


**GERARDI VAN
SWIETEN MED. DOCT.
COMMENTARIA IN
HERMANNI
BOERHAAVE...**

Gerhard : van Swieten





12

3

d

1-3

GERARDI VAN SWIETEN

M B D. D O C T.

COMMENTARIA

I N

HERMANNI BOERHAAVE

APHORISMOS

D E

COGNOSCENDIS ET CURANDIS

M O R B I S.


GERARDI VAN SWIETEN
M E D. D O C T.
COMMENTARIA
IN
HERMANNI BOERHAAVE
APHORISMOS
DE
COGNOSCENDIS ET CURANDIS
M O R B I S.
T O M U S P R I M U S.



P A R I S I I S,
Apud GULIELMUM CAVELIER, Patrem, viâ Jacobea,
sub Signo Liliâ Aurei.

M. D C C. X L V I. *HHH*
CUM APPROBATIONE ET PRIVILEGIO REGIS.

Prostat LUGDUNI: apud Fratres DE TOURNES.



P R Æ F A T I O.

DUM acerbum MAGNI BOERHAAVII
funus Academia, Civitas, Respublica,
imo per orbem terrarum lugerent om-
nes boni, videbar & mihi non mini-
mam justî mœroris causam habere, cum irrepa-
rabile damnum fecissem, & perdidissem oracu-
lum, quod in rebus dubiis semper consulere li-
cuit. Summa enim ingenii perspicacia, & longæ-
vo artis usu, in difficillimis etiam atque intrica-
tissimis Morbis latentes causas detegere nove-
rat, atque uno sæpe vel altero verbulo his tene-
bris lucem affundere. Dum vero in curandis
ægris felix successus meis aliquando respondebat
votis, agnovi ilico, me omnia debere optimo
Magistro, qui cespitantem in gravioribus mor-
bis curandis prudenti consilio toties firmaverat,
blande correxerat devium quandoque, neque
unquam repulerat interpellantem, licet forte sæ-
pius, discendi aviditate, importunum. Probe enim

P R Æ F A T I O.

memini, & gratus recordor, me nunquam accessisse hoc oraculum, quin redierim doctior.

Omnia hæc impulerunt me, alia quamvis dudum meditantem, ut, sepositis omnibus, primos labores MAGNI PRÆCEPTORIS scriptis illustrandis impenderem. Placuit imprimis hoc propositum, quia & gratum sic testari animum, & tanti Viri vestigia premere possem, dum & forte sic prodessem illis, qui salutarem artem addiscere cupiunt.

Institutionum Medicarum explicationem sublimioribus ingeniis relinquens, commentandis *Aphorismis de cognoscendis, & curandis Morbis* me accinxi: quibus autem copiis instructus aggredi hoc ausus fuerim, paucis dicam.

Rara certe felicitate mihi contigit, forte unico, viginti fere annorum ipatio MAGNI BOERHAAVII institutionibus frui, tam publicis, quam privatis: nec defuit occasio consulendi Magistrum, si quid minus recte percepissem. Cum interim angusto anni Academici curriculo hos Aphorismos explicaret suis discipulis Auctor, atque prima horum elementa sedulo inculcaret, imo & eadem repetere cogeretur, ut tardioris

P R Æ F A T I O.

etiam ingenii auditoribus prodesset, sæpe contigit, ut circa finem harum exercitationum domesticarum, invitus quamvis, festinare deberet. Quot autem & quam utilium rerum jacturam patiebantur auditores, dum tempus dicentem deficeret, noverunt illi, qui interfuerunt mecum publicis prælectionibus, quas *De calculo, Venerea Lue, Nervis & Nervorum Morbis, & De Corde* habuit BOERHAAVIUS. Plurima enim, quæ in privatis cursim tantum, ob temporis angustiam, delibaverat, latius deduxit in publicis. Omnia autem & hæc, quatenus explicandis his Aphorismis inservire poterant, in Commentariis his invenientur.

Præter hæc cuncta, quæ ex optimis Auctoribus, & imprimis ex antiquorum Medicorum monumentis, in proprios usus collegeram, addidi: patebitque, credo, quam pulchre BOERHAAVII dogmata *Hippocratis & Galeni* placitis, tot sæculorum consensu probatis, consonent. Simul hic contuli illa, quæ attenta harum rerum meditatio suggessit, vel aliquis jam in arte salutari usus me docuit.

Adhibui autem *Hippocratis & Galeni Opera à*

P R Æ F A T I O.

Renato Charterio edita, in citationibus tamen notavi libros & capita, ut minori cum difficultate loca allegata etiam in aliis editionibus inveniri possent. Ultimo vero tomo horum Commentariorum addam Catalogum auctorum & editionum, ex quibus collegi illa, quæ illustrandis aut confirmandis his Aphorismis convenire credidi. Subjungam & finito operi locupletem indicem.

Ut vero gratum animum publice testarer.

I M.

IMMORTALI MEMORIÆ .
MAGNI BOERHAAVII

H Æ C
COMMENTARIA
S A C R A

V O L U I

Lugduni Batavorum.

17¹/₄2.

G. VAN SWIETEN.

*

INDEX CAPITUM

H U J U S T O M I.

<i>Prolegomena.</i>	1
<i>Morbi fibra solida simplicis.</i>	18
——— <i>debilis & laxa.</i>	21
——— <i>rigida & Elastica.</i>	38
——— <i>Vasorum minimorum & majorum.</i>	44
——— <i>Viscerum debiliū & laxorum.</i>	47
——— <i>serium & rigidorum.</i>	57
<i>De simplicissimis humorum vitiiis & spontaneis.</i>	71
<i>Morbi spontanei ex acido humore.</i>	73
——— <i>a glutinoso spontaneo</i>	86
——— <i>ex alcalino spontaneo.</i>	101
<i>De morbis oriundis ab excessu motus circulatorii solo.</i>	120
<i>De morbis, ex defectu circulationis, & plethora.</i>	136
<i>Morbi compositi simplicissimi obstructio & vulnus. Obstructio</i>	143
<i>De vulnere in genere.</i>	196
<i>Hæmorrhagia.</i>	312
<i>Dolor.</i>	322
<i>Convulsio. &c.</i>	338
<i>Vulnera Capitis.</i>	353
——— <i>Thoracis.</i>	445
——— <i>Abdominis.</i>	467
<i>Contusa.</i>	487
<i>Ossa fracta.</i>	506
——— <i>luxata.</i>	545
<i>Inflammatiō.</i>	572
<i>Abscessus.</i>	635
<i>Fistula.</i>	658
<i>Gangrena.</i>	674
<i>Sphacelus.</i>	736
<i>De Combustione.</i>	766
<i>Scirrhus.</i>	777
<i>Cancer.</i>	804
<i>De morbis Ossium.</i>	835

APPROBATIO.

Amplissimi Gallix Cancellarii jussu, accuratè perlecta *Hermani Boerhaave Opera omnia, cum Notis Alberti Haller, & Commentariis Gerardi Van-Swieten, Medicina Doctorum*, digna judico, quæ typis nostratibus committantur, Parisiis Junii die xi. anni 1744.

BRUHIER.

PRIVILEGE DU ROY.

LOUIS PAR LA GRACE DE DIEU, ROI DE FRANCE & DE NAVARRE; A nos amés & feaux Conseillers, les Gens tenans nos Cours de Parlement, Maîtres des Requêtes ordinaires, de notre Hôtel, Grand-Conseil, Prévôt de Paris, Baillifs, Sénéchaux, leurs Lieutenans Civils, & autres nos Justiciers qu'il appartiendra, Salut. Notre bien amé GUILLAUME CAVELIER, Pere, Libraire à Paris, ancien Adjoint de sa Communauté, Nous a fait exposer qu'il désireroit faire imprimer & donner au Public un Ouvrage qui a pour titre: *Hermani Boerhaave Opera omnia, cum Notis Alberti Haller, & Commentariis Gerardi Van-Swieten*, s'il Nous plaisoit de lui accorder nos Lettres de Privilège pour ce nécessaires; A ces Causes, voulant favorablement traiter l'Exposant, Nous lui avons permis & permettons par ces Présentes, de faire imprimer ledit Ouvrage, en un ou plusieurs Volumes & autant de fois que bon lui semblera, & de les vendre, faire vendre & débiter par tout notre Royaume pendant le temps de Douze années consécutives, à compter du jour de la date desdites Présentes: Faisons défenses à toutes personnes de quelque qualité & condition qu'elles soient, d'en introduire d'impression étrangere dans aucun lieu de notre obéissance; Comme aussi à tous Libraires, Imprimeurs, & autres, d'imprimer, faire imprimer, vendre, faire vendre, débiter, ni contrefaire ledit Ouvrage, ni d'en faire aucun extrait, sous quelque prétexte que ce soit d'augmentation, correction, changemens ou autres, sans la permission expresse & par écrit dudit Exposant, ou de ceux qui auront droit de lui, à peine de confiscation des Exemplaires contrefaits, & de trois mille livres d'amende contre chacun des contrevenans, dont un tiers à Nous, un tiers à l'Hôtel-Dieu de Paris, & l'autre tiers audit Exposant, ou à celui qui aura droit de lui, & de tous dépens, dommages & intérêts; à la charge que cesdites Présentes seront enregistrées tout au long sur le Registre de la Communauté des Libraires & Imprimeurs de Paris, dans trois mois de la date d'icelles; que l'impression dudit Ouvrage sera faite dans notre Royaume & non ailleurs, en bon papier & beaux caractères conformément à la feuille imprimée & attachée pour modèle, sous le contrescel desdites Présentes: Que l'Impétrant se conformera en tout aux Réglemens de la Librairie, & notamment à celui du 10. Avril 1725. & qu'avant de les exposer en vente, le Manuscrit qui aura servi de Copie à l'impression dudit Ouvrage, sera remis dans le même état où l'Approbation y aura été donnée, ès mains de notre très-cher & féal Chevalier le Sieur Daguesseau Chancelier de France, Commandeur de nos ordres; & qu'il en sera ensuite remis deux Exemplaires dans notre Bibliothèque publique, un dans celle de notre Château du Louvre, & un dans celle de notre très-cher & féal Chevalier le Sieur Daguesseau Chancelier de France; le tout à peine

de nullité desdites Présentes, du contenu desquelles vous mandons & enjoignons de faire jouir ledit Exposé ou ses ayans cause, pleinement & paisiblement, sans souffrir qu'il leur soit fait aucun trouble ou empêchemens. Voulons que la Copie desdites Présentes qui sera imprimée tout au long au commencement ou à la fin dudit Ouvrage, soit tenue pour dûment signifiée; & qu'aux Copies collationnées par l'un de nos amés féaux Conseillers & Secrétaires, foi soit ajoutée comme à l'Original. Commandons au premier notre Huissier ou Sergent sur ce requis, de faire pour l'exécution d'icelles tous actes requis & nécessaires, sans demander autre permission, & nonobstant clameur de Haro, Charte Normande, & Lettres à ce contraires. Car tel est notre plaisir. Donné à Paris le vingt-sixième jour du mois de Juin, l'an de grace mil sept cent quarante-quatre, & de notre Règne le vingt-neuvième. Par le Roy en son Conseil.

SAINSON.

Registré sur le Registre XI. de la Chambre Royale des Libraires & Imprimeurs de Paris, N^o. 329. fol. 277. conformément aux anciens Réglemens confirmés par celui du 28. Février 1723. A Paris ce 12. Juin 1744.

Signé, SAUGRAIN, Syndic.

COM-



COMMENTARIA
IN
HERMANNI BOERHAAVE
APHORISMOS
DE
COGNOSCENDIS ET CURANDIS
MORBIS.

~~~~~  
PROLEGOMENA.

§. I.



**OMNIS** humani corporis conditio, quæ actiones vitales, naturales, vel & animales, lædit, Morbus vocatur.

Absoluta hic traditur Morbi definitio, necessario præmittenda, antequam aliquid certi de morborum cura dici possit. Ubi vident à sanitate deflectere corpus, morbum adesse dicunt omnes: sed pulchre notavit Galenus (a) sanitatem habere latitudinem quandam, non enim absoluta ipsa est, nec indivisibilis simul, quæ est & dicitur sanitas,

(a) De Sanitate tuenda Lib. I. Cap. 5. Charter. Tom. VI. pag. 45.

A

*verum etiam qua ab hac deficit, modo adhuc usibus nostris non sit inepta.*

Perfekte sanum invenire forte arduum foret, in quo nempe nec in solidis, nec in fluidis, nec in motu fluidorum per canales solidos, deficeret nihil: externi enim nos ambientis aëris vicissitudine, animi affectibus, alimentis, vel tenacioris indolis, vel parum largiori copia ingestis, &c. sic mutamur quotidie, ut non nisi laxiori sub significatione sani possimus dici: hinc videtur hoc sensu Galenus (a) sanitatem definivisse: *perfekte sanus nemo dici potest; sed sani dicuntur, qui nulla corporis parte dolent, & ad vitæ munera haudquaquam sunt impediti.*

Sanitas vero læsa morbus est; sed ut in morbis indagandis haberent ordinem, sani corporis actiones ad tria genera redegerunt Medici, nempe vocaverunt VITALES, NATURALES, ANIMALES. VITALES ACTIONES dicuntur, quibus præsentibus vita adest, quibus absentibus vita abest. Certe possunt in corpore manere solida & fluida dotibus & copia eadem, & abesse vita; sic dum homo aquis submergitur, nihil perit, nihil accedit corpori, sed solus motus deest, hunc si resuscitare potes, redit vita.

In syncopem perfectam delapsus homo mortis imaginem quam bene exhibet! aspersa frigida contractæ venæ suum sanguinem versus cor derivant, hoc sic irritatum contrahitur, reviviscit mox.

Vita perfecta est sanitas, vita penitus abolita, mors; vita læsa morbus.

Post cognitum sanguinis circulum, demonstratum est, quod vita omnium minima adhuc consistat in actione cordis contracti & aperti, sed ut hæc fiant, debet superesse motus muscularis cordis sanguinis venosi influxus in cava cordis, sanguinis arteriosi ex cavis cordis expulso.

Ad actionem autem musculosam cordis requiritur cerebelli & nervorum inde ad cor tendentium libera actio, & sanguinis arteriosi per coronarias arterias impulsus.

Ut autem sanguis venosus in cor fluat, requiritur, ut sanguis saltem in quasdam venas adhuc redeat.

Sed in homine nato, ut sanguis ex dextro cordis ventriculo in sinistrum possit transire, requiritur liberum per pulmones iter.

Veteres dixerant, actionem vitalem esse duplicem, pulsum nempe & respirationem: sed actiones vitales videntur esse omnes illæ conditiones, sine quibus vita non potest esse; pulsus autem & respiratio sunt signa externa vitæ.

Hinc morbi vitales sunt omnes illi, qui lædunt influxum venosi sanguinis in cava cordis, & expulsionem sanguinis arteriosi ex cavis cordis; omnia enim mortium genera investigata hoc docuerunt.

An non apparet ex his veritas dicti Hippocratici in ipso principio libri de locis in homine: (b) *Principium corporis mihi quidem nullum esse videtur, sed partes omnes peraque principium, omnesque finis. Descripto namque circulo principium non invenitur.*

Certe ad cordis actionem requiritur actio cerebelli per nervos in cor, sed ut cerebellum agat, & spiritus secernat, & secretos moveat per nervos, requiritur actio cordis pellentis sanguinem per arterias cerebelli: idem de reliquis verum est.

Sic autem agit cor, quatenus communes causas sui motus cum aliis musculis habet, sed adest in corde mira proprietas, qua sine his omnibus motum suum satis diu continuare potest.

(a) De Sanitate tuenda Lib. VI. cap. 5. Charter. Tom. VI. pag. 170. & de Morb. differentiis | cap. 1. Charter. Tom. VII. pag. 1.

(b) Charter. Tom. VII. pag. 157.



Hinc in corde latere vitale principium crediderunt Veteres ; cordi innatum esse motum dixit Galenus ( *a* ).

Nec hoc absurdum videbitur cogitanti, quod cor , licet communibus motus muscularis causis per arterias & nervos allatis instructum sit , tamen præter hæc omnia in se ipso recondat vim excitandi motus , quæ ex cognita partium fabrica deduci minime potest.

Cor enim rescissum à suis vasis omnibus motum suum continuat , & satis diu quidem : sic cor anguillæ de corpore exemptum pulsare perrexit , imo sub recipiente positum , exhausto aëre , perrexit pulsare per horæ spatium ( *b* ) ; cor pectunculi piscis excissum , transversum in duas partes dissectum , compressu à sanguine purgatum , linteo ab utraque parte deterium , per spatium temporis notabile motum suum retinuit. ( *c* ).

Ex similibus experimentis concluderat Galenus , ( *d* ) cor non indigere nervis ad suam functionem exercendam &c. illos maxime errare , qui cor musculus esse censent &c. sed esse nativi veluti caloris quendam fontem.

Plurima talia de animalium cordibus recenseri possent experimenta , sed & constitit , idem obtinere in ipso corde humano : Verulamius ( *e* ) dicit , se vidisse hominis cor , qui evisceratus erat ( supplicii genere apud nos versus proditores recepto ) quod in ignem de more injectum saltabat in altum primo ad sesquipedem , dein gradatim ad minus , durante spatio ( ut meminimus ) 7 vel 8 minutorum.

NATURALES sunt omnes illæ actiones , quæ faciunt , ut corpus impleatur talibus , qualia amisit ; ut tot & talia apponantur , quot & qualia defecerunt. Vita enim se ipsam destruit , per ipsius vitæ actiones deterimur quotidie , & nisi ex ingestis reficeremur , brevi deficeremus. Galenus ( *f* ) verissime dixit : quod à singulis partibus desinit , tale est , qualis ipsa pars. Nihil autem eorum quæ edimus aut bibimus , tale prorsus est , hinc necesse habuit natura prius immutare ( παρασκευάσαι ) & concoquere illa , & alendo corpori similia prius preparare ( προπαρασκευάζειν ).

Ingesta ergo non sufficiunt ad hanc rem alimenta , sed requiritur creati corporis perfectissima Machina , ut ex illis fiat nutrimentum.

Paucis multa comprehendere solitus Hippocrates dixit , ( *g* ) alit concoctum.

Hinc in Aphorismis ( *h* ) monuit : à morbo bene comedenti nihil proficere corpus malum : designat enim deficere vires coquentes , id est , deficere naturam ipsam.

Natura ( φύσις ) antiquum illud Hippocratis vocabulum , à multis tam male explicatum , quid designat ? Nihil aliud , nisi aggregatum omnium conditionum physicarum , quæ requiruntur , ut vita sit constantissima , durabilissima , & simul agilissima mobilitas , sed hoc est perfecta sanitas : si aliquid deest , est natura deficiens , & ille defectus morbus est.

Non ergo summo Numini injuriam faciunt Medici , dum naturæ tam multa tribuunt ; per hanc enim intelligunt creati corporis fabricam.

( *a* ) Adversus Lycum cap. 2. Charter. Tom. IX. pag. 359.

( *b* ) Boyle nova Experimenta Pneumatica de Respiratione pag. 18.

( *c* ) Boyle de Utilitate Philosoph. Experim. exerc. 1. pag. 112. &c.

( *d* ) De anatom. administrat. Lib. VII. cap. 2.

Charter. Tom. IV. pag. 155.

( *e* ) Historia vitæ & mortis pag. 559.

( *f* ) Comment II. in Lib. de alimento Hippocratis. Charter. Tom. VI. pag. 245.

( *g* ) De alimento Charter. Tom. VI. p. 245.

( *h* ) 31. Sect. II. Charter. Tom. IX. pag. 73.

Optime ergo dixerat Helmontius ( \* ) *Naturam esse jussum Dei , quæ res est id quod est , & agit , quod agere jussa est.*

De hac dixit Hippocrates (a) *natura omnia omnibus sufficit* (b). (*ἡ φύσις πάντων ἰσχύει*) morborum natura medica & invenit natura sibi ipsi vias, non ex intellectu (*οὐκ ἐκ διανοίας*) à nullo edocta natura & citra disciplinam omnia , quæ conveniunt , efficit : & ad hunc locum Hippocratis videtur allusisse Galenus (c) dum scribit (*οὐδὲν γὰρ ζῷον ἐδιδάκτατο*) *natura enim animalium à nullo docta sunt , dicit Hippocrates.* Et hanc rem pluribus confirmat exemplis : Vitulus enim inermi adhuc fronte ferit , hinnulus molli adhuc ungula calcitrat &c.

Ingestorum ergo manducatio , deglutitio , digestio in ventriculo & intestinis , chyli secretio , distributio , excrementorum secretio &c. ad actiones naturales reducuntur , quia per hæc omnia cibi & potus in nostram convertuntur naturam.

ANIMALES vocaverunt omnes mutationes corporis humani viventis , quæ mentem in suis cogitationibus mutant , vel à mente cogitante mutantur.

Omnes ergo hæ actiones cogitationem supponunt.

Illud , quod cogitat , dicitur mens , cogitare enim est primum , quod scitur de mente : an hoc cogitare est ipsa mens ? certe maneant omnia , prout nunc sunt , si non cogitas , omnia nihil erunt respectu tui , & de mente nil aliud scimus.

Quædam ex illis actionibus fiunt , dum novæ oriuntur in mente cogitationes mutato prius organo corporeo , & fere tantum in sua superficie , sive hoc fiat à causa externa , sive à causa interna ; sic mens videt objecta , dum bonus est oculus , sed & in morbis sæpe credunt ægri se videre objecta externa , quæ non adsunt , mutato organo corporeo per causas internas , & non per objecta externa.

Aliæ actiones animales fiunt , dum mens prius mutata in sua cogitatione corpus mutat , excitando motus musculares : v. g. dum quis vult brachium elevare , mox elevatum est ; est enim in homine illa proprietas , ut pro voluntatis arbitrio possit motum excitare , sustinere , dirigere , mutare , sistere , renovare.

Maxime mirum est , quod cum motus sic excitati sint adeo sensibiles , adeo mutantes vi mechanica alia corpora , tamen in sua origine vix videantur corporei , nulla appareat horum causa ; id est , nulla mutatio physica in corpore præter rem mutatam , nec , suppresso per voluntatem motu , maneat ullum vestigium.

Et hæc omnia fiunt sine cognitione causæ , nam peritissimus Anatomicus non melius hæc perficiet , quam idiota : profundæ certe speculationis argumentum.

Reliquæ actiones animales ad sensus internos dictos solent referri , memoriam nempe , imaginationem , animi affectus , attentionem &c.

Potest enim mens nostra sine ullo sensuum externorum adminiculo cogitare ratione intimi fontis sui , & quasi in proprio fundo contemplari.

Sic sæpe memores sumus , nos habuisse aliquam ideam , quam non possumus nunc nobis præsentem reddere : quærit in suo intimo thesauro hoc principium cogitans , quid hoc sit , & nescit , quid quærat , distinguit tamen ab omnibus aliis , quæ tunc cogitat.

Possunt tamen & intima illæ cogitationes mutari corpore mutato , imo & deleri integre : quoties enim non videmus , sapientissimis viris imaginationem depravari ,

( \* ) pag. 38.

( a ) 6. Epidem. Charter. Tom. IX. pag. 509.  
& 513.

( b ) De alimento. Charter. Tom. IX. p. 264.

( c ) De usu Partium Lib. I. cap. 3. Charteri Tom. IV. pag. 286.

memoriam aboleri &c. dum atra bilis gravat præcordia.

• Et licet dixerit Hippocrates ( *a* ) *qui aliqua parte corporis dolentes ut plurimum dolorem non sentiunt, illis mens laborat* ( *γνώμη νοεῖται* ) tamen ille corpus curabat, non mentem: dum enim Abderitarum precibus motus, ut Democritum, quem insanire credebant, curaret, Abderam versus tendere proposuit, salutes jubet Cratææ ut colligat herbas, ut hanc dementiam curat. \*

Medicina fere semper in corpus agit etiam in illis morbis, ubi nihil in corpore mutatum invenitur, sed tantum cogitationis apparet mutatio, in quadam mania specie hoc observatur, verbi gratia, ubi vel sagacissimi Medici nullum possunt culpæ in corpore vitium, tamen delirat homo ferociter & sine febre: in his casibus ab omni ævo dederunt talia, quæ incredibili vi fundendi & movendi omnia sic totum systema nervorum, vasorum, muscutorum movent, ut nullibi maneat eadem conditio, hac spe ut sic turbato toto corpore deleatur illa impressio latens in sensorio communi, unde oriebatur hoc malum.

Sic antiquissimus Melampus, diu ante bellum Trojanum vivens, furentes observaverat ab helleboro sanari capras, & felici successu insanientes regis filias curaverat, unde & Hippocrates Melampodium vocavit Helleborum.

§. 2. **Q**UÆ vero disciplinæ Medicæ pars docet Morbum in ipso ægroto præsentem detegere & curare, Praxis appellatur Medica. Sanitatem ægris Medicina promittit. *Cels. I.*

Ultimus scopus, ad quem universa artis medicæ cognitio collimat, est ægris sanitatem reddere; hinc merito dixit Celsus, ( *b* ) *ut alimenta sanis corporibus agricultura, sic sanitatem ægris Medicina promittit.* Praxis jam, *ἀπὸ τοῦ παύειν* dicta, est illa pars medicæ doctrinæ, quæ docet, quam ratione in homine vivente ægroto per certa signa physica debeat detegi, an præsens sit morbus, & qualis, in quo sit statu, an in initio, ascensu, statu, descensu, qua methodo & quibus auxiliis præsens jam cognitus morbus tolli possit.

Omnia autem hæc determinari debent in ægro decumbente, longe enim aliud quid est describere pleuritidem, quam ex artis regulis definire, quod homo decumbens laboret pleuritide, cum morbus ille, idem licet nomen servet, vario tamen tempore variam medelam requirat.

Medici nunc artem exercentes vocabantur Clinici apud Veteres, quia ægri ( *ἐν κλίνῃσι* ) in lectulis decumbebant.

§. 3. **Q**UI ergo actionum vitalium, naturalium, atque animalium exercendarum requisita ignorat, adeoque Vitæ causas nescit, & sanitatis, ille defectum illarum; id est, morbos, cognoscere non poterit.

Medico ergo morbum curaturo necesse est morbum nosse, sed morbus erat læsio functionis ad sanitatem requisitæ; qui ergo ignorat requisita ad functionem, quo-

( *a* ) Aphor. 6. Sect. 1. Charter. Tom. IX. pag. 47.

\* Si Hippocrati adscribendæ sint hæc epistolæ,

ut vulgo fit.

( *b* ) pag. 1. in ipso initio Præfationis.

modo cognoscet, quid deficiat? merito dixerat Galenus, (a) *cujusque morbi tanta magnitudo est, quantum à naturali statu recedit, quantum vero recedat, is solus novit, qui naturalem habitum ad amissum tenuerit.*

Cæcitas, v. g. morbi nomen est, designans abolitum visum, sed potest ille morbus ortum ducere à concretionem palpebrarum, obscuracione corneæ post inflammationes validas, cicatrices relictas &c. potest humor aqueus turbidus factus, humor crystallinus opacus redditus visum tollere, potest nervus opticus in retinam expansus insensibilis fieri; potest idem nervus in toto suo decursu à cerebri ventriculis ad oculum usque comprimi à variis tumoribus, exostosi &c. potest in ipsis cerebri ventriculis hæreere origo mali &c.

Qui jam per cognitam organi fabricam non novit ex tot possibilibus causam nunc præsentem distinguere, quomodo idonea poterit adhibere auxilia?

Dum in febre ardenti, sanguine fere omni immeabili hærente in arteriis distentis fiebat cæcitas perfecta, frustra fovebantur collyriis oculi, qui puri & limpidi manebant: peritus Medicus omnem spem ponebat in salubri & larga superveniente hæmorrhagia narium, depletis sic vasis, resoluta sic spisso inflammatorio, redibat integer oculorum usus.

Objici posset Hippocratis in arte peritia, tot sæculorum consensu probata, qui orbatus illis inventis pulcherrimis, quibus hodiernum gaudet sæculum, ex sola observatione phenomenon in morbis artem salutarem adeo promovit.

Sed certe magnus Hippocrates, si novisset recentiorum inventa, major fuisset.

Unde ergo post tot detecta nova non accessit major arti medicæ firmitas? ratio videtur hæc esse.

Multa detexit, circa corporis fabricam, recentiorum industria; plura tamen latent & latebunt forte diu: novis his superbientes Medici ad hypotheses condendas nimis proni, ex paucis numero particularibus universales fecerunt in praxi regulas; quæ occurrebant in morbis, minus faventia præconceptæ hypothese, neglexerunt penitus, vel vi detorserunt sic, ut favere viderentur.

Sic artem, quam longam sapiens pronunciaverat antiquitas, voluerunt facere brevem.

Jam dudum hæc prurigo generalia condendi & pauca axiomata invaluit. Methodici satis esse credebant, quædam communia morborum intueri, & quidem horum tria genera esse, unum adstrictum, alterum fluens, tertium mixtum. (b)

Qui ergo castis veterum observationibus jungunt recentiorum inventa, videntur habere optima Medicinæ fundamenta.

§. 4. **S**ANATIO porro est morbi (1) in sanitatem (2) mutatio: ponit ergo & hæc eadem cognita (3): quare cognitio & curatio morborum Scientiam Dogmatum, quæ explicant quæ Vita, Sanitasque sit hominis, id est, Instituta Physiologica Medica, requirunt.

Prior pars practicæ disciplinæ versabatur circa morborum cognitionem, altera docet, quomodo morbus cognitus curetur.

(a) De Methodo Med. ad Glaucon. Lib. I. |  
cap. 1. Charter. Tom. X. pag. 345.

(b) Celsus in Præfatione. Lib. I. pag. 15.

Sed Sanatio ipsa requirit omnia eadem cognita; est enim Sanatio mutatio corporis viventis talis, ut conditio corporea, quæ vocabatur morbus, tollatur, & restituatur illud, quod ablatum faciebat morbum. In Exemplo res patebit evidenter.

Paronychia illa species, in qua sine ullo fere tumore acutissimus dolor ultimam digitorum phalangem occupat, & vel in corpore sanissimo validissima incenditur febris, syncope, phrenitis, convulsiones & ante tertium diem mors sæpe fit, totam suam malignitatem peculiari structuræ hujus partis debet: tendinibus enim flexantibus duas phalanges extremas digitorum circumponitur ligamentum forte cohercens, ad cartilaginis fere firmitatem accedens, Galeno jam descriptum (a) sub hoc tenacissimo scuto si fiat inflammatio, sive ligamenti, membranæ cellulosa, periostræ, vel tendinum vitio hoc fiat, non multum refert, oriuntur omnia illa horrenda symptomata, quia sub duro hoc regimine cedere non potenti locus inflammatus hæret; in tempore vocatus Medicus fabricæ peritus jubet audacter scalpello discindi a parte laterali digiti omnia incumbentia ad os usque, sic mutat singularem hujus partis structuram in conditionem communem toti corpori, dolor sedatur statim, & molliissimis applicatis cedit adeo minax malum.

Possset hujus asserti veritas pluribus demonstrari, hoc pro exemplo sufficiat.

§. 5. **I**LLA mutatio (4) motum excitat, sopit, vel dirigit, per applicationem instrumentorum, quæ Artifex nosse debet, & regere: hinc ponitur perspecta victus, medicamentorum, & Chirurgiæ, materia, præparatio, usus.

Omnis sanatio requirit vitam superstitem, quam motus humorum vitalium per vasa comitatur, per hunc motum actiosa fiunt applicata remedia, quæ in cadaver nihil agunt: hunc motum, ubi languet in multis morbis chronicis, excitamus, dum furibundo impetu corpus destrueret in morbis acutissimis, sopimus prudenter, dum nimio impetu ruit in quasdam partes, revellendo versus alias partes dirigimus.

Dum languet alba pituita gravatum corpus, debilem vitam acribus excitamus stimulis, dum acuta phrenitide correptus homo furit, debilitamus vitam sanguinis missione, & per balnea, fomenta, cucurbitas & similia impetum omnem, quantum fieri potest, à capite avertimus.

Sed omnia hæc perficiuntur per quædam instrumenta, quæ applicata corpori ægrotanti illud sic mutant, ut fiat sanitas; hæc autem instrumenta vocantur medicamenta.

Dixit de his Hippocrates (b) *omnia medicamenta sunt, quæ præsentem statum (το παρὲν) dimovent, vehementiora autem omnia immutant &c. ægrotanti vero omnia è præsentī statu dimovere conducit.*

Hæc autem instrumenta corpori humano applicantur per victum, medicamenta, & Chirurgiam.

Primis Medicinæ temporibus horum omnium cura uni incumberebat Medico.

Sed circa Herophili & Erasistrati tempora Medicina in tres partes diducta est: ut

(a) Galen. Admin. Anatom. Lib. I. cap. 5. Charter. Tom. IV. pag. 36.

(b) De locis in homine cap. 16. Charter. Tom. VII. pag. 375.



una esset, quæ victu, altera, quæ medicamentis, tertia, quæ manu mederetur. (a)

Turpe penitus videtur artificis propriæ artis instrumenta ignorare, & licet Medicus optime perspexerit, quid in corpore mutandum sit, ut fiat sanitas, si non noverit illa auxilia, quibus hæc mutatio perfici debet, prodesse non poterit.

Nec perfunctorie didicisse Pharmacorum nomina sufficit, nili enim quis horum indolem & attributa noverit, ineptis formulis se ludibrio exponet, ægrisque suis nocebit sæpius.

Quantum enim mutant variæ præparationes medicamentorum indolem! Scammonei Syriaci lacrymâ, ingesta corpori humano, in putridam aquam solvit humores, solutos per alvum evacuat, dum vero sulphuris accensi vapori exponitur, ut fiat diagridium dictum sulphuratum, iners fere redditur.

Rhabbari radix fervidæ infusa aquæ innoxium dat purgans omni ætati & sexui, decocta diu & fragrantiam & vires amittit.

Sed & varius usus nosci debet. Jalappæ resina assumpta tenacitate sua ventriculi plicis & intestinorum adhærens hypercatharsin induxit sæpius, cum sacchari paulillo trita, vel vitello ovi fracta tenacitate illa resinosa, datur tutius longe.

Tithymali acerrimum succum ficibus instillabat Hippocrates, ne in transitu gulam læderet. (b)

Innumera similia adduci possent, ut demonstretur, quam necessaria sit Materiæ Medicæ cognitio.

§. 6. **D**IRIGITUR illa applicatio (5) à mente præscia futuri effectus, quo exigitur Scientia generalis legum, juxta quas actiones illæ exercentur; unde itaque doctrina Signorum, & Methodi Medendi, necessaria est. Adeoque tradituro Praxin (2) omnes partes Institutionum Medicarum scitu necessariæ prius sunt: Eas ideo ponemus notas, & demonstratas alibi.

In dirigendis his instrumentis, ut fiat talis mutatio, quam ars requirebat, ut restitueretur sanitas, summa hæret difficultas.

Omnia enim medicamenta corpori viventi applicantur, per vitam actiuosa fiunt, & sæpe in variis hominibus diversos, imo oppositos, producant effectus, ratione peculiaris idiosyncrasia; sed hoc nunquam à priori determinari potest, per sola experimenta cognoscitur.

Sed & idem remedium aliter afficit sanum hominem, quam ægrotantem: post æstivos calores summos incensa bilis, levi stimulo purgante incitata, quam enormes facit sæpe dejectiones: sextupla dosis data hydropico languenti fecit nihil: maniacæ furentissimæ, à paucis granis scammoniei ante hunc morbum in syncopen usque mobili, data quinque grana mercurii vitæ fecerunt nihil.

Dum in chronicis morbis, tabefactis fere & friabilibus redditis visceribus, vomitorium propinatur vel ex mitissima ypecacuanha, quantum imminet periculum!

Omnia hæc attendere debet prudens Medicus, nam exhibitum medicamentum

(a) Cels. Præfatio pag. 3.

(b) De victu acur. Charter. Tom. XI p. 183.  
extra

extra ejus potestatem est. Monuerat Galenus (a) *sive purgans dederis, sive vomitorium &c. prima exhibitio in tua potestate est, reliqua sibi fortuna vindicat.*

Sed & in morbis toties natura modis incognitis nititur expellere latens morbum, sive morbi causa fuerit, sive effectus: qui tunc imprudenti consilio remediis oppositis turbat inceptum naturæ opus, nocebit semper.

Hinc doctrina signorum & methodi medendi omnino necessaria, hinc adeo operosus in enarrandis signis Hippocrates.

Unde merito concluditur, institutionum medicarum omnes partes requiri cognitæ, antequam praxi addiscendæ quis se accingat.

Idem conclusit Galenus (b) dicens. *At non propter se cetera omnia ad artem spectantia, aut discimus, aut docemus, aut denique auscultamus, sed quod eorum unumquodque sit ad finem utile.*

§. 7. **M**ORBUS (1), cum corpori inhæreat, erit effectus corporeus singularis determinatæ causæ.

Ex ante dictis in §. 1. patuit, ab omni ævo Medicos corpus curasse etiam in illis morbis, ubi solæ mentis functiones videbantur læsæ: morbum quidem & morbi causam corpori inhære, quando in corpore sensibilem mutationem percipiebant, dubitaverunt numquam, sed multis vitum fuit magnum paradoxum, idem affirmare de illis morbis, in quibus sola cogitatio læsa apparebat.

Sed videtur illud in nobis principium cogitans, quatenus sibi conscius est, esse immutabile, esse simplex, idem semper & ubique; de quacumque enim re cogito, scio me cogitare, præterea novi, de qua re cogitem, sed cum omni momento cogitem alia, ergo in me cogitante manet aliquod semper idem, dum infinita varietas est, quæ me cogitantem afficit.

Hoc autem cogitans principium ex adorandi Creatoris voluntate sic unitum est corpori, ut mutato corpore mutantur cogitationes, & vicissim mutata cogitatione mutari possit corpus.

Totum ergo, quod Medicina potest, est, ut mutato corpore læsam mentis corpori unitæ actionem emendet. Sæpe autem leve vitium corporis totam mentem turbat. Sic observaverunt, fatuos à nativitate semper fere habere capitis vitiatam figuram: Sic uncia sanguinis effusi sub olla cranii totam humanitatem delet: (c) puer octennis magnis caloribus æris perdebat memoriam fere omnium quæ didicerat, per duos vel tres dies frigidiuscula tempestas reddebat perditam, calore redeunte eadem redibat calamitas. Innumera alia hanc rem evincunt observata.

In corporis ergo mutatione morbos considerat Medicus.

§. 8. **C**UJUS accurata ablatio sanat.

Cum ergo sollicita indagatione invenerit Medicus, quid in functionibus à sanita te deviet, & à qua causa facta fuerit illa corporis mutatio, quæ morbus dicitur, omni

(a) Galen. de venæ sectione adversus Erasistratum cap. 7. Charter. Tom. X. pag. 401.

ci. Charter. Tom. XII. pag. 3.

(b) Comment. in Hippocr. de officina Medici.

(c) Histoire de l'Académie des Sciences 1705.

pag. 73.

artis molimine cognito nititur, ut hanc causam tollat: generale enim habetur axioma, sublata causa tolli effectum.

Notandum hic quam maxime, fieri posse, ut ablata morbi causa, hinc & morbo ipso, maneant tamen in corpore per morbum prægressum mutatae functiones: v. g. homo laborat sæva quartana autumnali, repetitis paroxysmis sæpe sic debilitantur solida, sic dissolvuntur fluida, ut nascatur hydrops, datur cortex Peruvianus, sanatur febris, manet hydrops: non tamen inde concludi potest, quod sublata morbi causa non tollatur effectus: Cortex enim Peruvianus latentem febris causam sic domuit, ut febris, effectus hujus causæ, evanescat; sed per febrim mutatum sic fuerat corpus, ut hydropicum fieret, & sublata febre per corticem, causæ illæ manent, ex quibus hydrops ut effectus sequitur, debilitas nempe nimia in solidis, nimia dissolutio in liquidis.

§. 9. **A**UFERTUR correcto malo singulari, vel per remedium in illud solummodo agens; vel auxilio in omnia simul æqua vi agente. Hanc universalem, illam propriam, Medelam vocabimus.

Duplex modus est, quo tollimus morbos, vel enim directe in morbos agimus, non mutato reliquo corpore, vel totum corpus mutando inertem reddimus vel eliminamus morbum.

Quartana purgantibus, vomitoriis, sudoriferis, frustra tentata, imo per mediam salivationem (ut vidi) constanti typo pergens, tollitur Cortice Peruviano, qui cæteroquin corpus non observatur mutare, vocatur propria & specifica medela, quia dum febrim tollit, reliquum corpus non mutat. Opium deglutitum in ventriculo hærens doloris sensum tollit, nec turbat corpus. Forte plura talia latent ad alios morbos remedia, felices Medici, si novissent!

Calculus ex rene in pelvim, inde in ureterem delabitur, oritur intolerabilis dolor, spasmus abdominales, nausæ, vomitus &c. si specificum cognosceret Medicus remedium, quo solvere posset impactum calculum, sanaret statim: sed tali auxilio caremus hætenus. Fomentis, clysmatibus, venæ sectione, decoctis emollientissimis mutat totum corpus Medicus, ut laxatis & lubricatis viis expellat hostem; hæc vocatur generalis medela.

Hæc fere semper agit inducendo alium morbum: dum enim Lue Venerea laborantem hominem salivatione curat Medicus, facit per mensem & ultra ægrotare, ut à diro hoc morbo liberet.

Hic imitamur salutaria naturæ molimina, quæ turbato sæpe toto corpore morbosam causam eliminat.

Per asperæ arteriæ rimam micula panis illabatur, excitat natura per fideles custodes nervos tussim violentissimam, nec quiescit hæc, donec educatur.

Hinc ausus fuit concludere Sydenhamus (\*) *morbum, quantumlibet ejus causa humano corpori adversetur, nihil esse aliud, quam natura conamen materia morbifica ex-terminationem in agri salutem omni ope molientis.*

(\*) pag. 39.



§. 10. **U**TRAQUE (9.) reperitur observatione, similitudine, vel ratiocinio ex hisce binis.

Nullum est dubium, quin medicamenta & medendi methodus inventa sint per observata singularia; hæc enim videntur fuisse Medicinæ primordia, dum illa, quæ in seipsis vel aliis ægrotantibus viderant profuisse, suadebant iterum aliis, hac spe ut prodesse similitur.

Dumque videbant, morbum non omnino eundem, similem tamen morbo ante observato, affligere, ex similitudine concluderunt, eandem medelam esse adhibendam.

His binis contenta Empyricorum secta Medicinam absolvi posse contendebat: (a) dicebant enim, *diligentes homines hac notasse, qua plerumque melius responderent, dein ægrotantibus ea præcipere cœpisse: sic Medicinam ortam, subinde aliorum salute, aliorum interitu, perniciofa discernentem à salutaribus.*

Quod si morbus incidat ignotus (b) *Medicum protinus visurum, cui morbo id proximum sit, tentaturumque remedia similia illis, quæ vicino malo sæpe succurrerint, & per ejus similitudinem opem reperturum &c. latentium vero rerum conjecturas ad rem non pertinere, quia non interfit, quid morbum faciat, sed qui tollat.*

Deinde possunt ex his binis casto ratiocinio plurima in arte utilissima deduci, modo nihil admittatur incerti quoad observationes, nihil concludatur ex his, quod repugnet experimentis: pulchro certe monito post examinatas Empyricæ & Rationalis Medicorum sectæ disceptationes concludit Celsus (c) *rationalem quidem Medicinam esse debere, instrui vero ab evidentibus causis; obscuris omnibus, non à cogitatione artificis, sed ab arte ipsa rejectis.*

§. 11. **O**BSE RVATIO habetur: 1. ex accurata historia morbi, enarrante causas, naturam, effectusque mali. 2. Ex enumeratione exquisita eorum quæ profunt vel nocent, dum casu, vel arte, morbo subministrata sunt. 3. Ex introspectis cadaveribus incisis eorum, quorum morbi observati fuerant prius.

1. Dum homo incipit ægrotare, habet in corpore aliquid mutatum à sanitate, aliter non foret morbus; hanc mutationem corporis prius sani sensibus detegere possumus: procedente morbo magis & magis deflectit à sanitate, hinc novæ quotidie mutationes apparent, & quæ prius apparuerunt, augentur, perstant, minuuntur, vel & desinunt aliquando; omnia hæc accurate notata illo ordine, quo se mutuo sequuntur, dant historiam morbi. Sed jam morbus, ut effectus adæquatus, idem est cum sua causa completa sive proxima dicta, cujus præsentia morbum ponit, cujus absentia morbum tollit. Sed hæc causa proxima raro simplex est, semper fere composita ex aliis causis, quæ singulæ non sufficerent morbo producendo, quæ junctæ simul morbum faciunt. V. g. Pleuritidis causa proxima est sanguis inflammatoria similitudine peccans, adæctus in vasa angustiora, aucto simul per febrim motu; nulla ex his tribus causis sola pleuritidem facit, simul junctæ morbum hunc constituunt. Illæ

(a) Celsus præfat. Lib. I. pag. 9.

(b) Celsus ibid. pag. 10.

(c) Ibid. pag. 20.

jam causæ, quæ simul unitæ causam proximam constituunt, sunt vel prædisponentes (*πρὸςκαίται*) vel *παρατάξιται* dictæ, sive occasionales.

V. g. Homo valde plethoricus, calidissima æris tempestate validos motus musculares faciens, rupta in cerebro arteria fit apoplecticus, causa remota prædisponens erat in hoc homine plethora, causæ occasionales erant calor æris, & impetus sanguinis auctus per motus musculares; sed ille æris calor, & validi motus musculares non fecissent apoplexiam in hoc homine, nisi adeo fuisset plethoricus.

Pulchre hoc notavit Galenus (a) dicens *corpore nostro ad morbos quasi prapato, externum quoddam adveniens febrim accendit, quod ex se morbum vehementem minime generaret &c. & propter corporis dispositionem unumquodque horum non morbi causa sed occasio redditur; has causas vocaverunt πρὸςκαίται.*

Similia & Celsus habet (b) *nihil omnino ob unam causam fit, sed id pro causa apprehenditur, quod conulisse plurimum videtur; potest autem id, dum solum est, non movere, quod junctum aliis maxime movet.*

Qui jam accurata observatione sic causam proximam morbi detexit, intelligit morbi naturam.

Sed morbus, sic cognitus in suis causis, dum pergit, omni momento corpus plus mutat, functiones plus lædit, & novos quasi morbos facit, qui vocantur effectus morbi, vocantur & symptomata; sic enim vocantur omnia illa præternaturalia, quæ ex morbo, ut causa, in corpore ægroto fiunt ita, ut distingui tamen queant ab ipso morbo & ab ejus causa proxima.

V. g. Pleuriticus præ acerbitate doloris non audet inspirando pectus dilatare; hinc sanguis cordis dextri per pulmonem difficilius transiens incipit ibi accumulari, & facit Peripneumoniam, quæ tunc est novus morbus ex pleuritide ut causa natus.

2. Homo, qui ægrotat, vivit, vita semper actiosa est, ergo aliquid movet, agit, vel non agit, æger aliquid bibit vel comedit, vel non: post singula hæc fit aliquid boni, vel mali: Medicus jam observat omnia illa, quæ fiunt tempore morbi, notat nocentia & juvantia, illa prohibet, hæc jubet: hæc est illa doctrina de juvantibus & nocentibus tanti in praxi usus, hæc videtur arti Medicæ dedisse primam fere originem. *Vide Celsum. (c).*

CASU: Dum multa aliquando tentant ægri, fiunt sæpe mutationes improvisæ in morbis & maxime notabiles, quæ sæpe ansam dederunt pulchris in arte inventis. Galenus (d) *sæpe vidit, non paucos febre ardente laborantes, cum jam mediocriter concocti humores essent, statim ex frigida potione liberatos.*

Epilepsiam sanaverunt manantia capitis ulcera sponte enata, unde & artificialia profutura conclusit Tulpus. (e) Vidi in acuta continua febre pessime delirantem hominem mox resipuisse, dum incendium satis vicinam domum occupasse audiret.

VEL ARTE. Licet omnia ex artis regulis adhibuerit Medicus, tamen attenta mente debet spectare eventum, an profuerint, an non: Hippocrates hoc in multis locis sollicite inculcavit: sic certa dat signa, quibus distinguimus, an purgans datum profuerit nec ne, dicens (f) *si, qualia purgari decet, purgentur, tum confert, tum facile ferunt, si è contra, difficulter.* Ab illis enim, quæ nocere videmus, abstinendum jubet

(a) Comment. 4. in Hippocrat. de victu acut. Charter. Tom. XI. pag. 178.

(b) In Præfat. Lib. I. pag. 16.

(c.) In Præfat. pag. 9.

(d) Galenus Meth. Med. Lib. IX. cap. 162. Charter. Tom. X. pag. 220. 221.

(e) Observ. Medic. obs. 8.

(f) Aphor. 25. Sect. 1.

ratio : ut autem quid certi de nocentibus & juvantibus statuatur , requiritur attenta circumspectio ad morbi indolem, aliter sæpissime adscribetur remedio exhibitio, quod debebatur soli morbo ; v. g. dum in hemitritæ alternis diebus fit exacerbatio ex morbi natura , male tunc adscriberetur remediis exhibitis molestia ingravescentis circa hoc tempus morbi.

3: Utinam liceret sæpius defunctorum cadavera scrutari ! quam cauti essent in tractandis morbis Medici , si novissent , post mortem in cadavere se debere demonstrare , an bene an male de morbi indole judicassent : quod non detegerentur latentes morborum causæ. (a) Herophilus & Erasistratus nocentes homines inciderunt vivos , nec crudele putaverunt , paucorum nocentium suppliciis remedia populis innocentibus omnium sæculorum quæri : hodie fœdum , imo crudele , clamant multi , mortuorum lacerare cadavera , ut viventibus certior medicina fieret. Summa tamen cautela hic opus est : in cadavere enim invenitur tantum ille corporis status , in quo erat , dum morti proximum fuit , plurima inveniuntur per morbum mutata , quæ utpote effectus morbi male pro ejus causa venditantur : dum suppurata pleuritide mortui cadaver lustrans Medicus invenit in thoracis cavo ingentem copiam puris , quam male concluderet , pus illud fuisse morbi causam.

Infinita certe docuit prudens cadaverum inspectio , de quibus ne somniasent quidam Medici : quis credidisset per vomitum enormem posse œsophagum rumpi , lienem ingentis molis in pelvim posse prolabi elongatis valis nectentibus , in ipsa cordis semper moti substantia posse nasci calculos &c.

Dum visa in cadaveribus collegit in Sepulchreto Anatomico Bonetus , & ordine disposuit , latentibus morborum causis indagandis summam attulit lucem.

§ 12. **E**X similitudine concludit , qui observatis jam ( 11 ) , adeoque cognitis , casum præsentem , hætenus ignotum , comparans de indole & curatione mali incogniti argumentatur , à præteritis ad futura arguens.

In Exemplo res videbitur satis evidens. Vidit Medicus hominem febre acuta continua cum dolore lateris punctorio , inspirationem impediante , decumbentem , observavit , nec per sputa , nec venæ sectionem & alia auxilia levatum morbum , sed orta dyspnoea sensim aucta post diurnos languores extinctum hominem : notavit quæ profuerant , quæ nocuerant ; in cadavere invenit saccum ingentem pure plenum pulmone compresso suffocasse hominem. Postea invenit alium ægrotantem , in quo observat eadem phænomena , quæ in priori vidit in initio morbi , ex similitudine concludit similem & in hoc ægro eventum metuendum esse : quæ priori profuisse visa sunt , adhibet , & omni artis molimine funestum morbi eventum præcavere nititur : hoc vocatur ex similitudine , ex analogia , concludere.

Dum Epidemici novi morbi latentem rimabatur indolem Sydenhamus , sedulo observabat , quomodo in sanationem , mortem , vel alium morbum abiret , quænam adhiberet molimina sibi soli sufficiens natura , ut sanaret , hæc imitatus postea in simili casu ex analogia conclusit.

(a) Celsus Præfat. Lib. I. pag. 7.

§. 13. **Q**UI denique omnia, quæ ægro accidunt, observando cognita (11), ad amussim ponderat seorsum singula, comparat deinde inter se universa, confert iis, quæ in sanitate contingunt, hincque tandem severitate ratiocinii subacti assurgit in intellectum causæ proximæ; & auxiliorum ei tollendæ aptorum, verum Medici nomen meretur.

Quænam sit idea optimi Medici, sequentibus temporibus futuri, nescimus, sed qui utitur omnibus illis adminiculis, quibus hodierni sæculi felicitate ars medica illustratur, perfectus dicetur Medicus.

Geometræ docuerunt, quomodo in simplicissima quadam re diu examinata detegantur infinita, de quibus prius non cogitabatur: quid simplicius idea circuli, quam unusquisque facile percipit? sed applicando huic simplicem rectam, quam pulchra deduxerunt inde Geometræ!

Idem & in morborum consideratione verum est; illa enim, quæ observatio detexit, data sunt, ex quibus, attentæ mentis acumine sedulo lustratis, infinita & salt; berrima deducit in arte prudens Medicus.

Hæc autem singula seorsum, non perfunctorie consideranda sunt V. g. dum in quartanæ exquisitæ initio oritur mirum illud frigus, quod sensim ex minimo gradu (auræ quasi frigidiusculæ sensu) in rigorem ascendit tantum, ut membra omnia tam rigida faciat, ut flecti nequeant, sæpe omnem tollat sensum sic, ut pedes ad ossa usque combusserint ægri sine ullo dolore. Quam multa illud Medicum docet! demonstratum enim habetur in physicis, quod ignis absentia, vel non determinatio ad locum, sit frigus, sed ex legibus corporis humani hodie certo concluditur, frigus sequi imminutam circulationem; sed in quartanæ initio evidenter videmus imminutam circulationem, cor quidem celerius palpitat, sed auctas resistentias superare impotens ad extrema corporis vitalem sanguinem propellere nequit; hinc primo incipiunt pallere extrema, nasi apex fit pallidissimus, ungues & extrema digitorum pallent, sic & labia &c. & dum frigus omnia contrahit, constrictæ venæ suos humores majori impetu versus cor dextrum ducunt, cor interim sinistrum non potest evacuare contentum suo cavo sanguinem in arterias plus contractas, hinc circa pulmonem & cor accumulatur sanguis, & inexplicabilem illam anxietatem facit, unde adeo anhelant, & omni respirationis molimine nituntur prementem hanc amovere sarcinam; hinc concludimus magnum tunc adesse mortis periculum, & metuendum esse, ne stagnans fere in magnis venosis receptaculis sanguis in concretiones polyposas abeat, sæpe tota vita non resolvendas.

Hinc non est bonus Medicus, qui tantum notat phaenomena, sed qui illa ponderat, & quæ ex illis necessario sequuntur, determinat.

Nec hoc sufficit adhuc, sed requiritur ut dein COMPARET INTER SE UNIVERSA: sequetur enim post summum quartanæ frigus calor sensum increscens in summum æstum usque, sed calor distendit, elongat omnia solida, auget liquorum volumen; sic fibræ solidæ per præcedens frigus accuratæ, calore subsequente elongabuntur, sed nil plus debilitat solidarum partium fabricam, quam illa vicissitudo alternæ contractionis & elongationis: hinc tanta sæpe debilitas corporis post quartanam diu toleratam, & plurima, quæ inde sequuntur, mala,

Hic est secundus usus illorum, quæ in morbis apparent; primus usus erat singula seorsim considerare, & ab omni facie contemplari, deinde his in chartam congestis, ut memoriæ succurratur, secundus usus erat, illa considerata combinare, ita usque ad ultimum procedere, sic faciendo ad omnem in arte medica certitudinem possibilem pervenimus.

CONFERT IIS QUÆ IN SANITATE CONTINGUNT. Summi momenti in arte hæc regula est. Sapiens Hippocrates in *Prognostico* inde tot sæculi jam probata præfagia deduxit: jubet considerari faciem ægri, an similis sic bene valentium, sed maxime an sibi ipsi, pessimam autem dixit, quæ sanorum faciei prorsus contraria est; nasus acutus, oculi concavi &c. faciem postea à Medicis dictam Hippocraticam describens. Decubitus ægri considerans confert cum sanorum decubitu, & in tantum damnat, quantum inde recedit: à moderato homine ferox responsum damnat; præter consuetudinem aliquid facere, aliquid curare magno studio non consuetum, tanquam pravum & delirio proximum notatur in *Coacis prænotionibus*: innumera talia apud Hippocratem habentur: hæc pro exemplo adduxisse sufficiat.

Nullum enim apparet in morbo phænomenon, quin sit actio læsa, quæ in sanitate exercebatur, & morbi magnitudo tanta est, quantus est à sanitate recessus.

HINCQUE TANDEM SEVERITATE &c. Qui enim jam quartanæ frigus juxta regulas prædictas expendit, concludet illius causam proximam esse imminutam circulationem ob cordis vires expellentes minutas, vel resistantias auctas circa fines arteriosos, vel utrumque simul; sed cur distincte hic dicitur, quod sic acquiramus intellectum causæ proximæ? quia causæ remotæ plures possibiles esse possunt, nec tam facile intelliguntur omnes.

Sed ex intellectu causæ proximæ auxilia huic tollendæ idonea inveniuntur; dum enim novi, quid in quartana faciat hoc frigus, facile concludo quid agendum sit, ut hoc curetur, vel mitigetur saltem: tenuis, repidus, leviter aromaticus potus, cum levi frictione, diluendo liquida, laxando vasa, excitando parum vires vitales, totum absolvunt. Veteres Medici in balneum ægros deducebant, ut frigus febrile præcaverent. Dum aliam viam sequebantur Medici, quantum à veritate aberraverunt! dum videbant quædam corpora effervesce simul mista, & tunc producere frigus, similem causam frigus febrile producere audacter dixerunt: sed mors majus frigus producit, quam in ulla quartana observatur.

§. 14. **O**RDO itaque optimus describendæ historiæ & curationi morborum erit, qui

Datur hic casta methodus, qua morbi describi debent, & curari, utinam observaretur semper! multi enim Medici, dum communis consilii causa aliis casus examinandus traditur, non describunt phænomena observata, sed credunt sufficere, si indicaverint, quid sentiant de morbo, dein agenda ex communi consilio determinanda relinquunt: sed summopere necessarium videtur, ut describantur omnia observata phænomena, per totum morbi decursum, ut alii, qui consuluntur, Medici de morbi genio suum ferre possint judicium, & legitimam inde agendorum indicationem deducere. Hoc autem optime fieri posse videtur juxta sequentes regulas.

1. Uniuscujusque mali phænomena individua, propria, communia, considerate cognita, justo ordine, vera fide, proponit.



1. PHÆNOMENA vocantur omnia illa, quæ in morbis apparent à sanitate recedentia; hæc jam vel sunt INDIVIDUA ET PROPRIA quæ in morbo describendo adfunt semper & nunquam inde possunt separari: talia v. g. sunt in pleuritide dolor acutus punctorius inspirando valide auctus cum febre acuta continua: hæc vocantur signa pathognomica.

Præterea adfunt in morbis phænomena multis aliis morbis communia, v. g. in pleuritide sæpe adest dolor capitis, lumborum &c. quæ millenis aliis morbis adfunt, hæc vocantur COMMUNIA; omnia autem hæc debent notari IUSTO ORDINE, prout sibi mutuo succedunt, aliter tota descriptionis utilitas tollitur: qui simpliciter diceret, variolis laborantem delirasse, nihil proferet, unde firma prognosis deduci posset: plurimum enim differt, an deliraverit in statu contagii, an post eruptionem variolarum: nisi hoc observassent antiqui Medici, quomodo potuissent ex illis, quæ quarto die morbi apparebant, prædicere, quid septimo die futurum esset.

*Præterita dicere, præsentia noscere, futura prædicere, oportet, dixit Hippocrates (a).*

VERA FIDE. Omnia hæc debent proponi, prout morbi decursus offert, non autem detorqueri ad præconceptas hypotheses.

2. Cuncta, quæ acciderunt ægro ab iis, quæ gessit, ingessit, retinuit, excrevit, vel sibi applicuit, dum morbus adfuit, enarrat.

2. Summi momenti hæc regula est, & sine qua omnia in morborum descriptione obscura erunt & turbata: omnia enim hæc, quæ ingeruntur, vel applicantur corpori illud mutant, & ab illo vicissim mutantur; sed illas mutationes sollicite distinguere debemus, ne confundantur cum illis, quæ ex morbi natura ægro accidunt: ingens enim in decursu morbi varietas est, dum variis tractatur modis. Quantum differre inter se vidit variolas Sydenhamus, dum calido vel frigido regimine tractabantur! quantum exacerbantur omnia in morbis acutis, dum non quiescunt ægri! quam anomala apparuerunt symptomata in morbis ab imprudenter applicatis vel externe tantum Cantharidibus, Mercurio, Arsenico &c. omnia enim hæc non agunt sola, sed cum morbo, nec morbus tunc agit solus, sed cum illis.

3. Auxilia victus, manus, medicamentorum, una cum vera methodo applicandi, prout casus, vel ars, obtulit, exponit.

3. Candide enarranda sunt omnia, quæ per victum, Chirurgiam, medicamentorum exhibitionem, observata fuerunt proficua vel noxia; dissimulandum nihil est. Hippocrates (b) ingenue fatetur errorem, dum teli læsionem in vulnere capitis à futura non distinxerat; ægrorum plurimi, quorum morbos in Epidemicis descripsit, perierunt. Observatores plerique felices tantum successus narrant, infaustos tacent.

4. Ea, quæ ex hisce tribus, ut ex datis, juxta (13.) dictam legem effectu rationis verissime deduci queunt ita, ut pro regulis Praxios accipi tuto possint, concludendo elicit.

Si jam tria priora collecta habeantur, ex his datis casto ratiocinio possint deduci

(a) Epidem. Lib. I. Charter. Tom. IX. | (b) §. Epidem. Charter. Tom. IX. pag. 340.  
pag 580. | 341.

regulæ fidelissimæ, quæ Praxi Medicæ dirigendæ inservient semper immutabiles. Certa observata dum docuerunt, quartanam febrim, quamdiu durat, epilepticos insultus cohibere, imo sæpe radicitus tollere, merito concluditur, quartanam epileptico accidentem esse relinquendam, tollendam minime.

Dum ingruentes morbos, tanquam incognitum quid, sollicitè observabat Sydenhamus, vidit applicata quædam male, alia bene cessisse, quasdam vias naturam affectare, opposita his methodo exacerbari omnia: ex illis deduxit methodum medendi, qua tam felix fuit, & tantam jure merito auctoritatem in arte obtinuit.

Debuit hæc observationum rædia sæpius devorare, dum nova constitutio Epidemica, quamvis satis similis videretur prioribus, iisdem tamen tentata remediis infausitos plane exhiberet successus, quod tam candide fatetur; eadem tamen indagationis via novam & certam curandi methodum invenit.

Sic moniti ergo talem sæpe diversitatem in morbis satis sibi similibus obtinere, per regulas has datas rectam morborum indolem rimari debemus, ut salutari arte ægris prodesse possimus.

## §. 15. **M**ULTITUDO quidem morborum his ordinandis officit.

Qui omnia hodie cognita in arte Medica probe nosset, forte in nulla re plus titubaret morborum historiam descripturus, quam dum deberet determinare, unde inciperet, quomodo pergeret, ubi finiret. Certe vel apud optimos autores varius occurrit ordo; quidam a Chylopoiesi & ejus actionibus lætis, dein ab Hæmatopoiesi &c. incepterunt; alii singulas partes corporis à capite ad calcem usque percurrerant harum morbos enarrantes: sed omnibus his methodis magnæ insunt difficultates; videtur sequens paragraphus simplicissimum ordinem dictare.

## §. 16. **S**ED ordinem dictat: 1. Clarius morbi notitia. 2. Simplicior ejus natura. 3. Facillima sanatio. 4. Ejus requisita ad alium intelligendum cognitio.

1. Ab evidentissimis enim incipiendum esse, omnis evincit doctrina, & Geometræ optimi veritatis magistri ex paucis postulatis tam evidentibus, ut de illis nemo sanæ mentis dubitare possit, sensim procedendo innumera pulcherrima deduxerunt.

2. Simplicissimus morbus foret, qui unum tantum haberet phænomenon, (si forte quis talis existat) si jam alter morbus duo vel tria haberet phænomena, à priori, tanquam simplicissimo, foret incipiendum: sic enim à simplicissimis ad magis composita omnis ordinata doctrina procedit.

3. Facillima sanatio dicitur illa, cujus requisita morbum consideranti statim apparent, & quæ sine magno artis molimine perfici potest.

4. Ad hanc rem quam maxime attendendum est, ut ille morbus prius explicetur, cujus cognitio requiritur necessario, ut alii intelligi possint. Solebat Celeberrimus horum Aphorismorum Auctor hac occasione semper auditoribus suis enarrare, quod morbos in chartam conjecerit, & illis dein applicuerit has quatuor regulas, & deinde deduxerit sequentes conclusiones.

C

§. 17. **E**X quo fundamento (16.) omnes sequenti serie tractabimus.

§. 18. **M**ORBORUM itaque simplicissimorum species, & curatio præmittenda reliquis.

*Hæc sponte sequuntur ex prædictis.*

§. 19. **S**OLIDARUM ergo partium morbi explicandi & sanandi primum locum postulant.

*Omnes morbi sunt vel solidorum vel fluidorum, vel amborum simul; sed fluidorum indoles longe intricatior est & magis composita, quam solidorum, hinc secundum præmissas regulas a solidorum morbis est incipiendum.*

§. 20. **F**IBRÆ simplicissimæ solidæ morbi explicati, sanati, inter hos (19.) denique primi sunt.

*Inter partes solidas corporis nostri nihil possumus simplicius concipere fibra; vasa enim ex membranis, membranæ ex fibris constant: fibra autem vocatur pars corporis humani secundum longitudinem extensa, quæ ratione latitudinis suæ consideratur habere partes nullas; hinc comparari potest lineæ geometricæ, quæ definitur esse longitudo latitudinis expers: manet jam hæc fibra simplicissima, quantumcumque longa fuerit, modo nullam habuerit latitudinem.*

## MORBI FIBRÆ SOLIDÆ SIMPLICIS.

§. 21. **I**LLÆ partes, quæ ex fluido vasis contento secretæ, sibi mutuo vi vitæ, & ope glutinis tenuissimi, aquosi, pinguisve, applicatæ, Fibram minimam faciunt, sunt minimæ simplicissimæ, terrestres, vixque mutabiles per eas causas, quæ in nobis viventibus deprehenduntur.

*Fibra jam simplicissima constat ex partibus minoribus secundum longitudinem sibi mutuo appositis; hæ partes fibram constituentes, non amplius dividendæ in minores, vocantur elementa fibrarum. Elementum enim dicitur, quodcumque minima est pars illius rei cuius est elementum. (a) Quæ ex binis talibus elementis secundum longitudinem sibi appositis concrevit fibra, est omnium minima, unicum tale elementum, solum consideratum, non facit solidum, sed in fluidis hæret; combinata elementa fibram constituunt.*

*Quomodo jam hæ fibræ nascuntur? Certe adultus homo ducentas libras pendens in prima sua origine latuit in spumantis libidinis guttula, & ex tantilla molecula excre-*

(a) Galeus de Hippocratis & Platon. placit. Lib. VIII. cap. 2. Charter. Tom. V. pag. 219.



vit tam vastum pondus; totum illud augmentum in solidis partibus per fluida allatum fuit; docent hoc Malpighianæ observationes in ovo incubato factæ, jam tentatæ ab Hippocrate (\*) ubi ex albuminis attenuato liquido per incubatum intra 21. dies pul- lus jam solida firma adeo habens ex invisibili molecula crevit.

Sed illud albuminis liquidum debuit per organa fabricata pulli adhuc ulterius at- tenuari & perfici, antequam per vascula illa, quæ sua parvitate omnem captum fu- giunt, potuerit transire.

Et tamen cum hoc fluido subtilissimo vehebantur illa elementa solidarum partium.

Hinc merito concluditur, quod partes illæ constituentes fibræ solidam sint *M I N I- MÆ*.

Sed & sunt *SIMPLICISSIMÆ*; si enim aliud simplicius concipi posset, non forent elementa ex data definitione.

*TERRESTRES*. Audax videtur forte propositum dererminare sic horum cor- pusculorum fibræ constituentium naturam; terrestre vocamus illud, quod nec in aqua solvitur, nec ad ignem fluit, sed fixum perstat: sed partes solidæ animalium arte che- mica omnibus volatilibus orbæ tales dant reliquias. Numquid putrefactio, quæ terram à reliquis principiis perfectissime separat, hoc evidenter docet: cadaver hu- manum sub terra defossum per multos annos dum hæsit, & postea lustratur, quid ex- hibet? nisi exsiccatum induruerit, ut aliquoties observatum fuit, omnia pristinam fi- guram retinuerunt, sic ut facies distingui possit, sed levi concussu collabuntur omnia, & reperitur terræ subtilissimæ pauculum, quæ firma plerumque adhuc ossa tegebat; eadem hæc ossa diu aëri aperto exposta, vel igne aperto usta, omnibus sic expulsi, meram terram relinquunt.

*VIXQUE MUTABILES* &c. Documastæ, ubi vividissimo igne metalla ex- plorant cum plumbo fusa, testulas suas inde conficiunt omnium optimas, quæ cribri instar plumbum transmittunt, pretiosa metalla retinent: an credibile est tanta ignis vi immutabiles partes à causis in nobis viventibus deprehensis mutari posse? possunt coherere inter se, possunt iterum dissolvi, cæteroquin immutabiles.

Mirum videri posset, fixam adeo & insolubilem terram potuisse latere in subtilissi- mis liquidis. Chemia hoc fieri docet. Animalium spiritus salini alcalini, igne expres- si, limpidissimi, terram gerunt, olea animalium destillatione educta, purissima quam- vis, repetitis destillationibus terram relinquunt, tandemque terra sua deposita evanes- cunt in auras. Videtur enim terra hæc stabilitatem dare reliquis principiis.

Sed requiritur, dum ex his elementis terrestribus fiunt fibræ nostræ solidæ, ut co- hæreant inter se: hoc in nobis facit vis vitæ applicans fibris jam factis nova elementa, quæ deperditorum loca suppleant; illud vocamus nutrire. Et quantum apparet res fac- tas considerando, dum forte modum, quod fiant, ignoramus, sit hoc interpolatione *GLUTINIS AQUOSI VEL PINGUIS*. Aqua enim incredibilem vim habet corpora adulandi; lapidis alabastrini exusta calx, oris halitu disslanda, (gyp- sum vocant) aqua addita fit ductilis pasta brevi in lapideam duritiem concrescens; conchyliæ in calcem usta pollinem exhibent tenuissimum, volatili levitate pulmoni tam sæpe noxium, cum aqua subactus ille pulvis dat pastam igne in durissimum lapidem convertendam: & in durissimis animalium partibus, ubi nemo suspica- retur aquam adesse, incredibili copia hæret: dum siccissimum ebur, vel quæ per

(\*) De natura pueri cap. X. Charter. Tom. V. pag. 322.

annos latuerant in. Officinis cervorum cornua aridissima, ex retortis vitreis destillantur, maxima pars volatilis fit, inque excipulum transit, & magna copia aquæ sic exprimitur, residuum fragile est.

An hoc voluit indicare sapiens Homerus? (a) dum Hectore Græcos ad singulare certamen provocante, hi obmutescerent, iratus Menelaüs ipsis annihilationem quasi imprecatus dixit.

*Vos quidem omnes aqua & terra statis.*

*Αὐτὶς μὲν ὅτι πᾶν τὸ ὕδωρ ἐν γαίᾳ γένοιτο.*

Sed & pingue gluten terrestres partes coherere facit, docent iterum chemica experimenta: quamdiu enim ultimum illud oleum, nonnisi ignis in aëre libero agentis vi separandum, adhæret partibus animalium, coheret adhuc, hoc expulso in cineres fatiscunt: ossa calcinata fragilissima, oleo immissa, iterum coherent.

§. 21. **Q**UARE in his (21.) separatim spectatis, nullus occurrit morbus, qui Medicis observatus, sanatusque describitur.

Si jam minima illa elementa, ex quibus adunatis fibra simplicissima fit, separatim spectentur, de illis certe nihil dicere novimus: qui subtili speculatione voluerunt & horum morbos indagare, nihil unquam dixerunt bonæ frugis. Transponi posse, à coherensione cum aliis dimoveri concipimus; immutabilia autem penitus esse corporum elementa suadet constans per sex mille annos Univerſi facies.

Hæc enim minima solidarum partium elementa vel considerantur, dum fluidis inherencia per vasa deferuntur, sed tunc horum morbi, licet cognosceretur, fluidorum forent vitia; vel considerantur, dum adunata solidam partem faciunt, sed tunc non amplius sunt elementa, sed conflatum ex his solidum.

§. 23. **S**ED in fibra minima, ex adunatis his (21.) concreta, morbi simplicissimi sequentes, (24. ad 38.) considerari merentur: sunt enim frequentes, & fundamenta jaciunt intellectui aliorum, licet prætervisi, vel non bene cogniti.

Omniū ergo simplicissimi morbi non in elementorum vitiis, quæ forte in æternum nos latebunt; sed in fibra minima horum adunatione facta querendi sunt. Dum enim vel bina tantum inter se coherent elementa, varia coherensio potest morbum facere: & uti ex sequentibus patebit, nimia vel nimis parva coherensio in fibris solidis simplicibus, & vasis & visceribus inde formati, infinitis morbis originem dare poterit.

Hi autem morbi fere prætervisi fuerunt; nam nequidem Methodici dicti, quibus de tricto & laxo doctrina solet adscribi, de his simplicissimis morbis egerunt.

Patet ex horum doctrina à Celſo (b) descripta. *Satis esse credebant, communia morborum intueri, & quidem horum tria genera esse; unum adstrictum, alterum fluens: tertium, mixtum. Nam modo parum excernere agnos, modo nimium: modo alia parte parum, alia nimium.*

(a) Homer. Iliad. Lib. VII. pag. 110.     (b) Lib. I. in Præfatione pag. 15.

## MORBI FIBRÆ DEBILIS ET LAXÆ.

§. 24. *FIBRÆ* (23.) *debilitas* vocatur adunatio partium minimarum (21.) cum nisu in cohæſionem tam parvo, ut vel illo levi motu solvi queat, qui Sanitatis effectus sit, vel non multum majori.

A quacunque demum causa fiat cohæſio elementorum, fibræ constituentium, inter se, poterit facile concipi, quod illa vis, qua cohærent, possit augeri, possit minui; debent vasa nostra ex fibris conflata cedere posse impulso liquido, & distendi, nec nimis tamen; debet manere cohæſio sine ruptura, hinc requiritur certus & determinatus cohæſionis gradus in fibris nostris, qui, si major vel minor fiat, morbum faciet.

Debilitas ergo fibræ nunquam poterit definiri nisi relative: primis post conceptum septimanis hominis rudimentum ad tactum liqueſcit, & nisi æquabili pressione ambientis fluidi sustineretur, in informem mucosam massulam collaberetur; tam parva cohæſio fibrarum requirebatur hoc tempore; sed quantum jam robur cohæſionis in his requiritur in adulto!

Sed & in variis partibus ejusdem hominis quam diversa requiritur cohæſionis vis. Longe minor videtur esse cohæſio ultimi solidi, quod mollem pulpam nervi acoustici facit, quam illius, quod durum Achillis dictum tendinem constituit.

Hinc fibra solida tunc minus debilis dicitur, quando non potest integra cohæſione sustinere illum motum, qui ad functionum exercitium in sanitate requiritur.

Neque hoc adhuc sufficit, sed debent semper paulo majorem vim posse sustinere: si enim solida illa ultima haberent tantum talem cohæſionem, quæ placidum fluidorum per vasa motum in sanitate posset sustinere, non ultra, solveretur statim, ubi aucta circulatio majori momento motus pelleret liquida per vasa: sed à levibus adeo nec ulla prudentia humana evitandis causis augetur circulationis velocitas; audito subito fragore mox cor palpitare celerrime, omnes arteriæ pulsant velocius: risus, tussis, sternutatio quantum accelerant sanguinis motum?

In morbis aliquando apparuit, quam misera sit conditio hominis habentis fibras solidas tam debiles, ut tantum pacatissimo motui substinendo pares sint.

Qui debili nimis pulmone sanguinem rupta arteriola exspuunt, si quiescant, per Venæ sectionem minuatur distendentis vasa sanguinis quantitas, nil in victu fumant, quod movere vel irritare potest, satis commode vivunt; si valida tussis miseros corripit, vel imprudenter clament, animi affectu valido agitentur &c. tenera nimis pulmonis vasa, aucto sic impetu transmissi sanguinis, rumpuntur, & undatim profuso sanguine sæpe subito pereunt.

§. 25. **H**ANC (24.) antecedunt: 1. impedita ingestorum assimilatio in naturam liquidi vitalis sani, quæ debetur jacturæ nimiae humoris boni, & inertiae virium solidorum in liquida; vel alimentis magis tenacibus sua indole, quam virium permutantium in corpore

C iij



virtus est. 2. Debilis nimium applicatio partis unius (21.) ad aliam, quæ oritur à nimis debili motu liquorum, isque ut plurimum à defectu motus musculorum. 3. Nimia distractio fibræ rupturæ proxima.

1. Certissimum est, quod constemus illis, quibus nutrimur; sed materies, quæ nutrit, præparetur in corpore, ut nutriat: hinc ingesta sola ad hanc rem non sufficiunt, uti in §. 1. explicatione jam notatum est; sed requiritur actionum naturalium integritas, ut fiat illa assimilatio ingestorum in naturam nostram, & restituantur illa, quæ vitæ actuositas abstulit. Dum conclamatis pthificis vel optima ingerunt alimenta Medici, mirantur non proficere, sed deficit in illis illa assimilans virtus, sine qua nulla perfici poterit nutritio. Merito igitur damnavit Galenus (a) ad hoc non attendentes Medicos, *nomini quidem methodicos, opere vero ab omni methodo alienos* (αὐτοὶ δὲ οὐκ) *vinum & carnes dantes, ac tanquam in vas inanimum* (ὡς ἀψυχὸν ἀγγεῖον) *nutrimenta infundentes.*

**QUÆ DEBETUR JACTURÆ NIMIÆ HUMORIS BONI.** Dum consideramus illa, quæ accidunt crudis ingestis, antequam in nostros humores convertuntur, videmus, quod incredibilis copia liquidorum humanorum illis admisceatur. Inter manducandum saliva & mucus oris, linguæ, palati, faucium &c. in ventriculo succus gastricus, inde exeuntibus utraque bilis, ingentis pancreatis latex, in omni intestinorum puncto novi admiscuntur jam per fabricam corporis elaborati humores: subtilissimis fistulis lacteis receptus chylus lymphæ copia ingenti diluitur, in ductu thoracico totius fere corporis lymphæ reduce perfunditur, ex hoc tandem guttatim in subclaviam venam deductus chylus integro sanguinis torrente abreptus absorbetur: hinc merito concludere licet, inter præcipuas assimilationis causas esse numerandam illam miscelam pauci crudi ingesti cum tanta copia humorum coctorum.

Pulchre hanc rem confirmant experimenta: dum robustissimis militibus per vulnera fere omnis exhaustus fuit sanguis, alimenta avide quamvis ingesta non subigunt & mutant in bonum sanguinem, sed hydropes sepulti languent, debilitata totius corporis compage.

Quantus manet languor & quam diu in fœminis per abortum maxima copia sanguinis orbatis!

Omnes aliæ evacuationes nimix per alvum, urinam, sudorem &c. idem efficiunt.

**INERTIÆ VIRIUM SOLIDORUM IN LIQUIDA.** Dum chylus recens sanguini ingestus arteriarum pulmonis & totius corporis efficaciam per aliquod tempus perpeffus est, jam lactis indolem habet, lac autem jam propius ad naturam nostram accedit quam chylus, post longius spatium, ut Lowerus (b) docuit, feri jam indolem habet; sed toto hoc tempore vasorum in fluida actionem expertus est, quæ est ille renixus, quo vasa nostra distendens fluidum reprimunt, quo ergo hæc vasa firmiora sunt, (modo non nimis rigida cedere possint liquidis impulsis) eo plus agunt, & eo citior & melior fit subactio ingestorum in naturam nostram.

Dum debilis languida chlorosi torpet puella, ingerit nutrimenta quidem, sed non inde perficit bonum sanguinem, sed lac quasi tantum; unde tota pallor, imo imprudenter secta vena in tali casu vidi sanguinem exivisse album, si in his vires paulo plus valent, plus mutantur ingesta, non tamen perficiuntur integre, tunc oritur co-

(a) De ratione victus in morbis acutis ex | **XL.** pag. 189.  
Hippocratis sententia Cap. IV. Chart. Tom. | (b) De Corde pag. 139.

lor flavescens, viridescens : deficit enim in his solidarum partium actio in fluida, tumens, implentur crudis, sed non fit bona nutritio.

Per ferrum ingestum, & corporis exercitia augeatur in hac puella vis firmarum partium in fluida contenta, incipit tumens subsidere facies, amœno roseo colore genarum & labia perfunduntur, redit debitus vigor toti corpori.

VEL ALIMENTIS MAGIS TENACIBUS &c. Admissio maximæ copiarum humorum coctorum ad pauculum crudi chyli, & actio solidarum partium in contenta fluida, erant bini illi modi, quibus conspirantibus crudum ingestum in nostram convertitur substantiam. Sed, quamvis hæ actiones adeo efficaces sint, ut ex tot & tam variis ingestis ultimo suo effectu conficiant sanguinem humanum, tamen requiritur in alimentis talis dispositio, ut per has vires permutantes nostri corporis possint superari; (a) ipsa enim concoctio est in coquentis substantiam (visio) deductio quædam ejus, quod concoquitur; corpore igitur secundum naturam habente, quando & concoquendum familiarem habuerit naturam respectu coquentis, mutatio & alteratio totius substantia coquendi fit, aut maxima ejus partis, paucissimo nobis immorante semicocto.

Dum in urbibus obsessis fame pressi coguntur obvia quævis devorare, languent, debilitantur omnes. Cum (b) propter annonæ penuriam pane & libis ex semine lini coctis vescerentur Middelburgi in Zelandia, distenta his valde cito hypochondria fuerunt, & facies aliæque partes tumida factæ, quorum non pauci sic affecti etiam mortui sunt.

Non poterat indomabile gluten seminis lini in bonum nutrimentum converti.

Cum depravato appetitu arenam, calcem, lanam & plurima alia absurda devorant puellæ, quam debiles, quam pallidæ fiunt!

Proportionalis ergo debet esse ingestorum tenacitas viribus assimilantibus, vel non reficitur inde corpus, sed gravatur. Dum teneris infantibus de plebe homines, ex farinosis non fermentatis pultes, solani esculenti tubera &c. ingerunt, tumet miseris abdomen immaniter, decrescit reliquum corpus.

Hæc probe cognoscens Hippocrates jussit (c) ut, dum morbus in vigore fuerit, tenuissimo uterentur victu; oppressa enim tunc vi morbi natura impar est validioribus alimentis immutandis, & ex hoc fonte plures saluberrimas in victu regulas deduxit alibi.

1. Dum sanissimus homo suffocatur sub aquis, habet omnia solida & fluida ac ante, nulla tamen fit assimilatio, nulla restituitur fibra, deficit enim vis vitæ distribuens, movens, applicans: licet enim ingerantur in corpus talia, in quibus sunt elementa fibræ restituendis idonea, nisi per vim vitæ applicentur, firmentur, nulla fit nutritio.

In illis morbis, in quibus vitalis humorum circuitus languet, licet optima dederis nutrimenta, nil proficis; potes hæc corpora replere ut tumeant, graventur, imo suffocentur fere; bene nutrire non poteris; docent hydropici.

Circulationis jam velocitas imminuta est causa præcipua, cur non fiat debita applicatio elementorum ad fibræ nutriendam.

In corde autem videtur origo & fons vitalis motus hære, per quem motum expulso ex thalamis cordis sanguine dilatantur arteriæ omnes, quæ postea contractæ motum impulsu sanguinis continuant.

(a) Galen. Comment. 2. in Epidem. 1. Chart. Tom. IX. pag. 55.

(b) Dodonæi Stirp. hist. pag. 534.

(c) Aphor. 8. Sect. 1.



Sed inter causas, quæ cordis motum faciunt, præcipua forte est venosi sanguinis influxus in cava cordis: diu enim post mortem protruso sanguine venoso versus cordis thalamum dextrum redit cordis motus, ut certissima docuerunt experimenta: verum turgentes muscoli dum agunt, comprimunt adjacentes venas, sic venosi sanguinis motum versus cor accelerant, hinc cor irritatum citius contrahitur, hinc celerior sanguinis circuitus.

Hanc rem confirmant certissima experimenta: dum bini iisdem parentibus orti fratres vario utuntur vitæ genere, dum unus sapientiæ studia excolens sedentariam degit vitam, alter venatu, equitatione, bellicis laboribus corpus firmat, quanta in corporis robore est differentia! prior debilis puellæ instar labili valetudine fruitur, alter firmato per labores corpore, Herculeo fere robore gaudet.

Validis curribus quotidie assuetus equus quiescat in stabulis, opima brevi pinguedine turget, sed simul longe debilior fiet, solitis laboribus impar omnino.

Otium humectat & corpus reddit debile, labor siccatur, & corpus robustum efficit (4).

3. Nil magis docet impossibilitatem explicandi per principia mechanica singularem corporum naturam, quam cohesio, mira illa corporum proprietas: cohererent partes ferri inter se, illud ferrum ducitur in tenue filum instrumentis musicis applicandum, circumducto vertibulo illud filum fit longius, fit tenuius, pauciores particule se mutuo tangunt, tandem ulterius distractum rumpitur, & extrema rupta, licet sibi mutuo applicata, cohærebunt nunquam: hinc cohesio potest sensim per gradus ita minui, ut tandem fiat nulla, & circa momentum rupturæ vix cohærent amplius; vel saltem sic tantum cohærent, ut levissima vi accedente dirumpantur: idem in fibris nostris solidis obtinet.

Dum invitis maleficis per tormenta veritatem exprimunt, solent suspensis applicare ad pollices pedum pondera sensim aucta; hæc tormenta passi per plures dies vix possunt membra movere, fere paralytici à sola distensione.

Numquid distenta nimis per diu retentam urinam vesica omnem se contrahendi vim amittit? distenti abdominis in gravida muliere cutis & panniculus adiposus, excusso quamvis distendente sætu, tota visa flaccida & rugosa manent.

§. 26. **P**RODUCIT autem facilem vasculorum ex his (24.) conflatorem extensionem, rupturam, in sua liquida contenta inertiam; unde Tumores ab distendentibus, Putrefactiones ab stagnantibus vel extravasatis liquidis, tum ea, quæ ex binis hisce sequuntur, infinita.

Res hæc evidenter patet, si supponatur, corpus humanum perfecte sanum statim fieri nimis debile in omnibus fibris solidis: omnia vasa nostra constant fibris inter se inflexis & intricatis, hinc vasorum omnium robur pendet à robore harum fibrarum, sed major aut minor cujusque vasis capacitas mensuratur ratione composita ex ratione directa impetus liquidi impulsu, & ratione inversa resistentiæ laterum; cum ergo, debilitatis fibris constituentibus latera vasorum, minuatur resistentia laterum, impetu interim liquidi impulsu manente eodem, necessario distendentur vasa.

(4) Hipp. de victus ratione Sanorum Lib. II. Cap. X. Charter. Tom. VI. pag. 474.

Si pars corporis, pes v. g. exponetur vaporī tepidæ aquæ, quo nil plus debilitat, tumebit paulo post & fiet œdematosus.

Dum pergit causa eadem fibras debilitare, à minima vi fiet cohesio nulla, id est ruptura, uti toties docuerunt tristia exempla, dum tenelli homines tam facile à tussi, cantu, clamore &c. habuerunt ruptam in pulmone arteriam.

**IN SUA LIQUIDA CONTENTA INERTIAM.** Distenta ab impulso liquido vasa arteriosa suarum fibrarum efficacia reprimunt fluida: dum nituntur minuere fibræ capacitatem vasis, quod constituunt, liquida contenta premunt, comprimunt, mutant: & ab his binis omnia in corpore pendent; dum ergo minuitur fibrarum robur, facile patet, quod vasa ex his conflata minus agant in fluida contenta.

**TUMORES AB DISTENDENTIBUS.** Ratio dicta fuit: observata certissima rem demonstrant; dum incipit languida chlorosi debilitari tenera virgo, mox incipiunt laxissima illa sub palpebris loca ( *πρότω ὀπίσθ' ὀφθαλμοῦ* dixerunt veteres Græci ) tumere, dein tota facies turgidula, alba, apparet; & dum quotidie increfcit humorum moles movenda, non aucta causa mortice, tota incipit tumere in omnibus fere partibus: sic & in primo initio Cacochymix Leucophlegmaticæ lætantur sæpe homines, dum credunt se bene valere & pinguescere: dum per multos dies aër nebulosus est, corpora omnium hominum apparent inflata, quia partes externæ sic quasi in perpetuo ponuntur balneo, unde labefactatæ cedunt liquidis distendentibus.

**PUTREFACTIONES &c.** Quamdiu æquabili motu per vasa circumducuntur humores, nulla nascitur in corpore putredo, omne illud, quod inciperet disponi ad putredinem, solitis corporis viis eliminatur: sed dum debilitata solida non possunt propellere distendentia fluida, fit stagnatio, & in calore aëris communis omnia liquida humana ( si forte pinguis exceperis ) sibi relicta putrescunt solo lacte excepto, ( quod nondum omnes dotes humani liquidi acquisivit ) hinc longe plus in calore corporis nostri, qui semper aëris communis calorem superat: idem verum est, dum rupta ob nimiam teneritudinem vasa suos effundunt humores.

Si jam hæc applicentur variis partibus humani corporis, apparebit, ex simplici hac causa oriri posse infinita & gravissima mala.

Dum tener nimis pulmo impetum sanguinis corde expulsi ferre nequit, ruptis vasibus hæmoptoe, & toties inde immedicabilis pthisis.

Dum cerebri vasa debilitata vel distenduntur nimis, vel rupta effundunt suos humores, omnes morbi functionum animalium à levissima vertigine ad lethalem apoplexiam usque oriri possunt. Idem in aliis visceribus verum est, hæc pro exemplo sufficiunt.

§. 27. **E**X hisce ( 24. 25. 26. ) præsens, futura, præteritave noscitur: effectus prævidetur; & Curationis requisita perspicuantur.

Qui jam bene intellexit omnia antedicta, de natura fibræ simplicis nimis debilis, de illis, quæ antecedunt hanc debilitatem, de phænomenis, quæ hoc docent, & de effectibus, quæ sequuntur; poterit facile definire, an adsit nimia fibrarum debilitas: hæc vocatur *diagnos* in Medicina, sive evidens cognitio morbi præsentis distinctissimi ab omni alio, & denotat morbi naturam individuum: hæc *diagnos*,

D

habetur, si novimus præcessisse tales causas physicas, quæ semper antea hunc morbum fecisse deprehensæ sunt. Si v. g. homo à propria temperie jam debilis balneis aquosis, potibus similibus tepidis frequenter usus, inertis otio torpuit, tunc novi præcessisse tales causas, quæ fibræ debilem faciunt, hoc primum est diagnosis fundamentum. Alterum diagnosis fundamentum est cognitio morbi in sua natura & effectis præsentibus, quæ, si sensibus patent, per illos observantur; sed morbi recte natura cognoscitur, quando cognoscuntur effectus facti ab hoc morbo ut causa, unde qui novit effectus fibræ debilis, poterit detegere, an adsit, vel non.

*PROGNOSIS* autem significat, cognoscere aliquid, antequam fiat, unde est cognitio, nata in mente Medici, morbi alicujus certo futuri, qui nondum est: cognoscitur morbus futurus ex causis cognitis talibus, ut nondum faciant morbum, sed quæ majores factæ, vel aliis unitæ faciunt morbum: v. g. si noverit Medicus temperiem hominis vergere ad hæmoptoem, monebit hunc morbum ipsi metuendum esse, licet nunquam antea laboraverit; jubebit, ut caveat, ne aromata vel vinum copiose ingerat, abstineat à clamore, cantu &c. nam prognos non habetur ex eo, quod cognoscamus causam completam morbi in ægro, tunc enim jam adesset morbus, sed quod cognoscatur causa quædam physica, prædisponens ad morbum cognitum ut pars causæ totalis, & quod prævideat Medicus, alteram causam accessuram, quæ priorem illam prædisponentem faciet completam: dum pleuritide decumbit æger, & à Medico petitur prognos, & ille videt, non esse pessimam, nec tamen resolvi per naturam, nec ulla critica evacuatione vel metastasi causam morbi materiale ductam fuisse, nec idonea adhibita fuisse medicamenta, tunc prædicet, quod pleuritis illa suppurabitur: hæc prædictio non pendebat à pleuritide præsentem, sed junctæ talibus causis, quæ faciunt inflammationem in suppurationem tendere.

Sic evidenter intelligitur, quid sit Diagnos, quid sit Prognos.

Si jam observatæ fuerunt illæ mutationes, quas morbus, per diagnosim cognitus, fecit in corpore sano prius, possum ex hix mutationibus visis in ægro concludere, morbum adfuisse; hæc vocatur *anæmnosis recordatio*.

*CURATIONIS REQUISITA*. Hoc jam est magnum illud artis molimen: curare enim est, corporis præsentem conditionem physicam, unde morbus fit, sic permutare, ut salva vita redeat integritas læsarum functionum.

Postquam enim Diagnos docuit morbi nomen, ejus statum varium incrementi &c. partem affectam, & materiem peccantem in parte affecta, & Prognos demonstraverit, quænam speranda, quænam metuenda sint; tunc ex his omnibus concluditur, quænam sint agenda: hæc vocantur *Indicata*, & scientia sic nata in mente Medici vocatur *Indicatio*.

Semper hic primo consideramus, an morbus naturæ sit committendus, an vero ars aliquid addere debeat: vivit enim æger, & pervitæ superstitis effectus multa fient, quæ nondum sunt; si hæc mutatio à vita superstita facta talis est, ut per certa observata constiterit, illam posse causam morbi sic mutare, ut redeat sanitas, nihil agendum est. V. g. si pleuriticus primo morbi stadio tussim rejicit mucosam flavam materiem cum strigementis sanguineis, cum levamine omnium symptomatum, ex fide veterum observatis novimus, quod si possit hæc expectoratio sustineri, intra paucos dies sanabitur æger: hinc nec venæ sectionibus, nec aliis remediis turbabimus salutare hoc naturæ molimen, sed dabimus tantum mollissima decocta, quæ hanc expurgationem sustinere possunt: sed si v. g. in pleuritico vi-



demus febrim magnam, calorem urentem, tussim siccam linguæ siccitatem, nec ulla observantur signa, quæ docent, naturam affectare aliquam metastasin salutarem, nunc novimus, quod si pergant in hoc corpore agere illa, quæ nunc agunt, sequetur vel lethalis gangræna, vel, si mitior fuerit morbi indoles suppuratio, semper bona, ubi materies suppurata poterit extrorsum educi, sed hic magnum instat periculum, ne pus factum in cavum thoracis decidat, & funesto empyemate ægrum necet: hinc tunc concludimus, hic non esse sibi relinquendam naturam, sed validis artis auxiliis mutandum esse sic morbum, ut non fiat suppuratio vel gangræna: hæc autem auxilia ex cognita morbi indole & causis prægressis patebunt.

§. 18. **H**ÆC enim obtinebitur: 1. nutrimento, in quo materies (21) abundet, quodque jam fere ita præparatum sit, ac in corpore sano & forti sit. Lac, Ova, Jura carniū, decocta panis bene fermentati, vina austera, primaria sunt. Quæ parva copia sæpe repetita sumenda. 2. Aucto motu solidi & fluidi per frictiones, vectiones in equo, rheda, navi, ambulationes, cursus, exercitia corporis. 3. Leni compressione vasorum liquidorumque repulsi. 4. Medicamentis acido austeris, aut & spirituosius fermentatis, prudenter, leniterque usurpatis. 5. Omni modo, quo nimia distractio tollitur.

In hoc casu ponitur nullum vitium in toto corpore, nisi sola debilitas fibrarum, hinc ille morbus jam abstracte sumitur: non possumus facile curare fibræ præsentem nimis debilem, ut fiat requisitæ ad sanitatem rigiditatis, sed futuræ ex lege corporis fibræ possumus talia suppeditare elementa, ex quibus per vires vitæ fiet fibra latis fortis.

Prima causa debilitatis nimix fibrarum recensebatur impedita assimilatio crudi assumpti in ultimum illud coctum, quod est materies omnium subtilissima, per minima vasa delata: sed ut fibræ fiant satis fortes, debet adesse materies debita illis apponenda, sed hæc est illa, quæ omnium viscerum & vasorum actiones passa juxta sani corporis leges ultimæ elaborationis perfectionem adepta est: sed dum fibræ nimis debiles supponuntur, & omnium vasorum in fluida contenta actio à debito fibrarum robore pendeat, omnes functiones permutantes crudum ingestum in nostram naturam erunt minus efficaces, hinc in tali corpore per vires proprias non poterit præparari ultima illa materia, quæ nutrimento inservit: mirantur hinc sæpe Medici cur optimæ carnes debili tali homini ingestæ non nutrant, sed hæc tantum præbent materiem remotam, unde vitæ actiones nutrimentum faciant, & his functionibus læsis frustra dantur optimi cibi.

Dum in utero materno hæret tenellus embryo, matris viribus præparati humores illum nutriunt, debile enim corpusculum non valeret ex aliis minus assimilariis suum facere nutrimentum; recens nato lac materno in corpore præparatos humores infundit: sic naturæ modum imitata ars medica debilibus talibus corporibus ingerit jam præparata in corpore sani animalis nutrimenta: inter illa præcipuum est

L A C. Proprio lacte omnis homo nutritur, & ex eo solo omnia reliqua solida & fluida vi suæ vitæ perficit; est enim in viris æque ac fœminis semper præsens, licet nunquam pepererint, nunquam nutrices fuerint: ex sexagenario sene sola suctione

D ij

lac educitum narratur (a), & ex mammis mulieris non prægnantis (b) est enim chylus, cordis, pulmonis, arteriarum actiones passus, omnibus humoribus mistus, mammarum mirabili fabrica inde separatus.

Omnium jam optimum lac est humanum ad hos usus, utpote naturæ nostræ maxime analogum, hinc semper præferendum lacti aliorum animalium: lac illud debet esse fœminæ sanæ, quæ salubri motu corpus exercet, & victu laudabili utitur, & integro ætatis flore viget, omnium optimum, si quatuor vel quinque post partum horis ducantur ubera, tunc enim chylus in lac coctum jam mutatus est, & alimentorum indole deposita, incepit humanam induere naturam: ingens enim est differentia, prout lac vario post ultimum partum tempore ducitur; quod statim post ingestos cibos & potus in mammis colligitur, crudum est, & multum de ingestorum indole retinet, quod duodecim ab ultimo partu horis ducitur, jam tenue, subflavescent, fœtorem suburinofum fere instar seri sanguinis habet; intermedio hinc tempore optimum lac est.

Sed & aliud maxime notandum hic est; omnia animalia, quæ lacte materno utuntur, illud ducunt de uberibus, nunquam acri exponitur lac, sed omnibus suis partibus subtilissimis dives teneris præbetur animalibus: videntur enim lacti inesse subtilissimi spiritus, ultima concoctione in sano corpore elaborati; docent hoc tot nervi concurrentes ad chyli & lactis officinas, subtilissimus ros exhalans ex lacte recens multo adhuc calido, miræ mutationes observatæ in tenellis infantibus à lacte assumpto: vidi sic infantem, qui ira furentis nutricis ubera duxerat, mox fuisse convulsus, licet sanissimus fuisset ante.

Sed jam ab omni ævo corpora interitura præ debilitate conati fuerunt Medici refocillare, dum subtilissima illa exhalantia de valido juvenili corpore insinuabant debilissimis corporibus sub iisdem stragulis decumbentibus.

Sic Davidis effectum senectute corpus fovebatur sanissimæ puellæ in eodem lectulo decubitu (c); si ergo lac jam penitus frige factum, vel postea igni admotum iterum exhibeatur, jam subtilissimum illud, quod præ cæteris requirebatur, abest.

Dixit hinc Galenus (d), *veteres vero etiam mulierem lactantem illis, qui tunc decumbant, adstare voluerunt, quorum sententia & ipse quoque accedo, & quod familiare id sit, & quod priusquam ab ambiente aëre refrigeretur, id sumi voluerint.*

Et alibi (e) postquam similia præfactus fuerat, lac comparat semini genitali, quod nec ipsum aliquamdiu extra propria vasa, si modo suam virtutem servabit, morari patitur, sed vel in maris partibus contineri, vel fœmina partes tangere debet: & sane optimum lac est, si quis ex ipsis mammillis extraxerit &c. postea ridens quorundam morositatem addit: *quod cum exhiberi sibi, cum pueris, plerique recusent; utique cum asinis ipsis dare asininum convenit.*

Confirmaverunt jam hanc rem observata plurima. Capivaccius nobilissimæ gentis unicum hæredem servavit, dum inter binas florentis ætatis decumbentem nutrices ubera illarum ducere iussit.

Juvenis marasmo vero correptus Bononiæ, juvenulæ nutricis pulcherrimæ ubera ducebat, & in eodem cum illa lecto dormiebat, unde sic instaurabatur exsuccum

(a) Miscell. Cur. Dec. II. An. 5. pag. 60. Append.

(b) Miscell. Cur. Dec. I. An. 3. pag. 12.

(c) Regum Lib. III. cap. 1.

(d) Method. Med. Lib. V. cap. 12. Charter. Tom. X. pag. 123.

(e) Method. Medendi Lib. VII. cap. 6. Charter. Tom. X. pag. 160.

corpusculum, ut metuerent, ne intempestiva Venere perderet renascentes ex lactis usu vires. (a)

Defectum lactis humani proxime supplet Asininum, post Caprinum, dein Vaccinum.

Ova, quæ fragili sub testa tot miracula recondunt, & per immortalis Malpighii Observationes tantam lucem animalium generationi affuderunt, ad hunc usum pariter adhibentur.

Albumen ovi, sero sanguinis humani plurimis dotibus conveniens, habet in se materiam, quæ calore incubatus mutata intra viginti & unum dies in sacculo colligamenti latens vitale stamen pulli in tantam molem facit excrecere, vitellus enim non consumitur, solum albumen videtur nutrimento pulli in ovo servire.

Hinc optimum in se nutrimentum habere merito affirmatur: dixit Hippocrates (b) *volucrum ova validum quid & nutriens & inflans habent; validum quidem, quia animalis generatio est; nutriens, quia lac est pulli; inflans, quia ex parva mole in multum diffunduntur.*

Albumen ovi hinc præcipue commendatur ad nutriendos debiles homines, sed dilutum aqua, ut tenacitatem amittat, & levi aromate conditum, ne nimis fatuo sapore displiceat; tepida autem aqua dilui debet, fervidæ enim aquæ calore coagulatur in scissilem massam, difficillimæ digestionis.

Multum tamen deficit à lactis usu, albuminis enim ovi liquor, antequam nutriat pullum, ejus vasorum & viscerum actionem experiri debet, cum in lacte jam adsint humores subtilissimi animali fabrica præparati.

Vitellus autem, licet nutrimentum optimum det, requirit firmiorem viscerum fabricam, nam, ut Harvæus (c) post Aristotelem pulchre notaverat, pullus primis ab exclusionem diebus vitello, intra suum abdomen concluso, pro nutrimento utitur; albumen autem consumitur illo tempore, quo pullus ex invisibili molecula in ovo ad debitam magnitudinem crescit, hinc videtur facilius in nutrimentum converti posse quam vitellus.

Videtur ergo Galenus locutus fuisse de ovīs coctis, non de crudis, ubi debilibus vitellos commendat præcipue, quia albumen difficile concoquitur (δυσκολεῖται) (d) uti clare patet, dum in alio loco de ovīs sorbilibus loquens similia dicit. (e)

**JURA CARNIUM.** Imprimis si animalia, quorum carnes jusculis parandis adhibentur, viginti quatuor ante mortem horis jejuna manserint, tunc enim omnes crudi humores per fabricam animale mutati sunt in debitam indolem: carnes mactatorum animalium succulentæ penitus sunt, sanguis tantum ruber, pro maxima parte educus fuit, reliqui omnes adsunt humores, qui inter coquendum aquæ misti debilibus corporibus præbent materiam in sani animalis corpore jam elaboratam; sed inter coquendum pars subtilissima avolat, quæ retineri posset, si in machina Papiniana coquerentur; sed decocta sic parata saponaceum nauseosum satis saporem habent, dum pingue carnibus semper adhærens ignis & aquæ validissima actione in vase exactissime clauso sic attenuatur, ut aquæ intime misceatur; præterea nimis me-

(a) Foresti Observ. Tom. I. Lib. IV. p. 152

(b) De ratione victus sanorum Lib. II. cap. 5. Charter. Tom. VI. pag. 469.

(c) Harvæi Exercitat. de generatione Animal. pag. 93.

(d) Method. Medendi Lib. XII. cap. 6. Charter. Tom. X. pag. 235.

(e) Method. Medendi ad Glauc. Lib. I. cap. 10. Charter. Tom. X. pag. 355.

raca sunt hæc juscula, & dilutione indigent: hinc in vasis vulgaribus, quantum fieri potest, altis & clausis diuturna coctione omne solubile ex carnibus educi potest, sic ut meræ solidæ fibræ musculosæ superint, juscula hæc dein refrigerata pingue supernatans, in frigore plerumque concrefcens, habent, quod sollicite auferendum, ne debiliū ventriculum offēdat, cito rancescens hoc oleum.

Magnus tamen error foret credere, eo meliora esse in hos usus jura carniū, quo meraciora, consummata enim dicta indomabili tenacitate debilem ventriculum potius gravant, hinc moderata requiritur dilutio.

Sic tamen decoquendo in vasis vulgaribus multum perit de subtilissima parte, docet gratus & reficiens halitus ex vasis non bene clausis transpirans, dum carnes decoquantur.

An ideo ferocissima sunt illa animalia, quæ vivas carnes laceratas devorant? certe canes crudas carnes vorantes ferocissimi evadunt.

Solent præferri ad juscula carnes ex genere gallinaceo, vitulina dein, post ovilla, bubula denique. (a) Si negligitur subtilissimum illud pro maxima parte exhalans in vulgari coctione, reliquum quod nutrit hæret in parte illa gelatinosa, quam inspissata juscula exhibent experimenta tunc docuerunt, quod vitulina caro plus habeat de illa parte gelatinosa quam bubula, ovilla caro adhuc parum plus quam vitulina, pulli carnes minus dant, galli veteris carnes duplum fere respectu carnis vitulinæ. (b) In loco citato tabula habetur variam in diversis carnibus proportionem exhibens.

Ex vitulina, ovilla, bubula & gallinacei generis carne permistis optima & sapidissima habentur juscula, imprimis si his postea pauculum succi citri vel arantiorum adspargatur, ut nimia in putredinem proclivitas tollatur.

DECOCTA PANIS BENE FERMENTATI. Magni usus apud illas gentes, quæ calidissimis regionibus viventes stricta & macilenta corpora habent, in quibus in morbis acutis statim omnia in summam vergunt putredinem: requiritur ut per fermentationem nimia frumentorum glutinositas frangatur, ne noceat, tunc decocta inde facta seri lactis spissitudinem fere habentia optime prosunt, meraciora lactis cremorem fere æquantia minus facile digeruntur: tali decocto possunt grata aromata, vini pauculum addi, sic magis reficiunt.

Notandum tamen, quod hæc ex pane præparata decocta tantum eo usque perfici possint, ut chylo simillima fiant, quatenus chylus ex ingestis constat, non quatenus admistis humoribus humanis conficitur: hinc semper de vegetabili natura participant, sed ut ex chylo fiat liquidum humanum, requiritur pulmonis imprimis, uti & reliquorum viscerum & vasorum actio: hinc in phthisicis & omnibus aliis, quibus debiles nimis pulmones sunt, in solo fere lactis usu salutis spes posita est: ideo panis decocta longe magis remotam ab ultima perfectione nutrimenti materiam habent, quam lac.

VINA AUSTERA. In vinis omnibus mirus ille inest, & naturæ humanæ gratissimus stimulus, omnia excitans, omnia calefaciens: dum modica copia ab homine non ad modum assueto sumuntur, oritur promptitudo omnium sensuum, summa in omnibus membris agilitas, incredibilis lætitia; dum meditationibus exhaustus Philosophus pauculum vini sorbet, mox inde reficitur, & redit menti peccata illa serenitas, & novus quasi vigor, Petulca illa vina, ut Campanum &c. hoc habent, sed cito eva-

(a) Herm. Boerh. Mater. Med. pag. 2.

(b) Academ. des Sciences An. 1730. Mem. 314. &c.

nidum, austera vina firmitus quasi hærens illud spirituosum magis durabili actione corpori applicant, & simul adstringente vi debiles fibras plus roborant, hinc in hoc casu præteruntur: omnium optimo successu exhibentur, dum panem biscoctum his vinis madidum deglutiunt omni trihorio, sic non tam cito dilabitur vini virtus, & novam quasi vitam flaccidis primis viis inspirat. In pane & vino robur & virtus est. (a)

PARVA COPIA &c. Sæpiissime hic peccatur, dum volentes reficere debilia hæc corpuscula, nimia copia simul ingesta obruunt; quantæ sunt angustiae, dum phthistici plusculum licet optimi nutrimenti ingerentes novo chylo debilem pulmonem gravant nimis! Sapiens naturæ institutum jussit, ut debiles infantes sæpius sed pariori copia lac maternum sumerent: nisi hoc observetur, reliqua omnia, utilissima quamvis proderunt nihil.

2. Inter causas debilitatis nimiae fibrarum debilis nimis applicatio partium ad se mutuo numerabatur, hæc tollitur, dum solida fortius agunt in fluida contenta, à solidorum enim in fluida actione & reactione mutua omnia in corpore pendent: hæc autem actio & reactio instauratur.

FRICTIO NE, quæ est alterna quasi pressio & relaxatio partium corporis: levis frictio solas venas premit, validior & arterias: premendo venas per frictionem acceleratur sanguinis venosi motus cor versus, hinc cordis excitatur motus, ergo velocior fit propulsio per omnia vasa; potest ideo vis vitalis per frictiones augeri, nullo alieno intra corpus introducto, ad quemvis gradum: potest enim per frictiones frigidissimo hydropico calida excitari febris: in illis corporibus, ubi præ inertia nullum fere ex chylopoieticis visceribus suo fungebatur munere, frictiones jejuni homini per totum abdomen factæ panis asperis laneis dederunt mirabiles effectus: hinc veteres & ad tuendam sanitatem & ad curandos multos morbos tanti fecerunt frictiones.

Dum in stabulis equus relinquitur neglecta cutis sordidæ depuratione, intra paucos dies sit ad omnia inutilis, dum ferreo pectine quotidie cutis raditur, perfricatur setis, agilis manet per multos annos.

Nec minus quotidie corpora pecudum quam hominum defricanda sunt: ac sæpe plus prodest pressa manu subegisse terga, quam si largissime cibos præbeas: sic monuit Columella. (b)

Frictiones autem variae erant, & oppositis sæpe serviebant usibus; hinc Hippocrates dixit (c) *frictio potest solvere, ligare; carne implere, minuire, dura ligare, mollis solvere, multa minuire, moderatè densare*. Dum enim cum oleosis mollibus perfricatur pars, laxior fit.

In fibra autem debili curanda frictio pannis laneis asperis calidis, imprimis penetratis fumo accensi succini mastiches &c. ut simul hoc aromaticum roborans thimiamma laxis se insinuet partibus, maxime prodest; sed sensim hic progrediendum, nec statim validissimis utendum frictionibus, ne stagnantia multa in distentis nimis vasis, nimia copia cor versus pressa, illud obruant & suffocent, vel tenera nimis adhuc vasa aucto imprudenter motu frangantur.

VECTIONES IN EQUO. Omni momento tunc viscera abdominalia, imo & thoracica, pendula concutiuntur, sibi invicem leniter quasi affricantur, in-

(a) Homerus Iliad. Lib. I X. circa finem  
(ὅστις καὶ ἐν τῷ 249 μέρει ἔστι καὶ ἀλλῶς) pag.  
373.

(b) De Re Rustica Lib. VI. cap. 30. p. 527.

(c) De Medici Officin. Charter. Tom. XII.  
pag. 24.



terim aër purus majori impetu in pulmones agit, omnibus his simul conspirantibus incredibiles fiunt mutationes: notandum, debilem hominem non debere equitare pleno ventriculo, sed ante prandium, vel post digestionem fere peractam; distento enim ventriculo non sine molestia hos concussus equi ferunt debiles homines, jam fere vacuis primis viis residuæ fæces hoc concussu eliminantur.

Tanti fecit equitationem Sydenhamus, (a) ut non tantum leviora mala, sed tabem tantum non conclamatam, ubi jam nocturnis sudoribus funesta adeo phthificis diarrhœa accesserat, se curare posse confidat sola equitatione, nec magis efficacem creavit Mercurii in lue venerea, vel corticis Peruviani in febribus intermittentibus usum, quam equitationis in curanda phthifi.

Sed sensim auctis equitationis vehementia & tempore, non subito & semel validissima equitatione defatigandum monet, & pulchra ibidem curationum exempla adducit.

Deinde addit, quod licet equo vehi phthificis præcipue conferat, tamen & itinera curru facta mirandos sane effectus ediderint.

Hinc tam debiles, ut se sustinere non possent equo infidentes, rheda vehantur, donec plus firmato corpore equitationem ferre possint. Ab omni tempore hominum debilissimis, infantibus nempe, profuit gestatio & in cunis agitatio.

NAVI autem vehi conducit debilibus: si placido navis feratur motu, miram alacritatem perspiratione aucta solet excitare, famem augere, ingestorum digestionem promovere: illa autem, quæ sit procelloso in mari, jactatio robustissimum hominem non assuetum vertigine, vomitu, anxietate intolerabili, ipso animi deliquio, afficit, hinc casu aliquando inveteratos morbos sic sanari novimus, debilibus tamen tantæ in corpore excitatæ turbæ minime prodessent.

Omnia jam hæc imprimis profunt debilibus, quia sine defatigatione multa beneficio motus fruuntur, postquam autem sic inceperunt redire vires, tunc motu musculari firmandum corpus.

• Hoc autem fit per **AMBULATIONES, CURSUS EXERCITIA CORPORIS.**

Nisi enim tales ægri velint his uti, sensim in eandem calamitatem relabuntur: hoc toties dolemus in praxi, dum à languida chlorosi curatæ puellæ, sedentariam vitam nimis amantes, negligunt restauratum corporis robur sustinere corporis exercitiis, post paucas enim septimanas æque debiles æque pallidæ sunt ac ante; volunt ex ingestis nutriri, & nihil agere, nunquam sic inde faciunt bonum sanguinem, sed iners & vappida redit cacochymia. *Cibi enim & labores adversas inter se potestates, mutuo tamen ad sanitatem conferentes, habent, labores namque ea quæ adsunt solent consumere, cibi vero & potus: quæ vacuata sunt, replere.* (b).

Quantum autem possit ad firmandum corpus nimis debile motus muscularis, dictum fuit ad num. 2. §. 25.

In his iterum à lenissima ambulatione incipiendum, sensim augendo in cursum usque: profunt imprimis corporis exercitia, quæ mentem simul delectant, dum corpus movent, ut pilæ ludus, ars gladiatoria &c. Unde & sapiens vetustas præmia proposuit illis, qui in his exercitiis gymnasticis reliquos superarent, ut sic juvenilia corpora ad bellicos labores firmarentur; Cyrus Persis, quos recte instituere semper

(a) In Dissertatione Epistolari pag. 523. 524. | l. cap. 2. Charter. Tom. VI. pag. 449.

(b) Hippocrat. de vict. ratione Sanorum Lib. I

studuerat, quasi legem dedit, ne ipsi unquam sine labore cibum caperent. (a)

3. Maximi momenti est hoc monitum, cum sæpe pro desperatis habiti morbi sanati fuerint sola leni compressione vasorum, quæ nunquam debet esse tanta, ut vasorum cavitatem integre tollat, tunc enim vita suffocaretur in parte, sed ut tantum reddat vasa angustiora, quam sine hac compressione fuissent, sic enim cavetur, ne vasa nimis debilia distendantur nimium à fluidis contentis; vasis enim capacitas non à solo distendente liquido, sed ab excessu hujus super resistantiam vasis pender: sed quo fibra plus distrahitur, eo fit debilior, hinc omne illud, quod distractionem fibræ impedit, causam debilitantem tollit; fasciæ jam vel vestes arctius appressæ corpori fulciendo vasa illud suppleant, quod deficiens solidorum robur facere non poterat, nempe impediunt nimiam dilatationem.

In morbis curandis plus per hanc methodum perficitur, quam per omnia alia. Dum hydrops anasarca crura, femora, tumida reddidit, & casu vel arte rupta cute exstillerit aqua omnis, flaccidæ pendulæ manent partes, & nisi circumductis fasciis firmaveris, paulo post æque tumidæ fiunt.

Dum asciticis perforato abdomine aquosam colluviem educunt, nisi statim circumductis loris stringant pendulum abdomen, sæpe ipso momento lethalis syncope adest, vel postea omnia in pendulas & laxas partes ruunt, & cito recrefcit dirus hydrops.

Dum dilatatis vasis stagnantia vel certe minus mota liquida hærent in cruribus, accedente imprimis scorbutica labe, toties erosa cute fiunt ulcera illa cacoëthe, ad optima quævis sæpe rebellia; fasciæ circumductæ sic constringentes partes, ut in vasis dilatatis non possint hæreere liquida, profuerunt toties.

Memini me curasse nobilem puellam, qua in genere nervoso mobiliorem nunquam vidi: à minimo sono, lumine vividiori, convellebatur ilico, miros motus cum lacerationis sensu in abdomine sentiens: nec ferulacei succi, nec adeo salubre in his casibus castorei virus, proderant: dum autem fasciis crura, femora, totum abdomen ad mammas usque firmabantur, remisit statim molestum malum, & datis dein idoneis remediis convaluit: per menses tamen sic, instar Mumiaæ Egyptiacæ ferre, fasciis circumductis vixit non invita, cum ilico tantum inde sentiret solamen.

4. Descripta hætenus fuit curatio debilitatis nimia in fibra solida simplici, quatenus per usum rerum non naturalium & chirurgica remedia (fasciarum v. g. circumductionem) perficitur: superest jam talia eligere medicamenta, quæ ingesta corpori, & naturæ viribus commissa, talem faciunt mutationem, qualis requiritur, ut fiat sanitas. Fibrarum elementa nimis debili cohæsiōe unita faciebant morbum: requirebantur ergo remedia, quæ corpori applicata facerent, ut fortior esset illa cohæsiō: talia jam in materia medica habentur.

**ACIDO AUSTERA**, quæ adstringentia vocantur: omnia hæc applicata linguae vim suam satis manifeste exserunt; totum enim os exsiccatur, constrictis omnibus exhalantium vasorum osculis; lingua ipsa contracta quasi & brevior fit: hinc Galenus (b) dixit, *gustus solius proprium est discernere, quod vim adstringendi habet*. Videtur enim omnibus his medicamentis hæc inesse proprietas, ut applicata corporis partibus faciant elementa fibrarum propius quasi ad se invicem accedere & plus cohæreere, imo vel mortuorum animalium partibus hæc applicata hoc efficiunt; dum enim coria animalium diuturna maceratione omni adhærente pingui orbaverunt coriarii,

(a) Mercurialis de Arte Gymnast. pag. 9.

(b) Meth. Med. Lib. VIII. cap. 2. Charter.

Tom. X. pag. 134.

hæc emollita penitus fere diffluunt, tunc austeris his additis debitum robur reddunt : hoc vocavit Plinius (a) coria perficere, dum de punicis malis dixit : *Corticis major usus ex acerbis ad perficienda coria*. Viliores longe quercus cortices his usibus hodie hic adhibent. Vegetabilia præcipua talibus viribus prædita in materia medica recensentur.

Sed inter acida austera fossilia reliquis fere omnibus palmam præripit ferri, in acidis vegetabilibus fermentatis soluti, usus ; quo miraculi instar tumentia illa frigida debilia corpora reviviscunt : nulla sit inde evacuatio liquidi distendentis, sed novum robur accedit vasis, quo plus contracta promoveant stagnantes fere humores : illi autem, qui evacuando curare volunt hos morbos, plus debilitant.

Dum his utuntur, sentiunt gratum calorem renasci toto corpore, subsident omnia tumentia, color pallidus labiorum, genarum &c. in rutilum sanguineum mutatur, torpor ille & ad minimos motus anhelitus cedit, & pristina redit agilitas, omnes insurgunt functiones, & nova quasi redit vita.

Idem præstat ferrum in acidulis fontibus medicatis solutum.

**SPIRITUOSIS FERMENTATIS.** Si alcohol purum affunditur sero sanguinis, vel albumini ovi, illa mox coagulat : si partes solidæ animalium in alcohole detineantur, fiunt duriores longe, & contrahuntur in omnem dimensionem ; hinc revera vis hæc accurtandi solida animalium in alcohole adest, sed simul humores coagulat : hinc in usu spirituum fermentatorum summa cautela opus est, nam duplici hoc effectu inspissandi liquida & contrahendi solida infinita mala possunt producere, si imprudenter usurpentur. In cadavere ebriosæ mulieris lien, pancreas, hepar, pulmones, sicca, scirrhusa, pro parte quasi petrefacta, glandulæ omnes internæ, externæ, inveniebantur lapideam fere habere duritiem. (b) Plurima similia apud alios leguntur Observatores.

**PRUDENTER LENITERQUE &c.** Omnia enim hæc assumpta primo agunt in ventriculum & intestina, & nunquam integris suis viribus possunt ingredi sanguinem ; tunc enim nocerent : unde debent dari pauca copia simul, & repetitis vicibus, ut diluta humoribus nostris sensim intrent in sanguinem. Acerbissimus Acaciæ Egyptiacæ succus si ad pauca grana tantum ore retineatur, omnia contrahit, omnia oris interni vascula inhalantia & exhalantia sic stringit, ut per semiquadrantem horæ os totum siccissimum maneat, si itaque illud vasorum lacteorum tenerrimis orificiis applicaretur, hæc constringendo sibi ipsi viam intercluderet : sed dum omnia hæc in primas vias agunt imprimis nec nisi multum diluta ingredi possunt lacteorum oscula, & furtim quasi se sanguini insinuare ; hinc non nisi valde jam imminutis viribus ad ultima illa venire possunt. Pulchre hic convenit monitum Galeni (c) dicentis : *Quocirca medicamento, sive id foras applicatum, sive ex illis fuerit, qua devorantur vel potantur, potestatem præsentem non oportet considerare, sed qualem habebit, ubi ad affectum locum pervenerit.*

Hæc autem acido austera, imprimis validiora, imprudenter abhibita, partim coagulando liquida, partim claudendo omnia vasa tenerrima, quæ superficiem internam ventriculi & intestinorum constituunt, miserrimos possent producere morbos.

Hinc ferrum in lenibus acidis solutum reliquis fere præfertur ; quia non tantum vi austera adstringente agit, sed sulphuris sui metallici, naturæ humanæ adeo amici, miro stimulo vires vitæ incitat.

(a) Lib. XIII. cap. 19.

(b) Académ. des Sciences l'aa 1706. Hist.

(c) De Method. Med. ad Glauc. Lib. II.

cap. 4. Charter. Tom. X. pag. 375.



§. Distractio removebat à contactu mutuo minimarum fibrarum elementa : hinc disponebat ad cohesionem nullam, i. e. rupturam. Status ille proximus rupturæ est debilissima cohesio, minima vi superaddita separanda : omne ergo quod distrahit, minuendo cohesionem, facit debilitatem. Dum chorda musica appenso pondere tenditur, fit longior, aucto adhuc pondere, extensio augetur, tandem rumpitur. Memento ante rupturam cohærebat adhuc, sed tam parum, ut exiguo pondere addito rumperetur : qui ergo tunc aufert pondera distrahentia, auget chordæ robur.

Idem in nostris fibris verum est : dum enim distendentes causæ minuuntur, crescit omni fere momento fibrarum robur, quo nituntur se accurtare. In morbis exempla evidentissima hoc docent. Homini cuidam scirrhusus tumor œsophagum sic presserat sensim auctus, ut ultimis miserrimæ vitæ mensibus non nisi paucas guttulas lactis aqua diluti, vel tenuis jusculi, & adhuc cum summa molestia, potuerit deglutire. In hujus cadavere vidi ventriculum non excedere fere sua capacitate tenuis intestini molem : tot enim septimanis nullo modo distentus fuerat ventriculus, hinc fibræ ejus sensim se sic contraxerant in tam breve spatium.

Mira enim hæc proprietas in omnibus nostri corporis partibus firmis obtinet, ut si diu in eodem contactu maneant, postea sic cohæreant, ut divelli non possint.

Dum fracto crure decumbit homo, nec Chirurgus subinde articulos leviter flectit, sanatus postea habet immobiles illas articulationes : ligamenta enim, nullo motu articuli per tot septimanas distracta, induruerunt rigida facta.

§. 29. **LAXITAS** Fibræ vocatur ea cohesio partium ( 21. ) inter se quæ parva vi potest mutari ita, ut fiat se ipsa longior ; unde patet, hanc esse debilitatis ( 24. ) speciem, & *flexilitatem* inde pendere ; adeoque hæc omnia clare ex dictis ( 21. 22. 23. 24. 25. 26. 27. 28. ) intelligi, ut & *imminutam Elasticitatem*. Namque vitrum corpus fragilissimum, arte ductum in filamenta subtiliora aranæ filo, cohæret, estque flexile quaquaversum minima vi in omnes spiras, absque ruptura. Crescit pro subtilitate flexilitas. *Ac. Reg. Sc.* 1713. *Hist.* 11.

**LAXITAS.** Debilitas fibrarum nimia dicebatur adesse, quando non poterant, manente cohesione, sustinere illum impetum, qui ex sanitatis actionibus fieri debebat ; vel licet perfectissimæ sanitatis efficaciam sustinere possent, aucto parum motu ( quod in vita humana inevitabile est ) rumpebantur. Laxitas autem nimia adesse intelligitur, quando fibræ impetum vitalis motus sine solutione cohesionis quidem ferunt, sed à parva vi distractæ nimis, fiant se ipsis longiores.

Filum sericeum, appensum, pondus sine ruptura sustinere non potens, fibræ nimis debilis ideam dat : filum autem ex plumbo mollissimo factum, eodem pondere statim immaniter elongandum sine ruptura tam facili, fibræ nimis laxæ speciem præbet.

Sed à debita laxitate pendet

**FLEXILITAS** : ut enim omnia illa fiant in corpore, quæ per motum humorum, vasorum, muscutorum, facta quotidie observantur, debebant solidarum partium elementa partim à contactu mutari, partimque in eo permanere, hinc elongari posse ; ut flectantur v. g. articuli, debent ligamenta coërcentia posse elongari ; requiritur hinc certus laxitatis gradus, ut sanitas sit, si augeatur, morbus est.

E ij

*IMMINUTAM Elasticitatem.* Fibrarum Elasticitas in hoc consistit, quod extendi possunt, & ablata vi extendente iterum ad pristinam longitudinem redeant.

Sed tota hæc vis est tantum nixus, quo partes minimæ fibræ constituentes se invicem trahunt, dum per elongationem superficierum plus distant, manente tamen cohesione: si ergo à quacumque causa fibra sit nimis debilis, id est, partes ejus se invicem minus valido nixu trahunt, necessario minuitur elasticitas.

Vasa nostra majora ex minoribus componuntur; hæc adhuc ex multo minoribus sunt, sic ut hætenus nullus limes in Anatomicis demonstratus sit: musculi ex minoribus musculis, & quæ nobis nudo oculo fibra muscularis apparet, microscopio illustrata fibrarum longe minorum fasciculum exhibet.

Idem in nervis &c. observatur: hinc videntur omnes partes corporis ex infinite parvis similibus constare: hoc autem requirebatur ad flexilitatem partium: & experimento hic allegato patet, quomodo fragilissimum corpus ( vitrum ) simplici divisione in tenuissima filamenta reddatur ductile adeo, ut, textoris artibus illud adhiberi posse aliquando, non desperaverit acutissimus Reaumur (a) Fictitiam ex vitro in fila ducto comam vidi, in qua vitrum sine ruptura poterat in cincinos crispari.

§. 30. **Q**UIN ex iisdem etiã respondetur ad hæc quæsitã: Cur aquosa, & pingua alimenta dant fibras debiles? Cur frigidis, junioribus, quiescentibus, crescentibusque debiles? Cur terrestria, austeraque dant fibras fortes? Cur calidis, exercitatisque fortes? Cur Elasticitas robur concomitatur?

**CUR AQUOSA ET PINGUA &c.** Experimenta hoc docent: durissimæ enim animalium partes tepidæ aquæ, vaporis imprimis, expositæ, redduntur molliissimæ. Annosa cervorum cornua vapore tepidæ aquæ, vel & ebullientis, ut in præparatione cornu cervi philosophica officinarum fit, fiunt scissilia.

Dum quotidie tepidos potus aquosos sorbillant puellæ, quam debiles quam flaccidæ fiunt! In libro de liquidorum usu Hippocrati adscripto (b) noxæ recensentur, quas calida copiosior adfert utentibus, facit nempe *carnium effæmationem, nervorum impotentiam, mentis stuporem, hæmorrhagias, animi deliquia.*

Debilis fibræ in facile separabili cohesione partium consistit, sed aquæ elementa parum admodum coherent: hinc forte si binæ vel plures aquæ particule se interponant elementis fibrarum, videtur inde debilior reddi fibra; si vero singulæ hæreant aquæ particule inter elementa fibrarum, multo inde rigidiores fiunt: elementa enim aquæ sola seorsim considerata videntur esse durissima & immutabilia, & miro modo concrefcere possunt cum aliis corporibus, ut in explicatione §. 21. demonstratum est: hinc forte ratio deduci potest, quare partes animalium aqua madefactæ fiant molliores; exsiccata iterum longe fiant rigidiores, quam antea fuerant. Posse autem aquam se insinuare inter elementa corporum & illa à contactu remove, docuerunt experimenta: chartarum lacinia aqua madefactæ fere sexta parte fiebant longiores. (c)

Similem ob causam pingua mollire solidas partes plurima docent experimenta:

(a) Acad. des Sciences l'an 1713. Mem. pag. 279. Aph. 16. Sect. 5. Charter. Tom. IX. pag. 203.

(b) Cap. 2. Charter. Tom. VI. p. 444. & (c) Acad. des Sciences l'an 1714. Mem. pag. 72.

rigidissima animalium coria, oleo penetrata, mollescunt; ut debitam flexilitatem retineant muscoli, vaginis oleosis undique vestiuntur; ne rigescant ligamenta, attenuatum medullare oleum illis affunditur: dum in decrepita senectute illud oleum incipit deficere, quanta rigiditas! Dum in obesio nimis abundat, quanta laxitas, quantus tumor totius debilitatæ compagis!

**CUR FRIGIDIS.** Intelliguntur hic frigidi temperie: frigus enim absolute consideratum elementa ad se invicem adducendo roborat. Sed in frigida temperie hominibus minor est circulatio, sanguinem habent minus pressum, cruda minime mutata, elementa ultima minori vi ad invicem applicata; hinc minus cohærent.

**JUNIORIBUS.** In prima origine sua Embryo humanus infinitæ parvitatæ fere molecula est: auctus dein, & jam sensibus observabilis, muci instar collabitur; nisi liquidi ambientis pressione æquabili sustineatur. Recens natus infans mollis totus & pulposus omnia adhuc ossa flexilia habet; procedente ætate firmior fit sensim: hinc quo origini suæ propior homo est, eo molliores habet omnes partes suas: hinc fibræ ejus, licet debitam firmitatem habeant in hac ætate, comparatæ tamen cum adulti hominis fibris debiles dici possunt: hoc autem requirebatur, ut in omnem dimensionem facile extendi posset corpus humanum, ex tantilla molecula in tam magnam molem excrescens.

**QUIESCENTIBUS.** Vide §. 25. num. 2. Dum nolunt à languidis suis morbis curatæ puellæ, per salubrem ferri usum, exercere corpus, quam cito relabuntur in pristinum languorem! languentes hydropicos laborare jussit Hippocrates; acutis morbis decumbentibus absolutam imperabat quietem: in his enim nimia vitæ incitatæ per febrim actuositas consumeat omnia liquida, solida reddebat siccissima: hinc tota fere cura acutissimorum morborum in eo consistit, ut diathesis ad hydroperem inducatur, id est, major debilitas.

**CRESCENTIBUS.** Humores pulsi per canales conicos plenos à basi versus apicem semper conantur producere latera suorum canalium secundum axim longitudinis: quamdiu cedere possunt & elongari canales ab hac vi crescit homo: hinc requiritur minus firma cohæsiō, ut cedere possint; sed videmus incrementum omnium velocissimum: dum origini suæ propior est homo, & tunc fere non resistantia solida habet: crescit enim intra novem menses ex stamine omnem sensum fugiente in molem sedecim imo viginti aliquando librarum.

Sed & observamus in juvene, nondum incrementi apicem adepto, natam febrim facile adhuc elonganda vasa producere sensibili admodum staturæ augmento. Requiritur ergo ad incrementum minus firma fibrarum cohæsiō, ut cedere possint: dum ergo valido labore nimis durantur juniorum corpora, incremento obex ponitur ante tempus. An ideo, qui caniculos nutriunt, parvitate suâ puellis gratissimos, illis junioribus quotidie vini spiritum ingerunt?

**CUR TERRESTRIA ET AUSTERA.** De austeris dictum fuit §. 28. n°. 4. nempe talia corpora videntur per experimenta prædita esse tali vi, ut elementa nostrarum fibrarum ad se invicem propius faciant accedere. Terrestria autem illa bibula corpora attrahunt omnia humida, quæ possunt attingere; & deinde concrescunt cum illis firmissime: fistula tabacaria recens excocta, nulla crusta vitrea obducta, labiis admota, mox pertinacissime cohæret, sic ut vix sine læsione avelli possit. Cum ergo aquosa, ut ex ante dictis patuit, debilitent fibras; illa, quæ aquam absorbent, inter roborantia recenseri possunt.

**CUR CALIDIS.** Calor externus corpori applicatus omnia debilitat ; facit enim elementa fibrarum plus distare à se invicem : hinc fibras reddit debiliores. Sed hic intelliguntur calidi temperie, in quibus densi & compacti humores satis valido motu pelluntur per vasa : in his semper vis assimilans ingesta fortis est, & efficacissima applicatio elementorum fibrarum ad se invicem. Ab his autem robur fibrarum pendet.

Quantum intersit inter calorem excitatum per validum corporis motum, & calorem foci, docemur ubique. Qui hyeme prope focum frigus pellit, surget iners & debilis ; qui valido motu corporis aeris frigus superare potuit, alacris & agilis manet.

**EXERCITATIS.** Dictum fuit de hac re §. 25. num. 2. dum duro labore victum sibi & suis comparat rusticus, quam firma habet omnia, quam robusta ! Omnes aeris injurias spernit, durissimos vorans cibos digerit perfectissime : otio & luxu perditus homo quam debilis, quam misere vivit ! Minimam aeris ambientis mutationem sentit ilico ; & millenis gulæ irritamentis, quæ satietas, non fames, invenit, vix potest languentem excitare ventriculum.

**CUR ELASTICITAS &c.** Elastica dicuntur corpora, quæ distracta redeunt in tot puncta contactus, quot ante distensionem habebant : hinc requiritur valida vis, qua partes distractæ se mutuo trahant : sed in hac vi consistit fibrarum robur.

Exemplum sequens hanc rem illustrat. Bini magnetes sibi mutuo applicati cohererent : si parum removeantur à se invicem, sed maneant tamen in tali distantia, in qua in se mutuo agere possunt, iterum uniuntur : sic & corporis elastici partes distractæ à se invicem, ablata causa distrahente, iterum se mutuo attrahunt, & manet pristina cohesio : dum debili leucophlegmaticæ puellæ premitur digitis pars corporis, pastacea mollicie cedit, & vix, nec nisi lente, resurgit : si valido homini idem fiat, elasticæ partes mox se restituunt.

Sic jam descriptus fuit morbus simplicissimus, & data fuit methodus, per quam ejus indolem cognoscimus ; Dein enarratæ sunt causæ, quæ illum faciunt : Appa-ruit porro, quinam effectus præter naturam hic soleant oriri ; quomodo futura inde prævideamus ; & quomodo ex cognita historia morbi, per sua signa descripti, habeatur indicatio, quæ docet, quomodo & per quæ Medicus debeat agere, ut sanet. Tandem ex omnibus illis deducta fuerunt quædam Corollaria generalia.

Raro autem sola debilitas fibræ solidæ simplicis peccat, sed plura mala simul : sed tamen hæc debebant sic abstracte considerari, ut liquido intelligerentur ; unde supponebatur homo perfecte sanus, sed qui momento post haberet à quacumque causâ fibras nimis debiles.



## MORBI FIBRÆ RIGIDÆ ET ELASTICÆ.

§. 31. **RIGIDITAS** fibræ nimia est illa adunatio partium minimarum ( 21 ), quæ tam valide faciat eas coherere, ut non cedant illi actioni fluidorum, quæ superare debet hanc resisten-  
tiam, ut maneat Sanitas.

Tota nostra vita & sanitas pendet ab eo, quod omnes fibræ omnium arteriarum sint adeo flexiles, ut à sanguine, cordis vi musculari expulso, possint sic distendi,

ut capiant illum sanguinem expulsum : dum enim cor est in sua diastole, arteriæ & venæ plenæ sunt, aliter non daretur propulsio continuata sanguinis. Momento post cor in sua systole expellit sanguinem in arterias plenas, & per has in venas etiam plenas : hinc si vasa illa infinita vi resisterent suæ dilatationi, nec sanguis tamen sit adeo compressibilis, non posset cor evacuari : actum ergo esset de vita. Requiritur igitur fibrarum, hæc vasa constituentium, talis laxitas, ut possint cedere dis-tendenti sanguini, à corde expulso in plena hæc vasa. Quo jam sunt rigidiores hæc fibræ, eo major fit resistentia.

Hinc, æque ac in fibra debili dictum, non potest dari absoluta definitio fibræ nimis rigidæ, sed tantum cum relatione ad variam ætatem &c. ut tenelli embryonis corculum sufficeret dilatandis vasis, propulso sanguine, requirebatur tam parva co-hæsiō, ut muci instar fere disfluere omnia solida.

§. 32. **H**ÆC (31.) sequitur eas causas, quas requirit sanatio fi-bræ debilis (28), si diu, & nimis perseverant.

Fibræ nimis debilis historia præmissa est, quia curatio hujus morbi dat intellec-tum causarum fibræ nimis rigidæ. Omnia ergo in cura fibræ nimis debilis hic re-petenda forent : sed unicum exemplum sufficiet.

Moderatus labor corpora roborat : nimius exsiccat, & omnia rigida facit. Dum à teneris annis jam nimis laboribus coguntur corpus exercere rustici, sæpe quadra-gesimo anno jam exsuccī & rigidi marasmo senili pereunt, ante ætatem incurvo cor-pore vera facti silicernia.

§. 33. **N**ATA (31) vero facit vasa, quæ ex his fiunt, minus fle-xibilia, angustiora, breviora, liquidorum motui nimis resistentia, & quæ hinc sequuntur ; vid. (50. 51. 52. 53.)

Vasa nostra semper renituntur suæ distensionī : hinc illorum capacitas pendet ab ex-cessu virium distendentium supra hanc contractilitatem. Quando ergo increfcit hæc vis contractilis vasorum, eademque manet vis distendens, plus contrahentur vasa, id est, fiunt angustiora. Ultimus hujus morbi gradus est, quando vasa nullo modo cedunt liquidis distendentibus ; hinc suffocatur ilico motus sanguinis, & fit placi-dissima illa senilis mors, dum in ultima senectute rigida facta omnia resistunt flui-dis impulsis. Simulac quacumque de causa liquida minuuntur, robur vasorum sic coarctat vasa, ut plena maneant quidem, longe minus tamen distenta.

Homo potest intra 14. dies in febre acuta continua dimidium sui ponderis perdere contractis sic vasis, prout minuitur liquidi copia. Hoc evidenter patet, quia omnia animalia, in quibus augetur robur fibrarum, habent vasa magis contracta.

Dum pastu abundans in stabulis quiescens equus, hinc pinguior factus, sensim aucto motu validis tandem quotidie exercetur laboribus, forte tertiam sui ponderis partem amittit ; longe tamen ad labores ferendos erit robustior ; & per hosce labo-res consolidatis vasorum fibris, licet postea quiescat in stabulis, non tam cito pin-guescet iterum.

BREVIORA. Impetus liquidi impulsī per canales conicos flexiles nititur elon-gare hos canales ; hinc quamdiu fibrarum co-hæsiō hoc patitur, elongantur : docet



hoc juniorum incrementum tam notabile, post morbum acutum toleratum. Memini me vidisse, dum uno ictu cunei fortis & acuti abscindebatur magnus pedis digitus, statim extra æquabilem vulneris superficiem prominuisse binas arterias, fere ad lineæ geometricæ longitudinem: tantum elongabantur hæc vasa in loco tam diffito à corde. Quando nimia oritur fibrarum rigiditas, non patiuntur se elongari; imo tandem, prævalente fibrarum robore, accurtantur: Patet in senibus, qui revera decrefcunt.

**LIQUIDORUM MOTU** &c. Dum cor pellit per arterias sanguinem, pars impetus à corde communicati impenditur dilatandis arteriis; reliqua pars sanguinem propellit per arterias. Si ergo arteriæ fiant minus facile dilatabiles, i. e. rigidiores, plus de motu à corde communicato impendi debet dilatationi arteriarum, minus impenderetur sanguinis propulsi. Hinc patet evidenter, quare fibræ nimis rigidæ augeant resistentias liquidis movendis.

Sed à debito motu humorum per vasa pendent omnia in corpore humano: hinc infinita possunt à tam simplici causa oriri mala, de quibus postea in numeris citatis.

§. 34. **E**X quibus (31. 32. 33.) ipsis internoscitur id malum (31), simulque prævidentur inde secuturi effectus (33), neque latet Curatio.

Ex tribus §§. præcedentibus facile colligitur diagnosi, quæ docet, an fibrarum nimia rigiditas adsit? si enim videamus hominem esse macilentum, os internum & fauces habere sicciora, totam cutim externam esse aridiorem, omnes articulationes minus flexiles; & manere hæc omnia, licet implentia adhibeantur corpori; concludimus, solida nimis firma esse, liquidis prævalere, illa celerrime disflare. Sunt tales homines macilenti penitus, & simul voracissimi, qui omnia assumpta digerunt velocissime, & de corpore disflant.

Si jam novimus in victu & medicamentis adhibita illa esse, quæ in curatione fibræ nimis debilis enarrata sunt, prævidemus, hunc morbum nimie rigiditas futurum.

Prout jam hæc rigiditas nimia in parte vel in toto fit, varii & mirabiles oriri possunt morbi: Observationes enim medicæ docuerunt, omnes cognitos canales nostri corporis rigescere posse, sæpe à causis adeo subtilibus, ut nulla ratione possint detegi.

Sic aliquando digitus, aliquando brachium integrum ita sensim decrefcit, & aridum fit: si enim resistentia vasorum à quacumque causa fiat major, minor erit extensio: hinc lentissimus marasmus. Vidi fœminam nondum quadragenariam, cui sine ullo vitio sensibili corporis, sine ulla suspitione internæ suppurationis, sine ulla evacuatione sensibili aucta, intra biennium lento marasmo tam exsuccum redditum fuerat corpus, ut squalida cutis ossæ tantum tegeret. Forte similes morbos vocaverunt veteres Medici *αἰσχρογῆρας* (a) *ex morbo senectutem*.

In Observationibus suis Anatomicis accuratissimis Santorini (b) narrat, dum scrutabatur cadaver hominis, cui dexter oculus vera amaurosi dudum laboraverat, invenisse se nervum opticum ejusdem lateris æquo graciliorem, & colore obscuriorem. In hoc casu videtur à latente causa nimia rigiditas forte orta fuisse in nervo optico dextro. Idem si fiat in aliis organis sensuum, vel in visceribus, infiniti diversi morbi oriri possunt.

(a) Gal. Method. Med. Lib. VII. cap. 6. | (b) Cap. 3. §. 14. pag. 64. Charter. Tom. X. pag. 167.

Ex illis omnibus jam facile inveniuntur auxilia ad nimiam rigiditatem tollendam apta, quæ recensentur §. sequenti.

§. 35. **H**ÆC enim efficitur 1. cibo & potu aquosis, lenibusque; sero lactis imprimis, oleribus mollissimis, farinosis dilutis, nec fermentatis. 2. Quiete in aëre humido frigidiusculo, cum somno pleniore. 3. Remediis aquosis externis, internisque, tepide applicatis, vel assumptis, insulsis, levissimis & blandissimis oleosis, similiter adhibitis.

1. CIBO ET POTU AQUOSIS &c. Vocamus potum aquosum vel aquam ipsam, vel omnem potum, in quo aqua prædominatur. Cibos aquosos vocamus omnes illos, in quibus aqua maximam partem constituit: ut sunt pulcullæ, carniū juscula & similia. Omnia hæc assumpta magnam aquæ copiam interno corpori applicant, per omnia vasa deducunt, omnia emolliunt, omnia lubricant; hæc enim aquæ, & imprimis tepidæ virtus est ut partes animalium durissimas possit emollire: sic cornua, ungues, imo ipsa ossa aqua tepida possumus mollia reddere.

Hinc videmus, omnes illas gentes, quæ calidissimis locis viventes strictissima habent corpora, aquam & aquosa sola fere appetere. Non mirum debet videri, quod serum lactis hic commendetur, cum lactis usus ad roborandas fibras nimis debiles antea laudatus fuerit: sed in sero lactis abest jam subtilissimum illud spirituosum, abest pars caseosa; superest sola pars aquosa graminis vi dissolvente dives. Imprimis laudatur ad hos usus serum lactis ebutyrati, omni pinguedine butyracea orbum, acidulum; quod hinc in morbis acutis tanti usus est. Huc etiam referuntur omnes succi fructuum horæorum bene maturi.

OLERIBUS MOLLISSIMIS. Omnia hæc recensita sunt in Materie Medica Celeberrimi Autoris: & in omnibus his fere nec magnus odor nec sapor est, sed aquosam quasi mucilaginem emollientissimam exhibent. Juscula inde facta strictis illis atrabilariis corporibus adeo salubria sunt.

FARINOSIS DILUTIS. Dum strictissimis corporibus, in quibus semper sunt densi & compacti humores, ingeritur aqua, diffatur ilico, nec diu manet in corpore. Hoc toties dolemus in morbis acutis, quod aqua ingesta ilico per sudores vel urinam dilabatur; sed aquæ addiderunt farinosa in illa Materie Medica descripta hoc effectu, ut semel ingesta aqua farinosa hoc lentore plus quasi hæreat, non tam cito expellatur de corpore. Hæc videtur esse ratio quare Hippocrates (a) aquæ potum damnet in acutis, dum in eodem libro ptisanæ usum adeo laudat. Omnia hæc farinosa lentorem aquæ conciliant, atque tecto & aquæ miscibili oleo (quod purum ex illis exprimi potest) emolliunt omnia. Solum certe avenæ decoctum, magna copia potatum quotidie, sic solvit totius corporis robur vel in validissimo homine, ut totus inde langueat. Sola farina, sero lactis vel aqua subacta, sues adeo laxos, adeo pingues noverunt reddere rustici.

Plurimi in his locis de plebe homines sedentarios labores, nec validos, exercentes, interim his farinosis fere solis vitam sustentantes, laxissima semper habent corpora.

(a) De Victu Acutor. Morbor. Charter. Tom. XI. pag. 101.



**NEC FERMENTATIS.** Idem de succis fructuum horarum verum est: nam & inter remedia fibræ debilis recensentur merito spirituosæ fermentatæ. Per fermentationem enim ex omnibus his nascuntur liquida illa spirituosæ, quæ ad summam perfectionem redacta, ignis fere instar, omnia solida corporis comburunt, & sanguinem densant in massas irresolubiles.

2. **QUIETE** &c. Motus muscularis præcipuum remedium habebatur ad curandam fibræ nimis debilem; non mirum ergo si quies contrarium faciat. Qui citissime volunt saginare animalia, illa semper ab omni motu prohibent, largo dato simul pabulo. Hinc in morbis acutis, ubi omnia adeo exsiccantur, quietem summam, imprimis in aere frigidiusculo & humido, imperaverunt veteres Medici: frigidus enim & siccus aer roborat fibras.

Nihil autem magis laxat corpora, quam tepor lecti, dum somno largiori indulgent agri: hærent enim sic in proprio vaporum de corpore exhalantium balneo. Hinc omnia animalia à somno tument. Dixit ideo Hippocrates (a): *Longiores vero somni calefacientes colliquant carnem, & corpus diffundendo resolvunt, & imbecillum reddunt.*

Et alibi (b): *In quibuscunque morbis siccitas confert, conducit quam minimum dormire. Quibus vero humiditas confert, non debent inedia pati, nec cibo aut potu indigere, neque laborare, & dormire quantum volunt.*

3. **Primarium** inter hæc, & reliquorum omnium basis est aqua: quæ tepida, & in vapores resoluta, vel durissimas animalium partes sic emollire potest, ut disfluant fere. In morbis acutis, ubi sæpe aridissima cutis, contractis penitus vasis exhalantibus, nihil transpirat, frustra nituntur calidissimis remediis exhibitis provocare sudorem; dum vero nudato corpore tepidæ aquæ vapor exponuntur agri, resolutis vasorum osculis, madescit cutis, & brevi post sudoribus disfluunt. Cum autem in his morbis interna æque sicca sint, ac externa cutis, per clysmata similia injiciuntur, aquosa cum farinaceis decocta exhibentur, ut emolliantur omnia interna: imo dum nimis diu aquosis his debilitant corpus, sæpe oppositum malum, hydropem nempe, inducunt.

Omnia hæc aquosa debent applicari tepida: frigida enim densant fibras & roborant; nimis calida sanguinem coagulant, & in crustam gangrænosam solida comburunt.

Omnia autem hæc insulsa debent esse, quia sales omnia indurant: docent hoc carnes salitæ. Summum simul auxilium dant.

**OLEOSA BLANDA.** Certe coria animalium aqua madefacta fiunt flaccida; sed postea exsiccata plus rigescunt: si vero cum oleo perfricentur, manent diutissime mollia: plus enim adhæret, nec tam cito disflatur oleum. Dum spasmo contractæ intestinorum fibræ horrendos illos faciunt cruciatus, mollissima olea, ad libras usque potata, & per clysmata injecta, solvunt hoc strictum laxatis fibris.

In morbis acutis, ubi summa ariditas, & nimium solidorum robur per morbum nascitur, vel sæpe præexistit, egregie hæc conducerent, nisi auctus calor facile rancescentia hæc olea corrumperet, & ex blandissimis faceret acerrima: sed tunc decocta ex farinosis illis, in Materia Medica recensitis, oleorum vicem pulchre supplent: ex omnibus enim illis, imprimis siccatis, prælo potest exprimi purum & copiosum oleum, quod in decoctis horum mucilagini unitum sic latet, ut integram

(a) De victus ratione Sanorum Lib. II. cap. I. (b) De Affectionibus cap. 12. Charter. Tom. 10. Charter. Tom. VI. pag. 474. | VII. pag. 632.

vim emolliendi, quam olea habent, seruet, sine ullo metu futuræ rancidatis.

Dum topicum hæret in quodam articulo, rigiditatis nimie vitium ( sæpe enim anchyloses fiunt à nimia duritie ligamentorum, quæ non patiuntur se extendi, ut flectatur articulus ) optimo cum successu curatur, dum pars affecta lixivio saponis bene perfricatur undique, ut tota terfa nitida & perspirabilis sit; & tunc vaporì tepidæ aquæ exponantur sæpius de die; porro exsiccata pars mollissimo inungatur oleo; & dein lenis fiat distractio nimis rigidorum ligamentorum, flectendo articulum. Inter causas enim fibræ debilis recenscebatur nimia distractio: hinc post hæc præmissa sum mopere prodest distendere nimis rigidas partes.

Dum volebant emaciatas partes ad pristinum reducere habitum Veteres, irritabant hæc loca, ut levis fieret inflammatio, & tumor, sic enim majori impetu & celeritate huc delati humores plus distendebant vasa nimis stricta. Dum autem hoc sæpius fieret, nimium robur vasorum sic minuebatur, ut cederet humoribus, ex lege sanitatis influentibus; atque ita redibat pristina torositas: sic frictione à somno cum pinguibus multos longo tempore macie tabescentes paucis diebus facile carne implevit Galenus, (a).

Hinc frictiones quidem hic conveniunt sed cum pinguibus, & tantum ut fiat levis rubor: si enim ultra pergas, discutitur illud, quod frictio attraxit ad partem; hic autem requiritur distensio major vasorum nimis fortium; hoc sollicitè monuit (b) Galenus dicens. *Ideoque ubi carne implere quodlibet corpus volumus, id eo usque calefaciendum nobis est, dum intumescat: ubi vero discutere & vacuare cupimus, continuandum est eo usque, dum, quod intumuit, subsidat.*

Sic alibi (c) dicit, *Ferulas parvas ac leves modice illitas gracilibus partibus incutiunt, donec modice attollantur.* Tali percussione nates pueri graciliores brevi auctas fuisse narrat, dum hoc fiebat quotidie vel alternis diebus, una cum moderata picatione.

Hinc apparet, quomodo frictio oppositos habeat aliquando effectus: fortis nempe, cum pannis asperis, siccis, laneis, imprimis accenso aromatum fumo penetratis, debiles nimis fibras curat; levis frictio cum pinguibus attrahendo humores, laxando solida, fibras nimis rigidas emollit.

### § 36. HINC Elasticitas nimia intelligitur, curaturque, quippe rigiditatis ( 31. ) ut plurimum comes, & effectus.

Explicatum fuit, quid sit rigiditas, quæ semper cum elasticitate eadem proportionè progreditur; perfecte enim rigidum corpus, quod nulla vi flecti posset, non facile invenitur. Hinc cum elasticitas ( ut dictum fuit in §. 29. ) pendeat ab illa vi, qua partes fibram constituentes nituntur ut cohæreant, hæc autem vis major sit in fibra nimis rigida; patet facile, quod nimia elasticitas rigiditatem nimiam comitetur semper.

Ex argilla molli facti globi, opposita directione motus concurrentes, quiescunt; in clibano excocti, fiunt elastici, & resiliunt à se mutuo.

(a) De Sanitate tuenda Lib. V. cap. 3. Character. Tom. VI. pag. 143.

Tom. X. pag. 161. &c.

(b) Meth. Med. Lib. VII. cap. 6. Character.

(c) Meth. Medendi Lib. XIV. cap. 16. Character, Tom. X. pag. 336.

§. 37. **CUR** pueris, fœminis, otiosis laxitas? contra vero adultis, viris, exercitatis, fibrarum, adeoque omnium solidarum partium rigiditas, & solutarum valida contractio?

**CUR PUERIS.** Vide §. 30. nondum enim in his fibræ & vasa callosa facta sunt, quod vitæ ætuoſitate poſtea fiet.


**FŒMINIS.** Ab Anatomicis confirmatur, fœmininum corpus, cæteris paribus longe mollius eſſe corpore virili. Hoc autem à Creatoris instituto pendet, qui ſic fecit corpus fœmininum, ut, ſine multo malo poſſit diſtendi quam maxime; ut nempe fœtum poſſint locare & nutrire, & menſtruam plethoram accumulare. Multum etiam huc confert, quod plerumque minus validis laboribus exerceantur, quam viri.

**OTIOSIS.** Vide §. 25. n°. 2. & §. 30.

**CONTRA VERO ADULTIS.** Quia quo diutius vixit homo, eo vires conſolidantes ſæpius & fortius applicatæ fuerunt fibris: hinc creſcente ætate creſcit fibrarum robur. Puer omnia habet flexilia & obſequioſa membra, decrepituſ vero ſenex in omnibus rigeſcit, nec ratio dari poteſt, cur hoc in viris plus fiat, cæteris paribus, quam in fœminis, niſi ex primogenita corporis fabrica ab instituto Creatoris pendente.

**EXERCITATIS.** Quid corporis exercitia poſſint in roboranda fibra nimis debili, dictum fuit §. 28. n°. 2. Illud enim, quod vocamus tenacitatem in partibus firmis, eſt continuatæ vitæ effectus: ſed quo minus quis motum animaleſ ſuperaddit motui vitali, eo ſolida debiliora manent. Qui nullum opus manibus exercet, habet manus molles & teneras; qui valide illis operatur, eaſdem habebit duras & calloſas; tandemque immobiles & rigidas.

**ET SOLUTARUM &c.** Quando unitatis ſolutio fit in parte ſolida in corpore vivente, ſemper partes ſolutæ retrahuntur à ſe invicem, quia vis illa, qua cohærent fibrarum elementa, neceſſario retrahit utrumque extremum: quo ergo hæc vis fortior eſt, eo major fiet hiatus partium ſeparatarum: hinc vulnuſ in corpore laxo ſtatim coaleſcit; in corpore rigido plus hiant vulnera inſicta, & difficilius conſolidantur.



## MORBI VASORUM MINIMORUM, ET MAJORUM.

§. 38. **VASORUM** minimorum, ex fibris ſimplicibus (21. 23.) applicatu, intertextu, vel intortu, adunatis, factorum morbi ex iſdem cauſis eandem indolem, effectum, & curationem habent; ergo ex dictis (ab 21. ad 38.) intelliguntur.

Morbis fibrarum conſideratis, hincque etiam omnium partium solidarum corpo-

ris, quatenus fibris constant, apparuit, ad qualem simplicitatem potuerint reduci hi morbi, qui in omnibus partibus solidis occurrunt.

Sicut jam elementa sibi mutuo applicata fibram solidam constituunt, sic possumus concipere fibras minimas sibi mutuo apponi in omnibus punctis laterum contiguum, quando sic cohærent secundum longitudinem tantum. Si duæ tales fibræ sibi mutuo applicentur paralelo ductu, erit membrana omnium minima, si millenæ juxta se invicem positæ uniantur, erit membrana latior, non crassior. Hinc membrana simplicissima concipitur constare fibris secundum longitudinem adunatis.

Robur jam fibrarum pendeat à cohæsione elementorum; sed singula elementa fibræ, membranam simplicissimam constituentis, cohærent cum elementis binarum fibrarum proximarum utrimque; hinc duplo majus robur fibræ aliis fibris utrimque junctæ, respectu roboris in fibra simplici.

Hinc fibrarum robur crescit, dum in membrana simplicissima adunantur. Fibræ autem, quæ ultimos limites membranæ simplicissimæ constituunt, cum tantum ab uno latere contiguam aliam fibram habeant, tantum dimidio majorem vim cohæsionis suorum elementorum habent, quam fibra simplex.

Dum jam intertextis, vel intortis inter se, fibris membrana constat; multiplicatis punctis, quibus se contingunt, augetur fibrarum, talem membranam constituentium, robur.

Hinc patet, illam partem membranæ simplicissimæ facillime à cohæsione cum reliquis posse separari, quæ marginem constituit.

Si jam concipiatur talis membrana simplicissima convolvi in vas cavum, tunc omnes fibræ inter duas alias fibras positæ sunt, & nulli tunc habentur margines; sed omnium fibrarum, constituentium membranam simplicissimam, in vas cavum convolutam, cohæsio duplo fortior est, quam in fibra solida simplici.

Illud jam vas, ex tali membrana simplicissima convoluta factum, vocatur vas minimum.

Sed omnes morbi talis vasculi minimi tantum pendent à nimia, vel nimis parva vi, qua fibrarum elementa cum se invicem & cum vicinis cohærent. De illis autem jam actum est in morbis fibræ simplicis.

§. 39. **V**ASA majora, ex minimis ( 38 ), applicatu, intertextu, vel intortu, unitis, conflata habent duo diversa morborum genera. Horum prius pendet ex morbis minimi canalibus ( 38 ), majorem hunc componentis, adeoque origo, natura, efficacia, curatio ejus inde ( 38 ) peti debet. Posterius vero pendet, 1. à vi, qua fluidum, per majorem hunc canalem fluens, ejus latera extendendo premit: quæ latera, ex aliis minoribus canalibus constantia, hac pressione orbantur suo liquido, uniuntur quoad latera concrescunt in fibræ ( 21. 23. ) solidæ sed crassioris, speciem: potestque idem & vicinis communicari vasculis; 2. à liquido cum vasculo proprio concrecente.

Uti jam fibræ, adunatæ secundum longitudinem, faciebant membranam, sic

F iij

possumus concipere, vascula minima, ex simplicissima membrana convoluta facta, sibi mutuo applicari, & facere membranam; quæ iterum convoluta faciet vas, non minimum, sed majus jam; non ex fibris, sed ex vasis minimis fibrarum loco conflatum.

Cum jam vasorum horum minimorum sectio perpendicularis ad axim sit circulus, non poterunt singuli circuli adjacentium sibi mutuo vasorum se tangere nisi in puncto: hinc vascula vicina se mutuo tangent per lineam, i. e. per fibram simplicissimam: ergo in illis locis contactuum iterum augebitur robur talis membranæ ex vasculis minimis loco fibrarum conflata.

Vas ergo minimum constabit ex fibris in membranam adunatis: vas huic proximum magnitudine, sive penultimum simplicitate erit, si ejus membrana constet ex vasculis minimis loco fibrarum: vas antepenultimum simplicitate non constituitur ex vasis minimis, uti penultimum, sed ex vasis minimis & penultimis; & sic porro, donec ad maxima corporis vasa perveniatur, quæ ex omnium vasorum seriebus, quæ in corpore inveniuntur, fiunt.

Aorta, maximum vas, per injectiones demonstrata fuit constare membranis ex minoribus vasis, sed adhuc magnis, conflatis: horum vasorum aortæ membranas constituentium, membranæ iterum aliis, sed minoribus, constant vasculis; & sic porro, donec ad ultima perveniatur. Simplicissimas olim habitas & solidas membranas innumeris constare vasculis, docuit arte sua Ruyschius.

Hinc ex multiplici concretionem laterum robur continuo augetur in vasis majoribus; & sic incipimus intelligere, unde robur & firmitas corporis humani pendeant.

Quæritur jam, quinam morbi in vasis majoribus oriri possint, non respectu fluidorum contentorum, sed quatenus solida sunt hæc vasa? Apparet primo quod pati possint omnes morbos vasorum minimorum, ex quibus componuntur; sed de his actum est.

**POSTERIUS VERO PENDET.** I. Dum aorta à sanguine ex corde sinistro expulso distenditur, canales constituentes ejus membranas comprimuntur: dum iterum cessat cordis actio, contrahens se aorta liberat hos canales ab hac compressione. Sed dum omni momento sic comprimuntur vascula minima constituenta membranas majorum vasorum, hæc sensim sic incipiunt orbari suis liquidis, ut vix detur tempus influxui: tunc concrescunt latera inter se, & aboletur cavitas, & fit membrana, sed crassior & fortior: cohæsiō enim membranæ in vas convolutæ erat duplo fortior, quam cohæsiō fibræ simplicis, sed dum vas complanatum concrescit, tunc oppositæ fibræ concrescunt, & fiet talis membranæ, ex vase complanato concreto factæ, cohæsiō adhuc fortior, quam antea.

Quo jam vis cordis major est, & diutius egit, eo pauciora numero vasa, sed fortiora solida sunt. Hinc ultima senectute robur solidorum fit immensum; & tandem, cum nimis resistentes canales non patiantur se extendi amplius à liquidis impulsis, fit quies omnium, & fatalis, sed placidissima, in summo senio mors. Hinc nimio labore exercitatis animalibus cita venit senectus, callosis factis ante ætatem omnibus vasis.

Ridendi ergo sunt jactatores illi, qui rugas & gravem senectutem se avertere posse clamant, paucis Elixiri guttis quotidie sumtis, dum inevitabili vitæ sanæ effectū, callosis factis omnibus vasis, ad fatalem ducimur terminum.

Sapientius certe Medex institutum, quæ balneis fovebat exsucca hæc cor-



pora: hinc credebatur senibus juventutem reddere. (a)

A LIQUIDO CUM VASULO &c. Quando liquidum contentum, parte liquidissima orbatum, tandem concrefcit cum proprio vafe. Ab omni ævo obfervatum fuit, quod in morbis, in quibus (ut dicebant Veteres) calidum innatum prævaleret humido radicali, five ubi vis vasorum vim liquidorum diftendentium excederet, fanguis fiat talis, ut concrefcit in pellem novacula vix difcindendam: certe plastica eft in liquidis nostris indoles, nec ingefta fiunt humores nostri, antequam illam induerint naturam: Ruyschius (b) ex fuo fanguine, fimplici agitatione ramulo plantæ Africanæ, fecit membranam denfam coherentem.

Hinc facile intelligitur, fanguinem, inflammatoria denfitate in morbis acutis jam nimis in concretionem proum, orbatum adhuc plus parte liquidiffima per morbi vim, poffe concrefcere cum vafis continentibus.

Sed evidens habemus exemplum, quod vafa majora etiam cum liquido contento poffint concrefcere: magnus enim ille canalis, qui, dum utero materno latebamus, fanguinem ex placenta in hepar deferebat, poftea concrefcit, non in complicatum canalem, quod fieri debuiffet, fi folo collapsu concreviffet, fed in teretis & folidi funiculi fpeciem mutatus evidens dat argumentum, quod cum contento liquido concreverit.

In vafis ergo majoribus triplici de caufa robur nascitur; 1. à fibrarum robore; 2. à vafis collapsis vel compressis in membranas concretis; 3. à vafis concretis una cum liquido contento.

§. 40. **I**NDE vasorum debilitas, laxitas, robur, rigiditas, elasticitas, de quibus multa imperitis memorantur, clare intelligi poffunt. Et meretur dignitas horum pertractationem.

Omnia hæc jam explicata funt, recensentur tantum hac paragrapho, ut exhibeant quali fummarium omnium illorum, quæ ex fimplici hac doctrina intelligi poffunt: fequentia capitula docebunt, infinitos morbos inde poffe cognofci & curari.

\*\*\*\*\*:

## MORBI VISCERUM DEBILIUM ET LAXORUM.

§. 41. **V**ASORUM, & viscerum debilitas vocatur illa partium (23. 38. 39), hæc constituentium, cohæfio, quæ tam levi motu tolli poteft, ut imparia fint iis efficiundis, quæ Sanitatis & Vitæ ratio ab his poftulat.

Viscus folet plerumque definiri, quod fit pars organica corporis, quæ humores allatos per fuam fabricam plurimum mutat, fic ut hæc mutatio proficit totius corporis vitæ & fanitati. Sic pulmo viscus eft, accipiens omnem fanguinem, & mutans

(a) Palzphatus de incredib. Hift. cap. 44.

(b) Thesaur. Sexto n°. 7. & Thesaur. 7. n°. 39.

sic, ut aptus evadat fluere per omnia corporis vasa. Sic etiam cor omnem sanguinem recipit, & mutat in motus directione & miscela: idem de reliquis visceribus verum est.

Constat jam per Anatomicas injectiones omnia viscera constare vasis innumeris, vario ordine in variis visceribus dispositis; & ab his vasis viscerum actionem pendere, qua mutant allatos humores. Si ergo hæc vasa debiliora sint, quam requiritur ad sanitatem, minus agent in contenta fluida, minus illa mutabunt. Sic debilis nimis pulmo non poterit chylum mutare in bonum sanguinem. Si nimis laxum hepar fuerit in suis vasis, sanguis per illud viscus sine bilis secretionem fluet & refluet, & nascetur hydrops: Dum nimis debilis ventriculus languet, totum chylicationis opus turbabitur.

§. 42. **Q**UÆ alia ætate, atque sexu alia, sunt.

ÆTATE. Viscera omnia robur accipiunt, sensim auctum, prout vitæ vires diutius in hæc egerunt. In prima hinc origine debilissima omnia diffluunt, sensim major accedit firmitas, donec omnia in summo senio rigescant fere. Jam inter maximam illam debilitatem & maximam firmitatem infiniti gradus medii intercurrent vario vitæ nostræ tempore.

SEXU. Viris enim hanc legem imposuit Deus, ut in sudore vultus panem lucrentur suum; fœminis vero, ut fœtus concipiant, pariant, & nutrant. Apud illas gentes, quæ potius naturæ consilio quam legibus vitam suam moderantur, idem obtinet: ad hæc autem in diverso sexu varium robur requirebatur.

§. 43. **H**ÆC debilitas oritur 1. à debilitate fibræ (24) ejusque causis; (25.) 2. à debilitate canalium minimorum (28), atque causis hujus; (38.) 3. ab inertia liquidi per vasa majora (39) fluentis, quæ pendet à minuta copia, fluiditate aquosa aucta, motu musculari torpescente. 4. A numero magno canalium minimorum, pro ratione ætatis, nimis diu remanentium.

Dux priores causæ jam sunt explicatæ.

3. Tota actio omnium viscerum pendet ab eo, quod liquida, vi cordis pressa, dilatent arterias; hæc, suo robore & elasticitate reagentes, promoveant distendentes humores: sed motum semel impressum servant diutius omnia illa, quæ sub eodem volumine plus massæ corporeæ habent, id est, quæ sunt solidiora.

Requirebatur ergo in liquidis, cordis vi motis, certus soliditatis gradus, ut motum impressum non tam cito amitterent. Ubi illa debita soliditas abest, dicuntur inertes esse humores: sed hæc soliditas conciliatur partibus constituentibus nostrorum humorum per efficaciam vasorum, per quæ fluunt: sed hæc efficacia est illa vis, qua distenta vasa reagunt in humores distendentes. Dum ergo minuta nimis liquidorum copia non satis distenduntur vasa, minus reagunt; hinc languent omnia & debilitantur. Ob hanc etiam causam, ubi per vulnera, vel alias causas quascunque, ingens liquidorum copia subducta est, ex ingestis non fit solidus ruber sanguis, sed omnia in aquosam degenerant tenuitatem.

FLUIDITATE



**FLUIDITATE AQUOSA AUCTA.** Fuerunt quidam Medici in illa opinione, ac si tunc foret omnium perfectissima corporis conditio, quando omnia liquida nostra essent tenuissima, hincque per omnes canales expeditissima esset via: sed alia lege factum invenitur corpus humanum: Respondent diversis vasorum seriebus proportionalis crassitie fluida; Si enim sanguis noster aquæ tenuitatem haberet, per patula in superficie corporis interna & externa vasorum exhalantium orificia dilaberetur, vel replerentur omnia cava corporis loca humoribus, tenuioribus quidem, sed non propulsis. Sanguinis enim pars crassissima rubra in arteriis & venis maximis, rubris nempe, semper manens in sanitatem, momentum motus ad vitam & sanitatem requisiti à binis causis motricibus, corde & arteriis, recipit, & reliquis communicat: ab hac parte rubra, ad sua vasa continentia attrita, calor noster producit; simul ac enim illud rubrum incipit deficere, omnia frigent. Docent hoc leucophlegmatici, & pallido morbo languentes puellæ.

Hinc adorandus Creator cerebri medullæ, collectæ in medullam oblongatam, circumposuit majora vasa rubra, ut tenuissima hæc vasa, in quibus omnis attritus deficit, foveantur blando tepore.

Ergo inter debilitatis viscerum causas merito recensetur aquosa humorum fluiditas.

Robusti hominis de vena saliens sanguis in scissilem coherentem massam statim concrescit: dum debili puellæ sanguis mittitur, subrubella, tenuis, vix concrescens, effluit aqua.

**MOTU MUSCULARI TORPESCENTE.** De hac re dictum fuit §. 25. n°. 2.

4. Constat certissime, quod in quavis ætatis diversitate requiratur certa callositas, & vasorum quorundam abolitio. Anatomici observaverunt, injectiones felicissimo successu semper factas in junioribus. Videmus sic, procedente ætate, multa aboleri vasa.

Glandula thymus, adeo insignis in recens natis, in adulto homine adeo decrevit, ut vix sui vestigium relinquat. Quæ plures infantes successive plenis lactei nectaris fontibus nutrit mulier, annosa & strigosa facta, flaccidas, vix mammarum nomine dignas, habet pelliculas. Glandulæ vagæ mesenterii in provectioris ætatis hominibus abolentur penitus.

Magnum enim robur additur partibus firmis corporis, quando plurima vasa minima compressa concreverunt in fortiores membranas: hæc autem concretio nascitur à valido motu, quo liquida feruntur per vasa majora; Ergo quo fortior fuerit ille motus, vel quo diutius egit, eo major consolidatio corporis. Hinc in recens nato homine maximus canalium numerus; sed laxa totius corporis compages: in adulto homine, pluribus vasis abolitis, major firmitas.

§. 44. **A**B hac debilitate (41), per suas causas (43) producta, oriuntur multi morbi, qui falso Temperiei, vel Congeniti, habentur; primarii sunt: facilis vasorum dilatatio, tumor; facilis horum compressio, inanitas; liquidi stagnatio; Cordi aucta resistentia; liquidorum cruditates; spontanea corruptio; ad actiones vitales, animales, naturales exercendas ineptitudo; & illa omnia, quæ ex his sequi solent, quæ ut infinita numero, ita difficillima curatu, & foecundissima novis morbis producendis sunt; maxime *ναχξία*,

& *καταρρυία*. 2. Facilis vasorum dissolutio ab internis, externisve causis, acribus vel motis; effusio; stagnatio, corruptio, evacuatio huiusmodi ad vitam, sanitatemque necessarii; interceptio motus fluidi per vasa rupta; corruptio eorum, quæ hoc motu vigeant; qui rursus varii sunt, maxime *φθίσις*, *ἰμπύημα*, *ὑδρωψ*, *ἀτροφία*.

Supponitur hic iterum corpus antea sanum nunc habere viscera & vasa nimis debilia: tunc apparent mutationes læsarum functionum, præcipue sequentes in textu enumerata.

Cum videatur unicuique homini sua esse & singularis sanitas, & diversa corpora hominum penitus inter se varia esse, tam in solidis quam in fluidis, appareat, licet singula sana sint, vocaverunt illam constitutionem singularem corporum, qua differunt ab aliis corporibus etiam sanis, *ἰδιουργησις*; & quæ inde pendebant aliquando vitia; habebantur incurabilia, quia jam à prima origine facti corporis credebantur adfuisse: sed morbos illos debiliū nimis vasorum & viscerum non semper congenitæ conditioni adscribere possumus.

Nobili de stirpe ortæ puellæ, molliter educatæ, otiosa defluit vita; languet debile corpusculum: primis vitæ mensibus priorī similis rustica à teneris jam assuescens laboribus viget firmitate corporis robore.

Debilitas prioris, & morbi inde pendentes, falso habentur pro congenitis.

Dum robustissimus homo per vulnus omnem fere sanguinem amisit, fit hydropicus: quanta tunc sic dictæ vulgo temperiei mutatio!

**PRIMARIISUNT FACILIS VASORUM DILATATIO, TUMOR.** Quomodo viscera quælibet conficiant humores suos, disputatum fuit à nata Medicina huc usque, nec multum boni dixerunt Auctores: donec *Ruyfchius* demonstraverit ubique in visceribus esse ad fines arteriarum aliam conformationem in variis locis; & videtur viscus factum esse, ut hæc conformatio arteriarum maneat: si jam arteriæ fiant nimis debiles in quodam viscere, plus dilatabuntur necessario, cum eadem vis impulsus liquidi distendat vasorum latera minus resistentia: hinc non conficiunt viscera debilitata tales humores, quales in sanitate, sed longe alios; unde turbabitur totum corpus. Sic simul ac fabrica hepatis mutatur, non fit bilis, sed longe alius & degenerans liquor; ut certa docuerunt observata. Laxata renum vasa sanguinem transmittunt loco urinæ.

Sed dilatata vasa tumorem faciunt majorem totius, vel partis, debilia enim vasa & viscera habentes, faciem habent inflatam, buccas tumidas, fungosi toto corpore, ut bombyces, quando se parant ad fila explicanda; hinc dum incipit sensim hoc malum subrepere, sæpe quasi aucto corporis habitu lætantur.

**FACILIS HORUM COMPRESSIO ET INANITAS.** Vasa hominis robusti sibi commissæ contrahuntur quidem, ut minuant cavitatis suæ diametrum, sed non collabuntur flaccida; imo contractioni, quæ naturali major est, valide resistunt. Hydropico cruri impressa vestigia manent; in sano vero & robusto homine statim pars pressa rearsurgit.

**LIQUIDI STAGNATIO.** Cordis enim vis fere tota impenditur dilatandis arteriis: si jam debilitatæ arteriæ, à sanguine per cordis vim impulsæ distentæ, se non satis contrahant, manebit sanguis immotus in vasīs dilatatis: binæ enim causæ

sunt, quæ liquida nostra per canales suos movent : 1. Cordis vis, distendens impulsio sanguine vasa. 2. Robur & contractilitas vasorum, cessante cordis actione propellunt impulsus à corde sanguinem : ubi ergo hæc contractilitas vasorum deficit, liquida stagnant.

**CORDI AUCTA RESISTENTIA.** Hoc mirum forte videtur, cum vasa debilitata facilius cedant impulsio à corde sanguini : sed dum arteriæ debilitatæ non satis valida systole contrahuntur, manent distentæ & plenæ ; hinc momento sequenti cor non potest tam facile se evacuare in vasa plena & distenta jam nimis. Quotidie videmus tumida illa & pallida corpora, dum quiescunt, se satis bene habere ; ad minimum vero motum anhelant, cor palpitat, venæ jugulares tument, suffocantur fere : dum enim quiescentibus parca copia sanguinis venosi, lente moti, ad cor deferuntur, illud adhuc exprimitur, sed per motum corporis sanguinis venosi celeritate aucta cor non valet tam cito acceptum sanguinem per vasa repleta pellere.

**LIQUIDORUM CRUDITAS.** Omne, quod assumimus, vocatur crudum, quia nostris liquidis alienam naturam habet, nondum à viribus vitæ subactum : dum autem viscera debilitantur, illorum vires singulares pereunt, quibus conspirant ad mutanda ingesta in nostram naturam : ut enim bona fiat chylopoiesis, requiritur imprimis ut omnia viscera chylopoietica sua fabrica confectos affundant humores : requiritur ergo ut tales confecerint : si ergo debilitata fuerint, degeneres à nativa indole humores affundent ; unde totum turbabitur chylicationis opus. Sic debile virginis, Chlorosi laborantis, corpus ex assumtis vel optimis alimentis non facit bonum sanguinem ; sed pallidum quemdam humorem, ac si multum lactis paucio sanguini misceres : & inde fiunt mirabiles degeneraciones : & morborum, inde pendentium, miræ & variæ species. Ut ingesta mutantur in nostram naturam, omnia viscera conferunt suam symbolam : si nunc unum vel plura debilitentur, hæc assimilatio deficit, & fit aliud longe.

Hinc pulchre monuit Galenus (A) quod considerandum sit in debilibus reficiendis, nutrimentum se ipsum non concoquere nec in partes distribuere, nec alendi partibus assimilare &c.

**SPONTANEA CORRUPTIO.** Ingesta in corpus humanum mutantur per omnes actiones omnium vasorum & viscerum, & assimilantur naturæ nostræ ; hæc mutatio vocatur ( αἵσις ) coctio ; sed si ingesta tam tenacis indolis fuerint, vel vires corporis adeo imminutæ, ut non possint subigere ingesta ; tunc hæc mutantur quidem in corpore, non autem assimilantur naturæ nostræ : sed sequuntur suam naturam, qua in calido & humido loco fota degenerant in corruptelam acidam, putridam, rancidam &c. hæc vocatur corruptio spontanea. In exemplo res patebit : dura messorum illa ex pane secalino faciunt bonum sanguinem ; sed panis ille calore, simili calori nostri corporis, si foveatur in vase chemico, addita aqua, in acidum pessimum mutatur : robusta viscera superant illam aciescentiam ; sed debili puellæ si ingeratur, ibi suam sequetur naturam panis ille, & aciescens cardialgias, tormina &c. faciet.

Non fit hæc degeneratio quidem in corpore debili eodem penitus modo ac extra corpus ; sed tamen assumpta, si non prævalet vis corporis humani assimilans, semper tendunt in spontaneam mutationem.

**INEPTITUDO AD ACTIONES VITALES, ANIMALES &c.** Omnes actiones nostri corporis quodam sensu dependent à muscolari motu ; uni-

(A) Method. Medendi Lib. VII. cap. 6. Churten. Tom. X. pag. 163.

versales enim causæ motrices omnium humorum, cor nempe & arteriæ, musculosæ sunt: sed hæ actiones tantum fieri possunt, dum adsunt boni spiritus: sed spirituum confectio ultimam & perfectissimam requirit assimilationem.

Itaque dum debilia nimis viscera non possunt ingesta ad ultimam elaborationem usque perficere, subtilissimum illud, a quo omnia tere pendent in corpore, incipit deficere. Hinc dum incipit languere Chlorosi debilis puella, sensim subrepat insolitus torpor, à minimo motu ingens lassitudo, vertigo, hebetudo omnium sensuum; quæ omnia animalem facultatem læsam significant. Cor palpitans à minimo motu, pulsus mollis & debilis, respiratio anhelosa, vitales actiones imbecilles monstrant; languens vel & miris modis depravatus appetitus, molestia ingens ab assumtis, tarda sæpe alvus, urina pallida, cruda, naturales functiones depravatas indicant.

Hinc apparet facile, ex hoc fonte infinitos numero posse oriri morbos, dum omnes functiones corporis sic lædi possunt. Facile etiam inde patet curationis difficultas: debet enim restitui omnium partium deficiens robur; sed hoc non potest fieri, nisi tantum adhuc supersit de natura creata corporis, ut illud, ab impedimentis levatum, & deficientibus instructum, valeat, bonum sanguinem facere ex non sanguine, id est, ex ingestis. Hinc dum v. g. pulmo vel hepar tabe perit, frustra promittitur medicina.

Maxime autem omnium inde fiunt.

*Καχξία.* Malus habitus ( de quo postea peculiari capitulo dicetur ) talis est debilitas, ut nutritio læsa & depravata sit per totum corporis habitum simul. Fit hæ cachexia, quando omnia liquida & solida desciscunt ab his conditionibus, quæ requiruntur, ut fiat assimilatio: sed omni cachexiæ necessario adest *κααχυνισ*, quæ est degeneratio omnium humorum ab his conditionibus, quæ requiruntur in sanitate: sed humores nostri suas dotes accipiunt per vim vasorum & viscerum; hæc ergo si sint nimis debilia, necessario degenerant humores.

2. FACILIS VASORUM DISSOLUTIO. Requiritur talis cohesio partium solidarum constituentium canales nostri corporis, ut possint sustinere impetum liquidi, vi cordis impulsus, sine solutione continuitatis: dum jam debilitata est cohesio hæc, metus rupturæ est à majori impetu impulsus liquidi: sic toties occurrunt tristes illi casus, ubi ad incrementi sui apicem pervenerunt tenelli homines, quibus vel à nativa labe, vel non firmato per motus musculares corpore, debilia nimis sunt vasa, quod clamore, cantu, cursu &c. rumpatur in pulmone arteria, sicque una cum sanguine animam vomant, vel postea lenta phthisi marcescant. Quibus debiliora sunt renum vascula, in carpento per strata lapidea rudius vecti sanguinem mingunt toties.

Sed præterea dictum fuit, debilitatis visceribus degenerare humores in spontaneam corruptelam; hinc semper fieri acriores: blanda enim est humorum nostrorum in sanitate indoles, sic ut sanguis sanus oculo instillatus nullum dolorem faciat: cum ergo liquida acriora debilitatos canales perfluunt, facilis fit solutio horum: docet hoc scorbutus, in quo sæpe laxitas totius corporis cum acrimonia humorum concurrunt, unde fractis vasis effusus sub cute sanguis maculas illas scorbuticas efficit.

Sed erosio sic ab acri liquido, vel fractis nimio impetu moti liquidi vasis, effunduntur humores contenti; effusi stagnant, quia movens causa deficit; stagnantes corrumpuntur: dum nullus datur aëri accessus, serius quidem hoc fit, corrumpuntur tamen. Effunduntur liquida ex vasis fractis; abruptitur continuatio circuitus

humorum, dum vasa fracta hiant; omnes functiones, quæ à motu liquidorum per integra hæc vasa pendeant, abolentur. Hinc dum in variis corporis locis hæc fieri possunt, infiniti numero possunt oriri morbi, non facile recensendi, sed ad classes quasdam revocandi, quarum præcipuæ sunt sequentes:

*Θρίαι*, à corrumpendo dicta; sed obtinuit apud Medicos, ut hoc vocabulum non sumatur pro qualibet corruptione, sed pro totius corporis in suo habitu consumptione, nata ex cacochymia purulenta prædominante, ubicumque demum fomes ille hæserit in corpore. Debilibus nimis valis exesis, vel fractis, effusi humores corrumpuntur, vicina omnia inflammant sua acrimonia: sic sanguis in cavum thoracis effusus putrescit, pulmonem alluens inflamat, post hanc inflammationem suppuratio secuta vera phthisi pulmonali hominem perdit: sic intelligitur, quomodo ab eadem causa nasci possit, *ἐμπίνα*, quod latiori significatione omnem supurationem denotat, plerumque tamen designat puris collectionem in cavo thoracis.

*ὑδρῶδ.* Omnes illi, quibus sensum subrepat hoc malum, laborant debilitate vasorum & viscerum; & omnis hydrops, non natus ex alio morbo valido prægresso, hanc fere causam agnoscit. In omnibus enim cavis majoribus & minoribus corporis exhalantes arteriæ suos effundunt humores; sed observatum fuit, illam vim, qua minima orificia venosa imbibunt ex cavis corporis locis effusos humores, crescere & decrescere proportionaliter ad circulationis vires; hinc in morbis acutis, ubi circulatio nimia est, exsiccantur omnia: in languidis chronicis morbis sensim accumulato humore tument omnia. Accedit & hoc, quod in summis languoribus diutius videatur persistere vis evacuans arteriæ, quam vis resorbens venæ: hinc in omni corporis diathesi, in qua vitalis vigor imminuitur, aquosa incipiunt accumulari.

*Ἀρροσία.* Priori videtur prima fronte oppositum malum; sed dum ascite turgēt immaniter abdomen, videmus gracilescere omnia superiora: nec mirum, quia nimis debilia viscera non possunt conferre singula suam symbolam, ut fiat ultima elaboratio ingestorum, qua mutantur in nostram naturam, & perdita restituuntur: vita enim nostra destruet corpus: nisi reficiatur ex ingestis. Deficere potest ergo ex hac sola causa nutritio: & hic defectus atrophia dicitur.

§. 45. **Q**UÆ ( 41. 42. 43. 44. ) si quis accurate observat, ille, non hujus modo ( 41 ), sed infinitorum & obscurissimorum morborum originem, præsentiam, eventum internoscet, & solus auxilia impetrandæ sanationi valida & tuta inveniet.

Qui omnia ante dicta attenta mente considerat, concludet facile, debilitata actione vasorum in contenta fluida, posse lædi omnes functiones corporis; quia omnium functionum integritas ab actione solidorum in fluida, & fluidorum in solida pendet; hinc veram hanc esse lernam malorum, unde infiniti morbi pullulant. Ubi vero morborum à debilitate ortorum effectus sensibus obvii sunt, nulla in cognitione causæ manet difficultas; sed sæpe latentissimi morbi huic tantum causæ suam debent originem. Dum nimis debilia pulmonum vasa rupta floridum & coccineum eructant sanguinem, facile prægressa debilitas, ut mali causa, cognoscitur sed si similes arteriolæ in cerebro ruptæ lethalem fecerint effuso sanguine apoplexiam, latens tantæ mali causa eadem est. Dum fracta in hepate vasa suos effuderunt humores, qui



corrupti stagnando vicina inflammant, tandemque post multas miserias toto hepate consumto certam mortem inferunt; prima hujus mali origo ab eadem causa pendet. Idem in omnibus aliis visceribus verum est.

Nullus videtur melior canon esse in Medicina, quam ille, quod in curandis morbis semper ad causam primam, unde omnia reliqua fluxerunt, sit respiciendum: ex hoc fundamento enim solo certa & valida auxilia deduci possunt. Qui ex debilitate natum hydropem, purgantibus emungendo corpus, curant, post paucos dies mirantur æque timere omnia, dum omnia ruunt in flaccida hæc vasa, nihil fere de ingesto potu per sudorem vel diaphoresim, parum admodum per urinam, excernatur. Qui primam mali causam investigaverunt prudentiores, distendente saburra educta, fasciis laxum corpus stringunt, victu sicco, roborantibus remediis, corporis exercitiis, primam morbi causam, unde omnia fluxerunt, debellant.

§. 46. **I**N applicatione vero horum, præsens debilitas tarditatem jubet; nec enim alibi perniciosior mutatio subita.

Subitam mutationem inducere in omnibus morbis sapiens damnavit Hippocrates dicens (a), *quod paulatim fit, tutum est, tum alias, tum maxime si quis ab altero ad alterum transcat.* Sed generalis hæc regula imprimis in cura debiliū vasorum & viscerum observanda est. Si quis in hoc casu vel medicamentis stimulantibus, vel motu muscolari, humorum per vasa motum imprudenter nimis accelerat, debilia nimis viscera & vasa, impetus augmentum dum sustinere non possunt, franguntur sæpissime, & turpi errore pro remedio mortem infert Medicus.

Qui hæmoptoe laborantem ex pulmonis debilitate validis exercitiis statim vellet curare, hoc efficeret, ut accelerato sanguinis impetu nondum consolidatum vulnus rumperetur denuo: hinc requiritur summa hic cautela, & prudens tarditas.

§. 47. **E**RGO remedia (28.) lente, caute, à primo in ultimum gradum, adhibenda sunt. Quorum usu roboratis vasis, motus validus musculorum adhibeatur, donec omni effectu constet, satis compacta, solidata; & callosa evasisse Vasa & Viscera.

Omnia jam quæ de curatione fibræ nimis debilis dicta sunt, hic forent repetenda. Notandum maxime, per gradus omnia hæc augenda esse, donec redeat sanitas. Si per motum muscularem volumus curare hos morbos, incipiendum est à lenissimo; dein sensim & caute augemus, continuo respiciendo ad effectum observatum in corpore ægri ex hoc motu. Qui hydropicum factum ex sola debilitate vasorum validissimis vellet statim exercere motibus, suffocaret; sed prius imminuta copia aquarum distendentium, laxæ partes fasciis firmantur, dantur remedia leviter calefacientia, postea validiora, lenis imperatur motus, sensim augendo ad validissima exercitia usque: sic certo firmantur illa corpora, & morbus superabitur.

Sed non sufficit morbum superasse, debent etiam tolli causæ, unde necessario redditurum prævidemus. Dum enim hydropici aquas evacuaſti, reddidisti tantum cor-

(a) Aphor. 51. Sect. 2. Charter. Tom. IX. pag. 18.



pus tale, quale erat, antequam hydropicum fieret sua sponte: hinc debent laxæ tunc roborari partes.

Sed undenam novimus satis firmam jam esse viscerum, prius nimis debiliū, compagem? Si calor per totum corpus sit æquabilis, & sanus; in debilibus enim calor deficit: si à potu ingesto non tumeat corpus in parte vel in toto; sed omnium maxime si color sit vivus & ruber in partibus illis, ubi vasa nuda, nulla cute recta, conspicua sunt, in labiis, lingua, faucibus, gingivis, oculorum angulis: ex his enim tuto concludimus debitum jam adesse viscerum & vasorum omnium robur.

Ubi jam eo usque cura deducta est, tunc non requiritur ulterior roboratio; nam induceretur oppositum vitium nimix rigiditatis: sed servandum est corpus in illo gradu acquisiti roboris: sollicitè evitanda sunt omnia illa, quæ recensita fuerunt inter causas nimix debilitatis: nisi enim hoc fiat, cito redibit morbus. Hoc toties dolemus fieri in puellis à chlorosi curatis; dum nolunt abstinere tepidis illis sorbitiunculis, & inertī otio corporis robur restauratum perdere malunt, quam exercitio sanitatem tueri: sicque summum Medicis tædium, sibi ipsis tandem insanabilem morbum parant.

§. 48. **H**INC patet, omnia, quæ de facultate nutrimentorum traduntur, alias vera, alias falsa esse; Exercitia muscutorum roborare fibras; Exercitia unctionis resolvere coacta, roborare laxa, nec dispergere vires; ipsum sanguinem & cruorem in robustissimis esse maxime densum, lentum, blandum; in tenerrimis dissolutum, levem, acrem, infinitos morbos, facie diversissimos, una sæpe radice hæere posse, eaque succisa tolli.

QUÆ DE FACULTATE NUTRIMENTORUM &c. Qui absolute de his scripserunt, nunquam potuerunt vera dicere in omni casu, quia alimentorum facultas non pender ab alimentis solis, sed omnium maxime à corpore, in quod ingeruntur (vide §. 25. n°. 1.) Integræ nationes solis vegetabilibus & aqua vixerunt incolumes; solis fere piscibus & aqua aliæ gentes; omnibus fere simul mistis, quæ terra sponte vel arte protulit, quæ animalium partes exhibere potuerunt, uti erudita gula docuit alios; & tamen satis sani adhuc vixerunt omnes, vel saltem plurimi ex illis, nec nutrimenti varietas tam magnam differentiam attulit. Est enim in corpore humano sano talis facultas, ut, conspirantibus viscerum & vasorum actionibus omnibus, ex diversis indole ingestis fiat idem omni fere dote sanguis humanus. Pro vario tamen vasorum & viscerum robore nutrimenta ejusdem indolis nocere vel prodesse possunt: fumo & sale conditæ carnes, cum pane atro duris aratoris visceribus convenient: si carniū juscūla darentur tali homini, deficeret præ languore: sed hæc debilibus adeo prosunt, & contra duri tales cibi nocerent summo opere. *Qui copiosos cibos conficere queunt, illis sorbitiones ne dederis, cibum enim excludunt; qui vero non possunt, his dato. (a)*

Nullum ergo alimentum universali titulo salubre dici potest: & qui rogat, quodnam sit salubre alimentum, idem facit, ac si quæreret, quidnam sit ventus secundus, non cognito itinere.

(a) Hippoc. de Affect. cap. 12. Charter. Tom. VII. pag. 633.

EXERCITIA MUSCULORUM &c. De his vide §. 25. n°. 2. & §. 28. n°. 2. Solo motu enim musculari, nimis exercitato, oppositus morbus nimix rigiditatis fieri potest. Quantum differunt carnes in stabulis saginati bovis à carnibus ejuldem animalis, quod aratrum ducens duro labore exsucca fere omnia habet?

EXERCITIA VECTIONIS &c. Motus musculares firmant corpus, sed fatigant; & quantum spirituum faciunt renasci, tantum perdunt: unde debilissimos his curare est impossibile. Hinc in debilibus substituuntur motibus muscularibus vectiones, & primo quidem lenissimæ, dum funi insidentes ægri motu oscillatorio leni agitantur (a): his succedunt gestationes in lecticis; dein vectiones in carpentis molles, postea in curribus per strata viarum motis: tandem ægri tales equos conscendant, & per varios gradus velocitatis quadrupedante cursu corpus firment. Sic difficillimi curatu morbi sanantur, & omnes fere motus muscularis fructus habent ægri sine virium dispendio. Omnia autem hæc imprimis triplici de causa profunt; 1. Quia pendula viscera illis concussionibus agitata roborantur, & concreta partim his concussionibus, partim auctis vasorum & viscerum viribus, resolvuntur. 2. Quia fœces ex ultima digestionem residuæ sic ex primis viis eliminantur in illis, quibus vis horum viscerum deficit; hinc profunt imprimis una vel altera hora ante cibum ingestum. 3. Quatenus impetus & efficacia aëris in pulmonum vasa sic augeatur, & ambiens atmosphæra, calore corporis statim tepescens, renovatur assiduo; quod imprimis equitando obtinetur.

SANGUINEM ET CRUOREM IN ROBUTISSIMIS &c. Densum vocamus sanguinem, quando est maximi ponderis in data mensura: hoc autem pendet à pressione vasorum. Omnia fere quæ assumimus, ut & inde paratus chylus & lac sanguine sunt leviora. Sanguis extravasatus, à vasorum compressione liber, fit se ipso levior. Sanguinis ergo compactio & soliditas eo majores sunt, quo vasa fortiora plus consolidaverint: hinc in morbis acutis, in quibus nimia actio vasorum est in contentos humores, sanguis fit ponderosior, fit densior. In fortissimis viris sanguis de vena secta, vel vulnere, exsiliens densus & niger est: hinc Homerus (b), ubi Ajax vulnerabat Hectorem, dicit: *Ater exsiliabat sanguis*: & alibi (c) Heroum *Sanguinem atrum* dixit. Sed & simul adest tali sanguini *lentor*, quo concrescit statim in unam massam solidam. In sanguine arteriolo in robustis hoc semper verum est: & post validos labores, vel in morbis acutis inflammatoriis, sanguis venosus etiam sic concrescit ilico fere. In tali sanguine simul obtinet hæc conditio, ut oculo sano immissus nullum dolorem faciat: adeo *blandus* est sanguis sanus, aliquid lenissimi subfalsi habens, sed dilutum valde; sic ut nulla acrimonia lædat partes acutissimi sensus: omnia enim, quæ nimis acria fierent in sanguine, eliminantur de corpore, per vesicam, alvum, sudorem &c.

IN TENERRIMIS DISSOLUTUM &c. Sanguis sani hominis difficulter examinatur hydrostatice, cum statim concreseat, & liber à pressione vasorum rarefiat ilico. Ut aliquam tamen, licet non omnino accuratam (ut ipse fatetur) hujus rei noticiam haberet Boyleus (d), excepit phiala oblonga sani hominis sanguinem: cum jam quietus stagnaret, & bullulæ evanuiscent, adamante notavit altitudinem: postea eandem phialam, eloto prius sanguine, replevit aqua ad eandem altitudi-

(a) Mercurialis de Arte Gymnastica p. 217.

(b) Iliad. Lib. VII. pag. 124. *μῆλιν δ' ἄντην*  
*πυρρίπην.*

(c) Ibid. pag. 26. *τῶν τοῦ δῖου καλῶν*, &c.

(d) Histor. Sang. Humani pag. 11.

nem;

nem ; tuncque invenit , sanguinem sani hominis superare aquæ gravitatem specificam circiter una vigesima quinta parte : sed ex paulo ante dictis constat , ex ingestis vi vasorum & viscerum sanguinem fieri solidiorem , ergo & ponderosior , ingestis ipsis : hinc ubi in teneris hominibus illa vis languet , minus consolidatur sanguis ; hinc dissolutus magis , & levis , tandem in aquotam tenuitatem degenerat. Docet id ex sola inertia & debilitate natus hydrops.

Sed plerumque nimie sanguinis tenuitati comes est major acrimonia : unde teneris illis faciles erosiones debiliū vasorum : unde hæmoptoe , & similia mala. Hinc illis tam frequentes acres illi & falsi catarrhi.

INFINITOS MORBOS &c. Dum liquida humana per canales proportionalis diametri fluunt , & singulæ series decreſcentium liquidorum per sua vasa feruntur , omnes omnium vasorum & viscerum functiones illibatae sunt. Dum debilitata vasa , ab impulsis liquidis nimis distenta , alienos humores admiserunt , turbantur omnia : hinc infinitorum morborum origo à simplici hac causa pendere potest ; omnesque inde orti morbi , restituto naturali vasorum robore , tolli possunt. Unicum sufficet ex innumeris , quæ adduci possent , exemplum. Naturaliter adnata oculorum tunica sanguinis rubri in suis vasis nihil habet : hacce vero laxata à quacumque causa sanguis ruber ingreditur , & ibi hæret ; facitque ophthalmiam , in initio sapissime aquæ frigida applicatione sanabilem , dum hoc frigore stricta vasa repellunt ingressum sanguinem rubrum : cum in hoc casu emollientia & laxantia applicantur , augetur saepe malum.

Hinc apparet , quantum usum habeat consideratio simplicis talis morbi , cum viam parer , ut intricatissimi alii , ab eadem origine pendentes , cognosci & curari possint.

§. 49. **E**X iisdem cognitio & curatio laxitatis Vasorum & Viscerum habetur.

Cum laxitas sit debilitatis species , uti antea dictum est , omnia prius enarrata conveniunt.



## MORBI VISCERUM FORTIUM ET RIGIDORUM.

§. 50. **R**IGIDITAS nimia Vasorum & Viscerum nominatur illa partium ( 23. 38. 39. ) hæc componentium cohesio , quæ non cedat illi motui , qui illa mutare & movere debebat , ut fierent ea , quæ Sanitatis & Vitæ tempore ab hac mutabilitate fluebant.

Omni vitæ nostræ tempore corpus mutatur in suis vasis , dum hæc nunquam binis momentis maneant in eadem amplitudine , sed nunc distendantur vi impulsu à corde liquidi , nunc contrahantur in minorem diametrum suo robore. Requiritur ergo talis cohesio partium , constituentium hæc vasa , ut cedere possint : ubi hæc cohesio tanta est , ut non cedant omnino , vel non satis , morbus est nimie rigiditatis in visceribus & vasis.

Quid viscera sint, dictum jam fuit §. 41 : & notatum fuit ibi, quod omnia viscera omnes suos effectus singulares faciant per vasorum, quibus constant, fabricam : sed omnia vasa tantum agunt in fluida contenta, quantum reprimunt, & nituntur minuere suas diametros : & ubi semel contracta fuerunt ad minimam suam diametrum, tunc vis hæc quiescit, nec agit iterum, nisi ab impulso liquido distendantur rursus vasa. Requiritur ergo in vasis talis flexibilitas, ut cedere possint & expandi ab impulso liquido; dein, cessante vi impellente, rursus se contrahere.

Sed præterea requiritur, ut in singulis visceribus, quæ sua fabrica præparatos liquores secernunt per emissaria, ultimi canales secretorii habeant certam & determinatam amplitudinem, ne dimittant illa, quæ retineri debent; aut retineant secernenda : à justo hoc moderamine tota vita & sanitas pendent.

In variis jam corporis visceribus varia requiritur vasorum flexilitas : longe major certe in corticis cerebri arteriis, quam in renum secretoriis vasculis : hinc iterum nihil hic generaliter definiri potest, sed tantum cum limitatione ad varios usus, quos vita sana requirit.

§. 51. **O** R I T U R 1. ab omni causa fibræ nimis rigidæ, ( 32. )  
2. maxime à fibris, valida vi propulsi liquidi vitalis admodum compactis ad se mutuo; 3. ab adunatione canalium minorum orbatorum suo liquido per violentam pressionem, qua vitale liquidum arteriosum canalium majorum latera premit, cujus maxima effectrix causa est valde exercitatus muscularis motus; 4. à concreto vase in unum solidum cum proprio liquido stagnante, exsiccato, coagulato.

1. De his dictum fuit. §. 32.

2. Licet in liquidis forent partes, restituendis elementis, per sanitatis actiones detritis & deperditis, aptæ; requirebatur tamen ( ut in cura fibræ debilis dictum ) applicatio harum per propulsum liquidi vitalis ad loca debita, & quasi appressio ad alia elementa, quæ quo validior erat, eo firmior fibræ inde natæ vel restitutæ fabrica. Eadem jam hæc vis, quæ elementa fibrarum inter se compingit, fibras, ex his adunatis factas, fortius ad se invicem apprimat, & plus coherere facit.

3. De hac re §. 39. n°. 1. dictum fuit. Maximi enim canales habent suas membranas contextas ex minoribus : sed minimi canales per cordis vim longe minus distenduntur, quam majores, in quos primo quasi impetu, & integris suis viribus cor agit : hinc majoribus canalibus distentis, minora vascula, majorum canalium membranas constituentia, complanantur & impervia fiunt; unde concreescunt, & inde augetur robur. Motus jam muscularis valde exercitatus, velocius movendo sanguinem venosum versus cor, illius motum auget : hinc major impetus imprimis in maxima vasa, & hinc omnia illa dicta sequuntur. Hæc imprimis ratio est, quare debilia corpora motus muscularis tam pulchre roborat.

4. Dictum fuit de hoc §. 39. n°. 2.

§ 52. **U**BI obtinet in vasis, producit effectus : 1. similes, vel eosdem iis, qui à fibra nimis rigida (33.) 2. facit in vasis validum nixum, quo fibræ conantur se applicare ad axin sui canalis; arctare cava sua; premere, comprimere, repellerè, expellere sua liquida; hinc eorum motui à corde, adeoque & cordi resistere; vix dilatari, hinc interrompere æquabilem sanguinis motum, adeoque omnium secretionum; minuere copiam sanguinis aliter uno ictu ex corde expellendi; impedire cordis evacuationem perfectam, polypos sanguinis producere; fluidum comprimendo, & à fluidissimis spoliando, id condensare, suffocationes, mortem creare. 3. Vulneratis vasis magnos hiatus creat per vim magnam, qua trahuntur in sua sustentacula partes vasorum; discissis integre cavitates minuit extremas, vel claudit.

1. De his actum est.

2. In canali conico linea ducta ab apice ad centrum basis dicitur axis. Dum canales nostri flexiles distenduntur ab impulso liquido, sunt in statu violento, & fibræ longitudinales, in arcum distentæ, nituntur redire in pristinam longitudinem: fibræ orbiculares distractæ nituntur redire ad minores diametros. Utraque hac actione latera canalis propius accedunt ad axim: hæcque est sola actio canalium nostrorum, quatenus nempe fibræ distentæ nituntur se restituere. Quo jam firmior fabrica, & major elasticitas est horum laterum; eo validior hic nixus est, ut evidenter patet.

Sed dum latera canalis ad axim propius accedunt, necessario minuitur Cavitas: ergo premitur liquidum contentum; & cum liquidum non possit tam cito exprimi per convergentes arteriarum fines, nec retro pelli in cor (obstant enim aortæ valvulæ) hinc comprimitur, reprimitur, & condensatur: orone enim porosum, & simul flexile, corpus in tanto minus spatium redigitur, quanto major est vis comprimens. Hæcque videtur esse ratio, quare chylus & lac leviora semper sanguine, repetitis vasorum nostrorum actionibus compressa, mutantur in sanguinem solidum & compactum.

Sed omnia, quæ ingrediuntur corpus nostrum, nova liquida, five ex cibo & potu, five per bibula vasa in tota corporis superficie, semper per venas ingrediuntur: hæc dilatabiles facile admittunt omnia. Postquam autem hæc ingressa sunt arterias, si in his robur supra sanitatis vires increverit, statim difflantur de corpore: hinc intelligimus, unde homines macilenti & fortes comedant duplo plus sæpe quam obesi & otiosi, nec tamen pinguescant, licet parca copia tantum alvum deponant. Ingesta quidem in his ingrediuntur venas lacteas, dein cavam venam, corque dexterum; sed in pulmonis arteriis, & postea per totum systema arteriosum reliqui corporis sic attenuantur, ut per ultima exhalantia corporis vasa difflari possint, sicque evanescant.

**HINC EORUM MOTUI A CORDE &c.** Maxime notandum, quod, licet majus robur accedat arteriis, ideo non statim debeat oriri cordi nimia resistetia; nam aucto arteriarum robore, cordis vires augentur: influxus enim venosi sanguinis in cava cordis, trajectio sanguinis arteriosi per cordis substantiam, influxus spirituum in villos musculosos cordis, sunt causæ à quibus motus muscularis cordis

H ij



pendet. Sed dum aorta validiori vi se contrahit, sanguinem majori celeritate pellit per arterias coronarias in cordis substantiam; simul validiori vi per carotides & vertebrales sanguinem cerebro & cerebello applicat; unde major spirituum secretio: deinde ex arteriis in venas sanguinem velocius promovet, sicque sanguinem venosum celerius movendo cor irritat: omnes ergo causæ motus muscularis cordis augentur, aucto robore arteriarum.

Quamdiu hoc manet æquilibrium, summa permutatio & celerrima conversio ingestorum in naturam nostram fit; magna conciliatur sanguini soliditas: sed nondum inde sanitatis detrimentum. Ubi vero robur arteriarum eo usque increvit, ut vix patiantur se dilatari; tunc omnia illa mala hic recensita fiunt. Dum enim non dilatantur arteriæ, non contrahuntur postea: sed contractio arteriarum præcipua causa est, quæ sanguinis motum per vala facit; cordis enim actio tantum fere dilatat arterias, & in illis dilatatis locat contentum in cavis suis sanguinem: momento post contractæ arteriæ contentum sanguinem propellunt. Hoc evidenter apparet, dum arteria major vulnerata sanguinem fundit: nunquam enim uno impetu profluit, sed per subsultus: longe minori celeritate exit; quando cor contractum arterias dilatat; longe majori impetu, dum arteriæ contrahuntur & cor est in diastole.

Ubi ergo à quacumque causa tanta fit rigiditas vasorum, ut non patiantur se dilatari, vel saltem non satis, tunc cordis vires non valent expellere contentum in cavis suis sanguinem, tunc cor mirabili quasi tenesmo irritatum nititur pluribus ictibus facere, quod unica contractione non potuit; hinc palpitationes cordis & interruptus pulsus in summo senio toties observata: nam in valde longævus vasa majora circa cor cartilaginea, imo ossæa, aliquando inventa fuerunt; ut testantur observationes Medicæ. Cordis jam motu turbato omnia turbantur in corpore: illud enim fons & origo motus est. Hinc nulla secretio, nulla excretio manet talis, qualis antea fuerat: sed dum in cordis cavis, & in sinibus & auriculis, incipit hæreere sanguis, nascuntur.

**P O L Y P I**, à Polypo pisce sic dicti, qui plurimis cirris se vicinis affigit: morbus frequentissimus, latens admodum & rebellis.

Malpighius in tractatu de Polypo cordis primus fere obscuræ hætenus Polypi historiæ lucem affudit, & demonstravit, unde polypi in corde & majoribus valis origo deducatur.

Sanguis enim sani hominis vena missus lentescit statim, & incipit facere crustam concretam, quæ repellit à se liquorem flavum fluidum. Massa hæc magis & magis concrevit, & innatat liquidiori parti expressæ; concreta deinde aqua pura lota albescit, fibrosa apparet, discissa exhibet cellulas, ichore rubello plenas.

Experimentum Ruyfchii (§. 39.) ante memoratum docet, quomodo semel incipiens nasci talis concretio, ex reliquo sanguine trahat similes partes; & ex illis adunatis fiat membrana quasi species.

Sanguis ergo sani hominis, ut constat ex his experimentis Malpighii & Ruyfchii, constat binis talibus partibus, quæ se mutuo repellunt, sed motus vitalis hæc miscet inter se: hinc simul ac sanguis in homine vel sanissimo in valis magnis aliquandiu quiescit, aut tardius motus copia nimia aggregatur in vasis distentis, disponitur ad coagulationem flocculentam: flocculi sic nati concrevunt inter se, sibi que assimilant & quasi attrahunt similes partes, & faciunt sic polyposas massulas, quæ continuatione ejusdem causæ crescunt sæpe in immensam magnitudinem, & vasis ipsis,



cordis columnis, auriculis &c. accrescunt; ut docuerunt in cadaveribus factæ observationes (a).

In jugulatis animalibus omni sanguine emisso, circa solum cor dextrum pauculum adhuc sanguinis hæret, in massulas oblongas polyposas concreti: hincque apparet ratio, quare post ingentes sanguinis jacturas polypi sæpe circa majora vasa concrecant, postea miserrimos inducentes morbos. Vidi sic fœminam, cui per abortum tanta facta fuerat sanguinis jactura, ut pro mortua deponeretur; revixit postea, satis commode se habens dum quiesceret; si vero minimum moveret corpus, mox anxietas intolerabilis, & subitanea omnium virium prostratio, anhelatio miserrima, donec quiete sensim rediret pacatior status: sic jam per decem annos hæret lectulo affixa. Videtur in hac fœmina idem factum fuisse ac in jugulatis animalibus, factas nempe polyposas concretiones lentæ motum sanguinem transmittere, & viam præcludere celerius moto.

Apparet hoc evidentissime in syncope: quando enim in syncopen delapsis vita reddit: suspirant, anhelant; concrecentis sanguinis polyposi flocculi in arteria pulmonali, ex ingenti capacitate in tam minutas angustias statim abeunte, sistuntur; contractione cordis & arteriæ pulmonalis, respirationis molimine tunc semper aucto, eunt, redeunt, & aliquando solvuntur: qui autem sæpius syncopen patiuntur, nato jam polypo tota vita cordis palpitationibus obnoxii manent.

Malum hoc frequentissimum foret mobilissimis puellis, quæ ab animi affectu validiore statim animo deficiunt, nisi illarum sanguis vitium oppositum polyposæ concretioni haberet: in illis enim, quibus validæ vires sunt, & actuosa vita, sanguis majorem vim concrescendi habet; hinc requirit motum perpetuum & æquabilem; ne concreseat.

A polyposis autem illis concretionibus, vel in cordis ipsius cavis, vel circa vasa majora natis, oriuntur tam anomala, tam tetra symptomata, ut causis majoribus adscripta fuerint sæpius. Concretio talis polyposa ovi columbini magnitudine, nulli accreta, sed libere hærens in sinistri cordis cavo, horrenda mala produxit. (b).

Angusta spes curæ est in polypo confirmato. Jactantur plurima remedia; profunt fere numquam. Totum autem, quod, sperari potest, est, ut reddatur sanguis dilutissimus, ab omni concretione maxime alienus; id est, inducatur per artem cacochymia nimis diluti sanguinis, ne augeri possit polypus novæ materiæ appositione; sed tritu omni momento vitæ præterlabentis sanguinis deteratur sensim.

3. Si nulla foret in partibus nostris solidis contractilitas, vulnus inflictum non haberet majorem hiatus, quam est crassities instrumenti lædentis: sed videmus vulnera, vel acutissima novacula inflicta, paulo post hiare: vis enim illa, qua cohærent partes firmæ inter se; facit retrahi utraque extrema. Quo ergo hæc vis est major, eo plus recedent partes discissæ a se invicem. Cum vero integre discissæ sunt vasa, eadem hæc vis extrema vasorum retrahet & occultabit sub aliis partibus; sicque in hoc casu hæmorrhagiæ facilius sistuntur in robustis quam in debilibus. quia & vis contractilis orbicularium fibrarum in arteriis robustorum fortior est.

• (a) Abridgement Tom. III. pag. 70. Malpighi de Polypo & passim apud Observatores.

(b) Aët. Physic. Med. vol. 2. pag. 5.

§. 53. **E**X his ( 31. 32. 33. 34. 35. 36. 37. 50. 51. 52. ) accurate perspectis clara habetur doctrina, qua noscitur præterita, præsens, futura, agens, & actura vasorum rigiditas, elasticitas, vis, curatio.

In præcedentibus Capitulis explicata fuit methodus, quomodo diagnosi morbi præsentis, anamnesis morbi præteriti, prognosis futuri & effectuum inde sequentium; tandemque indicatio curatoria inveniri possint; vide §. 27. & 34.

§. 54. **E**A M enim efficiunt 1. remedia curandæ rigiditati fibræ propria, ( 35. ) 2. illa maxime, quæ liquidi vitalis copiam, densitatem, pressionem minuunt: 3. Quæ motum muscularem suspendunt. 4. Ea, quæ humectant, leniunt, emolliunt, diluunt, resolvunt, abstergunt.

1. De his dictum fuit.

2. **Q U Æ M I N U U N T L I Q U I D I V I T A L I S C O P I A M.**

In fibra nimis rigida curanda solum considerabatur solidum: in visceribus & vasis nimis rigidis curandis ratio haberi debet & solidorum & fluidorum simul. Inter causas nimis rigidorum viscerum §. 51. recensita fuit valida vis propulsi liquidi vitalis, compingens ad se invicem fibras. Liquidum autem vitale vocatur, quod corde expellitur, & in cor refluit. Sed quo plus hujus liquidi vitalis, manente vita, auferatur, eo minor fit solidarum partium actio & attritus ad fluida contenta; id est, minuitur vitalis circuitus humorum vehementia: minuta enim copia vitalis liquidi, non reddit ad cor eadem quantitas. Sed sanguinis, per venas allati, in cava cordis influxus inter causas motum cordis excitantes merito numeratur, ut ante dictum fuit ( §. 28 ) & alibi jam sæpius: ergo minuitur cordis contractio muscularis in suo robore & velocitate. Docet hoc evidenter venæ sectio, quæ furentem in morbis acutis nimio impetu vitam sic potest compescere, ut incipiant omnia remittere, languere; imo ad animi deliquulum deducta hac evacuatione in acutis continuis, ubi validæ ægrotantis vires sunt, sæpe ilico tollitur febris: ut Galeno, sic febrem curanti, adstantium quis dixerit: *ô homo jugulaſti febrim!* ( a )

Sed jam antiquis temporibus disputaverunt Medici, quomodo deberet in morbis tolli illa copia nimia vitalis liquidi: simplicissimus, & naturæ, toties hæmorrhagiis excitatis morbos sanantis, familiaris modus videbatur aperto vase per venæ sectionem minuere copiam: sed Erasistrati sectatores damnabant venæ sectionem, & exsuperantem sanguinem tolli posse volebant inedia, quam triduanam imperabant ægris suis: famosa illa *διάρησις αἵματος* ab Hippocrate in libro de victu acutorum morborum fuit proscripta. Integrum librum Galenus ( b ), scripsit, ubi & argumentis, & rerum experimentis, hanc sententiam refutavit; licet postea à Chemicis quibusdam infelicitè resuscitatum.

Dum enim per inediam humorum copiam minuere volunt, diffantur subtilissimæ, crassissimi humores in vasis maximis eo plus condensantur; & simul omnia in putri-

( a ) Method. Medendi Lib. IX. cap. 4. Charter. Tom. X. pag. 206.

( b ) De venæ sectione adversus Erasistrateos Charter. Tom. X. pag. 406. &c.

dam acrimoniam disponuntur : venæ sectio vero crassissimam humorum nostrorum partem, sanguinem rubrum nempe, educit, viamque facit diluentibus ingestis.

**DENSITATEM.** In homine sano sanguis semper densitate aquam superat; & dum in aquosam tenuitatem incipit degenerare sanguis, perit omne robur: docent hydropici. Ubi ergo nimium robur in valis & visceribus peccat, depletis per venæ sectionem vasis,educta densissima sanguinis parte, ingeruntur aquosa; serum lactis, ptisanæ hordeaceæ &c. in quibus aqua prædominatur; ut his repleta vasa debilitentur, & quasi dispositio ad hydropem inducatur. In morbis acutis Hippocrates solis fore aquosis in victu ægrorum usus est.

**PRESSIÖNEM.** Omnia ingesta alimenta & stultenta sanguine sunt leviora: vis ergo vasorum hæc continuata actione compingit & consolidat in bonum sanguinem. Quo hæc vis vasorum minor est, eo minus compactus ex ingestis nascitur sanguis: docent debiles puellæ, quibus subrubellus ichor quasi per vasa fluit, non scilicet sanguis. Quo jam vasa pleniora sunt, eo major compressio liquidorum vasis contentorum: cordis enim vis, projiciens sanguinem in arterias, jam valde distinctas, debet comprimere plus sanguinem in arteriis, ut locare ibi possit contentum in suis cavis sanguinem: hinc dum minuitur hæc vasorum plenitudo, minuitur & hæc pressionis causa. Quo jam densiora sunt liquida nostra, eo majori impetu in vasa nostra agunt; cui actioni in sanitate æqualis est vasorum reactio in liquida. Dum ergo minuitur liquidorum nostrorum densitas, minuitur etiam pressio, ut patet. Quo jam celerior est propulsio sanguinis per vasa, eo sæpius, eodem dato tempore, applicantur causæ condensantes nostris liquidis: hinc in omnibus morbis, in quibus nimius vitæ impetus peccat, summam quietem imperavit sapiens antiquitas. Minuta ergo copia, minori conciliata densitate liquidis, minori motu fluidorum per vasa, minuitur pressio; &, quod inde necessario sequitur, nimium robur vasorum & viscerum præsens tollitur, vel futurum præcavetur.

3. Quid motus muscutorum valeat efficere dictum fuit, §. 28. n°. 2. §. 37. §. 43. n°. 3. §. 48.

4. **QUÆ HUMECTANT.** Quidnam vocatur humectare in Medicina? Corpus humanum replere pluribus, quam hætenus habebat, liquidis; & simul sic disponere, ut plus, quam solebat antea, retineat: hæc duo simul faciunt humectationem. Dum enim ingeritur aqua, non mansura in corpore, perluitur corpus, non humectatur. Aqua tepida pota laxat omnia vasa, sed cum farinosis cocta longe plus emollit & humectat, sicque efficit, ut repletioni minus resistant vasa. Hoc totum jam verum est respectu solidarum corporis partium; sed ratione fluidorum difficultas magna manet: sanguis enim humanus per vim nimiam vasorum in fluida incipit coire in spissitudinem inflammatoriam; tuncque non facile miscetur aquæ ingestæ; sic sæpe in morbis acutissimis observatur, largam copiam aquæ epotam per urinas & sudores statim dilabi, & post paucas horas urinam esse æque rubram ac ante, nec levare symptomata. Viderur tunc aqua fluxisse quidem cum sanguine per vasa, non autem cohesisse sanguini intima miscela, sed mox secessisse. Tunc saponem blandissimi, aquæ misti, ut sunt omnes succi fructuum horarum, olerum mollissimorum, mel, manna, saccharum &c. sic dividunt nimis pronum in concretionem sanguinem, ut aquæ facilius fiat, & magis durabilis, miscela cum sanguine.

Remedia jam humectantia in materia medica descripta sunt; in quibus omnibus semper prædominatur aqua. Ad sunt simul talia, quæ aliquid glutinosi lentoris addunt

aquæ, nimis cito præterlapsuræ; ut sunt omnia farinosa, omnes herbæ emollientes. Adduntur & saponacea, quæ dividunt nimium sanguinis lentorem: sed imprimis laudabantur pro hoc scopo decocta cancerum fluviatiliū in Græcia, ad siccos illos marasmos ab Hippocratis temporibus jam adeo laudata. In Italia viperinarum carniū decocta tanti fiunt. Forte hic decocta anguillarum substitui possent; in his enim omnibus est subviscosus, humectans, blandus succus, qui plus facit in exsiccis illis corporibus, quam fere sperari posset. Si his decoctis, ex se fatuis, gratis oleis additis concilietur saporis gratia, summum habetur remedium.

**LENIUNT.** Quæ lenientia dicuntur sunt talia vel respectu solidorum, vel respectu fluidorum: respectu solidorum lenientia dicuntur, quæ nimiam rigiditatem tollunt; respectu fluidorum, quæ omne acre stimulant obvolvunt & inviscant: qualia sunt omnia recensita statim.

**EMOLLIUNT.** Quæ lenientia dicuntur ad emollientium classem pertinent, hac tamen cum diversitate, quod emollientia respiciant tantum solidas partes, lenientia & fluidas & solidas partes simul.

**DILUUNT.** Diluere tantum de liquidis dicitur: his vero dilutis solida laxantur. Sed quid diluit? certe aqua unicuique proprie diluens est respectu nostri sanguinis; & reliqua omnia, quæ diluentia dicuntur, tantum ratione aquæ agunt. Salia quidem attenuant & resolvunt, non diluunt tamen. Spirituosa omnia potius coagulant nostros humores. Aqua autem frigidissima, æque ac fervida, sanguinem coagulat: hinc sola tepida dat optimum diluens. Hæc jam aqua tepida potest omni modo applicari corpori nostro, per balnea, vapores, clysmata, fomenta &c.

**RESOLVUNT.** Nimium robur fieri dictum fuit, concretis multis vasīs, antea perviis: hinc resolyentia, respectu solidarum partium, deberent habere talem potestatem, ut vasa concreta redderent iterum aperta: hoc vix videtur fieri posse, vel saltem non facile. Sed resolyentia respectu fluidorum sunt omnia illa, quæ partes olim fluidas, nunc concretas, iterum solvunt in illas moleculas, ex quibus constabant ante concretionem. Hæc autem dividunt concreta vel insinuatione suæ molis inter partes coherentes, vel stimulorum instar vasorum vim augment, unde major attritus, & sæpe divisio concreti: aliquando utrisque his viribus simul conspirantibus agunt.

Sanguis ruber, dum fluit per totum corpus, debet transire per vasa, quorum diameter decimam partem crassitie capilli non superat: sed sanguis ille, extra corpus dimissus, sic concrevit, ut per maximos canales transire non posset: jam resolvens diceretur illud, quod sanguinem concretum posset iterum dividere in particulas adeo parvas, ut per vasa illa minima posset transire.

Prout jam sunt varia genera concretientium humorum, diversa etiam requiruntur resolyentia: quorum præcipua in Materie Medica ad hunc numerum sunt recensita.

Diluentia aquosa enim solvunt omnia mucosa, glutinosa, gummosa, saponacea &c. plurima autem sunt per aquam non resolvenda: sanguis enim noster in aquam tepidam dimissus à concretionem non impeditur.

Salina solventia pleraque, recensita in Materie Medica optime hoc munus absolunt: inflammatoriis concretionibus resolvendis sales neutri optime conveniunt; maxime nitrum & ejus præparata pleraque, quod sale marino levius, faciliusque superandum à natura humana, tam pulchro usu in omnibus fere morbis acutis adhibetur.

Sales

Sales alcalini ad glutinosas lentas concretiones magis laudantur &c.

Saponacea, mitissima imprimis illa ex saccharo, melle, succis &c. sine ullo fere molimine, sine ullis turbis, plurima concreta solvunt: fortiora illa, & chemica acriora, simul excitato majori motu agunt.

Hæc omnia autem maxime adjuvantur frictionibus, dum alterna pressione & relaxatione vasorum resolventia, sanguini mista, teruntur quasi cum concretis fluidis. Sic certe post balneum vaporis moderata frictio, simul interne solventissimis remediis adhibitis, sæpe duos glandularum tumores dissipavit, qui resolvi posse vix credebantur.

**ABSTERGUNT.** Dum viscosum vel glutinosum aliquod tenacitate sua apprehendit superficiem vasis, & meatus naturales obstruit, si hoc aufertur, dicitur deterfa esse illa pars corporis. Hinc abstergentia sunt resolventia concreti, imprimis saponacea omnia. In illis autem vasis, per quæ rapidissimus est humorum motus, non facile inveniuntur talia viscosa vasis adhaerentia, sed in ultimis vasis vel in receptaculis, ubi colliguntur humores in proprios usus, occurrunt talia. Magnus tamen error foret credere, omnia talia viscosa esse semper morbosa: certe totum os internum, œsophagus, ventriculus &c. tali obidentur muco, quo deficiente pessimi oriuntur morbi: Ad classem abstergentium pertinent omnia quæ diluunt, quæ resolvunt: omnium maxime saponacea. Illa autem nimiae rigiditati vasorum & viscerum curandæ profunt, quatenus, obstaculis remotis, per vasa patula liberrimus fit humorum transitus: unde æquabilissima facta circulatio non compingit adeo ad se invicem solidas partes, non condensat tanta vi humores.

§. 55. **E**X hisce omnibus (ab 21. ad 55.) morbi Partium Solidarum proprii intelliguntur, curantur, & ex iisdem clarescit, quia respondendum his quæstionibus? Quæ diversitas structuræ Partium Solidarum in ætate diversa? Cur homo crescit, perstat, decrescit? Cur in utero materno omnium ocyssime augeatur? Cur latus, fortis, rigidus fit? Cur humidus, plenus, siccus? Cur morte naturali, vel fato senili, moritur? & quo tum morbo? quinam morbi plerumque singulæ ætati proprii? Quis victus, quæ vita, quæ medicamenta, cuique tempori vitæ commoda? quænam fides, quæ utilitas, doctrinæ de stricto & laxo in solidis? Unde desumenda nota certissima justæ mensuræ Laxi, & Stricti, in homine? &c.

Ex hætenus dictis omnes morbi solidarum partium intelligi possunt, & explicari: pendent enim omnes à mala cohesionem partium, & ex hac doctrina plurima sequuntur, & maximi usus, in Medicina; facilis enim sequitur responsio ex prædictis ad sequentes quæstiones.

**QUÆ DIVERSITAS STRUCTURÆ &c.** Quo propius origini suæ est corpus humanum, eo pluribus vasis, fibris & membranis simplicibus; constat; eo facilius cedunt vasa liquidorum impulsui; eo major proportio encephali & nervorum inde productorum ad reliquas partes. Si recens nati corpusculum lustratur undique, omnia pulposa, mollia, humida sunt; volæ manuum, pedum plantæ; ubique in



omni puncto per minima vascula exhalantia humido madent; nihil sicci, nihil callosi invenitur; sensim facto ætatis augmento plurima ex minimis vasculis incipiunt consolidari: sic vasorum numerus minuitur, solidorum augetur robur; donec tandem in ultima senectute dura accedat exsucco corpori callositas, & minimorum vasorum plurimorum abolitio: unde omnes actiones, quæ pendent à subtilissimi humoris per minima vasa motu, in senibus incipiunt deficere; & solida omnia nimis rigida facta resistunt magna vi fluidis impulsis.

**CUR HOMO CRESCIT?** Dixerat Hippocrates (a): *Partes autem simul omnes discernuntur, & augentur, neque una prior altera neque posterior: majores tamen natura minoribus priores conspiciuntur, quum priores non existant.* Dum enim generationis animalium mirabilem historiam; quantum per fidelissimas observationes hodie cognoscitur, consideramus, videntur in embryone partes præexistentes explicari in majorem molem. Idem & in plantarum propagatione constat, ubi in sæcundo semine integra plantula convoluta latet, sensim explicanda. Dum ergo in tenello embryone pleraque vasa intorta & convoluta jacent, oritur resistentia liquidis per hæc vasa propellendis; sed liquida pulsa per canales, cum renixu quodam contra hunc motum facto, conantur distendere hos canales, & simul producere latera canalium juxta longitudinem: hinc elongantur omnia, & fit incrementum. Ubi vero; explicatis omnibus vasis, minor fit resistentia liquidis propulsis, fit liberrima circulatio per omnes canales; tuncque cessat illa productio canalium secundum suam longitudinem, quia jam liberrime perfluunt liquida, & vitali motu (ut ante demonstratum est) consolidata canalium latera non patiuntur se distrahi ulterius ab eadem vi: tunc corpus

**PERSTAT.** Dum copia & impetus humorum ex corde pulsorum æquilibrantur viribus solidorum resistentium: corpus enim humanum non desinit crescere, quia solida extendi non possunt; sed quia explicatis vasis omnibus liberrima circulatio efficit, ut minus urgeant liquida suos canales: quacumque enim de causa nato obstaculo circa quædam vasa (etiam in corpore jam adulto) velocitate & copia humorum manentibus iisdem, videmus partes incrementum accipere: Docet hoc uterus gravidarum in tantam molem expansus; hepar & lien obstructa in immanem magnitudinem excreverunt; cutanea vascula invisibilia à comprimente atheromate vicino insigniter aucta. (b)

Fortè a tali latente causa mirabile sæpe quarundam partium augmentum. Puellam novi, cui lingua, immaniter aucta, extra os infra mentum pendula est, deglutitione, loquela, gustu integerrimis.

**DECRESCIT.** Inevitabili vitæ sanæ effectū sensim nascitur tale robur in vasis omnibus, ut incipiant nimis resistere liquidis impulsis. Hinc sensim contrahuntur omnia; totum corpus aridum & exsiccum fit; omnis fere pinguedo consumitur, quæ tam magnam partem corporeæ molis humanæ facit: hinc in senum manibus, omni fere pinguedine evanida, nudas quasi tendinum chordas videmus; mirabilia illa ligamenta, inter corpora vertebrarum media, evanescent sæpe sic, ut fiant nulla, & vertebræ vertebrae tangant: unde minuitur corporis proceritas, incurvatur spina dorsi antrosum, gibbosi fiunt senes, & vera silicernia, tandem senili marasmo pereunt.

(a) De victus ratione Sanorum Lib. I. cap. 1.  
9. Charter. Tom. VI. pag. 455.

(b) Simson the system of the womb. pag. 24.  
25. &c.



**CUR IN UTERO MATERNO &c.** Rem se sic habere certi sumus : ex invibili enim molecula intra novem menses crescit infans , ut sexdecim librarum pondus sæpe æquet , imo exsuperet aliquando. Ratio videtur hæc esse : tenerrima sunt vasa , corculo valide moto valde propinqua , convoluta plurima magis resistunt liquidis impulsis ; hinc plus elongantur & distenduntur ; totus embryo fovetur assidue repenti calore liquoris amnii : hinc omnia servantur laxissima ; nutrimentum materni corporis viribus præparatum affunditur continuo , distribuitur æquabilissime.

**CUR LAXUS.** Si otio ignavus torpeat homo , somno indulgeat , mollissimis simul utatur cibis , tumebit inerti mole corpus , vires tamen non adeo insurgunt , vasa non satis consolidantur : hinc facile distendenda cedunt liquidis replentibus.

**FORTIS.** Dum liquidorum vis prævalet vasorum firmitati , corpus tumet & laxum est : dum corporis exercitiis roborata vasa liquidorum impetum sustinent sine dilatatione nimia , & vasorum robur fluidorum copiarum & motui æquilibrata vi resistit , tunc fortis dicitur homo ; in quo firma cohesio solidarum partium , & debita humorum densitas.

**RIGIDUS.** Si eadem causæ pergant agere , quæ corpus reddiderunt forte , tandem illud facient rigidum : ætas sensim tenellum recens nati hominis corpus firmat , corporis exercitia robur addunt vel debilissimis ; provectior ætas omnia callosa rigida facit ; nimii labores præproperam senectutem faciunt.

**CUR HUMIDUS.** Omnes venæ nostræ facillime dilatabiles replentur ab ingestis novis liquidis ; sed arteriarum firmitus robur expellit iterum ingestos liquores : homo enim sanus & fortis incredibilem copiam aquæ potare potest , quæ omnis recepta venis cordi traditur , per arterias dein distributa expellitur de corpore ; sequenti enim die pristinum pondus recuperat. Ubi ergo talis in arteriosis vasis est debilitas , ut venis receptos humores nec moveant satis , nec expellant superfluos , tunc accumulatur liquida , & prævalent solidis , humidamque dictam temperiem inducunt.

**PLENUS** dicitur homo , quando vasa ejus plus repleta sunt bonis humoribus , quam requiritur ad stabilem sanitatem. In illis talis laxitas est in vasis , ut impleantur ad illum terminum , in quo nondum morbus fit ; sed si augeantur plus humores , aut rarefiant à calore vel alia quacumque causa , sanitas manere non potest.

**SICCUS.** Hoc fit simpliciter ab incrementum vasorum robore : quando arteriæ majore contrahuntur vi , quam requiritur ad perfectam sanitatem , liquida expelluntur , siccum fit corpus : hinc ætas & labores solida robotando corpus siccant.

**CUR MORTE NATURALI &c.** Mors naturalis dicitur illa , quæ inevitabili lege ex creati corporis constitutione sequitur : hæc autem fit , quoniam elementa fibrarum ad elementa , fibræ ad fibras , membranæ ad membranas , parietes vasorum ad invicem applicantur , & vasa complanata cum aliis similibus concretescunt ; sicque tandem , minimis vasis fere omnibus concretis , per sola majora adhuc absoluitur humorum circulus : donec & hæc arida , callosa , imo tandem cartilaginea & ossea facta ( ut docuerunt observata ) impendant liberam sanguinis expulsionem ex corde : sicque vita definit in placidam , maximeque optabilem , mortem. Ita defecit centenarius major Ludovicus Cornaro. ( a )

( a ) Raadgeving om gezond en lang te leven pag. 78.

Hinc inanis Chemicorum jactantia patet, qui magno hiatu fere immortalitatem promittebant; saltem pro lubitu se vitam posse producere clamabant inepti: vide §. 39. n<sup>o</sup>. 1.

ET QUO TUM MORBO. Simplici quiete repleti cordis, non potentis se evacuare in arterias plenas; & tam rigidas, ut à vi cordis distendi non possint.

QUINAM MORBI &c. Pulcherrima est hujus rei consideratio, & maxime necessaria, cum variâ ætate variis malis homo obnoxius vivat.

In prima ætate omnibus morbis generis nervosi magis obnoxius vivit homo, quia docent observata, encephalon, ejusque producta, medullam spinalem & nervos, eo majorem habere proportionem ad reliquas partes corporis, quo origini suæ est propior: accedit, quod ut cerebrum minus firmum in hac ætate, ita & nervi, cerebri producta, molliores sint, hinc facilius afficiendi, & præterea tenuioribus involucris tegantur: hinc tam facile convelluntur; vix enim laborat infans minima febricula, quin convellatur: Ab acido primarum viarum nata ventris tormina, susceptum contagium variolosum vel morbillosum, omnia quæ sensus organa afficiunt vividissima actione, ut fragor magnus, lux fulgidissima &c. toties convulsiones excitant: imo Sydenhamus, dentitione defunctos dum convulsione correptos videbat, prælagiebat variolas & quidem boni moris. (a) Hinc cum à tam levibus causis in hac tenera ætate convulsiones oriantur, non adeo illas timuit ante septimum annum Hippocrates; post hanc ætatem, majoribus causis dum excitantur tantum, periculosas pronunciat. (b)

Altera origo morborum in prima ætate est, quod humorum copia solidorum robori prævaleat; omnes enim in prima ætate turgiduli, & humidi, sunt: hinc tam faciles & tam miræ mutationes humorum, qui tam sæpe per cutim modo nondum bene intellecto mutatam exeunt; docent hoc achores, herpes, excoriationes pone aures, sub axillis &c. sicque sæpe incredibilis copia humidi quotidie excernitur, quod, imprudenter dum cohibebatur, molestissimis morbis toties originem dedit.

Postea circa pubertatis tempus miræ mutationes accidunt toti corpori in utroque sexu; in masculis testium tumores, varicosæ vasorum seminalium inflationes, leni frictione supra vapores accensi succini, simulque purgante levi dato, facile curabiles: in foemellis miri sæpe morbi primam mæstruorum eruptionem præcedunt & comitantur.

Dum postea ulteriori incremento incipit resistere corpus, nec vasa patiuntur se tam facile extendi, nascitur æquilibrium inter fluidorum impetum copiamque, & vasorum resistantiam. Pergunt interim bona viscera novos quotidie generare humores: unde facilis vasorum ruptura, hinc hæmorrhagiæ narium, sputa sanguinis &c.

Adulto dein homini maxima actio vasorum in fluida: hinc densius & compactus sanguis; unde frequentes tunc morbi acuti inflammatorii.

Ingravescente demum ætate solida magis compacta fiunt, minima vascula sensim concresecunt, & callosa fiunt, omnia, quæ à subtilissimis humoribus per minima vasa motis pendent, incipiunt aboleri sensim: hinc omnes actiones cerebri & nervorum incipiunt debilitari; humores in frigidam & pituitosam indolem degenerant; per sola majora vasa humorum circuitus adhuc absolvitur; tandemque inevitabili

(a) Pag. 161.

(b) In Prognostico & Coacis.

necessitate mors sequitur. *Quia natura progressum, qui est ad siccitatem, effugere non licet, ideo senescimus, & corrumpimur (a).*

Ætatum varios morbos sollicite notavit Hippocrates (b).

**QUIS VICTUS.** Quandiu in utero materno hæsit fœtus, à matre præparatos recepit humores. In lucem editus infans mox materna novit ducere ubera. Lac ergo maternum solum fere infantibus convenit. Dum dentes anteriores prodierunt, solidiora parum, sed prius commansa, exhibenda, & perfricandi sæpe, sed non nisi vacuo ventriculo (c): panis bene fermentatus; lacte vel carniū jusculis affusus, in pulvem mollem conversus, tunc exhibitus prodest. Quando dentes molares jam prodierunt, durioribus sensim uti licet: omnia autem calida, vinosa, irritantia &c. nocent infantibus, quia totum genus nervosum adeo mobile habent.

Sæpius autem cibandos esse juniores, & puerorum voracitas suadet, & monitum est Hippocratis (d) dicentis, pueros omnium minime jejunium ferre: qui crescunt, plurimum habent calidi innati, hinc plurimo alimento indigent, aliter corpus absumitur.

Adultis & sanis fere sufficit regula Hippocratica, (e) *valetudinem excolunt, citra satietatem cibis vesci, & impigrum esse ad labores.* Cumque hæc ætas morbis acutissimis obnoxia sit, patet calefacientia evitanda esse. Labori autem semper proportionatus sit cibus: longe alio enim & copiosiori indiget durus arator, quam meditationibus solis incumbens Philosophus.

Senibus autem, (cum & facillime jejunium ferant, & parvam habeant calorem, hinc paucis egent fomitibus, à copiosis namque exstinguuntur); (f) mollium ciborum sæpe repetita exhibitio prodest: cumque jam edentuli facti fuerint, solo fere lacte, jusculis, ovis, bis pueri facti senes vitam sustineant: imprimis illis prodest moderatus vini usus, quod ideo lac senum dicitur: Nascitur enim in fermentantibus liquidis aliquid miri spirituosum, quod momentanea actione in cerebrum & omnes nervos agit efficacissime; imprudenter autem & nimia copia applicatum corpori humano, ipsam mortem, & subitissimam, facere potest: vel & minori violentia agens tristem magis ipsa morte conditionem adfert, amentiam nempe, & alia mala (g). Illud spirituosum in novis illis & petulcis vinis hærens summum dat restaurans senile. Cornaro singulis annis mense Julio & Augusto abhorrebat ab omni vino: hinc mox languebat appetitus, & circa medium Augusti debilis penitus factus erat: simulac vero per tres quatuorve dies Septembris mensis initio novum vinum sumserat, mox redibant vires, & crudæ in hoc viro senectutis vigor (h).

**QUÆ VITA.** Tenella ætate, cum agilissimum sit corpus, vix quiescere possunt, & pessime se habent, si a severis nimis parentibus vel custodibus à ludis pueri cohibeantur penitus. Cum autem nimis cito duris laboribus adhibentur, corpus redditur robustum quidem, sed cito perituum senili callositate ante ætatem. Sic vi-

(a) Galen. de Sanitate tuenda Lib. VI. cap. 3. Charter. Tom. VI. pag. 169.

(b) Sect. 3. Aphorism. 24. 25. 26. 27. 28. 29. 30. 31.

(c) Galen. de Sanitate tuenda Lib. I. cap. 10. Charter. Tom. VI. pag. 55.

(d) Aphor. 13. & 14. Sect. 1. Charter. Tom. IX. pag. 23. 24.

(e) Epidem. Lib. VI. Charter. Tom. IX. pag. 500.

(f) Hippocr. Aphor. 13. & 14. Sect. 1. Charter. Tom. IX. pag. 23. 24.

(g) H. B. Chem. Tom. I. pag. 806. 807.

(h) Cornaro raadgeving om gezond en lang te kunnen leven pag. 54. 55.

demus rusticos, à teneris annis jam nimis laboribus exercitatos, senum instar rigidos & callosos factos quadragesimo ætatis anno.

Nec minus peccatur, dum severioribus disciplinis nimis cito adhibentur: sic sæpe præcoces & admirandos ingenii fructus exhibent; sed fere semper brevi pereunt, vel postea stupidi & ad omnia fere inepti vivunt. Qualia exempla passim obvia occurrunt.

Adultis salubri corporis motu vires sustinere & firmare convenit, ne torpeat corpus, tandemque opima pinguedine sepulti (ut de Ptolomæo Ægypti Rege dixit Justinus) (a) sensu hominis nimia sagina careant. Quantum boni corpori humano præstent corporis exercitia, dictum §. 28. n°. 2.

Senibus autem frictionem cum oleo mane post somnum commendat Galenus, (b) jubetque, ut consuetis exerceantur laboribus, vehementia tamen laborum remissa: cumque minima diætæ vitia senes sentiant, juvenes autem vix maximos errores, repetitis vicibus cibos molles ut sumant, jubet. (c)

**QUÆ MEDICAMENTA.** Infantibus fere tantum videntur conducere illa, quæ humorum copiam aliquantum minuunt: Hinc tam bene ferunt lenissima imprimis ex rhabarbaro purgantia. Prosumt plerumque & illa, quæ acidæ acrimoniæ temperandæ conducunt, ut absorbentes ex lapidibus cancerorum &c. pulvisculi: deinde quæ nimis facilem irritabilitatem generis nervoli aliquantum compescunt, & simul solidas partes moderate roborant: hinc rhabarbarum, cum lapidibus cancerorum & paxillo cinamoni, adeo prodest.

Increſcente demum ætate nunquam dentur talia, quæ stimulo suo motum humorum nimis incitant: metus enim tunc est, ne tenella rumpantur vasa.

Adultæ ætate profunt imprimis illa, quæ nimiam propensionem humorum in spissitudinem inflammatoriæ tollunt.

Senectus autem, cum sit nihil aliud, quam siccum & frigidum corporis temperamentum annorum multitudine proveniens, (d) requirit humectantia, & leviter nutrientia, additis gratissimis stimulis spirituosis; sed semper humectantibus mistis.

**QUÆNAM FIDES, QUÆ UTILITAS &c.** Postquam Medicina in duas partes secta erat, quæ singulæ suos habebant sectatores, quorum quidam solis experimentis artem natam esse contendentes, evidentes quidem causas ut necessarias amplectebantur, obscurarum vero causarum & naturalium actionum quæstionem supervacuum esse credebant, dicebantque, Medicinam non esse inventam post rationem, sed post inventam Medicinam rationem esse quæsitam; hinc experientiorum notitiam tantum necessariam esse contendebant; vocabantur Empyrici. Alii, qui Rationales dicebantur, non negabant experimenta quoque esse necessaria: sed ne ad hæc quidem aditum fieri potuisse, nisi ab aliqua ratione contendebant: sed præterea abditarum & morbos continentium causarum notitiam, deinde & evidentium, post hæc etiam naturalium actionum, ideoque & partium interiorum notitiam necessariam esse volebant.

Inter rationales vero Medicos unus ex Asclepiadis sectatoribus Themison, & illo auctore postea alii, artis difficilis compendium parabant, asserentes nullius causæ notitiam quidquam ad curationes pertinere, satisque esse quædam communia mor-

(a) Lib. XXXIV. cap. 2.

(b) De Sanitate tuenda Lib. V. cap. 3. Charter. Tom. VI. pag. 144.

(c) Ibid. cap. 4. Charter. Tom. VI. p. 146.

(d) Galen. de Sanitate tuenda Lib. V. cap. 9. Charter. Tom. VI. pag. 154.

borum intueri: & quidem horum tria esse genera, unum adstrictum, alterum fluens, tertium mixtum; nam modo parum excernere ægros, modo nimium, modo alia parte parum, alia nimium (a).

Hæc fuit prima origo doctrinæ de stricto & laxo, de quo postea Prosper Alpinus in Medicina Methodica tam operose egit: & plurima circa hanc rem apud Cælium Aurelium, Methodicorum sectæ pariter addictum, habentur.

Sed proprie strictum & laxum in solidis tantum partibus obtinet; nec humorum morbi ex hac doctrina facile explicari poterunt; ut postea patebit. Magnum ergo usum habet in Medicina consideratio mutæ cohesionis in partibus firmis: nec tamen omnes morbi inde deduci poterunt, ut voluerunt Methodici.

UNDE DESUMENDA NOTA CERTISSIMA &c. Quæritur hic, quænam sint signa, quæ doceant, talem obtinere cohesionem in solidis, ut nec nimis resistant, nec nimis facile cedant, distendentibus liquidis: deinde quænam sint signa, quæ nimis validam, vel nimis parvam cohesionem designant? Quando à pleniori victu, potu copiosiore assumpto, aëre humidiusculo, non statim tumer, vel saltem non diu tumidum corpus manet; novimus debitum robur inesse vasis & visceribus, per quod distendentium liquidorum nimia copia brevi de corpore expellitur. Si simul non decrescat sensim adulti hominis corpus, arctatis nimia contractilitate vasis, sicque expulsis, liquidis, sed in eadem nec aucta multum tamen torositate persistet, novimus illud obtinere æquilibrium: si ab ingestis copiosioribus &c. statim tumeat corpus, novimus nimis debilem nimis facile dilatabilem esse vasorum compagem: si macilenta, exsiccata, arida sint omnia, facile nimium robur vasorum adesse videmus.

§. 56. **V**ULNUS hinc (16.) jam primo pertractandum, post morbos solidi simplicissimos. Sed, cum vitia liquorum spontanea semper trahat secum, de hisce ante vulnera agendum erit, quæ nosci debent ante historiam vulnerum absolvendam.

Post explicatos morbos, qui à nimio robore, vel nimia debilitate, solidarum partium pendent, videretur agendum esse de cohesione nulla partium antea coherentium, sive de soluta unitate (ut vocant): sed inter solutæ unitatis morbos omnium simplicissimus est vulnus, sive solutio recens facta à corpore duro, acuto, & moto. Constat autem certissime, ne minimum posse infligi vulnusculum, quin laxis vasis effundantur humores. Humores vero effusi, non amplius propriis vasis coerciti, stagnant, nec nostri corporis leges sequuntur, sed spontanea corruptela mutantur in alienam indolem. Prius ergo debet explicari, quid humoribus extravasatis accadat, antequam de vulneribus aliquid bonæ frugis dici possit.

§. 57. **U**NDE agetur primo de his humorum morbis, qui in illis nascuntur sponte; dum vel sibi ipsis permittuntur, nulla habita ratione vasorum, vel vitio incitati, torpentisve nimium, vitalis motus.

Primo ergo considerandum est, quænam fiat mutatio liquidorum à causis commu-

(a) Vide Celsi Præfat. Lib. I.



nibus, quæ in omnia corpora agunt. Hæc autem mutatio vocatur spontanea. Quamdiu autem in vasis nostris hærent liquida, vim corporis nostri experiuntur, & per hanc mutantur. Hinc nunquam sola spontanea mutatio in hæc agere potest, sed vasorum & viscerum efficacia longe aliam mutationem inducit: ergo, nulla habita ratione efficaciarum vasorum in liquida, sola mutatio per communes causas expendi debet: sic lac humanum extra corpus in serum caseum, & pinguem cremorem abit, quod nunquam in corpore fit.

Sed vitalis motus humorum per vasa nostra facit insignem mutationem in humoribus, imo aliam prorsus naturam inducit. Prout jam ille motus nimis incitatus furibundo quasi impetu agit in acutissimis, vel torpens in languidis morbis silet fere, longe aliæ, imo oppositæ, sæpe mutationes inducuntur: quæ ergo necessario etiam debent examinari.

Tria ergo hic considerata sunt, 1. quid fiat humoribus extra vasa positis à causis communibus. 2. Quænam fiat mutatio in his ab aucto motu. 3. Quænam oriatur à motus defectu.



## D E

# SIMPLICISSIMIS HUMORUM VITIIS, ET SPONTANEIS.

§. 58. **H**UMORES in homine vivo reperiendi, vel crudi assumptorum naturam retineant hæcenus, vel vi actionum naturalium, & miscela fluidorum humanorum, indolem acquisiverunt nostris liquoribus similem.

Omnes, qui fluunt per vasa nostra, humores vel ingestorum naturam adhuc retinent, vel per miscelam liquidorum humanorum, & vasorum viscerumque vires, propria indole deposita, in nostram jam transiverunt naturam.

Quamdiu autem ingesta adhuc aliquid de sua indole retinent, tamdiu cruda dicuntur. Crudus ergo est cibus & potus, dum deglutuntur. Chylus inde factus, in ventriculo & intestinis, in vasis lacteis, cisterna lumbari, ductu chyliifero, in vena magna, in corde dextro, crudus adhuc est, licet tot coctis humoribus jam mistus. Cum per pulmones pellitur, incipit coctio secunda, quæ ex chylo lac facit: tandemque per aliquot horas chylus crudus expertus vim vasorum & viscerum, imprimis pulmonis, ingestorum natura deposita, assimilatur nostris humoribus, & coctio absoluta est.

Cumque hæc coctio satis longam requirat vel in sano corpore moram, hinc fere semper aliquid crudi, nondum penitus mutati, cum coctis humoribus per vasa fluit, nisi diu à cibo & potu abstinuerit homo.



§. 59. **P**RIORES ( 58. ) vel ex plantis, vel ex aliis sunt haui animalibus.

Ex regno enim vegetabili & animali nutrimenta nostra sumuntur; ex fossilibus vix, nisi forte condimenta quædam: ut sal marinus, gemmæ &c. vel si aquam quis inter fossilia numerare vellet.

~~~~~

MORBI SPONTANEI EX ACIDO HUMORE.

§. 60. **L**IQUIDA nostra, confecta ex plantis farinosis, vel ex horæis fructibus, crudis, fermentatisve, si vires viræ nostræ vincunt, eam in nobis indolem acquirunt, quam suæ naturæ per calorem fortæ debent. Acrimonia acida, & glutinosum pingue hinc oriuntur maxime. Prior ex fermentatis imprimis & non fermentatis: posterius ex farinosis cerealibus, vel leguminosis, non fermentatis: neque coctis nascitur; quo spectant etiam illa, quæ austeri adstrictu tenacitatem humorum creant.

Acidum dicitur, quod linguae applicatum excitat saporem illum, quem communi consensu acidum omnes vocant (sapor enim verbis describi non potest) quod narium suppositum, imprimis si calefactum fuerit, odorem spirat, quem omnes vocant acidum: Omne acidum cum testaceis pulveribus, exustis animalium ossibus, creta &c. effervesceat, uti & cum salibus alcalinis. Syrupus florum violarum à levissimis etiam acidis in rubrum colorem convertitur.

Omne jam illud, in quo recensitæ dotes observantur, acidum vocabitur.

Magna jam agitur quaestio, an tale acidum ingestis solis originem debeat, posteaque per vim humani corporis mutetur in non acidum; an vero in liquidis humanis sanis, vel aliorum animalium, acidum prius definitum existere possit naturaliter, sic ut arte inde educi posset?

Si lac exceperis, (& forte quædam pingua) quod nondum penitus animalem naturam acquisivit, sed in quo ingestorum adhuc indoles prævalet, omnes humores reliqui, sibi relictæ, in aëre aperto putrescunt. Omnia animalia sibi relictæ, nisi magno calore exsiccentur, putrescunt. Chemica analysis sales volatiles alcalinos inde educit: plurimique & celeberrimi Chemici inde acidum educi posse, negant. Sani hominis de vena saliens sanguis nullam acidæ notam habet: urina sana, sanguinis sales abluens, nullum signum acidæ dat, etiam in illis, qui acidorum copiam magnam ingesserunt. Contrariam opinionem & specioso ratiocinio, & experimentis, defenderunt celeberrimi in arte viri.

Licet enim ingesta mutantur in corpore humano, antequam nutrant, forte tamen non semper omnes suas dotes deponunt. Volucrum, solis piscibus viventium, carnes ingratum piscium foetorem retinent; turdorum, rhamni cathartici baccis vescentium, carnes purgant. Hinc cum tot acida ingerantur & acescentia, quædam posse aliquid pristinae indolis servare, probabile videtur.

K

Hombergius se ex variorum animalium sanguine, imo & ex ipso sanguine humano, acidum eduxisse destillando affirmat; &, quod mirum videtur, inde produxit liquorem, in quo & alcali & acidum simul aderant separatim hærentia, nec concreta in salem neutrum. (a)

Ex viperis, limacibus, muscis, formicis, acidum destillando eduxit idem Hombergius; phosphorus urinæ acidum acre habet. (b)

Illud deinde Lemery confirmavit (c): imo salibus volatilibus animalium, destillatione inde eductis, acidum adhuc adhærere voluit. (d)

Acidum autem ex animalium partibus facile educi asserit, si prius macerentur, ut volatilis sal pro magna parte abeat; si addatur sal alcali fixus acida trahens, ac impediens, ne una cum sale volatili eleventur; si in initio adhibeatur ignis modicus, ut volatilissima prius eleventur; si postea valido igne torqueantur, ut exprimarur acidum terrestri parti adhærens &c. (e)

Liquidorum humanorum sales nulla arte mutati ad salis ammoniaci naturam accedunt proxime: sed ex acido fixante & volatili alcalino sale simul unitis videtur constare sal ammoniacus: hinc & tale quid in salibus humanis forte obtinet: hinc expulsio sale volatili, non mirum foret, in residuo hæreere acidum, antea unitum cum sale volatili.

Sed efficacia vasorum & viscerum in corpore humano sales illi nascuntur. An ergo bina illa principia constituentia aliquando seorsim fluxerunt in humoribus nostris, unita postea? An acida ingesta per vim nostri corporis mutantur sic, ut suam naturam amittant penitus? An vero, non deposita sua natura, cum alcalino volatili concrescunt in salis ammoniaci quasi speciem? interim sanguis hominis sani, & urina, nullam notam acidi præsentis exhibent.

Saltem hoc certo constat, plurima vegetabilia, & inter illa imprimis farinosa, cerealia, legumina, uti & horæos fere omnes fructus, in calore tali qualem habet corpus nostrum, acquirere acidam acrimoniam, vel in glutinosum pingue mutari; eadem vero, ingesta robusto sano corpori, per vim vasorum & viscerum, & liquidorum humanorum miscelam, sic immutari, ut deposita sua indole in nostram convertantur naturam: dum vero à quacumque causa debile factum corpus minus assimilare valet ingesta, tunc suam sequuntur indolem, & in spontaneam degenerant corruptelam.

Acidi ergo in corpore humano origo videtur deberi ingestis non satis mutatis per corporis vires. Peregrinum ergo corpori acidum est: nullus enim humor, vere animalis dicendus, unquam sua sponte acescit.

Omnia jam vegetabilia, sive fermentata sive non, quæ sibi relicta acescunt, in corpore debili possunt & in acidum mutari: farinosa autem illa omnia cum aqua lentescunt prius, & glutinosas pastas formant; postea autem acida fiunt, ubi fermentatio tenacitatem illam glutinosam attenuavit.

Acidum autem ex ingestis sic in corpore natum vel mite & excoctum est, ut acidi plerique horæorum fructuum maturorum succi, ut in ribesiis &c. & in fermentatione paratis acidis; vel simul junctum habet austerum acerbum, ut immaturi fructus, & acida quædam fossilia, quæ coagulo inducto humorum augent tenacitatem.

(a) Academ. des Sciences 1712. Mem. p. 10. ad 19.

(b) Academ. des Sciences 1712. Mem. 351. ad 362.

(c) Academ. des Sciences 17 9. pag. 227. 246.

(d) Ibid. 1720. 218. &c.

(e) Ibid. 1722. Mem. 51. 52.

§. 61. **A**CIDA hæc acrimonia (60.) causas habet antecedentes,
 1. alimenta ex farinosis, succulentis acidis, recentibus,
 crudis, ferventibus jam, vel fermentatis, vegetabilium partibus.
 2. Inopiam boni sanguinis in corpore hæc alimenta assumente. 3. De-
 bilitatem fibrosæ compagis (24. 29. 41.) vasorum & viscerum. 4. De-
 fectum animalis motus.

Recensentur hic causæ, quæ acidum in humano corpore producere valent. Hæ
 commodè ad duas classes revocari possunt: sunt enim vel ingesta, ex propria sua in-
 dole in acrimoniam acidam degenerantia; vel talia quæcumque, quæ debilitant il-
 lam virtutem, qua corpus sanum ingesta in suam naturam assimilant.

1. Enumerantur illa, quæ materialem causam acido generando præbent.

FARINOSA. Omnes farinæ fere fatuum & mitem saporem habent; cum
 aqua subactæ glutinescent; post fermentationem in liquores spirituosos mutantur;
 ulterius protracta fermentatione in acre degenerant acetum.

SUCCULENTIS &c. Quales sunt omnes succi fructuum horæorum bene
 maturorum, (in immaturis enim austerum inest fermentationi non ita obnoxium) (a),
 hi succi jam vel sunt acidi, ut succus ribesiorum &c. vel facile post fermentatio-
 nem in acidum degenerant; dulcis uvarum succus fit acidulum vinum, iterata
 fermentatione acerrimum acetum.

Cum autem fermentatio ultimo suo effectu acidum producat; hinc quo magis hi
 succi in fermentationem proni sunt, vel dum jam fermentationem absolverunt, eo
 citius inde in debilibus corporibus acidum nascitur; minus ergo succus recens pres-
 sus uvarum sacharinæ dulcedinis fere, plus dum incipit motu intestino agitari, &
 cum sibilo assidue crepitantes bullas habere, (fervere tunc dicitur), maxime, dum
 peracta fermentatione in vinum mutatus est, in acidum vergit. Debiles homines vi-
 num potantes mox acidum eructant, nisi fuerit vinum oleosum meracissimum & non
 tam cito mutabile.

Sequuntur jam causæ efficientes:

2. Omnes actiones vasorum & viscerum conspirantes ingesta mutant in naturam
 nostram: hoc autem fit partim vasorum actione, partim miscela fluidorum jam as-
 similatorum; sanguis autem bonus recondit materialiter in se omnes reliquos hu-
 mores, bilem, salivam &c. & illi humores à sanguine secreti sequuntur sanguinis
 naturam; qui bonus est, quando ex assimilatis humoribus constat; crudus vero, dum
 ingesta adhuc quid retinent de sua natura. Dum ergo boni sanguinis inopia est, de-
 ficit primaria vis immutans ingesta in naturam nostram, vide de his & §. 25. n°. 1.

3. De his dictum fuit paragraphis citatis; & ibi apparuit, quantum solidorum
 robur faceret ad coctionem ingestorum. Hinc corpora laxa ab acidis & acrescentibus
 (id est nondum acidis, sed admodum dispositis, ut acrescant) pessime se habent:
 in calidis vero regionibus; ubi strictissima corpora sunt, acidis maxime delectantur,
 & inde optime se habent. Romanis militibus, in fervidis regionibus bella gerenti-
 bus, familiaris potus erat acetum aquæ mistum, poscam vocabant. (b).

4. Chylus ex ingestis per viscera chylopoietica paratus sanguini parca copia simul

(a) H. Boerhaave Chem. Tom. II. pag. 172.

(b) Nonnius de re cibaria Lib. IV. cap. 15. pag. 479.

miscetur, dumque sic cum sanguine fluit, vasorum & viscerum efficacia mutatur in lac: tandem post aliquot horas in sanguinem nostrum, deposita priori indole, transit. Totum autem hoc opus circulationis efficacia, & imprimis pulmonis actione perficitur. Quo autem quis motu musculari corpus plus exercet, eo celerior humorum per vasa motus, eo respiratio fortior & celerior: ergo tanto citior & facilior ingestorum assimilatio. Durus arator atrum, & jam acidum, panem vorans, inde optime se habet; debili homini ingestus talis panis in rodens acidum convertitur, & molestissima cardialgia afficit. Hinc recens natis, qui debile corpusculum vix multum movere possunt, interim solo fere lacte vivunt, toties ab acido morbi: procedente ætate, dum alacriter currunt, nunquam fere quieti, minus his morbis obnoxii vivunt.

§. 62. **S**EDEM habet jam nata maxime primæ digestionis officinas, inde tardius sanguinem, denique omnes humores inficit.

PRIMÆ DIGESTIONIS OFFICINAS. Omnis illa mutatio, quæ ingestis alimentis accidit per manducationem, ventriculi, intestinorum, vasorum lacteorum, glandularum mesenterii, ductus chyliiferi actionem, donec venæ subclaviæ infunditur chylus, vocatur digestio prima, Omnia vasa & viscera, quæ suos liquores in toto hoc itinere affundunt, ad primæ digestionis officinam pertinent. Hujus primæ digestionis effectus est chyli productio: sed chylus semper aliquid de ingestorum indole retinet. In secunda vero digestionem (cujus effectus est sanguificatio) totum illud peregrinum deletur, & in nostram naturam tandem convertuntur ingesta. Cum ergo acidum peregrinum sit corpori, & ingestis suam debeat originem; facilius nascetur in illis locis, in quibus crudi humores ingestorum naturam adhuc aliquatenus retinent: longe difficilius autem ubi ingesta mutata nostris jam assimilata humoribus sanis fluunt.

TARDIUS SANGUINEM. Nec videtur hoc fieri posse, nisi tota digestionis primæ officina acido repleta fuerit. Minima lacteorum & venarum meseraicarum oscula nihil facile admittunt, quod acre est: contraherentur enim statim tenerima horum vasorum orificia. Deinde chylus in ductu thoracico ingenti copia lymphæ diluitur: & talis chyli, tot jam humoribus diluti, minima copia subclaviam ingreditur; ibique mox torrente sanguinis abripitur, & disparet. Hinc licet aliquid levis acidi in chylo foret, illud sic dilutum evanesceret. Sed chylus brevi temporis spatio cum sanguine fluens, mammarum fabrica inde separatus, lac dat; quod ducrum de uberibus recens acidum invenitur forte nunquam; sibi relictum extra corpus, in calore aëris communis, acidum fieri novimus. An autem, ex mammis dum ducebatur, acidum unquam lac inventum sit vel in debilissimis feminis? nemo credo hoc facile affirmabit.

Cum ergo lac, adhuc remotum à sanguinis humani perfectione, vel nunquam vel rarissime inveniatur acidum, multo difficilius sanguis ipse acida inficietur labe: infici tamen posse, suadent quædam in morbis observata.

In morbis languidis aliquando sudor acidum spirans observatur, imo & aliquando in fine acutorum.

Acidulorum vinorum abusus podagram fecit, alcalinorum parco & repetito sæpies usu sanatam.

Atra sanguinis fæx hypochondria occupans, soluta, mota, vomitu excreta, aliquando acidissima inventa fuit; sic ut lapides arroderet, & cum terrestribus corporibus efferveresceret fortissime.

Ossa acidis immersa mollescunt, flexilia fiunt; pleraque alimenta sunt acescencia, quorum indoles mutatur in sano corpore: quando vero hæc vis immutans nimis debilis est, non superatur illa acescencia ingestorum; tunc aliquando ossa, cartilagine &c. flexilia redduntur, ut in Rachiticis. (a).

§. 63. **P**RODUCIT ructus acidus, famem, morsum ventriculi, dolores iliacos, flatum, spasmos, inertiam bilis, mutationem ejus variam, chylum acidum, fæces alvi acidum spirantes. Hæc ejus effecta in stomacho, & intestinis.

RUCTUS ACIDOS. Ructus est explosio materiæ elasticæ, convulsiva constrictione fibrarum œsophagi & ventriculi compressæ, mox liberatæ: cumque in ventriculo & intestinis prædominetur acidum, sequitur hos ructus acidus esse debere.

FAMEM. A plurimis causis pendet fames; inter quas & stimuli recensentur, & inter illos imprimis acidi. Minime autem verum est, quod sola acida appetitum excitent, ut voluit Helmontius. (b).

Bilis, absinthii succus &c. appetitum languentem excitant: ab acido sæpe fames oritur; non tamen semper ubi fames, ibi acidum adest. Docent hoc rapacissima animalia, quæ solis animalibus vivunt, in quorum ventriculis nunquam acidum; interim voracissima sunt. Infantes acido laborantes sæpe appetitu valido fruuntur, miranturque, nutrices, quod avide comedentes nihil proficiant tamen.

MORSUM VENTRICULI. Sentitur tunc dolor satis acutis sub cartilagine ensiformi in illo loco, quem scrobiculum cordis vocant: dixerunt καρδ. αλγία καρδ. αλγία, quia ventriculi os καρδ. αλγία (cor) dixerunt, uti ex Nicandro, Thucydide, Hippocrate probat Galenus (c) qui & alibi monuit (d), quod nulla pars tam accuratum habeat sensum, nec utrumque principium una secum afficiat, ut os ventriculi, & vulgo & Medicis stomachus dictus; dum per nervos adeo magnos cerebrum, situs vicinia cor, afficit.

Ventriculus enim ipse non videtur adeo sensibilis esse, sed illud orificium superius: dum enim acidum hæret in ventriculo quietum; non inde dolor oritur: sed simul ac vel ructus expellens sursum, vel motus, vel mutatus situs corporis illud applicat orificio superiori ventriculi; statim molestissimus doloris sensus adest. Ille ventriculi morsus, non semper ab acido, sed & ab alia quacumque acrimonia, irritante cardiam, oriri potest.

DOLORES ILIACOS. Acidum sic in ventriculo ex ingestis natum, nisi bilis efficacia mutetur, in fistula intestinali mora & calore acius factum, rodendo, vellendo, enormes dolores facere potest: hinc ventris tormina infantibus adeo frequentia.

(a) H. Boerhaave Chem. Tom. I. pag. 737. in Lib. II. Epidem. Charter. Tom. IX. p. 114.
(b) Pag. 164. 24. (d) De Symptom. causis Lib. I. cap. 7. Charter. Tom. VII. pag. 57. 60.
(c) De Hippocr. & Platon. placitis Lib. II. cap. 8. Charter. Tom. V. p. 108. & Comment.

FLATUS, SPASMOS. Aër, libere in cavo ventriculo & intestinis hærens, nihil mali facit: sed docuerunt experimenta, in vivis animalibus capta, quod si intestinum tangatur, v. g. spiritu vitrioli, in quodam loco; stringatur ilico valido spasmo: si in alio loco parum distante hoc iterum fiat; stringitur & ibi: mox intermedia pars intestini inflatur ab incluso aëre rarefacto. Ubi ergo acidum in intestinis hærens irritando spasmos producit, quibus arctatur in diversis locis intestinum, inclusus aër rarefactus illud distendit, & solutis his spasmis, cum impetu exit vel sursum, ructus faciens, vel deorsum, flatus produciens; vel, mutato tantum loco, in intestinis oberrans cum murmure, borborygmus dicitur. Accedit præterea, quod omnia fermentantia copiosam generent elasticam materiam. Hinc duplici de causa flatulentia oritur ab acido: ab irritatione, qua intestinorum fibræ spasmo contractæ inclusum coercunt aërem; & à genita materia elastica in omnibus ad fermentationem pronis liquidis: hinc acido laborantes adeo sunt flatulenti.

INERTIAM BILIS. Simul ac ex ventriculo per pylorum exit chylus in duodenum, utraque bilis admiscetur, summum auxilium ad mutationem peregrini humoris in naturam inquilini. Sed bilis inter omnes humores nostros non excrementitios acerrima est, & cito in putredinem prona: hinc circa hepar cadavera citissime putrescunt. Hujus admistio nimiam sæpe chyli acescentiam tollit, omnia dividit, solvit, & ad æquabilissimam miscelam disponit. Hinc cerevisias, ne nimis cito acescant, amarissimis plantis, bilis fere æmulis, lupulo, absinthio &c. condiunt. Ubi ergo prædominatur acidum, bilis natura quasi invertitur, & ejus efficacia iners redditur. Patet hoc in infantibus acido laborantibus: in illorum enim ventriculo colostrum caseosum lactis secedit, quod à bile, quamdiu bona est, solvitur; & tunc fæces alvinæ flavæ & æquabiles apparent: sed ubi prædominante acido bilis iners redditur, integra fragmenta caseola alba per alvum exeunt.

Si bilis aliorum animalium inspissata parum, in minima catapotia redacta, parca copia ingeratur quotidie, sæpe satis cito superatur hoc malum. Quamdiu enim bilis iusta temperies adest, illibata fere obtinetur sanitas: dum enim abundat, vel nimis acris est, putridi morbi fiunt; dum vero deficit, vel iners reddita est, morbi fiunt chronici: quorum plurimi à mala digestionem primæ officinæ orti, sensim naris humorum vitiis, sanitatem opprimunt.

MUTATIONEM EIUS VARIAM. Quamdiu infantes bene se habent, fæces alvinæ flavæ & æquabiles sunt: dum incipit in his acidum prædominari, fæces excretæ flavescunt quidem, sed post dimidiam horam in aëre aperto viridescunt: si augetur malum, jam virides fæces excernuntur; & quidem aliquando tam saturati coloris, ut æruginis instar maculis vix delendis lintea tingant. Hinc ex colore fæcum alvinarum in infantibus acidi copia & acrimonia fere determinari potest.

Verum quidem est, & ab aliis causis æruginosam illam bilem nasci posse, uti alia occasione dicitur; sed in tenera illa ætate fere semper ab acido prædominante fit.

CHYLUM ACIDUM, FÆCES ALVI ACIDUM SPIRANTES. Si ventriculus & intestina acido sic repleta sunt, tunc & chylus poterit acidus esse, ut facile patet: sed non facile oscula minima lacteorum intrabit, quia ab omni acri constringuntur. Tandem & ipsæ fæces alvinæ acidum spirant, quod in infantibus acido laborantibus observatur sæpe; tuncque designat totam primæ digestionis officinam acido plenam esse; simulque indicat magnum periculum.

§. 64. **I**N sanguine pallorem, serum chylosum acidum; hinc fœminis lac acidum, aut potius nimium acescens, sudorem acidum; salivam acidam, producit; inde pruritus, obstructions, pustulæ, ulcera, lactis prompta nimis, quin & forte ipsius quoque sanguinis coagula, & ad circuitum ineptitudo exsurgunt, tum irritamenta cerebri nervorumque; unde convulsio, turbata circulatio, mors.

PALLOREM. Omnes, in quibus acidum prædominatur, pallent: patet in infantibus, teneris puellis, & viris laxæ temperiei. Sed pallor ille designat defectum solidissimæ rubræ partis in sanguine. Ubi autem hæc deficit, minor fit assimilatio crudorum in naturam nostram: hinc facilior degeneratio in spontaneam corruptelam. Ergo & pallor ille non tantum ut effectus acidi in corpore geniti considerari debet; sed & ut præsagium acidi futuri, ob debiliores vires assimilantes. Videntur præterea acida corpori ingesta pallorem illum facere: acetum labiis applicatum illa pallere facit. Illi, qui acetum ex vino vel cerevisia parant, quotidie in aëre, acidis vaporibus pleno, versantes, pallent sæpe.

SERUM CHYLOSUM ACIDUM. Quod maxime distinguendum à sero cocto sanguinis, quod flavum ad ignem concrevit, & nunquam nec acidum, nec acescens, invenitur; sed spontanea corruptela in putredinem primum est. Per serum chylosum autem hic intelligitur chylus cum sanguine fluens, nec satis subactus viribus corporis; hinc nimis diu suam naturam servans, qua in acidum vergit: ex chylo enim cum sanguine circumducto fit lac; ex hoc lacte porro serum sanguinis, & sanguis ruber, continuata per horas viginti quatuor circulationis efficacia: sed si debiliior hæc vis fuerit, non mutabit, vel saltem non tam cito, lactis naturam: hinc lactis aciescentia manebit, & forte in debilissimis acidum fieri poterit in sanguine ipso.

HINC FŒMINIS LAC ACIDUM AUT POTIUS NIMIUM ACESCENS. Lac raro, si unquam, observatur acidum in mammis; sed potest fieri facile tale, ut citissime acescat. Fœmina sana, si per viginti quatuor horas nihil assumerit cibi vel potus, non habebit lac in mammis, sed serum flavescens falsum, à quo abhorrent infantes: ratio est, quia omne lac per vires circulationis jam in serum mutatum est, & ingestorum indole deposita in naturam humoris inquilini transiit. Si jam debiliores fuerint hæc vires immutantes; lac diutius retinebit illam dotem, qua in acidum vergit: hinc eo citius acescet, quo minus subactum est. Sed hæc subactio pendet à robore sani corporis, & à mora lactis in vasis, in quibus cum sanguine fluit: hincque ratio apparet, quare statim post partum, vel ex debilibus nutricis uberibus ductum lac, acescat citius.

SUDOREM ACIDUM ET SALIVAM ACIDAM. Rarius forte, nec nisi in debilissimis: facile patet, si sanguis acidum in se habeat, quod & secreti inde humores illud habere possint.

PRURITUS &c. Videmus, quod omnia aciora ad cutim delata pruritum, obstructions circa subcutaneos imprimis folliculos, pustulas &c. excitent. In ictericis bilis ad corporis superficiem delata intolerabilem sæpe pruritum excitat. Si acida

acrimonia infecti humores huc transeant, idem fiet. Rusticorum pueri, immaturos fructus, penitus austeros, dum comedunt, malis sæpe cutis morbis cum summo pruritu laborant. In prima ætate miris illis cutis erosionibus infantes laborant sæpe.

LACTIS PROMPTA NIMIS COAGULA. Lac nimis jam vergens in aciditatem, in receptaculis galactophoris mammarum stagnans, collectum, ibi forte potest acidum fieri: separabitur tenue à parte caseosa serum; effluet per papillas; relictum crassamentum hærens duros tumores, inflammationes &c. facere potest. Longe tamen frequentius mammarum à coagulato lacte inflammationes fiunt, febre prius valida prægressa: tuncque alcalescens potius degeneratio est; *forte centies Medici observant, lac coagulari sic à febre, ubi ne semel id vident factum ab acido (a).*

IPSIUS QUOQUE SANGUINIS COAGULA. Acida fortissima fossilia sanguinem coagulant: vegetabilia mitiora longe potius illud diluunt: hinc rarius videtur acidum, in corpore ex ingestis natum, posse sanguini inducere coagulum: tamen si atrabilis, quæ, ut Veteres jam observaverunt, aliquando tam acida est, ut terram fermentet, lapides rodat instar aquæ stygiæ, sanguini misceatur, lethale certo inducet sanguini coagulum.

IRRITAMENTA CEREBRI NERVORUMQUE &c. Certum est, si acre quodcumque teneram cerebri & nervorum fabricam attingere posset, quod turbarentur omnes, quæ inde pendent, functiones. Rarius tamen acria ad minima illa vasa pertingere possunt. Cavit sollicita natura, dum ubique fidelis custodia impedit, ne admittantur talia. Acerrima quævis impune in ventriculum demittunt homines, quæ si ad cerebrum deferri possent, illud destruerent. Si oculum tangat levissimus fumus, claudirur ilico; si nares, quanta oritur sternutatio; si pulmonem, tussis orta averrit hoc noxium; si quid acris insueti ingrediatur ventriculum & intestina, quanti vomitus, diarrhææ &c.

Omnes fere humores totius corporis ex locis propriis deducuntur ad hæc loca, ut illud abluant: sed ubi in majoribus omnibus organis lex quædam admittitur, videtur & eadem obtinere in minimis. Certe cortex cerebri, omnibus vasis sanguineis separatis, fatuum valde saporem habet, & oculo applicatus dolorem nullum facit. Hinc non tam facilis ingressus acrium in minima vasa, ac crediderunt multi; sed alia videtur esse ratio, quare irritamenta cerebri, nervorum & infinita, quæ inde sequuntur, mala oriantur ab acido hærente in primis viis: nervi enim, per ventriculum & intestina dispersi, mirum imperium habent in omnes partes corporis, uti certissima docent exempla. Vermis, reptatu suo irritans nervosas has partes, convulsiones toties fecit: hernia suffocata toties subitam mortem, & ante mortem, sæpe omnia turbati cerebri signa. Atra bilis hæc viscera occupans quam miras mentis alienationes facit: Venena ingesta, in ventriculo adhuc hærentia, totum corpus turbant ad mortem usque: opium deglutitum, in ventriculo adhuc contentum, solutum vix, omnes dolores pacat, nimias evacuationes sistit &c. hinc videtur acidum natum in primæ digestionis officina sola irritatione nervorum, per hæc viscera perforum, posse mirabiles morbos, imo mortem ipsam, facere; neque ad hæc producenda requiri, ut acidum sanguini mistum, ad cerebri & nervorum intima perveniat. Imprimis autem hoc fiet in illa ætate, in qua totum nervorum systema maxime mobile est: hinc toties infantibus acido laborantibus convulsiones accidunt,

(a) H. Boerhaave Chem. part. 2. pag. 303.

§. 65. **E**X his (60. 61. 62. 63. 64. 65.) recitatis præsens, futura, præterita cognoscitur acida temperies; hinc prænoscutur ejus effecta; hinc curatio scitur.

PRÆSENS acida temperies noscitur, si color in angulis oculorum, ore interno, faucibus, labiis, pallidus sit; ructus sint acidi; sitis fere nulla; frigus & laxitas in toto corpore; fæces alvinæ acidum spirent; urina aquosa alba; appetitus satis magnus plerumque.

FUTURA. Si temperiem debilem & laxam, sanguinem dissolutum, vitam otiosam, magnam jacturam sanguinis prægressam fuisse noverit Medicus; & interim talia alimenta assumpta esse, quæ spontanea mutatione in acidam acrimoniam degenerant; tuto præfagiet futuram brevi in tali corpore acidi generationem, dum bina hæc juncta videt, acescentia ingesta, & vires nimis debiles, ut hoc corrigant.

PRÆTERITA autem ex modo dictis facile cognoscetur.

EFFECTA, quæ varia erunt, antea jam commemorata, prout vel primas vias solas, vel & ipsum sanguinem, jam infecerit acida labes: iterumque ex observatis acidi prædominantis effectis illud adesse cognoscitur.

Ex omnibus autem his curationis requisita patent facile.

§. 66. **Q**UÆ perficitur: 1. alimentis acido oppositis ex animalibus, vegetabilibusque. 2. Succis bono sanguini similibus ex avibus rapacibus. 3. Roborantibus. 4. Motu valido. 5. Medicamentis acidum absorbentibus, diluentibus, obtundentibus, immutantibus.

Si omnes forent ab acido morbi, ut voluit quædam Medicorum secta, ars medica longa minime foret, sed brevi compendio tradi posset. Si enim homo acido pessime laboret, viscera tamen omnia adhuc integra habeat, videtur intra paucos dies posse curari; & quidem solo victu, sine medicamentis; si sola aqua pro potu utatur, pro cibo solis carnibus vel piscibus, vel illorum jusculis.

1. Nullum animam sponte sua in acidum vergit, in putredinem semper: hinc omnia, quæ ex animalibus petuntur alimenta, acido opposita sunt: imprimis carnes animalium assatæ; tunc enim magis ad oppositam indolem dispositæ sunt: pisces autem imprimis hic conveniunt, qui longe citius putrescunt quam carnes; imprimis pisces illi, qui alios pisces vorant, uti lucius piscis &c. huc spectant & carniū juscula, & gelatinæ inde factæ: sic gelatina, ex cornu cervi rasura facta, intra biduum æstivo tempore jam putrescit.

VEGETABILIBUS. Pleraque vegetabilia acescunt, non omnia tamen. Amara fere omnia acido resistunt; hinc cerevisias his condiunt, ne acescant. Brassicarum fere omnia genera sibi relicta putrescunt; decoctum certe brassicarum jam aliquid subputridi fætoris habet: plantæ illæ antiscorbuticæ acres ut cochleariæ, raphani, sinapi &c. putrescunt, non fermentantur; imo & recentes destillatæ salem volatilem alcalinum exhibent: hinc in morbis illis scorbuticis frigidis tantum usum habent, dum & acido resistunt, & efficaci stimulo languentes functiones excitant.

L

Pro potu sola aqua; omnes enim cerevisiæ acefcunt. Si debilitas vini ufum fua-deat, fumatur oleofum, meracum; quale Hispanicum, Hungaricum, Canarinum &c. vel detur post vinum affumptum abforbens aliquod, quod acidum vini corrigit.

2. In Materia Medica recensitæ sunt tales aves, quæ aliis animalibus vivunt: hinc illarum carnes in alcalinam putredinem magis pronæ sunt. Bos solo gramine vivit, & gramine, per corporis efficaciam mutato, constat: ideoque hujus animalis carnes magis quasi ad vegetabilis naturam accedunt, sed dum aliis animalibus pascuntur aves, materia nutrimenti ingefi jam animale naturam habet, & ulterius adhuc in corpore affumentis perficitur, hinc harum avium carnes libidinosum illum dictum saporem habent; & nemo illis diu, sine acidis condimentis vel fale, vivere posset; adeo in putredinem pronæ sunt.

Ut autem curetur acidum prædominans in corpore humano, tria requiruntur: 1. ingefio talium alimentorum, quæ spontanea mutatione nunquam in acidum, sed in acido oppositam indolem, vergunt: de his actum fuit binis prioribus numeris hujus paragraphi. 2. Corporis actiones, quæ cruda ingesta affimilant in naturam nostram, excitandæ & roborandæ sunt: de his agitur numero tertio & quarto hujus paragraphi. 3. Acidum præfens nociturum debet tolli vel iners reddi: hoc docet ultimus hujus paragraphi numerus.

3. De his jam dictum fuit n°. 4. §. 28. & ob hanc rationem ipsa acida austera, corpori ingesta, sæpe acidum tollunt non admiffione suæ substantiæ, sed ratione effectus ultimi, per quem actionem vasorum & viscerum in ingesta augent. Plerumque tamen eliguntur illa, in quibus vis roborans sine acido simul præfente adest. Omnibus fere palmam præripit Momma Brunfwicenfis, quæ Cereris quasi Syrupus in Indias delata summis illis caloribus sine ulla mutatione refistit, & in morbis omnibus languidis plus prodest fere, quam sperari posset: sic & vina omnia, imprimis oleofa illa meraciffima, quatenus roborant & motum augent, sunt antacida; imprimis si aromata stimulantia addantur.

4. Quid motus & exercitia corporis valeant in roborando corpore nimis laxo in solidis partibus, dictum fuit n°. 2. §. 28. sed per motum auctum actio vasorum & viscerum augetur, per quam ingesta mutantur in naturam humoris inquilini, qui semper in putredinem, nunquam in acidum, vergit: dum valido labore corpus exercetur, urina fit longe acrior, & jam aliquid subputridi quasi spirat; sudor flavescens olidus exprimitur; imo nimis laboribus corpus ad morbos acutos putridos disponitur. Mirantur sæpe Medici, debilia illa corpora, debellato optima quamvis methodo acido, paulo post iisdem languere morbis. Fit hoc tantum fere, quia negligunt corporis exercitiis firmare corpus: certo enim semper redit morbus, nisi augeatur muscularis motus, vel ejus defectus validis frictionibus fuppleatur. Hinc rustici, pane fecalino jam acido, lacte ebutyrato &c. quamvis utantur, duro labore hæc omnia fuperant, nec acido inde laborant.

5. A C I D U M A B S O R B E N T I B U S. Præcipua in Materia Medica enumerata sunt. Sunt autem talia medicamenta, quæ habent hanc peculiarem dotem, quod acidum in liquidis latens ad fe trahant, illud à reliquis liquidi partibus feparant, & cum illo concrefcant quasi.

Spiritui aceti puriffimo sensim immenfi lapides cancrorum in pollinem tritos; oriebatur sibilus, effervescentiæ motus, & videbantur diffolvi: sic tamen ut quiescente liquido, flocculenta plurima fecederent, sensimque fundum peterent. Moto

vase hi flocculi æquabilissime miscebantur liquido supernatanti. Perrexi addendo lapidum cancerorum pulverem, donec in fundo non dissolutus maneret, & nulla fierent amplius effervescentiæ signa. Filtro dein depuratum liquorem gustans inveni saporem acidum utcumque, miscens tamen syrupo florum violarum, nulla fiebat coloris mutatio. Purum hunc liquorem ex alta cucurbita superimposito alembico, lenissimo igne destillavi: prodiit notabilis copia spiritus ardentis, in quo nulla apparebat acidi nota. Hoc spiritu expulso, aucto parum igne prodiit aqua, quam ex odore & sapore acidi quid habere suspicabar; tamen hæc aqua nec mutabat syrupum florum violarum in rubrum colorem; nec effervescebat cum oleo tartari per deliquium; nec mutabat solutionem mercurii sublimati corrosivi aqua pura factam. Perrexi inspissare residuum liquorem fere ad siccitatem: erat tunc sapore salsus, subamaricans: conclusi inde in hoc residuo hæere acidum aceti, unitum cancerorum lapidum pulveri: addidi dein huic residuo potentius acidum, vitrioli nempe oleum, ut illud excuteret cancerorum lapidibus adhærens aceti acidum; dein lenissimo igne ex vasis purissimis destillavi; habuique spiritum acidum valde, fugacissimum, nares ferientem penetrabilissimo odore.

Cum ergo aceti generatio videatur pendere à combinatione ardentis spiritus cum acido paulo fixiore, quod in vino latebat (a); apparet clare ex experimento narrato, quod lapides cancerorum habeant hanc vim, ut acidum aceti separent à reliquis aceti partibus, quibus cohærebat; deinde ut illud acidum sibi uniant sic, ut, quamdiu hæc unio manet, non agat ut acidum.

Hinc apparet absorbentium pulverum utilitas: ex se enim inertes fere videntur. efficaces tantum, ubi acido occurrunt: interim nulla acrimonia corpori nocent.

Unicum restat monendum de horum absorbentium usu: solent in officinis supra porphyritem terere hos pulveres in sublimitatem pollinis impalpabilis, ut æquabilius dilui possent in mixturis, nec ingrato sub dentibus stridore displicerent: sed tunc acquirunt hanc proprietatem, ut vel cum aqua pura concrecant, & longe magis adhuc, si in primis viis occurrant glutinosi humoribus; tunc si non adsit sufficiens copia acidi, quod solvere possit, in massas difficulter postea resolubiles, mole & pondere gravantes, concrecant.

Nulla docuit observatio, pretiosas margaritas ad hos usus præferri debere vilibus cancerorum lapidibus.

Omnium autem absorbentium actio, qua acidum domant, videtur tantum in primæ digestionis officina obtinere.

DILUENTIBUS. Quæ sunt aqua; & dein omnia talia, in quibus aqua prædominatur. Oleum vitrioli comburit omnes partes corporis, quas tangit: idem illud vitrioli oleum, dilutum maxima copia aquæ, non nocet amplius: sed quia acidum plerumque in debilibus corporibus prædominatur, aquosa autem diluentia, dum acidi vires enervant, simul solidarum partium robur debilitant, (vide §. 35. n°. 1. 3.) fibrosæ autem compagis debilitas inter causas acrimoniæ acidæ in corpore natæ recensetur: (vide §. 61. n°. 3.) ob hanc ergo causam absorbentia præferuntur diluentibus.

OBTUNDENTIBUS. Vocantur obtundentia, quæ mollibus suis, & imprimis oleosis, partibus sic involvunt omnia acria, ut illa inertia reddant: simul omnes partes corporis, quæ oleosis imprimis illis obtundentibus teguntur, ab omni

(a) H. Boethaave Chem. part. 1. pag. 214.

rosione defenduntur. Dum lapide infernali, mercurio sublimato corrosivo &c. in quibus concentratissimum acidum metallo soluto adhæret, Chirurgi erodere volunt corporis partes, pinguibus applicatis vicina loca defendunt: dum venena acia ingesta sunt, nil plus profuit, quam olei ingens copia potata. Acerrimum vitrioli acidum, oleo unitum, concrevit in blandum sulphur; quod, insipidum fere, rodens illud acidum continet. Hinc infantibus acido laborantibus mollissima illa olea adeo profunt. Hanc tamen noxam habent, quod simul solidarum partium compagem laxent & debilitent, (vide §. 35. n^o. 3.)

Huc etiam referuntur juscula ex animalium partibus inspissata in gelatinas; quæ & glutine suo acidum inviscant, & simul profunt, dum ex propria sua natura in putredinem semper, nunquam in acidum vergunt.

I M M U T A N T I B U S. Vocantur hæc immutantia, quæ acido occurrentia cum illo uniuntur in novam salis speciem; in quo sale nec acidum nec alcali prævalet, sed vocatur Chemicis sal neuter, vel sal compositus, optimas resolvendi vires obtinens. Dum oleo vitrioli acidissimo miscetur acris liquor salis tartari per deliquium soluti, ex binis his acerrimis nascitur sal blandus compositus, quem tartarum vitriolatum in officinis vocant; optimum deobstruens remedium.

Talia jam sunt omnes sales alcalini fixi, ex vegetabilium combustorum cineribus elixiviando parati: præterea omnes sales volatiles ex animalibus & vegetabilibus confecti. Huc & referuntur omnes saponem, ex sale alcalino, sive fixo, sive volatili & oleo parati.

§. 67. **Q U O R U M** electio, præparatio, dosis, applicatio tempestiva, innotescunt Medico ex cognito malo, ejus sede, ægrotante, &c.

E L E C T I O. Ex recensitis præcedenti paragrapho eliguntur jam illa, quæ maxime conveniunt pro varia indole & sede mali, & varia ægrotantis natura. Tenerimis infantibus raro damus sales alcalinos, vel fixos, vel volatiles; vel saltem exigua tantum quantitate: quia, nisi statim occurrant acido, sua acrimonia æque lædere possent ac acidum ipsum. Sed his damus absorbentia, in quibus nulla lædens acrimonia est; vel saponem, in quibus alcalini salis acrimonia oleo sic obvoluta est, ut non noceat. Interim acido potentissime resistunt. Si acidi rosione excoriata sint intestina vel ventriculus, ad oleosa confugimus, & gelatinas ex animalium partibus confectas. Si una cum acido lentum glutinosum adsit in primis viis, quod absorbentes pulveres inviscando inutiles redderet; sales alcalinos fixos adhibemus, qui & omne glutinosum lentum dividunt, & acidum mutant in salem neutrum. Si jam ipsum sanguinem infecerit acidi labes, simulque frigus & inertia adsint, ut sit plerumque; alcalini volatiles sales mobilissimi profunt, qui simul efficaci stimulo languentem vitam excitant. Profunt tunc & sales alcalini fixi, quatenus in chylo diluti videntur sanguinem ingredi posse. Absorbentium non adeo tunc laudatur usus, quia non facile videntur vasa lactea posse ingredi. Si simul roborandum est corpus, limatura ferri præfertur reliquis.

P R Æ P A R A T I O. Sales alcalini volatiles, vel fixi, diluti in aqua puri dantur optime. Ubi metuitur, ne effervescentia facta in concursu acidi & alcali molesta oriatur flatulentia, alcali cum oleo coctum in saponem exhibemus. Ab-

§. 67. 68. MORBI SPONTANEI EX ACIDO HUMORE. 85

forbentia non in nimiam tenuitatem trita damus, ut jam monitum fuit in paragra-
pho præcedenti. Est præterea alia præparatio absorbentium in quibusdam officinis,
non multi riles, ut videtur: absorbentes pulveres solvunt in aceto stillatio, so-
lutos præcipitant, affundendo oleum tartari per deliquium; dein subsidentem pul-
verem ablutum servant: vocant magisteria. Tractavi hac methodo lapides cancro-
rum, & inveni magisterium inde factum nil aliud esse, nisi tenerrimum pulvisculum
lapidum cancrorum, qui æque effervescebat & solvebatur in aceto stillatio, ac
ante. Hinc satis inutilis videtur hic labor: nec tamen verum est, ut dixerunt qui-
dam, hæc magisteria cum acidis non amplius effervesce.

DOSIS. In absorbentibus non facile peccatur: tuto enim larga dosi dantur,
cum ex se ipsis non adeo actiosa sint, ut nocere possint. Nec in diluentibus, aut
obtundentibus, anxia cautela requiritur, sed immutabilia, semper acia cum sint,
limitatam magis dosim requirunt; uti in Materia Medica notatur.

APPLICATIO TEMPESTIVA. Dum in primis viis hæret acidum, ma-
xime convenit, leni stimulo purgante addito, remedia antacida per totum intesti-
norum tractum deducere, dum in sanguine hæret, volatiles alcalini sales, dispo-
sito simul ad sudorem corpore, imprimis profunt.

Dum infans ubera matris ducens acido laborat, possumus acidum præsens tol-
lere & enervare; sed victum ex alcaliscentibus tali infanti exhibere nequimus; cum
præter lac omnia fere reliqua fastidiat. Hinc tempestiva applicatio tunc requirit, ut
matri præscribatur victus talis, qui chylum & lac reddat quam maxime alienum ab
acida acrimonia. De his dictum in §. 66. n^o 1. 2. 3. 4.

§. 68. **H**INC patet cur pueris, pigris, virginibus, pauperibus, & certis artificibus, hic morbus familiaris sit?

CUR PUERIS. Solo fere lacte materno vivunt, vel pulcibus ex farinosis,
pane, lacte animalium: solida omnia habent tenerrima: carent animali motu fere.

PIGRIS. Dum inerti otio torpent, corpus vix moventes, omnium vasorum &
viscerum actiones debilitantur; ingesta non assimilantur, sed spontanea corruptela
degenerant: cumque pleraque, quæ assumimus, acescere possint, ut panis, cerevi-
sia, vinum, olera pleraque &c. hinc non mirum, acido repleri talia corpora.

VIRGINIBUS. Quia laxiorem corporis compagem habent, otiosæ vitæ ni-
mis deditæ sunt, ditiores si fuerint; sedentario autem labore victum sæpissime quæ-
runt illæ, quibus angusta res est; & aquosis tepidis potibus, saltem in his regioni-
bus, nimis delectantur.

PAUPERIBUS. Qui in his locis raro carnibus uti possunt; lacticiis, im-
primis lacte ebutyrato; hordeo, avena, fagopyro, oryza &c. oleribus, cerevisia
tenui vivunt; & plurimi ex illis sedentarii labore victum quærere debent; vel sal-
tem tales artes exercent, quæ non ad validos motus requirunt.

CUR CERTIS ARTIFICIBUS. Omnes illi, qui tales artes exercent, quæ
requirunt ut tota die in aëre, acidis halitibus repleto, versentur, frequenter acido
laborant. Bibulæ enim in tota superficie corporis venæ ex aëre multum resorbent;
aër talibus plenus inspiratur; per ventriculum & intestina oberrat: hinc totum cor-
pus tandem acido quasi repletur. Hinc videmus pallidos, languidos, tumentes tam

sæpe illos, qui cerevisias, aceta conficiunt, aquas fortes parant &c. tanta enim copia acidi corpus quotidie ingreditur, ut motu & robore corporis superari nequeat.

MORBI A GLUTINOSO SPONTANEO.

§. 69. **G** LUTINOSUM pingue ex vegetabilibus habet causas antecedentes, primo farinosa cruda, austera immatura. 1. Inopiam boni sanguinis. 3. Debilitatem vasorum, viscerum, bilis. 4. Imminutum motum animale. 5. Dissipationem liquidioris per laxata vala secernentia. 6. Retentionem crassioris debilitate instrumentorum excernentium.

Uti multi à solo acido plerosque morbos deducebant; sic alii à pituita derivare illos conati sunt. Ubique hanc damnabant, semper de corpore eliminandam volebant, licet multis in locis corporis naturalis sit, & ab hujus pituitæ defectu plurimi, & difficillimi morbi, oriuntur sæpissime.

Glutinosum jam dicitur omne corpus, quod ad fluidi naturam utcumque accedens tale est, ut ejus partes tanta tenacitate cohæreant, ut in filamenta se duci possint. Hinc glutinosum quasi semiliquidæ naturæ est, sed cum tali partium lentore, ut motu cohærendo quasi inter se teneant.

In omnibus liquidis humanis, si subtilissima forte, & quædam excrementitia, excipiantur; lentor adest: sanguis & ejus serum, bilis, saliva &c. aliquam tenacitatem habent, quæ ad sanitatem requiritur: simul ac enim sanguis plasticum illum lentorem amisit, & in nimiam tenuitatem degeneravit; nascitur hydrops.

Sed & observantur in corpore sano à sanguine secreta liquida, quæ optimo jure glutinosa dicenda sunt: v. g. Liqueor unctuosus articulis lubricandis inserviens; mucus naturalis partes membranaceas corporis plurimas defendens & lubricans; ut in ventriculo, œsophago, intestinis &c. arteriarum interni parietes quoque mucoso tali sinegmate obducuntur &c.

Hinc non semper glutinosum damnandum est, tanquam morbosum; cum pituita ex lege corporis nascatur in sanitate illibata, & tam pulchros usus habeat.

In hoc capitulo autem de pituita morbosa agitur, quæ vel ingestis, glutinosa nimis tenacitate præditis; vel abundantiori nimis aut spissiori redditæ pituitæ naturali originem debet.

Duplicem pituitam Veteres agnoverunt, illud, quodustum & velut supra modum in succis coctum erat, vocabant *phlegma* (*πύμα*), quodustum esse significat) illud autem albi coloris, quod omnes pituitam vocant, *λευκόν* (*mucum*) dixit Prodicus in opere de hominis natura (*a*).

Prius illud erat phlegma calidum, & phlegma phlegmonodes dictum: posterius erat frigidus lentus humor, qui simpliciter pituita, vel & phlegma frigidum dicebatur.

Phlegma illud calidum in sanguine venis educto, in morbis inflammatoriis, ap-

(*a*) Galen. de natural. facultat. Lib. II. cap. 9. Charter. Tom. V. pag. 50.

parer sæpe; ubi insulæ superficies coriacea tenaci alba lamella regitur: phlegma frigidum in catarrholis morbis tanta copia secernitur.

Causæ jam nimix pituitæ recensendæ, quatenus ex his prægressis in corpore sano nasci & accumulari potest.

1. Omnes farinæ plus minusve, cum aqua subactæ, lentescunt. Amylum, farina subtilissima, gluten dat adeo notum: farina seminum lini cum aqua in pastam tenacissimam abit, indomabilem corpori, si assumitur, uti dictum §. 25. n^o. 1. Sed hoc faciunt farinæ crudæ imprimis: si enim fermentatio accesserit, licet levis & incepta tantum, frangitur illa tenacitas; ut in panē fit. Hinc multiplices pauperum morbi, dum farinosis crudis utuntur fere quotidie, & interim plurimi ex illis sedentario labore victum quærunt.

AUSTERA IMMATURA. Hæc talem vim habent, ut & solidarum partium elementa ad se invicem propius accedere faciant, & fluidis lentorem concilient majorem. Dum quis melpili immaturum fructum gustat, sentiet totum os sicari & contrahi, & salivam inspissatam plus lentescere: hæc austera deglutita in ventriculo & intestinis eadem efficiunt. Dum rusticorum pueri immaturos fructus avide devorant, tumido abdomine, pallido vultu, languore totius corporis, pœnas toties luunt.

2. Inter illas causas, quæ ingesta alimenta mutant in nostros humores, recensetur merito sanguinis boni copia præsens; ut demonstratum est §. 25. n^o. 1. & §. 43. n^o. 3. ubi ergo deficit boni sanguinis idonea copia, glutinosa ingesta suam retinent indolem, nec subiguntur. Magnam jacturam sanguinis passi toto corpore tumidi frigido lentore languent; sanguis enim bonus suo motu & calore omnia hæc lenta attenuat. Hippocrates (a) memorabilem locum habet, qui hoc confirmat; dicit enim: *cum in utero gerat mulier, tota sit cum virore pallida, (χαρπὴ) quod purus ipsius sanguis quotidie ex corpore destillet, & ad fœtum feratur, illique incrementum fiat, & pauciori in corpore sanguinis existente, eam ex viridi pallidam esse necesse est.*

3. Vasorum & viscerum debitum robur cruda ingesta mutat in naturam humoris inquilini. Illud robur auctum lentorem quidem sanguini conciliat, sed calidum dictum, sive phlogisticam diathesim sanguini inducit, penitus oppositam frigido pituitoso lentori, de quo hic agitur: effectus enim fortium vasorum & viscerum est lentorem glutinosum ingestorum attenuare, & dividere: hinc robusti & duro labore corpus exercentes farinosa talia assumunt sine ulla noxa; debiles, otiosi, his utentes, abominalia viscera infarcta habent satis subito.

BILIS. Ex viscerum abdominalium sanguine venoso per hepatis fabricam secernitur bilis; chylo; ex ventriculo egresso, affunditur; saponacea indole fundit omnia; æquabilissimæ miscelæ apta reddit; glutinosa lenta omnia dividit & attenuat. Dum vituli solo adhuc utuntur lacte, illud in primo ventriculo horum animalium jam in caseum & serum dividitur: caseus ille in secundum & tertium ventriculum delatus sensim fit lentior & crassior; in quarto ventriculo exsuccus fere; sed dum huic caseo in duodenum delato miscetur bilis, totus resolvitur; tantam habet efficaciam bilis. Hinc bile utuntur saponis instar, ut sericeas vestes à sordibus repurgent: tenacissima pigmenta bile diluunt pictores, ut æquabilissime possent diduci. Ubi ergo inertior facta bilis minus bene suo munere fungitur, ingesta glutinosa, & pituita naturalis ventriculum & intestina obducens, accumulatur, in majorem tenaci-

(a) De Mulierum morbis Lib. I. cap. 31. Charter. Tom. VII. pag. 748.

tem degenerant, & pessimos morbos producant, bile acriori reddita, vel medicamentis amaris saponaceis, bilis vicem suppleantibus, curabiles. Accidit sæpe in autumnalibus imprimis febribus acriorem factam, & putridam fere bilem, vel sponte vel arte evacuari: nisi tunc curati ab his febribus amaris illis, bilis defectum compensantibus, utantur, pituitosis frigidis morbis diu languent.

4. Naturale gluten lubricandis & defendendis partibus inserviens in quiescentibus hominibus accumulatur semper: hinc laxa, tumidula, glutinosis humoribus plena, horum corpora fiunt. Dum enim salubri motu corpus exercetur, liquidorum per vasa propulsio augetur: sic averritur omne, quod inciperet hære. Quiescentibus membris, linimentum illud mucosum articulis lubricandis inserviens, incipit sensim accumulari; sicque sæpe anchyloses facit, postea vix curabiles. Ventriculus & intestina, lento glutine in interna sua superficie obducuntur: valido motu dum corpus exercetur, respiratio aucta diaphragmatis & musculorum abdominalium actione reciproca omnia hæc viscera mover, premit, ad se mutuo quasi attricat; & sic detergantur omnia. Lentum oleosum, quod in quiescentibus bene pastis animalibus tanta accumulatur copia, motu musculari attenuatum dissipatur iterum.

5. Frequens satis causa nati lentoris in liquidis nostris, licet de illa non tam sæpe cogitur: plerique enim humores nostri hanc habent indolem, ut ablato pauculo liquidiori concrecant: lentæ tales mucosæ concretiones ex lymphâ tenuissima perspirante inspissata nasci possunt tam cito, ut incredibile videretur omnibus, nisi certissima observata docerent.

Nares hominis sani, in aëre moderate calido degentis, tota die ne unicam liquoris guttam pluunt: totum ergo, quod de naribus exhalat, perspirabile est tenuissimum. Sed si vespertino corripitur frigore tota die in aëre calido versatus, sentiet narium pruritus, sternutationem, incipit exire liquor limpidissimus, vocatur coryza: dormiens de nocte incipit à tumente membrana interna narium clausis naribus per os solum posse respirare, sequenti die sæpe jam emungit maximam copiam mucici spissi; durat hoc per plurimos dies, imo aliquando per menses: dum in somno non sentit homo gravedine laborans irritamenta mucici in naribus collecti, matutino tempore evigilans invenit fragmenta tenacia penitus coriacea, ex inspissato mucico nata. Idem jam circa laryngem, asperam arteriam, pulmonem fit: unde post somnum fragmenta densa adeo mucici concreti rejiciuntur, ut mirum videatur, suffocationem inde non accidisse: hinc catharrho laborantibus illæ luctæ, & jactationes, & insomnia laboriosa, dum dormiunt; quæ videntur difficiliorem tractum vitalis sanguinis per pulmonem indicare.

Quantum ergo peccant sæpe, qui sudoriferis, diureticis &c. sanguinem volunt attenuare? Dum, liquidissimis subductis, reliqua facilius in concretionem tendunt.

6. Sanum corpus pituitam generat; quæ functa suo munere debet eliminari de corpore; aliter remanens colligitur, & fit pituita morbosa. Tota superficies interna asperæ arteriæ & bronchiorum pulmonis tenerrimo obducitur mucico, qui nervos hic dispersos, tam facili irritabilitate præditos, regit & defendit: sed in juvene sano optime respirante, agili, omnis ille mucus suo munere functus dissipatur, vel post somnum paulo majori copia aliquando collectus, levi tussicula excreando educitur facillime. In senili vero ætate mucus ille iners, lentus, sensim aggeritur, debiliior pulmo, & minus firma latera; hunc educere nequeunt; hinc collectus stertorem facit & sibilum in parte aërea pulmonis; tandemque tussi repetita, non sine molestia

lestia, educitur. Assidue renatus mucus, ob pulmonis vires coquentes imminutas, dilatata plus vasa, & cryptulas mucosas diffuentes, senile illud tussiculofum asthma facit, de quo dixit Hippocrates (a): *raucedines & gravedines in valde senibus non coeuntur*. Hinc omnia illa, quæ lentum illud mucosum attenuant, & simul languentes vires incitant, adeo profunt senibus: nam non tantum in pulmone, sed & in ventriculo & intestinis &c. muci aggestio fit; imo & in ipsa velica: unde toties senes urinam pituitosam reddunt.

§. 70. **N**ASCITUR primo in prima officina digestionis, hinc in sanguine, dein in reliquis, inde derivandis, liquidis.

Lentum illud gluten, ex ingestis tali indole præditis natum, semper primo apparebit in ventriculo & intestinis. Sed non videtur facile glutinosum tale posse ingredi subtilissima lacteorum vasorum & venarum mesentericarum oscula: sed tales particulae, quæ unitæ lentum illud mucosum constituebant, separatae, & dilutæ tenuioribus liquidis, possunt se furtim quasi per hæc oscula subducere, sicque sanguini misceri, deinde possunt in magnis cavis cordis & sinu venos. Iterum uniri & lentorem præternaturalem facere, qui se primo fere semper manifestabit in pulmone, dum recens chylus statim per pulmonis angustias transire debet. Hinc ubi debiliores imprimis homines farinosa non bene fermentata in prandio assumerunt, paucis horis postea dyspnœam sentiunt, lentiori chylo difficilius per pulmonem pulso.

Sed sanguinis indolem sequuntur inde secreta liquida. Hinc ubi semel sanguis tali lentore gravatur, reliqui humores inde secreti plus lentescunt, quam in sanitate requiruntur.

§. 71. **I**N primis viis facit prostratum appetitum; repletionis sensum; nauseam, vomitum; ingesti cruditatem; bilis inertiam, ejus inviscationem & consumptionem; pituitæ stomachicæ & intestinalis ortum; alvum tardam & tumentem, impedimenta chyli parandi, perficiendi, secernendi.

PROSTRATUM APPETITUM. Quando in ventriculo non sunt vires ad digerendum cibos, deficit appetitus; qui redit, simul ac ventriculi vires insurgunt: sed nisi debilis fuerit ventriculus, raro lentum illud accumulatur. Cognoscitur huic causæ adscribendam esse appetitus deletionem, si sine morbo prægresso, sine signis corruptorum humorum circa ventriculum hærentium, lente & sensum minuatur appetitus, tandemque penitus deficiat. Miseri illi, qui fermentatione paratis spiritibus ardentibus abutuntur, tandem destructo omni ventriculi robore penitus appetitu carent: omnibus illis mane surgentibus nausea molestissima & tenacis pituitæ vomitus.

REPLETIONIS SENSUM. Semper se plenos, semper saturos dicunt, & de molesto pondere hic hærenre conqueruntur. Sic enim factus est ventriculus, ut, dum aliquod contineat non facile digerendum, gravitatem & anxietatem homines sentiant. Spissius carniū jusculum debiles ex morbo homines quantum gravat?

NAUSEAM, VOMITUM. Lenta hæc pituita faucibus adhærens, vel in

(a) Aphorismi. 40. Sect. 2.

ventriculo fluctuans, & hinc inde mota, irritat sic, ut continua fere nausea fiat, & sæpe vomitus molestus; nec facile tamen adhærens pituita ventriculi lateribus vomitu excutitur: hinc diuturna affligit ab hac causa nausea. Notum est, levem irritationem faucium & ventriculi: simplici motu mechanico factam, nauseam & vomitum producere posse. Dum Lumbrici in ventriculo repunt, quanta nausea! dum plumula in faucibus movetur, mox nausea & vomitus. Malum hoc sæpe molestum Literatis provectioris ætatis, in quibus aliquando faucium, œsophagi, ventriculi interior tunica sic disponitur, ut membranæ narium accidit in catarrhosis hominibus; ex qua sæpe per integros menses maxima copia muci depluit.

INGESTI CRUDITATEM. Cibi ingesti pituita tenaci hic hærente obvolvuntur sic, ut humorum, per fabricam viscerum secretorum, huc affluentium efficacia reddatur iners penitus: sed horum humorum, & imprimis bilis actio, præcipuum est chylopoiesis instrumentum. Cum ergo illæ causæ, quæ in homine sano abstergunt & dividunt omne viscosum in his locis, non potuerunt impedire hujus viscosi aggestionem, multo minus poterunt illud gluten jam hic accumulatum dividere & attenuare: hinc sæpe cibi, imprimis duriores, post multos dies, pituita undique obvoluti, evomuntur.

BILIS INERTIAM. Præcedenti paragrapho dictum fuit, glutinosa in primis viis hærentia, non posse ingredi sanguinem, nisi diluta; sed illas partes, quæ unitæ viscosum illud lentum faciebant, separatas, & aliis tenuioribus mistas, posse intrare hiantia in cavum intestinorum oscula venosa. Hæc autem sunt vel vasa lactea, vel venæ mesentericæ. Sed omne, quod per venas mesentericas ingreditur, directe per venam portarum tendit in hepar. In hepate vero tardissimus circuitus humorum; hinc faciliior unio partium glutinosarum in sanguine hepatico: sed ex hoc sanguine secernitur utraque bilis: & bilis cystica, in suo folliculo collecta & stagnans, dat magnam opportunitatem adunationi particularum viscosarum. In porcis mactatis laniones aliquando deprehendunt vesiculam fellis immaniter distentam, & bile tam glutinosa plenam, ut in filamenta cohærentia se distrahi patiatur.

EJUS INVISCATIONEM ET CONSUMTIONEM. Videtur admodum probabile, bilem, chylo intestinorum mistam, pro parte iterum resorberi per venas mesentericas; sic redire in hepar; & postquam efficaciam hujus visceris rursus passa est, de novo secerni. Hinc elaboratissima bilis portio iret & rediret sapiens hanc viam: sed dum bilis tenaci glutine inviscatur, impeditur hæc resorptio per venas mesentericas, ideo huic viscoso permista manet, & cum illo, motu peristaltico intestinorum, ad crassa intestina deducitur: patet ergo, multum bilis tenuissimæ sic consumi frustra.

PITUITÆ STOMACHICÆ ET INTESTINALIS ORTUM. Morbosæ nempe, ex causis explicatis hic natæ & collectæ. An & ab iisdem causis deduci potest origo pituitæ, vitræ Veteribus dictæ? Observatum fuit, sæpius per alvum excerni splendentes, gelatinæ instar tremulas, & purissimi vitri instar pellucidas massas; quæ ob tenacitatem glutinosam huc referri posse videntur. Sed plerumque acerrimos abdominis dolores prius toleratos sequitur hæc pituita vitrea.

De se ipso narrat Galenus sequentia (a). *Memini mihi ipsi accidisse dolorem vehementissimum, ut mihi videretur in intimo ventre terebra perforari, in illo potissimum spatio, per quod à renibus ad vesicam ureteres scimus extendi, injecto deinde oleo rutæ,*

(a) De locis affectis Lib. II. cap. 5. Charter. Tom. VII. pag. 405.

cum id paulo post excernere tentarem, excrevi simul cum gravissimo dolore humorem vitreum à Praxagora appellatum, qui vitro fuso, tum colore, tum consistentia consimilis est, atque id aliis quoque accidere conspexi &c. frigidissimus autem percipitur sensu tactus tum ipsorum, qui excernunt, tum si quis confestim ipsum tangere voluerit &c. evacuato hoc humore dolor sedebatur: fatetur autem se deceptum fuisse, dum crederet, calculum alterutri ureterum impactum causam doloris fuisse. Acerbus ille dolor inerti pituitæ non videtur adscribi posse: hinc videtur pituita illa vitrea differre à pituita naturali accumulata.

ALVUM TARDAM ET TUMENTEM. Bilis præcipuum stimulum alvi exonerandæ facere videtur: hinc reddita acrior choleras & dysenterias validissimas facit: si impediatur fluere in intestina, ut in Ictericis, alvus tarda fit. Sed antea jam dictum est, bilem inerte fieri, inviscari, consumi, dum glutinosum illud in primæ digestionis officina accumulatum hæret. Naturaliter intestina sunt contractissima: sed dum pituita spissa intestinalem fistulam obturat variis in locis, accumulatur ingesta, tenuissima sola transeunt, crassiora hærent: his aggestis, intercepto elastico aëre, distenditur miram in molem sæpe abdomen; ut toties in pueris, pituita tali aggesta laborantibus, apparet: in quibus prominulum abdomen turget, & omnia reliqua corporis adeo decrescunt, ut sceletorum instar appareant, defectu nutritionis. Purgantibus deturbata per alvum hac saburra; dein laborantibus exhibitis pulchre curantur, simul perfricato abdomine aromaticis unguentis.

IMPEDIMENTA CHYLI PARANDI &c. Ut enim bonus chylus fiat ex ingesto cibo & potu, ventriculi & Intestinorum actio requiritur; affusio bilis utriusque lymphæ pancreaticæ, succi gastrici, intestinorum &c. sed omnia hæc impediuntur à glutine hic hærente: hinc ad debitam perfectionem non elaboratur chylus. Præterea & glutinosum illud tenuissima venarum mesentericarum & vasorum lacteorum oscula obstruit; & hinc secretio chyli in intestinis facti impeditur; ac corpus, defectu nutrimenti, vero marasmo consumitur.

§. 72. IN sanguine visciditatem, pallorem, immeabilitatem; in vasis obstructions, concretiones, urinam pallidam vix olentem; salivam lentam; tumorem album; impeditas secretiones; defectum subtiliorum; sic minimorum canalium coalitum facit.

Si jam talis iners pituita ex ingestis glutinosis, vel ex naturali lubricante mucos non satis deterfo, sed accumulato, nata sanguinem infecerit, fient quædam phenomena mutata sanitatis, quæ observata vocantur effectus glutinosi spontanei in sanguine hærentis.

VISCIDITATEM. Distinctissimam ab inflammatorio viscido, uti jam monitum fuit §. 69. sed hic intelligitur tale viscidum mucosum, quod in aqua solubile est, cum concretiones inflammatoriæ sanguinis in aqua non solvantur: tale viscidum visum fuit sæpius, dum imprudenti consilio frigidis & pituitosis illis hominibus vena secabatur; pauculum enim rubri concreti sanguinis innatabat magnæ copię feri visci glutinosi.

PALLOREM. In omnibus illis locis, ubi cutis abest, sanguinis colorem, per vasa tenerrima translucentem, observare possumus; uti in lingua, gingivis, ore interno, naso, oculorum angulis, adnata, palpebrarum interiori superficie &c. quando

tunc in his locis omnia pallida apparent, tunc novimus, viscidum in sanguine hærens non esse inflammatorie naturæ, sed lentæ pituitosæ indolis. Ubi enim inflammatoria sanguinis tenacitas adest, omnia rubent, calent: ubi lenta pituita prædominatur, pallor & frigus adsunt. Chylus enim omnis albus est, quando sanguinem ingreditur; debetque per circulationis efficaciam mutari in sanguinem rubrum: debilia autem illa corpora, dum hanc chyli mutationem perficere nequeunt, pallent semper. Cum chlorosi, seu pallido morbo, incipiunt laborare toties circa primam menstruum eruptionem virgines, res hæc evidenter patet: dum enim ad incrementi apicem pervenit muliebre corpus, incipit æquilibrium inter solida & fluida nasci: viscera interim chylopoietica agunt ut ante: hinc gignitur plus boni liquidi: quod non auget vim corporis, sed molem movendorum, manente eadem causa motrice: hinc totum corpus iners fit, tumet, pallet; non ob jacturam sanguinis rubri, sed quia quotidie chylus albus sanguini affunditur, quem vires corporis non valent mutare in sanguinem rubrum. In hoc morbo semper illud glutinosum lentum nascitur: ut docet pastacea totius corporis mollities, pallor, inertia.

IMMEABILITATEM. Tandem enim nimis lentescens sanguis non potest pelli amplius per vasa; imprimis cum semper debilior circulatio adsit in illis, qui viscoso illo lento abundant. Hæc autem immeabilitas imprimis observabitur in valis minimis, in pulmone & cerebro: hinc horum viscerum actiones tunc turbantur quam maxime: & tandem fere lethargici pereunt; vel oppresso pulmone suffocantur.

IN VASIS OBSTRUCTIONES. Quæ longe frequentius à tenacitate inflammatoria nascuntur, quam à pituita frigida. Tamen inde nasci possunt, dum fluidorum moleculæ, lenta viscositate nimis coherentes, non patiuntur se dividi per vasorum actionem in illam tenuitatem, quæ requiritur. ut transire possint per ultimas vasorum angustias.

CONCRETIONES. Ubi stagnat pituita, in massas coriaceas densas crescere potest; imprimis liquidiori parte dissipata. Docet id narium mucus, in tales concretiones abiens. Similia concreta in faucibus nata sæpe excreantur. Idem & in pulmone aliquando fieri; docent quotidiana observata.

URINAM PALLIDAM VIX OLENTIEM. Hæc semper designat languentes corporis vires: hinc pueris, laxis mulieribus, debilibus senibus, semper talis urina. Quo fortior enim homo est, eo cæteris paribus magis colorata urina est, magisque olida. Sed in robustis glutinosum illud spontaneum raro nascitur: nam ærior in his bilis, validaque viscerum actio, omne lentum dividunt, solis vero debilibus hic morbus familiaris est.

SALIVAM LENTAM. Saliva vel in homine sanissimo lentescit; imprimis quia mucus oris & vicinarum partium huic miscetur. Sed cum sanguinis naturam sequantur inde secreta liquida, non mirum est, ex sanguine viscidiori secerni lentiorrem salivam: quæ deglutita, & inter manducandum cibis mista, in primæ digestionis officina viscidum auget.

TUMOREM ALBUM. Vocaverunt αἷμα λεῖψμα Veteres; unde & λεῖψματις dixerunt hunc morbum. Dicitur adesse, quando sanguis degenerat in talem caeochymiam, ut rubedinem & densitatem amittat; & levior factus magis laxam, & mucoso frigori accedentem, naturam acquirat: ubi vero sanguis dissolutus in aquosam tenuitatem loca subcutanea hydropico tumore distendit; vocaverunt & simili nomine aliquando Medici; sed melius Veteres vocaverunt tunc hydropem

ἀπὸ σπύης. Apparet facile distinctos esse hos morbos, licet sæpe confundantur; in leucophegmaticis enim frigida pituitosa humorum indoles est; in hydropse in tenuitatem aquosam degenerant omnia. Hydrops ἀπὸ σπύης plerumque ab inferioribus orta, sensim ascendente tumore pergit; leucophlegmatia, pituita in habitum corporis diffusa: magis æquabiliter per totum dispergitur; hinc laxitas & pastacea mollietates totius corporis: & hoc morbo laborantes homines bombycum instar pellucere ferre. Hinc Hippocrates hæc distinguens dixit (a): *Cum pituita alba corpus derinuerit, totum corpus tumore albo intumescit &c. si curatus fuerit inchoante morbo, convalescit; sin minus, in hydropem transit morbus, & hominem perimit:* & alibi (b), *alba pituita hydrops supervenit.*

IMPEDITAS SECRETIONES. Omnes secretiones à sanguine fiunt. Ut ergo illæ fiant debito modo, requiritur, ut sanguis bonus adsit. Sed debilia hæc corpora chylum, & lac album conficiunt; sanguinem solidum rubrum difficillime: hinc albus ille color. Si vires paulo plus valeant, magis mutantur; non tamen integre perficiuntur humores: tunc color oritur flavescens vel viridescens; ut patet in chlorosi. Ideo vix perspirant, parum mingunt, parcius & inertior bilis secernitur &c. accumulatum illud pituitosum obstruit minora vasa secernentia, vel distendendo partes comprimit, sicque secretiones impedit.

DEFECTUM SUBTILIORUM. Videmus evidenter in leucophegmaticis, omnes illas functiones deficere, vel languere, quæ à subtilissimo liquido, per minima vasa moto, pendent. Hinc illa tarditas ad omnes motus musculares, torpor, hebetudo sensuum, oblivio, somnolentia: videtur enim naturæ prudenti instituto sanguis ad cerebrum tendens liberari à lentiori minus mobili parte, dum carotis externa ad nares, linguam, os internum &c. deferret sanguinem, unde tanta copia lenti muci secernitur: & sic solidissimus & purissimus sanguis ad cerebrum & cerebellum deferretur, ut inde fiat spirituum secretio. Dum ergo sanguis in pituitosam inertem cacochymiam degenerat, debita spirituum secretio deficit; & omnes, quæ ab his pendent, actiones.

MINIMORUM CANALIUM COALITUM. Certo novimus, magna etiam vasa, orbata liquido transfluente, collapsa concrevisse. Canalis arteriosus, medius inter aortam & pulmonalem arteriam, tam patulus in fœtu, postea concrevit; dum respiratione explicatus pulmo liberam viam facit sanguini, ex corde dextro per arteriam pulmonalem pulso: unde per hunc canalem non amplius fluit sanguis; contigua facta collapsi canalisi latera concrevissent, & satis cito quidem. Sed si hoc fiat in tam magno vase, quid fiet in minimis illis, quæ sua parvitate omnem imaginationis vim fugiunt, si orbentur subtilissimo suo liquido? Ex antedictis autem patuit, in hoc morbo deficere illud subtilissimum, quod suo transfluxu minima illa vasa aperta servare potest: & ex hac causa toties, post apoplexiam vel paralysem ex hac cacochymia glutinosa natas, supersunt immedicabilia mala.

§. 73. **H**INC coctiones, circuitus, secretiones, excretiones, motus vitales naturales, animales, omnes perturbantur, unde suffocatio, mors.

Omnia, quæ in hoc paragrapho recensentur, à debito motu liquidorum sanorum

(a) De Affectionibus cap. 5. Chaster. Tom. VII. pag. 625.

(b) Aphor. 72. Sect. 7.

M iij

per vasa, requisitum robur habentia, pendent: ubi ergo nimia sanguinis glutinositas difficiliorem trajectum per minora vasa facit, vel & tandem omnino impedit, necessario sequuntur omnia hic recensita mala. Dum consideramus illa symptomata, quæ in chlorosi laborantibus observantur, hæc omnia patebunt evidenter.

In hoc enim morbo, nulla sit *COCCTIO* ingestorum, vel depravata penitus; & omnia in spontaneam abeunt corruptionem. Hinc illi ructus acidi, nidorosi &c. *CIRCULITUS* humorum penitus turbatur: docet hoc pulsus, inordinatus toties in hoc morbo, & frigus, imminutæ circulationis sequela: *SECRETIONES* omnes fere à naturali lege declinant. Viscida saliva, iners bilis, spirituum defectus hoc docent. *EXCRETIONES* mutantur omnino: urina pallida, spumosa, vix olens: alvus plerumque tardior: perspiratio vix ulla. *VITALES MOTUS* perturbantur omnino: respiratio difficilis, ad minimum motum corporis anhelosa: cordis palpitaciones enormes sæpe: animi deliquia à levissimis causis: pulsus tardus parvus, dum quiescunt; velox & inæqualis, dum corpus movent. *NATURALES* functiones depravatæ penitus sunt. Appetitus vel nullus, vel inordinatus absurda quævis desiderat; dum arenas, calcem, cretam &c. clanculum toties vorant hoc morbo laborantes puellæ; unde calamitosissimi sæpe morbi. Ab assumtis cibis gravantur; nec inde reficitur corpus; *ANIMALES* functiones languent omnino. Languida membra vix trahunt, à minimo corporis motu delassatæ ilico: sensuum omnium hebetudo, stupor, vertigines molestissimæ adsunt. Tandem, immeabili præter nimiam viscositatem hærente in pulmonibus sanguine, suffocantur; vel subtilissimorum spirituum defectu lethargo pereunt.

§. 74. **E**X his (69. 70. 71. 72. 73.) diagnosis, prognosis, anamnesis mali hujus patet, nec vero, sanatio quid indicet, obscurum est.

DIAGNOSIS docens descriptum morbum adesse, ex dictis facile habetur Si sit solidorum debilitas, boni sanguinis inopia, talia assumpta sint alimenta, in quibus glutinosum illud prædominatur, sedentaria vita fuerit, tuncque sine febre, sine siti, sine ulla nota putredinis, incipiat sensim appetitus deleri, totum corpus tumere, pulsus sit debilis, frigus adsit; certo licet concludere, pituitosum illud frigidum prædominari.

PROGNOSIS. Omnia illa mala recensenda forent in prognosi, quæ §. 71. 72. 73. enumerantur. Et ex iisdem prægressi mali *ANAMNESIS* habetur.

SANATIO. Quomodo obtineri possit, ex iisdem certissime deducitur: hæc enim obtinebitur evitatione causarum §. 69. sic enim prohibetur viscidæ generatio & deinde viscidum jam præsens in corpore debet attenuari idoneis remediis, ut non amplius functiones lædere possit.

§. 75. **Q**UÆ obtinebitur, 1. usu cibi potusque bene fermentati, sale, & aromate conditi; 2. Jusculis volatiliū animalium; 3. Roboratione vasorum & viscerum; 4. Aucto motu; 5. Medicamentis diluentibus, resolventibus, stimulantibus, biliosis, saponaceis; 6. Frictu, calore, balneo, vesicatoriis. Cæterum interiora corporis obsidentur glutinosis, vel spissis, caseosis, mucosis, mucila-

ginosis, lemosis, ceraceis, pultaceis, amurcosis, calculosis, tartareis, serosis inflammatis, polyposis, meliceratis, steatomatosis, atheromatosis densis, scirrhis concretis. Cavendum religiose, ne perturbetur glutinosum beneficum, naturale, lubricans, inungens, defendens, quod oculis, palpebris, naso, ori, faucibus, gulæ, ventriculo, intestinis, pelvi, ureteribus, vesicæ, urethræ, vaginis mucilaginosi tendinum; articulorum commissuris, laryngi, arteriæ asperæ, bronchiis, datum in usus necessarios, cum glutinoso morbofo. Quod fatali idiotarum, & medicastrosum, errore nimis crebrum.

1. Dum farina cum aqua subigitur, fit lenta & ductilis pasta, glutinosa penitus: si fermentatio concilietur huic massæ, omne illud tenax dividitur, & quidem eo plus, quo fermentatio fortius & diutius egit in hanc tenacem massam. Optime ergo fermentatus panis requiritur, imprimis biscoctus; tunc enim sponte inter manducandum deliquescit: imprimis si pauculo salis & aromatibus gratissimis, in Materia Medica recensitis, condiatur.

Pro potu vinum; vel cerevisia optima, meracior, viro forte præferenda ad hos usus. Ubi inflammatorium gluten adest, mollissimum hordei decoctum datur; quod frigidum glutinosum, de quo hic agitur, auget: cerevisia vero ex hordeo facta etiam, sed diversa præparatione, nobile remedium dat in glutinosa frigida sanguinis, & humorum inde secretorum, degeneratione. Hordeum enim in cerevisiæ præparatione aqua perfunditur & maceratur, donec intumescat, & incipiat germinare; tunc in area spargitur, & bis de die vertitur, donec humidum pro maxima parte perdat; dein supra fornacem siccatur; vocatur tunc Maltum: illud deinde, mola tritum, aquæ ferventi infunditur, & in illa relinquitur per aliquot horas: aqua hæc soluta hordei tota fere substantia dives, decoquitur in alio vase; deinde fermentata dat cerevisiam, quæ suos spiritus tenaciori quasi vinculo ligatos retinet, quam vinum; & hinc magis durabiles effectus in corpore facit. Hæc cerevisia, imprimis meracior, nobilissimum remedium exhibet: & Momma Brunsvicensis, cum pane biscocto, sæpe sine aliis remediis tales morbos superavit.

2. Illa enim juscula non adeo habent tenax illud gelatinosum, sed ingesta calore corporis humani ilico disponuntur ad incipientem putredinem quasi, quia imprimis laudantur hæc juscula facta ex carnibus avicularum, quæ insectis vivunt; hinc illa dispositio major est, quam in carnibus animalium vegetabilibus viventium. Adduntur simul pro condimento aromata acriora: putredo enim vel incipiens tantum omne lentum attenuat; gelatina spississima scissilis ex cornu cervi ratura longa coctione in aqua facta, simul ac levissimum putredinis initium oritur, diffluit instar aquæ.

3. Quomodo roborari possint vasa & viscera nimis debilia, dictum est §. 47. & quotidie videmus, rusticos robustos validissima edulia commode digerere, quæ debilius viscera infarcirent pessime: solani esculenti tubera, farinosa non fermentata, durissimas fumo & sale carnes, impune ferunt.

4. Frustra Medicus tentat sanare hominem, pituitosa humorum cacochymia laborantem, per pharmaceutica & victum, si non possit impetrare, ut æger superet

pigritiam, in quam ducit morbi indoles, & laboribus fere ultra potestatem exerceat corpus. Non tamen statim quidem corpus, glutinosum plenum, in summos motus ducendum est; nam subito mota hac mucosa materie, pulmo obrueretur summo cum periculo: ut toties fit, dum hyemali tempore aggestum glutinosum, verno calore subito fufum, & sanguini mistum, in pulmonis angustiis hæret; & suffocat inopinato hominem: sed motus sensim & per gradus augendus est. Quamdiu debilitas corporis exercitia non permittit, frictiones illorum defectum suppleant.

§. MEDICAMENTIS DILUENTIBUS. Sola aqua proprie diluit, & omnia reliqua, quæ diluentia dicuntur, tantum agunt ratione aquæ. Iners illa frigida pituita, de qua hic agitur, potest aqua dilui, imprimis tepida, & sic resolvi: sed momentaneum tantum levamen adfert hæc pituitæ per aquosa diluentia resolutio: aquæ enim tepidæ usu omnes partes solidæ debilitantur; unde augetur causa pituitam producentis in corpore. Hinc adeo fallax hæc medela, dum sæpe homines sapientiæ studiis dediti, accumulata quotidie inerti pituita laborantes, tepidis aquosis potibus levamen sentiunt; dein his indulgentes tandem corpus misere perdunt, Ubi vero subita dilutio pituitæ, v. g. in ventriculo fluctuantis, requiritur, tunc profuna.

RESOLVENTIBUS. De his actum fuit §. 54. n°. 4. ubi & de diluentibus dictum fuit.

STIMULANTIBUS. Omne, quod applicatum corpori facit augeri motum in toto vel in parte, posset vocari stimulans: ille enim communis omnium medicamentorum stimulantium effectus est, quocumque demum modo in corpus agant. Inter stimulantia quædam sunt, quæ videntur rigiditate & figura suarum partium agere, dum acuta superficie lateribus vasorum, per quæ cum humoribus nostris fluunt, impacta, irritatione hac celeriores contractiones vasorum faciunt. Plurimorum stimulantium effectum videmus evidenter; modum vero, quo agunt in corpus nostrum, intelligimus non facile.

Verbi gratia: Cinnamomum gratissimo, nec minus efficaci, stimulo languentes corporis vires excitat: illud autem, quod in cinnamomo has vires habet, incredibiliter parvum mole; dum liberum est à tenaci vinculo oleoso, quo irretitur, omnem fugit sensum. Oleum ex cinnamomo destillatione productum totum aroma stimulans cinnamoni possidet: illud oleum per aliquot dies expositum aëri libero sine sensibili ponderis jactura fere omnem vim amittit. Quis poterit determinare figuram illius subtilissimi, quod in cinnamomo hærens stimuli vice fungitur? Sed & venenati stimuli quomodo corpus totum turbant, quantos excitant motus? Venenum variosum, morbillosum, postis &c. quam enormi vi agunt? In illis tamen eadem subtilitas omnem indagationem eludit: solis effectis tantum detegitur efficacia.

Sed numquid & animi affectus, mutata solum cogitatione, tam miris modis corpus mutant, validissimas excitant febres, omnes secretiones, omnes excretiones, augent, minuunt, turbant?

Hinc stimulantium effectus non semper à figura, pondere, rigiditate partium pendent: sufficit Medico novisse talia, quæ applicata corpori motum augent; licet ignoret, quomodo agant.

Omnia autem hæc, majori motu & calore excitatis, videntur agere, sicque ultimo effectu dividere glutinosum iners; illudque sic mutare, ut proprietates sanorum humorum acquirat.

Posse

Posse autem sanguinem, qui glutinosa inerti cacochymia gravabatur, sine evacuatione illius viscosi, aucto motu & efficacia vasorum in liquida contenta, iterum acquirere omnes dotes ad sanitatem requisitas, certissima docent observata.

Chlorosi laborat debilis puella; totum corpus laxo œdemate tumet; pallent & frigent omnia. Dato prius leni vomitorio, vel purgante ex pilulis Ruffi, v. g. vel similibus, saburra mucosa in primis viis hærens educitur, ne aliorum medicamentorum efficaciam impediat: dein datur vinum medicatum ex optimis aromatibus & ferri limatura. Dum his utitur, incipit oriri major calor, levis quasi febricula; quotidie incipit subsidere latus partium omnium tumor; redit amœnus rubor in cute, labiis, gingivis &c. nulla evacuatione facta prædominantis viscosi, renascitur solidus ruber sanguis; redit omnium functionum integritas.

Prudentissimum certe erat Galeni monitum, dicentis (a): *Pituita autem frigida & humida est, & veluti quoddam semicoctum alimentum: quare non est evacuanda, sed debet in corpore manere atque alterari (ἀλλοιῦσθαι).*

Stimulantia in Materie Medica, variis classibus distributa, recensentur.

BILIOSIS. Adeo oppositam inter se habent indolem bilis & lenta pituita, ut nunquam simul prædominentur: summum enim detergens pituitæ est ipsa bilis, omnia solvens & attenuans. Simul ac bilis, impedita fluere in duodenum, regurgitat in sanguinem, totus sanguis sic dissolvitur, ut tandem diuturnum icterum sequatur hydrops. In illis hominibus, in quibus lentum illud pituitosum accumulatur, semper bilis copia deficit, vel peccat inertia. Nihil ergo videtur plus convenire, quam ut bilis defectus suppleatur: hoc autem fit, bilem, ex alio animali desumptam, ingerendo corpori, in quo deficit bilis; vel usu plantarum, amararum, absinthii, centaurii &c. Prius maxime naturale videbatur, hinc selegerunt imprimis bilem illorum animalium, quæ voracia satis, manducatione tamen, & pluribus aliis digestionis adminiculis, carebant: in illis enim acerrima bilis horum defectum supplere videbatur. Hinc fel lucii piscis, integros pisces vorantis, fel anguillarum, adeo laudatum ad hos usus. Sed & observaverunt Zoographi, ferocissimis animalibus acriorem bilem inesse; hinc fel taurinum inspissatum, ne putresceret, in officinis servant, ex hac bile inspissata facta cotapotia tanti usus sunt. Forte pretiosissimus lapis Porcinus, *Pedra del Porco*, dictus, bili suam efficaciam æque ac originem debet.

SAPONACEIS. Imprimis sapo Venetus, blandissima actione omne glutinosum, omne pingue solvens, hic laudabatur. Addebant Medici saponi Veneto vigesimam bilis inspissatæ circiter partem, inde facta catapotia exhibebant in hoc casu ægris, & sic utriusque bilis defectum supplere conabantur. Bilis enim hepatica amara nunquam, saponacea penitus, saponi Veneto conveniebat utcumque; bilis cystica parca tantum copia videtur effluere, ob colli vesicæ fellæ angustiam, intorsionem, situm: sic naturam ars conatur imitari.

6. **FRICTU.** Quid possint efficere frictiones, dictum §. 28. n°. 2. Dum glutinosus infarctus puerorum abdomen tumet: frictiones pannis lanceis asperis factæ plurimum prosunt; sed debent perfricari mane post somnum, vacuo ventriculo: illo enim distento, non facile illud ferunt. Imo in frictionibus ventrem omnino non contingendum esse voluit Galenus (b). *Cum alioqui periculum sit, ne & cibum dete-*

(a) In Librum Hippocr. de alimento Comment. III. Charter. Tom. VI. pag. 255.

(b) De Sanitate tuenda Lib. III. cap. ult. in fine. Charter. Tom. VI. pag. 114.

ius concoquat, & succus quispiam ex eo Semicrudus in corpus digeratur, & caput turbetur, & stomachus subvertatur. Vacuo autem ventriculo dum instituuntur frictiones, non est hujus rei periculum.

CALORE. Omnia fere, quæ laudantur ad glutinosos morbos sanandos, Medicamenta, sunt talia, quæ majorem calorem corpori conciliant. Imprimis hic prodest calor per motum muscularem corporis excitatus, qui semper simul roborat; cum calor foci debilitet potius. Nec nocebit humidi dissipatio per calorem majorem corporis facta, cum in his morbis plerumque simul humidi nimia copia adsit.

BALNEO. Balnea sunt vel humida, vel sicca. Humida laxando & diluendo agunt: hinc in hoc casu aromaticæ herbæ adduntur, quæ simul roborant & attenuant, & post balneum frictiones. Balnea sicca calore majori excitato profunt. Cum autem tota corporis externa superficies bibulas venas habeat; hinc balnea, ex herbis aromaticis facta, possunt laxatis venis bibulis insinuare simul harum herbarum vires.

VESICATORIIIS. Sic vocantur illa remedia, quæ cuti sanæ applicata epidermidem in vesicam, tenui ichore plenam, attollunt. Talia fiunt ex acerrimis plantis, raphano, sinapi, ranunculis &c. vel frequentissime ex cantharidibus. Omnia hæc calorem excitant illo in loco, cui applicantur; & dein toti corpori caloris augmentum faciunt. Imprudenter applicata corpori, febrim, sitim, calorem urentem, halitum cadaverosum, molestissimam stranguriam, faciunt, imprimis cantharides: quæ ideo à Dioscoride inter venena recensentur. Omnia hæc agunt ratione stimuli, quo languentem motum sanguinis excitant, & vi fundente, qua pituitosum iners dividunt & attenuant: hinc in omnibus morbis languidis & frigidis tanti usus. Ubi vero humores dissoluci, acres, in putredinem vergentes, & magnus motus adest, non adeo tuto adhiberi posse videntur.

CÆTERUM INTERIORA CORPORIS OBSIDENTUR &c. Observata Medica docuerunt, posse ex humoribus nostris nasci variis in locis corporis miras concretiones, & penitus diversæ indolis; quæ partium, quas occupant, actiones impediunt: unde mirabilium & latentissimorum morborum origo sæpe pender. Præcipuæ talium concretionum classes hic recensentur.

GLUTINOSIS VEL SPISSIS. Talia oriri posse in corpore, partim ex ingestis, tali indole præditis, partim ex naturali glutine accumulato, toto hoc Capitulo demonstratum est.

CASEOSIS. Lactis solius productum caseus est; chylus enim non exhibet caseum: sed lac, coagulo addito, separatur in binas partes; serum nempe tenue, & spissum colostrum, quod omni sero expresso caseum exhibet; qui exsiccatus corneam duritiem sæpe habet; imo, ut cornua animalium, ductilitatem ab igne acuerit, & destillatione salem volatilem alcalinum exhibet. Sed lac illud continens caseum, qui in tantam duritiem concreescere potest, fluxit cum sanguine per minimas vasorum pulmonalium angustias: si ergo lacti cum sanguine fluenti accideret talis mutatio, qua fieret separatio serî & colostri; quanta fierent mala? Dum in mammarum ductibus galactophoris collectum lac stagnat, & corrumpitur; per papillam stillat tenue serum; colostrum retentum, inflammationes, suppuraciones, scirrhum, imo Cancrum toties produxit. In cadavere nobilis juvenis tumor inventus in abdomine (*) $7\frac{1}{4}$ librarum materia alba plenus, quæ partim lactis instar fluida, partim caseosa apparebat.

(*) Académ. des Sciences Pan 1729. Hist. pag. 17. 18.

MUCOSIS. In omnibus illis locis, quæ membrana Schneideriana, vera mucæ officina, investit, nasci mucum, accumulari, concrefcere in moles sæpe non facile postea resolvendas, docent quotidiana observata. Sed magis mirabile videtur in talibus locis corporis mucum nasci; in quibus subtilissimi tantum naturali fabrica partium secernuntur humores: in ipsis enim cerebri ventriculis mucum verum, frigida apoplexiæ causam, invenerunt Observatores (a).

MUCILAGINOSIS. In articulis, majoribus imprimis, manifeste apparent glandulæ illæ, Haverlianæ à primo descriptore dictæ, quæ smegma mucilaginosum fundunt, inserviens lubricationi ossis excepti & excipientis, & internæ superficiei ligamenti articulationem ambientis. Hæc mucilago, vel nimia spissitudine degenerans, vel nimis quiescente articulo accumulata, miros sæpe tumores circa articulos facit, & aliquando immedicabilem anchylosim producit.

LEMOSIS. In homine sano oculi, tenuissima lymphæ irrorati, splendent: minimo hic orto vitio, copia majori secretum hoc liquidum depluit: postea apparet ibi mucus crassus, viscositate sua hærens, & deturpans oculi pulchritudinem: hic incipit concrefcere in lemas, quæ paucas post horas friabiles penitus colliguntur circa angulum majorem oculi. Sic ab humore limpidissimo, à sanguine purissimo secreto, intra paucas horas, dura friabilis nascitur massa.

CERACEIS. Mirabilis casus docuit, oculi humores omnes, adeo limpidos, adeo sinceros in sanitate, degenerasse in sebaceam materiam: dum enim prominens oculus extra palpebras, metu majorum malorum extirpabatur, & felici quidem successu; postea oculo extirpato & discisso patuit, omnes humores oculi sic degenerasse. (b). Sed si in oculis fieri possit, ut in tam alienam indolem degenerent humores, quid non possibile erit in aliis corporis locis? in rugis ani ceracea talis materies naturaliter in suis loculis hæret, quæ inspissata & accumulata tales tumores producere potest (*).

PULTACEIS. In abscessibus similem materiam invenit Severinus (c). Admodum videtur probabile, & in partibus internis similia observata fuisse.

AMURCOSIS. Inflammatum hepar, ut reliquæ corporis partes, in suppurationem aliquando tendit, & sæpe consumto friabili viscere non bonum pus fit; sed corrupti visceris tabus, amurcæ similis, per alvum deponitur: imo abscessu ad exteriora verso, talis materia, discissis vel sponte ruptis integumentis, exit: unde Hippocrates (d) monet, quod qui hepate suppurato uruntur, si effluat velut amurca, pereant.

In abdomine subperitonæo tumor invenitur, plenus sanie, fœcibus vini rubri tam colore quam consistentia simili, quantitate pintas circiter duodecim æquans (e).

In tumore, genu sinistrum occupante, discisso, similem invenit materiem Severinus (f).

CALCULOSIS. Nasci in corpore humano calculos, nullus dubitat; imprimis circa urinæ vias, renes, ureteres, vesicam, & circa hepar: sed in his locis humores effusi in cavis majoribus stagnant, vel tardius moventur, saltem in hepate: hinc faci-

(a) Theoph. Boneti Sepulchr. Lib. I. pag. 103. 104. 105. 108. 138. &c. | Ruysch. pag. 11.

(b) Theoph. Boneti Sepulchr. Lib. I. pag. 427. 428.

(*) H. Boerhaave Epist. Anatom. ad Fred.

(c) De Recondita Abscess. Natura pag. 183.

(d) Coacar. n°. 451. & Aphor. 45. Sect. 7.

(e) Peyer. Parerg. Anatom. pag. 191.

(f) De Recond. Abscessuum Natura pag. 153.

lius videntur hic posse nasci calculosæ concrectiones. Sed magis mirabile videtur, in ipsa substantia cordis, nunquam quiescentis, reperiri calculos (a). Ut & quod in cavo abdominis nulli parti affixus calculus repertus fuerit (b). Iridem quod bovis robustissimi, qui quater se subduxerat lanionibus, antequam mactaretur, cerebrum inventum totum lapideum (c) fuerit.

TARTAREIS. Sic vocantur concrectiones calculosæ, quæ totam superficiem loci, quem occupant, tartari instar crusta calculosa tegunt. Placenta uterina tali crusta calculosa aliquando undique tecta observatur: dura mater cerebri lapidea tali materia incrustata fuit inventa (d).

SEROSIS INFLAMMATIS. Docet hoc sanguis pleuriticorum: in quo densa, coriacea, vix cedens novaculæ pellis, ex sero condensato nata, insulæ pertinaciter adhæret: naturaliter enim inest sanguini in concrectionem proclivitas; quæ in morbis acutis inflammatoriis augetur.

POLYPOSIS. De his vide §. 52. n^o. 2.

MELICERATIS, STEATOMATOSIS, ATHEROMATOSIS. Hæc tantum differunt imprimis inter se ratione diversæ consistentiæ, quam habet materia contenta. Sic enim Galenus *de tumoribus præter naturam* cap. 5. dicit, quod puliculæ aliquid simile in atheromatis invenitur; melli vero in ipsis meliceridibus; sevo autem in ipsis steatomatibus: ut plurimum vero tunica quædam membranosa hæc omnia coercet (e). In cute externa folliculi, emissario obstructo, tumentes, nova aggesta materie, nec evacuata, toties in hos tumores degenerant. In internis & nasci posse similia, docuerunt observationes Medicæ. Inter cerebrum & cerebellum natum steatoma pugni magnitudine, cœcitatem primo, post & necem intulit (f). Verum steatoma ultra sex libras pendens in cavo pectoris repertum, quod post enormes calamitates tandem suffocavit ægrum (g).

SCIRRHOSIS CONCRETIS. Scirrhum exquisitum vocavit Galenus (h); tumorem præter naturam, sensu carentem, & durum. Talis autem tumor post male curatas inflammationes toties relinquitur; imprimis circa loca dicta glandulosa. Innumera possent citari observationes Practicorum, quibus constat, omnia viscera per morbos scirrhusa facta fuisse aliquando.

CAVENDUM RELIGIOSE, NE PERTURBETUR GLUTINOSUM BENEFICUM, NATURALE &c. Maxime momenti monitum est, quod neglectum turpibus erroribus toties ansam dedit. Multi enim fuerint in illa opinione, cum vita & sanitas in liberrimo motu fluidorum per vasa consistere tantum ipsis videretur, quod vix posset unquam peccare nimia liquidorum tenuitas: omne crassum, omne tenax, dicebatur morbosum. Qui partium humani corporis fabricam & usum examinaverunt, viderunt evidentissime, lentum mucum in plurimis corporis locis præparari naturali lege per organa huic scopo inservientia, & maxime necessarios usus habere. Palpebrarum limbi toties attriti ad se invicem, nisi molli sme-

(a) Philosoph. Transactions Abridged Tom. III. pag. 158.

(b) Academ. des Sciences l'an 1703. Hist. pag. 46.

(c) Academ. des Sciences l'an 1703. Mem. pag. 315.

(d) Theoph. Boneti Sepulchr. Lib. I. pag. 59.

(e) Dictionar. Medic. ex Hippocrat. Arctæo: &c. pag. 465.

(f) Theoph. Bonet. Sepulchr. pag. 422.

(g) H. Boerhaave atrocis & rarissimi Morbi Historia altera.

(h) Method. Med. ad Glaucon. Lib. II. cap. 6. Charter. Tom. X. pag. 378.

gmate defenderentur, inflammarentur brevi, & excoriati dolerent: docent hoc molestissimæ lippitudines toties ab hujus defectu oritæ. Nervi per narium ingentia cava dispersi, nisi muco tecti forent, ab aere exsiccarentur brevi, & periret olfactus: omnes partes oris interni, faucium, œsophagi, simili obducuntur linimento, ut deglutienda facile per lubricata loca transirent: Ventriculi & intestinorum interna superficies, vel in sanissimis animalibus mactatis, lubricissima apparet, inuncta simili muco, ut tenerimæ vasorum & nervorum extremitates hic patulæ & prominentes defenderentur ab acrimonia vel asperitate allumentorum; unde in dysenteria, deraso hoc muco, tam enormes dolores; non sedandi, nisi ingestis talibus remediis, quæ suo glutine defectum hunc suppleant. Omnes viæ, quas acris urina transit, tali muco inunctæ sunt: dum deest in urethræ quodam loco talis mucus, molestissima stranguria oritur, quæ mucilaginoso althææ decocto tam pulchre curatur. Tendines mucilaginosi vaginis ambiuntur, ut facillima fiat mobilitas: dum per validas suppurationes, vel gangrænas, destruuntur hæ vaginæ, rigescunt omnia.

In articulis ossium extrema tenuissimo smegmate obliniuntur: dum post summos & diurnos motus, vel per morbos, aut senium, deficit: crepitus & dolor articulorum oritur. Laryngis, asperæ arteriæ, interna superficies, totum cavum acreum pulmonis, adeo irritabiles nervos habet, ut nisi muco tegerentur, ab ipso aëris tactu continua fieret tussis.

Cum omnibus illis locis naturalis sit mucus, male culpatur tanquam morbosus; & pessimo successu de corpore expellitur. Cantharides assumptæ cum sæva stranguria mucis sanguinolenti pauculum faciunt exprimi, derasis virulenta horum insectorum acrimonia urinæ viis: acriora purgantia toties, post sæpius evacuatam alvum, exprimunt flavescentis glutinis pauculum cum striis sanguineis, summo cum tenebris & dolore; est tantum beneficium illud gluten abrasum, unde postea sæpe molestissima tormina manent, excoriatis & dolentibus intestinis. Idem & in aliis locis verum est.

MORBI EX ALCALINO SPONTANEO.

§. 76. **N**ONNULLÆ plantæ scatent materia, quæ sponte corrupta non acescit, nec coit, sed resolvitur in fœtidum volatile, pingue Alkali: tales omnes fere Aromaticæ valde acres. Has vero raro assument tanta copia, ut morbum creent ex suo ingenio. Sin autem id contigerit, pertinebit ad acre alkali oleosum.

Alkali, receptum jam in arte nomen, à falsissima herbula Kali dictum videtur; quæ vivis flammis usta relinquit cineres acri sale divites. Pleræque plantæ, igne aperto combustæ, relinquunt cineres plus minusve falsos; cineres illi in aqua cocti, filtrati, dant lixivium falsum, quod inspissatum relinquit salem, alcalinum dictum; qui certas habet notas, quibus cognosci potest (*), fixus in igne satis diu; in aëre

(*) H. Boerhaave Chem. Tom. I. pag. 765.

humido deliquescent penitus; saporem habens acrem igneum, urinosum; odorem nullum; acidis mistus ebullit; syrupi violarum colorem cæruleum in viridem mutat &c.

Sal ille, ex vegetabilibus valido igne & aperto productus, in corpore nostro nasci nequit; ingeri quidem.

Dum vegetabilia aperto igne comburuntur, exit fumus; qui, lateribus camini adhærens, pinguem nigram massam exhibet, fuliginem nempe: hæc fuligo destillata vasis chemicis dat magnam copiam salis, concrefcentis ad latera excipuli; qui sal linguam urit cum sapore urinoso, ut sal fixus alcalinus; similiter cum acidis effervesceat, colorem syrupi florum violarum mutat &c. hinc sal alcalinus ob has doctes merito dicitur, sed volatilis, & minimo igne mobilis.

Animalium partes, igne examinatae, prima destillatione dederunt talem salem volatilem alcalinum.

Putredo hætenus explorata animalium & vegetabilium corpora eoredigit certissime, ut salinum eorundem principium evadat alcalinum volatile (a).

In quibusdam plantis hæret jam alcalinus volatilis sal, nativa plantæ fabrica paratus; nullam artem requirens, ut se manifestet. Sinapi semina fracta mox spirant halitum illum volatilem alcalinum; cum aceto trita effervescentiæ signa dant; sponte & prima destillatione statim salem volatilem alcalinum exhibent.

Aliæ plantæ sunt, in quibus non adeo manifesta quidem indicia sunt præsentis alcalini volatilis; quæ tamen sibi relictæ spontanea corruptela degenerant in fortidum volatile pingue alcali: harum Catalogus habetur in Materia Medica.

Alcalini ergo origo in corpore nostro pendet vel ab humoribus nostris, corruptis putrida degeneratione spontanea; vel ab ingestis, quæ talem indolem habent, ut sua in putredinem vergant, vel denique ab assumptis salibus alcalinis.

Sales autem alcalini tanta copia vix unquam exhibentur, ut multum nocere possint,

Nec acres illæ aromaticæ herbæ, de quibus in hac paragrapho agitur, facile tanta usurpantur copia, ut inde origo alcalini spontanei in corpore deduci possit. Aliquando tamen accidit, cum fere omnes antiscorbuticæ vocentur, imprudenti ad hunc morbum usu sic dissolutum fuisse sanguinem, adeo exesa vasa, ut lethales hæmorrhagiæ, halitus putridissimus, urina foetidissima, fæces alvinæ cadaveroso odore, testarentur putredinem inde natam.

§. 77. **E**X animalium partibus confecta nostra liquida varia sunt: 1. pro varietate alimenti, quo se sustinent: 2. pro varietate partis, quæ assumitur.

Ut ex ingestis per omnium viscerum conspirantes actiones restituatur illud, quod inevitabili sanitatis effectum perditum erat de solidorum & fluidorum substantia; requiritur, ut, deposita sua indole, nostram induant naturam ingesta alimenta: hinc quando ad ultimam illam perfectionem pervenerunt, tunc omnia, quatumvis varia, ejusdem sunt naturæ. Sed hæc transmutatio non nisi continuata per multas horas actione omnium vasorum & viscerum perficitur: hinc ingesta satis diu sæpe suam naturam retinent; & tunc varia sunt liquida inde confecta ratione diversorum ingestorum: illa autem liquida, quæ ex animalium partibus comestis sunt, differunt inter se imprimis ob duas causas.

(a) H. Boerhaave Chem. Tom. I pag 803.

1. Omnia enim animalia hoc respectu in tres classes possunt dividi: vel enim vivunt solis vegetabilibus, ut equi, boves, oves &c. vel solis animalibus, ut vanelli, hirundines &c. vel utrisque, ut passeret &c.

Dum lac bovinum in calore aeris æstivi relinquitur, acescit brevi; carnes ejusdem animalis putrescunt: qui ergo lac ingerit, alimentum sumit sponte sua acescens; qui carnes ejusdem animalis comedit, nutrimentum sumit sponte in putredinem vergens; si medullam ejusdem animalis quis assumit, hæc poterit in debiliore ventriculo imprimis in rancidam corruptelam abire. Apparet ergo varias ejusdem animalis partes penitus diversam spontaneam mutationem habere posse.

§. 78. **A**NIMALIA enim, quæ herbis & aqua aluntur, chylus acidum, vel facile acescentem, adeoque & tale lac, habent; quod in nobis suam sequens indolem vegetabili nutrimento simillima patrat. Vid. (61. ad 76.) & lentam materiem caseo presso similem in primis viis creat; quæ singularis hic viscerum species.

Chylus ex ingestis alimentis confectus, imo & lac ipsum, magis adhuc sequuntur naturam assumti quam assumptis. Hinc dum vacca solo gramine & aqua in pratis vivit, chylus ejus & lac assumti graminis naturam retinent, & acescentem indolem: hoc satis patet.

ET LENTAM MATERIAM CASEO PRESSE SIMILEM &c. Sanguis humanus & serum sanguinis vim satis magnam concrescendi habent: & hoc videtur proprium esse liquidis humanis: serum sanguinis coagulatur majori calore; lac non ita: sed lac, per 24. horas fluens cum sanguine, mutatur in serum, & tunc hanc vim concrescendi acquirit. Totum hoc debetur efficaciam vasorum in liquida; imprimis autem pulmonis actioni. Quo plus ergo liquida, ex alimentis facta, absunt ab illa ultima perfectione, eo minorem vim concrescendi habent. Hinc chylus examinatus vix quid coaguli dat: sed lac, quod tantum est chylus, qui aliquo tempore fluxit cum sanguine per vasa, jam separari potest in tres partes; cremorem nempe, serum, & colostrum subsidens; quod omni sero expresso caseum dat: hinc in lacte jam incipit nasci plastica feri sanguinis indoles. A lacte assumpto illud colostrum separatur in ventriculo & intestinis; quod, nisi bile affusa dividatur iterum, pessimo lentore intestina obstruit: unde sæpe adeo tumet infantum abdomen. Postea calore loci & mora corruptum putridissimum alvi fluxum facit: caseus enim, licet ex lacte acescente separetur, videtur partem lactis maxime animale in se habere; nam caseus, omni cremore ablato & sero expresso, induratus, acer fit, alcalinus, & chemico examine similia fere exhibet ac partes animalium.

§. 79. **Q**UÆ aliis nutriuntur animalibus, omnes succos facile alcaliscentes habent.

In illis enim chylus ipse, ingestorum naturam retinens, in alcalinam putridam potius indolem vergit: hinc plerumque pisces, sine sale vel acidis condimentis, aut aliis acscentibus simul assumtis, diu ferri nequeunt: hinc animalia rapacia fere omnia fœtidum halitum spirant. Dum Magnus horum Aphorismorum Auctor sævis-

mis rheumatismi doloribus excruciabatur, proposuit solo carnis vitulinae jussulo, sine ullo sale, vivere, ut leniret dolorem, & simul sustineret vitam: sed ultra quinque dies ferre non potuit, coactus postea ad serum lactis confugere; quo solo per multos dies vixit cum magno doloris levamine.

§. 80. **S**I alimenta, vi nostri corporis, (58) eo sunt redacta, ut jam liquores fecerint, quales in corpore sano & robusto inveniuntur, post abstinentionem à cibo potuque per viginti horas; tum, si sibi relinquuntur in quiete, & calore, vel etiam si moventur valide, naturam adipiscuntur ubique eandem putredinis incipientis.

In præcedentibus paragraphis dictum est de illis mutationibus, quæ fiunt in humoribus natis ex alimentis ingestis, antequam per vires corporis naturam nostrorum liquidorum acquisiverint: in hac paragrapho explicatur, quomodo mutantur iidem, postquam, deposita ingestorum natura, in nostros humores conversi fuerint. Observaverat Lowerus (a), quatuor vel quinque horis post largiorem pastum, sanguini, è quacumque vena vel arteria detracto, magnam chyli lactescentis copiam innatare; & in animalibus æque ac hominibus: postquam vero chylus diutius circumductus fuit cum sanguine, albedine prorsus deposita, in serum attenuatur: hinc longo post pastum intervallo si fiat venæ sectio, nulla lactis species supererit, sed serum solummodo cruori coagulato innabit.

Hinc lac emulctum longe alias dotes habet, prout vario post pastum tempore colligitur. Dum enim omni lacte crudiori prius educto, secunda vice post aliquot horas emulgentur animalium majorum ubera, lac colligitur vix acescens amplius: cujus lactis caseus subputridus, fætidus, qualis est Leodiensium, multis adeo placet.

Ubi ergo per viginti vel plures horas nihil cibi potusve ingestum fuit, tunc nil amplius de natura crudi ingesti superest, & omnia humorum inquilinorum indolem acquisiverunt: sed omnia nostra liquida, sibi relicta in calore aeris communis, putrescunt; licet solis acidis & acescentibus vixerit homo: hinc in omnibus his est proxima dispositio ad putredinem. Nihil autem in sanitate unquam in corpore perfecte putridum fit: antequam enim eo usque pervenerit, per excretorias vias de corpore exit.

Longe autem citius in putredinem abeunt humores animalium, si valide moveantur. Si valido cursu, vel alio labore, quis corpus exercuerit; quam olidus sudor, quam acris & fætida redditur urina? Dum febris acuta lactantem præhendit mulierem: nisi plurimum potet, intra paucas horas lac fiet tenue, subflavescent, falsum, odoris suburinosis.

§. 81. **I**N alimentis vero ex aliis animalibus, jam statim, ante mutationem corpori nostro adscribendam; illa in putredinem vergens indoles sponte adest.

Mulier sana & fortis ex solo pane, lacte, cerevisia, fructibus horæis, paucis-

(a) De Corde pag. 238.

que carnibus vivens, inde conficit lac suum; quod intra 24. horas, si potu & cibo abstineat, potest penitus degenerare in alcalescentem indolem. Hoc longe citius fiet, quando alimenta assumpta jam ex propria natura in alcalinam indolem vergunt. Hinc dum in Principum aulis sæpe solis carniū jusculis vivere debent nutrices, languent, & lac salsum subalcalescens habent, simul ac acescentia exhibentur, reficiuntur statim.

§. 82. **P**UTREDO hæc (§o. 81.) significat eam conditionem humorum; cujus præsentia aqua multum exhalat; Salina materies attenuata, acido orбата, vel & mutata, à terra, oleoque suo, separata, fit acris volatilis, alcalina; Oleosa pariter, una parte tenuior, terra orba, sali illi acri permista, acris, volatilis, fœrens evadit; altera autem olei pars, terræ aqua, sale, & oleo priori orbatæ, permista tenacissime, abit in atram, densam, immeabilem, fœcem.

Describuntur jam illæ mutationes, quæ accidunt humoribus animalium dum putrescunt.

AQUA MULTUM EXHALAT. Putrefactio potuit paucarum septimanarum spatio vastum balneæ, in littus ejectæ, cadaver dissipare in auras, ut nuda tantum relinquerentur ossa: habuit ergo vim talem, qua volatilia redderet hæc omnia. Sed mobilissima humorum pars aqua est, in omni examine chemico humorum animalium primo prodiens, hæc ergo citissime dissipabitur.

SALINA MATERIES &c. Sanguis recens eductus de animali fano nullam notam alcalini salis exhibet; oculo instillatus nullum dolorem facit: si repore simili, ac habet corpus sanum, idem sanguis roveatur per triduum, jam corruptus fœtet, acer fit, & leni destillatione salem volatilem alcalinum dat. Sed sal natus sanguinis neuter erat, longe fixior: hinc ejus indoles penitus putrefactione mutatur. Quod autem putrefactio possit & acidus sales mutare in alcalinos, docet acidissima acetosa, quæ putrefacta salem volatilem alcalinum præbet.

OLEOSA PARITER &c. Ex putrefactis animalium partibus sal volatilis alcalinus, destillatione eductus, nunquam purus apparet; sed flavescens, & oleo subtilissimo, acri, fœtido, inquinatus: ergo per putrefactionem oleum sanguinis, adeo fixum naturaliter, fit tam volatile, ut una cum mobilissimo sale volatili alcalino sursum ascendat leni calore.

ALTERA AUTEM OLEI PARS &c. Non enim omne oleum volatile redditur per putrefactionem, sed quædam pars tantum: reliquum, terræ unitum, pertinacissime cohæret. Ex urina putrefacta una cum sale volatili prodit oleum tenue; sed in residua fœce hæret ingens olei copia, quod summo resistit igni. Sic & in morbis atrabilaris videmus, mobilissimis sanguinis partibus dissipatis, residuum tenax, piccum, pertinacissime hærens, amurcæ instar, viscera abdominalia gravare, & maxime chronica producere mala.

§. 83. **I**NSECTA, pisces, amphibia, animalia volatilia, repentia, gradientia, natantia, homines denique, ex propria sua na-

tura ; in hanc putredinem (82.) sponte vergunt semper ; acescunt nunquam.

Omnia huc usque cognita animalia , dentis quibusdā exsuccis insectis , (ad putredinem enim humiditas requiritur , siccata enim animalium partes nunquam putrescunt) in calore aëris intra 32. & 92. gradum thermometri Fahrenheitiani , sponte putrescunt ; eo citius plerumque , quo calor major est intra definitum hunc terminum (majore enim calore fit potius exsiccatio putredinem impediens) eo lentius , quo descendens calor magis appropinquat ad glaciale frigus. In piscibus plerumque hæc putrefactio citissime obtinet ; in aliis lentius : nec hætenus constat ullo experimento , animalium partes spontanea degeneratione unquam in acidum degenerasse. Hinc hoc videtur merito pro generali regula posse assumi.

§. 84. **H**UJUS putredinis (82.) antecedentes causæ sunt : 1. cibi ex aliis animalibus comestis , excepto lacte herbaceo (78) , maxime ex insectis , piscibus , avibus rapacibus , ex vegetabilibus alcalescentibus : 2. abundantia boni sanguinis , vel si jam putredini ille proximus : 3. Virtus magna vasorum viscerum , (50. ad 54.) bilis : 4. Stagnatio , vel nimia agitatio , torpente , vel incitato animali motu : 5. Calor ingens diu & multum conciliatus corpori.

1. Potest sani corporis actio in ingesta alimenta , quæ in acidum sua natura vergunt non in putridum alcalinum , illa sic mutare , ut , similia facta humoribus sanis , jam incipientis putredinis naturam adipiscantur (§. 80.) Si ergo ingesta alimenta ex sua indole jam in putredinem vergant , conspirabunt simul ingestorum indoles & corporis actio in hæc ingesta : longe ergo promptior erit dispositio ad putredinem. Hinc solis carnibus , solis piscibus sine ullo sale , sine acido , sine vegetabilibus acescentibus simul assumtis , homo diu vivere nequit ; langueret brevi , & abhorreret hos cibos. Sunt tamen animalia quæ solis vivunt carnibus , nec bibunt tamen : hoc de aquilis Gesnerus affirmavit ; & certa observata docuerunt hujus rei veritatem : in hominibus tamen capta experimenta docuerunt , quod solis alcalescentibus vivere sani nequeant diu.

2. Quantum possit boni sanguinis copia in assimilatione ingestorum , dictum fuit §. 25. n^o. 1. præcipuum enim auxilium est , quod immutat cruda ingesta in naturam nostrorum humorum. Hinc sanissimi & plethorici in morbos putridos maxime proni , dum talis constitutio epidemica regnat ; debiles , cacochymici , mucosis , lentis , humoribus pleni , vix afficiuntur : & ideo athletice valentium periculosus status est. Si plethoricus homo , valido labore corpus exerceat , sudor exit olidissimus ; urina rubra , acris jam subputrida fere. Calor major , qui semper his corporibus , boni sanguinis copia abundantibus , adest , multum auget hanc dispositionem ad putredinem.

3. Bina sunt auxilia præcipua , per quæ fit conversio crudi ingesti in naturam humoris inquilini : miscela nempe pauci crudi cum magna copia humorum coctorum ; & actio vasorum & viscerum in hoc crudum. De priori dictum fuit numero præcedenti , de posteriori nunc agitur. Chylus , sanguini mistus , cum illo per multas horas fluit , antequam in serum mutetur ; sed continua vasorum actio & viscerum tan-

dem chylum mutant in serum & sanguinem: quo fortior ergo hæc actio vasorum & viscerum est, eo citius perficitur hæc mutatio. Hinc robusti homines, duro labore corpus exercentes, panem durum acidum, lac ebutyratum acidum, fumo & sale induratas carnes, vasorum & viscerum robore digerunt & convertunt in bonum sanguinem: cujus semper hæc proprietas est, ut alcalinam putredinem vergat, acelcat nunquam. Si talibus hominibus darentur juscula, teneræ carnes &c. languerent ilico, nisi acidis sumtis domarent nimiam ingestorum proclivitatem in putredinem.

BILIS. Inter liquida corporis sani, excrementitia excipiantur, nullum acius est, nullum magis vergens in putredinem, quam bilis. Hinc circa illa loca, ubi bilis hæret: cadavera omnium citissime corrumpuntur. Hinc in morbis acutis cito in putredinem degenerans bilis tanta sæpe facit mala. Chylo, per pylorum ex ventriculo in duodenum intestinum egresso, mox bilis utraque affunditur; sicque ingestis alimentis per bilem primus quasi humanitatis character imprimitur: acelcentia, vel acida, per bilem incipiunt mutari in oppositam naturam. Præcipuum itaque est chylopoiesis instrumentum. Ob hanc causam frigidi pisces, & dentibus carentes, acerrimam bilem habent: si vero bilis vel copia aucta, vel incipiente putredine peccet, corrumpit omnia, & morbos acutissimos omnia putrefaciens excitat.

4. Motus nullus, & motus nimius liquidorum nostrorum, producant putredinem; sicque binæ causæ penitus oppositæ producant eundem effectum.

Homo per octoginta & plures annos vivit sine ulla putredine humorum; post mortem, cessante omni motu, stagnantibus omnibus liquidis, intra triduum, & aliquando citius, putrescit cadaver. Idem in sanissimo homine, aquis submerso, fit; ubi omnes humores adsunt: nil deest, nisi solus motus: brevi putredo nascitur.

NIMIA AGITATIO. Longe adhuc celerius putredinem inducit. Acutissima febris intra 24. horas sic potest corrumpere omnia, ut urina fœtida, fœces alvinæ cadaverosæ penitus, halitus oris putridissimus, interna omnia jam corrupta testentur.

Inerti otio torpentes toties scorbutus putridissimus, tabefactis visceribus, necat: validissimo motu musculari ardentissima potest excitari febris, omnia putrefaciens.

5. Ubi calor tantus est, ut humidum omne dissipare possit, tunc fit exsiccatio, putrefactionem semper impediens: aliter major calor semper putredinem auget. Carnes animalium hyemali tempore per plurimos dies servari possunt; æstivis caloribus brevi putrido tabo disfluunt: imprimis si cum magno calore simul adsit æris humiditas. Hippocrates inter æstivos morbos recenset plures, in quibus humores in putredinem degenerant: febres nempe continuas, ardentes, oris exulcerationes, genitalium putredines (a). Dum in calidissimis regionibus, silente vento, diu coguntur manere classiarii, putridissimis morbis corripiuntur. Hinc apparet, quam necessarium sit æris refrigerium morbis acutis putridis decumbentibus. Galenus (b), putredinis naturam describens dicit: *Putredo est mutatio totius substantia corporis putrescentis ab corruptelam ab externo calore; non enim à proprio calore corrumpitur quidquam &c. docent animalia sana per multos annos sine putredine viventia, si servetur eorum proprius calor &c.*

(a) Aphor. 21. Sect. 3.

(b) Method. Medendi Lib. XI. cap. 3. Chatter. Tom. X. pag. 254.

§. 85. **I**N primis viis facit sitim, prostratum appetitum, ructus nidorosos, graveolentiam tabidi, corruptique, sordes ori, linguæ, palato, faucibus, amarescentes putridas, nauseam, vomitum putrefactæ biliosæ materiei, horrorem adversus omnia, nisi aquosa; vel acida, cruditatem putridam, diarrhœam biliosam, dolores iliacos inflammatorios, caloris molesti sensum.

Sequuntur jam effectus putredinis natæ in corpore humano: & primo quidem illi, qui observantur nasci, quando putridi quid in primis viis hæret.

SITIM. Quæ est individua comes putridi hic hærentis: conatur enim natura plurimo potu ingesto abluere hoc putridum. Hoc apparet evidenter in hydropicis, qui in initio raro siticulosi sunt; sed ubi mora & stagnatione incipiunt corrumpi aquæ, sitis oritur indomabilis. Hinc inter bona signa numeravit Hippocrates, si hydropici siti careant. Quibus tabefactum hepatis est, immaniter sitiunt, à fomite putrido hic hærente.

PROSTRATUM APPETITUM. Potest & à plurimis aliis causis appetitus tolli; sed ubi simul cum prostrato appetitu sitis adest, fere semper ab hac causa fit.

Si quis, quamvis sanissimus, occurrat putrido animalis cadaveri, illo momento, quo crepat distentum abdomen, in syncopen fere labitur, & satis diu ab omni cibo abhorrebit. Qui ovi, leviter tantum putrefacti, particulam deglutivit, mox omnia fastidit. Quid fiet miseris illis, quibus circa ventriculum putridus talis fomes hæret, per interna corporis putrida hæc miasmata dispergens? Hinc in morbis a putrida bile, hic hærente, insuperabile ciborum fastidium.

RUCTUS NIDOROSOS. Quomodo ructus fiant, dictum fuit, §. 63. dum eructat homo, odor contentorum ventriculo imprimis nares ferit: ubi putridi quid hic hæret, putridus cum ructu exit odor; qui tunc vel ab alimentis ingestis putrescentibus pendet, vel à fomite corrupto in visceribus hærente.

SORDES ORI, LINGUÆ, &c. Medici prudentes nunquam ab ægris discedunt, nisi prius inspexerint oris interna, & linguam, quæ viscerum chylopoieticorum & pulmonis conditionem tam pulchre sæpe demonstrant. Ex ore hominis sani nil nisi limpidissimus ros exhalat: sed in morbis, immeabilibus humoribus obstruentibus extrema hæc oscula exhalantium vasorum, incipit linguæ dorsum imprimis scabrum fieri, siccum; color mutatur in pallidum, flavescentem, fuscum, nigrum tandem; imo aliquando totæ gingivæ & dentes ipsi crusta tali obducuntur: distinctum omnino ab apthis hoc malum, cum quibus sæpe confunditur; sordes vocantur melius: quæ, postquam redit debita perspiratio per aperta vasa, ab impetu vitalis liquidi a tergo urgentis absterguntur, reditque linguæ solita nitiditas. Quando sordes illæ ab inflammatoria immeabilitate nascuntur, plerumque simul magna adest siccitas; si vero à viscoso putrido obstruente, plerumque major humiditas est: nisi binæ hæ causæ simul concurrant, inflammatoria nempe densitas & putredo, ut in morbis acutis sapius fit: sed ut linguæ superficies apparet, sic & se habet interior superficies œsophagi, ventriculi &c.

GRAVEOLENTIAM TABIDI CORRUPTIQUE. Quando in primis viis, & imprimis circa ventriculum, putridus fomes hæret, mirabiles sæpe

oriuntur morbi, totum genus nervosum turbantes, omnes cerebri actiones pervertentes; non adeo, ut videtur, putrido liquore venis reorpto, dein communi humorum circulo ad cerebrum delato, sed potius venenatae quasi auræ afflatione turbantur omnia: dum putrida bilis hic collecta; vel per morbi vim nata, stabulatur, immanes capitis dolores, vertigines, deliria, furores &c. in capite causam & sedem mali esse, fere persuaderent: sed excussa per lene vomitorium hac saburra, uno momento cessant omnia hæc mala: unde Hippocrates in prognostico, tenebrosam vertiginem, & oris ventriculi morsum, tanquam signum vomitus biliosi brevi futuri recensuit: & uti putridi cadaveris horrendus fætor hominem vel sanissimum potest in syncopen usque deducere, uno momento ablati omnibus viribus, sic & in internis latens putridum graveolentia sua & spirituofo quasi afflatu, omnia turbare potest.

NAUSEAM ET VOMITUM &c. Omnium humorum acerrima bilis omnium citissime in putredinem vergit, hinc simul ac quid putridi in primis viis nascitur, mox bilis mutatur. Sed præterea putridum hic hærens omnem tollit appetitum, sola fere aquosa acida ferunt, quæ facile transeunt; hinc ventriculus vix distenditur: sed ventriculo non distento pylorus semper patet: hinc commercium immediatum ventriculi cum intestino duodeno; in quo omnis humor secretus ex ingenti hepate, pancreate, vesica fellea colligitur, quem intestinum jejunum, tot rugis clausum, non adeo facile transmittit: hinc hæc in vacuum ventriculum regurgitant, ubi liber datur aëri accessus: hinc citissima putrefactio, unde nausea & vomitus materię biliosę putrefactę in febribus autumnalibus epidemice grassantibus post magnos calores æstivos toties occurrunt; & nisi illud biliosum corruptum sponte vel arte excutiat, in fine morbi putridissima diarrhœa oborta, prostratis subitissime viribus, sæpe pereunt ægri.

HORROREM ADVERSUS OMNIA NISI AQUOSA VEL ACIDA. Sedula observatio docuit, & in hominibus & in animalibus morbum natum sæpe incitare ad applicationem auxilii, cæterum ignoti; & nasci sæpe insuperabile desiderium assumendi quædam; & contra, horrorem versus alia quædam, quæ offeruntur. Modum, quo hæc fiunt, non assequimur; veritatem facti certa demonstrant experimenta. Dum summis æstibus exsiccatur corpus, sitis vel invitum cogit, ut remedium quærat. Simul ac quid putridi in corpore hæret, mox nascitur omnium facile putrescentium fastidium summum: si acuta febre putrida laboranti carnes offerantur assę, ne quidem aspectum feret æger, vel nidorem carniū: si vero citrea, aurantia mala, fructus horzoes &c. offers, avidissime arripit. Sive jam peritissimus Medicus tali decumbat morbo, sive innocuus infans, hæc fiunt eodem modo: summę prudentię Medicę est in morbis nata hæc desideria observare. Qui ex præconcepta hypothesis in morbis calidissimis omnem negabant potum, omnia acida damnabant, quam infelices fuerunt in morborum curatione! Sibi soli ad omnia sufficiens natura aquam appetit & aquosa omnia, ut abluatur putridum, & per urinam vel sudores eliminetur de corpore; acida, ut corrigatur.

CRUDITATEM PUTRIDAM. Quamvis alimenta vi corporis nostri sic mutantur, ut in quiete & calore, vel & dum valide moventur, incipientis putredinis naturam adipiscantur, ut dictum §. 80. tamen nulla putredo in humoribus sani corporis observatur naturaliter. Hinc omne putridum crudum est: cocti enim humores nostri blandi sunt, nec alcalini, nec acidi: hinc si ingesta alimenta in primis

viis, vel & liquida corporis nostri his locis effusa in putredinem abierint, cruditas hic nascitur putrida; quæ omni momento augetur, ob æris liberum accessum, calorem & humiditatem primarum viarum, & quia tota vis corporis in ingesta agens huc conspirat: hac enim vi alimenta ab omni putredine alienissima convertuntur in naturam liquidorum nostrorum, quæ omnia putrescere possunt; quanto magis eadem hæc vis agens in putrida, vel putredini proxima augebit corruptelam.

DIARRHŒAM BILIOSAM. Dum aliquid putridi hæret in primis viis, bilis facillime putrescens cito corrumpi incipit; corrupta venenato fere stimulo continuas alvi excretiones putridissimas facit: tunc liquamen quasi oleosum putridissimum alvo excernitur. In acutis morbis sæpe accidit, ut jam in initio per vim morbi corrupta bilis perpetuam faciat nausæam: nisi tunc excutiat vomitorio illud corruptum biliosum, vel corrigatur acidis, circa finem morbi diarrhœa putridissima biliosa nascitur, fractis jam a prægresso morbo viribus, adeo periculosa. Vitellum ovi putrefactum ad pauca grana datum, validissimam hypercatharsim posse facere, observavit Bellinus.

DOLORES ILIACOS INFLAMMATORIOS. Omnis acrimonia potest irritare nervos per intestina dispersos, unde spasmodica contractio, & ab hac inflammatio intestinorum oriri potest: maxime quia ab acri bilioso imprimis saponacea vi abraditur mucus, defendens tenerrimas papillas nerveas, per internam tunicam intestinorum dispersas, hinc longe magis sensiles fiunt.

CALORIS MOLESTI SENSUM. Quantum caloris per putrefactionem generetur, docet sænum magnis acorvis collectum per solam putrefactionem in vivas flammæ erumpens. In febribus illis continuis, quas ab effectu putridas vocaverunt, mordax calor diagnosticum signum præcipuum dat: in ardentissimis febribus, dum extrema frigent, ignis urentis vim circa præcordia ægri sentiunt: sed quam subita omnium putrefactio in his febribus adest? Hydropici crura, marmoris instar frigida, dum incipit putrescere stagnans lymphæ, calent, inflammantur. Infans peste mortuus secundo post obitum die adhuc calebat (a).

§. 86. **I**N sanguine producit dissolutionem ejus putridam; acrimoniam alcalinam oleosam volatilem; ineptitudinem ad nutriendum; aptitudinem ad consumendum; minimorum vasculorum destructionem; hinc omnes actiones solidarum & liquidarum partium turbat, depravat, destruit; unde circulatio, secretio, excretio variat; tum febres ardentes, urinæ & omnia secreta putrida, inflammationes, suppurationes, gangrænæ, sphaceli, mors.

DISSOLUTIONEM EIUS PUTRIDAM. Sanguis sani hominis missus de vena post pauca minuta coagulatur in massam homogeneam rubram; de qua postea secedit serum tenuius, remanente parte rubra crassa concreta: sed sanguis talis tepore simili, ac in sano corpore observatur, fœtus aliquandiu incipit putrescere, & simul attenuari; nec amplius concrevit postea. Dum in Ictericis bilis retropremitur in sanguinem, totus sanguis, si diu durat morbus, à bile dissolvitur, & in putredinem disponitur: unde à nimis soluto sanguine hydrops postea icte-

(a) Van der Mye de Morbis Bredanis pag. 8.

rum sequitur. In scorbuto putrido sic solvitur sanguis, ut propriis vasis coërceri renuat, sed ecchymoses, maculas, & validissimas hæmorrhagias faciat. In obsidione Bredana dum pestis grassabatur in urbe, sanguis infectorum apparebat lividus, fœtidus, non concrelscens (a).

ACRIMONIAM ALCALINAM OLEOSAM VOLATILEM. Non videtur in vivente penitus putrescere posse sanguis, (destructis enim minimis in cerebro & cerebello vasis, mors prius fieret,) sed tamen proxime eo disponitur; sic ut, ubi aëri libero exponitur, statim in putridam saniem diffuat. Apparet hoc in gingivis scorbuto putrido affectorum, exit enim erosio vasis sanguinolenta sanies cadaver olens.

INEPTITUDINEM AD NUTRIENDUM. Albumen ovi, ex quo certo scimus pullum nutrir, tenacitatem habet satis notabilem: in sero sanguinis, quod per experimenta demonstratur satis simile esse ovi albumini, similis plastica cohesio inest. In lacte jam incipit tale quid nasci; docet hoc caseus. Hinc videtur ad nutritionem corporis requiri, ut talis cohesio adsit in nostris humoribus: sed putredo nata hanc tenacitatem tollit. Albumen ovi putrescens instar aquæ tenue fit; serum sanguinis putridum ad ignem non coagulatur amplius; & in illis morbis, ubi putridus fomes in corpore hæret, dissolvuntur omnes humores, nutritio deficit, lento marasmo omnia pereunt: docent id phthisici, in quibus à dissolutio nimis sanguine sudores illi nocturni, colliquativus & putridus omnino alvi fluxus, atrophia, mors.

APTITUDINEM AD CONSUMENDUM. Hoc imprimis patet in illa specie tabis, quæ consumptio Anglis dicitur: in quo morbo, sine notabili fere pulmonis labe, sensim consumuntur corpora. Videtur fere morbus ille originem ducere à nimio usu carniū, unde humores in nimiam alcalescentiam promi plastica illa tenacitate carent, unde sudoribus diffluunt, & sensim contabescunt.

MINIMORUM VASCULORUM DESTRUCTIONEM. Urina sales sanguinis nimis acres factos eliminat de corpore: ubi ergo à quacumque causa urinæ secretio vel excretio impeditur, non fit hæc sanguinis depuratio. Hæc acrimonia ipsis vitæ actionibus omni momento augetur: hinc in tenerrimis vasis, cerebri nempe & cerebelli imprimis, læsio apparet; & ideo post ischuriam diuturnam, sopor, delirium, mors. An ideo subtilissimum pestis venenum putrefaciens omnia, destruat minimis vasis, tam subitam mortem infert?

HINC OMNES ACTIONES &c. Ut fiant actiones in sanitate requisitæ, in solidis partibus requiritur debita cohesio, in fluidis proportionalis ad vasa, per quæ fluere debent, crassities. Putrida dissolutione attenuati humores aliena vasa intrant, & blanda indoles in acrem mutatur; hinc necessario in omnibus functionibus corpus à sanitatis legibus recedit. In acutissimis febribus, in quibus tam subita putrefactio fit, statim læsio omnium functionum apparet, ilico degenerant omnes humores. In ipso enim talium morborum initio respiratio anhelosa & difficilis, pulsusque celerrimus & sæpe inæqualis, vitales functiones læsas demonstrant. Debilitas summa, deliria, sopores &c. animalium functionum læsionem indicant: prostratus appetitus, sitis, nausea, vomitus &c. naturales functiones perturbatas probant; saliva, bilis, sudor, urina, mox degenerant: unde, cum nihil fere de sanitate superfit, tam funestus plerumque eventus.

(a) Van der Mye de Morbis Bredanis pag. 14.

FEBRES ARDENTES. Hippocrates (*) monuit post statum austrinum humidum & mollem (*) febres ardentes phreniticas oriri : sed talis aëris constitutio omnia ad putredinem disponit, sic ut carnes mactatorum animalium in tali aëre humido & calido intra paucos dies in tabum putridum diffuant. Ubi exusta arrabilis, fixitate sua pertinaciter adeo hærens, per quamcumque causam fusa, corrupta, sanguini miscetur, ardentissima oritur febris subito destruens omnia.

URINÆ ET OMNIA SECRETA PUTRIDA. Omnia hæc sequuntur indolem sanguinis unde secernuntur : sed urina naturali lege sales & olea sanguinis acriora, & putredini proxima, abluat & expellit de corpore : hinc, sanguine putridis inquinato, urina similem habebit labem ; uti & sudor &c.

INFLAMMATIONES, SUPPURATIONES &c. Omne acre irritans stimulo suo inflammationem in toto corpore, vel in parte quadam, facere posse, docent certissima observata. Hinc & putridum natum in corpore sua acrimonia inflammationem facere potest. Sed & præterea dissoluti per putredinem humores aliena vasa intrant, & sæpe per illorum angustias ultimas transire non possunt : hinc alia ratio inflammationis a putredine nata deducitur. Ophthalmiæ laborantis nuchæ applicuerant lienem recens mactati vituli, reliquerant per 24. horas, totus lien tempore corporis & humiditate resolutus fuerat in olidissimam putrilaginem ; & locus, cui applicatus fuerat, validæ inflammationis omnia signa habebat. Sed inflammatione nata, sequuntur necessario inflammationis exitus varii, suppuratio nempe, gangræna, sphacelus ; ut postea in inflammationis historia dicetur. Hæc non adeo in externis partibus timentur, sed si in minimis tenerrimorum viscerum vasis hæc fiant, summum periculum. Sic in febribus acutissimis observatur, per abscessum versus extrema corporis deponi malignos adeo humores, ut fiat subitissima mors partis, & sphacelus ad ossa usque : ut monuit Hippocrates in Prognosticis, quod partes tales penitus nigræ factæ decident, superstite ægro, si malum leviter ferre videatur, & signum aliquod salubre præterea adsit (b).

§. 87. **E**X his (76. 79. 80. 81. 82. 83. 84. 85. 86.) denuo diagnosis & prognosis, æque ac Curatio morbi liquido conspicitur.

Quomodo diagnosis, prognosis & indicatio curatoria deducantur ex cognita prius Morbi historia, dictum fuit §. 27. pro exemplo generali. Sic in hoc morbo causæ prægressæ §. 84. & effectus morbi nati §. 85. & 86. demonstrant adesse alcalinum spontaneum : ubi vero ex his noscitur illud adesse, pro Prognosi facile concluditur, metuenda esse illa omnia, quæ fidelis observatio docuit sequi hunc morbum natum ; & quæ omnia recensentur §. 85. & 86. deinde ex his bene intellectis curationis requiisita facile deducuntur.

(*) Epid. 3. Charter. Tom. IX. pag. 259. 260.

significare *ἀντὶ καὶ θερμὸν* tranquillum, sine ventis, & calidum.

(*) *μάλιστα* Galenus in Commentariis dicit

(b) Charter. Tom. VII. p. 624

§. 88. **Q**UÆ perficitur 1. alimentis, potibusque, cito acescentibus, vel jam acidis, quo farinosa in aqua cocta, vel ad initium corruptionis digesta, lac ejusque producta herbacea, fructus horæi, horum acidi crudi, vel fermentati vinosi, acetosive, succi. 2. Acidis medicamentis ex vegetabilibus crudis, vel fermentatis, aut salibus & sulphure vi ignis in acida conversis. 3. Salinis Alkali absorbentibus, ut est sal gemmæ, marinus, & nitrosus. 4. Aquosis diluentibus. 5. Lenibus obtundentibus, qualia farinosa vegetabilia emulsa, vel decocta, sunt; & laudatissimæ boli, acidulo balsamico recto, & demulcentissimo viscido; constantes. 6. Saponaceis abstergentibus acidis suboleosis, oxymelle, sapis acetosis. 7. Quiete, somno, balneo vaporis, fomentisve.

1. Facile apparet totam curam consistere in binis his, ut nempe putridum alcalinum vel expellatur de corpore, vel sic mutetur, ut non noceat amplius: deinde, ut talia pro cibo & potu ingerantur, quæ ex sua indole putrescere nunquam possunt, sed in oppositam acrimoniam, acidam nempe, vergunt: talia jam habentur omnia dicta FARINOSA: cerealia nempe omnia & matura semina, quæ trita in farinam abeunt. Hæc enim aqua diluta in calore modico acescunt, quædam citius, quædam serius. Avenæ & secalis decocta citissime acescunt, dein hordeum &c. secale autem imprimis satis cito in acidum satis acre degenerat, si in aqua coquitur, vel maceratur. Artifices, qui ferri lamellas stanno obducunt, noverunt requiri ad hanc rem, ut ferri tota superficies tersissima sit, tunc enim stannum facile adhæret: ideo ferri lamellas macerant in aqua acida reddita per secalis grana addita. (a) Hordei prisana, cremore, succo, in omnibus acutis morbis utebatur Hippocrates, uti passim in ejus operibus habetur.

LAC EIUSQUE PRODUCTA HERBACEA. Lac ipsum purum non satis tuto in putridis morbis datur: acescit quidem omne lac herbaceum, sed habet cremorem pinguem, qui rancescere potest; habet caseum, qui plus jam de animali natura participans, quam reliquæ lactis partes, putrescere potest: hinc in acutissimis morbis non nisi plurima aqua dilutum lac conceditur, vel lactis serum; imprimis illud, quod à lacte ebutyrato jam acido per manicam Hippocratis separatur: hoc tenue serum acidulo sapore adeo placens saluberrimum auxilium dat in omni morbo putrido.

FRUCTUS HORÆI. Ægri similibus morbis decumbentes spontaneo appetitu maxime versus hos gratissimos fructus feruntur. Ante multos annos omnes fere oblectabantur Medici, ne sumerent: dum Celeberrimus horum Aphorismorum Auctor Nobili Viro, morbo acuto decumbenti, cerasa, mora, ribesia dabat, publica auctoritate puniendum scelus putabatur: interim, qui hanc methodum adeo calumniabantur, succos horum fructuum cum saccharo in syrupum coctos præscribebant quotidie. Maturorum fructuum succus nulla præparatione indiget, sitim extinguit, calorem temperat, urinæ & alvi vias laxat, summum solamen

(a) Acad. des Sciences l'an 1725. Mem. 152.

languenti ventriculo à putrida bile præbet. Calidissimis in regionibus solis fere his fructibus vivunt sani: æstivis caloribus incensa bilis saponaceis & blandis fructuum horarum succis felicissime demulcetur. Galenus, qui ubique fere fugacium fructuum usum damnabat, tanquam pravi penitus succi forent, *illis solis prodesse dixit, qui æstu vehementiori & longiore itinere sese confecerint: tunc enim juvant corporis squalorem humectantia, & si frigida sumantur moderate refrigerantia* (a). Sic invitus pulchros fructuum, quos damnaverat, usus recenset. Succus illi jam sæpe sunt acidi naturaliter, ut in ribeisis, cerasis quibusdam &c. vel cito satis acescunt, facile fermentabiles; tuncque in vini vel aceti indolem mutantur. Vinum autem ipsum in his morbis prodest, imprimis acidulum, & in morbis ipsis acutissimis; sed multa tunc aqua dilutum. Aprorum carnes vino Rhenano conditæ ab omni putredine servantur in Germania.

2. EX VEGETABILIBUS. Plurima habentur Vegetabilia, in quibus acidum naturaliter invenitur, ut omnes acetosæ species, acetosellæ, tamarindorum pulpa &c. quæ ubique in officinis obvia prostant; unde efficacissima & gratissima simul parari possunt remedia. Huc imprimis refertur fermentatione paratum acidum, tartarus nempe, & acetum omnibus fere palmam præripiens: unde oxycratum, oxymel, poscam, adeo laudaverunt veteres Medici. Acetum quidem ex omnibus liquidis fermentatis parari potest, melius tamen nunquam fit, quam ex vino: omnes enim vini partes constituentes in aceto videntur adesse, sed alio modo dispositæ. Acetum inter præcipua prophylactica ad pestem ipsam ab omnibus recensetur, solo olfactu putridis morbis decumbentes adeo reiciens.

AUT SALIBUS ET SULPHURE &c. Omnia fere acida vegetabilia, & imprimis acetum, talem vim habent, ut simul sanguinem plus dissolvant, ipsa putredo nimiam dissolutionem omnium humorum facit; hinc ubi putridum adest una cum nimia dissolutione humorum jam præsentem, vel si brevi futura metuitur, tunc acidi spiritus vi ignis ex sale marino, nitro, vitriolo, expressi summum usum habent; efficacissime enim omni resistunt putredini, dum simul non dissolvunt humores nostros, sed coagulant potius. Huic scopo pulchre inservit spiritus sulphuris per campanam dictus, qui purissimum acidum fossile nihil metallici in se habens præbet.

Quantam autem habeant efficaciam hæc acida fossilia, docuit Sydenhamus, qui in variolis pessimis confluentibus spiritum vitrioli potui ordinario mistum pulcherrimo cum successu exhibuit, dum incassum alia tentaverat remedia (b): Sed in his variolis putridissimo tabo omnia diffluunt: hinc apparet, quanta vi putredini resistant hæc acida fossilia.

3. SALINIS ALCALI &c. Sales illi animalium carnibus aspersi omnem putredinem arcent, ut docent quotiadiana experimenta. Optimi hinc semper usus, nisi validus simul motus humorum adsit; tunc enim metus est, ne sanguis magna copia horum salium gravatus, acior redditus, & velocius motus, destruat tenerima vasa. Nitrum tamen inter hos sales levissimum, facilius superabile viribus corporis nostri, tunc præfertur reliquis. Externo usu sales illi soluti in aqua, applicati partibus gangræna corruptis, omnem arcent putredinem.

4. Sales sanguinis nimis acres facti, & olea nimis attenuata, & jam subputrida, naturali corporis lege per urinam eliminantur; aliquando & per sudores: maxime

(a) De Aliment. Facult. Lib. II. cap. 2. | (b) Sydenham. pag. 299.
Charter. Tom. VI. pag. 336.

ergo convenit aquosis diluentibus magna copia ingestis hæc abluere : copia enim urinæ inde augetur , & materiæ per sudorem eliminandæ suppeditatur vehiculum : sed & in omnibus morbis putridis , quamdiu mens constat , sitis ingens aquosa petit , natura sic monstrante viam.

§. FARINOSA EMULSA VEL DECOCTA. Hæc ratione aquæ diluunt ; molli vero glutine suboleoso inviscant omne acre , & ineris reddunt : hinc tanti usus. Omnia illa farinosa semina , contusa , pressa magnam copiam olei mollissimi dant : sed hoc oleum , cito rancescens , noceret sæpius : dum autem cum aqua teruntur , dant liquidum lacteum mollissimum , emulsum vocant in officinis , in quo idem hoc oleum est , sed sic muratum , ut non rancefeat , sed acefcat citissime. Olei virtus , qua inviscat & obtundit omnem acrimoniam , in emulsis manet , & futuræ ranciditatis metus abest.

LAUDATISSIMÆ BOLI. Galeni tempore magna jam laude efferebantur terræ illæ medicatæ dictæ ; imprimis Terra Lemnia , quæ in Lemno insula effodiebatur.

Dioscorides (*a*) terræ huic caprinum sanguinem misceri credidit , & in pastillos dein formari , quos capræ signarent imagine. Galenus (*b*) bis laboriosum iter in Lemnum insulam suscepit , ut indagaret hujus terræ indolem , & invenit , nunquam ei misceri hircinum vel caprinum sanguinem , pingue vero lutum , & omnibus crassioribus elotione inde separatis ad ceræ consistentiam siccatum servari , & in minutas particulas diviso luto sacrum Dianæ sigillum imprimi deinde sicque postea vendi.

Variae tales terræ hodie habentur in officinis ; omnium forte optima illa , quæ Bolus Armena hodie dicitur. Ad attractum pinguis apparet & saponacea , coloris pallide rubri , levem nec ingratum odorem habens , facile in mollissimum pollinem teritur ; in ore deliquescit fere instar butyri , & saliva integre diluitur ; in sapore invenitur levissimum aroma , & simul aliquid exsiccantis adest. In his terris latet acidum , miro modo obvolutum , ut docent Chemicæ Observationes. Acidum enim illud vagum , fossile dictum , in terræ visceribus hærens , varia constituit concreta , prout diversis unitur corporibus : sic enim vitriola , alumen , sulphur , idem fere omnidote acidum exhibent. Quia autem omnium facillime , & maxima quidem copia , ex vitriolo educi potest , hinc acidum vitriolicum dicitur. Hoc acidum sali marino , gemmæ , nitro , mistum expellit acidus horum salium spiritus , unitur parti residuæ post expulsos spiritus , & novam salis speciem constituit : sed iidem illi sales , cum magna copia boli armenæ misti , igne valido dant similes spiritus , nec hoc fit , quia bolus admista fluorem horum salium impedit , creta enim v. g. admista , vel arena non succedit hoc experimentum : inde concluderunt , latere in pinguibus his terris acidum vitriolicum , quod igne actuosum redditum excutit acidus horum salium spiritus : nec obstat , quod blandus sapor nullam acrimoniam indicet , sulphur enim insipidum magnam copiam illius acidi recondit.

Hinc pulcherrimus harum terrarum medicatarum usus patet ; latente acido omni putredini resistunt , & innocua lenitate demulcent omnia : unde in dysenteris putridis tantum usum habent , modo satis magna dosi exhibeantur : uncia una emulgendo quasi in libra aquæ diluta , dein cochleatim sumta , pulcherrimos effectus præstat ; ubi ad pauca grana dantur , nihil efficiunt.

(*a*) Lib. V. cap. 113.

(*b*) De Simpl. Med. Facultat. Lib. IX. cap. 1. | *a*°. 1. Charter. Tom. XIII. pag. 247.

6. In morbis acutis majore motu & calore pinguedo fusa sanguini miscetur, sicque plethoram quasi oleosam facit: aqua, & aquosa omnia potata, non possunt facile eluere de sanguine hoc oleosum, omni momento acrius jam factum; hinc adduntur talia quæ saponacea vi omne pingue reddunt aquæ miscibile. Veteres mel cum aceto coctum sumebant: hodie & melle & saccharo utimur, & imprimis inspissatis illis sapis acidulis ex succo sambuci, ribesiorum, herberisæ &c. quæ saponacea vi omne concretum resolvunt, & aciditate sua omni putredini resistunt efficacissime.

7. QUIETE. Motus muscularis circulationem auget & attritum: sed hæc aucta disponunt omnes humores ad putredinem. Dum validissimo cursu quis corpus fatigavit, acris, rubra, fetida redditur urina: idem in morbis acutis observatur. Ideo Veteres Medici talibus ægrotis summam imperabant quietem, omnem strepitum, omnem lucem arcebant sollicitissime, ut placidus subreperet sopitis omnibus sensibus somnus.

BALNEO VAPORIS. Sic laxatis vasis insinuabantur aquosa diluentia, minuebatur attritus, omnes meatus cutanei aperiebantur, ut facilis fieret exhalatio illorum, quæ jam nimis acria facta nocerent, si manerent in corpore.

FOMENTIS. Tota cutis bibula resorbet sic applicata remedia, imprimis dum spongiæ madidæ applicantur ad parotides, axillas, inguina, &c. illis enim in locis maxime bibula cutis est, & venæ majores prope decurrentes resorptos humores cito sanguini miscent.

§. 89. **U** NDE patet, ubi, & cur, acidus ructus nidorosum sequens bonus? cur, & quibus convalescentibus salis ammoniaci sapor molestus? cur sudor acidum spirans acutis salutaris? quæ acrimonia acida, alcalina, biliosa, oleosa sit? Qui morbi propria significatione putridi dici queant? Cur illi fortissimis, plethoricis, præcipue? an unquam in homine vivente ulli humores jam vere alcalini reperti sint? rarissime: expertus loquor. Urina in vesica, diu retenta, aut in calculo rariore absorpta, forte, aliquando, eo pervenire queat. Aliter mors ante fit, tabefactis per acria, necdum alcalina, pulposis vitalium extremis.

CUR ACIDUS RUCTUS &c. Non semper acidus ructus bonus est; nam in infantibus & debilibus hominibus, acido laborantibus, sæpe molestissimi illi acidi ructus sunt, sævam cardialgiam inducentes; sed ubi prius à putridis, circa ventriculum & vicinas partes hærentibus, ructus rancidi nidorosi fiunt, tunc acidus ructus sequens bonus est, quia denotat, putredinem superatam esse, & oppositum omni putredini prævalere in primis viis acidum: *In diuturnis Lienteriis ructus acidus superveniens, qui prius non erat, signum bonum.* Sic Hippocrates in Aphorismis (a) monuit. Ratio facile patet: quia in lenteria assumpta omnia statim demittuntur, nec tamdiu moram patiuntur, ut acida possint fieri; ideo ructus acidi designant;

(a) Sect. VI. Aphor. 1. Charter. Tom. IX. pag. 245.

intestina & ventriculum eo usque roborata esse, ut ingesta possint retineri diutius, donec acefiant.

CUR ET QUIBUS CONVALESCENTIBUS &c. Hoc omnes fere experiuntur, qui à morbis acutissimis resurgunt, quod nempe omnia, quæ assumunt, apparent falsissima: jus carniū parum meracius falsissimæ muricæ saporem habere videtur. Idem & in illis, qui à peste convalescebant, observatum dicitur. Fit autem ille sapor, quia per ingesta acefientia vel acida alcalinum putridum prædominans correctum est, & mutatum in speciem quandam salis compositi blandi. Multum etiam huc facere videtur, quod lingua, in morbis acutis semper sordida & scabra, deciduis illis crustis nitidissima fiat, & simul tenerrimi sensus.

CUR SUDOR ACIDUM SPIRANS &c. In morbis languidis chronicis sudor acidum spirans malum signum dat, effætas penitus corporis vires demonstrans; in acutis vero designat, subactam esse illam diathesim, qua humores in alcalinam putridam vergebant naturam.

QUÆ ACRIMONIA ACIDA. Quæ ex assumtis acefientibus, non bene subactis per vires vasorum & viscerum, nascitur: omnes enim humores vere animales dicendi sponte sua in putredinem vergunt, nunquam in acidum: Acida ergo acrimonia solis ingestis debetur.

A L C A L I N A. Quæ & ab ingestis in putredinem pronis oritur, & ab humoribus nostris stagnantibus: quamdiu enim per vasa moventur humores nostri, vix possibile videtur ut putrescant penitus, & alcalinam naturam induant: tenerrima enim vasa cerebri & cerebelli tam acres humores ferre non possent sine destructione. Omnis acrimonia alcalina imprimis in excrementis hæret, si adsit: in stercore enim sæpe vera putredo adest: urina in morbis putridissimis proxime illuc disponitur.

B I L I O S A. Inter humores nostros, exceptis excrementitiis, nullus est, qui plus vergit in putredinem, quam bilis; unde citissime in morbis acutis corrumpitur; hinc biliola acrimonia acerrima, maxime noxia. Cum enim in morbis acutis aucta sit circulatio, major copia bilis secernitur, quæ blando chylo non obtunditur, ut in sanis fit; sed acris facta, attenuata, sanguini mista, turbat omnia.

O L E O S A. Omnium pessima olei cuiusvis, blandissimi etiam, corruptela. Pressum ex amygdalis oleum suavissimum intra paucos dies æstivo tempore sic corrumpitur, ut ex miti acerrimum fiat, & deglutitum fauces exurat. Medulla ossium adeo blanda, dum corrumpitur, fætores intolerabili, & acrimonia pessima, ossa densissima in cariolum pulvisculum dilabi facit. Tenacitas, qua adhæret corruptum oleum, partibus quas tangit, auget malignitatem.

QUI MORBI &c. Omnes illi, qui aucto motu & calore subitissime faciunt sic degenerare omnes humores, ut in putredinem quam maxime vergant. Tales sunt imprimis omnes febres acutæ continuæ, & potissimum illæ, quas ab hoc effectu putridas dixerunt Veteres Medici: in quibus, sæpe in ipso morbi initio, linguæ sordes, urina acris, rubra fætida, fæces alvinæ olidissimæ, sudor graveolens, certas putredinis notas exhibent.

CUR ILLI FORTISSIMIS &c. In his enim boni sanguinis abundantia, calor magnus, robusta vasa & viscera, efficiunt, ut omnia ingesta citissime in animale naturam degenerent, id est, in putredinem sponte inclinent: unde & observatum sæpius fuit, febres putridas epidemice grassantes; imo & ipsam pestim, for-

rissimos quosque invasisse: debiles, senes, chronicis morbis laborantes, mansisse immunes.

AN UNQUAM IN HOMINE VIVENTE &c. Effusos humores extra vasa sua, collectos in cavis naturalibus vel morboris, posse putrescere, in homine vivente, imprimis si liber aëri accessus detur, nullum dubium est; sed in ipso sanguine & humoribus inde secretis per sua vasa motis, veram putredinem obtinere posse vitæ tempore, rarissime si unquam docuerunt observata. Imo in ipsa urina quæ acriores de sanguine sales abluit, vel in morbis putridissimis, an unquam observatum fuit verum alcali? unicum vidi casum, qui fere faceret, ut crederem aliquando, quamvis rarissime, hoc fieri posse. Decumbebat syncho pntrida adulta virgo: vocabar decima die morbi; inveni pulsum parvum, celerem, inæqualem; tremulos omnium musculorum motus, respirationem sublimem, difficilem; mens constabat tamen; urina foetorem habebat pessimum: emissæ fuerat ante trihorium; mecum abstuli urinam ilico, affudi nitri spiritum, effervescencia fiebat validissima: post octo horas periit agra. Hæc ergo urina vere alcalina erat, sed per tres horas in libero aëre steterat; forte & diu in vesica hæserat, antequam excerneretur. Sanguis fœminæ, febre maligna quasi Erysipelatosa laborantis, per phlebotomiam extractus adeo foetebat, ut ex ejus tetra odore tam Chirurgus, quam adstantes, in animi plane deliquium inciderent: hoc se vidisse asserit Morton (*).

URINA IN VESICA DIU RETENTA &c. Senex in hac urbe rei frumentariæ mercator ischuria laborabat: Chirurgus, in simili casu huic ægro levamen per catheterem immissum afferre solitus, aberat: noluit alteri curam committere æger: sic mansit usque in diem sequentem, donec rediret in urbem Chirurgus, qui, cathetere immisso, eduxit urinam, tam putridam, ut argenteum catheterem Iridis coloribus tingeret, & Chirurgum ipsum, qui incautius hauserat putridissimæ urinæ halitum, levi peripneumonia afficeret per aliquot dies. In fungoso calculo in vesica vel renibus hærente resorptam urinam, mora & calore putridissimam fieri posse, certissimæ docent Observationes.

ALITER MORS ANTE FIT &c. Tam tenera enim sunt hæc vasa, ut omnem sensum, omnem fere imaginationem fugiant: hinc ilico destruerentur, si acria fluida alluerent hæc vascula. Qui urinæ suppressione pereunt, ante mortem cerebri functiones læsas habent omnes; tandem lethali sopore placide moriuntur, aliquando & convulsi ante mortem. Videtur tunc acre retentum, in sanitate per urinam excerni solitum, destruere tenerrima hæc vascula.

§. 90. **H**INC tandem scitur, quid mali faciat nimius vel minor liquorum circulantium motus, & quantum ejus effectus variet pro varietate loci, ubi hærent, & humorum in quos agit: quæ à stagnante, vel ab extravasato, nocumenta? imo neque obscura hinc ratio ortus viscosi glutinis, quo lentescunt humores nostri; dum spissâ decocta ex animalibus diuturna elixatione parata, nimia ingeruntur copia; aut etiam, dum tegumenta animalium, horumque lentæ, tenacesque, partes extremæ, avidius assumuntur, aut diutius:

(*) Appar. Curat. Morbor. Universal. pag. 111.

etenim alia hinc pituitosi indoles, & distincta ab illa, quæ jam exposita in fine (75).

QUID MALI FACIAT NIMIUS VEL MINOR &c. Ambo faciunt putredinem nasci: sic à validissima inflammatione gangræna, putrefaciens omnia, oritur. Simile malum à defectu circulationis fit, sed lentiori passu incedit: prius malum celerissimi destruit omnia.

QUANTUM EIUS EFFECTUS VARIET, &c. Circulatio aucta eo plus agit in corporis partes, quo minus distant à corde: hinc in febribus ardentibus intolerabilis ardor circa præcordia: & maximum ab aucto motu humorum per vasa periculum in illis locis, ubi vasa omnium tenerrima sunt; in cerebro nempe & cerebello. Sed & ingens discrimen est ratione humorum, in quos agit nimia vel minor circulatio: Bilis per febres citissime corrumpitur; urina statim fit acris & rubicundior, quia per hanc sales in putredinem vergentes naturaliter abluuntur, reliqui humores corporis non tam cito mutantur.

QUENAM A STAGNANTE ET EXTRAVASATO NOCUMENTA. Quamdiu vitalis motus humorum per vasa pergit, omnia manent integra, & ad summum senium homo sine ulla putredine pervenit. Si sanissimus homo sub aquis suffocatur, omnia sunt ut ante; abest solus motus: intra paucos dies putrescit totus: hinc stagnatio & extravasatio humorum ad putredinem disponunt; sed ubi nullus datur aëri accessus ad humores stagnantes vel extravasatos, lentius hoc fit. Patet in contusionibus, ubi sub cute integra fractis vasis effusus sanguis stagnat, nec corrumpitur facile, quia nullus datur aëri accessus, & vasa bibula venosa tenuiorem partem continuo resorbent.

IMO NEQUE OBSCURA HINC RATIO &c. Meracissima carniū juscula penitus glutinosa fiunt, & debilem ventriculum gravant, non resciant vires; dilutiora autem pulchre nutriunt. Quia autem quod in carniū jusculis nutrit, est illud quod coquendo solvitur in aqua de animalium partibus; hinc concluderunt multi, eo magis nutrire hæc juscula, quo spissiora forent; sed tandem fortissimi glutinis instar indomabilem tenacitatem acquirunt, sic ut corporis viribus superari minime possint. Longe pejor adhuc tenacitas oritur, dum partes extremæ animalium tendinosæ & mucilaginosæ sic decoquantur; unde gluten validissimum in Mechanicis paratur. Dum pthificis decocta pedum vitulinorum exhibentur, hac spe ut nutrant plus miseros; tenaci nimis chylo gravatur debilis pulmo, & maximæ fiunt anxietates.

ET ENIM ALIA HINC PITUITOSI INDOLES, &c. Glutinofum spontaneum §. 69. & sequentibus descriptum debebat ortum suum vegetabilibus, imprimis lentis farinosis: hoc vel lentorem suum retinebat, & faciebat tunc pessimas obstructions, vel dilutum ingestis, vel affluentibus liquidis poterat fermentari & acescere. Sed illud glutinosum, quod ex animalium partibus diu in aqua decoctis nascitur, primo tenacitate nocet, & postea corruptum terribilissimam putredine inficit. Gluten vulgare ex animalium partibus confectum, tenacissimum, si diluatur aqua, putrescit citissime, & horrendum fœtorem spargit.

§. 91. **P**ERTRACTATIS morbis Solidi & Fluidi simplicissimis seorsum, agendum sequitur de iis, qui in Solido & Fluido conjunctim occurrunt simplices quam maxime.

Firma nunc posita sunt fundamenta, quibus, simplicissimis quamvis, compositorum, & sæpe intricatissimorum morborum, cognitio & cura innititur: post simplicissimos morbos solidarum partium, & spontaneas degeneraciones humorum, ordo §. 16. dicitur, ut sensim ad magis compositos morbos procedatur. Cum jam, quamdiu vita manet, liquidorum adsit per vasa solida motus, proxime indagandum sequitur, quid fiat in corpore, si motus humorum per vasa fiat nimius, vel minor, quam requiritur ad sanitatem.

DE MORBIS ORIUNDIS AB EXCESSU MOTUS CIRCULATORII SOLO.

§. 92. **O**MNIA fluida, quæ in ullo vase, ab Arteria magna orto, continentur, ex solo sanguine sunt secreta, qui paulo ante in corde dextro & sinistro mistus erat, & referebat speciem unius liquidi,

Primus hic morbus est, in quo & fluida & solida simul considerantur; & in hoc capitulo agitur de sola velocitate aucta motus fluidorum per vasa: merito ergo prius agendum de indole & attributis illius liquidi, quod per vasa fluit.

Sanguis vocatur universale illud liquidum, quod in cor dextrum influit, & quod ex corde sinistro expellitur. Cor omnem sanguinem per venas recipit ab universo corpore; receptum vero reddit per arterias singulis partibus. Ex hoc sanguine omnes partes corporis, omnia viscera faciunt suos humores, varios pro varia singulorum structura. Ergo in sanguine sunt omnia liquida corporis humani, non quoad singulare ingenium, sed quoad materiam, ex qua in singulis partibus per propriam earumdem fabricam fit illud, quod in infinita sua idea expresserat Adorandus corporis humani Creator. Quando nunc hoc factum est, hæc materies in singulis partibus & visceribus mutata, demta quadam parte, quæ extra corpus excernitur, redit ad cor. Sanguis vocatur, dum emittitur ex corde; dum redit ad cor, sanguis dicitur. Hæc sunt tamdiu, quamdiu manet vita.

Hinc fas est dicere, quod ex sanguine humores omnes, quod in sanguine humores omnes sint.

Sanguis constans ex tot diversis, sed intima miscela simul unitis, apparet homogeneum liquidum rubri coloris: sibi tamen relictus sanguis secedit in distinctas partes.

§. 93. **H**ABET tamen & ibi, & tunc, globos majores, determinatæ molis, figuræ mutabilis, coloris rubri; sphæras flavas, rubris sextuplo minores, serosas; tum laticem pellucidum in igne concrecentem; & aquam pellucidam, leviolem, tenuiorem, partibus minoribus, sed ob pelluciditatem non cernendis, constantem. Priorum congeries sanguis ruber, posterior Serum appellatur. Microscopia utrumque demonstrant.

Leeuwenhoeckianis observatis hæc omnia innituntur: sanguis enim humanus, per microscopia visus, partibus sphæricis plurimis simul congestis constat, innatantibus liquido tenuiori pellucido, hinc microscopii aciem eludente. Dum in animalium viventium partibus pellucidis per microscopia conspicitur sanguinis per vasa motus, apparet evidentissime, moleculas sanguinis per vasorum angustias pressas, aliis occurrentes, mutari omni momento in sua figura, hinc flexiles esse. Ex ejusdem Leeuwenhoeckii sententia maximæ sanguinis moleculæ sunt globi rubri, sex minoribus ad se mutuo appressis constantes; atque hi globuli minores sua adunatione globum rubrum constituentes, flavescent, & forent globi serosi. Si eadem jam analogia obtineret ad ultima usque, tunc globi serosi ex sex minoribus iterum constarent, hæcque divisio pergeret ad subtilissima à sanguine secreta liquida usque: sed experimenta hic deficiunt: nam quæ in sanguine habentur subtiliora, quam est pars rubra & serosa, pellucunt omnino. Cum vero inter maximum vas in corpore, aortam nempe, & subtilissimu nervum numerosissimæ vasorum decrecentium series intercurrent; videntur per singulas vasorum series proportionales fluere humores. Maximarum sanguinis molecularum congeries vocatur sanguis ruber; reliqua omnia tenuiora liquida simul sumta serum sanguinis sic dictum constituunt: in binas enim tales partes distinctissimas sanguis humanus, vasis emissus, secedit sponte.

§. 94. **R**UBRUM concretum, & à sero seorsum collectum, sola quiete, & laxitate suarum partium cito resolvitur in serum ita, ut in id omnis fere cruor abeat.

Dum sanissimo homini vena pertunditur, pleno rivo exiens sanguis post pauca minuta concrefcit in unam massam rubram; sensim incipit illud rubrum contrahi; exprimitur pars tenuior, omni momento aucta, cui rubra concreta massa plerumque innatat: si effundatur serum sanguinis, post aliquot horas rubra illa massa minor apparet, & feri nova copia adest; sic tandem fere totum illud rubrum convertitur in serum: & hinc apparet, rubram partem sanguinis sensim quasi deliquesce & in serum abire. Ex sententia Leeuwenhoeckii hoc fieret, quia globuli rubri ex sex minoribus constantes, pressione vasorum jam liberati, sensim dissiliunt in globulos serosos, ex quorum adunatione facti fuerant. Hinc apparet, difficillime posse determinari proportionem inter partem rubram & serosam sanguinis, cum pars rubra sensim in serum deliquescat.

§. 95. **S**ERUM diu retentum in aëre moderate calido & humido sola quiete & laxitate partium resolvitur in tenuius, pellucidius, levius liquidum, quod putrescit sensim, totumque fere avolat volatile. Quæ crescunt pro ratione temporis.

Uti pars rubra sanguinis sensim defluebat in serum tenuius, sic & serum sibi relictum sensim attenuatur, incipit putrescere, avolat, paucula tantum fœce residua. Dum autem sic in aëre moderate calido & humido hæret serum sanguinis, quo tenuius fit, eo acrius simul; nec tunc amplius à calore ebullientis aquæ, vel ab alcohole, coagulatur. In albumine ovi omnia hæc eodem modo obtinent: vix enim inveniuntur duo liquida magis similia in omnibus fere phænomenis, quam albumen ovi & serum sanguinis.

§. 96. **S**ANGUIS omnis (92.) recens, levi calore, parum superante salubrem, & cum paucò exhalantis dispendio, coit in massam solidam, scissilem, tenacem, non solubilem per aquam, salem, oleum, spiritus. Atque idem fit calore per humida conciliato, singulari concretionis, & simili prioris, genere.

In sanguine hominis etiam sanissimi maxima proclivitas est in concretionem. Dum rupta nasi arteriola exilit sanguis, statim concrescit in solidam placentulam. Hæc autem vis concrescendi aucto calore increscit plurimum; imo simul ac calor, superans forte decem vel duodecim gradibus thermometri Fahrenheitiani calorem maximum sani hominis, conciliatur sanguini, concrescit totus. Ideo in morbis acutis ab augmento caloris tantum periculum. Sed sanguis semel sic concretus difficillime resolvitur. Plurima sunt, quæ sanguini mista præcavere possunt, ne tam facile concrescat; sed semel concretus si fuerit, vix resolvitur amplius; nec sales, nec spiritus, nec olea, imo nec saponēs ipsi, tunc multum profunt. Sanguis calore sic inspissatus postea sensim iterum deliquescit in aëre aperto; sed tunc putrescit simul: neque videtur hæc concretio fieri ideo, quia per calorem dissantur subtilissima, nam in aquam fervidam dimissus de vena exsiliens sanguis coagulatur ilico in massam scissilem. Eadem jam proprietas in ovi albumine iterum obtinet, quod in aqua ebulliente, integra quamvis ovi testa reclusum, induratur ilico.

§. 97. **O**RIGO rubedinis (93. 94.), seri concrecentis, lymphæ concrecentis, (95. 96.) debetur vasorum actioni, circulationis, efficacix; ut chyli, lactis, cruoris, & sanguinis, mutata indoles docet, atque microscopia confirmant.

Sed maxima fuit quæstio, unde nam orirentur mirabiles illæ hætenus recensitæ sanguinis proprietates, rubedo illa, seri flavedo, concretio adeo facilis &c. Philosophi quam mira dixerunt! quam vana protulerunt nimis sæpe in similibus imprudentes Chémici! nullus interim potuit ulla arte vel ex optimis cibus facere nequĩ-

dem unicam sanguinis guttulam : solum corpus humanum suum sibi sanguinem facit ex materia , quæ non est sanguis. Nec refert , an corpus humanum parvulum sit , & in initio fere suæ existentiae , an vero adultum jam & firmum , adeo inseparabilis à posita natura corporis humani est præsentia sanguinis , ut in debilissimo infante adsit æque ac in robustissimo viro. Imo in Embryone humano , simul ac oculis lustrari potest , jam adest sanguis ruber , & quidem illo tempore , quando nec in placenta , nec in ovi humani membranis , nec in liquido contento his membranis , vel vestigium sanguinis rubri apparet. Hinc videmus , quod opifex sanguinis sit corpus humanum in ipso illo tenello mucoso principio.

Quandonam autem in primo hominis rudimento incipiat nasci sanguis ruber , per experimenta non facile potest determinari , sed in ovo incubato rem demonstravit Immortalis Malpighius. Ovum Gallinæ fecundum , nulla incubatione fotum , in sua testa , membranis , albumine , chalazis , vitello , sacculo colliquamenti , nihil omnino exhibet rubri sanguinis , licet optimis lustretur microscopiis.

In ovo incubato apparebat omni hora mutatio fere , & ad ambitum cicatriculæ circa vitellum apparebant per microscopia vasa quædam visibilia jam ; post paucas horas vasa incipiebant distingui à liquore contento : circa horam trigesimam hæc vasa habebant colorem subviridescentem ; quadragesima hora jam aderat color ferrugineus , (Xerampelinum vocant , quia autumnali tempore folia vitis emarcida hunc colorem habent) simul apparebat , quod omnium horum vasorum congeries colligeretur in unum vas , quod ad cicatriculam tendens finiebatur in sinu quodam nunc primo apparente ; qui sinus erat auricula dextra cordis , ut postea apparuit ; & in hoc sinu à carina pendulo apparebat pulsus manifestus ; & paulo post punctulum rubrum in illo pulsante corpusculo. Idem illud rubrum dein in corde dextro , corde sinistro , & paulo post in canali secundum longitudinem , carinæ decurrente , qui erat aorta , apparuit. Hinc novimus ex materia non rubra sanguinem rubrum fieri posse , & quidem sine admistione sanguinis rubri præexistentis. Illud rubrum ducit originem in illo pulsante punctulo , ibi enim primo apparet , ubi pulsatio est , & sanguis ruber jam adest , antequam in rudimentis hepatis pulli appareret ullus color sanguineus : unde Veterum Medicorum cadit opinio , hepatis sanguificationis munus adscribentium.

Forte & aer , sine quo nulla planta , nullum animal vivit , huc facit. Post decimam enim octavam horam incubatus observavit Malpighius (1) cicatriculam ascendere versus obtusum ovi angulum , ubi aer hæret. In adultis chylus in sanguinem mutandus statim per pulmonem fluit , ubi latissima superficie in tenerrimis vasis nudo fere aëri exponitur. Ex sententia Veterum Alchemistarum occultum vitæ pabulum in aëre latebat.

Sed & in homine adulto fatis simili modo ex alimentis ingestis sanguis nascitur : venæ enim lacteæ præparatum in intestinis chylum sic hauriunt , uti vasa illa vitelli hauriebant attenuatum incubatus calore albumen ; omnis chylus in unum ductum thoracicum concurrit : sic & in pullo omnia hæc vasa in unum confluebant intra ammion. Calore incubatus , motu humorum per vasa , vi cordis , aëris conspirante actione in pullo non habente sanguinem rubrum , nascebatur sanguis ruber intra quadraginta octo horas : in homine adulto sano ex chylo fit sanguis viginti quatuor horarum spatio , ut docuerunt Loweri & Walæi observata : & ad chyli transmuta-

(1) Vide de omnibus his tractatum de Ovo incubato.

tionem in sanguinem in adulto concurrunt calor corporis, actio vasorum & cordis, aeris vis in pulmone applicata transfluenti cum sanguine chylo: quod autem breviori temporis spatio fiat hoc in adulto homine, quam in nascente pullo, videtur deberi longe validiori actioni vasorum in liquida contenta, respirationi, copiae sanguinis rubri praeexistentis.

Dum autem causae illae sanguinem producentes in adulto, vel deficiunt pro parte, vel segnius agunt, non nascitur sanguis ruber, sed degenerans liquor; patet hoc in pallido virginum morbo: tunc enim non fit sanguis ruber, sed talis color oritur subviridescens in toto corpore, qualis apparebat in vasis vitelli, antequam sanguis ruber fieret.

Hinc sanguis se non propagat vi seminali, ut voluerunt quidam, sed fit ex materia non sanguinea in corpore non habente adhuc sanguinem: & uti hoc fiebat in prima origine hominis, sic pergit ad finem vitae usque.

Dum in homine ex chylo sanguis nascitur, observantur varii & successivi mutationum gradus: chylus enim paulo post pastum deprehenditur sanguini affusus nondum subactus; hinc, dum post largum pastum mittebatur sanguis, inveniebatur, praeter serum & partem rubram, in sanguine fluctuans materies alba dulcis chylo a.

Post aliquot horas chylus cum sanguine circumactus per vasa, mammarum fabrica separatus à sanguine, exhibet lac, quod naturam & à sanguine & à chylo diversam habet: incipit enim in lacte jam nasci illud concreescens, quod in sero sanguinis adest; caseum enim dat, qui in chylo nunquam adest: hinc per artem possumus chyli confectionem imitari in Emulsis, lactis autem indolem nunquam.

Dum per duodecim horas ab omni cibo & potu abstinuit sana mulier, incipit lac fieri salsum & flavescens: si diutius adhuc exspectatur, in sanguine nihil habetur, nisi quod ad ignem concreescit instar albuminis ovi, quod in lacte & chylo nunquam fit.

Hinc licet concludere, quod corpus sani hominis sit faber sui sanguinis, perfecte uti quaelibet planta ex succo fertilis terrae, & toto aere ambiente, suum sibi succum conficit peculiari sua creata fabrica.

In corpore autem humano sanguinis confectio pendet imprimis à circulationis efficacia, per quam vasa agunt in contenta fluida: hinc in robustissimis hominibus sanguis ruberrimus, imo prae saturata rubedine ater fere, ilico concreescens, dum quiescit: & in morbis acutis aucta circulatione omnia quam maxime rubent, & ipsum serum sanguinis in scissilem massam abit: id debilibus autem, in quibus longe minor est circulationis efficacia, omnia languent, pallent, & sanguis tenuis vix concreescens adest: dum vero in his per corporis exercitia, & apta remedia augetur circulationis imperus, redit rubor, & debita cohaesio sanguini.

§. 93. **A**UCTUS sanguinis per vasa motus oritur Corde saepius, & fortius, contracto.

Post intellectam sanguinis humani indolem debebat indagari causa, quae sanguinem moveret. Celeberrimi in arte Viri crediderunt illam in ipso sanguini haerere: viderant enim miscela liquorum inter se posse excitari subito validissimos motus, & hinc crediderunt, in sanguine simile quid obtinere. Sed dum in ardentissima febre,

rupta nasi arteriola, summo cum impetu exilit sanguis, exceptus vase purissimo, calido licet, quiescit ilico, & nullum signum intestini motus exhibet: hinc in sanguine non hæret causa proprii motus.

Sed cordis actio musculosa contentum sanguinem in cavis suis validissima vi expellit per arterias, quæ momento post, cessante cordis actione, sua elasticitate & vi musculari sanguinem ulterius promonent: hæ sunt veræ & solæ causæ, quæ sanguinem movent: sed in corde hujus motus principium hæret, nam arteriæ, ubi pervenerunt ad minimum diametrum sua contractione, quiescerent, nisi à sanguine corde expulso dilatarentur iterum: cordis ergo actio musculosa sanguini motum conciliat, quiescente corde, stagnant omnia.

Si ergo cordis actio, id est, ejus contractio (in diastole enim cor non agit sed patitur) fiat frequentior & simul validior: causa motus sanguinis augebitur: non enim sufficit, ut cor frequentius se contrahat, (nam circa mortem tam numerosæ sunt cordis contractiones, ut nullo modo possint numerari, interim circulatio deficere incipit, quia nihil expellitur fere ex corde) sed requiritur ut & simul se fortius contrahat, ut omne contentum in cavis cordis expellatur: fortis enim contractio cordis est, quæ totum cor evacuat, debilissima contractio quæ nihil expellit: intermediæ gradus sunt debiliores cordis contractiones.

§. 99. **C**OR sæpius & fortius contrahitur: 1. Cerebro & cerebello in nimiam expressionem liquidi nervosi agente, ut in affectibus animi, & dolore: 2. Irritato Corde per accelerationem motus sanguinis venosi, frictione, vel musculis agentibus, pulsus; aut per acre sanguini inhærens aromaticum, salinum, acidum, alcalinum, purulentum, ichorosum, putrefactum, & quandoque specie contagii, pestis, veneni, nondum definiendum mali genus.

In hac paragrapho considerantur illa, quæ docuit certa observatio motum cordis excitare & augere posse.

1. Cor omnes dotes veri musculi habet, & instructum est illis partibus, quæ in aliis musculis motui absolvendo inserviunt. Destructo nervo ad musculum tendente, tollitur illius musculi actio; compresso cerebro ab effuso humore quocumque omnium musculorum voluntariorum actio cessat; si à quacumque causa fiat celerior influxus spirituum per nervos in musculum, augetur ejus actio in summum spasmus usque. Nervi autem magni & numerosissimi cordi tribuuntur, nec tamen per hos nervos acutus in corde exercetur sensus: reliqui corporis musculi nimio motu fatigati dolent; cor in acutis febribus, per plurimos dies celerrime motum, nullum dolorem sentit: hinc videntur illi nervi cordis motui inservire. Omnes jam causæ, quæ possunt efficere, ut fiat celerior motus spirituum per nervos cordis, augent cordis motum.

Animi autem affectus hoc faciunt potissimum. Rem certissimam esse agnoscunt omnes, quomodo fiat, explicuit nemo. Pacatissimo homini atrox dicitur contumelia: mutata tantum cogitatione, mutantur omnia: mox cor celerius & fortius contrahitur, pulsus fit magnus, vehemens; calor augetur, tumet facies, scintillant oculi, imo ardens febris excitatur aliquando, pergens ad mortem usque.

Q iij

Dolor autem totum encephalon sic mutare potest, ut fiat delirium, & non amplius sentiat dolor; vel & syncope perfecta: nec ultra possunt tormenta acerbissima procedere. Cum ergo dolor possit sic mutare sensorium commune, poterit & inde prodeuntes nervos afficere. Raro dolor diu cruciat, quin fiat febris (id est cordis contractio celerior) etiam in morbis à febre alienissimis; ut v. g. in podagra. Hinc monuit Galenus (a): *Dolor dum parvus est, atque initio, pulsum edit majorem, vehementiorem, celeriolem, crebriorem: auctus vero jam & admodum validus, ut etiam vitale robur offendat, minorem, languidiorem, celeriolem, crebriorem.*

2. IRRITATO CORDE. Præter causas motus, quas cor cum aliis corporis musculis communes habet, adest in corde singularis proprietas, quam cordis irritabilitatem vocare possemus: dum enim influxus spirituum per nervos in villos cordis, & arteriosi sanguinis motus per cordis substantiam cessat post mortem, potest flatu per venas adacto, vel & aqua tepida cordis motus resuscitari; imo cor rescissum ab omnibus vasis, quibus cohæret, motum suum per aliquod tempus conservat; & post multas horas quiescens jam, dum pungitur acicula & fovetur calore, incipit iterum moveri. Physiologi subtiliter explicuerunt, quare alternis vicibus cor paralyticum fiat, & fulmineo quasi spasmo iterum convellatur: quomodo causa faciens systolen cordis omni momento pereat, mox iterum renata; illudque ex fabrica & situ partium deduxerunt: cor tamen de corpore exemptum, nullis amplius partibus cohærens, eundem motum continuat, & sæpe satis diu. Videatur de his §. 1.

SANGUINIS VENOSI. Dum ab animi affectu, vel à re horrida visa, in syncopen labitur tenora puella, cordis fit absoluta quies: aspergitur aqua frigida corpori nudato, contractæ frigore partes sanguinem venosum versus cor derivant, & resuscitatur cordis motus. Dum Sarpedonem vulneratum anima reliquit aspirans aura Boreæ reviviscere fecit, (b) constrictis frigore venis: hinc omnia illa, quæ accelerant motum venosi sanguinis versus cor, motum cordis augment; imo sic ardentissima febris excitari potest motu musculari nimio, & frictionibus validissimis. Vide de his §. 28. n°. 2.

AUT PER ACRE SANGUINI INHÆRENS &c. Omnes nostri humores, sani si fuerint, blandi sunt; (sanguis enim sani hominis, oculo instillatus, nullum dolorem facit) tuncque fit æquabilissima circulatio: simul ac vero acriora sanguini permiscuntur, augetur irritato corde sanguinis per vasa motus, & nascitur febris; quæ vel expellit de corpore hæc acria, vel sic subigit, ut non amplius nocere possint. Nec refert fere, qualis hæc acrimonia fuerit; omnium fere similis effectus est: differunt tantum majori vel minori gradu, & magis vel minus durabili actione. In aromatibus, tenaci oleo inclusum hærens acre non tam facile excuti potest. Sic dum piperis triti magna copia imprudenti consilio sumitur, ad curandam febrem intermittentem, sæpe mitis tertiana in ardentem febrem mutatur. Qui nimiam copiam salis marini in prandio sumsit, pomeridiano tempore febricitabit, sitiet, donec copioso potu ingesto prædominans illud salsum abluatur. Ipsum acetum, in putridis febribus tanti usus, majori copia sumtum, febrem excitat. Dum vomica in interioribus corporis latens pus colligit, illud resorptum, & sanguini mistum, quotidie febrem incendit, quæ sensim corpus depascens hæctica di-

(a) De pulsibus ad tyrones, cap. XII. Charter. Tom. VIII. p. 8.

(b) Homer. Iliad. Lib. V. pag. 25.

citur ; dum pus retentum diu in tenuem ichorem mutatur , acrius fit , & resorptum majora mala facit.

Corrupta bilis circa præcordia hærens , vel consumti hepatis putridus tabus enormes febres accendit , nunquam curabiles , nisi putridus ille fomes tolli possit.

Sed in omnibus his acrimonia sensibus detegi potest ; sed alii sunt stimuli maxime mirabiles , qui ad nullam cognitam acrimoniæ speciem reduci possunt , totum tamen corpus in omnibus suis functionibus turbant.

Contagium Variolarum subtilissimo miasmate , omnes sensus fugiente , afflat vel sanissimum hominem : oritur validissima febris , quæ intra paucos dies totum corpus externum & internum pure varioloso replet : & in hoc pure , ex sanissimis humoribus per morbum nato , hæret eadem vis contagium variolosum propagandi in infinitum ; uti docet methodus variolas propagandi per insitionem , dum crudo & recenti vulnuscule puris variolosi guttulam instillant. Quis jam explicabit naturam hujus stimuli ? quis demonstrabit methodum , qua sani humores , contagio varioloso mutati , venenatam naturam induunt , & infinitam fere vim multiplicandi contagium acquirunt ?

Pestis , singulis animalium speciebus propria & peculiaris , raro pluribus animalium speciebus simul accidit. Dum bovina pestis per Europam grassabatur , homines immunes erant ab omni labe , etiam illi , qui insectorum animalium carnibus uti fuerant. Peritissimi Medici sedula observatione dum indagabant naturam atrocis mali , ingenue fassi sunt , se nihil hic intelligere quoad cognitionem causæ , tantum patere mali effectus. Vestibus laneis , pelliceis , lineis , lignis rariobus & porosis adhærens pestilentielle virus iners ibi hærebat ; donec corpori humano applicatum fieret actuosum , & quaquaversum se dispergeret multiplicato contagio ; quam miris modis tum omnia turbentur in corpore , quam validæ accendantur febres &c. apud *Diemerbrækium* & alios , qui de peste scripserunt , auctores videre licet.

Venenorum mirabilis historia confirmat , dari tales stimulos in liquoribus quibusdam venenatorum animalium , qui nullam acrimoniam sensibus ullo modo observabilem habent , interim tamen celerrima actione omnes functiones fere lædunt , validissimasque febres incendunt. Viperæ venenum pro exemplo sufficiet : Nobilissimi Redi observatis & candore fretus Charas gustavit succum flavum gingivis viperæ adjacentem ; invenit saporem similem oleo amygdalarum dulcium (a) : dum morfu inflicto vulnuscule pauculum quid ejusdem succi adhæserat , in Nobili viro imprudenter viperam tractante sævissima symptomata post pauca minuta oborta sunt (b) , vixque ille post multa artis molimina evasit.

§. 100. **A**UCTUS motus sanguinis per vasa efficit majorem vincti pulsi sanguinis in vasa excipientia ; majorem renixum valorum in sanguinem ; sanguinis fortem compressionem ; valorum sanguinisque attritum validum ad se mutuo ; partium Sanguinis attritum validum inter se ; calorem majorem totius ; sanguinis exsiccationem diffuso aquoso , ejusdem viscositatem inflammatoriam facile concrefcentem ; sanguinis resolutionem in sales , oleaque vola-

(a) Moshi Charas Oper. Tom. III. pag. 138.

(b) Ibid. pag. 156.

tiliora & acria: vasorum auctam ad initia amplitudinem; liquidorum crassiorum in tenuiora vasa impulsam, horum obstructions destructionesque, inflammationes, suppurationes, gangrænas, sphacelos, scirrhus; & quæ ex his infinita sequi possunt.

Recensentur jam effectus in solidis & fluidis partibus corporis humani observati, qui pendent à sanguinis motu aucto.

MAJOREM VIM PULSI SANGUINIS IN VASA RECIPIENTIA. Arteriæ semper plenæ sunt: dum ergo cor contractum expellit contentum in suis cavis sanguinem in arterias, debent arteriæ dilatari; vel debet tanta copia sanguinis expelli per arteriarum fines, quanta ex corde in arterias pellitur: sed arteriæ omnes corporis (exceptis arteriis coronariis) dilatantur illo momento, quo cor contrahitur: hinc cordis tota fere actio dilatandis arteriis impenditur, & hac vi urgentur arteriarum latera, ut recedant ab axi, & distrahuntur omnes fibræ arteriarum latera constituentes. Cum vero in §. 98. demonstratum sit; auctum sanguinis motum fieri à frequentiori & validiori simul cordis contractione, patet vim illam, qua latera arteriarum coguntur recedere ab axi, tunc augeri in ratione composita ex auctis robore & frequentia contractionum cordis.

MAJOREM RENIXUM VASORUM IN SANGUINEM. Arteriæ distentæ sunt in statu violento; hinc elasticitate & vi musculari suarum fibrarum nituntur latera propius accedere ad axim; sicque reprimunt sanguinem distendentem; nisi enim arteriæ sua vi arctatæ expellerent distendentem sanguinem, non posset cor sequenti systole contentum omnem in suis cavis sanguinem expellere in arterias adhuc distentas; accumularetur sensim in cavis cordis sanguis, & suffocaretur circulatio. Quo validior ergo fuerit cordis actio distendens arterias, eo fortius ager vis illa, qua arteriæ nituntur arctare proprium cavum; quo sæpius eodem temporis spatio cor contrahitur, eo frequentius arteriæ contractæ reagent in sanguinem distendentem.

SANGUINIS FORTEM COMPRESSIONEM. Sanguis in arteriis contentus semper quasi inter duo præla hæret: dum arteriæ dilatantur, urget cordis embolus sanguinem à basi arteriæ versus apicem: summam interim resistantiam faciunt arteriarum extremi fines adeo angusti: dum arteriæ contrahuntur, valvulæ resistunt circa basim arteriarum in corde, eadem resistantia manet circa arteriarum fines, hinc utroque in casu sanguis arteriis contentus comprimitur. Cum autem sanguinis partes constituentes flexiles & compressibiles sint, ut dictum in §. 93. & causæ comprimentes, nempe cordis & arteriarum actio, augeantur; necessario sequitur, debere fieri validiorem sanguinis compressionem.

VASORUM SANGUINISQUE ATTRITUM VALIDUM AD SE MUTUO; PARTIUM SANGUINIS VALIDUM ATTRITUM INTER SE. Dum sanguis ex corde pellitur, impingit in latera aortæ incurvatæ, resistunt huic sanguinis directioni aortæ laterum firmum robur, sanguisque in aortæ cavo contentus hinc nulla particula sanguinis, ex corde in aortam expulsi, per bina momenta servat illam directionem motus, quam habebat, dum corde expellebatur; accedit quod aorta, conica cum sit, latissima circa basim in decursu angustetur: cum autem directio sanguinis, corde expulsi in aortam, sit secundum perpendiculares li-

nea 3

neas ad aortæ basim , necessario brevi post sanguinis particula in latera incurrent conici hujus canalis , inde resiliētes occurrent aliis partibus diversa directione motis : hinc perpetuus attritus partium sanguinis inter se , & ad latera vasorum : hinc flexiles sanguinis partes cum sint , decussis eminentibus angulis perpetuo hoc attritu , acquirunt sphaericam figuram : aucto vero sanguinis per vasa motu , ille attritus augebitur pari proportionē.

CALOREM MAJOREM TOTIUS. Ab hoc attritu partium inter se , & ad latera vasorum , calor oritur. Demonstratur evidenter , quia simul ac sanguis quiescit , perit omnis calor , & redit sensim corpus ad frigus communis atmosphaeræ : dum augetur sanguinis motus per valida exercitia , vel febrim , calor augetur : in debilibus , ubi sanguinis circulatio languet , frigus semper adest.

Verissimum hinc Hippocratis effatum : *Sanguis non est natura calidus , sed calefit* (a) :

SANGUINIS EXSICCATIONEM DIFFLATO AQUOSO. Calor auctus semper mobilissima dissipat : sed , ut ante demonstratum est , calor major nascitur , aucto sanguinis per vasa motu. Totum corpus in omni sua superficie interna & externa habet vasa exhalantia , quæ ex sanguine secernunt & diffiant tenuissimum liquidum : aucta ergo sanguinis applicatione ad hæc organa , orietur major secretio. Hinc in omnibus morbis , in quibus calor auctus est , corpus exsiccat. Dixit ideo Hippocrates (b) : *Quicumque vero ex febre ardente moriuntur , omnes ex siccitate pereunt.*

EJUSDEM VISCOSITATEM INFLAMMATORIAM &c. In sanguine hominis , etiam sanissimi , est naturalis proclivitas in cohaesionem , per quam concrescit sponte , dum valis effusus quiescit. Hæc cohesio augetur majori calore , ablata aquosa parte diluente , & auctis viribus comprimentibus sanguinem. Statim demonstratum est , aquosam partem diffilari aucto motu , pariterque augeri calorem ; sed actio vasorum in sanguinem est vera compressio sanguinis contenti , hinc cum celeriori motu sanguinis augeatur & vasorum actio in sanguinem , patet omnes illas causas concurrere , quæ sanguinis concretionem faciunt. Tunc nascitur illud phlegma phlegmonodes Veterum , distinctissimum ab inertis frigida mucosa concretionē : vocatur tunc inflammatoria spissitudo , ex validiori compressione elementorum sanguinis ad se invicem nata. Elementa sanguinis sphaerica esse observantur , vel saltem sphaericis proxima ; hinc in paucis punctis se invicem tangunt : nimis valida pressione mutata figura , expresso tenuissimo aquoso interposito , pluribus in punctis contigua fiunt , & concrescunt : inde coriaceus ille lentor in sanguine pleuriticorum nascitur.

SANGUINIS RESOLUTIONEM IN SALES ET OLEA VOLATILIORA ET ACRIA. Quomodo sales & olea sanguinis se habeant , omnium optime docet urina , quæ verum sanguinis lixivium cum sit , eluit sales & olea nimis acria jam facta , hincque nocitura. Apparet evidentissime , urinam eo acriorem esse , eo magis foetidam , quo validior est circulatio : in debilibus hominibus urina pallida , vix olens , non adeo falsa ; in robustis & valide exercitatis hominibus urina rubicundior , foetidior , falsa admodum. Motus ergo sanguinis per vasa auctus sales sanguinis reddet acriores magisque volatiles ; olea magis attenuata , sed simul

(a) In fine Libelli de Cordo. Charter. Tom. I. (b) In fine Libri primi de Morbis. Charter. IV. pag. 271. | Tom. VII. pag. 549.

minus blanda : hinc novi iterum nascuntur stimuli augentes circulationem , ex cujus augmento facti erant ; sicque morbi effectus morbum auget.

VASORUM AUCTAM AD INITIA AMPLITUDINEM. Cordis vis expellens sanguinem in arterias plenas est causa sola , quæ dilatat has arterias : cum ergo cordis hæc actio increfcit , pari modo augebitur arteriarum dilatatio. Sed hæc dilatatio eo major erit , quo arteria cordi magis vicina est : ergo arteriarum omnium initia magis ampliabuntur , dum ad ultimos fines arteriarum vis hæc dilatans tanto cum effectu pervenire non possit.

LIQUIDORUM CRASSIORUM IN TENUIORA VASA IMPULSUM. Crassissima sanguinis pars observatur globus ruber , qui naturaliter in maximis vasis tantum hæreere potest : proxime sequens magnitudine sanguinis pars poterit ingredi minus vas , quod sua parvitate globum rubrum excludit , & admittit omnia tenuiora. Idem in reliquis decrefcientium vasorum seriebus obtinet : & videtur sanitas in eo præcipue consistere , quod in singulis vasis mancant liquida proportionalia. Dum ergo aucto sanguinis per vasa motu distenduntur plus initia arteriarum proximæ seriei , ingredi poterunt partes crassiores , quæ naturaliter in illis vasis non debebant contineri. V. g. dum augetur sic initium arteriæ serosæ , ex arteria rubrum sanguinem vehente ortæ , ingredietur hanc serosam arteriam sanguis ruber. Quod autem revera hoc sic obtineat , docent certissima observata. Homo sanissimus valido cursu corpus moveat , incipiet tota facies tendi , rubere quam maxime in illis locis , ubi naturaliter rubedo non aderat ; adnata tunica oculorum tota incipiet in suis vasis rubro sanguine repleri , cum hæc vasa naturaliter nunquam sanguinem rubrum habeant. Post validos motus , aut vectiones in curru rudiores per strata viarum , per dilatatas fistulas renales sanguis transit , & fit miætus cruentus , sola quiete facile curabilis.

HORUM OBSTRUCTIONES ET DESTRUCTIONES. Arteria , in suo decursu sensim arctior facta , tandem adeo angustatur , ut unam tantum fere sanguinis moleculam transmittat. Dum microscopiis sanguinis circuitus in pellucidis animalium vivorum partibus examinatur , hoc evidenter apparet ; pulcherrime imprimis , dum vivæ lacertæ pulmo per vulnus factum erumpens microscopio lustratur : tunc enim evidenter apparet , circa ultimas arteriarum angustias singulas moleculas liquidi transfluentis in oblongam cylindricam figuram mutari , & sic transprimi. Dum ergo v. g. arteria serosa dilatata in suo initio acceperit sanguinem rubrum , ille non poterit transire per ultimas illas arteriæ serosæ angustias : hinc fiet obstructio hujus canalıs , & dum liquidum vitali motu pulsus urgeat locum obstructum , tenerrimum tale vas destruetur facile.

INFLAMMATIONES &c. Dum enim sanguis ruber in minimis canalibus stagnans comprimitur , & atteritur impetu sanguinis à tergo prementis , & per febrim , plerumque comitem , fortius moti , dicitur inflammatio : quæ ergo à liquidis crassioribus , in minora vasa dilatata pulsus , frequentissime oritur. Sed nata inflammatione sequuntur omnes inflammationis effectus : dum enim vascula infarcta , una cum impacto & immeabili humore , vi vitæ atteruntur , & soluta abeunt in pinguem album æquabilem humorem , pus dictum , suppuratio fit. Si subito ruptis vasis destruaturs omnis circuitus humorum vitalium per partem affectam , fit gangræna , sive mors partis : quod malum , si ad omnia usque omnia corruperit , sphacelus vocatur. Si circa loca glandulosa inflammatio fiat , sæpe tumor

durus, indolens, difficillime postea resolvendus oritur, qui scirrhus vocatur.

Quando jam omnia in hac paragrapho dicta considerantur, apparet evidentissime, motum sanguinis circulatorium auctum infinita numero posse producere mala: omnes humores corporis per auctum motum, & calorem majorem inde natum, possunt mutari penitus in morbosam indolem, validiori pressione, difflatione aquosi, coagulo per majorem calorem inducto, acrimonia majori nata: solidæ partes plus atteruntur, imo rumpuntur sæpe: dilatata vasa ingrediuntur crassiores humores, qui per ultimas vasorum angustias penetrare nequeunt. Dum jam simul consideratur, omnia hæc mala obtinere posse in omnibus & singulis corporis partibus, patet, innumeros morbos nasci posse ex simplici hac causa.

§. 101. **C**OGNOSCITUR ergo aucta circulatio notis ejus causis (99), & effectis (100); sed imprimis pulsu celeri, duroque; respiratione veloce & laboriosa; calore ingenti.

Summæ utilitatis est in Medicina cognoscere, an in morbo peccet nintia circulationis velocitas, vel non. Causæ circulationis auctæ si adfuerint, si videantur effectus nimii motus, nullum manet dubium: interim quædam habentur signa nunquam fallacia, quæ demonstrant excessum motus circulatorii.

PULSU CELERI ET DURO. Pulsus celeritas designat, cor intra idem temporis spatium sæpius contrahi; durities autem pulsus arteriarum plenitudinem, & sanguinem valide compactum & densum significat, & inflammatoria viscositate per ultimas vasorum angustias difficiliter permeabilem. Sola celeritas sine duritie pulsus cor sæpius contractum, sed non fortius, denotat: circa mortem enim pulsus celerrimus sed parvus simul. Sola durities pulsus sine celeritate potius denotat suffocationem motus circulatorii, ut in summe plethoricis fit.

RESPIRATIONE VELOCE ET LABORIOSA. Omnis sanguis corde dextro expulsus debet transire per pulmonem, antequam redeat in cor sinistrum: sed cor dextrum sua vi musculosa sola non valeret propellere sanguinem per arteriæ pulmonalis angustias, requiritur etiam pulmonis per inspirationem dilatatio, ut expeditum fiat iter sanguini ex corde dextro expulso: quo ergo sæpius & fortius se contrahit intra idem temporis spatium cor dextrum, eo frequentior & validior requiritur respiratio. Hinc simul ac cursu vel alio quocumque exercitio sanguinis per vasa motus augetur, increscit respiratio proportionaliter, & fit majori cum molimine. Augetur sic respiratio ob solam velocitatem auctam sanguinis per pulmonem transeuntis: sed dum per majorem motum incipit nasci inflammatoria illa spissitudo, longe magis laboriosa erit & velox simul respiratio; primum enim vitium incipientis immeabilitatis se manifestat in pulmone; unde in morbis acutis inflammatoriis velox illa & laboriosa simul respiratio tam mali est hominis.

CALORE INGENTI. Quamdiu enim liber adhuc transitus est per omnia vasa, aucta celeritate motus, augetur calor, ut demonstratum est in paragrapho præcedenti: ubi vero immeabilis sanguis redditus ad extremas corporis partes usque non valet pertingere, fit frigus extremorum; sed circa vitalia viscera calor urens adest tunc, ut in pessimis febribus ardentibus contingit; tuncque fere inter lethalia signa numeratur ab Hippocrate in Prognosticis & alibi.

§. 102. **R**EMEDIA ergo nimio motui compescendo valida sunt, quæ frequentiam, & vim contractionis Cordis imminuunt.

In abstracto simplices hi morbi debent prius considerari: hinc supponitur hic, nihil mutatum esse in corpore, & motum solum circulatorium auctum esse. Remedium ergo erit omne illud, quod causam proximam motus aucti tollere poterit. Causa autem proxima motus circulatorii aucti erat nimis celer & fortis simul cordis contractio; remedium erit ergo omne illud, quod facere potest, ut cor tardius & debilius moveatur. Tale autem remedium vel agat in spiritus motores cordis, vel in sanguinem venosum & arteriosum delatum in cordis fabricam, vel denique in stimulos illos, qui sua irritatione faciunt, ut cor celerius & fortius contrahatur.

§. 103. **Q**UORUM illa Mentem, hæc Corpus, spectant.

In §. 99. dictum fuit, quod sola cogitationis mutatio, in sanissimo etiam corpore, possit sic augere cordis motum, ut fiat violentissima febris: nisi tunc possit Medicus illud mutatum in cogitatione tollere, reliqua auxilia nihil agent. Omne autem, quod hoc efficit, non mutato corpore, in mentem agit. Dum iratissimo homini maximus incutitur metus, compescitur ira, non mutato corpore, sed mutata mente in cogitatione sua. Reliqua auxilia, tollentia causas corporeas aucti motus, in solum corpus agunt.

§. 104. **P**RIORA sunt, quæ magnos affectus, ratiocinio, excitemento contrarii affectus, vel divertendo, sopiunt.

QUÆ MAGNOS AFFECTUS RATIOCINIO. In nobis deprehendimus, quod cogitemus, & quod cogitemus res à cogitatione diversas, quæ, si tantum intelliguntur illa mentis nostræ perspicacia, tunc nos parum afficiunt, sed in simplici contemplatione nos retinent: docent hoc summi Mathematici, qui sæpe vitam sic cogitando consumunt, nec multum afficiuntur ab aliis rebus: sed & contingit nobis perceptio quædam, quam non possumus ita alteri communicare, tamen à nobis evidentius & fortius percipitur, quam ipsum verum: sic dum gustamus suavissimum vinum, oritur in nobis idea, quam non possumus explicare, nisi dicendo, quod placeat: sed illud placere tam evidens est, tam valide afficit, ut nulla veritas validius afficere possit: sic si ovum putridum quis gustet, adeo abhorret, ut quævis pateretur potius, quam illud iterum assumeret: sic nati motus animi simul cum perceptione sua fere inevitabili necessitate rapiunt totam mentem, ut illud placens faciat perennare, ut illud displicens removeat vel destruat.

Illud autem gratum vel ingratum, quod comitatur ideam cogitatam, differt ab idea cogitata, differt à principio cogitante, turbat tamen omnes ideas, turbat ipsam voluntatem, & libertatem quasi tollit, cogens ad volendum vel nolendum; quia nunc hoc adeo singulare est, vocaverunt animi affectus, animi pathemata,

& merito, quia non sumus illorum magistri, sed obsequiosi servi, dum sapissime meliora videmus & probamus, deteriora tamen vel inviti sequimur.

Dum gratum hoc & ingratum, quod ideas perceptas comitatur, delere conabatur superbi Philosophi, quantopere erraverunt! totum, quod patitur humana conditio, est ut animi affectus regamus ratione: sed hæc sæpe tam debilis est, ut hæc tenacia vincula rumpere nequeat, hinc insitendum diu, ut consuetudine obluendi firmior facta ratio triumphet: certe summa & rationis & religionis lucta vix validissimis animi affectibus resistunt sapientissimi.

EXCITAMENTO CONTRARIJ AFFECTUS. Sapientissimi legistatores probe gnari, humanam societatem sola ratione regi non posse, proposuerunt præmia & pœnas. Supplicii metus furem ira hominem compescere poterit, ubi pulcherrima Ethices præcepta frustra adhibebuntur. Summæ ergo utilitatis est cognoscere oppositos animi affectus. Iram supprimit summus metus: meticulosissimus homo ira audax fit. Si observentur illa, quæ apparent mutata in Corpore in duobus his contrariis animi affectibus, patebit esse penitus opposita.

In irato homine statim nascitur validior & celerior cordis contractio, pulsus fit plenior, fortior, celerior, tument omnia & expanduntur etiam in macilentissimis: calor major nascitur toto corpore, omnes fere tenduntur muscoli, truces prominent oculi, scintillantes, sanguine suffusi, validissimæ fiunt exhalationes minarum, jurgiorum &c. apud Homerum, qui tam pulchre naturam ubique expressit, irati Agamemnonis oculi igni lucenti similes erant (a); irato Achilli ob vi abductam puellam terribiles lucebant oculi (b): Ajaci suadenti, ut arma caperet, responderet Achilles, *sed mihi tumescit cor ira &c.* (c) dum à Theride allata arma conspiceret Achilles, *statim ira subit, & oculi terribiliter sub palpebris tanquam jubar apparebant* (d).

Subito terrore percussus homo pallet, friget, contrahitur toto corpore, pulsus celer sed parvus & inæqualis, cor palpitat, summa oppressio circa pulmonem & suspiria adiunt, omne robur membrorum solvitur, tremor fit totius corporis, vel & aliquando attoniti obrigescunt statux instar, & vox faucibus hæret. Hinc frigidum timorem dixit Homerus (e), & alibi (f) pallidum timorem vocavit; dum irruentem Menelaum fugit Alexander, *tremor occupavit membra, & retro secessit, & pallor occupavit genas* (g); similia & in pluribus aliis locis habet.

Hinc apparet, oppositos effectus in corpore facere animi affectus contrarios; hincque unum animi affectum alterius posse esse medelam. Idem, percurrendo alios oppositos sibi mutuo animi affectus, demonstrari posset, hoc pro exemplo sufficiat.

V E L D I V E R T E N D O. Mirabilis hæc obtrinet in mente nostra proprietas, quod possimus ideas cogitatas alligare quibusdam signis mere arbitrariis, inter quæ signa & ideas cogitatas nulla occurrit omnino similitudo, tamen postea visis his signis præsens redditur eadem idea menti. Paucis literis varie adunatis excitantur in mente ideæ, quas ante annos habuimus, quarum idearum omnis periisset memoria, nisi hæc signa arbitraria conservassent: idem in animi affectibus verum est: dum vi-

(a) Pag 7. Lib. I Iliad.

(b) Pag 11. Iliad. Lib I.

(c) Iliad. Lib. IX. pag. 171.

(d) Iliad. Lib. XIX. pag. 346.

(e) Iliad Lib. IX. pag. 149.

(f) Iliad. Lib. XIV. pag. 272.

(g) Iliad. Lib. III. pag. 50.

Ati Turni precibus incipiens flecti Æneas Pallantis à Turno occisi balteum spectat.

--- furis accensus, & ira
 Terribilis: Tunc hinc spoliis indute meorum
 Eripiere mihi! Pallas te hoc vulnere, Pallas
 Immolat, & pœnam scelerato ex sanguine sumit &c. (a).

Dum ergo ideas, per hæc signa renovatas, comitatur illud gratum vel ingratum, animi affectus renascuntur acriores, sicque tandem possunt reddi perpetui: tunc illud infinite extensum in cogitatione, quod habebat mens humana, perit & relabitur in hunc unicum affectum, voluntas antea infinita non vult nisi hoc unicum, tunc vocatur delirium, si summa adsit violentia, dicitur furor; si febres adsint & agitati humores, phrenitis; si hæc absint, mania; si simul adsit negligentia omnium rerum, stultitia.

Hinc prudentes Medici omnes illas notas corporeas, quæ renovant has ideas, sive per sensus, sive per memoriam, tollunt inscio ægro; quæcumque alia ipsi offerunt, ut nascantur aliæ ideæ, quæ sensum minuant vel & deleant nimis validam illam impressionem, hoc vocatur *divertere*. Sufficit ad hanc rem, ut quocumque modo mutetur cogitatio, ne eadem idea, diutissime hærens, tandem totam mentem occupet indelebilis postea.

Ubi vero validi animi affectus omnia turbant in corpore, & totum systema nervosum irritant, ut in hysterice tam sæpe fit, tunc confugimus ad illa, quæ spiritus sopiunt, & omnem cerebri actionem pro tempore silere faciunt: tale imprimis auxilium dat Papaveris succus, qui parca copia sumtus lætissimum facit, qui cogitari potest, sensum, & instar Nepenthes Helenæ omnium malorum oblivionem; aucta dosi somnum inducit, nimia copia tandem apoplexiam. Vini usus in homine non admodum assueto similia facit, magnam nempe hilaritatem, validos animi affectus lenit, tandem, optatam omnium malorum requiem, somnum inducit.

§. 105. **P**OSTERIORA agunt quiete musculorum, laxatione venarum (54), mitificatione acris cujuscunque, diluendo, vel obtundendo (66. 67. 88.), doloris causas tollendo.

Quæ paragrapho præcedenti dicta sunt, impetuosissimos illos motus, mutatæ cogitationis effectus, compescebant, agendo in mentem ipsam potius, quam in corpus: quæ nunc dicentur, corporeas causas aucti motus tollunt.

QUIETE MUSCULORUM. Inter causas, quibus cordis motus efficitur, numeratur sanguinis venosi influxus in cordis cava, uti antea dictum fuit in §. 25. n°. 2. & §. 28. n°. 2. sed sanguinis venosi motus versus cor acceleratur musculis motis: pleræque enim venæ, in superficie corporis positæ, musculis accumbunt: hinc à musculis turgentibus, dum agunt, comprimuntur, sicque sanguis venis contentus cor versus ducitur, quia directio motus sanguinis per venas est ab apice versus basim. Præterea musculi, dum agunt, pallent, expresso omni sanguine, qui tunc per venas citius redit ad cor: hinc adeo augetur motus sanguinis per

(a) Virgil. Æneid. Lib. XII. in fine.

motum muscularem. Hoc probe norunt Chirurgi, qui, dum aperta brachii vena tardius fluit sanguis, jubent moveri digitos, & statim celerius effluit sanguis. Hinc Veteres Medici, licet circulationis ignari, in omni morbo, in quo erat nimius motus, imperabant summam quietem, removebant omnia, quæ sensus valide afficere poterant, & in tenebris hinc jubebant ut decumberent atri, ab omni strepitu remoti, in quiete summa.

LAXATIONE VENARUM. In morbis acutissimis, in quibus maxima circulationis velocitas, observatur semper, maximam copiam sanguinis hære in vasis arteriosis, venas vero depleri: contra in morbis languidis, in quibus circulatio deficit, venæ & omnia corporis cava implentur, arteriæ vero deplentur: venarum ergo laxitas & impletio minutam circulationem comitantur. Sed præterea laxatæ venæ, facilius hinc distendendæ ab impulso ex arteriis sanguine, plus sanguinis continent; minor ergo redit copia sanguinis ad cor, & minuitur ergo una ex causis præcipuis motus cordis: sed & impetus sanguinis ex arteriis in venas pulsus magis retardatur, quia majori copiam movendorum in venis occurrit: utramque ob causam minuitur circulationis velocitas.

Quomodo autem laxari possint quæcumque corporis partes, dictum fuit §. 54. omnium optimum est balneum vaporis externæ corporis superficiei applicatum: dum simul in interioribus per clysmata, emollientissima decocta epota, & victum similem idem fit. Hanc methodum Hippocrates in morbis acutis ubique adhibuit.

MITIFICATIONE ACRIÆ &c. Acris illa cognita, & ad suas classes reducta, ars valet tollere, modo viscera adhuc sint integra. Acrimoniam alcalinam, acidam, aromaticam &c. curare non adeo difficile est: sed ubi mirabiles illi stimuli venenati, miasmata illa contagiosa, nullis sensibus detegenda, sed solis effectibus cognita, sunt causæ velocioris motus, tunc ars deficit. Dum sanissimam puellam mordet venenatissimus serpens, à crepitaculo, quod in apice caudæ gerit, nomen habens (*serpent à sonnettes*) paulo post mors sequitur. Medico præsentem quidem, sed nullam opem ferentem, dum volunt cadaver auferre, tabefactæ secedebant carnes (α), paucis tantum post mortem horis. Dum homo sanissimus varioloso contagio afflatur, quod sua subtilitate omnem sensuum aciem eludit, turbantur omnia, validissima febris incenditur, quæ tam miro modo omnes totius corporis humores mutat, ut intra quatuordecim dies gangrænosus tabo omnia externa & interna corporis diffluant. Si ingruente morbo posset ille stimulus opposita antidoto iners reddi, nil sequeretur mali. Hoc est illud divinum (τὸ θεῖον) in morbis, quod toties omnia artis molimina eludit; hoc facit, quod toties nimium motum in morbis non possint compescere Medici. Totum quod habet ars, est ut vitam debilitet ipsam: per vitam enim actiuosa fiunt venena, in cadaver nihil agunt; deinde ut diluentibus, ingenti copia potatis, abluat; & emollientissimis simul exhibitis obrundat.

DOLORIS CAUSAS TOLLENDO. Luxato articulo, summus fit dolor; à dolore febris, non curanda, nisi restituto osse luxato, & sic sublato dolore. De cura doloris postea peculiari capitulo agetur.

(α) Journal des Observ. physiques, mathemat. & botaniques par le R.P. Louis Feuillée, Tom I, pag. 417.



DE MORBIS, EX DEFECTU CIRCULATIONIS, ET PLETHORA.

§. 106. **D**EFECTU motus circulatorii morbi fiunt in humoribus illi, qui proxime accedunt ad hos, qui quiescentibus spontanei nascuntur. Modo bene consideretur aer, qui admixtus corruptiones spontaneas accelerat, quæ aliter, eo secluso, lentiores (§ 8. ad 80.) adeoque intellectus, & curatio horum inde peti debet. Atque ex his omnibus Plethoræ indoles, causa, effectus, signa, remedia intelliguntur, si ad sequentia animus advertitur.

Liquida in nobis vel sunt adhuc cruda, & ingestorum naturam pro parte saltem retinent; vel jam acquisiverunt per vim corporis illas dotes, quæ liquidis humanis propriæ sunt. Si consideremus, quid crudis, vel assimilatis liquidis accidat, dum minuitur circulatio, apparebit evidenter, tales quam proxime fieri mutationes, quæ quiescentibus, & sibi relictis, acciderent. Sanguis noster, per pauca momenta quiescens, separatur in serum & rubram partem concrecentem: dum multum minuitur circulatio, incipit simile malum nasci, unde toties polyposæ concrectiones post lentos morbos observantur. Cruda vero omnia ingesta mutantur in nostram naturam circulationis efficacia: hæc ergo si minuitur, ingesta suam naturam diutius retinent, & spontanea mutatione corrumpuntur. Sed de his actum fuit in præcedentibus capitulis, hinc jam non repetendis.

Unicum tantum monendum videbatur, quod nempe aeris liber accessus omnes humorum spontaneas degenerationes acceleret. Nulla enim fermentatio fit, nisi aer accedat; & putrefactio longe tardius oritur, dum aer excluditur: stagnans in tumido abdomine aqua per multos menses hæret, vix corrupta; simul ac aer accesserit, putrescit citissime.

Dum ultimo graviditatis tempore, in distentissimis uteri vasis, sanguis fere stagnat, nulla fit corruptio: excusso fœtu, aëre libere accedente, lochiorum pessimus fœtor. Post validas contusiones, dum sub cute integra hæret effusus sanguis, vix putrescit; sed sensim attenuatus & resorptus evanescit quasi: si effusus sanguis aëri libero exponatur, putrescit citissime. Hinc in interioribus corporis dum stagnant, vel tardius moventur, humores, cum non detur liber aëri accessus, non tam subita fit degeneratio in putredinem.

Quia vero aucta liquidi movendi moles circulationis velocitatem retardat, hinc huic capitulo subnectitur Plethoræ consideratio, in suis causis, indole, signis, & remediis; quæ omnia sex sequentibus numeris explicantur.

α. Plethora est copia boni sanguinis major, quam quæ ferre possit
eas

cas mutationes, quæ vitæ inevitabiles accidunt, nisi inducantur morbi.

Sanguinis boni abundantia nimia vocatur Plethora; hinc ex se nunquam est morbus: supponit enim boni humoris auctam copiam; omnia autem reliqua se bene habere. Ideo Helmontius credidit, plethoram male inter morbos recenseri, volens illud, quod bonum est, copia peccare non posse. Sed plethoricus homo dicitur, non qui jam ægrotat, sed qui in tali statu plenitudinis est, ut si ulterius augeatur copia humorum, vel calore aut alia quacumque de causa plus rarefiant humores, lædantur functiones. Hinc plethoricus homo potest esse sanus, sed in maximo discrimine interim versatur. Calore enim aëris ambientis aucto, minimo vitio rerum non naturalium, affectu animi validiore, summa illa sanitas potest mutari in periculosissimum morbum: sed impossibile est præcavere, quin sanissimo homini hæc aliquando accidant. Hinc dixit Hippocrates: (a) *Bene habitæ Athletarum valetudo, si ad summum processerit, periculosa: non possunt enim in eodem statu permanere neque consistere: cum autem non consistent, nec in melius possint proficere, superest ut in deterius vergant. Ob hac ergo bonum illum habitum baud cunctanter solvere confert &c.*

Non ergo plethora significat omne humorum augmentum, sed tantum boni sanguinis auctam copiam: hinc Galenus (b) dicit: *Ubi æqualiter inter se humores sunt adaucti, illud plenitudinem & plethoram nominant: ubi vero vel flava bile, vel nigra, vel pituita, vel serosis humoribus repletum corpus fuerit, talem affectum cacochymiam, non plethoram, vocant.*

Plenitudinem illam nimiam Veteres distinxerunt in eam, quæ ad vasa (πρὸς ἀγγεία) esset, & alteram, quæ ad vires (πρὸς τὰς δυνάμεις) vocabatur. Quando vasa bonis quidem, sed copiosis adeo turgebant humoribus, ut rupturæ forent proxima, vel & nimia distensione læderentur functiones, vocabatur simpliciter plenitudo, sive plethora, ad vasa: Quando autem vasa non nimis plena forent bonis humoribus, plus tamen continerent, quam debilis vitalis vis movere poterat, erat plenitudo sive plethora ad vires. Plethora ergo ad vasa poterat semper & absolute dici plenitudo, plethora ad vires non nisi respective. Sic Galenus (c) dicit: *Duas esse plenitudinis species, vel ad virium robur & facultates corporis illam sustentis; vel ad suscipientem capacitatem, & alibi (d): Quanto enim gravior sibi videtur homo, tantum & plenitudinem quoad vires crevisse constat: ad eundem modum, quantum auctus fuerit tensionis sensus, tantum & alteram auctam plenitudinem esse novimus, quam à quibusdam κατὰ τὸ ἕχμα vocari diximus.*

Vulgari tamen sensu per plethoram intelligitur illa plenitudo, quæ ad vasa est, & hac significatione plethoræ vocabulum in hoc capitulo sumitur.

β. Hanc generat omnis causa, quæ multum laudabilis Chyli, & Sanguinis conficit, simulque horum attenuationem, consumptionem, perspirationem, impedit.

Per ipsius sanitatis actiones inevitabili necessitate deteruntur solida, & disflan-

(a) Aphor. 3. Sect. 1.

(b) Meth. Medendi Lib. XIII. cap. 6. Charter. Tom. X. pag. 300.

(c) De plenitudine cap. 3. Charter. Tom. VII.

pag 316.

(d) De Curandæ ratione per venæ sectionem cap. 6. Charter. Tom. X. pag. 434.

tur fluida; hinc per ingesta debebant restitui illa, quæ perierant. Si quotidie tantum restituitur corpori, quantum deperditum erat, manet perfectissimum æquilibrium, sanitatis firmissimæ summum indicium: ut Sanctorius suis experimentis demonstravit, quod tunc perfectissime valeret corpus, quando quotidie post integram subtractionem ingestorum rediret ad solitum pondus. Restitutio deperditi fiebat per bonum chylum, & sanguinem inde factum. Si ergo à quacunque causa major fiat boni chyli & sanguinis copia, quam requiritur, ut tot & talia reddantur corpori, quot & qualia perierant, fiet sensim accumulatio superflui: quæ plurimum augebitur, si minuatur efficacia illarum actionum, per quas attenuari, consumi, diffilari de corpore per solitas excretionum vias debebant liquida. Præcipuas causas, unde hæc bina fiunt, recenset sequens numerus.

γ. Quo spectat vis contractilis viscerum Chylopoëtorum magna; ut & in Corde & arteriis; simulque laxior venarum, & cæterorum vasculorum compages; cibi blandi facile in chylum resolvendi; somnus multus, animus sedatus; quies musculosa; consuetudo mittendi sanguinis, naturalis, artificialis.

VIS CONTRACTILIS VISCERUM &c. Dum firma & valida sunt illa viscera, quæ ingesta debent mutare in bonum chylum, ex cibo & potu maxima chyli copia paratur. Dum in corde & arteriis simile robur obtinet, ex copioso illo chylo bonus sanguis nascitur: venæ autem semper ex sua natura laxiores cum sint, cedunt facile distendenti liquido, & illud superfluum recipiunt, nisi per exercitia & motum majorem depleantur: nam uti demonstratum est §. 105. quo minor est motus humorum per vasa, eo plus aggregantur in venis humores; quo major motus est, eo plus implentur arteriæ, deplentur venæ. Dum immanem sæpe potulentorum copiam ingurgitant helluones, nisi venæ cedere possent & in se recipere illud superabundans, suffocarentur, & ideo inflatas tunc adeo venas habent. Dum ergo viscera chylopoietica majorem copiam chyli parant, & hæmatopoietica viscera inde sanguinem faciunt, laxitasque simul major in venis sit, necessario accumulatur boni sanguinis copia.

CIBI BLANDI &c. Omnia acriora suo stimulo motum circulatorium augent, ut dictum §. 99. n°. 2. sed auctus sanguinis motus minuit liquidorum copiam, ut demonstratum est §. 100. Blandi igitur & molles cibi ex cerealibus bene maturis, carniū jusculis, juniorum animalium teneris carnibus, oleribus mollissimis, ex quibus omnibus blandi chyli magna copia conficitur, Plethoræ producendæ favent.

SOMNUS MULTUS. Quantum conducatur laxandis fibris nimis rigidis plenior somnus, dictum fuit §. 35. n°. 2. sed laxata vasa facilius cedunt distendenti liquido; hinc major impletio. Præterea somni tempore restituuntur illa in corpore, quæ sensuum & motuum voluntariorum actionibus perierant; dum vigilamus, consumuntur illa, quæ somni tempore accumulata fuerant; hinc defatigati diurnis laboribus post salubrem somnum resurgunt alacres: dum ergo longiori somno indulget homo, plus aggeritur quotidie, minus dissipatur; hinc plenitudo nascitur: ideo morbis validissimis exhausta corpora longiori somno tam pulchre restituuntur. *Ursi* tota hyeme dormientes sine pabulo vitam sustinent.

ANIMUS SEDATUS. Tranquilla mentis serenitas quantum conducatur tuendæ sanitati, omnibus patet: sed summæ sanitatis effectus plethora est: validi animi affectus, & θυμώδης curæ etiam corpus depascuntur: hinc elegantissime cecinit Ovidius (a):

*Attenuant vigiles corpus miserabile cura;
Adducitque cutim macies, & in aëra succus
Corporis omnis abit; vox tantum atque ossa supersunt.*

Galenus (b) ubi nimix obesitatis curam tradit, inter alia remedia recenseret & animæ curas (τὰς ψυχῆς σπορίδας).

QUIES MUSCULOSA. Postquam divina sententia in peccati pœnam homini iustum est, ut in sudore vultus sui panem manducaret, inventum fuit, corporea exercitia ad sanitatem tuendam necessaria esse. Dum in re lauta constituti homines inertii torpent otio, gravissimis morbis pressi desidix pœnas luunt: Hippocrates (c) dixit: *Homo comedens sanus esse non potest, nisi etiam laboribus exerceatur. Cibi enim & labores adversas inter se potestates, mutuo tamen ad sanitatem conferentes, habent. Labores namque ea, quæ adsunt, consumere solent; cibi vero & potus vacuata replere.* Et alibi (d) saluberrimam sanitatis regulam tradit, quam se primum mortales docuisse gloriatur: jubet nempe considerari, *utrum cibi labores, an vero cibos labores superent; an moderate inter se habeant, quodcumque enim superetur, ex eo morbi contingunt, ex mutua vero inter se æqualitate sanitas adest.*

Illud ergo æquilibrium inter cibos & labores requiritur, ut tantum dissipetur quotidie, quantum ingestum est: simul ac ingestorum copia manente eadem, minuuntur labores, incipit plenitudo nasci. Dum in stabulis bene pasti quiescunt equi, pinguescunt brevi; si per aliquot dies valido exerceantur cursu, dissipatur cito omne illud incrementum.

CONSUETUDO MITTENDI SANGUINIS NATURALIS, ARTIFICIALIS. Certa observata docent, quod, quo sæpius sanguinis jactutam patitur homo, modo non penitus inde debilitetur, eo citius postea sanguine turgat. Fœminis singulis mensibus naturali lege superfluous evacuatur sanguis; eodem iterum temporis intervallo novo sanguine turgent. Viri sæpius repetitis venæ sectionibus assueti, circa solitum venæ sectionis tempus eadem patiuntur mala, quæ fœminæ à retentis menstruis; sicque tandem virile robur in laxitatem fœmineam fere degenerat. Observavit DODARTIUS (e), sedecim uncias sanguinis per venæ sectionem eductas intra quinque dierum spatium restitui in homine non debilitato. Hinc patet, venæ sectionem repetitam ad plethoram disponere, tam cito regenerato sanguine; sed forte minus firmo, & simul laxiore reddito corpore, hinc facilius implendo. Vidi fœminam, cui ob validissimos, & sæpissime renatos animi affectus, sexagesies & ultra vena fuerat secta intra anni spatium, quæ obesissima facta paucorum mensium spatio 150 librarum pondere aucta fuerat; & dum

(a) Metamorph. Lib. III.

(b) Method. Medendi, Lib. IV. cap. 15.

Charter. Tom. X. pag. 335.

(c) De victus ratione Sanorum Lib. I. cap.

4. Charter. Tom. VI. pag. 448.

(d) De victus ratione Sanorum Lib. III. cap.

3. Charter. Tom. VI. pag. 481.

(e) Histoire de l'Académie des Sciences l'an

1707. pag. 234.

continuo turgeret renato sanguine, nova sanguinem mittendi necessitas urgebat magis quotidie; donec tandem soluto omni corporis robore in hydropem incidere. Non videtur ergo adeo laudabilis hæc consuetudo, qua sapiens in anno sanis hominibus cautelæ gratia sanguis mittitur: debilitatur enim inde corpus, & ad faciliorem repletionem disponitur. Galenus, qui & frequentes in morbis, & audacissimas venæ sectiones ad animi deliquium usque jussit institui, & Medicos à venæ sectione abhorrentes *ἀμφοτέρω* vocavit (a), damnavit hanc consuetudinem, dicens (b): *Nam per annum venam sæpius secare, haud expedire arbitror; quod una cum sanguine vitalis excernatur spiritus. Atqui si hic copiosius absumatur, sola moles refrigeratur, & omnes naturales operationes deterius perficiuntur.*

§. Effectus Plethoræ omnes pendent à rarefactione, quæ majori velocitati, atque inde nato calori, aut causis aliis, per solam observationem cognoscendis, adscribenda: hinc arteriarum dilatatio tam Sanguiferarum, quam Lymphaticarum; mutata secretio; compressio generis venosi Sanguiferi & Lymphatici; suffocatio circulaturi, inflammatio; vasorum ruptura; suppuratio; gangræna; mors.

EFFECTUS PLETHORÆ OMNES PENDENT A RAREFACTIONE. Quando nimia copia boni sanguinis repleta sunt vasa, potest adhuc esse sanitas; sed ubi à quacumque causa sanguis vasis contentus rarefcit, tunc incipiunt lædi functiones, & cum tunc appareant mutationes quædam in corpore, hæ vocantur effectus Plethoræ; licet non ab unica hac causa pendeant, & Plethora tantum sit causa prædisponens; rarefactio autem sit causa excitans, sive occasionalis dicta. Ex binis autem his causis, prædisponente nempe & excitante, unitis sit causa proxima illorum phænomenorum, quæ tunc apparent: & quia causa excitans, nempe rarefactio, in actum deducit Plethoram, quæ sola, nisi in summo gradu fuerit, non tam cito noceret; hinc illo sensu effectus Plethoræ dicuntur pendere à rarefactione.

QUÆ MAIORI VELOCITATI &c. Simul ac intra idem tempus major copia sanguinis per vasa fluit, dicitur aucta esse velocitas: sed hoc non potest fieri nisi aucto attritu fluidorum ad vasa, unde calor, & à calore rarefactio. Omnes autem causæ, quas docuit observatio rarefacere sanguinem, videntur hoc imprimis facere aucta celeritate, & calore inde nato. Sola autem sanguinis rarefactio potest efficere omnia illa, quæ à Plethora oriuntur. Si enim sanguis fieret duplo rarior, esset respectu vasorum res eadem, ac si duplo fuisset factus copiosior: Si ergo Plethoræ accedit rarefactio, omnia, quæ à Plethora nasci possunt, mala augentur. Hinc patet, quare omnia illa medicamenta, & omnes morbi, qui sanguinis velocitate aucta calorem inducunt, rarefacto sanguine, Plethoræ distendentis symptomata faciant. Pallida & frigida puella contagium variolosum recepit; mox oritur calor, rubor, inflammatoria tensio vasorum, dolor capitis immanis &c. non ab aucta copia sanguinis, sed à rarefactione per calorem majorem ab accelerato sanguinis motu natum.

HINC ARTERIARUM DILATATIO &c. Sanguis auctus copia, vel per

(a) Method. Medendi Lib. IX. cap. 5. Char. |
ter. Tom. X. pag. 210.

(b) De Hirudinibus revuls. &c. cap. ultimo
| circa finem. Charter. Tom. X. pag. 455.

rarefactionem majus spatium occupans, necessario plus dilatabit vasa, quibus continetur, hinc æque arteriæ quam venæ distendentur. Sed sanguis ex arteriis non tam facile poterit propelli in distentas nimis venas; hinc major orietur resistentia circa fines arteriarum. Ergo arteriæ plus debent distendi à sanguine ex corde in arterias pulso. Cum autem inter causas, quæ faciunt, ut ex eodem sanguine tam varii in variis locis secernantur humores, recenseatur à Physiologis varia proportio ramorum secernentium ad truncum, unde oriuntur; patet turbata hac proportione per dilatationem arteriarum, turbari posse & omnes secretiones.

COMPRESSIO GENERIS VENOSI &c. Plerisque in locis corporis arteriis comites incedunt venæ; tumentes nimis arteriæ adjacentes venas, debilibus tunicis instructas, comprimunt; venæ compressæ contentum fluidum versus cor derivant; cor illud pellit in arterias, & venæ compressæ minus recipere valent: hinc necessario sequitur major adhuc arteriarum dilatatio, & tandem omnis fere sanguis accumulatur in arteriis, dum venæ magis comprimuntur & deplentur.

SUFFOCATIO CIRCULATURI. Sic enim omni momento augetur resistentia sanguini ex corde sinistro expellendo; hinc venæ pulmonales non poterunt tam facile suum sanguinem infundere in cor sinistrum: ergo sanguis accumulari incipiet in pulmonis vasis; augetur resistentia cordi dextro, tandemque suffocabitur circulatio. Sic videmus in summo gradu plethoricos rubere quam maxime, dilatatis arteriis minoribus, jam recipientibus sanguinem rubrum; & tandem incipiunt livescere suffocati fere, & nisi sponte vel arte solutis vasis tollatur copia, sicque minuatur calor & rarefactio, subito sæpe pereunt.

INFLAMMATIO. Ob crassiores humores ingressos dilatata nimis vasorum minimorum orificia, nec potentes tamen per ultimas horum angustias transire.

VASORUM RUPTURA. Imprimis in illis locis corporis, ubi tenerrima sunt: hinc toties in cerebro ruptæ arteriæ in plethoricis lethalem fecerunt Apoplexiam: fractis à distendente sanguine pulmonum vasis, tam frequens observata fuit in plethoricis Hemoptoe.

SUPPURATIO, GANGRÆNA. Inflammationis factæ, nec resolutæ, communes exitus.

MORS. Quæ videtur fieri, quia distenta nimis vasa tantam faciunt resistentiam cordi, ut illud evacuari non possit; unde circulatio suffocatur: vel quia vasa majora, turgentia nimio sanguine, minima vascula in cerebro, cerebello, & nervis comprimunt: vel ubi fractis vasis humores ad vitam necessarii effluunt. Vel denique quando ruptis vasis extravasata liquida viscerum vitalium actiones tollunt.

1. Itaque facile cognoscitur præsens; prævidentur futuri effectus.

Plethora præsens cognoscitur, si prægressæ sint causæ illæ, quæ nimiam boni sanguinis copiam generant, quæ recensitæ sunt (β) & (γ) hujus paragraphi: si magna rubedo adsit in toto corpore, maxime conspicua in illis locis, in quibus vasa nulla cute tecta apparent nuda, ut in oculorum angulis, palpebris internis, adnata oculorum tunica, naribus internis, ore, faucibus, labiis: si magnus calor ad extrema corporis usque inveniatur: si venæ inflatæ sint, una cum pulsū forti pleno: si à motu majore, aëris calore aucto, vino vel aliis quibuscumque calefacientibus assumtis sentiant in omnibus musculis corporis mollem plenum dis-

tendentem tumorem, una cum immobilitate quadam, sic ut manuum digitos vix claudere possint: incipiunt tunc segnes fieri, soporosi, oculos habere lacrymantes. Sicque habetur perfecta plethoræ diagnosi.

In Prognosi prævidentur futura illa mala quæ (A) in hac paragrapho recensita sunt: & imprimis quod encephali totius functiones turbabuntur, quia in capite omnia plena sunt naturaliter: hinc distentis vasis majoribus, rubro sanguine plenis, minora reliqua comprimuntur, quia durum calvariae os cedere nequit: hinc à levissima vertigine ad lethalem apoplexiam usque omnes morbi cerebri à plethora nasci possunt.

2. Curatio absolvitur missu sanguinis; labore; vigiliis; cibo acriori post evacuationes; omissione evacuationum sensum introducta.

MISSU SANGUINIS. Nimia copia boni sanguinis erat causa omnium malorum enumeratorum: omne ergo quod hanc copiam minuit, proderit: sed omnium optime copia minuitur nullo sanguine; & statim inde oritur levamen omnium symptomatum. Nunquam rectius Medicina curat, quam ubi naturæ vias, quibus morbos levat, imitatur: sed videmus & in sanitate, & in morbis, nimiam plenitudinem, à sanguinis copia majori, vel & rarefactione nimia ortam, salutari hæmorrhagia, narium imprimis, tam feliciter tolli. Hinc juvenibus, perfecte valentibus, illo ætatis tempore, quo incipiunt vasa, jam fortiora reddita, plus resistere liquidis distendentibus, tam frequens salutaris hæc evacuatio est, imprimis incrementum verno calore. Eandem ob causam fervidissimis morbis narium hæmorrhagia toties salutem attulit. Ars postea, salutaria hæc naturæ conamina imitata, aperta vena sanguinem eduxit; & si signa docerent, arteriosum systema solum esse distentissimum, venas collapsas, ob immeabilem sanguinem, hærentem in arteriis & non potentem transire in venas, ut in morbis acutis inflammatoriis sæpe fit; tunc ausi fuerunt Medici ipsas pertundere arterias: & quia hoc in majoribus arteriis sæpe non sine periculo fieri poterat, discessis plurimis minoribus per scarificationes, eundem fere præstabant effectum. Unde in Ægypto, ubi acutissimi illi morbi frequentes erant, tanti fecerunt scarificationes, uti testatur *Prosper Alpinus in Medicina Ægyptiorum*.

Quidam, Helmontium secuti imprimis, damnabant sanguinis missionem, tanquam crudelem & inutilem; credebant abstinencia à cibo & potu plus minui posse nimiam copiam, cum per insensibilem perspirationem, & alias excretiones, quotidie plures libræ humorum expellantur ex corpore, quod totum cibo & potu iterum restituitur: hinc cum pergerent naturales hæc excretiones liquida minuere, nec ingesta iterum redderent deperdita, magis minuebatur copia liquidorum abstinencia a cibo & potu per viginti quatuor horas, quam vel audacissima venæ sectione fieri posset: sed hac methodo subtilissimi tantum de corpore disillantur humores, ruber crassus sanguis majora vasa distendens, vix minuitur, quod imprimis requirebatur; & omnes humores acriores fiunt, dum nihil novi chyli sanguini miscetur.

Sed sanguinis missio nimiam quidem copiam minuit, corpus tamen relinquit æque facile replendum iterum; imo plus disponit ad novam plethoram generandam, uti dictum (Y) in hac paragrapho: hinc requiritur ut corpus sic firmetur, ut non tam facile boni sanguinis copiam accumulet. Fit hoc imprimis.

LABORE: qui & dissipat illa, quæ in otio retinentur; & firmat sic solida, ut non facile cedant liquidis implentibus. Quotidie duris laboribus exercitos, licet voracissimi simul fuerint, plethoricos tamen rarissime quis inveniet. Labores tamen non conveniunt, nisi prius sanguinis missione depleta fuerint vasa; aliter summum-periculum foret rupturæ vasorum adeo distentorum.

VIGILIIS. Inter causas nimix plenitudinis recensebatur & somnus multus (>) : vigiliæ ergo oppositum præstabant effectum.

CIBO ACRIORI POST EVACUATIONES. Molles cibi, facile subigendi à visceribus chylopoieticis, magnam chyli copiam largiuntur: unde quotidie sanguinis augetur quantitas, nisi validiori motu humorum diffletur superfluum. Hinc recens natis mollissimum lac jam materno in corpore subactum, dedit natura, quia incrementum adeo velox in hac ætate requirebat quotidianum humorum augmentum: ubi vero contrarium requiritur, ut in plethoræ curatione, tunc duriores cibi, non tam facile subigendi, & acriora simul aromatica condimenta stimulantia profunt: quia sic & minus chyli, adeoque cæteris paribus & minus sanguinis, conficietur; & aucto motu per acres stimulos, non fiet tam facilis aggestio humorum. Sed antequam evacuantibus minuta fuit distendentis liquidi copia, acria assumpta nocerent summopere, ob magnum metum rupturæ vasorum nimis plenum, si simul accederet per stimulantia factum motus augmentum.

OMISSIONE EVACUATIONUM SENSIM INTRODUCTA. Quantum disponant crebræ sanguinis missiones ad novam plethoram, dictum fuit l. 7. hujus §. Hinc exacuationes illæ omittendæ sunt; sed non potest simul & semel hoc fieri, quia omnis subita mutatio à consuetis ad insolita semper mala est; & imprimis in hoc casu. Per frequentes enim sanguinis missiones assuescit corpus, ut majorem sanguinis copiam accumulet; quæ nisi tollatur, omnes plethoræ effectus sequentur; & ideo sensim minuendæ sunt solitæ illæ evacuationes quoad quantitatem; majusque temporis intervallum inter singulas interponendum; ut sic gradatim minuantur sine ullo periculo. Hoc dum sic fit, imitamur salutare naturæ institutum in fœminis circa illud tempus, quo menstrua incipiunt deficere: naturaliter enim sensim minuuntur copia, & majori temporis intervallo tantum prodeunt; donec penitus desinant: si verò subito cesset solitus menstruorum fluxus, pessima inde solent sequi mala.

~~~~~

## MORBI COMPOSITI SIMPLICISSIMI, OBSTRUCTIO, ET VULNUS.\*

### OBSTRUCTIO.

§. 107. **O**BSTRUCTIO est obturatio canalis, transitum tollens liquido, per eum transjiciundo, vitali, sano, vel morbofo, orta ex excessu molis transituræ supra capacitatem vasis transmissuri.

Omniū simplicissimus morbus inter compositos foret Vulnus, supponens tan-



tum separatam cohaesionem partium solidarum : sed nullum potest fieri vulnus ullius momenti , quin effundantur liquida vasis contenta ; quæ tunc effusa suam sequuntur naturam : hinc spontanæ degeneraciones liquidorum prius debebant considerari. Præterea canales discissi in vulnere primo emittunt contenta liquida : postea clauduntur & tenuiora liquida dimittunt ; tandem , illis obturatis fit obstructio , & cessat liquidi effluxus , ut in historia Vulneris in genere patebit. Hinc secundum dicta in §. 16. debebat præmitti obstructio , quæ in omni vulnere obtinet.

**OBSTRUCTIO EST OBTURATIO CANALIS &c.** Hæc est generalissima obstructionis idea , supponens impedimentum qualecumque , quod tollit transitum liquidorum per canales. Intelligitur hic canalis nomine imprimis omne vas , per quod continuo liquidum fertur ; uti fit in arteriis & venis : illa enim vasa , per quæ non semper sed tantum certo tempore fluit liquidum , potius emissaria vocantur : quamvis tamen & in illis obstructio nasci possit ; uti v. g. in ductibus biliosis , urethra &c. toties observatur.

Omnia corporis nostri liquida vel per vasa continuo motu feruntur vel in majoribus alveis collecta tantum aliquo tempore hærent. Videtur jam in vasis obstructio locum præcipue habere ; in majoribus alveis vix vel rarissime : nam licet v. g. in vesica hæreat calculus , nisi maximus fuerit , & totum vesicæ cavum perfecte impleat ; non faciet obstructionem , nisi ubi ex vesica in urethram pellitur. Dum polyposæ concreciones in sinubus venosis , vel & in cordis cavis hærent , non faciunt obstructionem , nisi quando ex majoribus his receptaculis in canales pelluntur.

**VITALI , SANO.** Post datam generalem definitionem obstructionis , jam consideratur , quotuplex sit illud liquidum , quod impeditur fluere per canales obturatos. Hoc erit vel vitale , quod per venas allatum cordis vi per pulmones & aortam pellitur , redditurum iterum ad cor pro sustinenda vita : sed vita diu potest subsistere , licet sanitas deficiat , hæc est enim perfectio omnium functionum simul : sed ut omnes functiones integræ sint , requiritur , ut omnes canales sint liberi : hinc plurimæ obstructiones sanitatis integritatem lædere possunt , vita salva adhuc. Sic si in minima renali fistula concretum hæreat calculi rudimentum , obstructio erit nata , tollens transitum liquido sano per hunc canaliculum transjiciendo ; nec tamen inde nascetur ullum notabile impedimentum liquidorum vitalium motui : tamen impedita erit actio illius canaliculi , quæ ad integram sanitatem requiritur.

**VEL MORBOSO.** Liquida morbosa dicuntur , quando sic degeneraverunt à naturali conditione liquidorum sanorum , ut lædant functiones ; nec refert , an hæc degeneratio fuerit morbi nati causa , an vero effectus. Sic v. g. inflammatoria sanguinis spissitudo , futuræ pleuritidis causa prædisponens , morbosum sanguinem facit , id est , aptum ad lædendum functiones : In variolis vero per vim morbi , purulenta labe inquinato toto sanguine , morbosa fit omnium humorum indoles , quæ non præexistebat ante morbum natum , sed per morbum facta fuit : sed jam liquida hæc morbosa per canales feruntur aliquando sola , aliquando cum reliquis fluidis nondum à sanitatis conditionibus aberrantibus : Obstructio ergo nata in canalibus poterit & impedire liquidi morborosi transitum : sic sæpissime in morbis apparet , humores morbosos vi vitæ superstitis ex uno loco ad alium per metastasim deferri ; parotides & purulenti crurum abscessus , in pleuritide & peripneumonia

pneumonia toties salutare, hoc evincunt. Dum in exquisita Podagra in subtilissimo liquido degenerans morbosum conatur natura deponere ad articulos pedum, si quacumque de causa impediatur ad loca illa consueta adferri, quanta oriuntur mala!

**ORTA EX EXCESSU MOLIS TRANSITURÆ &c.** Sic habetur accurata cognitio causæ proximæ omnis obstructionis. Compressio vasorum postea quidem numerabitur inter causas obstructionis; si tamen liquidum tam tenue sit, ut per vas compressione angustatum adhuc transfluere possit, nondum erit obstructio: nam obstructio non designat tantum difficiliorem transitum, sed totalem obturationem canalis.

§. 108. **Q**UÆ oriuntur ex angustia vasis, magnitudine molis fluxuræ, vel utrisque concurrentibus.

Tria hæc omnes possibiles obstructionis causas comprehendunt: vel enim liquidum per canalem transmittendum fit spissius, manente eadem canalis amplitudine; vel arctatur canalis, manente eadem meabilitate liquidi; vel denique & canalis angustia, & liquidi aucta spissitudo simul concurrunt. Inquirendum jam in causas, quæ vel singula hæc seorsim, vel utraque simul faciunt.

§. 109. **A**NGUSTIA vasis fit compressu externo, contractione propria, vel augmento crassitie in ipsis canalium membranis.

Recensentur hic causæ, quæ canales reddunt angustiores, manente eadem tenuitate liquidi transmittendi.

**COMPRESSU EXTERNO.** Dicitur tunc vas per *θύλιον* angustari. In canalibus nostris sectio perpendicularis ad axim circularis semper est: sed circulus inter figuras Hoperimétras maximam habet aream; hinc omnis compressio externa, mutando circulem figuram, minuet semper canalis capacitatem: si autem conciperetur vis externa comprimens æquabiliter agens per totum vasis ambitum, tunc non mutaretur quidem circularis figura, sed minueretur diameter; hinc pariter angustaretur cavum.

**CONTRACTIONE PROPRIA.** Tunc per proprium tonum dicuntur vasa contrahi. Naturalis autem est vasis nostris hæc contractio, qua nituntur latera vasorum propius accedere ad axim, simul ac causæ distendentes minuuntur: hoc autem maxime necessarium erat, ut liquidorum copia minuta posset tamen manere non interruptus humorum circuitus, per vasa plena quidem, sed contractione propria angustiora facta. Hinc ubi v. g. sanguinis jactura ingens tam subito fit, ut vasa se non possint contrahere tam cito, ut plena maneant, interruptitur circulatio, & fit syncope; imo & mors ipsa subitissimas inanitiones secuta fuit sæpius. Hæc ergo contractio propria vasis nostris si augeatur à causa quacumque, vel minuatur imperus vel copia liquidorum distendentium, effectus erit idem, nempe angustatio major canalium.

**VEL AUGMENTO CRASSITIEI IN IPSIS CANALIUM MEMBRANIS**

NIS. Patet evidenter, tunc minui canalis cavi capacitatem; tumentibus membranis. Ut distinguerent hanc causam obstructionis à  $\theta\lambda\iota\phi$ , vocaverunt  $\sigma\mu\chi\upsilon\pi\iota\alpha$ , sive angustationem loci, quando latera canalium aucta propria substantia angustarent cavum.

§. 110. **M**OLECULARUM moles augetur viscositate fluidi, vel errore loci.

In hac paragrapho considerantur illa vitia fluidorum, per quæ manente eadem canalis capacitatem nasci potest obstructio.

Elementa constituentia humores nostros videntur habere determinatam magnitudinem, & quidem proportionalem ultimis angustis vasorum, per quæ fluere debent. Sic elementum rubrum sanguinis tam parvum debet esse, ut per ultimas angustias arteriæ minimæ rubræ transire possit: idem in reliquis tenuiorum liquidorum seriebus verum est. Si ergo à quacumque causa augeatur volumen in singulis elementis liquida constituentibus, hærebunt circa ultimos canalium fines; quia, ut docuerunt Lecuwenhoeckii observata, per ultimos fines, v. g. arteriæ rubræ unicum elementum sanguinis rubrum, & adhuc cum quadam molestia, transit; hinc si expanderentur in majus volumen, manente eadem massa corporea, hæc elementa, liber impediretur transitus: ideo & illa obstructionis causa concipi potest, licet forte rarius contingat.

Sed aliud considerandum præterea est in liquidis vitium, forte multo frequentius. Fluidorum omnium partes, ut demonstraverunt Physici, quadam vi inter se cohererent; idem & in nostris humoribus obtinet: ut vero per ultimas vasorum angustias transeant fluida, requiritur, ut moleculæ singulæ, separatæ à cohesione cum vicinis, transeant solitariae: hinc debent potentia moventes, quibus humores pelluntur per vasa, posse superare hanc cohesionem. Si ergo à quacumque causa augeatur cohesio elementorum fluida constituentium eo ulque, ut non patiantur se ab invicem separari actione cordis & vasorum, manebunt adunatae moleculæ, quæ per ultimos vasorum fines tantum transire possent solitariae; hinc nascetur obstructio: ubi vero hoc vitium in fluidis obtinet, vocatur **AUCTA VISCOSITAS**, quia non habetur aliud vocabulum magis generale: designat autem tantum illam conditionem physicam, quæ in fluido, elementis nimis coherentibus, auget immeabilitatem.

**ERRORE LOCI.** Dicitur hoc vitium obtinere, quando humor bonus ingressus fuerit vasa minora, in quibus naturaliter esse non debet, & per quorum ultimas angustias transire non potest. Sic v. g. dum sanguis ruber arterias serosas vel lymphaticas, in suis initiis dilatatas, ingreditur, dicitur peccare Errore loci: hinc, licet omnia liquida corporis humani requisitas ad sanitatem dotes obtineant, & omnia vasa integra sint, modo hæc, parum dilatata in suis initiis, admiserint crassiora fluida, possunt nasci obstructiones, & quidem pertinacissimæ. Frequentissima autem hæc est inter obstructionis causas: nam aucto circuitus humorum impetu & velocitate sanguis ruber statim ingreditur aliena vasa. Leviter tantum fricati oculi in tunica adnata rubent, cum naturaliter in his vasis sanguis ruber non adit. Valido cursu exercitatus homo totam cutim externam habet ruberrimam, ob sanguinem rubrum in vasa minora adactum. Quamvis autem proprie loquendo per erro-

rem loci non augeatur molecularum fluida constituentium moles, tamen ratione habita vasorum, in quibus per errorem loci hærent, nimia illarum magnitudo causam obstructionis facit.

§. 111. **E**X utrisque vero à concursu causarum utriusque. (109. 110.)

Possunt enim causæ angustantes canalem, & causæ facientes immeabilitatem liquidi transjiciendi simul concurrere.

Hinc apparet, ad quantam simplicitatem totum hoc possit reduci, dum sola causa proxima omnis obstructionis consideratur: tota difficultas est, quod causæ remotæ adeo multiplices & variz sint, quæ nunc ordine enumerabuntur.

§. 112. **V**ASA externe comprimuntur.

1. A tumore vicino plethorico, inflammato, purulento, scirrhuso, cancroso, œdematoso, ampuloso, steatomatode, atheromatode, meliceride, hydatidico, aneurismatico, varicoso, tophoso, puitoso, calculoso, calloso.

1. TUMORE Medicis & Chirurgis tumor vocatur partis, vel totius corporis, in naturali magnitudine factum augmentum à quacunque demum causa contigerit. Dum ergo pars tumens majorem occupat locum, quam in sanitate solebat, necessario adjacentia vasa comprimendo angustat. Tumores autem fiunt, vel à fluidis replentibus distenta ultra naturalem magnitudinem vasa, vel à liquidis extra vasa effusis, vel à vasis concretis cum fluidis contentis inspissatis. Recensentur jam præcipuæ tumorum varietates.

PLETHORICO. Quando nempe vasa arteriosa & venosa, rubrum sanguinem vehentia, nimia copia distenduntur, & distenta comprimunt minora vasa vicina. Tumoris autem plethorici effectus imprimis in cerebri actionibus latis apparet; cranium enim semper plenissimum est, sanguis ruber tantum in pia matre observatur, & in arteriis rubris majoribus per medullarem encephali substantiam dispersis, & medullam oblongatam ambientibus; in cortice cerebri naturaliter nunquam sanguis ruber invenitur: hinc distentis vasis rubrum sanguinem vehentibus, cum dura cranii olla cedere nequeat, comprimuntur reliqua vasa corticis & medullæ; unde omnes functiones cerebri turbantur: cerebellum autem, cerebro longe firmitus, minus ab hac causa afficitur.

INFLAMMATO. Dum vis vitæ urget liquidum vitale in vas inflammatum; necessario illud vas distendit, quia liquidum impulsus non potest penetrare vas obstructum: hinc omnis impetus liquidi impulsus dilatat vasis latera ante locum obstructum; ergo vicina adjacentia vasa comprimuntur: unde humorum circuitus non tantum impeditur in vasis inflammatis, sed etiam in vasis vicinis: hinc tumoris augmentum, & imprimis dum membrana cellulosa inflammatur, maximi tumores fiunt, sic ut aliquando digitus inflammatus decuplam crassitiem habuerit.

T ij

**PURULENTO** : Qui duplex est , vel enim pus , propriis membranís coëcentibus clausum , vomitam facit purulentam ; vel ruptis his repagulis in vacua vicina loca effunditur ; utroque modo pressione vasa vicina angustat ; hinc nunquam fere in partibus subcutaneis apostema est , quin cutis vasa à pure collecto pressa inflammantur.

**SCIRRHOSO , CANCROSO**. Qui fit à glandula tumente , dein indurata : hinc vasa per proprias glandulæ membranas dispersa , uti & in locis vicinis , comprimuntur , ideoque varicosæ venæ majores scirrhos comitantur semper. Parotides schirrosæ factæ & tumidæ , dum adjacentes jugulares venæ comprimunt , impedito sanguinis à capite reditu , quanta sæpe fecerunt mala ! sub axillis & in inguinibus scirrhosæ factæ glandulæ , comprimendo venas , arterias , nervos adjacentes , partes subjectas omni vitalium humorum influxu privabunt : qualia multa Exempla in observatis medicis habentur. Ubi vero scirrhosus in canceri malignitatem degenerat , aucto tunc semper tumore , plus nocet.

**ŒDEMATOSO**. *Ōidhma* ut testatur Galenus , ( a ) *Antiqui & tumorem idem appellabant* : & alibi , ( b ) omnes tumores præter naturam ab Hippocrate *ŏidhma* vocatos fuisse , asserit ; postea recentiores dicit ab antiquo usu recessisse , & tumores varios distinctis nominibus vocasse : si enim cum dolore essent , vocabant phlegmonas ; si sine dolore essent & duri , scirrhos ; si sine dolore & molles simul essent tumores , tunc proprie *ŏidhma* dicebantur. Tumores autem illi molles indolentes apud Hippocratem non vocabantur simpliciter *ŏidhma* , sed addebatur semper aliud vocabulum , ut distingueret ab aliis tumoribus. Sic in Prognostico & Coacis prænotionibus hi tumores vocantur , *ŏidhma μαλακὰ , ἠρόδια , το δακτύλῳ ὑπέκονται* ; tumores molles , indolentes , digito cedentes. Hac ergo sub significatione tumores illi hodie plerumque intelliguntur , & hærent in membrana cellulosa , quæ vera œdematis sedes est. Materia autem horum tumorum est plerumque aqua , ut in hydropse anasarca patet ; vel & aliquando lentescens magis pituitosum liquidum , ut in Leucophlegmaticis. Sed membrana cellulosa , horum tumorum sedes , omnia vasa ambit ; hinc tumores ibi nati vasa angustare possunt , & mirabiles sæpe morbos ab hac tantum causa pendentes producere.

**AMPULLOSO** &c. Numerosissimæ in variis locis corporis tales sunt ampullæ , sive folliculi ; tota cutis externa , interior superficies oris , œsophagi , ventriculi , intestinorum &c. similibus folliculis obsidentur undique. In his folliculis ab arterioso sanguine secretus humor pinguis , vel mucilaginosus , per proprium emissarium exit , lubricandis & inungendis his partibus interserviens : si jam à quacumque causa obstruatur emissarium talis folliculi , non poterit evacuari contentus in cavo folliculi liquor , augebitur copia liquidi retenti , & distendetur folliculus ; sic ut ex invisibili parvitate in molem aliquot librarum aliquando excreseat : minimæ illæ cryptulæ , quæ in capillata capitis cute unctuosum illud smegma præbent , quod pilos inangit & lubricat , aliquando in maximas moles excreseunt : *talpa* solent vocari apud Chirurgos. Observatores plurima exempla similium tumorum in aliis corporis locis habent.

Hæc jam est communis idea ampullosorum tumorum : sed variant ratione materiæ contentæ , & inde varia nomina acceperunt , quando enim materiem pulti su-

( a ) Commentar. IV. Aphor. 34. Charter. Tom. IX. pag. 155.

( b ) Comment. V. Aphor. 65. Charter. Tom. IX. pag. 239.



milem continebant , dicebantur *ATHEROMATA* : si materiam ambiguae fluiditatis inter mel & ceram continerent , vocabantur *MELICERIDES* : si pinguedini similem duriorē in se haberent materiam , vocabantur *STEATOMATA*. Sed de his jam alia occasione dictum est , nempe §. 75.

**HYDATIDICO.** Hydatides communi hodie opinione (*ὕδατις* enim olim vocabatur pinguedinis superiori palpebrae substratae extrema parte incrementum ) (a) vocantur membranacei sacculi variae magnitudinis in partibus corporis externis & internis saepe deprehensi , aqueo humore turgidi. Valde autem dubium videtur , an semper ad tumores ampullosos referendi sint : hi enim tumores , ut dictum fuit , erant tantum naturales folliculi dilatati , hinc magnitudine aucti , sed hydatides observatae fuerunt in talibus locis , ubi folliculi illi ab Anatomicis non adeo detecti erant : integram enim placentam uterinam in hydatides mutatam observavit Ruyschius (b). Imo observaverunt , hydatides tales , ab omni nexu cum se invicem vel vicinis partibus liberas , in majori sacco membranaceo conclusas , fluctuare ; & quod magis mirum est , majores hydatides continebant in suo cavo minores alias , pariter ab omni nexu liberas (c) : dum una cum suis folliculis coquebantur aquae Hydropici mortui , visum fuit ipsam folliculorum substantiam , quae membranacea apparuerat , fuisse dissolutam (d). Hinc concluderunt Celeberrimi Viri , hydatidum pelliculas non esse partes organicas , sed ex liquido incrassato forte natas fuisse. Nihil tamen repugnat , quin & naturales folliculi aqueo humore distenti expandi possint in magnam molem : tales hydatides in palpebrarum limbis observantur saepius , degenerantibus forte sic glandulis sebaceis hic positis : in ovario muliebri sic in satis amplam magnitudinem ovum expansum humore plenum invenit Ruyschius (e).

Tales autem tumores Hydatidicos passim in variis locis corporis inventos fuisse , & modo memorata Auctorum loca invincunt , & innumera alia apud Bonetum , & alios Observatores , habentur Exempla.

**ANEURISMATICO.** Aneurisma , vel potius Aneurisma dicendum ; *ἀνὴρ τῆ ἀνύσματος* , designat arteriae integrae dilatationem praeternaturalem in quadam parte , sic ut arteria , quae antea uniformem canalis conoidei figuram habebat , nunc in quadam parte debilitata expandatur in sinum , quae omnia vicina comprimendo pessima potest producere mala. Sic ab aneurismate , circa vitalia viscera haerente , costas , claviculas , sternum , elevata non tantum , sed & fracta , partem internam vertebrarum dorso fere ad spinalem medullam usque contritam & consumptam miratus fuit sagacissimus Albertini (f) : costas penitus cariosas , imo cum osse sterno in nihilum redactas ab aneurismate vidit Ruyschius (g).

**VARICOSO.** Quod Aneurisma dicitur in arteriis , illud , si in venis obtineat , vocatur Varix , frequentius longe malum quam Aneurisma ; quia & venae facilius cedunt causae distendenti , & sanguis tardius movetur in venis quam in arteriis , hinc a levi satis obstaculo , impedito motu sanguinis venosi venae ab accumulato sanguine distenduntur , & varicosae fiunt : frequens imprimis malum gra-

(a) Gorraei definit. Medic. pag. 656.

(b) Observat. Chirurg. pag. 33.

(c) Acta Petropolitana. Tom. I. pag. 379. 382.

Acad. des Sciences l'an 1721. Mem. pag. 222.

(d) Academ. des Sciences l'an 1719. Hist.

pag. 49.

(e) Observat. Chirurg. 17.

(f) Institut. Bononiens. pag. 383.

(g) Observat. Chirurg. 37. 38.

vidis mulieribus, dum distentus uterus venas Iliacas premens impedit, ne venæ per crura & femora dispersæ se tam expedite possint evacuare; hinc tunc apparent in illis varicosi illi tumores, crurum imprimis.

**TOPHOSO.** Tophi proprie dicuntur, quando per causas morbosas quascunque lamellæ os majus constituentes à se invicem removentur, elevantur, & tumorem constituunt, non omnino durum instar ossis, sed scissilem utcumque, habentem firmitatem, qualem habent juniorum animalium cornua, dum primo protuberare incipiunt. Tumores illi in omnibus illis morbis, qui ossa imprimis afficiunt, satis frequentes sunt, ut in Rachitide, Scorbuto, & omnium maxime in Lue Venerea: in quo morbo tumores illi periosteï vasa comprimendo, nervos hic tam sensibiles distendendo, adeo molesti sunt. Huc & referri possunt exostoses, ubi ipsa ossis duri substantia in tumorem elevata comprimit vasa vicina.

**PITUITOSO.** Ubi gluten naturale, vel morbosum, accumulatum cava; quibus continetur, distendit, & adjacentia vasa premit.

**CALCULOSO.** Quanta mala fiant à calculis in renibus, ureteribus, vesica hærentibus, mole sua & pondere vasa comprimantibus, quibus accumbunt, omnibus notum est.

**CALLOSO.** Callus vocatur partis membranaceæ increscens moles, una cum duritie & insensibilitate, orta à valis concretis inter se, imprimis per compressionem externam. Causa proxima calli est compressio vasorum, expressio liquidi contenti, & concretio laterum vasorum inde nata. In recens natis nullibi callus apparet, sed postea dum incedere incipiunt, toto pondere corporis sustentato pedum plantis, incipiunt ibi vasa complanata expresso liquido concrelescere & callum facere. In fabris ferrariis ab attritu mallei sæpe manuum volæ cornu duritiem acquirunt. Callus autem omni vitali influxu humorum destitutus ex sua natura multum mali facere nequit, sed mole sua & duritie premens vivas partes subiectas inflammationem & alia molestissima mala facere potest: sic sæpe pedum omnem fere usum sustulit callus durissimus, circa prominentiam ossis metatarsi pollicem pedis sustentantis natus, dum totum pondus corporis sustentatum hac parte apprimebat durum callum subiectis partibus inflammatis & dolentissimis. Quando à vi externa comprimente papillæ nervosæ per cutim dispersæ, una cum valis suis sanguiferis lymphaticis &c. quibus coronantur, complanantur, nascitur inflammatiuncula, postea consolidantur omnia in corneam duritiem, vocantur tunc clavi: familiare satis, nec minus molestum malum, in digitis pedum, & aliquando in aure externa occurrens, ubi plicæ illæ cartilagineæ nimis premuntur capitis tegumentis; vel quando in unum tantum latus decumbere possunt ægri, ob vulnera, empyema &c. & tunc pulvinari aurem externam assiduo apprimunt. Tales clavi sunt veri calli, sed durissimi, & in cute externa cum semper latiores sint, sensim convergant, descendendo infra cutim, hinc ab hac figura nomen habuerunt; & quia partibus vivis nervosis cohærent, hinc pressus talis clavus tantum dolorem facit. Tales jam calli à compressionem etiam in internis nasci possunt. Vidi in cadavere puellæ lienem solito plus tumentem, appressum ultimæ costæ, habuisse tunicam externam in illo præcise loco callosam & longe crassioram.

2. A fractis, luxatis, distortis, distractivæ partibus duris, comprimantibus vasa flexilia.

Recensentur hoc numero angustationes vasorum per compressionem externam facta, quæ oritur ex eo, quod partes duræ corporis humani, ossa nempe & cartilagine, ex naturali suo situ dimotæ, vasa adjacentia presserint: simul & hic considerantur illæ obstructions, quæ à ligamentis, ossa neccentibus, distortis vel distractis fiunt in vasis, quæ horum ligamentorum substantiam constituunt.

2. FRACTIS. Quando os in magna fragmenta solvitur, dicitur fractura; quæ nunquam adesse potest, quin plurima vasa inter ossis lamellas decurrentia compressa, imo destructa sint: periosteum vasa necessario ob eandem causam debent comprimi; imprimis si ossis fracti partes ex naturali situ remotæ fuerint, tunc enim simul omnia vicina vasa comprimunt.

LUXATIS. Quando ossis articuli caput ex cavo, in quo movebatur, excidit, luxatio adesse dicitur: sed hoc nequit fieri, quin ligamenta articulationem ambientia ab elapso osse comprimantur, uti & vicina alia quævis adjacentia vasa. Dum caput ossis humeri luxatum in axillæ cavo hæret, sæpe ibi maxima vasa per axillam decurrentia comprimit; unde postea pessima mala, imprimis à magnis truncis nervorum hic decurrentibus compressis.

DISTORTIS DISTRACTISQUE. Distorsio & distractio proprie in ossibus locum non habet, sed in ligamentis ossa imprimis articulata neccentibus. Distorsio autem fit, quando, ossibus articulatis manentibus in suo situ, circumtorquendo quasi magna vis infertur ligamentis hæc ossa inter se neccentibus: distractio vero, quando nimia vi, v.g. pondere ultra vires elevato, elongantur ligamenta articulorum. Facile intelligitur, neutrum fieri posse, quin plurima vasa per ligamenta decurrentia comprimantur & angustentur.

3. Ab omni causa, quæ vasa nimis trahit, & elongat sive tumore, sive pressione partis extra debitum locum positæ, sive vi externa trahente.

Non possunt canales flexiles elongari, quin minuat horum canalium cavitas. Hoc ad oculum apparet, dum tubi vitrei ad lampadem flexiles redditi elongantur. In canalibus majoribus, sic elongando angustioribus redditis, non statim nascitur quidem obstructio, sed dum idem fit in canalibus minimis, qui per ultimas suas angustias singula tantum fluidorum elementa transmittunt, facile apparet obstructionem ab hac causa nasci debere. Dum in torturis maleficorum ligamenta articulorum ponderibus appensis vel trochleis distrahuntur, sequenti die dolor, inflammatio, rubor obstructionem ab hac elongatione vasorum natam satis testantur. Omnes jam tumores, distendendo circumpositas membranas, vasa harum partium elongant: ossa, muscoli, tendines naturali suo situ mora idem efficiunt: omnis vis externa trahendo partes elongans huc pariter referri potest.

4. Ab externis comprimentibus, quo vestes arctæ, fasciæ, pondus incumbentis corporis quieti in unam partem, ligaturæ &c. pertinent, motus, attritus, amplexus partis ad alia corpora.

In prioribus numeris recensitæ sunt illæ causæ, quæ vasa angustando obstructio-

nem faciunt, quatenus nempe partes corporis mole auctæ, vel ex situ naturali remotæ, vicina vasa comprimunt: simul & recensitæ sunt illæ causæ, quæ elongando vasa illorum capacitatem minuunt. Hoc numero recensentur omnia illa, quæ externam superficiem corporis premendo vasa reddunt angustiora.

**V E S T E S A R C T A E.** Per has enim omnia vasa in exterioribus corporis posita comprimuntur; omnium maxime venæ, quia & facilius comprimendæ, & in superficie corporis magis ponuntur: arteriæ vero & fortiores sunt & magis tuto reconduntur. Sed venis sic compressis tanto major copia sanguinis continetur in arteriis: hinc plethoræ effectus nascuntur. Ubi ergo in quadam corporis parte vasa tam debilia sunt, ut à minimo augmento impetus vel copię fluidi rumpantur, vel nimis distenta apertis osculis ultimis in cava corporis loca eructent liquida, quæ naturaliter retinere debuerant; à vestibis nimis arctæ corpori appressis oriuntur sæpe magna mala. Sic Hæmoptoë vel mictu sanguinis laborantes, ab hac sola causa toties sanguinem apertis vel ruptis vasibus effundunt. In fœminis hystericeis, viris Hypochondriacis, Asthmaticis &c. in quibus minima mutatio æquilibrii inter solida & fluida tam enormes effectus facit, tantum ilico solamen apparet, dum vestes nimis arctæ solvuntur.

**F A S C I A E, L I G A T U R A E.** Pro vario adstrictionis gradu diversos habent effectus: leviter enim adstrictæ partes nimis laxas & distentas firmant, sicque fibrarum nimis debiliū defectum suppleunt: si fortius adducantur, vasa angustant, imprimis venas; si adhuc plus stringantur, etiam & arterias: unde sæpe inflammatio, imo ipsa gangræna nascitur. Dum ossa fracta, & reposita in situ, retinere volunt Chirurgi, inter alia auxilia & fasciis circumductis partem firmant, quæ si arctius adstrictæ fuerint, cum post aliquot horas semper solet nasci tumor major in parte affecta, inflammatio fit & magnus dolor: si tunc querelas ægri negligant sæpe in his casibus nimis crudeles Chirurgi, subito postea natam gangrænam turpi errore dolent.

**P O N D U S I N C U M B E N T I S &c.** Dum in morbis oritur illa insensibilitas, qua molestias corporis & leves dolores non adeo sentiunt ægri, ut sæpe in morbis acutis sit; vel dum propter acerbissimos dolores podagricos, rheumaticos &c. omnis fere corporis motus prohibetur, tunc totum pondus corporis jacentis premit partes, quibus incumbunt ægri; hinc vasa per has partes decurrentia angustantur, imo penitus sic comprimuntur sæpe, ut omnis vitalis influxus tollatur; unde gangræna & sphacelus nascuntur. Imprimis autem hæc mala oriuntur illis in locis, ubi dura ossa, paucis integumentis tecta, prominent; ut circa scapulas, os sacrum, os coccygis, ossis ilii eminentem marginem, trochanteres ossis femoris, calcem &c. omnium frequentissime circa os coccygis, quia dum homo horizontaliter dorso incumbit, lectus semper in medio deprimitur, superius & inferius assurgit, unde totum corporis pondus soli fere ossi coccygis innititur paucissima tecto pinguedine: hinc partes superimpositæ huic ossi hac compressione omni vitali influxu privatæ citissime moriuntur. Unicum remedium est, ut situs ægri sæpe mutetur, & nudo corpore mollissimæ alutæ incumbant.

**M O T U S, A T T R I T U S, A M P L E X U S &c.** Quando nempe pars corporis humani duro obstaculo occurrit, necessario comprimuntur vasa flexilia: nec refert, an pars mota occurrat duro resistenti corpori, an vero atteratur ad obstaculum; vel denique amplectendo durum corpus partibus mollibus idem fiat. Qui non assueti longum iter pedibus conficiunt, illos inflamos habent; qui remis scapham movent

movent insolito labore , manus ob validum amplexum habebunt inflammatas ; imo si pergant pertinacius , vesiculæ fere gangrænosæ attolluntur.

§ 113. **C**ONTRACTIO vasi propria aucta , maxime spiraliū fibrarum , tum quoque longarum , cavitatem arctat , oriturque , 1. ab omni causa augente vim elasticam fibræ , canalīs , visceris ( 31. 36. 40. 50. 51. ) ; 2. ab tumore vasculorum minorum , quorum contextu majorum latera & cava fiunt , nimis impletorum ; 3. ab imminuta causa vasa extendente , sive inanitio , sive inertia fuerit : unde dissecti canales liquida propria coërcent brevi.

Causa proxima omnis obstructionis est tantum una , semper eadem & simplex , nempe excessus magnitudinis materiæ per canalem transmittendæ supra capacitatem ejusdem canalīs.

Hæc vero causa proxima omnis obstructionis habebat pro suis causis , arctationem canalīs , vel incrementum molis in elementis fluidi transmittendi per canalem , vel utrumque simul. Prima causa , qua arctabatur canalīs , erat compressio externa , cujus causæ ad quatuor classes redactæ præcedenti paragrapho enumeratæ fuerunt. Sequitur jam illa angustatio canalium , quæ fit à vi contractili vasorum aucta.

Vasīs autem nostris talem inesse vim , qua nituntur proprium angustare cavum , extra omne dubium est : per hanc vim enim arteriæ , dilatatæ à sanguine vi cordis impulso , cessante cordis actione contrahuntur iterum in pristinam dimensionem. Hanc autem vim contractilem augeri posse , pariter certo constat. Dum ex morbis acutis resurgunt ægri , perduto sæpe in obelis dimidio pondere corporis , omnia collapsa sunt ; manet tamen æquabilis humorum circumductio , quæ fieri non potest , nisi plena sint vasa : minuta ergo in tantum liquidorum copia , nisi vasa se plus contraxissent , quam antea solebant , non potuissent vasa plena manere. Sed etiam manente eadem liquidi copia videmus sæpe in vasīs quibusdam subitissime oriri majorem contractilitatem. Dum subitaneo timore homo percellitur , mox tota contrahitur facies , pallent labia , genæ , oculi &c. sanguis ruber contractis vasīs versus interiora repellitur , & circa cor & pulmones in majoribus alveis collectus stagnat fere ; unde intolerabilis anxietas , cordis palpitatio , syncope & pessima alia , sæpe tota vita manentia , mala. Constat ergo , vasa nostra vim habere contractilem & illam posse augeri.

Considerandæ jam sunt causæ præcipuæ , quæ propriam vasorum contractilitatem augere possunt.

1. Omne illud , quod auget elasticitatem , facit ut plus resistant fibræ , & vasa ex his composita , distendenti liquido ; & cessante causa distendente , majori vi arctent cavitatem suam. Hæ autem causæ recensitæ sunt numeris hic citatis : unicum sufficiet hic repetere exemplum. In stabulis bene pastus quiescat equus , augebitur brevi corporis moles , laxata vasa plus distendentur , ubi vero quotidiano exercetur & satis valido cursu , firmitioribus redditus per exercitia solidis partibus , brevi incipit subsidere turgens moles , & aucta sic vasorum contractilitate difflatur de corpore accumulatum liquidum.

2. Constat per observata Anatomica hodierna certissime , quod membranæ , quæ



sua convolutione canales majores constituunt, constant mirabili vasorum textura. *Ruyfchius* (a) demonstravit suis injectionibus, arteriarum coronariarum propaggines per aortæ membranas dispergi; uti & per ramos majores arteriosos ex aorta mox oriundos. Invenitur & hic tunica cellulosa; inveniuntur folliculi præparantes & emittentes unctuosum illud linimentum, quo interni arteriarum parietes obducuntur: omnia ergo tumorum genera, §. 112. n°. 1. recensita, & hic fere locum habere possunt: arteriæ enim in his membranis possunt fieri aneurismaticæ, vel & inflammatorie distentæ; venæ possunt fieri varicosæ; loculi possunt mutari in tumores ampullosos; vasa lymphatica in phlyctænas & hydatides. Sed evidenter patet, tumentibus vasis has membranas constituentibus, debere arctari cava canalium, qui ex his membranis convolutis facti sunt. Observatum fuit, cervos matatos, post diuturnum & velocissimum cursum, habuisse totam aortam in externa superficie fere nigram, ob nimis impleta impulso sanguine hæc vasa. Sed non ita facile apparet, quare vis contractilis propria vasis augeatur à majore tumore vasculorum membranas vasis majoris constituentium, cum augmentum contractilitatis tantum videatur pendere à majori elasticitate & fortiori actione fibrarum muscularium: sed si consideretur, quod liquidum vi cordis impulsus distendens majorem canalem, eadem hac actione urgeat latera ejusdem canalis, hinc comprimat omnia vasa minora per membranas majoris canalis dispersa, patet, quod cessante hac causa distendente, mox iterum repleantur vascula illa, sicque conspirent cum contractilitate propria canalis, ut cavum minuant, & hoc sensu tumor impletorum nimis horum vasculorum juvat contractilitatem propriam majorum canalium, qui ex illorum contextu fiunt.

3. Dum cor expellit vi sua musculari sanguinem cavis suis contentum in arterias plenas semper naturaliter, sequitur necessario illas debere distendi eo usque, ut capere possint omnem sanguinem corde expulsus: hinc cordis systole est causa extendens arterias. Sunt ergo tunc arteriæ in statu violento, & simulac cor cessat impellere, reagunt elasticitate & vi sua musculari, sicque cavitatem suam arctant; sed potest capacitas arteriarum esse major vel minor, licet arteriæ tamen plenæ sint: minuta enim liquidi contenti copia plus contrahuntur arteriæ. Binæ ergo causæ sunt, quæ arterias distendunt, nempe cordis vis sanguinem in arterias propellens, & copia sanguinis in arteriis jam contenti: si minuatur cordis vis, inertia totius circulationis adest; si minuatur copia liquidi distendentis, inanitio peccat. Utroque in casu vis distendens vasa minuitur: sed canalium omnium capacitas pendebat à binis causis contrariis, nempe ab impetu & copia liquidi per vasa mori, & à vi contractili laterum resistente causis distendentibus; simulac ergo causæ distendentes minuuntur, vis contractilis majorem effectum habet, id est, angustantur vasa. Hinc post mortem propria contractilitate, per frigus aucta, cessante cordis vi distendente, arteriæ fiunt angustissimæ, & omnem sanguinem suum fere exprimunt in venas facilius dilatabiles. Vix credi posset, quantum contrahi possint vasa corporis, dum causæ distendentes cessant, vel minuuntur multum. Dum Cholera furibundo impetu sursum & deorsum evacuantur humores tanta copia, mox sic contrahuntur vasa, ut pulsus vix possit sentiri; venæ antea conspicuæ evanescent penitus, facies contracta penitus sic mutetur, ut vel ab amicis post paucas

(a) *Epist. Anatom. Problem. III. Tab. 3. fig. 1. 2. 3.*

horas vix agnoscantur tales ægri. Uterus in gravidis adeo distentus, excusso fœtu & secundinis, quam cito contrahitur, quam arctum habet post paucas septimanas cavum. Plura talia possent adduci, hæc pro Exemplo sufficiant.

U N D E DISSECTI CANALES LIQUIDA PROPRIA COERCENT BREVI. Ratio satis evidens est: dum sanguis cordis vi pellitur in arterias, quæ major est resistentia circa fines arteriarum, eo plus dilatat arterias; sed ubi arteria discissa est, resistentia nulla fere est, & libere effluit per apertum vulnus sanguis; hinc non distenditur arteria, sed propria contractilitate sensim plus contrahitur, donec tandem exitum liquidi effluxuri impediat omnino. Hinc dimidiato discissa vasa pertinacissimam sæpe Hæmorrhagiam faciunt, quæ curatur felicissime, si integre discindantur, ut in Vulnerum historia postea dicitur.

§. 114. **A**UGETUR crassities in ipsa membrana vasis, 1. ab omni tumore (112. N. 1.) orto in iis vasis, quæ unita & contexta membranam efficiunt; 2. ab callis ibidem factis, cartilagineis, membranosis, osseis (51.)

1. De hoc dictum fuit §. 112. n°. 7. & §. 113. n°. 2.

2. Demonstratum fuit §. 39. quomodo per ipsius vitæ actuositatem minima vasa plurima, liquido expulso, contiguis factis lateribus, concrecant; & imprimis ab hac causa debitum robur in solidis partibus nasci. In tenella ætate omnia vasa debilissima cedebant facile distendenti fluido, elongabantur pariter: hinc eo majus incrementum, quo origini suæ propior homo est. In adulto homine major requirebatur firmitas corporis, & à concretis plurimis vasis minoribus, majus robur accedebat firmis partibus, & vera nascebatur in multis partibus callositas; eo semper major, quo vita actuosior & diuturnior fuerat: hinc in decrepita senectute, vel per nimios labores, tandem nimia nascebatur rigiditas. Ut autem maneat functionum integritas, requiritur debita flexilitas in vasis, ut cedere possint impulsis liquidis; per callositatem nimiam flexilitas Vasorum minuitur, & membranae per callum factum reddita crassiores arctant cavum vasis quod constituunt. Observata Medica jam docuerunt in maxime longævis, in cartilagineam, imo & osseam, duritiem transire majores arterias. In Actis Anglicanis habetur, quod in cadavere senis centum & triginta annorum invenerint Aortam & Iliacas arterias pro maxima parte cartilagineas (a). In longævo, & validissimis cursibus exercitato animali (Cervo) arterias in basi cordis toties osseas invenerunt, quæ tunc in officinis *Os de corde Cervi* vocantur. Verum tale os in media carne mulculosa cordis humani inventum, quod quatuor pollices cum dimidio longitudine æquabat, latitudine vero pollicem, cum tamen vasa majora cordis minime ossea forent, tantum subcartilaginea: nec poterat ultimæ senectutis vitio adscribi hoc malum, cum observatum fuerit in cadavere viri 72 annos nati (b).

(a) Vide & Acta Lipsiens. anni 1709. pag. 119. (b) Academ. des Sciences Hist. pag 34. l'an 1726.

§. 115. **P**ARTIUM fluentium moles augetur, ut immeabilis fiat, vel 1. mutatione figuræ sphaericæ in aliam majori superficie incurrentem in aperturam vasculi; vel 2. adunatis pluribus prius sejunctis in unam massulam.

Pertractatis causis illis obstructionis, quæ arctando vasorum cavitates viam præcludunt liquido transfluxuro, sequitur ut considerentur illæ mutationes fluidorum, per quas evadunt inepta, ut fluant per illas vasorum angustias, per quas in sanitate naturaliter fluere debebant.

1. In sanguine hominis sani, projecto ex cordis cavis in arterias, hærent tot diversæ magnitudinis partes, quot sunt in corpore distinctæ vasorum series: per singulas enim vasorum decrescantis amplitudinis series proportionales fluunt moleculæ fluidi. Hoc quam maxime necessarium erat, ut omnia vasa manerent impleta: nisi enim in sanguine rubro forent tam magnæ particulæ, quæ tantum possent transire per ultimas angustias arteriæ sanguinem rubrum continentis; excluderentur vero ab omni vase, cujus diameter minor erat ultimo fine arteriæ rubræ; omnis sanguis dilaberetur ex vasis maximis: idem jam in reliquis vasis decrescantis magnitudinis obtinet. Microscopia jam docuerunt, partes minimas visibiles liquidorum circulantium sphaericas esse, & singulas fere tantum per ultimas vasorum angustias transire, & sæpe adhuc cum quadam difficultate: sed ubi molecula liquidi sphaericæ figuræ, maximo suo circulo applicata cavo vasi, potest transire, tunc patet evidenter, quod in quacumque alia positura æquali facilitate permeare poterit. Hæc autem proprietas soli figuræ sphaericæ peculiaris est: si enim cylindricam v. g. figuram haberet talis molecula, tunc, si basi sua applicaretur vasis aperturæ, transiret, si alio situ incurreret, penetrare non posset; hoc solidissime demonstravit *Piscarne* in suis Opusculis (a). Ubi ergo à quacumque causa molecularum fluida nostra constituentium figura sphaerica mutatur, tunc possibilitas æquabilis transmissionis per vasa tollitur: cum enim per cordis & arteriarum motum reciproco cuilibet sanguinis particulæ omni momento concilietur alius motus, & alia positura; requirebatur ad æquabilem motum per vasa talis molecularum sanguinis figura, ut in quocumque situ transire possent per ultimas vasorum angustias; sed hoc in sola figura sphaerica obtinet.

2. Per ultimas angustias arteriæ rubræ solitarius rubri sanguinis globus transire potest, si jam vicini sanguinis globuli à quacumque æmum causa concresecant plures in unam massulam, orificium canalis, quod singulos transmittere poterat, adunatis obstruetur: maximam autem proclivitatem esse in sanguinis partibus, ut concresecant, patet inde, quod extra vasa corporis, vel & in vasis, modo quiescat, sanguis citissime coaguletur.

Sed præterea videtur aliud vitium obtinere posse, quo impedirentur fluidorum moleculæ transire per ultimas vasorum angustias, si nempe manente eadem massa corporea expanderentur in majus volumen. Constat experimentis physicis calore augeri, frigore minui corporum volumina: si jam vel à calore, vel alia quacumque causa, moleculæ fluidorum expanderentur in majorem superficiem, manente

(a) Dissertat. de Circulat. Sang. per vasa minima pag 25. 26.

eadem massa corporea, tunc non possent penetrare ultimas suorum vasorum angustias: sed vix videtur molecula fluidi sic expansa resistere posse condensationi, quæ per actionem vasorum, comprimentium has moleculas, imprimis circa ultimas vasorum angustias fit; ibi enim singulæ fere vasorum lateribus contiguæ premuntur fortiter & condensantur: chylus enim, sanguine rarior, actione vasorum in sanguinem densiorem mutatur. Ob hanc rationem Celeberrimus horum Aphorismorum Auctor rarefactionem molecularum inter causas obstructionum non recensuit.

Fuit præterea quorundam opinio, ac si crassiora ingesta sanguini mista, obstructionem facere possent. Sed videtur obitare absorbentium vasorum in tota corporis externa & interna superficie tenuitas; & quod omne peregrinum sanguinem ingrediens statim cogatur transire per pulmonalium vasorum angustias.

§. 116. **M**UTATUR figura imprimis, desinente æquabili, & undique simul, atque æqualiter, premente pressione moleculæ, proprio elateri jam commissæ, hoc est, languente motu, vel laxato vase, vel minuta copia liquidi.

Dum sanguis ex cordis cavis in arterias plenas projicitur, magna fit compressio omnium partium sanguinis in arteriis contenti, cessante cordis actione, arteriæ contractæ iterum valida vi premunt contentum fluidum: hinc omnes moleculæ sanguinis actione cordis & arteriarum compressæ condensantur. Ob hanc causam eo densior sanguis fit, quo validiores fuerint cordis & arteriarum vires: ideoque in robustis exercitatis hominibus densus solidus sanguis, in debilibus longe tenuior, nec adeo confrescens, invenitur. Dum paucis post partum horis homini sano sanguis mittitur, sæpe magna copia chyli reperitur supernatans sanguini; ergo levior sanguine chylus est: sed postquam idem ille chylus per octodecim horas, imo & minori tempore, cum sanguine fluxit, actione vasorum in serum & sanguinem mutatus, longe majorem acquisivit soliditatem: actio ergo vasorum condensat liquidorum particulas. Sed quando per microscopium lustrantur pellucidæ vivorum animalium partes, apparet, globosa fluidorum elementa per ultimas vasorum angustias quadam cum difficultate aliquando transpirari, & in oblongam cylindricam figuram mutari; superatis vero his angustis, propria elasticitate pristinam recuperare figuram: unde apparet, illas moleculas fluidorum elasticas esse; hinc, ubi à compressione vasorum liberantur, expandi in majorem molem. Sed quænam sunt illæ causæ, quæ sanguinis elementa, quantum oculis etiam armatis patet, sphaerica efficiunt? si consideretur, valida cordis vi sanguinem pelli in vas conicum, reciproce ampliatum & arctatum, incurvatum statim ubi ex corde egreditur; apparet facile, nullam sanguinis particulam eandem motus directionem servare per bina momenta successiva; hinc omnes partes continuo ad se mutuo attriti: quidquid ergo angulosi emerget in tali elemento sanguinis, totam vertiginem vicinorum sustinebit, & abradetur, vel complanabitur. Accedit præterea; quod ultimæ arteriarum angustiae circularem sectionem habeant; hinc & hanc figuram possent conciliare utcumque flexilibus partibus. Sic cera mollis, vel argilla, inter manus rotando sphaericam figuram acquirit. Si ergo causæ illæ, quæ æquabili pres-

sione figuram illam sphaericam fecerant, & factam conservabant, cessant agere; elasticæ moleculae resiliunt, & ab hac figura recedunt.

Sed hoc imprimis fit à sequentibus, nempe **LANGUENTE MOTU** cordis & arteriarum, quacumque demum de causa hoc fiat. Ex modo dictis ratio patet, & observata certa facti veritatem demonstrant. Pallido morbo laborantes virgines languidissimam habent circulationem; hinc omnia torpent; & cum functionum integritas ab expedito transitu fluidorum per vasa pendeat, hinc omnes actiones vitales, animales, naturales vel abolitæ sunt, vel laxæ; sanguis, à debita soliditate recedens, aquosus tenuis fit, vel & iners lentusque, glutinosa tenacitate immeabilis: dum vero per ferrum & exercitia corporis vasorum in fluida actio augetur, redit color ruber, & debita sanguinis densitas. In similibus vero morbis longe periculosiores fierent obstructions, nisi laxa simul vasa facile cederent.

**LAXATO VASE.** Omnis enim actio vasorum in fluida consistit tantum in illo nixu, quo vasa ab impulso vi cordis liquido distenta conantur se contrahere in minus spatium; uti jam sæpius dictum & demonstratum fuit in præcedentibus: sed laxitate minuitur vasorum robur; ergo & minuuntur omnes effectus, qui à vasorum debito robore pendent.

**VEL MINUTA COPIA LIQUIDI.** Patebit hoc evidenter, si considerentur sequentia: cor sua vi pellit sanguinem in arterias; resistunt sanguini à corde expulso arteriarum plenitudo, elasticitas, & convergentes fines arteriarum: hinc sanguis per viam à corde datam fluit per arterias tali celeritate, cujus exponens est excessus virium cordis supra aggregatum resistantiarum: sed jam omnium resistantiarum aggregatum potest considerari tanquam potentia pellens à vertice Arteriæ conicæ basim versus: vis autem cordis agit contraria directione à basi versus verticem; hinc omnes partes sanguinis sunt quasi inter duo plana paralela prementia, unde summa, & simul æquabilissima compressio. Si jam vasorum minuitur plenitudo, quæ inter causas resistentes cordi numeratur, minuitur necessario compressio partium sanguinis, à qua pendebat major soliditas harum. Accedit quod minuta liquidi copia minus distendantur vasa; hinc minus reagant in fluida contenta. Probatum etiam fuit §. 25. n°. 1. & §. 43. n°. 3. à minuta copia liquidi debilitari solidarum partium compagem.

§. 117. **A**DUNANTUR moleculae, quiete, frigore, gelu, exsiccatione, calore, motu circulari violento, & vase forti comprimente, coagulo acido, austero, spirituosio, absorbente, viscositate, oleositate.

Binæ recenscebantur causæ §. 115. quibus liquidorum moleculae sic augerentur, ut fierent immeabiles; nempe mutata figura, de qua actum fuit paragrapho præcedenti; & ubi plures particulae, antea separatae, nunc adunatae cohererent inter se: causæ illæ jam enumerantur in hac paragrapho per quas hæc adunatio fit.

**QUIETE.** Causa fluiditatis in ipso sanguine non hæret: sani enim & robustissimi hominis de naso stillans sanguis, purissimo vase exceptus, mox concrevit in placentam solidam: requiritur ergo alia causa, quæ sanguinem tam facile concrementem fluidum servet, sed hæc causa est motus sanguinis continuus per vasa;



simul ac ille cessat, statim fiunt sanguinis coagula. Hinc syncopem frequentius passis toties insanabilis palpitatio cordis, à sanguine in majoribus alveis circa cor & in ipsis cordis cavis stagnante, & concreto in polyposas massas, non resolvendas postea. Ideo post mortem etiam in sanissimis ante mortem animalibus concretæ tales massæ circa cor & in majoribus vasis apparent. Quo fortior jam & robustior homo est, eo majus periculum concretionis est, si à quacumque causa sanguis in vasis quiescat: ideoque debilibus puellis non adeo periculosa sunt animi deliquia à minimis sæpe causis tam frequenter orta, quia illarum sanguis nimis dissolutus vix, vel saltem tardissime, concrevit, quamvis immotus hæreat.

**FRIGORE, GELU.** Dum aperta vena effluit sanguis, & purissimo vase excipitur, post tria vel quatuor minuta coit totus in massam solidam, undique accretam plerumque lateribus vasis, quo continetur: si vero glaciali sub frigore idem tentetur experimentum, citius longe concrevit, & congelatur; tuncque serum inde non exprimitur. Non adeo facile autem determinari potest, quo frigoris gradu sanguis congeletur, cum tam cito ex sua natura concrevit, etiam in aëre calido; sed serum sanguinis circiter 28 gradu thermometri Fahrenheitiani concrevit in glaciem; hinc majus requirit frigus quam aqua, forte quia serum sanguinis salibus dives est. Sufficit ad hunc locum, quod frigus auctum sanguinem citius concrevere faciat: Ideoque in syncopem delapsi si tam diu hæserint, ut corpus penitus perfrigerit, tunc & à quiete & à frigore simul conspirantibus irresolubiles nascuntur circa vasa majora & cor Polypi.

**EXSICCATIONE.** Quando à quacumque causa subtilissima liquidorum pars diffatur, reliqua crassiora concrevunt facilius. Nisi docerent experimenta, quis crederet, subtilissimum rorem arteriarum, ultimis finibus exhalantem in cavis narium, & pulmone, dissipata parte liquidissima, in tenacem adeo posse abire mucum, imo in coriaceas lemas mutari posse: mucus enim naturaliter obliniens has partes non secernitur talis, sed ex limpidissimo humore stagnando nascitur. Dum conclamati Phthisici nocturnis disfluunt sudoribus, sanguis, diluente vehiculo orbus, circa cutanea minima vascula incipit hære, & pustulas inflammatorias facit. Ideo sudorem, in morborum acutorum principio ortum, damnavit Hippocrates in *Prorrhetico*, & *Coacis Prænotionibus*. Quia post mortem contractæ elasticitate & frigore arteriæ expellunt liquidissima in venas, ideo sanguis plerumque in arteriis concretus apparet, non adeo in venis.

**CALORE.** Serum sanguinis fluidissimum ab aqua ebulliente coagulatur in scissilem massam: & in morbis, dum calor insurgit multum ultra gradum caloris hominis sani, statim incipit disponi sanguis ad concretionem: hinc respiratio tunc incipit esse difficilis & anhelosa, & cerebri actiones læduntur, quia per subtilissima illa vasa sanguis, jam fere concrevens, transire nequit: accedit simul, quod per calorem auctum subtilissima diffentur de corpore.

**MOTU CIRCULARI VIOLENTO, ET VASE FORTI COMPRI-  
MENTE.** Quo debiliior est circulatio, eo dilutior & tenuior sanguis est; ut patet in debilibus puellis: quo validior motus humorum per vasa, eo spissior & magis concrevens sanguis; patet in duro labore exercitatis hominibus. Dum in variolis primo die morbi sanguis mittitur, apparet satis bonus; si tertio vel quarto die educatur sanguis, jam inflammatoriam illam crustam habet, quia per febrim acutam dissipatis liquidissimis, plus compactis crassioribus partibus, incipit nasci major co-

hæfio inter moleculas sanguinis : quamdiu enim plurimum tenuioris liquidi inter moleculas crassiores interponitur , pressio vasorum non mutabit illarum figuram ; sed si diffuso tenuiori liquido , moleculæ sanguinis crassiores , sibi contiguæ factæ , valida actione vasorum comprimuntur , mutabitur figura sphaerica , & pluribus punctis se mutuo contingent , & concreſcent. Dum autem robusta & firma vasa magna vi premunt contenta fluida , subtilissima exprimuntur , crassiores partes reliquæ compressione hac adunantur.

**COAGULO ACIDO.** Non omnia acida sanguinem coagulant : vina enim acidula , acetum , succi acidorum maturorum fructuum , lac ebutyratum &c. potius dissolvunt : sed acida fossilia , ex sale marino , nitro &c. parata , sanguini inducunt coagulum. Dum vivi animalis venis hæc acida injiciuntur , mox sanguis in crassos thrombos concreſcit , qui per venas , sensum ampliores factas , ad dextrum cor delati , mox in pulmonem pulsi , anxietatem summam excitant , & paulo post mortem. Interim tamen bibulorum vasorum oscula non facile hæc acida acerrima admittunt ; mox contracta etiam à longe levioribus stimulis. Dum atra bilis , aliquando tam acida , ut instar aquæ stygiæ pavimentum rodar , erosus vasis sanguini miscetur , subitissima sæpe mors à coagulato sanguine oritur.

**AUSTERO.** Talia sunt imprimis alumen , & vitriolorum species variae , quæ fortissima coagula producant.

**SPIRITUOSO.** Notum est in Chirurgicis , alcohol applicatum vasis discissis validissimas hæmorrhagias sistere , coagulo sanguini inducto. Ipsum serum sanguinis ab alcohole affuso induratur illico. Hinc apparet , quantis se exponant malis , qui spiritibus illis fermentatis adeo abutuntur. Alia occasione ( §. 28. n°. 4. ) recenscebatur mirum exemplum , quod nempe in ebriosa muliere omnia fere viscera invenirentur scirrhusa , & indurata.

**ABSORBENTE.** Sunt quædam corpora bibula , quæ omnem humorem proximum vi quadam trahunt in se ; sic gypsum , calx viva , ossa animalium diu exusta , terræ argillaceæ valido igne excoctæ , omne liquidum , quod attingere possunt , imbibunt. Talia si miscerentur nostris humoribus tenuissima absorbendo facerent reliqua concreſcere. Rarius autem hæc integris viribus sanguini miscentur : prius enim occurrunt liquidis , quibus saturantur : sed tamen in primis viis pessima inde mala fieri posse , imo mortem ipsam , testantur historiæ. Plinius ( *a* ) narrat , C. Procleium in maximo stomachi dolore , gypso poto , sibi mortem conscivisse. Strangulando suffocare gypsum potum monet Dioscorides ( *b* ).

**VISCOSITATE.** Quomodo inde nasci possint obstructions , explicatum fuit in *Capitulo de morbis à glutinoso spontaneo* , & imprimis ibidem §. 72.

**OLEOSITATE.** Quando in obesitas per validissimos motus , calorem aëris intensum , vel febres acutas , soluta pinguedo sanguini affunditur , sæpe subita mors fit ; quia illud oleosum minima vascula suo lentore obstruit , & impedit , quo minus alia liquida per minima vascula transeant : unde sæpe subito lethalis peripneumonia nascitur , obstructis sic pulmonalis arteriæ angustis.

( *a* ) Lib. XXXVI. cap. 24.

( *b* ) Lib. V. cap. 134.

§. 118. **E**R R O R E loci partes fluidi fiunt non meabiles, & in os dilatatum ad basin canalis conici ruit corpusculum finem longe angustiore tranare non potens. Plethora, motus auctus, rarefactio liquidi, laxatio vasis, dilatationem hanc præ cæteris creant; maxime si his prægressis, statim contraria horum sequuntur.

Haftenus enarratae sunt obstructionis causæ, quæ vel vasis cavum arctent, vel liquidis per vasa fluentibus concilient immeabilitatem, per mutatam figuram molecularum fluidi, vel adunationem earundem. Sequitur jam alia obstructionis causa, ubi vasis debitam amplitudinem retinentibus, saltem non arctioribus redditis, fluidisque manentibus iisdem in omnibus suis dotibus, tamen obstructio nascitur: dum nempe crassiores fluidorum molecule dilatata oscula minorum vasorum ingrediuntur, per quorum ultimos fines transire nequeunt; atque hærent tunc immeabiles fluidorum particule in vasis alienis: hinc tantum peccant loci mutatione, unde hæc causa obstructionis vocatur *Error loci*.

De hac obstructionum causa non adeo frequens mentio fit apud Auctores, quamvis in morbis acutis frequentissima mortis causa sit. Apud Veteres, circulationis sanguinis ignaros, obscure satis in quibusdam locis adumbratur hoc vitium. Dum phlegmones naturam, describit Galenus, (a) dicit: *Quum sanguis calidus copiosior in aliquam animalis partem procubuit, majora ejus vasa protinus distenduntur, quæ plenitudinem non ferunt, ab his deinceps, quæ minora sunt. Mox, ubi nec in iis satis continetur, exudat foras in illa ampla spatia, quæ inter vasa sunt, sic ut etiam omnia, quæ in composita carne habentur, loca occupet.* Unde concludi potest, quod in phlegmone sanguis aliena loca ingrediatur.

Ut autem evidenter pateat, quomodo per errorem loci nascatur obstructio, sequentia merentur expendi.

Pars maxima in sanguine est globus ruber, qui naturaliter tantum in vasis maximis hæret; ultimæ jam angustię arteriarum, rubrum sanguinem vehentium, unicuique tantum globum rubrum talem transmittunt, & sæpe adhuc cum quadam molestia; ut patuit, dum in vivorum animalium pellucidis partibus per microscopia observabatur circulatio; omnia tenuiora ex arteriis rubrum sanguinem vehentibus, per lateralia vasa minora, ex his arteriis orta, elabuntur; solum crassissimum rubrum per ultimas angustias arteriæ rubræ transiens venam rubram ingreditur: proximum magnitudine vas post arteriam rubram omnia liquida recipit; excludit tantum sanguinem rubrum, & in hoc vase retinebitur etiam crassissima pars liquidi, per illud transeuntis, nempe globus serofus: reliqua tenuiora per minora vasa, ex arteria serosa orta transibunt. Sicque ex analogia credere licet, similem legem in reliquis decrescendum vasorum seriebus obtinere. Per singula ergo diversæ magnitudinis vasa fluunt quædam particule tam magnæ, ut minora vasa ingredi non possint; & hæ particule constituunt naturale & proprium singulis vasorum seriebus liquidum. Sic maximum vas transmittere potest omnes humores; minora autem

(a) Method. Med. Lib. X. cap. 6. Charter. Tom. X. pag. 233.

vasa tantum transmittunt omnia fluida tenuiora una cum suo liquido naturali, unde nomen habent: arteriæ enim rubræ omnes humores recipere & transmittere possunt, arteriæ serosæ rubram partem sanguinis excludunt, transmittunt autem globos serosos & omnia his tenuiora fluida. Arteriæ jam rubræ ultimus finis, ubi in venam rubram transit, debet habere majorem amplitudinem, quam arteria serosa ex arteria rubra orta; aliter enim sanguis ruber non maneret in suis vasis, sed arterias serosas ingrederetur: unde minima arteria rubra vasorum maximorum minimum est, sed vasorum minimorum maximum.

Si jam à quacumque causa augeatur diameter vasculi lateralis ex majori vase orti, v. g. si major fiat apertura arteriæ serosæ ex arteria rubra ortæ, poterit globus ruber dilatatum principium arteriæ serosæ ingredi; sed in canali conico, aucta semper angustia, brevi hærebit, & nullo modo per ultimos fines arteriæ serosæ transire poterit: nata ergo erit obstructio, cum moles particulæ transfluxuræ capacitatem vasis transmittentis excedat. Hoc vitium jam obtinere potest in omnibus locis, in quibus vasa minora ex majoribus derivantur; & potest fieri à totuplici materia, quotuplex est numerus decrefcentium magnitudine particularum in sanguine; excepto subtilissimo totius corporis fluido, quod per omnium minima vasa fluit: illud enim nunquam poterit errore loci ullum vas obstruere.

Causæ autem, quæ vasorum capacitatem augent, imprimis sunt sequentes.

**PLETHORA.** Dum nimia copia boni sanguinis in corpore adest, omnia vasa rubrum sanguinem gerentia turgent: hinc illa, mole aucta, comprimunt adjacentia tenuiora vasa: sed dum arteria rubra nimio sanguine impleta distenditur, distrahuntur latera hujus vasis; hinc oscula minorum vasorum, ex lateribus arteriæ rubræ ortorum, ab eadem causa fiunt ampliora, & admittent crassiores partes, quam naturaliter capere deberent. Ideo videmus, adnatam tunicam oculorum, quæ naturaliter sanguinea vasa rubra non habet, adeo sæpe rubere in plethoricis.

**MOTUS AUCTUS.** Quomodo per motum auctum fiat major amplitudo ad vasorum initia, & liquida crassiora impellantur in vasa tenuiora, explicatum suit §. 100.

**RAREFACTIO LIQUIDI.** Si per calorem auctum, vel aliam quamcumque causam possibilem, augeatur liquidum vasis contenti volumen, manente eadem massa corporea; debebit vas continens dilatari: ergo vas dilatatum poterit admittere crassiores partes, quam quæ naturaliter per hoc vas fluebant. Dum foco quis assidet, partes externæ per calorem tument, rubebunt magis, quam naturaliter solebant.

**LAXATIO VASIS &c.** Amplitudo vasorum pendet à binis sibi invicem oppositis causis. Liquidum vi cordis impulsus nititur dilatare canales, qui suarum fibrarum robore resistunt impulso liquido: si binæ hæ vires forent æquales, canales manerent in eadem amplitudine; si vero prævaleat imperus impulsu liquidum, dilatabitur canalus, & quidem eo plus, quo major est excelsus virium impulsu liquidum supra resistantiam laterum canalium. Si ergo, laxato vase, minuatur resistantia laterum, impulsus liquidum magis dilatabit canales; & molecule fluidi poterunt ingredi canales dilatatos, quæ antea excludebantur. Dum pars corporis diu exponitur vaporibus aquæ tepidæ, tument, & rubebunt, sanguine rubro nunc ingresso vasa minora dilatata. Ab hac causa toties adnata oculorum tunica, facillime dilatandis vasis constans, rubet; cum naturaliter ejus vasa sanguinem rubrum non habeant. Hinc austrina calida tempestate & humida sine ventis, inter morbos populares re-

confer & ophthalmias Hippocrates (4); ab hac causa, ut videtur, imprimis ortas: nihil enim magis laxa reddit corpora, quam talis aëris constitutio.

MAXIME SI HIS PRÆGRESSIS STATIM CONTRARIA HORUM SEQUANTUR. Dum valido corporis motu quis calefcit, aucto sanguinis impetu & velocitate, dilatata vasa acceperunt alienos humores; hinc totum corpus in cute externa adeo rubet post validum cutem: si tunc in calido aëre, bene tecto corpore, quiescant, minuta celeritate sanguinis per vasa moti, incipiunt proprio robore vasa omnia se plus contrahere, & repellere crassiora impulsu in vasa latiora; redeuntque sensim omnia in pristinum statum: si vero æstuant sic corpori frigida adspiret aura, gelidusve affatim bibatur potus, quanta mala! Subito enim frigore constricta vasa crassiora fluida, quæ ingressa fuerant, retinent, nec possunt hæc re- tenta per angustissimos fines transire; unde sævissimæ inflammationes, & morbi sæpe subitissime lethales fiunt. Quoties hoc occurrit in praxi, quod, æstivis caloribus & labore valido natam sitim dum gelido potu avidissime hausto explent Rustici, sæpe subito moriantur; vel sic mutatum habeant in omnibus functionibus corpus, ut nihil fere de pristina sanitate superfit? Dum pulvere ac sudore perfusus, in calidissima regione, fervidissimo diei tempore Alexander Cydnum amnem ingreditur, ut corpus ablueret; *vix ingressi subito horrore artus rigere cæperunt, pallor deinde suffusus est, & totum propemodum corpus vitalis calor reliquit. Exspiranti similem Ministri manu excipiunt, nec satis compositam mentis in tabernaculum deferunt.* (b) Tam subito in valido, juvenili, & bellicis laboribus durato corpore prosternebantur omnes vires: sanissimum antea gravissimus mox opprimebat morbus; à quo Philippi Medici fide & peritia vix evalit.

### §. 119. U N D E causæ, & natura obstructionis cujuscunque parent.

Natura obstructionis tantum consistit in impedito transfluxu fluidi per vas; & omnes causæ fuerunt recensitæ, quæ agebant arctando vasa, vel inspissando liquida, vel & utrumque simul efficiebant.

Sed adhuc dubium videtur, an quidem obstructio nasci possit in omnibus vasis: certum est in vasis conicis, per quæ liquida feruntur directione motus tendente à basi versus apicem, posse fieri obstructionem: fluidi enim particulae omni momento occurrunt angustiori sectioni coni; hinc, quæ circa basim libere penetrabant, poterunt in ultimis angustiiis convergentis canalıs facile hære; tuncque liquidum à tergo urgens immeabilem moleculam angustiozem semper locum verius premit, sicque obstructionem auct. In canalibus cylindricis, sive, ut Pitcarnius dicit, quorum latera paralela sunt lineæ motus, poterit forte nasci obstructio, sed non ita facile; omnes enim fluidorum particulae, quæ semel potuerunt ingredi talem canalem, poterunt & transire, cum ubique sit æqualis amplitudo. Possent tamen moleculæ fluidorum factæ fuisse rarefactione v. g. majores, & hinc difficilius transire; sed à tergo urgens liquidum videtur hanc resistantiam facile superare debere. Verum est, quod concipi posset, moleculam, aptam transire per canalem cylindricum, aucto volumine, vel adunatam aliis distendere partem vasis cylindrici flexilis ubi

(4) Epidem. 3. Charter. Tom. IX. pag. 261. | (b) Q. Curtii Lib. II. cap. 5.



hæret, & sic obstruere; sed tunc non amplius manet cylindricus ille canalis: non haberet enim tunc æqualem ubique amplitudinem, & obstruens illud ibi hærens pelleretur directione motus ex majori amplitudine in minus spatium; & tunc idem obtineret, quod in arteriis fieri modo dictum est.

In venis autem, in quibus directio motus à vertice conici canalis versus basim tendit, obstructio locum non videtur habere posse, nisi ab externa compressione vasis; quicquid enim angustum verticis orificium transivit, facile reliquas sectiones canalis, semper ampliores, pervadere poterit, & adunatæ licet supponantur fluidi molecule, cum non sustineantur lateribus divergentibus venarum, facillime abripiuntur impetu subsequenteris liquidi: uti demonstravit in suis dissertationibus *Piscarnius* (a).

Sed & experimenta in vivis animalibus facta hanc rem demonstrant. Dum venæ crurali canis immisi alcohol, sanguis statim in thrombos coagulatus deferrebat, tamen per totam longitudinem venæ ad cor dextrum; ex hoc vero in pulmones pulsus thrombi hærebant statim; summa nascebatur anxietas, conabatur summo respirationis molimine animal superare has angustias; moriebatur brevi. Dum à tam valido coagulante non oriebatur obstructio in venis, à levioribus causis multo minus hoc fiet.

Hinc in canalibus, per quos vitæ tempore perpetuo motu feruntur liquida, non videtur nasci posse obstructio, nisi directio motus sit à latiori amplitudine versus majores angustias.

Nec obstat, quod ductus hepaticus & communis, ad venæ naturam accedens, obstruatur sæpius, licet ex angustis fistulis in latiore ductum hepatis fabrica secretus liquor deferatur: nam ductus communis intestini duodeni exteriorem tunicam penetrans, inter hanc & alteram descendit, mox perforata & hac, inter secundam & tertiam longo satis itinere progreditur, tuncque tandem in cavum intestini patulo osculo hiat. Hinc plurimæ possent esse causæ, quæ ultimum illud osculum arctant, vel & penitus occludunt; sicque liberum bilis iter impediunt, quæ tunc stagnans concreescere poterit; uti observata Anatomica docuerunt.

In majoribus autem alveis & sinubus, in quibus sanguis venosus colligitur, & hæreere potest, nasci posse concrectiones polyposas, & inde obstructiones, certo constat.

§. 120. **Q**UÆ nata in corpore vivo impedit transitum fluxuræ materiæ; reliqua impingentia sistit; horum actionem excipit; subtiliora exprimit; adunat crassiora; vas extendit, dilatat, attenuat, solvit; fluidum stagnans condensat; functionem integro fluore oriundam tollit, vasa inde irriganda deplet, siccatur; capacitatem vasorum transmittendis liquidis minuit; copiam liquidi; velocitatemque per libera vasa auget; adeoque omnia, quæ inde pendere possunt, mala producit.

Explicatis jam causis & natura obstructionis, expendi debent illa omnia, quæ ex obstructione ut causa sequuntur.

(a) *Dissertat. de Circulatione Sanguinis in Animalibus genitis & non genitis* pag. 107. 108. 109.

**QUÆ NATA IN CORPORE VIVO IMPEDIT TRANSITUM FLUXURÆ MATERIÆ.** In cadavere enim, ubi nullus motus liquorum per vasa superest, non nocebit obstructio: & ex ipsa definitione obstructionis §. 107. hoc evidenter patet; tunc enim dicebatur adesse obstructio, quando transitus liquidi per canalem tollebatur, à quacumque demum causa fieret.

**RELIQUA IMPINGENTIA SISTIT; HORUM ACTIONEM EXCIPIT.** Dum vivimus; jugi motu fluida per vasa feruntur, & quidem satis magno impetu; nam, uti alia occasione dictum fuit, digito pedis abscisso per apertas arterias ad binorum pedum & ultra distantiam expellebatur sanguis: dum ergo canalis obstructus est, liquidum vi cordis & arteriarum urgetur in locum obstructum illa quantitate motus, qua potuisset ad extrema corporis usque tanta adhuc cum celeritate pervenire; & singulis contractionibus cordis & arteriarum renovatur hæc vis agens in locum obstructum: cumque illud immeabile obstruens hæreat in canali conico, per quem liquidum à basi versus verticem pellitur, omni momento protruditur versus angustiores locum: hinc omne liquidum impingens sistitur ad locum canalis obstructum, & materia obstruens immobilis hærens omnem impetum liquidi à tergo urgentis sustinere debet.

**SUBTILIORA EXPRIMIT, ADUNAT CRASSIORA.** Obstructio raro locum habet, (nisi à compressu externo, vel errore loci facta fuerit), præterquam in ultimis vasorum angustis: hinc si v. g. sanguinis rubri globuli circa ultimos fines arteriæ rubræ immeabiles hæreant, quid fiet? Sanguis habet in se plurima minoribus moleculis constantia fluida, & omnis canalis major habet ramos laterales minores, per quos fluidissima transire possunt, crassiores vero partes minime; hinc dum vis cordis & arteriarum sanguinem pellunt in locum obstructum, necessario fluidissima, inter duo quasi præla opposita pressa, transibunt in canales laterales minores, sola crassiora manebunt, apprimuntur contra locum obstructum, augebunt materiam obstruentem. Sed sanguis sanus ex sua natura in concretionem tendit, orbatu vero tenuissima parte, longe magis concresecet; & hinc augebitur malum. Dum in vera phrenitide sanguis, per arterias vertebrales & carotides allatus, immeabilis hæret ad fines vasorum, cor pergit per arterias omni momento bonum forte adhuc sanguinem adferre; sed per canales laterales liquidissima exprimuntur, crassiora accumuluntur, donec infarctis fere omnibus corticis cerebri vasis immedicabilis reddatur morbus. Inde adeo malum signum in Peripneumonia habetur, si sanguis vena missus dilutus vix concresecat; denotat enim, sola tenuiora per pulmonis vasa transprimi, omnia crassa accumulari.

**VAS EXTENDIT, DILATAT, ATTENUAT, SOLVIT.** Dum cor sanguinem pellit in arterias, illæ distenduntur: sed hoc fit ideo, quia arteriæ plene sunt, & magna resistentia fit liquido impulso à convergentibus arteriarum finibus: si enim arteriæ vacuæ forent, vel nulla resistentia foret circa fines; sanguis ex corde in arterias pulsus libere perflueret, nec urgeret latera, ut recederent ab axi canalis. Quo ergo pleniores sunt arteriæ, quo major resistentia circa fines, eo plus dilatantur à sanguine vi cordis impulso: sed canalis obstructus ante locum, ubi hæret obstructio, plenus est, & maxima simul fit resistentia liquido impulso; hinc necessario sequitur canalis obstructi dilatatio. Dum ligatura injecta liberum sanguinis per venas iter impeditur, mox ante ligaturam tument dilatata: sed dum vas extenditur, fibræ solidæ, latera vasis constituentes, distrahuntur, minuuntur

puncta contactuum, & hinc debilitatur cohesio : uti explicatum fuit §. 25. n°. 3. Latera ergo vasorum minus possunt resistere causis distendentibus, & hinc magis dilatantur, donec tandem fiat cohesio nulla, id est, ruptura. Si jam consideretur, obstructionem in maximis vasis raro obtinere, semper fere tantum in minimis; & quod canales maximi inter minimos, ultimæ nempe arteriæ rubræ, ne quidem decimam partem capilli æquent; patebit facile, his obstructis summum metum esse rupturæ vasorum longe majus autem periculum in ultimis serosis, lymphaticis &c. arteriis erit, si obstruantur. Ob hanc rationem, ubi valida inflammatio duravit per quatuor vel quinque dies, nimia distensione ruptis vasis tenerimis obstructis, gangræna, vel saltem suppuratio, sequitur : frustra tunc expectaretur benigna resolutio.

Sed vasa obstructa, & hinc dilatata, comprimunt alia vasa vicina : hinc & in illis obstructio nascitur; sicque augetur malum.

**FLUIDUM STAGNANS CONDENSAT.** Expressione partis liquidissimæ, & compactione crassioris hærentis; uti modo dictum fuit.

**FUNCTIONEM INTEGRO FLUORE ORIUNDAM TOLLIT.** Sic incipimus videre, quam multiplex morborum species à sola obstructione oriri potest : omnes enim functiones à libero fluxu fluidorum per vasa pendent : hoc impedito, turbantur omnes, vel & cessant omnino. Si polypusæ mællæ concretæ circa magnum sinum dextri cordis pellantur in arteriam pulmonalem, actum est de vita : si venæ portarum ramuli in hepate obstruantur, nulla fiet bilis secretio &c. Cum ergo à tot causis obstructio nasci possit, forte mirum videri posset, non sæpius deleri, vel turbari functiones, dum forte quædam vasa, per hæc vel illa viscera dispersa, obstruuntur sæpius : sed docuerunt Anatomici, vasa, per viscera dispersa, ubique fere emissis ramulis communicare; hinc, licet quædam ex illis obstructa fuerint, manet tamen liber circuitus per reliqua; nec statim à levi obstructione lædetur viscerum functio.

**VASA INDE IRRIGANDA DEPLET, SICCAT.** In multis partibus corporis sanguinis distributio fit per unum vas adferens : v. g. singulis renibus una plerumque arteria sanguinem dat; axillares arteriæ brachiis prospiciunt &c. patet evidenter, his vasis obstructis; nihil deferri posse ad omnes illas partes, quæ inde vitam hauriebant sanguinem. Sed vasa nostra, nullis liquidis distenta, collabuntur, vel saltem se in minimam contrahunt diametrum. In vasis majoribus, ubi obstructionis causa ablata est, magno impetu irruens liquor collapsa vasa, vel contracta, iterum distendit : sed si in minimis vasis à simili causa talis collapsus factus fuerit, & manserit aliquandiu; contigua latera concrecent brevi; & impervia manebunt tota vita, omnesque functiones, quæ à libero per hæc vasa tractu pendebant, erunt abolitæ. Sæpe accidit, post morbos acutos inflammatorios capitis, remanere surditatem, vel amaurosim, tota vita incurabiles : forte ab hac causa, quod obstructis inflammatione majoribus canalibus, minora inde derivata, compressa vel collapsa, concreverint. Dum in Apoplexiâ omnes cerebri actiones silent, raro curatur, quin maneat aliquod vitium in hac vel illa cerebri functione, fere semper incurabile.

**CAPACITATEM VASORUM TRANSMITTENDIS LIQUIDIS MINUIT; COPIAM, &c.** Dum obstructa vasa transmittere nequeunt impulsa vi cordis liquida, debet in reliquis vasis liberis hæreere omne illud, quod per vasa

obstructa transire non poterat : cum enim obstructio fere semper in arteriis sit , omne liquidum , quod pone locum obstructum in arteriis hæret , per venas redibit ad cor ; illæ enim facile deplentur : sic manebit eadem copia liquidi movendi , interim minuto canalium numero ; hinc si notabilis pars corporis in suis vasis obstructa sit , reliquæ partes necessario majori copia liquidi distendentur ; & inde fient omnes plethoræ effectus ; & debet omne illud suprapondium liquidi vel manere in vasis liberis distentis , vel debet angere circulationis velocitas , ut , manente eadem copia liquidi , dato tempore per minores numero canales cor pelleret sanguinem. Vivo cani , aperto abdomine , ligavi descendens aortæ truncum : omnis sanguis partium inferiorum , animalis nixibus inter hæc tormenta , accelerato motu redibat ad cor ; sed non poterat vel guttula sanguinis ad inferiora transmitti : mox oriebantur summæ anxietates ; cor celerrime palpitabat ; oculi prominebant sanguine suffusi ; lingua , turgida sanguine , extra os prominebat ; ingens copia spumæ circa os colligebatur , & moriebatur brevi animal. Dum cibi & potus larga copia distentus ventriculus postea truncum premit versus inferiora tendentem , turgida facies , rubri oculi , pulsus auctus , respiratio celerior , docent & copiam sanguinis in partibus superioribus auctam esse , & celeritate majori per vasa sanguinem fluere ; unde tot apud Observatores habentur exempla hominum , qui largas inter epulas apoplexia correpti petierunt.

ADEOQUE OMNIA &c. Hæc certe infinita sunt : omnes enim functiones à libero trajectu fluidorum per canales debitos pendent : sed obstructio nata , hunc liberum transfluxum impediens , potest omnes & singulas functiones lædere ; & cum functio læsa morbus sit ; ergo tot possunt diversi nasci morbi ex obstructione , quot possunt lædi diversæ functiones.

§. 121. **Q**UARE pro diversitate vasis obstructi , & materiæ obstructuentis , illi effectus ( 120. ) variatis apparent phænomenis.

Cum ingens morborum numerus , qui ex obstructione nasci possunt , impediatur , quo minus describantur singuli , sufficiet notasse præcipua capita , unde varii effectus obstructionis pendent. Longe alia enim apparebunt phænomena , dum sanguis inflammatoria densitate immeabilis factus hæret in tenerrimis corticis cerebri vasis , quam si idem ille sanguis obstruxisset renum vascula multo firmiora : atque etiam longe major spes curationis affulget in inflammatoria tali obstructione corticis cerebri , quam si atrabilaria materies fusa , mota , picea fere tenacitate hæc vascula obstruxerit. Aliquando enim materies obstruens talis est , ut dissolvatur sensim , modo minus urgeatur à tergo per impetum vitalis humoris ; aliquando rebellis ad omnia insanabilem morbum facit. Si scirrhus confirmatus , vel malignus cancer , obstructionem fecerint , nec manu tolli possint , quis curam promittere audebit ?

§. 122. **I**N vasis Sanguiferis arteriosis rubris inflammatio primi generis fit , in arteriosis serosis flavis rubra inflammatio errore loci , vel flava propria illi vasi , calida flava , in Lymphaticis arteriosis dilatatis inflammatio secundi generis flava , errore loci ,

vel pellucida, calida, propria illi vasi; in arteriosis vasis Lymphaticis, majoribus, œdema calidum; in minoribus dolores sine apparente tumore; in pinguisferis, ossis, medullofis, nervosis, biliosis alia.

**. IN VASIS SANGUIFERIS ARTERIOSIS RUBRIS INFLAMMATIO PRIMI GENERIS FIT.** Generalis idea omnis obstructionis supponebat excessum molis transituræ supra capacitatem vasis transmissuri, uti definitum fuit §. 107. hinc potest in omni vase obtinere, per quod liquidum fluit, in minimo æque ac in maximo: sed ruber sanguis naturaliter tantum invenitur in vasis maximis; hinc, si in his canalibus obstructio fiat, hærebit crassissima pars sanguinis, id est, rubra, in angustiis ultimis horum vasorum; si tunc impetus vitalis pergat à tergo urgere illud obstruens, erit inflammatio in vasis maximis inter minima, & vocabitur inflammatio primi generis. Sed ex vasis maximis oriuntur minores vasorum series: hinc ubi per maxima impediretur humorum circuitus, nihil fere ingredi posset minora ex his orta vasa, unde brevi mors in toto, vel in parte.

**IN ARTERIOSIS SEROSIS FLAVIS RUBRA INFLAMMATIO ERRORE LOCI, VEL FLAVA PROPRIA ILLI VASI, CALIDA FLAVA.** Vas sanguineum rubrum proximum magnitudine sequitur vas serosum, quod solam partem rubram excludit, reliqua omnia admittit: sed in his vasis dilatatis circa principium possunt aliquando impelli globi rubri sanguinis, nec penetrare tamen per ultimas angustias; hinc errore loci obstructionem facere, ut dictum §. 118. erit tunc inflammatio rubra hærens in vasis non rubris naturaliter. Sed uti in vasis maximis rubris crassissima sanguinis pars, mutata figura molecularum, vel adunatione earundem, poterat inflammationem facere his vasis propriam; sic & crassissima liquidi, per arterias serosas flavas fluentis, pars, hærens circa ultimas angustias horum vasorum, poterit facere inflammationem serosis vasis propriam: & cum hoc possit fieri, licet nihil rubri ingressum fuerit hæc vasa; flava erit hæc inflammatio non rubra.

**IN LYMPHATICIS ARTERIOSIS DILATATIS INFLAMMATIO SECUNDI GENERIS FLAVA, ERRORE LOCI; VEL PELLUCIDA, CALIDA, PROPRIA ILLI VASI.** Vas, quod proxime sequitur magnitudine vas serosum, jam non habet amplius coloratum liquidum; omne enim rubrum & flavum angustia horum vasorum excluditur: sed & dilatata horum vasorum oscula poterit ingredi flavum serosum, & sic in his vasis nasci poterit per errorem loci inflammatio flava. Atqui etiam crassissima pars liquidi per vasa hæc lymphatica fluentis per communes obstructionis cujuslibet causas poterit reddi immeabilis, & facere inflammationem huic vasi propriam. Eadem jam doctrina poterit applicari reliquis decrescensium vasorum seriebus, de quibus per solam Analogiam aliquid dicere possumus tantum; Anatomicæ enim horum vasorum demonstrationes deficiunt.

Inde patet, quod in maximis vasis, id est sanguineis rubris, unica tantum inflammationis species obtinere possit, immeabili nempe reddito liquido naturaliter per maxima vasa fluente: in reliquis vero decrescens magnitudinis vasis duplex esse possit inflammationis species: una ab errore loci, admissio liquido crassiori per oscula dilatata; altera à liquido naturali horum vasorum, immeabili facto.

IN



**I**N ARTERIOSIS VASIS LYMPHATICIS MAJORIBUS ŒDEMA CALIDUM. Quo usque hæc vasorum divisio in minora pertingat, quis dicere poterit? Majora vasa inflammata, liquidis coloratis distenta, tumore, & mutato colore loci, quem occupant, sub sensus nostros cadunt: sed ubi tanta vasorum tenuitas est, ut nec naturaliter, nec errore loci, capere possint colorata liquida, tunc, his vasis inflammatis, non mutabitur loci affecti color. Interim tamen distenta vasa & turgentia liquido, pellucido quamvis & non colorato, possunt molem partis augere, & facere tumorem. Generali nomine omnes tumores vocabantur *οἰδηματώδεις* (ut dictum §. 112.) & postea imprimis hoc nomen dabatur aquosis frigidis tumoribus: sed cum in hoc casu calor adsit, omnis inflammationis in majoribus vasis comes; hinc talis tumor dicebatur *œdema calidum*: sed hoc tantum obtinet, dum in majoribus lymphaticis arteriis inflammatio adest.

**I**N MINORIBUS DOLORES SINE APPARENTE TUMORE. Omnes sensus, imo omnem fere captum fugere minima corporis nostri vascula, satis firmis probatur argumentis. In primo enim pulli stamine punctum illud saliens movebat liquida, vasis contenta, sed quantæ tenuitatis! Nervorum mirabilis structura; cerebri per nervos, ad partes corporis delatos, tam distincta actio in singulis musculis movendis, pro voluntatis arbitrio; sensuum organa tam vivida actione in mente distinctas adeo ideas excitantia &c.; hæc rem satis evincunt. Sed si minima hæc vascula inflammentur & tumeant, non augebunt ad sensus molem partis affectæ; poteruntque tamen acerbissimos excitare dolores: nam in sævissima podagra, & dolentissimo rheumatismo, sæpe nullus tumor apparet. Mitior semper horum malorum indoles observatur, quando partes affectæ tument.

**I**N PINGUIFERIS, OSSEIS, MEDULLOSIS, NERVOSIS, BILIOSIS ALIA. Prout jam diversi per vasa feruntur humores, prout diversorum viscerum vel partium corporis fabricam constituunt vasa, orientur ab horum obstructione varia mala. Si enim in pinguedinosis vasis hoc fiat, calore & stagnatione cito corrumpendum pingue in pessimam convertetur ranciditatem. Ossis vasa inflammata cariem, exfoliationem, exostoses, tophos &c. producent; quæ recondita ossium cavis tenerrima vasa medullare oleum à sanguine secernunt, si inflammentur, medulla corrupta osse cavo clauso contenta terribiles morbos producere poterit. Nervi ipsi acerrimos dolores, dum inflammantur, parient; & peribit omnis nervorum sic affectorum usus ad sensus & motus. Biliosa vasa obstructa impediunt, quo minus bilis, à sanguine venoso abdominalium viscerum per hepatis fabricam separata, ad debita loca feratur; sed regurgitans in sanguinem cacochymiam biliosam faciet, & plurima, quæ inde sequuntur, mala.

§. 123. **Q**UI vero sedem, naturam, materiem, causas, effectus obstructionum, hucusque (107. ad 123.) tradita novit; illi signa, quibus futura, præsensque obstructio, ut & ejus effecta, sciuntur, ignota non erunt.

In hac paragrapho agitur, quomodo & ex quibus signis in *Diagnosi* concludatur, obstructionem adesse; quomodo in *Prognosi* futura prævideatur; uti & effectus inde secuturi, sed ex illis, quæ præcedentibus hujus Capituli paragraphis dicta sunt, hæc omnia facile deducuntur.

Y

**S E D E M.** Obstructio, facta ab externa causa, vasa comprimente, in omni loco canalisi nasci potest; à reliquis causis enarratis orta obstructio imprimis hærebit circa maximas vasorum conicorum convergentium angustias.

**N A T U R A M.** Quæ, ex definitione data §. 107. tantum in excessu molis transiit supra capacitatem vasis transmissuri consistit.

**M A T E R I A M.** Quæ tot habere potest diversitates, quot sunt distincta suis dotibus fluida per proprios canales mota: sed & idem liquidum, varia degeneratione morbosa, distinctas concretiones facere potest; unde iterum materiæ obstructionis ingens varietas. Potest v. g. sanguis inflammatoria tenacitate immeabilis reddi; potest in polypos concrelescere; potest frigidus mucosus glutine lentescere &c.

**C A U S A S,** quæ hætenus recensitæ sunt, & vel angustando vasa, vel augendo moleculas fluidi, vel denique errore loci agunt.

**E F F E C T U S,** qui iterum varii sunt, ratione vasis obstructi & materiæ obstructantis; & pro vario impetu, quo liquidum pellitur in locum obstructum.

Quomodo jam ex omnibus his cognitis habeatur Diagnosin & Prognosis, dictum fuit §. 27.

§. 124. **E T** cognita hac ejus diversitate, difficile non erit, propriam cuique curationem tradere.

Nulla generalis regula in cura obstructionis dari potest, sed sollicite indaganda est causa, quæ obstructionem fecit; hac enim cognita, tantum certi quid statui potest. Solet quidem dici, in omni obstructione conducere, ut vas obstructum laxetur, ut facilius cedere & dilatari posset, & sic transmittere infarctum liquidum: sed si ab errore loci nata sit obstructio, laxatio vasorum an conducet semper? Certe §. 118. demonstratum fuit, inter causas erroris loci merito recenseri laxationem vasis. Alterum generale indicatum in cura obstructionis prædicabatur dissolutio concreti obstructantis: sed nisi ex historia causarum noverit Medicus, cujus naturæ fuerit illud concretum, hærebit anceps. Aliam enim medelam poscit inflammatoria densitate concrelescens sanguis, quam si inertis frigido mucosus lentescant humores. Idem in reliquis verum est: hinc pro varietate causæ cognitæ, obstructionis varia erit curatio.

§. 125. **N A M** illa, quæ à compressu externo (§. 112), indicat ablationem causæ prementis, quæ, ubi possibilis, petenda ex secutura ejus descriptione.

In §. 112. recensitæ sunt illæ causæ, quæ observatæ fuerant externa compressione vasorum obstructionem fecisse: sed nisi causa illa comprimens noscatur, & cognita tollatur, non poterit sanari obstructio inde orta, uti evidenter patet: Ideoque in numero citato in quatuor classes distinctas redactæ sunt hæ causæ, ut ordine indagari possint.

Postquam autem innotuit causa, quæ externa compressione vasis obstructionem fecerat, inquiri debet, an hæc tolli possit; an vero talis sit indolis, ut nullo hætenus cognito artis molimine superari vel emendari possit. V. g. tumores illi ampullosi, qui à varia spissitudine materiæ contentæ, atheromata, melicerides, stea-

tomata dicuntur, dum in externis partibus hærent, ubi manibus accessus datur, non nisi difficulter tolli possunt; quid sperandum de similibus tumoribus, dum in interioribus corporis hærentes vicina vasa comprimendo angustant? Dum uterus gravidæ mulieris distentus suo situ, ut aliquando fit, venas iliacas premit, tumor œdematosus crura & femora occupat; nec tolli potest hoc malum, cessans sponte, post partum detumescente utero. Quando scirrhus confirmatus, vel cancer ex eo natus, extirpari non potens, obstructionem fecerit, quænam cognita medela superest? Idem in plurimis aliis obstructionum causis obtinet. Interim æque magnus Medicus est, qui incurabilem morbum distinguere potuit, quam qui sanabilem tollere valuit.

Reliquarum vero causarum in §. 112. recensitarum medela vel ex ante dictis hauriri potest; uti v. g. plethorici tumoris curatio; vel de illis postea singulis capitulis diceretur: v. g. de inflammatione, suppuratione, scirrho &c. de luxatis fractis &c. Dum vero externo corpori applicata quædam vasa comprimunt, ut vestes, fasciæ, ligaturæ &c. facilis cura est, & sponte patet.

§. 126. **E**A vero, quæ ab aucta fibrarum contractione oritur, cognoscitur per signa, quibus visceris, vasis, fibræ nimia contractio scitur (34. 36. 40. 50. 53.); tum quoque illa, ubi hæc contractio à secunda causa (113. N°. 2.) per suæ causæ signa clara; ut altera, quam inanitioni prægressæ adscripsimus. (Ibidem. N°. 3.)

In hac paragrapho agitur de signis, quæ docent obstructionis causam pendere à contractione propria vasorum aucta. Sed in §. 113. tres recensebantur causæ distinctæ, quæ augebant vasorum contractionem. Prima erat aucta elasticitas fibrarum, canalium, viscerum: sed hujus auctæ elasticitatis signa descripta sunt, dum de nimia rigiditate fibrarum, vasorum minimorum & majorum & viscerum dictum fuit in numeris hic citatis. Secunda causa erat nimia distensio vasculorum minorum constituentium majorum vasorum latera: hæc autem adesse cognoscitur nimix plenitudinis signis in Plethoræ historia recensitis. Tertia vero causa, quæ imprimis inanitioni prægressæ adscribebatur, cognoscitur adesse per evacuationes qualcumque magnas prægressas, faciem collapsam, pulsum parvum debilem, siccitatem lingue & oris interni, vires prostratas.

§ 127. **S**ANATUR hæc obstructio (113. 126.) 1. per remedia contractionem nimiam fibræ, vasis, visceris emendantia (35. 36. 38. 54. 55.) 2. maxime, si ipsi affecto loco applicari possit eorum virtus, quod halitus, fomenta, balnea, litus, fomenta efficiunt imprimis: 3. per auxilia, quæ vascula, membranas componentia, nimis impleta deplent. Quo evacuantia in genere, sed præprimis illis vasculis applicata, spectant, quæ sunt laxantia, diluentia, resolventia, attenuantia, deterfiva, evacuantia: 4. per illa, quæ callositatem factam resolvunt.

1. De his dictum fuit in numeris hic citatis; & patuit, tunc artem multum  
Y ij

posse efficere in similibus morbis, in quibus nimia rigiditas solidarum partium tollebat illud æquilibrium, inter fluidorum impetum & solidorum resistantiam, ad sanitatem requisitum. Sed aliud hic notandum occurrit, stimulos nempe mirabiles, imo & ipsos animi affectus, posse subito & efficacissime augere contractilitatem solidarum partium. Dum sulphuris accensi vapor pulmone hauritur, mox sic constringitur in omnibus suis valis, ut nil transmittat; unde omnibus animalibus majoribus lethalis sulphuris fumus. Oleum vitrioli, penicillo applicatum vivi canis dissecti intestino, fecit illud sic contrahi, ut nullam omnino cavitatem haberet. Aceti guttula, oculo inspersa, sic facit constringi palpebras, ut nulla vi diduci possint. Nisi Medicus noverit hos stimulos tollere, vel enervare, non poterit curare nimiam contractionem inde ortam.

Quantum autem possint animi affectus augere vasorum contractilitatem, patet obviis ubique observatis. Dum subito metu percutitur homo, mox pallet, & collabitur tota facies, contractis omnibus valis: si jam cogitemus, idem in interioribus fieri posse, quod in externa cute tam clare videmus, mirabiles & pertinacissimi inde possunt oriri morbi. Vidi mulieri sanæ, subito terrore affectæ, mox ortum fuisse in mamma tumorem, qui, licet optimis tractatus remediis, in scirrhum irresolubilem induruit.

2. Si universa solidorum compages nimia rigiditate peccat, toti corpori & omnibus ejus partibus externis & internis illa applicari debent remedia, quæ nimiam illam tollunt rigiditatem: sed si in singulari parte hæreat hoc malum, quare omnia vasa laxarentur? Sufficit tunc topica medela, si applicari possit soli parti affectæ: hoc autem imprimis fit per

**HALITUS.** Aqua tepida emollit partes solidas corporis; sed aqua, in vapores resoluta calidos, longe magis. Durissima cervorum cornua, vaporis aquæ tepidæ exposita, sic emolliuntur, ut scissilia fiant. Cubiti articulationem, ob indurata ligamenta immobilem penitus redditam, vidi pristinam flexilitatem recuperasse, dum per binos menses quotidie per horam pars exponeretur aquæ calidæ vaporis. Hinc ubi commode vapor determinari potest ad partem, reliquis auxiliis aquæ calidæ halitus præferendus est.

**FOMENTA**, quæ sunt ex aquosis, imprimis si mollissimæ herbæ his incoctæ fuerint, ut malva, althæa &c. semina lini, avena &c. tali decocto madidi panni lanei applicantur parti; superimponitur his pannis vesica oleo perfricata, ut impediatur exhalatio; deinde fictilibus calidis, variæ figuræ pro variis partibus corporis, impositis calida servantur hæc fomenta: sic pars affecta in perpetuo vaporis balneo hæret. Dum pleuriticorum lateribus hæc sic applicantur, summum doloris levamen sentiunt.

**BALNEA.** Imprimis balnea vaporis, partes enim corporis aqua immerse comprimuntur ab aqua, vapor autem aquæ omnia laxat, uti ante dictum est: observatum fuit, in similibus malis topicis profuisse, ultra fere quam sperari poterat, aquæ calidæ ex alto delapsum guttatim in partem affectam: chronicos admodum, & ad omnia fere remedia rebelles, circa genu tumores hac methodo curavi aliquoties.

**LITUS.** Si nempe ex blandissimis oleosis fiant. Rigida animalium coria oleo inuncta flexilia redduntur: omnibus partibus corporis, in quibus requiritur flexibilitas, apponitur molle oleum: omnes muscoli, tendinetque vaginis oleosis re-

guntur : omnibus ligamentis , ossa articulata nectentibus , pinguis unctuosus liquor affunditur. Sed ubique invenitur , illud pingue esse blandissimum , nullamque habere acrimoniam : magnus enim error foret credere , olea acria ambusta , Galbaneta illa Paracelsi &c. efficaciora esse ad hos usus. Ubi sola nimia rigiditas peccat in partibus solidis , mollissima olea p<sup>o</sup>lla ex vegetabilibus , medulla ossium recens , mollissimum althææ unguentum & similia , pulcherrimi tunc usus ; imprimis si , post balnea vel fomenta applicata , bene deterfis & siccatis partibus corporis hæc illinantur.

3. Dictum fuit §. 113. n<sup>o</sup>. 2. , quod per Anatomicas injectiones demonstratum fuerit , majorum vasorum latera minoribus vasculis constare : hæc vero nimis impleta possunt minuere cavitatem vasis , cujus latera constituunt. Si v. g. emulgentes arteriæ , inflammatae in suis membranis , sic arctentur in minimis ramulis per renum substantiam dispersis , ut non fiat urinæ secretio , erit ischuria , ab hac causa forte aliquando in morbis acutis observata. Post validissimos cursus lactantis animalibus , inventum fuit sæpius , majora vasa in suis tunicis fuisse penitus inflammata , & sanguine turgida : cura hujus mali perficietur per :

**E V A C U A N T I A** IN GENERE &c. Nihil hic habemus nisi generalia ; omnis enim depletio artificiosa fit fere tantum per majora vasa. Omnium fere maximum auxilium est venæ sectio ; & sic depletis maximis vasis minus comprimuntur minora horum latera constituentia , minori impetu urgetur liquidum in locum obstructum : & si magna fuerit facta sanguinis missio ad animi deliquium usque , contracta vasa minora , ablata pressione vitali à basi versus verticem , reprimunt hærens in illis fluidum in vasa majora. Sed si loco affecto possint applicari remedia , tunc recensita omnia conveniunt : si v. g. in morbo acuto ischuria ab hac causa nata fuerit , & æger nullum tenesmum exonerandæ vesicæ sentiat , noscitur , circa renes hæreere hoc malum : tunc generalibus evacuantibus præmissis , fomenta lumbis applicantur , & clysmata injiciuntur , quia colon intestinum renibus proxime adjacet , ut saltem quam proxime ad partem affectam applicentur remedia.

Quomodo autem **LAXANTIA** , **DILUENTIA** , **RESOLVENTIA** , **ATTENUANTIA** , **DETERSIVA** agant , explicatum fuit §. 54. n<sup>o</sup>. 4.

4. Callus , uti dictum fuit §. 112. n<sup>o</sup>. 1. in fine , fit , si vasa minima compressa , omni liquido expulso , lateribus contiguis factis , concreverint ; tunc non amplius manet vas pervium , sed fit concreta membrana ; unde nulla humiditas , nullus sensus in callo. Adsunt quidem eadem vasa quoad materiem , non quoad liquidorum transfluxum. Callus tamen abscissus renascitur in cute externa , quamvis nullus transfluxus liquidi vitalis per callum fit. Videtur autem hoc fieri , quia concreta vasorum extrema vi vitalis liquidi sensim protruduntur , extremitates vero vasorum apertæ , callo contiguae , ab illo comprimuntur ; hinc callus detritus , abscissus , increfcit iterum , uti quotidianis observatis constat. Quam difficulter autem callositas semel nata tolli possit , sequens docebit paragraphus.

§. 128. **V**ERUM illa obstructionis species , quæ ab hac causa , raro , si unquam , curari potest. Emollientia , & laxantia præcipua sunt. Unde mortis patet inevitabilis necessi-



tas , & magna vitæ longæ per medicamenta parandæ difficultas.

An unquam constiterit , vas concretum iterum pervium factum fuisse , maxime dubito : quomodo enim hoc fiet ? Si velis liquidi vitalis impetu & celeritate auctis divellere concreta latera , citius solventur vasis callo contigui parietes , per quod fluidum ad vas concretum devehiri debet : præterea aucto motu vasa viva , ad calli limites appressa , complanabuntur , & callosa fient ; sicque hoc modo callus potius augebitur. Dum callosa cutis externa facta est , unica spes curæ est , si caveatur omnis attritus ; sicque sæpe sensim callus minuitur , dum ejus extrema superficies sensim deteritur , & vasa viva supposita sensim protrudunt concretorum vasorum extrema. Homines , qui duris laboribus callosas manus habent , postea his abstinentes sensim molliores illas factas sentiunt : forte tamen nunquam loca illa callosa vasis apertis fient iterum perspirabilia. Sed si vel nunquam , vel difficillime saltem , calli externæ cutis possint resolvi , quibus remedia applicare possumus ; quid fieri poterit , quando partes internæ callosæ induerunt ?

**EMOLLIENTIA ET LAXANTIA PRÆCIPUA SUNT.** Per hæc enim durum hoc operculum , vasis vivis suppositis impositum , sic emollitur , imprimis si & interna similia larga copia exhibeantur , ut sensim separetur à vivis partibus subjectis. Quibusdam hominibus , verno tempore imprimis , quando omnia turgere incipiunt , oritur intolerabilis dolor à callis pedum plantas occupantibus , sic ut incedere nequeant : vivæ partes , callo subjectæ , inflammatae , callosa duritie incumbente pressæ , illas molestias pariunt : si tunc lacte cum farina lini coccto foveatur callus noctes & dies , incipit emollitus elevari , & secedere , interim tamen subjectus locus , separato callo glaber apparet & politus , non perspirabilis ; hinc iterum renascitur callus : quod præcaveretur , quantum fieri potest , si locus mollissima tegatur aluta , ut omnis attritus caveatur.

**UNDE MORTIS PATET INEVITABILIS NECESSITAS &c.** §. 39. n<sup>o</sup>. 1. & §. 55. demonstratum fuit , vitam humanam tandem se ipsam destruere absoluta necessitate. Requirebatur enim ad integritatem actionum vitalium debita flexilitas canalium , per quos vi cordis pelli debebant liquida ; debebant vasa cedere posse distendenti fluido , & ablata causa distendente redire in priorem capacitatem. Sed ex dictis ibidem constat , ipsis vitæ sanæ actionibus sensim majus robur accedere partibus solidis ; aucto robore , plus resistere solida fluidis impulsis ; donec tandem rigida penitus facta vasa non cederent liquidis à corde pulsis ; unde cor non poterat evacuari : hinc placidissima sine morbo fere in ultimo senio mors. Si consideretur in variis ætatibus humanum corpus , patebit , quanta fiat mutatio in firmitate solidarum partium vario vitæ tempore. Recens nato infanti omnia mollia , liquidis plena apparent ; tota superficies corporis vasis ubique patulis in omni puncto perspirabilis ; ossa ipsa ceream fere flexilitatem habent : procedente ætate , sensim minuitur vasorum perviorum numerus ; augetur robur & firmitas in omnibus partibus corporis ; ossa durefcunt : tandem in decrepita senectute totum corpus exsuccum fit ; articuli in juventute adeo flexiles obrigescunt , omnis fere pinguedo evanescit ; flaccida , callosa , & turpibus rugis deformis cutis vix amplius perspirabilis manet ; & ossa fragilissima fiunt ; cartilagineas osseam induunt duritiem ; & vasa , antea membranacea & flexilia , in cartilagineam , imo osseam , naturam mutantur. Quo autem per motus animales magis aucta fuerit vitalium actionum

efficacia , eo citius hæc rigiditas nascitur : hinc nimio labore exercitata animalia ante ætatem senescunt.

Qui ergo fatalem vitæ terminum se remove posse gloriabuntur , tentent hanc rigiditatem senilem præcavere , vel natam curare. Fuerunt ab omni tempore tales jactatores , qui *ἀγροίαι*, imo immortalitatem ipsam , auderent promittere mortalibus ; persuaserunt pluribus , quod omnes sperant avide. Galeni sæculo Philosophus librum conscripserat , in quo docebat modum , quo quis senii expertus perpetuo permanere posset. Annum agebat quadragesimum , dum hoc scriberet ; ad octogesimum annum vixit postea , sed gracilis adeo & exsuccus factus , ut rideretur ab omnibus : & quamvis proprio exemplo doctrinæ suæ falsitatem ostenderet , tamen effugia quærebat , dicens , non quemlibet hominem senii expertem permanere posse , sed ad hoc natura opus esse idonea : & promittebat , se infantium ad hoc idoneorum corpora redditurum immortalia , si statim ab initio illorum curæ præficeretur. Tuto hæc jactabat periturus , antequam adolescerent (a).

Sed dum in diætâ dirigenda fidem tanti promissi ponebat , minus insaniebat , quam Chemicus , qui paucis guttulis quotidie sumtis vitam ad mille annos se producere posse gloriabantur ; tunc deliberaturi , quando vellent mori. Paracelsus ipse quadragesimo octavo ætatis anno mortuus vanitatem hujus promissi demonstravit.

Si quid prodesset ad vitam longam , forent illa , quæ nimiam rigiditatem futuram præcaverent : hinc victum humectantem senibus prodesse dixit Galenus (b) , & alibi (c) hanc rem latius deduxit.

§. 129. **I**LLA fluidi ineptitudo ad transeundum per vasa , quæ à figura sphaerica amissa pendet , cognoscitur perspectis ejus causis (116) , quippe sensibiles plerumque sunt.

Demonstratum fuit in §. 115 , quod sphaera sola sit inter figuras solidas , quæ datum orificium transire posset , quocumque situ ad illud delata fuerit ; modo diameter orificii transmittentis major sit sphaeræ diametro. Sphaeræ enim omnes sectiones factæ planis per centrum transeuntibus , & cuivis dato plano paralelis , sunt figuræ æquales , similiterque positæ , nempe æquales circuli. Simulac ergo elementa fluidorum , quæ solitaria per ultimas angustias vasorum transire debent , amiserunt hanc figuram , infinitæ poterunt esse posituræ varietates , quibus denegabitur transitus. Sed unde concludi potest , hanc obstructionis causam adesse ? certe minimarum harum molecularum figura in pellucidis vivorum animalium partibus non nisi oculo armato detegitur ; hinc non facile erit per sensus hoc cognoscere in parte obstructa corporis humani. Sed cognitæ sunt causæ §. 116. descriptæ , per quas æquabilis compressio molecularum fluidi tollitur : ubi ergo novimus has causas prægressas fuisse , tunc obstructionem natam deperditæ figuræ sphaericæ molecularum fluidi adscribere possumus.

Sed causæ tres recensebantur , quæ tollebant æquabilem compressionem elementorum fluidi : languidus nempe nimis fluidorum per vasa motus , quem pulsus ar-

(a) Galen. de Marasmo cap. 2. Charter Tom. VII. pag. 179. 181. | Tom. VI. pag. 152.

(c) De Marasmo cap. 5. Charter. Tom. XII.

(b) De Sanit. tuenda Lib. V. cap. 5. Charter. pag. 183.

terix docet; laxitas nimia vasorum ex dictis §. 27. & §. 44. adesse cognoscitur; & minuta copia liquidi, quæ scitur adesse, si evacuationes magnæ præcesserint, collapsa sunt vasa, siccitas totius corporis obtineat.

§. 130. **S**ANATUR vero remediis, quibus illa figura redditur. Qualia sunt, quæ motum augent per vasa & viscera. Ut stimulantia omnia, & roborantia; tum motus animalis citatior.

Corpus humanum illis instructum dotibus, quæ ad sanitatem requiruntur, valet ex ingestis diversissimis inter se conficere sanguinem, cujus elementa sphericam illam figuram habent; hæc autem figura non præexistit semper in particulis assumptorum, sed nata fuit per efficaciam vasorum & viscerum, qua ingesta convertuntur in naturam nostram. Ubi ergo deficit hæc figura in elementis fluidorum, totum, quod ars valet, est ut restituat illas causas, per quas naturaliter hæc figura his fluidorum elementis conciliatur.

Sed motus humorum per vasa flexilia, & reagentia valido nixu in distendentes humores, inducebat crudis ingestis hanc figuræ mutationem. Chylus per 12 horas cum sanguine fluens per vasa mutabatur in sanguinem; & eo celerior hæc mutatio, eo perfectior, quo validior esset, cæteris paribus, actio vasorum in fluida: hinc in robustis & exercitatis hominibus ingestorum subita assimilatio; in languentibus & debilibus, tardior.

Patet ergo evidenter, amissam figuram sphericam molecularum fluidi restitui pulcherrime, si augeatur robur vasorum, quo contenta fluida premunt, ut & si intra idem temporis spatium vasorum efficacia sæpius applicetur fluidis contentis, id est, augeatur circulationis velocitas.

Quomodo vero & per quæ auxilia robur vasorum augeatur, dictum fuit §. 28. & 47. Qua ratione augeatur circulationis velocitas, pariter dictum §. 28. n°. 2. Quomodo stimulantia hunc effectum producant, dictum fuit §. 75. n°. 5.

Dum laxa illa, frigida, & mucosis humoribus plena, corpora curant Medici, excitant gratissimis aromaticis stimulis; & imprimis ferri, in acidis vegetabilibus blandis soluti, usu, languentem motum. Per frictiones, unctiones, equitationes, & corporis exercitia, circulationis velocitatem & efficaciam augent: redit brevi amœnus ille ruber color, sanguinis boni renascentis indicium; omnesque functiones, quæ languebant antea, vel & penitus depravatae erant, restituuntur. Unde evidentissime patet, liberum esse tunc per vasa fluidorum motum; hinc redditam esse figuram sphericam fluidorum elementis, quæ requirebatur, ut per ultimas vasorum angustias in omni possibili positura transire possent.

Motus autem animalis citatior imprimis prodest duplici effectu, auget enim circulationis velocitatem, & reddit partes solidas corporis firmiores; ut dictum §. 28. n°. 2.

§. 131. **L**IQUIDI spissior concreta moles, quum oriatur à tam variis & diversis causis (117), etiam pro re nata varia remedia, variam sanandi methodum, requirit: quæ diversitas

sitas in singulis dein morbis indagata ipsa auxilia , & applicandi modum , dabit.

Obstructionis causæ , quatenus fluidis inhærebant , duplices erant : nempe vel figura mutata elementorum fluidi fecerat liquidi immeabilitatem ; vel molecularæ , prius separatæ , nunc adunatæ à quacumque causa , non poterant penetrare vasorum angustias. Hæc vero adunatio molecularum à tam variis , imo penitus oppositis , causis pendet , enumeratis §. 117 , ut nihil certi quoad curationem statui possit , nisi prius cognoscatur singularis causa , quæ fecerat concretionem. Quies enim & auctus motus ; frigus & calor faciunt fluida nostra concrelescere : sed tam oppositæ causæ diversam etiam medelam requirunt. Dum in morbis languidis chronicis fluidorum immeabilitas nascitur , stimulantibus augetur circulationis velocitas , ut dividatur concretum : dum in acutis inflammatoriis morbis phlogisticus lentor sanguinem spissorem reddit , venæ sectione debilitamus vitam , ut tardior fiat sanguinis motus : dum nimis debilia vasa non satis efficaciter agunt in contenta fluida , concreciones nasci possunt in stagnantibus fere , vel non satis valide motis , liquidis ; dum nimis fortia vasa comprimunt contentos humores , expressa parte tenuissima , compacta parte residua spissiori , concrelescunt.

In singulis ergo morbis , qui ab obstructione nati sunt , vel qui fecerunt obstructionem , omni cura inquirendum est in indolem causæ , à qua nata fuit liquidorum immeabilitas ; aliter nihil certi statui potest. Paragraphus autem sequens generalia tantum tradit auxilia , quibus concretio tollitur fluidorum.

§. 132. **A**T moles concreta in genere tollitur 1. motu vasis reciproco. 2. Dilutione. 3. Attenuante fluido advecto , permisto , moto. 4. Coagulante causa educta.

1. Singulis vicibus , quibus cor expellit sanguinem ex suis cavis , arteriæ dilatantur ; mox cessante cordis actione , arteriæ iterum contrahuntur : sic alternis vicibus liquidum impulsus superat vasorum resistantiam , & ab illa superatur : hinc omni momento vitæ liquida vasis contenta ad latera vasorum affricantur , imprimis in angustissimis vasorum finibus , ubi solitaria , vel saltem pauca elementa fluidi simul possunt transire. Hic autem attritus fluidi per reciprocum motum vasorum impedit , quo minus concretio nascatur ; & simul summum auxilium est , quod concrecionem natam tollit. Sanguis noster vasis emissus illico concreescit ; per hunc autem attritum continuum à concrecone impeditur. Sed , ut demonstratum fuit §. 119 , obstructio imprimis in arteriis locum habet : in arteriis vero ille motus reciprocos toto vitæ tempore durat ; hinc molecularæ sanguinis adunatæ , hærentes in arteriarum angustis , mechanico hoc tritu dividi & resolvi posse videntur : sanguis enim vasis emissus , concreescens illico , attritu solo potest iterum fluidus reddi. Sanguinis insulam rubram concretam solo tritu in mortario vitreo potui redigere in spumescens coccineum liquidum.

Pulchrum habetur apud Leeuwenhoeckium (a) observatum , quod demonstrat efficaciam reciproci illius vasorum motus in dissolvendo sanguine concreto. In vel-

(a) Experiment. & contemplationes pag. 105. &c.

peritione fame & frigore languenti, dein parum refecto, observavit microscopiis tenuem illam membranam, qua expansa hoc animal alarum instar utitur: nullum observavit motum, nec in arteriis nec in venis, sed post sex horas elapsas, reviviscente magis animali, vidit particulam sanguinis concreti oblongam, totum arteriæ cavum implentem, protrudi per arteriam, mox retropelli: dein protrudi iterum, sicque ire & redire hanc viam; donec tandem hoc attritu resoluta massula per ultimas arteriæ angustias transiret in venam. Non potest haberi exemplum magis evidens obstructionis ab adunatione molecularum fluidi natæ: & simul apparet, quomodo vitali motu fluidorum per vasa, & attritu ad latera vasorum, dividatur iterum hoc concretum, & resolvatur obstructio.

2. Quando nempe inter moleculas concretas insinuare se potest tenuius fluidum, sicque illas à contactu remove, tunc dicitur obstructio soluta esse per dilutionem. Ita si in exemplo mox narrato, dum massula concreta ibat & redibat in vase obstructo, potuisset affundi tenue liquidum, hoc pressione vasorum attritum cum hoc concreto, illud citius resolvisset. Accedit præterea, quod diluentia aquosa sint, hinc semper laxiora reddant solida nostri corporis. Sed vas laxatum facilius transmittet immeabilem ibi hærentem massulam. Quia autem diluentia sola non semper possunt resolvere concreta, hinc sæpe aliis indigemus auxiliis.

3. Si jam simul diluenti liquido misceantur talia, quæ cognoscuntur habere hanc vim, ut possint solvere concretas moleculas in illas partes, ex quibus concreverunt, tunc omne fit, quod ab arte expectari potest. Omnia autem hæc assumpta, venis recepta, cordis & arteriarum viribus advehuntur ad locum obstructum; dumque hæc massula concreta adhuc mobilis est, ut reciproco motu ire & redire possit, illam continuo præterlabuntur, cum illa teruntur, moventur, miscentur, donec resolutio facta fuerit. Verum ubi adunatae moleculæ, compactæ & immobiles hærent in vasorum angustis, tunc liquidum attenuans per vas obstructum protrusum à tergo urgere potest massulam obstruentem, non vero præterlabi, nec cum illa moveri & misceri; & tunc magna difficultas est resolvendi hoc concretum. Tale videtur obtinere malum in inflammatione non resolubili, ubi optima diluentia & attenuantia, magna quamvis copia ingesta, non valent dissolvere concretum inflammatoria viscositate sanguinem.

4. Si hoc fieri possit; nam hic plerumque videtur hære magna difficultas: dum enim per acida v. g. coagulum sanguini inductum fuit, cognita quidem sunt corpora, quæ acidum trahunt; sed si coagulatus sic sanguis in ultimis vasorum angustis hæserit, lateribus vasis obstructi ubique contiguus, non erit facilis aditus ad hoc obstruens coagulum. Præterea acida illa fortissima non inducunt coagulum tantum interpolatione suarum partium inter partes sanguinis antea non coherentes, sed uno momento, & ipso quasi tactu, coherere inter se cogunt separatas massulas; hinc sanguini de vena fluenti, per acida admista statim coagulato, admistis alcalinis, quæ acidum in se statim trahunt, non redit pristina fluiditas. Si à spirituosus fermentatis tale coagulum inductum fuerit, eadem, imo major erit difficultas, cum spirituosus illo expulso, factum tamen coagulum maneat. Serum enim sanguinis, ab alcohole affuso induratum, non dissolvitur, expulso coagulante per calorem tam lenem, qui serum concrefcere minime faceret. Ubi vero à gelu coagulum inductum est sanguini, possumus spicula illa glacialia educere, admota prudenter aqua frigidissima; sed qua methodo, & quibus cautelis, hoc fieri debeat, dicetur §. 454.



§. 133. **R**ECIPROCUM vasi motum conciliant 1. quæ distendentes causas temperant. Ut est venæ sectio 2. quæ vasa roborant ( 28. 29. 45. 46. 47. 49. ). 3. Frictio , & muscularis motus. 4. Stimulantia.

1. Causæ distendentes arterias sunt sanguis illas replens , & vis cordis urgens sanguinem in arterias plenas. Ut autem reciprocus motus systoles & diastoles in arteriis maneat , non debent distendentes causæ tolli , nisi enim arteria prius distendatur , non contrahetur postea : sed debent sic temperari , ut possint vicissim cedere causis illis , quæ arteriæ systolem faciunt : hinc merito dicitur , causas distendentes esse temperandas. Si enim distentæ arteriæ non possint se evacuare in venas nimis plenas , vel arteriosi fines obstructi denegent transitum , cor perget hæc vasa distendere , nec poterunt se contrahere ; unde cessabit ille reciprocus motus. Omne enim vas nimis distentum , si repletum maneat , est vas mortuum. Si jam hoc in omnibus vasis fieret , mors sequeretur illis : dum in quibusdam vasis hoc obtinet , in illis nulla fit circulatio , sed in distentis vasis liquidum immobile stagnat.

Unicum tunc remedium est , quod tollit hanc plenitudinem , nempe venæ sectio ; si venæ simul nimis plenæ transitum ex arteriis impedian. Si vero in arteriis distentis circa finem obstructis aggestus hæreat sanguis , arteriotome prodest potius ; quia cum liber transitus ex arteriis in venas impeditus est , venæ sectio plenitudinem nimiam arteriarum tollere nequit. Sic in morbis acutis salutari naturæ molimine toties soluta in naribus arteriola plenitudinem illam tollit. Ideo tam sollicitè omnia signa recensuit Hippocrates , quæ docerent Medicum , moliri naturam hanc viam , ne imprudenti cura turbaret , vel impediret salutarem hanc evacuationem.

Sed præterea per sanguinis missionem minuuntur vires , quibus cor sanguinem in arterias pellit : possumus enim vitam minuere pro lubitu , imo animi deliquium & mortem ipsam inducere per sanguinis missiones. Hinc patet sic omnium efficacissime minui distendentes causas.

Paret hoc clare in summe plethoricis ; in quibus , dum vasa nimis distenta se contrahere nequeunt , suffocatur circulatio ; pulsus incipit languidus fieri ; imo statuarum instar obrigescunt : simul ac larga venæ sectione solvitur hæc plenitudo , contracta vasa propellunt distendentes humores , redeuntque vires suffocatae antea.

Quantam autem efficaciam habeant hæc evacuationes in solvendis obstructionibus , docent pulcherrima observata. Dum Pleuritide acutissima decumbit homo , præ doloris acerbitate respirationem supprimens se ipsum suffocat : dum sanguis mittitur , sæpe statim levamen sentit ; imo aliquando omnis sedatur dolor , contractis vasis repellentibus obstruentes massulas in majora vasa. Monitus per insomnia Galenus , juvenis adhuc , sibi ipsi dissecauit dextræ manus arteriam inter indicem digitum & pollicem sitam ; permisit sanguinem effluere , donec sponte listeretur ; sic enim somnium præceperat : & subito diurnus dolor extinctus est , in illa maxime parte fixus , qua jecur diaphragmati committitur. Alii homini per vulnus in malleolo inflictum vulnerata fuerat arteria , nec quievit hæmorrhagia , donec Galenus vocatus totam arteriam dissecarer ; sed huic homini quarto jam anno molestus coxæ dolor inde sanatus fuit ( a ).

( a ) Galen. de Curand. ratione per Venæ sectionem cap. 23. Charter Tom. X. pag. 451.

2. Reciprocus motus contractæ & distentæ alternis vicibus arteriæ fiebat à cordis vi impellente sanguinem, & arteriæ elasticitate & vi muscolari, qua se contrahit. Sed demonstratum fuit §. 26. nimiam debilitatem fibrarum producere vasculorum, ex his conflatorum, extensionem, & in liquida contenta inertiam; hinc ubi nimia laxitas vasorum facit, ut minori efficacia se contrahant, tunc vasorum roboratio locum habet.

Sed ipsa nimia distensio vasorum robur debilitat. Sic vesica, diu distenta in urinae retentione, paralytica fere facta, omnem se contrahendi vim amittit: & forte ab hac causa plurima in morbis pendent. Qui valida laboraverunt ophthalmia, sæpe tota vita habent nimis laxa hæc vascula; unde à levissimis causis distenta rubent: roborantia, prudenter applicata, sola tunc prosunt. Post morbos acutos inflammatorios capitis, sæpe manent læsæ adhuc cerebri functiones, quamvis dudum deferbuerit morbi impetus; pulposis corticis vasculis infarctis adhuc manentibus: sensim soluta materie obstruente, aucto vasculorum distentorum robore, superatur malum. Si debilitante cura pergat Medicus, insanibilis sæpe postea stulticia manet.

Quomodo autem, & per quæ, vasa roborari possint dictum fuit numeris citatis.

3. Per frictiones fit successiva & repetita sæpius vasorum mollium compressio & laxatio; hinc frictio supplet reciprocum illum vasorum motum. Possumus per frictiones, premendo liquida ab apice versus basim, facere, ut arteriæ venæ fiant; sicque ducere obstruens immeabile ex angustis arteriarum finibus in latiorē locum; relaxata parte, mox pellitur iterum in priores angustias: dum hoc fit sæpies, idem erit perfecte, quod in vespertilionē viderat fieri Leeuwenhoeckius, id est, ita illo & reditu atteretur & dividetur illud obstruens, sic ut transire possit in venas.

Quantum autem valeant frictiones in resolvendis obstructionibus, docent observationes Medicæ. Parotidem glandulam indurata, plurimis, illique efficacissimis remediis frustra tentata, resolutam vidi, dum bis de die, vapor aquæ tepidæ cum aceto exposita prius parte, pannis laneis perfricaretur per horam. Idem in strumosis colli glandulis observatum est sæpius.

MUSCULARIS MOTUS vero huc convenit: quatenus per illum accelerato venosi sanguinis motu cor irritatum fortius & sæpius contrahitur: hinc augeatur circulatio, & vasa eodem dato tempore sæpius distenduntur, & contrahuntur vicissim.

4. Constat observatis certissimis, esse talia in arte remedia, quæ ingesta vel applicata corpori nostro augent motum in toto vel in parte; hæc vocantur stimulantia. Illa autem, mista vitali fluido per vasa moto, videntur vel sua mole & figura talibus, ut paucissimis punctis impetum sui motus communicent partibus quibus applicantur, irritare vasorum latera in frequentiores & validiores contractiones; tuncque mechanicis legibus explicari potest horum actio. Vel sunt talia, in quibus licet sensibus nihil acrimoniæ detegatur, quæ tamen certissimo effectu, quamvis lateat modus agendi, motum humorum per vasa, & vasorum attritum ad contentos humores augeant. De his autem dictum fuit §. 75. n°. 5. & §. 99. n°. 2.

§. 134. **D**ILUIT aqua, calida imprimis, si hausta, injecta, exhalans, applicata; atque, dein ad loca, ubi solvendum haeret, pulsa sit. Quo derivantia, attrahentia, propellentia spectant.

Respectu liquidorum nostrorum, si pingua exceperis, unicum tantum diluens habetur, nempe aqua; & reliqua omnia, quae diluentia dicuntur, tantum agunt ratione aquae, quam continent. Diluere autem proprie dicitur, si aqua, admittione & interpositione suarum partium, separat adunatas moleculas. Sed requiritur certus caloris gradus, ut aqua diluat: frigida enim potius coagulat fluida, constringit vasa; utroque hoc effectu nocens in hoc casu. Fervida aqua sanguinem uno momento concreescere facit. Omnium optimus ille caloris gradus, qui parum tantum excedit sani corporis calorem. Aqua talis, vaporis forma, vel specie fomenti, cataplasmatis &c. applicatur parti affectae; vel potata, vel clysmate injecta, vel denique venulis absorbentibus, in corporis interna & externa superficie positis, resorpta, miscetur sanguini: & tunc aequabiliter per totum corpus distribuitur. Sed indicatio curatoria requirebat imprimis, ut diluens aqua ad locum obstructum iret plus quam ad alias partes.

Habemus jam in arte talia auxilia, quae faciunt, ut liquidi vitalis impetus & copia augeantur in parte quadam corporis. Sunt autem talia, quae minuunt resistantiam in loco, versus quem indicatio jubet, ut majori impetu & copia ruant humores. Sed liquido, in partem corporis quamcumque pellendo, resistunt vasorum plenitudo & robur: omnia ergo, quae vasa deplent, vel vasorum latera reddunt minus resistantia, efficiunt, ut in hac vasa majori impetu & copia ruant humores. Hinc fomenta, cataplasmata, vapores aquae tepidae, laxando vasorum latera, hoc efficiunt: cucurbitae pariter, atmosphaerae pressionem dum tollunt in loco, cui applicantur, resistantiam minuunt: frictiones venas deplendo faciunt, ut arteriae celerius se in venas depletas evacuent: hinc circulationis velocitatem in parte augent, efficiunt ergo, ut eodem dato tempore major humorum copia aucta celeritate per partem fluat; dum scarificantur partes, quibus imponuntur cucurbitae, depletis valis adhuc magis minuitur resistantia. Praeterea omnia illa, quae applicata corpori stimulo suo vasa irritant in celeriores contractiones, ob eandem causam idem praestant. Hinc sinapismi, vesicatoria, &c. tanto cum fructu adhibentur in hunc usum.

Paret per Experimenta, quanti usus sint haec auxilia. Dum pars corporis exponitur aquae tepidae vaporibus, incipiet brevi tumere & rubere, majori copia liquidorum huc derivata. Dum in acuta phrenitide omnes turbantur cerebri functiones, balnea, epispastica, cucurbitae, applicata inferioribus partibus, quantum levamen adferunt! Pleuritis longo pulchrius curatur, si calidis fomentis emollientibus nocte & die tegatur affectum latus. Dum strumosis colli glandulis laboranti solventissima exhibentur remedia, nisi partibus affectis fomenta applicentur, vix multum profunt.

Omnia ergo, quae hoc efficiunt, ut in loco, ubi obstructio haeret, vasa depleantur celerius, & impleantur facilius, DERIVANTIA ET ATTRAHENTIA dicuntur: quia faciunt, ut aqua corpori applicata, venis recepta, sanguini mista,

intra datum tempus majori copia veniat ad partem affectam.

Sed PROPELLENTIA dicuntur talia auxilia, quæ motum humorum per vasa augment: hoc enim aucto, celerior fit propulsio aquæ sanguini mistæ. Sed hæc agunt æquabiliter in totum corpus: attrahentia autem & derivantia aucti motus effectum versus partem obstructam determinant.

Quando jam hæc simul conspirant, sanantur sæpe talia mala, de quibus desperabant fere omnes. In spina ventosa; & venereis ossium morbis, qui omnia fere vel optima remedia eludunt, datur magna copia decocti Ligni Guajaci: impleto dein corpore per hoc decoctum, suscitatur major motus; dum per accensum vini spiritum, nudo sub stragulis decumbenti ægro applicatum, excitatur febris: sic decoctum Guajaci celerius propellitur per omnia vasa. Interim pars affecta vel fomentis mollissimis obvolvitur, vel sic locatur, ut directe recipiat accensi spiritus halitum: sic derivatur & attrahitur in hanc partem remedii efficacia, & sapissimum sanatur.

§. 135. **A**TTENUANT 1. aqua. 2. sal mar. gemm. ammon. nitr. borax, fixus alcalinus, volatilis. 3. Saponex ex alcali & oleo nativi, compositi, fuliginosi, volatiles, fixi, bilis. 4. Præparata Mercurialia. Quæ ipsa perducuntur ad loca debita per derivantia, attrahentia, propellentia.

1. **AQUA** inter illa, quæ attenuant, principem locum obtinet. Adepti dixerunt ex aqua, per seminale rerum principium mutata, concrevisse omnia; & ultimo artis & naturæ effectū in aquam omnia resolvi posse. Hinc fere universales solvendi vires in aqua agnoverunt. Elementis enim aquæ hæc proprietas inest, ut calore (aqua enim in glaciem concreta vim solvendi non habet) a se invicem separata, possint locare in interstitiis suis corporum solutorum particulas, illasque ibi sustinere sic, ut simul cum aqua penetrent per minimas angustias, per quas aqua sola transire posset, nisi occurrant in hoc itinere aliis corporibus, quæ soluti corporis in aqua particulas fortius trahunt, tunc enim excutiuntur: v. g. salis marini granum sic solvitur in aqua ut dispareat totum, & licet decem libris aquæ diluatur, in singulis aquæ guttulis hærebit proportionalis salis soluti molecula, poteritque sal sic solutus in aquæ magna copia transire per omnia vasa, per quæ aqua ipsa posset transire. Sed experimenta docuerunt subtilissimam, quæ sub sensu cadit, fluidorum humanorum partem, aquam esse, saltem pro maxima parte. Urina recens emissæ halituosum quid spargit, quod vasis puris collectum aquam exhibet, in qua aliquid spirituosum odorati hæret. Similis vapor & ex sanguine sano, recens misso, exhalat. Subtilissimum exhalans de tota corporis superficie fluidum, radiosum labore collectum, aquam exhibuit, in qua latebat subtilissimum aliquid solo fere odore distinguendum; quod an aqua sit, an aliud quid, nondum per experimenta constat. Saltem inde pater, potuisse aquam transire per exhalantia vascula, quorum centena & amplius millia in spatio unius grani sabuli biant, secundum calculum Leeuwenhoeckii: ubi ergo obstruens molecula per aquam poterit attenuari & solvi, ibi cum aqua per minima quæque vascula, & resoluta erit obstructio.

Hinc ablata sæpe modica aquæ quantitate immeabiles redduntur humores, qui antea per angustissima fluxerant vasa, reddita aqua, iterum attenuantur: v. g. arteriæ exhalantes in narium cavis subtilissimum efflant liquidum; quod, dissipata parte mobilissima aquosa, concrefcit in mucum tenacem; mucus tamen ille iterum per aquam attenuari & solvi potest.

Sed vis hæc attenuans aquæ non valet solvere omnia concreta, in corpore humano observata. Salina quidem omnia, mucosa, mucilaginosa, gelatinosa, pituitosa frigida, saponacea, concreta per aquam attenuantur & solvuntur: sed inflammatoria sanguinis spissitudo, concreta oleosa, sebacea, calculosa &c. per aquam non solvuntur. Habentur tamen in arte & alia auxilia, quæ concrectiones illas dividunt, quas sola aqua solvere non posset; uti sunt salina multa, saponacea &c. sed & omnia fere hæc aquam requirunt pro vehiculo, ut penetrare possint ad locum obstructum. Aqua ergo in obstructionibus referendis fere universalium usum habet, dum vel agit attenuando, vel saltem vehiculi instar alia solventia deducit ad locum obstructum.

2. S A L M A R I N U S , G E M M A , A M M O N I A C U S . Satis affines sibi mutuo pluribus dotibus hi sales simili fere attenuandi efficacia pollent. Duo priores assumpti humoribus nostris miscentur quidem, sed per lotii vias immutati fere redeunt: hinc licet per pleraque corporis vasa transeant, tamen horum actione non immutantur. Omnia autem illa, quæ ingesta per corporis vires mutari nequeunt, semper majorem motum excitant; hinc & stimuli vice funguntur simul.

Ammoniacus autem sal, prioribus levior, salibus nativis sanguinis magis affinis, per vires nostri corporis mutabilis, & penetrabilis maxime, præfertur fere, & laudatur merito tanquam summum deobstruens in acutis æque ac chronicis morbis.

Videtur autem salium horum actio inde pendere, quod humoribus misti soluti, ad locum obstructum delati, vasorum actione quasi attriti ad moleculam obstruentem, pondere suo & figura dividant illud concretum, sicque aptum reddant, ut transire possit per vasorum angustias; dum simul stimulo suo vasorum in contenta fluida actionem augeant.

Quantam autem vim habeant, docent observata Medica. Dum à contusione sub integra cute, fractis vasis, sanguis in thrombum concretus hæret, sales hi soluti in aqua, applicati loco contuso, felicissime concretum sanguinem resolvunt. Qui sale marino abutuntur, sanguinem tandem habent sic dissolutum, ut vix vasis coerceri possit; unde validissimæ sæpe hæmorrhagiæ oriuntur, partim à nimis dissoluto sanguine, partim à nimia acrimonia humorum, erosio vasis.

N I T R U M . Hodiernum à Veterum nitro penitus differre videtur: illud enim videtur vel fuisse alcalinæ naturæ; vel salem ammoniacum Veteres vocaverunt nitrum. Plinius (a) dicit, *nitrum in picatis vasis adferri, ne liquefceret; calce respersum reddere odorem vehementem; in testa aperta exuri, ne exulset*. Sed hæc dotes sali armoniaco perfecte conveniunt; nitro autem hodie in officinis dicto minime quadrant. Alio autem in loco (b) de vitri inventionem scribens narrat, *famam ferri, quod appulsa nave mercatorum nitri, cum sparsi per litus epulas pararent, nec esset sortinis attollendis lapidum occasio, glebas nitri de nave subdidisse, quibus accensis per-*

(a) Lib. XXXI. cap. 10.

I (b) Lib. XXXVI. cap. 26.



*mista arena litoris, translucentes nobilis liquoris fluxisse rivos, & hanc fuisse originem vitri.* Sed hæc historia alcalinam nitri Veterum indolem arguere videtur: unde Boyleus & alii dixerunt, sodam Ægyptiorum esse nitrum Veterum.

Illud autem, quod hodie in officinis nitrum vocatur, Veteribus videtur incognitum fuisse, miro modo ambigens inter naturam vegetabilem, animale, fossililem: reperitur enim in desertis & inhabitatis locis in Indiis orientalibus crusta tenuissima superficiem terræ regens, post largas pluvias imprimis apparens, in aliis locis de terra nigra excoquitur; in vetustis ædificiis, cæmeteriis, stabulis, columbariis colligitur nitrum: in plantis quibusdam reperitur sal-essentials, sola intpissatione succi expressi & depurati collectus, qui omni dote nitrum refert.

Nitrum hoc, si purum sit ab omni sale marino, in aëre siccum manet, in aqua solvitur totum, inter falsa fere levissimum; summum attenuans, per corporis vires mutabile, refrigerans, tantum usum habet, imprimis in morbis acutis, in quibus obstructions ab inflammatoria sanguinis densitate nascuntur. Præfertur tunc sali marino & gemmæ, quia levius est, & superabile corporis viribus: sali ammoniaco vero præfertur, quia sal volatilis alcalinus, in his morbis nocens, magnam partem salis ammoniaci constituit; extricandus forte à ligante acido salis marini, si occurreret putrefactis vel alcalinis humoribus,

**B O R A X.** Mirabilis penitus sal, cujus indoles nondum bene cognita est, & cujus historia confusa penitus vel apud optimos scriptores habetur. Voluerunt esse Veterum chrysocollam: sed Dioscorides (a) colorem porri late virentis commendat in chrysocolla, & monet in fine capituli, esse ex eorum genere, quæ vomitum concitant, imo & necem inferre possunt: & alibi (b) ex urina & aëre Cyprio parari gluten, auro ferruminando idoneum (ἀρμόζοντα ἐπὶ τῷ χυρσίῳ κάλλει) dicit. Plinius (c) segetis instar late virentis colorem commendat: unde in Neronis spectaculis Circi harenam Chrysocolla stratum fuisse dicit. Monet etiam vomitum excitare, & auri fabros illud sibi vendicare agglutinando auro; sed addit tunc Cypria temperari ærugine, & pueri impubis urina, addito nitro.

Unde ex colore & effectis videtur Veterum Chrysocolla cuprum in se continuisse: sed in actis Academiæ Regiæ scientiarum (d) Celeberrimi Viri, salis hujus proprietates indagantes, invenerunt, boracem nihil in se cupri habere; sed esse naturæ utcumque alcalinæ, magnamque assenitatem habere cum soda Ægyptiorum; verum esse minus alcalinum, & habere præterea in se terram vitrificabilem, & sallem neutrum nondum bene cognitum.

Inter deobstruentia remedia magnum nomen obtinuit; unde & difficillimis morbis sanandis solet adhiberi, partim miro, quem habet, stimulo, partim vi salina attenuante agens.

**FIXUS ALCALINUS.** Artis tantum, non naturæ filius, à Kali herbula dictus; quæ vivis flammis combusta cineres salissimos relinquit. Sal ille ex variis admodum paratur vegetabilibus, semper fere idem, tantum majori vel minori acrimonia diversus. Adhibetur imprimis, ubi frigus, inertia, lenta pituita prædominantur; ubi calor, putredo, siccitas magna adsunt, non adeo tutus horum salium usus.

**VOLATILIS.** Omnia hætenus explorata animalia & vegetabilia, per pu-

(a) Lib. V. cap. 104.

(b) Lib. II. cap. 99.

(c) Lib. XXXIII. cap. 5.

(d) L'An. 1718. 1729. 1731. &c.

retactionem

træfactionem dant salem volatilem alcalinum. Animalia omnia hæcenus examinata simplici destillatione hunc salem largiuntur. Animalium humores non alcalini, admisto sale fixo alcalino, præbent salem volatilem alcalinum. Plantæ quædam acerrimæ, ut sinapi, cochlearia, nasturtium, cepæ &c. salem talem continent, fractis tantum plantarum harum partibus, suo halitu se manifestantem, & levi destillatione facile inde extricandum. Ex omnibus illis natus sal volatilis alcalinus, per artem purissimus redditus, omni dote apparet idem.

Usum habent eundem fere hi sales, ac alcalini fixi; sed mobilissimi levissimo caloris gradu disperguntur quaquaversum, & aufugiunt; hinc non tam durabili effectu agunt; si vero coërceantur ad locum, ubi agere debent, omnia destruunt: sal enim alcalinus volatilis, cuti applicatus, & renaci emplastro tectus, illam comburit in crustam gangrænosam. Majorem ergo adhuc cautelam horum salium usus requirit.

3. Saponem omnes olei cum sale accuratam adeo miscelam habent, ut in aqua dilui possint, absque ullo apparente oleo; hoc enim requiritur, ut saponem dici possint. Tales jam saponem habentur plurimi nativi. Mel, Veteribus adeo usitatum, & Chemico examine, & pulcherrimo usu in morbis, imprimis acutis, imo & in chronicis plurimis, saponaceas vires solventissimas exhibuit. Saccharum posterioribus sæculis maximo in usu, antiquis tamen, uti videtur, cognitum, in igne deflagrans, in aqua solubile & in crystallos redigendum, simili valet efficacia. Fructuum horæorum bene maturorum succi recentes, vel & in sapam inspissati, incredibili solvendi virtute fundunt omnia. Herbarum recentium succi nativa miscela oleum & salem sic unita habent, ut saponem merito dici possint; imo in quibusdam tanta efficacia est, ut saponis arte parati instar sordidas emaculent vestes: docet hoc saponariæ dictæ herbæ succus.

Dum certa lege oleum animalium, vel vegetabilium, acri sali fixo alcalino unitur, nascitur sapo; in quo antiqua detergens & dissolvens lixiviosi salis vis inest, omnia oleosa, pingua, resinosa, pituitosa, amurcosa solvens; abest tamen nimia & sæpe rodens acrimonia salis alcalini fixi: hinc talis sapo, aqua dilutus vel vacuo ventriculo & intestinis imprimis in propriis humoribus horum viscerum huc affluentibus solutus, universale fere deobstruens dat, tuto faciens, quod acriora solventia non nisi cum periculo efficerent.

Efficacissimi per artem parantur saponem, dum purissimum & attenuatissimum oleum vegetabile jungitur sali alcalino sincerissimo fixo, vel volatili. Sic alcohol vini cum sale volatili alcalino concrevit in saponem mirabilem, Offam Helmontianam dictum. Idem Alcohol, ab omni aqua liberum, siccissimo ab igne sali fixo alcalino unitum, verum facit saponem. Athereum terebinthinæ oleum, alcalino sali difficili arte unitum, saponem præstantissimum facit, Starkeyanum vulgo dictum. Quo purius & subtilius oleum, quo magis sincerus sal fuerit, eo præstantior usu sapo inde natus.

FULIGINOSI. Fumus, dum aperto igne combustilis materia uritur, camino receptus, condensatus, ejus parietibus accrescit forma flocculorum nigrorum: est verus carbo volatilis pingui oleo dives, fuligo dictus. Chemica hujus analysis docet, in aquam, sales, olea, terram, resolvi posse; unde saponacea ejus indoles patet. Catapotia ex fuligine facta, auro obducta, ne displiceant nimis, deglutita in lentis morbis, vi attenuante saponacea summos fecerunt effectus.

A a

**BILIS.** Verum saponem nativum in animali corpore exhibet. Crudis ingestis, per ventriculi actionem jam parum subactis, in homine statim bilis affunditur, ut æquabilissima fiat omnium miscela, & solubilitas in aquosis. Sericeas vestes, pinguibus maculatas, bile animalium pulchre depurare noverunt artifices.

Pretiosa pigmenta Pictores bile diluunt, ut æquabilissime diduci possent. Quamvis autem vim dissolvendi habeat bilis, docent morbi, in quibus bilis, impedita fluere per consuetas vias, regurgitat in sanguinem; dissolvitur enim totus in aquam tenuem; unde diuturnum Icterus fere semper hydrops sequitur. Bilem inspissatam in extracti formam, ne putrescat, servant officinæ: unde cataportia sunt ad hos usus. Imo tumido abdomini juniorum inuncta bilis inspissata fundit concretas massas in intestinis hærentes, & per alvum evacuat.

Pro varia jam morborum indole varii saponem adhibentur. Sapo, Venetus dictus, ex purissimo oleo pressò & sincero sale alcalino factus, sine ullo fere renixu fundit omnia; in morbis autem acutis, putridisque, non semper adeo tuti usus: tunc mel, saccharum, horarum fructuum succi recentes, vel inspissati præferuntur; maximi usus imprimis, ubi inflammatorium spissum resolvendum est. Si frigus, inertia, mucosa humorum indoles prædominentur; aciores saponem fuliginosi, vel ex oleis stillatitiis aromaticis & sale volatili alcalino facti, ut sunt sales volatiles oleosi officinarum, præferuntur. Profunt tunc & illi, qui ex alcohole & salibus fixis alcalinis fiunt &c. Ubi putredo adest, vel futura metuitur, à bile, adeo sponte in putredinem prona, abstinemus.

4. **PRÆPARATA MERCURIALIA.** Argentum vivum, sic dictum est, quia argenti fulgorem suo splendore refert, & tremula fluiditate vitalis quid habere videtur: unde & ἰδργύρεον vocavit Dioscorides; ἀργύρεον κινεῖται Aristoteles, quasi argentum mobile dixit; hoc Veteribus quidem cognitum fuit, sed damnatum tanquam deleterium. Dioscorides (a) dixit hydrargyron epotum eadem facere, quæ Lichargyron, cujus noxas (b) descripserat: & alibi (c) monet, quod oporteat servari hydrargyrum in vitreis vel plumbeis, vel stanneis, aut argenteis vasis; aliam enim omnem materiam exedit, & facit diffluere, potestatem autem habet deleteriam epota, gravitate erodens interiora. Plinius (d) pariter damnavit, vocans argentum vivum vomicam liquoris æterni, rerum omnium venenum, quod exest, ac perrumpit vasa permanens tabe dira: unde & postea (e) minii, ex quo argentum vivum excoquitur, usum in Medicina tanquam temerarium damnat. Galenus (f), brevi tantum sermone agens de Hydrargyro, dicit, se non habere ejus ullam experientiam; neque ut interimentis, si epotum fuerit, neque an id faciat externe appositum. Proscriptus hinc fuit argenti vivi usus etiam à Græcis Medicis recentioribus. Arabes primi inceperunt externo usu argentum vivum adhibere ad cutaneos morbos sanandos. Postea ad luem veneream curandam laudaverunt externum tantum usum Medici, donec primus fuerit *Joannes de Vigo*, qui præcipitatum rubrum interne exhibuerit. Postea ipsum argentum vivum in nativa forma dederunt in pilulis Barbarossæ dictis; uti in tractatu absolutissimo de Morbis Venereis demonstrat Celeberrimus Astruc (g).

(a) Lib. VI. cap. 18.

(b) Ibid. cap. 27.

(c) Lib. V. cap. 110.

(d) Lib. XXXIII. cap. 6.

(e) Ibid. cap. 8.

(f) Lib. IX. *Simplis. Medicament. Charter.* Tom. XIII. pag. 270.

(g) Pag. 126. &c.

Mirabile hoc fluidum metallicum, soli auro pondere cedens, simplicissimum est & divisibile admodum, cum per ignem volatilis fumi forma dissipetur in auras ( quantum enim debuit increvisse superficies ratione molis, antequam ponderosissimum argentum vivum in aëre sustineri possit ). Nullam præterea habet acrimoniam sensibus observabilem; cum & oculi tenerrimus sensus, & crudum vulnus nullam asperitatem, nullum dolorem ab applicato argento vivo percipiant. Dum blandum adeo apparens & iners remedium corpori viventi applicatur externe per linimenta, emplastra &c. vel & in vapores resolutum bibula ingreditur extrorsum patentia vata; vel deglutitum parca copia & repetitis vicibus fuerit, miro modo mutat totum corpus, fundit, dissolvitque totum sanguinem in fœtidam quasi colluviem, quam per salivationem, vel & per alvum quandoque de corpore expellit.

Oritur tunc primo ægritudo per totum corpus, major calor, febris, vires incipiunt prosterni quasi, appetitus minuitur, sitis oritur major; post cadaverosus halitus expiratur ore; gingivæ, lingua, palatum, tonsillæ, glandulæ sub lingua & aliæ vicinæ incipiunt tumere, dolere, calere; dentes assurgunt; lingua ad latera & apicem, ubi dentibus contigua est imprimis, ulceribus albis dolentissimis eroditur; similiter & pars interior genarum & labiorum afficitur; tota facies tumet; labia tumentia retorrída sunt fœdo aspectu; tunc effluit viscosus olidus humor ingenti sæpe copia, exulcerans omnia loca, quæ alluit. Durat hoc per plures dies: sensim tunc minuuntur omnia recensita, exhaustum apparet totum corpus, & decolor. In quibusdam, vel ex suppressa salivatione jam incepta per frigus admissum imprimis; vel ex peculiari idiosyncrasia versus ventriculum & intestina tendit remedium virtus; & similia tunc in his partibus videntur oriri mala, quæ oculis videmus fieri in partibus oris interni. Tunc sævissima cardialgia, & tormina intestinorum acerbissima oriuntur, alvi fluxus aquosus, olidissimus, copiosus subito sæpe vires prosternit, animi deliquia, imò ipsam mortem producit.

Hoc saltem patet, argenti vivi usum, sive per salivales ductus, sive per alvum educantur humores, dissolvere omnia, attenuare, dividere: sanissimus enim homo, opima corporis pinguedine nitens, incautus dum argentum vivum, ad curandam scabiem, corpori affricat, validissimam passus fuit salivationem per viginti dies, totus pallidus & emaciatus emerit, toto sanguine sic dissoluto, omni pinguedine attenuata & educta de corpore.

Pitcarnius, ( a ) qui ex communibus omnium corporum legibus plurima deduxerat pulcherrima in Medicina, fuit in illa opinione, gravitatem argenti vivi solam sufficere, nec aliam facultatem hic desiderari, ut explicentur mirabiles illi effectus: imò audacter addidit, aurum, in formam sanguini permiscendam redactum, habiturum vires ponderi proportionales, & omnia medicamenta tantum superaturum virtute, quantum pondere superaverit.

Argentum nempe vivum in minutissimas moleculas divisibile, sanguine fere decies & quater ponderosius, venas ingressum, per pulmonis angustias pulsus, ex sinistro corde cum sanguine in arterias projectum, habebit eandem celeritatem ac reliquæ sanguinis moleculæ; momentum ergo motus in argenti vivi particula erit ad momentum motus in sanguinis molecula, ut pondus argenti vivi est ad

( a ) Dissertatio de causis diversæ Molis, qua fluit sanguis per pulmonem, natis & non natis pag. 37. 38.

pondus sanguinis. Tanta ergo vi irruentes argenti vivi particulæ in sanguinis moléculas, illas dividunt, & attenuabunt: rubedo peribit in sanguine dissoluto; extricabuntur olea & sales attenuata pariter, unde fætor & putredo, attenuati humores per dilatata, impetu irruentis tanta vi argenti vivi, vasorum oscula exhibunt de corpore. Omnia autem hæc effecta debent augeri, quia argenti vivi moléculæ motum semel impressum diutius retinent: demonstraverunt enim Mechanici, retardationes corporum æqualium, sed diversæ densitatis, æquali cum velocitate per idem liquidum motorum, esse in ratione inversa densitatum.

Simplex hæc, & cognito ponderi argenti vivi innitens, explicatio mirabilium horum effectuum sufficere visa fuit. Quædam tamen serio hæc meditati obvenierunt dubia, quæ non prurigne obloquendi Viris, quos veneror, sed veritatis amore, meliora addiscere paratissimus, proponam.

Ex universalibus illis argenti vivi proprietatibus non videtur explicari posse, quare soluti per vim assumti argenti vivi humores per salivales ductus potius ruant, quam per alia corporis loca.

Præparata mercurialia officinarum in parva quantitate omnes illos producant effectus, quos longe major argenti vivi copia tantum facit. An verosimile apparet, in corpore humano argentum vivum extricari ita posse ex his præparatis, ut nativa ipsi forma redeat, & pristinum pondus; cum per artem non nisi summo igne, & additis talibus, quæ acidum argento vivo unitam in se trahunt potentissime, hoc fieri possit? Et licet daretur, sic reviviscere in corpore argentum vivum, nondum ulla patet ratio, quare pauca grana facerent, quod uncia integra argenti vivi vix efficit.

Novi satis, quid respondeatur ad hanc difficultatem; quod nempe argenti vivi minutissime divisi moléculæ, salinis spiculis infixis horridæ, pondere metallico unito concentratissimo acido, plus dividant omnia, quibus occurrunt. Sed si consideretur præcipitatum album officinarum, levissimum exhibens inter præparata mercurialia pulvisculum: in ejus præparatione enim affusa muria salis marini excutitur in spiritu nitri solutum argentum vivum, edulcoratione repetita pulvis ille insipidus fere & blandus fit; tamen vidi sæpies, quod granis viginti, divisis dosibus datis, imo & aliquando longe minori quantitate excitata fuerit satis valida salivatio. Levitas hujus præcipitati albi, & debilis salium argento vivo unitorum acrimonia in hoc pulvere, videntur repugnare huic sententiæ.

Nobili Viro cæcitate languida & confirmata utriusque oculi laboranti, jusserrat Empyricus, ut bina grana pulvisculi mercurialis (quem postea turbith minerale fuisse dixit) naribus attraheret, statim vomitu, sudoribus, sedibus, urina, saliva, lacrymis, decem aut duodecim horarum operatione, adeo commotus fuit, ut caput ejus plurimum intumuerit; tertio tamen aut quarto die post hæc facta gradatim rediit visus; & post mensem philosophicum acutior, quam unquam antea fuerat. Sic narrat Boyleus (\*).

Ex hac historia patet, omnes effectus argenti vivi ortos fuisse, dum pulvisculus mercurialis internas nares tangeret tantum.

Argentum vivum purum, vase vitreo sicco, sincero, contentum, solo concussu mechanico agitatam, dedit pulverem mollem, nigrum, tenuissimum, saporis

(\*) De Utilitate Philos. Experiment. pag. 346. 347.



acris metallici, aëris saporem utcumque referentis. Sexaginta & una destillationibus purissimum redditum Argentum vivum majorem copiam dedit similis pulveris. Argentum vivum in cucurbitis vitreis conicis fundo plano instructis, phiala chemica vitrea inversa clausis, calori 180. graduum expositum per plures menses, dedit similem omni dote pulverem.

Sed pulvis ille sic natus, ex retorta vitrea valido igne destillatus, rediit in argentum vivum, pauca grana tantum relinquens fixæ materiæ.

Simplici destillatione ex retorta vitrea purissima ex Argento vivo nascebatur pulvis ruber splendens, valde friabilis, saporis acerrimi metallici, nauseosi, penetrabilis, vix ex ore delendi, corpus humanum diu & valide turbans, & ad excretionem disponens: tamen pulvis ille sic natus, validissimo igne iterum fere totus mutabatur in argentum vivum (a).

Ex his apparet, argentum vivum, sine ullo addito, solo tritu mechanico, sola ignis actione posse mutari in acerrimam indolem; iterum tamen redire majori igne in pristinam formam, deposita omni acrimonia. An ergo argenti vivi efficacia à communibus omnium corporum proprietatibus pendet? An non potius singulari ejus naturæ, per experimenta sola cognoscendæ, hæc attribui debet? Sufficit interim Medico novisse, quid agat argentum vivum humano corpori applicatum, licet modum, quo agat, ignoraverit. Aliorum remediorum virtus non magis patet inquirantibus: quis enim explicavit modum, quo scamnoneum totum sanguinem, in putridam aquam solutum, per alvum deturbet? Quis intellexit antimonii, & ejus præparatorum, mirabiles dotes &c.?

Omnia jam hæc remedia hac § recensita iterum determinari debent ad illa loca, quantum fieri potest, ubi hæret solvendum: hoc autem fit per DERIVANTIA, ATTRAHENTIA, PROPELLENTIA; de quibus dictum præcedenti paragraho.

§. 136. **C**AUSA coagulans educitur attractione alterius fortius trahentis. Sic acida in alcalia, olea in alcalia, &c. trahuntur, quæ experimentis Chemicis in primis inveniuntur.

Per Chemica experimenta constat, obtinere in quibusdam corporibus miram proprietatem, qua alia corpora trahunt & sibi uniunt: v. g. olei vitrioli drachma si tribus aquæ libris diluatur æquabilissime, dein affundatur oleum tartari per deliquium, illud sibi uniet vitrioli acidum, & cum illo concreset in salem compositum. Dum fluidissimum argentum vivum liquato per ignem sulphuri instillatur sensim, & agitatione continua miscetur, concrescunt hæc simul in nigram massam; quæ valido igne si urgeatur, non redit argentum vivum, nec avolat, sed simul unita sublimantur, & dant cinnabarim. In hoc casu ut reddatur pristina fluiditas argento vivo, debet addi huic massæ, ex sulphure & argento vivo concretæ, tale corpus, quod potentius trahit sulphur, & sibi unit; tunc enim redit argento vivo antiqua indoles. Hoc fit, dum limatura ferri miscetur cinnabari; & dein

(a) Herm. Boerhaave de Mercurio experimenta in transactionibus Philosophicis Anglicanis num. 430. Mens. Novemb. & Decemb. An. 1733.

summo igne urgetur ex retorta : unitur tunc sulphur limaturæ ferri , & liberum ab hoc vinculo argentum vivum in excipulum transit.

Plurima alia recenferi possent experimenta Chemica , quæ docent , unita simul corpora , admistione alterius , quod potentiori vi trahit alterutrum horum , secedere à se invicem. Argentum in aqua forti solutum , immisso cupro , præceps fundum petit ; solutum cuprum similiter addito ferro excutitur &c. Alcohol dissolvit , & sibi unit , olea stillatitia ; affusa aqua , lactescit antea limpidum fluidum , & secedunt sensim olea prius soluta.

Magna tamen hic semper difficultas manet , dum non ita facile cognoscuntur causæ coagulantes , & sæpe causæ penitus oppositæ coagulum nostris humoribus inducunt. Numquid quies & nimius motus sanguinem coagulant ? An non frigus summum & urens calor in massas irresolubiles faciunt coire sanguinis elementa ? Quis intellexit modum , quo ab ingenti terrore ( quod vidi ) scirrhus in mamma subitissime nascitur , nullis remediis postea resolubilis ? &c. Præterea dum coagulans causa fecit concreescere fluidorum nostrorum moleculas inter se , illas sæpe sic mutat , ut ablata causa coagulante , tamen non restituatur pristina fluiditas. Si quis dubitaret de hac re , tentet coagulatum affuso oleo vitrioli sanguinem iterum fluidum reddere additis alcalinis salibus.

Pulchrum tamen habetur in arte exemplum , quo patet , humorum nostrorum coagula quædam sic posse resolvi per educationem causæ coagulantis , ut redeat fluiditas , sic ut restituatur liber omnino per vasa humorum transfluxus : dum nempe per acerrimum gelu extremæ partes corporis omni vitali humorum influxu privatæ sunt , si tunc nive regantur , vel immergantur aquæ gelidissimæ , tantum non congelatæ , extrahuntur ex parte congelata spicula illa glacialia , redit vita in partem , & concretis fluidis redditur pristina fluiditas.

Plura forte talia adhuc latent in rerum natura , quæ educatione causæ coagulantis valerent resolvere concreta in corpore humano. Calculi elementa in limpidissima sani hominis urina fluunt ; adunata postea sic coherent , ut hætenus per artem resolvi non potuerint. Qui posset vim illam , qualiscumque demum sit , qua uniantur calculi elementa , tollere , solveret calculum. Interim non semper summæ solvendi virtuti magna acrimonia comes est : blandum oleum solvit ceram , quæ aquæ stygiæ resistit ; iners ovi cocti albumen myrrham diffluere facit , quæ aliis menstruis sua tenacitate vix solvi potest. Pulcherrimus talium remediorum usus meretur , ut investigentur sedulo.

§. 137. **V**ERUM quum liquidum , in loca aliena pulsus , non penetrabile sit , hincque obstructions creat , producuntur multi , malignique morbi , unde meretur id malum attente perpendi.

Hic agitur de illa obstructionis causa , quæ explicata fuit §. 118. ubi nempe nec in vasis angustatis , nec in liquidis concretis hæret obstructionis causa ; sed tantum fit , quia liquida ingressa sunt canales minores , quam sunt illi , per quos naturaliter fluere debebant : hinc quamvis talia liquida ingredi potuerint valorum minorum dilatata orificia , non poterunt tamen per angustos horum vasorum fines transire : hærebunt ergo , & obturabunt hæc vasa.

Quam ferax inde oriatur morborum seges, patebit facile consideranti, quod illibata sanitas totius corporis & singularum partium pendeat à debito liquidorum transfluxu per vasa proportionalis amplitudinis; & quod auctam celeritatem transfluxus humorum per vasa sequatur statim hoc malum. Dum enī in valido motu muscolari, vel per febrim, augetur circulationis velocitas, videmus statim rubore perfundi multas corporis partes, quæ antea non rubebant: manifesto indicio, sanguinem rubrum jam ingressum esse plurima vasa, in quibus naturaliter antea non reperiebatur.

Sed non tantum numerosissimi inde pullulant morbi, sed & periculosissimi simul inde nasci possunt. Facile enim concipimus, quod sicuti pars rubra sanguinis per errorem loci ingredi potest vasa serosa, ita & reliqua decrescantis magnitudinis fluida possint impelli per easdem causas in aliena vasa. Si jam à tali causa obstructio nascatur in tenerrimis illis cerebri & cerebelli vasculis, unde vita & humanitas pendent, subito lethales orientur morbi, quorum causa tamen in cadavere omnem sensum fugiet. Tales autem morbi merito maligni dicuntur.

Apparet ergo evidenter, quantæ utilitatis sit recte intelligere hujus mali naturam, & cognito malo debitam adhibere curationis methodum.

§. 138. **S**CIMUS id factum, si novimus 1. Causas ejus (118.), quæ ut plurimum satis observabiles; prægressas fuisse. 2. His dein successisse contrarias. 3. Ubi effectus ejus clare cernimus. (120. 121. 122.)

Quæritur jam, per quæ certo cognoscere possumus, hanc obstructionis causam obtinere.

1. In §. 118. enarratæ sunt causæ, quæ observatæ fuerunt errorem loci produxisse: Plethora nempe, motus auctus, rarefactio liquidi, laxatio vasis. Plethora adesse cognoscitur ex dictis §. 106. 1. Motus auctus indicatur signis recensitis §. 101. Rarefactio liquidi noscitur ex illis, quæ §. 106. 2. dicta sunt. Laxatio vasis præsens scitur ex dictis §. 27. & §. 43. & §. 44: imprimis autem, si observetur error loci obtinere sine plethora, motus aucti, vel rarefactionis signis, tunc laxitas vasorum sola causa videtur esse. Ut enim vasa minora recipiant crassiores solito humores, requiritur, ut prius dilatentur; naturalis enim horum vasorum angustia excludit crassiores humores. Sed hæc dilatatio vasorum oritur vel ab aucta vi, qua urgentur humores in vasa, vel à minuto robore vasorum, quo renitentur nimix dilatationi. Ubi ergo non adsunt causæ, per quas majori impetu fluida agunt in vasorum latera, error loci potest tantum fieri à minori resistantia laterum vasorum, id est à laxitate nimia. Hæc autem causa frequentissime obtinet; toties enim opthalmiæ à sola laxitate nimia vasorum oriuntur; non quidem adeo acutæ, sed magis diuturnæ. Sic in moribundis, resoluta vitali robore, videmus viscidum exprimi sudorem, maculas rubras, purpureas, lividas, nasci, à crassioribus nempe liquidis ingressis minora vasa, & resolutione sphincterulorum; quibus vasa videntur coercere contentos humores.

2. Si jam dilatatis vasis per plethoram, motum auctum, rarefactionem liquidorum, vel laxitatem nimiam, applicentur talia, quæ subito constringant vasorum capacitatem, certi sumus errorem loci obtinere; ingressi enim crassiores humores

dilatata vasa, retinentur iisdem constrictis, nec retrogredi poterunt, nec per angustias posteriores propelli, unde necessario sequitur obstructio. Si æstuans a valido labore homo bene recto corpore quiescat, sensim vasa omnia contracta proprio robore retropellunt alienos ingressos humores: si nudum corpus idem homo gelido vento exposuerit, sæva nascitur tam sæpe ab hac causa pleuritis, vel & alii inflammatorii & difficillimi morbi.

3. Confirmatur autem hæc diagnosi, quando observantur illæ mutationes læsarum functionum, quæ descriptæ fuerunt numeris citatis.

§. 139. **F**ACILE quoque est prævidere, quid fiat ex hoc malo posito per ea, quæ exposita sunt (120. 121. 122. 123.)

Quando jam hoc malum cognitum est adesse, & simul constiterit, à quam causâ ortum duxerit, & quam corporis partem occupaverit, facile erit prædicere effecta hujus mali. Longe enim alia metuuntur ab errore loci, qui à nimia circuitus humorum velocitate oritur, quam ab illo, qui à nimia laxitate vasorum fit: multo periculosior error loci in vasis encephali, quam in cute brachii &c. Sed in numeris citatis omnia hæc explicata fuerunt: § enim 120. generales omnium obstructionum effectus considerantur; sequentibus vero 121, 122, 123, dictum fuit, quid in variis vasorum seriebus, & diversis corporis partibus inde foret metuendum.

§. 140. **C**URATIO fit 1. Impactum retropellendo motu retrogrado in vasa majora. 2. id resolvendo. 3. Vasa laxando. 4. Suppurando.

Hæret molecula obstruens in vase conico, semper in angustius vergente: quamdiu jam manet eadem magnitudo moleculæ obstruentis, & eadem firmitas laterum vasis obstructi, non poterit illud obstaculum ulterius protrudi versus majores angustias; nihil ergo tunc superest, nisi ut retrogrado motu retropellatur versus basin conici vasis; sicque iterum ingrediatur vasa majora. Patuit autem ex Leeuwenhoekii observatione §. 132. n°. 1. enarrata, quod massula obstruens retropelleretur sæpe, dein protruderetur iterum, sicque iret & rediret in canale obstructo: causa autem protrudens moleculam immeabilem in majores angustias est impetus fluidi à tergo urgentis; cessante hoc impetu, contractilitas laterum canalis obstructi reprimebat hanc moleculam versus latiore locum.

Obtinere autem talem retrogradum motum fluidorum in vasis, simulac cordis vis impellens cessat, vel minuitur, docent certissima observata. Dum in syncopen delabitur homo, incipit minui cordis actio; imo si perfecta fuerit syncope, cessat integre. Incipiunt tunc statim pallere labia & oculi, facies contrahi & subsidere, collapsis, vel potius contractis, elasticitate suorum laterum vasis minoribus, & retropellentibus fluida contenta in majora vasa.

Si jam v. g. globus ruber, orificium dilatatæ arteriæ serosæ ingressus, ibi hæreat immeabilis; idem ille, retropulsus in arteriam sanguineam rubram, ex qua derivabatur

derivabatur arteria serosa , libere fluere per ultimas arteriæ rubræ angustias , & resoluta erit obstructio. Eadem jam poterit fieri obstructionis solutio in reliquis decrescentium vasorum seriebus.

2. Ex data definitione §. 107. obstructio nascebatur ex excessu molis transituræ supra capacitatem valis transmissuri : si jam possit immeabilis hærens molecula sic dividi , ut per valis obstructi ultimas angustias transeat , sublata erit obstructio. Hæc methodus resolvendi obstructionem patuit in modo citato Leeuwenhoeckii experimento , ubi itu illo & reditu massula obstruens ad latera canalıs attrita solvebatur sic , ut transire posset.

3. Apparet evidenter , effectum fore omnino eundem , siue valis obstructi augeatur capacitas , siue moleculæ obstruentis minuatur moles ; utroque enim in casu liberum conciliabitur iter fluido transmittendo per canalem antea obstructum , quod requirebatur. Laxari autem sic posse vasa , ut non tantum admittant crassiores humores , sed & transmittant per ultimos suos fines , quotidiana docent observata. Uteri internam superficiem constituentia vasorum ibi hiantium oscula tenuissimum tantum rorem transmittunt omni tempore , dum non menstruat mulier ; menstruatorum vero tempore rubrum dimittunt sanguinem : his cessantibus , contrahuntur iterum , nec admittunt sanguinem rubrum. Multis hominibus accidit , ut ruditer vecti per strata lapidea sine ullo dolore purum mingant sanguinem , non ruptis , sed tantum dilatatis fistulis renalibus ; sola quiete tollitur hoc malum , contractis iterum his fistulis , antea nimis dilatatis.

Mirum forte videri posset , quod §. 118. inter causas , per quas aliena vasa ingrederentur crassiores humores , recensetur vasorum laxatio ; hic autem in curatione ejusdem mali laudetur eadem vasorum laxatio. Sed notandum , quod laxitas vasorum , quæ facit , ut dilatatis orificiis admittantur quidem , sed non transmittantur crassiores humores , sit causa erroris loci : talis vero laxitas , quæ facit , ut admissa crassiora liquida transmitti possint per ultimos fines canalıs , sanet obstructionem ab errore loci ortam.

4. Ubi jam molecula obstruens tam valide impacta est vasis conniventis angustis , ut non possit retropelli in majora vasa , nec resolvi per artem , neque tanta possit conciliari vasi obstructo laxitas , ut transmittat immeabilem moleculam ; tunc unicum hoc superest , ut vis vitalis , à tergourgens in locum obstructum , abscindat partem obstructam : vas tunc liberum , sed patulum , humores suos effundit , solidis illis tenerrimis abscissis miscet , calore loci , attritu vicinorum vasorum , hæc simul abeunt in homogeneous album , spissum pinguem humorem , pus dictum : hoc vocamus *suppurare*. Hæc est sola via , qua natura se liberat ab omni parte adeo obstructa ut resolvi non possit. Salutare semper est hoc naturæ conamen , modo vasa ; sic in pus mutanda una cum infarcto immeabili liquido , non sint absolute necessaria ad vitam ; & pus sic factum commode evacuari possit.

Dum in febre ardentissima , nempe peste , oritur circa glandulas axillares , vel & inguinales , sæva inflammatio , cum summa duritie ; nulla arte resolubilis ; suppuratione circa margines abscinditur totum hoc mortuum à vivis partibus , & excidit : quod arte nulla nisi per solam suppurationem fieri potest.



§. 141. **I**M P A C T U M retrofertur. 1. Evacuando liquorem, qui impactum urget, magna; subita Sanguinis Missione, unde nixu contracti vasis retro agitur. 2. Frictione ab extremis vasis ad basin.

1. Dum arteria vi cordis distenta se contrahit, retroprimeret contentum fluidum versus latiore locum, nisi à tergo urgens impetus liquidi impediret: dum ergo illius liquidi minuitur copia, & debilitatur impetus à tergo urgens, retrogrado motu ab apice basin versus movebitur in arteriis contentum fluidum; sicque, quoad determinationem motus fluidi, arteriæ fient pro tempore venæ. Sanguinis missio jam utrumque hoc præstat; minuit enim fluidi vasis contenti copiam, & debilitat cordis impellentis robur: possumus enim pro lubitu sola sanguinis missione ad mortem usque solvere hominis vires.

Sed ut hæc fiant cum fructu, debet magna esse & subita sanguinis missio: parva enim quantitate sanguinis subducta non satis minuitur copia; & nisi subita fuerit, non ita debilitatur vis cordis à tergo sanguinem urgens. Robustus enim homo patulo de vulnere vix binas libras sanguinis pleno rivo dimittet, quin cadat in animi deliquium; dum triplam copiam sanguinis perdere poterit, cum guttatim de naso stillat; vel dente evulso (ut sæpe observatum fuit) tenuis arteriola jugi stillicidio noctes & dies sanguinem fundat; nec tamen tunc animo linquitur.

Confirmant hanc rem observata in morbis acutis inflammatoriis. Dum acuta pleuritide decumbens præ immuni dolore inspirare nequit, sicque suffocatur fere, solvitur patulo vulnere brachii vena: fluente adhuc sanguine sæpissime incipit minui dolor; imo integre cessat aliquando, liberatis vasis obstructis retrogrado hoc motu humorum versus latiora vasa. Dum inflammati oculi rubent penitus à sanguine alienis vasis impulsio, venæ sectione magna, imo ad animi deliquium usque, facta, statim rubor ille disparet, retropulso sanguine in majora vasa. Non enim requiritur, ut massulæ obstruentes retrogrado hoc motu ferantur per magnam longitudinem, antequam ingredi possint latiores truncos; Anatomica enim injectiones docuerunt frequentissimas anastomoses & divaricationes truncorum in ramos in exiguo etiam ipatio inveniri.

Veteres Medici, licet sanguinis circuitum ignoraverint, tamen per solam observationem effectuum in morbis, largam sanguinis missionem commendaverunt ad similia mala. (a) Galenus explicans Aphorismum 23. sect. 1. ubi de evacuationibus agitur, & quidem ad animi deliquium usque, talem evacuationem laudat in febribus ardentissimis, in maximis inflammationibus, & vehementissimis doloribus. Et alibi: (b) ubi fervescens sanguinis inest plenitudo, acutissimam accendens febrem, subito ac simul evacuare expedit, eamque inanire tentandum, vel ad animi deliquium usque, virium modo inspecto robore. Quæ autem sequuntur mox, indicant, Galenum hic de sanguinis missione agere: monet enim, ad pulsuum diminutiones Medicum attendere debere, tangendo eos, sanguine etiamnum fluente, ne pro animi deliquio mors occupet: quod tribus Medicis accidisse turpi errore narrat.

(a) Galen. Comment. I. in Aphorism. Hippoc. Charter. Tom. IX. pag. 40.

(b) De curandæ ratione per venæ sectionem cap. 11, Charter. Tom. X. pag. 441. 442.

Signa autem instantis animi deliquij à larga missione sanguinis manifesta apparent : pulsus enim incipit robore minui , vacillare , levis oritur vertigo , pallent oculi & labia , nausea oritur & sæpe vomitus , & sanguinis effluentis celeritas minuitur : tunc abstinendum ab ulteriori vacuatione.

2. Quando impetus liquidi , à tergo urgentis moleculam obstruentem , sublatus est , vel saltem minutus plurimum , tunc sola contractio vasis reprimit immeabilem massulam versus latiore locum. Omne ergo , quod vasorum contractilitatem auget , vel simili effectu cum illa conspirat , juvabit hunc retrogradum motum. Frictio autem externe comprimendo vasorum latera facit idem , quod contractilitas propria fecisset , & hujus efficaciam anget , uti dictum §. 28. n<sup>o</sup>. 2. hinc patet ejus utilitas , imprimis si ab extremis vasis basim versus frictio instituat.

Quantum autem hoc profit , docent iterum observata. Longe felicius sanguinis missione Pleuritis solvitur , si illo tempore , dum fluit adhuc sanguis , leviter perfricetur latus affectum ; vel ægri profunda & sæpe repetita inspiratione , vel & tussi , affectam partem moveant : unde sæpe vino calido vel aceto naribus supposito , cardiaci titulo , cogimus ægros , ut vel inviti tussiant ; dum sæpe acerbè doloris prægressi metu hoc facere non audent. Dum valido cursu agitantur animalia in venatu , observatur sæpe , ablata cute totum panniculum adiposum , imò & ipsam carnem musculosam , fere nigrescere , ob infarctum sanguinem in vasis alienis : ideo reduces post validos cursus equos in stabulis perfricant equisones , ut tollatur hoc malum , didicerunt enim experimentis , nisi hoc fecerint , languere hæc animalia , & inepta penitus reddi ad solitos labores.

Veteres lassatos longo itinere homines in balnea ducebant , & perfricabant : idem adhuc in Asia fieri consuevit.

### §. 142. **I**MPACTUM resolvitur remediis ( 133. 134. 135. 136. ) ante positis.

De his omnibus dictum fuit in numeris hic citatis. Maxime notandum videtur , quod sanguis noster , sponte sua concrescens dum quiescit , concretus tamen sensim iterum resolvatur : sanguis enim , de vena sani hominis missus , concrescit brevi in placentam solidam ; unde sensim exprimitur serum tenuius , cui innatat concreta massa rubra , insula dicta. Effuso omni sero , rubra illa crassa pars post aliquot horas iterum simile serum dat , sicque tandem fere tota colliquescit. Hinc admodum probabile videtur , moleculas obstruentes , in vasis hærentes , calore corporis sensim sic posse solvi , modo impetus fluidi à tergo urgentis minuatur , & non adsit nimium robur vasorum , per quod densantur nimis valide fluida.

Hæcque videtur esse ratio , quare morbi inflammatorii felicius curentur in laxis corporibus , quam in robustis & valido labore exercitatis hominibus.

### §. 143. **V**ASA laxantur remediis ( 35. 36. 34. ) propositis.

### §. 144. **D**E Suppuratione dicetur in historia Inflammationis.

Haftenus explicati funt morbi simpliciffimi , qui in folidis partibus corporis humani occurrebant ; nimis debilis nempe , vel nimis valida cohaefio partium inter fe , nulla habita ratione fluidorum. Dein fpontanæ fluidorum & morbofæ degenerationes fuerunt enarratæ : tunc confiderata fuerunt illa vitia , quæ in folidis & fluidis fimul confideratis obfervabantur simpliciffima ; nempe incitatus , vel torpens nimis fluidorum per vala motus : uti & Plethora , five nimia boni humoris abundantia. Tandem & de obftructione actum fuit , quia & folidarum partium vitiiis , & humorum , vel & utrifque fimul confpirantibus originem fuam debebat.

Sequitur jam ex ordine §. 16. defcripto , ut agatur de foluta cohaefione partium id eft de Vulnere : patebit enim confideranti , omnia hæc præmittenda fuiffe , antequam Vulneris hiftoria & curatio tradi poffet.

~~~~~

DE VULNERE IN GENERE.

MIRUM forte videri poffet , Celeberrimum horum Aphorifmorum Auctorem externos & Chirurgicos dictos morbos tanta cura tradidiffe , cum plerorumque animis hæc infederit opinio , internos morbos folos ad Medicum pertinere , externa vero mala Chirurgis relinquenda effe. Sed illa Medicinæ pars , quæ de externis morbis agit , omnium vetuftiffima eft. Podalirius & Machaon , Æfculapii filii , bello Trojano ducem Agamemnonem fecuti , non mediocrem opem commilitonibus fuis artulerunt ; quos tamen Homerus non in peffilentia , neque in variis generibus morborum aliquid attuliffe auxilii , fed vulneribus tantummodo ferro & medicamentis mederi folitos effe propofuit (4).

Postea quidem in tres partes Medicina diducta eft ; ut una effet , quæ victu , altera quæ medicamentis , tertia , quæ manu mederetur. Nec tamen ideo Chirurgia à Medicis neglecta fuit. Medicinæ parens Hippocrates pulcherrima de vulneribus capitis , de ulceribus , fistulis , fracturis , luxationibus , pofteris reliquit : nec perfunctorie hæc tractavit , fed machinas & modos reponendi luxata & fracta membra defcripfit fatis diffufo fermone.

Præterea summum ufum habet , ad latentes morbos in interioribus corporis partibus cognoscendos & curandos , eofdem confiderare , ubi externas partes corporis occupant. Sensibus tunc omnia patent , & facilius intelliguntur.

Inflammationem & varios ejus exitus longe evidentius intelligimus , dum externas partes occupat , quam dum in internis partibus later. Quantam lucem affundit teftis capitis morbis cognitio vulnerum capitis ! Idem in multis aliis verum eft.

Cum ergo omnis ordinata doctrina à facilioribus intellectu ad difficiliora pergat , jure merito internorum morborum hiftoriæ præmittuntur morbi externi , Chirurgici dicti.

(4) A. Corn. Celfi Præfatio Lib. I. pag. 1. & 2.

§. 145. **V**ULNUS est soluta cohæsiō recens , cruenta , partis mollis , à corpore duro acuto , moto , pressio , vel resistente.

Vulneris hic traditur accurata definitio , nempe quod sit soluta partium cohæsiō : sed additur , quod , ut vulnus vocetur , debeat esse recens ; sic enim distinguitur ab ulcere ; in quo etiam est partium antea cohærentium solutio : tamen apud Hippocratem *ulcus* & vulnus (ἡλὺς καὶ τρώμα) aliquando promiscue sumuntur (*) & quidem in uno & eodem Capitulo. Additur deinde in definitione , quod sit soluta cohæsiō **CRUENTA** ; si enim vulnus tam parvum fuerit , ut sanguis ruber non exeat , vix considerationem meretur , cum ne quidem tenuissimæ aciculæ apice cutis pungi possit , quin cruor effluat. Additur deinde , quod sit solutio **PARTIS MOLLIS** , ut distinguatur à solutione continui , quæ in ossibus fit per fracturam , fissuram &c. Præterea , ut distinguatur à contusione , additur , separationem continui fieri in vulnere à **CORPORE DURO ACUTO** , quod parva superficie motum suum parti corporis imprimit. Sed corpus durum & acutum non potest separare cohæsiōem , nisi motu vel pressione applicetur ad partes cohærentes ; vel nisi partes corporis moveantur vel premantur ad durum & acutum corpus , sed resistens simul. Facile enim patet , eundem fore effectum , sive lanceola brachio , sive brachium lanceolæ impingat.

§. 146. **C**AUSA ergo sensibilis ejus est durities , acuties , motus , resistantia instrumenti vulnerantis.

Hæc per se patent ; nisi enim durum esset instrumentum vulnerans , non posset superare vim , qua cohærent partes unitæ inter se , nisi acutum foret , faceret contusionem loco vulneris.

§. 147. **S**UBJECTUM pars mollis , adeoque , textura vasorum sanguiferorum , serosorum , lymphaticorum , adiposorum , nervosorum , membranosorum , tendinosorum ; tum vesicularum , quæ ex his constantur.

Ex ipsa definitione patet , vulneris subjectum esse partem mollem ; sed hodierna Anatome docuit , partes molles corporis humani esse meram vasorum texturam : hinc nullum vulnus potest esse , quin plurima vasa discendantur , & quidem diversarum serierum. Nulla enim arteria sanguifera discindi potest , quin lædantur fere omnis generis vasa : tunicæ enim hujus vasis ex aliis minoribus vasis fiunt , horum tunicæ iterum ex minoribus vasis , donec ad ultima perventum sit. Hinc simplici vulnere arteriæ sanguiferæ vulnerantur & serosa & lymphatica vasa &c. vulnerantur & folliculi , qui lubricans illud smegma dant , quo interni majorum artiarum parietes inuncti apparent ; vulnerantur membranæ , musculosæ fibræ

(*) Lib. de Capit. vulneribus cap 11. Charter. Tom. XII. pag. 120.

arteriæ tunicam musculosam constituentes &c.

Patet ergo vel in levi vulnere omnes partes in hac paragrapho recensitas lædi posse.

§. 148. **I**N quo subjecto (147.) causa (146.) producit cohærentis separationem, liquidi contenti effusionem.

Cum ergo nulla possit fieri separatio cohæisionis in parte molli, quin lædantur plurima vasa, apparet evidentissime, omne vulnus duplicem semper præstare effectum; separat nempe à se invicem partes solidas ante cohærentes, & deinde educit ex vasis vulneratis illud liquidum, quod in vasis erat præsens illo momento, quo vulnerantur, uti & illud, quod circulationis legibus mox advehetur ad locum vulneratum per vasa nunc dissecta. Cum ergo patuit ex paragrapho præcedenti, omne vasorum genus in vulnere posse lædi, apparet evidenter, omnis generis liquida ex vasis vulneratis effluere posse.

§. 149. **I**NDE lædit actiones, quæ pendent ab integritate partium, & ab determinato fluxu liquorum per vasa.

Totum corpus humanum solidis & fluidis constat: nullum potest concipi vulnus, quin tollat cohæisionem solidarum partium, & interrumpat circuitum humorum per vasa, prius integra, nunc divisa. Sed omnes functiones nostri corporis ab integritate partium solidarum, & debito motu fluidorum per vasa, pendent: hinc nullum potest esse vulnus, quin lædat saltem aliquas functiones. V. g. ut digiti manus ad voluntatis arbitrium flecti possint, requiritur integritas musculorum profundis & sublimis, per quos hæc flexio peragitur. Si jam vulnere facto discindantur tendines horum musculorum, perit illa actio ab integritate harum partium pendens.

In Physiologicis demonstratur, quod ad actionem musculi cujuscunque inter alia requisita necessarius sit liber influxus spirituum per nervos; si jam discissus fuerit nervus ad musculum tendens, determinatus fluxus liquidi nervosi in musculum impeditur, & tollitur ejus actio.

§. 150. **Q**UÆ vulnera proinde occupant eas partes, quarum integritas vitæ inseparabilis, Lethalia sunt.

Lethale vulnus vocatur omne illud, quod mortem infert effectu suo inseparabili. Sed mors adest, dum sanguinis influxus in cor, ejusque expulsio ex corde impeditur. Ut autem bina hæc fieri possint, requiritur plurimarum aliarum partium integritas. Omne ergo vulnus, quod tollit requisita ad influxum liberum sanguinis in cor, & expulsionem sanguinis recepti ex corde, erit ex sua natura lethale. Quælia autem sint vulnera lethalia, & quibus partibus inflicta, postea dicetur.

§. 151. **H**ORUM (150) autem alia inevitabili necessitate mortem ferunt.

Vulnera illa, quæ mortem inferunt suo effectu, conveniunt in illo omnia, quod sanguinis in cor receptionem, & ejus expulsionem ex corde tollant; sed tamen magnum occurrit inter illa discrimen: quædam enim sunt inevitabiliter lethalia; sic ut licet accuratissime fuerint intellecta, & ad amissim cognitæ partes, quas vulnus læserat, tamen nullo auxilio hætenus in arte cognito potuerit impediri, quo minus mors, ut effectus inseparabilis, ex vulnere ut causa fieret. V. g. si gladio ancipiti per hominis thoracem adacto vulneretur lata plaga aorta illo in loco, ubi ex Pericardio emergit, exhibit omnis sanguis corde sinistro expulsus per hoc vulnus, accumulabitur vel in thoracis cavo, vel exhibit de vulnere, nec redibit per venas ad cor dextrum unde inevitabilis mors sequitur. Nec potest ulla arte præcaveri: non datur enim accessus manibus, ut ligetur, consuatur &c. & licet hoc fieri posset (quod tamen impossibile omnino est) ligata aorta, non posset evacuare se cor sinistrum; hinc suffocaretur sanguinis circuitus, unde vita penderet.

Sed si aorta bifida facta, ad femur & crus utrumque tendens, vulneretur in his partibus, erit vulnus hoc ex se lethale quidem, quia omnis sanguis per arteriam hanc discissam effluet, sed tamen non erit inevitabiliter lethale, quia torculari vel laqueo arteria sic comprimi poterit, ut nullum sanguinem emittat; & postea poterit ligari &c.

In renunciationibus autem, quas Medici de vulneribus ad Judices mittunt, hæc sollicitissime distinguenda sunt.

§. 152. **A**LIA, sibi relicta, mortem inferunt, sed artis auxilio ita emendari possunt, ut mortis periculum absit.

Omnes arteriæ majores, per artus dispersæ, vulneratæ ad mortem usque sanguinem dimittent; hinc talis arteriæ vulnus lethale quidem est, per artem tamen poterat impediri, quo minus mors inde sequeretur. Talia plurima habentur apud Observatores exempla. Studiosius vigilem publicum noctu sic vulneraverat ens, ut arteria profunde decurrens sub suræ musculis discissa fuerit: vulneratus ingentem sanguinis jacturam passus prolabitur, invenitur fere mortuus: reficiunt debilem cardiacis; statim iterum sanguis effluit ad animi deliquium usque. Vulneris orificium stipticis pulveribus replet, frustra sic conatus hæmorrhagiam compescere, non satis peritus Chirurgus, interim pergunt vino & similibus languentem vulneratum reficere, sicque aucto sanguinis motu augebatur hæmorrhagia, ex qua miser periit. Vulnus hoc lethale pronunciatum est. Verum quidem est, quod hoc vulnus fuerit causa mortis; tamen in arte cognita erant talia auxilia, per quæ vulneratus servari poterat: si enim sub poplite compressisset arteriam idonea ligatura Chirurgus, potuisset hæmorrhagia sisti; aut dilatato vulnere arteria vulnerata potuisset ligari; vel saltem extirpatione membri vita servari potuisset.

Similis etiam casus contigit, dum in conflictu gladio vulnerabatur brachium, & discindebatur arteria profunde decurrens supra ligamentum inter radium & ulnam medium; poterat arteria in brachii parte superiori supra os fere nudum decurrens comprimi, sicque hæmorrhagia sisti, & deinde amputato membro vita re-

dimi : sed nec æger crudelem curam admittere voluit , nec Chirurgi urgebant necessitatem , credentes se compressione valida sanguinem sistere posse. Perit miser vulneratus putrefactione summa per compressionem hanc orta , qui per artem servari potuisset.

Hinc apparet , quam necessarium sit Medicis & Chirurgis , qui vulnera tractant , & de illorum lethalitate ad Judices ex officio renunciare debent , cognoscere decursum majorum vasorum , & illa loca , ubi comprimi possint commode , ut mors ab hæmorrhagia secutura præcaveatur. Exactissimæ Eustachii tabulæ omnia hæc accurate designant.

§. 153. **T**ANDEM ex non lethalibus , neglectus , vel error , lethalia potest facere.

Omnium hoc frequentissime accidit illis , qui minus merentur ; nempe quibus in conflictibus bellicis vulnera inflicta sunt. Quoties perierunt vulnerati ab hæmorrhagia , quæ compesci potuisset à perito Chirurgo ? Quot perierunt sanguine sub cranio effuso , qui terebratione calvariæ in tempore adhibita potuissent servari ? Cranii integumenta externa , valida contusione læsa , cum exigua vulneris simul facti apertura , fecerunt sapissime neglectu solo funestissima symptomata ; imo ipsam mortem : quæ omnia præcaveri sæpe potuissent bona curandi methodo adhibita. Innumera hujus rei Exempla apud Observatores occurrunt.

Sed non tantum neglectus illorum , quæ ex arte fieri debent , verum etiam turpes errores vulnera non ex se lethalia fecerunt esse lethalia. Raro moriuntur homines ex hæmorrhagia , nisi maximæ arteriæ discissæ fuerunt ; sed magnam sanguinis jacturam passi in animi deliquium cadunt , tuncque sistitur hæmorrhagia : si sic relinquuntur semimortui fere , in moderato tantum calore , detur solum jus carnis parca quantitate , sed repetitis vicibus ; languida potest sustineri vita , vas discissum se contrahit , imo sæpe consolidatur : sicque servati fuerunt multi , qui certo perituri videbantur.

Dum autem ob ingentes hæmorrhagias in animi deliquium lapsos spirituosis conantur refocillare , non restitunt perditam humorum copiam , sed vim vasorum in liquida augent ; unde nova redit sanguinis jactura , & mortis causa augetur. Multi post conflictus bellicos , per dies integros inter cadavera relictæ , omni fere sanguine exhausti , revixerunt postea.

Scripserant Chemicæ quidam , Arsenicum per nitrum fixatum summum remedium esse ad hæmorrhagias sistendas : sed quam periculosa est applicatio tam virulenti remedii ad crudum vulnus ; dum vel minimum hujus venis receptum post crudeles convulsiones mortem inferre potest.

Hinc dum ex auctoritate publica lustrantur cadavera percussorum , primo inquirendum est , an vulnus tale fuerit , ut inde mors necessario sequi debuerit ; an vero mors præcaveri potuisset arte hodie cognita : deinde an mors secuta post vulnus adscribenda sit vulnere , an vero aliis causis.

Non sufficit ergo sola vulneris in cadavere inspectio , ut de ejus lethalitate judicium ferri possit ; sed debent & cognosci omnia , quæ vulnerato acciderunt post vulnus inflictum.

§. 154.

§. 154. **P**RO varietate alterius cujusdam actionis , à parte integra prius exercitæ , etiam alia vulnerum effecta , atque inde variæ appellationes oriuntur , vix ignotæ perito actionum Sanitatis.

Quot sunt partes diversæ corporis humani , quæ vulnere lædi possunt , tot poterunt esse distinctæ actiones læsæ , quarum integritas à cohesione partium , per vulnus separatarum , pendeat. Sed qui ex Anatomicis & Physiologicis novit partium corporis usum , quantum per artem hodie excultam licet , ille cognita parte vulnerata poterit determinare damna , quæ inde sequuntur. Sic tendine musculi discisso , patet facile , actionem musculi abolitam esse , quæ ab integritate huius tendinis pendeat &c. Ancilla lagenam vitream manu tenens cadit ; fractæ lagenæ frustum vulnus facit profundum medio loco inter carpum & cubiti articulum in parte interna ; valida oritur hæmorrhagia , vulnerata arteria quæ sub flexore carpi ulnari decurrebat : idonea ligatura circa humerum comprimebatur , ad nudum ibi fere os humeri , arteriæ truncus ; feliciter sistebatur hæmorrhagia , sed conquerebatur ægra , quod stuporem in digito minimo & medietate digiti minimo proximi sentiret ; credebatur Chirurgus à valida compressione stuporem ortum fuisse. Eustachii accuratissimis tabulis confusus ausus fui prædicere , nervum discissum esse , qui digito minimo & medietati adjacentis digiti prospicit ; hinc immedicabile fore hoc malum. Eventus asserti veritatem demonstravit : sanata enim , me rogante , sæpius digiti minimi apicem flammæ candelæ imposuit sine ullo doloris sensu.

Patet ergo , maximam vulnerum varietatem esse , quoad varia effecta à diversis partibus corporis læsis pendentia.

§. 155. **N**EC minor nominum , formarum , & effectuum varietas in vulneribus , à diversitate causæ vulnerantis (146) quoad figuram , modum adigendi , pungendo , secando , cædendo , agitando , illatum , vim impingendi , ablationem ex vulnere , relictionem in eo , infectionem venenatam.

Considerantur hac paragrapho vulnerum diversitates , quatenus ab instrumento vulnerante pendent.

QUOAD FIGURAM. Si conica acuta figura fuerit præditum instrumentum vulnerans , erit punctura , cito se claudens ; tuncque difficilius cognoscitur vulneris profunditas : si vero in acutum cuneum formatum fuerit , erit scissura &c.

MODUM ADIGENDI &c. Nam inde oritur magna varietas : **PUNGENDO** enim fit vulnus angustum , sæpe tamen profunde penetrans. **Secando** , quando cuneus acutus per partes molles protrahitur , fiunt tunc longa , sed minus profunda vulnera.

CÆDENDO. Majori tunc vi penetrat instrumentum vulnerans & profundius adigitur : & nisi acutissimum fuerit , simul contusionem facere poterit.

AGITANDO. Ad quod maxime attendendum est : dum enim vulnus extenso directe brachio infligitur ense , sæpe inter partes transit , à quibus læsis summum

foret periculum , sine adeo magno malo ; sed si ensis in vulnere hærens fuerit agi-
tatus & circumrotatus in vulnere , longe plures partes læduntur. Figura autem vul-
neris hoc docere poterit : si enim vulneris magnitudo respondeat magnitudini in-
strumenti vulnerantis , directo tantum impetu vulnus inflictum fuit ; sed si v. g.
lato gladio vulnus rotundum factum fuerit , designat ensẽ circumrotatum fuisse
in vulnere.

VIM IMPINGENDI. Pro vario enim impetu , quo instrumentum vulnerans
fuit impactum corpori vulnerati , vulnus magis vel minus profunde penetrabit.

ABLATIONEM EX VULNERE , RELICTIONEM IN EO. In gravis-
simis enim vulneribus aliquando prodest relinquere instrumentum vulnerans , cum
sæpe partes vulneratæ se circa hoc constringant , ac sic hæmorrhagia sistitur ; quæ,
educto instrumento vulnerante , ipso sæpe momento mortem affert. Sic saltem ali-
quo tempore vita sustinetur. Dum telo Turnus miseri Pallantis pectus perforat , (a)

Ille rapit calidum frustra ne vulnere telum

Una eademque via sanguisque animusque sequuntur.

Dum immitis Achilles hasta transfixerat Hectoris cervicem , ut morienti insulta-
ret , reliquit in vulnere telum , quod mortuo evulsit (b).

Imprimis hæc obtinet diversitas vulneris ab hac causa , si hamatum telum fuerit ,
unde non sine magna laceratione educi potest.

INFECTIONEM VENENATAM. Mira circa hanc rem capta experimen-
ta evicerunt , esse in rerum natura talia venena , quæ innoxie quamvis possent de-
glutiri , vulneribus tamen applicata certam & subitam mortem facerent. In vipe-
rarum morfu vulnere dentibus facto immixtus venenosus succus certo & hominem
& majora animalia , gallinas , columbas &c. necat. Dum magni Hetruriæ Ducis
jussu inquirebant Eruditissimi Viri naturam hujus veneni & quidam in felle viperæ
vim venenatam latere assererent , Veterum autoritate , uti & recentiorum multo-
rum testimoniis moti ; in angulo stans viperarum captor , antiquis Marfis & Psyllis
audacior , bilem viperæ dimidio cyatho frigidæ mistam bibit intrepidus , nihil inde
mali passus. Nec diversis animalium speciebus exhibitum sed viperinum ullam no-
xam intulit ; nec vulnere recenti instillatum sed viperinum aliquid mali fecit (c).

Aliis longe probabilior videbatur hæc opinio , quod venenum illud viperarum
hæreret in oculis illis , qui dentibus adjacent. In illis enim cavitatibus hæret hu-
mor colore & sapore simillimus oleo amygdalino ; dumque morsum infert vipera ,
compressis maxillis necessario vulnere adspargitur illud liquidum : sed quamvis vi-
rus hoc vulnere dente viperæ facto immixtum tam lethales effectus faceret , idem
ille venator , qui bilem viperæ deglutiverat , pari audacia maximæ & simul iratissi-
mæ viperæ expressum ex his oculis liquorem , simul omnem spumam & salivam ,
quam ore continebat , vino diluta hausit sine noxa. Simili successu animalibus in-
gerebatur (d).

Lethalia illa tela Bantamensium , quæ levi vulnere indubitata adferunt mortem ,
vino infusa aut alio liquore per plures dies , nullam malignitatem conciliaverunt li-
quido , in quo tam diu hæserant (e).

(a) Virgil. Æneid. Lib. X. vs. 486.

| pag. 14. &c.

(b) Homer. Iliad Lib. 22.

| (d) Ibid pag. 18, 19.

(c) Francisc. Redi observat. de Viperis

| (e) Ibid. pag. 33.

Dum per Lybiæ aridissima deserta duceret exercitum Cato, sitientes milites non audebant bibere de fonte, quem turba serpentum tenebat, sed sapientissimus Dux hortabatur, ut audacter biberent, dicens

*Vana specie conterritæ lethi
Ne dubita miles intos haurire liquores.
Noxia serpentum est admisto sanguine pestis.
Morsu virus habent, & fatum dente minantur.
Pocula morte carent. Dixit, dubiumque venenum
Hauisit, & in tota Libyes fons unus arena
Ille fuit, de quo primus sibi posceret undam (a).*

Dum oleo Tabaci madidum filum per vulnus acu factum trahitur, in animali vivente, illud cito perit. Viperam sic spatium minori, quam est octava pars horæ, necavit Redi, (b) qui tamen in omnibus Tabaci speciebus non invenit hoc oleum eandem habere malignitatem (c).

Plura forte talia sunt, quæ melius latent. Ubi ergo adsunt anomala symptomata, quæ non possumus suspicari ex vulnere, ut causa, orta fuisse, tunc de infectione venenata instrumenti lædentis cogitandum est.

§. 156. **T**UM etiam omnia eadem (155) variant pro differentia partis vulnus excipientis (147.), quoad ejus duritiem, mollitiem, nexum, situm, effectum, liquida contenta, faciem mutatam.

Vulnerum diversitates enarratæ sunt binis præcedentibus paragraphis, quatenus ab actionibus per vulnus læsis desumebantur, uti & illæ; quæ pendebant à diversitate ipsius causæ vulnerantis. Hac autem paragrapho considerantur illæ vulnerum varietates, quæ oriuntur à diversa indole partis vulneratæ.

DURITIEM, MOLLITIEM. Modica vi instrumentum vulnerans penetrabit mollia abdominis integumenta; longe validiori indigebit impetu, ut durum calvariæ os dividat.

NEXUM. Dum tendo musculi diseissus est, motus partis illius, cui naturaliter necessebatur, perit; hinc pro effectu vulneris habetur. Dum parva arteriola dentis evulsi, in alveolo latens, læsa sanguinem fundit sæpe ad mortem fere usque; hoc non fit ideo, quia tam parvus arteriæ ramulus læsus est, sed quia ossæ alveoli superficiæ affixus non potest se contrahere, & sic claudi. Quando in flexura cubiti per venæ sectionem infausto casu læditur aponeurosis illa, à parte tendinea bicipitis musculi orta, sæva symptomata, quæ sequuntur, non pendent à tam levi vulnuscule, sed à nexu illius tendinæ expansionis cum aliis partibus.

SITUM. Si arteriarum intercostalium ramus, licet exiguus, lædatur sic, ut simul perforata pleura in pectoris cavum sanguis fluat; poterit effuso sanguine corrupto pulmo inflammari, suppurari, & lethalis tabes inde sequi: tantum ideo

(a) M. Annei Lucani Pharsal. Lib. 9.

(b) Observat. de viperis pag. 98.

(c) Redi Experim. Naturalia pag. 50.

quia vulnerata arteria talem situm habebat , ut posset in cavum pectoris sanguinem dimittere. In aliis enim corporis partibus longe majores arteriarum rami sine periculo discinduntur. Longe periculosius vulnus est inflictum internæ femoris parti , ob maxima vasa ibi decurrentia , quam si externæ parti femoris simile contigisset.

EFFECTUM. Multis partibus corporis talis inest proprietas , ut vulnere vel alia quacumque causa læsis his partibus , turbentur aliquando functiones aliarum partium ; cum tamen ex hætenus cognita Anatome nondum constet ratio , cur læsis prioribus turbentur aliarum actiones. In exemplo res patebit. Post dolores colicos vel Iliacos aliquot vicibus toleratos oritur in Colica dicta Piætorum brachiorum Paralysis , & sæpe pergente malo verus Marasmus artuum superiorum. Quis ex cognita fabrica partium explicabit rationem mirabilis hujus eventus ? Post vulnera abdominis , discissis mesenterii nervis quibusdam post enormes dolores mors sequebatur , nec reperiebantur in cadavere magna vasa discissa , nec viscera læsa. In cane , discisso nervo intercostali & paris octavi , in his animalibus eadem vagina contentis , apparuit oculum ejusdem lateris obscurari , mole minui , inflammari ; sæpius repetitis Experimentis constitit , semper oculos inde mutari sensibiliter. Hoc autem patuit non ex cognita structura partium , sed ex effectu observato post vulnus factum (a). Hinc patet , ingentem iterum nasci vulnerum varietatem ex effectis , quæ a parte vulnerata observantur in corpore producta esse : tamen sæpe sola observatio facti docet mirabiles tales eventus , cum ex cognita partium structura hætenus a priori non demonstrari potuisset , hæc mala metuenda esse.

LIQUIDA CONTENTA. Si vesicula fellea vulnerata bilem in abdominis cavum effuderit , hæc cito putrescens pessima producet mala. Si ureteribus discissis urina per vulnus stillans in abdomine accumuletur , hæc corrupta omnia abdominis viscera putrida labe inficere poterit &c.

FACIEM MUTATAM. Possunt enim partes corporis per vulnus læsæ plus minusve degenerare à naturali conformatione , sicque miro modo externam partium faciem mutare.

Dum muscoli faciei unius lateris paralytici fiunt , quam mira sit distorsio faciei in latere opposito , quia musculi æquilibrio antagonistarum destituti retrahunt faciei partes. Idem per vulnera , læsis quibusdam faciei vel aliarum partium musculis , vel nervis dissectis ad hos musculos tendentibus , fieri posse satis patet.

§. 157. **H**UJUS multipliciter originem nosse ut opus , ita nomina subtiliter distinguere non juvat.

Ad omnia illa , quæ tribus præcedentibus paragraphis dicta sunt , attendendum esse Medicis & Chirurgis , qui vulnera curant , nemo dubitat ; ex his enim Diagnosis & Prognosis vulnerum pendet , utpote quæ cognitioni structuræ & usus partium , tanquam firmis fundamentis innituntur. Cognito enim instrumento vulnerante , & quo modo & qua vi applicatum illud fuerit corpori ; deinde considerata natura partis vulneratæ , & cognitis ejus usibus naturalibus per vulnus læsis , prævidemus , quid metuendum sit ; intelligimus , quid ars efficere possit , ut tollat mala jam facta , vel caveat futura. Difficile autem videtur , variis nominibus vul-

(a) Acad. des Sciences l'an 1727. Memoires pag. 6. &c.

nerum diversitates tam numerosas designare ita , ut nomen datum distinctam offerat menti ideam : difficilius longe memoriæ hæc sic imprimere , ut usum habere possent. Integræ sic tabulam tractatui suo de vulneribus præfixit *Parans* , ut vulnerum diversitates traderet. Rem consideranti apparebit facile , hæc non adeo magni usus esse : sufficere vero generalem cognitionem illorum , unde tanta vulnerum diversitas pendet.

§. 158. **S**I in corpore sano , robustoque factum vulnus in loco visibili , non irrigato magna quadam arteria , nec nimis tendinoso , hæc oriuntur phænomena ; si modo à frigore , aëre , siccatione , vulneris hiatus defenditur.

Ut aliquid certi de vulnerum curatione dici possit , necessario præmittenda sunt illa phænomena , quæ fidelis observatio per sensus facta docuit obtinere in vulnere à primo initio , quo inflictum est , ad integram consolidationem usque. Hæc autem omnia dum notantur illo ordine , quo se mutuo excipiunt , dant evidentem cognitionem methodi , qua natura utitur , ut separatas per vulnus partes in pristinam cohæsionem restituat.

Ut autem omnis evitetur error , & confusio , nihil hic consideratur , præter solum vulnus , & corpus vulnerati supponitur perfecta sanitate valere ; aliter enim phænomena observata non forent adscribenda soli vulnere , sed etiam pro parte penderent à morbo vulnus comitante. Longe enim aliæ mutationes apparent in vulnere , si cacochymia v. g. scorbutica , Venerea , Rachitica corpus obsederit. Præterea corpus supponitur robustum ; in debilibus enim languida circulatio minori impetu humores versus vulnus ducit : hinc dolor , calor , tensio &c. longe minora sunt circa labia vulneris , quam in homine validis viribus prædito.

Deinde omnia hæc debent sensibus patere : unde in externis corporis partibus vulnerum phænomena imprimis observanda ; & his visis discimus , quid in internis corporis partibus vulneratis contingat. Ob hanc causam & supponitur , quod nullo vas arteriosum majus simul læsum sit , undatim enim tunc profluens sanguis impedit , quo minus omnia accurate lustrari possint.

Additur præterea ; quod vulnus non debeat esse in loco *nimis tendinoso* : si enim v. g. tendo cujusdam musculi lædatur per vulnus , nec discindatur tamen integre , musculus huic tendini affixus trahendo tendinem læsum horrenda poterit producere symptomata , quæ non adeo pendent à vulnere , quam à musculo tendinem vulneratum trahente. Postea autem describentur illa mala , quæ ab arteriis majoribus discissis , vel tendinibus per vulnus læsis oriuntur.

Præterea aër , imprimis frigidus , admissus miro modo mutat partes vulneratas , & lædit tenerrima vascula , illaque exsiccatur. Sic si per vulnus calvaria denudata , & aëri liber accessus fuerit ad nudum os notabili tempore , vix sanabitur tale vulnus , nisi prius exfoliatione separata fuerit ossea lamella. Hoc autem non penderet à vulnere ; si enim statim ab aëre defensum fuisset os nudatum , hæc exfoliatio non contigisset.

Sub his ergo conditionibus recensentur phænomena , vulneribus omnibus propria , sequentibus numeris.

1. Partes , inter quas causa vulnerans adacta , sensim magis magisque à se mutuo recedunt , licet causa ablata sit , nisi punctura fuerit parva.

Simul ac causa vulnerans divisit cohesionem partium , distantia inter partes separatas est æqualis crassitie instrumenti lædantis : hinc dum maleficis à carnifice acuta novacula facies discinditur , apparet tantum linea rubra , sed sensim labia vulneris à se invicem recedunt , & post paucas horas sæpe lineæ geometricæ amplitudine hiant. Vis enim illa , qua cohærent partes solidæ corporis nostri , pergens agere utrimque retrahit extrema discissa , quia in loco vulneris destructa est partium cohesio.

NISI PUNCTURA FUERIT PARVA. Dum enim instrumentum vulnerans pungendo parvum vulnus fecerit , simulac penetravit cutim , & læserit tunicam cellulosam subjectam (nisi fuerit macilentissimum vulnerati corpus) vulnus apparet fere nullum , quia tunica cellulosa à cutis pressione in loco vulneris libera , statim assurgit in vulnus , illudque claudit. Hinc dum obeso homini vena secatur , subito sæpe sanguinis effluxus sistitur , pinguedine vulnus cutis obrurante.

2. Cruor primo cum impetu effluit , dein sensim sponte sistitur.

Si non sit vulnerata magna arteria , neque talis , quæ ossi affixa se retrahere & claudere nequit , primo quidem vulneris momento vasa discissa sanguinem cum impetu eructant , paulo post contractis vasorum discissorum orificiis propria elasticitate , & se recondentibus sub vulneris labiis , minuitur brevi , & tandem sponte cessat sanguinis effluxus. Hoc evidentissime apparet in sectione calculi : ibi enim magno satis vulnere cutis & subjectæ partes discinduntur , effluit uncia una vel altera sanguinis ; sed , nisi infelici casu major arteria vulnerata fuerit , paulo post fere integre cessat hæmorrhagia ; quæ aliter multum turbaret operationem. Omnis enim sanguis , qui ex vulnere factò effluit , fere tantum ex arteriis exit , venæ enim satis magnæ etiam discissæ , nisi obstaculum positum fuerit inter cor & vulnus venæ inflicto , parum tantum sanguinis stillant ; arteriæ autem sua elasticitate facile se contrahunt , & sic sanguis brevi sistitur.

3. Tum crusta sanguinea cavo vulneris innascitur.

Cum ergo ex vulnere sanguis arteriosus fere tantum exeat , uti modo dictum est ; & ille ex sua natura etiam in homine sano & robusto extra vasa hærens statim coaguletur ; ideo simulac incipit cessare impetus sanguinis erumpentis , fit tale coagulum sanguinis effluentis , sive thrombus dictus , vel eschara sanguinea , quæ labiis vulneris agglutinatur , & totum vulneris hiatum tegit perfectissime ; sicque pulchro naturæ molimine tegitur & defenditur vulnus ; subque hoc regmine sensim consolidantur separatæ per vulnus partes. Et quia thrombus ille calore corporis & aëre contiguo exsiccatur magis & magis , satis durum sic nascitur vulneri operculum , quod postea sanato vulnere sponte cadit.

4. Et liquor dilutus , rubellus , tenuis effluit.

Dum ille thrombus sic incipit nasci , uti & si natus auferatur , non effluit sanguis fere , sed tenuis levi rubedine tinctus liquor , loturæ carniū recens mactatarum similis. Hoc autem videtur fieri , quia vasa sanguinea rubra discissa , sensim contractis suis orificiis , pauculum rubri sanguinis , majorem autem copiam tenuioris liquidi non rubri transmittunt.

5. Tum vero labia vulneris incipiunt rubere , calere , dolere , tumere , retorqueri , fundo interim tumido assurgente , præcipue assurgente adipe in aperturam vulneris , ibidemque cito degenerascente.

Cum vasa discissa proprio elatere contrahunt sua orificia , imo fere claudunt , humores soliti fluere per hæc vasa sistuntur ; hinc nascitur tunc circa labia vulneris obstructio , & imperus vitæ , à tergourgens fluida in vasa obstructa , illa dilatat ante locum obstructum , unde nascitur vera inflammatio. Ideo rubent secundo vel tertio die labia vulneris , adest simul major calor inflammationis comes , uti & tumor ; quæ omnia , si moderata fuerint , nihil mali designant , cum naturaliter in omni vulnere fiant. Hæc est ratio , quare vulnus recens inflictum vix doleat ; tertio autem imprimis die , vel aliquando citius , nata inflammatione , tumentibus partibus vulneratis , dolor sæpe satis magnus sentiatur in vulnere.

Ideo Hippocrates (*a*) dixit , *gravibus vulneribus inflictis si tumores non appareant , ingens malum*. Idem in Aphorismis habetur pronunciatum (*b*) , ubi addidit , *molles tumores boni , crudi pravi sunt*. Si enim nullus oriatur circa vulneris labia tumor , designat vitales vires deficere ; si nimius sit valida inflammatio peioris exitus metum facit.

Alibi pulchre notavit (*c*) & tanquam utilissimum in arte præceptum commendavit : quod nempe *tertia & quarta die minime vexanda sint vulnera , & ab omni exploratione per specillum tunc sit abstinendum , & ab omnibus aliis , quibus vulnera irritantur*. In totum enim pleraque vulnera tertio aut quarto die recrudescente consueverunt &c.

Ob eandem causam monuit , (*d*) ubi os fractum , per cutim eminens , reponendum erat , illud debere fieri eodem die , vel postridie ; sed non tertio , quarto vero vel quinto minime.

Dum sororis stuprum vindicaturi Simeon & Levi persuaferant incautis , ut circumciderentur ; tertia die post circumcisionem , acerrime dolente vulnere , impune occidebant omnes (*).

RETORQUERI , FUNDO INTERIM TUMIDO ASSURGENTE &c. Panniculus adiposus cuti subiectus facillime distendi potest & tumere ; patet in obesissimis , hydropicis , & emphysemate , in quo aer , panniculum adiposum ingressus , tam mirabiles ejusdem expansiones facit. Cutis autem superinducta huic panniculo adi-

(*a*) Epidemic. Lib. II. Charter. Tom. IX. pag. 181.

(*b*) Aphorif. 66 & 67. Sect. 5.

(*c*) De Fracturis Charter. Tom. XII p. 249.

(*d*) Ibidem , Charter. Tom. XII. p. 252.

(*) Genesis cap. 34.

posse tenaci vinculo eum coercet : hinc ubi cutis per vulnus divisa est , sensim recedunt discissæ cutis margines ; panniculus autem adiposus , in loco vulneris cutis æquabili pressione liber , brevi assurgit , & tumet , unde retrotracta utrimque cute , ex protuberante panniculo adiposo , vulneris labia retorquentur , & in vulneris fundo tumida moles assurgit. Sed manente eodem impetu liquidi vasa distendentis , si minuantur causæ , quæ huic distensionis resistunt , vasorum amplitudo augebitur ; cum ergo cutis resistentia in vulnere sublata sit , panniculus adiposus in vulnus assurgens , magis dilatabitur , & in fungosam dictam carnem Chirurgis excrescet , sicque degenerabit satis cito.

6. Atque eodem tempore febricula cum calore & siti adest.

Si nempe vulnus fuerit alicujus momenti , in parvo enim vulnere hæc symptomata non ita observantur. Simulac enim oriuntur symptomata præcedenti numero descripta , oritur major calor in vulnere , & in toto corpore , pulsus fit celerior , inquietudo nascitur & insomnia turbulenta ; uti & sitis major , & urina fit magis rubicunda. Omnia autem hæc symptomata durant , quamdiu ille tumor , dolor , & calor , uti & retorsio labiorum in vulnere adsunt ; his cessantibus , desinunt & illa : levis talis febricula , vulneratis hoc stadio contingens , non nocet ; imo prod-est potius , quatenus per hanc febriculam pus nascitur : pure autem facto , solet plerumque cessare. In sectione calculi , extirpatione mammæ , & similibus vulneribus illo tempore adest hæc febricula , boni tunc semper ominis.

Hinc monuit Hippocrates (a) circa puris generationem dolores ac febres magis accedunt , quam (pure) facto.

Hic autem agitur de tali febricula , quæ à vulnere ut causa hoc tempore nascitur ; potest enim vulneratis ab aliis causis plurimis febris contingere. In magnis enim vulneribus v. g. pure jam facto , sed copioso & pro parte bibulis venis resorpto , hæctica febris , corpus depascens , oritur sæpe.

7. Hinc tertio , quartove die serius , vel ocyus , vulnere adest liquor tenax , albus , pinguis , æqualis , pus.

Vulnere facto statim exibat sanguis ; postea constrictis magis vasis discissis ichor subrubellus ; dein oriebatur inflammatio vulneris cum symptomatibus descriptis ; & post hæc incipiebat apparere in vulnere liquor unctuosus , consistentiam fere habens cremoris lactis recentis , parum subflavescens , æquabilis omnino , inodorus , saporem blandum chyli fere instar habens ; vocatur Pus : quod si bonum fuerit , omnes dotes recensitas habet. Sed pus tale nunquam fit , si vulnus tectum non fuerit ; sed sub thrombo , nato in vulnere , vel Emplastro tegente , pus illud nascitur. Hinc pus non fit in vasis , sed extra vasa in vulnere generatur , ab effusis humoribus , calore corporis fotis & mutatis. Si enim pus omne in vulnere hærens linteis carptis mollissimis abstersum fuerit , post horam vulneris superficies undique madida apparebit tenui liquido , non pure ; sed si per viginti quatuor horas Emplastro tectum fuerit vulnus , illo ablato , pus apparebit. Unde pus fit extra vasa ; sed materies , unde fit , per vasa adfertur.

(a) Aphor. 47. Sect. 2. Charter. Tom. IX. pag. 44.

Pus autem sic natum in vulnere pulcherrimos effectus præstat : hac enim via utitur natura , ut semilaceras partes , inflammata vasorum extrema , una cum infarctis liquidis in labiis & fundo vulneris hærentia , solvat , & à partibus vivis & sanis separet : deinde sub hoc pure factò recrefcunt omnia perdità.

Naturam ubique secutus Hippocrates (a) ideo dixit , recentia vulnera (ἰλνία νέτρα) enim potius de vulneribus quam de ulceribus videntur intelligi debere) tum & ambientes partes minime inflammari , si celerrime suppurentur. Postea addit ibidem , quod acuto telo inflicto vulnus possit sine suppuratione curari , sed carnes contusas & dissectas putrescere & in pus versas extabescere , deinde novas carnes renasci necesse est.

Dicit eodem in loco : tunc inflammanur vulnera , quum ad suppurationem tendunt : suppurant autem alterato & calefacto sanguine , donec putrescens fiat pus illorum vulnerum. Non autem hic per putredinem videtur intellexisse malignam & vere putridam dicendam humorum degenerationem , sed tantum illam immutationem , qua in pus abeunt , uti hunc locum legenti facile patebit.

Hinc bonum pus maximum securitatis signum Chirurgis dat : quin imò Galenus ausus fuit pronunciare , *nihil mali posse accidere ulceri pus procreanti* (b).

Puris enim confectio fit , dum boni humores debito motu ad vulnus feruntur ; hinc sanitatis superstitis actiones pro sua causa agnoscit. In corpore enim cacochymico raro bonum pus in vulnere nascitur , sed degenerans multum à conditionibus boni puris ichor ; & hinc in talibus vulnera , licet levia , difficillime sanantur. Talia corpora ideo *δυσίχνια* dixerunt veteres Medici. Ob hanc causam dixit Hippocrates (c) : *Hydropicis orta in corpore ulcera non facile sanantur*. Si magno impetu per validam febrem moveantur humores , siccum vulnus apparet sine ullo pure : si è contra vires vitales langueant , deficit iterum puris confectio. Hanc ob rationem , ulceris siccitatem inter signa mortis futuræ recenset Hippocrates (d).

8. Simul rubor , calor , dolor , tumor , retorsio labiorum , febricula cessant , vel minuuntur.

Omnia enim hæc symptomata tantum oriebantur , quia in labiis vulneris vasa discissa , contracta sua elasticitate , denegabant liberum transitum liquidis appulsis ; hinc vera nascebatur inflammatio , unde rubor , dolor & calor in loco fiebant. Panniculus interim adiposus , cutis æquabili pressione liber , recipiebat in vasis suis dilatatis alienos humores , unde turgebat in fundo & retorquebat labia vulneris. Suppuratio autem separabat extremitates obstructas vasorum , una cum immeabili liquido hic hærente ; unde pure factò vasis obstructis iterum patulis factis restituebatur liber transitus per hæc omnia. Omnia ergo illa symptomata , quæ ab inflammatione labiorum & fundi vulneris oriebantur , necessario pure factò minuuntur multum , vel & penitus cessant.

Hoc autem vulneris stadium solent Chirurghi vocare tempus digestionis : cumque vident omnia ante tumentia nunc subsidere , dixerunt pus fundere & dissolvere omnia.

(a) De Ulceribus in initio. Charter. Tom. XII. pag. 131.

(b) Commentar. in Aphor. 22. Sect. 5. Charter. Tom. IX. pag. 207.

(c) Aphor. 8. Sect. VI. Charter. Tom. IX. pag. 252.

(d) In Pronostic. Charter. Tom. VIII. pag. 605. & Coac. Prælag. n°. 496.

9. Et sensim cavum vulneris à fundo fursum , & ab ambitu versus centrum crescente nova , rubra , viva , materie , carne dicta , impletur , coëunte margine albo , subcærulescente , molli , æquali.

Quando , bona digestionem facta , omne illud , quod non poterat iterum ad integritatem requisitam reduci , separatum est à vasis vivis , tunc purum vulnus dicitur , & tota ejus superficies undique æquabiliter apparet humida & perspirabilis , nihil asperi , nihil sicci in fundo & labiis vulneris conspicitur. Tunc incipit illud stadium vulneris , quo consolidatio perficitur. Sub pure enim , naturali & blandissimo balsamo , videmus tunc quotidie sensim elevari fundum vulneris ; uti & ab ambitu marginum versus centrum æquabilissime prodire novam materiem , quæ microscopiis lustrata tenerrima & pulposa vasorum excrementum extrema exhibet. Hoc vocant incarnationem Chirurghi : non quod caro , proprie dicta musculosa , sic recreseat , sed obtinuit usu , novam hanc rubram & vivam materiam , in vulnere puro quotidie auctam carnem vocare. Omnium pulcherrime hoc apparet in illis vulneribus , in quibus jactura substantiæ facta est : dum v. g. acinacis ictu cutis cum subjecti panniculi adiposi parte ablata est ; tunc enim naturaliter primo in vulneris fundo apparet vasorum recrecentium congeries , deinde à marginibus similia protruduntur , quæ cum prioribus à fundo surgentibus concurrunt , uniuntur , sicque perditam corporis substantiam restituunt mirabili naturæ artificio. Nihil enim ars hic agit , impedimenta tantum removet , ærem arcet tegendo vulnus , reliquum Corporis creata fabrica perficit. Hæc sic fieri novimus omnes ; qua lege fiant , ignoramus omnino. Eleganter hujus rei veritatem expressit Galenus dicens (a) : *cognosci debet circa carnis generationem , quod materies illius sit sanguis bonus , opifex vero & author (Σπουδὴς τε ἔχοντος) natura*. Agit autem ibi de methodo , qua ulcus cavum curari debet. Ignorabant tamen Veteres subtilissimorum vasorum mirabilem structuram , quibus partes nostri corporis , constant. Anatomicis demonstrationibus edocti hodie stupemus , quomodo elongata vasorum in vulnere hiantium oscula vicinis concurrant , uniantur , concrecant ; nec hoc tantum , sed arteriæ arteriis , venæ venis , nervi nervis &c. sic debent uniri , ut renascatur similis deperditæ in vulnere substantia. Infinitam Creatoris sapientiam adoramus , qui corpus humanum his doctibus instruxit.

Interea dum hæc fiunt in cavo vulnere , margines antea rubri & tumidi , nunc incipiunt subsidere æquabilissime ; colorem subcærulescentem margaritarum instar acquirunt , sicque primum cicatricis rudimentum circa margines nascitur ; sensimque augetur centrum versus ; donec æquabilissime clausum fuerit vulnus.

Hæc est naturalis & perfectissima vulneris sanatio.

10. Postremo siccatur vulnus , & obducitur cicatrice.

Ubi jam omnia recreverunt in vulnere deperdita , & unita fuerint omnia , quæ per vulnus separata fuerant , locus vulneris siccus apparet , ubi antea in singulis punctis videbatur humiditas.

(a) Method. Med. Lib. III. cap. 3. Charter. Tom. X. pag. 59.

Si jam non fuerit multum perditum de substantia , nec valida nimis suppuratio-
ne multum fuerit consumptum de panniculo adiposo & cute , omnia sic consolidan-
tur , ut vix appareat aliquod discrimen inter locum vulneris & vicinam cutim ; tunc-
que vix cicatricis nomen meretur. Ubi vero magna cutis portio ablata est , vel
multum subjctæ membranæ pinguedinosæ consumptum fuerit per suppurationem ,
tunc apparebit locus vulneris magis albescens , magis solidus , & sæpe magis de-
pressus , quam vicina cutis : vocatur tunc cicatrix , quæ semper minus perspirabilis
est , quam reliqua corporis externi superficies , magisque polita & glabra apparet ,
quam reliqua cutis. Hoc imprimis patet , dum post mammæ vel majoris steatoma-
tis extirpationem , magna portione cutis sic abscissa , cicatrix nascitur ; tunc enim
vulneris consolidati superficies polita , splendens , immobilis , & accreta partibus
subjectis apparet.

Sic descripta fuit historia vulneris in corpore sano , & enarrata sunt illa omnia ,
quæ fidelis observatio docuit fieri in vulnere , ab initio ad integram consolidatio-
nem usque : & inde postea certissima poterit deduci methodus , qua vulnera cura-
ri debeant , imitando nempe naturæ in curandis vulneribus viam , removendo illa ,
quæ nocere possent , subministrando talia , quæ deficere videmus. Sed monitum
fuit , tantum hic agi de tali vulnere , in quo nec major arteria , nec locus admodum
tendinosus læsa fuerant. Ergo jam videndum , quænam mutationes phænomenorum
simplici vulnere accidunt , si tales partes per vulnus læsæ fuerint.

§. 159. **S**I arteria non nimis magna , nec Cordi admodum pro-
pinqua , omnino transversim disseccatur , retrosiliens , at-
que inter solida vicina se recondens , sibimet obturaculo est ; & cæ-
tera ut (158) prius.

Dum sanguis cordis vi in arterias , sensim semper angustiores factas , pellitur ;
in latera illarum incurrens illa ab axi canalis remouet ; & hinc arteriarum capacita-
tem auget : tanto autem magis cæteris paribus arterias dilatat , quanto major est re-
sistentia circa fines arteriarum ; unde arteria ligata intumescit plurimum inter cor
& ligaturam. Huic autem dilatationi resistunt arteriarum fibræ musculosæ orbicula-
res satis valida vi , qua iterum contrahuntur in pristinam dimensionem , simul ac
cordis vis impellens cessat. Quando ergo arteria , per vulnus dissecta , patulo orifi-
cio sanguinem fundit , minuitur resistentia sanguini à corde impulsio , & hinc mi-
nuitur causa dilatationis arteriæ : prævalet ergo vis orbicularium fibrarum , per
quam omni momento arteria plus contrahitur , sicque sensim , si non nimis magna
fuerit , orificium discissæ arteriæ clauditur. Accedit præterea , quod fibræ longitu-
dinales , ob easdem causas plus contractæ , arteriæ longitudinem minuant , unde
arteria integre discissa retrosilit , & inter vicinas partes solidas se recondens harum
mole & pondere plus adhuc comprimitur & angustatur. Si jam simul per vulnus
factum notabilis copia sanguinis exiverit , debilitatis inde viribus , & minuto san-
guinis impulsu impetu arteriæ discissæ contractio augetur. Dum magnus pedis digi-
tus uno cunei ictu extirpabatur , vidi binas arterias à latere abscissi digiti ultra vul-
neris superficiem ad lineæ Geometricæ forte longitudinem eminere ; dum per pau-
ca minuta permittebatur liber sanguini effluxus per patula hæc vasa , inceperunt re-
trotrahi , minuebatur hæmorrhagia ; & post biduum soluto apparatu nullus efflue-

bat sanguis, oclusis jam discissarum arteriarum finibus. Si vero magna admodum fuerit arteria discissa, vel cordi admodum vicina, non valet resistere arteriæ contractio sanguini tam valida vi impulso; hinc ad mortem usque pergit hæmorrhagia. Quo enim minor est arteria, & quo magis distat à corde, eo magis retardatur impetus sanguinis à corde impulsus, quia resistentiæ majores sunt.

§. 160. **S**I eadem (§. 159) vulneratur transversim non tota dissecta, retrahentis fibris vulnus ampliatur; hinc Hæmorrhagia perpetua; & ea sedata, à tenuitate cicatricis cedente Aneurisma.

In hoc casu, ob rationes dictas §. 158. n°. 1. vulnus arteriæ inflictum, recedentibus à se mutuo sensim plus partibus discissis, ampliabitur magis: sed quia pars quædam adhuc cohæret, non poterit vulneratæ arteriæ extremum retrosilire, & se recondere sub partibus vicinis; nec poterunt fibræ orbiculares sic contrahi, ut claudatur arteriæ vulnus. Cum ergo in hoc loco resistentia nulla sit, & in reliquis vasis integris satis magna, perget hoc vulnus sanguinem fundere ad mortem, vel animi deliquium usque. Sæpius autem accidit, quod non ad mortem usque sanguis fluat, sed ad summam debilitatem tantum: tunc incipit sensim nasci in loco arteriæ discissæ quasi rudimentum cicatricis, quod valet quidem compescere sanguinem, debili adeo cordis vi motum, ne exeat, sed postea auctis vulnerati viribus debiliior hic locus adhuc manens, quam est arteriæ reliqua pars, à distendente sanguine magis dilatatur, & protuberat: vocatur tunc *anévrysme*, sive arteriæ dilatatio, quia arteria in illo loco non amplius manet æquabilis conicus canalis, sed in saccum extenditur. Cum enim amplitudo arteriarum pendeat à duabus causis, nempe à vi qua sanguis corde pulsus dilatare nititur arterias, & à resistentia laterum arteriarum; ideoque hæc amplitudo mensuretur (uti dictum §. 26.) ratione composita ex ratione directâ impetus sanguinis impulsus, & ratione inversâ resistentiæ laterum; patet evidenter, debiliore facta arteria in quadam parte, ibi necessario plus debere extendi. Quia jam per ipsam hanc extensionem magis adhuc debilitatur talis arteriæ locus, patet ratio, quare sæpe adeo ingentes tumores aneurismatici oriantur: qualia exempla passim apud Observatores occurrunt.

§. 161. **S**I arteria major tota dissecta, oritur perpetua, usque ad defectum animi, vel vitæ, Hæmorrhagia; inferius posita tabescunt, & putri exeduntur, sed lenta gangræna; aut arefacta penitus contrahuntur.

Pleno tunc rivo undatim effluit sanguis, non æquabili celeritate tamen, sed per subsultus, nunc minori, mox iterum majori impetu; quia illo tempore, quo arteriæ sunt in diastole, cordis vis sanguinem urgens sola tunc expellit per apertam arteriam sanguinem; sed magna pars impetus, sanguini à corde conciliati, impenditur dilatandis arteriis: hinc tantum tempore diastoles arteriarum sanguis propellitur illo excessu, quo cordis vis superat resistentiam laterum arteriarum. Dum vero, cessante cordis actione, arteriæ comprimuntur, longe majori celeritate sanguis per illas movetur, & simul color sanguinis exeuntis coccineus fulgens est: &

ex binis illis signis novimus sanguinem ex arteria, non autem ex vena, effluere. Vena etiam, licet magna fuerit, vulnerata, leni stillicidio sanguinem fundit, (nisi in summe plethoricis) semper magis nigricantem, minusque rutilum. Si jam arteria maxima fuerit, & cordi admodum propinqua, cita mors sequitur, omni sanguine per vulnus brevi tempore expulso. Sæpe tamen ad animi deliquium tantum: & si tunc vulnerati non refocillarentur vino vel cardiaceis, sed sic fere mortui relinquerentur; spes adhuc aliqua superest, manente tali vita, sed debilissima, arteriam discissam posse contrahi & consolidari. Mirabile hujus rei Exemplum videbat Celeberrimus horum Aphorismorum Autor, illudque solebat hac occasione auditoribus suis narrare.

Vulnerabatur in pago vicino inter pocula rusticus cultero sub axilla, & discissa arteria axillari incredibili impetu exiliebat sanguis: brevi post concidens credebat expirasse, & pro mortuo deponebatur. Sequenti die, dum accedebant illi, qui publica auctoritate occisorum cadavera examinare debebant, ut de vulnerum lethaliitate ad judices ordinarios renunciarent, invenerunt aliquem adhuc calorem circa thoracem; cæterum nulla vitæ signa: differebant scrutari vulnus per aliquot horas, incepit sensim parum refocillari vulneratus, quem tamen brevi periturum existimabant omnes. Sed præter omnium opinionem diu in summa tali debilitate manens vulneratus evasit tandem. Brachium autem illius lateris aridum & exsiccum penitus Mumie fere instar tota vita mansit. Si ergo in tam magna arteria, & cordi adeo vicina, potuit fieri consolidatio, apparet non tam facile desperandum esse etiam in periculosissimis vulneribus arteriarum: modo nullis stimulis vinosis vel cardiacis augeatur debilis vita in talibus vulneratis, forte plures evaderent.

Si jam arteria talis major discissa sola prospiciat partibus inferius positis, nec ulli alterius arterie rami huc pertingant; necessario tollitur omnis omnino vitalis liquidi influxus in has partes. Sequitur inde mors harum partium, quæ tunc duplici modo fit: vel enim liquida, in partibus suppositis hærentia, non amplius propulsa motu arteriosi sanguinis, stagnant & corrumpuntur: tuncque putrida fit, sed lenta simul gangæna: quia omnis vitalis impetus, movens partes vivas ad gangrænosas illas crustas, hincque proserpere cito faciens malum, hic deficit: vel humores in partibus suppositis relictæ post discissam arteriam majorem, contractione propria vasorum, & muscutorum vicinorum actione, transeunt in venas, & redeunt ad cor: sed nihil interim poterit à corde redire ad has partes; unde sensim omni liquido orbata vasa harum partium collabuntur, & concresecunt: cumque maxima pars nostræ molis corpore ab humoribus pendeat, ideo moles harum partium ultra fidem fere imminuitur, & omnia arefacta penitus contrahuntur; uti apparuit in Exemplo modo allegato.

§. 162. **N** E R V I majores, tensique, toti dissecti retrosiliunt, se recondunt, ramulos vulnere paulo superiores trahunt, tendunt, vicinis dolorem, obstructionemque creant, parti vero infra Vulnus positæ stuporem, immobilitatem, marcoremque, aut & gangrænam.

Jam considerabuntur illa phænomena, quæ apparent, quando nervi majores

vulnerantur. Nullum enim vulnus cutim lædere potest, quin innumera fibrillæ nervæ dissecantur; sed de his hic non agitur. Consideramus hic tantum nervos majores, prout ab Anatomicis demonstrantur, qui sunt fasciculi nervorum communi involucri tectorum.

RETROSILIUNT &c. Illud, quod in majoribus nervis proprie nervus dicendum esset, tenerrime encephali pulpæ propago, non videtur talem habere firmitatem, ut dissectum elastica vi retrosilire possit, sed mollissimis in sua origine ex medulla oblongata & spinali nervis circumponuntur tenacia involucra, ut tuto deferri possint ad illa loca corporis, in quibus suo munere fungi debent. Ab his vaginis nervorum firmitas & elasticitas pendent, unde & parvæ satis fibrillæ nervæ Anatomico scapello resistunt; &, nisi hoc foret, nervorum demonstratio, imprimis ubi in tenues dividuntur ramulos, omnino foret impossibilis. Dum ergo discinditur major nervus, extrema discissâ vi contractili vaginarum, nervos investientium, & vasorum per hæc disperforum, utrimque retrosiliunt, & sub vicinis partibus se recondunt. Quo crassior autem nervus est, eo, cæteris paribus, densiora involucra habet: & cum nervei fasciculi minores, qui uniti hunc majorem constituunt, etiam suis investiantur involucris, ideo magni nervi disseci satis valida vi retrorahuntur.

RAMULOS VULNERE PAULO SUPERIORES TRAHUNT &c. Nervi quidem distribuuntur in ramos, ut arteriæ & venæ; sed rami ex arteriis venisve orti cum cavo trunci, unde oriuntur, communicant, unde liquidum ex trunco in ramos continuitate motus fertur. Sed alia ratio obtinet in nervis majoribus, minores nervos ramorum instar à se dimittentibus. Major enim talis nervus continet innumeros minores nervorum fasciculos communi involucri colligatos; qui iterum ex aliis minoribus constant: nec finem hujus divisionis hætenus invenit subtilissimorum Anatomicorum dexteritas & industria. A majori autem nervo in decursu suo secedunt ubique tales nervorum fasciculi, qui rami majoris nervi dicuntur; non quod substantiæ continuatione inde propagentur, ut in arteriis & venis, sed antea uniti cum aliis similibus molem majoris nervi constituiebant; nunc inde secedentes tendunt singuli ad debita loca, ut suo fungantur munere. Omnes ergo nervi, qui ex majori nervo ramorum instar derivantur, jam adsunt tales in illo loco, ubi major nervus ex medulla oblongata vel spinali originem ducit. Sed in arteriis & venis rami ibi originem suam ducunt, ubi ex trunco majoris canalıs exeunt.

Dum ergo truncus major nervosus discissus est, ille retrosiliens simul trahet ramos nervosos ex hoc trunco ortos paulo superius, quam est vulnus inflatum; unde à violenta hæc distractione fibrillarum nervosarum immanes dolores in partibus vicinis, ad quas illi ramuli pertingunt, oriuntur; & ideo sæpe longe acerbior dolor in partibus vicinis est, quam in ipso vulneris loco. Posse autem à simplici tali distractione fibrarum nervearum enormes fieri dolores, docent plurima observata. Dum Phlegmone panniculum adiposum occupans & distendens suppuratur, cutim elevat & nerveas cutis fibrillas distrahit cum summo dolore; pure dein facta, pertusa cute lanceola Chirurgica, cessat ilico dolor omnis, dum distendens cutim pus effluit. Quam sævus dolor oritur, dum inflammatorius tumor tensam & nervosam adeo meatus auditorii membranam elevat? dum in lue Venerea tumens ossis substantia Periosteum distrahit, præ doloris acerbitate sæpe violentas sibi ipsis intulerunt ægri manus.

Præterea vaginæ illæ, quæ nervos majores, & inde secedentes ramos, investiant, innumeris constant vasculis; uti hodie per Anatomicas injectiones certo novimus: non poterunt ergo rami nervosi à trunco discisso & retrofiliante distrahi, quin simul & distrahantur hæ vaginæ, & sic elongentur vascula has constituenta: sed demonstratum fuit §. 112. n^o. 3. omnem causam, quæ vasa nimis trahit & elongat, minuere vasorum capacitatem; unde obstructio nasci poterit, & omnes ejus effectus.

PARTI VERO INFRA VUENUS POSITÆ STUPOREM, &c. Nervorum actiones in corpore humano observatæ sunt distinctissimæ omnino: Quidam enim sensum præbent partibus, ad quas tendunt; alii motum muscularem efficiunt; nutritio partium denique, & vita, ab aliis videtur pendere. Diversas autem illas actiones per diversos heri nervos, docemur in morbis, evidentissime. Accidit enim sæpe, paralytes particulares, imo & ipsam hemiplegiam nasci, in qua dimidium latus corporis immobile omni actione musculari voluntaria caret, superstiti sensu, calore, & nutritione in parte affecta; tuncque magna spes curæ affulget. Aliquando una cum motu sensus perit, & fit talis stupor in parte affecta, ut non amplius ægris appareat hæc pars pertinere ad corpus, sed sentiant obstacula occurrentia huic parti, ac si baculo porrecto eadem tangerent; pejor tunc longe mali conditio. Dum autem simul frigus in parte paralytica est, & torola partis substantia incipit decrescere, immedicabile fere semper malum est; uti in paralyti, Colicam Pictorum dictam sequente, tristibus exemplis constitit. Nervi autem his adeo diversis functionibus inservientes, origine sua in encephalo distinctissimi licet sint, tamen colligati in majores fasciculos nerveos ad partes tendunt: talibus ergo funiculis nerveis discissis integre, omnes illæ functiones diversæ, à nervis integris pendentes, abolentur: unde stupor & insensibilitas partium infra vulnus positarum; uti & earundem immobilitas & marcor: nisi rami, supra vulnus factum ex trunco emissi, partibus inferioribus prospexerint, vel alii trunci nervei ramos ad has partes dederint.

Minus forte evidens apparebit ratio, quare gangræna partium infra vulnus positarum nervum majorem penitus disiectum sæpe sequatur. Sed gangræna dicitur illa partis mollis affectio, quæ, abolito influxu vitalis humoris in arterias, & effluxu per venas, in mortem tendit. Si ergo nervo majori disiecto gangræna sequatur, debet tolli vitalis ille humorum influxus & effluxus: arteriæ tamen & venæ sunt integræ, humores per illas fluentes boni; soli nervi discissi sunt. Si autem consideretur, motum liquidi per arterias pendere à binis causis, cordis nempe vi & arteriarum actione; & simul notetur, cordis vim pro maxima parte impedi dilatandis arteriis, hinc præcipuam causam motus fluidi per arterias esse earundem contractionem, quæ partim ab elasticitate quidem arteriarum, maxime tamen pendet à vi musculari fibrarum orbicularium, qua arctantur dilatatae arteriæ, & propellunt contentum liquidum; cumque constet ex Physiologicis, actionem musculi requirere integritatem nervi ad muscolum delati, & truncos nervosos ramos dare vicinis arteriis, apparebit, nervo destructo, perire vim muscularem arteriæ, qua urget liquidum contentum; supererit ergo sola Elasticitas arteriæ & impetus à corde communicatus. In venis autem sanguis movetur illo motu, quem habet, dum ex arteriis in venas transit; adjuvatur dein motu musculorum adjacentium, qui turgentes, dum agunt, adjacentes venas premunt, sicque sanguinis venosi

motum promovent. Nervis autem discissis, musculi suppositi paralytici manent; hinc nulla illorum actio superest. Minuto ergo impetu sanguinis ex arteriis in venas pulsus, deficiente musculorum venis adjacentium actione, incipit sanguis in venis tardius moveri, accumulari, stagnare; atque ita major adhuc resistentia oritur arteriis, quarum actio jam debilitata erat; unde tandem integre suffocatur motus vitalis fluidorum per arterias & venas in partibus tali vulnere suppositis; id est, nascitur gangræna.

Sic ratio apparet illorum malorum, quæ observantur sequi nervos majores integre discissos: observata autem Medica docent in simili casu talia sequi mala.

Sanissimus, & cruda senectute vigens vir, sexagesimum quartum ætatis annum agens, ex alto delapsus spinam dorli acuto lapidis angulo sic impingit, ut ipso momento totus corporis inferior truncus ab infimo margine ultimarum costarum, & artus inferiores carerent sensu & motu, medulla spinali læsa in tam alto loco. Incassum adhibitis omnibus, sexta die gangræna plantam pedis utramque occupabat; septima die placide periit.

Similem casum in juvene sanissimo viginti annorum vidi, cui circa ultimas lumborum vertebrae hærebat malum: miseram ille vitam per decem septimanas traxit, sed horrenda gangræna totas nates, pedum plantas, utramque calcem depalcebatur, miserrimo spectaculo.

§. 163. **N**ERVI tensi, tendinosi, puncti, vel dimidiato discissi dolores, aliquando primo obtusos, nonnunquam vivos excitant, primo loco vulneris, post per omnes nervos nexos, vicinosque; hinc calores, tumores, rubores late sparsos; febres, deliria, spasmos, inflammationem, inflammati aperturam cum exacuatione acris, tenuis, & copiosissimi sæpe feri; postea insensilitatem, rigiditatem, exsiccationem, immobilitatem producant, vel gangrænam, & mortem: atque hæc quidem omnia eo violentiora accidunt, quo nervus est fortius tensus supra partes firmas, iisque annexus; aut & involucris magis tenacibus indutus.

Hi sunt calamitosissimi illi casus, ubi à levi vulnere tam dira sæpe symptomata oriuntur. Accidit aliquando, ut, dum vena in brachio pertunditur, lædatur ipse brachii musculus tendo; vel, quod sæpius fit, lata illa aponeurosis ab hoc tendine orta, musculos cubiti regens. Ipso hoc momento sæpe oritur dolor intolerabilis, quem misero ejulatu ægri exprimunt. Dum Carolo nono, Galliarum Regi, Medicorum jussu vena secabatur, ipso momento, quo vulnusculum infligebatur, præ doloris acerbitate Rex alta voce clamavit, paulo post totum brachium intumuit, nec poterat sine magno dolore flecti vel extendi articulus cubiti: sævus interim dolor in loco puncturæ, & postea per totum brachium dispergebatur: applicabatur vulnusculo oleum terebinthinæ calidum cum pauxillo spiritus vini rectificati, & aliis dein idoneis remediis post trimestre spatium brachii usus integre restitutus fuit (*).

(*) Les Oeuvres d'Ambroise Paré Livre XII. chap. 47.

Aliquando & in initio talis mali tantum sentitur obtusus dolor, post paucas sæpe horas immaniter auctus, totum brachium ad humerum usque occupans; aliquando & subaxillares glandulæ satis cito tument & inflammantur. Conqueruntur sæpe in ipso vulnere adesse sensum vivi ignis partem comburentis. In cute externa maculæ rubræ oblongæ apparent, pessimo tere semper signo. Dum in Paronychiæ maligna specie tendines flexorum digiti afficiuntur, rubra zona, per cutim cubiti; longitudinaliter secundum ductum musculorum digitos flectentium decurrens, tam mali habetur ominis apud peritos Chirurgos; acutissima sæpe in sanissimo etiam homine accenditur febris; & partim ab hac febre, partim per doloris vehementiam turbato cerebro, deliria, convulsiones, mors ipsa sequitur. Funestum tale exemplum mortis secutæ post nervi puncturam Paræus in loco modo citato habet. Hippocrates (a) narrat, *quod homo sibi ipsi subulam ad digiti longitudinem, in femur supra genu adegerit: nullus effluebat sanguis, vulnus cito clausum fuit, totum femur intumescibat, & tumor extendebatur ad inguen & laterum mollitudinem (xvi. a) tertio autem die mortuus est. Alter acuto telo posterius paulo infra cervicem vulnerabatur: vulnus autem acceptis vix effatu dignum, non enim alte penetrabat: non longo tempore postea evulso iaculo contrahabatur, uti solent opistorhono correpti, & maxilla clauderantur; & si quid liquidi assumeret ore, & deglutire tentaret, redibat per nares: reliqua omnia deteriora fiebant; secunda die mortuus est.* Plurimi tales tristissimi casus apud Observatores occurrunt.

Quamvis autem non semper mors sequatur tales nervorum læsiones, molestissima tamen plerumque adsunt mala: tota enim pars tumet immaniter, inflammatur, & vel per elatas epidermidis bullas, vel & per ipsum vulnusculum sponte dilatatum exit incredibilis quantitas tenuis liquidi noctes & dies: quia autem adeo urentem dolorem sentiunt ægri, acrimoniam depulcentis ichoris accusant; cum tamen gustu non detegatur in hoc liquido effluente tanta acrimonia. Aliquando gangræna totum panniculum adiposum depascitur; suppuratio mitis nunquam hic fit, sed sinuosæ collectiones ichorosæ materiæ omnem pinguedinem musculis interpositam consumunt; vaginæ pinguedinosæ tendinum destruuntur: unde postea, cute musculis accreta, tendinibus & musculis defectu cellulosæ tunicæ concretis cum vicinis partibus, fit rigiditas & immobilitas omnium, & totius membri usus perit. Destructis valida gangræna, vel suppuratione, nervorum tunicis, (nam & in nervorum involucri cellulosa tunica reperitur) usus horum perit, fitque insensibilitas, marcor &c. Quam mirabile videtur, in corpore etiam sanissimo, à levi nervi punctura posse nasci tam miras humorum degenerationes, tam enormes dolores, tot partium usum penitus destrui à levissimo etiam vulnere! Ratio horum phænomenorum postea dabitur §. 181. & sequentibus.

Notandum quam maxime, omnia hæc eo violentiora accidere, quo nervus læsus fortius tensus est: hinc tam periculosæ puncturæ sunt circa ultimas digitorum phalangas, ubi fortissimi tendines inferuntur, & in vola manus, ubi expansio illa tendinosa palmaris musculi tensum illud & tendineum scutum facit. Augetur præterea hæc malignitas, si tenacioribus involucri nervosæ partes læsæ tectæ fuerint; uti patet imprimis in periculosissima Paronychiæ specie, ubi tendo insertus ultimæ phalangæ digiti punctura læsus, vel alia quacumque de causa inflammatus, sævis-

(a) Epidem. Lib. V. Charter. Tom IX. pag. 343. 344.

mos dolores , phrenitidem , convulsiones , syncopen , imo mortem ipsam sæpe satis subito infert ; vel , si evaserit post diros adeo cruciatus ager , sideratum ultimæ phalangis ossiculum cadit ; manus in pugnum contracta per totam vitam manens immobilis tristes funesti mali reliquias , arte insuperabiles , ostendit. Ratio autem tam enormis malignitatis , tota fere pendet inde , quod tendinibus flexantibus phalangas digitorum circumponatur ligamentum illud mirabile , cartilagineam fere duriciem habens ; si enim primis horis incipientis mali peritus Chirurgus audaci sectione dividat omnes partes incumbentes ad os usque , licque pertundat thecam illam tendines ambientem , minuitur dolor illico , & præcaventur omnia illa funesta symptomata.

§. 164. **Q**UÆ eadem (162. 163.) , parum mutata , etiam in tendinibus diversimode læsis obtinent , atque sævissima quidem.

Tendo musculi examinatus discerpi potest in tot fibrillas , in quot poterat dividi musculus ipse : inter quas fibrillas iterum interponuntur vasa numerosissima , uti injectiones Anatomica docuerunt. Sed tendinum illæ fibrillæ videntur esse tantum continuationes fibrarum musculosarum , quæ nervis musculos ingressis originem suam debere videntur (*a*). Hinc non mirum , tendines læsos , nervorum propaggines cum sint , nervis similia mala pati. Sed uti in majori nervo reperiuntur omnis generis vasa , & tunica cellulosa , nervosas fibras a se mutuo separantia , sic idem in tendinibus observatur. Quia autem tendines movendis partibus tantum inserviunt , nervi autem præterea & sensum , & nutritionem , in plurimis corporis partibus faciunt , hinc non omnia eadem mala fiunt à tendinibus læsis , quæ nervis vulneratis accidunt : multa tamen in utroque casu adsunt communia phænomena , quæ tamen plerumque violentiora in tendinibus læsis adhuc observantur.

Integre discissi nervi , nisi ramuli vulnere paulum superiores trahantur à resiliente trunco discisso , non multum doloris faciunt ; partibus autem inferioribus omnes usus tolluntur , quos à nervo integro habebant. Sic & tendine integre discisso aboletur motus partis , qui ab hujus tendinis integritate pendebat ; cæterum dolor sæpe nullus , nili qui omni vulnere simplici adest , nec sæviora sequuntur symptomata. Hoc vidi in homine , cui cultro tendines erectores digitorum abscissi fuerant. Memorabilis casus , qui hoc confirmat , habetur in actis Academia Regiæ scientiarum (*b*). Saltator agilissimus , dum validissimo saltu corpus elevare nitebatur , dirumpit utriusque pedis magnum tendinem , quem Achillis vocant , integra manente cute ; distantia autem trium digitorum transversorum erat inter tendinis rupti extrema. Idonea ligatura restitutus fuit in pristinam sanitatem ; nec rupturæ momento , nec toto curæ decursu ullum dolorem sensit.

In alio homine , integra etiam manente cute , ejusdem tendinis illa pars , quæ oritur à musculis gastrocnemiis , rumpebatur , manente integra illa parte tendinis , quæ musculo soleo , gastrocnemiis subjecto , originem debet. Aderat magnus dolor , valida inflammatio , & tumor partis (*c*). Inde apparet , longe majora mala sequi tendinem semidiscissum , quam si integre divisus fuerit.

(*a*) Herm. Boerhaave Institut. Med. § 395. | (*c*) l'An 1728. Mem. pag. 331. &c.

(*b*) l'An 1722. Mem. pag. 70 &c.

Savissima autem mala à tendinibus, vulneratis leviter, oriuntur; imo à levi tantum tactu tendinis, involucris suis nudati, totum genus nervosum turbatur uno momento per totum corpus: quod maxime mirum, cum tendines involucris suis tecti, imprimis pinguedinosa illa vagina, quæ molli oleo lubricando tendinum mobilitatem expeditam adeo servat, ferant sine magno malo, ut valide trahantur, imo consuantur. Notum enim est in Chirurgicis, quod tendines discissos, tenaculis arreptis extremis, attrahant, trajecto filo in unionem retineant, sicque felicissime sanent, parte affecta sic disposita, ut muscoli, quorum tendines sunt discissi, flaccidi maneant. Ubi vero involucris illis nudus tendo vel leviter attingitur, quam horrenda oriuntur mala!

Nobili viro valida inflammatio totum pedem à genu ad malleolos usque occupaverat; valida simul aderat febris; & in corpore satis cacochymico tantæ inflammationis resolutio expectari minime poterat: oriebantur hinc inde collectiones purulentæ & ichorosa materiæ, & magna pars tunica cellulosa separabatur; imprimis circa malleolum internum consumpta omni pinguedine, ipsique vaginis tendinum separatis, nudi apparebant tendines. Monuerat Chirurgum Celeberrimus Boerhaavius, ne tangeret: neglexit ille hoc monitum, & credens tunica cellulosa partem esse, tenaculo prehendit tendinem, ut auferret: ipso momento miser æger convulsus fuit totus à capite ad calcem, cum immani dentium stridore; sicque per aliquot momenta tetanodes factus obrigit.

Terribile & huius rei exemplum habet Hippocrates (a): *Thrinon Damonis filius circa sibi malleolum ulcus habebat; juxta nervum jam purum erodente medicamento illi appposito, contigit episthotono correptum mori.* Satis autem videtur probabile, quod per nervum purum (νεῦρον καθαρόν) intellexerit tendinem vaginis suis nudum, qui tunc albo colore niteret. Eadem observatio repetitur & alibi (b).

Nullum autem pulchrius habetur remedium ad nervorum vel tendinum puncturas, ut præcaveantur horrenda illa symptomata, vel mitigentur, si jam adsint, quam Balsamum Peruvianum nigrum, leviter calefactum, vulnere instillare; deinde spatula calefacta apposita efficere, ut magis penetret, & diffundatur per omnia vulneris loca: postea totum membrum mollissimis cataplasmatibus aut fomentis involvatur, vel blandissimis oleosis illiniatur continuo. Si vulneris angustia Balsamum Peruvianum non admittat facile, dilatetur parum.

Quantum autem possit olei calidi perfusio, ubi totius generis nervosi irritatio, & convulsionem inde futuræ metuuntur, propria calamitate didicit Galenus: qui, in palæstra dum exercebatur, divulsus habuit acromium à clavícula. Palæstræ magister, luxatum humerum credens, summa vi & repetitis vicibus distrahebat partem, ut nempe restitueret os luxatum: distractis tam enormi vi musculis, sensit instare convulsionem sibi Galenus, jussitque totum diem & noctem oleo calido partem perfundi, dum nudus sub æstu caniculæ decumberet in pelle sic figurata, ut oleum affusum lente delaberetur in pelvim suppositam; quod sic collectum & calefactum reaffundebatur continuo. Testatur autem, quod dum vel modico tempore intermitteretur olei affusio, sentiret illico musculos cervicis distendi, & instare convulsionem (c).

(a) Epid. Lib. V. Charter. Tom. IX. pag. 348. in fine.

(b) Epid. Lib. VII. Charter. Tom. IX.

pag. 570.

(c) Galen. Comment. I. in Hippocr. de Articulis. Charter. Tom. XII. pag. 323.

§. 165. **E**T Membranæ, tendinum, nervorumque sæpe producta quum sint, iisdem afficiuntur morbis (162. 163.)

Non omnes quidem membranæ læsæ tanta mala faciunt, sed illæ imprimis, quæ tensæ admodum sunt. Tendinosa illa membrana, quæ à fascia lata produci-
tur, similis aponeurosis à glutæo musculo orta femoris musculos validissimos ambiens & coercens, si levi punctura lædatur, enormia producit mala. Idem apparet in bicipitis aponeurosi per venæ sectionem in brachio institutam aliquando læsa. Meatum auditorium investiens membrana, adeo tensa, si inflammatorio tumore ibi orto distrahatur, intolerabilis dolor oritur, delirium imo sæpe mors sequitur; ut Hippocrates in *Prognostico* & *Coacis prænotionibus* monuit. Imprimis autem metuenda est læsio illarum membranarum, quæ vel tendinum producta sunt, vel exquisitissimo sensu nervorum, per suam substantiam disperforum, copiam & irritabilitatem testantur: qualia v. g. obtinent in Periosteo, quod tam acerbos aliquando dolores facit, si lædatur.

§. 166. **Q**UID lymphatica, adiposa, venosa vasa, & vesiculæ patiantur in vulneribus, quid efficiant, ex lege circulationis, & consideratione vicinorum facile intelligitur.

LYMPHATICA. Vasa, quæ ab Anatomicis demonstrantur sub nomine lymphaticorum, omnia venosa sunt: docet hoc liquidus motus per illa vasa ex ramis in truncos, uti & valvulæ, quas Ruyschius tam evidenter demonstravit Bilsio, has unquam in his vasis demonstrari posse neganti (a). Hæc vasa lymphatica venosa læsa non facient magnum malum: venæ enim sanguinæ, etiam satis notabiles, vulneratæ non multum sanguinis fundunt. Sed his venis lymphaticis respondent similes arteriæ lymphaticæ; quæ vulneratæ, nec integre dilcissæ tamen, molestissimum & perpetuum lymphæ stillicidium in vulneribus facere poterunt. Numerosissima autem talia adesse in corpore vasa, potest etiam concludi ex injectionibus Anatomicis per arterias factis: replentur enim colorata materie tales partes in suis vasis, in quibus naturaliter, nullus sanguis ruber apparebat. Tendines & ligamenta sic replevit Ruyschius, ut ruberent penitus: ergo adfuerunt in his partibus plurima talia vasa, quæ liquido tenuiori non colorato replebantur in sanitate. An ideo frequens talis lymphæ profluvium observatur vulneribus circa articulos inflicti? Chirurgi ideo articulorum lympham vocaverunt (Leedewater) quia frequenter observabant circa articulos ex ulceribus, vel & vulneribus, exstillare magnam huius lymphæ copiam.

ADIPOSA. Corporis humani pinguedinem sanguini misceri posse, & cum illo per vasa, moveri, satis certo constat: videmus enim, per febrim acutam in obesius paucorum dierum spacio pinguedinem adeo minui; imo & in sanguine, venis educto in talibus morbis, apparuerunt oleosæ guttulæ. Malpighius (b) dum in ranis adnatas trunco venæ portarum oleosas strias observabat, his compressis vidit conspicuas olei guttulas in trunco venæ portarum una cum sanguine in hepar abripi. De hac ergo re nullum videtur superesse dubium: quaeritur tantum, an pingue tale

(a) Dilucidatio valvularum pag. 2. & 3. | Atibus pag. 42.
(b) De Omento, Pinguedine & adiposis du-

oleum propriis vasis feratur continuo motu, uti reliqui humores; an vero collectum hæreat in ampullulis, quæ orificiis suis recipientibus uniuntur arteriis, unde hoc oleum secernitur, orificiis vero emittentibus communicarent adjacentibus similibus ampullulis, uti etiam venis, quæ pingue hoc ab arteriis secretum, in folliculis illis collectum, iterum reciperent, & reliquis miscerent humoribus. Malpighius fere videtur in tractatu modo memorato fuisse in hac opinione, quod essent talia vasa pinguedinosa, quæ continuo ductu, nullis ampullulis interpositis, oleum deferrent: in posthumis autem ejus operibus (a) dicit, pinguedinem propriis in loculis contineri & coacervari, velut in peculiaribus officinis; vasorum autem seu ductuum adiposorum existentiam nondum asserere audet, licet circa ipsa sollicitus plurimum se exercuisset. Sive autem pinguedo talibus ampullulis, unitis simul & in se mutuo patentibus, constet; sive dentur talia vasa pinguedinosa, his læsis pingue contentum effluet, corrumpi poterit, sicque multa mala producere valebit. In equi abdomine, post validum cursum mortui, aperto, totam cavitatem ejus oleo tenui fuso plenam reperit Ruyschius (b). Hoc certum est, quod pinguedo laxissima sit, facile in vulnere protuberet, fungosas carnes sic dictas faciat; imprimis si pingua loca vulnerata nimis emollientibus tractentur.

VENOSA VASA. Modo non fuerint admodum magna, non adeo metueda faciunt mala: hæmorrhagia enim valida raro inde nascitur, nisi in valde plethoricis, quæ tunc non nocet, utpote nimiam sanguinis copiam minuens. Vicinæ autem venæ, crebris anastomosibus inter se junctæ, defectum vulneratæ venæ facile suppleant. Hoc tamen videtur notandum, quod si cognoscatur notabilis vena per vulnus læsa esse, tunc non posse applicari sine periculo acria illa styptica, quæ hæmorrhagiæ in vulneribus compescendæ causa aliquando adhibentur, vitriolum v. g. alumen, alcohol &c. metus enim est, ne hæc patulo venæ vulnere recepta sanguinem ingrediantur, ejusque coagula faciant; quæ per latiore continuo factam venam ad cor dextrum delata, dein pulmonalis arteriæ angustiiis impulsæ, funesta maxime possent producere mala.

VESICULÆ. Quales sunt omnes folliculi glandulosi, in quibus per arterias secretus à sanguine humor membranaceo cavo colligitur, & deinde proprio emissario ad usus peculiare emittitur. Læsis per vulnus his vesiculis patet, illarum usum destrui: quanti autem momenti sit hæc jactura, ex cognito usu harum partium patet: sic v. g. seminalibus vesiculis discissis, apparet facile, totum turbare generationis opus.

§. 167. **S**I vulnus oculo patet, ejus præsentia, & natura scitur 1. Sensu ipso, absterso impedimento conspectus, & suppressio cruoris fluxu. 2. Scientia anatomica vicinorum.

Summa imprimis hic cautela opus est Medico æque ac Chirurgo, qui ad vulneratum vocantur, ne de vulnere judicium ferant, priusquam omni cura illud examinaverint: quidquid enim tunc tumultuario consilio minus cauti pronuntiant, postea forte ad iudices deferetur. Si tunc infelix eventus periculosum fuisse vulnus prober, quod prima illa inspectione levioris momenti esse dixerant, Patro-

(a) Pag. 25.

(b) Epist. Anatom. ad Vir. Clar. Herm. Boerhaave pag. 55.

ni, qui rei causas agunt, postea Medico æque ac Chirurgo infamiae notam inurent, ac si illorum imprudentiae deberent imputari gravia illa mala, quæ vulnus inflic- tum secuta sunt. Chirurgi autem prudentiores plerumque solent tunc præsentem Medicum rogare, quid de vulnere & ejus effectibus metuendis sentiat; sicque cauti evitant famæ periculum. Utilissimum ergo erit, si illi, qui Medicinæ exer- cendæ se applicabunt aliquando, omnem arripiant avide occasionem, ut vulnera, & graviores operationes, sæpius videant; ut sic sensim assuecant intrepido animo hominum calamitates intueri. Non sine ratione Hippocrates dixit (*). *Medicus periculosa intuetur, ingrata contrectat, & ex aliorum calamitatibus proprias lucratur miseras, agrotantes vero per artem à maximis malis, morbis, doloribus, tristitia, morte per artem vindicantur.* Humani generis commoda, ex arte salutari nata, levant hæc tædia. Sæpe enim accidit, Medicos, fabricæ corporis humani peritissi- mos, vulneris aspectu, ejulatu adstantium, vulnerati querelis, sic turbari, ut titubantes longe aliud judicium ferant de vulnere, quam quidem tulissent, si pacata mente omnia considerassent.

Non ergo festinanter, sed summa cum animi attentione vulnus examinandum est.; prima enim deligatione hoc licebit, quod postea fieri commode non poterit. Sequentibus enim diebus sæpe vulnus sic tumebit, dolebit, inflammabitur, ut sine magna molestia & irritatione specillum ferre nequeat.

Si jam vulnus sit in tali corporis loco, qui oculo patet, auferenda sunt om- nia illa impedimenta de vulnere, quæ faciunt, ut minus distincte examinari possit. Aqua tepida, cum melle & vino, & pauculo salis marini, vulnus abluunt, con- creti sanguinis thrombos sic tollunt, ut tota superficies vulneris undique pateat. Quamdiu autem sanguis adhuc cum impetu de vulnere fluit, omnia sic inundan- tur, ut nihil distincti cernere liceat; hinc sanguinis fluxus coercendus: quod in artubus facile fit, idonea ligatura compressis vasorum truncis: in aliis locis cor- poris, nisi magna admodum vasa fuerint læsa, alcohole vini calido poterit com- pesci hæmorrhagia.

2. Sine hac enim scientia nihil certi determinari poterit. Inspectio enim vul- neris ejus magnitudinem, profunditatem, decursum docere poterit, cognitio au- tem partium, quæ in vulneris loco ponuntur, ex sola Anatome haberi potest. Fidelissimæ Eustachii tabulæ, in quibus arteriarum & venarum majorum nervo- rumque situs, uti & musculorum origines & decursus tam accurate notantur, summi hic usus esse poterunt, ut, cognito vulneris loco, possit determinari, quænam partes corporis per vulnus læsæ sint, & quodnam inde damnum metuen- dum sit.

§. 168. **V**ULNERIS autem absconditi præsentia, & natura noscitur. 1. Ex Scientia anatomica, situ vulnerandi, modo & vi inflictus. 2. Ex læsa actione sequente vulnus. 3. Ab excæteris, intra vel extra corpus expulsi. 4. Ab effectis superve- nientibus, dolore, singultu, spasmio, tumore &c.

Difficilior longe vulneris cognitio, ubi illud totum oculis lustrari nequit: ingres-

(*) De Flatibus in initio. Charter. Tom. VI. pag. 213.

sum instrumenti vulnerantis in externis integumentis videmus; quo usque tamen penetraverit, sæpe latet: multum tamen juvabit, si attendatur ad sequentia.

1. Ex Anatomica scientia partium novimus, quænam hic locentur partes; sed situs vulnerati illo momento, quo vulnus accepit, uti & ipsi situs vulnerantis, dum vulnus infixit, demonstrabunt viam, qua instrumentum vulnerans, penetravit versus interiora corporis. Si tunc simul adsit instrumentum vulnerans, poterit aliquando ex amplitudine vulneris integumentorum cognosci, ad quam profunditatem adactum fuerit. Omnia hæc sedulo merentur inquiri ex ipso vulnerato, vel illis, qui adfuerunt illo tempore, dum vulnus infligebatur. Si v. g. vulnus gladio inflictum intra sextam & septimam costam veram transiverit perpendiculari directione, penetrabit in abdominis cavum; si reclinato versus posteriora corpore homo vulnus acceperit, gladio ab inferioribus sursum adacto, poterit in thoracis cavum penetrasse. Si vero versus anteriora proclivi corpore gladius eodem loco penetraverit, poterit per totum abdomen ad pelvim usque pergere. Sic à latere inflictum vulnus potest longo satis itinere sub integumentis supra costas pergere, imprimis in obesis, nec penetrabit tamen in cavum thoracis. Quando jam vulnorum profunditas specillo explorabitur, conducit maxime cognoscere situm vulnerati, dum vulnus accepit, tuncque illum in eodem situ reponere: nisi enim hoc fiat, sæpissime accidet, ut panniculus adiposus viam obturet: sic in venæ sectione, imprimis in obesis, sæpe accidit, primo momento sanguinem pleno saltu exilire; mutato parum situ brachii, mox cessat sanguinis fluxus, pinguedine curi supposita se interponente inter aperturam venæ & cutis.

2. Dum ex Physiologicis cognoscimus illa, quæ requiruntur ad actionum singularum corporis integritatem, facile videmus ex actione post vulnus impedita, vel abolita penitus, an quædam, an vero omnia requisita ad actionem exercendam per vulnus sublata sint. V. g. si vulneri in cavum abdominis penetranti succedat illico actionum vitalium languor summus, cor palpitet celerrime, pulsus parvus, celer, inæqualis sit, pallor faciei & labiorum adsit, & frigus extremorum; concludimus, valis majoribus discissis sanguinis ingentem copiam in cavum abdominis effundi. Si vulnus collo inflictum, sine notabili hæmorrhagia, similia sequantur symptomata, metuimus, ne nervi hic decurrentes, qui vitalibus visceribus prospiciunt, læsi sint. Si post capitis vulnus eadem obtineant mala, cerebelli læsio, vel ab extravasatis humoribus compressio, adesse creditur. Si vulnera capitis omnium actionum animalium abolitio sequatur, eadem de cerebro timeamus. Si post vulnus dorso inflictum omnia infra posita sensu & motu privari observamus, spinalem medullam læsam esse concludimus. Idem de reliquis actionibus verum est.

3. Si post vulnus thoraci inflictum coccineus spumescens exit sanguis de vulnere, vel ore exspuitur, novimus pulmonis vasa discissa esse. Si ex vulnere abdominali chylus effluat, tenuis intestini læsio significatur, si fæces prodeant, crassi intestini vulnus indicatur; si sanguis emingatur, renes, ureteres vel vesicam læsam novimus &c.

4. Dolor ingens, subito natus post vulnus inflictum, denotat nervos, tendines, vel membranas tendinosas, aut nervosas, læsas esse. Singultus autem, à diversissimis partibus læsis, fieri poterit, uti & spasmus. Post validas hæmorrhagias singultus & convulsio sæpe oriuntur, illaque tunc admodum mala pronuntia-

vit Hippocrates in Coacis prænotionibus & Aphorismis. Ab ileo singultum ortum damnavit Hippocrates : hinc & intestinis vulneratis supervenire posse valde probabile est. Diaphragmatis , Œsophagi , ventriculi , capitis vulnera singultus sequitur. Hinc illud signum solum consideratum semper malignum vulneris effectum ostendit , non semper certo partem vulneratam indicat.

Tumores autem subitanei , vulnus sequentes , vel humores effusos , & in loco præternaturali collectos , designant , vel aerem per vulnus cava corporis loca ingressum , & mire dilatatum calore corporis. Dicitur postea de miris illis tumoribus vulnera pectoris sequentibus , dum aer panniculum adiposum ingressus immani tumore totam corporis externam superficiem distendit.

§. 169. **E**X cognitis (167. 168.) determinatur prævisus vulnerum eventus.

1. Mors , vel Vita vulnerati.
2. Sanatio possibilis , impossibilis , integra , pro parte.
3. Curatio facilis , difficilis , brevis , longa.
4. Effectus à vulnere , peracta sanatione , superstes futurus , ut tabes , insensibilitas , immobilitas , figura læsa. &c.

Postquam per adminicula artis hodie cognita , post debitum examen omnium illorum , quæ binis præcedentibus paragraphis dicta sunt , habetur vulneris diagnosis , quæ docet partem læsam & abolitas vel impeditas actiones corporis sani per vulnus ; tunc poterit prædicti vulneris eventus , & patebunt illa mala , quæ à vulnere ut causa sequi poterunt. Hæc vocatur vulnere Prognosis , in qua determinanda semper summa cautela opus est. *Est enim prudentis hominis , primum eum , qui servari non potest , non attingere , nec subire speciem ejus , ut occisi , quem fors ipsius interemit. Deinde , ubi gravis metus sine certa tamen desperatione est , indicare necessariis periclitantis , in difficili rem esse : ne , si victa ars malo fuerit , vel ignorasse , vel fefellisse videatur. Sed ut hæc prudenti viro conveniunt , sic rursus histrionis est , parvam rem attollere , quo plus præstitisse videatur (a).*

Animadversione tamen quam maxime dignum est , dari aliquando tales casus , in quibus vel Anatomes peritissimi fallerentur in determinandis partibus per vulnus læsis. Observatæ enim fuerunt frequenter viscerum internorum posituræ , diversissimæ à situ naturali , quem communiter obtinent. Accuratissimus MERY in militis defuncti cadavere mirabilem viscerum transpositionem invenit. Cordis basis sinistram partem respiciebat , apice in dextra parte thoracis hærente ; magnorum vasorum ex corde egressorum situs pari modo mutatus erat. In abdomine ventriculus sic positus erat , ut pylorus in sinistro latere hærens duodeno intestino continuaretur. Hepar sinistram hypochondrium , dextrum vero lien occupabat : intestinum cæcum & coli initium in sinistro ilio hærebant &c. (b). Simile exemplum & viderat celeberrimi Caroli Drelincurtii pater , ubi sedibus permutatis lien à dextris cesserat , hepar à sinistris (c).

(a) A. Corn. Celsi Medicin. Lib. V. cap. 16. | acta Lipsiens. 1690. pag. 405.

(c) Caroli Drelincurt. Opuscula pag. 721.

(b) Journal des Sçavans Janvier 1689. &

Hæc autem in sanis hominibus contigerunt, & à prima origine talis mutatio situs in visceribus obtinuit. Sed & per morbos frequenter mutari viscerum situm fidelibus constat observatis. Post frequentissimos vomitus in cadavere mulieris situs ventriculi imprimis, uti & aliorum viscerum abdominalium mire mutatus inveniebatur (a). Admodum verosimile videtur satis frequentes esse tales mutationes situs viscerum. In illis enim cadaveribus, quæ vel ipse dissecai, vel ab aliis dissecta vidi, plurima talia observare licuit. Vidi Lienem in pelvim prolapsum, ventriculi fundum infra umbilicum porrectum, coli intestini illam partem, quæ ventriculo subjacet, inde sic reflexam, ut infra umbilicum hæreret, arcum formans, cujus convexa pars pelvim, concava ventriculum respiciebat &c.

Erroris autem, qui inde in vulnere Prognosi contingunt, vix evitabiles videntur. Quis enim auderet talia prædicere, & quibus signis hoc posset cognosci?

Præterea peculiaris vulnerati idiosyncrasia plurimum mutare potest effectus vulneris inflicti. Sunt v. g. tam pusillanimes quidam, ut conspecto sanguine, licet alterius de vulnere fluat, mox in animi deliquium cadant. Unde Hippocrates (b) prudenter monuit, *multa vulnera in locis minime malis esse, & nullo modo gravia videri, sic tamen dolet plaga, ut respirare non possint: alii vero præ vulneris dolore, ubi nihil periculosi aderat, spiritum quidem duxerunt, verum delirarunt, & febricitantes mortui sunt. Quicumque enim aut corpus in febres pronum habent, vel mentes facile turbandas, talia patiuntur. Sed neque hac admirari oportet, neque formidare, illud expendendo, quod & anima & corpora hominum plurimum differunt, & vim maximam habent &c.*

Sub his ergo cautelis determinatur prognosis vulneris, in qua quæritur,

1. An nempe vulnus inflictum tale sit, ut pro effectus suo physico mortem faciat, nulla arte evitandam; an vero post vulnus vita superstes manere possit.

2. Sanatio vulneris dicitur, ubi partes, per causam vulnerantem separatæ à naturali cohæsiōe, iterum concresecunt simul unitæ. Si v. g. digitus sic dissectus fuerit transversim, ut exigua tantum cutis portione adhuc cohæreat, non poterit promitti talis vulneris sanatio: servari quidem poterit æger, sed mutilatus hac sui corporis parte. Præterea accidit sæpe, ut vulnere curato non restituantur usus omnes parti vulneratæ, quos in sanitate habebat; tunc non est sanatio integra, sed tantum pro parte. V. g. si insignis nervus discissus fuerit omnino per causam vulnerantem, vulneris talis sanatio integra nunquam erit; omnes enim illæ functiones partis vulneratæ, quæ à nervi discissi integritate pendeant, manebunt abolitæ.

3. Nisi enim hæc statim ab initio præmoneantur, culpa difficilis curæ, vel diu protractæ, in Chirurgum vel & Medicum conjicietur. Facilis autem cura dicitur, quæ sine multo ægri incommodo, & absque magno artis molimine perfici poterit. Dum v. g. tendo musculi erectoris pollicis discissus se subduxerit sub integumentis, non poterit hoc vulnus curari, & restitui usus naturalis huic parti læsæ, nisi, dilatato vulnere, tendinis abscissi extremum tenaculo prehensum protrahatur, & dein consuatur cum altero extremo: sed hæc non sine difficultate & dolore fieri possunt. Prudentia postulat, ut hæc non semper ægris revelentur, amicis tamen

(a) Academie des Sciences l'an 1716. Memoires pag. 238.

(b) Prothæticorum Lib. II. Charter. Tom. VIII. pag. 817.

vulnerati hæc omnia indicari debent , ne postea curationis molestæ tædia imputentur Chirurgo & Medico.

Ubi v. g. vulnus cum notabili substantiæ jactura inflictum est , dum acinace cutis & panniculi adiposi magna pars abscinditur , requiritur satis magnum temporis spatium , ut restituatur hoc perditum. Si simplex tantum divisio cutis & panniculi adiposi facta fuerit per instrumentum vulnerans , bene unitis ex artis præscripto labiis , brevi tempore poterit consolidari tale vulnus , si sanum vulnerati corpus fuerit : si autem notabili cacochymia laboret , longe tardius & multo difficilius cura perficietur. Hæc autem in vulnere Prognosi determinari debent , quia multorum animis hæc insedit opinio , ac si Chirurgi turpis lucri causa vulnere curam de industria protraherent ; quod ab honesti viri animo quam longissime abesse credere fas est.

4. Omni cura & ad hæc attendendum est. In vulneribus enim non lethalibus solent Judices pœnam statuere proportionalem damno , quod vulneratus ex vulnere inflicto ut causa recepit. Ideo Patroni , qui rei causam agunt , omni versutia , quæ sæpe nimis valent , solent culpam malorum , vulnus sequentium , imputare Chirurgo & Medico , qui vulnere curam gesserunt. Ideo in prima deligatione ex cognitione Anatomica partis , cui vulnus inflictum est , & ex functionibus læsis post vulnus acceptum , debent indicari mala illa , quæ hoc vulnus , quamvis optima arte curatum , sequuntur. Vel si non possit hoc tam certo determinari , saltem moneri debet , periculum esse , ne hoc vel illud damnum maneat post vulnere curationem. Nullibi enim iniquius agitur cum Chirurgis , quam in his casibus : curato enim vulnere si partis pristina mobilitas v. g. perierit , solent plerumque narrare , quis curaverit hoc vulnus , non quis inflixerit ; & summa injuria sæpe damni relictæ culpam in Chirurgum , non in percussorem , conjiciunt. Ubi ergo artetia , parti cuidam sola prospiciens , discissa est , atrophiam partis post curationem prædicimus futuram ; si nervus major ad partem tendens per vulnus destructus sit , insensibilitatem , immobilitatem sæpe , præsumimus &c. si vulnus non possit curari , nisi post diuturnam & validam suppurationem , (uti v. g. dum ossis læsi partes separari sensim debent) consumto sic panniculo adiposo , profundam & turpem futuram esse cicatricem præmonemus &c.

§. 170. **M**ORS inevitabilis à vulnere ex quinque effectis sequitur , adeoque necessario Lethalia vulnera (151.) Hæc sunt.

Enumerantur hac paragrapho illa vulnera , quæ inevitabili necessitate , nulla arte hætenus cognita superanda , tollunt illam corporis conditionem , quæ omnino requiritur , ut commercium mutuum inter mentem & corpus duret quodammodo , aut queat restitui utcumque , nec necesse sit id omnino tolli (a) : sed ex Physiologicis constat , absolute huc requiri actionem musculosam cordis , sanguinis in cor receptionem , & recepti ex corde expulsionem. Hinc numero 1^o. recensentur illa vulnera , quæ influxum liquidi nervosi , ad cordis actionem musculosam requisiti , tollunt ; 2^o. numero illa , quæ discissis cordis cavis impediunt ,

(a) Herm. Boerhaave Institut. Medic. §. 42.

quo minus sanguis corde contineri possit: 3^o. numero enumerantur illa vulnera, quæ efficiunt ut patulis vasis vulneratis effluens sanguis non redeat ad cor. Cum autem in homine nato cor dextrum non possit evacuare sanguinem suo cavo contentum nisi per pulmonem, & ad hoc requiratur ejus dilatatio per respirationem, ideo numero 4^o recensentur illa vulnera, quæ respirationem integre tollunt. Tandem cum inevitabili vitæ & sanitatis effectu, & ex humoribus, & de solidis partibus plurima pereant quotidie, requiritur ad constantiam vitæ, ut tot & talia in humoribus & solidis restituantur perpetuo, quot & qualia per ipsius vitæ ætuitatem perduntur. Horum autem omnium jactura restituitur ex ingestis alimentis per actiones naturales (vide §. 1.) in substantiam similem nostris partibus solidis & fluidis mutatis. Numero 5^o ergo recensentur illa vulnera, quæ integritatem partium, ad hoc opus absolute requisitarum, tollunt.

Ad hæc autem quinque capita reduci possunt omnia vulnera absolute lethalia.

1. Quæ influxum nervosi liquidi à Cerebello in Cor intercipiunt.

a. Cerebelli vulnera, & Cerebri, profunda adeo, ut medullam oblongatam lædant multum. β. Vasa sanguifera intra cranium soluta cum effuso cruore, qui pressione, vel concepta putredine vitam tollit, nec terebra levare potest ob conditionem loci, ut inferiora orbitæ Oculi, & ossis Temporum, ossis Ethmoidis, basios cranii &c. γ. Medullæ Spinalis superioris profunda vulnera. δ. Tum ea, quæ nervos cardiacos dissecant.

a. Cordis actio, cum verus sit musculus, illa omnia requirit, quæ & in aliis musculis corporis necessario adesse debere per experimenta novimus. Sed spirituum influxum per nervos in musculum requiri ad actionem ejus constat certis experimentis; idem ergo & in corde obtinebit. Præterea novimus ex Observatis Medicis, quod ubi a causis violentis externis effuso sanguine intra cranium, comprimitur tota cerebri moles, omnes sensus, & omnes motus, à voluntatis arbitrio pendentes, perfecte aboleantur: cordis tamen actio in initio talis mali insurgit potius, uti docet pulsus robur & celeritas in Apoplecticis. Sed ex Anatomicis notum est, cerebellum tutissime defendi, cerebro subjacens, & tectum expanso illo duræ matris velo, non tam facile posse comprimi ab effusis humoribus, quam ipsum cerebrum. Ubi autem eadem illæ causæ pergentes vel auctæ incipiunt ipsum cerebellum comprimere, (quod solidioris fabricæ cum sit, ideo etiam magis resistit causis comprimentibus) tunc cordis actio cessat, & vita perit. Unde novimus, cerebellum per nervos dare spiritus requisitos ad motum muscularem cordis. Vulnera ergo, ipsum cerebellum insigniter lædencia, vel & penitus destruencia, merito pro lethalibus habentur.

Experimenta in vivis animalibus capta hanc rem confirmant. Cani majori cerebrum tesselatim dissecabatur fere per integram horam; moriebatur ipso momento, dum lædebatur cerebellum (a). *Dum capite canis per superidra aperto, cerebellum in frustula secatur, & è calvaria eximitur, illico fere moritur canis; etiamsi cerebrum*

(a) Perrault Méchanique des Animaux partie 1. chap 7. pag. 403.

& *medulla oblongata caudex nequaquam ledantur* (a). In catellis junioribus, quibus calvaria adhuc mollior, & futurae hiscentes, per futuram sagittalem adigendo cullellum in cerebellum idem experimentum tenuit Bohnius, viditque eisdem, post leviores partium externarum concussiones, expirasse; remota vero calvaria apparuit, in uno totam fere illius compagem perforasse, in altero ad medullasum ejus nucleum tantum penetrasse instrumentum (b).

Nec obstat vulnere cerebelli lethalitati, quod in recens natis catellis, capite detruncato, cordis motum, systole & diastole rite alternantibus, plurimis horis integrum perstitisse viderit Wepferus (c). Agitur enim hic de durabili vitae actione, non de mira illa cordis proprietate, qua etiam corpore exemptum motum suum continuat post mortem ipsam, uti dictum §. 1. Magnus enim ille Vir ex his experimentis minime deducere voluit aliquam conclusionem, quae repugnet prioribus observatis; uti ipse eodem loco testatur.

Cum autem ex Anatomicis constet, ex cerebello nullum derivari nervum, sed totam cerebelli substantiam medullarem collectam abire in medullam oblongatam, ex qua postea nervi prodeunt; satis patet, hujus oblongatae medullae insignes lésiones mortem certo effectu producere. Si jam simul consideretur, ipsum cerebellum, & medullam oblongatam, tam tuto recondi, ut vulnerari nequeant sine insigni lésione cerebri ipsius, magnorum vasorum, musculorum &c. magis adhuc patebit horum vulnere lethalitas.

Cerebri autem ipsius vulnera, quamvis maxima fuerint, non semper lethalia esse, docent observata plurima; de quibus postea dicetur in vulneribus capitis.

¶ Dum vasa sanguifera arteriosa, vel & venosa majora, à quacumque causa rumpuntur, effundunt contentum sanguinem, uti & illum qui continuo vi cordis per hæc vasa integra fluxisset: sed cranii durum os cedere nequit, & naturaliter encephalon totum calvariae cavum exactissime replet; ideo sanguis effusus debet necessario comprimere omnia illa, quae calvariae cavo continentur: unde statim ab effusis intra cranium humoribus cerebri functiones incipiunt aboleri; & postea, eadem causa pergente, & cerebellum & oblongata medulla comprimuntur, & vita inde pendens tollitur. Si jam effusus vasis fractis sanguis non fuerit tanta copia, ut compressione tollere possit cerebri, & cerebelli, & medullae oblongatae actionem, poterit tamen nocere alio modo. Humores enim corporis humani, extra vasa sua effusi, spontanea degeneratione corrumpuntur; tardius quidem, ubi omnis aëri accessus denegatur; sed tandem tamen etiam putrescunt, acres fiunt, tenerrimam encephali fabricam rodendo, inflammando, suppurando destruunt & consumunt. Unde tot Exempla apud Observatores habentur, quae probant, vulnera & contusiones capitis, quae vix ullius momenti habebantur, post longum satis temporis intervallum, subito mortem induxisse. In cadaveribus apparebat copia ichorosa vel purulenta materiae, & saepe notabilis consumptio encephali inde facta. Exempla hujus videri possunt apud Bonetum (d).

Præcipua ergo in talibus casibus curæ spes ponitur in perterebratione cranii, ut liber exitus concilietur effusis humoribus. Sed si talis sit loci vulnerati conditio,

(a) Raymundi Vieussens Neurographia universalis Lib. I. cap. 20. pag. 123.

(b) D. Johannis Bohnii de Renunciatione vulnere &c. pag. 169.

(c) Cicutæ Aquaticæ Historia & noxæ p. 91.

(d) Sepulchret. sive Anatom. practic. Tom. III. pag. 318. 319. 320. &c.

ut hanc operationem non admittat , mors sequetur inevitabilis ; talia autem loca sunt imprimis sequentia.

INFERIORA ORBITÆ OCULI. Illa nempe pars orbitæ oculi , quæ calvariæ fundi maximam partem constituit , & quæ inferiorem situm habet , si spectetur calvaria , sed orbitæ oculi lacunar superius facit. Hæc enim orbitæ pars ab ossis frontis lamella sit , quæ in plurimis locis adeo tenuis est , ut in mundatis calvariis pelluceat , & nequidem unguis crassitiem habeat. Hæc autem lamella , cui cerebri anteriores lobi incumbunt , & satis magna vasa sanguifera , ob tenuitatem summam levi vulnere facile perforatur , effusus sanguis sub cerebro in ipsa basi calvariæ hæret , hinc terebra educi nequit. Unde apparet , quam periculosa sint vulnera huic parti infligta. Vulnerabatur homo baculi extremo non admodum acuto in oculi sinistri orbita : illis , qui curationi præerant , videbatur exigui momenti vulnus : brevi tamen postea periit vulneratus. Publica auctoritate dum inquirerebatur mortis causa , cranio ferra diviso , apparuit vulnus sat profunde penetrasse ipsum cerebrum (a).

OSSIS TEMPORUM. Foveæ in calvariis mundatis apparentes , arteriarum duræ matris pulsu excavatæ , demonstrant , circa tempora satis notabiles arterias decurrere : his ergo læsis , sanguis effusus declivi via versus basim calvariæ tendet : & ob musculos ingentes temporales hic positos , non datur terebrationi locus ; omnia ergo illa mala metuenda , quæ ab effusis humoribus , compressione vel corruptione nocentibus , expectanda sunt.

OSSIS ETHMOIDIS. Forte primo aspectu videretur , adeo tuto reconditum hoc os , non facile lædi posse ; sed si reclinato versus posteriora capite gladius acutus per nares sursum adigatur , poterit eo usque facile penetrare. Præterea si laterali orbitæ oculi parti versus nasum infligatur vulnus , poterit levi vi lamellam illam ossis ethmoidis , quæ orbitæ oculi partem constituit , & os planum dicitur , perforare , & sic in calvariæ cavum pergere. Talem casum habet Bonetus (b) ubi Juris Studiosus infra orbitam sinistri oculi ense punctim vulneratus fuit , & post 24 horas apoplecticus mortuus est. Aperto cadavere apparuit , vulnus per orbitam oculi & os ethmoides prope cristam galli penetrasse in dextrum cerebri ventriculum : basis cerebri , & cerebelli regio , copioso sanguine extravasato referta erant. Apparet facile , nullam superesse in tali casu medelam.

Reliqua autem , quæ basim cranii penetrant , vulnera ob easdem rationes inevitabili effectu mortem adferunt.

3. Postquam ex medulla oblongata novem paria nervorum intra cranium secesserunt , omnis reliqua medulla cerebri & cerebelli simul collecta in unum caudicem , vertebrarum theca tuto defensa , porrigitur ad os sacrum usque. Ex hac medulla spinali omnia capiti subjecta membra , & plurima viscera , pro magna parte suos nervos accipiunt : si ergo in superiori loco spinalis medulla vulnere satis profundo lædatur , destruitur medullaris ejus substantia , & omnis actio cerebri & cerebelli in subjectas partes tollitur ; quatenus nempe ab harum fibrarum medullarium integritate pender. Par enim octavum , vagum dictum , & nervus intercostalis , altiori loco ex ipsa medulla oblongata intra cranii cavum orta , plurimis visceribus

(a) Frederici Ruyschii Observat. Anatom. Chirurg. Centuria. Observatione 54.

(b) Sepulchret. sive Anatom. pract. Tom. III. pag. 317.

vitalibus prospiciunt. Hinc à tali vulnere non quidem in instanti mors sequitur, tamen tales vulnerati omnes pereunt majori vel minori temporis intervallo, prout vel profundius læsa fuerit medulla, vel altiori in loco. Ratio facile patet: tota enim cerebri & cerebelli moles sua fabrica à sanguine arterioso secernit subtilissimum illud liquidum, quod dein secretum per medullares fibras, & nervos his fibris collectis constantes, deferretur ad omnia & singula corporis loca. Dum igitur, manente eadem copia liquidi allati ad organum secernens illæsum, destruitur tantus numerus canalium, qui secretum liquidum continere & deferre debebant ad loca debita, sequitur debere turbari, & tandem destrui functionem ipsius organi secernentis. Accedit, simul & lædi plerumque magna satis vasa sanguinea; unde effusi humores facile in cranii cavum reascendunt, impleta prius vertebrarum theca. Lethalem autem talium vulnerum eventum docuerunt Observata Medica.

Rusticus ex arbore decidit, cervicis vertebram secundam prope atlantem luxatam habuit (ut postea in cadavere apparuit) hoc modo per quamplurimos dies vixit, dein mortuus. Alii tamen in simili casu brevi temporis spatio mortui fuerunt (a).

Sennertus (b) dicit, se novisse lanium quemdam, qui boves mactaturus, eos non securi, quod vulgo fieri solet, percutiebat, sed exiguum cultellum eo in loco, quo caput vertebrae colli conjungitur, in spinalem medullam adigebat; unde bos attonitus quasi statim concidebat. Idem jam Galenus notat, quod tauri, quibus spinalis medullæ origo juxta primam vertebram quotidie dissecatur, statim procumbant, pereunte simul cum sectione & respiratione, & voce.

In junioribus canibus simile experimentum institutum parem successum habuit.

Hippocrates (c) spinalis medullæ vulnera lethalia pronuntiavit. Et alibi (d) dicit: medulla spina si agrotaverit, sive ex lapsu, sive ex alia aliqua causa, sive sponte; homo & cruribus impotens fit, ut neque, si tangatur, percipiat, neque ventre aut vesica circa prima tempora stercus vel urinam egerat, nisi coactus. Quum autem vetustior factus fuerit morbus, non urgente homine & stercus prodit, & urina. Moritur autem post hac non multo tempore interposito. In hoc autem loco patet, quod agatur de læsione medullæ spinalis in loco inferiori, & tamen mortem inde futuram præfagit. Summum etiam tunc periculum adesse probant bina Exempla recensita in illis, quæ dicta sunt ad finem §. 162. Quosdam tamen evasisse, vel saltem miserrimam vitam diu protraxisse in simili casu, ubi circa vertebrae lumborum luxatio facta medullam compresserat, docet Hildanus (e) binis Exemplis. In uno casu abscessu facto & ulcere fistuloso relicto, symptomata remiserunt plurima, sic ut alvum & urinam postea continere potuerit; sed ab umbilico omnia inferiora sensu omni & motu erant privata; sicque per annos aliquot vixit. Qualis autem tandem fuerit exitus, sibi non constituisse affirmat Hildanus. In altero casu secunda vertebra lumborum intropulsa erat, cum paralyti inferiorum, & resolutione sphincterum ani & vesicæ. Juvenis cum esset, & optimo corporis habitu præditus, post annum sensus rediit, & aliquis motus. Qualis autem fuerit eventus tandem, non notat auctor.

(a) Bonet Sepulchret. sive Anatom. pract. Tom. III. pag. 427.

(b) Tom. III. Lib. V. part. 4. cap. 3. pag. 371. Galen. de Hippocr. & Platon. placitis Lib. II. cap. 4. in fine. Charter. Tom. V. pag. 97.

(c) De morbis Lib. I. Charter. Tom. VII. pag. 532.

(d) Protrhetico Lib. II. cap. 11. Charter. Tom. VIII. pag. 819.

(e) Observat. Chirurg. cent. V. p. 458. 459.

Ex notabili autem læsione medullæ spinalis superioris evasisse aliquem, quantum novi, non constat ullis observatis.

1. Per nervos cardiacos enim defertur tenuissimum illud fluidum, cerebelli fabrica separatum, à purissimo sanguine arterioso, quod requiritur ad motum muscularem cordis.

Cor in Pericardio hæret liberum, nulli parti nexum, nisi vasis, quæ cor ingrediuntur, vel ex corde exeunt. Omnia jam hæc vasa, quibus cor nectitur, in Pericardio libera sunt, mobilia, nulli parti vicinæ accreta. Nervi ergo, qui cordis substantiam ingredientur, debent una cum vasis, quibus cor nectitur, ad cor deferri. Cor enim nulli alteri parti in Pericardio cohæret. Hinc nervi ad cor pertingentes non hærent liberi, uti ex tabulis Anatomicis quis credere posset; sed applicati manent venis, quæ cordis cavis sanguinem immittunt, & arteriis, quæ sanguinem cordis cavis expulsum excipiunt. Ex qua nervorum ad cor tendentium mirabili positura in Physiologicis explicatur cordis systole & diastole; dum eadem causa, quæ motum cordis facit, momento post motum factum destruit necessitate fabricæ: unde uno momento vitæ cor fulmineo quasi spasmo contrahitur, momento sequenti perfecte paralyticum fit.

Patet hinc, nervos cardiacos in cordis vicinia non posse lædi per vulnera, quin simul lædatur maximorum vasorum integritas circa cor; tuncque mors vulnus tale sequeretur inevitabilis ex læsione horum vasorum. Hic autem consideratur sola læsio nervorum cordis. Sed Anatomicæ observationes docuerunt, omnes nervos, qui ad cor perveniunt, ortum ducere à pari octavo, nervis intercostalibus, vel & nervis recurrentibus. Sed nervorum horum trunci possunt in suo decursu lædi, sicque aboleri horum nervorum effectus, quem cordi præstant.

Willisius (a) cani vivo, circa jugulum cute discissa, utrique paris vagi trunco ligaturam injecit strictissimam: mox torpuit animal, & obinuit; & circa hypocondria motus convulsivos cum magno tremore passum est. Hoc affectu postea brevi cessante, quasi moribundum jacuit, alimenta respuens: vixit tamen, iidem nervis penitus discissis, postea per plures dies, donec inedia fere exstingeretur.

Cadavere tamen aperto, sanguis intra cordis ventriculos, & vasa majora coagulatus admodum in grumos concreverat. Sed per inediam necatis animalibus talia sanguinis coagula non inveniuntur. Causam vitæ tamdiu adhuc protractæ Willisius ipse à ramulis nervi recurrentis & intercostalis ad cor tendentibus deduxit.

Idem Experimentum & Lowerus sumsit, & observavit, statim cor palpitare & contremiscere: atque sic per diem unum aut alterum miserum animal, corde tremulo, pectore admodum suspirioso, languidam vitam protrahit, & tandem expirat. Tantam autem angustiam patitur animal, ut coerceri nequeat, nisi firmissimis vinculis cohibeatur (b). Bohnius tamen affirmat, animal, quod huic martyrio philosophico exponebat, fulmine quasi tactum à constrictis funiculis exspirasse (c). Nervis paris octavi, una cum nervis par intercostale constituentibus, circa cervicem ex transverso recisis, animal illico languore, futuræ mortis prænuncio, afficitur, tremulos motus patitur, vires illius sensim labascunt; & intra viginti circiter horas vita destituitur. (d). Idem experimentum feci in cane, ligans

(a) Cerebri Anatome pag. 324.

(b) Lowerus de corde pag. 90 91.

(c) Johan. Bohnii circulus Anatomico-Phy-

siologicus &c. pag. 96.

(d) Vieussens Neurographia pag. 179.

in utroque colli latere per octavum & intercostale: nullum edebat amplius ejulatum, sed summo nixu aliquid sonori edebat satis obscuri; per intervalla temporis immani furore & anxietate corripiebatur, omnia obvia mordens summa cum ferocia. Antequam autem talis insultus acideret, prius incipiebat nasi apex miro modo corrugari. A sexta vespertina ad undecimam noctis horam sic vixit; sequenti mane jam inveni mortuum.

Ex omnibus his patet, nervis cardiacis in animali vivo discissis, mortem secutam fuisse citius vel serius, & animal statim quasi agone mortis laborasse; qui sit à corde non amplius valente expellere contentum suis cavis sanguinem. Sed observamus in morbis aliquando per biduum & ultra homines in tali agonia hærere, sanguine non potente transpirari per arterias obstructas. Idem videtur etiam contigisse in his animalibus, quæ, nervis his ligatis vel discissis, diutius vitam protraxerunt. Forte etiam alii nervuli per cordis substantiam distributi adhuc vitalem motum tam diu sustinebant: sic inventus fuit ramus nervi notabilis ex plexu gangliiformi semilunari Vieussentii ortus, prope magnum plexum mesentericum, ex abdomine in pectus ascendens, & auriculæ dextræ & cordis basi insertus (a). An insita cordi mirabilis proprietas, qua etiam rescissum ab omnibus vasis valet motum suum continuare, potuit adhuc producere vitam destructis nervis cardiacis? de hac autem cordis irritabilitate dictum §. 1.

Sic per experimenta apparuit, quid fiat in brutis à dissectis nervis cardiacis. In hominibus autem rarissime contingit, truncos octavi paris aut intercostalium nervorum lædi, quin simul tollatur integritas vasorum adjacentium; quorum læsio sola mortem inferre potest. Carotidum enim trunci, & jugulares magnæ venæ incumbunt in collo his nervis; & posterius laterales vertebrarum processus cavent ne facile lædantur. Nec memini, me apud Observatores Medicos aut Chirurgicos legisse exemplum ullum, quod doceret nervos cardiacos solos læsos fuisse.

2. Quæ sanguinem Cordis effundunt ex ejus cavis vulneratis; unde vulnera Cordis profunda, in cava penetrantia, lethalia.

Cum cor sit musculus semper motus, cujus omnes partes sic conspirant, sic uniuntur, ut una alterius officio carere nequeat, & sit fons vitæ, unde dimanant omnia; veteres Græci, & Arabum plurimi, dixerunt, quod vulnera cordis sint certo & cito lethalia. Sed videntur hæc dixisse potius ex hypothese, quam ex rerum experimentis.

Mirabilia quædam habentur apud Auctores Exempla, quæ, si vera forent, probarent sine corde vixisse animalia. Cæsari Dictatori, quo die primum veste purpurea processit, atque in sella aurea sedit, sacrificanti bis in extis defuit cor (b). Cæsari immolanti cor hostiæ non apparuisse; idque pro tetra ostento habitum, neque enim consistere naturaliter animal sine corde posse, narrat Plutarchus (c). Idem & Suetonius (d) in vita Cæsaris habet. Sed Haruspices audacter imponebant sæpe credulis, ut pro lubitu de rebus gerendis decernerent. Hinc suspecta admodum fidei hæc testimonia sunt, cum adeo repugnent cognitæ animalium Œconomia.

(a) Acad. des Sciences l'an 1734 Hist. p. 60. | (c) In vita Cæsaris pag. 737.

(b) C. Plinii Secundi Lib. XI. cap. 37 p. 184 | (d) Cap. 77.

Vix enim credibile videtur, cor unquam in homine, vel aliis animalibus de-
fuisse; sed incautos decipere potuit, situs, figuræ magnitudinis &c. cordis adeo
Insignis varietas, aliquando per morbos inducta: uti in observatis Medicis habe-
tur.

Celeberrimo tamen horum Aphorismorum Auctori communicata fuit vigesimo hu-
jus sæculi anno mirabilis observatio à Clarissimo Anatomico Edinburgensi, quæ do-
cet, posse existere monstra in rerum natura, quæ omnem scientiam usus partium
turbant. Inquirebat Eximius ille Vir vasa seminalia in sorice majore vivo & agilissimo;
apparebat ren dexter duplex, sed aperta capsula tegentē, apparuit verus ren
dexter: alterum illud, quod renem simulabat, corpus, proprio sacculo inclusum,
habebat talem magnitudinem & figuram, qualem cor in hoc animali habere solet;
basi sua corporis superiora, apice autem inferiora spectabat. Cor hoc omni cura
examinatum habebat duos ventriculos, septo medio separatos, & auriculam sini-
stram; aderant valvulæ cordis & columnæ carnez; de cætero nullum auriculæ dex-
træ, nec venæ cavæ, nec pulmonarium venarum vel arteriarum, aut aortæ ves-
tigium. Aperto thorace, nec pericardium, nec cor invenitur; sed ex ipsis thoracis
vertebris, loco inter binos pulmones medio, emergebat auricula dextra: ex hac
exibant arteriæ pulmonales. Vasa, quæ sanguinem reducant à pulmone, uniebant-
ur in unum truncum, qui erat aorta; quæ deinde distribuebatur solito more. Hoc
animal adultum erat, reliqua viscera bene formata habebat; cor quidem aderat,
sed aberrans & inutile, instructum tamen solitis partibus. Sine actione cordis ergo
animal vegetum & agilissimum vixit.

Corde exsecto, animalia quædam vixisse adhuc aliquo tempore, testantur satis
fidelia observata. In sacrificiis corde ex animalibus evulso, & jam aris imposito,
respirant, clamant fortiter, imo aufugiunt; donec sanguinis profluvio moriantur.
(a) Thorace vivi animalis aperto, vinculo cordis basi circumjecto constringeban-
tur omnia cordis vasa; dein sub vinculo cor totum rescindebatur celerrime; solu-
tis dein laqueis, quibus animal colligatum erat, vidit Vesalius canes, sed præci-
pue feles, aliquo usque concurrisse (b). In catulis vivæ canis utero exsectis, ab-
scisso corde, vita supererat per quadrantem horæ, cum motu sensibili membrorum,
& quadam adhuc sibilantis vagitus specie. Ex Zoologia porro constat, vermes, &
animalia, quæ ad hoc genus proxime referuntur, corde exsecto, vixisse diutissime:
imo & talibus animalibus in partes dissectis, singula segmenta per notabile tempo-
ris spatium vitam continuant. Sed ex Malpighii & Leeuwenhoekii observatis con-
stat, animalia in prima origine sua vermis vitam vixisse: hinc forte in animalibus,
quamdiu in utero hærent, aliquid de antiqua illa vitæ tenacitate superest. Rana,
corde excisso, saltabat, aquæ injecta natabat; imo summa agilitate exsiliens de
vasculo aqua pleno per conclave saltare pergebat per horæ spatium, & amplius (c).

Homini vivo cor excindebatur à carnifice: dumque illud jam carnifex manu te-
neret, tria aut quatuor precum verba auditus est proferre; (d) sed monet ibidem
magnus vir, amicos rei carnifici mercedem dare, ut subitissime hæc peragat, & mi-
serum ab his cruciatibus liberet. Hinc non adeo mirum videtur, quod dum
frigus insolitum vasa discissa parum stringeret, & ultimis illis vitæ momentis inten-

(a) Galen. de Hippoc. & Platon. placitis
Lib. II. Cap. 4. in sue. Charter. Tom. V. p. 97.

(b) Vesal. pag. 570.

(c) Boyle de utilitate Philosophiæ Experi-
mentalis pag. 113.

(d) Verulam. Histor. vitæ & mortis p. 552.

tissima esset dispositio omnium organorum animalium, aliqua adhuc pressio sanguinis per pauca momenta in cerebrum egerit, per quam in sic dispositis organis ultimo illo nixu perrexerit loquela per tantillum temporis spatium: si simul consideretur, pulmones, aperto thorace collapsos, & insolito frigore aëris undique contractos, contentum aerem expulisse satis valida vi. Non videtur ergo hoc experimentum adeo repugnare cordis necessitati. In experimento autem Vesaliano ligatis omnibus vasis, arteriæ contractiles, elasticitate per frigus admissum aucta, poterant sanguinem per cerebrum cerebellum &c. pellere, & hinc vitam diutius continuare.

Illa autem experimenta, in ranis capta, uti & plurima similia in viperis, testudine &c. quæ docent, hæc animalia corde exempto satis diu vivere posse, demonstrant, modum vivendi in animalibus non posse adeo generalibus regulis limitari; sed illum varium esse in diversis, sic ut non facile sit historiam vitæ generalem condere, sed possimus tantum notare experimenta.

Nullis autem certis observatis constitit, cor unquam in homine defecisse; vel cordis fabrica penitus destructa, notabili tempore supervixisse hominem. Unde satis patet ratio, quare cordis vulnera majoris momenti merito ut lethalia considerari mereantur. Non omnia tamen vulnera cordis lethalia esse, & differre plurimum inter se, prout variis cordis partibus infliguntur, certum est.

Si enim per vulnus arteriæ vel venæ coronariæ truncus in basi cordis discissus fuerit, mors videtur inevitabilis, & cito quidem secutura; quia impetu omnium maximo aortæ contractione validissima sanguis per arteriam coronariam per cordis substantiam musculosam transprimitur, per venas citissime rediens; singulis enim cordis contractionibus totum cor pallet, expresso omni sanguine, momento post, dum cor est in diastole, tota cordis substantia repletur in omnibus vasis.

Si vero vulnus dextrum ventriculorum cordis in cavum usque penetraverit, effundetur sanguis partim ex laceratis vasis ipsius substantiæ cordis, partim ex ipso cordis cavo in pericardium; & ex pericardio in thoracis cavum, vel exibat de vulnere externo. Vulnus illud dilatabitur, dum cor impletur: illo enim tempore, quo cor constringitur, partes vulneratæ ad se mutuo accedunt potius, nec fiet hoc tempore magna sanguinis effusio. Interim effuso sanguine, debilitabuntur vires, superstitæ tamen adhuc cordis actione, & manente vita. Sed dum adest summa debilitas, cor fere quiescit; si tunc simul nullus fiat motus muscularis, sanguis venosus sedatissimo motu & minima copia influet. Si tunc simul abstinenceatur ab illis, quæ copiam sanguinis per nutritionem subito augent, & omnia cardiaca dicta, quæ semper motum suis stimulis augent, evitentur sedulo, videtur tunc vita posse servari, & sanitas restitui. Nisi enim in vulneratis, & in abortum passis foeminis, exempla docuissent practica, nemo crederet, quam parca copia, & parvo motu sanguinis, homo posset vivere. Sic enim per validam hæmorrhagiam minuta quam maxime sanguinis copia, & projectis viribus, vulnus factum vix amplius dilatatur, incipiunt nasci concretionis rudimenta, & paulatim perfici; modo caveatur, ne aucta copia vel motu sanguinis, disrumpantur illa, quæ jam inceperant concrelescere.

Præterea in vulneribus cordis dextri hoc notandum, quod pulmo pergat agere; & sua dilatatione facillimam viam paret sanguini ex corde dextro pellendo. Hinc systoles tempore ob liberum per pulmones iter, non exprimetur tanta copia sanguinis per vulnus factum. Ideo major adhuc vulneris consolidationi nascitur opportunitas.

Cordis vero sinistri vulnera longe adhuc videntur esse periculosiora. Si enim venterculus sinister cordis latus fuerit, nec tamen integre perfossus, vulnus illud dilacerari debet necessario, dum cor sinistrum validissima vi muscolari, qua dextrum cor tam multum superat, contentum sanguinem premit in aortam adeo resistentem, illamque & omnes ejus ramos per universum corpus dilatat. Fibrae enim cordis sinistri tunc supra contentum sanguinem & resistentem distrahuntur, hinc vulnus augebitur, donec in cavum cordis penetrans viam faciat sanguini huc facilius exeunti, quam per aortam resistentem; vel si aliqua consolidatio hic fieri incipiat, summus metus est, ne locus ille debilior in aneurismaticum tumorem extendatur, sicque turbetur cordis actio; & vita quidem protrahatur, sed non nisi cum summis ærumnis, morte sola terminandis.

Si vero cor sinistrum patulo vulnere in cavum penetrante perforetur, mors cita ac certa sequetur. Omnium autem subitissime lethale videtur fore tale vulnus, quod aortae ipsius principium immediate supra valvulas discinderet. Corde autem sinistro perfosso, valvulae aortae sustinent sanguinem in arteriis contentum; hinc totum systema arteriosum plenum manet, arteriae deinde contractae sanguinem promoveant; sicque vita aliquo tempore adhuc sustineri posset.

Observationes quoque Medicae docuerunt, post vulnera cordis saepe adhuc notabili tempore vixisse homines; imprimis corde dextro solo perfosso. Imo quaedam observata docuerunt, possibilem esse consolidationem vulnerum cordis.

Juvenis amicum cultro transfixit inter tertiam & quartam costam sinistram: vulneratus ex suburbio domum pedibus ivit, & per quinque dies supervixit. Aperto cadavere apparuit, vulnus sub sternum cordis ventriculum dextrum penetrasse foramine angusto & obliquo (a).

Ingolstadii studiosus, à typographo punctum latus in sinistra parte thoracis, placentae satis longae spatium cursu confecit; mente porro & sensibus integerrimis ferme per horam integram ita constitit, ut loqui & Deo se commendare potuerit. Aperto cadavere Medici Professores omnes, & alii spectatores viderunt, vulnus ipsam cordis substantiam, & utrumque ejus ventriculum transversim penetrasse, sic ut instrumenti vulnerantis genus ex vulneris forma dignoscere & in judicio explicare potuerint (b).

Nobilis vir in singulari certamine sub mamma sinistra vulneratur gladio; post vulnus acceptum pergit pugnare, fugientem hostem per ducentos passus prosequitur, tuncque mortuus procidit. In cadavere invenitur vulnus cordis substantiam penetrans, quod digitum caperet, & magna copia sanguinis effusi Diaphragmati incumbens (c).

Serenissimus Daniae Rex in venatu cervum sclopeto trajecit: accepto vulnere, animal quinquaginta passus conficit, antequam concideret. Cor à venatoribus extractum lustrans Regius Archiater, tunc praesens, invenit per utrumque ventriculum ponderoso globulo trajectum, sic ut vulnus trium digitorum apices admitteret (d).

In cadavere hominis, olim thoracem vulnerati, vidit Chirurgus cicatricem vulneris cono cordis inflicti (e).

(a) Thom. Barthol. Histor. Anatom. rarior. Centur. 1. Histor. 77.

(b) Schenckii Observat. Medic. rariores pag. 275.

(c) Parvus Lib. X. cap. 32.

(d) Thom. Barthol. Histor. Anatom. rarior. Centur. 1. Histor. 77.

(e) Act. Lipsiens. An. 1705. pag. 237. ex Celeberrimi Chirurgi Wolfii Observatione posthuma 21.

In apris, canibus, cervis in venatu & domesticis observationibus inventæ fuerunt cicatrices vulnerum cordis sanatorum, & glandes plumbeæ diu ibi relictæ. Plurima talia habentur observata, quorum collectionem vide (4).

Ex omnibus his concludere licet, vulnera cordis esse semper periculosissima; tamen non semper subito, nec certo lethalia. Simul patet, nequidem in periculosissimis vulneribus semper desperandum esse, sæpe enim, dum vita debilissima sustinetur tantum, possunt fieri consolidationes vulnerum, de quibus nullus cogitasset, quod possibiles forent.

3. Quæ cruorem à corde, & à cerebro, cerebelloque derivant vel in cava corporis, vel extra illud, neque Medelam capere possunt ob situm loci. Ut magna vulnera Pulmonis, Hepatis, Lienis, Renum, Pancreatis, Mesenterii, Stomachi, Intestinorum, Uteri in gravidis, Vesicæ circa arterias ejus majores, Aortæ, Carotidum, Vertebrælium & similium arteriarum, venarumque.

Prioribus numeris hujus paragraphi demonstratum fuit, vulnera illa lethalia esse; quæ cerebelli fabricam destruunt, vel læsis medulla oblongata, & ipsa medulla spinali in loco altiori, aut ipsis nervis cardiacis, impediunt, quo minus vitalis influxus spirituum, fabrica cerebelli à sanguine secretorum, in cor & alias corporis partes perficiat illa, quæ ad vitam requiruntur. Sed ut per cerebelli fabricam separentur illi spiritus vitales, requiritur, ut sanguis cordis vi musculari pellatur in arterias; hinc & vulnera profunda, cordis cava penetrantia, lethalia judicantur. Tota autem cordis actio consistit in eo, ut sanguinem per venas advectum recipiat, receptum autem propellat in arterias: omnia ergo vulnera, quæ sic lædunt vasa, quæ sanguinem ad cor deducunt, vel & illa, quæ sanguinem corde expulsum recipiunt, ut sanguis per apertum vulnus extra corpus fluat, vel in cavis corporis accumuletur extravasatus, neque redeat iterum ad cor, impediunt, quo minus sanguis debita copia & impetu requisito prematur per arterias encephali; unde necessario omnes functiones cerebri & cerebelli turbantur, & tandem penitus abolentur. Nec refert, an vasa lædantur in suo decursu, antequam per viscera dispergantur, quorum fabricam constituunt; an vero in ipsis visceribus lædantur simili cum effectu, nempe sanguinis vitalis effusione tam notabili, quæ lædat cordis & cerebelli actionem. Non omnia ergo viscerum & vasorum vulnera, quæ hac paragrapho recensentur, absolute lethalia sunt, nisi sub hac limitatione. Præterea requiritur, ut talis vulneris facti sit conditio, ut ligatura, nec aliis artis auxiliis, non possit impediri sanguinis effluxus. Inter hæc vulnera primo recensentur.

MAGNA VULNERA PULMONIS. Omnem sanguinem totius corporis per venas allatum cor dextrum accipit, illumque propellit per pulmonem in cor sinistrum: dum ergo lato vulnere læditur pulmo, sanguis, vicini adeo cordis vi pressus, exhibet per vasa discissa; hinc non redibit ad cor sinistrum, sed per vulnus factum effluet; vel in aëreum cavum pulmonis transiens undatim eructabitur; vel tandem effusus in pectoris cavum, pulmonis liberam expansionem impedit. Apparet hinc facile lethalis talium vulnerum effectus.

(4) Miscell. Cur. decur. 2. Ao. 6. pag. 166. &c.

Observata jam Medica funestum eventum vulnerum pulmonis evincunt. Chartacea glande sclopeto expulsa trajectum pectus fuerat, cum pulmonis sinistri ejusque vasorum insigni dilaceratione: intra nycthemeron cum insigni hæmorrhagia, spirandi difficultate &c. obiit percussus (a). Eodem in loco & bina alia habentur exempla, quæ hoc confirmant. Habentur quidem & observata apud Auctores, quæ pulmonis vulnera sanata fuisse docent, sed vel fuerunt leviora, vel talia ad quæ manus Chirurgi pertingere potuit. Sic apud Hildanum habetur (b) quod pulmonis pars, per vulnus pectori inflictum erumpens, ferreo candenti instrumento fuerit abscissa, & æger postea integre sanatus fuerit. Aliud satis mirabile exemplum habet (c), ubi post vulnus thoraci inflictum difficultas anhelitus maxima, sanguinis cum tussi rejectio &c. docebant pulmonem vulneratum esse, tamen evaserit æger, & post tres menses à curato vulnere rursus una cum pure turundam, Chirurgi imprudentia in cavum pectoris delapsam, rejecerit; & tandem evaserit. Si ergo post vulnus pectoris æger moriatur, & aperto cadavere pulmo læsus appareat, merito Judicibus renunciatur, tale vulnus mortis fuisse causam; licet quædam pulmonis vulnera sanata fuerint aliquando. Imo in levioribus etiam pulmonis vulneribus metus est, ne talia vulnera degenerent in ulcera pulmonis, quæ postea lenta tabe consumunt vulneratum. Tale exemplum habetur apud Forestum (d).

HEPATIS. Per venam enim portarum abdominalium viscerum sanguis venosus collectus deferitur per hepar: ipsius adscendentis cavæ venæ truncus hepatis innascitur: totum hoc viscus molle, ac si spongia fere foret sanguine plena, apparet. Arteriæ quidem hepaticæ, si ingens visceris hujus moles spectetur, satis exiles sunt, sed venæ portarum insignes rami per hepar distribuuntur. Ideo apparet, periculosissima semper esse vulnera hepatis, & si insignes rami vasorum per hepar distributorum læsi fuerint, semper lethalia; & quidem plerumque satis subito, ingenti sanguinis copia in abdominis cavum, vel & per vulnus effusa: unde animi deliquium & mors brevi sequuntur. *Jaculo in jecur cominus percusso, statim cad. verosus color affusus est, oculi concavi, anxietas, corporis jactatio, mortuus est, priusquam concio dimitteretur, eodem quo percussus est die (e).* Facile autem pater, omnium periculosissima esse illa vulnera hepatis, quæ circa portas ejus infliguntur (f), quæ ideo à Celso pro insanabilibus habentur: illa vero, quæ jecinoris crassum dividunt, difficilia quidem, non tamen omnino insanabilia, esse voluit. Satis notabile exemplum vulneris in hepate sanati in Epistola ad Sennertum recenset Hildanus: (g) ubi maximo vulnere inflicto dextro hypochondrio, cum tali hæmorrhagia, quæ animi deliquium induceret, & educto forcipibus hepatis frusto, quod in vulneris apertura se offerebat, licet sævissima supervenerint symptomata, tamen optime convalescit vulneratus. Post triennium continua febre periit, & in cadavere apparuit, portiunculam quandam infimi lobi hepatis abscissam fuisse, & vulnus cicatrice bona fuisse obductum. Sed apparet ex ipsa hac historia, vulnus non penetrasse ad majores vasorum hepaticorum ramos. Imo & leviora hepatis vulnera, licet non ilico lethalia, funesta tamen sæpiissime fuerunt observata. *Licetor*

(a) Bohnius de renunciatione vulnerum pag. 233.

(b) Centur. 2. Observ. 32.

(c) Centur. 1. Observ. 46.

(d) Observ. Chirurg. Lib. VI. Observ. 4.

(e) Hippoc. Epid. 7. Chart. Tom. IX. pag. 567.

(f) Celsus Lib. V. cap. 26.

(g) Centur. 2. Observ. 34. pag. 110.

imperterritus, injecturus vincula audacissimo cuidam nebuloni, ictus fuit bipenni, in infima jecinoris fibra. Cujus exstillans sanguis, in pus conversus, coniecit ipsum in lentam febriculam: utique tam vehementem universi corporis mareorem, ut conficeretur ante diem quadragesimum (a).

LIENIS. Quamvis Democritus dixerit, (b) quod noxius & inutilis corporis humani incola splen ex adverso hepatis dormiat, & per Experimenta in vivis animalibus capta constiterit, posse lienem excindi superstiti vita, nec adeo multum turbata sanitate; imo & in ipsis hominibus hoc factum fuisse, legatur (c), tamen tam magna habet vasa sanguinea, & cordi adeo propinqua, hoc viscus, ut lethalis merito timeatur hæmorrhagia post splenis vulnera. Mortem inde secutam fuisse testantur observata Medica. *Inter ludicra puerilia, ictus fuit scipione, in regione Lienis, juvenis quatuordecim annorum, cum insigni dolore, & tam frequenti animi deliquio, ut postridie ejus diei vitam cum morte commutaverit (d).* Alium casum similem ibidem habet Auctor, & in utroque cadavere lien in cava sui parte rimam egerat, quæ duos facile digitos caperet. Similia bina exempla lienis fissi à percussione externa, cum sanguinis extravasati ingenti copia in abdomine collecta, & morte subito secuta, vidit *Bohnius (e).*

Leviora tamen Lienis vulnera, æque ac hepatis, non semper absolute lethalia esse, quamvis semper periculosa, valde probabile est.

RENUM. Servari non posse, quibus renes vulnerati sunt, Celsus dixerat (f). Qui magnitudinem arteriarum emulgentium considerat, facile credet, lethalem hæmorrhagiam sequi posse, si majores emulgentium rami in renum substantia, vel & in ipso renis ingressu discendantur, si simul peritonæum læsum fuerit, sanguis in abdominis cavum effluet; si vero à posteriori corporis parte inflictum vulnus renem læserit, integro manente peritonæo, tunc mirabilis fiet sanguinis effusio in tunicam pinguedinosam musculis interpositam, neque sanguis tam libere poterit ex renis vulnere effluere. Nec obstat locus Hippocratis, ubi sectionem imperat in calculo renum: dicit enim ibi, *quum dolor urget, multa calida lavato, & qua parte precipue dolor est, fatus tepentes admoveo; quum vero intumuerit, & extuberarit, sub hoc tempus juxta renem secato (κατὰ τὸν νεφρὸν) & extracto pure, arenam medicamenti urinam moventibus curato &c. (g).* Apparet enim evidenter, quod noluerit renem ipsum dissecari, nec per sectionem factam arenas educi voluit. Quid autem de Nephrotomia sentiendum sit, dicetur postea in Capitulo de calculo.

Non omnia tamen renum vulnera lethalia esse, docet Foresti observatio (h): ubi juvenis viginti annorum, cultro in lumbis vulneratus, è regione renis dextri, à sanguine, in vesicam delapso ex rene vulnerato, per sex dies urinam omnino suppressam habuit; feliciter tamen & ab hac ischuria, & à renis vulnere, evasit.

PANCREATIS. Si nempe vasorum trunci vel rami insignes per hoc viscus dispersi discendantur, poterit, effuso sanguine in cavum abdominis, vel & cor-

(a) Tulp. Observat. Medicar. Lib. II. cap. 26.	pag. 378. & ann. 7. pag. 293.
(b) Epist. ad Hippoc. de natura humana Charter. Tom. I. pag. 29.	(d) Tulpii Observ. Medic. Lib. II. cap. 29.
(c) Boyle de utilitate Philosoph. Experimentalis Exercit. I. pag. 109. 110. Miscell. curios. dec. 1. ann. 4. & 5. pag. 210. & dec. 2. ann. 3.	(e) De renunciatione vulnerum pag. 282.
	(f) Lib. V cap. 26.
	(g) De internis affectionibus cap. 15. Chart. Tom. VII. pag. 649.
	(h) Lib. XXV. Observ. 10. pag. 194.

rupto postea , mors sequi ut effectus talis vulneris. Tamen Pancreas ventriculo subjacens raro videtur lædi posse , quin simul per alia viscera vulnus transeat.

M E S E N T E R I I. Quam magna vasa sanguinea per mesenterium decurrant , & quo locentur ordine , Eustachius 27. tabula figura 2. & 3. pulchre demonstrat ; præter enim insignes venæ portarum ramos , & venæ cavæ propagines , magni trunci arteriosi per mesenterium deferuntur , arteria nempe mesenterica superior , & inferior. His ergo vasis à causa vulnerante discissis , lethalis hæmorrhagia sequi poterit , & abdominis cavum effuso sanguine repleri. Talis casus habetur apud Bohnium , (*a*) ubi ex punctura regionis epigastricæ tertia die æger expiraverat. Observatum autem fuit in cadavere , ictum per omentum in mesenterii centrum penetrasse , sicque , præter vascula Epiploica exiliora , propaginem arteriæ mesentericæ superioris insigniorem reseculisse : unde abdomen satis vastum & obesum cruore extravasato & ad corruptionem inclinante , turgebat. Ex omenti vasis disruptis similiter mors , per hæmorrhagiam repleto toto abdomine , secuta fuit (*b*). Sed aliud adhuc periculum imminet à læso per vulnera mesenterio , cujus cognitio Celebrerrimo Ruyschio imprimis deberi videtur. Ille enim per quinquaginta & amplius annos amplissimi Magistratus auctoritate , in populissima urbe Amstelodamo , cadavera violenta morte peremtorum lustravit , ut de vulnere conditione ad Judices renunciaret. Dicit enim , se frequenter observasse , vulnera , mesenterio inflicta , intra duos tresve dies fuisse lethalia , postquam acerrimis & assiduis doloribus abdominis denunciati fuerant vulnerati : sollicito tamen examine constitit , nullam aliam partem alicujus momenti fuisse læsam. Præterea Ornithotrophi , dum gallos castrant , si videant mesenterium hac operatione vel minimum læsum fuisse , statim hæc animalia jugulant , probe edocti per experimenta , brevi moritura à tali vulnere (*c*). Videtur autem lethalis talium vulnere effectus à læsis nervis mesenterii pendere. Quam mirabile enim imperium in ipsas etiam vitales functiones corporis humani habeant nervi per abdominalia viscera dispersi , docent Observata Medica in herniis suffocatis , intestinorum susceptionibus &c.

An in Coacis prænotionibus aliquid simile adumbratur , (*d*) dum ibi dicitur : *pereunt & quibus nervi interiores , sive tenuis aliquis , sive crassus vulneratus fuerit , si plaga transversa fuerit & magna ; quod si parva & recta , nonnulli evadunt.* Cornarius loco *οι ις τα εντις* legit *οι ις τα ιντεξ* , quæ lectio propius huic sententiæ accederet (*e*).

STOMACHI , INTESTINORUM. In hoc numero considerantur vulnera harum partium , quatenus vasis sanguineis ruptis mortem facere poterunt effuso sanguine , nam illa mala , quæ sequuntur à contentis ventriculi & intestinorum per vulnus dilabentibus , considerabuntur quinto numero hujus paragraphi. Ventriculum enim ambiunt satis magna vasa , quæ circa utrumque ejus orificium versus fundum descendunt , & in hoc itinere frequentibus anastomosibus junguntur similibus vasis à fundo ventriculi sursum ascendentibus. Hinc uno insigniori ramulo discisso , sanguis per omnia vasa ventriculi reliqua trajectus facile effluit per vas vulneratum. Plurima mortis secutæ post ventriculi vulnera exempla habentur apud Observatores :

(*a*) De renunciatione vulnere pag. 164.

(*b*) Comment. Acad. Scient. Imperialis Petropolit. Tom. I. pag. 382. 383.

(*c*) Ruysch adversar. Anatom. decad. 2. N°. 1

IV. pag. 8. & 9.

(*d*) N°. 509.

(*e*) Foësius Tom. I. pag. 100.

unicum notasse sufficere, quod demonstrat, maximam hæmorrhagiam inde ortam fuisse. Villicus in hypochondrio dextro sub costis spuris gladio valde lato vulnerabatur; multa cruenta vomuit & per alvum dejecit, supervenere sudores, syncope, extremorum frigus, convulsiones: tertio die periit. Aperto abdomine, vulnus ingens apparebat in ventriculi fundo, venis & arteriis, quarum maximus ibi numerus est, integre discissis; ingens simul erat in abdomine sanguinis effusi copia (a).

Intestina autem, mesenterio annexa, per illud vasa sua recipiunt, quæ utrimque intestinali fistulæ circumapplicata, in parte intestini mesenterio opposita, Anastomosis inter se junguntur. Vulnere ergo intestinis imprimis circa mesenterium inflata, satis magnos vasorum truncos discindere possunt, unde magna sanguinis in cavum abdominis effusio, & mors. Homo vulneratur in hypochondrio dextro, paulo supra umbilici regionem, gladio acuto; conqueritur de vehementi abdominis dolore; multum sanguinis per alvum dejecit: supervenere & ventriculi subversiones, singultus, frequens animi deliquium, hora quarta mortuus est. Aperto abdomine, absterisique, quibus refertum erat, excrementis & sanguine, intestinum Colon totum undequaque per transversum discissum & sphacelatum repertum est (b).

Multum autem videtur augeri periculum à læsis majoribus vasis ventriculi & intestinorum ideo, quia continuo motu peristaltico hæc viscera moventur; hinc hæc vulnera nunquam fere quiescunt. Forte etiam similia mala oriuntur à nervis læsis, per ventriculum & intestina dispersis: quæ & post mesenterii vulnera sequuntur, uti modo dictum est.

Interim tamen apud Observatores vulnere ventriculi & intestinorum sanatorum occurrunt frequentissima exempla. Unde non omnia talia vulnera pro lethali habenda sunt.

U T E R I I N G R A V I D I S. Uterus, postquam mulier concepit, & ovum imprægnatum incipit sua mole aucta uteri cavum implere, extenditur quaquaversum, & pari proportionem omnia ejus vasa omni mensura ampliantur, ac majorem copiam humorum recipiunt. Hinc uterus gravidæ mulieris habet fere eandem crassitiam, quam habebat uterus contractus in non gravida; & tamen in tam amplam molem distenditur, dilatatis nempe vasis, & repletis simul. Unde dixit Hippocrates, (c) *ubi in utero mulier gerit, paulatim à toto corpore sanguis in uterum deferitur, & in orbem id, quod in utero est, circumstans, ipsum auget.* Et inde rationem deducit, quare gravidarum depravetur color: quod nempe purus sanguis quotidie ex corpore destillet, & ad fœtum feratur &c. uti habetur in eodem libro de morbis mulierum, (d) quem locum antea alia occasione allegavi. (§. 69. N^o. 2.) Apparet hinc, quam periculosa sint vulnera uteri imprægnati, cum tanta copia sanguinis distendantur vasa. Periculum auget, quod fœtus uterum distendens impediat, quo minus uterus se contrahere, & sua vasa angustare possit: si vero post inflatum utero vulnus excluderetur subito fœtus, aliqua spes esset, contracto utero, hæmorrhagiam sisti, & vulnus consolidari posse. Talia enim habentur exempla mirabilia, quod dissecto utero ipso, & per latum vulnus educto fœtu, supervixerint mulieres. Mulieri primiparæ læsa vagina post partum difficilem concreverat sic, ut apertura ejus pili magnitudinem vix retinuerit; imprægnata postea iterum fuit,

(a) Boneti Sepulchretum Tom. III. p. 362. | ter. Tom. VII. pag. 744.

(b) Ibid.

(d) Charter. Tom. VII. pag. 748.

(c) De mulier. morbis Lib. I. cap. 23. Char-

cumque

cumque partus doloribus abortis nulla spes esset, illam parere posse, fœtusque jam mortuus esset in utero, feliciter, dissecto abdomine, & utero ipso, eductus fuit, nullo symptomate vel animi deliquio superveniente, (a) & superstite matre. Aliud habetur exemplum partus talis Cæsarei dicti, publico testimonio confirmatum. Fœmina primipara quadragesimo octavo ætatis anno, omnibus tentatis auxiliis, ob loci angustiam non poterat parere: septima die peritissima, nec minus intrepida, obstetrix dissecto utero fœtum eduxit, nullo malo securo, & muliere postea integra sanitate fruente (b).

VESICÆ CIRCA ARTERIAS EIUS MAJORES. Quamvis Hippocrates vesicæ vulnera ut lethalia damnaverit, nec posse coalescere dixerit, (c) constat tamen certissimis hodie & frequentissimis observatis, vesicam vulneratam in calculi sectione sanari. Periculum tamen est, ne magna satis per vesicam decurrentia vasa discissa validam faciant Hæmorrhagiam; ex magnis enim truncis arteriarum Iliacarum satis vicinis orta valido impetu sanguinem fundunt. Vasorum horum origo & decursus in Eustachii Tab. XII. fig. 1. habentur. Imprimis augetur hoc discrimen, quia in calculosis vesica, sæpe longe crassior facta, dilatata plus vasa habet: his autem vasis discissis, quamdiu calculus adhuc in vesicæ cavo hæret, non poterit vesica se penitus contrahere; hinc patulo vulnere sanguinem fundere pergunt. Calculo vero educto, contracta vesica, & lotio per vulnus factum libere effluente, claudi possunt iterum vasa dissecta.

AORTÆ. Sanguis ex pulmone redux in cor sinistrum pellitur omnis in maximum vas arteriosum totius corporis, quod aorta vocatur: quæ in arcum curvata deorsum tendit, spinæ accumbens, sinistrorsum parum declinans, usque ad os sacrum; ibi in binos ramos æquales dividitur, quæ vocantur arteriæ Iliacæ; toto autem hoc itinere à corde ad locum illum usque, ubi bifurcatur, aortæ nomen retinet. Facile jam patet, si vulnere lædatur aorta ipsa, nullam superesse medelam, cum directo impetu sanguinem omnem ex corde sinistro accipiat, nullusque detur accessus manibus Chirurgi: in intimis enim corporis tuto lateret, corporibus vertebrarum incumbens. Eo autem citius lethale erit tale vulnus, quo magis vicinum cordi fuerit.

CAROTIDUM. Arteriæ carotides, ex ipsa curvatura aortæ, ex corde sinistro egressæ oriuntur (saltem sinistra carotis, dextra plerumque ex subclavia arteria ejusdem lateris oritur.) binæ hæ arteriæ ad latus utrumque asperæ arteriæ decurrunt usque ad laryngis altitudinem, ubi in binos dividuntur ramos singulæ, quorum unus, externis imprimis capitis partibus prospiciens, carotis externa vocatur; alter calvariam ingressus per encephalon distribuitur, carotis interna dictus. Toto decursu, ab origine ex aorta, vel subclavia, ad illum locum usque, ubi in binos dividuntur ramos, simpliciter carotides vocantur. In homine arteriæ illæ fere digiti minoris amplitudinem habent: hinc apparet, quanta hæmorrhagia, illis vulneratis, fieri debeat, dum tam propinquæ cordi impetu maximo pulsus sanguinem accipiunt. Verum quidem est, Carotides fere toto hoc decursu satis propinquas esse tegumentis corporis externis, sic ut digito illarum pulsus in collo percipi possit facillime. Præterea impune videtur ligari posse carotis arteria, cum

(a) Act. Lipsiens. an. 1693 pag. 230.

(b) Académ. des Scienc. l'an 1731. Hist. p. 41.

(c) De Morbis Lib. I. cap. 2. Charter. Tom.

VII. pag. 532. & ibid. cap. 4. pag. 536. uti & in Coacis Prænotionibus. N°. 503. 504. 509.

per alteram & vertebrales arterias sanguinis idonea copia ad caput deduci possit. In canes, cui ante octiduum abscideram nervos recurrentes, ligavi utramque carotidem, nec potui observare illum aliquid mali inde pati: inveni enim hoc animal per octo dies elapso vegetum & alacre: ligavi tunc venas jugulares sine ullo observabili malo. Post quatuor dies inveni canem sanum omnino. Examinans tunc ligaturas carotidibus injectas inveni illas firmissime hærere, & thrombum valde densum & compactum hærere inter ligaturam & cor. Aperto cranio in cerebro nihil mutatum apparebat, imo cerebri volumen potius auctum quam minutum apparebat.

Si vero ponderentur illæ difficultates, quæ occurrunt, ubi in homine carotis arteria discissa est, patebit tale vulnus merito lethale dicendum esse: ingens enim hæmorrhagia paucis certe minutis horæ hominem è medio tollere poterit. Ut ergo salvari posset talis vulneratus, requireretur, ut peritissimus adesset ipso momento vulneris inflicti Chirurgus, qui digitis ad resistentem asperam arteriam comprimeret utrumque carotidis discissæ extremum, simul artubus ligaturæ injiciendæ forent, ut compressis venis minor sanguinis copia rediret ad cor, sicque impetus effluentis sanguinis minueretur. His factis deberet utrumque extremum carotidis discissæ investigari, & inventum deinde ligari. Non sufficit enim ligasse arteriæ illam partem, quæ cordi propior est; pergeret enim sanguis effluere per alterum arteriæ discissæ extremum, quia carotides sub basi cerebri cum se invicem, & cum vertebralibus arteriis, magnis satis ramis emissis, junguntur. Ex his omnibus patet, unicum Chirurgum, dextrimum quamvis, non sufficere, sed ad minimum requiri, ut bini adsint tales. Præterea vix videntur arteriæ discissæ extrema posse inveniri, nisi integumentis divisis amplius redderetur vulnus; unde postea sæpe in Chirurgos, optime quamvis de vulnerato meritos, mors imputaretur post vulnus secuta. Si vero vulneratus tantum sanguinis amisisset, ut in animi deliquium lapsus cessaret fere hæmorrhagia, posset forte hoc tentari.

VERTEBRALIUM. Arteriæ vertebrales, ex arteriis subclaviis ortæ, utrimque per foramina processuum transversorum vertebrarum colli pergunt versus cranium. In hoc transitu ramulos per vertebrarum commissuras ad spinalem medullam, ejusque involucria transmittunt; uti etiam ad musculos vicinos. Discissæ ergo illæ arteriæ non possunt facile retrahi, & sic orificia sua claudere: & cum sub basi cranii ramis emissis cum arteriis carotidibus internis communicent; hinc sanguis, per carotides allatus, per has arterias vulneratas effluere poterit, unde patet ingens periculum. Nulla autem hic datur opportunitas ligandi arterias has vulneratas, cum offeis illis foraminibus lateant discissæ arteriæ extrema: unica spes esset, si per hæmorrhagiam debilissimo reddito ægro, & vita tali minima sustentata parco & blando victu, nullisque datis cardiacis, consolidari posset arteriæ discissæ extremum. Hoc autem non penitus impossibile esse, docent ipsa cordis vulnera sanata aliquando, & memorabile illud exemplum antea enarratum, (§. 161.) ubi axillari arteria discissa homo tamen evaserat.

Facile jam patet idem periculum imminere ab aliis magnis arteriis vulneratis, emulgentibus v.g. Iliacis &c.

Venarum autem maximarum vulnera pariter lethalia esse ob easdem causas patet: cum autem plurimæ venæ magis versus corporis superficiem ponantur, faciliusque comprimi possunt; neque tanta sit velocitas sanguinis in venis, quam in

arteriis ; ideo , cæteris paribus , venarum vulnera minus periculosa sunt vulneribus arteriarum.

4. Quæ Respirationem integre tollunt : ut abscissio laryngis cum subductione fistulæ scissæ , vulnera magna bronchiorum , vulnera lata , utramque cavitatem thoracis , cum admissu aëris , perforantia , vulnera diaphragma ab utraque parte mediastini thoracis penetrantia , vel ejus nervosa dissecantia.

In homine nato , ut sanguis ex corde dextro in sinistrum transire possit , requiritur , ut pulmo , per aërem inspiratum dilatatus , viam faciat sanguini , ex corde dextro pulso per arteriam pulmonalem in venas pulmonales , & deinde in cor sinistrum. Necessaria ergo ad vitam est respiratio , quæ si per pauca tantum momenta tollatur , vita perit. Ad respirationem autem requiritur , ut aër libere pulmonem ingredi possit , illumque expandere : omnia ergo vulnera , quæ aëris ingressum in pulmonem impediunt , vel pulmonis dilatationem per aërem ingressum , lethalia sunt. Talia autem sunt sequentia.

ABSCISSIO LARYNGIS CUM SUBDUCTIONE FISTULÆ SCISSÆ.
Aspera arteria , cartilagineis illis segmentis constans , semper aperta , nunquam collabi , nec facile comprimi potens , liberum aditum aëri in pulmonem servat : dum ergo vulnus aëream hanc fistulam sic dissecat , ut discissum extremum inferius se subducens sub partibus vicinis occultetur , & aërem admittere nequeat , actum est de vita. Si vero vulnere quantumvis magno lædatur , patula tamen via maneat aëri in pulmonem , minime lethale erit tale vulnus ; uti docent fidissima observata. Frequentissimi enim Medicis & Chirurgis occurrunt tales casus , in quibus homines , vitæ pertæsi , violentas sibi ipsis intulerunt manus ; vel & à latronibus confossi discissam habuerant arteriam asperam , & tamen sanati fuerunt postea. Pauca tantum adducentur observata , quæ hanc rem probant. Juvenis Melancholicus inopinata nuptiarum , quas speraverat , repulsa , sibi ipsi discidit asperæ arteriæ cartilagineas , illæsis venis jugularibus & carotidibus utrimque adjacentibus ; mox voce privatus jacebat. Chirurgus diducta vulneris labia consuit ; miser vulneratus vitæ pertæsus futuram dilacerat ; Emplastro , fabрили glutine illito , utrimque labiis vulneris appposito , filisque transmissis adducto , uniebantur iterum vulneris labia , & mensis spatium sanatum fuit vulnus. Nihil postea remansit vitii præterquam quod in concentu Musico cogeretur paulo submissus canere , quam solebat ante plagam inflictam (a). Similis casus legitur & apud Bartholinum (b) de puella , quæ sibi ipsi fauces præsciderat , & vulneris futuram pariter laceraverat ; postea tamen curata.

Tria similia Exempla habet Paræus (c) ubi homini aspera arteria discissa fuerat una cum vena jugulari : inflicto vulnere statim vocem perdiderat : unitis futura vulneris labiis , iterum loqui potuit ; & , licet mortem brevi secuturam credidisset Paræus , præter spem convaluit. Binis aliis una cum aspera arteria & œsophagus

(a) Tulp. Observat. Medic. Lib. I. cap. 50. | Hist. 89.

(b) Thom. Barthol. Histor. Med. Cent. V. | (c) Lib. X. cap. 31.

discissus fuerat, unde mortui fuerunt, postquam per quatuor tamen dies post vulnus inflictum supervixerant, & confuris labiis vulneris loquela perdita redierat, sic ut unus percussorem indicaverit, alter se sibi ipsi hæc vulnera infixisse confessus fuerit, atque ita famulum criminis suspicione liberaverit.

Memini me ante multos annos vidisse militem, qui ostiatim stipem petens ostendebat patulum ingens foramen asperæ arteriæ, quod spongia solebat tegere, tuncque commode loqui poterat, detecto autem foramine, vox peribat. In conflictu bellico huic homini per globum plumbeum pars insignis asperæ arteriæ ablata fuit; unde non potuerunt adduci ad se invicem vulneris labia, sed relicta fuit talis apertura; plurimis tamen annis postea supervixit.

VULNERA MAGNA BRONCHIORUM. Aspera arteria, postquam per colli anteriora in thoracem descendit, circa illum locum, ubi aorta ex corde egressa incurvatur, in binos dividitur ramos, qui singuli ad pulmonem sui lateris tendunt: hi rami tunc, deposito asperæ arteriæ nomine, bronchia vocantur; horumque ramorum subdivisiones in pulmonibus factæ deinde illud nomen retinent. Cum ergo asperæ arteriæ & bronchiorum munus sit aërem inspiratum per pulmonis cava ærea distribuere, aër, per magna horum vulnera elapsus, in cavo thoracis accumulabitur; calore loci expansus pulmonem comprimet; sicque omnem ejus actionem impediet: unde suffocatio & mors: imprimis, si utriusque pulmonis bronchia sic lædantur: tunc enim respiratio integre tollitur. Unde Hippocrates (a) dixit: *Moritur, si in arteriam (asperam hoc nomine semper intelligens) & pulmonem magna admodum plaga inflicta sunt, sic ut percusso pulmone minor sit, qui per os prodit, spiritus, quam qui per vulnus excidit.* Periculum autem talium vulnerum augetur, quod vix videantur magnis vulneribus bronchia lædi posse, quin vasa sanguinea, horum bronchiorum divisiones suis ramificationibus comitantia, simul discindantur.

VULNERA LATA, UTRAMQUE CAVITATEM THORACIS, CUM ADMISSU AERIS, PERFORANTIA. Pulmones, quamdiu in thorace undique exacte clauso continentur, semper sunt plus distenti, quam si aëri libero undique exponerentur, tunc enim collabuntur, & in spatium minus contrahuntur, imprimis actione contractili fibrarum muscularium, quæ segmenta bronchiorum inter se connectunt. Naturaliter enim in homine inter pulmonem & pleuram nullus adest aër, sed per glottidem aëri in pulmonem semper relinquitur liber aditus. Unde pulmo plus distenditur per aërem ingressum per glottidis rimam, quam comprimitur per aërem externum, costas & diaphragma prementem, quia costarum arcuata figura & diaphragmatis nexus cum costis & vertebis impediunt, quo minus aër externus diaphragma premat in pectoris cavitatem eo usque, ut fieret æquilibrium inter vim aëris externi & ejusdem pulmone contenti. Hæc est ratio, quare pulmo pleuræ semper contiguus maneat, etiam post mortem, quamdiu thoracis clausi manet integritas; uti patet evidenter, si illæsa pleura musculi intercostales caute separentur; tunc enim pulmo omnino contiguus apparet pleuræ, præ tenuitate fere pellucidæ. Dum vero pleura perforatur, aëre illapso in pectoris cavum, pulmo collapsus statim contrahitur in minus spatium, & à pleuræ contiguitate recedit; diaphragma, antea cavum à parte abdominis, tensissimum, & in cava pectoris tru-

(a) COAC. PRÆNOT. N°. 309.

sum, statim flaccidum fit, & deorsum collabitur. Ex quibus patet evidenter, naturaliter in homine pulmones pleuræ undique contiguos esse, nec aërem hære in- ter convexam pulmonis superficiem & pleuræ cavum. Ideo, dum per musculos, huic scopo inservientes, elevatis costis & diductis à se mutuo, diaphragmate con- tracto & plano facto ampliatur thoracis cavitas, esset inter pleuram & pulmonis superficiem spatium aëre vacuum; sed aër per glottidem libere ingrediens pulmones sic distendit, dum pectus dilatur, ut maneant semper pleuræ contigui; sicque perficitur inspiratio. Dum vero, perfollo thoracis cavo, liber datur accessus aëri in cavum, aëris, per glottidem ingressi, pressio æquilibratur: hinc non distende- tur pulmo, sed propria contractilitate abibit in minus spatium. Si hoc jam fiat in utroque pectoris cavo simul, non poterit pulmo uterque collapsus dilatari per aërem inspiratum; & hinc cor dextrum non poterit per collapsum pulmonem pel- lere suum sanguinem, sicque brevj suffocabitur cordis motus, & peribit vita inde pendens.

Galenus jam in vivis animalibus tentaverat hæc experimenta, & conclusit (a) *quod ideo semivocale & semirespirans ilico fiat animal à magnis vulneribus alterutram thoracis partem penetrantibus; voce autem & respiratione penitus destitui, si amba ca- vitates perfolle fuerint.* Et inde deduxit mediastini, thoracem in bina cava separan- tis, usum, ut vulnere penetrante unius lateris cavum, in altero maneat respiratio- nis integritas. Postea & Vesalius in vivis animalibus sectiones administrans nudata pleura demonstrabat, pulmonem illi semper contiguum manere; pertusa autem pleura, illius lateris pulmonem concidere, thorace interim æque ac prius moto; postea illud latus pulmonis quam maxime aperiens, pluribus costis resectis, per membranas thoracem intersepientes poterat videri, quomodo alter pulmo in thora- cis cavo adhuc integro pectoris motum sequeretur; illis vero membranis pertusis, & ille pulmo concidebat illico (b).

Ex his experimentis videretur concludi posse, vulnera thoracis cavum utrumque penetrantia sic, ut aëri ingressus detur, esse certo & subito lethalia. Quousque au- tem hoc verum sit, patebit ex sequentibus experimentis.

Ante duodecim, si recte memini, annos degebat in hac Academia WILLIAM HOUSTOUN, eruditione singulari & imprimis Anatomie & Botanices scientia insignis, cujus amore radiosissima suscepit itinera, naufragia, captivitates & alia plurima mala passus, & magno scientiarum damno in patriam redux in flore ætatis lento morbo periit, longiori vita dignissimus. Magno meo bono hujus Viri fami- liaritate usus fui, & plurima me ab illo didicisse gratus recordor. Ille quadam die me conveniens rogavit, an crederem, vulnera utrumque cavum pectoris perfo- rantia lethalia esse? Annui, & argumentis modo enarratis asserti veritatem pro- bare conatus fui. Audivit placide ratiunculas, & dein eduxit ridens de sinu cani- culam, cui ante triduum utrumque pectoris latus perforaverat: alacriter currebat animal, ac si nihil mali passum fuisset. Examinans omni cura inflicta vulnera, vidi in cava thoracis penetrare, nec pulmonem accretum esse illis locis, quod suspica- bar primo: candelilla cerea, applicata utrique vulnere, aëre per vulnera attracto & expulso exstinguebatur. Obstupui insolitum spectaculum, & postea in canibus similia experimenta plurima tentavi; quomodo autem successerint, referam.

(a) De usu partium Lib. VI. cap. 3. Charter. Tom. IV. pag. 419.

(b) Vesal. de Corporis humani fabrica Lib. VII. cap. ult. pag. 571.

Cani perforavi anteriorem partem pectoris sinistri ; statim aër cum sibilo intravit , tubo immisso removi undique pulmonem à pleura. Postea & dextro lateri thoracis vulnus inflexi , digito immisso itidem pulmonem undique à pleura removi : remoto digito pars magna pulmonis cum impetu per vulnus erupit : pergebat respirare & ejulare canis ; vi iterum intrusi pulmonem in pectus , exhibat denuo. Hæmorrhagia aderat satis valida ; & post quadrantem horæ moriebatur animal.

Repetens in alio cane hoc experimentum , per vulnera facta aërem per siphonem inflavi valide ; longe diutius vixit : sed non aderat tanta hæmorrhagia. Dum quiescebat animal , pulmo in thoracis cavo manebat. Dum autem præ dolore magnos motus faceret , per vulnera facta pars pulmonis erupit.

Alteri cani pariter utrumque thoracem perforavi : tubo aërem inflavi in cava pectoris , dein alperam arteriam resecai ; postea totum abdomen cruciatim dissecidi , tunc diaphragmate pertuso in latere sinistro , vulnere in cavum pectoris sinistrum penetrante , solutis vinculis vixit animal per bihorium , & pendulis de abdomine intestinis cucurrit per cubiculum.

Longe magis mirabar , alium canem , perforato utrimque pectore , abdomine aperto dein , & pertuso utrimque diaphragmate , per quinque horas vixisse.

Hæc experimenta frequenter iteravi , fere semper simili cum successu : sed dum maximis vulneribus pectus perforarem , quæ paralelo ad costas ductu dimidii digiti longitudinem æquarent sæpe , vel & superarent , vidi animalia satis cito mori : sed tunc ingens semper aderat hæmorrhagia.

Dum una cum eruditissimis amicis , qui hæc experimenta mecum tentabant , conabar invenire rationem , quare perforatio utrimque pectore in animali pergeret vita & respiratio ; incidit hæc opinio : quod si vulnera inflicta minorem haberent aperturam , quam erat glottidis rima , tunc aër facilius irruens per glottidis aperturam , quam per vulnus distenderet pulmonem. Præterea animal summo nixu videbatur expandere pulmonem , ut per vulnus sæpe exprimeretur ; sicque aëris ingressum liberum per vulnus impendebat : simul vidi evidenter , quod adductis ad se invicem costis animal minueret vulneris aperturam quam maxime. Ut certi essemus de his , instituimus sequens Experimentum.

Cani in utroque pectoris latere , loco medio inter binas costas infleximus satis magnum vulnus ; vulneribus immisimus tubulos ex bractea ferri , quorum aperturæ longe majores erant , quam apertura glottidis in hoc animali : hac methodo vulnera manebant patula , cessabat ilico respiratio , & peribat vox , atque animal videbatur mortuum. Clausis dein per digitos impositos tubulorum orificiis , & perfricato valide abdomine , incipiebat iterum citissime respirare , remotis digitis emissâ parte aëris in cavo thoracis contenti , mox iterum tubulos claudebamus , sic augebatur respiratio , & redibat vox amissa : apertis iterum tubulorum orificiis desinebat respiratio , nullam vocem emittebat animal , & moriebatur. Hoc experimentum aliquoties iteravimus , semper eodem cum eventu : & vidimus , quod , nisi firmiter retineremus in vulnere tubulos posset animal summis nixibus moto thorace excutere tubulos de vulnere , & costas sic adducere , ut pergeret respirare.

Unde videtur concludi posse , vulnera , utrumque thoracis cavum penetrantia , & aërem admittentia , tunc tantum esse cito & certo lethalia , si vulnere orificia glottidis aperturam amplitudine sua superent.

An non hujus rei vestigium habetur in illo loco Coacarum Prænotionum in

eodem hoc numero modo allegato, ubi dicitur: quod moriatur homo, *si percussio pulmone minor sit, qui per os prodit spiritus, quam qui per vulnus excidit?*

Non memini, me legisse apud Observatores exempla hominum sic vulneratorum, ut mors secuta potuerit adscribi soli aëris ingressui in utrumque thoracis cavum: semper enim fere simul læduntur viscera thoracis cavo contenta. Sed apud Schenckium (a) habetur, quod homo delapsus ex alta arbore in palum acutum incidit, qui lumborum musculos perforans, sursum in pectoris cavum usque penetravit. Curatus ab hoc vulnere foramen fistulosum in dorsi regione habuit in thoracis cavum penetrans, per quod lumen admotum flatu erumpente in thoracis constrictione agitabatur, & nonnunquam exstinguebatur: sic diu supervixit sine ulla noxa.

VULNERA DIAPHRAGMA AB UTRAQUE PARTE MEDIASTINI THORACIS PENETRANTIA. Pleura dicta membrana thoracis utrumque cavum investit, sic tamen, ut singulo cavo thoracis sua propria membrana sit. Possunt ergo concipi, ac si binæ pleuræ forent tales vesicæ cavæ sibi mutuo adjacentes, & in loco contactus accretæ sibi mutuo. Harum membranarum duplicatura mediastinum vocatur, quod thoracis cavum dividit bifariam; sic tamen, ut in parte anteriori mediastinum declinet sinistrorsum, unde dextra cavitas pectoris major est sinistra (b). Cum ergo mediastinum non sit simplex membrana, sed ex binis pleuræ saccis sibi accumbentibus nata, satis exacte dixit Galenus (c) describens membranam succingentem thoracis, ex illa nasci thoracem intersepientes membranas. (*ὁμοίαι ἀνεπαρτήντες τὸ θώρακος*). Si jam vulnus ab utroque mediastini latere diaphragma læserit, poterit aër per has vias ingredi thoracem, & sic impedire pulmonis expansionem; eodem modo ac statim dictum fuit de vulneribus thoracem utrimque penetrantibus.

Sed si consideretur, magnum hepar diaphragmati accumbere, uti & lienem &c. satis patet, non facile posse lædi diaphragma in binis distinctis locis, quin & illa lædantur viscera; unde mors, secuta tale vulnus, non posset adscribi soli aëris admissioni in cava pectoris: præterea enim diaphragmatis & musculorum abdominalium actione pressa viscera obturabunt aëri liberam viam per hæc vulnera factam: sed uti ex experimentis modo citatis patuit, deberent hæc vulnera satis ampla esse. Unde videtur rarissime, si unquam, talis casus contingere posse.

VEL EJUS NERVOSA DISSECANTIA. Medium diaphragmatis locum dixerunt ejus centrum tendineum. Est satis lata plaga tendinea, sive aponeurosis, ad quam omnes fibræ carneæ diaphragmatis concurrunt. Vocabatur & pars nervosa diaphragmatis, quia veteres tendinibus etiam nervi nomen imposuerunt. Putabatur jam actione fibrarum carnearum diaphragmatis tendineum illud centrum undique deorsum trahi; hinc si vulnus huic parti inflictum foret, singulis vicibus, quibus agit diaphragma, distraherentur fibræ semilaceræ, augeretur vulnus, dolor fieret intolerabilis, & inde convulsio, & mors. Sed demonstravit clarissimus SENAC, (d) partem illam mediam tendineam diaphragmatis non descendere in inspiratione, cui cor pericardio suo inclusum incumbit; cujusque adeo turbaretur situs & motus, quia pericardium lata superficie huic tendineæ diaphragmatis

(a) Lib. II. de Vuln. thoracis Observ. 3. pag. 197.

(b) Acad. des Sciences l'An. 1715. Memoires pag. 311. &c.

(c) De Anatom. admin. Lib. VII. cap. 2. Charter. Tom. IV. pag. 148.

(d) Acad. des Sciences l'An. 1714. Memoires pag. 251. &c.

parti accrescit. Probatur & hoc ibidem ex diaphragmatis structura & nexu.

Sed aliud sequitur post diaphragmatis vulnera, nec minus funestum malum; unde non adeo subita quidem, certa tamen post diras calamitates mors sequitur. Dum nempe partes corporis, abdominis cavo contentæ, diaphragmatis & musculorum abdominalium actione pressæ vulnus diaphragmatis ingrediuntur, illud dilatant, in pectoris cava transeunt, sicque pulmonem comprimendo, & cordis ipsius actionem turbando, post summas miseras mortem inferunt citius vel serius. Sic Paræus (a) se vidisse testatur in homine, qui vulnus acceperat in media tendinosa parte diaphragmatis, ventriculum per hoc vulnus, pollicis magnitudinem non superans, thoracis cavum ingressum fuisse. In alio per octo menses superstite, post acerrimos dolores colicos mortuo, inventum fuit intestinum colon pro magna parte in thorace hære; licet vulnus diaphragmatis minimi digiti apicem tantum capere posset. Simile exemplum etiam habetur apud Sennertum (b) de studio, qui proprio se confoderat ense, post binos menses tamen inde curatus: sed septem mensibus elapsis post crebros vomitus expiravit. In cadavere apparuit, vulnus per pulmonem & diaphragma penetrasse. Ventriculus totus adscenderat in sinistrum thoracis cavum, & cor cum pericardio depulerat in latus dextrum; ubi vivus adhuc, post vulnus sanatum, manu imposita cordis pulsus jussu erat observari.

Hinc apparet, quam periculosa sint diaphragmatis vulnera. Hollerius tamen testatur, se observasse in suspensi cadavere, cujus dissectioni in scholis Medicis Parisiensibus præfuerat, vulnus obductum cicatrice in parte carnosa diaphragmatis (c).

5. Quæ motum Chyli in cor tollunt, abscissio œsophagi, magna vulnera ventriculi, intestini tenuioris, superioris integra dissection, vulnus ductus thoracici, vel alvei chylosi.

Recensentur hoc numero vulnera illarum partium, quarum integritas requiritur, ut alimenta ingerantur, digerantur, & chylus ex his præparatus deferatur in sanguinem; ut inde restituantur illa, quæ vitæ & sanitatis actionibus perduntur quotidie.

ABSCISSIO œSOPHAGI. Integra nempe abscissio œsophagi omnem transitum ingestorum ad ventriculum tollit. Vulnera enim œsophagi, non integre discissi, sanata fuisse testantur Auctores. Sic apud Schenckium habetur, (d) quod homo quidam carceribus detentus sibi ipsi guttur, qua parte tracheam arteriam spectat, ferro vulneravit, & digito vulnus tantopere ampliavit, ut per ipsum alimenta & medicamenta ad os usque transmitterentur. Sanatus tamen fuit paucis diebus. Aliud Exemplum habetur apud Bohnium (e) de juvene, cui à latronibus maximo vulnere faucibus inflicto; dum elato capite lac biberet, illud per vulnus effluebat; dum vero supinus biberet, illud in ventriculum descendebat. Unde patebat œsophagum non omnino rescissum fuisse. Ex hoc vulnere tamen convaluit. Integre autem discisso œsophago una cum aspera arteria, retractum versus ventriculum dis-

(a) Liv. X. chap. 32.

(b) Lib. II. part. 2. cap. 13. pag. 372.

(c) Holler. Comment. in Aphor. 18. Sect. 6.

pag. 344.

(d) Observ. Medic. Lib. III. Observ. 6. pag. 316.

(e) De renunciatione vulnerum pag. 208.

cissi œsophagi extremum non potuit unire Paræus alteri extremo, licet tanta valem in arte peritia. Per futuram quidem univit asperæ arteriæ vulnus, sicque loquelam amissam misero restituit, ut potuerit indicare percussorem; quarta tamen die post vulnus inflitum periit. Aliud simile Exemplum habetur ibidem (a). Cum autem œsophagus aspera arteria tegatur, corporibus vertebrarum incumbat, & à latere maxima vasa adjacentia habeat, raro solus vulneratur. Hinc forte credi posset, adjacentium partium vulnera pariter mortis causam fuisse. Mirabilis habetur, & forte unica hætenus in arte descripta observatio, quam publicavit Celeberrimus Boerhaavius. Illustrissimo nempe Heroi, Nobilissimo Baroni de Wassenæ, Reipublicæ nostræ Architalasso, post maximos vomendi conatus, abruptus fuit œsophagi tubus prope diaphragma: unde, post enormes cruciatus, ingestis, una cum aëre deglutito, in cavum pectoris delapsis, intra 24 horas mors accidit (b). Conclufit optimo jure tunc Magnus Auctor, similem casum, si recurreret, indicio hujus historiæ detegi quidem posse, nullis tamen unquam remediis sanabilem fore.

MAGNA VULNERA VENTRICULI. Omnes cibos & potus deglutitos suo cavo recipit ventriculus: cujus fabrica, affusis hūmoribus, & mora ibi hæc sic mutantur, ut deinde per intestinalem tubum delata præbeant materiem, quæ tenuissimis fistulis venosis resorpta, sanguini mista, & ulterius elaborata, restituere posset illa, quæ sanitatis actionibus de corpore perierant. Si ergo magnum vulnus inflitum fuerit ventriculo, contenta per vulnus dilabentur extra corpus, vel in cavum abdominis; sicque omnis nutritio deficiet necessario. Accedit, quod & ventriculi vulnera, quatenus ipsam ventriculi substantiam, tot arteriis, venis, nervis undique repletam, lædant, sint admodum periculosa. Dum autem pereunt ex vulneribus ventriculi non multo temporis intervallo post inflitum vulnus, non potest inde deduci mors secuta, quod nutritionis defectu perierit æger; sed ipsam substantiæ ventriculi læsionem tunc mortis causam fuisse, satis patet. Bina talia ventriculi vulnerati exempla habet Bohnius (c), sic ut mors intra biduum secuta fuerit. Ubi autem vulnera ventriculi mortem inducunt, quia ingesta alimenta continere nequit ventriculus perforatus, tunc lentior mors sequitur, sensim defectu nutritionis tabefacto corpore. Imo aliquando constitit per observationes Medicas, vulnera talia, in fistulosum ulcus degenerantia, plurimis annis aperta mansisse, superstiti ægro; sic ut potuerit pro lubitu per hanc aperturam cibos potusque emittere, vel clauso per externum apparatus vulnere eadem retinere: Qualia bina exempla habentur apud Schenkium (d). Imo plurima talia vulnerum ventriculi sanatorum integre exempla apud Auctores occurrunt. Habetur mirabilis admodum historia in Actis Anglicanis. (e) Maurus juvenis maturos Musæ fructus decerpit, & avide comedit: vitricus ejus ira furens, ut hoc ulcisceretur, cultro magnum vulnus abdomini juvenis infligit, & lata plaga ventriculum sic descendit, ut comesti fructus cum impetu per vulnus erumperent. Peracto hoc facinore, dum amici vulnerati insequerentur, senex sibi ipsi ventriculum simili fere vulnere lacerat. Post quatuor horas Chirurgus veniens utrique vulnerato & ventriculum & integra-

(a) Les Oeuvres d'Ambroise Paré Liv. X. Chap. 31. pag. 249.

(b) Atrocis nec descripti prius morbi Historia &c. scripta ab Hermanno Boerhaave,

(c) De renunciatione vulnerum pag. 252.

(d) Observat. Medic. rarior pag. 348.

(e) N°. 420. pag. 184. & Abridg. Tom VII. pag. 506.

abdominis discissa consuit, parvo foramine relicto, ut puri exitu pateret via. Febre corripuntur ambo vulnerati, quæ per quatuordecim dies durabat, & mensis circiter spatio juvenis convaluit; senex, sexagesimum ætatis annum agens, magis periclitabatur, & tardius curatus fuit. Uterque tamen, post quindecim à curato vulnere annos, integra sanitate fruebatur.

Videntur hæc observata docere, quod non omnia ventriculi vulnera, magna quamvis, absolute semper lethalia sint. Si nempe aditus detur manibus Chirurgi, ut futura possint uniri. Parva autem ventriculi vulnera satis magnam spem curæ faciunt, modo cibus vel potus non distendatur ventriculus; tunc enim contracto, manente ventriculo consolidari possunt.

INTESTINI TENUIORIS, SUPERIORIS, INTEGRA DISSECTIO. Videntur talia vulnera absolute lethalia esse. Intestini enim discissi extremum chylum in cavum abdominis effundet; qui ibi corruptus contenta omnia cavo abdominis viscera tabefaciet; unde certa mors. Si vero vel casu, vel arte, discissi intestini extremum externo integumentorum margini acceverit, patebit via, qua motu peristaltico ventriculi & intestinorum contenta omnia intestini cavo exhibunt de corpore. Chylus enim ex ventriculo in intestina egressus per tantam longitudinem tubi intestinalis ejusque gyros & anfractus impeditur, quo minus elabatur de corpore, antequam per vasa lactea & venarum meseraicarum oscula inde resorptum fuit omne illud, quod corporis nutrimento inservire posset. Si ergo intestinum tenue integre discissum fuerit, in loco superiori, id est, ubi pyloro latis vicinum est, defraudabitur necessario nutrimento corpus, & lento peribit marasmo, si per vulnus integumentorum contenta exeant; si vero in cavum abdominis delapsa accumulentur, ibi corrupta mortem accelerabunt.

Intestinorum autem crassorum vulnera, uti & tenuiorum in loco remotiori à ventriculo, uti & illa quæ non integre disciunt tubum intestinale, periculosa semper sunt, non tamen absolute lethalia. Maniacus cultro octodecim vulnera proprio abdomini inflixerat, quorum octo in abdominis cavum penetrabant: febris mox secuta, tensio abdominis, respiratio difficilis ac dolens, nausea, vomitus, diarrhœa &c. funestum præsagebant exitum: repetitis venæ sectionibus, tenuissima dieta, rara deligatione vulnerum, præter spem evasit tamen. Post septemdecim menses mania iterum correptus ex alto præcipitem se dedit, unde illico mortuus fuit. In cadavere inventæ fuerunt cicatrices sanatorum vulnere in hepatis lobo medio, intestino jejunum, & colo (a).

Canis majori intestinum tenue secundum longitudinem divisum fuit; reposito intestino, non confuto, futura clausum fuit vulnus abdominale; sine ullo molesto symptomate animal sanatum fuit (b).

Plurima similia apud observatores exempla occurrunt. Intestinis autem crassis & tenuibus integre discissis supervixisse homines, modo vulnere externo assueretur extremum intestini discissi, ut exitus pateret fœcibus, pluribus exemplis constitit; de quibus dicetur in vulnere abdominis. Requiritur tunc, ut à ventriculo ad locum discissum tanta supersit intestini longitudo, ut ex ingestis paratus chylus per vasa lactea & meseraica resorptus, nutritioni corporis sufficere possit.

(a) Acad. des Sciences l'an. 1705. Memoir. pag. 40. &c.

(b) Philosoph. transact. abridg. Tom. V. pag. 272.

VULNUS DUCTUS THORACICI, VEL ALVEI CHYLOSI. Omnis chylus, ex intestinis, per vasa lactea resorptus, & ingens copia lymphæ per lymphaticas venas in unum hunc alveum confluit: illo ergo læso, & contentum humorem dimittente, cessant omnes illi effectus, qui à chylo, sanguini misto, & vasorum & viscerum actionibus ulterius perficiendo, pendent; deficit nempe nutritio. Verum quidem est, venarum meseraicarum oscula undique hiare in intestinorum cavo, & resorbere partem tenuissimam chyli, rectaque via ad hepar deducere; album autem chylosum succum solæ venæ lacteæ dictæ ex intestinis hauriunt, sed non videtur sustineri vita posse, si solæ venæ mesentericæ ebiberent tenuissima tantum, chyli autem admissio in sanguinem impediretur. Pulcherrimis experimentis demonstravit Lowerus (a) nihil chyli per venas meseraicas resorberi. Canis thoraci, in dextro latere intra duas costas inferiores aperto, digitum immisit, & ungue velut in ferram resecto, commune chyli receptaculum tribus à pastu horis valde turgidum perfregit: confuto dein vulnere, animal, licet cibo saturaretur quotidie, intra paucos dies exspiravit. In cadavere ventriculus & intestina repleta, vasa lactea chylo turgida apparebant; in ductu thoracico nihil chyli reperiebatur, sed in pectoris illa parte, cui vulnus inflictum fuerat, binæ chyli libræ repertæ sunt. In altero cane pectus sinistrum perfodit inter tertiam & quartam costam superiorem: immisso per vulnus digito laceravit truncum factum ex binis ductibus chyliiferis in hoc animali adunatis: eventus fuit similis. Ut autem certus esset, dilaceratum fuisse ductum thoracicum, aperto post mortem animalis abdomine aquam siphone injecit in ductum chyliiferum; quam vidit totam per vulnus factum dilabi in pectoris cavum. Dum autem animali, sic vulnerato, post diem unum aut alterum, paucis horis post largum cibum sumptum, aperta vena sanguis mitteretur, nihil chylosi apparebat in sanguine; uti aliter in simili casu semper invenitur.

Ex his experimentis concluditur, chylum non ingredi venas meseraicas; & ingressu chyli in sanguinem impedito, vitam diu sustineri non posse.

Rarius accidit, in homine per vulnera solum ductum thoracicum lædi: mediis enim fere vertebrarum corporibus incumbit, medio inter venam sine pari à dextris & aortam descendantem à sinistris, loco, sic ut aorta pro maxima parte ipsi incumbat: deinde assurgens pergit supra corpora vertebrarum sub œsophago, sub arcu venæ Azygos; inde supra corpora vertebrarum sinistrorsum inclinatur, pergit sub carotide sinistra usque ad medium ultimæ cervicis vertebræ; ibique arcus forma incurvatus sinistrorsum deorsum tendit, & terminatur in venam subclaviam sinistram. Toro ergo hoc decursu tutissime reconditur, & maximis vasis adjacet: hinc vix lædi potest, quin & aliæ vulnerentur partes; à quibus læsis mors sequi poterit.

Habetur tamen apud Bonetum (b) Exemplum vulnerati, cui, ex symptomatibus vulnus sequentibus, ductus thoracicus læsus fuisse videtur. Nobili Baroni circa mediam dorsi vertebram sclopeto vulnus infligitur, globo subter sinistram scapulam exeunte: initio non adeo male se habuit vulneratus, consueta tantum vulnorum symptomata passus. Post quatuordecim dies observatur in linteis copiosus albicans humor, per intervalla rediens: debilis inde manet & macie conficitur, licet appetitus foret integerrimus. Vixit sic per plures menses, & incepit per binas septimanas

(a) De corde &c. pag. 229. &c. ad 237.

(b) Sepulchren, s. Anat. Practicæ, Lib. IV. pag. 360.

effluxus illius humoris cessare. Genio indulgens, calidioribus imprimis usus, subita commotus ira, Epilepticis insultibus afficitur, postea hemiplegia lateris sinistri correptus perit. In cadavere pulmones, illa parte, qua vulnus inflictum fuerat, insigni putredine correpti apparebant.

Magna suspicio adest, ductum thoracicum læsum fuisse; cum autem vitam tam diu protraxerit, forte non penitus destructum. Præterea ductus thoracicus in suo decursu sæpe bifurcatus insulas quasi format: forte talis bifurcationis unus ramus læsus fuerat. Fateor meras tantum hæc esse conjecturas, cum & mortis genus, & pulmonis corruptio doceant, non à sola læsione ductus chyliiferi momentum fuisse vulneratum.

§. 171. **V**ULNERA sua natura lethalia, arte vero curabilia (152) sunt, prædicuntur:

1. Vulnera Encephali terebra levanda.

Sequitur nunc altera classis vulnerum, illorum nempe, quæ mortem inducunt; & certam quidem, si sibi relinquantur. In arte tamen cognita sunt auxilia, quibus adhibitis mors, horum vulnerum effectus & sequela, præcaveri posset.

Primo loco inter illa numerantur vulnera Encephali: Generale hoc nomen comprehendit omnia illa, quæ calvariæ cavo continentur. Notum jam est ex Anatomicis & Physiologicis, calvariæ cavum naturaliter exactissime plenum esse: simulac ergo mutata figura cranii angustatur spatium, vel fractis vas effusi humores colliguntur sub integro cranio, necessario mollis encephali fabrica comprimitur, læduntur omnes functiones, quæ inde pendent, tandem & destruuntur penitus.

Si jam cranium intropressum, vel effusi humores compresserint encephalon sua copia; vel denique corrupti mora eroderint sua acrimonia tenerrimam hanc pulsam, unde tota vita & humanitas pendent, mors secuta erit effectus talis vulneris. Sed si humores effusi hæreant in tali loco calvariæ, ut per terebram apertura facta potuissent tolli, apparet facile, potuisse servari vulneratum: & uti postea in Capitulo de vulneribus Capitis dicetur, plurima sunt talia observata, homines ab effusis humoribus compresso cerebro jam apoplecticos factos fuisse, qui trepano applicato & eductis extravasatis liquidis fuerunt sanati.

Bina ergo requiruntur in tali vulnere, quod nempe causa mortis secutæ evidens fuerit inventa humor extravasatus comprimens encephalon, & quod hæserit effusum liquidum in tali loco, unde potuisset tuto educi.

2. Vulnera arteriæ, venæve majoris in loco, ad quem manus Chirurgi pervenire potest.

Maxime necessarium est Chirurgo, ut cognoscat decursum arteriarum & venarum majorum, imprimis in artubus: in cavis enim corporis hærentes magni trunci vasorum, si vulnerati fuerint, ipsius manum non admittunt. Et imprimis requiritur, ut cognita sint illa loca artuum, ubi magnæ arteriæ & venæ decurrunt adeo nudæ, ut comprimi possint. Talia sunt in artubus superioribus loca subaxillaria, anterior & superior ossis humeri pars, ubi arteriæ magnus truncus ad nudum fere os subjacens comprimi potest, sicque facile omnis hæmorrhagia à vulnere locis in-

ferioribus inflicto sisti potest. In artubus inferioribus talia loca sunt in interiori & anteriori fere media femoris parte, uti & sub poplitibus. Omnibus his locis splenia apposita, tornatili machina hodie adeo cognita (*tournequet*) appressa valide, truncos vasorum sic comprimunt, ut omnem sanguinis transitum impedian. Sic lethalis Hæmorrhagia præcavetur, & datur opportunitas Chirurgo, ut suppresso sanguinis fluxu, & dilatato, si opus sit, vulnere, arteriam vulneratam possit invenire, & inventæ idonea remedia, ligaturam &c. applicare. Hinc videtur hodie nullum artuum vulnus fere absolute lethale dici posse per hæmorrhagiam, quia per artem cognitam potest compesci per compressionem truncorum, in locis imprimis subaxillaribus & in inguinibus; & si tunc arteria vulnerata tam profunde hæreat, ut ligari nequeat, exstirpatio membri adhuc superest, qua vulnerati vita servari potuisset. Dum autem majorum vasorum decursum ignorant Chirurgi, omni molimine per ligaturas, stipticos absorbentes pulveres, uti gypsum &c. impediunt, ne sanguis ex læso vase erumpens per vulneris aperturam exire possit, qui tunc totum panniculum adiposum implet, & postea corruptus horrenda putredine omnia depascitur, uti tristissima docuerunt Exempla.

3. Viscerum, ad quæ manus & medicamenta cum effectu sanationis pervenire possunt.

Nisi certis experimentis constitisset, tuto fieri posse, quis crederet, viscerum etiam vitalium partes, vulnere nudatas, abscindi posse, ne postea corruptæ mortem inducerent. Celsus (a) jam audacter pronunciaverat: *si quid aut ex jecinore, aut pulmone duntaxat extremo dependeat, id pracidatur*. Unicum sufficere memorabile admodum exemplum, quo constabit, sæpe talia curari posse, si manibus datur accessus, quæ fere desperata haberentur: Infigebatur homini ingens vulnus sub papilla sinistra: temulentus ille neglexit vulnus: postridie pulmonis pars tres transversos digitos æquans hiante vulnere prorupit. Temerarius ille vulneratus neglexit omnino tam grave vulnus, nihilque applicuit; &, bidui itinere quamvis abisset, Amstelodanum se contulit, ibique in valetudinarium receptus fuit. Ilico emortua jam pulmonis pars, filo prius constricta, forcice abscindebatur, quæ lanci imposita tres circiter pendebat uncias. Decimo quarto die vulnus jam coaluerat, nihilque supererat mali præter levem tussiculam, non semper sed subinde duntaxat molestam. Sic per sex annos supervixit, quocumque locorum navigans, & ebrietati indulgens dissolutissimæ vitæ homo. In cadavere nihil mali inventum fuit, nisi quod pulmo vulneris loco accreverat, unde tamen nihil incommodi, præter levem illam tussiculam, passus fuit (b).

Præcedentis paragraphi numero quinto recensebantur bini illi casus, ubi ventriculi gravissima vulnera, à perito Chirurgo per suturam unita, fuerunt sanata. In vulnerum abdominalium historia patebit, viscera abdominalia læsa sic, ut effuso sanguine, vel contentis suis, in cavum abdominis mortem inducerent, ligari posse, vulneris margini assui &c.

4. Quæ mortem inferunt emissio suo liquido in cava illa, unde id

(a) Lib. V. cap. 26. N°. 24 in fine. pag. 195.

(b) Tulpii observat. Med. Lib. II. Observ. 17. pag. 128

educi sine discrimine vitæ potest; ut thoracis, abdominis, ureterum, vesicæ, intestinorum quædam vulnera.

Multa vulnera sunt lethalia, non ob copiam sanguinis effusi, sed quia sanguis extravasatus, mora & calore loci corruptus, putrida labe exedit & tabefacit viscera, quæ alluit. Sic v. g. vulnerato thorace post magnam hæmorrhagiam vulneratus in animi deliquium labitur, vasa discissa se contrahunt, & cessat omnis sanguinis effluxus. Interim sanguis in thoracis cavo hæret, qui ibi manens corrumpitur, & vicinum pulmonem exedens lenta tabe hominem conficiet. Idem in abdominis cavo verum est. Sed paracentesis in thorace & abdomine institui potest, & sic effusus sanguis educi, omniaque hæc mala præcaveri. Si vero ureteri, vel vesicæ fundo, tale fuerit inflictum vulnus, ut urina in cavum abdominis effluat, pariet facile, urinam, jam ex sua indole in putredinem pronam, longe citius putrescere, hincque omnia contenta abdominis lædi summopere. Sed poterit, perforato abdomine educi omne, quod ibi collectum hæret liquidum, & cathetere flexili vesicæ immisso impediri, ne urina in vesicæ cavo colligatur, sicque illam distendat; unde, contracta semper manente vesica, vulnus inflictum facilius consolidabitur. Si vero ureter discissus fuerit,educta prius urina in cavum abdominis effusa, siccissima tunc diæta adhibita, magna spes est, ureteris extremum abscissum consolidari posse. Peribit quidem sic usus renis, sed plurima docuerunt observata, alterum renem posse vices supplere, integra satis sanitate. Calculo enim impacto & obstruente omnino ureteris unius cavum, constitit, homines diu supervixisse, altero rene integro, & tunc plerumque multum aucto in mole sua.

Novimus autem urinam in cavum abdominis effluere, ex vulneris loco, si nulla vel paucissima tantum emingatur urina, & tumore quotidie aucto distendatur abdomen.

Idem jam & in quibusdam vulneribus intestinorum verum est, de quibus postea dicetur in vulneribus abdominis,

§. 172. **P**RÆDICITUR lethale fore ex non lethali (153)
per has causas.

1. Omissione purgationis effusi puris, unde tabes purulenta; vel effusi sanguinis, hinc putrefacti.

Sub hac classe comprehenduntur illa vulnera, quæ tales lædunt partes, quarum integritas tolli potest, superstitæ vita; post quæ vulnera tamen mors aliquando sequitur, non ex vulnere ut causa, sed quia vulnerati incuria, vel medentis errore vel imperitia, vel alio morbo, non à vulnere orto, vel denique propria vulnerati idiosyncrasia, talis accidit mutatio in corpore, unde functiones ad vitam requiitæ abolentur. Possunt autem hæc commode reduci ad quatuor sequentia capitula.

OMISSIONE PURGATIONIS EFFUSI PURIS, UNDE TABES PURULENTA. Ex illis, quæ dicta sunt §. 158. N°. 7. constitit, in omni vulnere alicujus momenti pus nasci; imo hoc requiri, ut separentur illa, quæ vulneris consolidationem impedirent. Si jam vulneris talis sit conditio, ut pus factum in vulnere decidat in cava corporis loca, vel, nimis diu relictum in vulneris superficie, attenuatumque,

forbeatur per aperta venarum orificia, poterit totus sanguis infici purulenta cacochymia, unde febris hectica, & lentus marasmus. Si jam apparet, pus in cava corporis loca delapsum potuisse sine periculo educi, vel puris resorptionem potuisse impediri idonea vulneris depuratione, constat, mortem secutam non adscribendam esse vulnere, ut causæ, sed omissioni purgationis puris effusi. Dum post magnas extirpationes latum vulnus quotidie ingentem copiam puris colligit, magna sæpe oritur in cura difficultas: si enim sapiens de die depuretur vulnus absterfo pure, impeditur consolidatio vulneris, quod tunc in fonticuli quasi naturam degenerat, & incredibilem copiam liquidi plorat; sicque ægri marasmo vero contabescunt, nullo vitio hærente in humoribus vel solidis partibus, tantum ideo, quia nimia puris confectio tantum perditur de corporis nutrimento, ut marcescant reliqua. Si vero diu rectum maneat vulnus, retentum in superficie vulneris pus, mora & calore corporis attenuatum & acrius redditum, resorbetur venosis osculis apertis, miscetur sanguini, purulentam cacochymiam & tabem inducit; vel per metastasin ad viscera nobilia delatum necat. Qualia exempla plurima frequenter in praxi occurrunt.

VEL EFFUSI SANGUINIS, HINC PUTREFACTI. Dixerat Hippocrates (a). *Si in ventrem sanguis effusus fuerit præter naturam, necesse est suppurari.* Galenus ibidem in commentariis suis monuit, quosdam hunc Aphorismum legere sic, ut non haberetur *ἐν τῷ κοίλῳ* sed sine articulo *ἐν κοίλῳ*, & tunc significaretur sanguinis effusio in quodcumque cavum; addiditque, illorum sententiam confirmari, quia additur in hoc Aphorismo *præter naturam*. Tuncque sensus hujus Aphorismi esset, quod sanguis ex suo loco naturali effusus in quodcumque cavum corporis suppurari deberet. Monuit etiam ibidem Galenus, suppurationis nomine hic intelligi omnem sanguinis corruptelam, non autem tantum conversionem in pus proprie dictam. Si aëri liber accessus detur, sanguis in cava corporis effusus putrescit satis cito, & corrumpendo vicina viscera; vel resorptus putrida acrimonia destruendo tenerima vitalium viscerum vascula, mortem infert. Si vero aëri nullus accessus detur, diu sine corruptione manere potest, imo sensim attenuatus iterum resorberi sine noxa, uti sæpe post validas contusiones apparet, quando sanguis, vas fractis sub cute integra effusus, per mensem & ultra sæpe hæret; sensim iterum disparsens sine ullo malo. Ubi ergo sanguine effuso in cava corporis, aëris simul libero accessu facto, mors sequitur; & in cadavere non invenitur vulnus fuisse ex sua natura lethale, mors adscribenda est huic causæ: si nempe per artem tuto sanguis effusus potuisset educi.

2. Commisso vitio in sex rebus non naturalibus.

Ex Pathologicis notum est, res non naturales dictas in sex classes dividi, sunt enim: aër; cibus, potus, motus, quies; animi affectus; retenta excreta; somnus, vigilia. Hoc autem nomine vocantur, quia usu vel abusu, bonæ naturales, aut malæ contranaturales fieri queunt: Prudens Medicus omnia hæc dirigit, à nocituris abstinere jubet vulneratum, profutura commendat. Si jam vel Medici incuria, vel vulnerati obedire nolentis culpa, committantur vitia in usu sex rerum

(a) Aphor. 20. Sect. VI. Charter. Tom. IX. pag. 259.

non naturalium, poterit vulnus, minime ex sua natura lethale, sic mutari, ut mortem inferat. Innumera habentur apud Autores observata, quæ hoc probant evidentissime: pauca quædam notasse sufficiet.

Dum in castris vulneratos milites curabat Paræus, doluit quam maxime, quod ad singulas tormentorum bellicorum explosiones vulneratis recrudescentes hæmorrhagiæ: imprimis autem inde lædebantur illi, qui capitis vulneribus decumbebant: unde omnia augebantur symptomata, & mors accelerabatur plurimis (a). Puero annorum quatuordecim bregmatis os confractum fuerat, extracta fuerant ossicula quam plurima, febris dolor & reliqua symptomata cessabant, spes optima integræ curationis affulgebat. Pater pueri, quamvis severissime prohibuissent Chirurghi, prope cubiculum decumbentis permisit rusticis debacchantibus, ut tympana pulsarent, fistulas inflarent, saltarent &c. Postridie miser puer acutissima febre, delirio, spasmo, nausea corripiebatur, & quarto post die mortuus est. Pater, re ad magistratum delata, graviter multatus fuit (b). In simili casu, dum decimo quarto post vulnus capiti inflatum die omnia se optime habebant, subita commotus ira puer, valida corripitur febre, & phrenitide periit quarta die postea (c).

Nobili viro læva manus amputata fuerat à dexterrimo Chirurgo: vulnerè jam fere sanato, uxorem interpellavit: illa à Chirurgo monita recusavit: vulneratus sine coitu semen emisit; protinus recidit in febrim, deliria, spasmos, & alia gravia symptomata, & quarta die obiit (d). Ex his observationibus satis patet, quanta cum cautela tractandi sint gravibus vulneribus decumbentes, quam severe monendi, ut obediant, nisi temeritatis pœnas mortis periculo luere velint.

13. Neglectu, vel errore Chirurghi.

Observationes medicæ plurimæ docuerunt, & quotidiana exempla confirmant, capitis contusiones & levia satis vulnera, dum negligentius tractantur, dira symptomata, & mortem ipsam produxisse. Quot perierunt vulnerati hæmorrhagiis, qui servari potuissent, si arteriarum trunci, in locis illis ubi nudi fere hærent, idonea ligatura compressi fuissent! Quantus numerus vulneratorum perit post conflictus bellicos, dum Chirurghi obruti multitudine negligentius tractant singulos! Nec minor vulneratorum perniciēs turpibus debetur erroribus. Militis dextro pectori sub mamma magnum infligitur vulnus: sanguinem cum tussi per os rejicit: imperitus Chirurgus vulneris labia futura unit: sequenti die advocatur Paræus: invenit febrim validissimam, respirationem & loquelam difficillimam, sic ut mortem instare merito metueret. Discidit ilico suturam, digito per vulnus immisso thrombum vulneris orificium obturantem removit, elevatis pedibus, capite demisso, clausis ore & naribus vulnerati eduxit de pectoris cavo octo uncias sanguinis jam corrupti & fœrentis; injectionibus deterfit thoracis cavum, & eduxit reliquos grumos; sicque ultra spem vulneratus convaleuit: qui prioris Chirurghi turpissimo errore periisset certissime (e). Quam horrenda aliquando orta sunt mala, dum caustica acerrima tendinosi & membranosi partibus applicuerunt Chirurghi. Exci-

(a) Les Oeuvres d'Ambroise Paré Lib. X. Chap. XIV. pag. 231.

(b) Hildan. Observ. Chirurg. Cent. 1. Observat. 20. pag. 25.

(c) Ibid. Observat. 17.

(d) Ibid. Observat. 25.

(e) Les Oeuvres d'Ambroise Paré Liv. X. Chap. 32. pag. 251.

derat barbitonfori tuberculum ad apicem dextri pollicis Hildanus : rudis ille sibi persuadens radicem mali nondum esse extirpatam , crudo vulnere nonnihil Arsenici applicuit : mox dolor ingens , febris , vigiliæ , anxietas , animi deliquia , corripuerunt incautum , sic ut de vita periclitaretur : tamen evasit , sicque in propria pelle didicit , in aliena cautius postea mercari (*a*). Habetur & ibidem aliud exemplum mortis secutæ , in robusto Helveto , medio ætatis flore , ab imprudenti applicatione Arsenici ad tumorem cancrosum manus carpum obsidentem. Nec solis rudibus in arte hominibus contingunt errores , sed & exercitatissimi aliquando doluerunt , talia sibi accidisse. Ut hoc demonstretur , sufficiet solius Hippocratis exemplum , qui ingenue fatetur , se deceptum fuisse , dum in capitis vulnere non distinxerat ossis lationem , putans futuram esse , & hinc crediderat ægrum sectione non indigere , qui decimo sexto die periit , sero nimis adhibita sectione (*b*). Dum Medicorum principi tale quid accidere potuit , unusquisque nihil humani à se alienum credat , sed omni cura adhibita errores prudenter evitet. Si jam talis error à Chirurgo vel Medico commissus detegatur , æquitas jubet , ut Judicibus indicetur , ne alieni erroris pœnam luat ille , qui vulnus inflixit.

4. Temperie naturali aut morbosa ægri , vel manifesta juxta historiam ejus ægri , vel aliquando adeo singulari , ut non nisi hoc eventu se manifestet. Quam intentus observet semper in suo rescripto ad Judices consultus Medicus.

Maximi momenti est in vulnere renuntiatio ad ipsam temperiem vulnerati attendere ; & tamen hoc sæpe vilipenditur omnino : In plurimis locis publica auctoritate constituti sunt quidam Medici & Chirurgi , qui cadavera occisorum lustrant , & illa , quæ viderunt , ad Judices renunciant. Sed Medicum vel Chirurgum , qui vulnerato adfuit , sapissime non consulunt , ut ex illis cognoscant , quid de ægri temperie , morbis prægressis , symptomatibus post vulnus inflictum secutis &c. observatum fuerit. Omnia tamen hæc videntur admodum necessaria esse , ut fidelis fiat de vulnere renunciatio. Multi enim homines adeo facile irritabile habent totum systema nervosum , ut levissima de causa spasmo , tetano , similibusque malis corripantur : Alii , dum sanguinem alieno de vulnere exsurgentem vident , in syncope delabuntur. An non admodum probabile videtur , etiam à levi vulnere in talibus hominibus gravissima symptomata , imo mortem ipsam produci posse ? An mors secuta tunc soli vulnere ut causæ adscribi debet ? Persarum Rex ludens cum concubina , quam maxime deperibat , pugionis aciem versus ejus præcordia dirigit , dumque illa nudum pectus simulatis ictibus exponit , stomacho læditur , sed exiguo sane & oculis vix conspiciendo vulnuscule. Tamen repente prolapsa dicto citius expiravit (*c*). Præterea in nonnullis morbis circa finem vitæ nihil fere sanguinis superest in corpore : sic in phtisicis post mortem sæpe paucæ tantum uncie sanguinis inveniuntur. Si jam tali homini per leve vulnus pauculum illud , quod superest , sanguinis subducatur de corpore , certa mors sequetur , sed non pendens à solo vulnere.

(*a*) Hildani Observ. Chirurg. Centur. VI. | Tom. IX. pag. 340. 341.
Observ. 80. pag. 607.

(*b*) Hippocr. Epid. Lib. V. N°. 22. Chart. | pag. 19.

(*c*) Amœnit. exoticar. Engelbert. Kaemfer.

Notum est, Luem Veneream, & scorbutum pessimum, ipsam durissimorum in corpore ossium substantiam sic erodere, ut penitus cariola facta à minima vi frangantur; si ergo in tali casu calvaria levi percussione capitis fracta mortem fecerit, non pendebit hoc à sola causa vulnerante. Sed hæc & alia similia cognosci possunt ex illis, quæ in ægri corpore observata sunt, antequam vulnus inflictum fuerit. Forte longe alia latere possunt, quorum nullum unquam apparuit indicium, & quæ tantum vulneris inflicti occasione manifestantur. Dum enim evolvimus illa, quæ in cadaveribus repentina morte extinctorum invenerunt Observatores, videmus sæpe à latentissimis causis uno instanti mortem secutam fuisse; cum tamen nihil in sanitate læsum ullius momenti apparuisset ante mortem. Si jam tali homini paulo ante mortem vulnus inflictum fuisset, perperam adscriberetur vulnere mors secuta, pendens ab alia longe causa. *Fine namque vita nostra variis & occultis causis exposita, interdum quadam immerentia supremi fati titulum occupant: cum magis in tempus mortis incidant, quam ipsam mortem accersant (a).* Unde in similibus casibus debet renunciari ad Judices, vulnus inventum fuisse tale, ut mors secuta post vulnus, non videatur adscribi posse vulnere ut causæ. Sic suo munere functi sunt Medici & Chirurghi; reliquum ad Judices pertinet.

§. 173. **H**INC renunciatio de Vulneribus, definitio temporis, intra quod lethalitas determinatur, peti possunt.

Judices, antequam de pœna percussoribus infligenda decernant, solent Medicis ac Chirurgis committere curam, ut in cadavere occisi inquirent, an mors, secuta post vulnus, à vulnere facta fuerit. Illi accurate notant, quas corporis partes per vulnus læsas invenerint; deinde communi consilio concludunt, an vulnus fuerit absolute lethale, an vero ex sua natura quidem lethale fuerit, per artem tamen hodie cognitam mors præcaveri potuisset; denique an vulnus læserit tales partes, quarum integritas non absolute ad vitam necessaria erat, & tamen ex singulari idiosyncrasia vulnerati vel incuria, vel neglectu aut errore illorum, qui curæ vulnerati præfuerunt, mors secuta fuerit. Hæc omnia rescribunt ad Judices, & hæc vocatur renunciatio de vulneribus. Apparet hinc, quanta cautela hic opus sit, dum imperiti sæpe, quando cadaver examinant, non tam lustrant vulnera, quam faciunt. Quantum fieri potest, inquirendum in figuram & magnitudinem instrumenti vulnerantis; in situm vulnerati & vulnerantis, dum vulnus infligebatur; in symptomata omnia, quæ vulnus inflictum ad mortem usque secuta sunt.

Præterea consideranda sunt omnia illa, quæ vulnerato acciderunt, vel applicata fuerunt, postquam vulnus inflictum fuerat. Tunc denique prudenti sectione investigatur, quousque & per quas partes penetraverit instrumentum vulnerans. Tandemque ex cognito usu partium læsarum concluditur, an mors secuta adscribi debeat vulnere inflicto ut causæ, an non.

Non videtur autem facile determinari posse, quo temporis spatio lethalitas vulnorum limitetur. Plurimis hominibus insedit hæc opinio, quod si ultra novem dies supervixerit vulneratus, tunc mors postea secuta minime possit vulnere adscribi; & contra, si ante hoc tempus moriatur vulneratus, tunc vulnus inflictum fuisse ne-

(a) Valer. Max. Lib. IX, cap. 12.

cessario & absolute lethale. Sed arteria major, in brachio vel crure discissa, poterit paucarum horarum spatio, imo & citius, hominem è medio tollere; cum tamen hoc vulnus non absolute lethale sit, sed per artem curari potuisset. Sic & effusus in calvaria sanguis, si hæreat tali in loco, ex quo per artem educi nequit, nec tamen tanta ejus copia sit, ut comprimendo omnem encephali usum statim turbet; potest ibi per septimanas hære, sensim corrumpi, & dein eroso cerebro, cerebello, vel medulla oblongata, mortem facere: & tale vulnus jure merito lethale renunciabitur, licet tam diu supervixerit æger. Si intestinum tenuius integre discissum fuerit in loco non admodum distante a pyloro, poterit vita protrahi per multos dies, donec nutritionis defectu sensim contabescat vulneratus; & tamen tale vulnus erit absolute lethale. Ex quibus satis apparet, nihil certi posse definiri quoad vulnorum lethalitatem ex temporis intervallo, quod vulnus inflictum & mortem secutam intercessit.

§. 174. **E**X historia pariter Vulnerum (ab 145. hucusque.) facilis erit prædictio eventuum aliorum, qui (169) præfagiendi habentur.

Paragraphus 169. agebat de Prognosi vulnerum: ibi enim determinabantur illa; quæ vulnere cognito, tanquam sequelæ hujus, præcognosci poterant futura. De vita vel morte vulnerati dictum fuit §. 170. 171. 172. Reliqua circa sanationem possibilem vel impossibilem, facilem curationem vel difficilem, & effectus vulneris post ipsam sanationem superstites, ex ipsius vulneris natura bene cognita evidenter deducuntur. Dum enim quis ex Anatomicis & doctrina usus partium intellexerit, quænam partes læsæ fuerint, quænam functiones abolitæ vel depravatæ sint, poterit determinare, an curatio possibilis sit vel non, an facilis vel difficilis, an aliquid læsum manebit in functionibus post sanatum vulnus &c. In Exemplo res patebit. Si vulnus inflictum fuerit dorso manus, novit Medicus ex Anatomicis tendines musculorum digitos extendentium hic locari, jubet vulneratum digitos erigere; si jam videat, quod indicem omnino erigere nequeat, concludit, tendinem, ex unitis tendinibus muscoli extensoris communis & indicatoris dicti muscoli conflatum discissum esse: si jam possibile sit, tendinis dissecti extrema posse iterum adduci, & uniri sibi invicem, curationem difficilem, integram tamen, promittere poterit. Si vero hoc fieri nequeat, tuto prædicet, curato vulnere indicis erectionem abolitam fore semper, nec ulla arte restitui posse. In similibus præfagiendis cautum imprimis esse oportet & Medicum & Chirurgum, quia omnia mala, quæ post curationem vulneris remanebunt, illis adscribentur, nisi antea præmonuerint, hæc certo remansura, vel saltem metuenda esse.

§. 175. **P**hænomenon autem (158. 159.) causa patet perito actionum vitalium, & animalium. Vid. Morb. Solid. & fluid. in genere præmissos.

Omnia hæc in paragraphis citatis ad singulos numeros explicata fuerunt summam tantum hæc repetere sufficiet. Patuit enim quod illa vis, qua cohercebant par-

K k ij

tes unitæ, pergens agere retrahat utrumque extremum; hinc necessario augebatur vulneris hiatus, eo magis, quo firmiter fuerat antea partium cohesio: hinc in robustis & exercitatis hominibus vulnerum labia omnium maxime à se mutuo recedunt. 2°. Minuta causa distendente vasa, per liberum sanguinis effluxum ex iisdem vulneratis, propria contractilitas vasorum prævalebat sensim magis & magis, donec integre fere clauderentur. 3°. Sanguinis autem nostri talis indoles est, ut extra vasa dimissus cito concresecat, unde à sanguine extravasato, dissipata simul liquidissima parte, crusta talis sanguinea vulneris cavo innascebatur. 4°. Contractis autem vasorum discissorum aperturis, crassissima pars retinetur, tenuior adhuc pergit effluere; unde liquor dilutus rubellus effluit, postquam sanguinis fluxus desinit. 5°. Cum autem vasa sanguinea discissa sic contrahantur, ut non amplius sanguinem rubrum dimittant, idem fiet in serosis, lymphaticis, & aliis decreescentium vasorum seriebus; unde nascetur horum vasorum obstructio, & vitali impetu à tergo urgente in obstructos vasorum fines, fiet horum dilatatio, & omnia quæ inde sequuntur, ut inflammatio, dolor &c. Interim laxa pinguedinis membrana, cutis cohercentis vinculo libera in vulneris loco, sponte assurgit in vulneris fundo, dilatabitur, & prominebit, labia vulneris retorquebit &c. 6°. Si autem vulnus fuerit alicujus momenti, à dolore & inflammatione fundi & laterum orietur febricula, quæ suppuratoria Chirurgis dicitur: quæ si non nimis vehemens fuerit, semper boni ominis est. 7°. Hinc tunc labia & fundus vulneris antea sicca & inflammata sub hac febricula incipiunt humescere, tenue liquidum fundere, quod mora & calore mutatum, distillata parte liquidissima in blandum, spissum, cremoraceum quasi humorem transit, pus dictum. 8°. Simul extrema vasculorum inflammatorum officina, una cum immeabili liquido, obstruente, separantur, una cum humoribus effusis miscentur, & pus constituunt; sic vasis iterum liberis redditis, separato omni illo, quod vitali humorum circuitui resisteret, liber fit humorum transitus; calor, dolor, tumor &c. cessant, vel minuuntur plurimum. 9°. Puris sic redditus per supurationem fundo & labiis vulneris, natura, quæ sibi sola sufficit, à fundo sursum, ab ambitu versus centrum extendit vasorum extrema, occurrentibus aliis unit, sicque restituit illa, quæ in vulnere de corporis substantia perdita erant. 10°. Incipiunt dein margines vulneris album subcærulescentem colorem induere, siccari, cicatricem facere, quæ ab omni ambitu centrum versus aucta quotidie, tandem vulnus claudit: tunc sanatio peracta est.

§. 176. **T**UNICÆ arteriarum exteriores, illæsa interiori; punctæ, sectæ, tussæ, distractæ, erosæ, impetu sanguinis dilatantur, saccum formant, qui ad ovi sæpe magnitudinem crescit; callosos parietes accipit; pulsatur; colore rubello splendet; compressus evanescit; laxatus redit; suam arteriam ampliat; vicina vasa comprimendo angustat. Aneurisma verum vocatur (160), ejus causa, signa, effectus sponte cernuntur. Atque eo quoque refertur cordis aneurisma, ejus ortus, signa, & effectus.

§. 159. & 160. dictum fuit, quænam sequantur mala, quando arteria integre discissa est, vel quando vulnus in cavum usque arteriæ penetrat, licet illam inte-

gre non disciderit. Hac paragrapho expenduntur illa mala, quæ metuenda sunt, quando arteriæ sic vulnerantur, ut vulnus non penetret in illarum cavum, sed tantum tunicas exteriores dividat. Constat enim ex Anatomicis, arterias, majores imprimis, satis crassas habere tunicas, quarum exterior plerumque communis membranae, cavum corporis, per quod arteria pergit, investientis propago est; cui cellulosa tenuis subjacet, per quam vasa plurima, arteriarum nutritioni inservientia, decurrunt: huic glandulosa dicta supponitur, forte prioris pars: tunc sequitur muscularis tunica, crassa & fortis, in plures lamellas separabilis, orbicularibus fibris constans: ultima, internum arteriæ cavum constituens, tenuis est, fibris longitudinalibus conflata.

Dum sanguis vi cordis in arterias semper plenas pellitur, observatur manifeste illas dilatarî per totum ambitum æquabiliter: firmitas tunicarum arteriam constituentium resistit nimia dilatationi: & cessante cordis actione vi orbicularium imprimis fibrarum contrahuntur iterum in pristinam dimensionem. Si jam in quodam arteriæ loco, separata cohæsiione imprimis fibrarum orbicularium (nam læsio tunicae externæ & cellulosa videntur minus periculosa) minuatur firmitas laterum, causa distendens manens eadem illo in loco plus dilatabit arteriam, mutabit æquabilem figuram conici canalîs, expandet locum illum debilitatum in saccum: tunc vocatur *Aneurysma verum*, propria vocabuli vi designans tantum dilatationem arteriæ.

Causa ergo aneurysmatis est omne illud, quod cohæsiionem tunicarum in quodam arteriæ loco minuit: & observata docuerunt, hoc imprimis accidere dum arteriæ sunt *puncta vel secta*, uti sæpissime constitit. Dum enim vena secatur, accidit aliquoties, ut adjacens arteriæ ramus lanceolæ cuspide simul vulneretur: paucis diebus postea incipit tunc emergere tumor cutim elevans, pulsans manifeste, auctus quotidie, nisi in initio circumductis fasciis & splenio applicato compescatur.

T U S Æ. Et hoc observatum fuit, validam contusionem arteriæ produxisse aneurysma. Homo 45 annorum sanus & fortis, cum per publicam viam incederet, fortuito à quodam ex ludentibus sphaera buxea vehementer percussus fuit in læva dorî parte; domum redux partem læsam diligenter observari curat; præter contusionis indicia nihil mali invenitur, sed mansit per quatuor annos leviter molestus tantum in loco percusso sensus. Post tantum temporis intervallum, incipit conqueri de profunda pulsatione in illo loco, sensim aucta, quæ cordis ictibus responderet: paucorum mensium spatio elevatis & corrosis costis, cum dolore acerbissimo luctabatur æger. Audacissimus Empyricus persuasit misero, profundum latere abscessum, aperuit locum, undatim profuso sanguine ilico mortuus est (a). Similem casum vidi, ubi à sola contusione aneurysma ortum fuerat. Homo pusillæ staturæ, vesperi per tenebras incedens, palo impingit validissime dextrum pectus; acerbum dolorem se in suprema pectoris regione sensisse testabatur, qui tamen brevi postea cessabat. Post aliquot menses insolitam pulsationem incepit sentire sub dextra clavicula, sensim auctam; à minimo corporis motu anhelabat, imo sub finem vitæ fere suffocabatur: sic per annum languens subito periit. In cadavere vidi, arteriam subclaviam dextram in saccum ingentem dilatatam, sic ut aneurys-

(a) Lancisius de motu cordis & aneurysmatibus pag. 235.

maris hujus membrana chartæ tenuitatem superaret, & per illam pellucidam contentus sanguis conspici posset: levi vulnere inflicto, ingens copia sanguinis concreti erupit.

DISTRACTÆ. Plurima talia occurrunt apud Observatores exempla, dum post validos nixus, pondera ultra vires sublata, sternutationem, tussim validam &c: arteriæ distractæ in Aneurismaticos saccos degeneraverint. Unicum Exemplum adduxisse sufficet. In venatu homo subitissime caput in dextram partem flexit, & non nisi magna cum difficultate illud potuit reducere; ab illo momento languit semper, deglutitione, & respiratione multum impeditis. Post quindecim menses elapsos moritur: in cadavere reperitur aorta admodum dilatata, & ingens sacculus aneurismaticus in arteria subclavia dextra (a). Equi illi, qui in magnis Emporiis trahis illis tam magna pondera vehunt, & per acclives pontes soleis ferreis, eminentibus aculeis donatis, tanta vi ascendere coguntur, sæpissime in cruribus posterioribus habent aneurismata, & varicosos venarum tumores. Simile infortunium & in bajulis frequenter observatum fuit.

EROSÆ. Novimus, in morbis adeo degenerare posse humores, ut acerrimi facti durissimas etiam partes corporis erodant. Scorbuto durissimi eroduntur dentes; lues venerea maxima & fortissima etiam corporis ossa in cariem convertere potest; cancrum virus vicina omnia dira tabe peredit. Sic in scorbuto videmus toties, exesis vas, effusum sub corporis integumentis sanguinem lividas illas maculas facere; imo toties lethales inde factas hæmorrhagias notant Auctores. Intelligitur hinc facile, tunicas majorum arteriarum sic erodi posse, ut in sacculum aneurismaticum extendantur. Bina talia habentur apud Lancisium (b) exempla, ubi tumor Venereus claviculam occupabat, & vicina arteria subclavia erosa aneurisma nascebatur.

A quacumque jam ex enarratis causis arteria in quodam loco debilior facta fuerit, illo in loco plus cedit distendenti sanguini, & expandetur, cumque singulis cordis ictibus causa illa distendens applicetur de novo huic loco debilitato, augebitur aneurismatis capacitas, unde in immanem molem sæpe aneurismata expanduntur, imprimis si in magnis arteriarum truncis fiant. Sic vidit Ruyschius (c) hominem, qui in pectore gerebat sponte factum aneurisma tantæ magnitudinis, ut pulvinar mediocri, quo in sedili utimur, (denti quatuor angulis, rotundum enim erat,) æquaret. In cadavere apparebat, aortam tribus digitis transversis supra cor, in tam magnum aneurisma degenerasse. In maximis aneurismatibus sæpe apparuit, membranas extensi talis sacculi esse crassissimas, cum potius videretur distracta membrana tenuior fieri debere. Hoc autem videtur fieri, quia sanguis in dilatatum hunc sacculum aggestus in polyposas concrevit massas, quæ applicatæ tunicæ arteriæ dilatatæ illius crassitiem immaniter possunt augere: sic in ingenti illo aneurismate vidit Ruyschius, innumerabiles tunicas, crassas, carnosas, satis tenaces, & sibi invicem impositas auxisse crassitudinem membranæ, sic ut inter has tunicas sanguis copiosus & coagulatus delitesceret: exterior tamen tunica, quæ aortæ dilatata membrana erat, straminis tantum crassitiem habebat, omnis reliqua moles à concretionibus illis polyposis pendebat.

(a) Acad. des Sciences l'an 1700. Hist. pag. 80.

(b) De motu cordis & aneurismatibus p. 256.

(c) Observat. Anatom. Chirurg. Centur. Observat. 38.

Quæritur quam maxime, quibus signis cognosci possit, & ab aliis tumoribus distinguatur, Aneurysma: cum observata plurima docuerint, satis cateroquin peritos hic turpissime erravisse, & imprudenter pertuso aneurysmate pro remedio mortem intulisse. Cognoscitur adesse, si causæ memoratæ prægressæ fuerint, tumor dein oriatur in tali loco, ubi per Anatómen novimus magnam arteriam adesse; si pulsus manifestus in tali tumore percipiatur; si leni pressione evanescat vel minuatur plurimum, mox redeat ad pristinam magnitudinem, ubi pressio cessat. Notandum autem, colorem cutis raro mutari ab aneurysmate, nisi diu duraverit, & magnum valde fuerit; tunc enim erosa, vel per distractionem attenuata cute, color ruber conspicitur. Præterea pulsus in Aneurysmate incipiente & parvo semper adest, ubi in majorem molem excrevit, sæpe pulsus non animadvertitur: partim ob crassiores factas aneurysmatis tunicas; partim quia impetus sanguinis à corde propulsi non adeo valide agere potest in magnum aneurysma, ut illud elevetur singulis cordis ictibus. Dum autem comprimitur aneurysma, imprimis si magnum fuerit & cordi vicinum, nili lenissime & sensim fiat, summum discrimen est, ne subito suffocetur æger; dum concretus sanguis ex aneurysmatis cavo expressus sanguini ex corde per arteriam pulso sic resistit, ut cordis motus suffocetur subito: nec magnum Aneurysma compressum manu simul, & semel liberandum est, sed sensim, aliter in animi deliquium cadunt, sanguine subito in vacuum hunc saccum ruente. Ideo compresso aneurysmate majori, statim ægri de intolerabili oppressione circa pectus conqueruntur. Ubi autem Aneurysma in interioribus latet, difficilius cognoscitur. Causæ tamen cognitæ si prægressæ fuerint, insolita pulsatio percipiatur ab ægro, cordis motus turbetur, & aucta sanguinis velocitate per motum muscularem, vel aliam quamcumque causam, suffocetur fere; admodum probabilis suspicio habetur, Aneurysma in interioribus corporis partibus latere.

Mala autem producta ab Aneurysmate pendent inde, quod tumore suo vicina comprimendo illorum actionem turbet vel impediat, quod arteriæ cavum mutet, & æquabilem sanguinis circuitum per illam tollat; unde & cordis actio tandem multum impeditur. Hinc apparet, diversissimos morbos ab Aneurysmate posse fieri; omnia tamen mala inde orta semper eo pejora fore, quo Aneurysma majus, & cordi magis vicinum fuerit.

Altera malorum, ab Aneurysmate factorum, origo pendet ex eo, quod liquidum in sacco Aneurysmatico contentum incipiat degenerare. Sanguis enim in Aneurysmate majore fere quiescit, saltem tardius movetur: hinc minus atteritur, minusque calet; sicque nascitur dispositio ad illam sanguinis degenerationem, quæ fit à minuto motu & calore. Incipiunt nempe nasci polyposæ concretiones; quæ semel natæ habent vim associandi sibi ex sanguine affluente similes partes ad augmentum prioris massæ, uti dictum fuit (§. 2. N^o. 2.) Unde in majoribus Aneurysmatibus dissectis sæpe non invenitur multum sanguinis, sed mira sæpe textura polyposa ex sanguine stagnante nata, quæ debilem hunc arteriæ locum suæ substantiæ applicatione sic firmat, ut non tam cito rumpatur, sic ut sæpe diu vita adhuc sustineri possit. Tandem illud ex sanguine concretum, una cum sanguine inter lamellatam polyposam substantiam stagnante, incipit corrumpi, acrimoniam solventem acquirere adeo mirabilem, ut vasa vicina, membranas, cartilagine, ossa durissima consumat penitus. Historiæ Medicæ plenæ sunt talibus observatis. Ruyschius in observatione paulo ante memorata invenit, ab ingenti illo Aneurysmate,

omnes fere costas, & sterni os, in nihilum fuisse quasi redacta. Dum autem sanguis corruptum illud, in sacco expansi Aneurismatis hærens, continuo præterlabitur, incipit putrida cacochymia nasci; unde febris hæctica sensim corpus depascens oritur. Talem enim habuisse exitum magna Aneurismata, constat ex observatis Medicis; nisi suffocata circulatione, vel rupto Aneurismate, perierint agri, antequam contenta in hoc sacco ad illam malignitatem pervenerint.

Subitanæ tamen mortis periculum instat, à ruptura talis sacci Aneurismatici; sic enim minuto temporis pereunt, ubi minime cogitatur. Memorabilis talis habetur casus (a). Militi post violentam tussim tumor oriebatur in parte inferiori, & anteriori colli, immediate supra sterni emarginationem: mollis erat, rotundus, sine colore cutis mutato; pulsabat, cedebat digito prementi, mox rediens ablata pressione. Per sex septimanas tantum gellerat hoc Aneurisma, inopinato undatim prorumpente per os sanguine intra spatium unius minuti horæ perit. Post mortem omnis tumor colli evanuerat, & inveniebatur Aneurisma, trachæ adhærens, per foramen inter sextam & septimam cartilaginem asperæ arteriæ patulum, sanguinem in cavum trachæ effudisse.

Dum Aneurisma in interioribus corporis partibus hæret, ubi non datur manibus accessus, angusta spes curæ est: totum quod fieri potest, est ut debilitata vita per venæ sectiones, & tenuem dietam, minuatur circulationis impetus & velocitas; sic enim Aneurismatis incrementum prohibebitur, quantum fieri poterit; summa simul quiete corporis & animi imperata ob eandem causam. Ubi manibus accessus datur, si nondum in formidabilem magnitudinem increverit Aneurisma, à prudenti compressione aliquid sperari potest: ubi tunc notandum, quod maxime conducatur arteriam supra Aneurisma pariter modice comprimere: sic impetus sanguinis per hanc arteriam minuitur, & compresso Aneurismate non tam facile sanguis regurgitabit cor versus. Ubi à compressione nihil sperari potest, vel frustra jam adhibita fuit; sola Aneurismatis extirpatio superest, quam feliciter institui posse, docuerunt observata. Talem casum narrat Ruyschius, ubi felix eventus fuit, licet brachium jam gangræna correptum esset (b).

A T Q U E EO QUOQUE REFERTUR CORDIS ANEURUSMA, EIUS ORTUS, SIGNA; EFFECTUS. Cordis Aneurisma vocatur prænaturalis dilatatio cavitatum ejus: qui morbus satis crebro occurrit, licet forte non adeo exacte descriptus fuerit. Facile concipitur, quod omnia illa mala possint & cordi contingere, quæ arterias reddunt Aneurismaticas, tunicis illarum exterioribus per vulnera, contusiones, distractiones, erosiones, destructis vel labefactatis. Observationes enim, in cadaveribus factæ, docuerunt, vulnera huc penetrasse, inflammationes, suppurationes, erosiones &c: hic inventas fuisse. Nauta post febrim continuam, hæmoptilin, difficilem respirationem, tandem post diras toleratas anxietates moritur. In cadavere inveniuntur pulmones pure crasso infarcti; Pericardium sanguine grumoso sic distentum, ut dimidium thoracis spatium expleret. Cordis substantia exterior ubique exulcerata, & quasi à vermibus profunde excisa. Imo cor adeo defiguratum apparuit, ut nec auriculæ inveniri, nec vasa egredientia majora facile discerni potuerint (c). Sed præter has causas, alia adhuc occurrunt, à quibus frequentius

(a) Acad. des Sciences l'an 1733. Mémoires | Observ. 2.
pag. 153.

(b) Observ. Anatom. Chirurg. Ceurus.

(c) Acta Physico-Medica &c. Tom. II.
pag. 47.

nascitur

nascitur cordis dilatatio praternaturalis. Cordis enim actio in hoc consistit, ut receptum ex venis in cava sua sanguinem valida contractione urgeat in arterias totum, sic ut singulis cordis contractionibus integre evacuentur cordis cava. Debet ergo cordis vis superare posse resistantiam arteriarum: si autem à quacumque causa aucta fuerint hæ resistantiæ eo usque, ut cordis vires superent, non poterit cor evacuari integre, accumulabitur sanguis sensim in cordis cavis, quæ inde dilatabuntur. Sed in corde observatur illa mirabilis proprietas, qua etiam post mortem, aqua tepida vel flatu solo per venas pulsas in ejus cava, excitatur in contractionem: ideo sanguine non integre expulso ex cavis ejus, irritatum cor frequentius contrahitur, ut expellat contenta, uti evidenter apparet in ultima illa mortis lucta, quando cor non amplius valet in arterias sanguinem expellere, tunc enim celerrime palpitat, donec tandem insuperabili victum obstaculo quiescat. Dum autem validis illis & frequentissime repetitis nixibus cor superare tentat has resistantias, fibræ constituentes latera cavorum cordis distrahuntur validissime, dum contentum cavis fluidum, non potens exprimi, compressum instar durissimi corporis resistit: hinc debilitatur fibrarum nimis distractarum cohesio, unde augebitur dilatatio cordis in suis cavis.

Apparet ergo, quod non requirantur adeo magnæ causæ ut cor Aneurismaticum fiat, dum enim cordis vis potest superare resistantias arteriarum, manet æque magnum in suis cavis; simul ac prævalent resistantiæ hæ cordis viribus, incipient dilatari ejus cava.

Potest jam hæc cordis dilatatio fieri vel in solo dextro cavo, impedito libero transfluxu sanguinis per arteriam pulmonalem: vel poterit hoc fieri in corde sinistro, posito impedimento quocumque in arteria aorta: vel dum bina hæc simul concurrunt, dilatatio fiet in utroque cordis cavo simul. Notandum tamen hoc est, quod, impedimento nato in pulmonari arteria, cor dextrum solum præternaturaliter distendi posset, corde sinistro non mutato in sua capacitate: ubi vero cor sinistrum non valet expellere suum sanguinem, non poterunt venæ pulmonales depleri in cor sinistrum; hinc nec arteriæ pulmonales tradere possunt suum sanguinem venis pulmonalibus: augebitur hinc resistantia cordi dextro, unde & illud ab iisdem causis poterit dilatari. Accedit, quod cor dextrum, longe debilius sinistro, cedat facilius causis distendentibus; unde, cæteris paribus, frequentius dilatabitur, & in majorem capacitatem poterit distendi.

Plurima jam observata docuerunt, in cadaveribus cor sic dilatatum inventum fuisse: pauca annotasse sufficiet. Puer jam à quinto ætatis anno asthma correptus laboraverat, plurimis incassum adhibitis usque ad decimum quartum ætatis annum miseram protraxit vitam, tandem suffocatus periit. In cadavere cor invenitur accretum Pericardio, & cavum utrumque cordis immaniter auctum (a). Juvenis post enormes cordis palpitationes moritur, sinistrum cavum cordis invenitur triplo majus dextro cavo (b). Ibidem & ex Dionysio habetur, quod auricula dextra inventa fuerit adeo dilatata, ut recens nati infantis caput æquaret. Homo 34 annorum post validas & diuturnas palpitationes cordis moritur, invenitur cordis ventriculus immaniter dilatatus, in sua substantia tamen æque crassus, ac natura-

(a) Medical. Essays vol. 2. pag. 313.

(b) Abridgement Tom. V. pag. 219.

liter esse solet. Aorta erat ossea facta in ipso egressu ex ventriculo cordis sinistro (*). Vir 25 annorum, cursor, pallidus, anhelosus, subita laborat angina, à qua sanatur quidem, sed manet spirandi difficultas, & cordis palpitatio sæpe recurrens, imprimis cum citato gressu procederet: tandem subita morte exstinguitur. In cadavere invenitur cor triplo majus, quam naturaliter esse solet; ablato Pericardio, & expresso omni cruore libras duas cum dimidia in lance pendens (†): tamen in hoc homine sinistrum cor dextro duplo latius erat.

Omne ergo illud, quod resistentias sanguini ex cordis cavis pulso auget, poterit præternaturalem cordis dilatationem producere. Nimia humorum copia in plethoricis, augmentum velocitatis in morbis acutis, immeabilitas sanguinis per arteriarum fines à diathesi inflammatoria, polyposa, atrabilaria &c; vicia arteriarum, per quæ liber sanguinis transitus per illas impeditur, uti sunt illarum nimia callositas; degeneratio in cartilagineam, imo osseam substantiam, Aneurysmata &c; præcipuæ causæ sunt, à quibus cava cordis ultra naturalem suam dimensionem dilatantur. Inter rariores autem causas meretur referri, quod aliquando aer in cordis cavis repertus fuerit, immaniter illa distendens. *In muliere subito mortua reperitur cor stupenda magnitudinis, ab aëre, quo plenum erat, absque ullo fere sanguine; id quod palam factum cuspide cuspelli: eo enim adactò tam subito subsidebat cor, ac vesica aëre repleta, & cuspide cuspelli attracta (b).* An forte calore aucto, per velocissimum animale motum, vel & per morbos, sanguis aërem contentum dimittit, qui in cavis majoribus collectus & rarefactus distendit omnia?

Malum hoc præsens, vel saltem metuendum esse, novimus, si continuæ palpitantes cordis adsint; si signa docuerint, pulmonem impeditum esse sic, ut libere non transmittat sanguinem: si pulsus durus valde & plenus cum anxietate intolerabili ad motum auctum adsint; tunc in aorta obstaculum tale hæerere non sine ratione concluditur.

Turbatur tunc miris adeo modis circulatio, oriuntur tam varia & tam stupenda phænomena, ut naturæ leges superare videantur: pulsus vacillat omni modo, nunc deficiens, nunc iterum validissime insurgens, respiratio difficillima fit; terribiles sæpe convulsiones oriuntur, dum cor quiescit, & paulo post validissimo spasmo contrahitur: sic enim uno momento sanguinis motus per arterias encephali cessat, mox velocissimus fit, unde turbatur tam mirifice spirituum secretio & motus. Omnes sæpe sensus externi & interni turbantur, intolerabilis anxietas, & frequentissima fit lucta vitæ cum morte; donec tandem hæc tantis malis finem imponat.

Simul apparet, quare post asthma diu toleratum, & morbos inflammatorios validos pectoris &c; sæpe tam luctuosa mala supersint.

Ubi natum fuit hoc malum, nihil fere boni sperari potest, semel enim nata debilitate cordis, necessario augetur difficultas removendi obstaculum; unde crescit atrox malum, & augentur omnia symptomata, imprimis si vita fuerit actuosior. •

Totum, quod ars efficere poterit, est, ut mali incrementum differat aliquatenus, & tolerabilem magis vitam reddat miseris. Hoc fiet, si vita instituaturs adeo

(*) Acad. des Sciences l'An 1735. Hist. pag. 127. 128.

(†) Lancisus de subitaneis mortibus pag. 29. (b) Ruysch. Epist. Problem. 16. pag. 112

quieta , ut non fiat major motus cordis , quam qui ad vitam continuandam omnino est necessarius : absoluta hinc mentis & corporis quies requiritur. Debet ingeri magna copia potus tenuissimi , serum lactis , hydrogala mellita , aquæ spædanæ cum lacte , præcipua sunt. Cibus parvus , blandus , tenuis , repetitis vicibus parca quantitate exhibeatur , ut parum blandi chyli sanguini misceatur , & omnia stimulantia evitanda sedulo. Medicamenta dentur talia , quæ diluunt sanguinem , aperiunt vasa , lubricant vias ; ut expeditissima fiat humorum dilutorum per vasa lubricata & aperta circumductio.

§. 177. **S**I ab iisdem causis , similiter vulnerata arteria , curata debilius firmatur , eadem fiunt (176).

Dum in ardentissimis morbis , pertinacissimis & chronicis (maxime capitis) doloribus , arteriam temporalem secant Chirurghi , maximam semper curam adhibent , ut arteriæ vulnus , postquam debita copia sanguinis effluerit , imposita lamella metallica vel simili quocumque sic firment , ut sanguinis impetus , arteriam singulis cordis ictibus distendentis , non possit incipientis cicatricis rudimenta extendere ultra æquabilem arteriæ dimensionem , & Aneurisma facere : quæ compressio arteriæ vulneratæ si negligatur , fere semper tale malum fiet. Frequenter hoc observatum fuit , dum infelici casu in flexura cubiti una cum vena pertunderetur arteria vicina , nec idonea pressione firmaretur hoc vulnus : quod etiam multo difficilior hic fit , quam in temporibus , ubi arteria læsa ad duram calvariam sic premi potest , ut nullus maneat Aneurismatis futuri metus. Unde satis tuto in hoc imprimis loco institui potest Arteriotome , à qua forte nimis abhorrent sæpe Medici , cum tamen à perito Chirurgo sine discrimine fieri posset , & aliis remediis frustra tentatos debellaverit sæpissime morbos , uti plurimis observatis demonstravit SEVERINUS (a). Videantur & illa , quæ dicta sunt de Aneurismate ex hac causa nato in commentariis ad §. 160.

§. 178. **U**BI ab iisdem causis (176) omnes tunicæ simul ruptæ liquorem effuderint in partes vicinas distentas , nec exeuntem , fit collectio extravasati cruoris , continenter aucta , & sine mensura , mollis , vix pulsans , livida , compressu vix evanescens , brevi putrescens , hinc gangrænam vicinorum creans. Aneurisma spurium est , (160) cujus causa , signa , effectus ex ipsa hac descriptione cognoscuntur.

Si jam arteria sic læsa fuerit , ut , soluta coæssione laterum , contentus arteriæ cavo sanguis possit exire ; cute tamen integra , vel ejus vulnere per pinguedinem , aut sanguinem coagulatum ocluso , coërceatur effusus ex arteria sanguis ; ille viam sibi faciet in panniculo adiposo , quem replebit , & in maximum sæpe tumorem attollere poterit ; sanguine enim continuo expulso per arteriam ruptam , augebitur distendens moles , donec cutis cedere amplius nequeat , vel vicinæ partes impediant

(a) Marci Anselmii Severini de efficaci Medici. Lib. I. part. 1. pag. 40. &c.

ulteriorem sanguinis in panniculo adiposo collectionem ; vel coagulati sanguinis thrombus arteriæ læsæ aperturam claudat. Post validas contusiones sæpe maximi tales tumores oriuntur , lividi , imo sæpe omnino nigri , à sanguine extravasato & coagulato per cutim pellucente. In scorbuticis , erosis vasīs , similia sæpe mala apparent : sed cum in minoribus arteriis hoc plerumque fiat , non adeo in tumorem attollitur pars , sed maculæ planæ nigricantes nascuntur. Quam enormes autem inde nasci possint tumores , unico exemplo demonstrasse sufficiet. Juvenis septendecim annorum vulnerabatur sclopeti globulo femur penetrante , ad octo digitorum transversorum distantiam ab inguine. Mox aderat valida hæmorrhagia , quæ apparatu Chirurgico imposito coerceretur : sequenti die apparebat ingens tumor cum pulsu tam valido , ut ambas manus impositas attolleret : sanguis interim per vulnus ad tres vel quatuor uncias sæpe effluebat , dein sponte iterum sistebatur. Sic ad quadragesimum usque diem ab inflicto vulnere res se habuit. Comuni tunc consilio , licet febris & collapsæ vires ægri summum indicarent periculum , conclusum fuit locum affectum aperiendum esse , & arteriam vulneratam ligandam , ut coerceretur hæmorrhagia. Inciso loco , ingens grumosi sanguinis moles in conspectum venit , quam propriis manibus SEVERINUS abstulit , pondere sex libras æquantem : mox arteria vulnerata , hoc pondere comprimente liberata , cum saltu sanguinem emisit. Peritissimus Chirurgus semilaceram arteriam ligavit utrimque , & post sex hebdomadas vulneratus integre sanatus fuit , sic ut femur vulneratum nec mole minus , nec robore debilius manserit (a). Docet hæc historia , quam immani copia sanguis possit colligi in panniculo adiposo , & quam longo tempore extravasatus sine corruptela maneat , modo acri non detur liber aditus.

Quia jam tumor talis quædam habet communia signa cum Aneurismate proprie dicto , ideo vocaverunt eodem nomine ; ut tamen distinguerent , dixerunt *Aneurisma spurium*. In vero enim Aneurismate tunicæ arteriæ , debilitatæ quamvis , manebant tamen cohærentes , & sanguinis impediabant exitum ; in spurio autem ruptæ tunicæ sanguini liberum concedebant. Vocabulo minus ambiguo utebantur Veteres , dum tale malum appellabant *εὐρύμα* , quam plerumque una cum contusione & ruptione incidere dixit Galenus (b) ; quamvis & per anastomosin , diapedesin , & anabrosin aliquando fieri moneat. Tumores minoris molis , ab effuso sub cute integra sanguine , hoc nomine adhuc hodie solent vocare Chirurgi : si à majori arteria lacerata tumor insignis molis fiat , imprimis si aliquis pulsus in tali tumore percipiatur , solet Aneurisma spurium vocari.

Aneurismatis mentio non fit apud Hippocratem , quantum novi ; sed definitio Aneurismatis , quam Galenus habet (c) potius conveniret spurio hodie dicto Aneurismati. Dicit enim : *Arteria autem aperta affectus Aneurisma vocatur : fit autem , quum illa vulnerata ad cicatricem quidem pervenit circumposita cutis , manet tamen vulnus arteria , nec coëuntis , nec cicatrice obducta , nec carne obturata*. Signa tamen , quibus hunc affectum distinguit ab aliis tumoribus præter naturam , potius Aneurismati vero conveniunt. Addit enim : *Dignoscuntur huiusmodi affectus pulsibus , quos edunt arteria ; sed & , quum comprimuntur , tumor omnis delitescit , sub-*

(a) Ibid. pag. 51.

(b) Method. Med. Lib. IV. cap. 1. Charter.
Tom. X. pag. 70.

(c) De Tumoribus præter naturam cap. 11 ;
Charter. Tom. VII. pag. 319.

stantia , qua ipsum efficit , in arterias recurrente ; quam alibi ostendimus , tenuem esse & flavum quemdam sanguinem tenui & copioso spiritui permixtum : hic vero sanguis longe calidior est illo , qui in venis continetur , & vulnerato Aneurismate erumpit , ut vix sisti possit.

Causa ergo Aneurysmatis spurii poterit esse omne illud , quod continuitatem laterum canalisi arteriosi solvit , integra interim manente cute ; vel saltem sic obturato cutis , si adsit , vulnere , ut sanguinis effluentis liber prohibeatur exitus : unde in cellulosa tunicam aggestus tumore distendit partem.

Maximi autem momenti est distinguere Aneurysma spurium à vero ; unde signa illa accurate cognosci debent. Novimus Aneurysma spurium adesse , ex causis prægressis , imprimis validis contusionibus , quod longe velocius sit tumoris incrementum in Aneurismate spurio , quam in Aneurismate vero. Deinde quod tumor non ita distinctis limitibus circumscribatur , quia per tunicam cellulosa quaquaversum dispergitur : in Aneurismate vero autem dilatatis arteriæ tunicis limitatur tumoris ambitus. Præterea Aneurysma verum , saltem in initio antequam in formidabilem molem excreverit , manifestum pulsum , arteriæ pulsibus respondentem , habet ; Aneurysma spurium non adeo manifestum , licet tamen hoc aliquando fallere posset , uti in Historia ex SEVERINO modo allegata patuit. Aneurysma verum , nisi jam maximum fuerit , si prematur , omnis tumor evanescit , sanguine pulso in arteriæ cavum : hoc in Aneurismate spurio non ita fit , illud enim pressum cedit quidem , sed tumor tunc in vicinia augetur. Deinde color cutis in Aneurismate vero , saltem in initio , raro vel nunquam apparet mutatus , in Aneurismate spurio sanguis , sub cute effusus , alieno colore cutim deturpat.

Effectus Aneurysmatis spurii præcipui sunt , quod effusus sanguis mole sua aliena loca occupans vicinarum partium actionem impediat , & tandem mora corruptus talem possit acquirere acrimoniam , qua inflammationes , gangrænas , & erosiones pessimas faciat. Si autem aeris accessus prohibeatur , diu incorruptus manere potest effusus sanguis , imprimis si talia applicentur fomenta , quæ putredini quam maxime resistunt. De his autem , & de cura similium malorum dicetur §. 334. & sequentibus.

§. 179. **A** LII effectus arteriæ dissectæ majoris (161) ex physiologia sponte intelliguntur , ut & phænomena (162) primo nervi dissecti.

Omnia hæc explicata sunt in commentario §. 161. 162.

§. 180. **U** T vero clara causa habeatur mirabilium effectuum ; qui in nervis punctis , vel partim dissectis apparent , juxta dicta (163. 164. 165.) sequentia consideranda ex Anatomicis , & Theoreticis.

Nihil magis mirabile habetur in observatis Medicis , quam quod in homine sanissimo levis punctura nervi turbet omnia in toto corpore sic , ut nihil de pristi-

L l iij

na sanitate superfit. Immanis enim dolor, acutissima febris, deliria, convulsion-
nes, inflammationes, suppurationes molestissimæ, gangræna, mors ipsa sequun-
tur aliquando leve adeo vulnuscum. Sed & tota historia Medica docet, muta-
tione levissima nervis inducta, aliquando turbari mirifice omnes corporis actio-
nes.

Titillatio v. g. ad plantas pedum quantas potest inducere mutationes! substi-
liunt ilico omnes fere musculi & tendines totius corporis, invito risus extorque-
tur, resolvuntur statim omnes vires; atque etiam convulsionem, & mortem ipsam,
à tam levi causa secutam fuisse constat. Imo semel hanc molestiam experto titil-
lationis minæ intentatæ similia producant. Simplex agitatio plumulæ in naribus,
vel faucibus, vermium reptatio in ventriculo, pituita ibidem fluctuans, levi tan-
tum mechanica mutatione nervis hic dispersis inducta, totum corpus adeo mirifi-
ce turbant.

Quamvis ex fabrica corporis, quatenus hodie cognita est, non possint explicari
omnia illa mirabilia, quæ à nervis mutatis fieri in corpore observantur; multum
tamen lucis illius cognitio affundet illis malis, quæ nervos vulneratos sequuntur.
Unde ex Anatomicis & Theoreticis hæc consideranda sunt.

§. 181. **N**ERVUS omnis visibilis est fasciculus minorum ner-
vorum, membranulis nexorum, arteriolis, venulis,
lymphaticis intertextis, una dein communi membrana vestitus.

Per omnia hæc vascula, nervum componentia, perpetuo fluit li-
quor suis canalibus proprius à corde, cerebro, cerebello, & me-
dulla spinali. His omnibus vis contractilis satis magna semper adest.

NERVUS OMNIS VISIBILIS &c. Agitur enim hic tantum de illis ner-
vis, qui oculis lustrari possunt. In illis autem, uti dictum fuit in commentario ad
§. 162, invenerunt Anatomici, quod possint separari in minores alios, qui sin-
guli iterum aliorum nervorum, sed longe minorum, fasciculi sunt. Leeuwen-
hoekius nervulum, pilo porcino non crassior, invenit ad minimum constare
triginta aliis minoribus, qui singuli propria iterum membrana vestiebantur; idem
postea & in longe tenuioribus vidit (a). Præterea vidit & vascula tenerrima
sanguinea inter medias has fibrillas decurrentia. Anatomicæ injectiones, in junio-
ribus imprimis corporibus factæ, docuerunt, vasa numerosissima per totam nervi
substantiam decurrere. Nervi ergo omnes visibiles minimam partem suæ molis de-
bent substantiæ nervosæ proprie dictæ, quæ medullæ cerebri & cerebelli, in ob-
longatam & spinalem dictam medullam collectæ, originem debet. Vaginulæ in-
vestientes minores fibrillas, nectentes membranulæ, vasa omnis generis per has
dispersa, præcipuam partem nervi visibilis constituunt. Sic defenduntur tenerrima
illa, & omnem captum fugientia vascula, & deducuntur tuto ad illa corporis loca,
ubi crassioribus involucris depositis nervi munere fungi debent. Nervus opticus,
membranis investientibus ab utraque cerebri meninge donatus, in suo decursu te-
nax & firmus apparet; ubi depositis his involucris in oculi fundo in tunicam reti-

(a) Tom. III. Epist. 36. pag. 350. & alibi pluribus locis;

nam expanditur, tam mollis est, ut nisi æquabili pressione ambientis liquidi sustineatur, collapsus informis muci speciem exhibeat. Per mediam tamen tunicam retinam numerosissima vasa arteriosa dispergi, docuerunt evidentissime Anatomicæ injectiones.

PER OMNIA HÆC VASCULA &c. Omnia hæc vascula, quæ nervum visibilem constituunt, accipiunt liquida proportionalia vi cordis & arteriarum pulsa: de illis autem vasculis, quæ tunicas investientes fibrillas nerveas constituunt, nullum videtur esse dubium, cum injectiones Anatomicæ doceant, arteriosos ramos impulsu liquidum huc deducere. Sed ipsos proprie dictos nervos pervios esse, & perpetuum tenuissimi liquidi per illos motum fieri, non potest ad sensus demonstrari. Si tamen consideretur, medullam cerebri & cerebelli, cortici vasculoso continuatam totam, impendi constituendis fibrillis nervosis, & in illas continuitatis porrectione abire; tantam copiam purissimi sanguinis arteriosi ad cerebrum ferri; destructa vel compressa medulla cerebri & cerebelli omnem functionem nervorum inde ortorum tolli; nervis in suo decursu ligatis omnem perire actionem sub ligatura, illam vero integram manere supra ligaturam; patebit satis evidenter, nerveas fibrillas subtilissimum fluidum, cerebri & cerebelli fabrica secretum, recipere, & deducere toto vitæ tempore per distinctissimos canaliculos ad singula corporis loca; ut motuum & sensuum adeo distinctæ operationes perfici possint.

Omnis ergo nervus visibilis læsus non patitur tantum, quatenus est nervus, sed etiam quia omnis generis vascula habet, quorum integritas & inde pendens actio per vulnus læditur.

Quia autem, in sua origine ex medulla encephali distinctissimæ fibrillæ nerveæ, in decursu propriis investiuntur membranulis, sicque manent separatæ à vicinis; & totus fasciculus nervorum constituens nervum visibilem involvatur communi tunica satis crassa, patet, quare omnis nervus visibilis tenax & durus appareat, licet illud, quod proprie nervus dicitur, mollissimæ encephali pulpæ propago sit. Tota ergo nervi visibilis contractilitas, qua discissi extrema resiliunt, a tunicis nerveas fibrillas investientibus, & valis per has dispersis, pendet.

§. 182. **E**RGO partes nervi integre dissecti à loco vulneris, versus firmas partes, quibus nectuntur, retrosiliunt, sub solidis ambientibus se recondunt, eorum vi comprimuntur, orificia claudunt sua, & suorum vasculorum, adeoque præter dicta (162) nihil damni.

Si jam nervus talis, descriptus præcedenti paragrapho, integre discindatur; tunica investientes singulas fibrillas, uti & involucrum regens omnes simul collectas, elasticitate sua & nexu cum vicinis partibus, retrahentur utrimque. Cum vero arteriæ satis etiam notabiles discissæ, retrotractæ, vicinorum pressione, sub quibus occultantur, & propria contractilitate sic claudantur, ut nihil sanguinis transmittant; patet satis, tenerrima nervosa vascula, uti & illa quæ per horum tunicas investientes feruntur, ilico claudi, nec amplius humores allatos transmittere posse. Omnes ergo functiones, quæ ab integritate horum vasorum pendebant, erunt abolitæ; hientque illa mala, quæ §. 162. enumerata sunt.

§. 183. **S**I sectus, vel punctus ita sit, ut nonnulli nervulorum dissoluti sint, qui uniti majorem componunt, partes solutæ retrocedentes (182) trahent minimas fibrillas, quæ neciebant nervulos inter se & vascula (181), unde fiet in his perpetua, lenta laceratio; adeoque dolor ingens, acutus, continuus. Partes vero adhuc cohærentes sustinebunt nunc solæ omnem vim, quam ante simul, ergo plus distrahentur, & lacerabuntur, adeoque acutissime dolebunt, & distractæ comprimuntur; ut transitus impediatur. Dum una pars soluta, altera cohærens, ita afficiuntur, vascula intermedia comprimuntur; ergo sanguis, lympa, spiritus sistuntur, urgentur, accumuluntur, unde circa partes inflammatio cruenta, lymphatica, & spiritiosa.

Inde nervi vicini, tendines, horum & nervorum vaginæ, musculi, vasa tenduntur, stringuntur, convelluntur, hinc cerebri, cerebelli, medullæ spinalis meninges trahuntur, vellicantur, cerebri actio turbatur.

Ex quibus sequitur series omnium phaenomenon (163. 164. 165.) naturali necessitate.

Si jam nervus visibilis, constans plurimis nervulis sibi mutuo accumbentibus; proprio involucro vestitis, & una communi membrana tectis, sic lædatur, ut quædam ex his nerveis fibrillis, sua adunatione majorem nervum constituentibus, discissæ fuerint, quibusdam integris relictis, peribunt omnes functiones, quæ ab integritate fibrillarum, nunc à cohæsiōe separatarum, pendebant. Præterea ex dictis §. 158. N^o. 1. separata hæc fibrillarum extrema recedent plus à se mutuo, sed hoc non poterit fieri, quin membranulæ necientes fibras nerveas sibi mutuo accumbentes distraherentur, & lacerentur; sicque acutus & continuus dolor oriatur. Fibrillæ autem integræ relictæ sustinebunt nunc solæ omnem illam vim quam antea unitæ ferre debebant, dum vario musculorum motu, articulorum flexionibus, extensionibus, arteriarum pulsu &c: mutatur situs partium: necessario ergo magis distraherentur, unde iterum ingens dolor nasci poterit.* Si enim concipiatur nervus integer constitisse centum fibrillis nerveis simul collectis in unum fasciculum, & quod per vulnus factum quinquaginta fuerint discissi, reliqui integri duplo plus distraherentur ab iisdem causis, quia dimidium cohæsiōis, qua resistebant causis distrahentibus, ablatum est. Demonstratum autem fuit §. 112. N^o. 3. omnem causam, quæ vasa distrahunt & elongat, minuere eorundem capacitatem, hinc obstructionem facere posse: unde iterum sequi possunt infinita mala. Sic incipimus videre, quænam mala fiant à nervis vulneratis, nec integre discissis tamen: discissæ enim partes resilientes utrimque contrahent orificia dissectorum vasculorum, & liberum humorum transitum per illa impediunt: cohærentes adhuc fibrillæ minus poterunt resistere causis distrahentibus; hinc elongabuntur, & minuent suorum vasorum diametros: unde & ab hac causa impediatur liber circuitus fluidorum per hæc vascula, & inde

& inde impetu vitalis liquidi à tergo urgente in loca obstructa fiet inflammatio : non tantum in majoribus sanguineis valis , sed etiam in reliquis decrefcentium ferrierum vasculis ad ultima subtilissima usque nempe nervosa , idem obtinere poterit. Quam enormes autem inde fieri possint dolores , docent Podagra , Rheumatismus , Arthritis , in quibus morbis tenerrima vascula inflammata exquisitos adeo cruciatus faciunt. Sed natam inflammationem sequi poterunt varii ejus exitus : qui iterum adeo diversi sunt , prout inflammatio in majoribus vel minoribus vasculis hæret. Post phlegmonem blanda suppuratio sequitur ; Erysipelas exulceratum , in minoribus valis hærens , tenue ichorosum liquidum fundit , Rheumatismus verus suppuratur nunquam ; Podagra in subtilissimis nervosis vasculis hærens consumit partes etiam solidissimas in calcem &c : unde iterum innumera mala oriri possunt.

INDE NERVI VICINI &c. Sic factum invenimus corpus humanum , ut unico nervulo læso partes vicinæ , imo aliquando & satis dissitæ , afficiantur. Dum dentis adamantina crusta fissa vel corrupta nudaverit fibrillas nerveas subtilissimas , per dentis substantiam internam dispersas , frigidi aëris attractus solus intolerabili dolore afficit non tantum dentem affectum , sed & totum latus capitis denti dolenti respondens ; & elevantur vicinæ partes sæpe in enormem tumorem : destructo nervo dolente per alcohol applicatum , vel & evulso dente affecto , cessat omne malum. Dum infortunato casu acus infixæ digiti ultimæ phalangæ tendinem læsit , mox dolor enormis per totam volam manus , carpum , cubitum , ad humerum usque perrexit , inflammatio sævissima , in subitam gangrænam tendens , omnia hæc loca occupavit : febris acutissima , phrenitis , convulsiones , mors tandem quarta die à tam levi vulnere secuta fuit. Similia plurima exempla apud Hildanum & alios observatores habentur , ex quibus patet , à levi punctura nervi , vel & tendinis , mox vicina omnia affici , dein corpus turbari in omnibus suis functionibus posse ad mortem usque. An autem propagatio mali in uno nervulo orti ad vicinos omnes & ad cerebrum usque fiat per continuationem membranarum investientium nervos , quæ cerebri meningum productiones habentur ; an vero hoc fiat irritatione ipsius substantiæ nervosæ propriæ dicendæ , quæ medullæ encephali propago est ; hic non disputo : sufficit post nervorum læsionem similia mala sequi , & forte utraque hæc causa concurrat. Sic membrana renum pelvim investiens per ureteres , vesicam , urethram , continuata propagine defertur ; dumque asper calculus in pelvis angustia hærens internam hanc investientem membranam vellicat , dolor sæpe in extrema sentitur urethra , & molestissima stranguria. Dum tendinea illa membrana musculos humeri & cubiti tegens lanceolæ cuspide in venæ sectione læditur , dolor , inflammatio & reliqua symptomata brevi se per totum hujus membranæ ambitum dispergunt.

EX QUIBUS SEQUITUR &c. Qui jam confert illa phænomena , quæ §. 163. 164. 165. recensita sunt , cum illis , quæ dicta sunt hac paragrapho & binis præcedentibus , sine difficultate videbit rationem , quare nervum læsum tot ac tanta mala sequantur.

§. 184. **E**T intelligitur, quæ, & cur punctura, laceratio, vulnus nervi adeo funesta? Item cur membranis, tendinibus, valisque multis eadem fiant.

Quo nervus magis tensus est, quo pauciores fibræ læsi nervi integræ remanserint, eo major distractio illarum, eo læviora symptomata nascentur, & acrior aderit dolor. Nervum autem minime tensum, vel & integre discissum, non sequentur tam dira mala. Membranis autem, cum nervos per suam substantiam dispersos plurimos sæpe habeant, similia accidere, nulli mirum videbitur, uti & tendinibus, qui muscularibus fibris continuati & hinc nervorum propagines videntur esse, ut dictum in commentario §. 164. Idem jam in valis obtinebit, ex membranis convolutis factis, per quas nervi pariter disseminantur, sensui, motui, & nutritioni inservientes.

Hactenus actum fuit de vulneris definitione, causis & effectibus, deinde enarrata sunt fideliter illa omnia, quæ vulnere simplici accidunt à primo momento, quo inflictum fuit, ad perfectam sanationem usque. Postea consideravimus, quænam vulnere accidant mala ab arteriis, nervis, tendinibus, membranis &c. læsis. Deinde tradita sunt illa signa, per quæ vulneris præsentia noscitur, & simul determinatur, quænam corporis partes per vulnus læsæ sint. Ex his tunc deducebantur illa, quæ de vulnere jam cognito erant præfagienda circa vitam vel mortem vulnerati, curationem brevem & facilem, vel difficilem & longam, & læsiones functionum post vulneris curationem superstites futuras. Postea ex fidelissimis observatis, & cognita humani corporis fabrica, determinatum fuit, quænam vulnera lethalia forent dicenda, & quibus sub cautelis: an nempe absolute lethalia essent, destructis per vulnus partibus necessario ad vitam requisitis, sic ut ab arte hodie cognita nullum posset auxilium expectari. An vero ex sua natura quidem lethalia, per artem tamen forent curabilia. Denique an mors secuta post vulnus penderet non à solo vulnere, sed ab aliis simul concurrentibus causis, à vulnere inflictio distinctis. Ex quibus intellectis patebant illa, quæ ad Judices renunciari debebant circa vulneris inflictio naturam & effectus. Tandem ex Anatomicis & Theoreticis ratio reddita fuit mirabilium effectuum, qui nervos punctos vel partim dissectos sequuntur. Superest nunc, ut de vulneris cura generali agatur.

§. 185. **U**T vulnus sanetur, opus erit:

1. Auferre ex eo illa, quæ, vel à liquidis & solidis corruptis, vel ab instrumento vulnerante, aut aliunde, ibi relicta adunationem impedirent.
2. Supplere perdita nova regeneratione ablati.
3. Unire separata, & in adunatione retinere.
4. Cicatricem naturali cuti simillimam obducere.

Sanatio, uti dictum in commentario ad §. 4. est mutatio corporis viventis talis, ut conditio corporea, quæ vocabatur morbus, tollatur, & restituatur illud, quod

ablatum faciebat morbum. Sed vulnus est soluta cohesio recens & cruenta partium mollium, à corpore duro & acuto facta. Sanatio ergo vulneris erit restitutio cohesionis naturalis partium per causam vulnerantem separatarum. Sive jam simplex adsit divisio partium antea coherentium, sive magna facta fuerit jactura substantiæ per causam vulnerantem ablata, vita superstes in vulnerato unit separata, restituit perdita (vide §. 158. N^o. 9.) inimitabili artificio. Medici & Chirurghi illa tollunt, quæ salutare hoc naturæ molimen impedire poterant, & suppeditant talia, quæ juvare possunt, hoc totum est, quod ars habet. Qui plus sibi sapere videntur, tentent in cadavere levis tantum vulnusculi consolidationem, applicent decantatissima balsama vulneraria, foveant calore repente sani corporis: Eventus docebit, naturam creati corporis sibi soli sufficere, sine hac nihil fieri posse per artem. Sequentibus numeris recensentur illa, quæ in omni vulnerum curatione semper requiruntur.

1. Omne, quod hæret in vulnere, alienæ à corporis nostri partibus naturæ, nunquam poterit concrelescere, & impedit semper partium separatarum unionem, quamdiu ibi hæret. Dum elevata cutis lanceola discinditur, & vulnere imponitur purissimo ex auro factus globulus, concrelescent nunquam vulneris labia, sed manebit ulcus per annos pus quotidie fundens: si tollatur illud peregrinum, nisi penitus callosa facta fuerint jam labia à continuo attritu ad durum hoc corpus, paucis diebus consolidabitur. Non refert jam, an illud peregrinum fuerit pars instrumenti vulnerantis, an aliud quid, quod una cum hoc in vulnus penetravit; an vero effusi humores, vel solidæ partes, à causa vulnerante sic mutata, ut amiserint illas dotes, quæ requiruntur, ut partibus vivis iterum uniri possint. In bellicis conflictibus globi sclopetis emissi, dum vestes penetrant, sæpe partem illarum simul in vulnus abripiunt; sicque talium vulnerum consolidatio per menses plurimos, imo per annos protrahitur. Nobilissimo viro sclopeti globo femur dextrum perforatur; os femoris à globo transeunte frangitur, restituebatur ab hoc vulnere sic, ut incedere potuerit; mansit tamen per viginti annos ulcus fistulosum, exeuntibus subinde ossis fragmentis. Postquam tanto temporis spatio toleraverat has molestias, aucto dolore & fere continuo reddito, ex consilio celeberrimorum Medicorum & Chirurgorum dilatatur cultro fistulosi ulceris orificium, extrahitur festuca ossea tres pollices longa, postea & tres aliæ: tandem in fundo ulceris invenitur portio panni ex femoralibus una tum globo vulnus ingressa. Aliquot diebus postea prodibant tria fragmenta ferrea rubigine obducta, quæ clavis, quam in saculo gestaverat æger illo die dum vulnerabatur, partes fuisse apparebant. Tanto temporis spatio hæc peregrina in vulnere latuerant, ejusque consolidationem impederant (*). Patet ergo hæc tollenda esse, si fieri possit.

2. Si jam vulnus factum fuerit cum magna jactura substantiæ, non poterunt labia vulneris uniri & concrelescere, nisi prius illud perditum fuerit nova regeneratione restitutum: nimis enim distant à se invicem, & licet vi facta per futuras vel Emplastra tenacia adducerentur sic labia vulneris, ut contigua fierent, maneret tamen sub labiis unitis cavum, in quod humores effusi colligerentur, & sinuosum facerent ulcus.

3. Notatum fuit §. 158. N^o. 1. quando phaenomena omnibus vulneribus com-

(*) Academie des Sciences l'an 1731. Memoires pag. 741. &c.

munia recenscebantur , quod partes corporis , inter quas , causa vulnerans adacta fuit , sensim magis magisque à se mutuo recedant : sed , ut vulnus cusetur , requiritur , ut partes separatæ iterum fiant contiguæ. Hic ars naturam adjuvat , uniendo partes separatas , & sic illas muniendo , ut maneant adunatæ.

4. Quod tamen sæpe fieri nequit , quando valida suppuratio multum consumsit pinguedinosæ tunicæ , vel magna pars cutis per vulnus ablata fuit : tunc enim semper cicatrix solidior , magis polita & splendens erit , quam vicina cutis.

Hæc sunt generalia indicata in omnium vulnerrum curatione , quæ quomodo obtineri possint , dicetur in sequentibus.

§. 186. **F**RAGMENTA impacta metallorum , lapidum , ligni , vitri , globi tormentorum , thrombi cruenti , caro mortua , vel membranæ , ossa fracta , primo tollenda , si proderit.

Casus illi in hodiernis bellicis conflictibus frequentissimi contingunt , dum tormenta bellica lapidum & metallorum fragmentis variis onusta (*mei Schroot geladen*) in adversos hostes exploduntur , & difficillimæ curationis vulnera faciunt. Omnia hæc in vulnere relicta , dum vulnus incipit tumere & inflammari , partes , quas tangunt , contundunt , callosasque reddunt , inflammationem augent , tandemque in fistulosa ulcera degenerare faciunt , non curanda , nisi per artem , vel per suppurationem in contiguis partibus excitatam , educantur. Idem verum est , si thrombi sanguinis concreti , vel partes solidæ corporis abscissæ , & ab omni nexu cum vivis partibus liberæ , in vulnere hæserint. Si enim v. g. ossis fragmentum adhuc co hæreat cum vivis partibus , spes est , quod iterum uniri possit. Semper autem advertendum est , quod si talium heterogeneorum in vulnere hærentium eductio non possit fieri , quin metuantur gravia inde secutura mala , tunc potius hæc relinquenda sunt , & naturæ committenda est horum separatio. Quomodo autem determinetur , an tollenda sint , an relinquenda , sequens docebit paragraphus.

§. 187. **C**ONSIDERATA natura vulneris , partis vulneratæ , materiæ impactæ , roboris ægrotantis , symptomatum secutorum , tolli , an relinqui debeant , judicatur.

In periculosis vulneribus imprimis summa cautela opus est , ut determinetur , an heterogenea in vulnere hærentia tollenda sint , an vero relinquenda. Si omnibus attente consideratis appareat , quod vulneratus , his eductis , commodius vel diutius victurus sit , tunc procul dubio tollenda sunt. Sed si vulneris ex scientia Anatomica , & functionibus læsis , talis conditio appareat , ut certa & satis subita mors timeatur merito , relinquenda sunt , ne mortis vulnus secutæ culpa imputeretur Medico vel Chirurgo. Desperatos enim non attingere melius est. Si pars vulnerata non possit instrumentis , ad educationem illorum , quæ in vulnere hærent , necessariis attingi sine periculo , relinquenda pariter : ut si v. g. circa loca admodum tendinosa , nervos majores , cerebrum ipsum , hæc peregrina hæreant , non sine magno discrimine tolli possunt. Sed & quædam corpora tutius relinqui possunt in vulnere , quam alia , prout diversa constant materia. Sic innumera observata docuerunt ,

globos plumbeos , per vulnus ingressos ; impune latuisse in corpore per plurimos annos , & miras postea sæpe fecisse vias , per quas tandem exirent. Ex cupro vel ferro si conflati fuissent , rubigine corrupti irritassent longe plus partes , quibus accumbunt. Simul ratio haberi debet virium vulnerati : si enim pulsus debilis , frigus extremorum , pallor cadaverosus doceant , vitale robur admodum jam immunitum esse , prudentia jubet , ut à molesto vulneris scrutinio per instrumenta Chirurgica abstineatur omnino. Mirabilia enim observata docuerunt , sponte postea prodiiisse heterogenea relictæ in vulnere , quæ sine summo periculo educi non potuissent antea. Juveni viginti sex annorum bregmatis os dextrum in medio transfigitur sagitta ferreo cuspidem armata ; dum vulneratus tentat evellere sagittam , rumpitur lignum prope ferreum cuspidem , qui in vulnere mansit. Satis bene se habuit usque ad septimum diem : tunc incisione facta inventum fuit os bregmatis circulari foramine perforatum , & apparebat cuspis relictæ sagittæ. Bis applicato trepano ingens portio calvariæ excindebatur , & dura mater discindebatur per totum foraminis facti ambitum , nec tamen poterat educi cuspis sagittæ relictus. In latere opposito vulnere fiebat paralyxis , suppuratio ingens nascebatur , fungi cerebri enascebantur frequenter : tertio jam elapso mense specillo tangebatur in ipsa cerebri substantia cuspis ferreus , Chirurgus tentabat educere , sed convulsiones mox ortæ impediabant , ne pergeret. Circa finem quarti mensis sponte se offerebat in vulneris apertura cuspis ferreus sagittæ , qui tunc tenaculo prehensus educeretur facile sine ullo damno , & post viginti dies adeo periculosum vulnus cicatrice obductum fuit (a). Plura alia habentur observata apud auctores , quæ docent , melius relinqui aliquando in vulnere heterogenea , quæ postea solius naturæ beneficio excludentur.

§. 188. **E**X iisdem (187.) definitur instrumentum , & modus , quibus tolli queant (186).

Primo examinatur , an per vulnus factum instrumenti vulnerantis pars relictæ possit educi sine dilaceratione partium , an vero illud prius dilatari debeat , vel novo vulnere facto in parte v. g. opposita commodius possit eximi. Sic tela hamata , in vulnere relictæ , non possunt per vulnus factum educi , sine magna dilaceratione partium vicinarum ; hinc in tali casu vulnus potius dilatandum foret : vel , si fieri posset , protrudendo telum per oppositam partem educi deberet , novo facto vulnere. Variæ nunc figuræ & magnitudinis tenacula describuntur apud auctores Chirurgicos , quibus heterogenea in vulnere relictæ protrahi possunt. Tamen summa hic opus prudentia , ne simul & semel magno cum impetu hæc educantur : præstat enim prehensum tenaculo telum leniter agitare , ut sciri possit , an alicubi hæreat sic , ut sine magna dilaceratione non posset educi ; tunc enim potius relinquendum esset. Postquam autem inceperunt in bellicis conflictibus pulvere pyrio uti , globi plumbei , sclopetis emissi , in vulneribus hærentes , non poterant adeo commodè educi tenaculis in arte Chirurgica usitatis hætenus ; hinc novas excogitaverunt machinas , imprimis spiralem terebram cavo canali occultatam , ut tuxo in vulneris fundum usque posset demitti , donec globo ibi hærenti occurreret ; tunc prudenter circumrotando terebram molli plumbo infigunt , donec sic hæreat ,

(a) Journal des Sçavans l'An 1733. Avril pag. 410. &c.

ut globus sequatur terebram , dum extrahitur. De his instrumentis , & modo utendi , videri possunt recentiores Chirurghi.

§. 189. **D**EPURATO sic (186. 187. 188.) vulnere , si ablata quid fuerit de corpore , id repleri debet , generata iterum materia simili perditæ. Id fit , si 1. vascula arteriosa , lymphatica , nervosa , &c. ita se habent , ut sua liquida bona excipiant , transmittant. 2. Si liquidum bonum naturale debita copia , & apto impetu fertur in illa vasa.

Ablatis jam omnibus heterogeneis de vulnere , considerandum est , an vulnus tale sit , ut simplex tantum facta fuerit divisio partium , antea coherentium , per instrumentum vulnerans ; an vero pars quædam substantiæ corporeæ per causam vulnerantem ablata fuerit : In priori casu sufficit sola unio partium separatarum ; in posteriori casu requiritur substantiæ deperditæ regeneratio. Partes corporis resectas omnino recrefcere non posse amplius , licet applicarentur illis partibus , quibus antea cohererant , vulgo semper creditum fuit : quædam tamen observata docuerunt , non semper de hoc desperandum esse. Militi mordicus auferebatur fere tota pars cartilaginea apicis nasi , quæ in terram projecta conculcatur ab hoste , qui mordendo abstulerat. Vulneratus tollit nasi sui apicem , projicitque in vicinam Chirurghi officinam , tuncque ira flagrans hostem prosequitur. Redeunti postea , repescto vino prius immissus nasi apex adaptatur iterum , tenaci firmatur Emplastro sic , ut in loco maneat : sequenti die jam unionis rudimenta apparebant , & quarto die omnimoda unio fuit facta (a). Simile habetur Exemplum , ubi index digitus dextræ manus sic intra januam , dum claudebatur , vulnerabatur , ut cutis & panniculus adiposus orbiculariter discissa circa ultimum articulum revolverentur una cum ungue sic , ut nudum fere os relinqueretur. Dum tentat reducere Chirurgus separatas has partes , videt integre ab omni cohesione cum subjectis liberæ esse : cavam tamen hanc chirothecam adaptat digito iterum , & post triduum perfecta unio facta erat (b).

Similia observata probant possibilitatem methodi , quæ CASPARUS TALIACOTIUS , Medicinæ & Chirurgiæ Professor Bononienſis , truncatas partes corporis , nasum , aures , labia restituebat singulari artificio ex cute brachii incisa , & adaptata truncis locis. Hanc rem satis fuse descripsit in libro , quem inscripsit *de Chirurgia Curtorum per insitionem*. Paræus narrat Exemplum hominis , qui diu argenteum nasi apicem gesserat , tandem pertæsus hujus deformitatis in Italia tali methodo curatus fuit : non sine magna admiratione omnium , qui illum antea noverant (c). Et apud Hildanum (d) habetur , quod GRIFFONIUS , Chirurgus ingeniosissimus , simili methodo , quam tamen debebat TALIACOTIO , nasum abscissum restituerit virgini , sic ut vix appareret , factitium esse nasum ; uti sæpius se cum admiratione summa vidisse testatur Hildanus .

Sed hæc certe minus obvia sunt : & ubi pars quædam substantiæ in vulnere abla-

(a) Garengcoz. Operat. de Chirurgie Tom. III. pag. 55.

(b) Ibidem. pag. 57.

(c) Liv. 23 Chap. 1. pag. 574.

(d) Centur. III. Observ. 31. pag. 214.

a est, vicina vasa elongata retexunt illud, quod perditum erat, mirabili naturæ humanæ artificio. Ut autem hoc fiat, bina requiruntur.

1. Inevitabili vitæ & sanitatis effectû quotidie de corpore pereunt quædam, quæ per alimenta, in nostram conversâ naturam vi vasorum & viscerum, restituuntur. Est ergo in corpore sano potestas talis, qua valet reficere ex ingestis tot & talia, quot & qualia perierant de corpore. Sed totum hoc opus absolvitur vitali motu humorum bonorum per vasa liquidis proportionalia & sana. Requiritur ergo, ut in vasis sint illæ conditiones, quibus possint recipere, deferre, & referre iterum talia liquida, qualia in sanitate per hæc vasa fluebant. Unde si nimia compressione, vel exsiccantibus fortioribus, vasa arctantur nimis, vulneris superficies sicca evadet & inflammabitur, nec vasa transmittere poterunt illa fluida, quæ in sanitate per hæc vasa movebantur. Si nimis emollientibus tractetur vulnus, laxata vasa cedent liquidis impulsis, dilatabuntur & admittent alienos humores; & vasa sic ultra naturalem capacitatem expansa cum contentis fluidis constituent carnem fungosam dictam, quæ vulnere curam retardabit semper. Felix ergo restitutio perditum in vulnere, quatenus ad vasa, pendet ab eo, ut debita firmitas concilietur vasis, qua nec nimis resistent, nec nimis facile cedant liquidis impulsis. Cum autem vasa omnia, superficiem vulneris constituentia, elongari debeant, ut restituatur perditum, major parum, quam in naturali statu requiritur, proderit emollitio & laxitas. Ideo dixit Hippocrates: (a) *Siquidem ulcus occludere & implere sit opus, tumefacere juvat.* Et alibi: (b) *Quum vero carnem generare voles, pingua & calida magis conferunt.* Et Galenus (c) monet, ubi carni producenda studemus, maxime cavendum ab adstringente medicamento. Dum autem quotidie vulneris superficiem lustrat Chirurgus, poterit videre, an major vel minor emollitio requiratur ad regenerationem perditum. Si enim vulneris superficies sicca appareat, & profunde rubri coloris, & parum puris generetur, novit statim vasa in vulneris superficie patula nimis resistere liquidis impulsis, nec illa transmittere. Si vero in omni puncto vulneris æquabilis appareat humiditas, & modicus rubor, si æquabiliter incipit fundus vulneris elevari quotidie, & latera extendi in omni ambitu, videt satis, vasa habere requisitam laxitatem, ut liquidis impulsis cedere & elongari possint. Si vero vulnus nimia humiditate diffuat, fundusque ejus & latera subito & inæqualiter attollantur, nimis laxata vasa esse concluditur, unde oppositis remediis opus est. Pulchre hoc distinxit Galenus, (d) de methodo curandorum ulcerum agens; dicit enim: *Carnis autem ipsius sanabilis intemperiem, si squalens & sicca videatur, aqua temperata sapiet humectando &c. Scopus tamen hujus humectationis sit, ut, quamprimum rubescat & attollatur partis moles, desinas.* Monet tamen paulo post, quod medicamentorum humectandi facultas plenior esse debeat, quam in sana carne præceptum est. Si autem humidior, quam pro naturali habitu, caro fuerit contraria facienda jubet.

Hæc sunt illa, quæ observanda sunt in vulnere, quoad vasa, ut fiat regeneratio perditum: Sequenti numero dicetur, quid in fluidis requiratur ad eundem finem.

2. Debet hic recrefcere nova substantia per vulnus deperdita; sed hæc constat

(a) De locis in homine cap. 13. Charter. Tom. VII. pag. 371.

(b) De affectione, cap. 10. Charter. Tom. VII. pag. 631.

(c) De methodo medendi Lib. III. cap. 4. Charter. Tom. X. pag. 65.

(d) De methodo medendi Lib. IV. cap. 2. Charter. Tom. X. pag. 81.

fluidis & solidis, sive vasis continentibus, & liquoribus contentis. Debebit ergo adferri ad vulneris locum talis materia, in qua hærent partes requisitæ ad hanc regenerationem perdiri. Sed liquidum bonum naturale, sanitatis legibus per vasa motum, continet in se hæc omnia; Inde enim quotidie restituuntur in fluidis & firmis partibus illa, quæ sanitatis actionibus de corpore pereunt. Alimenta enim non nutriunt, nisi prius per corporis nostri fabricam mutata fuerint in liquidorum humanorum indolem, & depolita natura propria induerint nostram. Requiritur ergo, ut tantum de sanitate supersit, ut ex ingestis fieri possint boni & naturales humores. Inde patet ratio, quare in cacochymicis corporibus difficillima, imo sæpe impossibilis, in euchymis autem facilis sit perdiri restitutio. Præterea requiritur, ut bonum illud naturale liquidum idonea copia adsit, ut omnia æquabiliter possit replere vasa: Et inde iterum in vulneratis, qui per validam hæmorrhagiam magnam copiam boni liquidi naturalis amiserunt, curæ patet difficultas; quæ augetur adhuc, quia cruda ingesta imprimis mutantur in nostram naturam à copia humorum bonorum, quibus miscentur, uti demonstratum fuit in commentario ad numerum 1. §. 25. Neque hæc adhuc sufficiunt, sed requiritur, ut debito motus impetu liquida naturalia ferantur per vasa. Languente enim hoc motu deficit omnis nutritio, vel saltem depravatur; uti in debilibus corporibus apparet. Dum nimia velocitate humores per vasa feruntur, destruitur corpus, non reficitur; uti in nimio labore exercitatis animalibus patet, & in illis morbis, in quibus nimia circulationis velocitas peccat.

Hoc jam totum est, quod ars facere potest: nempe ut vasa talia sint, qualia in sanitate fuerunt; & per hæc bona liquida debito ferantur impetu: reliquum sibi soli sufficiens natura perficiet, uti dictum fuit §. 158. N°. 9.

§. 190 **H**IS enim (189) fiet canalium vulneratorum, retractorum, obturatorum, compressorum, fere exsuctorum, (158), impletio, humectatio, extensio, elongatio, implicatio cum vicinis, applicatio ad alia, quæ ex reticularibus plexibus propinqua, & ope boni liquidi conglutinatio.

Demonstratum fuit in commentario ad §. 159. arterias discissas, etiam satis notabiles, sensim contrahi & obturari; hincque, nisi maximæ fuerint, hæmorrhagiam sponte sisti. Patet ergo evidenter, minora vascula discissa ab iisdem causis claudi, & sic impediri humorum effluxum: unde vi vitæ, à tergo urgente in obstructa hæc dissectorum vasculorum oscula, nascitur inflammatio & febricula, per quam majori impetu pulsi humores in fines vasorum constrictos, illos protrudunt, elongant, & aperiunt, vel fines vasorum exsuccos omnino & mortuos suppuratione benigna à vivis partibus separant. Sed cutis tenaci vinculo non amplius coercita hæc vascula ab impetu liquidi per hæc moti extenduntur & elongantur sensim, & apertis jam osculis sua demittunt in vulneris cavum liquida; unde tota puri jam vulneris superficies humida apparet, & minimis quasi papillis sensim magis & magis elevatis hirta, quæ nil aliud sunt nisi pulposæ vasculorum protuberantium extremitates: dumque hoc fit in omni vulneris ambitu æquabiliter, sibi mutuo occurrunt excrecentium vasculorum oscula, applicantur & coalescunt; sicque renascitur

tur perdita in vulnere substantia. Si, puro jam vulnere, mucosa illa renascentium vasculorum congeries detergitur quotidie à Chirurgo, destruitur illud, quod perditum restituere debebat; unde retardatur cura, & degenerat in ulceris sordidi naturam vulneris superficies. Totum ergo, quod ars facit, ut in vulnere fiat regeneratio perditæ substantiæ, consistit in eo, ut vasa & liquida per hæc mota habeant illas dotes, quas optima sanitas requirit; & impetus fluidi, per vasa moti, nec nimius sit, nec langueat. Reliquum totum natura corporis humani perficit, uti dictum §. 158. N^o. 9.

Conglutinatio autem illa videtur fieri per substantiæ appositionem, non vero interpositione succi cujusdam ferruginantis, qui glutinis instar uniget separata vasculorum extrema. Videmus enim vasa, cutis & epidermidis tegumento libera, si contigua fiant, concreescere ilico. Sic palpebrarum limbi excoriati unice noctis spatio concreverunt ita inter se, ut lanceola dividi debuerint. Imo digiti, pulveris pyrii ambustione ablata epidermide, contigui relictæ concreverunt inter se quam firmissime. Tantus est vasorum extremorum & patulorum nixus, ut cum similibus concrecant, ubi contigua facta fuerunt.

§. 191. **E**T, dum hæc (190.) ab omni puncto fundi præcipue, & laterum, æqua vi simul fiunt, impletur ab omni parte ad centrum cavitas vulneris materie solida & liquida, amissis simili.

Si jam omnia vasculorum extrema in fundo & lateribus vulneris aperta fuerint æquabiliter, motus humorum per vasa aget æquali vi in omnia: hinc, si in uno loco non fuerit major resistantia quam in alio, in omni puncto fiet æquabilis elongatio vasculorum. Si autem in quodam loco major laxitas fuerit, quam in vicina, magis ibi distendentur & elongabuntur vasa; sicque nascetur ibi fungosa excrescentia, quæ vicina vasa comprimendo æquabilem impediet vulneris consolidationem. Dum autem sic ab omni ambitu cavi vulneris facta vasa sibi invicem occurrunt, & uniuntur, renascitur structura vasorum, quæ perditam corporis substantiam redintegrat. An autem sic renata compages eadem sit omnino, ac ante vulnus fuerat, quis dixerit? simillimam saltem esse omnia phænomena docent, & crassissima sanguinea vasa æque ac tenuissima perspirantia sic renasci, experimenta docent. Si enim mucosam illam vasorum renascentium in cavo vulnere congeriem linteo rudius tangas, sanguis ruber exit; si leviter tantum attingas, tenuius exit liquidum; si laminam metallicam politissimam, vel speculum apponas, orietur in superficie polita talis corporis macula humida, brevi evanescens sine ullis sordibus relictis; manifesto indicio, patere in hac congerie etiam vasa talsa, quæ subtilissimum exhalans fluidum continent & emittunt. Unde probabiliter concluditur, cum & vasa sanguinea, & minima exhalantia adsint, pariter hic inveniri intermedias vasorum decrescientium series.

Tamen hæc regeneratio deperditæ substantiæ in corpore humano habet suos limites. Digiti enim vel ultimum articulum abscissum nemo renatum vidit unquam. Vasa quidem in superficie vulneris concreta cicatricem faciunt, sed tota vita pars truncata manet. Hinc videtur restitui posse perditam corporis substantiam, quando ab omni ambitu vulneris centrum versus elongata vasa concurrere & uniri possunt;

N n

ubi autem simplici elongatione vasorum, quæ in truncata parte supersunt, deberent restitui tot partes organicæ abscissæ, deficit natura, & bona cicatrice partem truncatam firmat. Quod tamen hominibus negatum est, illud aliis animalibus concessum esse merito mirantur Philosophi. Gammaris majoribus, & cancris marinis fractos & separatos integre à reliquo corpore pedes renasci testabantur illi, qui maris littora habitant: ridebant hæc tanquam fabulas & rudis plebeculæ commenta. Eruditi: rem tamen verissimam esse detexit Perspicacissimus REAUMUR, cui tam pulchra debemus in animalium historia.

Absciderat magnus ille vir Gammaro alterum ex magnis illis forcipibus, quibus prædam suam prehendere & tanta vi tenere potest; viditque post unum alterumve diem, subrubram membranulam vulnus factum tegere: paucis diebus postea incipit plana hujus membranulæ superficies convexa fieri; deinde medium illius membranæ quasi centrum elevatur in conicam protuberantiam; quæ sæpe post decem dies jam tres lineas Geometricas æquat longitudine. Membranulæ elevatae color ruber in album mutatur, quodque in extremo ejus rubrum erat, secedit. Sub hac membranula tunc latet renascentis partis jam observabile rudimentum. Post quatuor vel quinque septimanas membranula hæc coercens rumpitur, renata pars nuda apparet, sed mollis adhuc, paucis tamen diebus postea osseum tegmen habet, æque durum, ac habuerat pars abscissa. Nec differt renatum hoc membrum à deperdito, nisi magnitudine sola, quam tamen sensim acquirere videtur: & renascitur perfecte tantum, quantum abscissum fuerat, uti repetitis Experimentis in hoc animali patuit, dum forcipes, pedes, cornua in hoc animali in varia distantia à trunco corporis abscissa fuerunt (a).

Dum pars sic renata absceindebatur denuo, tamen iterum recrefcebat nova prioribus ablatis similis: nec hæcenus constitit per Experimenta, an hæc vis nova membra producendi in hoc animali exhaustiri possit. Sic videmus, in rebus Physicis singulares observationes docere plurimā; generales conclusiones autem, ex paucis observatis cognitis deductas, fallere sæpissime.

§. 192. **E**o huc (189) requiritur 1. victus debitus, ut chylus, serum sanguinis, & materia nutrititia blanda, glutinosa, nec facile putrescens sit, sed facilis digestionis, & assimilationis. Decocta farinosa cruda fermentata, Emulsionēs, lac, Jura, fructus maturi cocti, olera lenissima, primaria sunt sæpe, at pauca copia simul, exhibita; repletionem, famem, sitim, cavendo.

Omne, quod regenerabitur de perdita substantia corporis, debet restitui per liquida ad vulnus allata. Sed liquida nostra, quæ per vasa fluunt, sunt vel cruda ex ingestis nondum penitus mutatis in nostram naturam, vel talia, quæ, vi vasorum & viscerum, deposita aliena indole, omnes dotes nostrorum liquidorum assumerunt. Ex ingestis jam alimentis per viscera chylopoietica factus chylus per multas horas una cum sanguine per vasa deferretur, uti constitit Loweri experi-

(a) Académ. des Sciences l'an 1712. Mem. pag. 296. &c.

mentis §. 80. citatis : hinc crudum illud chylosum , una cum reliquis humoribus , ad locum vulneratum etiam deferetur ; & quidem magis , quam ad reliquas partes , quia minor resistencia est in loco vulneris : unde observatum fuit in latis vulneribus , totam fere materiem nutriticiam exire , & hinc corpus quotidiano pabulo defraudatum lento marasmo perire. Nisi ; ergo bono victus regimine caveatur , ut chylus , ex ingestis alimentis natus , blandam habeat indolem , vulnus ab acriori chylo irritabitur quotidie , & difficulter sanabitur. Agitur enim hic de vulneribus alicujus momenti ; levia enim vulnera tantam cautelam non requirunt. Sed præterea in vulneris cavum patulis vasorum orificiis multum liquidi effunditur , quod tenuiori parte resorpta vel distillata in bonum pus convertitur : si ergo chylus cum sanguine huc allatus constet talibus , quæ in putridam degenerationem inclinant nimis ex sua indole , effusi humores stagnatione & mora in loco calido degenerabunt in putridum ichorosum ; non mutabuntur in bonum pus : Ergo & talia vitanda sunt. Cum autem vulneratis quies necessaria sit , motus vero muscularis & corporis exercitia plurimum conducant ad assimilationem crudi ingesti in naturam nostram , (vide §. 28. N^o. 2. & §. 43. N^o. 3.) patet , non posse exhiberi cibos , qui difficulter digeruntur ; sed requiri tales , qui facile digeri & assimilari possunt. Aliter cruda plurima , cocta pauca ad vulnus deferuntur : sed à coctis solis , & in naturam nostram conversis , perdiri regeneratio in vulnere potest obtineri.

Recensentur jam hic talia , quæ blanda indole & facili assimilatione huic scopo imprimis inserviunt. Avena , hordeum , Fagopyrum , oryza &c. cum aqua vel carniū jusculis decocta , blandum tale & facile subigendum nutrimentum dant , nec interim putrescunt. Ex horum farinis etiam leni fermentatione optima edulia fiunt , sic enim farinosus lentor tollitur. Panis hinc optime fermentatus , imprimis biscoctus ; juscula carniū non nimis meraca , & omni pinguedine orbara , tam pulchre profunt. Emulsiones ex farinosis seminibus mollissimis cum aqua terendo factæ jam fere chyli naturam habent. Lac æquali copia aquæ dilutum hyemali tempore , æstate vero plus aquæ misceri poterit pro potu communi : idem lac cum farinosis leviter coctum blandum cibum exhibet. Fructus horæi maturi gratissimo sapore & blando refrigerio multum profunt : leviter coquuntur , ut omnis absit flatulentia. Olera omnia mollissima , ut sunt Lætuca , Endivia , Spinachia , Sisari , Scorzonera , Dauci , Tragopogoni , Pastinacæ radices , jusculis incocta , optima sunt.

Omnia tamen hæc , quantumvis salubria fuerint , poterunt nocere quantitate ; si nimia copia simul ingerantur. Gravabitur enim inde corpus vulnerati quiescentis , multum crudi chyli sanguini miscebitur , mutabitur vulneris conditio. Si autem sic dividatur nutrimenti assumendi copia , ut omni bihorio aliquid sumatur , illud facillime assimilabitur ; & humores , qui vulnus alluunt , habebunt semper fere easdem proprietates. Dum autem bis de die tantum majorem copiam alimenti sumunt , crudo chylo copioso onustus sanguis ad vulnus defertur uno tempore ; altero vero sanguis , chylo jam subacto , aliam habebit indolem , unde alterna hac vicissitudine turbabitur vulneris conditio. Sed fames æque vitanda ac nimia impletio ; designat enim novo tunc pabulo corpus indigere : & omnes humores , nisi novo blando chylo demulceantur , fient acriores & subputridi. Diuturnam enim inediam passorum urina acris putridula , & halitus cadaverosus , hanc degenerationem ha-

N n ij

morum docent. Sed imprimis debet caveri, ne sitiant vulnerati: sitis enim designat siccitatem corporis, vel immeabilitatem liquorum, vel acre liquidis mistum: sed omnia hæc vulnere summopere noxia, cum ad restitutionem perditæ æquabilis humiditas vulnere in omni puncto, liquidorum facilis meabilitas & blanda indoles, requirantur omnino: Hinc victus humidus, & blandi liquidi copiosior usus requiruntur: sic enim humectabitur totum corpus in omnibus partibus, liquidis dilutio major conciliabitur, & facilis meabilitas, acre nociturum copioso liquido dilutum enervabitur, & per sudoris vel urinæ vias exibat de corpore.

§. 193. **C**OGNITA temperies ægri, tempestatis ratio, consuetudo, & natura comitantis morbi, docet quale, & quo modo præparatum ex his (192) cuilibet proficit.

Omnia autem hæc, quæ de victus regimine dicta sunt, variant pro diversa constitutione vulnerati, unde nulla potest dari generalis regula. Et dum belli tempore in Nosocomiis ingens vulneratorum numerus decumbit, & omnibus idem fere datur victus, plurimi pereunt, qui aliter servari potuissent. Totum enim, quod hic requiritur, est, ut sanitas superstes in vulnerato servetur, vel restituatur, si deficiat. Sed sanitas unicuique homini privata sua est, unde diversissima in solidis & fluidis partibus corpora quamvis fuerint, tamen singula sana esse poterint; hæc vocatur sanitas temperiei, ad quam ergo quam maxime attendendum est. Calidam enim & frigidam, humidam & siccam, biliosam, sanguineam, phlegmaticam, atrabiliariam temperiem, propriis signis distinguunt Medici; & varium diætæ regimen, imo sæpe oppositum diversæ temperiei hominibus convenire notant, ut singulis illibata conservetur sanitas. Sic v. g. ubi aquosum frigidum vulnerati temperamentum cognoscitur, tenues diluentes potus vitantur; roborantia & excitantia exhibentur. Si vero humores densi & compacti, solidæ partes strictæ & firmæ fuerint, calidum & siccum temperamentum adesse dicitur; tuncque profunt illa, quæ in priori casu nocuissent. Idem in reliquis verum est. *Carnosis, mollioribus, rubris confert, majorem anni partem sicciori diætâ uti, humida namque illorum natura est. Duros vero, graciles, fulvos & nigros, humidioris victu diuturniori tempore uti oportet, nam hujusmodi corpora sicca sunt.* (a).

Sed varia anni tempestas in eodem homine etiam diversum vitæ genus requirit. Æstivis enim caloribus celerrimæ degenerationes humorum fiunt, hyemali frigore tardissimæ: carnes enim animalium hyemali frigore per septimanas servantur non corruptæ; quæ æstivis caloribus intra paucos dies in putridum defluxissent tabum. Hinc sapientes veteres Medici tam sollicitè distinxerunt varium vivendi genus pro varia tempestate anni: hyeme cibum copiosum, meracum potum sed parcum, olera paucissima, & illa tantum, quæ calefacere & siccarent, obsonia, assata omnia commendabant: Æstate vero potum dilutum & copiosum, obsonia elixa, olera mollia copiosa laudabant. Verno autem tempore sensim jubebant augeri potum, sed magis dilutum; assis substituebant elixa, ciborum minuebant quantitatem, sensim subducendo, ne subito magna fieret in corpore mutatio: sic pergebant ad diætam æstivam. Deinde iterum in autumnio cibos augebant, potus minuebant, sed meraciores dabant, donec ad hyemalem diætam gradatim sic per-

(a) Hippocr. de salubri victus ratione Charter. Tom. VI. pag. 223. 24.

ventum foret. (a). Cum autem bellici conflictus sæpius æstiva tempestate fiant, & miseris vulneratis tunc jura carniū sola dentur fere, sæpe adeo languent, & acidulos potus, maturosque fructus avidissime expetunt; à quibus tamen aliquando prohibentur.

Atque iterum variæ ætatis ratione diversum indicatur diætæ regimen, ut facile patet.

CONSUETUDO, quæ altera natura merito dici solet, etiam hic considerari meretur. Durus arator, qui atro pane durissimo, & sale vel fumo conditis, carnibus vivere consuevit, ut firmo corpore validos labores quotidie sustinere posset, si vulneratus decumberet, & solis carniū jusculis uti cogeretur, deficeret brevi; hinc tali homini solidiores cibi concedi possent, imo deberent. *A multo tempore consueta, etiam si deteriora fuerint, insuetis minus molesta esse solent*; sic monet Hippocrates: (b) idem autem in libro de victu acutorum latius deduxit, monens, quod homines cibos, quibus assueverunt, facile ferant, etiam si natura non fuerint boni; & contra quod moleste ferant cibos, quibus non assueti sunt, quamvis mali non sint: idemque de potu affirmat. (c) Unde patet, prudentiam Medicam dictare, ut consuetudini aliquid concedatur, quamvis cæteroquin artis regulis repugnet.

ET NATURA COMITANTIS MORBI. Hactenus dictum fuit de his omnibus, quatenus in homine sano vulnerato dirigi debent: sed si notabilis cacochymia adfuerit ante vulnus infligendum, vel alius morbus vulnus comitetur, tunc omnis victus ratio sic dirigi debet, ut quam maxime contraria sit illi humorum degenerationi, quæ à morbo vel cacochymia vulnus comitantibus metuenda est. Si v. g. putrida Scorbutica cacochymia adsit, vel per validam febrem omnia in putredinem vergant; solis fere lacticiis, avena, oryza &c. fructibus horæis acescentibus utimur: à carnibus, illarumque jusculis, ovis &c. abstinemus: si iners mucosa colluvies totum corpus obsederit, carnibus assis, vino, aromatibus &c. languentes excitamus vires.

Ex his omnibus accurate cognitis, & invicem comparatis, concluditur, qualia exhibenda sint in cibo & potu, & quibus præparationibus indigeant alimenta. Ingens enim diversitas ejusdem etiam cibi à varia ejus præparatione nascitur. Caro vitulina recens cocta jusculum præbet, quod adhuc exhiberi potest, licet aliquis putridæ degenerationis in humoribus metus esset; imprimis si pauculo succo citri addito exhibeatur: Eadem autem caro, per aliquot dies in aëre aperto relicta, si coquatur, dabit jusculum longe citius putrescens. Assa autem eadem caro vitulina magis adhuc in putredinem prona est, ignis vi acrioribus redditis salibus & oleis hujus carnis. Frigidis pituitosis hominibus farinosa cruda nocent, eadem fermentata tamen concedi possent. Idem de plurimis aliis præparationibus alimentorum verum est.

§. 194. **A**CRE, impetum nimis augens, vitandum. Salsum, Aromaticum, Acidum, olus acre, vinum, ergo vulnere mala.

Cum blanda sit adeo humorum nostrorum indoles in sanitate, ut sanguis ipse, & omnes inde secreti liquores, (si bilem & urinam exceperis quæ tamen moræ & stagnationi imprimis natam acrimoniam debent) oculo instillati nullum dolorem

(a) Ibidem pag. 121. 122. & de victus ratione sanorum Lib. III. cap. 2. Charter. Tom. VI. pag. 472.

(b) Aphor. 50. Sect. 2. Charter. Tom. IX. pag. 87.

(c) Charter. Tom. XI. pag. 58.

faciant; & ex his ad vulnus allatis regenerari debeant perdita, videtur quam maxime profuturum, si tantum ingerantur talia, quæ nihil acris, nihil stimulantis, in se continent, nec facile in acrem indolem mutari possunt. Nocent enim acria, quatenus ad vulnus delata cruda hæc loca irritant; uti etiam, quia stimuli actione majorem humorum motum excitant, sicque impetum vitalis liquidi in tenerissima vascula, in vulnere renascentia, augent; unde hæc sæpe in fungosam carnem degenerant; vel per motum auctum inflammatione genita inperspirabilis fit vulneris superficies obstructis vasculis; unde iterum cura retardabitur: totum enim illud iterum debet suppuratione facta separari.

Omnia ergo stimulantia, quocumque demum titulo commendatur, ex sua indole nocebunt vulnere: corpus enim vulnerati sanum supponitur. Si enim v. g. putrida cacochymia simul adesset, acida ingesta prodesse, non vero nocerent. Neque hoc tamen intelligi debet, ac si paucula salis grana vel guttula aliquot succi citri jusculis carniū addita nocitura crederentur: tam levi enim copia hæc addita nimis facilem horum degenerationem in putridum poterunt præcavere; neutiquam tamen stimuli vice fungi poterunt. Nisi enim jusculis tale quid addatur, abhorrebunt brevi ab his vulnerati.

Vini pariter usus ob easdem causas reprobat; nisi languentes nimis vires, vel consuetudo aliud jubeant. Multi enim homines quotidie vino vel aliis spirituosiss uti consueverunt: illi, si abstinere cogantur, languent illico, & turbantur omnes functiones corporis: unde in simili casu moderata copia dari debet vinum, vel purum, vel dilutum, prout virium languor vel consuetudo requirunt.

§. 195. **I**TEM quæ facile putrescunt. Jura nimis spissa, herbæ alcalæscences, ergo obsunt; raphani, nasturtia, brassica, & similia.

Non solum attendendum est ad illam indolem, quam habent alimenta, dum ingeruntur; sed etiam respiciendum est ad illas mutationes, quæ ipsis calore corporis & mora contingere possunt. Uti enim ante dictum est, humores nutritii, ex ingestis alimentis nati, ad vulnus deferentur, & pro parte patulis vasibus effundentur in vulneris cavum. Si ergo ingesta ex sua natura in putredinem admodum prona fuerint, metus est ne humores ad vulnus delati non in bonum pus abeant, sed in putridum ichorosum degenerent. Cum ergo pisces, & imprimis marini, citissime putrescant, neque ferri possint, nisi multo sale condiantur, ideo prohibentur. Juscula carniū spissiora, gelatinæ ex cornu cervi vel eboris rasura paratæ, æstivo tempore sæpe intra viginti quatuor horas in putridum liquamen dissolunt. Accedit, quod spissiora hæc juscula ventriculum gravant, nec facile digeruntur. In quibusdam plantis, uti dictum fuit §. 76. reperitur talis indoles, ut sponte corruptæ non acescant, ut plurimæ aliæ, sed resolvantur in fœtidum; volatile, pingue alcali; imo in quibusdam adest, sine ulla corruptela prægressa, acer, alcalinus volatilis, sal, ut in raphanis, sinapi, nasturtiis &c. omnia hæc nocent vulnere, quia in putredinem nimis vergunt, & acri stimulo irritant. Magis autem meruitur ab his, quæ in putredinem prona sunt, quia omnes humores nostri ex sua natura in putridam degenerationem tendunt: illa vero vegetabilia, quæ ex sua natura in acidum vergunt, spontaneæ degenerationi nostrorum humorum resistunt; cum priora cum hac

conspirent. In materia medica ad Sect. 76. catalogus herbarum alcalescentium habetur, quæ hic nocerent.

§. 196. **T**UM quæ difficulter in chylum, & sanguinem mutantur. Qualia sunt quæ sale, fumo, aëre induruerunt, vel quæ pingui multo scatent, ut lardum, pisces pingues, item anseres, anates, similes aves piscibus pastæ, &c. denique viscida: ut legumina crassa, farinosa cruda, ova.

Qui valido labore corpus quotidie exercent, durissimos cibos avide comedunt, illosque optime digerunt; levioribus cibis minime delectantur, nec possent requisitum ad labores corporis robur his sustinere; sed quibus otiosa defluit vita, à durioribus assumtis pessime se habent: unde pro generali axiomate in dirigenda sanorum diætâ haberi potest, quod talis debeat esse cibus, qualis est labor. Duri enim cibi, non nisi difficulter mutabiles in bonum chylum, pondus & inertiam addunt corpori quiescenti: cum autem vulneratis quies sit necessaria, non poterit fieri talium bona digestio & debita assimilatio, quæ ad regenerationem perditæ in vulnere omnino requiritur. Semper tamen hic aliquid concedendum consuetudini, uti monitum fuit §. 193. qui enim tota vita his uti assueti fuerunt, non sine molestia possunt vivere solis mollioribus cibis.

Carnes autem animalium, & pisces sale vel fumo indurata, vel siccata in aëre, longe difficiliter rediguntur in chylum bonum & sanguinem, quam si recentia fuerint. Sed imprimis hic nocent pingua, quæ difficillimæ semper digestionis sunt, & diu retenta in corpore rancidam acrimoniam pessimam induunt. Si debilis homo lardum majori copia in prandio comederit, vespertino tempore sæpe eructabit pingue oleum, quod fauces adurit, & in ignem projectum vividam flammam alit. Tam diu in ventriculo retinetur hoc pingue indigestum, nec tamen, fluidum quamvis fuerit, pyloro elabitur. Idem verum est de piscibus pinguibus, ut anguilla, sulmone &c. & imprimis si hepata piscium comedantur, in quibus oleum tanta copia hæret, ut inde purum exprimi possit; & quamvis sapor adeo placeat blandum hoc oleum, citissime tamen in rancidum pessimum convertitur. Unde periti Chirurghi, si vulnerati talia comederint, ilico vulneris conditionem in pejus mutatam observant. Oleosa enim hæc ad vulnus delata minima vascula obstruunt, & mora & calore acriora reddita inflammationem difficulter resolubilem efficiunt. Cum autem in piscibus plurimis oleosum illud magna copia adsit, quo transudante externa superficies corporis defenditur; ne ab aqua, in qua vivunt, macerati diffuant, hinc aves, piscibus pastæ, difficilis sunt digestionis. Licet enim assumpta alimenta mutantur in naturam assumentis per naturales functiones, tamen sæpe aliquid adhuc de priori indole manet: unde adeo diversus sapor in carnibus animalium, prout diverso utuntur pabulo. Anates, anseres & similes aves si solis vivant piscibus, carnes harum avium piscium nidorem ingratum spirant. Lepores, qui cicurati Brassicæ foliis vixerunt, mensis abhixi abominabilem fœtorem spirant. Unde etiam à similibus abstinere jubentur vulnerati.

Præterea omnia leguminosa crassiora, & farinosa cruda chylum lentorem generant; qui lentor, si validis exercitiis agitetur corpus, superari potest, sed in quies-

centibus hominibus plurima mala producit : quæ in Capitulo de morbis à glutinoso spontaneo productis §. 71. 72. 73. recensentur. 1

Ova denique, licet merito laudentur tanquam nutrimentum, debilibus corporibus restaurandis idoneum, (vide §. 28. N^o. 1.) si nempe recentia diluantur in jusculis, & imprimis illorum albumen; in putredinem quam maxime prona cum sint, hinc parcius usurpanda; si vero coctione induruerint, tunc satis difficilis digestionis esse observantur.

§. 197. **A**D eundem scopum (189) conducunt medicamenta : quæ tollunt impedimenta nata consolidationis (190. 191.) & plerumque Decocti forma exhibentur. Illa ergo erunt varia pro varietate ejus impedimenti, quod tollendum erit : nec ullum utile omnibus habetur.

Haftenus dictum fuit de illis, quæ observanda sunt in diætæ regimine vulneratorum, ut liquida sana per bona vasa delata ad vulnus faciant recrescere perditam substantiam. Sed supponebantur vulnerati cæteroquin recte valere : si vero in vulnerati corpore, vel & in vulnere ipso adsit conditio corporea, quæ impedit, ne partes perditæ recrescant, hæc tollenda est. Inquiri ergo debet, quodnam sit illud impedimentum, an in liquidis, vel solidis, vel in utroque simul hæreat; an in vulnere ipso lateat, an in illis, quæ ad vulnus circulationis efficacia adferuntur; an nimio, vel nimis parvo impetu ad vulnus delati humores turbent vel impediant perditæ regenerationem? Cum ergo tam varia possit esse talis impedimenti natura, imo sæpe ab oppositis causis impediatur vulnorum consolidatio; patet evidenter, nullum hic esse posse universale remedium, & inanem esse jactantiam illorum, qui hoc promittunt. Dum ab acido pus in vulnere nasci male credidit Helmontius, voluit, ut omnis potio vulneraria occultum alkali, & quidem volatile, in se contineret. (a). Alii alia jactant : hinc tot diversæ & tantis Encomiis celebratæ decoctorum vulnerariorum formulæ. Sed dum bona liquida per vasa debito motu ad vulnus feruntur, fiet illud, quod requiritur. Unde ars medica tantum cognitum impedimentum idoneis remediis tollere vel emendare poterit, præterea nihil : Reliquum totum à natura fiet. Illa autem remedia vulneraria plerumque decocti forma solebant præparari, quia hac ratione medicamentorum virtus, aqua diluta, commodè sanguini misceri, & æquabiliter per totum corpus distribui poterat. Quam variam autem hæc decocta materiam requirant, docebit sequens paragraphus.

§. 198. **H**INC pro re nata sumuntur ex attenuantibus, inspissantibus, mitigantibus, excitantibus, virtute singulari contrarium vitium emendantibus, aperientibus, laxantibus, adstringentibus, adeoque sæpe ex oppositis.

ATTENUANTIBUS. Si per signa observata constiterit, impedimentum curationis vulneris pendere à nimia spissitudine humorum, qua tollitur facilis eorum

(a) Helmont. ortus Medicinæ. in Capit. *Blas Humanum*, N^o. 53. pag. 153.

per vasa meabilitas; patet, vulneraria remedia in hoc casu esse omnia illa, quæ humores sic dividunt & attenuant, ut sine molestia transire possint per illa vasa, per quæ sanitatis legibus fluere debent. Sed §. 115. 116. 117. demonstratum fuit, à variis causis hanc fluidorum immeabilitatem produci posse; unde etiam §. 134. 135. 136. varia tradita sunt remedia, quibus hæ causæ tolli & emendari poterant. Unde iterum nascitur ingens varietas medicamentorum vulnerariorum, quatenus attenuando agunt. Longe enim alia requiruntur, ut humorum spissitudo inflammatoria attenuetur, quam si atrabilaria tenacitas, vel frigidus glutinosus lentor humorum immeabilitatem fecerint.

INSPISSANTIBUS. Si nempe liquidorum nimia peccet tenuitas, vel aquosus adsit languor: hæc autem humorum tenuitas vel habet simul comitem acrimoniam, ut in scorbutico sæpe fit, ubi tenuis acer sanguis undique vasis suis elabitur, & eccumoses illas scorbuticas facit, tuncque mollissima glutinosa inviscantia requiruntur: vel à minus valida actione debiliū vasorum in fluida contenta non satis compacti humores nimia tenuitate peccant: tunc omnia illa, quæ vim vasorum in liquida contenta augment, sunt inspissantia vulneraria remedia: de quibus dictum in cura fibræ debilis & laxæ §. 28. Hinc iterum apparet, sub eodem hoc titulo opposita laudari remedia, quæ enim in priori casu proderant, in altero nocerent omnino.

MITIGANTIBUS. Quæ talia sunt, ut mollibus suis, & imprimis oleosis partibus, sic involvant & obtundant omnia acria, ut illa inertia reddant. Unde non sunt talia, quæ singulari vi acrimonix cuidam opposita sunt, sed molli visciditate quodcunque acre obvolvunt & mitigant. Talia sunt imprimis omnia illa, quæ emollientia vocantur in officinis, quæ omnem in fluidis acrimoniam leniunt, & solidas partes corporis emolliunt & lubricant.

EXCITANTIBUS. Quando nempe vis vitæ languet, frigus, inertia, pallor, & mucosa humorum indoles prædominantur, sine signis acrimonix cujusdam comitantis; tunc omnia illa, quæ grato stimulo aromatico languentem motum augment, adeo profunt, qualia sunt aromata, vinum &c.

VIRTE SINGULARI CONTRARIUM VITIUM EMENDANTIBUS. Vitium hoc ergo primo detegendum est, antequam oppositum remedium, singulari virtute hoc emendans, cognosci possit & applicari: illud autem hærebit vel in solidis vel in fluidis, vel in utroque simul. In solidis major vel minor cohesio peccare potest: de remediis ad hæc vitia dictum fuit in Capitulis de morbis fibræ nimis debilis vel rigidæ, ubi autem de humorum vitiiis spontaneis agebatur, indicata fuerunt illa remedia, quæ singulari virtute corrigebant liquidorum degeneraciones.

APERIENTIBUS. Sic vocantur illa, quæ liberrimam circulationem per omnia vasa faciunt, ad quam requiritur fluidorum meabilitas, & vasorum debita apertura: quæ ergo iterum varia sunt, prout in solidorum vel fluidorum agunt vitia, quæ liberum humorum per vasa transitum tollunt.

LAXANTIBUS, ADSTRINGENTIBUS. Prout nempe nimia debilitas, vel nimium robur in partibus solidis peccat. De his omnibus autem antea dictum fuit.

Ex his ergo patet, nullum posse haberi remedium generale, quod omnibus his impedimentis tollendis sufficere possit; sed singulis casibus singularia convenire remedia. In Materia Medica jam habentur formulæ singulis vitiiis tollendis idoneæ.

§. 199. **Q**UORUM quid eligendum, docet cognita natura vitii in ægro, & tituli horum Medicamentorum (197. 198.)

Cognitis ergo vulnerati ætate, sexu, temperie, vitæ genere, morbis prægressis, vel nunc vulnus comitantibus, habetur indicatio, quæ determinat, quid agendum sit & per quæ remedia. In Exemplo res patebit evidenter. Si homo strictæ temperiei in solidis, & atrabilaria tenacitate sanguinis præditus, vulneratus fuerit, vulnus siccum erit, nec bonum pus fundet: si jam æstivus adsit calor, sitiat valide, caleat, urinam parcam rubram olidam reddat; decocta avenæ, boraginis, buglossæ & similia mollissimorum demulcentium cum sero lactis vel aqua pura facta, additis syrupo florum violarum, succo citri, rob sambuci &c. si magna copia potentur, & panni similibus emollientibus decoctis madidi applicentur parti vulneratæ, brevi mutabitur vulneris conditio: siccitas nimia emendabitur, diluti humores per vasa laxata libere movebuntur, & obtinebitur felix vulneris curatio. Sed si jam alius vulneratus decumbat hyemali tempore, qui pallidus & frigidus laxitate solidorum & mucosa frigida humorum inertia totus tumet, & otiosam egit vitam, vulnus pallidum frigidum & leviter tumidum apparebit, & manebit fere in eodem statu. Si tali homini darentur eadem ac in priori casu, pejor multo redderetur & vulneris & totius corporis conditio: si vero huic detur radicum caryophyllatæ, imperatoricæ, helenii, angelicæ contrajervæ, serpentariæ virginianæ &c. infusum vel leve decoctum, addita aliqua etiam vini copia, paucis postea horis incipiet plus calere toto corpore & sudare; vulneris color pallidus mutabitur in magis rubicundum, nova vita quasi redibit in flaccidis his partibus, regenerabitur perditum & consolidabitur vulnus. Si jam ingens febris, magnusque calor vulnerato adsint, missio sanguinis, decocta tamarindorum, trifolii acetosi &c. proderunt. Ubi autem non adeo evidenter cognoscitur latens impedimentum, interimque vires vitæ sunt satis validæ, ut ingestam horum decoctorum copiam movere possint, decocta radicum chinæ, sarzaparillæ, scorzonæ, lisari germanorum &c. dantur; hæc enim remedia diluunt, attenuant, solvunt sine impetu, vasa laxant & aperiunt, sicque æquabilissimam circulationem reddunt; urinæ & sudoris viis multa eliminant de corpore, quæ retenta nocere possent. Hoc tunc totum est, quod fieri poterit.

§. 200. **A**ERIS puri semper, ab exhalante putri liberi, sæpe renovati, temperies sicca cum calore temperato optima.

Dum in nosocomiis in eodem loco plurimi vulnerati decumbunt, putridis exhalationibus repletur aer; unde fere omnes pessime se habent, & plures moriuntur, qui aliter servari possent, quapropter hæc loca apertis fenestris perflari sæpius debent, ut renovetur aer, & dissipentur putrida illa in aëre hærentia. Solent ad hanc rem & suffumigia laudari; sed aeris renovatio plus reficit decumbentes. Omnium autem maxime nocet capitis vulneribus aer non renovatus sæpe, uti observata docuerunt. Temperies autem aeris requiritur talis, ut blando tepore verno quasi refocillet; frigidus enim aer vulneribus semper nocet, partes enim, per vulnus involucris regentibus nudæ, ilico frigus sentiunt non consuetum, & ab illo male afficiuntur. Hinc

dixit Hippocrates : (a) *Ulceribus frigidum mordax, cutim obdurat, dolorem non suppurantem facit, nigredines, rigores febriles, convulsiones & tetanos facit.* Sed simul cum calore requiritur aeris siccitas; aer enim calidus & humidus quam maxime in putredinem pronus est: tali enim tempestate carnes mactatorum animalium brevi tempore corrumpuntur, & in putridum tabum disfluunt. Possumus jam per artem aerem, in quo versantur vulnerati, pro lubitu temperare: largo enim accenso foco, imprimis ex lignis aromaticis, aeris frigus minuitur, & corrigitur nimia ejusdem humiditas. Si nimis calida & sicca fuerit tempestas, pavimento sæpius de die aqua frigida resperfo, vel florentibus sambuci arboris, tiliæ, vel salicis ramis aquæ immerfis, gratum possumus facere aeris refrigerium. Thermoscopia autem & Hygroscopia demonstrabunt aeris requisitam temperiem.

§. 201. **A**LVUS servetur laxa usu emollientium, laxantium,
 ἰχθυοσπορικῶν.

Non agitur hic de illis, quæ valida vi alvum ducunt; illud enim hic non requiritur. Sed tantum hoc obtineri debet, ut vulnerati sine valido nixu & molimine alvum exonerent. Videmus enim homines, qui magna cum difficultate duras fœces alvo exprimunt, retento per validum nixum aëre in pulmone, faciem habere tensam & rubram imo sæpe lividam: unde sæpe Hæmorrhagia in vulnere recrudescere posset, & iterum dilacerari illa, quæ recrescere inceperant; imprimis si vicinis ano locis vulnus inflictum fuerit. Unde prudenter illis, quibus ob calculi educationem, vel ani fistulam, vicinis ano locis vulnus infligitur, aliquot diebus ante operationem perficiendam leni purgante & clysmatibus crassa intestina evacuantur sic, ut nullæ fœces remaneant; deinde per aliquod tempus solum carnis jusculum illis datur, quod vitam sustinere poterit, interim vix fœces in intestinis relinquit: unde peracta operatione diu sine alvi evacuatione commode vivere possunt. Hinc monuit Hippocrates (b) quod vulnerato alvus resiccata noceat.

Alvus autem sine magno molimine exoneratur, si fœces molles fuerint, & fistula intestinalis lubrica facile dilabi pariatur descendentes fœces. Hinc strictis illis & macilentis corporibus adeo dura sæpe alvus est: in illis enim valida vi intestinorum omne solubile ex fœcibus emulgetur; unde siccissimæ, compactæ & duræ evadunt, & simul molli sinegmate non satis obducta intestina difficilem faciunt fœcibus transitum. Juscula hinc pingua, mollissima olera, emollientia decocta, blanda olea pressa, emolliendo fœces, & lubricando vias huic scopo satisfaciunt. Similia clysmatis forma injecta eundem faciunt effectum: & imprimis profunt, si jam duræ fœces in ultimis intestinis hærent; tunc enim ilico juvant, dum reliqua assumpta longiori tempore indigeant, antequam ad hæc loca deferri possint: & sæpe metuatur, ne, subito tenesmo deponendi alvum orto, cogatur vulneratus valido nixu duras fœces exprimere.

Postquam hæc emollientia & lubricantia exhibita fuerunt, vel & sæpe una cum illis, dantur talia, quæ leni stimulo fœcum alvinarum excretionem promovent, nec interim corpus turbant, vel liquidas excretionem faciunt: observatum enim est post purgantia data alvum semper adstringi. Illa autem medicamenta, quæ hoc per-

(a) Aphorism. 20. Sect. V. Charter. Tom. IX. pag. 205.

(b) Lib. I. de morbis cap IV. Charter. Tom. VII. pag. 535.

ficiunt, vocantur eccoprotica, quia solas fœces crassas intestinis contentas expellunt: horum Catalogus habetur in Materia Medica ad hunc numerum. An autem talia remedia habeantur stricta hujus vocabuli significatione solum stercus educentia, dubium videtur: omnia enim illa, majori dosi data, liquida per alvum ducunt. Sic enim recentes horarum fructuum succi, & musta inde facta, manna, Cassia, mel, Tamarindi &c. majori copia, vel repetito usu, non tantum educunt per alvum illa, quæ intestinorum cavo hærebant, sed efficacissima vi fundunt humores, fusosque per alvum evacuant. Illa autem proprie purgantia vocantur. Antiqui Medici jam hæc probe distinxerant. Asclepiades enim erat in illa opinione, purgantia corpus colliquare (συστήναι τὸ σῶμα) deinde liquata educere, quæ antea non præexisterant (a). Et Thessalus, uti ex propriis ejus verbis à Galeno citatis (b) patet, concludit, à purgante medicamento materiam in corruptionem permutari: deinde excerni vel iustum per vomitum vel deorsum per alvum: illudque probat exemplo Athletæ bono habitu præditi, & qui secundum naturam se habebat, cui datum purgans admodum corrupta eduxerat, quæ procul dubio in sano & robusto hoc homine non præexisterant. Galenus, qui credebatur purgantia attrahere illa, quæ talia præexisterant in corpore, acerrime quidem in hanc sententiam invehitur, nec tamen videntur ejus argumenta sufficere, ut hoc improbent. Certe scammonium, etiam sanissimo homini datum, fundit sanguinem in putridam aquam, quæ alvo educitur; potestque totum corpus emaciari penitus repetito ejus usu: sic ut pallor, collapsa vasa, & debilitatæ vires satis doceant, noneducta fuisse corrupta, quæ præexisterant, sed virulenta vi pharmaci corruptos fuisse & eductos de corpore bonos humores.

Cum ergo omnia illa, quæ eccoprotica dicuntur, majori copia data purgandi vim habent, & plurima purgantia, minuta dosi data, leni stimulo sic irritent, ut contentæ tantum intestinis fœces expellantur; patet hunc effectum obtineri posse, si minori dosi dentur, ut corpus non multum turbent, nec humoribus magnam mutationem inducant, interim tamen alvum laxam servant, quod in hoc casu tantum requiritur.

Sollicite etiam solius stercoris educationem à purgatione distinxit Hippocrates, (c) postquam enim de sputis egit, dicit: *Quicumque enim dolores ex his locis non cessant per sputorum expurgationes, neque per alvi defectionem*, (πρὸς αὐτὴν τῆς κοιλίας ἐκκρίσιν) *neque per vena sectionem, & diætā, & purgationes*, (καταρκτικὰ) *suppurationem concitatos esse, sciendum est.*

§. 102. S O M N U S conciliandus anodynis, victu humido, narcoticis.

Subtilissimi liquidi defectum, spirituum nempe, natura reparat unico tantum modo, per motum nempe vitalem solum, silente omni animali motu, id est per somnum tranquillum. Dum validis laboribus lassatus, vel meditationibus exhaustus homo, optimos cibos sumit, nisi simul blando somno corpus refecerit, torpere mentem, gravari corpus sentiet. Sed post bonum somnum quæta sentitur in corpore agilitas, quam pacata redit menti serenitas, quam facilem sentiunt mentis perspicaciam, qui bono somno refectioni maturinis horis meditationibus indulgent? Hinc licet ex ci-

(a) Galen. de natural. facult. Lib. I. cap. 13. Charter. Tom. IX. pag. 351.

Charter. Tom. V. pag. 21.

(c) In Prognostico Num. 52. Charter. Tom. VIII. pag. 646.

(b) Galen. adversus Julianum libellus cap. 8.

bo & potu ingerantur talia, quæ restituere poterunt illa, quæ vitæ & sanitatis inevitabili lege quotidie pereunt de corpore, somni tamen tempore illa imprimis perficiuntur, ut apta evadant succedere in locum perditorum. Respiratio enim fortior, cordis & arteriarum actio validior & magis æquabilis, somni tempore humores omnes sic perficit, ut optima inde possit fieri resectio perditæ, dum causæ mutantur, applicantes & consolidantes, tanta cum libertate agunt. An hoc voluit indicare Hippocrates (a) dicens: *Anima enim vigilat, & quum quidem corpori subministrat, haud ipsa sibi vacat, sed singulis corporis partibus quandam partem subministrat, sensibus nimirum, visui, auditui, tactui, ambulationi, actioni, omnique corporis cogitationi, ipsa vero mens sui officii non est. Quum vero corpus quiescit, anima movetur; & in corporis partes subrepens domum suam gubernat, omnesque corporis actiones ipsa obit.* Patet ergo, quam noxiæ sint vigiliæ protractæ vulneratis, quam necessarius sit somnus ad regenerationem perditæ & consolidationem vulneris. Si ergo somnus deficit, ille conciliandus est, quod sit ANODYNIS, quæ dolorem tollunt: vigiliæ enim, in vulneratis imprimis, à dolore molesto fiunt, quamvis & mordaces curæ & validi animi affectus vigiliæ inducere possint. Illa autem quæ dolorem tollunt, triplici modo possunt hoc efficere: vel enim agunt tollendo causam illam corpoream, quæ talem mutationem facit in corpore, ut inde in mente nascatur molesta illa perceptio, quæ dolor vocatur: vel partem corporis, cui causa dolorem faciens applicatur, sic disponunt, ut non vel minus valide afficiatur ab eadem causa: vel denique non ablata causa doloris, & manente eadem conditione partis affectæ, tollitur doloris sensus. V. g. dum pars inflammata dolet, causa doloris est sanguis inflammatoria densitate immeabilis hærens in vasis, cum impetu vitalis liquidi magna vi urgente in vasa obstructa: omne ergo illud, quod poterit sanguinem impactum reddere sic meabilem, ut fluat libere per vasa antea obstructa, tollit dolorem, sublata ejus causa. Sed si mollissimis applicatis cataplasmatibus vel fomentis sic laxentur partes solidæ, ut facile cedere possint distendentibus causis sine rupturæ periculo, licet maneat eadem densitas inflammatoria sanguinis, & æque validus impetus à tergo urgens, aberit tamen, vel saltem plurimum minuetur dolor. Denique si nihil ex modo dictis factum fuerit, sed remanserit doloris causa, & eadem conditio partis affectæ, & detur granum unum aut alterum opii homini non assueto, nullus erit doloris sensus, licet causa dolorem excitans pergat agere. Hinc generali nomine omnia remedia, quæ uno ex tribus his modis dolorem tollunt, dicerentur anodyna. Obtinuit tamen usu, ut illa tantum sic vocarentur, quæ vel doloris causam tollunt, vel partem dolentem sic mutant, ut non afficiatur, vel saltem minus valide ab eadem causa. Illa vero, quæ doloris tantum sensum tollunt, non mutatis doloris causa vel parte affecta, vocaverunt narcotica, id est, stupefacientia. Olim tamen hæc stupefacientia vocaverunt etiam anodyna. Sic enim Cælius Aurelianus de dolore dentium agens dicit: *Multi autem veterum Medicorum accessionis tempore ea medicamina adhibenda jusserunt, quæ anodyna Græci vocaverunt; nos indoloria dicere poterimus, quæ aiunt nocturno tempore adhibenda, profecto sensum, non dolorem auferentia (b).* Sic & Celsus dixit: *Ανίστρια vocant, quæ somno, dolorem levant. Quibus uti, nisi nimia necessitas urget, alienum est. (c)*

Præcipuæ jam doloris causæ sunt in vulnere distractio partium adhuc coheren-

(a) De insomniis cap. 1. Charter. Tom. VI. pag. 373.
pag. 511.

(b) Morbor. Chronicor. Lib. II. cap. 4.

(c) Lib. V. cap. 25. pag. 178.

tium, dum vulneris labia utrinque retrahuntur: tensio fibrarum nervearum, à truncis majoribus discissis retrotractis, & laterales nervos minores trahentibus, vel &, semidiscissis vel punctis nervis tensis, distractio fibrillarum adhuc integrarum: inflammatorius tumor fundi & labiorum vulneris: humores effusi in cavum vulneris acres facti, hinc irritantes crudas has partes. Anodyna ergo erunt omnia illa, quæ diluendo, laxando, humectando, acrimoniam natam emendando vel obtundendo, denique tumores distendentes resolvendo, tollunt doloris causam, vel partem affectam sic mutant, ut à doloris causa non afficiatur ita, ut in mente nascatur ingrata illa perceptio, quæ dolor vocatur. Hæc omnia in Materia Medica rediguntur ad proprios titulos.

VICTU HUMIDO. Omnia semina farinosa rufa possunt valida pressione oleum sudare satis copiosum: Eadem hæc trita cum aqua dant Emulsiones sic dictas, in quibus blanda olei indoles manet sine rancidæ corruptelæ metu. Ex his ergo, vel horum farinosorum decoctis cum aqua, lacte, jusculis, habetur victus humidus, in quo aqua prædominatur, sed sic adhærens farinoso horum lentori, ut non facile dilabatur de corpore, sed diu maneat. Talis victus diu continuatus perstinacissimos etiam dolores lenit, laxatis solidis, & blandissima facta omnium humorum indole.

NARCOTICIS. Si jam præcedentibus auxiliis non cedat, nec remittat dolor, vel adeo sævus sit, ut non possit ferri sine magno damno, donec doloris causa tolli possit, tunc dantur in arte talia remedia, quæ, non sublata doloris causa, tollunt ejus in mente conscientiam. Summa enim causa doloris potest esse in corpore sine ullo doloris sensu, ut patet in Apoplecticis, qui ne quidem vivi ignis applicati vim sentiunt. Plurima quidem habentur, in quibus hæc vis obtinet, ut Hyosciamus, Solanum, Datura &c., quorum tamen omnium suspectus usus est, imprimis si interne sumantur, quia mentis actiones adeo mirifice turbant. Tutior longe, & innumeris Experimentis probatus Papaveris usus. Europæi Papaveris minor efficacia majorem dolorem postulat: Asiatici Papaveris succus, Opii nomine in officinis adeo notus, si prudenter & debita quantitate usurpatur, pulcherrime dolorem sopit; rediturum tamen, si causa doloris maneat, post aliquot horas, ubi vis remedii cessat. Frigida intemperie nocere papaveris succum voluit Galenus (a), & post illum plurimi alii: hinc vel trepide usurpaverunt, calidissimis admistis metuendum illud frigus corrigere tentantes, vel damnaverunt omnino tanquam deleterium pharmacum. Qui calidum amatorem opii semel gustavit, facile crederet, male frigidam opio noxam adscribi. Adhæsit tamen optimo remedio diu hujus infamiæ nota, sic ut plurimi Medici abhorruerint ab ejus usu: unde Paracelsus non exiguam partem suæ celebritatis opio debuit, dum Laudano suo tam mira faciebat in morborum curationibus. In Asia quotidiano usu opium & magna quidem copia sumunt impune; imprimis illi, quibus Religio vini usum vetat. Imo illi, qui maxime damnabant opium, utebantur sine ullo metu magnis illis compositionibus Officinalibus, Theriaca, Mithridatio, Philonio &c. in quibus magna copia opii adest. Alii turpis lucri causa aliis tectum remediis clam dabant opium, quod publice damnabant, ut viderentur aliis arcanis perficere, quod soli debebatur opio. Verum quidem est, quod plerique Medici fuerint in illa opinione, ac si

(a) Method. medendi Lib. XII. cap. 8. Charter. Tom. X. pag. 190. & alibi plurimis locis.

vis medicata Mithridatii, Theriacæ, & similium non penderet à conspirantibus viribus omnium ingredientium, sed ex unione tot diversorum nasceretur novum quoddam & penitus singulare remedium, cujus vis medicata non foret adscribenda collectis ingredientium viribus, sed ex omnium unione nova prorsus & efficacissima exsurgeret; unde laudabant antiquam Theriacam, & præferabant recens paratæ. Licet prima fronte speciosum videatur hoc ratiocinium, rem tamen consideranti apparebit facile, magnis his compositionibus vim calidam aromaticam inesse, præcipuam tamen virtutem pendere ab opio. Mithridatium enim Damocratis, reliquis antiquius, ex tot diversis componebatur, ut Plinius dixerit (a): *Quo Decorum perfidiam istam monstrante: hominum enim subtilitas tanta esse non potuit: ostentatio artis & portentosa scientia venditatio est.* Andromachus autem, qui Neronis tempore vixit, & inter ejus Medicos primus erat, Mithridatii Damocratis, paucis demitis, omnia ingredientia retinuit, quædam addidit; imprimis viperarum carnes, sicque novum fecit antidotum, quam Theriacam dixit à viperarum carnibus additis. Libellum Græcis carminibus scriptum Neroni dicavit, in quo theriacæ suæ recensebat descriptionem, quam & *ἡσυχία*, id est, tranquillam vocavit. Nec mirum certe, callidus enim Andromachus triplum opii suæ Theriacæ addidit, unde incepit obsolescere Mithridatii Damocratis celebritas; sola Theriaca extollebatur innumeris laudibus, & per tot sæcula tanti nominis famam retinuit; evidenti argumento, opii usum fuisse quotidianum & salutarem etiam illis temporibus, quibus damnabatur ab omnibus fere Medicis.

Omnia hæc ex papaveris floribus, foliis, succo, parata remedia, quæ in officinis prostant, possunt sic adhiberi, ut vel levissime sensuum acumen obtundant, vel aucta dosi somnum inducant satis profundum; imo imprudenti usu lethalem possent facere apoplexiam. Sic sæpe accidit, minori dosi hæc data dolorem quidem compefcere, nullo inducto tamen somno, sed pacatissima menti & corpori nascitur quies, quam ne verbis quidem describere se posse mirantur gratum hoc solamen experti. Non omnibus tamen hominibus eisdem effectus facit hoc remedium, eadem quamvis exhibitum copia: dum ergo Medicus ignorat peculiarem ægri circa usum hujus remedii idiosyncrasiam, præstat aliquot grana opii idoneo diluere vehiculo, & cochlearim dare, v. g. omni quadrante horæ, donec percipiatur doloris levamen. Verum tamen eadem quantitas opii majorem effectum præstat simul & semel exhibita, quam si detur divisis dosibus. Qui sæpius sumserunt, nisi augeatur sensim hujus remedii copia, non amplius inde levantur: sine noxa tamen, sensim aucta dosi, ingentem opii copiam quotidie sumpsisse homines plurimis, illisque certissimis, observatis constat. In materia medica jam habentur varix formulæ, quibus hæc remedia pro re nata exhiberi possunt sic, ut majorem minoremve effectum pro lubitu præsent. Hoc incommodi habent semper, quod alvum adstringant; sed lene clystma facile tollet hoc malum.

Sed & similia remedia externe loco dolenti applicata levamen summum faciunt: unde cataplasmata & fomenta ex emollientissimis herbis parata, additis simul hyoscyami, papaveris hortensis &c. foliis, tanti usus sunt.

(a) Lib. XXIX. cap. 1.

§. 203. **A**NIMUS sit hilaris. Venus vitanda, quies commendanda est.

Validi animi affectus omnes, cum miris adeo modis corpus mutare, & in omnibus suis functionibus turbare possint, nocebunt semper vulneratis: sed pacata illa mentis serenitas, qua nullius mali conscia nihil adversi metuit, & omnia prospera sperat, hic imprimis convenit. Profusum gaudium æque noceret, ac alii magni animi affectus. Sanctorius, & alii, qui de statica medicina scripserunt, observarunt hilaritatem corpus quam maxime perspirabile reddere, & leve ad sensum. Sed hoc designat liberrimam per omnia vasa circulationem, & expeditissimam exercitationem omnium functionum, id est, optimam sanitatem.

VENUS VITANDA. Nihil enim magis movet totum systema nervosum; quam Veneris usus: hinc communi omnium Medicorum consensu vulneribus noxius habitus fuit; & tristes casus docuerunt funestum eventum: Tale exemplum §. 172. N^o. 2. habetur, ubi seminis emissio sine coitu pessima symptomata, & mortem ipsam produxit. Hinc in victu vulneratorum vitanda omnia, quæ turgentiam Veneream irritare possunt, ut ostrea, cancri, gammari &c.

Quietem autem vulneratis necessariam esse, sponte patet: motu enim tenerissima illa vascula, quæ informis muci specie in vulnere recrescunt, destruentur.

Binx requirebantur conditiones, (vide §. 139.) ut fieret regeneratio perditæ in vulnere: nempe, ut liquidum sanum debita copia & apto impetu deferatur ad vulnus; deinde ut vascula excipientia humores allatos habeant illas dotes, quæ requiruntur, ut excipere & transmittere possint talia liquida, quæ secundum sanitatis leges per hæc vascula fluere debeant. Hactenus à §. 192. huc usque imprimis actum fuit de illis, quæ in victu & remediorum usu observari debent, ut bona fiat humorum indoles, qui ad vulnus deferentur. Sequitur nunc, ut agatur de canalium transmittentium in vulnere dispositione tali, quæ requiritur, ut fiat perditæ substantiæ restitutio, & separatorum unio.

§. 204. **U**T canales in debita conditione (189) maneant, nec liquida in vulnera corrumpantur, sicque lædant actionem (189. 190. 191.) descriptam, aer arcendus, vulnus totum fovendum balsamicis vulnerariis lenibus, implendum carptis, ad æquabilem pressionem, nervisque amicis medicamentis.

Post vulnus inflictum, discissorum canalium extrema retrahuntur, angustantur, & resistunt liquidis per illos puls; incipit tunc inflammatio nasci in labiis & fundo vulneris, & post hanc puris sequitur confectio: dumque hoc fit, ex fundo cavi vulneris sursum, & ab omni ambitu centrum versus, protruduntur sensim vasculorum hiantium extrema, quæ tenerum mucum referunt, & ex hac materia sic renata fit regeneratio perditæ in vulnere (vide §. 158.) Patet ergo, requiri ad hanc rem, ut canales illi pulposi debitam retineant molliem, & humores effusi per patula vasorum oscula in cavum vulneris blandam retineant indolem; si enim spontanea degeneratione acrimoniam acquirant, destruetur illud pulposum renascens.

cens. Utrique autem scopo satisfit, si aër arceatur. Constat enim certissimis observatis, animalium partes diutissime servari posse incorruptas, si omnis aëri accessus prohibeatur; cum è contra paucis saepe diebus putrescant, si aperto aëri exponantur. Carnes caprinæ & gallinacæ assatæ, in particulas dissectæ, butyro liquefacto immerstæ, in dolio exactæ clausæ conservatæ fuerunt ultra sex menses; in navi ex Indiis reduce, intensissimo quamvis sub aëris calore, sic ut pristinam saporis gratiam perfectissime retinuerint (*). Præterea aër libere ad vulnus allabens tenerrima illa vasculorum renascentium extrema exsiccando destruit; unde ab his mortuis sordes in vulnere antea puro nascuntur, quæ iterum separari debent, antequam consolidatio fieri possit. Ob hanc causam crediderunt multi, aliquid venenati in aëre hære, cum viderent tantas mutationes vulnerum à libera aëris admissione. Ideo etiam raras vulnerum deligationes adeo commendaverunt peritissimi Chirurghi.

Debet ergo tegi superficies tota vulneris sic, ut ab aëre defendatur. Hoc omnium optime fit per Balsama, vulneraria dicta; & imprimis per Balsama nativa, quæ omnia spissa unctuositate hærent, blandum aroma in se habent, & simul acidum, quod putredini omni resistit, sic tamen obvolutum pingui, ut non noceat sua acrimonia. Chemica enim Analysis ex omnibus balsamis nativis acidum liquorem, & fragrans tenue aromaticum oleum educit, in fundo manente tenaci resinosa parte. Dum hæc modica copia, leviter calefacta, ut æquabilius diffuant, vulneris superficiei applicantur, tegunt tenerrima hæc vascula, aërem pinguedine sua arcent, omnemque exsiccationem impediunt, & simul humores effusos à putredine præservant. Ex his liquet, parcam tantum Balsamorum copiam ad hos usus requiri, & male agere illos, qui magna copia horum vulnera infarciunt: sunt enim corpora heterogenea in vulnere, quæ concretionem partium interpositione suæ molis impediunt. In materia medica jam ad hunc numerum plura recensentur nativa balsama & artificialia, quæ omnia fere simili modo agunt & prosunt.

His factis cogitandum est, quod cutis æquabile tegumentum absit in vulnere; hinc vascula illa pulpofa recrescentia, molli balsamo tecta & humido calore fota, facile cedent liquidis distendentibus, augebuntur omni dimensione, & dilatata admittent alienos humores; hinc tota vulneris superficies degenerabit in flocculentam substantiam, quam carnem fungosam vocant Chirurghi. Hoc impiedetur, si tam moderata pressio vulnere incumbat, ut cutis antea coercentis defectus suppleatur: quod fiet, si linteis carptis mollissimis siccissimisque, leviter inunctis leni balsamo illa parte, qua vulneris superficiem tangunt, vulneris cavum impleatur: deinde Emplastro vel fascia circumducta sic firmentur hæc, ut lenissima pressione nimiam vasculorum dilatationem coercerant tantum, cavendo interim, ne nimis premendo destruantur tenerrima hæc vascula, vel suffocetur vitalis liquidi motus per has partes. Simul blanda tali compressione cavebitur, ne membrana pinguedinosa, undique in vicinia cutis tegmine coercita, assurgat in vulnus, & ibi degeneret satis cito.

(*) Boyle de utilitate Philosophiæ Experimentalis Exercitat. IV. pag. 184.

§. 205. **Q**UIBUS (204) in vulnere retinendis Emplastra prostant, vix aliud huic scopo præstantia, quam tenacitatem, non ædentem.

Non facile hoc credunt Chirurgi, qui felices vulnerum curationes plerumque suis solent adscribere Emplastris, & singuli fere hic sua jactant arcana. Si tamen equartæ præcedentibus paragraphis conditiones vulnere adfuerint, sanatur, quaecunque demum imponatur Emplastrum; modo nihil continuerit in se, quod nocere possit, inceptum naturæ opus turbando, vel conditiones requisitas ad regenerationem perditæ in vulnere tollendo, nimio stimulo v. g. vel alia quacunque ratione. Quod autem hæc res sic se habeat, patet inde, quod licet unusquisque fere sibi soli cognitum, & reliquis omnibus præponendum, Emplastrum adhibeat, tamen omnes æque feliciter curent, si reliqua auxilia eodem modo vulnere adhibita fuerint. Verum quidem est, quod Emplastra cuti externæ applicata, præter tenacitatem requisitam, possint continere talia ingredientia, quæ calore corporis, cui applicantur, mota & actiosa reddita se insinuant vasculis, sicque non solum agant in partem illam, cui applicantur, sed etiam totum corpus efficacissime mutare possint; uti v. g. Emplastra vesicatoria, Mercurialia & similia plurima: sed de hac re hic non agitur: requiritur enim tantum in hoc casu, ut vulnere applicata retineantur in loco, unde sola tenacitas hic sufficit ad hunc scopum. Hinc plumbeata illa Emplastra, quæ ex plumbo vel ejus calcibus variis in oleo coctis ad requisitam tenacitatem sunt, tanti sunt usus; dum facillime feruntur etiam ab illis, quibus à pingui fere quocunque applicato cutis inflammatur. Talia sunt Emplastrum de Minio, Diapalma, Diapompholygos, de Cerussa, Defensivum rubrum Vigonis, & plurima similia, quæ eundem præstant effectum in hoc casu.

§. 206. **L**IQUIDA ad vulnus allata, in vulnus effusa, fibræ semimortuæ, canales obstructi, tumefactique, creant in vulnere pus, ichorem, sordes, carnes spongiosas.

Singulis vulneris deligationibus accurate vulnus lustrandum est, ut videatur, an aliquid occurrat mutati in tota superficie, quod perditæ substantiæ regenerationem, & vulneris consolidationem, impedire possit. Si enim omnia rubra, nitida, & humida æquabiliter fuerint, novimus vasa & humores habere debitas conditiones, ut fiat sanatio: si vero siccum apparuerit, vel sordidum vulnus, certo scimus, non posse consolidari illud, nisi prius iterum sordes illæ ablatae sint, & vasa æquabiliter humores transmittant in omni puncto superficiæ vulneris. Hæc autem impedimenta nascuntur, vel ab humidis effusis, degenerantibus in alienam indolem; vel à vasculis obstructis & tumefactis, vel ab utrisque simul. Plurimæ enim partes possunt in vulnere esse pro parte discissæ, sanis quidem partibus coherentibus adhuc, omni tamen vitali influxu orbæ; unde emoriuntur, & separari debent; & quamdiu ibi adhuc hærent, heterogenei corporis instar, impediunt consolidationem. Postquam autem vasorum orificia in vulneris superficie incipiunt effundere humores, illi collecti stagnando, calore loci, tenuissimæque partis distensione, mutantur in unctuosum blandum liquidum, pus dictum, quod semper bonum est; uti dictum §. 138.

Nº. 7. nimis tamen diu relictum in vulnere nocere posset; tunc enim corrumpitur & acre fit. Si vero vulneris superficies madeat tenui ichore, non bono pure, numquam fiet bona consolidatio, quamdiu hoc adest. Hoc autem intelligitur, si talis tenuis sanies in vulnere appareat, postquam per duodecim vel plures horas idoneo apparatu tectum mansit vulnus: nam si omni pure ablato post horam unam aut alteram denudetur vulnus, non aderit pus, sed longe tenuius liquidum, quod tamen ibi relictum in pus mutabitur. Sed ichoris nomine hic intelligitur tenue liquidum, plerumque simul acrioris indolis quod mora in vulnere nunquam tamen in bonum pus convertitur, sed semper acrius fit. Talis autem ichor vel fit à liquidis effusis, non mutandis in bonum pus; vel fit etiam ab optimo pure nimis diu in vulnere relictum; tunc enim iterum attenuatur & acre fit. Dum enim pars corporis suppurata, & undique emollita, debito tempore lanceola pertunditur, bonum & crassum pus exit: si vero talis locus nimis diu clausus maneat, contentum pus attenuatur iterum, & tunc apertura facta loco boni puris tenuis effluet sanies.

Sordes autem nascuntur in vulnere vel à semidiscissis partibus vel à mortuis & nondum à vivis partibus separatis, vel à vasis dilatatis & liquido immeabili distentis; tuncque vulneris superficies non apparet pura & rubra, sed alba fere instar lardi: & nisi harum sordium fiat separatio à vivis partibus suppositis, in colorem flavum, imo fuscum mutantur, & eo pejorem degenerationem notant, quo color ab albedine in fuscum magis declinat.

Carnes autem spongiosæ tunc imprimis nascuntur, quando superficies vulneris non comprimitur æquali vi, ac cutis integra premit vicinas partes: unde panniculus adiposus assurgens tumet, & cito degenerat in fungosam dictam carnem, uti dictum fuit §. 158. Nº. 5. omnium maxime si per febrim natam impetus & velocitas circulationis augetur: tunc enim dilatata vasa cito assurgunt, si debita compressio non impediverit. Videmus autem ubique fere in toto corpore, ubi æquabilis pressio coercens ablata est, partes in locum minus resistentem assurgere. Sic in vulneribus capitis, vel post trepanum applicatum, calvariæ tegmine ablato, si simul dura mater discissa fuerit, cerebri substantia in mirabiles fungos excrefcit. Discissis per vulnus abdominis tegumentis, integro tamen manente peritonæo, nisi firmetur ligatura idonea locus, paulo post contenta abdominis pressa in locum minus resistentem, dilatato peritonæo, herniam facient. Carnium ergo fungosarum origo in vulnere est tantum naturalis sequela diminutæ æquabilis pressionis.

Sed omnia hæc in vulnere, quamdiu adsunt, impediunt consolidationem: heterogenea enim sunt; hinc auferenda: quomodo hoc fieri debeat, docebit sequens paragraphus.

§. 207. **Q**UÆ (206) digerente, abstergente, corrorente, exsiccante auxilio tolli solent, sæpe & comprimendo.

Quando vident periti Chirurghi, vulneris superficiem sic degenerare, ut non ubique humida & rubra sit, sed sordes albæ, flavæ, vel fusæ appareant; noverunt, optima etiam balsama non sufficere. Natura quidem sola per bonam suppurationem nititur separare hæc corrupta, sed vasa viva supposita, sordibus his incumbenibus & adhærentibus impedita, non valent hæc remove tam facile; unde hæc jam semimortua diutius hærentia corrumpuntur, & in pejorem indolem degenerant.

Pp ij

Applicant tunc talia remedia, quæ emolliunt quidem hæc sordida, sed simul saponacea vi solvunt, & leni stimulo irritant vivas partes suppositas, ut fiat facilior separatio harum sordium à vasis vitalibus, quibus adhærent. Hæc vocantur **DICERENTIA** termino chirurgico à ventriculi digestionem desumpto. Sumunt v. g. balsamum quodcumque nativum ut terebinthinam, & cum vitello ovi terunt, ut oleosa balsami tenacitas frangatur sic, ut in aqua dilui posset; addunt deinde mellis aliquam copiam, quod saponacea sua vi plurima concreta dividit & solvit. Tale medicamentum plumaceolis exceptum vulneris superficiei sordidæ applicant: emollitæ sic sordes, & vi saponacea solutæ, pure bono facto separantur à partibus sanis, & redditur purum vulnus. Pulcherrime talium remediorum usum, ubi impura vulnera sunt, indicavit Hippocrates, dicens: *Pinguia inflammatis non conferunt, neque sordidis, neque putrescentibus. Verum ad inflammata prosunt frigida, ad sordida vero & putrescentia, acrida, & quæ morsum quemdam excitando purgant* (a). Et alio in loco docet, humores bonos per vasa ad vulnus delatos avertere his remediis emollitas & facilius separandas lordes: *siquidem ulcus occludere vel implere opus sit, tumefacere juvat &c. Cibus enim recreata caro illam, quæ à medicamento compuit, propellit, & una cum natura debellat* (b).

ABSTERGENTE. Hæc remedia parum acriora sunt digestivis dictis. Si ergo præcedentibus addantur aloë, myrrha, saponis Veneri paululum: habetur medicamentum abstergens, quod à digerente tantum gradu paulo majoris stimuli differt.

CORRODENTE. Illa jam prioribus longe acriora sunt, & partes, quas tangunt, emori faciunt; hinc crustam vulneris superficiei, cui applicantur, inducunt: sub qua vasa vitalia suo motu & allatis liquidis sensum illud mortuum separant & expellunt. Hæc autem omnia faciunt quidem, ut omni vitali influxu priventur sordes illæ adhærentes vasis vivis, sed nunquam per hæc sola separatio mortui obtineri poterit, quod sola natura per suppurationem bonam perficit. Hunc autem usum habent, quod vasa obstructa & dilatata, in vulnere sordes facientia, quæ lenioribus abstergentibus pertinacius resistunt, uno momento, & ipso quasi attractu, faciant omni vitali influxu humorum privari: hinc gangranosam quasi crustam superficiei vulneris obducunt, cui deinde applicantur mollissima digestiva, ut escharæ illæ per corrodentia factæ, horum applicatione emollitæ, vasorum vivorum subjacentium actione separentur à vivis partibus, quibus cohærent, sicque vulneris superficies reddatur pura. Unde apparet, prudentem horum usum requiri, nec sæpe repetitum, nisi deciduis jam escharis vulnus adhuc impurum appareat: Male ergo agere illos, qui credunt, solis corrodentibus depurari posse vulnus, cum tantum sordium augmentum impediunt, his in mortuam escharam conversis, quæ postea emolli, & suppuratione facta separari debet; Imo nimis repetita applicatione partes vivæ puræ similiter afficiuntur; unde sordes augentur tunc, non minuuntur. Pulchre hoc notavit Galenus, narrans, Medicum sordido ulceri rodens medicamentum adhibuisse quotidie, & maxime miratum fuisse, quod sordes augeantur, non vero minuerentur, unde augebant imprudens applicati remedii efficaciam, sed malo eventu. Quippe quantum ille intendebat medicamenti acri-

(a) De affectionibus cap. 10. Charter. Tom. VII. pag. 631.

(b) De locis in homine cap. 13. Charter. Tom. VII. pag. 372.

moniam, tantum caro subiecta colliquabatur, & sordes augebat (a).

In Materia Medica recensentur jam hæc corrodentia, pro vario acrimoniæ gradu in varias classes distincta. Efficacissima imprimis sunt illa, quæ ex acido fortissimo, glebæ metallicæ unito, constant; & inter illa Lapis infernalis dictus summum usum habet: constat enim concentratissimo nitri spiritu & argento purissimo unitis: & cum forma solida habeatur hoc corrodens, & in quamvis figuram possit formari, potest fere omnium tutissime applicari. Reliqua enim vulnere adhibita in totam ejus superficiem agunt æqualiter; Lapis autem infernalis singulis punctis potest applicari, & momentaneo tactu escharam facit: unde major vel minor hujus effectus est, prout citius aufertur, vel diutius applicatus manet: & cum sæpe non omnes partes superficiæ vulneris æque crassis sint obsessæ sordibus, hinc non æque validam corrodentis actionem requirant; omnium pulcherrime hoc moderamen adhibito Lapide infernali observari poterit.

Escharæ autem per corrodentia factæ dein lenissimis applicatis remediis debent emolliiri, ut à vivis partibus subiectis possint cito separari; & illis deciduis tunc apparet, an repetita corrodentis applicatio necessaria sit; an vero lenioribus digestivis, vel abstergentibus, vulnus purum reddi possit.

EXSICCANTE. Quando nempe plurimo, & nimis tenui humore, vulnus madet; tunc illa, quæ liquida absorbent, & vascula roborant, imprimis prosunt. Tales sunt terrestres bibuli pulvisculi in pollinem impalpabilem triti, ne asperitate suarum partium crudum vulnus irritent, quales sunt, v. g. ossium combustorum cineres, mastiche, olibanum, sarcocolla &c. quæ simul roborant.

SÆPE ET COMPRIMENDO. Imprimis prodest compressio, si sordes à dilatatis vasis in fungosam excrescentiam degenerantibus nascantur: licet enim corrodentibus abstuleris spongiosam illam carnem, nisi debita compressione firmaveris has partes, brevi renascetur similis excrescentia; uti in fungis cerebri toties renatis docuerunt Observationes. Unde periti Chirurghi tunc sæpe solis linteis carpsis siccis vulnus replent, & modica ligatura coercunt; vel & aliquando crassum plumaceolum, balsamo vulnerario inunctum aversa parte imponunt, sic ut pars sicca plumaceoli vulneris superficiem tangat, pars vero superior balsamo inuncta aërem arceat.

§. 208. **I**LLA (207) adhibenda, donec pus album, blandum; viscidum, leve, æquale, inodorum, adsit; sub quo sordes abstergantur, contusa & tumida consumuntur, corrupta ab aëre separantur, cava implentur, conglutinantur separata.

Omnia illa, quæ præcedenti paragrapho recensita sunt, possunt compescere nimis facile distendenda vasa, possunt semimortuas partes una cum parte vivorum vasorum converttere in escharam gangrænosam, sed non valent separare hanc crustam à vivis partibus suppositis; hoc enim sola natura per suppurationem facit, nec ullus modus alius superest, quo hoc fiat. Sed suppurationis indicium est puris confectio, de quo dictum §. 158. n°. 7. ubi ergo pus bonum apparet in vulnere, novimus vasa sic disposita esse, ut transmittant debita liquida; & simul hæc liquida

(a) Galæa. Method. Medend. Lib. III. cap. 6. Charter. Tom. X. pag. 68.

habere illas dotes, quæ requiruntur ad sanitatem. De illis quæ requiruntur, ut humores ad vulnus allati boni sint, dictum fuit antea: hoc loco tantum agitur de illis impedimentis, quæ in ipso vulnere hærent, & regenerationem perditæ, bonamque consolidationem, impediunt. Quamdiu enim hæ sordes in vulnere hæserint, æque ac ullum aliud heterogeneous corpus, impediunt sanationem. Ubi autem per debita auxilia adhibita in vulnere nascitur bonum pus, tunc novimus per hoc separari posse à vasis vivis omne illud, quod vulneris sanationem impediret. Sed pus illud non tantum debet habere omnes conditiones hic recensitas, sed debet in omni vulneris superficie idem & æquale nasci: accidit enim sæpe, ut non omnis superficies vulneris sordibus obsideatur, sed tantum quædam ejus pars; tunc pura loca bonum pus dabunt, reliqua aliud diversæ indolis liquidum fundent; ergo pus non erit ubique æquabile sed varium in variis vulneris locis, tuncque hæc loca sordida sola requirunt medicamenta paragrapho præcedenti enumerata, quæ vivis & puris vulneris partibus non conveniunt.

Sub hoc pure, quidquid semilacerum vivis cohæret, & omnes obstructorum vasculorum fines, una cum materia obstruente, solvuntur & separantur; & vasa libera tunc humores sine impedimento transmittunt: hinc omnis tumor labiorum vulneris ab impedito libero humorum trajectu ortus disparere incipit; quæ contusione, vel acris admissione, corrupta fuerant, secedunt, tenerrima vascula bono pure tanquam blando & naturali balsamo testæ elongantur, vicinis occurrunt, & uniuntur, novamque vasorum texturam faciunt; per quam regeneratur perditum in vulnere, & separata uniuntur.

Totum ergo, quod arte fieri potest, est, ut tollantur illa impedimenta, quæ boni puris in vulnere generationem prohibent: reliqua natura sibi semper sufficiens perficit.

§. 209. **T**UM ea, quæ carnem generare dicuntur, applicanda; quæ sunt digerentia leniora.

Hæc remedia sarcotica dicuntur apud Chirurgos: sed unicum tantum vere sarcoticum dicendum est, nempe ipsa natura, sub blando pure renasci faciens perditæ: quam rem Galenus tam pulchre expressit dicens in loco antea citato (§. 158. n°. 9.) quod generandæ carnis materies sit sanguis bonus; opifex vero & autor natura. Reliqua omnia remedia, quibus carnis generandæ vis adscribitur, tantum auferunt impedimenta, & addunt adminicula; & nulla alia sunt, quam quæ pressione debita coërceant vasa, & sic disponant, uti solent esse in sanitate: quod faciunt aërem arcendo, fovendo partes, & humores effusos sic coërciendo, ut debita mora in bonum pus mutari possint.

Purum enim jam vulnus ab omni acriori applicato læditur; destruuntur enim tenerrima illa vascula, quæ incipiunt renasci, novæ sic ab his emortuis nascuntur sordes, quæ iterum separari debent: unde sola hæc tantum conveniunt remedia, quæ §. 204. laudata fuerunt. Bene autem procedere vulneris puri curam novimus, si color adsit in vulnere subrubellus (ruber enim nimis color inflammationem nam denotat) si pus debita copia & bonum adsit; si fundus & latera vulneris æqualissime excrecant, nihilque ultra æquabilem superficiem attollatur, & labia vulneris non superent altitudine vicinam cutim, sintque æqualia, nec excelsa appa-

reant, & in margine vulneris incipiat color pallidus subcærulescens nasci, qui cicatricem fieri indicat.

§. 210. **S**I autem, peractis, quæ primo scopo (185.) satisfaciunt (186. 187. 188.), nihil ex substantia corporis ablatum deprehenditur, labia unienda ita sunt, ut partes naturaliter unitæ iterum sibi mutuo applicentur, atque ita retineantur.

Generalia indicata, quæ in omni cujuscumque vulneris curatione requirebantur, §. 185. sunt enumerata: & quidem ibidem primo numero dicebatur, debere auferri omnia illa, quæ heterogenea ab instrumento vulnerante, vel partibus fluidis aut solidis corruptis, relicta possent impedire unionem partium separatarum. §. 186. 187. 188. dictum fuit, quomodo, & per quæ, & quibus cum cautelis, hæc heterogenea tolli debebant. Si ergo his peractis appareat, quod aliquid de substantia partium ablatum fuerit, illud restituendum primo est, antequam possit fieri unio partium separatarum. Quomodo autem hæc restitutio perditæ obtineri possit, dictum fuit à §. 189. huc usque. Si autem simplex tantum fuerit facta divisio partium antea cohærentium per causam vulnerantem, sine substantiæ jactura, sine ullo heterogeneo corpore relicto inter partes separatas; habetur tantum simplicissima indicatio, nempe, ut labia vulneris, sponte semper à se invicem recedentia, (vide §. 158. n^o. 1.) sic applicentur sibi mutuo, & applicata retineantur, ut partium omnium situs sit talis, qualis fuerat ante divisionem. Unionem partium sic dispositarum sola natura perficiet satis cito etiam in maximis vulneribus, si conditiones modo dictæ adfuerint. Optima etiam balsama vulneraria labiis talis vulneris interposita tunc nocent; sunt enim heterogeneum corpus, quod nunquam cum corporis partibus concreescere potest: sed requiritur tantum applicatio partium separatarum ad se invicem, nullo alio interposito remedio.

Quam facile enim partes corporis vulneratæ concrecant, non tantum cum illis; quibus unitæ fuerant naturaliter, sed etiam cum aliis vicinis, cum quibus antea nunquam cohæserant, docent plurima observata. Nobili juveni ense vulnus inflatum fuerat, quod non tantum oculi sinistri palpebram penetraverat, sed etiam simul adnatam oculi tunicam, & ipsam corneam leviter læserat. Imprudenti cura palpebra concreverat cum adnata & cornea; unde palpebra aperiri non poterat, & continua fiebat irritatio & dolor, dum oculo sano moto non poterat impediri, quin etiam alter oculus moveretur. Ingeniosissima methodo molestum hoc malum sustulit *Hildanus* (a). Mulieris pudenda Venereo ulcere erosa concrevisse inter se incuria Medici ex *Benivenio* recenset *Schenckius* (b). Rem hanc etiam confirmat Chirurgia curtorum dicta, per quam partes corporis ablatæ restituuntur: de qua dictum §. 189. & jam monuerat *Celsus*, quod exulceratio digitorum sæpe, nisi magna cura prospeximus, sanescendo eos jungat (c). Si ergo hæc concretio tam facilis fiat in partibus, quæ antea nunquam naturaliter cohæserant, longe magis expectanda erit, quando partes, quæ prius unitæ fuerant, iterum contiguæ fiunt.

(a) Centur. VI. Observ. 7. pag. 103.

(b) Observ. Medicin. Lib. VI. Observ. 23. | (c) A. Corn. Cels. Medic. Lib. V. cap. 28.

pag. 314.

§. 211. **H**ORUM prius absolvitur 1. situ conciliato parti illo, qui quiescenti aderat : 2. leni & æquabili partium ad se invicem compressu, ut in omni superficie contiguæ sint, & quiescant.

1. Maximæ utilitatis est cognoscere, qualis sit situs partium in homine quiescente, & imprimis in homine sano dormiente; tunc enim omnis motus voluntarius silet, & partes corporis sibi relictæ omnium maxime naturali situ disponuntur. Apparebit tunc, nullum articulum corporis extensum esse, sed omnes leviter flecti. Nunquam enim in sano homine dormiente digiti extensi sunt, nunquam tibia cum femoris osse in lineam rectam porrigitur, sed semper omnes illi articuli leviter inflexi sunt: idem de reliquis verum est. Musculi enim, qui articulos flectunt, plerumque extensoribus fortiores inveniuntur; hinc ubi neutri agunt vi musculari, tunc propria contractilitate partium flexores musculi prævalent extensoribus, & ideo semper leniter inflexi apparent in quiescente articulo. Apparet hoc etiam evidenter in paralyti perfecta partium corporis; tunc enim omnis actio muscularis voluntaria cessat. Si enim v. g. totum brachium paralyticum fuerit, digiti semper inflexi inveniuntur, & sic manent; unde sæpe post curatam paralytin non possunt extendi digiti, rigidis factis ligamentis articularum, & musculis flexoribus, tanto temporis spatio non elongatis, hinc propria contractilitate brevioribus redditis: unde extensores digitorum hæc obstacula superare non possunt. Hippocrates, qui tam sollicitè naturalem habitum partium corporis observavit, ut posset cognoscere, quantum morbi inde recederent, & hinc distinguere eorundem variam magnitudinem, hoc pulchre notavit, dum de decubitu optimo ægri agit, dicens: *Oportet autem ægrotum à Medico deprehendi decumbentem in dextrum aut sinistrum latus, & manus & collum & crura parum inflexa habentem, & toto corpore humentem, sic enim plurimi sanorum cubant (a).* Dum hoc negligitur in vulnere curatione, concrescunt inter se partes alio in situ, quam naturaliter habebant, & turpis sæpe nascitur à distractis partibus difformitas, vel motus naturalis partium depravatur sæpe plurimum. Sic puero, cui sexto mense ætatis dextra manus misere combusta fuerat, ab imperitis neglecta hac cautela, digiti omnes, excepto pollice, cum cute metacarpi concreverant, unde pessima difformitas orta, & omnis usus membri perierat; artificiosissima curatione, sed operosa tamen, correxit hanc difformitatem & usum partis restituit Hildanus (b).

In prima autem deligatione vulnere ad hoc attendendum est; nam partes crudæ unitæ citissime conglutinantur: unde non poterit error commissus corrigi, nisi crudeli cura discindantur iterum illa, quæ jam concreverant.

2. Partes corporis per vulnus separatæ propria contractilitate sensim plus recedunt à se mutuo; uti dictum §. 18. n°. 1. Sed ut agglutinentur iterum, requiritur, ut maneant contiguæ: hinc artificiosa pressione debet superari illa vis, qua à se mutuo recedere conantur. Quam maxime autem notandum, quod debeat hæc unio partium fieri in tota vulnere superficie, si enim profundi vulnere labia contigua hiant, & interim partes suppositæ dehiscant, cavum manebit in vulnere, in

(a) In Prognostico Charter. Tom. VIII. pag. 600.

(b) Centur. 1. Observ. Chirurg. Observ. 83, pag. 60.

quo effusi humores colliguntur, & in sinuosum ulcus facient degenerare vulnus. Hoc autem perficietur, spleniis apposis & idonea ligatura vicinas partes sic premendo, ut labia vulneris æque in fundo quam in cute ipsa fiant contigua. Requiritur tamen ut hæc compressio moderata sit, ne fiat in partibus compressis nimia vasorum angustatio, unde inflammatio & omnia, quæ inde sequuntur mala, possent oriri. Simul tunc requiritur perfectissima quies partis vulneratæ, unde sic firmandum est membrum vulneratum, ut immobile maneat; sæpe enim in somno, vel vulnerati incuria, mota parte vulnerata mutatur situs partium, separantur vulneris labia & dilacerantur illa, quæ jam concreverant; unde curationis pulchre eventus tollitur.

§. 212. **R**ETINENTUR in adunatione. 1. Emplastris renacibus, digitatis processibus, ad fines ansatis, utrimque à latere vulneris apposis, & per fila adducendis. Quæ locum habent in longis scissuris transversis cutis, vel partium laxarum.

Varii jam requiruntur modi pro vulnere diversitate, ut partes contiguæ factæ maneant in debita unione. Hoc fit.

1. Per futuram siccam dictam Chirurgis, ut distinguatur à futuris acu factis. Sumunt tenax quodcumque Emplastrum, quod cuti sanæ validissime adhærere potest; vel commune fabrosum gluten, Ichtyocollam, vel aliud quid simile, non refert fere quale fuerit, modo debitam habuerit tenacitatem; illud deinde extendunt supra linteum fortis texturæ, ne facile cedere possit; applicant utrimque ad aliquam distantiam à labiis vulneris, leviter calefactum, ut eo fortius adhæreat; tunc adducunt bina hæc Emplastra ansulis instructa, ut filis transmissis attrahi ad se mutuo pro lubitu possint. Cutis adhærens his Emplastris utrimque sic attrahitur, ut vulneris labia contigua fiant; & cum hæc Emplastra non tegant ipsum vulnus, commode potest videri, an naturalem situm habeant labia vulneris unita; & si aberraverint ab hoc situ, poterit illud facile corrigi. Prout jam vulnere variat magnitudo, varia figura & numerus horum Emplastrorum requiruntur. Minoribus vulneribus, nec admodum hiantibus, digitata talia Emplastra sine ansulis sufficiunt; majoribus autem vulneribus, & quorum labia magis ab invicem recesserunt, tutius applicantur similia Emplastra, quæ habenulis per ansas transmissis adduci possunt. De his Emplastris & vario illorum usu videatur Heisterus, (4) ubi illa delineata habentur.

Sed, uti facile apparet, sola cutis tantum per hæc Emplastra adducitur, subiecta pinguedo, si profundo vulnere læsa fuerit, mobilis admodum & laxa non sequetur cutim adductam; unde fere tantum locum habent, ubi cutis sola per vulnus divisa est, & partes satis laxæ facile sequi possunt. Hinc in vulneribus faciei non nimis profundis, & integumentorum capitis imprimis usum habent; uti etiam in vulneribus non alte penetrantibus reliquarum corporis partium.

Vulneris dein labiis, per Emplastrum tenax unitis, imponitur plumaceolum balsamo quodam vulnerario inunctum, ut aer arceatur, & relictis Emplastris

(4) Institut. Chirurg. Tab. IV. pag. 109.

quotidie vulneris extima superficies lustratur , ut pateat , an omnia recte se habeant.

§. 213. 2. **C**IRCUMDUCTU Fasciarum , & appositu Spleniorum , ut partes dehiscentes (158. 1.) æquabiliter appressæ maneant , & coeant ; quod determinato pressiois modo facile fit. Convenit vulneribus inflictis juxta longitudinem partis vulneratæ.

Vulnera superficialia his non indigent , sed tantum profunda , in quibus requiritur , ut partes in fundo vulneris æque contiguæ fiant , ac superficies extrema , ut bona curatio fiat. In his autem rite applicandis Chirurgi peritia & dexteritas imprimis cognoscuntur. Fasciæ circumductæ omnem ambitum , quem involvunt , premunt æquabiliter , sed spleniis applicatis potest fasciæ compressio , eadem licet maneat , plus agere in quædam loca , quam in reliqua ; hincque pro lubitu determinari pressiois vis , ut omnia puncta superficiei vulneris contigua fiant. Facile patet autem , hanc methodum nullius usus esse , nisi partes vulnere vicinæ molles fuerint , & hinc cedere possint : si v. g. femori juxta longitudinem partis vulnus profundius inflictum fuerit , utrinque à latere spleniis apposis & fasciis circumductis possunt æquabiliter molles partes sic premi , ut divisæ in vulnere tota superficie partes iterum contiguæ fiant. In aliis locis minus carnosus non adeo facile hoc fit ; sed etiam talibus locis raro tam profunda vulnera contingunt , quæ hoc requirant. Hippocrates , ubi de vario deligationum usu agit , hanc methodum indicare videtur. (a) *Ast ubi , qua expansa sunt , contrahere oportet , in cæteris quidem eodem modo. Ex longinquo tamen quodam intervallo contractio , & sensim progressu facto compressio facienda est , primo quidem minimum , postea magis , maxima compressionis terminus sit mutui contactus.*

Quamvis hæc methodus omnium felicissimo successu adhibeatur vulneribus inflictis secundum longitudinem partis vulneratæ , tamen videntur & locum habere posse aliquando in transversis partium vulneribus. Memorabilis ille casus in Commentariis ad §. 164. recensitus hoc docet , ubi nempe saltu validissimo utriusque pedis magnus tendo , qui Achillis dicitur , integra cute rumpebatur , sic ut trium digitorum transversorum amplitudine distarent à se mutuo tendinis rupti extrema : tamen idonea positura partis affectæ , & artificiosa pressione per splenia & fascias circumductas , potuerunt adeo dissitæ partes in mutuum contactum adduci , & con crescere perfectissime. Patet ergo , si in tam difficili casu hoc per artem fieri potuerit , multum etiam ab hac methodo sperari posse aliquando in transversis partium vulneribus.

§. 214. 3. **S**UTURIS per acus chalybeas , rectas in minori , curvas in majori profunditate vulneris , acuta acie , cauda cava filum cera obductum abscondente , ad sufficientem à vulnere distantiam infixas , ad fundum usque adactas , sic pariter in al-

(a) De Medici Officina Charter. Tom. XII. pag. 68.

tero labio eductas, quarum filo adstricto unita prius labia retineantur, dein levi splenio superductum filum colligetur: id repetitur à medio, vel ab angulo vulneris, ad fines ejus, pro necessitate. Hinc balsamo labia linenda, superpositisque levibus spleniis supra nodos, Emplastro regendum est vulnus.

Hæc methodus uniendi vulnere separatas partes vocatur futura cruenta, sive vera, cum illa adunatio partium per emplastra tenacia facta futuræ nomen vix mereatur. Imprimis hic requiritur, ut fiat hæc unio cum minimo dolore & irritatione partium: Dum enim nimis ruditer hæc fiunt, sæpe valida inflammatio sequitur, quæ unionem partium adductarum impedit. Ad hanc rem requiruntur acus chalybeæ satis fortes, nec tamen nimis rigidæ, ne frangantur. Conica figura in his acubus noceret, quia sensum aucta crassities facit, ut difficilior adigantur per partes: hinc sumuntur tales, quarum anterior pars prismatica acutis lateribus facile transit, & viam facit commodam reliquæ parti, quæ conica vel cylindrica est. In minus profundis vulneribus rectæ tales acus sufficerent; in profundioribus autem requiruntur incurvæ, ut ad fundum vulneris usque protrusæ facilius versus superiora emergant. Varia ergo acuum curvatura requiritur pro diversa vulneris profunditate. Nisi jam cauda harum acuum utrimque crenam insculptam habuerit, quæ filum abscondere possit, dum acus protrahitur, ejus cauda cum filo utrimque prominente non posset sequi sine dilaceratione partium. Filum autem cera obducitur, sic enim lubricum factum transit facile, nec humores imbibit, unde fila tumefacta partes, per quas transeunt, comprimerent: præterea humores filo resorpti, mora & calore acriores redditi, irritare possent partes. Acus tunc filo instructa ad sufficientem distantiam à vulnere infigitur, ne fiat postea dilaceratio partium, si nimis propinquo vulnere loco infigeretur. Debent autem acus adigi ad fundum vulneris usque, deinde sursum protrudi, ut per oppositum vulneris latus iterum ad sufficientem distantiam à vulnere exeant. Nisi enim ad fundum vulneris usque penetraverint, superiores partes adducentur quidem, sed inferiores dehiscunt, & cavum relinquent; in quod effusi humores, stagnando corrupti, fistulosum ulcus facient ex puro vulnere: unde postea debebunt iterum solvi illa, quæ unita fuerant.

Filis jam transmissis blanda manuum compressione, qua cutis ducentem quasi sua sponte subsequitur, (a) contigua fiant vulneris labia, & deinde filis adstrictis in hac unione retineantur. Ut autem dolor & dilacerationis metus, quantum fieri potest, evitentur, spleniis ex linteo imprimis cerato, (ne humores imbibendo noceat) impositis prius, constringuntur nodi. Prout jam major fuerit longitudo vulneris, vel figura ejus magis minusve angulosa, plures vel pauciores requiruntur tales futuræ; futura enim, si nimis rara est, non continet, si nimis crebra est, vehementer afficit, quia, quo sapientius acus corpus transiit, quoque plura loca injectum vinculum mordet, eo majores inflammationes oriuntur, maxime æstate (b). Plumaceolum leni balsamo vulnerario inunctum vulnere imponitur; deinde idonea ligatura, vel Emplastro superimposito, retinetur totus apparatus.

(a) A. Cora. Celsi Lib. V. cap. 26. pag. 193. | (b) Ibidem.

Si non oriatur valida inflammatio, vel magnus dolor, relinquitur vulnus sic per duos trefve dies, deinde ligatura vel Emplastro remotis attenditur, an aliqua corruptela odore deregatur ab humoribus effusis, tunc enim plumaceolum prudenter removeri debet, & novum, simili balsamo madidum, applicari; aliter paucae guttulæ balsami instillantur plumaceolo relicto. Ubi jam apparet, labia vulneris concrevisse satis firmiter, fila prudenter leviter trahuntur, ut sciatur an commode educi possint; plerumque enim hoc satis facile fit, & vulnuscula hæc relicta satis cito coeunt.

Si vero valida inflammatio, dolor ingens, tensio partium magna sequantur futuram factam, præstat illam discindere, & vulnus tunc sine futura curare. Nisi enim hoc fiat, pessimorum symptomatum caterva ingruet, quæ sero coget facere illud, quod in tempore factum magis profuisset.

Varia jam futurarum genera, & diversæ has perficiendi methodi apud Auctores habentur, qui de Operationibus Chirurgicis scripserunt.

§. 215. **C**ONVENIUNT (214.) recenti, cruento, à magna tamen hæmorrhagia libero, simplici, pleno, puro, transversio, obliquo, anguloso vulnere.

Nocent (214.) copiosum cruorem stillanti, antiquo, sanioso, purulento, sordido, contuso, substantia propria orbato, crustis obducto, vasis magnis læsis periculoso, nimis profundo, valde inflammato, venenis infecto, in parte necessario mobili hærenti vulnere.

Determinatur hac paragrapho, quibus vulneribus futuræ cum fructu applicari possint, quibus vero noceant.

RECENTI, CRUENTO. Si enim vulnus jam aliquo tempore inflitum fuerit, & imprimis si aer libere accesserit, extremi vasorum fines in superficie vulneris jam erunt mortui; hinc debebunt separari per suppurationem à vivis, nec potuerunt invicem concreescere; frustra ergo per futuram unio fieret.

A MAGNA TAMEN HÆMORRHAGIA LIBERO. Quia sanguis effusus distraheth labia per futuras adducta: unde dilaceratio, dolor, inflammatio, & reliqua, quæ inde sequuntur mala.

SIMPLICI. Cui nempe nulla contusio simul adest ullius momenti. Unde Hippocrates dixerat in loco citato §. 158. N°. 7, acuto telo facta vulnera sine suppuratione curanda esse; si vero contusio adesset, tunc ita medendum esse, ut celerrime suppurentur: carnes enim contusas putrescere & in pus versas contabescere necesse est.

PLENO. In quo nempe tantum facta fuit cohesionis divisio sine ulla substantiæ jactura. Si enim quid ablatum fuerit de vulnere, non poterunt partes separatæ contiguæ reddi, quin distraherentur ex situ naturali, unde semper turpis cicatrix, & læsio functionum violentam talem adductionem sequentur.

PURO. In quo nihil heterogenei à causa vulnerante relicto fuit, nullæ sordes, nec grumi sanguinis, nec caro fungosa adsunt: omnia enim hæc prius separari & educi debent, antequam consolidatio expectari possit.

TRANSVERSO, OBLIQUO, ANGULOSO VULNERI. Quia in his casibus nec Emplastra tenacia, nec artificiosæ fasciarum & splendorum applicationes sufficere possunt, ut partes continguæ fiant, & retineantur adunatæ.

NOCENT COPIOSUM CRUOREM &c. Imperiti Chirurghi, dum nullo habito discrimine quævis vulnera futuris uniunt, quam gravia sæpe miseris intulerunt damna! Quid juvabit unire separatas partes, si unitæ nequeant concreescere; vel effusi humores, unitis labiis vulneris retenti, educi debeant postea, futuris discissis? Turpe tale exemplum enarratum fuit §. 171. N°. 3. ubi rudis Chirurgus pettori inflictum vulnus in cavum penetrans futura univerat, unde in summum vitæ discrimen deducebatur vulneratus, toto pectoris cavo sanguine repleto, qui per clausum vulnus exire non poterat. Et periisset certissime miser homo, nisi Patæus futuris discissis sanguinem eduxisset cavo thoracis contentum. Nisi ergo pura fuerit & sana vulneris totius superficies, nihilque fuerit ablatum de substantia partium, futuræ nocebunt semper. Præterea si vulnus fuerit inflictum tali corporis parti, per quam magna vasa sanguinea, vel notabiles nervi decurrunt, quis audebit acus profunde per talem partem adigere, nisi talis qui scientiæ Anatomicæ partium ignarus periculum non novit? Idem discrimen adest, si nimis profundum vulnus fuerit, unde tendines & membranæ tendinosæ facile per acus lædi possent: à quibus læsis tam sæva solent sequi symptomata: accedit, quod profundo nimis vulnere divisæ partes non poterint adduci ad se invicem, ut in omni puncto superficiei continguæ fiant, nisi fila transmissa attrahantur valida vi; unde dilacerationis, inflammationis validæ &c. magnus metus est. Si vero jam inflammatio vulneratam partem occupaverit, ruditer tractata parte per suturas, augebitur inflammatio sæpe in gangrænam usque: & blanda suppuratione inflammatorum vasculorum fines obstructi una cum materia obstruente debebunt solvi & separari, antequam vulneris superficies pura & unioni apta evadere possit.

Si vero instrumentum vulnerans veneno infectum fuerit, & anomala symptomata maligna virulentia produxerit, tota spes curæ in eo est (nisi cognita sit antidotus veneni vim destruens) ut effusis humoribus per vasa discissa, suctione, vel cucurbitulis aucto affluxu humorum ad vulneris locum, abluatur & expellatur hoc virulentum; vel vivo igne pars infecta uno destruat momenta, ne labem conceptam reliquo corpori communicet. Patet ergo evidenter, per futuram vulneris retineri hoc virulentum, quod expellendum quam ocyssime ars jubebat.

Patet etiam evidenter, quod requiratur absoluta quies partium per futuram unitarum: si enim moveantur hæ partes, idem fiet, ac si fila transmissa traherentur continuo, unde irritatio perpetua, dolor, inflammatio, &c., quæ ex his sequi possunt mala, fient. Possumus jam omnes motus, qui à voluntatis imperio pendent, compescere; illi vero motus, qui absolute ad vitam continuandam requiruntur, pergunt semper. Hæc est ratio, quare vulnera thoracis futuram non admittunt, imprimis si convexæ maxime costarum superficiei inflicta fuerint: singulis enim inspirationibus dilatato pectore distraherentur summo cum dolore partes unitæ. Ideo etiam, dum per futuram uniunt abdominis vulnera, ne contenta viscera per vulnus exprimantur, fasciis sic abdomen firmit, ut vulneratus immoto fere abdomine respiret. Damnanda ergo quam maxime quorundam Chirurgorum impericia & temeritas, qui quævis fere vulnera sine ullo discrimine laceri panni instar consuunt,

§. 216. 4. **A**CU manente vulnere per labia ejus transfixa, filo-
que ei ita circumducto, ut horum retroitum impe-
diat, sed retineat unita. Convenit magnis, hiulcis, pendularum
partium vulneribus.

Prior futura fiebat filis transmissis per foramina acu facta, & deinde adductis
filorum constrictione vulneris labiis: sed in hac methodo acus non educitur ex
partibus perforatis, sed ibi relinquitur, & deinde filum utrimque sic circumdu-
citur, ut labia vulneris acu transfixa, & ad se invicem adducta, maneant conti-
gua. Methodus hæc imprimis adhibita fuit curando *Labio Leporino* dicto, quando
nempe pars illa labii superioris, quæ gutturnium illud sub naso constituit, fissa
est: postea etiam pulchro successu magna & admodum hiantia partium pendula-
rum vulnera sic univerunt. Quia autem in labio leporino fissæ fuerunt à nativitate
hæ partes, hinc utrimque forfice abscinditur callosa superficies, uti & in angulo
superiori leve vulnusculum forfice fit, ut partes uniendæ crudi vulneris naturam
acquirant: si enim quid callosi relictum fuerit, numquam fiet ibi bona unio par-
tium. Rite tunc sibi invicem adaptatis labiis vulneris, acus ad quatuor linearum
distantiam à vulnere infigitur, & per mediam labiorum substantiam transadigitur,
donec in opposito latere ad similem distantiam à vulnere acus emergat, quæ tunc
in vulnere relinquitur, & decussatim circumducto filo in situ retinentur partes
unitæ. Pro varia jam magnitudine vulneris plures vel pauciores acus sic transfi-
guntur, ut in omni puncto partes separatæ fiant perfecte contiguæ. Ne autem
acuti caspides acuum relictarum lædant, abscinduntur forfice, & extremis acuum
supponuntur spongiolæ, quæ longe melius se accommodant figuræ partium, quam
spleniola. Ut autem cito & sine vacillatione possint transadigi acus, aptoprehendun-
tur manubrio, quia solis digitis Chirurgi prehensæ, acus non tam firmiter transa-
digi possent. Præterea ut evitentur illa mala, quæ ab acuum acutis extremis re-
lictis fieri possent, (non potest enim dura chalybs forfice abscindi nisi magna vi ad-
hibita, unde sæpe hoc concussu partium unitarum in situ fieri posset mutatio) ad-
hibuerunt acus chalybeas quidem, sed quarum posterior pars ex puro argento fac-
ta erat: transfixis tunc acubus partem argenteam relinquebant in vulnere, acu-
men chalybeum una cum parte argentea quadam adhærente abscindere poterant
longe minori vi adhibita; Idem etiam pulcherrime perficitur acubus chalybeis pau-
lo majoribus, hinc firmitus tenendis sola digitorum ope, quarum cauda fissa te-
net aciculam argenteam utrimque obtuso capitulo instructam, quæ tunc in vulnere
relinquitur, & filis circumductis firmatur. Videatur de his *Garengeot.* (4)

Ubi jam adunatæ partes firmiter concreverunt, eductis aciculis illis argenteis,
vulnuscula hæc satis facile consolidantur.

§. 217. **U**LTIMUS scopus (185, 4º.) attingitur, curando
ut pars parti sic respondeat, quemadmodum olim in
sanitate, sicque retineantur, ut nimis nec premantur, nec laxen-

(4) *Traité des Operations de Chirurgie &c. Tom. III. pag. 18. &c.*

tur, adurentia, stiptica, adstringentia vitando, imprimis vero curando, ut in omni parte æquabiliter prematur vulnus. Quæ omnia obtinentur peractis, quæ descripta ab (186. ad 206.), & dein imposito leni deficcante medicamento; denique cicatricem spirituosius abluendo.

Indicationes generales illorum, quæ ad curam vulnorum perficiendam requirebantur, enumeratæ fuerunt §. 185, quatuor ibi numeris comprehensæ. De tribus prioribus huc usque dictum fuit: ultimum, quod fieri debebat, erat, ut restitutis illis, quæ perierant de corporis fabrica, & adunatis jam partibus, quæ per causam vulnerantem fuerant separatæ, obduceretur tegumentum naturali cuti quam simillimum. Si enim simplex divisio partium acutissimo instrumento facta fuerit, & mox partes divisæ in situ naturali iterum fuerint unitæ; concresecunt sic, ut nullum vestigium vulneris inflicti relinquatur, tuncque vulnus sine cicatrice sanatur. Cicatrix enim vulneris inflicti post sanationem integram relictum vestigium dicitur, quo pars illa integumentorum, ubi vulneris hiatus fuerat, distinguitur à cute vicina. Omnium ergo perfectissima sanatio vulneris est, ubi nullum vulneris facti vestigium manet: ubi autem hoc obtineri non potest, tota curæ pulchritudo in eo consistit, ut illud vestigium relictum in loco, ubi vulnus fuerat, quam simillimum fiat cuti vicinæ. Dum enim per causam vulnerantem, vel per suppurationem vulnus secutam, aliquid ablatum fuit de substantia corporis, debet renasci aliquod novum, quod ante non fuerat; illudque nunquam habebit omnino easdem dotes, quas pars ablata habuerat; unde poterit distingui à vicinis partibus.

Pulchritudo autem cicatricis pendet à tribus imprimis sequentibus. 1º. Si curetur, ut partes unitæ sint in eodem situ, quem obtinebant ante vulnus inflictum. 2º. Si cicatrix non emineat ultra æquabilem cutis vicinæ superficiem. 3º. Si cicatrix non sit cava. Primum obtinetur, si attendatur, ut labia vulneris per Empastra tenacia, suturas, vel idoneam ligaturam sic respondeant sibi invicem, quemadmodum in sanitate. Secundum fit, si moderata pressione cutis coercens defectus suppleatur, ne vasa hoc regmine orbata, à liquidis suis distenta, ultra æquabilem superficiem emineant: dum enim hoc negligitur, vel nimis emollientibus vulnus tractatur, eminens zona fœdam cicatricem efficit. Tertium cavebitur, si bona facta fuerit restitutio perditæ. Cava autem cicatrix plerumque fit ideo, quia vicinæ cutis pressio panniculum adiposum in vulneris locum premit, & facit assurgere, qui ibi in sordes & fungosam carnem dictam degenerans suppuratione facta consumitur, nec tenascitur postea: unde deprimitur cicatrix, molli pinguedine fulciente destructa, & cava manet. Unde patet, sæpe caveri non posse, quo minus cicatrix profunda & cava relinquatur, si nempe per causam vulnerantem, vel per validam suppurationem secutam, pinguedo destructa fuerit. Monuit Hippocrates: (a) *Ulcera annua quacumque fuerint; aut longius tempus habuerint, os abscedere & cicatrices cavas fieri necesse est.* Et alibi (b): *si ergo undecumque os absciderit, sive nustum sive sectum, sive alio quocumque modo, horum ulcerum cicatrices magis cavae sunt.*

Quam turpes & profundæ cicatrices relinquuntur, postquam per ulcera venerea

(a) Aphorism. 45. Sect. VI. Charter. Tom. IX. pag. 177.

(b) De ulceribus cap. 4. Charter. Tom. XII. pag. 132.


subjacens panniculus adiposus consumtus fuit, satis notum est.

Apparet hinc facile, quare ADURENTIA, STIPTICA, ET ADSTRINGENTIA vitanda sint, si pulchram cicatricem facere velit Chirurgus. Per hæc omnia enim vasa viva vel destruuntur, vel sic constringuntur, ut fluida non transmittant, sed suppuratione facta mortui vel obstructi vasorum fines debebunt separari; unde fiet substantiæ jactura, pinguedinis consumtio, & cava nascetur plus minusve Cicatrix. Simulque patet, quantum possit contribuere ad cicatricis elegantiam æquabilis pressio, quæ impedit, ne vasa nimis distenta emineant.

Cicatricis autem nascentis signa hæc sunt. Margines vulneris vel ulceris jam consolidandi incipiunt magis albi & solidi fieri, sensumque hæc albedo centrum versus ex omni ambitu protenditur: interim in superficie aperta vulneris similis albedo hinc inde sparsa incipit nasci, quæ æquabili superficie cum marginum limbo si concurrat, optima cicatrix nascitur. Vulnus quoque purum; antea in omni superficie puncto humidum in illis locis, ubi illud album cicatricis rudimentum apparet, siccatur. Unde omnia illa remedia, quæ cicatrifiantia vel & Epulotica dicuntur, semper laudantur talia, quæ læviter exsiccant, & roborant. Hinc ex plumbo vel ejus calcibus parata Emplastra; Colophoniz, Olibani, Sarcocollæ &c. tenerrimi pulvisculi vulneri vel ulceri in cicatricem tendenti tanto cum fructu solent applicari; quæ omnia in Materia Medica ad hunc numerum recensentur.

Pater hinc inanis jactantia illorum, qui se omnia vulnera sine cicatrice curare posse arcanis suis remediis gloriantur. Prudentes certe & periti Chirurgi, post magnam substantiæ jacturam, vel diuturnam suppurationem, nunquam pulchram fore cicatricem prædicent: & de hac re vulnerati semper præmoneri debent, ne cicatricis deformitatem curantis incuriæ adscribant temere.

Cicatricis locus deinde spiritu rorismarini, Matricali, vel simili fovere sæpius, convenit: omnibus enim illis spirituosus hæc vis inest, ut partes animalium firmiores reddant. Debiliior enim ille locus manet, tenui tantum pellicula tectus; hinc facilius lædendus, quam vicina loca: Unde sæpe convenit, ut vel leni plumbato Emplastro, vel mollissima aluta tegatur diu adhuc locus jam consolidatus, ne vestitium attritu, vel aëris injuriis, recrudescat sanatum vulnus.



H Æ M O R R H A G I A.

§. 218. **S**I cruor manat ex vulnere multus per suas (159. 160.) causas, sistitur. 1. Causticis ignitis. 2. Corrosivis. 3. Adstringentibus. 4. Circumstricto filo. 5. Dissectione integra. 6. Fasciis & splenio pyramidalis comprimentibus.

Pertractatis illis, quæ ad curam vulnerum generalem pertinent, antequam ad singularia observanda in curatione vulnerum capitis, thoracis & abdominis pergatur, primo consideranda sunt quædam Symptomata, quæ vulneribus accidunt, & sæpe

sæpe tam gravia sunt ; ut in summum vitæ discrimen adducant vulneratum : unde requiritur , ut hæc prius tolli , vel saltem multum minui possint , antequam vulneris curæ prospici possit. Primaria talia Symptomata sunt Hæmorrhagia , Dolor , Convulsio.

Hæmorrhagia propria vocabuli significatione copiosum sanguinis cum impetu effluxum notat ; postea tamen etiam obtinuit , ut pro quocumque sanguinis effluvio sumeretur. Αἱμορραγία enim videtur optime derivari ἀπὸ τοῦ αἵματος ὃ παύεται, quod vocabulum ex Galeni sententia apud Hippocratem idem significabat , quod αἱμαρ εἶναι : cum impetu & confertim prodire. Dum enim sanguis modicus & sensim effluit , ἱπποεῖν vocavit Hippocrates , vel lene stillicidium dixit σταγυεῖν (a). Ubi autem Hæmorrhagiæ nomen simpliciter occurrit apud Hippocratem , non addita parte corporis , ex qua erumpit , tunc intelligi illam , quæ per nares fit , sanguinis eruptionem , monet Galenus. (b)

Post vulnus inflictum sequens copiosus & cum impetu sanguinis effluxus notat semper , vasa majora , sanguinem vitalem rubrum gerentia , læsa esse ; imprimis autem arteriosa , quia venæ , nisi maximæ fuerint , vel ligatura apposita tumeant , raro multum sanguinis fundunt , & nunquam tanto cum impetu , quanto ex arteriis læsis sanguis prorumpit. Si ergo tanta fiat sanguinis jactura , ut funestus merito inde timeatur effectus ; nec spes sit , debilitata vita , vel contracta arteria , sponte sisti posse , tunc recurrimus ad illa auxilia , quæ in arte cognita sunt , ut impediatur sanguinis eruptio : Pleraque tamen hæc auxilia , quæ sanguinis eruptionem compescunt , vulneris curam retardant : destructi enim vasorum fines per ignem , corrosiva , ligaturas , compressiones &c. debebunt prius separari , antequam vulneris consolidatio obtineri possit.

Variae autem methodi adhibita fuerunt ad compescendas hæmorrhagias : omnes tamen hæc vel agebant constringendo vasis discissi orificium ; vel , coagulo inducto sanguini effluenti , impediabant ulteriorem effluxum ; vel denique utrumque simul perficiebant.

1. Præsentissimum remedium hæmorrhagias sistens habetur , si candenti ferro vas sanguinem fundens tangatur ; ilico enim in densam , nec resolvendam amplius massam , comburitur sanguis , sicque obturat vasis aperti orificium : simul ipsum vas ignis actione crispatur & constringitur , unde utroque hoc effectu conspirante sanguis sistitur. Diu hac methodo usi fuerunt Chirurghi : unde in exstirpationibus artuum , & similibus operationibus , in quibus valida metuebatur Hæmorrhagia , semper parata habebant cauteria variae figuræ & magnitudinis , ut comburendo sisterent sanguinem.

Sic apud Græcos recentiores & Arabes , Paulum Aeginetam , Avicennam &c. ferro ignito post exstirpationes membrorum supprimebatur Hæmorrhagia. Guido de Cauliaco , & post illum alii , oleo fervido utebantur in eundem finem. Vesalius (c) in exstirpatione membrorum candenti ferro jubet secari carnes , ut simul sic sanguinis effluxus impediretur. Sed hæc methodus plurima habet incommoda , unde vix adhibetur amplius. Difficile enim est requisitum caloris gradum ferro ignito conciliare ; si nimis candescat , sæpe simul aufertur illud , quod combustum

(a) Gorrxi definit. Medic. pag. 16. Charter. Tom. IX. pag. 18.

(b) Commentar. I. in Lib. I. Epidem.

(c) Chirurg. magn. Lib. V. cap. 12. pag. 1082. cap. 4. Charter. Tom. X. pag. 110.

est ; si non satis caleat , non sistitur Hæmorrhagia. Præterea dolorem ingentem , inflammationem validam , & quæ inde sequi possunt mala , cauteria faciunt ; & omne illud , quod combustione sic destructum fuit , debet postea suppuratione facta recedere à vivis partibus & separari ; unde maximum periculum est , ne decidua eschara redeat post paucos dies Hæmorrhagia , quæ tunc difficilijus adhuc compesci poterit , quam in initio. Vas enim combustum , eschara decidua , brevius erit ; hinc non poterit , vel saltem difficilijus , apprehendi & ligari ; unde crudelis hæc cauterii applicatio repeti deberet , superstiti semper æquali periculo , ne recrudesceret hæmorrhagia , postquam & hæc de novo facta eschara deciderit. Ideo , postquam artificiosa compressione aut vasorum ligatura tam pulchre noverunt sistere sanguinis effluxum periti Chirurghi , cauterii rarior usus fuit. Imo Galenus jam damnaverat Escharoticorum usum , tanquam minus tutum in sistendo sanguine. *Quantum enim parti in crustam adustum est , tantum profecto ipsi de naturali carne deperditur. Id itaque omne parti decidit , dum crusta cadit ; atque ob eam rem nuda & sine carne apparet , multisque , postquam crusta decidit , profusio sanguinis , quæ agre suppressi potuit , supervenit (a).* Unde non nisi in summa necessitate voluit adhibenda esse , & imprimis usum habere dixit , ubi ex erosione alicujus putrescentis sanguinis profluvium oriebatur ; sic enim & sanguis sistebatur , & serpens putridum vivi ignis actione destruebatur illico.

2. Dum vivus ignis per metalla candefacta vel ebulliens oleum applicabatur corporis partibus , vocabant hæc remedia Cauteria simpliciter , vel & Cauteria actualia. Sed dantur acerrima quædam remedia , quæ partes , quibus applicantur , sic destruunt & in escharas comburunt , ac fecisset ignis applicatus. Hæc à similitudine effectuum vocabantur Cauteria ; sed quia actu ignem non continent , dicebantur Cauteria potentialia. Vocantur & Corrosiva , quia partes corporis , quibus applicantur , rodendo consumunt , & destruunt. Sed etiam escharæ , per horum applicationem factæ , debent separari & decidere ; unde idem periculum novæ Hæmorrhagiæ nascitur , ac à cauteriis actualibus applicatis. Præterea omnia hæc acerrima cum sint , vicinas partes nerveas vel tendinosas sæpe pessime irritant , unde tam fæva mala oriri notum est. Laudatissimum imprimis fuit ad hos usus Vitriolum Cyprinum dictum , quod in globulum rasum , vel in pulverem tenuem tritum , & linteis carptis exceptum , applicabant orificio vasis discissi. Sanguis ipso tactu fere vitrioli illius coagulatur in thrombum , qui operculi instar vas dissectum claudit , simul & constringit vas ipsum & in escharam comburit vitriolum. Sed non potest globulus ex vitriolo factus applicatus manere orificio vasis discissi , nisi idonea firmetur ligatura , quæ sola posset sufficere , uti statim patebit.

3. Dictum fuit §. 28. N°. 4. de adstringentibus , quatenus fibrarum solidarum corporis nimis debilem cohesionem redderent fortiolem , sed hic adstringentium usus tantum est , ut sanguinis fluxum compescant. Hoc autem efficiunt , vel constringendo orificium vasis discissi ; vel coagulando sanguinem effluentem , qui tunc vasis orificium obturat ; vel denique utrumque effectum simul præstant. Sunt & præterea alia remedia , quæ , licet nec sanguinem faciant adeo concrelescere , nec vasa constringant , tamen sanguinis effluxum cohibeant ; unde hoc respectu

(a) Method. medendi Lib. V. cap. 4. Chartes Tom. X. pag. 110.

tantum adstringentium nomen merentur. Talia sunt v. g. farina volatilis moli-
torum, gypsi pulvis & similia bibula corpora, quæ liquidum quodcumque, quod
attingunt, absorbent, & cum liquido absorpto concrefcunt in duram satis mas-
sam, quæ vas discissum obturare & sic effluentem sanguinem sistere poterit: sed
si major arteria discissa fuerit, torrente sanguinis erumpentis averrentur hi pul-
visculi; hinc minus his confidere possumus: unde post magnas extirpationes;
dum applicabant vulneris superficiei bibula hæc corpora Chirurgi, simul noctes
diesque famuli adlidentis manu curabant premi sic apparatus totum, ut firmi-
ter manerent applicata. Hinc iterum patet, parum ab his sperandum esse in va-
lidis Hæmorrhagiis, nisi idonea simul accesserit compressio.

Inter illa vero, quæ coagulo inducto sanguini, vel constrictione vasis agebant,
maxime laudabatur alcohol, si calidum imprimis applicaretur: Illud enim sta-
tim ipsum etiam sanguinis serum adeo fluidum in scissilem massam convertit, &
simul satis valide solidas partes corporis contrahit; unde animalium partes mol-
les in alcohole servatæ indurescunt, & mole minuuntur: utroque hoc effectu
conspirante Hæmorrhagias compescere efficaciter poterit. Sed extremum vasis dis-
cissi, per Alcoholis applicationem contractum & induratum, separabitur postea
thrombus, sanguinis per alcohol indurati, secedet vel sponte, vel imperu
sanguinis à tergo impulsus protrudetur; unde iterum recrudescet Hæmorrha-
gia, nisi idonea ligatura & pressione retineatur thrombus ab Alcohole factus in
vasis discissi orificio. Præterea calore corporis fugacissimum Alcohol statim dis-
pergitur, unde fere momentanea ejus actio est, nisi contipuo de novo applice-
tur, & vesica oleo inuncta circumposita impediatur ejus nimis subita exhalatio.
Patet ergo & hujus usum, sine compressione simul adhibita, minus tutum
esse.

Vidi enim sic, etiam parva arteriola læsa, non potuisse sisti sanguinem Al-
coholis applicatione. Evulserat homini dentem molarem Chirurgus; sanguis jugi
stillicidio ex alveolo dentis evulsi exibat; frustra vitrioli pulverem, imo & acer-
rimum vitrioli oleum applicuerat Chirurgus, ut hanc hæmorrhagiam compesceret.
Vocatus sincerum alcohol calefactum, & plumaceolis exceptum, cavo alveolo
imponi jussi eo usque, ut eminentia hæc plumaceola clausis maxillis satis firmiter
apprimerentur, sed sine successu, licet aliquoties hoc repeteretur. Tandem re-
pleto siccis plumaceolis alveolo, per tres dies & noctes, digito adstantis famuli
comprimebatur locus assiduo, nec postea rediit Hæmorrhagia; sed post paucas
septimanas pars alveoli ossei, tot acribus applicatis omni vitali humorum influxu
privata, excidit sine ullo alio malo. Cum ergo tam parvæ arteriæ læsæ Hæmor-
rhagiam sistere non potuerit Alcohol, facile apparet, quod in majoribus arteriis
discissis etiam sæpe fallere posset.

Oleum autem terebinthinæ, nisi calidum fuerit, vix sanguinem sistit. Molles
quidem animalium partes, oleo terebinthinæ submersæ, indurescunt, sed lenta
tantum mora. Olea vero longe majorem caloris gradum requirunt, antequam
ebulliant, quam aqua; hinc oleum terebinthinæ calefactum comburendo solida
& coagulando sanguinem, Hæmorrhagiam compescere potuerit, tuncque instar
caustici actualis ager, de quo dictum fuit. Acerrima autem illa acida fossilia,
uti spiritus nitri, sulphuris &c. corrosiva sunt, decorum usu dictum pariter fuit.
Reliqua autem adstringentia mitiora, ut sanguis Draconis, granatorum cortices,

R r ij

flores &c. non videntur habere tantam efficaciam, ut ab illis solis multum sperari possit in compescendis Hæmorrhagiis.

Simul apparet, quid credendum sit de tot arcanis stipticis remediis, quæ jactantur à multis. Minores arteriæ, imo & sæpe satis magnæ, integre discissæ, sponte clauduntur, imprimis debilitata vita per magnam sanguinis jacturam: Plurima ex illis jactatis specificis erant acria corrodentia; alia mitiora forti ligatura apprimebantur ad vas læsum; unde sæpe sanguis sistebatur sola compressione potius vasis læsi, quam efficacia applicati remedii. Dumque circa finem elapsi sæculi plurima experimenta, arcanis his remediis facta, observaverat aptissimus in his rebus judex PETITUS, vidit leviores Hæmorrhagias his aliquando sisti potuisse, sed amputatione membri facta promissis non respondisse eventum. (a) Unde patet, similia jactantibus non temere fidem adhibendam esse.

4. Si manibus accessus detur ad arteriam discissam, sic ut ligari possit, certissime sistetur Hæmorrhagia vinculo circumposito. Methodus hæc sanguinem sistendi à Galeno jam commendata fuit. (b) Postquam enim varia auxilia ad compescendam vulnere Hæmorrhagiam recensuit, dicit: *Quippe de genere obstruantium quodammodo est & vinculum ipsis vasis sanguinem fundentibus circumpositum, ipsique nostri digiti, dum ea committunt & constringunt.* Videtur autem tantum hac methodo usus fuisse in vulneribus, membrorum enim sphacelo corruptorum, extirpationem, quantum memini, non descripsit. In magnis etiam extirpationibus ubi adeo periculosa est Hæmorrhagia ex majoribus vasis discissis, nulla fit mentio ligaturæ vasorum apud Celsum (c), qui tamen alibi (d) dicit, ubi curationem profusionis sanguinis ex vulneribus describit, quod si alia auxilia incassum adhibita fuerint, *vena, quæ sanguinem fundunt, apprehendenda, circaque id, quod ictum est duobus locis diliganda intercidendaque sunt ut & in se ipsa coeant, & nihilominus ora præclusa habeant*: Post Galenum reliqui omnes Medici & Chirurgi Hæmorrhagiam, post artuum extirpationem, causticis compescebant; imo & Vesalius (e) hanc operationem describens, novacula ignita jubet carnem incidi ad os usque, & postea ferramentis ignitis magna vasa comburi. Paræus, cum horreret crudelem hanc methodum, & observaret plurimos sic tractatos perire, paucos evadere post summas molestias toleratas, primus fuit, uti ipse testatur, (f) qui vasa dissecta ligavit post amputationem factam, forcipe illa protrahens, & duplicato filo ligans una cum parte circumpositæ carnis; si vero decidua ligatura recrudesceret Hæmorrhagia, transfigebat acu partes carnosas vasi discisso vicinas, & filo supra spleniolum impositum constricto claudebat vasis discissi orificium. (g) Postea fere omnes, relicto usu cauteriorum actualium & potentialium ligatura usi sunt. Fecerunt autem hoc duplici modo: vel enim extremum arteriæ discissæ protraheretur forcipe, & dein filo circumducto ligabant: sed si filum fortiter adstringeretur, sæpe sensum dissecabat arteriam, extremum ligatum cadebat nimis cito, & recrudescerebat Hæmorrhagia jam periculosior, quia difficilius vas,

(a) Académ. des Sciences l'An 1735. Mem. pag. 594.

(b) Method. medend. Lib. V. cap. 3. Character. Tom. X. pag. 107. 108. & ibid. cap. 5. pag. 111.

(c) Lib. VII. cap. ultimo pag. 498.

(d) Lib. V. cap. 26. N°. 11. pag. 290 291.

(e) Chirurg. Magn. Lib. V. cap. 12. pag.

108.

(f) Lib. XII cap. 38.

(g) Ibid. cap. 35.

brevius redditum, poterat nova ligatura claudi: unde Dionisius nodo jam confectio juberet, ut alterum fili extremum acu munitum per ipsam vasis substantiam transfigatur, & sic caveatur, ne ligatura decidat nimis cito (a): Tamen & hæc methodus tanquam nimis difficilis postea repudiata fuit. Si vero laxior ligatura nudæ arteriæ injicitur, tunc sanguis, continuo urgens locum ligatum, sensim protrudit ligaturam & decidere facit. Unde prævaluit illa methodus, quam Paræus descripsit, ligandi nempe arteriam una cum parte carnis vicinæ ambientis: sic enim clauditur optime arteriæ extremum, nec periculum est, ne ligatura tam facile decidat. Pater evidenter, quod ligatura præferenda sit combustioni vasorum, si considerentur sequentia. Dum igne vivo vel causticis potentialibus aduritur vasis extremum, & coagulatur sanguis effluxurus, partes combustæ escharam faciunt, quæ operculi instar vasis discissi regit orificium; huic operculo cohæret thrombus coagulati sanguinis, discissæ arteriæ cavum replens: decidua eschara thrombus solus in cavo vase hærens sustinet sanguinis impulsu impetum; sed vasis extremum, decidua eschara patulum, facile transmittet thrombum, qui ergo expelletur, & liberam viam sanguini erupturo faciet. Dum vero ligatura clausum fuit vas, con- niveret; hinc thrombus pone ligaturam hærens apice angusto ligaturam tanget, & latiori basi cavum vasis obturabit: decidua ergo per suppurationem parte ligata & filo ligante, licet nondum penitus consolidata fuerit arteria, tamen thrombus à parte sua postrema latior non poterit transprimi per angustum con- niventis arteriæ extremum; angustior apici thrombi pars exibat forte, reliqua pars crassior obturabit vas & sistet Hæmorrhagiam. Pulcherrime hanc rem expli- cuit, & figura addita thrombi elucidavit PETITUS. (b)

Securior longe ergo præcedentibus hæc methodus est, quamvis non omnino careat incommodis. Sæpe enim magnus dolor & valida inflammatio sequuntur, dum una cum vicina carne ligantur arteriæ; imprimis si simul nervi discissi li- gatura sic intercipientur: unde sæpe inviti & convulsivi motus oriuntur in parte truncata, quibus ligatura solvi posset & redire Hæmorrhagia.

§. Imprimis hoc locum habet, ubi arteria non nimis magna, nec cordi ad- modum vicina, vulnerata est, non tamen integre discissa; tunc enim Hæmorrha- gia perget, quia retrotractis propria elasticitate fibris vulnus arteriæ ampliatur: si vero eadem arteria integre discissa fuerit, tunc demonstratum fuit in Commen- tario §. 159. quod extrema arteriæ resiliant & recondantur sub solidis partibus vicinis, & propria contractilitate, & vicinorum pressione claudantur integre, sicque sistatur sanguis. Ubi ergo jugi stillicidio sanguis de vulnere fluit, tunc lo- cus vulneris, unde sanguis exire videtur, scarificatur scalpello, ut sic integre discindatur læsa arteria. Hac methodo se feliciter usum fuisse Galenus narrat: (c) *Homini cuidam ex vulnere in malleolo infligto lacerata fuerat arteria, nec san- guinis effluxus quievit, donec Galenus vocatus totam resecurit*: Addit deinde, quod sine Aneurismate curatum fuerit vulnus, quod aliter metuendum est in ta- li vulnere arteriæ, dum debilior cicatrix à sanguine extenditur in saccum talem dilatatum.

Sed apparet facile, tuto non posse sic integre dissecuri arteriam, nisi medio:

(a) Dionis, Cours d'Operations de Chirur-
gie &c. Demonstrat. neuvième pag. 509.

(b) Academie des Sciences l'an. 1731. Me-

moires. pag. 123. &c.

(c) De Curandi ratione per venæ Sectionem
cap. ultimo. Charter. Tom. X. pag. 451.

cris tantum magnitudinis fuerit, nec in loco cordi valde propinquo, nam tunc non cessaret Hæmorrhagia, licet arteria penitus discissa foret, sed deberet ligatura vel alia methodo obturari vas discissum.

Tamen constitit, arteriam vulneratam, non vero integre dissectam, moderata pressione sic firmari posse, ut sanguis sisteretur, non enim tunc semper requiritur tam fortis arteriæ compressio, ut integre aboleatur ejus cavum; sufficit talis, quæ liberum sanguinis effluxum per arteriæ vulnus impedit, & thrombum sanguineum intra vulneris labia continet, qui præcipuum sanguinis effluxuri impedimentum est, & postea margini vulneris firmissime accrescens integritatem vulneratæ partis restituit: uti in cadavere hominis subita morte extincti patuit, cui ante bimestre spatium brachii arteria vulnerata coaluerat. Apparuit enim evidenter, vulneratæ arteriæ margines non coivisse inter se, sed thrombum sanguineum inter vulneris labia incertum undique accrevisse vulneris circumferentia. (a)

6. Compressio vasis discissi omnium optima & maxime naturalis methodus est; qua hæmorrhagia sisti potest, & quam omnes homines sponte adhibent, dum sanguinem de vulnere erumpentem vident, digitis nempe comprimendo partem vulneratam. Sed hæc compressio potest agere vel perpendiculariter in superficiem patulam abscissi vasis, vel poterit applicari à latere vasis, & sic parietes ejus contiguos sibi mutuo reddere. In priori casu impeditur quidem sanguinis effluxus, sed thrombus à concreto sanguine natus ejusdem magnitudinis cum orificio vasis discissi cum sit, dum remittitur compressio, ab impetu sanguinis à tergo urgentis facile expellitur; unde debet in hoc casu pressio agere in vas discissum tamdiu, donec thrombus coagulati sanguinis concreverit cum ipsis lateribus vasis discissi, quod non fit tam cito; sed valida talis compressio & diu applicata, multa potest facere mala, inflammationem nempe, & omnes ejus sequelas.

Si vero causa comprimens agat in partem lateralem vasis discissi, connivent parietes vasis, & sibi mutuo contigui facti lata superficie concrescunt; thrombus coagulati sanguinis, pone compressum locum hærens, cum cylindricus fere sit, non poterit pelli per compressa latera vasis, licet nondum perfecta unio facta fuerit. Patet ergo facile, quantum præferenda sit hæc methodus reliquis omnibus. Si enim vasis apertura claudatur tantum, cessat Hæmorrhagia: sed hoc fit pulcherrime per talem compressionem, & contigua facta vasis latera brevi concrescunt, absque eo quod requiratur aliqua separatio partium mortuarum, uti post caustica actualia vel potentialia applicata, imo post ipsam ligaturam vasis, fieri debet. Accedit, quod ligato vase unio laterum fiat tantum in parva superficie, ubi filum hæsit; sed laterali pressione complanati vasis latera majori superficie uniuntur; hinc firmitus hærent & plus resistunt sanguini erupturo. Nunquam autem citius & melius concrescunt partes inter se, quam ubi recenti vulnere divisæ fuerunt: sufficit enim tunc partium separatarum unio, reliquum natura perficit. Hoc autem perfectissime fit hac methodo, dum crudo vulnere, nullis rodentibus vel ligaturis vexato, applicatur tantum talis compressio in locis illis, ubi magna vasa hiant.

Ut autem feliciter & sanguis sistatur, & simul vulnus curetur, requiritur im-

(a) Académ. des Sciences l'an 1735. Mém. 592. &c.

primis, ut pressio agat tantum in vasis discissi latera, non adeo in reliquam vulneris superficiem. Ideo ex charta diu dentibus masticata vel ex linteis carptis Chirurghi parabant globulum, quem applicabant loco vulneris, qui comprimi debebat, huic alium paulo majorem imponebant, tunc tertium iterum majorem, & sic porro, donec satis emineret ille apparatus, ut fascia circumducta commode posset apprimi ad vas dissectum. Sic enim quasi pyramis inversa nascebatur, cujus apex vasis lateri applicatus pressionem fasciæ basi circumductæ communicabat tantum illi loco vulneris, ubi requirebatur. Pulcherrimum autem instrumentum descripsit, & tabula expressit PETITUS, cujus applicatione tutissime poterat comprimi vas discissum, & simul arteriæ truncus supra vulneris locum angustari pro lubitu, dum vulnus deligatur; simul & compressio vasis discissi pro re nata augeri & minui poterat ejusdem instrumenti usu (a). Ibidem memorabili exemplo & hujus methodi certitudinem & instrumenti usum confirmat. Nobili enim viro extirpatio cruris supra genu facta, & ligatura vasorum ex arte instituta fuerat: omnia bene succedebant, donec vigesimo primo post membri amputationem die, soluta ligatura vasorum ægri imprudentia, recrudesceret Hæmorrhagia; quæ sistebatur feliciter, applicato vitrioli globulo ad orificium vasis aperti, & idonea ligatura firmato: sed post undecim dies decidua eschara redibat Hæmorrhagia. Periculoso hoc statu sola videbatur superesse compressio vasis, ut servaretur æger: causticorum enim infidum usum eventus docuerat, vasis retracti & brevioris redditæ ligatura non sine magna difficultate fieri poterat. Applicatum hoc instrumentum pulcherrimo successu Hæmorrhagiam compescuit, & integra sanatio tam periculosi vulneris secuta fuit.

Patet ergo, artificiosam vasis compressionem compescere periculosissimas etiam Hæmorrhagias, licet alia remedia frustra adhibita fuerint; illamque solam sufficere in omni casu, cum reliqua auxilia tantum in quibusdam casibus usum habere possint. Omnium autem optime agit hæc compressio, si à latere vasis discissi applicata comprimat patulum orificium; licet tamen in difficillimis casibus pressio perpendicularis in superficiem vasis dissecti Hæmorrhagias compescuerit aliquando felicissime. Hujus rei pulchrum exemplum habetur in Academia Regia Scientiarum. (b) Homini, ante octodecim menses fracturam compositam ossium tibiæ & fibulæ passo, communi consilio Chirurgorum extirpabatur crus sub genu articulo: sed nec tornatilis ligatura, trunco arteriæ applicata, compescere poterat Hæmorrhagiam; nec ligatura vasorum discissorum poterat adhiberi, quia arteriæ penitus ossis comprimi non poterant; hinc pleno rivo summoque cum impetu sanguis pergebat effluere, sed linteis carptis applicatis per splenia gradatim incrementa appressis feliciter sistebatur tam periculosa Hæmorrhagia, adeo ut quarta post extirpationem factam die, dum omnis apparatus removebatur, ne guttula quidem sanguinis efflueret. Aliquando etiam contingit in cruris extirpatione, ut arteria, quæ tibiæ os in parte superiori & posteriori perforat, & sæpe pollicis longitudine per ipsam ossis substantiam decurrit, dissecta pergat continuo sanguinem fundere, si nempe in illo canali osseo hærens dissecetur, ubi os ferra dividitur. Patet facile, ligaturam hic nullius usus esse; sola compressio per lintea carpta, orificio vasis discissi appressa, superavit anceps hoc malum. (c)

(a) Académ. des Sciences l'An 1731. Mem. pag. 131. &c.

(b) L'An 1731. Memoires pag. 536. &c.

(c) Ibid. pag. 139.

In similibus tamen casibus compressio fortior requiritur, quam si laterali pressione complanati vasis latera contigua facta fuerint, quia vasis discissi amplitudo eadem manet, hinc facile thrombus concreti sanguinis vas discissum obturans expelli posset, nisi valida pressione retineretur.

§. 219. **R**EVULSIO hic (218.) nihil juvat, nisi vascula læsa (159.) parva, & plethora adsit. Eadem de victu potu, & internis medicamentis vera sunt: quæ autem de Hæmorrhagia dicta, eadem & fluxui ichoris applicari queunt, licet auxilium hic summum in balsamicis crassioribus.

REVULSIO HIC NIHIL JUVAT &c. Galenus methodum tradens, quæ sanguis ex vulnere fluens sisti posset, dicit hoc fieri, *obturato quidem, quod per-ruptum est, averso autem atque aliorsum translato, quod per illud ferebatur.* (a) Sed circulationis sanguinis, qualem hodie novimus, ignarus cum fuerit non mirum est, illum fuisse in hac opinione, quod revellentia in compescendis Hæmorrhagiis vulnerum multum prodesse possent. Sed si magna arteria discissa est, quid juvabit Venæ sectio in alia corporis parte? certe omnis sanguis ruet potius per patulum arteriæ vulnus, ubi resistantia nulla est, ad mortem vel saltem animi deliquium usque. Vidi, repetitam etiam Venæ sectionem non potuisse sedare Hæmorrhagiam, quæ post dentem evulsum sequebatur: quid ergo proderit, ubi major arteria dissecta est, si sanguinis fluxum ex tam parva arteriola impedire non potuit? Nec poterit à revellentibus aliis, quæ frictione vel irritatione quacunque partium diffitarum à loco vulnerato agunt, quid boni sperari; cum potius noceant, quia morum prius in parte, dein in toto corpore augent.

Ubi vero ingens sanguinis copia adest, nec satis illa munita fuerit per Hæmorrhagiam, Venæ sectio prodesse posset, si vascula læsa parva fuerint, ut nempe minutata copia & impetu sanguinis vascula læsa minus distenta se contrahere possint.

EADEM DE VICTU, POTU &c. Ubi Hæmorrhagia sedata est per remedia præcedenti paragrapho descripta, in cibo & potu semper sollicitè vitantur talia, quæ copiam vel impetum sanguinis nimis subito augere possent, donec vas læsum optime consolidatum fuerit: hocque respectu debitum victus regimen multum boni facere potest. Sed facile patet, nihil inde sperandum esse, ut cohibeatur sanguinis effluxus ex patulo vase vulnerato; præsens enim auxilium poscit valida sanguinis jactura. Et licet daretur, cibum & potum aliquid huc facere posse, nimia requiritur mora, antequam chylus ex ingestis factus ad vulnus venire posset. Idem verum est de medicamentis interne sumtis, quibus talis efficacia adscribitur, ut sanguinem ex vulnere impetuose erumpentem sistere possent. Patuit enim ex modo dictis, ne quidem fortissima adstringentia posse sic cohibere periculosam Hæmorrhagiam, ut illis confidere tuto liceat, quamvis magna copia ipsi vasi discisso applicentur. Quid ergo sperandum foret ab iisdem, dum interne sumta, sanguini mista, mutata jam per corporis vires, circulationis actione ad locum vulneratum pauca copia deferuntur? una enim cum sanguine elabentur per hians va-

(a) Method. Med. Lib. V. cap. 3. Charter. Tom. X. pag. 106.

sis discissi vulnus. Præterea omnia auxilia, quæ Hæmorrhagiam compescere possunt, hoc faciunt vel constricto vase, vel coagulo inducto sanguini effluxuro, vel utroque hoc effectū conspirante agunt. Si ergo hæc remedia, dum sanguini mista per vasa fluunt, has vires haberent; an non prius constringendo pulmonis vasa minima, vel coagulando sanguinem, mortem inducerent, impedito sanguinis per pulmonem transitu, antequam ad locum vulneratum pervenire possent? Dum minores arteriæ discissæ propria contractilitate, & minuto sanguinis impetu ob sanguinis jacturam factam, clauduntur sponte, uti dictum §. 159. tunc similibus remediis adhibitis tribuebatur Hæmorrhagiæ sedatio, quæ longe aliis debebatur causis. Plurima jactantur talia, quorum multa impune quidem exhiberi possunt, cum nec noceant nec prosint; nemo tamen prudens his confidet, & interim, efficacioribus auxiliis neglectis, summo discrimini vulneratum exponet.

EADEM ET FLUXUI ICHORIS APPLICARI QUEUNT &c. Accidit aliquando, ut vulnera etiam leviora sequatur ingens tenuis lymphæ effluxus, vasis arteriosis lymphaticis majoribus læsis, uti videtur, ex venosis enim lymphaticis dissecctis vix videtur tanta copia lymphæ effluere posse, cum venæ sanguinæ læse, nisi maximæ fuerint, parum tantum sanguinis eructent, nisi ligatura vel aliud quodcumque obstaculum inter cor & venæ vulnus ponatur. Distingui tamen maxime debet ichoris effluxus, qui à vasis lymphaticis; vulnere læsis; oritur, ab illo, qui post nervi vel tendinis puncturas, & sævissimam inflammationem secutam, fit: longe enim alia auxilia requiruntur in tali casu, uti dictum fuit §. 163. Sed hic tantum agitur de fluxu ichoris, qui à vasorum ver vulnus facta læsione oritur; tuncque illa, quæ Hæmorrhagiis compescendis conveniunt, prodesse poterunt. Dictum fuit in præcedenti paragrapho, artificiosam vasis compressionem tutissimum & simul efficacissimum remedium esse ad compescendas etiam maximas Hæmorrhagias; & constitit, idem hoc auxilium ichoris effluxum tollere.

Chirurgus Bubonem Venereum, nondum perfecte maturum, aperuerat lanceola, & mala fortuna vas Lymphaticum dissecuerat, unde ingens lymphæ copia quotidie de vulnere profluebat. Consilii experts Celeberrimo Ruyschio indicavit hunc casum qui spleniis ex linteo complicato applicatis, & fibula valide compressis, tam feliciter sustulit hoc malum, ut sequenti die jam omnis lymphæ effluxus cessaret. (a) Ubi vero post nervi puncturam ichoris ille effluxus sequitur, compressio talis brevi in gangrænam faceret transire partes inflammatas. Pulchrum etiam effectum habuerunt balsama omnia nativa, imprimis crassiora, quæ oleoso lentore vasculi talis vulnus obturare possunt; & interim vulneratis partibus amica & salutaria observantur, ac in tendinum & nervorum puncturis tantum usum habent. Dumque hæc satis calida applicantur vulnere, ut plerumque solet fieri, forte etiam tenera hæc vascula calore majori contrahunt & claudunt.

(a) Ruysch. Observat. Anatom. Chirurg. Centur. Observ. 41.



D O L O R.

§. 220. **S**I fibra nervosa, cerebro orta, ita extenditur, vel alio modo disponitur, ut dissolutionem minuetur, fit Doloris idea.

Dolor est in mente perceptio rei molestæ; quam adeo detestatur natura humana, ut omni molimine vel invitus homo conetur tollere illud, quod causam illius ingratae perceptionis esse credit. Sanus enim homo habet in se facultatem percipiendi quasdam ideas occasione mutatorum nervorum quorundam, quam à se remove nequit ullo modo. Profundæ meditationi totus quasi immeritus Philosophus, si ferrum ignitum parti corporis applicetur, mox habebit mutatam cogitationem, & orietur in ejus mente ingrata illa perceptio, quam dolorem vocamus. Quid autem sit in mente illa perceptio, impossibile est verbis explicare; solus ille novit, qui dolorem patitur. Non enim oritur aliqua representatio rei diversæ à cogitatione, sed adest affectio percipiens: nemo enim cogitat, dum dolet, quod extra illum sit aliquid simile illi dolori, sed omnes dicunt, quod sint ipsi dolentes.

Doloris idea jam non relinquit sui memoriam, qui enim dolorem passus fuit; & momento post liber est, memor quidem est, quod illud molestum adfuerit, sed nullam habet amplius doloris ideam, nec potest ullo modo facere, ut illa renascatur in mente, nisi nova doloris causa accesserit, quæ mutato prius corpore, mentem in sua cogitatione mutaverit.

Quanam vero sit illa mutatio in corpore, & quibus in partibus corporis fiat; à qua nascitur in mente doloris idea, possumus cognoscere per Experimenta. Demonstratur enim, solis nervis à cerebro oriundis hanc facultatem inesse, ut ab illorum affectione nascatur in mente doloris idea. Si enim nervus, qui solus ad partem quamdam corporis tendit, destruat, poterit pars talis secari, uri &c. sine ulla doloris idea in mente excitata, licet reliquarum omnium partium integritas maneat. Sed omnes nervi in toto corpore oriuntur à medulla oblongata, quæ medullam cerebri & cerebelli in se continet; vel à medulla spinali, quæ medullæ oblongatæ continuatio est, & præterea medullarem substantiam à proprio cortice ortam continet. Tamen solos nervos à medullari cerebri substantia ortos doloris ideam in mente excitare, patet inde, quod in omnibus illis morbis, in quibus cerebri actio per nervos tollitur, nullus sentiatur dolor. Summa ebrietate sepulti, ut & apoplectici perfecti, ab effusis in cranio humoribus, nullum sensum doloris habent, licet vivus ignis partes corporis comburat: Idem in Epilepsia exquisita tristibus exemplis tories constitit. Unde apparet, solis nervis à cerebro oriundis hanc inesse facultatem, ut ab illorum mutatione excitetur in mente doloris idea. Quanam jam est illa mutatio nervi à cerebro orti, quæ in mente doloris sensum facit? Videretur esse talis dispositio, quæ, si diutius du-

rat, vel magis intenditur; faceret nervi in continuitate solutionem. Si enim homini sanissimo, cui nullus dolor in ulla parte corporis adest, in quo nullum in fluidis vel solidis corporis partibus vitium invenitur, tenuissima acicula sub unguem digiti manus vel pedis adigatur, mox oritur enormis dolor, qui totum hominem convelli faciet, tantum à mechanica tali mutatione papillæ nervosæ. Nec refert, qualiscumque causa sit, & quocumque modo agat: modo fibræ talem nervosam à cerebro oriundam sic disponat, ut rupturæ proxima sit, nec rumpatur tamen, (destructo enim nervo, dolor cessat) excitabitur in mente ingrata illa perceptio, quam dolorem vocant omnes.

Sed ut hæc mutata conditio nervi ideam doloris faciat nasci in mente, requiritur, ut nervi hujus in cerebrum, & cerebri in nervum, libera maneat actio, non interrupta ullo obstaculo: si enim nervus in suo decursu ligatus fuerit, licet ejus extremum trahatur, laceretur &c. non erit in mente doloris sensus. Idem erit, si nervo manente libero in toto suo decursu, ipsum cerebrum in functionibus suis læsum fuerit. Patet ergo per hanc mutationem nervi aliquid mutari in ipso cerebro, tuncque ab hac mutatione cerebri nasci in mente doloris ideam. Videtur ergo admodum verosimile, posse doloris ideam nasci aliquando in mente, licet nulla mutatio in nervis acciderit: si nempe cerebrum à quacumque demum causa talem accipiat mutationem, qualem accepisset, si fibra nervosa quædam in aliqua corporis parte sic disponeretur, ut dissolutionem minitaretur. Hanc rem confirmant observata Medica: Sæpe enim accidit, ut illi, qui per belli calamitates aut alia infortunia cruribus truncati fuerant, de dolore digitorum pedis abscissi coquererentur: imo in quibusdam observatum fuit, talis doloris sensum fuisse signum imminentis convulsionis, cerebro, omnium nervorum sentientium origine, mutato. (a) Nec tantum hoc fiebat parvo post extirpationem factam temporis intervallo, sed etiam diu postea. Dum ergo quibusdam hominibus primum illud originale sensibus & moribus inserviens, à quo oriuntur omnes nervi, facilius afficitur, quam in aliis, erunt obnoxii plurimis morbis & doloribus, quos externis causis adscribunt; qui tamen totam suam originem debent nimis facili mobilitati ipsius sensorii communis.

Hinc Sydenhamus videns, quod Venam secando, purgando &c. nihil proficeret in mixtis illis morbis, qui à turbato spirituum motu oriuntur, conclusit tandem, quod uti homo quidam exterior conspicitur, ex partibus sensui obviis compaginat, ita procul dubio & interior est quidam homo, è debita spirituum serie & quasi fabrica constans, sub rationis lumine contemplandus. Hic verò cum temperie corporis intimius conjunctus & quasi unitus, tanto agrius faciliusve de statu suo dejicitur, quanto major est minorve ea, quam à natura sortimur, principiorum constituentium firmitas. (b) Unde in talibus morbis, dum dolores varias corporis partes obsidentes distinctissima simulabant mala, merito solam spirituum animalium & res incusabat & inordinatos motus, hisque compescendis tantum omnem navabat operam; per experimenta probe edoctus, omnes illos tunc sopiri dolores, & omnia illa tunc sedari symptomata, quæ tanta varietate in mirabili hoc affectu distinctissimos mentiebantur morbos. Confirmabat hanc rem, quod sola animi perturbatio in mobi-

(a) Miscellan curiosa decur. 1. Ann. 1. pag. | Observ. XV.

32. Hildan. Observ. Chirurgic. Centur. III. | (b) Sydenham. Dissert. Epistolar. pag. 496.
Sf ij.

libus illis corporibus tot malorum catervam producere poterat, licet momento ante nihil in solidis vel fluidis partibus mutatum detegereetur.

Si ergo supponeremus omnia puncta sentientia in corpore manere, aboleri autem omnia puncta non sentientia, haberetur imago illius hominis interioris Sydenhami. Sed quam multa sic tollerentur de corpore. Totum cor in morbis ardentissimis adeo agitaturn, inflammatum &c. non dolet, sed anxietatis sensus molestissimus oritur; totus pulmo sæpe purulenta labe consumitur sine dolore; sic & renes cum tamen pelvis & ureterum membrana interior male affecta tam enormes dolores faciant: totum hepar abscessu consumitur sine dolore: sed si exterior hepatis membrana afficiatur, dolor intensus adest &c.

Doloris ergo idea in mente sequitur talem dispositionem fibræ nervosæ in corpore, quæ dissolutionem minatur; sic tamen, ut admodum probabile videatur posse etiam excitari doloris ideam, licet nulla mutatio nervis acciderit, sed tantum fuerit mutatum illud, à quo nervi hi suam originem ducunt, nempe cerebrum ipsum. Neque hoc tantum in nervis illis apparet, qui fideli custodia cavent, ne corpus destruaturn, & ubique dispersi doloris sensu monent hominem, ut tollat vel evitet omne illud, quod pergens agere, ut nunc agit, partem destrueret; sed videmus, idem certissime fieri in aliis nervis, à quorum mutatione in mente oriuntur distinctissimæ ideæ, quod nempe illæ fieri possint æque vividæ, licet nullum objectum externum egerit in sensuum organa, sed tantum per morbos mutatio inducta fuerit ipsi sensorio communi. Sic phrenitici quam mira vident phantasmata, quam horrendos sæpe fragores audiunt &c. licet nulla causa externa adfuerit, quæ has ideas excitaverit mutatione nervis inducta. Idem in Melancholicis deliriis & Maniacis furoribus contingit.

§ 221. **Q**UI eo acrior, quo fibra rupturæ propior: eo autem mitior, quo naturali est tensioni propior.

Cum ex præcedenti definitione doloris patuerit, dolorem tunc percipi, quando fibra nervola sic disponitur, ut dissolutionem minetur; sponte sequitur, illum eo acriorem esse, quo causa dolorem excitans nervos plus distraxerit, modo adhuc cohesio maneat: hac enim sublata, cessat dolor. Et vicissim eo mitior erit doloris sensus, quo minor fuerit nervi distractio. Patet hoc in tormentis, quibus utuntur iudices, ut invitis maleficis criminum confessionem exprimant. Suspenso enim manibus homini alligant pedibus pondera, sensim aucta, unde majori facta partium distractione per gradus augetur dolor ad summam acerbitatem usque. Simulac auferuntur pondera, minuitur dolor. Nervi plurimi in nobis sunt satis laxi, hinc sine dolore extensionem ferunt; sed ubi per periosteum v. g. dispersi supra ossa tenduntur, minimum tensionis augmentum tam acerbos cruciatus efficit; hinc summi illi dolores in Lue Venerea, dum ossei tumores incumbens periosteum sensim distendunt & dilacerant. Inde & acerbissimum illud tormenti genus, quod adhibent Carnifices, dum spinæ tibiæ cochleâ imposita Periosteum, adeo acuti sensus, ad durum os conterunt, sensim aucta pressione. Ob eandem causam & acerrimi dolores in minimis nervis fiunt; majores enim nervi minimam partem suæ molis habent vere nervosam dicendam: hinc facile fieri potest, ut talis major nervus distendatur, nec tamen adhuc fiat distractio in minimis nervosis fibrillis, sed tan-

tum in callosis vaginis has fibrillas regentibus. Sed quando nervus est exiguus, & tensus, & imprimis his involucris nudus, tunc summi dolores etiam à levissima causa fiunt: Docet hoc dentium dolor, ubi, crusta adamantina dentis erosa, minimi nervuli, per dentis omnem substantiam internam dispersi, vaginulis suis nudi, ab ipso aëris attactu tam intolerabiles cruciatus faciunt, non sedandos fere, nisi nervulus affectus destruatür aucta distractione, vel applicatis remediis, vel eradice-
tur dens.

§. 212. **U**NDE Dolor summus in eadem parte brevis, mitior diuturnus esse, & intendi potest, & remitti.

Cum dolor supponat illam conditionem nervi, qua rupturam, id est dissolutionem continuitatis, minatur; & ille eo acrior sit, quo fibra nervosa rupturæ propior est; patet dolorem summum tunc adesse, quando fibra nervosa jam jam rumpetur: sed fibra nervosa rupta, cessat omnis dolor, qui ante ab hac fibra nimis distracta fiebat. Dolor ergo summus, mox rumpendam fibram nervosam designans, brevis erit, quia rupta fibra desinet. Sic dum acutissima novacula vulnus infligitur, momentaneus sentitur dolor, sed mox evanidus. Et in Podagra observatur, eo citius deservescere paroxysmi sævitiam, quo acrior urserit dolor. Dum dente carioso facto nudantur nervuli, per ejus substantiam dispersi, aliquando sugendo trahitur talis fibrilla nervosa, & oritur tam immanis dolor, ut ne quidem per pauca momenta ferri posset vel à robustissimo homine; sed rupta hac fibrilla, cessat brevi. Dum dens evellitur, summus dolor est; dente evulso, statim cessans. Summus ergo dolor cito destruet nervum dolentem; vel sic afficiet cerebrum, ut omnis doloris perceptio cesset, tuncque simul plerumque syncope fit, sive abolitio omnis motus vitalis. Nec ultra possunt etiam acerbissima tormenta procedere: sic enim affecti cadaveris instar nihil amplius sentiunt, uti plurimis exemplis constitit: quod malefici, ad torturam damnati, aliquando statim quasi exanimis fiant. nec postea vel exquisitissimos cruciatus sentiant.

Videtur huic sententiæ repugnare, quod acerbus sæpe dentium dolor per plures dies, imo & septimanas, homines torqueat: Sed ratio est, quod nervulus, dentis substantiam ingreßus, in minimas fibrillas divisus, per omnia puncta distribuatur; hinc licet summo dolore destruatür una talis fibrilla, idem malum ad reliquas fibrillas pergens poterit diu continuare sævos hos cruciatus.

Cum vero mitior dolor lentorem nervi dolentis tensionem supponat, hincque minus periculum rupturæ; patet facile, talem dolorem longe diuturniorem esse posse: & cum inter naturalem nervi tensionem & summam distractionem, rupturæ proximam, innumeri gradus intermedii possint concipi; apparet, tales dolores diu manere posse sine destructione nervi affecti, & pro majori vel minori distractionis gradu posse intendi & remitti. Illi autem dolores, qui oriuntur in partibus corporis cordi satis vicinis una cum valida febre, brevi cessant, destructa parte dolente; sed in locis à corde admodum remotis, & sine magna humorum agitatione, diuturni dolores, & sæpe recrudescentes, tolerari possunt sine partium dolentium subita destructione. Terribilis adeo Iliacus dolor inflammatorius robustissimum hominem sæpe paucarum horarum spatio necat: Podagra vero sæpe viginti annis repetitis paroxysmis cruciat, antequam in calcem destruxerit partes dolentes; tuncque minuitur in extremis dolor Podagricus, vel & aliquando cessat: sed ad

§. iij

interna defertur hæc materia, quæ prius in artus detonabat, & pessima mala producit.

§. 223. **C**AUSA Doloris ergo omne id est, quod talem extensionem, vel dispositionem, (220.) facit.

Generali ergo causæ doloris nomine comprehenditur omne illud, qualecunque fuerit, quod nervum, non dolentem antea, sic distrahit, vel alio quocunque modo disponit, ut rupturæ periculum sit: nec refert, an hoc premendo, distrahendo, rodendo &c. fiat; effectus erit semper idem: nempe nascetur in mente doloris idea. Intensitate vel & duratione poterit differre dolor à diversis causis excitatus, cæteroquin effectus erit idem.

Pater hinc, quam multiplex possit esse causa, quæ in corpore etiam sanissimo dolorem excitat. Ut autem ordine posset indagari à Medico latens doloris causa, & cognita tolli, ad quasdam classes debent redigi causæ doloris hætenus observatæ, quod fit sequenti paragrapho.

§. 224. **Q**UO refertur 1. vis naturalis contractionis paucioribus fibris sustentata, dum quædam solutæ sunt (183). 2. Quod vas fibris nervosis contextum nimis replendo distendit; co obstructio, plethora, cacochymia abundans, auctusque motus circularis, spectant. 3. Quod vi distrahit, ut luxatio, tumor, vis externa. 4. Omne vulnerans, & rodens.

1. De hac re dictum fuit §. 163. & §. 183. In Paronychiæ pessima specie, in qua tendine flexorum digiti affecto tam immanis dolor oritur, hoc apparet: excidit enim sæpiissime ultimæ phalangæ digiti ossiculum post enormes toleratos cruciatus. Sed ut hoc fieri possit, debet tendo affixus huic ossiculo prius inde separari: quod non simul & semel, sed lenta tali distractione fit. Nulli enim fere parti corporis tam exiguæ molis tam validi affiguntur muscoli, quam digitis; & in hoc morbo musculis illis contractis, digiti semper flexi apparent. Dum ergo incipit tendo separari ab hoc ossiculo, reliquæ fibræ sustinent totam vim musculi contracti, & lenta, sed continua laceratione, ab osse distrahuntur, cui coherent; unde immanis dolor sæpe totum cerebrum sic turbat, ut acutissima phrenitis, convulsio, & mors sæpe ipsa sequatur: Omnem humanam patientiam evincunt hæc tormenta, quibus vivis ossibus coherentes partes sensim lacerantur. Philotas, quanquam hinc ignis, illinc verbera; jam non ad quæstionem, sed ad pœnam ingerebantur: non vocem modo, sed etiam gemitus habuit in potestate; sed postquam intumescens corpus ulceribus, flagellorum ictus nudis ossibus incussos ferre non potuit, si tormentis adhibituri modum essent, dicturum se, quæ scire expeteret, pollicetur, &c. (a).

2. Demonstratum fuit in Commentario §. 39. vasa majora constare ex convolutis membranis, quæ omnia vasorum genera in se continent, etiam minima totius corporis, nervos nempe: omne ergo illud, quod distendit vasis majoris latera, distrahet pariter nervos per hæc dispersos; sed ab hac distractione nascebatur in mente doloris idea, uti dictum est. Dubitari posset, an omnia vasa corporis ha-

(a) Q. Curtii, Lib. VI. cap. 11.

beant in suis membranis nervos sentientes? cum in §. 220. dictum fuit, plurima viscera (quæ tamen vasorum congeriem esse ex Anatome hodie constat) sæpe consumi sentim & destrui fere sine dolore: Unde hoc tantum verum erit, quatenus vasa constituentes membranæ habeant per suam substantiam dispersos nervos à cerebro oriundos & sensui dicatos. Hoc autem in plurimis vasis obtinere patet, quia tenuissimæ aciculæ apice in superficie corporis nullum punctum lædi potest, quin effluat ex vasis læsis contentus humor, & simul percipiatur doloris sensus. Causæ autem, quæ vasa fibris nervosis sentientibus instructa distendunt, præcipuè sunt sequentes.

OBSTRUCTIO supponit semper obturationem canalis, per quem liquidum vitali motu transfluere debet, hinc necessario sequitur, ut liquidum appultum ad locum canalis obstructum, nec penetrare potens, dilatet vasis latera, illaque attenuet & tandem solvat, uti demonstratum fuit in Commentariis §. 120; patet ergo, fibris nervosis vasis obstructi latera constituentibus tensis summopere, & tandem ruptis, posse excitari dolorem: & quidem vario intensitatis gradu pro varia distractionis mensura. Dum in pleuritide obstructæ arteriæ sanguine immeabili in locis intercostalibus distenduntur à vitali liquido à tergo urgente, quam immanis nascitur dolor, semper eo acerbior, quo majori impetu sanguis pellitur in loca obstructa; unde debilitata vita per Venæ Sectionem cessat vel minuitur dolor. Hinc obstructio proprie loquendo doloris causa non est, sed liquidum à tergo urgens dilatando vas obstructum dolorem excitat.

PLETHORA. Probatum fuit §. 106. 8. nimiam copiam boni sanguinis distendere vasa, imo & rumpere posse, hinc omnes gradus doloris, qui præternaturalem tensionem vasorum ad rupturam usque sequi possunt, ab hac causa sola excitantur. Docent hoc sæpe molestissimi capitis dolores à sola nimia plenitudine orti, sanguinis missione tam feliciter tollendi: Muliere etiam, antequam fluxu menstruo evacuetur nimia plenitudo, sæpe ab hac causa dolores in variis partibus corporis sentiunt, qui evanescent, dum per uteri vasa dilatata elapso sanguine tollitur nimia ejus copia.

CACOCHYMIA ABUNDANS. Omnis humorum nostrorum degeneratio ab illis conditionibus, quæ requiruntur in sanitate, hoc nomine vocatur. Potest ergo & nimia vasorum distensio fieri æque ab alienis humoribus aggestis, quam à nimia copia boni sanguinis; unde & dolor excitabitur à distractis fibris nervosis vasorum membranas constituentibus. (Non agitur jam hoc loco de majori acrimonia, quam liquida degenerantia acquirere possunt, & per quam rodendo & irritando dolorem excitare valent.) Dum iners aquosa colluvies in panniculo adiposo aggesta, in crurum Anasarca, cutim incumbentem distendit, ab hac sola causa dolor nascitur.

AUCTUSQUE MOTUS CIRCULARIS. Demonstratum fuit §. 100. solum auctum motum sanguinis per vasa calore aucto facere majorem rarefactionem liquidorum; unde sequitur vasorum major distensio, & à liquidis crassioribus, dilatata vasa ingressis, obstructio & destructio, inflammatio &c. Sed hæc omnia fieri nequeunt sine distractione & dilaceratione fibrarum nervosarum per vasorum membranas dispersarum; unde satis patet, dolorem inde excitari. In febribus à solo aucto motu capitis dolor & artuum fieri poterit: minuta vel sublata febre, iterum cessans,

3. Omne illud, quod vi distrahit partes nostri corporis, minuit earundem cohaesionem, ergo continuitatis solutionem inducere poterit, si pergat, vel augeatur hæc distractio; sed ex definitione doloris §. 220. illa conditio nervi, quæ dissolutionem continui minuitur, doloris ideam in mente facit. Distractio ergo partium, fibris nervosis præditarum, dolorem faciet, à quacumque demum causa fiat. Unde dum luxata ossa, cavis suis, quibus naturaliter continebantur, elapsa, ligamenta articulos neccentia elongant, tam acris dolor nascitur, qui, osse reposito, statim cessat, nisi distracta per luxationem ligamenta, vel vicinæ partes pressæ, jam inflammata fuerint: manifesto indicio, dolorem post luxationem ortum tantum ab hac distractione ligamentorum fieri. Unde Hippocrates monuit: quod in illis, qui post humeri luxationem restitutam omni dolore carent, partibus vicinis nulla inflammatione affectis, & ideo nulla cura sibi opus esse arbitrantur, cavendum sit quam maxime, ne repositum os iterum prolabatur: & ideo jubet, ut Medici hoc præfagiant, quia longe facilius luxatio redit in his casibus, quam si nervi inflammatione tentantur (a).

Facile jam patet, eundem effectum esse, si tumor, natus à quacumque causa, distrahat partes. In arthritide enim inflammatoria, vel & per alios morbos, ut spinam ventosam, exostosim &c. distracti nervi, per ligamenta articularum dispersi, tam acerbos cruciatus faciunt. Quantus autem dolor à sola vi externa distrahente fieri possit, docent tormenta maleficorum legum auctoritate facta, in quibus, vel ponderibus appensis, vel trochleis, distenduntur corporis partes.

4. Omne vulnus, uti ex ejus definitione §. 145. patet, est soluta cohesio partis mollis: sed dum instrumentum vulnerans partes antea unitas dividit, fit illa conditio nervi, qua dissolutionem minuitur; nascitur ergo dolor: sed statim evanidus, si celeri actione instrumenti vulnerantis separantur partes; tamen illo momento, dum vulnus infligitur, dolor est. Ille autem dolor, qui aliquo tempore post vulnus inflictum nascitur, à distractione partium, per vulneris labia ab invicem secedentia, pendet; unde ille dolor vulnus quidem inflictum sequitur, sed non à vulnere ipso, ut causa immediata, sed à mutatione vulneri inducta per contractilitatem partium, oritur. Nervus enim rupturæ proximus doloris ideam in mente facit; nervo autem rupto dolor cessat; unde dum vulnus fit, dolor nascitur; vulnere facto, cessat dolor.

Rodentia autem omnia, corpori applicata, & calore corporis æstuosa reddita (in cadaver enim vix agunt, si ignem solum exceperis) discerpunt minutis & numerosissimis vulnusculis partes & destruunt; unde dolor satis intensus & diuturnus simul oritur, uti evidenter patet.

§. 225. **I**NDE Doloris (226.) in vulnere, (145) causa multiplex (224.) cognoscitur.

Si jam omnia hæcenus dicta applicentur vulnere, apparet, magnum posse numerum & varietatem causarum dolorem excitantium in vulnere obtinere. Ipsum enim instrumentum vulnerans illo momento, dum vulnus infligitur, doloris causa est: partes instrumenti vulnerantis relictæ in vulnere dolorem facere possunt: Labia vulneris, à se mutuo recedentia, nervi semidiscissi, nervi majores discissi retracti

(a) Hippoc. de Articulis textu 29. Charter. Tom. XII. pag. 303.

& ramulos vulnere superiores distrahentes, summos dolores excitare possunt. Dum labia vulneris postea inflammantur, tument, & retorquentur, & simul febricula orta augeatur fluidorum celeritas, iterum novæ causæ doloris adsunt. Dum effusi in vulneris cavum humores in acrem degenerant indolem, illi rodendo & irritando dolorem iterum faciunt; idem & ab acribus quocumque titulo applicatis fiet. Quando per suppurationem sensim separantur obstructa vasculorum extrema à vivis partibus, pariter dolor nascitur; qui, pure facto, cessat. Omnia hæc sollicitè distinguenda sunt, ut cognitæ doloris causæ in vulnere debita auxilia possint adhiberi.

§. 226. **E**T effectus, inquietas, jactatio, vigilia, febris, calor, sitis, siccitas, (convulsio, gangræna, intelliguntur.

Quando dolor adest in corpore, sequuntur ejus effectus, qui imprimis observati fuerunt sequentes.

INQUIES ET JACTATIO. Dum percipimus ideas, oritur in mente nostra mutatio quædam, quæ grata vel ingrata est; vel & aliquando penitus adiaphora: sic dum cogito circulum bifariam per diametrum dividi, hoc nec placet, nec displicet. Sed si manus frigida apponitur igni moderato, omnes dicent, hoc placere; si vivus ignis applicetur manui, omnes testabuntur, hoc displicere. Quomodo hoc fiat, non potest forte explicari; unusquisque tamen in se ipso hæc deprehendit. Illud autem gratum & ingratum, quod comitatur ideam perceptam, facit in nobis effectus quosdam, quos nequidem summa ratio potest vincere, quidquid dixerint superbi Philosophi. Voluntas enim omnibus viribus nititur, ut illud gratum menti præsens maneat, ut illud ingratum deleatur: & tunc sequuntur motus corporei, non à mente præscia determinati, sed vere automatici & spontanei dicendi, quibus conamur tollere vel evitare illud, quod in mente excitaverat ingratum illum sensum. Hæc est humanitas nostra, quam non possumus exuere. Dum profundis meditationibus penitus immersus hæret Philosophus, si subito acicula pungatur ejus digitus, ipso momento manum retrahet, licet nulla sit illius motus excitati in mente conscientia. Unde doloris sensus fidelissimi custodis instar monet, ut tollatur illud, quod corpus destrueret. Hinc videmus, homines dolentes varia positura partium corporis, & continua sæpe agitatione moliri, ut forte talem situm inveniant, quo tollatur, vel saltem minuatur, doloris sensus, & inde illa inquietudo & jactatio corporis in magnis doloribus. Ubi vero à minimo motu corporis augetur dolor, tunc immobiles hærent homines: uti in sævissima podagra, & dolentissimo Rheumatismo fit.

VIGILIA. Sanissimus homo, sopitis omnibus sensibus, naturali somno dum fruitur, excitatur ab omnibus illis, quæ sensuum organa valide afficiunt: multo magis ergo impeditur somnus nondum præsens à dolore tam efficaciter cerebrum afficiente. Ideo veteres Medici in morbis soporosis pilos de naribus evellebant, urticis cadebant membra, acria applicabant corporis partibus, ut doloris sensu excitationis tolleretur nimia somnolentia.

FEBRIS. Fere semper magnos dolores sequitur; etiam in illis morbis, qui ex sua natura minime in febrim vergunt: uti in Podagra, Lue Venerea &c. patet. Dum enim acerbus talis dolor torquet, fere semper aliqua febris adest.

Hinc & Hippocrates inter febrium causas etiam dolores merito agnovit pluribus

Tt

in locis. Sic dixit. (a) *Ex vehementibus doloribus oborta febris diuturna.* (b) *Febris ex hypochondriorum doloribus maligna* &c. ubi humeri articulus versus posteriora elabitur, dicit, omnium dolentissimum hoc esse, & summas excitare febres &c. (c) Et, nisi luxatus articulus quicumque cito restituatur, à dolore febris sequitur etiam in sanissimo corpore.

Cum ergo febris dolorem majorem sequatur fere semper, facile inrelligitur, & calorem, aucti motus per febrim effectum; &, diffatis liquidis per majorem motum, siccitatem à dolore fieri. Ubi autem siccitas adest in corpore, & major calor, sitis semper cogit, ut potu copiosiori remedium fiat his malis: uti in Capitulo de siti Febrili dicitur postea.

CONVULSIO. Imprimis in illis, qui totum genus nervosum mobilissimum habent. Ideo infantibus, ob tormina intestinorum ab acido, toties convulsiones accidunt. Vidi hystericam puellam, quæ odontalgia ob cariosum dentem obnoxia cum esset, convulsam frequentissime toto corpore, dum dolor recrudesceret. In se ipso sensit convulsionem instare Galenus, dum immanem dolorem pateretur à distractione nimia humeri, quem luxatum credebant; uti dictum in Commentariis ad §. 164.

GANGRÆNA. Definitur, quod sit illa partis mollis affectio, quæ, abolito vitali influxu & effluxu humorum, in mortem tendit. Unde respectu nervi dolentis in magno dolore est ille status, quo in mortem tendit, dum nempe integre rumpitur brevi, jam summopere distractus. Dum validissima Pleuritis immani dolore urget, nisi succuratur subito, vel impedita respiratione ob doloris vehementiam suffocetur æger, macula livida in affecto loco orta gangrænam lethalem designat. In Ileo inflammatorio, post summos dolores intra paucas horas gangræna nascitur, cessante tunc dolore, sed brevi mors sequitur. In Paronychia pessima paucis sæpe horis cum intolerabili dolore sic pars afficitur, ut corruptæ partes molles postea in gangrænosum tabum disfluant ipsumque digiti affecti ossiculum sideratum cadat. Omnium maxime gangræna post dolorem nascitur, si inflammatio & valida febris simul adsint; tunc enim citissime aucto circulationis impetu destruuntur partes.

§. 227. **T**UM Anodynæ diversitas, pro varietate causæ sciatur.

Una tantum est causa proxima doloris, nempe talis dispositio fibræ nervosæ; cerebro ortæ, ut dissolutionem minuetur; omne ergo illud, quod tollit illam dispositionem nervi, doloris remedium erit. Quia vero illa nervi conditio à tam diversis causis pendere potest, ideo tanta etiam requiritur varietas Anodynorum, dum singulis causis tollendis distincta debeant adhiberi remedia. Requiritur ergo prius, ut doloris causa singularis cognoscatur, antequam determinari possit, quid causam hanc enervare vel tollere posset. §. 224. enumeratæ fuerunt, & in distinctas classes redactæ, doloris causæ: sequens paragraphus adæquata his causis remedia proponit.

(a) Prænot. Coacar, N°. 75.
 (b) Ibid. N°. 31. & Lib. I. præarthet. Char | (c) De Fracturis. Charter. Tom. XII. pag. 267.
 ter. Tom. VIII. pag. 738.

§. 218. **D**O L O R I S causa tollitur ergo 1. Laxata distenta fibra. 2. Resolutione concreti. 3. Minuto motu & materia distendente. 4. Ablata tractione inæquali, & violenta. 5. Lenito acri. 6. Discusso eodem. 7. Educto eo, quod solvit fibras.

1. Sola distractio rupturam productura, dolorem facit: si nunc ars facere valet, ut fibra possit distrahi sine rupturæ periculo, dolor cessat, vel saltem plurimum minuitur, licet causa distrahens fibram nervosam pergat agere. Si lignum rigidum & aridum flectere velis, rumpitur: si aqua maceratum fuerit diu, flecti poterit sine ruptura. Sic lentum de salice vimen torquetur nec rumpitur; idem arefactum, si flectatur, frangitur. Unde in dolentissimis morbis ab omni ævo semper adhibita fuerunt talia remedia, quæ laxarent solidas corporis nostri partes. In Ileo balneis foveri corpus, & oleo illiniri Hippocrates suasit: in Pleuritide mollissimis applicatis & repidis latus affectum regi iussit; similia & internè adhibenda voluit. Galenus in se ipso (vide §. 164.) dolorem summum, & convulsiones inde metuendas, sedavit, dum curaret, ut oleo calido perfunderetur continuo. Dum Phlegmone, inflammatorio tumore panniculi adiposi subjecti, cutim distendit, nervisque cutaneis distractis dolorem facit, licet irresolubilis omnino in suppurationem vergat, ideoque maneat imo potius augeatur causa distendens; si Cataplasmata ex emollientissimis continuo applicentur, mitigabitur dolor, sic laxatis fibris nervosis, ut distrahi possint sine rupturæ periculo aut facilius solvantur. Mollissimi olei pressi cujuscunque larga copia sumta dolores Iliacos, Colicos, Nephriticos tam pulchre lenit. Aquæ repidæ vapor, omnia adeo emolliens & laxans, dolentissimis locis tanto cum levamine adhibetur. Ubi à nervi punctura immanes illi dolores oriuntur, periti Chirurghi emollientissimis remediis noctes & dies foveant partes affectas. Hinc universale remedium ad dolores omnia emollientia & laxantia exhibent, quia ipsam causam proximam doloris, nempe rupturæ periculum, in fibra nervosa tollunt; dum reliqua auxilia tantum in causas remotas doloris agunt. Et licet ignoretur causa, fibras nervosas sic disponens, ut doloris sensus nascatur; tamen hæc semper tuto & cum fructu possunt adhiberi. Simul hoc boni habent hæc remedia, quod pluribus doloris causis remotis tollendis sufficiant, nec noceant tamen illis causis, quas tollere nequeunt. Vasis enim laxatis, distendens illa immeabile liquidum facilius transit, & simul omnis acrimonia demulcetur iisdem. Omne autem illud, quod solidarum partium corporis robur & contractilitatem auget, si maneat eadem causa distendens fibras, semper simul faciet doloris augmentum. Sic pleuritis longe acerbior in exercitatis & robustis corporibus observatur, quam in debilibus & laxis hominibus. Multo facilius & minori cum dolore articuli luxati restituantur in similibus, quam in strictæ temperiei hominibus: imo in quibusdam tam facilis elongatio ligamentorum fit, ut sine ullo dolore prolabantur articuli. Dum carnifices in tormentis summa vi distraxerunt omnes fere corporis partes, aspersa aqua frigida dolorem immaniter augeri noverunt. Ubi ergo laxantium & emollientium efficacia ad locum dolentem pertingere potest, numquam deërit effectus. Si enim v. g. in dentis media substantia febrilla nervosa tensa doleat, non poterit ille dolor laxantibus leniri: idem verum est, si à medulla ossis affecta intolerabiles illi dolores oriantur: uti &

T t ij

dum in pessima Paronychia sub cartilagineo illo scuto, tendines musculorum flectentium digitos regente, malum hæret. Aliquando etiam contingere potest, ut, licet dolor magnus urgeat, alia tamen Symptomata mali laxantium & emollientium usum prohibeant: v. g. si à cancro recto, vel jam exulcerato, summus dolor oritur, emollientia nocerent; quia & putredinem, & fungosam illam canceri excrecentiam, auferent summopere. In reliquis autem omnibus casibus fere universalis est laxantium usus ad dolores leniendos.

2. Dum calculus ureteribus impactus hærens dolorem facit, qui solvere posset illud concretum calculosum, tolleret dolorem: Omnia illa, quæ concretum inflammatoria densitate sanguinem resolvere possunt, pleuriticos dolores sedabunt. Idem in omnibus aliis casibus verum est, ubi obstruens immeabile vasa infarciens, vel tumores, ex aggestis concretis nati, vicina premunt & distendunt. In capitulo autem de obstructione actum fuit de variis modis, quibus liquidorum nostrorum moleculæ, antea separatæ, concresecere possunt (§. 117.): & ibidem tradita fuerunt talia remedia, quæ sua efficacia poterant dividere concreta (§. 132. 133. 134. 135. 136.) Unde prius indagari debet indoles concreti; deinde ex antedictis inveniri poterit remedium, quod resolvendo illud concretum tollit dolorem inde ortum.

3. Omnis dolor supponit vitam superstitem: & si ab immeabili humore, distendente vasa obstructa, oritur, semper erit eo acrior, quo vita actuosior. Hinc in pleuritide, dum simul valida febris adest, dolor intolerabilis nascitur; quia magno impetu urgentur humores in locum obstructum, & vasa dilatando, fibras nervosas horum valorum texturam facientes magna vi distrahunt. Omne ergo illud, quod minuit impetum & velocitatem circuitus humorum, sedabit dolorem; uti quotidiana observata docent. Venæ sectio enim, ad animi deliquium usque instituta, ilico sæpe tollit, vel saltem plurimum levat, acutissimæ etiam pleuritidis dolores. Hinc à Veteribus Medicis in vehementissimis doloribus commendabatur Venæ Sectio ad lipothymiam usque: uti in locis antea jam allegatis (§. 141.) patet. (a) Et in se ipso, uti alia occasione dictum fuit (§. 133.) dolorem diuturnum fixum in illa maxime parte, qua hepar septo transverso committitur, curavit Galenus, dissecta arteria inter indicem & pollicem dextræ manus, & sanguine effluente, donec sponte sisteretur. (b) Ob eandem causam summam quietem imperabant Veteres in morbis acutissimis, in quibus fere semper ingens capitis dolor adest. Nec tantum prodest tunc Missio sanguinis, quatenus debilitando vitam minuit motum, sed etiam quia edueto sanguine minuit copiam humorum distendentium. In Plethoricis molestissimi capitis dolores sæpe adsunt, licet sedatus penitus sanguinis motus sit, imo fere suffocatus, ob nimiam copiam humorum movendorum: simulac vel spontanea Hæmorrhagia per nares, vel per artem facta sanguinis subductio largam inuerit sanguinis copiam, ilico cessat dolor; sublata materia distendente vasa nimis plena.

Sed imminutio vitalis motus non tantum prodest in illis casibus, ubi nimia velocitas vel nimia distensio vasorum dolorem faciunt, vel ab alia causa factum augent; sed præterea summum usum habet in leniendis doloribus, qui ab acriori

(a) Galen. Comment. I. in Aphor. Charter. X. pag. 441.
 Tam. IX. pag. 40. & libro de Curandi ratione (b) Ibid. cap. 23. Chart. Tom. X. pag.
 per Venæ Sectionem cap. 12. Charter. Tom. 451.

humorum indole nascuntur. Acria enim, per vim vitæ & calorem corporis actiosa reddita, lædere possunt; in cadavere, ubi omnis motus cessat, & calor tantum communis Atmosphæræ adest, nihil fere agunt. Sic cantharides, cadaveri applicatas, nullum præstare effectum, post Helmontium docuit PETIT: imo & Cauterium potentiale, cuti cadaveris applicatum, fere nihil effecit spatio quindecim horarum: dum vero linteis calidis applicatis foveretur locus, cui applicatum erat cauterium, cutim dissolvit & partem subjæctæ pinguedinis. (a) In morbis, in quibus acrimonia degenerantium humorum dolores excitat, observatur, semper aucto motu vel & majore calore (qui etiam auctum motum sequitur) illos ingravescere. Dolores illi nocturni, qui tanta cum crudelitate Lue Venerea laborantes affligunt, calore lecti sæpe augentur adeo, ut miseri cogantur singulis noctibus surgere, ut frigefacto corpore minuatur dolor. Dum febris acuta pessimo scorbuto infectum hominem corripit, dolores augentur immaniter; imo sæpe, fractis subito valis, per auctum impetum acrium humorum, sanguis quaquaversum erumpit. Sic etiam æris caloribus pessimum scorbutum exacerbari quam maxime observatum fuit (b). Idem plurimis aliis observatis posset demonstrari; hæc tamen sufficere poterunt.

Quomodo & per quæ auxilia motus fluidorum per vasa minui possit, dictum fuit §. 102. 103. 104. 105. Distendens autem materia solis evacuantibus tolli potest.

4. Dum luxatione facta os articuli sui cavo excidit, distrahit ligamenta, & premit partes vicinas; unde dolor: qui brevi cessat, vel saltem insigniter minuitur (aliquis enim dolor sæpe remanet post luxationis restitutionem ob magnam distractionem, quam passa fuerunt ligamenta, unde sæpe inflammantur) simul ac os in suo loco repositum fuerit. Idem verum est, dum partes tendine semilacera inæquali tractione continuo elongatæ acerrimum dolorem creant: si enim tunc idoneo situ partis affectæ, spleniis & ligatura debita impediatur inæqualis illa tractio, dolor cessat; uti constitit in Historia §. 164. enarrata: ubi homo ruperat illam partem tendinis Achillis, quæ Gastrocnemio musculo continuatur, integra manente illa parte ejusdem tendinis, quæ Soleo musculo originem debet. Post sedatam enim inflammationem repetitis Venæ Sectionibus, per idoneam ligaturam inæquali tractione sublata, cessabat dolor. (c) Si autem vis illa distrahens tolli nequeat, ut dum v. g. luxatum os ob tumorem & validam inflammationem reponi non potest; tunc sola emollientia & laxantia profunt, quæ faciunt; ut sine rupturæ periculo fibræ nervosæ elongari possint.

5. Ubi sine majori motu humorum, sine ullis signis distensionis majoris partium à liquidis concretis vel accumulatis, sine ulla vi distrahente externa, dolor nascitur, tunc imprimis de acrimonia cogitamus, quæ sæpissime incusatur facere dolorem, qui ab aliis causis nascitur. Raro enim magna acrimonia in sanguine invenitur: destruerentur enim cito tenerrima encephali vasa, si acres humores per illa fluere. Unde fere semper tantum in primis viis acria inveniuntur, vel ubi humores stagnantes vel extravasati in loco corporis quocumque hærentes acres fiunt; sive ex propria sua

(a) Academie Royale des Sciences l'An 1731. Mem. pag. 314. &c.

(b) Academie des Sciences l'An 1699. Mé-

moire. pag. 245.

(c) Ibid. l'An 1728. Mém. pag. 334.

indole, sive ex peculiari cacochymia, ut in Lue Venerea, Scorbuto &c. Hinc fere semper topicum tale malum est. Si ergo constitit, acrimoniam doloris causam esse, patet facile dolorem tolli vel mitigari, si leniatur lædens acrimonia. Hoc autem fiet vel specifica medela opposita cognitæ acrimonix, ut v. g. dum acidum acre in primis viis hærens terrestribus absorbentibus, vel salibus alcalinis enervatur, & mite redditur; vel fiet generalibus auxiliis ad qualemcumque acrimoniam: diluentibus nempe, obtundentibus, inviscantibus &c. Per hæc enim omne acre iners redditur, uti probatum fuit, dum de sponaneis humorum degenerationibus agebatur, ubi de his remediis dictum fuit.

6. Dum in Lue Venerea pessima ossibus insidet malum, ab erosione lenta, & tumore ossium affectorum distendente sensu adeo exquisito præditum Periosteum, tam molesti dolores oriuntur. Dum autem in his calibus repletur corpus magna copia decocti Guajaci, & deinde, sudore per accensum vini spiritum excitato, movetur illud decoctum per omnia vasa; detergitur latens hoc virus, & diffilatur de corpore, cum levamine summo, vel & integra abolitione doloris. Idem fiet, si cacochymia notabilis, v. g. Scorbutica acris in corpore vulnerati obrinuerit: tunc enim humores ad vulnus allati, cito degenerantes in maiorem acrimoniam, dolorem excitare poterunt. Mollissimis & simul leviter diaphoreticis remediis, qualia sunt fere omnia decocta vulneraria dicta, larga copia exhibitis, abluitur & enervatur illud acre irritans.

7. Quamdiu v. g. fragmenta instrumenti lædentis, vel fragmenta ossis læsi, vel aliud tale quid, in vulnere hærent, quæ acuta sua figura & rigiditate partes lædere possunt; tamdiu manebit dolor; imprimis quia partes continuo irritatæ inflammantur & tument: hinc appressæ alieno huic relicto in vulnere lacerantur magis; donec educatur hoc heterogeneous per instrumenta Chirurgica, vel supuratione circumquaque nata expellatur. Quomodo autem hæc tolli debeant de vulnere, & quibus cum cautelis, dictum §. 186. 187. 188.

§. 229. **D**OLORIS sensus tollitur, manente ejus causa (224.)
 1. nervo inepto ad sensum reddito compressu, distensione, vel exustione. 2. Sensorio communi obtuso per vim narcoticam: atque his tolluntur nonnulli effectus (226.) ex Doloris sensu oriundi.

Omniū perfectissima doloris cura est, si ejus causa tollatur aliquando tamen etiam in summis doloribus causæ latent: sæpe etiam, licet cognitæ fuerint, tolli nequeant. Interim ingratissimus ille sensus lenimen postulat, & per affectus, qui dolorem sequuntur, jactationes v. g. vigilias, febres &c. sic mutabitur corpus, ut gravissima possint inde sequi mala. Tunc tantum hoc superest in arte, ut sensus doloris tollatur, licet maneat ejus causa, Sensus autem doloris fit, dum liberum est commercium inter cerebrum & nervum affectum, & dum cerebrum integritate suarum functionum valet. Omnia ergo illa remedia, quæ sensum doloris tollunt, non causam ejus, agunt vel in nervum dolentem, vel in cerebrum ipsum.

1. Constat certissimis observatis, nervo destructo, qui unicus ad partem quam

dam corporis tendit, omnem sensum in illa parte tolli, (vide §. 162) : illa enim mutatio, quæ in nervi extremo facta sensorium commune sic afficit, ut doloris idea nascatur in mente, per nervi affecti integritatem cerebro communicatur : omne ergo, quod nervi integritatem destruit inter cerebrum & locum illum corporis, cui causa dolorem excitans applicatur, tollet doloris sensum omnem, licet doloris causa maneat, & agere pergat etiam summa cum vehementia. Qui luxata spina dorso compressam habent medullam spinalem, ne quidem vivo igne cruribus applicato dolorem sentiunt. Nec refert jam, an compressione valida impediatur commercium inter cerebrum & partem compressam nervi, an vero dissecando, vel urendo, destruaturs nervi continuitas. Dum in artuum extirpationibus ligatura arctissime circumposita vasa comprimunt, ut compescere possint Hæmorrhagiam, simul & à nervis compressis stupor oritur & insensibilitas in parte, quæ dolorem multum minuit. Empyricus Amstelodamensis quondam dolorem dentium curabat, dum digitos suos capillis implicabat, & deinde pollice sub auriculæ lobo validissime appresso contundebat nervum ibi hærentem, qui ramos ad maxillam superiorem dat. Idem effectus erat, dum nervus sub dente molari primo maxillam inferiorem utrimque ingrediens comprimeretur. Sævissimam odontalgiam compescunt omnia illa, quæ dolentem nervulum in dente destruunt : hinc, si eroso dente pateat via, stylo ferreo candefacto illum comburunt, cum doloris præsentissimo levamine, modo ad nervulum dolentem calor igniti ferri pervenire possit. Hanc methodum in dentium dolore jam commendaverat Hippocrates (a), dicens : *In dentium autem doloribus, si dens erusus fuerit & vacillet, eximatur. Si neque erusus fuerit, nec vacillet, ustione resiccandus est.* Alii eodem effectum acerrima olea stillatitia Caryophyllorum, Origanii &c. denti cavo imponunt, quæ statim nervum, quem tangunt, ignea vi destruunt. Plurimis aliis doloribus, qui pertinaciter aliorum auxiliorum efficaciam eludebant, vivum ignem adhibuit, vel & scarificationes, Hippocrates ; utroque modo nervos dolentes destruendo doloris sensum tollens. Sic postquam ad Capitis dolores multa commendavit remedia, addit : *At si diuturnus & validus capitis morbus evadat, neque capite purgato tollatur, aut huius caput scarificare, aut venas in circuitu adurere oportet : ex cæteris enim ab hoc duntaxat sanum fore spes est* (b) ; & alibi (c) : *In capitis dolore sanguinem ex venis detrahito ; quod si non cesset, sed diuturnus sit, venas inurito, & convalescit.* Similia de capitis dolore curando per inustionem, & in aliis locis habet. In molestissimo morbo Ischiadico jubet, *quancumque partem dolor occupaverit, balneis, fomentis, linimentis emollire, & alvum subducere, levato dolore purgans exhibere, post hæc lac asininum potare &c. si in unum aliquem locum irruerit dolor, & constiterit, nec medicamentis expellatur, inurito, quocumque in loco fuerit.* (d) Et alibi in eodem morbo, post varia tentata auxilia, si non levetur dolor, multis & profundis crustis partem inurendam jubet, in ossibus quidem partibus per fungos, in carnosius per feramenta. (e) Idem & in Aphorismis (f) & aliis locis commendat.

Ideo & in Asia tantus usus Moxæ in doloribus Arthriticis tollendis, imo & in

(a) De Affectionibus cap. 2. Charter. Tom. VII pag. 621.

(b) Ibid. pag. 620.

(c) De locis in homine cap. 14. Charter. Tom. VII. pag. 373.

(d) Hippoc. de Affectionibus cap. 8. Charter. Tom. VII. pag. 629.

(e) Hippoc. de internis affectionibus cap. 53. Charter. Tom. VII pag. 677.

(f) Aphorism. 59. & 60. Sect. VI.

ipsa Podagra; dum Artemisiæ obsoleta folia contrita, & ab omnibus fibrosis partibus durioribus depurata, sicque in mollem lanuginem conversa, in pyramidales turundas contorquent, quæ bali sua dolenti loco imponuntur; dein incenso apice sensim descendens ignis partem urit, non adeo crudeli cura, cum & centies viderit Kæmpferus, pueros hanc unctionem admittit, absque eo, quod ullo signo vel ejulatu doloris sensum testarentur. (a) Hinc adeo familiaris Moxæ usus ibi est, ut sanitatis præservandæ gratia singulis sex mensibus plurimi sibi corporis loca quædam Moxa comburi patiantur; imo æterno carcere damnatis prodire permissum est, ut hoc beneficio fruantur.

Quia tamen nervo sic destructo pereunt omnes functiones, quæ ab ejus integritate pendebant; ideo hæc methodus dolorem sedandi non adhibetur, nisi quando doloris adest summa acerbitas; & illa auxilia, quæ paragrapho præcedenti recensita sunt, jam frustra adhibita fuerunt, vel conditio loci dolentis talis sit, ut illa remedia applicari nequeant sic, ut sua efficacia causam doloris tollere vel emendare possint.

2. Ubi jam causa doloris tolli nequit, & non conducit, vel impossibile omnino est, nervum dolentem destruere sine læsione partium, quarum integritas sine periculo vel magno incommodo tolli nequit, tunc unicum illud superest, ut sensorium commune sic mutetur, ut non sentiat. Posse enim esse in corpore summi doloris causam sine ullo sensu doloris, licet nervorum integritas manserit, docent Apoplectici, & summa ebrietate sepulti, qui omni sensu carent. Habentur jam in arte talia remedia, quæ doloris in mente conscientiam tollunt pro quodam tempore, licet nullo modo auferant vel emendent doloris causas: hæc a stupore, quem inducunt, narcotica vocantur. (vide de his §. 202.) Princeps inter hæc opium, quod mira nec facile explicabili virtute doloris sensum tollit, dum in ventriculo hæret. Granum enim unum aut alterum opii deglutitum, resinosa tenacitate sua non adeo facile dissolubile, in ventriculo hæret diu, & doloris sensum per octo horas ad minimum solet compescere; & quod mirabile est, sæpe sequenti mane opii nondum dissoluti pilula vomitu excutitur. Unde non videtur agere, quia solutum & humoribus mistum circulationis lege ad cerebrum deferretur, sed quia interiori ventriculi superficiei applicatum manet, & nervis hic dispersis quandam mutationem inducit, quæ valet obtundere cerebri vim sentientem. Quantam enim vim habeant nervi per ventriculi fabricam dispersi in sensorium commune, docebunt postea morbi plurimi, in quibus omnes actiones cerebri pessime turbantur, licet materialis causa omnium horum malorum tantum in ventriculo hæreat. Corrupta bilis in ventriculi cavo hærens enormes capitis dolores, vertigines, deliria &c. facit; vomitorio excussa hac saburra cessant omnia hæc mala. Idem confirmant venena plurima, quæ, dum in ventriculo hærent adhuc, totum corpus tam mirifice mutant; simulac excutiantur de hoc loco, pacantur omnia. Exemplum, quod hanc rem pulcherrime probat, habetur apud Wepferum. (b) Bini pueri & sex puellæ Cicutæ aquaticæ radicem comederant in pratis inventam; domum reduces ambo pueri diris convulsionibus misere perierunt, nihil autem per alvum vel vomitum prodierat. Puellæ omnes evaserunt, veneno in-

(a) Kæmpfer. Amœnitat. Exotic. pag. 592. | (b) Cicut. aquat. histor. & noxæ pag. 5. &c. &c.

gesto per vomitum satis cito excusso. Omnium citissime convaluit una ex his puel-
lis, cui jam convulsæ, dentibus vi diductis, pater infusum tabaci aqua fonta-
na factum ingesserat, unde mox radices comestas violentissime emovuit; in lectum
dein reposita quievit, & post brevem admodum temporis moram cibum petiit,
& bene se habere dixit. Pater reliquias veneni ventriculo adhuc contineri suspica-
tus iterum tabaci infusum porrexerat, unde mucum & bilem evomuit, tota nocte
dormivit, mane læta surrexit, obambulavit, & postea sanissima vixit. Postea &
in canibus experimenta instituta fuerunt, quibus constitit, omnia illa dira symp-
tomata sedari statim, si vomitu ejiceretur ingestum venenum. Ex his omnibus pa-
tet, simplici attractu interioris superficiei ventriculi venenum illud terribile tanta
mala facere, non vero permissione virulenti succi cum vitalibus humoribus; aliter
enim vomitu excussis radicibus his non tam cito sedata fuissent: illud enim, quod
jam humoribus mistum fuerat, perrexisset corpus turbare.

Admodum ergo verosimile videtur, Opium etiam in ventriculo hærens solo
attractu, mutatis nervis hujus visceris, talem mutationem producere in sensorio
communi, ut, manentibus doloris causa & nervorum integritate, tamen non
fiat in mente doloris idea. Videturque Divina Misericordia hæc auxilia homini-
bus concessisse, ut dolores enormes, quorum causa tolli nequeunt, vel non nisi
longa temporis mora enervari possunt, sopiri possent pro tempore. Unde Sy-
denhamus, plurimis experimentis convictus, conclusit, quod absque his auxiliis
manca sit & claudicat Medicina: addiditque, jactatissimas etiam præparationes
Opium non augere ejus vires, vel corrigere illam, quam falso credebant inesse
multi, malignitatem. (a) Certe prudenter adhibitum opium debita dosi, licet
etiam per menses continuetur ejus usus, omni noxa caret. Unde non immerito
dixit Eruditissimus *Joannes Terentius Lynceus* in notis suis ad *Francisci Hernandez*
Rerum Mexicanarum novæ Hispaniæ Thesaurum, quod, cum universus Oriens &
Meridies impune & quotidie utatur Opio, Datura, Banguæ & similibus, do-
lendum sit, infinitos mortales dolorum cruciatibus perire unius hujus remedii
ignorantia, qui orco eripi possent, si Medici, totius orbis consensu persuasi,
eo sæpius uterentur. (b) *Prosper Alpinus*, licet venenatum damnaverit opium,
tamen cogitur fateri, Ægyptios quotidie sumentes nullam inde noxam sentire,
licet aucta sensim quantitate ad trium drachmarum pondus aliqui sumpserint.
Si vero dudum assueti hujus usui subito illum intermittant, syncopen & alia gravis-
sima symptomata patiuntur, donec iterum opium sumpserint, vel larga copia vi-
num Creticum, quod generosissimum est, una cum aromatibus potaverint. (c)

Negari quidem minime potest, imprudentem opium usum in magna quantitate
deliria, convulsiones & lethalem apoplexiam produxisse: sed plurima remedia,
quæ debita dosi tuto quotidie usurpantur, nimia copia exhibita nocent. Memo-
rabile tale Exemplum habetur (d) quo constat opium virulentia, dum magna dosi
dabatur non assueti. *Juvenes Cophæ*, ut in computationibus vincerent quem-
dam ex sodalibus, qui reliquos omnes se superare posse gloriabatur, inter po-

(a) *Dysenter.* part. anni 1699. &c. pag. 230.
&c.

(b) *Hernand. Rerum Mexican. novæ His-*
pan. Thesaurus pag. 114.

(c) *Prosper. Alpin. Medic. Ægypt. Lib. IV.*
cap. 1. pag. 255. &c.

(d) *Academ. des Sciences l'an 1735. hist.*
pag. 6.

cula inscio drachmam opii vini cyatho dissolutam propinaverant : aliquot horas postea miser ille delirabat pessime , post profundo somno sepultus jacuit. Sequenti mane dum inviserent miserum , ut victo nempe insultarent , invenerunt jacentem sine pulsu , lividum & moribundum ; paulo post , frustra tentatis quibusdam etiam satis vehementibus remediis , expiravit , quindecim horis elapsis post opium assumptum. Tumores lividi , infantis quadrimestris caput magnitudine æquantes , brachia & femora cadaveris deturpabant cum fœtore intolerabili : centeni feles ex vicinia turmatim accurrebant , & cadaver lingeant cum aviditate tanta , ut certissime devorassent , nisi cautum fuisset.

Hoc mirum Exemplum probat quidem , enormi quantitate datum opium non assueto pessima producere mala , & mortem ipsam ; imo venenata vi corrumpi inde fluida corporis humani. Tutum tamen esse remedium , si debita prudentia adhibeatur , innumera experimenta evincunt. Nec ideo vilipendendum est , quia doloris sensum tantum , non vero ejus causam tollit. Magnum enim quid est in morbis dolorem sedare posse : nihilque impedit interim aliis remediis doloris causam cognitam tollere , dum narcoticis doloris sensus obtunditur. Non tamen satis inculcari potest , quod , licet nullus sensus doloris adsit tunc , pergat tamen doloris causa corpus destruere. Dum enim in dolentissimis morbis inflammatoriis , pleuritide v. g. , narcoticis compescitur dolor , sævissima inflammatio pergens vasa effecta destruere gangrænam facit , & evigilans à somno suo homo moritur sæpe subito. Funestus talis eventus tunc adscribitur his auxiliis , cum tantum inde factus fuerit , quod ægri querelis non admonitus Medicus male crediderit lenitum morbum esse , cum tamen æquali , imo majori forte aliquando violentia , post hæc remedia exhibita pergat. Dum enim suppresso omni motu animali sic profundus somnus inducitur , vitales motus augentur : sed in morbis inflammatoriis jam peccabat nimia velocitas vitalis motus ; unde numquam tutus videretur esse in his Narcoticorum usus , nisi validis evacuationibus præmissis per Venæ Sectionem &c. jam fractus fuerit nimius morbi impetus. Hanc rem sollicitè monuit etiam Sydenhamus , qui tamen frequenti usu in plurimis morbis salutarem narcoticorum vim tam bene noverat , & illis tam audaciter utebatur. (a) Quomodo autem , & quibus cum cautelis narcotica tuto exhiberi possint , dictum fuit in Commentariis ad §. 101.

Per hæc autem remedia tolluntur omnes illi effectus , qui à sensu doloris fiunt ; inquit nempe , jactatio , & vigilia imprimis ; reliqui autem effectus , qui pendent à causa doloris , quatenus nititur destruere nervos dolentes , pergunt , sopito licet doloris sensu.



CONVULSIO, &c.

§. 230. **V**IOLENTA, invita, & altèrne repetens, contractio musculi Convulsio vocatur.

Agitur hoc loco de convulsione , quæ à vulnere ut causa nascitur : postea enim §. 710. peculiari capitulo dicitur de convulsione febrili , quæ à longe aliis causis oritur ; hinc & aliam medelam requirit.

(a) Sydenham. febris contin. an. 1661. &c. pag. 81, 82.

Omnis convulsio est affectio musculi : & quia musculis agentibus tendines eorumdem trahuntur, dumque hoc alternis vicibus fit, tendines nunc trahuntur, nunc laxantur iterum; hinc & subsultus tendinum aliquando vocatur ille affectus apud Medicos, dum pulsum explorantes convulsis brachii musculis tendines subsilire percipiunt. Cumque & tendines sub nervorum generali nomine complexi fuerint Veteres, (*núta* enim vocaverunt ligamenta & tendines, æque ac cerebri & spinalis medullæ propagines (a).) Ideo nervorum distentionem vocavit *Celsus* illam affectionem quam hodie communi usu convulsionem vocare solent Medici.

In omni autem convulsione adest contractio musculi; quæ, si per voluntatem fieret, non esset morbus: hinc additur in definitione, quod sit invita contractio musculi. Præterea requiritur, ut hæc contractio sit violenta, aliter enim nulla distinctio foret inter convulsionem & tremorem, in quo præter voluntatem musculi contrahuntur & relaxantur quidem alternis vicibus, sed tamen debiles sunt illæ contractiones; in convulsione vero violentæ. Deinde additur in definitione, quod alternis vicibus reperatur hæc musculi contractio, cessans brevi, mox renascens iterum.

Notandum tamen, quod si causa illa, qualiscumque demum fuerit, quæ absque voluntatis imperio musculi contractionem efficit, pergat agere, sine alterna intermissione, tunc musculus perpetuo contractus manet, quamdiu illius causæ actio durat. Malum hoc ad convulsionem referendum esse satis patet, quia eadem causæ occasionales nunc alternas illas & invitas musculorum contractiones, nunc stabilem eorumdem, invitam tamen, obrigescentiam faciant. Apparet in Epilepticis: in quibus, dum paroxysmus adest, nunc adsunt alternæ illæ convulsionem, paulo post instar statux sæpe obrigescent, contractis fere omnibus totius corporis musculis; mox iterum convelluntur. Spasmus (*σπασμὸς*) vocaverunt Veteres Græci illud malum, quod hodie convulsio Medicis dicitur; tetanum (*τετανὸς*) autem, quando præter voluntatis imperium musculi valide contracti obrigescent; quod mali genus *Celsus* rigorem vocavit, spasmus vero distentionem nervorum dixit. (b) Convulsionis enim nomen apud recentiores tantum Medicos hac significatione reperitur: Quamvis tamen apud Aretæum, (c) ubi de tetano agit & ejus differentiis, occurrat vocabulum *ἐντολὴ*, quod satis apte convulsionis nomine in versione exprimitur: tamen videtur promiscue & spasmi & tetani nomine usus fuisse, ut eundem designaret affectum; uti in eodem Capite satis evidenter patet. Et Galenus (d) dixit, quod tetanus sit convulsio: sed in tetano partes convelli non videntur, quod æque antrosum ac retrorsum tendantur.

Unde concludi posse videtur, quod licet hodierno usu convulsionis nomen adhibeatur, ubi invita, violenta, & alterne repetita musculi contractio adest; tamen generali magis significatione posse etiam hoc nomine intelligi contractionem invitam & violentam musculi, quæ diu manet sine alterna remissione; cum & quondam promiscue hoc factum fuerit, & omnia hæc mala sæpe ab

(a) Galen. de usu part. lib. XV. cap. 1. Charter. Tom IV. pag. 656.

(b) A. Corn. Celsi Medic. lib. 2. cap. 1.

(c) Aret. Cappad. de causis & signis morb.

acut. Lib. I. cap. 6:

(d) Comment in Sect. IV. Aphorismi, N°. 571 Charter. Tom IX. pag. 171.

hisdem causis nascantur, & easdem partes occupent, nempe musculos. Illam autem convulsionis speciem, quæ distentis manentibus musculis fit, diviserunt in tres Classes, *τέτανοι* dixerunt, quum neutram in partem detortus homo & inflexilis distenditur; *ἐμπροσθεν* vero ubi versus anteriora corpus inflexum obrigescit; *ὀπισθεν* autem, si versus posteriora incurvetur corpus simili modo. Præterea tetanus potest esse vel universalis, dum omnes muscoli corporis sic affecti obrigescent uno momento; vel potest esse particularis: uti dum v. g. sic spasmus contractis maxillæ musculis, os pertinacissime clauditur &c.

§. 231. **C**UJUS causa id, quod liquidum nervosum vi alterna in musculos convulsos pellit.

Observatur in homine mira hæc proprietas, quod possit ad voluntatis nutum, per musculos voluntatis imperio subditos, motum excitare, illumque sustinere & dirigere, augere & minuere, motumque excitatum suppressere iterum, atque suppressum renovare denuo. Et illi motus adeo sensibiles in corpore excitati, tanta vi mechanica mutant alia corpora, in suo principio vix videntur corpori; omnesque fiunt sine cognitione causæ vel instrumentorum, quæ huc requiruntur. Nam peritissimus Anatomicus non melius hos motus perficiet, quam innocuus puer. Omnium maxime mirabile est etiam, quod in his motibus excitandis nulla appareat mutatio Physica in corpore præter rem mutatam; & suppresso dein ex voluntatis arbitrio motu, nullum supersit tantæ mutationis vestigium. Omnia autem hæc fieri possunt sine ulla fere observabili successione temporis; dum enim quis brachium vult elevare, jam elevatum est. Requiritur tantum ad hanc rem, uti ex Physiologicis patet, ut liberum sit commercium inter cerebrum & musculos, per nervos ex cerebri medulla ad musculos voluntarios delatos. Cum ergo convulsio ex definitione data sit alterna talis motus excitatio, & excitati suppressio; & possimus ex voluntatis arbitrio hoc imitari, (uti mendici Epilepticos mentientes satis norunt) patet, convulsionem excitari posse ab omni causa, quæ invito homine per nervos talem mutationem musculis inducit, qualem voluntatis imperio efficere posset homo sanus. Cumque modus, quo per voluntatem motum excitamus, nos lateat, sed tantum observemus effectum; etiam poterit æque latere mutatio illa ultima sensorii communis, per quam convulsio nascitur. Totum, quod ars potest, est, ut observet illas corporis mutationes, quas sequitur invita talis musculorum contractio; & deinde has mutationes cognititas tollat, vel emendet: licet minime intelligatur, qua ratione mutationes illæ corporis afficiant sensorium commune; sive illum cerebri locum, ubi hæret mutabilitas cogitationis à mutato corpore, & vicissim mutabilitas corporis à mutata cogitatione.

Quia autem ex observatis Medicis constat, plurima talia accidere posse corpori, per quæ convulsionem excitantur; hic autem tantum agatur de his malis; quatenus vulnus factum sequuntur ut causam præcipuam; hinc videndum, quænam sint observata in vulnere ipso hære, à quibus convulsionem factæ fuerunt. Illa autem recensentur sequenti paragrapho.

§2 32. **A**DEOQUE in ipso vulnere hæere potest, siue sit materies aliena irritans, siue ipsa nervi læsi (163. 164. 165. 183. 184.) conditio, siue evacuatio cruoris nimia prægressa.

MATERIES ALIENA IRRITANS. Tenerrimum illud pulposum, medullæ cerebri productum, quod proprie dictam substantiam nervi constituit, quod tot involucris munitur in nervis majoribus, ut tuto deferri possit ad loca debita; si irriteretur à quocumque acri, vel alio corpore, quod mechanica figura & duritie suarum partium lædere & destruere poterit molliissimam hanc pulpam; poterit convulsio inde nasci. In vulnere jam poterunt hæere nervi & tendines discissi, vel involucris suis sic nudati, ut ad intimam illam pulposam substantiam, adeo facile irritabilem, acria perungere possint. Imo nervi nudi si tantum tangantur à non consuetis liquidis, enormes dolores & convulsiones ipsas inde sequi constat. Dum carie dentium erosa fuit crusta illa durissima, nervulos tenuissimos per dentis substantiam dispersos regens; aer frigidus allabens, sacchari particula, molle butyrum &c. applicata his nervis nudis, convelli faciunt totum hominem præ doloris acerbitate. Simplex attactus nudi suis involucris tendinis uno momento tetano universali obrigescere facit hominem, uti dictum §. 164; cum tendines, suis vaginis mucosis vel pinguedinosis rekti, patiantur se protrahi, elongari, consui &c. sine magno malo. Cum ergo in vulnere sensibilissimæ illæ partes nudentur sæpissime, poterit instrumenti vulnerantis pars relicta, fragmenta ossium vel simile quid in vulnere hærens, irritando has partes, sævissima mala producere. Idem fiet ab humoribus in vulneris cavum effusis, ibique in acrem indolem degenerantibus; uti & ab acris vulneri applicatis remediis titulo; uti in paragrapho modo citato exemplum ex Hippocrate allatum confirmavit.

IPSA NERVI LÆSI CONDITIO &c. In numeris citatis demonstratum fuit; punctos vel semilaceros, nervos & tendines, convulsiones & alia sævissima symptomata producere; & pluribus observatis Medicis hujus asserti veritas confirmata fuit.

EVACUATIO CRUORIS NIMIA PRÆGRESSA. Simulac tanta copia subducuntur humores de corpore, ut residuum, cordis vi per vasa pulsum, illa æquabiliter replere nequeat, deficit pressio in arterias cerebri, unde & spirituum motus per nervos cerebri cessat: hinc omnium musculorum paralytis; & à cerebello, similiter affecto, animi deliquium: unde omnia liquida nervosa & arteriosa incipiunt quiescere. Interim frigore majori corporis, motus imminuti sequela, contractæ partes venosum sanguinem versus cor derivant; quod repletum contrahitur, & summa velocitate per vacuas arterias sanguinem movet, cum nihil resistat sanguini impulso. Tunc ergo validissimo impetu sanguis per cerebri vasa movetur; unde spirituum motus in musculos velocissimus fit, sed mox desinens; rediturus iterum, quando cor sensim impletum se contrahet. Uno ergo momento validissima causa motus musculis applicatur, quæ iterum sequenti momento desinit; unde alterna violenta & invita musculorum contractio, quæ convulsio dicitur.

In mactatis animalibus quotidiana observata hanc rem evincunt. Dum vitulis,

V v iij

ovibus, porcis &c. discissis arteriis carotidibus pleno rivo sanguis effluit, circa mortem incipit cessare sanguinis fluxus, per intervalla tantum rediens, ob causas modo dictas, tuncque semper valide convelluntur animalia, donec moriantur. Dum per abortum, vel post partum, patulis uteri vasis omnis fere sanguinis copia exit, toties convelluntur mulieres, & sæpe subito pereunt. Idem observatur, dum hypercatharsi per alvum nimia copia liquidorum de corpore subducitur.

Ideo monuit Hippocrates: *copioso sanguine fluente, convulsio aut singultus accedens malum* (a). Et alibi (b); *convulsionem fieri & à repletione, & ab inanitione* dixit. Sic & *nimia purgationi succedere convulsionem & singultum* asserit (c). Similia plurimis aliis in locis habet. Designat enim hoc malum, post nimias evacuationes ortum, tantam fuisse factam subductionem liquidi de corpore, ut vasa vacua collabantur, & sanguis, corde pulsus, non possit propagare motum acceptum per vasa plena, sed libere ruat in vasa vacua: unde deficit requisita pressio æquabilis in encephali vasis, à quibus tota vita & humanitas pendent; Hinc patet, quantum tunc adsit periculum, si ab inanitione nimia oriatur convulsio.

§. 233. **Q**UIN & effectus ejus perturbatio omnium Actionum, cognoscitur.

Effectus convulsionum mirabiles sunt & innumeri; nihil enim in toto corpore manet non turbatum, sive solida sive fluida spectes, sive actiones ipsas, quæ ab his pendent. Dum enim alterna hac & violenta contractione nunc rigent muscoli, nunc flaccescunt iterum, sanguinis per musculos transitus impeditur uno momento, altero momento per flaccidos musculos liberrime & cum impetu summo transit: venæ, musculis convulsis vicinæ, citissime deplentur; hinc venosi sanguinis impetus cor versus acceleratur; unde maxime turbatur æquabilis sanguinis receptio in cor, ejusdemque expulsio ex corde. Respiratio miris sæpe modis turbatur, laboriosa fit & non perficienda nisi summo molimine: aliquando & vehemens strangulatio accedit, uti pulchre notavit Aretæus, ubi tetani effectus describit. (d) Nec minor perturbatio in actionibus animalibus observatur: Musculorum enim illi enormes motus non determinantur ex voluntatis imperio, sed invito vel & inscio sæpe ægro fiunt: sæpe omnes sensus externi & interni abolentur penitus, vel turbantur mirifice: nec mirum, cum convulsionem testentur affectum esse illud organum corporeum, cerebrum nempe, unde tota humanitas pendet. In naturalibus actionibus pariter miræ observantur mutationes. Maxillæ sæpissime sic constringuntur, ut ne cuneo quidem deduci possint; deglutitio impossibilis; Ventriculi & intestinorum mirabiles inflationes abdomen sæpe ad crepturam usque distendunt. Alvus & vesica nunc penitus intercepta nihil demittunt; aliquando, inscio ægro, clam fæces & urinâ elabuntur &c. Uno verbo ut totam rem complectamur, mutantur singula & universa in toto corpore aliquando per convulsionem tam enormiter, ut nihil de pristina sanitate supersit, & ne quidem à familiaribus agnoscantur miseri; quæ omnia accuratissime notavit Aretæus in loco modo citato, & conclusit: *vetum adstantibus, prius impium*,

(a) Aphor. 3. Sect. 5. Charter. Tom. IX. pag. 191.

(b) Aphor. 39. Sect. VI. Charter. Tom. IX. pag. 273.

(c) Aphor. 4. Sect. V. Charter. Tom. IX. pag. 196.

(d) Aretæi Cappad. de causis & signis morbor. acut. Lib. I. cap. 6. pag. 4.

nunc honestum efficitur, agrum vita defungi, quo una cum vita doloribus & acerbis malis liberetur.

Sæpe enim, si evaserint, luctuosissima mala supersunt, à distortis membris; musculis distractis, functionibus cerebri deletis &c. Tristes enim casus docuerunt frequentissime, Paralyfes, Atrophias, Stultitiam &c., post convulsiones validas toleratas, tota vita mansisse incurabiles.

Tandem & abolitio omnium actionum vitalium, animalium, naturalium; mors nempe convulsiones aliquando sequitur, & tantis malis finem imponit. Dixit Hippocrates: (a) *Vulnere accedens convulsio, lethale.* Et Aretæus in eodem loco modo citato de convulsionibus agens dicit: *nam ob vulnera fieri solent, membrana, aut musculis, aut nervis punctis, ex quo plerumque moriuntur. A vulnere enim convulsio lethalis est &c.*

§. 234. **S**ANATUR. 1. Ablato irritante (186.) arte Chirurgi (187. 188.) 2. acri lenito, vel dissipato. 3. sublata nervi conditione (232.) per remedia (228. 229.) descripta 4. repletionem per lene, amicum, liquidum alimentum assiduo parca copia Ingestum. 5. sedata simul hæmorrhagia. (218. 219.)

Ingens farrago habetur apud auctores remediorum antispasmodicorum: sed cum à distinctis adeo, imo sæpe oppositis oriantur causis, patet facile unicuique, nullum universale remedium ad convulsiones dari; sed indagata prius causa determinari debere auxilium, quod causam hanc cognitam tollere vel enervare possit. Cum autem convulsiones post vulnera oriantur, vel ab irritante quocumque in vulnere hærente; vel à nervis, tendinibus, vel membranis punctis vel semidissicis; vel denique à sanguinis nimia jactura; ideo ad tria hæc indicata omnis curationis scopus dirigitur. Unde primo & secundo numero hujus paragraphi agitur de modis, quibus irritans quodcumque tolli vel leniri potest; tertio vero numero agitur de illis, quæ nervi affecti vel tendinis conditionem descriptam tollunt: ultimis binis numeris indicantur auxilia, quibus sanguinis jactura compesci poterit, & restitui illud, quod jam perditum fuerat.

1. Si spina loco nervoso infixæ hæreat, sub ungue v. g. nudas nerveas papillas lædens post summos dolores sæpe convulsio sequitur, non tollenda facile; quamdiu hæc spina ibi hæserit. Unde, quantum fieri potest, in prima vulneris deligatione inquirendum, an tale quid hæreat in vulnere. Quomodo autem hoc fiat, quibusque cum cautelis hæc tolli debeant, dictum fuit in numeris hic citatis.

2. Rarius acrimonia in vulnere ex allatis humoribus nascitur, nisi ingens cachymia in corpore prædominetur, vel in victu acrimonia plurima ingerantur. Longe frequentius ab applicatione acrimoniae remediorum hoc fit, dum Arsenicum, vel alia rodentia, imprudenter locis nervosis vel tendinosus vulneratis adhibentur. Hæc autem cognita tollenda sunt, vel enervanda talibus, quæ opposita virtute cognitam acrimoniam corrigere valent. Unde iterum nihil universale hic determinari potest, sed singulari acrimoniae conveniens medela applicanda est. Mollissima in-

(a) Aphorism. 2, Sect. V. Charter. Tom. IX. pag. 195.

terim Balsama semper profunt, quia defendunt partes, ne rodantur ab acribus; & simul obvolvendo acria lenissimo pingui, quo scatent, illa enervant. Vide & §. 228. N^o. 5. & 6.

3. Causa convulsionis à vulnere frequenter erat nervi talis læsio, qua partim dissectus distrahebatur in fibris adhuc integris relictis; unde dolor enormis, convulsio, & reliqua, quæ §. 163. & 183. recensentur, oriuntur mala. Omnia autem hæc à lenta & continua distractione fibrarum nervosarum sunt, quam semper dolor, uti ex ejus definitione §. 220. patet, comitatur. Ergo illa remedia, quæ dolorem tollunt, sanabunt etiam convulsionem ab hac causa ortam. Hæc autem remedia agebant vel in ipsam doloris causam, vel nervum reddebant ineptum sensui, destruendo commercium inter nervum affectum & cerebrum; vel denique sensorium commune ipsum sic obtundebant, ut non perciperet illam nervi mutationem, quæ à causa dolorem excitante fiebat. Omnia autem hæc convulsionibus sanandis adhibita fuisse cum fructu, mox patebit.

Inter illa enim, quæ §. 228. ad doloris causam tollendam laudabantur, præcipuum locum obtinebant, & maxime universalem usum habebant, omnia laxantia & emollientia dicta, quibus adhibitis fibræ nervosæ sic disponebantur, ut distendi possent sine rupturæ metu: Eadem autem ab omni tempore ad convulsiones tollendas fuerunt adhibita. Ad curandum Tetanum laudat Hippocrates (a) jusculum gallinaceum pingue & calidum, fomenta, tepefactoria humida & pingua in velicis & utriculis undique, sed præsertim ad partes dolentes admota; calidi olei copiosas & crebras inunctiones pariter jubet. Et alibi (b) ad Tetanum ex vulnere factum pinguium inunctiones ante focum, fomenta, tepefactoria, sudores tepidæ perfusione excitatos, aquæ mulsæ tepidæ potum, si quidem bibere posset æger, si non ejusdem per nares infusionem commendat &c. Præterea, ubi calidi utilitatem recenser, (c) dicit, quod sit dolorem sedans, rigores, convulsiones, tetanos mitigans, & contra (d) frigidum convulsiones & tetanos facere asserit. Calor enim omnia laxat, ut distrahi & flecti possint sine rupturæ periculo; frigus omnia reddit fragilia & contrahit, uti obviis ubique experimentis patet. Eadem & Celsus (e) commendat, qui sic affectos toto corpore in oleum calidum descendere jubet; vel in aquam calidam, in qua sænum græcum decoctum sit, & adjecta olei pars tertia. Galenus, uti in loco §. 164. allegato patuit, in se ipso à valida distractione ligamentorum imminentem convulsionem continua olei calidi perfusione evitavit, quam statim instare sensit, simulac olei affusio intermitteretur. Similia & apud Aretæum in cura tetani commendantur. (f) Unde apparet, antiquos Medicos unanimi consensu molliissima remedia, quæ tam pulchre omnes fere dolores leniunt, ad convulsiones curandas commendasse.

Facile etiam patet, quod si nervus, cujus læsio totum sensorium commune turbat, possit destrui sine metu gravioris mali per dissectionem, compressionem, caustica &c. nullum amplius convulsionis adsit periculum, quia omne commercium inter cerebrum & nervum læsum sublatum est. Docuerunt hanc rem impri-

(a) De morbis Lib. III. cap. 12. Charter. IX. pag. 207.
Tom. VII. pag. 587.

(b) De internis affectionibus cap 54. Charter. Tom. VII. pag. 678.

(c) Aphorism. 22. Sect. V. Charter. Tom. I. pag. 85. &c.

(d) Ibid. Aphorism. 20. pag. 205.

(e) Lib. IV. cap. 3.

(f) De Curat. morb. acutor. Lib. I. cap.

mis observata Medica in curatione cujusdam speciei Epilepsiae, in qua in quodam corporis loco, v. g. in digito majori pedis (qualem casum vidi) sentitur titillatio quaedam, ac si formicae reperent per partem; ascendit ille motus per crus, femur, abdomen ad praecordia usque, tuncque mox cadit convulsus toto corpore. Si subito, dum sentiret in digito pedis incipiens malum, ligatura sub genu arctissime stringeret omnes partes, liber erat à paroxysmo. In similibus casibus toties profuit locum illum, unde primo incipit mirus ille motus, caustico profunde inurere, ut destrueretur ille nervulus, cujus affectio tam miris modis totum corpus turbare poterat. Hujus rei vestigium habetur apud Celsum dicentem: *Quod si musculus lusus videbitur, pracidendus erit, Nam percursus mortiferus est: praecisus sanitatem recipit.* (a)

Illa autem, quae sensorium commune vi narcotica sic obtundunt, ut tollatur doloris sensus, mira efficacia turbulentos illos motus convulsivos compescunt saepe, uti in Hysteriis convulsionibus imprimis toties apparet. Apud veteres Medicos tamen non invenitur adeo frequentem fuisse in his casibus horum auxiliorum usum. Hippocrates tamen in cura Tetani laudat inter alia remedia etiam semina Hyoscyami vino infusa, cui dein aequalis olei copia misceretur, ut his calefactis dein caput & corpus ungeretur. (b)

4. Pro generali regula in morborum curationibus Hippocrates statuerat, *quod morbis à plenitudine ortis mederetur evacuatio; illis vero, qui ab inanitione fierent, mederetur repletio.* (c) Quando ergo vasis sanguineis discissis ingens facta fuerit sanguinis jactura, sic ut aequabilis pressio in vasa encephali inde turbetur, convulsionem inde factam pro causa sua habent nimiam inanitionem: curabuntur ergo repletionem. Decantatissima illa Antispasmodica, spiritus Cornu Cervi, serici crudi, succini tinctura & oleum, Castorei virus, olea pulcherrima stillatitia aromatica &c. quae in aliis casibus tam pulchre compescunt inordinatos illos in systemate nervoso motus, hic nocent suo stimulo, quo augendo sanguinis motum pauculum illud, quod in vasis adhuc superest, sanguinis ex discissis vasis expellunt ad mortem usque. Tota curatio consistit in eo, ut novo & bono liquido distendantur iterum collapsa per nimiam inanitionem vasa. Verum satis magna hic difficultas occurrit: nam ingesta viscerum & vasorum actionibus conspirantibus, & miscela cum bonis humoribus maxima copia praexistentibus, assimilantur in naturam nostram, & requisitas in fluidis humanis dotes acquirunt. (vide §. 25. N°. 1.) Post magnam autem sanguinis jacturam deficit illa copia humoris boni, quae in sanitate pauculum crudum per ductum thoracicum in subclaviam venam deductum absorbet & quasi disparere facit: simul & debilitatur ab eadem causa omnium vasorum & viscerum actio, unde binæ illae efficacissimae causae, quae crudum mutant in coctum; hic deficient, vel saltem languent. Totum ergo, quod fieri potest cum fructu, est, ut ingerantur talia liquida, quae sanis humoribus simillima, nihil stimulantis acrimoniae in se continent, & sine molestia à corpore debili ferri, & superstita adhuc vasorum & viscerum actione, licet languida, subigi possunt. Omnia itaque illa proderunt, quae §. 25. N°. 1. laudata fuerunt; & inter illa imprimis carniū juscula, in quibus humores, in corpore

(a) Lib. V. cap. 26. N°. 12. pag. 291.

(c) Aphor. 21. Sect. 1. Charter. Tom. IX.

(b) Hippocrat. de intern. affection. cap. 54. pag. 63.
Charter. Tom. VII. pag. 678.

fani animalis elaborati, in aqua ebulliendo solvuntur; imprimis si pauculum succi citri addatur, quod nimis facilem degenerationem horum jusculorum in putredinem corrigit. Eandem ob causam & acetosæ pauculum his jusculi incoquitur, adduntur & oryza, hordeum, avena & similia Cerealia mollissima. Omnia hæc dantur parca copia simul & sæpe repetita, ne gravetur ab ingestis debile corpus, & ut fiat sensim talis vasorum repletio, quæ vitam sustinere possit, sed tam debilem, ut vulnerata vasa consolidari possint, nec ullus metus sit, ne nimis subita impletione vasorum, vel aucto motu lacerentur iterum illa, quæ jam inceperant concreescere. Nisi enim fidissima observata docuissent, vix credi posset, quam parca sanguinis copia vita adhuc sustineri possit. Memorabile Exemplum hanc rem confirmans allegatum fuit in Commentariis ad §. 161. Et in fœminis, quæ sæpe per abortum omnem fere sanguinem amittunt, & convelluntur, felix successus hanc methodum probavit; dum pro mortuis jam fere habitæ, sensim sic repletis vasis, ex ipsis orci faucibus evaserunt felicissime.

Pulcherrima habetur apud *Lothverum* (a) observatio, quæ docet, quantum expectari possit à carnium jusculis, ubi magna sanguinis jactura facta fuit. A Medico fide dignissimo dicit se hanc historiam accepisse. *Adolescenti sexdecim annos nato, cum magna sanguinis copia per biduum continuo erumperet, neque medicamentis, aut arte ulla cohiberi potueris, jusculis eum reficere amici & adstantes curarunt, cumque ea valde avide expeteret, atque assumeret, fluxus subinde concitior factus est, & tandem res eo devenis, ut, massa sanguinis fere tota effluxa, quidquid jam efflueret, dilutum & pallidum, & sanguinis neque naturam, neque speciem præ se ferret, ipsi jusculo, quod toties hauserat, quam sanguini similis; atque eadem forma per diem unum aut alterum duravit hic aqueus fluxus, constante interim cordi motu suo, donec fluxu demum consopito, juvenis paulatim integræ sanitati restitutus est, & exinde in virum robustum & quadratum excrevit.*

§. Quomodo compesci possit vulneris Hæmorrhagia, explicatum fuit in numeris hic citatis. Patuit tunc, artificiosa methodo plurimas Hæmorrhagias sedari posse. Ubi vero nullus datur manibus accessus ad vas læsum, uti dum in corporis interioribus vasa vulnerata sunt; tunc imprimis prodest ligatura brachiis & femoribus circumducta tam firmiter, ut compressis venis impediatur, ne sanguis ex his partibus ad cor tam facile redeat: sic impediatur saltem pro tempore Hæmorrhagia, & forte nascetur occasio, ut vasa læsa contrahi & consolidari possint; sedata autem Hæmorrhagia non simul & semel sed sensim sunt laxanda hæc vincula, ne recrudescat hoc malum. Summa si sit quies mentis & corporis, & debilissima tantum si sustentetur vita, nullisque cardiacis refocilletur vulneratus, magna adhuc spes etiam in periculosissimis casibus manet.

§. 235. **T**UMOR, & inflammatio levis vulnere bona; si augmentur mala: balnea, fots, anodyna, antispastica, loco læso, & toti applicata ægro, prosunt: de quibus in historia & curatione Inflammationis.

Dictum fuit in §. 158. N°. 5. quod post vulnus factum alicujus momenti se-

(a) De corde pag. 70. 71.

quatur secundo vel tertio die in labiis & fundo vulneris major calor, dolor, rubedo, & tumor, & quod hæc omnia symptomata acciderent semper vulnere etiam in corpore sanissimo. Levis ergo talis inflammatio, cum comite tunc fere semper febricula, nunquam mala est. Abscissa enim vasorum extrema contracta resistunt liquidis impulsis, unde obstructio nascitur; & à vitæ viribus, febricula tunc comite, urgentibus majori impetu obstructos vasorum fines, levis sit inflammatio; quam blanda sequitur suppuratio separans obstructa extrema vasorum una cum immeabili liquido, & liberam humorum circumductionem restituens per totam vulneris superficiem, per quam fit regeneratio perditæ & unio partium separatarum. Ibidem tunc hoc & Hippocratis observationibus constitit, qui naturæ ductum ubique sequens tanquam ingens malum damnaverant, si in gravibus vulneribus tumores non apparent; in alio vero loco laxos in vulneribus tumores laudabat, crudos vero damnavat, ut potè nimis validæ inflammationis signum. Pulcherrime hanc rem expressit Celsus dicens: *nimis vero intumescere vulnus, periculosum: nihil intumescere periculosissimum est. Illud indicium magnæ inflammationis: hoc, emortui corporis est. &c. At ne febris quidem terrere debet, si in magno vulnere, dum inflammatio est, permanet. Illa perniciofa est, quæ vel levi vulnere supervenit, vel ultra tempus inflammationis durat, vel delirium movet &c.* (a) Ubi vero valida obstructione nata circa vulnus, auctore admodum motu per febrim exortam, dolor, tumor, rubor, & calor augentur valide, novimus facile, longe majorem jam hic esse inflammationem, quam requirebatur ex observatione phenomenorum communium omni vulnere. Hæc ergo si pergeret, destrueret partem gangrænosâ corruptela; vel saltem longe validior postea sequeretur suppuratio, separans inflammatum non resolvable à reliquis partibus vivis; quod fieri nequit, quin multum pereat de substantia corporea, & imprimis de cellulosa tunica, in qua præcipua suppurationis sedes videtur esse: unde tardior consolidatio vulneris, turpior cicatrix, & reliqua omnia mala oriuntur, quæ à consumptis nimis valida suppuratione partibus sequi possunt. Requiritur ergo, ut idoneis auxiliis tollatur nimis valida inflammatio: quod fiet, laxatis valis, & solutis fluidis, quæ inflammatoria tenacitate coiverant. Unde balnea, fomenta &c. ex mollissimis herbis parata tanti tunc usus sunt. Simul tunc attendendum, an causa inflammationis nimis in ipso vulnere hæreat, an vero febris excitata nimio impetu, vel diathesis inflammatoria sanguinis accusari possint. Priori in casu topica medela sufficeret sæpe; posteriori vero universalis medela motum auctum compescens, vel solvens inflammatoriam spissitudinem, requiretur. De his autem pro parte dictum fuit in capitulo de obstructione, & postea adhuc agetur in Historia & Cura inflammationis.

§. 236. **S**ANGUIS in cava corporis per vulnus delapsus inde Socys educendus situ corporis, suctu per fistulam, si recens vel dilutus primo, apertura vulneris dilatata, vel nova.

Præter illa loca corporis, in quibus humores à sanguine secreti accumulantur in usus requisitos; vel ut collecti excernantur de corpore; vix reperiuntur cava loca vacua in corpore. Certe tota calvaria plena est, thorax plenus,

(a) A. Corn. Cels. Medic. Lib. V. cap. 26. pag. 295. 296.

abdominis cavum pariter : vulneribus enim hæc cava penetrantibus exprimuntur contenta, simulac patet liber exitus. Sanguis tamen discissis vasis effluens potest sic comprimere partes contentas his corporis cavis, ut locum jam occupet, quem naturaliter tenebant viscera in his cavis locata. Lædet ergo sanguis in hæc cava effusus actionem viscerum contentorum comprimendo ; & postea corruptus acrimonia acquisita poterit rodere & corrumpere illa omnia, quæ tangit ; dumque simul attenuatur, dum putrescit, resorptus venis bibulis, ubique in superficie corporis interna & externa patentibus, poterit totam sanguinis massam putrida labe inficere, & pessima mala producere. Hippocrates (a) dixerat, uti §. 172. N^o. 1. jam habetur sanguinem in ventrem præter naturam effusum necessario suppurari : & Galenus in Commentariis suis adhuc locum per *κ. λ. μ.* quamcumque cavitatem præter naturam intellexit ; & simul monuit suppurationis vocabulo hic intelligi quamcumque aliam sanguinis degenerationem. Non adeo tamen videtur ablonum intelligere per vocabulum *κ. λ. μ.* non suppurationem proprie dictam, sed quod sanguis extravasatus, & cavo præternaturali contentus, viam sibi faciat per loca suppuratione facta, licet sanguis ipse extravasatus non convertatur in pus proprie dictum.

Præter hæc cava majora corporis notum est, sub cute inveniri, & ubique inter musculos poni, tunicam dictam cellulofam, vel pinguedinosam ; quæ facillime dilatibilis cedit sanguini effuso, & distendi potest in molem sæpe immanem, uti Aneurismata spuria, & sugillationes post validam contusionem docent. In his cavis præternaturalibus hærens sanguis poterit pariter pressione, & corruptela nata, plurima mala facere ; unde indicatio jubet, educendum esse cito, si commode fieri possit. Tamen hoc videtur notandum esse, quod sanguis effusus diu manere possit incorruptus, si nullus aëri detur accessus ; & quod aliquando diluentibus & solventibus remediis applicatis sic possit attenuari, ut per vasa bibula resorptus evanescat sensim. De hac re autem dicetur in capitulo de contusione.

Ubi ergo sanguis extravasatus in cavo corporis hæret, nocens compressione partium ; vel si metuatur ejus corruptela, & nulla spes sit, sanguinem effusum dissipari posse, tunc per artem educendus est. Hoc autem fiet.

SITU CORPORIS : qui talis tunc requiritur, ut sanguis extravasatus propria gravitate per vulneris orificium exire possit. Multum ad hanc rem facit si cognoscatur corporis positura, quam habuit vulneratus illo momento, dum vulnus accepit : in eodem enim situ corporis tunc reponendus est, quantum fieri potest : aliter enim sæpe membrana pinguedinosa vulnus cutis occludit sic, ut nihil exire possit. Simul tunc orificium vulneris in declivi quam maxime situ ponatur, ut sanguis exire possit. In abdominis cavo v. g. si sanguis effusus hæreat, pronus in ventrem decubitus proderit. Elevatus pedibus, capite demisso, sanguinem in pectoris cavo hærentem eduxit Paræus, & ab instanti mortis periculo liberavit vulneratum ; uti dictum fuit §. 172. N^o. 3.

SUCTU PER FISTULAM. Hoc locum habet, quando sanguis in cavo abdominis, & imprimis in cavo pectoris effusus hæret. Sumunt tunc fistulam ex plumbo flexili, vel ex corio vel balenæ osse, obtuso semper apice instructam, ne

(a) Aphor. 20. Sect. 6. Charter, Tom IX. pag. 259.

lædat partes; per hanc cavo corporis immissam vel sugendo, vel & applicata antlia extrahi potest sanguis extravasatus. Ubi vero sanguis sub cute in cellulis membranæ pinguedinosa aggestus hæret, patet facile, hanc methodum nullius usus esse.

Sed nec idoneo situ corporis, nec suctu per fistulam educi poterit sanguis extravasatus, nisi fluidus sit: si vero jam in grumos concreverit, tunc prius sic dilui debet, ut per vulneris orificium, vel fistulæ aperturam, transire possit. Sumitur tunc aqua cum melle vel saponis Veneri parca copia: additur aliquid salis marini, & pauculum vini: tepidus talis liquor injicitur, leni conquassatione vel & ipso respirationis motu agitatur cum sanguine concerto, quem diluit & solvit; deinde situ corporis, vel suctione, iterum educitur injectus liquor; illudque reperitur tandem, donec injectum liquidum purum & nullo sanguineo colore tinctum redeat. Simpliciter sic hordei decocto cum melle residuos in thoracis cavo sanguinis grumos eduxit Paræus in exemplo modo allegato; dumque sequenti die Ceptauræi, absinthii & aloës infusum injiciebat, ut magis mundaret hæc loca, mirabatur vulneratum amarorem ingratum percipere & nauseare. Facile patet hæc tentari non posse quamdiu Hæmorrhagiæ metus adhuc superest.

APERTURA VULNERIS DILATATA, VEL NOVA. Si angustum nempe nimis vulnus fuit, vel panniculus adiposus, in vulneris aperturam pressus, obstruxerit orificium, tunc dilatatio requiritur. Aliquando etiam accidit, vulneris aperturam altiori loco hære sanguinem vero effusum declivi loco situm non posse evacuari per vulneris orificium, nisi inverso situ corporis, quem sine molestia diu ferre non posset vulneratus, sic dum vulnere superiori thoracis parti inflicto, vasis disscissis, sanguinis copia magna in pectoris cavo accumulatur, ille versus posteriora thoracis, ubi profunde descendens diaphragma thoracis capacitatem multum auget, hærebit, nec poterit facile exire per vulneris aperturam, nisi capiti insisteret vulneratus: unde potius versus posteriorem & inferiorem partem thoracis in latere affecto nova apertura facta, sanguis educitur. Idem verum est, dum v. g. vulnere circa lumbos inflicto sanguis in abdominis cavo hæret, qui gravitate sua anteriorem & inferiorem abdominis prominuli partem occupabit, unde longe facilius, paracentesi in hoc loco instituta, poterit educi, quam pressione abdominis & mutato situ corporis per vulneris aperturam exprimi. Pariter etiam nova apertura vulneris requiritur, ubi sanguis effusus in panniculo adiposo descendendo viam sibi fecerit versus declivem locum.

§. 237. **S**I vulnus inter firmas partes corporis descendit, via paranda sordibus pressione, lotionè, ligatura, apertura vulneris nova, vel dilatata.

Aliquando fit, ut instrumentum vulnerans profunde adactum descendat inter partes corporis per panniculum adiposum imprimis: liquida tunc ex vasis disscissis in vulneris cavum effusa, & pus collectum ibi hærebunt, & propria gravitate descendente in facile dilatabili membrana pinguedinosa augebunt vulneris profunditatem; nec facile exire poterunt per vulneris orificium altiori loco situm. Imo sæpe collecta materies miras sibi & maxime sinuosas vias faciet per pannicu-

tata fuerit vulneris conditio, de aliis cogitandum est. Si vulneris orificium admodum exiguum fuerit, ut non possint exire de cavo vulneris aggesta liquida, tunc illud dilatandum est: si vero vulneris apertura talem situm habeat, ut contenta in vulneris cavo liquida nec propria gravitate, nec mutato situ corporis facile exire possint, tunc cogitandum est de apertura nova facienda, per quam commodius & sponte elabi possent omnia illa, quæ retenta in vulnere nocerent. Ut autem hoc fiat, turunda clauditur vulneris orificium, ut nihil exire possit, aggesti tunc humores colliguntur sponte in infima parte fundi vulneris, & ibi tumorem facient, qui indicabit locum, ubi nova apertura facienda est. Idem fieri poterit, si per siphonem aqua injecta promineat extrorsum vulneris infimus fundus; uti & si specillum immissum per vulneris aperturam ad infima usque pertingere possit sic, ut ejus apex digito Chirurgi sentiri possit: tuto enim tunc supra specilli apicem discinduntur integumenta, ut nova apertura fiat. Si vero vulnus inter partes crassas musculosas profunde descenderit, sic tamen ut fundus vulneris non versus cutim hæreat, sed in interioribus delitescat, longe difficilior est novam aperturam cum fructu facere: optimum tunc est, clausa vulneris apertura, ad illum locum, ubi vulneris fundus hæreere creditur, applicare mollissima cataplasmata hac spe, ut emolliatæ partes externæ facillime cedere possint liquidis in vulneris cavo aggestis, sicque inveniri locus, qui pertundi debet.

§. 238. **D**ILATATIO fit cultro, linteis carptis, spongia, radice Gentianæ & similibus siccis immixtis, filo alligato, absorptu humoris tumentibus, sicque dilatantibus.

Omniū optime vulneris dilatatio per cultrum fit: dolor quidem acutus adest; dum dissecantur partes vivæ, sed uno momento desinit; dum reliqua, quæ dilatando vulnere inserviunt, lenta distractione satis acutum & diuturnum simul dolorem excitant, & una margines vulneris contundunt: quæ loca contusa postea per suppurationem debebunt separari. Unde, qui vano metu sectionem cultro faciendam horrent, majoribus torquentur doloribus.

Ut vero fiat sine Sectione vulneris dilatatio, intruduntur ejus orificio linteæ carptæ vel similia corpora bibula siccissima, quæ, humores affluentes absorbendo distenduntur; sicque distrahunt orificium vulneris nimis angustum. Nec parva hæc vis est, quæ corpora sicca bibula, dum madescunt, remonent à contactu partes, quibus cœrcentur. Adest enim in aqua mirabilis hæc proprietas, certis experimentis cognita, quamvis difficillime explicanda, quæ distendit corpora, quibus se insinuat, in majus volumen; tanto quidem cum effectu, ut sola hæc vi enormia pondera eleventur, & durissima saxa findantur cuneis siccissimis ligneis intrusis & postea humectatis; uti solent facere operarii, ut enormes illas massas lapideas unde molares lapides conficiunt, separent à rupibus. (*) Nec hæctenus limites immanis illius potentiae novimus: sufficit scire, quod summa etiam obstacula superet. Linteæ ergo carptæ siccissimæ contorta in turundam, radicis gentianæ adeo fungosæ frustulum, vel & spongiam compressam vulneris orificio intrudunt: dein

(*) Acad. des Sciences Pan 1730. Mem. pag. 391. Boyle de utilitate philos. Experim. pag. 555.

vel tenaci Emplastro, vel ligatura idonea, hæc sic retinent, ut non possint exire, dum affluentibus humoribus resorptis tumere incipiunt: sic tota illa vis, qua distenduntur hæc bibula corpora, impenditur dilatando vulnere. Inter illa autem, quæ dilatandis hac methodo vulneribus adhibentur, nullum est, quod in tam parvum spatium comprimi potest, & tamen ab humido resorpto postea tam immaniter tumet, quam spongia; unde solet reliquis præferri: imprimis si artificiosa præparatione augeatur adhuc spongiæ ad hos usus efficacia. Solebant quidam spongiæ frustulum circumducto filo validissime constringere, deinde vulneris orificio immittere, sic ut nodus circumducti fili extra vulnus hæreret & forfice abscindi posset: sed non sine difficultate hoc potest perfici, & longe melius sit methodo sequenti. Resinam cum cera & pauco oleo liquant, ut fiat inde Emplastrum satis tenacis consistentiæ huic deinde Emplastro igne liquato spongiam puram, sicciissimam, & satis magnam immergunt, ut undique penetraretur hoc Emplastro soluto: deinde validissima actione præli, inter duas laminas ferreas modice calefactas, ex spongia exprimunt omne pingue, quantum fieri potest, sicque in prælo relinquunt donec omnia penitus refrigerint. Tunc habetur spongia in minimum volumen compressa, densa fere instar ligni, & quæ in quasvis figuras scindi poterit. Illud, quod post validam expressionem remansit in spongia Emplastica, siccæ spongiæ partes sibi mutuo applicatas retinet, nec tamen impedit, quo minus aqua & aquosa omnia in bibulam spongiam raptantur, illamque in pristinam dimensionem extendant. Cum ergo spongia validissima pressione in angustissimum spatium redacta, vulneris orificio immissa, ab humoribus affluentibus distendatur in maximam dimensionem, quam acquirere potest; patet, quam enormis dilatio hac methodo fieri possit. Præterea hoc commodi habet spongia sic præparata, quod possit in minima ramentula scindi, quæ angustissimis etiam vulnere vel fistularum orificiis immitti possunt: quod linteis carptis vel gentianæ radice aut aliis similibus fieri minime posset.

Omnes autem illis turundis, sive ex spongia sive ex aliis similibus fiant, alligatur filum, ne forte se subducant in latius vulneris cavum, & ibi plurima mala faciant; dum non possent sine molestia inde educi sine hac cautela.

Sic hætenus ordine pertracta sunt illa, quæ ad generalem historiam & curationem vulnerum pertinent, simulque actum fuit de illis symptomatibus, quæ vulneribus accidunt quandoque, & ob periculum vel summam molestiam peculiarem medelam requirunt. Sequitur nunc ut dicatur de vulneribus, quæ corporis partes illas occupant, in quibus viscera reconduntur; ideoque, præter generales in omnium vulnerum curatione indicationes, multa adhuc alia observanda requirunt. Solent plerumque hæc considerari in tribus illis magnis corporis cavis, in quibus nobilissima organa illa continentur, à quibus omnes functiones corporis sani pendent: unde apud auctores Chirurgicos seorsum semper solent tractari Vulnera Capitis, Thoracis, & Abdominis. Primo nunc agatur de Vulneribus Capitis.

VULNERA



VULNERA CAPITIS.

§. 239. **V**ULNERA Capitis lædunt vel sola externa communia; vel periosteum; vel cranium; vel duram Matrem; vel piam simul; vel Cerebri vasa, substantiam, corticem, medullam, ventriculos.

Distinguuntur vulnera capitis, quod vel lædant externa, inter quæ & ipsa calvarie os numeratur; vel quod penetraverint ad contenta in calvarie cavo. Externa autem hæc iterum bifariam solent dividi: vel enim sunt communia externarum partium corporis tegumenta; vel sunt talia, quæ soli capiti propria habentur. Integumenta communia sunt Epidermis, cutis & panniculus adiposus: quæ quidem ubique in toto corpore externo fere adsunt, tamen in plurimis locis diversam habent indolem. Longe enim alia Epidermis apparet in dorso pedis quam in planta; multo crassior cutis plerumque in dorso quam in abdomine; longe alia indoles panniculi adiposi in cervice, v. g., quam in aliis partibus corporis. Sic etiam in capite cutis satis crassa, loculis sebaceis copiosis satis magnis instructa; cellulosa tunica huic subiecta, satis tenuis, vix multum pinguis habet: unde diversitas communium integumentorum in capite patet. Præter hæc alia sunt capiti propria integumenta. Expansio enim tendinea, sive aponeurosis, totum caput sub membrana cellulosa tegit, quæ per collum pergens ad humeros fere usque descendit: in parte superiori capitis omnium fortissima est hæc Aponeurosis, duplici ad minimum strato fibrarum, se mutuo decussantium, constans; descendens postea sensim attenuatur, ubi collum ambit, & circa claviculas quasi evanescit (1). Huic membranæ supponitur Periosteum cranii, binis lamellis, arcte sibi invicem unitis, constans: interior lamella, ossi applicata, à quibusdam Periosteum proprie vocabatur; exterior, in quibusdam locis, ut circa musculos temporales, ab interiori secedens, à multis Pericranium dicitur. Sub hoc Periosteo cranium ipsum sequitur ex ossibus variis, miro artificio unitis, constans, binis tabulis osseis, intermediam diploën continentibus, compositum. Hujus ossis internæ superficiei arctissime accrescit membrana, dura mater dicta; quæ & internum Periosteum cranii vocatur. Dura matri supponitur pia mater dicta, cui tamen adhuc tenerrima Arachnoidea incumbit. Per hanc piam matrem omnes arteriæ, quæ ad cerebrum tendunt, omnesque venæ, quæ inde redeunt, decurrunt, & in illa ordinantur. Pia matri immediate unitur cerebri ipsius substantia corticalis; unde medulla oritur: quæ collecta fornix instar cava relinquit, quæ cerebri ventriculi dicuntur: in quibus plexus, Choroides dicti, mira vasorum sanguineorum congerie constantes locantur.

(1) Winslow Exposit. Anatom. pag. 659.

Ad omnes has partes vulnera, capiti inflicta, pertingere possunt; semper eo periculosiora, quo causa vulnerans profundius adacta plures partes ex modo enumeratis læserit. Omnium ergo minime periculosa, cæteris paribus, erunt illa vulnera, quæ sola integumenta communia lædunt; licet tamen, uti postea patebit, aliquando pessima mala etiam ab his læsis oriri possint.

In omni ergo vulnere capitis sollicite prima deligatione inquirendum, quo usque penetraverit instrumentum vulnerans, & quas partes læserit; ut possint prælagiri mala, quæ metuenda sunt, & idonea his præcavendis auxilia applicari. Quibus signis jam cognoscatur, sola externa communia læsa esse, docet sequens paragraphus.

§. 240. **S**OLA externa læsa, scitur. 1. ex causa vulnerante, ejus figura lædente. 2. vi ejus parva. 3. loci vulnerati conditione, quoad figuram imprimis. 4. levitate symptomatum. 5. conspectu. 6. specillo.

1. Sic si cultro discissa fuerint integumenta, poterit satis magnum vulnus esse, nec tamen profunde penetrare: si vero punctim culter adactus fuerit, non poterit alicujus longitudinis vulnus esse, quin profunde penetraverit. Sic si acinace incurvo vulnus inflictum fuerit, non poterit illud in longitudinem aliquam excurrere, quin in medio satis profunde descendat; uti satis patet.

2. Satis evidens est, instrumentum vulnerans eo minus penetrare, quo minori, vi adigitur. Hoc autem cognoscitur ex vulnerati ipsius, vel aliorum, qui adfuerunt, relatione.

3. Calvaria utcumque ad sphæroideam figuram accedit: in illis ergo locis, ubi maxima convexitas habetur, non potest magnum vulnus esse, nisi satis profunde adactum fuerit instrumentum vulnerans; uti v. g. circa anteriorem & maxime prominentem ossis frontis partem, & circa mediam partem utriusque ossis bregmaris; longe minus adhuc in illo loco, ubi os frontis circa tempora cum osse sphæroidali concurrat: ibi enim eminens angularis superficies est. In aliis locis, ubi planam magis superficiem calvaria habet, poterit satis longum vulnus sine magna profunditate infligi.

4. Illæ depravationes functionum, quæ post vulnus inflictum sequuntur, vocantur vulneris symptomata: quo ergo hæc plura fuerint, & quo graviora, eo major metus erit, plures partes, illasque magis necessarias ad sanitatis integritatem, læsas esse. Cum autem in capite hæreat actionum animalium origo & fons, imprimis inquiritur, an in his aliquid mutatum fuerit post vulnus inflictum. Vertigo, tinnitus aurium, bilis vomitus, somnolentia, sensuum omnium, vel quorundam saltem, abolitio vel depravatio &c., mali hinc semper ominis. Si nullum horum apparuerit, vel tantum levissima fuerint & statim evanida, magna spes est, causam vulnerantem non adeo profunde penetrasse. Sollicite monuerat Hippocrates, præter illa, quæ oculis subjiciuntur, etiam hæc inquirenda esse. *Etenim magis aut minus vulnerati hæc sunt indicia: si ager alto sopore descensus fuerit, aut tenebra oculis offusa, aut si vertigo prehenderit, aut ipse considerit (a).* Fatendum tamen est, aliquando gravissima etiam capitis vulnera,

(a) Hippocrat. de capit. vulner. cap. 15. Charth. Tom XII. pag. 121.

in cerebri substantiam usque penetrantia, non statim stipata fuisse adeo malignis symptomatibus. In memorabili enim illo casu §. 187. memorato usque ad septimum diem satis bene se habuit vulneratus, licet cuspis ferreus sagittæ profunde in ipso cerebro hæreret, post quartum mensem inde feliciter eductus; subsequente integra sanatione adeo periculosi vulneris. Unde & Hippocrates, & post illum peritissimi Medici longe majus suspicabantur malum, si gravia symptomata, non in initio, sed post aliquot dies ab inflictio vulneris apparent. Sic monet Hippocrates: *Optimum quidem esse, illum, qui vulnus in capite habet, non febricitare, neque sanguinem ipsi erupisse, neque inflammationem, neque simul ullum aliquem dolorem accessisse: si vero quid horum apparuerit, securissimum est, ut in principio fiat, & pauco tempore permaneat &c.* At incipere febrem in capitis vulnere quarta aut septima die, aut undecima, valde lethale est (a). Unde & Jacotius in eruditissimis Commentariis in Coacas Prænotiones pro generali axioma posuit, quod illa, quæ in vulneribus mox à principio apparent, minus terrere debeant, quam quæ perseverant, vel postea superveniunt; sive febres sint, sive alia symptomata. Et ideo suspendere judicium jubet, licet gravissima symptomata apparuerint in initio, donec constet, an illa perseverent an non (b). Patet ergo, non posse absolutam Prognosim deduci ex symptomatum levitate vel vehementia, sed simul & alia signa requiri. Tuto quidem moneri potest, pessima quæque metuenda esse, si gravia symptomata statim adsint: non tamen penitus desperandum est, etiam in gravissimis malis; nec temere confidendum, licet in initio nihil fere mali appareat.

5. Capitis enim vulnera, si externa sola læsa fuerint, satis oculo patent: unde abrasis in loco vulnerato capillis, & abluto sanguine tepido vino cum æquali copia aquæ diluto, prima deligatione omni cura inquirendum est, quo usque vulnus penetraverit, & quas partes læserit; ut inde Prognosis & indicatio curatoria tuto deduci possent. Inter illa autem signa, quæ conspectui offeruntur, & quæ docent, an os læsum fuerit, an vero tantum communia integumenta, recenset & Hippocrates (c), quod debeat animadverti, an capilli telo præcisi & in vulnus impacti fuerint: hoc enim si appareat, tunc os noxam accepisse asserendum est. Dum enim instrumentum vulnerans, licet satis acutum fuerit, mollia tantum integumenta capitis penetrat, sequuntur capilli teli impressionem, nec discinduntur: ubi vero ad durum os capilli in vulnus protrusi applicantur, non amplius cedere possunt, sed discinduntur.

6. Leniter diductis vulneris labiis immittitur specillum, ex mollissimo plumbo vel argento purissimo, quod molle semper & flexile est, paratum, apice obtuso: suspensa manu leviter pertentando exploratur totus fundus vulneris. Si enim os alicubi nudatum fuerit, resonabit specillum; si nullibi aliquid scabri vel asperi appareat, omnia mollia sentiantur, & nullus audiatur sonus, certi sumus, calvariam nec nudatam, nec læsam esse in vulneris loco.

(a) Hippoc. Prorrhæc. Lib. II. cap. 15. Charter. Tom. VIII. pag. 818. 819.

(b) Hippoc. Coaca præsentia cum interpretatione & Commentariis Jacobi Hollerii & De-

fiderii Jacotii &c. pag. 904.

(c) De vulneribus capit. cap. 12. Charter. Tom. XII. pag. 120.

§. 241. **H**ÆC (§. 240.) licet levia videantur, sæpe ex propinquitate musculorum, tendinum, suturarum, periostei, cranii, nervorum, vasorum, cerebri, periculosa fiunt; tum quoque à vi contractili partis læsæ.

Licet jam omnibus rite exploratis constiterit, sola externa communia læsa esse; tamen non vilipendenda sunt hæc capitis vulnera, cum innumera observata docuerint, levissima etiam in hac parte vulnera pessimos produxisse effectus: neque hoc tantum, quando interiora capitis à valido ictu v. g. læsa erant, licet in externis partibus nihil fere mali appareret; sed etiam in illis casibus, ubi nulla internarum capitis partium læsa fuit, & vulnus sola externa communia penetrasset. Hæc autem mala fiunt

EX PROPINQUITATE MUSCULORUM, TENDINUM. Quanta sæpe ex læsione tendinum & musculorum oriantur mala, dictum fuit §. 163. sed validissimi calvariae insiguntur muscoli, imprimis circa occiput, ubi splenii, cucullares &c. hærent. Sed & magni temporales muscoli lata basi calvariae accrescunt. Involucrum tendineum forte totam calvariam tegit, uti dictum §. 239. Si ergo vulnus has partes læserit, quamvis os cranii minime denudetur, periosteo illaeso; læva tamen possunt sequi symptomata: *Quibus tempora secantur* (dixit Hippocrates): (a) *convulsio in opposita sectioni parte contingit*; & in Epidemicis loco §. 163. allegato, vulnus exiguum, nec alte penetrans, acuto jaculo circa cervicem inflictum, opisthotono correptum necavit sequenti die.

SUTURARUM. Per has efficitur, ut cranii ossa crescere & extendi possint, manente eadem figuræ capitis æquabilitate. In junioribus omnium manifestissimæ apparent, æque in externa convexa quam in interna concava ossium cranii parte: In ætate provectis in interiori parte non amplius dentatæ illæ ossium unitorum prominentiæ apparent, sed simplex linea, quæ in summo senio obliteratur sæpissime. Observatur jam in illis locis, ubi suturæ sunt, duram matrem firmissime adhærere, & vasis emissis uniri pericranio, quod etiam in futuris fortissime adhæreret: unde patet, mala, quæ circa suturas fiunt in externis cranii partibus, posse communicari internis continuitate substantiæ.

PERIOSTEI, CRANII. Quod vasa ad ossa cranii deferunt, & vicissim ex illis recipiunt, & per hæc necitur ossibus: unde vitalis influxus & effluxus humorum in ossa cranii, & imprimis in tabulam externam, ab integritate periostei pender. Hoc periosteo ergo affecto, malum communicabitur ossibus cranii facillime, & duræ matri, imprimis circa suturas, ubi emissis vasculis inter binas illas membranas manifesta communicatio obtinet; uti modo dictum est.

NERVORUM. Qui à quinto nervorum pari orti, & à dura portione paris septimi, numerosissimis & satis insignibus ramis per externas capitis partes distribuuntur. His ergo nervis punctis vel pro parte discissis, omnia illa metuenda sunt, quæ §. 163. memorantur. Imprimis si attendatur, satis tenso hic esse, dum per cranii integumenta decurrunt, nervos, & adeo vicinos suæ origini.

VASORUM. Arteriæ enim satis notabiles per externa hæc integumenta

(*) Coac. Prænot. n°. 498.

decurrunt, quatum læsione insignis aliquando post hæc vulnera. Hæmorrhagia sequitur.

CEREBRI. In quibusdam enim locis cranii os tam tenue est, ut in mundata calvaria pelluceat: hinc Integumentis discissis semper metus est, ne cerebrum tam vicinum afficiatur. Hoc autem imprimis fiet vel à nervis laxis, vel ob continuitatem periostei externi & duræ matris, vel quocunque vitio post vulnus externarum partium nato, quod calvariam ipsam inficere, & deinde ad contentum cranio cerebrum pertingere potest.

A VI CONTRACTILI PARTIS LÆSÆ. Commune phænomenon est in omni vulnere, uti dictum §. 158. n°. 1., quod partes firmæ, per vulnus divisæ, sensim magis, à se mutuo secedant: sed hoc semper fiet tanto magis, quanto validiori vi contractili partes gaudent. Cutis capitis densa & fortis est, æquabiliter circumtensa cranio, & mobilis admodum, hinc facillime cedens; cui supponitur membrana cellulosa: ideo, divisa per vulnus cute cranii, brevi magnus hiatus vulneris nascitur, unde magnæ cicatrices toties post vulnera fronti inflicta manent. Si jam nervi semidiscissi fuerint, & tanta vi secedant à se invicem vulneris labia; omnia symptomata, quæ nervum sic læsum sequuntur, erunt longe violentiora. Accedit, quod quo plus hiant hæc vulnera, eo major superficies suppositarum partium insolito aëris frigori exponitur; unde plurima iterum mala sequi possunt.

§. 242. MAXIME, si contusio simul adest.

Licet leve fuerit vulnus, si simul contusio adfuerit, multa mala metuenda sunt: ubi enim obtusum corpus, motum vel appressum partibus corporis, vasa plurima minora destruxerit, contusio adesse dicitur, quam ergo semper comitantur vasorum laceratio, humorumque ex laceris vasis effusio, eorundemque stagnatio & corruptio. Cum autem externis integumentis capitis durum calvariae os supponatur, nili instrumentum lædens acutum omnino fuerit, contusio semper aliqua aderit, & quidem magis in capite ob hanc causam, quam in aliis corporis partibus. Quia vero cutis capitis est densissima, panniculus autem adiposus succumbens tenerrimus & facillime dilatibilis, inferius autem durum os resistit, effusi humores, mora corrupti, facile viam invenient per panniculum adiposum non resistantem, & descendant gravitate sua; sicque poterunt ad posteriora capitis delapsi magnos illos occipitis ossi insertos musculos irritare, & pessima mala producere. Eodem modo & ad latera capitis ad temporales musculos, & in fronte ad oculos, & radicem nasi descendere, ibique eadem mala facere poterunt. Facillime autem per capitis membranam cellulosam delabi sic extravasata liquida certis observatis constat: Quoties enim non fuit visum, contusione in capitis vertice facta, sequenti die frontem & palpebras ipsas tumere & livescere, à sanguine extravasato huc declivi via delapso? Merito hinc damnavit Hippocrates vulnera capiti inflicta obtusis telis: *carnem enim contundunt, maturant, & lacerant. Et sub huiusmodi telis vulnera ad latera & in orbem aliquantulum cava & purulenta magis redduntur & humida, & longiori tempore repur-*

gantur. *Carnes enim contusas & laceras necesse est in pus versas tabescere* (a). Alterum, quod inde metuitur malum, est, si periosteum vel os ipsum contusum fuerit, vel à liquidis extravasatis male affectum; unde ossis corruptio, & reliqua, quæ inde sequuntur mala, expectanda sunt. Contusum enim os crani esse potest, licet naturaliter se videatur habere, & læsio per contusionem facta potuit plus minusve ossis substantiam penetrasse, licet varia magnitudo mali oculis dijudicari non possit, uti prudenter monuit Hippocrates (b). Unde patet, quam suspecta merito prudentibus Chirurgis habeantur capitis vulnera, si contusio simul adfuerit, cum sæpe longo temporis intervallo postea pessima sequantur mala; dum omnia salva esse credebantur. Inter plurima observata Medica quæ hoc docent, adfert ex *Pawio* tale Exemplum *Bohnius* (c). Quidam à compotatore in bregmatis os dextrum populo stanneo percussus fuit, nec aliquid fissi in osse fuit deprehensum: pancreaticæ valuit, & obambulavit, donec post decimum mensem inter ambulandum vertigine correptus conciderit, & brevi post obierit. Aperto cranio in ictus loco, os plane putridum foetidumque cum meningē apparuit.

§. 23. AUT, si sub parva apertura lata læsio sordes colligit.

Accidit sæpissime post lapsum ex altiori loco, vel aliam quamcumque læsionem obtuso instrumento factam, leve vulnusculum cuti capitis infligi, licet locus satis magnus contusione læsus fuerit. Vilipendunt plerumque hoc tanquam leve malum & vulnerati, & sæpe etiam minus periti Chirurgi; postea tamen pessima mala à tam levi vulnusculo oriri mirantur. Nec mirum, cum collecta materies, angusto nimis vulnusculo exire non potens, augeatur, & novas sibi vias per membranam cellulosam quærat; vel & mora corrupti humores subiectum pericranium, vicinos musculos &c. pessime afficiant.

Vocabar aliquot jam elapsis annis ad fabrum lignarium febre decumbentem; & quia nihil commune habebat morbus, cum Epidemico tunc grassante, nec sollicito examine ullam causam invenirem; symptomata tamen adessent plurima, quæ aliquid mali latere persuaderent, hærebam omnino. Dolor capitis aderat satis intensus, frons & palpebræ utriusque oculi tuebant & rubebant, tensionem in nucha se sentire conquerebatur æger, somnos admodum turbatos &c. Rogavi, an externa quadam causa caput læsum fuerat: negavit æger, licet iterato monerem, me simile quid suspicari. Famulus præsens bona fortunâ reminiscitur, ante occiduum regulam, sed ex parva altitudine, in caput decumbentis delapsam fuisse: rem sic se habere annuit æger, sed vix ullum dolorem se inde sensisse, nec aliquid mali postea percepisse affirmabat: unde ægre permittebat, ut locum illum capitis examinarem. Inveni vulnusculum, quod vix majoris aciculæ caput superabat, sed contusionem tam latam, ut ejus diameter pollicem æquaret. Jussi, ut ilico discinderentur integumenta loci affecti; & sequenti die febris jam remissior, & omnia symptomata longe leviora erant: benigna suppuratione depurabatur locus, & feliciter sine ullo graviore malo evasit.

(a) Hippoc. de cap. vulner. cap. 14. Charter. Tom. XII. pag. 121.

(b) Ibid. cap. 7. pag. 118.

(c) De Renunciat. vulner. Sect. II. cap. 1. pag. 136.

§. 244. **COLLECTA** enim materies (242. 243.) miros tumores, erysipelas, œdema, dolores, convulsiones, ossis & periostei putredines, febres, mortem, creat. Aër cava alluens, incaute appositu emplastrorum ibi coercitus, impressus, mira emphysemata facit.

MIROS TUMORES. Dum valida contusione, imprimis cute integra, vel parvo tantum in loco aperta, plurima vasa fraguntur, effusi humores collecti, cute integra coerciti, illa in immanem tumorem extendunt; & satis subito quidem: cranium enim subiectum cedere nequit, hinc omnis liquidi effusi moles cutim extrorsum distendit & elevat: Et hæc est ratio, quare in aliis corporis partibus à contusionibus raro tam magni tumores, nec adeo subito oriantur. Memini, quod in domo, quam habitabam, ancilla de scalis delapsa fronte pavimento lapideo summa vi impegerat; dum ipso momento accurro, ut succurrerem miseræ, jam tumor ovum gallinaceum æquans frontem occupabat. Notum est, ludentes pueros toties capite in dura obstacula impingentes, ilico habere tales tumores in capite. De mira illa intumescencia, ab elastico aëre in membranam cellulosa penetrante & ibi retento, statim dicitur.

ERYSIPELAS. De Erysipellate, ejusque differentia à phlegmone, postea dicitur in historia inflammationis §. 380. Sufficit hic notare, quod hoc nomine intelligatur inflammatio superficialis, & in ipsa tantum cute fere hærens (*si exquisitum fuerit Erysipelas, solius cutis est affectus* (a)) rubro flavescens coloris; in vasis minoribus, quam sunt vasa sanguinem rubrum vehentia, pro maxima parte locum habens: Nullibi frequentius occurrens, quam in capite & facie, & fere semper in capitis læsionibus aliquid maligni latere demonstrat. Unde *ab ossis denudatione Erysipelas* dixit Hippocrates (b); & Galenus in Commentariis suis in hunc locum, monet in fine hujus Aphorismi subintelligi debere *malum*: quia non semper ossibus denudatis Erysipelas supervenit, sed ubi his malis accedit Erysipelas, prævum semper symptomata est. Præterea constat plurimis locis Hippocratis, ossis (*ῥῆσις*) vocabulo frequentissime intelligi calvariam, uti inter alia loca plurima etiam demonstrat Aphorismus 24. Sectionis septimæ. Facile jam intelligitur, compressis cutis vasis ab effusis humoribus distendentibus, vel & irritatione ab acri degeneratione eorundem, posse nasci hic tale malum.

ŒDEMA. Generali significatione quemcumque tumorem designat; & imprimis tumores molles & frigidos, uti dictum fuit in Commentariis ad §. 112. Hic autem non intelligitur talis tumor frigidus & lentus, sed longe diversum mali genus. Frigidum enim talem tumorem distinctionis causa optime nunc vocant œdema œdematodes. Ubi vero talis tumor, pellucens quidem & albus, cum magno calore simul comitante, adest, tunc vocaverunt œdema Erysipelatodes. Illud malum adesse dicitur, quando vasa tam parva, ut nec flavos nec rubros humores admittant, sed pellucidos tantum, inflammantur: de quo postea §. 380. dicitur. Solent & vocare Erysipelas bullatum, quia partes, quas occupat, valido

(a) Galen. Method. Med. ad Glaucon. Lib. II. cap. 1. Charter. Tom. X. pag. 368. 369. (b) Aphorism. 12. Sect. VII. Charter. Tom. IX. pag. 301.

tumore distendit, & imprimis palpebras & totam faciem, si circa caput hæreat. Ab iisdem causis oritur in capitis vulneribus ac Erysipelas, & plerumque pro pejori symptomate habetur.

DOLORES. Quia materies collecta cutim distendens nervos distrahit, vel stagnando acrior facta pericranium, adeo sensile, vel & tendines & musculos vicinos male afficit.

CONVULSIONES ab iisdem causis hic fieri possunt; & præterea si ad interiora calvarie malum hoc tandem penetraverit.

OSSIS ET PERIOSTEI PUTREDINES &c. Sub membrana cellulosa hæret expansio illa tendinea, de qua dictum §. 239., sub hac pericranium, quod immediate calvarie incumbit, illique vasis emissis & receptis communicat. Dum ergo extravasatis humores sub cute tenaci capitis coerciti hærent; vitium hic natum facillime communicatur pericranio: sed illud ubi læsum fuerit, vitalis humorum influxus in os tollitur, unde illa pars cranii, quæ affecto pericranio supponitur, moritur, & postea separari debet, si sanabitur malum; vel putrefacta corrumpet subjectas meninges & ipsum cerebrum: unde pessima mala, febres, imo mors ipsa sæpe nec opinantes opprimunt: quale Exemplum memoratum fuit §. 242.

AER CAVA ALLUENS &c. Aër omnia undique alluit: ubi ergo vulnus capiti inflatum est, cutim penetrans ad membranam cellulosa usque; & imprimis si specillo sub labiis vulneris immisso multum scrutatus fuerit Chirurgus, an periosteum vel & ipsum cranium læsum fuerit; aër ingreditur membranam cellulosa: si tunc tenaci emplastro vulnus reatum fuerit perfectissime, aëris recepti egressus impeditur, qui tunc calore corporis rarefactus vias sibi facit per membranam cellulosa, & vicina loca tumere facit. Hoc viso plerumque adhuc curiosius scrutantur Chirurgi specillis, ut inquirant latens malum, aëremque iterum admittunt per dilatatam membranam: & emplastro iterum applicato augetur tumor, ulterius se dispergens, imprimis per frontem, palpebras & faciem; unde sequenti die aliquando mino spectaculo tota facies tumore pellucido elastico sic turget, ut oculi sepulti quasi & eminens nasus dispareant. Observatur enim, membranam cellulosa eo facilius distendi, quo tenerior est, & minus pinguedinis in se habet. Unde illa sub palpebris loca tam facile tument, & scroti & penis membrana cellulosa in hydropse Anasarca in tam enormem molem distenduntur; quia in his locis membrana cellulosa nihil crassæ pinguedinis, sed potius mucilaginosi quid in se continet; nisi in castratis animalibus, in quibus ingens copia pinguedinis hic colligitur. Tumores sic natos apto satis vocabulo Emphysemata vocant, sive inflationes, quas *Corraus* (a) definiit spiritus flatuosi collectiones in inanibus corporis locis. Similem hujus vocabuli significationem etiam Galenus (b) habet, dicens. *Inflationes (ιγεμνισματα) ex flatuoso spiritu collecto nascuntur, alias sub cute, alias sub membranis ossa tegentibus, aut musculos viscerumve aliquod investientibus. Porro colligitur aliquando non parum etiam in ventriculo & intestinis, itemque in medio spatio horum & peritonæi.* Postea, ut distinguat ab œdemate hos tumores, dicit, quod digitis pressi non retineant vestigium, sed sonitum, veluti tympanum reddant; sed hoc tantum verum est, quando in ma-

(a) Definir. Medic. pag. 197.

(b) Method. Medend. Lib. XIV. cap. 7.

jori corporis cavo collectum hæret, illud flatuosum, v. g. in abdomine; tunc enim illud percussum resonat instar tympani, unde & ille affectus tympanites Medicis dicitur. Ubi vero in membrana cellulosa hæret hoc malum, pressum digitis cedere potest, quia in vicinas hujus membranæ cellulas tunc protruditur illud elasticum flatulentum; in pristinum locum rediens, ubi pressio cessat. Quia autem palpebræ adeo facile tument ob laxissimam hinc & facillime dilatabilem cellulosam membranam, ideo apud Æginetam (a) definitur Emphysema, quod sit œdematodes palpebræ tumor. Tamen alibi eadem de Emphysemate ex Galeno dixit, quæ modo citata fuerunt (b).

Quam facile autem aer semel admissus in membranam cellulosam per omnia penetret, docent Ianiones; qui parvo vulnuscule cuti mactati animalis inflicto, aërem inflant, ut facilius cutim sine læsione subjectæ carnis auferant. Constitit etiam Medicis observationibus, aërem in panniculum adiposum ingressum posse omnia fere corporis loca pervadere, & tumores mirabiles in variis partibus & aliquando in omni fere externa corporis superficie producere. Puellæ quinque annorum circiter, lento morbo sensim tabefactæ, triduo ante mortem nascebatur in gena dextra tumor, qui sensim totum truncum corporis occupavit. Dum digitis premebatur tumor, subducebat se cum crepitu quodam contentus aer. Post mortem pertusa scalpello abdominis cute statim omnis tumor subsedit, cum fœtore intolerabili exhalante (c). Robusto juveni duo vulnera infliguntur, unum prope claviculam dextram, alterum posterius inflicto prope scapulam sinistram: tumor invasit non solum tantum faciem, sed & universum reliquum corpus, velut sponsia vento plena, quocumque tangebatur, palparentibus occurrebat (d). Simile exemplum apud eundem auctorem alibi habetur (e). Similes tumores videntur & posse nasci, dum humores extravasati putrescunt: tunc enim constat experimentis, per putredinem produci, vel extricari forte, latentem in corporibus materiam elasticam, quæ, si non sit aer, saltem similem vim habet, qua per calorem immaniter expandi possit. Sic cadavera submersorum, dum incipiunt putrescere, distento toto corpore externo, & imprimis abdomine, emergunt, aucto nempe volumine aqua jam specificè leviora facta. Cum autem collecta materies extravasata, sub cute tenaci hærens, sic degenerare possit; patet & hanc aliquando causam obrinere posse mirabilis hujus mali. Forte illud fuit factum in Exemplo modo recensito puellæ illius, quæ lento morbo extincta paucis ante mortem diebus totum corporis truncum adeo tumidum habuit.

Et Apud Hildanum (f) tale habetur exemplum, ubi post gravissima capitis vulnera defuncti cadaver biduo post vulnera inflicta retrum adeo spirabat odorem, ut nullus accedere fere auderet; & sequenti mane caput, facies, brachia, abdomen horrendum in modum, intumuerant, & scrotum pariter inflatum infantis caput magnitudine æquabat.

Ubi autem tale Emphysema adest, indicatio curatoria jubet, ut illud distendens Elasticum iterum expellatur ex tunica cellulosa, quam distendit. Hoc autem fieri poterit, moderata pressione, vel frictionibus, derivando inclusum aë-

(a) Lib. III. cap. 22. pag. 33. versâ.

(b) Liß. IV. cap. 28. pag. 66. versâ.

(c) Acad. des Sciences l'an 1704. Mem. pag. 9.

(d) Thom. Bartol. Histor. Anatom. rarior. Centur. V. Histor. 12.

(e) Centur. VI. Histor. 89.

(f) Observ. Chirurg. Centur. II. Observ. 25.

rem versus vulneris aperturam, etiam dilatatam, si opus est; vel scarificationibus, usque in membranam cellulosa penetrantibus, concilietur liber exitus. Pulchrum scarificationum successum in tali casu habet Paræus (a). Homini ense vulnus jugulo infligebatur, discindens asperam arteriam pro parte & unam ex venis jugularibus, unde ingens Hæmorrhagia & sibilus ob aërem per vulnus asperæ arteriæ elabentem: futura uniuntur vulneris labia, & remedia adstringentia applicata fuerunt. Paulo post aër se insinuans in tunicam cellulosa non tantum vicina vulneri loca, sed totum corpus miro tumore distendit. Facies sic inflata erat, ut nec oculorum nec nasi vestigium appareret. Dum miserrimo hoc statu ab omnibus pro derelicto haberetur, peritissimus Chirurgus audacter pluribus & quidem satis profundis scarificationibus cutim pertudit, ut via fieret aëri incluso; & adeo felix fuit successus, ut integram sanitatem recuperaverit ex ipsis orci faucibus ereptus vulneratus.

Longe tamen sæpius hæc Emphysemata pectoris vulnera comitantur, si in cavum thoracis penetraverint, quia aër per vulnus in pectoris cavum ingressus sæpe non potest facile exire per vulnus, vel nimis angustum, vel oclusum quacumque de causa, unde rarefactus calore vitalium viscerum viam quærit in membrana cellulosa. Si autem pulmo læsus aërem inspiratum dimiserit in pectoris cavum, facile patet, horrenda posse fieri Emphysemata, novo aëre singulis inspirationibus accedente.

§. 245. **S**I sola ergo integumenta læsa sine dictis (241. 242. 243. 244.) facilis sanatio per ligaturam idoneam, & curationem descriptam ab (185. ad 239.) licet sæpe appareant maxima: imprimis vero juvat recens esse, dum incipit curari, rite uniri, raro deligari, & citissime, atque defendi cum cura à nimium humidis, aut laxantibus, & oleosis, ipsoque aëre.

Ubi ergo constitit, sola integumenta communia læsa esse, nec ulla maligna symptomata adsunt, quæ metum faciant, ne in interioribus aliquid mali lateat, nihilque deprehendatur ex illis malis, quæ paragraphis hic citatis enumerata fuerunt, felix sanatio merito exspectari poterit; Ex hæctenus dictis satis quidem constitit, nunquam capitis vulnera vilipendenda esse, cum etiam talia, quæ levissima apparebant, pessimum aliquando habuerint eventum; tamen solis integumentis communibus læsis, maxima quamvis vulnera capitis fuerint, felicissime solent & satis cito sanari: vulneris enim magnitudo hic rarissime vel nunquam nocet; cum è contra minima vulnera, ob rationes §. 243. dictas, ingens sæpe periculum adferant, quod evitatur imprimis vulnus nimis angustum dilatando.

Quod in omnibus vulneribus obtinet, hoc præcipue in capitis vulneribus, quæ sola integumenta lædunt, locum habet; nempe eo felicius curari, quo recentiora fuerint & adhuc sanguinolenta: omnium enim optima dispositio est tunc in partibus divisis, ut ad se mutuo adductæ iterum concrecant; uti in Cura generali vulnerum dictum fuit. Omnia ergo illa, quæ ibi monita fuerunt, hic etiam convenient. Quædam tamen singularia in capitis vulneribus, licet sola externa læsa sint, observanda sunt.

(a) Lib. X. chap. 30 pag. 249.

Ligaturæ, quæ apparatus retinendo, vel partibus separatæ ad se mutuo adducendis inserviunt, debent esse tam moderatæ, ut leviter tantum firment partes: si enim validius adstrictæ fuerint, integumenta externa premuntur ad duram Calvariam undique hic suppositam, unde compressio vasorum, inflammatio, & reliqua inde sequentia mala oriuntur. Solent semper molli tantum ligatura uti Chirurghi periti in his casibus. Unio autem labiorum dehiscentium non adeo fit ob eandem rationem per splenia & fascias, sed facillime obtinetur per Emplastra tenacia, sive suturam dictam siccam; quia hæc vulnera solam fere tantum cutini dividunt, & subjecta membrana cellulosa tenuis cuti adhærens facile sequitur.

RARO DELIGARI ET CITISSIME. Peritissimi Chirurghi in similibus casibus vix aliquid agere videntur, dum summa prudentia evitant plurima symptomata, quæ, minus peritorum incuria orta, postea sæpe magno artis molimine tolli debent. Totum enim, quod hic requiritur, est ut recrecant & uniantur separata capitis integumenta. Sed hoc totum, uti jam sæpius in generali vulnerum cura dictum fuit, natura sibi soli sufficiens perficit; ars tantum impedimenta tollit, & addit adminicula. Ubi ergo omnia phænomena docent, recte procedere curam, quid juvabit sæpius detegere vulnus, & aëris insolito attractui exponere renascentia pulposa vascula? & vana illa depuratio vulnerum, quæ detergendo plumaceolis fit, destruet illud, quod renasci incipit. Sufficit ergo rarior denudatio vulnerum. Si enim aliquid mali lateat, vel puris major copia prudentem absterfionem requirat, calor & levis pruritus circa vulnus monebunt: olfactu detegi poterit facile, si aliquid putridi adsit; symptomatum autem malignitas aucta indicabit statim, si quid magis sinistri metuendum sit. *Cæsar Magatus*, qui raram deligationem vulnerum solidissimis argumentis & pulchro effectu utilissimam esse adeo evidenter demonstravit; dum de capitis vulneribus simplicibus sine ossis denudatione agit, unitis vulneris labiis, & abietina lacryma cum mastiche & sarcocolla applicatis, noluit intra quattriduum solvendum esse apparatus (illo enim tempore jam agglutinatio facta erit;) ubi vero ablata substantia, vel hiatus labiorum vulneris requirebat perdiri regenerationem, usque ad septimam diem solutionem vulneris differri voluit. (*) Quotidie quidem, imo & sæpius de die, poterit accedere Chirurgus, ut inquirat, an aliquis dolor, pruritus, major calor &c. percipiantur; poterit subolfacere, an aliquid putridi adsit; sed si nihil tale inveniatur, præstat relinquere apparatus. Si vero novus apparatus apponi debeat, fiat hoc citissime, & omnia applicanda jam præsto sint, antequam detegatur vulnus. In reliquis corporis partibus vulnera, quæ sola integumenta dividunt, sæpius nudata & deterfa, præter retardatæ curæ tardia, plerumque non adeo multum mali faciunt: sed in capite, ubi vitia integumentorum tam facile subjecto pericranio & ipsi calvarie communicantur, majus inde periculum nascitur: unde rara horum vulnerum deligatio non satis inculcari posse videtur. Ubi fractis ossibus una vulnus mollium partium incumbentium adest, restituto osse apparatus sæpe per septimanas relinquitur; felicissima tamen cura vulneris, fracturam comitantis, sequitur, licet nulla depuratio facta fuerit per artem.

DEFENDI CUM CURA ANIMIUM HUMIDIS &c. Tenerrima hic subjacet, & facillime dilatabilis, membrana cellulosa, naturaliter inter densam ca-

(*) *Cæsar Magati de rara medicat. Vulner. Lib. II. cap. 26. pag. 219. &c.*

pitis cutim & calvariam suppositam coercita : ubi ergo vulnere divisis integumentis humida & laxantia applicantur, membrana cellulosa his emollita luxuriabit, alienis liquidis implebitur, & degenerabit in fungosam molem, postea suppuratione iterum separandam, quæ, ubi valida & diuturna hic adest, fere semper subiectum Pericranium male afficit: Hinc communi consensu omnes periti Chirurghi horum usum in capitis vulneribus damnant, Hippocratem secuti, qui dixit : *Capitis vulnus nulla re madefaciendum, ac ne vino quidem, aut quam minimum: neque Cataplasmata &c. postulat.* (a) Et eodem in libro postea addit, (b) *malum est humidam in vulnere (capitis) carnem esse, & nimia uligine diffluentem (ὑγρὰ καὶ ὑδαρὴν) idque longo tempore repurgari.* Et postquam monuit, a telo concisas & contusas carnes in pus versas tabescere debere, dicit, quam celerrime vulnus ad suppurationem deducendum esse: ubi vero depuratum fuit, siccus debet evadere, sic enim citissime sanescet, & caro sicca & minime humida excrescet &c. Ubi ergo contusio vulnus comitans fomenta requirit, vinum adhibent semper Chirurghi, hodie ne à solis aquosis nimia laxitas oriatur. Ob eandem causam omnia pingua in vulneribus capitis curandis vitantur, quæ præter nimiam laxitatem, quam inducunt, etiam oleosa tenacitate minima vascula obstruunt & faciunt imperspirabilia. Observaverant in Italia (c) & imprimis apud Florentinos, capitis vulnera difficillime sanari, illudque latenti aëris qualitatæ adscribebatur: sed Autores plures animadverterunt, quod oleum rosaceum omphacinum vulnere applicent, & vicina loca etiam hoc oleo inungant. (d) Atque inde monuerunt vel nullos omnino, vel paucissimos tantum evadere, licet leviter tantum vulnerati fuissent. Unde & Severinus (e) olei funestum usum deplorat, qui Neapoli communis erat in capitis vulneribus; & dicit, quod levissimæ etiam plagæ male cederent præter opinionem, & ex centenis vix unus evaderet; cum Melitæi Medici tam felici successu Cœnelæo uterentur, ut ex centenis vulneratis vix periret unus: fracta nempe admixto vino oleosa tenacitate.

IPSOQUE AERE Non quod maligna quadam indole noceat semper, licet possit aër in nosocomiis, ubi plurimi in eodem loco decumbunt, putridis exhalationibus inquinatus, cuicumque etiam vulnere obesse; sed quia insolito frigore tenerrima vascula emori facit; vel & aliquando nimis humidus simul laxando & emolliendo nocere poterit. Unde rara vulneris detectio etiam ob hanc causam laudatur; & ubi vulnera capitis deligantur, aëris temperies sicca & calida imprimis commendatur, quod igne & aromatibus accensis, ut succino, mastiche, olibano &c. obtineri poterit. Videantur & de his illa, quæ dicta sunt in Commentariis ad §. 200.

§. 246. **S**I adsint vero descripta (241.) utendum remediis variis (185. ad 239.) pro varietate partis affectæ (241) & mali.

(a) Hippoc. de Capit. vulner. cap. XVII. Charter. Tom. XII. pag. 122.

(b) Capit. XXVI. ibid. pag. 125. 126.

(c) Lud. Dureti comment. in Coac. Hip- poc. pag. 429.

(d) Bonet. Anatom. prætic. Tom. III. pag. 341.

(e) M. Aurelii Severini trimemo. Chirurg. pag. 210.

Paragrapho 241. recenscebantur illæ partes, quarum vicinia periculum addebatur levibus cæteroquin apparentibus capitis vulneribus. Facile jam patet, circa curam malorum, quæ ex hac causa oriuntur; nihil universaliter posse determinari, sed prius debere cognosci partem vulnere vicinam; & deinde, quænam læsio huic parti per vulnus facta fuerit, vel futura metuatur, antequam aliquid certi statui possit in curandis vel præcavendis illis malis. Aliud enim requiritur auxilium, ubi vasa sanguinea arteriosa, satis insignia sæpe, una cum integumentis capitis communibus discissa sunt, quam si tendinis læsio funesta symptomata fecerit: sed de illis, quæ observari debent in vulnere pro læsarum partium diversitate, dictum fuit in generali cura vulnerrum a §. 185. ad 239. usque.

§. 247. **C**ONTUSA hic (241.) rite digerenda his, quæ dissipare possint, vel suppurare, modo eligantur semper ea, quæ bona nervis membranisque (204. 207. 245.) aut excindenda sunt.

Contusio supponit multa vasa fracta esse, & humores effusos; qui tunc in membrana cellulosa collecti viros sæpe tumores faciunt: & nisi instrumentum vulnerans valde acutum fuerit, fere semper aliqua contusio vulnera capitis comitatur. Requiritur jam, ut humores effusi educantur, vel disponantur sic, ut resorberi iterum possint; & vasis fractis reddatur pristina integritas. Si autem contusio levis fuerit, & liquida effusa adhuc meabilia sint, tunc tutissimum est, ut dissipentur; quod pulcherrime fiet, si foveatur locus talibus remediis; quæ concreta liquida diluere & resolvere possunt, & simul omni putredini resistunt, nec interim nimis emolliunt. Urina hominis sani, addito pauculo sale marino vel ammoniaco, & vino, pulcherrimum hic remedium exhibet, quo toties felicissime dissipantur tumores à capitis contusionibus in pueris orti. Talia etiam ex ruta, scordio, & similibus parantur fomenta, quæ vi antiseptica singulari omnem putredinem arcent, & simul potentissime resolvunt concreta. Neque tantum leviores contusiones hæc sanare possunt, sed etiam satis magni tumores sic feliciter dissipantur, quibus incisio sola opem ferre posse crederetur. Mulier à curru decedens frontem humo gelu indurata sic impegerat, ut ingens statim ibidem elevaretur tumor. Chirurgus, mulierem aliquoties vomuisse intelligens, cranium impressum esse credidit, jamque cruciali incisione locum aperire volebat. Celeberrimus Ruyschius in consilium vocatus noluit incisionem fieri, sed fomentum ex optimis Cephalicis dictis herbis, vino incoctis, pannis laneis exceptum, calide applicuit, felici adeo successu, ut intra triduum tumor jam evanescere inceperit, & brevi sine ullo malo symptomate dissipatus fuerit. Additque, se sæpissime profuisse illis, quorum capitibus jam scalpellum incisivum imminerebat (4)

Ubi vero frustra per fomenta talia dissipatio contusorum tentata fuit, vel magnitudo mali nullam benignæ talis resolutionis spem relinquit, tunc suppuratione blanda facta separatio illius, quod corruptum erat, sola superest. Hoc autem vocant digerere Chirurghi, quando irresolubilem materiam in bonum pus convertunt; & digerentia remedia dixerunt illa, quæ humores effusos vel immeabiles, ad con-

(4) Fred. Ruysch. observat. Anatom. Chir. Centur. obs. 60.

ditionem boni puris deducunt; de quibus dictum fuit in Commentario ad §. 207. Sed in capitis vulneribus semper simul attenditur, ne adhibeantur talia, quæ nimia emollitione nocere possent; hinc à cataplasmatibus abstinendum, quia nimis humectant: sed sumitur terebinthina purissima, vel aliud simile nativum Balsamum, vitello ovi addito frangitur nocitura hic oleosa tenacitas; additur deinde aliquid unguenti basilici, aurei, vel similis; inspergitur deinde aloës, myrrhæ, olibani &c. tenuissimus pulvis: sic habetur digestivum remedium, in quo simul ista sunt, quæ omni putredini efficacissime resistunt; & nervis & membranis nervosis tendinosive amica semper observantur: hoc plumaceolo exceptum loco affecto applicatur; deinde imponitur Emplastrum aromaticum, quod partes fovet, & levi stimulo majorem parum motum excitat suppurationi promovendæ semper utilem. Omnibus dein his circumponuntur lanei panni, fomento penetrabili dissolvente, & simul omni putredini resistente, madidi, curando ut quam calidissime ferri possit applicetur, neque subito refrigescat. Horum omnium formulæ in materia Medica habentur, quæ pro varia vulnerati temperie, & diversa anni tempestate iterum mutari possent.

Ubi autem effusis humoribus infarcta membrana cellulosa in magnum tumorem distenditur, sæpe suffocatio hic nascitur, & fere gangrænosa facta hæc membrana una cum infarctis humoribus separatur: hæc tunc tuto excindi potest. Videmus enim etiam in aliis corporis locis miro modo tumere posse membranam cellulosam: v. g. in dorso manus vix ulla adest pinguedo, sed tendines musculorum in tenui membrana cellulosa hærent: tamen orta hic inflammatione sæpe tumor, binos pollices crassitudine æquans, hic observatur, & totum hoc in membrana illa tenui cellulosa hæret: fit tunc suffocatio, & apperto loco magnæ portiones gangrænosæ illius membranæ exeunt, quæ tuto excinduntur. Idem etiam in capitis læsionibus potest contingere, & similiter membrana hæc una cum extravasatis humoribus corrupta secedit. Non autem hic intelligitur, quod contusa, quæ resolvi non possent, crudeli cura excindenda forent una cum cute tegente; noceret enim summopere tam latam plagam pericranii integumentis suis nudare, quæ non facile recrescerent, sed semper debilior, & externis injuriis facilius afficiendus, locus relinqueretur, non sine magno incommodo. Unde sedulo monuit Galenus (*) cutim in omni ulcere & vulnere semper conservandam esse, quantum fieri potest: *Nuda enim caro, si sine cute relinquatur, agre ad cicatricem perducitur.* Hujus rei triste Exemplum vidi. Homini sano mediæ ætatis lata verruca circa frontis lateralem inferiorem partem prope tempora hærebat; cum frustra tentata fuisset variis remediis, peritissimus cæteroquin Chirurgus una cum cute totam verrucam excidit, nec potuit unquam ullis remediis ad cicatricem deduci locus ille cute orbarus; sed sensim undique retracta plus cute nudabantur supposita, malignum & depascens vicina nascebatur ulcus; unde misere periit. Nec mirum, cum solum pericranium nudo ossi incumbens non videatur sufficere ut tantum perditæ substantiæ regeneret. Unde tantum hic agitur de membrana cellulosa infarcta & corrupta, quæ tuto tunc abscindi potest.

(*) Comment. 3. in Hippocr. de fracturis Charter. Tom. XII. pag. 254.

§. 248. **S**I adfit malum (244.) dilatare cultro , & depurare opus
(238. 207. 208.)

Tota enim malignitas talis vulneris in eo consistit , quod effusi humores , densa capitis cute coerciti , nec potentes exire per angustum nimis vulneris orificium , viam sibi quærant per tunicam cellulosa ; vel mora corrupti pericranium , & ipsum cranii os , male afficiant. Dilatato ergo vulnere exitus patebit extravasatis humoribus , & idoneis remediis poterit depurari locus. Cognoscitur tale malum adesse si angusta vulneris sit apertura , & integumenta vicina vacillent , si digito tangerentur , & tumeant , & si febris prehenderit vulneratum , cujus nulla alia causa invenitur.

Nec ullum periculum hic est , ne lædantur tendinosæ expansiones , nam omnis ille tumor in tunica cellulosa hæret , quæ tuto una cum cute discinditur : & innumera observata docuerunt , tuto non solam cutim sed & omnia integumenta ad os usque discindi posse , ubi hoc requiritur.

Hippocrates , dum recenset capitis vulnera , quæ sectionem postulant , enumerat & illa , *quæ non satis idoneam habent longitudinem & latitudinem , quæ perspicui possit , numquid os à telo mane affectum fuerit &c. & ubi vulnera obliquam quandam cavitatem habent , cavum illud late incidere oportet &c. & ubi vulnera orbiculata & admodum cava fuerint , ejusmodi quoque incidere oportet , ut circulari plaga in longum bifariam divisa vulnus longum efficiatur. (a)*

Quantum autem levamen symptomatum fiat , dum in tali casu sectio in tempore instituitur , constitit Exemplo §. 243. memorato. Postquam autem dilatatum vulnus est , tunc illa digerentia , quæ paragrapho præcedenti laudata fuerunt , applicari poterunt ; & de vulnere depuratione , §. 207. 208. dictum fuit. Sola autem dilatio vulneris , quæ cultro fit , hic bona est illa enim quæ spongiis , vel similibus siccis corporibus , absorptu humorum tumentibus , perficitur , (vide §. 238.) noceret plerumque , quia per aliquot horas obturatur his sic vulneris orificium , ut nihil exire possit : unde sæpe emphysema , & alii tumores nascerentur. Præterea contusio & inflammatio major in vulneris labiis sunt : quæ postea diutius protractam suppurationem requirent , antequam consolidari iterum poterunt.

§. 249. **P**ERICRANIO læso , ut nudet diu os , vel ut putrefiat , os privatur vasis periostei , adeoque & suis , stagnat in his liquor , putrefactus squamam separat , unde os flavum , fulcum , nigrum , tandem foliolum deponit.

Postquam actum fuit de vulneribus capitis , quæ sola integumenta communia lædunt , sequitur , ut examinentur illa mala , quæ fiunt ideo , quia Pericranium læsum est. Uti ossa reliqua in toto corpore peculiari membrana teguntur , quæ satis arcte adhæret , sic & cranii os tale involucri habet , quod Pericranium vocatur. Demonstravit injectionibus Anatomicis Ruyschius , (b) innumera vasa

(a) Hippocrat. de vulner. capit. cap. 18. | (b) Thesaur. Anatom. N°. 3.
Charter. Tom. XII. pag. 123.

per hanc membranam dispergi, quæ ramis emissis subjecto ossi inseruntur, illique ad vitam & nutrimentum necessarios humores præbent. Per hæc vasa emissæ arcata fit cohæsiō Pericranii cum cranio: unde & hæc membrana avulsa ab osse subjecto, in vivo animali, puncta plurima rubra in osse apparent. Non poterit ergo Pericranium lædi, quin destruat magnus horum vasorum, ad os tendentium, numerus. Sed extrema abrupta vasorum, in ossis detecti superficie externa, poterunt retexere iterum similem membranam in illo loco, ubi os Pericranio suo nudatum fuit; communi lege, qua omnia deperdita vel separata in vulneribus recreſcunt, ut ante dictum fuit §. 158. N^o. 10. & §. 190. & 191. Ubi vero diu nudatum fuerit os, & imprimis si aer libere accesserit, tenerrima illa vasorum extrema destruuntur, & fiunt penitus inepta, ut retexant similem perditæ membranæ fabricam. Extrema ergo illa ossis superficies, vitali influxu liquidorum orbatæ, moritur, nec unquam poterit recreſcere cum partibus vivis: unde natura tunc molitur per vasa viva supposita mortui & corrupti separationem à supposita parte vitali & sana, & squamulam illam mortuam protrudit; qua separata, recreſcit ex osse ipso, & vicina membrana adhuc integra, novum Pericranium. Signum autem ossis sic affecti est mutatio coloris, qui in ossibus sanis subrubescens leviter, vel & in multis locis ex albo subcæruleſcens habetur. Oritur tunc in loco affecto color flavus, sensim obscurior factus, & in fuscum degenerans, tandem nigrescens, & ultimo corrupti ossis squamula separatur. Quo jam ossis color a naturali magis vergit in nigredinem, eo plus in corruptionem tendit; uti evidenter patet in dentibus: illi enim à quacumque causa male affecti incipiunt subcæruleſcentem, margaritarum fere æmulum colorem, perdere, & sæpe primo pallent, dein flavelcunt leviter, sensim magis fusci fiunt, tandem nigrescentes frustillatim decidunt. Constat jam accuratissimis observatis, ossa cranium constituentia in fœtu olim fuisse membranas cartilagineas, in quarum medio ossis primum rudimentum inchoatur, radiis osseis ab hoc centro per omnem ambitum diffusis: sicque primo interna tabula ossea cranii, vitrea dicta, producitur. Deinde radii illi ossei, sive fila illius reticuli, ab exteriori parte sensim lateſcunt, & erigunt bracteolas, inter se diversas magnitudine, figura, positu, ex quibus diploë cranii exoritur. Vertices dein harum bracteolarum quibus diploë constat, quasi retunduntur, hæc deinde lateſcunt, alique super alios squamularum instar inclinati confluunt in unius lamellæ inequabilis speciem, quæ tabulam cranii anteriorem constituit. Utraque dein tabula crassior fit & solidior: nam & intumescunt radii illi ossei & bracteolæ, & novæ crustæ accedunt. Ex hac ossium cranii genesi, non ex hypothesi sed ad ipsam naturam descripta à Celeberrimo Albino (a) (quem in Anatomicis præceptorem habuisse magnam felicitatem ducō; & gratus semper recordabor) patet lamellatam fabricam esse ossium bregmatis, occipitis, frontis, temporum, quæ imprimis à vulneribus capiti inflictis lædi possunt; unde vitium à Pericranio læso superioribus lamellis ossis succumbentis communicari poterit, & plus minusve suppositis lamellis nocere. Et admodum verosimile videtur, inter singulas lamellas vasa decurrere, saltem in illa ætate, quando nondum adeo magnam soliditatem acquisiverunt ossa; forte postea procedente ætate, uti alia plurima in corpore vascula, sensim obliterantur. Confir-

(a) Bernard. Siegfried. Albini &c. Icones Ossium fœtus &c. pag. 6. & 7.

mant hanc rem observata quædam, ubi partes os constituentes, per morbum omni dimensione auctæ, exhibuerunt pulposam talem & mollem vascularem fabricam. Infantis enim trium quatuorve annorum ossa cranii fere ubique habebant septem vel octo linearum crassitiem; mollia erant, & pressis exsudabat sanguis & lymphæ satis magna copia: simul & vasa sanguinea admodum conspicua apparebant. (a) Hanc rem pariter videtur agnovisse Hippocrates dicens: *ac totum capitis os, excepta parte infima atque suprema admodum exigua, spongia simile est. Et habet os in se multas carnes humidas similes, quas si quis digitis conterat, ex ipsis sanguis prodit. Insunt quoque in osse venulae tennes cava sanguine plena.* (b) Lamellæ ergo, omni vitali influxu humorum privata, separabuntur vi vasorum inter lamellas medias decurrentium; saltem si hæc jam arctius ad se compressis lamellis ossibus oblitterata fuerint, illa vasa, quæ ex molli illa spongiosa parte, inter binas cranii tabulas media, quam diploën vocant, in os tendunt, hoc facere poterunt. Inde forte senibus difficilius separantur ossæ lamellæ corruptæ, & simul utilitas methodi §. 252. describendæ deduci poterit.

Licet ergo, osse Pericranio suo nudato, si simul insignis mutatio coloris apparuerit, expectanda sit separatio lamellarum corruptarum per exfoliationem Chirurgis dictam, tamen rarus casus docuit, aliquando & sine hac, (rarissime forsitan) curam absolvi. *Vir ab equo in capite percussus, in terram tanquam mortuus cecidit, cum tanta alterius ossis syncipitis denudatione, ut Imperialis regendo vix sufficeret. Hæc ossis denudatio in totum nigricabat, circulo excepto, qui cuti proximus straminis latitudinem obfidebat. Hoc circulo albo de die in diem diminuto, pateriens corvaluit, sine ulla visibili ossis separatione, aut raspatorii usu &c.* (c): Forte minima pars superficiæ ossis affecta non forma squamulæ, sed minutissimis particulis separata, sensim cum pure abcessit.

§. 250. **C**UJUS causa (149.) interrupta vasorum continuïtas, frigorisve aëris constringens, & exsiccans fines vasculorum in osse, falso accusata ejus malignitate.

In generali vulnerum historia dictum fuit §. 149. lædi per vulnus omnes illas actiones, quæ pendent à partium, nunc per vulnus separatarum, integritate, & à determinato fluxu liquidorum per vasa. Sed Pericranii usus erat vasa ad os deferre, & redeuntia ab osse accipere; quod imprimis in Periosteio fœtus artificiosa impletione vasorum apparet. In hac enim ætate numerosiora longe vasa in hac membrana inveniuntur, cum plurima procedente ætate occalescant & deleantur. (d) Destructo ergo Pericranio tolletur vasorum continuïtas, unde vita & nutritio partium pendent: morietur ergo illa ossis pars, quæ sic omni vitali influxu humorum privatur, & separabitur a partibus vivis suppositis.

Quia autem Chirurgi semper observabant, ossis superficiem, pericranio suo nudatam, non posse diu exponi aëri, quin ossis corruptio & exfoliatio sequeretur

(a) Academie des Sciences l'an 1734. Hist. pag. 60.

(b) Hippocr. de Capit. vulner. cap. 2. Char. ter. Tom. XII. pag. 116.

(c) Fred. Ruysch. Observat. Anaton. Chirurg. Centur. Observ. V.

(d) Bernard. Siegfried Albin. &c. Icones ossum fœtus &c. pag. 160. fig. 161.

cum è contra os, quamvis Pericranio nudum, si ab aëre statim defensum foret, sæpissime sanetur sine ulla separatione; crediderunt in aëre aliquid hæere maligni, quod ossa corrumperet. Verum quidem est, in aëre posse hæere plurima, quæ non tantum ossibus detectis, sed & omnibus vulneribus nocent; uti, dum in Nosocomiis plurimi in eodem loco decumbunt, tuncque putridis exhalationibus inquinatus aër difficilem curam vulnerum reddere observatur. Sed hæc sunt ab aëre proprie dicendo distincta, licet in aëre hæreant. Videtur autem aër libere ossa nuda alluens insolito frigore, & illa proprietate, qua humida attrahendo corpora exsiccet, abrupta extrema vasorum in superficie ossis sic exsiccare & constringere, ut humoribus transmittendis omnino reddantur impervia; unde reliqua omnia mala sponte sequuntur, uti dictum præcedenti paragrapho. Unde Hippocrates nullam aëris malignitatem inculavit, sed dixit simpliciter: *Frigidum inimicum ossibus, dentibus, nervis &c.* (a)

§. 251. EFFECTUS vero, augmentum malorum (149.)

Dum superior squamula ossis, vasis suis privata, corrumpitur, vitium hoc succumbenti immediate ossis parti facile communicatur; sicque per totam ossis cranii crassitiem pergere poterit ad diploën usque, illamque corrumpere; quod malum dein internam cranii tabulam, vitream dictam, afficere poterit, vel inter binas osseas tabulas cranii proserpens in diploë pessima mala facere.

§. 252. CURATIO fit. 1. os leviter parva terebra diversis; vicinisque locis, usque ad medium perforando, unde exfoliatio cavetur, periosteum inde renascitur. 2. Inde arcendopus, saniem, pinguia, aquea, aërem, applicatis plumaceolis sp. vin. Mastichino imbutis. 3. raro, & citissime deligando.

1. Ubi signa docuerunt, cranii os pericranio suo nudatum, aërisque libero accessu sic mutatum fuisse in sua superficie, ut omnis vitalis motus humorum in parte sic affecta suffocatus fuerit, necessario illud mortuum separari debet à partibus vivis, quibus cohæret, antequam tale vulnus curari possit. Sed totum hoc separationis opus per vasa viva, mortuæ parti supposita, perfici debet, quæ motu suo & continua quasi arietatione partem ossis mortuam separant & expellunt. Pulchre hoc notavit Hippocrates (b) dicens: *In capitis vero vulnere os, quod ab alio quovis osse abscessurum est, sive teli vestigium in osse relictum sit, sive alioquin os plurimum nudatum sit, plerumque abscedit, ubi exsanguie redditum fuerit, (ἀποστρέφεται τὸ πρὸς τὸν ἰσχυρὸν ἐξαιμαίνεται)* & postea addit: *ideo ab alio osse vitam & sanguinem habente potissimum solvitur, & exsanguie & siccum factum à vitam & sanguinem habente valde abscedit.* Sed si hoc opus naturæ permittatur, lente admodum procedit, & quadraginta dierum imo & aliquando longiori temporis spatio, solet perfici. Tot

(a) Aphorism. 18. Sect. V. Charter. Tom. IX. pag. 204.

(b) De Capitis Vulnere. cap. 17. Charter. Tom. XII. pag. 126.

enim diebus observantur margines foraminis, per trepanum excisso osse contusi, separari. (vide §. 294.) Sed hoc temporis intervallo plurima possunt accidere mala tali vulnere, & vitium ossis potest subjectis lamellis communicari, sicque augeri malum. Imprimis in Nosocomiis publicis decumbentes pessime plerumque solent affici, si diu cogantur ibi manere; uti Chirurgi fere omnes, qui Nosocomiis præfuerunt, testantur; omniumque maxime funestum hoc observatum fuit illis, qui capitis vulneribus decumbebant. Unde pulchrum illud erit in arte inventum, quo poterit separatio corrupti ossis à sano accelerari. Tentaverunt hoc scalpris radendo, cauteriis urendo &c. sed sic semper abrasa vel usta superficies iterum separari debet. Tota separatio mortui, uti dictum fuit, pender ab actione vivæ partis suppositæ; omne ergo illud, quod viam faciet vivis vasis subjectis, ut emergere possint sub hoc tegmine corruptæ partis, accelerabit hanc separationem. Optima ergo methodus hæc est; ut leviter & parva terebra os nudatum perforetur minutis, & satis sibi vicinis foraminulis ad diploën usque, ubi certi sumus vasa viva copiosa & satis magna hæere. Hoc fecerunt vel pyramidali apice trepani perforativi dicti; vel & pulcherrimo cum successu factum vidi, dum acus vulgaris apex in parvum cuneolum formabatur, qui apto manubrio firmatus digitis rotando circumactis rotundum foraminulum in osse sic facit. Dumque hoc plurimis in locis satis vicinis fit, vasa viva supposita, incumbente tegmine libera, emergunt per hæc spiracula, retexunt novum periosteum, & sæpe feliciter sine ulla desquamatione sanatur tale vulnus. Præterea vasa, inter lamellas ossis media per easdem aperturas emergere possunt elongata, & separare sic ossis squamulam corruptam incumbentem. Pulcherrimi successus probaverunt hujus methodi utilitatem; & peritissimus Chirurgus, *Belloste*, cui hoc inventum debetur, vel qui saltem primus accurate descripsit, testatur, se plurimis in casibus felicissimas sic perfecisse curas, & in pulcherrimo, quem scripsit, tractatu, bina recenset exempla, quæ in Nosocomio publico coram plurimis testibus hanc rem confirmaverant.

Militi globus tormento majori bellico explosus abstulerat integumenta capitis communia, osse illæso, sed pericranio sic contuso, ut penitus livesceret. Unguibus laceravit pericranium, & os subjectum nudavit, dein subitissime os leviter sic terebravit pluribus locis. Post biduum soluto apparatu os subrubescens apparebat; & post aliud biduum plus quam dimidia pars ossis nudati, renato novo Pericranio, tecta apparebat; & post septimum diem tota ossis superficies jam erat tecta omnino, totumque vulnus octodecim dierum spatio consolidatum fuit. Alteri militi, cæsim inflicto vulnere ossi bregmatis sinistro, cranium satis amplo in loco nudatum erat: octo vel decem parvis foraminulis secunda vulneris deligatione pertunditur os nudum, sic tamen ut non penetrarent ad diploën usque, reliqua siebant omnia eadem ut in priori casu. Post biduum detecto vulnere os jam incipiebat subrubescere, & per foraminula facta apparebat jam aliquid exsurgere: post octiduum jam os rectum apparebat nova membrana, & tota tam ampli vulneris curatio septemdecim diebus absolvebatur (a).

Ex his binis casibus utilitas hujus methodi satis evidenter. apparet, & patet, tantum requiri huc, ut per artem via concilietur libera vasis vitalibus supposi-

(a) Le Chirurgien d'Hôpital &c. par Mr. Belloste pag 75—79.

tis, ut emergere possint. Ultimo autem exemplo constitit, non semper requiri, ut ad diploën usque os perforetur, sed, levi tantum apertura facta, vasa inter ossis lamellas media sufficere aliquando posse, ut regenerent pericranium perditum; cum moneat in loco citato peritissimus ille Chirurgus, quod de industria hoc tentaverit, ut certus esset, an levis talis ossis terebratio ad hunc scopum sufficere posset. Ubi vero mutatus ossis nudati color in flavum, vel magis fuscum, docet, corruptionem ossis profundius penetrasse, perterebratio ossis ad diploën usque necessaria erit, ut vasorum satis magnorum hic hærentium vi fiat separatio corrupti ossis, & regeneratio novi Pericranii.

An non videtur probabile, quod jam apud Hippocratem pulcherrimæ hujus methodi vestigium reperiatur? dum dicit: (a) *Verum oportet, ubi os carne nudatum fuit, attenta mente conari distinguere, si non possit oculis videri & cognosci, num os fissum sit & collisum, an collisum tantum; vel num ad teli vestigium accesserit collisio vel rima, vel utrumque. Ac si quid horum senserit os, exigua terebra osse perforato sanguis detrahendus est, subinde adhibita cautione, quod os juniorum tenuius sit &c.* Certe simul ac ad diploën usque penetraverit terebra, sanguis erumpet, uti notum est: & videtur satis patere; quod in hoc loco non agatur de osse excindendo per trepanum, sed de levi tantum perterebratione parvo trepano facta, donec sanguis exeat, id est, donec ad diploën penetraverit.

2. Observata omnium Chirurgorum, qui de vulneribus capitis curandis scripserunt, in hoc conveniunt, quod omnia pingua, omnia aquosa humectantia noceant vulneribus capitis, uti dictum fuit §. 245.

Longe magis ergo ab his cavendum, ubi os nudatum fuerit, & tenerrima vasa per hæc foraminula facta incipiunt pullulare; aquosa enim tabescere facerent adeo pulposa hæc vascula, oleosa obstruerent eadem & redderent impervia. Imo ipsum pus, ex integumentis vulneratis natum, si nimis copiosum alueret, vel diutius retentum & attenuatum acrius fieret, lædere posset tenerrimam hanc renascentium vasculorum compagem; unde prudentissime detergi debet, mollissimis linteis carptis, ne lædantur hæc tenerrima vascula. Aerem pariter arcendum esse, ne frigore insolito vel exsiccatione destruat eadem hæc vascula, ex antedictis satis patet. *Belloste* in loco citato plumaceolum ex linteo carpto spiritu vini madidum applicabat ossi nudato; deinde huic imponebat leve digestivum, quod sic os non tangebatur, sed labiis vulneris integumentorum proderat. Sic aer arcebat, omnis putredo præcavebatur, & roborante vi spiritus vini impediabatur ne in fungosam excrescentiam degenerarent pulposa hæc & tenerrima vascula. Optimo cum successu mastiches, olibani, sarcocollæ, myrrhæ, collophoniæ & similium tenerrimum pollinem ossibus nudatis inspergi constat, quæ crusta balsamica tegunt, nec tamen pinguedine nocent; interim pulcherrime defendunt ab aëre & omnibus liquidis in vulnus effusis partes suppositas. Eodem cum fructu horum pulvis in spiritu vini debiliore coctus (alcohol enim combureret ilico hæc vascula) plumaceolis excipitur, & ossi nudo applicatur.

3. Nihil enim hic magis metuitur, quam liber aëris accessus, qui frigore & exsiccatione omnibus vulneribus, sed imprimis capitis, nocet. Unde rara deli-

(a) Hippocr. de Capitis vulner. cap. 30. Charter. Tom. XII. pag. 127.

gatio adeo commendatur in his casibus. *Belloste* in exemplis modo citatis primum apparatus per biduum relinquebat, & postea tantum singulis tribus diebus renovabat. Si ergo nullus pruritus, nec major calor circa vulnus sentiantur, nullus adsit fœtor, nihil sanioli exeat, tuto sine deligatione relinquitur tale vulnus. Ubi vero novus apparatus applicari debet, fiat hoc citissime: mollissimis plumaceolis lenissime appressis imbibatur pus, mox applicentur eadem, & tegatur vulnus: curiosa enim & diuturna talis vulneris inspectio, & imprudens deterfio rudius facta, destruent mucum illum hic hærentem, qui nil nisi vasculorum renascentium compages est. Pulcherrime prodest, si, antequam detegeretur vulnus, utrimque ponatur testula vivam prunam accensam continens, cui succini, mastiches, olibani vel similibus suffumigiorum pauculum inspergitur; sic tepida atmosphæra, gratissimo roborante aromatico fumo dives, undique detectum vulnus alluet.

§. 253. **Q**UA arte ex punctis fodicatis (252.) & undique, emergit nova substantia quasi carnea cito, tumque reliqua (249.) sanantur, ut dictum, (245. 246. 247. 248.)

Qua significatione ex punctis terebratis enascens substantia caro dicatur, explicatum fuit §. 158. N^o. 9. *Belloste* (a) qui tam nitide omnia descripsit, quæ ad hanc methodum pertinent, apta satis phrasi dicit, foramina ossis post secundum diem incipere germinare (*germer*). Incipit enim ex his foraminulis elevari sensim mucus quasi, qui microscopio lustratus tenerrima vascula exhibet; imo & arteriolarum motum in hoc muco distinguere licet. Vasculosa compages per hæc foraminula emergens, simili substantiæ ex vicinis foraminulis ascendenti occurrens, retexit perditam membranam, & quidem tam cito, ut septem dierum spatio cranii partem nudatam, quæ floreni circiter amplitudinem æquaret, tectam iterum observaverit *Belloste* in exemplis præcedenti paragrapho citatis.

Quatuordecim jam elapsi sunt anni, cum in raro satis casu occasionem habui accurate examinandi pulpam illam vasculosam per facta sic in osse foramina emergentem. Homini quinquagenario, in febre acuta continua, metastasi subita unius noctis spatio siderabatur pedis dextri pars extrema tota ad illum circiter locum usque, ubi metatarsi ossa cum tarso ossibus contingua fiunt. Pars affecta sphacelo perfectissimo correpta erat sic, ut ad ossa usque adaucto scalpello nullus doloris sensus nasceretur, nihilque sanguinis exiret. Applicatis remediis, quæ partem mortuam à putredine servarent, & viva sic munirent, ne prosperet minax malum, tam felix fuit successus, ut listeretur sphacelus, & quinque diebus elapsis crena, vivas partes separans à mortuis appareret, quæ curæ spem non exiguam pejora hætenus omnia metuentibus dabat. Postquam integra separatio corrupti à viva parte facta fuerat, tendinibus tenacissimis forfice resectis à dextrissimo Chirurgo, separata fuit tota pedis pars anterior & ex periculossissimo morbo evasit æger hac parte mutilatus, adhuc hodie superstes. Tuncque apparebat manifeste ossa tarso, quæ metatarsi ossibus sphacelatis contingua fuerant, contraxisse non exiguam labem. Satis enim notabilis horum pars, extra æquabilem mutilati membri superficiem prominens, nigra penitus novas

(a) Chirurg. d'Hôpital pag. 78.

parabat molestias. Tenui serra rescissum fuit de ossibus corruptis, quantum sine læsione partium incumbentium poterat tolli. Sed & sic ossum horum superficies mortua manebat, & separari debebat, antequam bona cicatrice claudi posset vulnus.

Minutis tunc cuneolis peritissimus Chirurgus terebravit totam hanc corruptorum ossium superficiem, plurimis & satis sibi invicem vicinis locis: & jucundo spectaculo vidimus post biduum singula hæc foraminula humescere, deinde microscopio insipientibus distinctissime apparuit, micare in omnibus his punctis vascula vera systole & diastole, quæ perfecte respondebant ægroti pullibus eodem tempore in manuum carpis exploratis. Unde evidenter nobis constitit, emergentem hanc ex foraminulis factis substantiam esse veram vasculosam compagem.

Ubi autem hac methodo nova membrana os nudatum tectum fuit, reliqua sanatio perficitur, uti dictum fuit in numeris hic citatis.

§. 254. **S**I Calvaria læsa est, pro varietate causæ, fissa, fracta, contusa, intropressa, vel evulso fragmento spoliata erit, atque hæc vel in una, vel in utraque ejus tabula,

Postquam consideratum fuit, quid accidat integumentis communibus & Pericranio læsis, nunc agendum est de vulneribus capitis, quæ ipsum calvarię os lædunt; & primo recensentur hac paragrapho varii modi, quibus cranii os læsum fuisse observatum est, pro varia figura instrumenti lædentis, ejusque majori vel minori impetu.

FISSA. Fissura dicitur solutio continui in osse, oblonga utplurimum, angustissima plerumque, & cum aliqua adhuc partium cohæsione. In his fissuris jam magna varietas obtinet, pro magnitudine varia, recto vel obliquo decursu, pro varia ossis cranii parte, quam occupant: quædam enim in externa tabula hærent, aliæ vero in interna cranii tabula, quamvis externa integra appareat. Aliquando & fissura non est in loco, cui instrumentum lædens applicatum fuerit, sed in alia & sæpe opposita calvarię parte; vocatur tunc contrafissura. Qualia exempla plurima habentur apud auctores. Sic Tulpus (a) narrat, hominem sclopeto in capite ictum, frustra statim etiam perforata calvaria, sexto die periisse. Post obitum calvaria, quamvis foris illæsa appareret, ostendit tamen intus varias fissuras. Paræus (b) binis exemplis hanc rem confirmat. Homini lapidis ictu valida contusio & tumor cum parvo vulnere in bregmatis osse dextro facta fuerat: Dilatato vulnere os subjectum apparuit integrum, & vulneratus periit vigesimo primo die post inflatum vulnus. Post mortem, serra resecto cranio, apparuit oppositi lateris bregmatis os fissum fuisse. In alio Nobili viro post validam contusionem capitis, quamvis galea tecti, mortuo apparuit tabula cranii interior fracta, sic ut fragmenta abrupta cerebri substantiæ infixæ hæserint, licet externa cranii tabula omnino integra inveniretur. Hippocrates jam hoc notaverat, & postquam varios modos, quibus calvaria lædi posset, recensuit, addidit ultimum, quando nempe os læditur alia capitis parte, quam

(a) Observat. Med. Lib. I. cap. 2.

(b) Lib. X. cap. 8.

qua vulnus est; & dicit, huic calamitati nullam superesse medelam, quia non potest detegi, quamam in parte capitis hæreat (a): unde Celsus (b) dixit, *si graviter aliquis percussus est, si mala indicia subsequuta sunt, neque ea parte, qua cutis diffissa est, rima reperitur, non incommodum est, parte altera considerare, num quis locus mollior sit & tumeat, illumque aperire, siquidem ibi fissum os reperietur. Nec tamen magno negotio cutis sanescit, etiamsi frustra secta est.* Incerta tamen hæc omnia sunt, cum sæpe in eodem osse, sed non in ipso vulneris loco tamen, fissura inventa fuerit. Sic homini fuste percussio in fronte prope supercilium dextrum, & inde mortuo, nihil erat in loco vulneris mutatum in osse, sed in oculi dextri orbita contrahissura apparebat sesquipollicaris longitudinis versus sellam Turcicam tendens (c). Imo aliquando observatum fuit, fissuram ex vulneris loco porrectam fuisse ad alia etiam capitis ossa. Talem casum narrat Ruychius (d), ubi à validissima contusione ossis bregmatis sinistri fissura per totum os pergebat, deinde per futuram squamulosam ossis temporum, totum os petrosum, & os occipitis, usque ad magnum hujus ossis foramen, quod medullam oblongatam transmittit. Ex quo casu simul apparet, suturas non impedire, quo minus fissura in quodam cranii osse facta propagari polleret ultra hujus ossis limites, uti multi voluerunt.

FRACTA. Differt fractura calvarie à fissura, quia in fissura proprie dicenda superest adhuc aliqua cohesio, in fractura autem integra obtinet solutio: unde fissura angustam in osse rimam facit, fractura majorem separationem partium antea unitarum supponit. Potest jam fractura talis esse, ut fragmentum à reliquo osse liberum sit omnino, poterit & quadam sui parte adhuc unitum manere. Si integra talis solutio facta fuerit per causam vulnerantem, fere semper fragmentum liberum introprimitur, & cerebrum lædit. Potest etiam ad fracturam referri illud, quod Hippocrates vocavit sedem sive teli vestigium (*ἰσπύη*), dum v. g. acinacis ictu vulnus inflictum discissis calvarie integumentis omnibus ipsum os læserit. Dicit enim (e): *sedes (teli) autem dicitur, cum, osse in sua natura permanente, telum ossi infixum manifestum fecerit, qua infederit; & postea addit, quod Præcisio (*διακέννη*), quantamcunque longitudinem & latitudinem ossis occupet, ad teli vestigium referatur, modo alta ossa, qua præcisionem circumambiant, maneant in sua natura, neque una cum præcisione desistant (intropremantur).* Tunc enim voluit, non amplius teli vestigium dicendum esse, quando os undique solutum mutat locum & intro sublidet, sed vocavit tunc *ἰσπλασιν*, quando nempe os abruptum undique introcedit (f).

CONTUSA. Quando nempe à gravi & obtuso instrumento calvaria læditur sic, ut nulla rima tamen nec fractura appareat. Sicut enim contusio partium mollium plurima vasa frangere potest, integra manente cute; sic etiam idem in osse contuso obtineri potest, quod nempe vasa inter lamellas osseas media lædantur à contusione, licet integrum omnino os appareat. Difficilis cognitio hujus mali sæpe, nisi sero, ubi malignis symptomatibus ortis os pessime

(a) Hippoc. de Capit. vulner. cap. X. Character. Tom. XII. pag. 119.

(b) Lib. VIII. cap. 4.

(c) Joh. Bohn. de renunciat. vulner. pag. 142.

(d) Observat. Anatom. Chirurgic. Centur.

observ. 47.

(e) Hippocr. de capit. vulner. cap. 9. Character. Tom. XII. pag. 119.

(f) Ibid. cap. 8. pag. 118.

affectum fuisse cognoscitur. Hoc malum *δαέρν* vocavit Hippocrates, & simul monuit, non posse oculis dijudicari, an plus minusve ossis substantiam læserit contusio, an magis vel minus profunde penetraverit talis læsio (a). Si enim vasa dispersa per diploën, inter binas tabulas osseas calvariae mediam, tali contusione fracta fuerint, integro quamvis osse, facile patet, ab extravasatis & corruptis humoribus pessima produci posse mala, erodi posse internam tabulam, & vitium sic communicari posse meningibus & ipsi cerebro.

INTROPRESSA. Fit hoc duplici modo: vel enim ossis pars fracta, & undique libera à vicinis ossibus, sublidet; vel os, integro manens in sua cohesione, intropremitur. Quod imprimis in juniorum calvariis ab obtusa causa vulnerante accidit: in his enim ossa magis flexilia adhuc cedunt facilius sine ruptura. Tamen & talis intropressio in adultis observata fuit. Ossa enim cranii in homine vivente humida, & longe minus friabilia sunt, quam quidem in sceletto eadem ossa exsiccata apparent. Rarius tamen in adultis observatur talis intropressio, quin simul rima vel fractura adsit.

VEL EVULSO FRAGMENTO SPOLIATA SIT. Quod sæpe casum inflicto vulnere fit, quando nempe una cum integumentis ossis portio instrumento vulnerante abscinditur. Vocaverunt tunc dedolationem cranii: qualem casum habet *Scultetus* (b) ubi ad magnitudinem Thaleri Imperialis fragmentum calvariae ablatum fuerat, & feliciter tamen curatus fuit vulneratus. Constat pariter, post validas contusiones capitis exsiliisse fragmenta ossea de tabula cranii interna, & subjectum cerebrum læsisse: quale exemplum ex Paræo paulo ante in eadem hac paragrapho allegatum fuit.

Omnia jam hæc mala recensita possunt vel solam externam tabulam cranii, vel internam solam, vel utramque afficere: semper autem eo pejora, quo magis versus interiora penetraverint. Longe enim tunc difficiliorem medelam esse facile patet.

§. 255. SIC affecta (254.) scitur 1. causa vulneris forti. 2. vulneris magnitudine collata figuræ loci vulnerati. 3. specillo. 4. atramento affuso. 5. strepitu inter mordendum 6. visu fracti, contusi, vel punctis pallidis colorati cranii. 7. tactu ipso. 8. symptomatibus integumentorum; carne circa septimam diem abscedente, dolore, natura puris tenui, & graveolente, vulneris malignitate aliena.

Quia autem pessima mala sequi possunt calvariae læsionem, uti patebit sequenti paragrapho; ideo omni cura inquirendum est, an calvaria à causa vulnerante aliquam noxam acceperit, an non. Tumultuarium autem in his casibus examen non sufficere novimus, moniti Hippocratis ipsius infortunio, qui ingenue fassus est, se hic deceptum fuisse, dum teli vestigium non distinxerat à futura, uti dictum §. 171. N°. 3. De hoc autem constabit sequentibus signis.

1. Patet facile, validum ictum capiti impactum, sive obtuso sive acuto in-

(a) Ibidem cap. 7. pag. 112.

(b) Armamentar. Chirurg. Observ. XVII. pag. 214. instrumento

strumento vulnerante, necessario calvariam lædere. Facilius autem hoc oculis patet, si acuto instrumento dissectis integumentis calvaria detegatur, quam si obtuso telo integra cute, vel parvo tantum vulnuscule conspicuo, læsio facta fuerit.

2. De hac re dictum fuit §. 240. N^o. 3. In illis enim locis, ubi cranii ossa plana sunt, potest esse magnum vulnus sine ossis læsione; sed ubi magna adest horum ossium convexitas, vel in illis locis, ubi eminentem angulum formant, non potest esse vulnus magnum, quin prominentem ossis partem læserit, nisi circumtorquendo quasi instrumentum vulnerans vulnus inflictum fuisset, quod rarissime fit.

3. Chirurgi periti, dum ad tales vulneratos vocantur, aqua tepida cum vini exigua copia & aliquot salis granulis abluunt leviter vulnus; tunc prudenter ductis labiis inquirunt, an aliqua læsio in osse appareat. Deinde specillum politissimum obtulo apice donatum immittunt vulneri, quod satis tenue & molle esse debet, quale optimum paratur ex purissimo argento candefacto, & dein sensim refrigerato. Sic undique perterritando sentiunt primo, an os nudatum sit, quod facile ex sonitu specilli ad durum os noscitur: deinde oberrando per omnem ossis detecti superficiem explorant, an aliquid asperi occurrat. Ut hoc fiat sine erroris metu monuit Celsus (a): *specillum oportet esse nec nimis tenue, neque acutum; ne, cum in naturales quasdam sinus inciderit, opinionem fracti ossis frustra faciat; neque nimis plenum, ne parvula rimula fallant. Ubi specillum ad os venit, si nihil nisi leve & lubricum occurrit, integrum id videri potest: si quid asperi est, utique qua sutura non sint, fractum os esse testatur.* Unde patet, summopere attendi debere ad loca futurarum, quæ aliquando in variis hominibus, & in varia ætate differunt. Sic sutura sagittalis in junioribus os frontis usque ad radicem nasi bifariam dividit; in adultioribus sensim obliteratur: tamen in quibusdam hominibus satis etiam provectæ ætatis adhuc observata fuit; unde in vulneribus fronti inflictis de hac sutura cogitandum est. In summo senio sæpe omnes futuræ evanescent, & aliquando citius. Post pugnam Plataensem cum in unum locum ossa carne nudata comportarentur, inventum fuit caput nullam futuram habens, sed ex uno osse consistens (b), imo & quibusdam observatis constitit, in junioribus etiam aliquando futuras obliterari penitus. Sic in cranio pueri octo circiter annorum nullum vestigium sagittalis nec coronalis futuræ apparebat, nec in interna æque ac externa calvariæ superficie. Imo & in junioribus adhuc inceptam harum futurarum obliterationem sæpius observavit celeberrimus *Hunauld*, qui ideo credidit, non adeo raros hos casus esse, ac quidem vulgo putatur (c). Præterea quibusdam locis cranii naturalis est scabrities, uti v. g. in occipitis osse. Et aliquando futuræ ipsæ miro modo differunt in diversis hominibus: sic v. g. calvariam servo, cujus sutura sagittalis prope occiput & frontem angusta penitus erat, sed in vertice miris ambagibus decurrens pollicis fere latitudinem occupabat. Merito hinc in ipso libri sui de Capitis vulneribus initio monuit Hippocrates, *quod hominum capita neque inter se similiter habeant, neque sutura capitis omnibus in eodem loco sita sint* (d).

Sæpe ergo multum adhuc dubii manet, post explorationem specillo factam; & difficillima detectio læsionis in osse, ubi vulnus circa futurarum loca inflictum est: quali in casu ipse etiam Hippocrates se deceptum fuisse fassus est: more

(a) Lib. VIII. cap. 4. pag. 514.

(b) Herodor. Calliope. pag. 540.

(c) Academ. des Sciences l'an 1734. Hist.

pag. 89.

(d) Hippocrat. de capit. vulner. cap. 1. Char.

Jer. tom. XII. pag. 115.

scilicet magnorum virorum, & fiduciam magnarum rerum habentium. Nam levia ingenia, quia nihil habent, nihil sibi detrahunt. Magna ingenio, multaque nihilominus habituro, convenit etiam simplex veri erroris confessio præcipue, in eo ministerio, quod utilitatis causa posteris traditur, ne qui decipiantur eadem ratione, qua quis ante deceptus est (a).

4. Ubi ex cognita causa vulnerante, & vehementia, qua vulnus inflictum fuit, uti ex pessimis symptomatibus post vulneris inflictionem secutis, vertigine, lapsu, alto sopore &c. metuendum videbatur, quod calvaria noxam contraxerit, & tamen loco detecto, nec oculis nec specillo detegeretur rima vel contusio in osse, voluit Hippocrates alia adhuc methodo latens forte malum detegere, quod neglectum postea summa faceret mala. Jubet enim medicamento aliquo nigro liquato os obducendum, & vulnus subjecto linteo oleo madefacto, deinde cataplatinare ex maza imposito, deligandum. Postridie vero soluto vulnere & depurato os radendum voluit: si enim tunc os fissum vel collisum fuerit, in illo loco nigrum illud manebit, cum reliqua ossis superficies alba apparebit (b). Patet ergo tantum hic requiri, ut coloratum liquidum ossi detecto imponatur, quo dein abrafo vel deterfo apparebit, si alicubi os fissum fuerit vel contusum, quia ibi illud coloratum profundius penetrans non poterit abstergi vel deradi tam facile, quam in reliqua ossis nudati superficie.

An vero atramento scriptorio usus fuerit Hippocrates, ex hoc loco minime constat. Celsus tamen (c) sic hunc locum vertisse videtur, dicens. *At, si ne tum quidem rima manifesta est, inducendum super os atramentum scriptorium est, deinde scalpro id deradendum, nigritiem enim continet, si quid fissum est.*

Apud Æginetam (d) tamen, ad latentem angustam & capillarem fissuram detegendam, proponitur medicamentum aliquod liquidum nigrum, vel & scriptorium (σφραγιστὴν τι μέλαν ὕγρον, ἢ καὶ αὐτὸ τὸ γραμματικὸν ὑγρὸν). Præterea & sepiæ liquore & aliis forte atramenti scriptorii loco usi fuerunt veteres. Saltem illud, quod hodie in vulgari usu est, nisi valde dilutum fuerit, minus ad hanc rem convenire videtur, cum vitriolo, gallis quercinis, corticibus granatorum & similibus adstringentissimis constet, quæ ossi nudo applicata tenerrima vascula ilico sic constringerent, ut postea separari deberet lamella destructis vasculis mortua. Et certe nulla necessitas jubet, ut atramento scriptorio utamur, cum quodcumque aliud coloratum liquidum eundem effectum præstare possit; atque etiam, si color niger magis arrideret, ex ossibus ad nigredinem combustis, in tenuissimum pollinem tritis, & aqua dilutis, nigrum tale liquidum confici posset, uti & ex aliis plurimis.

Præterea videtur sufficere, si os nudum tali liquido tingatur, & deinde iterum spongia detergeatur; neque videtur requiri ut abradatur tota superficies scalpro, cum tunc iterum nova separatio superficiei derasæ expectanda sit; uti dicitur §. 266. Sicut jam exploratio per specillum fallere poterat circa futuras, & in illis locis, ubi naturaliter ossis superficies aspera est; sic pariter & hæc methodus decipere posset, coloratum enim liquidum se insinuabit futurarum interstitiis, & adhærebit calvariæ inæqualitatibus.

5. Apud Hippocratem in Coacis Prænotionibus (e) habetur, quod ubi am-

(a) Celsus Lib. VIII. cap. 4. pag. 515.

(b) Hippocrat. de capit. vulner. cap. 23 Char-
ter. Tom. XII. pag. 124. 125.

(c) Lib. VIII. cap. 4. pag. 515.

(d) Lib. VI. cap. 90. pag. 96. versa.

(e) N^o. 502. Charter. Tom. VIII. pag. 331.

biguum sit, an calvaria rupta sit nec ne, tunc vulneratus debeat asphodeli vel ferulæ caulem inter maxillas prehendere, & manducare, simulque animadvertere, an alicubi calvaria strepitum edere ipsi videatur; fracta enim strepere videntur. Sed facile patet, strepitum talem percipi non posse, nisi satis magna fractura fuerit: certe fissura calvariæ hoc signo nunquam cognosci poterit. Tota enim hujus signi efficacia in eo consistit, quod muscoli temporales, inter mordendum magna vi maxillam inferiorem apprimentes ad superiorem, oriantur lato ambitu utrimque à parte laterali calvariæ, quæ sit à processu superiori ossis jugalis, à vicino latere ossis frontis, à processu maximo ossis sphænoidis, ab osse bregmatis, & squamosa ossis temporis parte: hinc dum agunt hi muscoli, si in vicinia insertionis magna fractura fuerit, poterunt ossa fracta moveri & strepitum edere; cumque tot cranii ossibus diversis inserantur, & satis late pateat horum musculorum ambitus, poterunt fracturæ in pluribus calvariæ locis sic cognosci, si nempe satis magnæ fuerint. Solent Chirurghi clavem ferream mordendam exhibere vulneratis ob eandem causam; vel & chordam jubent dentibus prehendere, quam dein manu extendunt, & tensam digito percutiunt, & dein jubent vulneratum animadvertere, an aliquem motum vel strepitum in calvaria percipiat.

6. Si nempe sponte vel arte vulnus satis pateat, ut os nudum oculis lustrari possit; tunc rimæ vel fracturæ, si adfuerint, satis apparebunt. Ubi autem sine cohesionis separatione os contusum fuerit, hoc difficilius detegitur, quod jam monuit Hippocrates (a), uti dictum fuit præcedenti paragrapho.

Præcipuum signum, quod habetur, est, si os naturalem suum colorem mutaverit, qui subrubescens leviter, vel & parum subcærulescens plerumque est. Si jam puncta pallida intercurrent, signum est, vasa subjecta, quæ pellucidæ utcumque lamellæ ossæ colorem dabant, mortua esse, neque amplius liquidis transmittendis pervia; unde separatio lamellæ vasis succumbentibus destitutæ expectanda est.

7. Monendum imprimis hic est, digitorum attactum sæpe fallere, sic ut os intropressum credatur, licet nihil talis mali adsit. In validis contusionibus integumenta cranii ruditer ad durum os suppositum appressa sæpe sic læduntur, ut plurimis vasis fractis sub integra cute fiat collectio magna & subita effusi liquidi. Si in tali casu tangatur digito ambitus talis tumoris prope sanam partem, apparet, ac si os suppositum subsideret. Ratio hæc est: integumenta cranii satis crassa sunt, & imprimis cutis: hæc autem ab effusis humoribus turgente membrana cellulosa elevatur à subjectis partibus; hinc circa ambitum talis tumoris cutis adhuc applicata manet subjectis, paulo procedendo ad partem tumentem, cum cutis eleveretur ibi, sentitur in margine, qui limitem facit inter partem sanam & locum contusum, ac si os depressum foret, tantum ideo, quia crassa cutis ibi loci elevatur à subjecto osse & Pericranio. Hoc autem sæpe Chirurgos etiam satis peritos fefellit: imo Ruyschius fateetur (b), quod digitis explorans ingentem frontis tumorem, post validam contusionem natum, credidisset, cranium intropressum esse, uti præsens Chirurgus volebat; nisi multiplici experientia didicisset, attactum in tali casu sic fallere posse.

8. Ex his signis quidem noscitur, cranium læsum esse, sed sæpe nimis sero;

(a) De vulner. Capit. cap. 7. Charter. Tom. XII. pag. 118.

(b) Observ. Anatom. Medic. Centur. Ob. serv. LX.

cum pessima symptomata sæpe præter opinionem Medici & Chirurgi tunc orta ægrum de medio tollant. Quando sine læsione calvariæ vulnera inflicta fuerunt, si observentur illa, quæ dicta fuerunt §. 245. & 252., sanantur sæpe satis cito, licet maxima fuerint. Ubi autem calvaria læsa fuit, nec tamen per modo recitata signa hoc cognosci potuit, tanquam simplex capitis vulnus solet tractari, & primis diebus sæpe omnia satis bene procedere videntur. Interim os subjectum læsum incipit corrumpi, integumenta ab osse affecto abscedunt, dolor augetur, puris cocti nihil apparet amplius, sed tenuis tantum & sæpe satis olidus ichor, vulnusque ad omnia etiam optima remedia rebelle latentis mali certam notam exhibet. Omnia autem hæc symptomata serius vel citius accidunt, pro varia mali magnitudine, vulnerati temperie, & imprimis majori minorive aeris calore. Pulchre hæc omnia notavit Hippocrates (a). Postquam enim signa recensuit, quibus calvariæ fractura pollet cognosci, addit: *Progressu vero temporis fracta partim septimo, partim decimo quarto, partim etiam aliter significationem præbent. Nam & carnis ab osse abscessus fit, & os lividum, & dolores, ichoribus effluentibus. Hæc autem ægre jam auxilium admittunt.* Et alibi (b) ubi signa recenset, quæ docent perituum esse ex capitis vulnere hominem, dicit: *si os fractum, aut fissum, aut contusum fuerit &c. neque per errorem raserit aut secuerit, tanquam sectionem non postulet, sed sanum os existat, ante decimum quartum diem hyeme plerumque febris invadet, æstate vero post septimum. Et ex illo paucus ichor effluit, & quod in eo inflammatum est, moritur: ubi illud contigerit, & ulcus decolor sit & glutinosum, & apparet instar salsamenti (σῶπις ἀπὸ γῆς) colore fulvum, sublividum, & os deinde corrumpi (σάπνισμα) incipit, & nigrescit, læve existens, ad extremum autem subpallidum & exalbicans evadit. Cum vero jam putulentum exstiterit, pustula in lingua exoriuntur, & delirans moritur.* Omnia sic accuratissime in his locis Hippocrates descripsit. Quamdiu enim labia vulneris rubent, parum etiam inflammata, non multum mali metuunt Chirurgi periti; sed ubi vivus ille color perit, & incipiunt vulneris labia habere talem colorem, quem habent carnes emarcidæ, vel sale diu conditæ, norunt satis, pessima instare mala. Ideo post Hippocratem Medici peritissimi (uti dictum §. 240. N°. 4.) gravia etiam mala, statim post vulnus capiti inflictum apparentia, non adeo metuebant; sed quæ postea apparerent, & imprimis circa septimum diem, adeo damnabant.

Ob eandem causam valde lethale dixit Hippocrates (c) in capitis vulnere febrem quarta, septima, aut undecima die incipere.

Cum ergo ossis Cranii læsionem, etiam satis levem, plurima & gravissima sequantur mala sæpissime, de quibus dictum fuit, uti & illa, quæ sequenti paragrapho enumerabuntur, patet, omni cura inquirendum esse, ut hoc in initio detegatur, & curetur, signa jam recensita sunt, quorum plura imprimis si concurrant, satis firma diagnosi habetur. Illa autem, quæ ultimo hujus paragraphi numero recensentur, certam quidem dant notam, os læsum esse, sed tunc sæpe sero noscitur malum, quod latuit hætenus, quod citius cognitum medelam accipere potuisset.

Et ex hætenus dictis patet, quare periti Chirurgi nullum capitis vulnus, quan-

(a) Coac. Prænor. N°. 501. Charter. Tom VIII. pag. 881.

Tom. XII. pag. 127.

(b) De capitis vulnere. cap. 31. Charter.

(c) Proorrhæ. Lib. II. Charter. Tom. VIII. pag. 818. 819.

tumvis leve videatur, negligent vel perfunctorie curent; cum sæpe latens ossis læsio vel peritissimos fallere possit, & aliquando, solis integumentis læsis, subiectum os tamen à pure, aere &c. afficiatur.

§. 256. **E**FFECTUS hujus mali (254.) 1. partis ossæ separatae mors. (249. 250. 251.) 2. infectio vicinorum. 3. hinc sæpe totius ossis infecti putrefactio 4. Caries diploës. 5. Integumentorum cranii & cerebri corruptio. 6. inde mala affecti cerebri, convulsio, sopor, paralyxis, apoplexia, mors.

1. Mors in osse fit à destructione arteriarum periostei ad os deferentium vitales humores, uti & venarum referentium eosdem humores simili abolitione. Quando ergo hæc vasa omni effectu carent, lamella ossis mortua est, cui hæc vasa prospiciebant. Sive jam pericranio læsio destructa fuerint vasa ad os tendentia, sive ossis ipsius læsione vasa inter ejus lamellas ex pericranio dispersa, vel & illa, quæ per singularia foramina externæ cranii tabulæ insculpta ad diploen pergunt, fuerint destructa, effectus erit idem: nempe mors partis, vasis vitalibus humores adducentibus & reducentibus orbatæ. Sed omnis pars corporis omni influxu humorum vitalium carens nunquam poterit recrescere cum partibus vivis, sed semper debet separari à partibus vivis vicinis; unde & lamellæ ossæ mortuæ sic secedunt & expelluntur, uti dictum fuit in Commentariis ad §. 249.

2. Cranii ossa variis lamellis sibi invicem incumbentibus constant, inter quas vasa tenerrima media feruntur; saltem antequam provecta ætate arctissime appressis ad se invicem lamellis hæc vasa deleta fuerint. Probatum hoc fuit in Commentariis ad §. 249. & confirmavit hoc pulcherrima illa methodus, qua leviter pertundebatur os, non tamen ad diploen usque; & tamen ex punctis pertusis emergebant vascula, quorum efficacia separabatur corruptum & regenerabatur destructum Pericranium; uti dictum fuit in Commentariis ad §. 252. Adfuerunt ergo vasa in ipsa substantia ossæ tabulæ externæ, quæ, liberata incumben- tibus lamellis osseis & elongata, constituebant hanc vasculorum ex punctis fodicatis emergentium compagem. Mira habetur observatio apud Tulpium (4), quæ hoc confirmat. Homini sclopeto in occipite ictō, licet calvaria nullas rimas egisset, ob gravissima symptomata trepanum applicabatur; &, dum terebram in capite circumageret Chirurgus, eruperunt per integrum os innumeræ sanguinis guttulæ, roris instar universam calvariam cooperientes; quibus spongia aliquoties deterfis, continuo novæ repullulabant. Patet ergo, ex ipsa ossis substantia vasorum continuitate patere viam sanguini, ut per integri ossis extimam superficiem roris instar exire posset: si ergo superior lamella ossis v. g. mortua fuerit, malum hoc facile communicabitur vasculis subiectis, à quorum læsione afficietur sequens lamella; sicque malum poterit propagari per omnes lamellas tabulæ externæ, dein poterit ipsa diploë affici, & tabula interna simili modo corrumpi &c.

3. Ex modo dictis satis patet, destructis vasis vitam tolli in parto, unde corruptio mortui sponte sequitur. Et in Commentariis ad §. 242. tale exemplum fuit allegatum, ubi post validam contusionem capitis, decem jam mensibus elap-

(4) Observat. Medic. Lib. I. cap. 2.

sis subito mortuo homine, inventum fuit cranium plane putridum & foetidum. Apud Paræum (*) habetur mirabilis casus, quo constat, cranium sic penitus putrescere posse, & putrefactum separari, vita superstite. Bregmati sinistro hominis ense vulnus inflictum fuerat, cum ossis læsione, quæ tamen ad anteriorem cranii tabulam non penetrabat. Consolidato jam fere vulnere, dum cum sodalibus calidissimis cibis & potui meracioris vini liberalius indulserat vulneratus, acuta febre corripitur, cum sensuum & loquelæ abolitione, & ingenti capitis & faciei tumore. Post aliquot dies apostema hic natum lanceola apertum dedit maximam ichoris copiam, & calvariae os subjacens nigrum, putridum & foetidum apparuit per totam sui substantiam, & postea vivi vermes plurimi nidum hic fecerant. Os corruptum ad volæ manus magnitudinem secessit; nec minus tamen à tam periculoso malo integre sanatus fuit, nisi quod cicatrix diu adhuc debilior & admodum sensibilis remanserit.

4. Quando ossa corrupta in tenuem quasi pulverem fatiscunt, vocatur caries ossium, distincta omnino à separatione lamellarum corruptarum, quæ per exfoliationem fit. Diploë inter binas tabulas cranii media, vasis plurimis, & cellulosa ossis fabrica constat: adest hic & oleum medullare, tam cito corrumpendum. Unde si læsio ossis propagatione mali tandem ipsam diploë infecerit, siue osse integro post validam contusionem fracta in diploë vasa humores suos effuderint; poterit ab utraque causa corruptio stagnantium & extravasatorum liquorum hic nasci, ab his corruptis vasa tenerrima adhuc integra erodi possunt, sicque augeri malum: quod per cellulas diploës inter binas tabulas osseas propens latissime se dispergere poterit: & simul facile apparet, diploë sic affecta, utramque calvariae tabulam pariter corrumpi posse, unde mala plurima sequuntur.

5. Pericranium convexam calvariae partem tegit; dura mater, internum cranii periosteum, concavæ ejusdem parti firmiter adhæret: utraque hæc membrana vasa in os contiguum demittit, & ex osse recipit: & videtur admodum probabile, Pericranii vasa externam tabulam penetrantia in diploë communicare & uniri similibus vasis à dura matre emissis, & per tabulam internam ad diploë tendentibus. Dum ergo corruptum os cranii fuerit, & imprimis si diploë ipsa sic affecta fuerit, poterunt calvariae tegumenta externa & interna æque affici continuitate vasorum; quam rem & confirmant historię paulo ante memoratae. Sed, internis cranii integumentis sic affectis, contiguum molle cerebrum facillime afficitur, & corrumpitur; uti plurima observata docuerunt.

6. Omnes sensus & motus arbitrarii à cerebro pendent, uti constat ex Physiologicis. Cerebro ergo corrupto vel læso, poterunt omnes ejus actiones vel quædam tantum turbari & aboleri, prout malum totam cerebri molem, vel quædam tantum ejus partes, infecerit. Ubi autem lente proserpens malum ab osse læso sensum ipsum cerebrum infecerit, sæpe ordine hic recitato symptomata sequuntur. Aliquando nec opinantem hominem subita morte sic periisse restantur plurima observata. Sufficit hic notare, quod à levissima vertigine ad lethalem apoplexiam usque omnia cerebri affecti mala observata fuerint ab hac causa ortum duxisse.

(*) Lib. X. cap. 22.

§. 257. **E**X quibus (254. 355. 256.) & cognitio, & prædictio hujus morbi noscuntur.

Ex omnibus illis, quæ paragraphis hic citatis dicta sunt, poterit determinari quantum per artem licet, an calvaria læsa fuerit an non: licet tamen, si causa vulnerans satis valida fuerit, semper aliquis metus sit latentis mali, quamvis sensibus nullo modo detegi possit: Dum v. g. calvaria in alio loco sæpe funditur, quam ubi læsio facta fuit, uti dictum §. 254. Ubi autem per signa data constitit, calvariam læsam esse, tunc in Prognosi omnia illa metuenda sunt, quæ precedenti paragrapho enumerantur: non quod hæc semper sequantur talem læsionem, sed tamen aliquando sequi possint. Prudentia postulat, ut hæc omnia vulnerati amicis proponantur, ne postea sequentia mala medentis incuriæ, non autem vulneris malignitati, adscribantur. Præterea & vulneratus & amici, qui ejus curam gerunt, moniti, tam gravia mala sequi posse capitis vulnera, etiam quæ satis levia apparent, longe majori cura observabunt illa, quæ tam in dicta regimine, quam in cura vulneris, requiruntur; à quarum neglectu toties inopinato mors secuta fuit, cum omnia in vado crederentur.

§. 258. **E**T indicatur ad curationem. 1. Loci læsi detectio. 2. mundatio. 3. terebratio ossis. 4. Ejus periostei regeneratio. 5. reliqui vulneris sanatio.

1. Multum dubitari potest, an semper absolute necessarium sit detegere locum læsum, licet magna suspicio adsit, calvariam læsam esse. An non posset cranium vulneratum, vel fissum iterum coire, uti in aliis ossibus corporis fit? Hinc videtur hic utrumque extremum vitandum esse, dum quidam Chirurgi omnibus capitis læsionibus, nullo fere discrimine habito, sectionem adhibent; alii vero nimis meticulosi vix etiam in gravissimis casibus hoc facere audent. Ruyfchius (a) qui annoso artis usu in populosissima urbe tam multos casus viderat, dicit, etiam in vera cranii fractura, in qua symptomata non augentur, non statim ad incisionem & terebrationem esse pergendum; sed post venæ sectionem fomentis cephalicis calidis, larga copia applicatis, curam tentandam esse; additque, se sic felicissime opem tulisse multis, quibus jam scalpellum imminebat. Apud Celsum (b) hoc jam habetur. Dicit enim, antiquiores Medicos in omni fisso vel fracto osse statim ad ferramenta venisse, quibus id exciderent. Sed multo melius est, ante Emplastra experiri, qua calvaria causa componuntur &c. Voluit sic debere hoc tentari usque ad diem quintum: si autem caruncula increfcere cœperit, & febricula aut soluta fuerit aut levior, & cupiditas cibi reverterit, satisque somni accedat, in eodem medicamento erit perseverandum &c. Hac ratione sæpe rima callo quodam implentur; estque ea ossis velut cicatrix. Et latius fracta ossa, si qua inter se non coharebunt, eodem callo glutinantur. Estque id aliquando melius velamentum cerebro, quam caro, qua exciso osse increfcit. Si vero sub prima curatione febris intenditur, brevesque somni, & iidem per somnia tumultuosi sunt, ulcus madet, neque alitur, &

(a) Observat. Anatom. Chirurg. Centur. Ob-
serv. LX.

(b) De Medicin. Lib. VIII. cap. 4. pag. 517.

in cervicibus glandula oriuntur, magni dolores sunt, cibique super hac fastidium increfcit; tum demum ad manum scalprumque veniendum est.

Unde patet, imprimis ex symptomatum vehementia & malignitate determinari, an osse læso locus affectus detegi debeat; an vero spes sit, ossis læsionem sine sectione posse curari.

2. Quæ hic intelligitur mundatio, vel artificialis est, per quam nempe tolluntur omnia illa, quæ in vulnere factio inveniuntur talia, ut cum vivis partibus amplius uniri & recrefcere nequeant: verbi gratia thrombi sanguinis concreti, fragmenta ossis undique libera, membranæ corruptæ &c.: vel est naturalis, quando per suppurationem factam secedunt omnia illa, quæ, vivis partibus licet adhuc aliquatenus cohæreant, tamen illis iterum uniri & concrefcere non possunt. Utroque modo tolluntur illa, quæ vulneris consolidationem impedirent, quamdiu in vulnere hærent.

3. Agitur hic de illa terebratione, quæ minutis cuneolis fit, uti dictum §. 252. non autem de illa perterebratione cranii, qua magnus orbiculus ex calvaria ossis excinditur trepano proprie dicto.

4. Nonquam enim integumenta ossi accrescunt, quamdiu nudum est, sed prius debet recrefcere nova membrana ablato periosteo similis, quæ vasa in os subiectum deducit, & inde redeuntia recipit. Hoc autem fit minutis foraminulis perforata calvaria, ut vasis vivis subiectis detur exitus, quæ tunc elongata retexunt talem membranam.

5. Omnibus his peractis, quæ numeris præcedentibus dicta sunt, sanatio vulneris satis facilis est, & perficitur illa methodo, quæ descripta fuit §. 245.

§. 259. **L**OCUS detegitur. 1. incidendo tegumenta læsa per scalpellum recta, angulosa, perpendiculari, decussata sectione, in os usque impressa, caute in fractis & vacillantibus fragmentis, varia electa pro varietate loci, & mali. 2. separando secta a cranio exacte per scalprum, 3. infarctu carpti lintei.

Postquam vulneris conditio & symptomata vulnus secuta docuerunt, locum affectum debere sic detegi, ut oculis manibusque pateat tota vulneris superficies, tunc hoc fit sequenti modo:

1. Capillis prius novacula derasis, exploratur loci læsi magnitudo, & situs respectu suturarum, muscutorum, tendinum &c.; tuncque primo determinatur, quali sectione opus sit; an, v. g., una sectio per medium locum læsum sufficiet, an vero requirantur binæ sectiones; quæ iterum pro vario modo, quo concurrunt, majorem minoremve ossis partem denudabunt. Si enim binæ sectiones sic concurrant, ut angulum forment, poterit denudari os toto spatio, quod hujus anguli lateribus comprehenditur: si vero una sectio ducatur per lineam tangentem loci læsi, & altera perpendicularis per medium locum læsum ducatur ad priorem, patet facile, duplo majus spatium sic nudari: si jam eadem perpendicularis sectio producat, ut secet priorem in puncto medio, patet quatuor sic angulos nasci, unde quadruplo majus spatium nabitur ac in illa sectione, ubi binæ lineæ concurrunt in unum angulum. Vocatur hæc decussata sive cruciformis integumen-

tegumentorum sectio : quæ cum omnium maximum spatium demudet, hinc illam commodissimam esse voluit Celsus (a), *quæ duabus transversis lineis littera X. figuram accipit, ut deinde à singulis procedentibus angulis cutis subsecetur.* Eligitur jam sectio talis, quæ sufficit, ut locum affectum nudet : & patet, simplicem sectionem requiri, ubi tam parvus est locus læsus, ut dehiscentibus vulneris facti labiis in conspectum venire possit. Angulosa autem sectio conveniet, ubi locus læsus non quidem valde magnus est, major tamen, quam ut simplici sectione nudari possit. Ubi autem majus spatium detegi debet, usum habet sectio recta ducta tangentis instar ad linitem loci affecti, cui deinde altera perpendicularis additur per medium locum læsum transiens. Ubi vero amplius admodum locus detegi debet, sectione recta per medium locum affectum ducta altera similis priori perpendicularis, illamque per medium secans, superadditur; sicque quatuor dissectionum tegumentorum angulis elevatis totum illud spatium, quod binis illis sectionibus continetur, nudari potest.

Debet autem sectio fieri cultello acuto & satis forti, ne acies facile obtundatur; dura enim & callosa est calvariae cutis, & validam satis sectionem requirit. Cultelli autem acies statim debet ossi ipsi imprimi, & sic ipsum os radendo discindi simul pericranium una & eadem sectione; *ne quid ex ipsa membrana, quæ sub cute calvariæ cingit, relinquatur : siquidem hæc scalpro scerebrisve lacerata vehementes febres cum inflammationibus excitat (b).* Nisi enim firmiter ipsi ossi maneat appressus cultellus, dum tegumenta dissecantur, debet postea Pericranium adhuc discindi. Verum quidem est, sic cultello crenam duci in ipso osse, sed hoc evitari nequit, & detecto loco illa ossis læsio poterit satis facile curari.

Cum igitur ad hanc rem requiratur, ut satis valida manu cultellus ipsi ossi apprimatur, patet, summa cautela prius explorandum esse, an forte calvaria sic fracta sit, ut fragmentum posset deprimi, dum cultellus ossi apprimatur; unde pessima mala, & mors ipsa, sequi possent; uti aliquando tristibus exemplis constitit. Ubi ergo digitis undique palpando aliquid vacillare deprehendimus, sectio sic dirigitur, ut ille locus evitetur. Ubi autem simul valida contusio magnum tumorem in loco affecto fecit, sæpe non sine difficultate explorari potest, an os fractum vacillet, an non.

Simul cavendum est, quantum fieri potest, ne majores arteriæ, per tegumenta dispersæ, dissecantur; simulque vitari debent insignes nervorum rami hic dispersi, v. g. in fronte supra oculi orbitam &c. ut & musculi, tendines, suturæ &c. Horum omnium situs ex Anatomicis cognoscitur.

2. Pericranium satis firmiter cranio vasis emissis & receptis adhæret, uti antea dictum est : hinc licet omnia tegumenta una cum Pericranio discissa fuerint, tamen lata adhuc superficie cranio cohærebunt; unde, antequam nudum os in conspectum venire possit, Pericranium à calvaria separari debet. Aliquando elevatis angulis dissecatis Pericranium sequitur, & ab osse secedit, imprimis, quando laxius ossi adhæret, ut in senioribus observatur. Dum vero fortius adhæret, uti sæpiissime fit, eburneo imprimis & politissimo scalpro citissime abraditur à calvaria, non sine summo dolore, nisi æger hebes penitus aut soporosus fuerit, uti sæpe in gravioribus capitis vulneribus contingit. Optandum ergo foret, ut juniores Chirurgi in vitulinis vel ovillis caputibus se exercerent, ut discant scalpro tub-

(a) De Medic. Lib. VIII. cap. 4. pag. 516. | (b) Celsus ibidem.

ducto Pericranium à calvaria subito separare; In hominibus enim hoc addiscere crudele est & periculosum.

3. Separatis sic omnibus integumentis, sanguis effluens plerumque impedit, quo minus accurate detegi possit ossis nudati læsio; unde, nisi summum periculum urgeat, solet differri ulterior investigatio in sequentem diem, vel saltem per aliquot horas expectari. Ne autem partes recenti vulnere divisæ iterum concrecant, quod citissime fieri observatur, plumaceola plana mollissima nudo ossi imponuntur sub integumentis elevatis, sic hoc impeditur, & sedata Hæmorrhagia, amotisque plumaceolis, tota superficies ossis nudati in conspectum venit, elevatis integumentis dissectis. Sic enim minimo labore amplissimum vulnus sequenti die futurum monet Hippocrates (a), qui etiam jubet cataplasma imponi, ex polenta tenuissima aceto incocta, donec quam maxime glutinosa fiat, ad præcavendam nempe nimiam inflammationem. Plumaceola enim hæc sicca absorpto cruore, vel aliis liquidis, tument, & dilatant vulnus factum, quod semper quandam irritationem & inflammationem facit.

§. 260. **C**R U O R, pus, sanies, fordes, spongiolis absorbentur; fragmenta, festucæ, squamæ ossis, si parva, libera ab omni membrana, oculo mox patentia, sunt, eximuntur volsella, vel solvuntur forfice; quæ mundatio artificialis.

Amotis dein plumaceolis, absterfo cruore, omnibusque aliis sordibus, quæ impediunt, quo minus ossis detecti superficies undique oculis pateat, omni cura investigandum, an aliquid lateat mali, quod tolli vel corrigi debet. Si vero in osse nudato nihil fracti vel contusi appareat, & nulla detegatur rima, nec ulla suspicio sit. Sub calvariae osse extravasatos hæere humores, qui cranio in hoc loco perterebrato educi possent, vulnus factum iterum consolidandum est. Peritissimis enim Medicis æque ac Chirurgis aliquando contigit hic errasse, licet ex signis evidentibus conclusissent, sub loco jam aperto hæere aliquid mali. Plurima apud observatores habentur exempla, quæ hanc rem confirmant: monuerat Hippocrates in loco allegato §. 254. quod aliquando os frangatur alia capitis parte, quam qua vulnus est: & in Commentariis ad §. 254. quædam ex optimis auctoribus recensitæ fuerunt observationes, quæ evincunt, semper hic aliquid dubiū esse posse. Præstat ergo, vulneratum ejusque amicos præmonere, quod quidem omnia signa doceant, locum affectum dissecandum esse, ut latens malum detegatur, posse tamen aliquando in alio, & sæpe satis distito calvariae loco, hæere noxam. Unde prudentes Chirurgi semper Medicum vel alios Chirurgos vocari jubent, ut communi consilio concludatur, quid agendum sit in similibus casibus; sicque testes habeant, omnia secundum artis regulas peracta esse, quamvis eventus non respondeat votis.

Ubi vero constat, os nudatum læsum esse, indicatio generalis (§. 185. N^o. 1.) docet, auferenda esse illa omnia, quæ curam vulneris impedire possent. Liquida effusa hic hærentia spongiolis vel linteis carptis siccis facile absorbentur: fragmenta vero ossis, vel & festucæ & parvæ squamulæ sedentes, vel inde separatæ per

(a) De Capit. vulner. cap. 10. Charter. Tom. XII pag. 114.

instrumentum vulnerans, possunt considerari tanquam corpora heterogenea, quæ ibi relicta nocere possent, saltem vulneris curam multum retardare. Sed uti dictum fuit (§. 186. 187.) primo expendendum est, an sine damno tolli possint; an vero tutius ibi relinquantur, donec sponte separentur & excidant. Si enim fragmenta hæc ossis parva fuerint; nec vivis partibus cohæreant adhuc, nulla spes est iterum uniri posse, & tuto auferri possunt instrumentis idoneis. Cum autem à libero accessu aeris ossa, periosteo nuda, pessime afficiantur, uti dictum est §. 250; requiritur præterea, ut hæc fragmenta oculis sic pateant, ut statim tolli possint, neque opus sit diu instrumentis tale vulnus scrutari. Periculosum pariter, fragmenta ossea membranis adhuc hærentia vi avellere; cum & magnus dolor, & nexus pericranii cum dura matre, imprimis circa suturas, pessima posset producere mala; tunc enim melius, si tolli debent, forcice abscinduntur.

Illa autem depuratio vulneris, quæ sic manu vel instrumentis fit, vocatur mundatio artificialis; ut distinguatur ab illa, quæ sponte orta suppuratione perficitur, & naturalis ideo vocatur.

§. 261. **E**ADEM nimis magna, hærentia vivis, abscondita, relinquuntur, nam vel sponte separentur, vel recrescunt ad viva. Hæc mundatio naturalis.

Ubi autem fragmenta calvarie magna valde sunt, examinandum est, an sic corrupta fuerint jam, ut nulla spes sit, quod iterum uniri possint reliquo ossi. Hoc autem imprimis cognoscitur ex colore mutato. Si enim fragmentum tale flavum, fuscum, vel jam nigrum est, non recrescet; sed vel sponte separabitur postea, vel tollendum est statim, si commode fieri possit. Quando autem colorem adhuc naturali similem habent talia fragmenta, & imprimis si adhuc cohæreant cum pericranio, magna spes est, quod recrescere possint. Accidit aliquando in majorum ossium fracturis, tibie v. g. vel femoris os binis locis sic fractum esse, ut medium fragmentum ab utraque parte liberum sit; & tamen observatum fuit sæpius, tale fragmentum iterum concrevisse cum reliquo osse: unde patet, non desperandum esse in similibus cranii fracturis. Observationes Chirurgicæ hanc rem omnino evincunt. Homini solea ferrea mulus tam validum ictum capiti impegerat, ut frontis os fractum & intropressum esset. Trepano excidebatur orbiculus ex calvaria, ut os fractum & intropressum commode elevari & tolli posset. Cum autem fractura à medio frontis ad oculi canthum minorem pergeret, non audebat tollere Paræus tantam ossis portionem, sed elevavit os fractum sic, ut duram matrem non amplius posset comprimere; & feliciter curatus fuit vulneratus (*). Sed & integre separatum à reliqua calvaria ossis fragmentum, cohærens tamen adhuc Pericranio, iterum recrevit. Capitaneo cuidam ense ossis frontis magna portio abscissa fuerat, circiter trium digitorum longitudine & latitudine, sic ut nuda esset omnino dura mater. Tam magnum ossis fragmentum, Pericranio adhuc cohærens, una cum integumentis supra faciem reclinabatur horrendo spectaculo; & jam cogitabat Paræus, ut totum reseccaret: metuens tamen, ne tanto vulnere nudata dura mater pessime afficeretur, detergo sanguine, qui duram matrem tegebat, iterum adaptavit os abscissum una cum integumentis,

(*) Les œuvres d'Ambroise Paré, Lib. X. chap. 6.

& levi sutura in tribus locis firmavit, ne logo facile moveri possit. Pulcherrimus successus docuit, quantum sperari possit in similibus casibus, cum tam ingens ossis integre resecti portio in homine pluribus adhuc aliis plagis saucio recreescere potuerit. (a).

Quamdiu ergo vivis partibus adhuc cohærent talia fragmenta, relinquenda videntur; spes enim est, iterum uniri posse reliquo ossi: & si hoc non succedat, & signa docuerint, ossa hæc separata incipere corrumpi, semper poterunt eximi, vel & sponte separabuntur. Unde simul patet, noxium esse, nimis curiose scrutari capitis vulnera, ut fragmenta ossis, quæ non statim oculis occurrunt, tollantur. Si enim adhuc aliqua sui parte cohæreant vivis, poterunt uniri, vel sponte per suppurationem secedent, si recreescere nequeant. Naturam sæpe solam sibi sufficere etiam in periculosissimis casibus, docet sequens Historia. Puellæ novem vel decem circiter annorum cæsim ense inflicta fuerant octodecim vulnera capiti, præter alia quedam, quæ brachia & truncum corporis læserant. Omnia hæc capitis vulnera calvariam læserant, ossisque portiones quædam ad diploën usque ablatae erant; aliis in locis tota calvaria ad duram matrem usque ablata erat. Idoneo apparatu deligabatur tam misere vulneratum caput, & singulis binis diebus tantum denu dabantur vulnera. Singulis autem deligationibus ossis frustula plumacæolis adhærebant, & sic secedebant sine molestia. Illa fragmenta autem, quæ Pericranio adhuc cohæreabant, concredebant iterum, & prompte replebantur loca, ubi calvaria integre ablata fuerat; sic ut quinque septimanarum spatio tot plagis saucia convalesceret hæc puella (b). Sed in hoc casu nulla mundatio artificialis locum habuit, sponte per suppurationem separata fuerunt omnia illa, quæ recreescere non potuerant.

Prudentissimum ergo est monitum Hippocratis, dicentis: *Quæ vero ossa intus subsederunt à naturali suo statu, fracta aut late omnino præcisa, minus hac periculosa sunt, si membrana integra fuerit: & rimis pluribus & latioribus intus confracta minus periculosa sunt, & facilius eximuntur; neque quidquam horum sectione (serra) indiget; neque cum periculo tentandum est ossa auferre, priusquam sponte sursum cedant &c.* (c).

§. 262. **S**I os contusum, album, fuscum, lividum, fissumve apparet, minutis hinc inde foraminulis perterebrandum, ut præscriptum (252.), ita enim viva exeunt, & mortua expellunt cito.

Aliquando contingit, ut ablati integumentis nulla quidem fractura in osse reperiatur, & tamen os male affectum sit. Hoc imprimis observatur, ubi obtusum fuit instrumentum vulnerans, vel quando homo ex alto delapsus planæ superficiei valide impegit caput. Tunc enim vel finditur os cranii; sæpe integris licet manentibus capitis integumentis; vel pericranium, inter resistens obstaculum & duram calvariam subjectam, sic premitur & atteritur, ut frangantur vasa, quæ ex Pericranio in calvariam tendunt, & vicissim ex hac in Pericranium redeunt; unde aboletur omnis vitalis influxus in lamellam calvarie Pericranio continguam.

(a) Ibid. chap. 7.

(c) Hippocrat. de Capit. vulner. cap. 18.

(b) Bel. oste. Chirurgien d'Hôpital, pag. 81. | Charter. Tom. XII. pag. 126.

Patet satis ab iisdem causis posse lædi vasa, quæ inter lamellas cranii media decurrunt, unde augmentum mali fit. Cognoscitur autem, talem contusionem & destructionem vasorum in cranii ossæ obtinere, ex colore ossis mutato. Naturaliter enim ossa viva & sana colorem subrubellum, vel & ex albo cærulescentem habent; quia vasa vitalia, colorato liquido plena, per albam ossis lamellam, & præ tenuitate pelluentem, talem colorem exhibent. In omnibus illis ergo locis, ubi à contusione destructa sunt vasa supposita lamellis ossæis, albedo erit: unde & §. 255. N°. 6. inter signa calvariæ lætæ numerabatur, si punctis pallidis coloratum cranium apparet: & Belloste (a), postquam nudam Pericranio calvariam minutis foraminulis perterebraverat, primum signum felicitis successus memorat, quod os inciperet subrubescere; manifesto nempe indicio, vitam redire in ossæ, antea vitali humorum influxu privato. Ubi autem os vasis suis destructis incipit corrumpi, tunc color albus in flavum, fuscum, lividum, imo nigrum omnino mutatur; eo semper majori corruptelæ gradu, quo magis à naturali colore recedit, uti dictum fuit in Commentariis ad §. 249.

Cum ergo in tali casu metus sit, ne ossis hæc corruptio subjectas lamellas contiguas similiter inficiat, ad ipsamque diploën pergat, unde & subjecta tabula vitrea, & deinde ipsum encephalon infici poterunt, imprimis cum fractis vasis effusi humores & corrupti per integram contusi ossis superficiem exire nequeant; apparet iterum pulcherrimus usus methodi §. 252. descriptæ, qua nempe minutis hinc inde foraminulis perterebratur calvaria, ut effusi humores exire possint, & vasa viva supposita, duro hoc tegmine mortui ossis libera emergere & separare illud, quod mortuum & corruptum est. A vivis enim vasis suppositis solum expectandam esse separationem ossis corrupti, jam indicavit Hippocrates (b): postquam enim monuerat, ossa fracta non esse educenda cum periculo, nisi sponte sursum cedant, dicit: *sursum autem cedunt, carne subnascente; subnascentur autem ex diploë ossis, & ex sano (osse), si superior tantum ossis pars corrupta fuerit*. Sola observatione sic didicit Hippocrates illud, quod postea recentiorum industria confirmavit: carnem enim vocaverunt antiqui Medici, (& etiam recentiores eodem vocabulo uti sunt) vascularem illam compagem, quæ in vulneribus renata jacturam substantiæ restituit. Et pulchre addidit, hanc ex diploë succrescere, per quam adeo manifesta vasa disperguntur; imo &, superioribus tantum lamellis corruptis, talem carnem renasci ex sano ossæ supposito, non ex diploë, manifeste indicat.

Ubi autem fissura adest, eadem hæc methodus pariter prodest. Omnia enim mala quæ fissuram sequuntur, imprimis ab eo pendent, quod plurimorum vasorum ruptura facta fuerit, nec pateat facilis exitus liquidis extravasatis; unde corruptela ossis, & omnia quæ inde pendent mala, sequuntur. Minutis vero foraminulis circa fissuræ locum pertuso ossæ, exitus patet extravasatis humoribus, & facilis habetur via, qua vasa viva elongata prodire possunt, & retexere novum Pericranium.

Quam subito autem hac methodo perficiatur cura etiam in satis notabili ossis læsione, patuit ex illis, quæ dicta sunt in Commentariis ad §. 252. & 253.

(a) Chirurgien d'Hôpital, pag. 76. 78.

(b) De Capit. vulner. Cap. 28. Charter. Tom. XII. pag. 126.

§. 163. **Q**UO ipso (262) periosteï regeneratio cita. (252).

§. 164. **S**ANATIO tum reliqui descripta est (245. 246. 247. 248. 253.).

De his omnibus in numeris hic citatis dictum fuit. Simulac enim novum Pericranium sic recrevit, tunc reliquum curari debet instar vulneris capitis, quod sola integumenta læsit communia.

§. 165. **I**NDE patet, cur angusta fissura periculosior sæpe, quam ingens cranii contusio (256.).

Omnes Medici & Chirurgi periti in hoc consentiunt, fissuram calvarię sæpe longe majus discrimen adferre, quam validam contusionem, imo & fracturam ossis.

Fissura enim difficilior cognoscitur, & sæpe non detegitur, nisi sero, imprimis si circa suturas hæreat; vel & externa calvarię tabula integra manente sola interna tabula fissa sit; uti & dum alio loco calvarię os fissum est, quam ubi vulnus hæret. Accedit, quod fissura, licet oculis appareat, sæpe longius excurret, quam ut tuto tota possit detegi discissis integumentis. Omnia autem hæc aliquando sic contingere, probatum fuit fidelissimis observationibus in commentariis ad §. 254. memoratis. Dum vero ingens læsio ossis facta fuit, sponte patet; & magnitudine mali incitati Medici & Chirurgi omne molimen artis adhibent, ut præcaveant metuenda mala. Fissura tam sæpe latens, imo quandoque nullo signo detegenda, vel peritissimos fallere potest, quod de se ipso Hippocrates tam ingenue falsus est.

Altera causa, quare angusta fissura tam periculosa habeatur, est, quia non potest certo cognosci, quò usque penetraverit, an ad diploën usque, an etiam profundius. Si jam ad diploën usque fissa fuerit calvaria, magna satis vasa fracta erunt; effusi humores non poterunt per angustam ossis rimam transire; corrumpentur; destruent teneram illam cellulofam ossis partem, quæ diploën constituit; proserpere poterit malum inter binas calvarię tabulas, & corrumpere omnia. Erota dein interna cranii tabula, Encephalon ipsum poterit affici, & sic subito perit homo, dum nullum creditur latere malum, & post mortem totum os corruptum invenitur. Plurima talia habentur apud Observatores Exempla. Ubi autem ingens cranii læsio facta fuit, patet exitus humoribus extravasatis, vel per artem fieri poterit, & vasa viva supposita omne corruptum poterunt separare. Ideo tam felix sæpe cura fuit gravissimorum etiam capitis vulnerum una cum insigni ossis læsione; dum levis fissura, sero tantum cognita, nihil mali metuentes sæpe inopinato de medio sustulit. Ideo Hippocrates ausus fuit pronunciare: *si os (calvaria) fractum fuerit & contusum, periculo caret &c. si vero fissum fuerit, & fissura intro procedas, admodum est periculosum* (a). Additque, serram adhibendam esse, ne

(a) Hippocrat. de locis in homine cap. 12. Charter. Tom. VII. pag. 371.

sanies per ossis fissuram affluens meningem putrefaciat. Et alibi (a) ossa capitis fracta, vel late admodum præcisa, vel rimis pluribus & latioribus divisa, minus periculi habere affirmat. Accedit præterea, quod nunquam findi possit calvaria, quin simul plus minusve contusa fuerit (b): unde eo major numerus vasorum, in ipsa ossis substantia vel per diploën decurrentium, frangitur; hinc omnium malorum augmentum.

§. 166. **E**T patet, hanc methodum (§. 151. 161.) præferendam Ustioni, scalpris, trepanis Veterum in his malis (§. 249. 254. 256. 262.).

Ex illis, quæ dicta sunt in commentariis ad §. 151. patuit, levem illam perturbationem calvariae pluribus foraminulis cito & tuto simul sanare hæc mala; unde videtur merito præferenda esse reliquis methodis. Licet autem apud Hippocratem, uti dictum fuit, jam hujus rei vestigium habeatur, tamen frequenter usi fuerunt scalpris, ut deraderent ossis male affecti partem. Si tamen perpendantur omnia, quæ necessario sequuntur hanc ossis affecti abrasionem, patebit, minus tutum hoc esse, & longe tardius sic curam perfici. Ustionem ferro candenti commendaverunt quidem Chirurghi, ut os corruptum separaretur: sed non memini apud Hippocratem in læsione calvariae, uti nec apud Celsum, hujus mentionem factam fuisse; & certe difficile admodum foret sic adurere partem ossis corruptam, ut non læderetur pars integra ossis subiecta; quæ ergo iterum separari deberet, antequam curatio posset expectari.

Ubi autem angusta rima in osse cranii fisso apparebat, vel & teli vestigium in osse relictum erat, tunc scalpris variae magnitudinis & figurae, pro varia mali magnitudine & figura, utebantur, quibus os radebant, donec rima, vel teli vestigium deleberetur. Et, ut certi essent rimam talem sic deletam esse, prius atramento scriptorio, vel alio nigro liquore (vide §. 255. N°. 4.) tingeabant os nudatum, ut coloratum tale liquidum in rimam penetrans ostenderet, quo usque penetraret; pergebant enim radendo, donec totum illud nigrum deleberetur. Ubi vero altius descendebat rima, neque radendo tolli poterat, tunc terebram adhibebant, ut magnam ossis partem excinderent (c). Ubi vero latior locus calvariae contusione læsus fuerat, & signa docerent os corruptum esse, tunc utebantur trepano exfoliatorio dicto, quod binis cuneis contraria directione positus constabat, quibus circumrotatis abradebatur calvariae superficies orbiculari plaga. Quia convexa & in quibusdam locis inæqualis est cranii superficies, facile patet non adeo æquabiliter sic posse abradi illud, quod corruptum est. Sed præterea postquam radendo scalpris vel tali trepano exfoliatorio rima deleta erat, vel ablata ossis corrupti pars, tunc superficies ossis abrasa mortua est, destructis nempe omnibus vasis; hinc separari debebit, antequam iterum poterit illi incrementum Pericranium. Apparet ergo ab his operationibus non multum boni expectandum esse. Illa autem methodo §. 252. pulchre separatio corrupti perficitur, eademque opera regeneratur perditum brevi tempore.

(a) Hippocrat. de Cap. vulner. cap. 28. Charter. Tom. XII. pag. 126.

(b) Ibid. cap. 6. Charter. Tom. XII. pag. 118.

(c) Ibidem cap. 23. & 24. Charter. Tom. XII. pag. 124. 125.

§. 167. **C**RANIUM in junioribus intropressum, in adultioribus post fracturam intropulsum, Cerebrum premit; pro varietate loci pressi, pro varia magnitudine, profunditate, acutie, punctura prementis, producit hebetudines, sopores, vertigines, tinnitus, caligines, deliria, vomitum bilis, dolores capitis, convulsionem, paralytes, lotii fœcumque spontaneum exitum, apoplexias, febres, mortem.

Postquam dictum fuit de illis malis, quæ ossis cranii læsiones sequuntur, sequitur; ut videamus, quid futurum sit, si calvaria intropressa, vel post fracturam intropulsa, contentum encephalon compresserit, vel læserit. Constat ex Geometricis, circulum inter figuras Isoperimétras maximam habere aream; sed calvariae figura ad sphericam accedit: hinc intropressa calvaria, minuetur ejus capacitas. Notum est porro ex Physiologicis, cranii cavum semper plenissimum esse in sanitate: unde resecta calvaria statim contentum encephalon exsurgit sic, ut nunquam possit iterum adaptari resecta pars, nisi vi adhibita. Patet ergo, quod simulac mutata fuerit calvariae figura per intropressionem, necessario comprimantur contenta ejus cavo.

Sive jam figura cranii convexa mutata fuerit per intropressionem sine fractura, sive os fractum loco suo pullum depressum fuerit; effectus erit idem nempe cerebri contenti compressio. In junioribus talem intropressionem possibilem esse sine fractura, calvariae mollities in hac ætate fere persuadet: longe major firmitas in adultis difficilius hoc fieri posse sine fractura docet. Hippocrates (a), varias fracturarum calvariae species recensens, tertio loco enumerat hanc introcessionem, quam *εὐλασίαν* vocavit; dicitque, semper tunc simul rimas adesse: *Quod enim introprimatur, ab alio osse naturaliter se habente abruptum fractumque introcedit; itaque sane huic intropressioni rimam accedere necesse est.* Longe tamen mollior est ossium humani corporis in vivente substantia, quam in sceletis exsiccatis apparet: hinc forte non omnino impossibilis, licet rarior, calvariae depressio in adultis, non decrepitis tamen, sine fractura.

Cum autem ab illis, quæ cranii cavo continentur, tota vita & humanitas pendeant; totumque encephalon molle sit & facile comprimendum; patet, intropresso cranio turbari posse, imo & integre deleri, omnes functiones, quæ ab encephali integritate pendent. Quia autem cerebellum firmioris substantiæ est, & tutius reconditur, quam ipsum cerebrum; hinc damna, à calvariae intropressionem orta, semper fere cerebri actiones lædunt primario, tandemque propagato malo cerebelli actionem, à qua vita pendet, tollunt. Simul patet, effectus hujus mali admodum varios esse posse, prout diversa, cerebri loca comprimuntur, & prout causa comprimens majori minorive vi agit; vel etiam dum abrupta ossis fragmenta acuta cerebri substantiam ipsam vulnerant majori vel minori profunditate. Levem etiam cerebri compressionem turbare posse ejus actionem, raro constitit Exemplo. Mulieri dimidia cranii olla ablata fuerat, quam circumferebat os-

(a) De Capit. vulner. cap. 8. Chater. Tom. XII. pag. 118.

tiam stipem petens: nudam duram matrem dum digiti apice leviter quis tangeret, valide exclamavit dicens, se millenas videre candelas (1). Symptomata autem, quæ compressionem encephali ab hac causâ factam sequuntur, enumerantur sequentia.

HEBETUDINES. Quæ levissimam tantum cerebri compressionem sequuntur. In omnibus illis, quibus à lenta & frigida causâ apoplexia nascitur, prius talis insolita hebetudo sensuum omnium, & tarditas ad motus musculares exercendos, observantur: quæ designant, sensim accumulari in cranio tales humores, qui levi compressione obtundunt sensuum omnium vivacitatem, tandemque aucta copia penitus tollent. Si jam calvaria intropressa leviter sic cerebrum compresserit, simile malum oritur, aliquando tota vita manens, si non tollitur causâ comprimens. Tale exemplum habetur apud Hildanum (2). Puero decem annorum, felicissimo ingenio prædito, casu cranium circa futuram Lambdoideam impressum fuerat; cum nulla graviora symptomata sequerentur, neglectum fuit à parentibus hoc malum, mansitque hæc ossis impressio: Incepit sensim memoria & intellectus imminui, sic ut nihil addiscere potuerit, vixitque sic stupidus omnino ad quadragimum ætatis annum, tuncque peste correptus periit. Similis hebetudo etiam observatur, quando sanguis nimia copia distendit vasa majora in plethoricis; vel in morbis acutis velocitate aucta & majori rarefactione dilatat vasa sic, ut pulposa cerebri substantia incipiat comprimi.

SOPORES. Qui auctam cerebri compressionem indicant: simulac enim illæ causæ, quæ hebetudinem fecerant, augentur, oritur somnolentia, & tandem profundissimus somnus & lethalis, nempe apoplexia. Unde inter illa signa, quæ docent capite vulneratum periculose affici, recenset Hippocrates altum soporem, & tenebrosam vertiginem (3).

VERTIGINES, CALIGINES. Vertigo omnium fere morborum cerebri levissimus est, & plerique capitis morbi, imo fere omnes, inde incipiunt; & curati pro ultimo symptomate vertiginem relinquunt. In omni vertigine plerumque est rotatio apparens rerum extra nos positarum & naturaliter quiescentium; aliquando videntur omnia ex alto deorsum labi, & contra. Quando increfcit malum, incipiunt apparere colores varii in objectis; mox sequitur vacillatio omnium musculorum, incipiunt sic affecti metuere ne labantur, obvia quæqueprehendunt, ut se sustineant; enervatur totum corpus uno momento sic ut cadant, simulque tenebræ densissimæ omnem sensum visus tollunt; hocque est ultimum quod sentiunt: si enim pergat malum, in Apoplexiam, Epilepsiam, vel animi deliquium terminatur.

Levissima ergo vertigo est, ubi omnium objectorum rotatio apparet; aucto malo, tenebræ fiunt, tunc *σκιόδινος*, id est, tenebrosa vertigo vocatur: tandem cadunt sic affecti. Tria hæc in loco modo citato notavit Hippocrates, signa graviter capite vulneratorum recensens. Si tenebræ circumfundantur, & vertigo, vel & ceciderit. Dum Antilochus hostem in fronte sic vulnerat, ut lanceæ culpis os penetraret, tenebræ oculos cooperuerunt, dixit sapiens Homerus (4).

(1) Académie des Sciences l'An 1700. Hist. pag. 57.

(2) Observat. Chirurg. Centur. 3. observ. 21.

(3) De Vuln. Capit. cap. 15. Charter. Tom. XII. pag. 121.

(4) Τὸ δὲ σκιόδινον ὅτι ἐκάλουν Ἰλιάδ. Lib. IV. pag. 74.

Simplex ergo vertigo levem tantum compressiunculam cerebri indicat; tenebricola vero auctum malum designat: sublata autem causa comprimente, tollitur. Unde dum in morbis acutis impetu & copia sanguinis distenta vasa majora cerebrum comprimunt, oritur talis tenebricola vertigo, quæ narium Hæmorrhagia tollitur, uti monuit Hippocrates in Prænotionibus Coacis (a) dicens: *Tenebricolas vertigines ab initio sanguinis à naribus fluxus solvit*. Ut distingueret nempe à simili vertigine, quæ non adeo in morbi initio, sed tardius sæpe apparet, corrupta per morbum bile vel aliis sordibus circa præcordia collectis.

TINNITUS. Vertiginem tenebricolam fere semper comitatur molestissimus in auribus sibilus, ac si millenæ tinnientes campanulæ audirentur. Ubi autem sine causa externa talis sibilus percipitur, vocatur tinnitus aurium. Ille autem aliquando oritur ipsius organi auditus vitio, illoque etiam levissimo; tunc digito auriculari in meatum auditorium immisso & agitato, vel & trago auriculæ compresso, tolli solet satis cito; neque tunc aliquid mali portendit. Ubi vero ab ipso cerebro affecto aurium tinnitus oritur, tunc non facile cedit, & per annos sæpe molestus est; apoplexiæ tandem secuturæ, vel & Epilepsiæ, signum: uti in Coacis Prænotionibus habetur (b). Eandem causam agnoscit hoc symptoma ac vertigo, & graviores capitis læsiones fere semper sequitur.

DELIRIA. Cerebrum esse illud organum corporeum, à cujus integritate idearum perceptio, illarum combinatio, judicium inde sequens, animi affectus &c. pendent, ex Physiologicis notum est. Ubi autem idearum ortus non respondet externis causis, sed ab interna cerebri mutati dispositione pendet, delirium adesse dicitur. Compresso autem cerebro ob mutatam calvariæ figuram turbari possunt omnia, quæ ab hujus organi illibata actione fiunt in corpore. Observatur enim plerisque, qui à nativitate fatui sunt, vitiatam habere capitis figuram: & Hippocrates, ubi recenset funesta symptomata, quæ sequuntur calvariæ læsionem quancunque, si non adhibeatur debita cura, tandem addit, quod delirantes moriantur (c). Et alibi sæpius delirium post capitis plagas, tanquam malum signum, damnavit. *A plaga in caput accepta stupor aut delirium malum (d). Ab offe percusso delirium, si in vacuum penetraverit (e) &c.*

VOMITUM BILIS. Mirum symptoma, quod in capitis vulneribus cerebrum læsum, vel compressione aut concussionem, male affectum semper denotat. Constat enim certissimis & quotidianis observatis, cerebri insignes mutationes, etiam in sanissimis hominibus, biliosum talem vomitum excitare non tantum, sed etiam sæpe bilem miro modo mutare momento fere temporis.

Non assuetus homo navis agitationi, post vertigines & summam anxietatem, bilem æruginosam vomit: idem fit, si sanissimus homo subito in gyrum roetur: & tunc etiam vertigo præcedit, cerebrum affectum denotans. Et vicissim bilis corrupta, circa præcordia hærens, omnes cerebri actiones turbare potest miris modis, vertigines, deliria, convulsiones &c. excitando: excussa hac faburra, ilico cessant omnia hæc mala. Ex quibus patet, mirum commercium obtinere inter caput & præcordia, sic ut in se mutuo efficacissime agant; nec hac

(a) N°. 141, Charter. Tom. VIII. pag. 871.

(b) N°. 161.

(c) Hippocrat. de Capit. vulner. cap. 31. Charter. Tom. XII. pag. 127.

(d) Idem Aphor. 14. Sect. VII. Charter. Tom. IX. pag. 198.

(e) Ibid. Aphor. 24. Sect. VII. pag. 303.

tenuis hoc ex cognita corporis fabrica explicare facile poterit, licet certissimis experimentis constet, rem se sic habere. Sic Scultetus observavit, omnes fere capite vulneratos de oris amarore conqueri (a).

Suspectum hinc semper fuit in capitis vulneribus hoc signum. *Quibus cerebrum vulneratur; febris plerumque ac bilis vomitus accedit, & corporis sideratio, & tales perniciose habent (b).* Quibus percissum fuerit cerebrum, necesse est his febrim & bilis vomitum supervenire (c). *Bilis vomitus vulnere succedens, malum: & maxime in capitis vulneribus (d).* Imo etiam, dum ab internis causis cerebrum incipit premi, vel alio modo male affici, bilis, & imprimis æruginosa, vomitus, inter mala signa recensetur. *In capitis doloribus æruginosi vomitus, cum sorditate & pervigilio, cito vehementer insanire faciunt (e).* Hujusque pronunciati veritas in Epidemicis (f) exemplo Philistæ probatur, cui symptomata hæc omnia eo ordine, ut recensita fuerunt, acciderunt; & quinto die morbi periit.

Patet ergo, cerebro tam ab externis, quam internis causis male affecto, bilis vomitum sequi frequenter, & quidem malo omine. Tamen hoc notandum est, cum & leviores cerebri perturbationes aliquando sequatur bilis vomitus, non semper pessima quæque prædicenda esse, dum hoc symptoma adest, nisi & alia mala signa concurrant. Accidit enim sæpe, dum ex alto delapsi homines caput duro obstaculo impingunt, quod fiat vomitus à sola concussionione cerebri, licet postea nihil gravioris mali sequatur. In illo enim casu §. 258. ex Celebrissimi Ruyschii observationibus Anatomico-Chirurgicis recensito, cum Chirurgus mulierem, post lapsum ex curru in humum gelu duratam, aliquoties vomuisse intelligeret; pessima quæque suspicatus contusum in fronte locum cruciali incisione detexisset, nisi Ruyschius accedens hoc prohibuisset, qui solis fomentis capiti applicatis brevi sanavit totum hoc malum.

DOLORES CAPITIS. An ipsa cerebri vel cerebelli substantia doleat, dum male afficitur, nondum constat experimentis. Cerebri corticem sine dolore lædi posse, imo impune rescindi, dum in fungum excrescit, certo novimus. Medullam læsam convulsiones facere pariter constat; sed tunc illæ sic turbantur omnia, ut non possit determinari, an tunc simul dolor adsit. Interim tamen constat, calvarię integumenta externa, imprimis pericranium & expansionem tendinosam huic incumbentem, (de qua dictum §. 239.) uti & ejus Periosteum internum sive duram matrem, dolore, dum læduntur. Unde Celebrissimi in arte Viri dixerunt, cephalalgiam calvarię ejusque integumentis proprium esse malum; uti delirium cerebro (g). Cum ergo calvarię intropressio vel ejusdem post fracturam intropulsio non possit fieri sine læsione, vel saltem distractione, integumentorum, & ipsius duræ matris, patet facile, dolores capitis sequi tale malum; nisi simul sic compressum fuerit ab ossis introessione encephalon, ut omnes sensus aboleantur penitus. Unde dolores capitis in tali casu adhuc aliquid boni denotant, nempe cerebri functiones non esse penitus deletas.

(a) Sculteti Armament. Chirurg. pag. 198.

(b) Hippocrat. in Coacis Prænot. N°. 500. Charter. Tom. VIII. pag. 881.

(c) Idem Aphor. 50. Sect. VI. Charter. Tom. IX. pag. 283.

(d) Idem in Coacis Prænot. N°. 507. Charter. Tom. VIII. pag. 882.

(e) Hippocrat. Prorethet. Lib. I. Prædict. 10. Charter. Tom. VIII. pag. 706. & Coac. Prænot. N°. 170. ibid. pag. 861.

(f) Hippocr. Epid. 2grot. 4. Charter. Tom. IX. pag. 232.

(g) Lud. Duretus in Coacas Prænot. Hippocrat. pag. 87.

CONVULSIONES. Quæ semper fere docent, cerebrum sic compressum vel læsum esse, ut æquabilis spirituum influxus in nervos, motibus muscularibus inservientes, turbatus sit; de qua re dictum fuit §. 230. & sequentibus.

PARALYSES. Quando nempe sic læsum fuit cerebrum, ut influxus spirituum in nervos musculorum motores omnino sit impeditus. Hoc malum jam, prout vel omnes musculos, vel unum tantum latus corporis, vel denique quosdam tantum particulares musculos affecerit, varia nomina accipit, uti postea dicetur. Prout enim varia loca cerebri læsa vel compressa fuerint, diversus erit effectus. Mali semper ominis est Paralysis, capitis vulnera sequens; quia denotat, ipsam medullarem substantiam cerebri compressam vel læsam esse.

LOTII FÆCUMQUE SPONTANEUM EXITUM. Resolutis nempe sphincteribus ani & vesicæ: & inter pessima signa, & in morbis, & in capitis vulneribus, hoc habetur. Nervi enim sphincteribus his inservientes ex ultimis nervis spinalis medullæ, per ossis sacri foramina exeuntibus, originem ducunt; unde ipsius spinalis medullæ originem lædi jam in cerebro patet. Distinguendum tamen est inter hanc resolutionem ani & vesicæ, per quam urina & fæces sensim & continuo elabuntur, & ubi in apoplecticis aliquando, uti & in morbis acutis inflammatoriis capitis, urina emittitur in vesica prius notabili copia collecta, singulis forte sex horis; inscio quidem ægro, tamen sine resolutione sphincteris vesicæ, quia tanto tempore retinetur collecta in vesica clausa urina.

Longe enim gravius malum est, quando resoluta vesicæ sphinctere sic clam elabatur urina, quam si notabili copia collecta effluit non recordantibus ægris. Ultimatum enim illud incommodum pueris etiam sanis satis frequens, imo & adultis aliquando accidit, licet nihil sinistri inde sequatur. Videtur & hæc distinxisse Hippocrates (a) dicens: *Urina non recordantibus emissæ perniciofa; num & ab his me-juntur, ac si sedimentum conturbaveris.* Ubi quidem magnum malum inde metuendum voluit; cerebrum enim oppressum significat. Sed in alio loco (b) dixit. *Quibus urina clam elabatur ad pudendum, exsolvantur desperati* (ἀνασπαστοί). Sic enim legendam voluit hanc sententiam Foësius (c) licet in textu vulgatam lectionem retinuerit, quæ habet. *Quibus clam urina decidit, & pudendum contrahitur, desperati sunt.* Pro ἀνασπαστοί legitur ἐκλύεται apud Cornarium; & Duretus (d) pariter huic sententiæ accedit. Unde patet, longe gravius malum indicari, si urina sic clam delabatur, resoluta vesicæ sphinctere, quam si copia quadam collecta non recordantibus ægris excernatur. Et ob hanc causam Hippocrates (e) postquam varias urinæ proprietates quoad colorem, crassitiem, & contenta recensuit tanquam perniciosas, absolute damnavit urinam qualemcumque, quæ occulte mingitur (καθ' ἑσπεραν οὐραῖα).

APOPLEXIAS, FEBRES, MORTEM. Hactenus enarrata phenomena designant, cranii intropressionem leviori compressione turbasse cerebri actiones quasdam; ubi vero eo usque aucta fuerit hæc compressio, ut omnes sensus interni & externi deleti fuerint, una cum motibus voluntariis, tunc simul adest profundus & perpetui somni imago, & vocatur apoplexia; quam semper comitatur

(a) Prorethetor. Lib. I. prædict. 28. Character. Tom. VIII. pag. 718. & in Coac. Prænot. N°. 190.

(b) Coac. Prænot. N°. 474. ibid. pag. 878.

(c) Foësius Hippocrat. Opera omnia pag. 193.

(d) Lud. Duretus in Coacas Prænot. Hippocrat. pag. 363.

(e) Coac. Prænot. N°. 380.

fere pulsus fortis & celerior, superstiti adhuc, imo & aucta, cerebelli actione; quod sub expanso duræ matris velo tuto defensum minus facile comprimitur: tandem & cerebello similiter compresso, vel aucto motu destructa ejus fabrica (dum cerebro compresso omnis sanguinis per encephalon pellendi impetus fere tantum in cerebellum agit) mors sequitur.

§. 268. **Q**UIN & ipsum Cerebrum ita læsum, corruptum hinc inflammatione, suppuratione, gangræna, fungo, hæmorrhagia, similia mala (267) parit.

Præcipua malignitas vulnerum capitis inde pendet, quod vicinum cerebrum facile afficiatur: si ergo læsio tanta fuerit, ut ad cerebrum ipsum pertingat, facile patet, pessima quævis metuenda esse mala. Tota enim humanitas a mollis & pulposi hujus visceris integritate pendet. Interim constat ex Anatomicis & Physiologicis, totum encephalon vasis constare, in quibus ergo compressis, vel læsis, obstructio, inflammatio, omnesque horum morborum sequelæ obtinere poterunt; uti & illa mala omnia, quæ ab extravasatis humoribus premendo, vel ab iisdem corruptis rodendo, excitari poterunt. Observationes autem Chirurgicæ docent, hæc omnia cerebri læsiones secuta fuisse.

Homo acinace vulneratur in parte posteriori capitis cum læsione calvariæ: cumque in initio ab imperito Chirurgo tractatus fuisset, qui ruditer examinans vulnus specillum per calvariæ rimam in ipsam cerebri substantiam ad tertiam partem longitudinis specilli adegit; ideo prudentiores postea accedentes Chirurgi noluerunt trepanum abhibere, ne hæc operatio, quæ plurimis salutaris fuerat, infamaretur. Post varia symptomata miser vigesimo tertio die moritur; & aperto cranio deprehenditur abscessus magnus in sinistro cerebri latere, proprio folliculo circumseptus; quo pertuso ingens copia puri foetidi effluxit (a). Patæus (b) testatur, se frequenter observasse, dum cadavera mortuorum ex capitis vulneribus lustraret, ut de vulnere renunciaret ad judices, ingentem puris copiam, imo ipsius cerebri substantiæ corruptionem. Imo addit aliam Historiam, quæ docet, suppuratione intra calvariæ cavum facta superstitem tamen fuisse ægrum. Puer caput impegerat pavimento lapideo tam vehementer, ut statim omni sensu privaretur: successit febris, delirium, & alia pessima symptomata. Septimo die ingens sudor accessit, & sternutatio, simulque magna copia puris per os, nares, & aures effluxit, cum levamine omnium malorum; & sanatus fuit puer.

Mirum Exemplum habetur (c), ubi post lapsum ex alto, læso cranio, per foraminulum suturæ sagittali inhærens, exibat puris satis magna copia; qua evacuatione per aliquot dies quandoque suppressa, convellebatur æger sapius de die; exeunte pure cessabant convulsiones; tandem quinquagesima die moritur. In cadavere invenitur lata fissura sex pollices longitudine superans, sed jam coalita; in dura matre nullum vitium apparebat, sed totus lobus sinister cerebri erat suppuratus, dextro ejusdem lobo & cerebello integerrimis.

Plura similia exempla habentur apud Observatores; hæc sufficient, ut demon-

(a) Sculter. Armamentar. Chirurg. p. 217. | (c) Académ. des Sciences l'An. 1700. Hist.

(b) Liv. X. chapit. 23.

| pag. 56. 57.

stretur, veram suppurationem in ipsa cerebri substantia obtinere posse. Et simul apparet, licet semper admodum periculosa si suppuratio hic orta, non tamen semper mortem inde sequi.

Ubi autem loco benignæ suppurationis, quæ omne, quod legibus circulationis amplius obedire nequit, separat, gangræna cerebrum ipsum occupat, patet facile, nihil sperandum esse. Tale autem malum cerebri læsiones sequi aliquando, testantur observata. Miles post gravissimam capitis contusionem sine vulnere in Nosocomium recipitur, & post novem septimanas, dum nullum amplius dolorem nec aliud malum perciperet, jamque reditum in patriam meditaretur, noctu in lecto subito moritur. In cadavere nulla omnino læsio in calvaria de-regitur, sed cerebri substantia, loco percusso subjecta, ad digiti crassitiem, pomi instar putrefacti, corrupta apparebat, cum enormi, & ad ventriculos anteriores fere penetrante, putredine: levis præterea corruptio piz matris aderat, reliqua omnia apparebant illæsa (a). Dum gravissima capitis vulnera in cerebri substantia penetrantia acceperat homo mense Octobri, moritur post biduum. Ablatis fasciis post mortem teter adeo exibat ex vulneribus odor, juxta nullus ferre posset, vel ad cadaver accedere auderet (b). Tam enormis putredo bidui tempore in sanissimo homine, frigida satis tempestate, nasci potuit.

Ipsam encephalon corrumpi posse Hippocrates monuit, & vocabulo *σφακία* usus est, ut hanc corruptionem designaret. Sic dicit: *Cerebro corrupto, quidam in tribus, alii in septem diebus moriuntur; illas autem si effugerint, servantur: Quibus autem sectione adhibita os disjunctum apparet, hi pereunt* (c); & in Aphorismis (d): *Quibus encephalon corruptum (sideratum vertunt etiam σφακία) fuerit, in tribus diebus pereunt, si vero has effugerint, sani sunt.* In his autem locis indicat, possibilem adhuc esse sanationem, licet encephalon corruptum fuerit. Parebit postea, ipsam cerebri substantiam in fungos protuberantem, posse tolli secando, rodendo &c. superstitæ vita non tantum, sed & omnibus cerebri functionibus illæsis manentibus postea.

Dictum fuit antea §. 158. N°. 5. discissa cute, pinguedinem subjectam, æquabili pressione cutis non amplius coercitam, allargere, & degenerare in carnem, fungosam dictam, in vulneribus. Simile malum in vulneribus capitis obtinet, quando & cranium ipsum, & dura mater perscissa sunt. Naturaliter enim calvarie cavum semper plenissimum est, uti aliquoties jam monitum fuit: ubi ergo cranii & duræ matris vulnere non amplius coercentur contenta, incipiunt protuberare; & quia arteriæ, antequam cerebri substantiam ingrediuntur, tunicas suas crassas elasticas deponunt, ideo impulsis vi cordis satis propinqui fluidis minus resistere possunt, unde dilatantur quam maxime, & miros tumores faciunt. Et quia præter omnem expectationem citissime emergunt tales tumores, & postquam ultra vulneris labia externa emerferunt, latissime expanduntur, in ipso vulnere magis constricti, ideo & à figuræ similitudine, & à subito incremento, fungos cerebri vocaverunt hos tumores. Omnium autem maximi tales fungi nascuntur, si valida febris impetum & velocitatem liquidi impulsu in vasa cerebri tam facile dilatanda auxerit. Quamdiu autem dura mater adhuc

(a) Sculteti Armamentar. Chirurg pag 307

(b) Hildan. Observ. Chirurg. Centur. 2. Ob-
servat. 15. pag 103.

(c) In Coac. Prænot. N°. 188.

(d) Aphorism. 50. Sect. VII Charter. Tom.
IX pag. 319.

integra est, raro tales fungi enascuntur: hæc enim membrana satis firma coercet suppositam cerebri substantiam. Dum vero pia mater simul læsa fuit, longe magis adhuc fungi illi protuberant: nam videmus etiam in cadavere, levi vulnuscule percuta pia matre, ilico corticem cerebri per vulnus factum emergere.

Plurima jam habentur observata Chirurgica, quibus constat, dissecto cranio & dura matre, cerebri substantiam in mirabiles tales tumores excrecere, unum alterumve tale observatum adduxisse sufficiet.

Nobili juveni lapidis jactu dextrum bregmatis os frangitur: exit statim ipsa substantia cerebri ad dimidiam avellanæ magnitudinem: cumque junior quidam Medicus præsens negaret esse cerebri partem, sed pinguedinem esse diceret, experimentis probavit Paræus (a) prodiisse de vulnere ipsam cerebri substantiam. Docet hoc Exemplum, vulnere læsis cranio & coercentibus cerebrum membranis, citissime protuberare posse ipsam cerebri mollem fabricam.

Puero quatuordecim annorum globulo ligneo inter ludendum sinistra ossis frontis pars percutitur: mox concidit, bilem vomit, & postea perrexit omnia fere ingesta evomere. Post binos menses, cum admodum male se habere pergeret, cranium terebratur; cum impetu per foramen factum pus erupit. Postea ipsa cerebri substantia incipit emergere, nec potuit coerceri; unde filo circumstricto resecabatur: mox similis substantia fungi instar ad trium digitorum altitudinem erupit, iterum simili methodo ablata. Hocque sæpius factum fuit, sic ut fungi omnes resecti pugni magnitudinem æquaverint: tamen postea curatus fuit (b).

Septem annorum puer ex equo delapsus gravi vulnere dextrum bregmatis os læsit. Quinto die fungus excrevit ex cranio pertuso digitum crassus: pollicem longus: Parentes accuratam vulneris inspectionem, & cranii depressi elevationem, noluerunt admittere, & constanter asseruerunt, se male filium mitiori cura tractatum mori, quam incerto cum eventu crudelis operationis molestias subire. Hinc solis exsiccantibus fere fungum tollere conati fuerunt Medicus & Chirurgus. Mansit sic fungus vix mutatus per tres integros menses; symptomatibus autem pessimis, quæ in initio adfuerant penitus mitigatis, imo fere integre abolitis: omnes actiones vitales, animales, naturales restituebantur, sic ut corporis habitus augeretur, & solitis ludis puer tempus falleret. Circa quarti mensis initium fungus multum increvit: pulvere tamen ex Euphorbio & alumine usto insperso sublatus fuit; sed intra viginti quatuor horas alius fungus ovi gallinacei magnitudine excrevit, cum exacerbatione omnium malorum. In hoc fungo valida pulsatio arteriarum apparebat, & rudius tractatus sanguinem copiosissime fudit. Frustra tentatum fuit rodentibus consumere luxuriantem fungum, unde angustiores cervicem fungi filo circumducto constrinxit Chirurgus; sed oriebatur pulsatio tam enormis arteriarum in fungo, ut tota ejus moles subsilire videretur. Constringendo tamen hac methodo perrectum fuit, & maxima fungi pars cum intolerabili fœtore una cum filo decidit. Residuum fungi nigricans, sordidissimum, penitus corruptum horrendo aspectu apparuit: convulsiones, tremores, hemiplegia secuta fuerunt. Tamen post aliquot dies omnes illæ partes fungi corruptæ deciderunt; sed alius fungus cineritii coloris, nucem juglandem magnitudine æquans, indoles, cum pulsu manifesto arteriarum, per

(a) Livre X. chap. 23

| Observ. III. pag. 287.

(b) Hildan. observat. Chirurg. Centur. IV. |

fungosam hanc substantiam dispersarum, ex vulnere emerfit, qui post paucos dies sponte subsedit, & ingens hiatus in ipsam substantiam cerebri penetrans apparuit. Post biduum unius noctis spatio totum hoc cavum novo fungo oppletum fuit, & paucis diebus postea, prius opisthotono terribili per biduum excruciatum, misellus puer, quarto mense post acceptum vulnus finito, moritur: sensus tamen omnes, loquela, & ratiocinium constiterunt ad vitæ finem usque (a).

Mirabilis hæc historia docet, fungos tales cerebri ipsius substantia vasculosa, mirum in modum dilatata, constare, & cito renasci, licet ablati fuerint. In cadavere deprehensum fuit, cerebri corticem in loco vulneris penitus consumptum fuisse, & pure copioso omnia diffuere.

HÆMORRHAGIA. Vasa sanguinea triplicis imprimis generis in encephalo solent considerari. 1^o. illæ arteriæ, quæ per duram matrem dispersæ, satis fortes & validæ, & duplicatura hujus membranæ defensæ, tuto satis locantur: Arterias autem hic satis insignes esse, docent sulci ab his arteriis cranio impressi. 2^o. vasa sanguinea per piam matrem dispersa, quæ tota vasculosa esse injectionibus Anatomicis demonstratur. Arteriæ autem illæ, crassis tunicis depositis, antequam piam matrem ingrediuntur, tenerrimæ sunt, hinc facilius lædendæ. Simulac vero vasa illa sanguinea ex pia matre in cerebri corticem contiguum pervenerunt, jam non amplius sanguinem rubrum habent, sed longe tenuis fluidum. Naturaliter enim in cortice cerebri nihil rubri sanguinis unquam apparet. 3^o. Per ipsam medullarem substantiam encephali vasa sanguinea disperguntur, nudo oculo etiam conspicua, quæ blando calore tenerrima stamina medullosa foveant. Similia satis magna etiam medullam oblongatam ambiunt. Et in cavis cerebri ventriculis mirabiles illi processus piæ matris hærent, qui plexus choroidei dicuntur, nulli parti ventriculorum cerebri accreti, sed libere ibi fluctuantes, & tori vasculosi, uti & injectio Anatomica, & sine his nudus oculus etiam docet. In omnibus his locis per vulnera lædi possunt hæc vasa, & sanguinem effundere, & licet causa vulnens non adeo profunde penetraverit, solo tamen concussu valido, tenerrima vasa per piam matrem & in cerebri ventriculis &c. dispersa poterunt frangi, & effusus sanguis comprimendo encephalon poterit omnes actiones cerebri turbare, imo integre delere; uti in numeris observatis constitit.

Qualiscumque demum nunc causa fuerit, quæ cerebrum læserit, vel compresserit, vel denique inflammando, suppurando, putrefaciendo, destruxerit ejus fabricam; poterunt sequi omnia illa mala, quæ §. 167, recensentur, à levissima vertigine ad lethalem apoplexiam usque.

§. 269. **I**D vitii (167) noscitur tactu, visu, ablatis integumentis (159).

In prima deligatione vulnerum capitis omnia hæc sedulo examinanda sunt; quantum fieri potest: symptomata enim, capitis vulnus secuta, sæpe eadem sunt, licet diversæ partes læsæ fuerint. Nam dum cranium intropressum, vel post fracturam intropulsam, comprimit encephalon, poterunt adesse omnes cerebri mor-

(a) Miscell. curios. Decur. II. anno 9. Observ. CLXXIV. pag. 312.

bi; atque iterum, dum cranio illaeso, fractis vasis, v. g. piæ matris, effusus sanguis contentum premit cerebrum, omnia eadem mala sequi poterunt: sed cum per sensus cognosci possit, an calvaria læsa fuerit, an non; hoc primo explorandum est. Quod sit, si capillitio prius deraeso locus affectus digitis mollissime undique pertractetur, ut appareat, an convexa calvariae figura mutata fuerit, an non. Magnam tamen in hoc examine cautelam requiri, & tactum sæpe fallere posse, dictum fuit §. 255. n°. 7. Si vero tam magna fuerit intropressio calvariae, ut visus foveam impressam facile detegat, nullum dubium manet. Et dum ob symptomata vehementiora, discissis integumentis, nudatur calvaria, facile detegitur, an tale malum obtineat, an non.

§. 270. **A**BLATIO pungentis, restitutio prementis in statum naturalem, conservatio hujus status, sufficiunt curationi.

Generalis indicatio curationis tribus his continetur. Aliquando enim accidit; fractum cranium & intropulsum acuto fragmento lædere subjectum encephalon; quandoque, obtuso & imprimis rotundo obstaculo dum caput impingitur, orbitulare frustum ex calvaria excutitur, quod intropressum cerebrum comprimit, non autem pungit vel lacerat. Imo aliquando contigit, externa tabula calvariae illaesa, internam tabulam in fragmenta dissiliisse, quæ pungendo & lacerando subjectum cerebrum mortem intulerunt. Talem casum refert Paræus (a). Nobili viro caput casside armatum globo plumbeo percutitur sic, ut ferreum illud capitis tegumentum intropremeretur; nihil tamen in externa cute læsum apparebat, nec ulla calvariae intropressio poterat detegi. Sexto tamen die moriebatur apoplecticus: In cadavere apparuit, calvariae tabulam internam, externa licet integra, in fragmenta dissiliisse, quæ in cerebri substantiam penetraverant. Idem se in alio simili casu vidisse & Celeberrimis Archiattris præsentibus ostendisse dicit. Apparet facile difficultas detegendi tale latens malum: ubi autem cognoscitur adesse, summa cum prudentia acutum tale fragmentum extrahendum est; cavendo, ne circumtorquendo, vel fortius movendo, lædatur magis cerebrum. Ubi vero calvaria intropressa vel intropulsa in statum naturalem restituta fuerit, tunc requiritur ut in hoc situ retineatur, & impediatur, ne iterum introcedere facile possit. Causa tunc comprimente sublata, æquabilis humorum circuitus per partes jam liberæ restituet naturalem usum: ars in hoc casu tantum in situm naturalem reducit illa, quæ inde deviaverant.

§. 271. **E**RGO detectum cranium (§. 259.) molle in pueris, emplastro tenaci elevatur; in adultis, si firmum, elevatorio attollitur; si vacillans cerebrum non sustinet, perforanda juxta fracturam calvaria, ut vecti possit attolli impressum vacillans; juvat sternutatio, & animæ retentio.

Raro deprimitur cranium sine fractura, nisi in junioribus, in quibus mollia

(a) Liv. X. capit. 8.

E e e

adhuc ossa facilius cedere possunt sine ruptura. Ut autem elevetur cranium sic intropressum, excogitaverunt Chirurghi hanc methodum, ut sursum perpendiculariter tractis integumentis os intropressum elevetur. In juniore enim ætate pericranium firmissime ossibus adhæret, valis in omni puncto emissis & receptis: proce-
dente vero ætate plurima talia vasa sensim obliterantur, unde observatur in summo senio minor cohesio Periosteï cum ossibus. Cum ergo in junioribus firma adhæsiō Pericranii & ossium flexilitas magnam spem faciant, sic elevari posse depressum cranium, hæc methodus tentanda erit, antequam ad operosiora artis molimina procedatur: saltem nunquam nocebit hoc prius tentasse. Duplici autem modo hoc fit: vel enim loco affecto imponitur cucurbita, quæ, ubi firmiter adhæret, subito perpendiculariter sursum avellitur: sic magna vi trahuntur sursum omnia integumenta, & simul elevatur poterit intropressum cranium (a). Vel cuti in loco affecto applicatur tenax emplastrum ex pice, vel alio quocumque, quod firmiter adhærere possit; & monet Hildanus (b) capillos non omnino abradendos esse, ut magis hæreat Emplastrum; & simul voluit Emplastri magnitudinem non debere esse tantam, ut totum locum intropressum tegat, sed tantum tertiam circiter ejus partem, sic enim tota vis, dum elevatur Emplastrum, loco intropresso applicabitur. Simul debet per medium Emplastrum funiculus transire, quo prehensio possit perpendiculariter sursum trahere Emplastrum Chirurgus, postquam prius firmissime loco affecto adhæsit.

Ubi vero frustra tentata fuit hæc methodus, vel in adultis nulla spes est; posse sic restitui calvarie depressionem; tunc dissecis integumentis nudato ossi applicant illa instrumenta, quæ elevatoria dicuntur. Varia talia habentur descripta apud auctores chirurgicos, & omnium optima videntur illa, quæ spiralem terebram habent; quæ leniter circumtorquendo suspensa manu medio centro loci depressi infigitur, & deinde, ubi hæret satis firmiter, sursum trahitur una cum cranio intropresso. Varia talia instrumenta delineantur, illorumque usus indicatur apud Hildanum (c), Scultetum (d), Paræum (e), &c. Imo Hildanus ibidem narrat, dexterrimum Chirurgum, dum aliis instrumentis cæteret, felicissimo successu adhibuisse spiralem terebram, qua doliarii utuntur, & rudi hoc instrumento non tantum elevalse depressum cranium, sed & fragmenta nonnulla extraxisse.

Quamvis autem suspensa manu infigatur loco depresso talis terebra, tamen aliqua pressio requiritur, ut applicari possit: hinc, si vacillet os depressum, periculum foret, ne profundius descendens cerebrum pessime læderet. In tali casu alia opus est methodo: si rima tam patula adsit, ut vectis intromitti possit, tunc sic elevatur os depressum, curando ut vectis hypomochlium firmæ calvarie innitatur. Ubi vero non patet talis vectis aditus, ut depresso ossi submitti possit, per artem facienda via est. Excinditur tunc trepani modiolis juxta locum fractum & depressum foramen, per quod immisso vecte os depressum elevari poterit; & si unum tale sufficere non videatur, plura similia excindenda forent. In maxima cranii depressione septies modiolis cranium in depressionis circumferentia perforare se coactum

(a) Paré Livre X. Chapit. 5. Hildan. Observat. Chirurg. Centur. 2. Observ. 5. pag. 83.

(b) Ibid pag. 83. 84.

(c) Observat. Chirurg. Centur. 2. Observ.

4. pag. 80. 81. 82. 83.

(d) Armentar. Chirurg. tab. 3. pag. 8.

(e) Livre X. Chapit. 5.

fuisse fatetur Sculterus (4), & deinde foraminum interstitia forfice excindere debuit, ut tolleretur os depressum, quod elevare non poterat. Et quamvis tantum decimo sexto post acceptum vulnus die tam periculosa institueretur operatio, perfectissime tamen homo sanatus fuit; sic ut octo circiter septimanis post hæc perfecta militare munus suum iterum potuerit obire.

JUVAT STERNUTATIO ET ANIMÆ RETENTIO. In sternutatione sentitur levissima & grata titillatio circa nares, vel & aliquando simile quid percipitur circa præcordia: simulac alterutrum vel utrumque ex his sentitur, homo cogitur suspendere omnes actiones corporis, & expectare, quid futurum sit; momento post ingens convulsio omnium musculorum expirationi inservientium fit cum impetu non coercendo, & subitissime contractus pulmo omnem aërem contentum expellit sonoro cum sibilo. Illo ergo momento, dum validissima illa exspiratio fit, sanguis per pulmonem transire nequit; hinc sanguis venosus à capite rediens impeditur; quo minus se libere in cor dextrum evacuet, unde distenduntur omnia encephali vasa, simulque validissimo hoc concussu arteriosi sanguinis impetus augetur; sicque à binis his concurrentibus causis satis valide distenditur totius encephali moles. Rem autem sic se habere patet, quia repetita sternutatione incipiunt vacillare omnes sensus & motus musculares, turgescit facies, lacrymæ exprimuntur, nasus stillat; imo si frequentius recurrat, sæpe omnes cerebri functiones mirifice turbantur. Dum vero anima retinetur, sanguinis transitus per pulmonem, retento aëre & per calorem dilatato compressum, pariter impeditur; unde venæ jugulares se evacuare non possunt, & hinc omnia eadem fiunt, quæ in sternutatione dicta fuerunt, cum hac tamen differentia, quod tempore inter binas sternutationes medio liber iterum fiat transitus sanguinis per pulmonem; quamdiu autem anima retinetur, augetur omni momento pulmonis compressio, aëre retento in pulmone, mora plus calefacto, & dilatato. Si ergo ossa adhuc flexilia fuerint in junioribus, vel in adultis sic soluta, ut levi vi mobilia sint, turgens retento sanguine encephalon poterit elevare depressam cranii partem, vel saltem adjuvare hanc elevationem, dum alia methodo tentatur.

Neque adeo levem esse hanc vim, qua distentum encephalon urget coercentem calvariam, docuit mirabilis casus. Puellæ tredecim annorum, regulis ex scissili lapide factis (leyen) ex altissimæ domus tecto in caput delapsis, adeo magna fiebat impressio calvariæ in loco, ubi futura sagittalis cum coronali concurrat, ut quatuor pollices æquaret diameter loci læsi. Cum pessima symptomata urgerent, præmissa venæ sectione, statim applicabatur trepanum; dumque tentaret peritissimus Chirurgus elevare depressa calvariæ frustra, invenit omnia sic separata esse à vicinis, ut tolli debuerint. Sic ingens hiatus patebat, tam magna parte calvariæ ablata; felix tamen tanti vulneris cura trimestri spatio perfecta fuit. Debilior tamen locus lamina plumbea defendebatur, quam per binos menses gessit hæc puella posteaque neglexit, nihil amplius mali metuens; sicque per septem adhuc menses sana vixit. Mala fortuna correpta fuit tussi convulsiva tunc Epidemica, quæ tanta cum vehementia miseram hanc puellam in lecto de nocte decumbentem exagitavit, ut cicatrix sanati vulneris dilaceraretur, & ultra binas uncias ipsius cerebri substantiæ exprimeretur de vulnere, statim paralytica facta fuit omnibus suis mem-

(4) Armament. Chirurg. Observat. VII. pag. 198.

bris, loquela tamen & ratiocinio manentibus integris, & quinta die post triste hoc infortunium perit (a). Satis notum est, in molestissima illa tussi sic impediri omnem sanguinis transitum per pulmonem, ut horrendo spectaculo liveat, imo nigrescat sæpe, tota facies sic affectorum cum nihil sanguinis venosi ab externis æque ac internis capitis partibus cor dextrum, ob convulsos pulmones plenissimum, ingredi possit, pergente interim corde sinistro urgere sanguinem per arterias. Unde distentissima Encephali moles dirupit cicatricem vulneris jam per novem menses sanati. Atque hinc patet, quanta efficacia distenta encephali vasa urgeant calvariam.

§. 272. **I**N situ tenetur cavendo pressionem externam apta deligatione.

Altera pars indicationis curatoria §. 270. descriptæ erat, ut pars intropressa, jam restituta in statum naturalem, sic conservaretur. Hoc autem satis facile fieri poterit, modo tantum præcaveatur, ne aliqua pressio externa in hunc locum agere possit. Tota enim moles encephali, calvaria cavum naturaliter semper replens, a comprimente parte calvaria intropressæ libera, assurgit, & sustinebit restitutum os, ne propria gravitate iterum demergatur. Unde non videtur hic opus esse magno molimine, nec instrumentis, ut restitutum os in situ retineatur. Apud Hildanum (b) delineatur instrumentum, quo restituti ossis subsidentiam præcavere nititur. Spiralis nempe terebra cranio infigitur, quæ in parte superiori variis foraminibus perforatur, per quæ stylus ferreus transmitti posset varia altitudine, ut hujus styli transversi cranio incumbens ope sustineri posset vacillans ossis pars, voluitque splenis suppositis utrique styli extremitati in omni calvaria loco hoc fieri posse. Apparet facile, molestum esse, tamdiu terebram hanc calvaria infixam relinquere; & ex modo dictis patuit, hoc minime necessarium esse. Sufficit ex charta vel linteo contorto, aut alio simili quocumque corpore, annulum facere, paulo majorem loco affecto, illumque apta deligatione sic firmare, ut immobilis hæreat, totumque locum affectum suo ambitu contineat. Sic cavebitur, ne ligatura capiti circumducta locum affectum premere possit; neque, dum in somno pulvinaribus vel aliis obstaculis allideret caput vulneratus, poterit comprimi locus læsus.

§. 273. **F**ISSO, fracto, contusove cranio, si arteria, venæ lymphatica vasa sub cranio rupta effuderint suos humores, hi premendo cerebrum producant mala (267), tum putrescendo in pus, ichoremve, inficiunt tenerrima vicina cerebri, unde rursum similia. Hæc vasa ex cranio in duram, ex hac in piam, inde in cerebrum, sinus ventriculos decurrentia variis locis varia periculo & sanatione damna producant.

Si tanto cum impetu causa vulnerans capiti fuerit applicata, ut durum calvaria

(a) Medical Essays Tom. II. pag. 245.—249. | (b) Observ. Chirurg. Centur. 1. observ. 4. pag. 82.

os findere, frangere, vel & valida contusione lœdere potuerit; patet facile, summum esse metum, ne vasa sanguinea, vel & alia, quæ tenuioribus liquidis replentur, per cerebri membranas, vel ipsam ejus substantiam ubique dispersa, frangantur; & his fractis, effusi humores, collecti sub cranio, comprimant contentum encephalon. Uti enim jam aliquoties dictum fuit, totum calvariæ cavum semper exactissime plenum est; hinc non possunt effusi humores hic colligi, quin fiat ab iisdem compressio contenti encephali. Omnia ergo illa mala, quæ ab hac compressione fiunt, & numerata fuerunt §. 267. metuenda sunt. Nihil enim refert, hoc respectu, quam sit causa comprimens: sive cranii figura mutata minuatur ejus cavum, sive humores effusi, manente eadem calvariæ amplitudine, spatium occupent, quod antea à solo encephalo replebatur exactissime; effectus semper erit idem; nempe turbatio, vel abolitio functionum encephali, compressa ejus substantia.

Vasa sanguinea, quæ per duram matrem disperguntur, satis firma sunt, tunicis nempe callosis instructa, uti in reliquo fere toto corpore, unde difficilius franguntur. Sed si consideretur, duram matrem ubique calvariæ firmiter adhærere, facile patet, causæ vulnerantis imperum, in calvariam agentem, substantiæ continuitate quasi, facilius communicari duræ matri: accedit, quod fissæ vel fractæ calvaria, summum periculum sit, ne adhærens dura mater simul laceretur, vel à fragmentis ossis acutis vulneretur. Vasa autem sanguinea, satis magna, per piam matrem, ipsamque medullarem substantiam dispersa, tenerrima sunt, (depositis nempe callosis tunicis suis huc perveniunt, uti ex Physiologicis constat) hinc facilius rumpi poterunt, licet tutius recondantur.

Præterea humores fractis vasis effusi, stagnantes, spontanea degeneratione corrumpuntur; & acres facti tenerrimam encephali pulpam inflammando, suppurando, rodendo, destruent: unde iterum omnia eadem mala nascentur, quæ à compressione fieri observata fuerant; sed longe pejora; quia ablata causa comprimente spes erat restitui posse functionum integritatem; destructa vero ipsa organi fabrica, erosio tenerrimis vasis, immedicabile malum est. Ab effusis autem & corruptis, humoribus talia mala fieri, constat ex illis, quæ dicta sunt in commentariis §. 170. n^o. 1. B. & §. 268.

Ex his etiam patet, gravissima capitis vulnera, dum fracta calvaria exitus patet effusis humoribus, sæpe minus periculosa esse, quam ubi leviori vulnere sub calvaria effusi humores retinentur. Vide commentaria in §. 265.

Arterias autem, venasque sanguineas ruptas, sanguinem effudisse sub calvaria, nemo dubitat; & ab hoc sanguine effuso, encephalon comprimente, orta fuisse omnia illa mala recensita, constat certissimis observatis. An vero lymphatica vasa, per encephali fabricam dispersa, à similibus causis rupta, tanta copia lympham fundere possint, ut ab hac lymphæ collecta comprimantur encephalon, magis dubium videri posset; cum hæc vasa tam exigua sint, & rarius accidat, quod, integris manentibus vasis sanguineis per encephalon dispersis, sola lymphatica rupta fuerint. Talia tamen vasa adesse, quæ tenuissimam lympham vehunt, satis constat. Tota superficies duræ matris, quæ piæ matri accumbit, semper humida apparet; uti & tota externa encephali superficies: ventriculorum cerebri omnis ambitus tenuissimo tali liquido madet, quod nisi adesset, contiguæ superficies partium brevi concreverent inter se. Illud tenuissimum fluidum, continuo halitus forma per

rima vascula expulsum, nisi resorbeat venulis, accumulatur, & omnes cerebri morbos producere poterit; uti observata plurima apud auctores docent, lympham talem collectam fuisse inter duram matrem & cerebrum, inter piam matrem & arachnoideam ipsi accumbentem, in ipsis cerebri ventriculis &c. Observatum enim fuit, omnem ventriculorum cerebri superficiem regi membrana tenerissima, quæ injectionibus Anatomicis, & per inflammationem hic natam, vasculosa esse detegitur (a). Sed hæc vascula naturaliter tenuem lympham, non vero rubrum sanguinem, continent. Præterea vasa lymphatica vulgo Anatomicis dicta, quæ semper venosa sunt, hic pariter inventa fuerunt, & à *Ridley* delineata (b). Cum ergo & in aliis corporis partibus vulneratis aliquando sequatur incredibilis lymphæ tenuis effluxus, videtur & idem in encephalo obtinere posse; illudque observatis Medicis confirmatur. Puer septennis, baculo caput percussus, post cephalalgias, vigilias, somnolentiam, vertiginem &c. vigesimo sexto die moritur. Ventriculi anteriores cerebri inveniebantur sero lymphidissimo distenti (c). Illustrissimus Princeps ex alto delapsus capitis sinistram partem tam valide gradibus allidit, ut semianimis sine sensu, motu, loquela jaceret per integrum fere diem; Venæ sectione instituta parum ad se rediit. Ingens dein oritur capitis dolor, dies noctesque torquens immaniter, omnemque somnum impediens. Communi Medicorum peritissimorum consilio trepanum adhibendum esse conclusum fuit; dumque illud jamjam applicandum esset, incipit serosus latex ex aure sinistra exstillare, & pergit ille effluxus, donec octo libræ sic prodirent (d). Plura similia habentur observata; sed tamen in omnibus illis casibus notabili temporis intervallo post vulnus inflictum talis lymphæ inventa fuit in cerebro, vel effluxit per aures &c. unde adhuc aliquod dubium manet, an à ruptura vasorum Lymphaticorum, an vero alia de causa hujus Lymphæ accumulatio facta fuerit.

HÆC VASA EX CRANIO IN DURAM &c. Prout jam liquida, fractis vasis effusa, hæserint in variis locis encephali, poterunt comprimendo, vel rodendo, lædere diversas functiones. Sic v. g. dum effusi in ventriculis cerebri humores ad quartum ventriculum perveniunt, qui initium est rimæ decurrentis per totam longitudinem spinalis medullæ; poterunt hac via delabi, & varias paralyses particulares, hemiplegiam &c. producere. Cæteris autem paribus, semper erit eo pejus malum, & difficilius curandum, quo profundius hæserint humores extravalati. Sanguis enim collectus inter cranium & duram matrem, perforata calvaria, statim exibat; si inter duram matrem & piam hæserit, non nisi pertusa dura matre educi poterit. Si in ipsis ventriculis cerebri, vel & circa basim calvariae hæreant effusi humores, patet facile summum discrimen & curæ difficultas; quæ sæpe etiam omnino impossibilis est, dum nequit exitus conciliari per artem effusis liquidis encephalon comprimentibus.

§. 274. **C**ONCUSSUS validus capitis, integro sæpe cranio, eadem (273) facit rumpendo, comprimendo.

Aliquando accidit, lapsu ex alto, vel capitis valida contusione obtuso instru-

(a) Winslow Exposition Anatomique &c.

pag. 623.

(b) Ridley Anat. Cereb. F. 5. l. 44.

(c) Bohnius de renunciat. vulner. pag. 181.

(d) Miscell. curios. decur. 1. an. 6. observ.

12 pag. 23.

mento facta, integro cranio, sic lædi cerebrum, ut omnia sequantur mala, quæ hæcenus enumerata fuerunt. Dum enim v. g. quis ex alto delapsus duro impingit obstaculo, cerebrum calvaria contentum eadem velocitate deorsum fertur; sed obstaculum resistens calvariae motum sistit primo, unde cerebri moles, adhuc illo momento priorem motus directionem habens, valide poterit allidi ad duram calvariam, & sic insigniter lædi. Eodem modo, ac dum quis navi vehitur, & obstaculum occurrens navis motum sistat, perget moveri antrorsum, & cader. Verum quidem est, cum encephalon calvariam exacte repleat, multum minui hujus impulsus vehementiam; tamen inde posse frangi vasa encephali, humores effundi, & omnia, quæ inde pendent, mala sequi, docent observata Medica. *Pulchra virgo, Nerei filia, annorum viginti ab amica muliercula ludente lata manu syncipus percussa est, ac tunc tenebricosa vertigine prehensa est, nec respirabat; cumque domum pervenisset, illam statim febris prehendit, & caput doluit, & rubor erat circa faciem. Septima die ad aurem dextram pus prodiit graveolens, subrubrum, cyatho amplius; & videbatur melius se habere, & levata est &c. nona die periit (a).* Facile apparet, levi tali percussione, lata manu facta, calvariam fractam, vel fissam aut intropressam minime fuisse; sed ipsum encephalon sic fuisse læsum, ut fractis vasis effusi humores in fætidum subrubellum ichorem degeneraverint, & tandem mors ipsa secuta fuerit. Plurima similia apud recentiores Observatores habentur exempla, quibus constat, illaeso cranio, posse tamen valida capitis percussione sic lædi encephalon, ut fractis vasis majoribus, & sanguine effuso intra calvariae cavum, mors sequatur. Unicum tale adduxisse sufficiet. Puellæ sedecim annorum, ex lapsu quarto die defunctæ, cadaver lustravit *Bohnius (b)*, ut de mortis causa renunciaret ad Judices: & licet post lapsum viventi adhuc puellæ ex ore & naribus copiosus manasset cruor, ac post mortem adhuc manare pergeret, nihil omnino violenti effectus in capite observabatur. Aperta calvaria, & elevato cerebro, carotidum ramus sinister anterior ruptus inveniebatur. Docet hoc exemplum, magnam arteriam, tuto sub ipsa basi cerebri reconditam, solo concussu tali, calvaria illaesa, posse rumpi: unde apparet, simile malum reliquis encephali vasis accidere posse. Cum autem constet ex Physiologicis, arterias per piam matrem dispersas, simulac corticem cerebri ingrediuntur, in tomentosam tenuitatem abire, & vasculis his tenerimis corticalibus continuari medullosas fibras minimas; facile patet, valido tali concussu posse frangi vel comprimi tenerissima illa encephali stamina, unde vita & humanitas pendent: atque inde varia læsio, vel & abolitio omnium encephali functionum, sequi possunt; licet nulla læsio, aut humorum effusio, intra cavum calvariae detegatur: Omnem enim sensum hæc minutissima fugiunt. Juvenis robustus, ut evitaret rotæ supplicium, in carcere prono capite, manibus post tergum rejectis, tanta vi impegit in parietem validissimo cursu, ut ilico conciderit mortuus, nullo verbo vel clamore edito. Dum cadaver lustrabatur, nulla contusio, nullus tumor, nulla fractura apparebant in capitis vertice, quo impegerat in parietem (uti testabantur alii eodem loco inclusi). Integumentis omnibus ablatis, in illorum parte interiori, qua calvariae accumbunt, nulla læsio apparebat; neque in ipsa calvaria, præterquam quod pars squamosa ossis temporum parum secessit.

(a) Hippocr. Epid. lib. 2. textu 32. Char-
ter. Tom. IX. pag. 343.

(b) De Renunciat. vulner. pag. 172.

set ab osse bregmatis, cui incumbit; tamen inde nullo modo tam subita mors sequi poterat. Serra disicillo cranio nullum omnino damnum apparebat, sed encephalon non replebat exacte calvariae cavum, ut solet, & totius encephali substantia firmior & solidior apparebat, quam aliter observatur (a). Patet ex hac historia, subitam mortem, validam capitis percussione[m] talem secutam, tantum adscribi potuisse huic encephali totius subsidentiae, per quam tenerrima illa stamina vel fracta fuerunt, vel sic intorta aut complicata, ut non amplius pervia manserint subtilissimis totius corporis liquidis.

Simul etiam colligitur ex dictis, diversas posse functiones encephali laedi, prout variae partes hujus organi tali concussione laesae fuerint. Hippocrates dixit (b), *Quibus cerebrum quadam occasione concussum fuerit, illos quam primum voce privari necesse est*; & alibi (c) addidit, *talem nec videre nec audire necesse est*. Et Heurnius in Commentariis suis ad hunc Aphorismum (d) dicit, se novisse quosdam, qui, cum in occiput lapsi fuissent, tota vita gustum & odoratum amiserint. Quatuor annorum puer, sine ulla difficultate loquens, de scamno in caput decidit; nullum omnino observatur damnum: tertio die surgens puer incipit balbutire, ceterum sanus; sequentibus diebus augetur malum; deinde fomentis cephalicis capiti applicatis, aliisque quibusdam remediis interne datis, rediit loquelae integritas (e). Homini cuidam post capitis percussione[m] per plures annos mansit summa difficultas loquendi, quando decumberet (f). Neque tantum talis cerebri concussio fit, percussio capite; verum etiam accidere poterit, dum quis ex alto delapsus aliis corporis partibus impeerit. Tale exemplum habetur apud Galenum (g) de homine, qui ex alto delapsus dorsi initium terrae impeerat; tertio die postea exiguum vocem emisit, quarta omnino obmutuit, & resoluta simul fuerunt crura, manibus omnino illaetis &c. septima die redierunt vox & erurum motus. Galenus quidem solius spinalis medullae affectionem hic culpavit, sed cum paralysis solos inferiores artus occupaverit, facile patet, spinalis medullae initium non fuisse laesum, aliter & manus paralyticae fuissent. Unde vocis ablatio in hoc casu cerebri concussioni potius videtur adscribenda esse.

§. 275. **C**OGNOSCUNTUR mala haec (273. 274.) ex nota causa; ejus impetu; loco excipiente; vomitu bilioso; visu, auditu, olfactu, gustu, tactu minutis, depravatis, sublati; vertigine, caligine, lapsu; sopore, stertore; resolutione; convulsione; delirio; lethargo; apoplexia; horripulatione; febre geminata; cruore per os, nares, aures effluente; rubore faciei & oculorum.

Agitur hac paragrapho de signis, per quae cognosci potest, effusos humores.

(a) Academ. des Sciences l'an 1705. Histoire pag. 68. 69.

(b) Aphor. 58. Sect. VII. Charter. Tom. 9. pag. 325.

(c) Hippocrat. de Morbis Lib. I. cap. 2. Charter. Tom. VII. pag. 333.

(d) Pag. 504.

(e) Miscell. Curios. dec. 1. ann. 1. observ. 120. pag. 197.

(f) Academ. des Sciences l'an 1732. Hist. pag. 42.

(g) De Locis affectis Lib. I. cap. 6. Charter. Tom. VII. pag. 395.

sub

sub cranio premendo; vel rodendo acrimonia stagnando acquisita, encephalon lædere; vel etiam concussione sic mutatam esse tenerrimi hujus organi fabricam, ut ejus functiones inde turbentur, vel deleantur.

EX NOTA CAUSA, EJUS IMPETU, LOCO EXCIPIENTE. Omnia enim hæc, si cognita fuerint, magnam lucem affundent latentium malorum inquisitioni. Obtusum enim instrumentum vulnerans, valido impetu capiti impactum; semper metum facit fissuræ vel fracturæ cranii. Prout jam vario loco capitis læsio facta fuerit, iterum majus minusve periculum erit. Quibusdam enim in locis calvaria tenuissima est, aliis locis longe crassior. Satis notabiles arteriæ duræ matris in profundis sulcis calvariæ hærent in certis locis, unde causa lædens, his locis applicata, facile frangere poterit hæc vasa, & effusus sanguis comprimere encephalon.

VOMITU BILIOSO. Ille enim vulnera capitis sequens fere semper male affectum cerebrum designat; sive ab effusis humoribus compressum fuerit, sive concussione valida turbata fuerit ejus actio. De hoc vomitu autem dictum fuit §. 167.

VISU, AUDITU, OLFACTU, GUSTU, TACTU MINUTIS, DEPRAVATIS, SUBLATIS. Constat ex Physiologicis, cerebri integritatem requiri, & liberum commercium inter cerebrum & nervos his sensibus inservientes, ut fiat perceptio idearum, quæ per sensus externos menti repræsentantur. Unde patet evidenter, si post vulnera capitis minuat, aut depravetur, vel & integre aboleatur horum omnium, vel quorundam tantum actio, cerebrum sic affectum esse, ut origo nervorum, his sensibus inservientium, compressa, vel alio quocumque modo læsa, non amplius transmittat subtilissimos spiritus cerebri fabrica secretos, & ad sensuum integritatem requisitos.

VERTIGINE, CALIGINE, LAPSU. Dictum fuit in Commentariis §. 167. levissimum cerebri morbum esse vertiginem, sive apparentem rotationem corporum vicinorum; ubi vero augetur malum, tunc simul tenebras apparere: & vocatur tunc vertigo tenebricosa; simul sic resolvitur tunc omne corporis robur ut incipiant vacillare omnia membra, & tandem cadat homo. Illud autem designat, quod non tantum illa pars sensorii communis affecta sit, quæ nervis sentientibus originem dat, sed etiam malum pertigerit ad illa loca, unde nervi, motibus muscularibus inservientes, oriuntur. Unde in loco allegato in commentariis §. 140. n°. 4. Hippocrates signa enumerans, quibus cognoscitur, an aliquis graviter capite vulneratus fuerit, tria hæc conjungit, tenebras circumfusas, vertiginem, lapsum. Et alibi (a) monet, quod in omnibus alicujus momenti capitis vulneribus rogare oporteat, an conciderit homo, vel in altum soporem delapsus fuerit: si enim horum quidpiam factum fuerit, majori custodia opus est. Rationem dein addit, non quod hæc designent semper, cerebrum ipsum vulnere læsum esse, sed simpliciter, quod encephalon vulnus tunc perceperit (τὸ ἐν κεφαλῇ ἐσπαύσατο τὸ πρῶτον.)

SOPORE, STERTORE. In locis citatis inter mala signa semper profundus sopor numerabatur; si vero simul stertor accesserit, pessimum est: Quando nempe toto proflant pectore somnum, ut in Apoplecticis fit; tuncque designat,

(a) Prothetor. Lib. 1. Cap. 10. Charter. Tom. VIII. pag. 318.

per vulnus omnes actiones cerebri deletas esse; solas autem cerebelli functiones integras mansisse; imo plerumque auctas, dum, libero humorum transitu per cerebrum impedito, tanto fortior & velocior liquidorum trajectio per cerebelli fabricam fit.

RESOLUTIONE; CONVULSIONE. Cum à cerebri integritate pendeat exercitium muscularis motus, quatenus voluntatis imperio subjacet; hinc ejus læsione poterunt omnes, vel aliqui muscoli corporis paralytici fieri; & quia tunc muscoli sic affecti flaccidi & penduli fiunt, hinc dicuntur resoluti. Ubi autem muscoli voluntarii violenta & alterne repetens contractio fit, sed invita; tunc convulsio adesse dicitur: quæ plerumque tunc oritur in hoc casu, quando per quædam loca cerebri manet libera spirituum transmissio, per alia vero impeditur. Potest etiam hoc malum à spinis ossibus, pungentibus medullarem cerebri substantiam, vel & humoribus effusis, acerbis factis & rodentibus &c. excitari. Utrumque hoc malum semper cerebrum affectum in vulneribus capitis designat.

DELIRIO. Quando nempe ideæ excitatæ in mente non respondent objectis externis, sed ab interna sensorii communis mutatione ortum ducunt, tunc dicitur homo delirare: unde apparet, in vulneribus capitis delirium semper malum signum esse, quia designat cerebrum ipsum affectum esse. Quod etiam monuerat Hippocrates in locis allegatis in commentario ad §. 267.

LETHARGO. Otiosa quasi oblivio dicitur hoc malum quod motum & sensum tollit cum inexpugnabili necessitate dormiendi: ita tamen, ut sic decumbentes omnibus illis, quæ validissime sensus afficiunt, adhuc excitari possint; sed mox iterum in somnum relabantur. Unde cerebri functiones omnes maxime impeditas designat hoc malum, ideoque semper magnum periculum denotat.

APOPLEXIA. Omnia, quæ hætenus enumerata fuerunt, symptomata docebant cerebrum affectum esse quidem, sic ut quædam ejus functiones depravatæ vel abolitæ fuerint: ubi vero omnes omnino cerebri actiones silent, omnes sensus interni & externi, motusque voluntarii, cessant, superstitæ sola actione cerebelli, quod vitalibus motibus inservit; tunc apoplexia adesse dicitur: quæ summus cerebri morbus est, & plerumque in capitis vulneribus ab effusis humoribus compressum esse cerebrum indicat.

HORRIPULATIONE. Quæ fere semper designat in hoc casu sanguinem ruptis vasis exire; præsertim si sine ordine recurrat, neque febrem incipientem comitetur. Videmus etiam frequenter in morbis, magnas mutationes secuturas horripulationem talem præcedere; unde in vulneribus capitis semper illa horripulatio suspecta est, cum designet intima quasi sensorii communis perturbari, unde tales concussus in toto corpore fiunt.

FEBRE GEMINATA Dictum fuit §. 148. n°. 6. omni vulnere alicujus momenti illo tempore, dum pus fit, levem adesse febriculam; quæ ergo nihil funesti designat; sed ubi hæc febricula subito augetur; vel postquam hæc cessaverit, nova & vehemens febris insurgit; semper designat, magnum latere malum. Monuit ideo Hippocrates (a): *Quibus cerebrum vulneratur, febris plerumque ac bilis vomitus accedit, & corporis sideratio, atque tales perniciose habent.* Et in Protheticis (loco allegato §. 240. n°. 4.) dicit, optimum quidem esse, si capite

(a) Coac. Prænot. n°. 500. Charter. Tom. VIII. pag. 881;

vulneratus non febricitet &c. si vero quid horum apparuerit, securissimum est, ut in principio fiat &c. at incipere febrim in capitis vulnere quarta, aut septima, aut undecima die, valde lethale est. Talis enim febris novam inflammationem aut validam suppurationem, hic adeo periculofam, designat. Unde & in illa Historia, quæ ex Hippocratis libro secundo Epidemiorum præcedenti paragrapho allegata fuit, talem febrem geminatam pessima symptomata & mors ipsa secuta sunt. Puella enim illa, leviter manus palma synciput percussa, statim quidem febricitavit; sed dum septimo die pus graveolens subrubrum cum levamine effluxisset, iterum increfcebat febris, somnolenta fiebat, loquelam perdidit, faciei pars dextra contrahebatur, respiratio difficilis, tremor, convulsio &c. nona die periit. Dum examinantur historiarum vulnerum capitis apud observatores, plurima talia occurrunt exempla, quæ docent, febrem sic subito post aliquot dies incrementem, vel & de novo ortam, mali fuisse ominis; & fere semper, encephalon læsum vel compressum fuisse.

CRUORE PER OS, NARES AURES EFFLUENTE. Non videtur sanguis sub calvaria effusus per has vias exire posse, cum dura mater adeo accurate omnem interna cranii superficiem investiat, ut nullus detur exitus. Verum quidem est, quod constat observatis medicis, sæpe chronica capitis mala levata fuisse, dum per has vias exirent humores, quod notavit Hippocrates (a) dicens: *Capite laboranti & circumquaque dolenti, pus aut aqua, aut sanguis effluens per nares, vel aures, vel os, solvit morbum.* Nondum tamen per Anatomem hodie cognitam detectæ sunt illæ viæ, per quas humores calvariae cavo contenti sic exire possent; forte per morbum factæ fuerunt, licet naturaliter non præexisterint. Sic & in aliis morbis tales exitus humorum observantur, licet hætenus lateant viæ. Pleuritis enim sic sputis, per pulmonem educis, solvitur &c. Certe si tam facilis foret exitus sanguini sub calvaria effuso, non indigeremus cranii perterebratione; quam tamen tot experimentis necessariam & utilem fuisse constat. Sed sanguis per os, nares, vel aures effluens, denotat maximo impetu causam vulnerantem caput percussisse; cum arteriæ potuerint frangi per hanc vim: ideoque summus metus est, etiam illa vasa sanguinea, quæ per encephalon decurrunt tunicis callosis suis orbata, rupta esse.

RUBORE FACIEI ET OCULORUM. Sanguis ex corde per arterias carotides pulsus partim ad interiora capitis per internas dictas carotides pergit, partim per externas carotides distribuitur, quæ faciei & externis capitis partibus prospiciunt. Ubi ergo, effuso sanguine cerebrum comprimente, liber trajectus humorum per cerebrum impeditur, tanto majori copia per carotides externas fertur; unde facies magis rubicunda, tensa & florida apparebit. Et quia carotis interna, postquam ex canali osseo, per quem transmittitur, emergit, ramos dat, qui ad oculi orbitam, ipsumque oculum tendunt, ibique cum externæ carotidis ramis communicant; ideo impedito libero transfluxu sanguinis per cerebri vasa, oculi imprimis rubent, quia statim major copia sanguinis per ramos illos carotidis internæ, qui ad oculos tendunt, derivatur. Ideo faciei & oculorum rubor tam suspectum signum dat in omnibus capitis morbis. Fortissima Apoplexia decumbentes turgidam, inflatam, & rubicundam faciem habent. In phreniticis floridus ille vultus adeo damnabatur ab Hippocrate: Et in puella illa, cujus historia ex Hippo-

(a) Aphor. 10. Sect. VI. Charter. Tom. IX. pag. 253.

crate habetur præcedenti paragrapho, & quæ à levi capitis percussione periit, ade-
rat faciei rubor. Pluribus in locis apud Hippocratem damnatur oculorum rubor,
& facies illa florida. Sic (a) dicit: *Qui caput dolent, cum stupore delirantes,
alvo suppressa, feroci oculorum aspectu, floridi, opisthotonici sunt.* In quo loco per
ferocem illum aspectum turgent oculi & sanguine suffusi, uti in summa iracun-
dia sit, intelliguntur. Et in subsequente sententia addit (b). *Quæ caput concutunt,
oculi prærubri & manifeste delirantia, perniciofa.*

§. 276. **Q**UIS vero locus intra cranium sit læsus scitur. 1. ex
sensibilibus externis (249. 254. 255. 256. 262. 267.
269.), si adsunt. 2. invento loco cranii læso (255) per artem. 3.
ex tumore & rubore cutis capillis orbæ ad applicationem emplas-
tri. 4. ex motu spontaneo manus ad certam capitis partem. 5. ex
symptomatibus lateris unius paralytici, alterius convulsi.

Postquam constitit ex præcedentibus signis, encephalon per vulnus læsum esse,
sive instrumentum vulnerans ad interiora penetraverit, sive intropressa calvaria
aut effusis humoribus, illud compressum fuerit; queritur, in quo loco encephali
damnum hæreat. Patet facile, quod summi momenti res sit, hoc recte cognoscere;
cum cranii perterebratio non possit institui cum fiducia, nisi prius constet, in quo
loco hæreat malum. Sæpe tamen satis difficile est locum affectum determinare. Nam
aliquando læsio in alio longe loco inventa fuit, quam ubi causa vulnerans appli-
cata fuerat, uti dictum fuit in commentariis §. 254. Sæpe etiam nec ægri, nec ad-
stantes, indicare possunt, quenam capitis pars ictum exceperit. Neque à functio-
nibus læsis observatis post capitis plagam hoc certo determinari poterit. Inde enim
quidem concluditur: encephalon læsum esse, sed nullus inde auderet semper cer-
to concludere, quisnam encephali locus læsus esset. Quis auderet determinare lo-
ca cerebri, unde singuli nervi, sensibus externis inservientes, primam suam ori-
ginem ducunt, quis memoriæ, ratiocinii &c. sedem in mirabili hoc & intricatis-
simo organo demonstrare poterit? Celeberrimi viri miras hic quidem finxerunt hy-
potheses; sed eventus docuit, summa etiam ingenia, dum speculationibus indul-
gent, turpiter errare posse. Magnus STENON, tanta peritia in Anatomicis &
dexteritate valens, candide in publico Eruditissimorum virorum confesso falsus est,
se cerebri fabricam ignorare omnino (c): & in pulcherrima illa dissertatione va-
na omnia figmenta destruxit, & veram monstravit viam, qua sensim ad cognitio-
nem hujus organi ascendere posset humana industria. Interim tamen per signa hac
paragrapho descripta, quantum per artem hodie cognitam licet, in locum af-
fectum encephali inquirendum est. Et si omnibus his accurate examinatis tamen
quis erraverit, non erit artificis vitium, sed artis ipsius defectus, quem forte se-
quentium sæculorum inventa emendabunt.

1. De his dictum fuit in Paragraphis hic citatis.

2. Numero hic citato recensita fuerunt ordine omnia illa signa, per quæ co-

(a) Coac. Prænot. n°. 163. Charter. Tom. VIII. pag. 861.

(b) Ibid. n°. 163.

(c) Winslow Exposit. Anatom. pag. 641.

gnoscebatur ipsius calvariae læsio: si ergo per hæc constiterit, cranium in quodam loco læsum esse, & simul appareant symptomata, quæ docent encephalon affectum esse; habetur admodum probabilis ratio concludendi, encephali læsionem hære illo in loco, quem cranium male affectum demonstrat.

3. Ubi per signa §. 275. recensita constar, encephalon læsum esse, neque tamen ullum indicium adsit, quo locus affectus determinari posset; tunc sequenti methodo conantur invenire Chirurgi locum læsum. Omne capillitium novacula abradunt; deinde toti capiti applicant Emplastrum aromaticum quodcumque, illudque per aliquot horas relinquunt. Deinde ablato Emplastro omni cura totum caput lustrant, an aliquid tumidi vel inflammati appareat in quodam loco; quod si inveniatur, tunc magna suspicio est, huic loco subesse læsionem. Dum enim hoc Emplastrum cuti capitis adhæret, & blando stimulo aromatico paulo majorem motum excitat, si quid contusi fuerit, facilius hoc apparebit orto tumore. Ubi non poterat detegi, quonam in loco capitis læsio hæreret, huic calamitati nullis remediis posse subveniri Hippocrates pronunciavit (4).

4. Qua ratione hoc fiat, quis dixerit? Rem tamen sic se habere, quotidiana & certissima docent observata. Ipso hoc die, quo hæc scribo, hominem ex alto lapsum vidi, sine ullo sensu jacentem, qui dextra capitis & faciei parte duro obstaculo impegerat, cum valida contusione & levibus vulnusculis harum partium; continuo manu dextra in altum sublata tangebatur, imo fricabat satis fortiter affectas partes. Postquam valida missione sanguinis ad se rediisset post bihorium, nullius omnino rei se memorem esse dixit, postquam lapsus fuerat. Dum ergo videbant Chirurgi, quod automatico tali motu manus sic vulneratorum deferretur ad locum læsum, probabili conjectura concluderunt, ubi nulla læsio externa conspiciebatur, indicari pariter locum affectum, si ad certam & semper eandem capitis partem spontaneo tali motu manus decumbentis ferretur. In Apoplecticis idem illud Phænomenon sæpe apparet. Videtur certe signum hoc magnum pondus habere, cum observentur plurimi tales motus automatici, qui nullo modo à voluntatis imperio pendent, neque à mente conscia prædeterminantur; per quos illud, quod noceret, tollere conatur corpus nostrum, mirabili hac proprietate à Creatore instructum.

5. Illud organum corporeum, unde in nobis sensus & motus voluntarii pendent, videtur in sua origine, collectione, distributione & operatione duplex esse. Carotis enim arteria dextra & sinistra est, vertebralis dextra & sinistra est: Ex his oritur hæmisphærium cerebri dextrum & sinistrum, distinctissima à se invicem, tota medullæ collectio in sinistram & dextram dividitur; quod in corpore calloso, fornice, cruribus medullæ oblongatæ, nervis opticis, olfactoriis &c. imò etiam in ipsa medulla spinali & nervis inde derivatis, evidentissime apparet. Licet tamen omnia hæc sic duplicia inveniantur, tamen unus & simplex est homo, qui sentit: bini nervi olfactorii, adeo distincti in sua origine & progressu, tamen eundem sensum olfactus faciunt. Dum binis oculis revera bis videmus idem objectum (uti patet limite medio inter binos oculos posito, vel leviter tantum pressio digitis alterutro oculi bulbo) tamen unica visio fit: idem in auditu verum est.

Cum ergo illud organum sentiens & movens duplex sit, hinc una pars potest

(4) De vulner. Capit. cap. 10. Charter. Tom XII. pag. 119.

integra manere, dum altera, quoad corpoream speciem manens, impotens omnino sit ad omnia: uti patet in Hemiplegia: in quo morbo dimidium corporis sic resolvitur, ut nullus motus à mentis arbitrio pendens ibi supersit; tamen manet illa facultas conscia, sentiens & cogitans motum; & licet homo sic affectus omni nixu velit movere latus affectum, nullus tamen sequitur motus in musculis; imo etiam aliquando in pessima morbi hujus specie simul omnis sensus aboletur in latere affecto.

Hippocrates (a) jam monuerat hoc dicens: *Cerebrum hominis duplex est, uti etiam in omnibus aliis animalibus; medium autem ipsius dividit membrana tenuis; quare non semper eadem capitis parte dolet, sed particulatim alterutra, aliquando vero per totum.* Oritur jam subtilis quæstio, an origo sentiens, & principium illud movens, locentur in parte opposita illi loco, ubi effectus suos edunt; an vero in eodem latere corporis: id est, an motus & sensus origo, qui parte corporis sinistra exercentur, hæreat in parte cerebri dextra, an in sinistra. Hoc autem subtilissimorum Anatomicorum observatis, & Experimentis determinari debebit; illudque cognitum ubi fuerit, magnam lucem affunderet, ut in capitis vulneribus, ex sensuum & motuum læsione in alterutro corporis latere, determinetur locus encephali, ubi læsio hæret.

Mollis & pulposa cerebri fabrica semper magnam difficultatem fecit in demonstrationibus Anatomicis; omnium autem minimam consistentiam habet in junioribus. In senectute, & imprimis in illis hominibus, qui valido labore corpus exercuerunt, firmitus est, & melius tractari potest. In talibus cadaveribus, post diuturnam macerationem dissoluta pro maxima parte corticali, cinerea, encephali substantia, luculenter apparuit, medullares fibras, in dextra cerebri parte ortas, ad sinistram partem tendere, & vicissim. Ille autem fibrarum decursus potissimum triplici in loco animadverti potuit; in utraque scilicet priore & posteriore annularis protuberantiæ crepidine; atque maxime in imo medullaris caudicis, qua in spinalem abit: omnium evidentissime duabus circiter lineis infra pyramidalia & olivaria corpora hoc apparet; si enim leniter à se mutuo deducantur pyramidalia corpora, non tenues decussari fibrillas, sed validos earundem fasciculos in adversam partem tendere evidentissime demonstratur (b). Hoc fere totum est, quod Anatome circa decursum fibrarum medullarium cerebri detexit.

Plurima jam habentur Observata Medica, quæ decussatam illam cerebri actionem confirmant. Serva duodecim annos nata cranium contusum & ruptum habuit; sectione per ferram, non ut decebat, adhibita decimo quarto die periit. *Convulsio autem manum sinistram occupabat, in dextra tamen parte potius vulnus habebat* (c). *Quibus tempora secantur, ex adversa sectionis parte convulsio contingit* (d). Et in pulcherrimo de Capitis vulneribus libro (e) idem confirmat Hippocrates monens, temporum regionem non temere secandam esse, quia sectionem talem convulsio sequitur, dicitque: *At si sinistra tempora secta fuerint, dextra convulsio prehendit; si vero ad dextra fuerint secta tempora, sinistra convul-*

(a) De Morbo Sacro cap. 3. Chater. Tom. X. pag. 478.

(b) Santorin. Observat. Anatom. cap. 3. pag. 61. 62.

(c) Hippoc. Lib. V. epidem. textu 3. Char-

ter. Tom. IX. pag. 341.

(d) In Coacis Prænot. n°. 458.

(e) Cap. 19. Charter. Tom. XII. pag. 123.

sio prehendit. Et in eodem libro (a), ubi signa recenset, quibus noscitur, ex capitis vulnere perituum esse hominem, dicit: *Plerosque etiam altera corporis parte convulsio occupat. Si quidem sinistra capitis parte ulcus habuerit, dextram corporis partem convulsio prehendit. Si vero dextra capitis parte ulcus habuerit, sinistram corporis partem convulsio prehendit.* Sic jam antiquissimis Medicinæ temporibus talia fuerunt observata, quæ huic sententiæ favent.

Inter recentiores Auctores Fabricius Hildanus, qui simpliciter plerumque narrat illa, quæ vidit, nulla admiscens ratiocinia, plures habet observationes, quæ hanc sententiam confirmant. Homo quadragenarius globo ferreo, qui ultra libram cum dimidia pendebat, bregma sinistrum percussus fuit, cum insigni cranii depressione & fractura. In terram quasi mortuus procidit, loquelam, visum & auditum penitus amisit, quin etiam ex opposita parte paralyti correptus fuit. Elevato cranio depresso, & reliquis idoneis auxiliis sanitati restitutus fuit (b). Homini sexagenario lapidis ictu os frontis in sinistro latere illo in loco, ubi capilli prodire incipiunt, profundius impressum erat. Ipso momento ictus in terram procidit, vomuit, simul loquelam, intellectum, visum ac auditum amiserat, totoque latere opposito paralyti correptus fuerat. Amici noluerunt, dissectis integumentis cranium intropressum restitui, & paucis diebus postea periit (c).

Mulier vulnus contusum in dextro ossæ bregmatis cum fractura & intropressione cranii acceperat. Evomit mox ab initio biliosum humorem, & cibum indigestum, sinistrum latus resolutum est, in dextro autem convulsiones patiebatur. Convaluit tamen, licet multum de ipsa cerebri substantia per vulnus eductum fuisset (d). Juvenis robustus baculo vulnus ad sinistrum bregma cum ossis fractura recepit: dilatato vulnere, & cranii fragmentis eductis, post quinque septimanas vulnus fere cicatrice obductum fuit. Ille tunc cum scorto rem habuit, paucisque horis postea recidit in febrim & dolorem capitis vehementiorem, quam ante. Latus item oppositum resolutum est, brachium vero lateris ægrotantis spasmus correptum, & quarto die postea periit (e). Puer ex alto delapsus caput læserat, in initio levius putabatur malum. Os in medio vulnere postea incepit nudari, & in futura sagittali parvum foramen apparuit, per quod copiosum pus exibat: Puris illa excretio aliquando sistebatur per aliquot dies, tuncque quater vel quinque de die fortiter convellebatur spatio quadrantis horæ brachium dextrum, uti & maxilla ejusdem lateris. Simul ac rediret puris excretio, cessabant hæc convulsiones. Moritur tandem puer, & totus lobus sinister cerebri fuit inventus suppuratus, dextro lobo & cerebello integerrimis (f).

Valsalva (g) testatur, se quamplurimis cadaverum sectionibus semper invenisse, quod, ubi alterius medietatis corporis resolutio facta fuerat, causa semper hæserit in opposita cerebri parte, testesque eruditissimos, qui his sectionibus adfuerant, recenset. Et si aliquando ad alteram etiam cerebri partem extensam læsionem invenerit, hæc tamen erat in opposita parte multo notabilior. Inter illos autem viros doctos & graves, qui his experimentis adfuerant, nominat & *Petrum Mol-*

(a) Cap. 31. ibid. pag. 127.

(b) Hildan. Observat. Chirurg. Centur. 2. Observ. 3. Exempl. 1. pag. 78.

(c) Ibid. Exempl. 3.

(d) Ibid. Centur. 1. Observat. 13. Exempl.

1. pag. 21.

(e) Ibid. Observat. 19. pag. 25.

(f) Academie des Sciences l'an 1702. hist. pag. 56. 57.

(g) De Aure Humana pag. 85. 86. cap. 5.

linellum Philosophia & Medicina Doctorem, cujus habetur notabile experimentum (a), quod sic se habet: sinistram cranii partem vivo cani aperuerat, tum duram matrem iterum & sæpius pungens observaverat, canem variis quidem torqueri convulsionibus, præsertim cum illa pars duræ matris pungeretur, quæ maxime ad os adhærebat, nunquam tamen apoplexia corripi. Postremo sinistri cerebri lobum penitus extraxit. Cecidit extemplo canis, non quidem in sinistram latus, quemadmodum exspectandum videbatur, sed in dextrum, & relevatus iterum ad eandem partem procubuit. Simul dextra pars corporis omni sensu carere visa fuit, contra quam accidit in sinistra, quæ & sensum retinuit & motum. Addit deinde, quod noverit, alios idem experimentum sumsisse eodem exitu: & ex his omnibus concludit, quod Celeberrimi viri *Morganus* & *Lancisus* jure merito statuerint, facile posse conjici, utra pars cerebri offensam acceperit, si attendatur, in quodnam latus procubuerint Hemiplectici.

Plurima similia observata possent adduci, quæ & in morbis & in Capitis vulneribus hanc sententiam confirmant: hæc tamen enarrata sufficere posse credo. Imprimis magnum pondus huic opinioni addit illud ultimum in vivo cane tentatum experimentum. Nec tamen dissimulandum est, quasdam occurrere apud auctores observationes, quæ huic sententiæ repugnant; quarum unam alteramve breviter recensebo.

Puer undecim annorum in lethargum gravissimum incidit, & dum profundissimo somno detinebatur, tota pars dextra corporis paralyti resoluta nec movebatur, nec sentiebat. Forestus vocatus, cum nulla alia remedia aderant, thymum contritum cum aceto nari dextræ imposuit, indeque nonnihil reviviscere videbatur puer: simul è nare materia crassa, valde corrupta, sanguinolenta & viscosa instar putridæ saniei exibat. Prædixit hinc Forestus, abscissum una cum sphacelo dextram partem cerebri occupasse. Brevi moritur puer, dumque jam ante obitum, rebus omnino conclamatis, discessum meditaretur Forestus, Nobilis Matrona, quæ curam pueri habebat, utroque parente absentibus, illum retinuit, ut cadavere inciso mortis causa detegi, & parentibus renunciari posset. Cranio ablato, cerebrum & cerebellum in parte dextra vergens ad posteriorem partem, omnino saniosum, putridum corruptum & sanguinolentum inventum fuit; sinistra vero pars cerebrum album, sanum & incorruptum habebat. Sic in cadavere præfagii veritas detecta magnam famam Foresto conciliavit (b). Casus ille sollicitè descriptus directe repugnat ante memoratis, & videtur magnum pondus habere.

Juvenis læditur in regione bregmatis sinistri; postridie dextri lateris convulsivi motus, & sinistri paralyti observantur. Tota regio bregmatis sinistri contusa deprehendebatur, ut sua sponte octo ossa separarentur, de quibus unum acutius in ipsam substantiam cerebri per utramque meningem depressum inveniebatur (c). In hoc casu resolutio ejusdem lateris partem, convulsio oppositum latus tenebat; contraria ergo directione, ac in casibus paulo ante recensitis.

Valsalva (d) candide monuit, nihil dissimulare volens, in uno alterove ca-

(a) In Commentariis de Bononiensi Scientiarum & artium instituto pag. 139.

(b) Forest. Observat. Lib. X. obs. 11. Tom. I pag. 414.

(c) Bonet. Sepulcret. c. Anatom. Pract. Lib. I. Sect. XV. Observ. 27. pag. 373.

(d) De Aure Humana cap. 5. pag. 86.

su in utroque Hemisphærio cerebri æqualem læsionem sibi apparuisse; frequentissime tamen vidisse oppositam lateri résoluto plagam cerebri affectam esse.

Si tamen consideretur, sæpe nihil detectum fuisse post mortem in cerebro; licet gravissimæ læsiones functionum hujus visceris adfuissent ante mortem; cum levis tantum mutatio vel compressio in tenerrimis his staminibus sufficiat ad pessima quæque producenda mala, uti pulchro experimento docet *Valsalva* in loco citato.

Nervi Cordis ad jugulum canis filo arcte constricti, & ilico soluti, adeo in structura sua insensibili labefactati fuerunt, ut canis intra aliquot dies, eodem modo, ac si nervi illi amputati essent, moreretur; licet iidem nervi rursus intacti nullum sensibilis læsionis vestigium ostenderent. Unde potuit in talibus casibus à solo etiam concussu oppositum cerebri hemisphærium in sua fabrica læsum fuisse, licet sensibus nihil mali detegi post mortem potuerit. Quod adhuc magis probabile apparebit, si consideretur, læpe duram calvariam in opposita parte hndi, dum illa pars, quæ ictum excepit, integra manet, uti dictum fuit in commentariis §. 254.

Cum ergo numerosissimæ observationes celeberrimorum Auctorum, & experimenta in vivis animalibus capta decussatam illam cerebri sentientis & moventis actionem confirment; pauca tantum habeantur Exempla, quæ repugnent huic sententiæ, illaque adhuc possint sic explicari, ut saltem minus repugnare videantur; patet, si non omnino certam, saltem maxime verosimilem esse hanc opinionem, qua statuitur, quod si unum lateris paralyticum, alterum convulsus fuerit, tunc mali origo hæreat intra cranium in illa parte, quæ lateri paralytico opponitur. Si vero convulsio v. g. in dextro latere corporis appareat, & nullum omnino vitium adsit in latere sinistro, tunc ob eandem causam admodum videtur probabile, sinistram cerebri partem affectam esse sic, ut æquabilis influxus spirituum in musculos dextri lateris turbetur quidem, non tamen impediatur omnino. In Exemplis modo memoratis tales casus habentur.

Notandum tamen quam maxime, in nervis illam oppositionem directionis non obrinere, quæ in cerebro per hæc experimenta detegitur: nam nervi in dextra parte orti eidem lateri prospiciunt. Celeberrimi Anatomici fuerunt in alia opinione, & imprimis crediderunt, nervos opticos se mutuo decussare, & ad oppositi lateris oculum tendere singulos; multisque opticis Phænomenis explicandis hoc inservire posse arbitrati sunt Philosophi. Fortuitus tamen casus docuit contrarium: Celeberrimus *Santorini* (a) dissecabat cadaver hominis, cui dexter oculus jam dudum cæcus fuerat vera Amaurosi, nullo deprehenso vitio conspicuo oculi. Nervus opticus hujus oculi inventus fuit æquo gracilior, & colore obscurior, utpote cinereus; quem cum anxie persequeretur dexterrimus ille Anatomicus, invenit illum nervum, coloris diversitate facile distinguendum, semper dextrum lateris tenere; & simul evidentissime vidit, nervorum opticorum fibras, non inodo non decussari, sed ne implicari quidem; sed tantum hos nervos sibi mutuo accumbere, & dein iterum disjungi.

(a) Observat. Anatom. cap. 3. §. 14. pag. 64;

§. 277. **T**UM 1. cruor effusus ilico tollendus. 2. loca infecta depuranda. 3. officula forte infixata cerebro evellenda.

Quando jam constitit, causam lædentem quamcumque capiti fuisse applicatam cum tali effectu, ut functiones encephali læsæ fuerint, primo examinatur, qualis fuerit hæc læsio, an ab intropulsa calvaria contentum cerebrum premente vel acutis fragmentis pungente vel lacerante, an ab effusis sub cranio humoribus; an vero à valido concussu hoc factum fuerit. Quibus autem signis hæc causæ variæ detegantur, in præcedentibus explicatum fuit. De cura intropressæ calvariæ dictum fuit §. 271. 272. Per concussionem validam tenerrima encephali pulpa sic potest affici, ut compressis hoc concussu minimis vasculis liber transitus humorum per hæc impediatur: sed si non fuerint fracta vel destructa omnino hæc vasa, æquabilis humorum circumductio aperiet iterum collapsos hos canaliculos, & post aliquot horas sensim redibunt functiones. Ubi autem sub calvariæ olla hæret aliquid, quod comprimere vel lædere potest encephalon, indicatio curatoria generalis jubet hæc tollenda esse, ut facile patet: tuncque ad tria hæc in hac paragrapho enumerata attendendum est.

1. Patet evidenter: omne enim extravasatum liquidum, quod hic hæret, sensim per-comprimet encephalon; cum naturaliter omnia hic adeo plena sint: & si diu maneat hæc causa comprimens, contigua minimorum canaliculorum latera con-crescere poterunt, & impervia manere tota vita; unde postea immedicabilis orietur læsio functionum encephali.

2. Quando nempe humores effusi, corrupti, in pus, ichorem vel saniem mutati; infecerunt vicina loca, quibus accumbunt; uti & ubi solidæ partes sic affectæ fuerint, ut sanitatis legibus amplius obedire nequeant.

3. Observationes enim docuerunt, hæc infortunia aliquando contigisse; unde & hæc tollenda erunt.

§. 278. **E**XTRAVASATUS sanguis aufertur. 1. resorbendo. 2. dissipando. 3. perforando cranium.

1. In contusionibus, dum sub integra cute sanguis vasis fractis effusus hæret, & nigra vel cærulea macula locum affectum deturpat, videmus sæpissime sensim disparere omne illud extravasatum; vasis nempe bibulis venosis resorptum, & allabentibus humoribus tenuioribus attenuatum. Quare ergo & illud hic loci fieri non posset: sanguis autem extravasatus in loco clauso, ubi nullus datur aëri accessus, hæreere potest diutissime sine corruptela.

2. Quando nempe extravasatus cruor diluentibus & solventibus remediis sic attenuatur, ut vasis bibulis venosis, in omni interna æque ac externa corporis superficie patulis, resorptus dissipetur, & sensim dispareat.

3. Ubi tanta copia est effusi sanguinis, ut valida compressione encephali functiones maxime lædat, non daretur tempus, ut lenta tali resorptione & dissipatione tollatur extravasatum: prius enim sæpe periret homo. Unicum tunc superest,

quamvis crudele, auxilium, ut calvaria perforata exitus detur sanguini extravasato.

Jam examinandum est, quomodo singula hæc fieri debeant.

§. 179. **R**ESORBETUR, si in venas, largo missu sanguinis, & succenturiata purgatione alvi, evacuatas, vi vitæ repellitur.

Dum vivi animalis junioris (quia in his facilius cranium tolli potest) calvaria aperitur, apparet manifeste undique transpirans halitus, tota superficies utriusque meningis humida est, omnis ambitus ventriculorum tenui rore madet. Assiduo ergo tenuissimis vasis exhalantibus efflatur tenuissimum tale liquidum, quod omnia humectat & fovet. Sed nisi pariter adessent venulæ resorbentes in illis locis, accumularetur sensim ibi latex, & totam encephali actionem comprimendo tolleretur. His ergo osculis venosis debet resorberi extravasatus sanguis. Mirum forte videri posset, sanguinem, statim concrecentem, dum extra vasa hæret, tenuissimas has fistulas ingredi posse: sed si consideretur, sanguinem concretum, de vena missum, sensim iterum resolvi, & deliquescere in tenuius liquidum; & quidem citius hoc fieri, dum blando calore fovetur, & præterea exhalante tenuissimo rore continuo dilui coagulatum cruorem; & simul, plena cum calvaria semper sit, valide premi, & arteriosam fabricam encephali & imprimis duræ matris vasa, sanguine impulso vi cordis nunc distendi, mox iterum se contrahere; patebit, extravasatum cruorem hic omni momento premi, atteri, tenuissimo liquido dilui, & tandem sic attenuari posse, ut minima oscula venarum absorbentium ingredi valeat. Cum autem absorbentes hæc venulæ resorptos humores majoribus venis tradant; facilius fiet hæc resorptio extravasari, si venæ majores depletæ fuerint: & ob hanc causam larga missio sanguinis hic commendatur: porro per purgantia talia, quæ fortiter evacuant, & simul sine aucto motu vel majori stimulo potenter solvunt, subducuntur de corpore humores, attenuantur autem illi, qui remanent, & minus ergo distendunt vasa, dum facilius per omnia transire possunt. Sic facilis patet ingressus resorptis humoribus in venas depletas, & post illas evacuationes siccior redditum corpus in omni superficie interna & externa avidè absorbet contigua liquida. Sic observatur post validas alvi subductiones sitim ingentem nasci, & affatim hausta liquida citissime resorberi venosis osculis in cavo ventriculi & intestinorum hiantibus. Quantum autem possit hæc methodus, ut extravasatus sanguis resorbeat, ad oculum apparet in validis contusionibus. Tumorem talem, qui caput infantis æquaret, in natibus post lapsum ex curru, hac methodo integre dissipatum vidi; licet tota pars nigresceret ab effuso sub integra cute hærente sanguine. Nemo autem facile dicet, extravasatum hunc cruorem transpirasse per cutim illam: si enim eo usque attenuari possit coagulatus sanguis, ut per exhalantia cutis vascula exire posset, facile patet, quod commode ingredi poterit absorbentium venulatum oscula. Apparet ergo multum boni ab hac methodo merito sperari posse.

§. 280. **H**INC statim ad maximam copiam, ægro tolerabilem, utraque hæc evacuatio instituenda (279), & si juvat, pro re nata repetenda, iterumque, si post has administratas minuuntur symptomata (275).

Nunquam nocebit, modo vires consent, largas tales evacuationes facere; & imprimis maxima Venæ sectio, & repetita quidem, hic tanti usus est: Visum enim fuit sapissime, ubi omnia signa docebant, sanguinem effusum sub calvaria cerebrum comprimere, audacissima Venæ sectione ilico remisisse symptomata, licet jam de trepano applicando cogitaretur. Et licet malum non cederet his remediis, & trepanum postea deberet institui, nunquam nocebit per hanc methodum corpus reddidisse inflammationi minus obnoxium: sic enim pessima symptomata, perforationem calvarie quandoque sequentia; & imprimis fungorum cerebri generatio multum præavebuntur. Hæc ergo primo tentanda videntur, antequam ad trepanationem ipsam perveniatur. Si jam his evacuationibus incipiunt minui illa mala, quæ compressum ab effusis humoribus cerebrum sequuntur, novimus magnam spem esse, ut repetito horum usu, (semper habito respectu ad decumbentis viros) tollantur penitus. In gravissimis certe casibus pulcherrimos hujus methodi successus me sapiens vidisse lætus recorder: & Paræus (a) audacter repetitæ sanguinis missionis notabile Exemplum habet. Juvenis 28. annorum lapsu bregmatis os sinistrum lapidi valide impeggerat: aderat contusio, sed nulla cranii fractura. Septima die febris valida, delirium, inflammatio magna, tumor ingens totius capitis, faciei & colli; loquela, visu, deglutitione impeditis. Sequenti die duodecim uncias sanguinis detraxerat Chirurgus: postridie Paræus vocatus, dum videbat pessima hæc symptomata non remittere, & validas esse vires, quadraginta & duas uncias sanguinis de vena misit: sequenti die, auctis adhuc potius malis, iterum duodecim uncias subduxit; & postea adhuc binis sanguinis missionibus quindecim uncias eduxit: sic ut intra quatrimum ultra octoginta uncias sanguinis amiserit ager, & à tam periculoso malo integre curatus fuerit. Monuerat quidem magnus Hippocrates (b) *evacuationes ad extremum ductas periculosas esse*; & hinc videretur forte remerarium tantam copiam sanguinis subducere; sed eadem Sectione (c) axiomata sequens posuit: *ad extremos morbos extrema remedia ad amissim optima*. Cum ergo hic vita periclitetur, nisi subita modè adhibeatur, patet ratio, quare validæ adeo evacuationes adhibeantur. In levioribus enim malis nemo prudens hæc tentare auderet.

§. 281. **D**ISSIPATIO attenuati perficitur. 1. resorbendo (279. 280.) partem dissipandi. 2. attenuando per diluentia aquosa, & resolventia calide pota. 3. parti affectæ rase imponendo emplastra, cataplasmata, fomenta, ex discutientibus nervinis, cephalicisque. 4. auribus, naribusque eadem applicando.

Dissipatio vocatur, quando extravasatus sanguis sponte, vel per artem, ita

(a) Liv. X. Chap. 14. pag. 231.

(b) Aphor. 3. Sect. 1. Charter. Tom. IX. | pag. 7.

(c) Aphor. 6. Charter. Tom IX. pag. 124

dissolvitur, ut minima absorbentium vasorum oscula ingredi, sicque sensim quasi evanescere possit.

1. De his dictum fuit.

2. Si sanguinem sani hominis de vena missum, & coagulatum, in aqua tepida quis conqussaverit, sensim minuetur illud coagulum, aqua attusa rubescet, & ultimo tam parum illius massæ coagulatae supererit, ut vix credi posset: remanebit tamen semper aliquid, forte quia libero aeri tam diu expositus fuit sanguis. Videmus enim quotidie in contusionibus extravasatum sanguinem dissolvi sic, ut integre dissipetur. Ob hanc causam, post sanguinis missiones & purgantia, datur tanta copia decoctorum aquosorum, quantam corporis vires ferre & mobilem reddere possunt: sic sanguis omnis diluitur, & exhalanti fluido copiosa materia supeditatur, ut resolvatur sensim illud coagulatum, & solutum resorbeatur venulis minimis absorbentibus. Quia autem aquosa sola potata, imprimis post magnas evacuationes, corpus enervant sic, ut hæc assumpta inciperent colligi in cavis corporis, & corpus ad hydropem disponderent; ideo simul his decoctis adduntur lenia aromata, quæ blanda solvendi vi commendantur, & simul levi stimulo parum plus movent; quod nunquam nocebit post has evacuationes prægressas. Totus enim scopus est sanguinem reddere sic dilutissimum, ut copia tenuis liquidi per exhalantia vascula continuo applicetur extravasato cruori, & ille sic dilutus & attenuatus resorberi possit venolis osculis. Formula talis decocti in Materia Medica habetur.

3. Verum quidem est, quod horum omnium efficacia non directe & immediate agere possit in extravasatos humores, qui sub calvaria hærent, cum externa capitis fere tantum à carotide externa suos humores excipiant. Proderunt tamen, dum externis capitis partibus sic fortis & laxatis minuitur humorum impetus versus interiora capitis; uti & dum horum remediorum pars per venas resorbentes externæ cutis sanguinem ingreditur, & postea communi circulationis lege ad locum affectum deferri potest. Neque videtur semper anxie disputandum esse, quomodo & per quas vias remedia applicata agant, modo constet profuisse. Sic in morbis acutis inflammatorii capitis interiora obsidentibus, fomenta ex aqua, aceto, nitro tanto cum fructu derafo prius capiti applicantur. Unde in periculoso tali malo, omnia artis molimina adhibentur, per quæ aliquid emolumenti, quantumvis etiam leve hoc fuerit, sperari potest. In usu tamen horum semper animadvertendum est ad illas cautelas, de quibus dictum fuit §. 245. 246. 247. semperque curandum, ut Cataplasmata, vel fomenta talia applicata, in debito calore retineantur; quod pannis calidis sæpe applicatis fieri poterit. Talis Emplastri & fomenti formula in Materia Medica ad numerum 247. habetur.

4. Verum quidem est, duram matrem omnem superficiem internam cranii exactissime obducere, sic ut totum encephalon in proprio quasi territorio conclusum ab omnibus aliis hæreat. Tamen per observata Medica constat, bina hæc loca esse cerebri quasi spiracula, per quæ sæpe miris modis humores exeunt. Dictum fuit in commentariis ad §. 175. Chronica sæpe capitis mala levare citissime, dum per nares vel aures, aqua, pus &c. effluunt; illudque Hippocratis testimonio confirmatum fuit. Notum est, in omnibus morbis capitis, qui ab in-

farctis encephali vasis à nimia plenitudine, vel & inflammatoria humorum densitate, fiunt, sanguinis per nares effluxum adeo prodesse. Enarrata fuerunt Exempla in commentariis ad §. 273, quibus constitit, post gravissimas capitis læsiones, lymphæ per aures effluxum sanasse etiam, ubi communi expertissimorum Medicorum & Chirurgorum consilio jamjam trepanum applicandum erat. Hinc proximus ad interna capitis hic videtur patere aditus. Certe summis naribus incumbit tenuis ossis Ethmoidis lamella, foraminulis pertusa, quæ quidem in homine vivo duræ matris vaginulis emissis, & nerveis fibrillis, opplentur exactissime, tamen quam tenue est illud sepimentum, quod calvariæ cavum à naribus hic dividit! unde vapores per nares attracti fere immediate encephalo applicantur.

§. 282. **Q**UÆ (279. 280. 281.) si statim non tollunt, minuantve valde symptomata (275.), sed hæc vel persistunt, vel augentur, ilico perforandum cranium, ut exitus detur humoribus (273. 277. 1^o.), & facultas depurationi (277. 2^o.), & evulsioni fragmentorum (277. 3^o.).

Crudele videtur & temerarium omnino ilico semper calvariam perforare, ubi signa docent, post capitis vulnera encephali functiones valide læsas esse. Nisi enim certo constet, cranium depressum esse, vel fragmenta excussa encephalon lædere sic, ut non possint tolli hæc mala sine perforatione calvariæ, præstat semper prius per aliquot horas, saltem expectare, & interim validis evacuationibus tentare, an leventur symptomata. Plurimi enim tales casus occurrunt quotidie, ubi ex alto delapsi homines omni sensu & motu privati jacent, & paucis horis postea sensim reviviscunt, valido tali concussu turbato cerebro, licet nulli humores effusi fuerint. Et licet trepanum applicari deberet, valida sanguinis missio prius facta nocebit nunquam; sed è contra summopere proderit. Unde videtur methodus, tribus præcedentibus paragraphis recensita, prius semper tentanda esse; & si intra duodecim horas ab his remediis applicatis nullum levamen percipiatur omnino, sed omnia mala potius augeantur; tunc unicum auxilium superest, nempe ut perforata calvaria detur exitus humoribus effusis. Monendi tunc sunt amici vulnerati, certam mortem instare, anceps tantum hoc & operosum superesse remedium, à quo jure merito multum boni expectari potest, tamen nunquam certa cura promittenda est. Poterunt enim effusi humores hære in talibus locis, ut aperta calvaria exire tamen nequeant: possunt valido concussu fracta esse tenerrima illa stamina medullæ encephali, unde tota vita & humanitas pendent. Ubi vero hæc operatio requiritur, quo citius tunc perficitur, eo melius pergent enim liquida effluere fractis vasis, major fiet compressio encephali sic omni momento aucta copia liquidi extravasati, unde sæpe medullosoe fibræ tenerrimæ, soli tenuissimo totius corporis liquido perviæ, compressis lateribus & contiguis factis desinunt esse canales aperti, & postea, eductis quamvis liquidis comprimementibus, æquabili liquidorum circumductione contigua semel facta latera minimorum horum vasculorum non amplius à contactu removeri poterunt; unde concreverunt inter se, & sequetur immedicabilis læsio omnium illarum functionum, quæ à subtilissimi liquidi motu per minima hæc vascula

pendebant. Præterea humores effusi, diu hic relictī, poterunt corrumpi, & acquisita acrimonia rodere omnia vicina. Ex quibus omnibus patet, semper hic in mora periculum esse: licet tamen observationes fideles docuerint, magno etiam post vulnus inflictum temporis intervallo perforationem cranii institutam fuisse summo cum fructu. Homo capite vulneratus fuerat, cum nulla adessent mala symptomata, intra quatuordecim dierum spatium vulnus hoc curatum fuit. Diu post ingens capitis dolor, vertigo, caligo oculorum, dextrique brachii paralysis latere hic malum evidenter demonstrabant; & Scultetus (a), vigesima nona post vulnus inflictum septimana, detecto cranio, angustam rimam videns, binis foraminibus perforavit calvariam, & medium inter hæc foramina interstitium ferra versatili excidit: patula tali apertura evacuabatur collectus sub calvaria humor, & mensis spatio felicissime pristinae sanitati restituebatur vulneratus. Sed facile apparet ex hac historia, non fuisse in initio extravasati liquidi sub calvaria copiam, sed angusta rima fisso cranio, sensim hic collectum fuisse pus vel saniem. Sed ubi fractis vasis statim copia effusi liquidi sub calvaria colligitur, patet facile, non posse diu differri hanc operationem sine magno periculo. Unde dixit Hippocrates (b), in illis calibus, ubi perterebranda erat calvaria, intra triduum ad sectionem veniendum esse, neque ultra hoc tempus expectandum esse, præcipue si calida anni tempestate quis ab initio curam susceperit. Tamen agebatur hic loci tantum de læsione calvariae, quæ scalpro eradi non poterat: Ab effusis autem humoribus sub cranio magis præceptis discrimen imminet.

Perterebratio cranii solebat etiam institui, uti dictum in commentario §. 271. ut os depressum & vacillans vecte posset elevari: sed in hoc casu triplex inde potest expectari utilitas, nempe ut extravasatis liquidis liber pateat exitus, deinde si per suppurationem deberet aliquid separari à vivis partibus, ut puri facto pateret via; ultimo ut ossis fragmenta, encephalon pungendo, lacerando &c. lædentia, commode possint tolli.

§. 283. **L**OCUS, ubi terebra applicanda, cognoscitur. 1. ex loco læsionis noto (276.) ubi optime fit, si nihil vetat.

Postquam conclusum fuit, calvariam terebra perforandam esse, ut concilietur exitus effusis humoribus, tunc inquiritur, cuinam loco calvariae terebra applicari debeat. Apparet facile, postquam per signa descripta §. 276. detectus fuit locus læsus, ubi debere terebram applicari, quia maxime verosimile est, ibi hæsurum effusum sanguinem. Sed sequenti paragrafo patebit, plurima esse loca, ubi cranii perterebratio vel impossibilis omnino vel periculosa admodum est; unde sub hac tantum limitatione generalis hæc regula locum habet. Maturo autem consilio, nec festinanter, determinari debet locus, cui terebra applicabitur, ne postea crudelis hæc adeo apparens adstantibus operatio (vulnerati enim ipsi fere semper stupidi & hebetes in his casibus vix dolorem sentiunt) repeti debeat; sicque aliquando ansa detur illis, qui percussoris causam defendunt, imputandi malum secuta Chirurgis & Medicis.

(a) Armament. Chirurg. Observ. 13. pag. 211. 212. | (b) De Capit. Vuln. cap. 21. Charter. Tomi XII. pag. 124.

§. 284. **V**ETAT 1. sutura. 2. muscoli plurimi. 3. cavitates ossis frontis. 4. arteria major ossi inserta. 5. inferior situs loci. 6. vacillatio fracti, contusi, cariosi ossis. 7. inæqualitas eminentis & excavati iterum cranii.

1. Dum in cadavere ferra undique divisum cranium elevare nituntur Anatomici; vident evidenter, duram matrem in omni fere puncto calvariæ adhærere; sed in locis suturarum hanc adhæSIONem tam validam esse experiuntur, ut vecte ferreo interposito vix summa vi avellere possint. Patet ergo, quod, si terebratio his locis instituitur, non posset orbiculus ossis excissi tolli sine magna dilaceratione duræ matris; unde dolor ingens, convulsio, & alia pessima mala sequi possent. Hinc communi omnium Auctorum consensu illa loca vitantur, potiusque ab utroque latere suturæ terebratur cranium, quam in suturæ loco. Dum homini grave vulnus securi inflictum fuerat illo in loco, ubi sutura sagittalis cum coronali unitur, post gravissima symptomata, plurimis fragmentis ossis extractis, convaluit quidem, sed nulla arte potuit evitare Hildanus (a), quin fistulosum ibi maneret ulcus: unde & curæ difficultatem recenset inter illa argumenta, quibus improbatur trepani applicatio in loco suturarum. Hanc tamen operationem in futuris institutam se vidisse, dum studiorum causa in Italia versaretur, testatur Celeberrimus Medicus *Johannes Fredericus Werdenbergius* in Epistola ad Hildanum de hac re data (b). Apparet tamen evidenter ex modo dictis, periculosum semper esse, trepanum iplis futuris applicare.

2. Notum est, circa occiput validissimos musculos calvariæ infigi, & lateralem partem cranii utrimque occupari temporalibus musculis. Unde merito videntur & illa loca vitanda esse, si fieri possit. Monuerat Hippocrates (c): *Caput secanti reliqua quidem capitis tuto discindere licet, tempora autem, & quod adhuc supra est, juxta penam, quæ per tempora fertur, secari non debent, Convulsio enim sectumprehendit.* Et in loco allegato in commentariis §. 241. dicit, quibus tempora secantur, illis ex adversa sectionis parte convulsio contingit (d). Ex quibus concludere licet, semper periculosum fore, hos musculos lædere; quamvis tamen non semper lethalia mala inde sequantur. Plurima enim observata evincunt, sectos fuisse musculos temporales, applicatum fuisse trepanum illi loco, quem occupant, & tamen curatos fuisse ægros. Ex magno satis similibus observatorum numero unum alterumve Exemplum recensebo. Homo acinace vulneratur in tempore sinistro, cum fissura calvariæ adeo patente, ut digitum indicem facillime caperet: tamen à tanto vulnere brevi temporis spatio incolumis evasit (e). Riverius in observationibus, ipsi communicatis à Samuele Formio Chirurgo Monspeliensi, qui quinquaginta annorum spatio artem exercuerat, habet casum sequentem (f). Mulier vulnus acceperat ictu lapidis in tempore sinistro; cum

(a) Observat. Chirurg. Centur. 2. Observ. 8. pag. 85.
(b) ibid pag. 86. 87.
(c) De Capit. Vulnerib. cap. 19. Charter. Tom. XII. pag. 183.

(d) Coac. Prænot. n°. 408.
(e) Sculteti Armamentar. Chirurg. Observ. 3. pag. 195. 196.
(f) Riverii Opera pag. 572. observ. 19.

trepanum

trepanum necessarium videretur, in consilium vocatus exercitatissimus ille Chirurgus non dubitavit cruciali incisione discindere temporalem musculum, & loco detecto trepanum applicare; neque ullum grave symptoma inde ortum esse testatur. Similem casum, ipsi communicatum ab alio Chirurgo, habet alibi (a). In puero duodecim annorum ex alta arbore delapso os temporis adeo confractum fuit, ut coactus fuerit Chirurgus notabilem partem musculi temporalis tollere, ut latens malum posset detegi, & trepanum applicari. Felix tamen fuit curæ successus, præterquam quod maxilla inferior parum versus latus oppositum distorta manserit (b). Ubi ergo necessitas urget, præstat etiam in his locis trepanum applicare, quam certæ morti relinquere vulneratum.

3. Notum est ex Anatomicis, ossis frontis tabulas à se invicem diductas facere sinus frontales dictos, plerumque satis capaces; variæ magnitudinis in variis hominibus; supra oculorum orbita fere ad media supercilia productos; aliquando ossis lamellis in minora cava distinctos; qui binis satis magnis aperturis ad utrumque septi narium latus patent, & sic narium internam capacitatem augent. Sinus illi membrana illa, quæ nares internas investit, undique obducuntur. Si ergo trepanum hic applicaretur, externa tabula perforata, illico occurreret membrana illa internam ejus superficiem investiens, quæ tolli deberet; uti & illa ejusdem membranæ pars, quæ internam tabulam simili modo investit, antequam posset terebra perforari interna tabula. Pater facile, hoc difficillimum, si non penitus impossibile, esse, cum membrana hæc, narium cava investiens, adeo sensibilis sit, ut vel levissima plumulæ agitatione in naribus irritata, sternutatione excitata, totum corpus convelli faciat. Simul notandum, quod vix unquam ad cicatricem perducí possit vulnus, quod ad sinus frontales penetravit. Hoc jam apud Celsum (c) habetur, qui monet, omnibus capitis locis perterebratis commode cicatricem induci, *excepta illa frontis parte, quæ paululum superid est, quod inter supercilia est. Ibi enim vix fieri potest, ut non per omnem ætatem sit exulceratio, qua linteolo, medicamentum habente, contegenda erit.* Postea recentiorum observata hoc confirmaverunt. Hæc ergo loca, ex Anatomicis cognita, in applicatione trepani vitanda esse patet.

4. Si consideretur calvaria humana mundata, in interiori ejus superficie plurima apparent impressa, sæpe etiam satis profunde, vestigia, quæ majorum arteriarum, per duram matrem distributarum, ramificationibus respondent: si autem major talis truncus, dum terebra in osse circumducitur, ejus dentibus laceretur, valida poterit nasci Hæmorrhagia, quæ plurimum turbat operationem, & sæpe difficulter compesci potest. Summa tamen difficultas est in his locis determinandis, quia in diversis hominibus situs majorum horum truncorum variat; tamen quædam loca sunt, in quibus hi sulci majores in plurimis calvariis deprehenduntur; quæ ergo vitanda sunt. Sic v. g. in utroque osse bregmatis, prope futuram coronalem in laterali inferiori parte, talis magnus sulcus apparet, qui ascendendo sensim minuitur &c. Illa autem loca, comparando diversas calvarias inter se, potissimum cognoscuntur.

5. Si enim circa basim calvariæ hæreant effusi humores, vix ulla spes est, edu-

(a) Ibid. pag. 580.

(b) Garengot Operat. de Chirurg. Tom III. | observ. XV. pag. 131.

(c) Lib. VIII. cap. 4. in fine pag. 521.

ci posse illos cranii perterebratione, cum illa non possit fieri nisi in multo altiore loco. Verum quidem est, quod, cum calvaria plenissima semper sit, possit aliquando pressione encephali, replenti calvariae cavum, humor effusus sensim ascendere versus foramen factum, & sic evacuari; sed apparet simul, hoc satis difficile esse. Talem casum habet Tulpus (a) de sene septuagenario ebrio, qui ex alto delapsus tam amplum vulnus contraxit in calvaria, ut commode per ejus hiatum educeretur, quidquid inhæreret externae cerebri membranæ. Adhuc tamen ilico vertigo, vomitus & stupor: postridie quidem ad se rediit febris exers, & immunis omnium aliorum symptomatum; sed die quarto, excreatis prius sputis purulentis, præter omnem spem, inopinato periit Apoplecticus. In cadavere invenitur frequens humor, replens ventriculos cerebri, & prope sellam equinam ingens ossis cuneiformis fragmentum, separatum à reliquo osse, apparebat, & plurimum sanguinis coagulati. Dum ergo per tam amplum vulnris hiatum circa basin cerebri effusus sanguis exire non poterat; patet, à perforatione calvariae non multum boni expectari posse in tali casu. Unde Celsus merito dixit: *Servari non potest, cui basis cerebri percussa est* (b).

6. Dum terebra applicatur calvariae, non poterit excindi orbiculus ex cranio, nisi apprimatur terebra ossi: si ergo illud solum integre fuerit, vel parum tantum adhuc cohæserit, introprimetur, & turpi errore encephalon subiectum comprimetur. Idem infortunium metuendum est, si lues Venerea, v. g., os eroderit; vel ab alia quacumque causa cranium cariem contraxerit: tunc enim minima etiam vi adhibita terebra per integram ossis crassitiam ilico penetraret. Aliquando sic post capitis vulnera corrumpi calvariae os, patuit Exemplis memoratis in commentariis §. 242. & 256. n°. 3.

7. Dum calvariae cavum osseum sedulo examinatur, apparet evidenter, non esse ubique æquabilem superficiem; sed in quibusdam locis assurgere, in aliis magis excavari, ut contento encephalo, valis, sinibus &c. se quasi accommodet; unde varia sæpe crassities ossis in variis calvariae locis. Optimum ergo foret, dum de loco deliberatur, ubi trepanum applicandum est, plures considerare calvarias; & videre, quibus in locis illæ inæqualitates maxime inveniantur; & deinde illa loca vitare, si fieri possit.

Quamvis autem ex artis regulis & Anatomica cognitione partium satis evidenter pateat, septem illa recensita hac paragrapho in trepani applicatione vitanda esse, tamen optimi Artis magistri monuerunt, si aliter fieri nequeat, tentandam esse operationem, licet aliqua ex recensitis incommodis adfuerint; præstat enim sæpe anceps experiri auxilium, quam nullum, dum certa mors prævidetur. Vix enim credibile videtur, omnes has cautelas potuisse observari, dum puellæ duodecim annorum, ex alto delapsæ, duodecim distinctis locis calvaria perterebrata fuit, paucorum dierum spatio; quæ tamen puella perfectissime curata fuit, licet totum bregmaris os, & pars ossis temporalis, valido lapsu omnino fracta fuissent. Mirabilem hunc casum refert Dionisius (c), cujus filius quarta vice in hac puella operationem perfecerat.

(a) Observ. Medic. Lib. I. cap. 3. pag. 6. | n°. 2. pag. 283.

(b) A. Corn. Celsi Medic. Lib. V. cap. 26. | (c) Opérat. de Chirurgie pag. 358.

§. 285. **T**UM, qui læso cognito (276.) proximus, applicanda terebræ locus optimus est.

Ubi ob causas paragrapho præcedenti enumeratas non potest perforari calvaria in loco læsionis, omnium optimus erit ille, qui carens his obstaculis loco tamen læso proximus est. Circa hanc rem tamen notanda sunt quædam satis magni momenti. Dura mater undique quidem calvariæ adhæret, sed omnium fortissime in locis suturarum, uti dictum fuit paragrapho præcedenti n°. 1.: unde sanguis effusus, hærens inter calvariam & duram matrem, poterit illam separare à cranio, sed ubi suturæ sunt, ibi hoc fieri non poterit; unde certis limitibus hærebit semper sanguis effusus inter cranium & duram matrem, nec poterit facile ultra suturarum loca pergere. Si jam v. g. locus læsus esset in ossis bregmatis illa parte anteriori, quæ ob viciniam suturæ coronalis, per quam frontis ossi jungitur, & ob magnam arteriam plerumque hic locatam, tuto perterebrari non posset; tunc quidem locus proximus eligendus esset, talis tamen, qui ipso bregmatis osse contineretur. Si enim in osse frontis ad alterum latus suturæ coronalis terebratio fieret, non posset sanguis, duræ matri sub bregmatis osse incumbens, exire, quia dura mater in loco suturæ coronalis firmissime hærens impediet, quo minus illuc venire posset. Unde sub hac limitatione tantum generalis hæc regula locum habet, quæ jubet locum proximum eligendum esse, si in ipso læsionis loco terebratio fieri non possit. Sanguis enim intra cranium & duram matrem effusus sic in diversis quasi cameris hætere potest, quæ penitus distinctæ cum aliis non communicant. Omnium maximum tale spatium sub ossibus bregmatis hæret, sutura sagittali in medio divisum in binas tales distinctas cameras. Idem etiam in fronte verum est, quod iterum distinctum tale spatium habet; & cum os frontis media sutura ad radicem nasi plerumque divisum sit in junioribus, imo sæpe etiam in adultis, patet, & illud spatium sic bifariam dividi.

Ubi vero sanguis effusus hæret intra duram & piam matrem, iterum notandum est, totum calvariæ cavum internum bifariam dividi. Duræ enim matris processus, falciformis dictus, à crista ossis Ethmoidis per totam longitudinem suturæ sagittalis pergens usque ad processum duræ matris transversalem (qui cerebellum regit & ab incumbens cerebri pressione defendit) & intra bina cerebri hemisphæria profunde demersus, dividit bifariam internum cranii cavum, & impedit, quo minus sanguis in dextro latere effusus ad sinistram pergere posset. Unde & in illo casu ad hanc rem pariter attendendum est.

§. 286. **Q**UIN, urgentibus symptomatibus (273. 275.), licet nullus locus certo inveniri queat (276.), tamen trepanum applicandum & ab una, & ab altera, parte cranii, in finem descriptum (277.).

Aliquando accidit, omnia signa quidem docere, quod effusus sub calvaria sanguis comprimat encephalon; interim tamen non adsunt certa indicia, quibus determinari posset, in quonam loco cranii hæreat: tunc nihil superest, quam vul-

H h ij

neratum certæ morti tradere, vel incerto penitus eventu cranium perterebrare. Potest enim sanguis effusus ipsam basin calvariæ occupare; potest in ipsis ventriculis cerebri hære, potest in longe alio loco accumulatus esse, quam est ille, cui terebra applicabitur. Videtur tunc, præmonitis prius de ambiguo successu vulnerati amicis, melius esse anceps remedium experiri, quam nullum; præsertim cum innumeris observatis constiterit, trepani applicationem, rite administratam, non esse adeo periculofam; & vulnerati tales plerumque omni sensu careant: sic ut narret Dionisius (a) se nobili juveni, trepano applicato, effusum sub calvaria sanguinem eduxisse: nec noverat tamen vulneratus se hanc operationem passum fuisse, donec perfecte curato hoc indicabatur. Hinc licet adstantibus adeo crudele videatur, dum frustra instituta hæc operatio in alio loco calvariæ repeti debet; tamen decumbentibus non adeo molesta esse solet. Ubi autem nihil omnino cognoscitur de loco affecto, tunc solet os bregmatis perterebrari; quia & maximam partem ossæ calvariæ constituit, & satis magna vasa huic ossi supponuntur. Si nihil inveniatur, in oppositi lateris osse bregmatis idem tentatur. Apud Hippocratem non invenitur, quod repetitis vicibus in eodem agro trepanum applicuerit: sed quantum potui colligere ex pulcherrimo ejus libro de vulneribus capitis, non perforavit calvariam, ut humoribus sub cranio effusis viam faceret, sed tantum ut calvariæ malæ affectæ partem tolleret. Notavit quidem, quod os calvariæ malæ affectum posset colligere possit, illudque infra ad cerebrum transfundere (b), sed de extravasatione humorum, vasis fractis sub integra calvaria, nullam mentionem fecit. Unde non videtur applicuisse trepanum, nisi ubi constaret, calvariam viciatam esse, & cognitus esset locus latus: & ideo ubi os fractum erat alia capitis parte, quam qua vulnus erat, huic calamitati nullis remediis subveniri posse asseruit (c). Celsus tamen talem sanguinis extravasationem novisse videtur, dicit enim: *raro, sed aliquando tamen, evenit, ut os quidem totum integrum maneat, intus vero ex ictu vena aliqua, in cerebri membrana rupta, aliquid sanguinis mittat, isque ibi concretus magnos dolores moveat, & oculos quibusdam obcacet. Sed fere contra id dolor est, & eo loco cute incisa, pallidum os reperitur, ideoque id quoque os excidendum est* (d). Et in eodem Capite jubet pluribus foraminibus cranium perforandum esse, si rima longius pater.

Plurima Exempla habentur apud recentiores Chirurcos, quibus constat, felici successu pluribus locis perterebratam fuisse calvariam. Homini ex equo delapso vulnus in osse bregmatis apparuit: applicato trepano, multum sanguinis exivit, sed sine levamine symptomatum: post triduum tumor in occipite apparuit; quo aperto, alterum trepanum ossi occipitis applicatum fuit: copiosus exibat ex foramine facto sanguis; & dum ille efflueret, incepit ad se redire, & perfecte convaleuit. Hæc historia pulchre confirmat illa, quæ dicta sunt paragrapho præcedenti; quod sanguis intra duram matrem & calvariam effusus in distinctis cameris hæreat, quæ non communicant inter se (e). In eodem loco idem Auctor alium casum narrat puellæ, cui in utroque osse bregmatis trepanum applicuerat, felici etiam cum successu. In maxima cranii depressione septies in circumferen-

(a) Operat. de Chirurgie pag. 350.

(b) Hippocrat. de capit. vulner. cap. 4. Charac. Tom. XII. pag. 117.

(c) ibid. cap. 10. pag. 119.

(d) A. Corn. Celsi Medic. Lib. VIII. cap. 4. pag. 516.

(e) Dionis Operat. de Chirurg. pag. 319.

tia depressionis cranium modiolis perforare coactus fuit Scultetus (a) una & eadem die in Capitaneo, qui tamen binorum mensium spatio à tam gravi vulnere curatus munus suum militare cum laude exercere potuit. Et in mirabili illa historia, de qua dictum fuit in commentario §. 284. duodecim annorum puellæ cranium duodecies perforatum fuit, cum integra tamen sanatione. Longe adhuc mirabiliorem historiam narrat Celeberrimus suo tempore Chirurgus *Solingen* (b): Philippus Nassavius ex illustri Auriacorum stemmate oriundus, ex equo delapsus sic caput impexit stipiti, ut calvaria variis locis fracta fuerit; & ideo vigeties septies ipsi cranium trepano perforatum fuit à Chirurgo Neomagensi; tamen inde convaleuit: hujusque rei testimonium, sanati nobilissimi viri autographo confirmatum, vidit *Solingen*; additque, illum postea adeo pancreaticæ va-
luisse, ut inter pocula tres compotatores postea morti tradiderit.

Ex quibus omnibus patet, tutam satis esse, quamvis frequenter repetitam, trepani applicationem, si rite instituitur, quod quomodo fieri debeat, in sequentibus dicetur.

§. 287. **I**NVENTO loco (276. 283. 284. 285. 286.), abra-
so capillitio, inciduntur integumenta (259.), separantur à
cranio, elevantur labia, siccatur os, tegitur carptis linteis, sistitur
cruor (218.), lenitur dolor (227. 228. 229.), prohibetur inflam-
matio (235.), & si non urget valde malum, rite facta deliga-
tione in diem sequentem relinquitur apparatus.

Postquam determinatus fuit locus, cui trepanum applicabitur, requiritur, ut calvaria integumentis suis nudetur perfecte, ne modioli dentes molles partes relictas lacerent; imprimis sollicite cavendo, ne aliquid de Pericranio relinqua-
tur: illud enim, scalpro terebrivæ laceratum, vehementes febres cum inflam-
matione excitare, jam Celsus monuerat (c). Unde crinibus abrais integumen-
ta ad os usque cruciali incisione dissecantur; uti dictum §. 259. Anguli quatuor
vulnere sic facti elevantur & digitis, vel scalpro pericranium à calvaria separatur;
mollissimis plumaceolis parum calefactis abstergitur cruor ab ossis nudati superficie;
dein simile plumaceolum, pauculo mastiches tenuissime tritæ insperso, applica-
tur nudæ calvariæ: similiter & lintea carpta supponuntur elevatis integumentis,
ut magis ab osse nudo secedant. Hæmorrhagia plerumque levis esse solet, &
brevis cessat: si vero major parum ramus arteriosus discissus fuerit, alcohole
calido compesci poterit; vel idonea ligatura leviter comprimendo per aliquot ho-
ras sistetur sanguinis fluxus: vel etiam, si urgerent symptomata, filo transmissio
per integumentorum locum, ubi hæret arteria discissa, poterit satis commode li-
gari. Patet enim facile, non posse trepanum applicari, quamdiu Hæmorrhagia du-
rat: sanguis enim effusus continuo impediret, quo minus explorari posset, quo-
usque perforatio calvariæ processisset. Dolor, si adest, leniri poterit levi inunctio-
ne Unguenti Populei, quod mollissimum & simul anodynum est: plerumque ta-

(a) Armamentar. Chirurg. Observ. 7. pag. 198.

ste Deel cap. 7. pag. 29.

198.

(b) Manuale Operation der Chirurgie &c. eer-

(c) A. Corn. Celsi Medic. Lib. VIII. cap. 4. pag. 516.

men tales vulnerati hebetes & stupidi jacent. Si inflammatio metuatur, & imprimis si non statim applicabitur trepanum, sed in sequentem diem differetur operatio, postea fovere locum convenit. Si Hippocrates, loco in commentariis §. 259. n^o. 3. allegato, dum detegenda erat calvaria, discissis integumentis, jussit vulnus linamentis implendum esse, ut hæc in vulnere relicta quam minimo labore illud amplissimum exhiberent: sed simul monuit, quamdiu hæc linamenta adhibentur, cataplasma applicandum esse ex tenuissima polenta, aceto subacta & incocta, ut inflammatio nimia præcaveatur.

Quæritur nunc, an, detecto jam cranio, ejus perforatio differri debeat per aliquot horas, vel in diem sequentem; an vero statim perfici debeat? Videtur semper hæc operatio citissime instituenda esse; raro enim adhibetur, nisi in urgenti malo. Binæ plerumque sunt causæ, quare differri voluerunt operationem quidam Chirurghi. Primo: quia capillorum abrasio, integumentorum dissectio & separatio à cranio, satis temporis requirunt; unde amici vulnerati sæpe ægre ferrent, diuturniori cruciati torqueri miserum. Secundo: ob Hæmorrhagiæ post dissecta integumenta metum, & denique, quia dissectæ partes sponte retrahuntur vulnus factum magis patulum reddent, unde facilius patebit terebræ aditus. Sed si consideretur, plerumque tales vulneratos omni sensu carere, vel saltem admodum hebetes jacere; hæmorrhagiam idoneis remediis satis cito posse compesci, saltem ad hoc tantum fere requiri paucarum horarum moram; & dissecta labia, modo satis amplius fuerit locus discissus, posse facile sic diduci, ut terebræ via pateat; apparebit facile, omnium optimum esse, si statim post nudationem cranii ad ejus perforationem pergatur.

Nec obstat huic sententiæ Hippocratis auctoritas: ille enim dissectis integumentis, ut ossis læsionem investigaret, voluit hoc examen in posterum diem differri (a): verum, uti præcedenti paragrapho dictum fuit, non videtur perforationem calvariæ instituisse, ut extravasatis humoribus daretur exitus; sed tantum, ut male affectam cranii partem tolleretur: quod malum certe longiorem moram fert sine tanto discrimine. Ubi vero vasa fracta humores contentos pergunt effundere; nili subito liber fiat his exitus, summus metus est, ne sic comprimatur encephalon, ut postea functiones læsæ restitui nequeant, licet perforata calvaria educti fuerint humores extravasati. Tamen & Hippocrates in eodem libro (b), postquam recensuit illa signa, quæ indicant capite vulneratum hominem perituum esse, dicit: *si cognoveris febrem occupasse, vel aliud aliquod signum adesse, minime differendum est; sed os ad membranam usque serra secandum, aut scalpro eradendum est.*

§. 188. **T**UM capite firmato, auribus obturatis, aëre calefacto; deterso ossi terebra cum stylo applicatur, æquabili, æqualiter, & modice acta, fronti supposita, terebratione agitur, donec vestigium rite sit impressum.

Ut instituatur hæc operatio cum successu, attendendum imprimis ad sequentia:

(a) Hippocrat. de Vulner. Capit. cap. 10. & | (b) Cap. 31. 32. ibid. pag. 127. 128.
21. Charter. Tom. XII. pag. 124.

Caput ægri debet sic firmari, ut penitus immobile hæreat : unde lectulus, in quo decumbit, sic ponendus est, ut ab omni parte Chirurgus & ministri commode accedere possint. Pulvinari, cui caput ægri incumbit, solent supponere asserem, vel patinam stanneam, aut simile quid; ne inter operandum cedat molle pulvinar, & sic turbetur operatio. Præterea certus debet esse Chirurgus de constantia illorum, qui caput vulnerati immobile retinebunt : nisi enim assueti fuerint intrepido animo hominum calamitates intueri, sæpe in animi deliquium labuntur, dum hæc operatio satis crudelis videtur, & sæpe satis notabili tempore durat. Solent quoque plerumque aures vulnerati gossypio obturari, ne ingratum serræ stridorem audiat : manet tamen Dionisius (a), sæpe hoc neglectum fuisse sine ullo damno; nec mirum, cum plerumque illi, quibus trepanum applicabitur, sine sensu jaceant.

Omnibus illis instrumentis, quæ ad hanc operationem requiruntur, prius ordine dispositis, & calefacto aëre vicino, & repleto fumis accensi succini, mastiches, & similium, cereo ellychnio commodissime illuminatur locus, cui terebra applicanda erit. Terebra autem, qua ad hanc rem utuntur, cavum orbiculum refert : atque tali cava terebra Hippocratem jam usum esse satis patet (b). Celsus vocavit modiolum, ferramentum concavum, teres, imis oris serratum, per quod medium clavus, ipse quoque interiore orbe cinctus, demittitur. Videtur autem tantum usus fuisse modiolo, dum locum ossis corrupti poterat comprehendere modiolus : ubi vero latius vitium erat, tunc terebra fabrili, vel simili huic instrumento, foramen faciebat *in ipso sine vitiosi ossis atque integri : deinde alterum non ita longè, tertiumque, donec totus is locus, qui excidendus est, his cavis cinctus sit &c.* Tum excisorius scalper ab altero foramine ad alterum malleolo adductus id, quod inter utrumque medium est, excidit; ac si ambitus similis ei sit, qui in angustiore orbem modiolo imprimitur (c).

Si jam comparentur illa instrumenta, quibus veteres in perterebratione calvariarum usi fuerunt, cum illis, quæ hodie in usu sunt, apparebit facile, magnam perfectionem his instrumentis accessisse, dum sensim vitia, quæ usus demonstrabat, correctæ fuerunt. Diu enim adhuc usi fuerunt trepanis cylindricis : sed sic magnum periculum erat, ne circa finem operationis depressa terebra duram matrem læderet : unde postea conicæ figuræ trepana adhibuerunt; quæ sensim lateſcentia sustinebantur marginibus ossis dissecti, neque facile poterant demergi & duram matrem lædere. Sed facile patet, conicum talem modiolum non posse descendere, dum circumagitur, nisi ejus latera acuta marginem ossis radere possent, & sic viam facere latiori sensim facto modiolo. Unde pulchro invento modiolum talem cavum hodie conficiunt ex plurimis lamellis chalybeis, à parte superiori & latiori oblique descendantibus, & sibi mutuo incumbentibus, omnibusque versus eandem partem inclinatis; Singulæ hæ lamellæ in acutum apicem definentes dentem ferræ faciunt; ex quibus dentibus inferior orbiculus trepani constat : latera autem harum lamellarum acuta, radendo marginem orbiculi dissecti, viam faciunt sensim descendentem modiolo; & obliqua harum lamellarum ad invi-

(a) Cours d'Operations de Chirurgie pag. 355.

(b) Hippocrat. de Caput. Vuln. cap. ultimo
Charter. Tom. XII. pag. 129.

(c) A. Corn. Celsi Medic. Lib. VIII. cap. 31

pag. 510. 511.

cem inclinatione efficitur, ut ossis deraſi ſcobs ſurſum emergat ſponte, & excidat; quæ aliter impediret terebræ liberam circumductionem. Interna modioli ſuperficies politiffima & conicæ figuræ eſſe debet; ſic enim diſſecti ossis orbiculus cavum modiolum facillime poterit ingredi; & circa finem hujus operationis ad hoc illudve latus poterit inclinari terebra, prout requiritur; quod fieri non poſſet, ſi cavitās modioli cylindrica foret, uti facile patet. Figuræ trepani cum omnibus ſuis requiſitis, apud auctores expreſſæ, meliorem dabunt ideam hujus instrumenti, quam quidem ex ſola deſcriptione haberi poſſet. Videatur *Garengeot* (a) apud quem omnia hæc habentur.

Si nihil vetat, modiolus major præferendus erit minori; nullum enim periculum metuitur à foraminis exſcindendi majori amplitudine: & liberrima via ſic datur effuſis ſub cranio humoribus, qua exire poſſent. Ut autem caveatur, ne vacillet terebra, dum calvariæ applicatur, in medio poſuerunt ſtylum chalybeum inferius acutum, paulo eminentem ultra ſerratū modioli extremum; qui ſtylus calvariæ innitens ſic firmat modiolum, ut non aberraret; ſicque poterit ſerræ veſtigium rite calvariæ imprimi. Vocatur tunc *Trepanum mas*, quando in medio talem ſtylum habet; qui ſi abſit, dicitur *Trepanum fœmina*. Olim ſolebant ſemper habere binos ejuſdem magnitudinis modiolos; quorum unus talem ſtylum habebat, alter non, quia non poterat ad finem operationis ſtylus ille aſſe, ut facile patet: citius enim penetraret calvariā, & duram matrem læderet, quia ultra marginem ſerratū modioli eminet. Hodie ſic hæc instrumenta conſciuntur, ut ſtylus ille auferri commodiſſime poſſit, poſtquam veſtigium calvariæ impreſſum fuerit. Præſtat tamen ſemper binos modiolos ejuſdem magnitudinis habere, ne turberetur operatio, ſi forte caſu frangeretur lamella quædam ex illis, quæ modioli ſerratū ambitum conſtituunt.

Omnibus illis ſic rite paratis, in medio centro orbiculi exſcindendi, trepano, perforativo dicto, leve veſtigium imprimitur, quod ſtylum trepani maris excipiet, licet etiam hoc omitti poſſet, ſi ſtylus ille trepani maris bene paratus fuerit: tunc enim facile una alterave terebræ circumductione ſtylus ille ſibi viam faciet. Perpendiculariter tunc applicatur terebra, ſtylo ſuo inſtructa, loco exſcindendo: deinde ſiniſtræ manus index digitus cum pollice ſummitati vertibuli trepani ſic applicantur, ut cavum forment circulum; cui frontem imponit Chirurgus, qui operationem perficiet; vel & mentum, ut alii volunt, ut minimam etiam terebræ aberrationem ſtatim ſentire poſſit, & corrigere: deinde dextra manu prehenſo vertibuli manubrio terebram lente & æquabiliter circumducit aliquot gyris, donec ſtylo medio ſenſim profundius adacto, dentes modioli calvariā radere incipiant; ſicque pergit, donec crena talis calvariæ inſculpta fuerit, quæ ſine vacillationis periculo, ſtylo exempto, terebram poſtea ſuſtinere poterit.

§. 289. **E**XEMTO tunc ſtylo pergitur, terebra lente adacta; ſcobe aſſiduo eraſa, donec cruor erumpens, ossis molities, mutatio ſoni, diploën attactam doceant; quæ ſæpe non præſens fruſtra exſpectatur.

Poſtquam tale veſtigium terebra cranio inſculptum eſt, tunc ſtylus medius tol-

(a) Nouveau traité des Instrumens de Chirurg. Tom. II. pag. 98. 113. 134. 135.

litur, ne citius penetrans duram matrem lædat. Videtur in antiquorum trepanis jam stylus ille mobilis fuisse; dicit enim Celsus (a) hanc operationem describere: *At, ubi jam iter modiolus impressum est, medius clavus educitur, & ille per se agitur.* Si autem postea, uti dicitur §. 291. orbiculus calvariae excisus cochlea eximetur; præstat hanc jam applicare, antequam ad diploën usque penetraverit terebra; quia aliter, dum hujus instrumenti circumrotatione spiralis ductus imprimitur ossis substantiæ, posset aliquando tabula cranii externa separari ab interna; & tunc difficilior foret orbiculi discissieductio: unde prius hoc instrumentum applicandum est, ut viam in osse faciat, dum adhuc binæ tabulæ cranii firmiter cohærent: quo facto eximitur iterum, & applicato modiolus lente & prudenter pergitur terebrando: *est enim, (uti Celsus (b) monuit), quidam premendi modus, ut & foretur & circumagatur: quia, si leviter imprimitur, parum proficit, si graviter, non movetur.* Veteres, qui non videntur adeo adhibuisse trepanum, ut effusos sub calvaria humores educerent, sed potius ut corrupti ossis partem tollerent, pergebant terebrando, donec crederent modiolum penetrasse ad sanam ossis partem usque: unde dixit Celsus (c), *cum sanitas inferioris partis scobe cognita est, modiolus removetur.* Os enim vitiatum alieno colore inficitur: hinc quamdiu terebra in corrupta ossis parte circumagitur, scobs abrafa similis coloris est; ubi autem profundius penetrans terebra sanam ossis partem radit, color scobis mutatus hoc docet. Cum autem hodie trepanum hanc ob causam rarissime adhibeatur, sed tantum ut perforata calvaria exitus detur humoribus effusis, vel ut depressum cranium commodius elevari possit, & fragmenta avulsa tolli &c., ideo pergitur, donec ad diploën perventum fuerit. Cum autem lente & prudenter circumducatur terebra, & sapius tollatur, ut scobs in crena collecta & inter lamellas trepani hærens auferri posset; non videtur adeo magnus metus esse, ne terebra à valido attritu nimis incallescet. Dum illud metuebat Hippocrates (d), iussit, *terebram inter secandum sapius auferendam esse, & in aquam frigidam demergendam, ne os incalascet.* Terebra enim, dum circumducitur, incalascens, os calefaciens & exsiccans incendit, & facit, ut plus abscedat ab osse in sectionis ambitu, quam abscedere debebat. Eandem cautelam adhibendam voluit Celsus (e), dum terebra cranium perforabatur; ubi vero modiolus applicabatur, dixit: *neque alienum est, instillare paululum rosæ vel lactis, quo magis lubrico circumagatur (f).*

Ad diploën autem pervenisse terebram cognoscitur mutato sono, dum non amplius per duram ossis substantiam modiolus circumducitur; unde & minor resistentia sentitur: & cum vasa sanguinea sæpe satis insignia per cellulosam hanc ossis fabricam decurrant; his laceratis ferræ dentibus, cruor erumpit; vel saltem scobis derafæ color, albus prius, tunc mutatur in rubrum. Huc usque audacter terebram circumduci posse, dixerunt fere omnes, nullumque omnino periculum subesse, antequam ad diploën penetraverit modiolus: imo in initio parum festinandum esse voluerunt plerique, cum circa finem adeo lente & suspensa manu procedendum sit. Sed constat certissimis observatis, aliquando diploën deesse, impri-

(a) Lib. VIII. cap. 3. pag. 510.

(b) ibidem.

(c) ibid. pag. 511.

(d) De Capit. vulner. cap. 35. Charter.

Tom. XII. pag. 129.

(e) Lib. VIII. cap. 3. pag. 512.

(f) ibid. pag. 510.

mis in senili ætate : & vidi tales calvarias , in quibus diploë in quibusdam locis aderat , in aliis aberat omnino ; unde sic turpissimus error committi posset. Videtur jam Celsus hoc monuisse , dum dicit : *sed tum majori cura agendum est, cum jam aut simplex os dimidium perforatum est, aut in duplici superius. Illud spatium ipsum, hoc sanguis significat* (a). Licet enim in hoc capitulo , uti & in præcedenti , de ossium vitiis in genere videatur agere ; tamen illa , quæ mox sequuntur , evincunt , quod de cranii perforatione hic loquatur : cum dicat , metum esse , ne mucrone cerebri membrana lædatur &c.

§. 190. **E** LOTO tum cruore , & per alcohol calidum compresso , exenta accurate scobe , summa cum cautela , lente , patienter , uno alterove gyro tantum agendus modiolus , assiduo everrenda scobs , perpetuo inspiciendum , an color in circulo exarato mutetur , assiduo exploranda fundi æquabilitas , tum variata pressione terebræ , pro vario colore apparente , os solvitur eo usque , ut parum adhærescat & æquabiliter.

Ubi ad diploën penetravit modiolus apparet facile , quanta cautela opus sit : sola enim interna tabula cranii , vitrea dicta , superest ; quæ sæpe tenuissima est in quibusdam calvariis , in aliis iterum multo crassior. Præterea arteriæ duræ matris , in profundis sulcis , cranii internæ tabulæ insculptis , locantur ; unde si pars talis sulci in orbiculo illo dissecito hæreret , posset terebra in illo loco jam penetrare calvariam , & insigne tale vas lædere ; cum in aliis locis satis crassa adhuc pars cranii perterebranda restaret. Inæqualis in plurimis locis cranii crassities pariter in causa est , quare tanta hic tarditate & prudentia opus sit. Si ergo , dum terebra per diploën transit , sanguis copiosior erumpat , ille alcohole calido sisti debet : impediret enim liberum conspectum crenæ in osse factæ. Scobs continuo everrenda est , post unam alteramve terebræ circumductionem ; & attendendum ad coloris mutationem , quæ in scobe abrafa apparet : quamdiu enim in diploë terebra circumagitur , tamdiu scobs rubicunda apparet ; ubi vero terebra internam cranii tabulam incipit radere ; scobs iterum alba incipit fieri. Sæpissime stylo immisso orbiculi disseciti fundus explorandus est , an ubique æquabilis sit ; an in omni loco os resonet ad styli attractum ; an vero in quodam loco , dissecito jam osse , mollis membrana tangatur. Simul attendendum est , admoto cereo ellychnio , an in fundo crenæ color albus ubique æquabilis appareat , an vero , pellucente per tenuem ossis lamellam dura matre , in quodam loco mutetur jam color. Ex omnibus enim his peritus Chirurgus novit , quibus locis major terebræ appressio conveniat , quibus vero non ; sicque sensim summa cum prudentia pergit , donec tenuissima tantum lamella super sit : integre enim excindere orbiculum periculosum foret , quia vix sine læsione duræ matris , cranio coherentis , fieri posset ; unde graves inflammationes cum periculo mortis oriri monuit Celsus (b).

(a) A. Corn. Celsi Medic. Lib. VIII. cap. 1. 3. pag. 512. (b) Lib. VIII. cap. 3. pag. 512.

Ob hanc causam Hippocrates, qui (uti jam dictum fuit) hanc operationem adhibuit, ut ossis vitia tolleretur, non ut exitum faceret effusis sub calvaria humoribus, noluit os ad membranam usque secandum esse, si quis in initio curam suscepit; ne in ipso opere terebra membranam vulneret: verum ubi parum abest, quin os totum jam dissectum sit, illudque jam vacillet, delistendum jubet, & permittendum esse, ut os sponte sua abscedat. Secto enim ossi ad talem profunditatem nihil mali contingere posse asserit: quia tenue est illud, quod relinquitur (a). Ubi vero per initia curationem quis non suscepit, sed ab alio traditam tardius perficere debeat; tunc ad membranam usque os excidendum esse jubet: & pulcherrime recenset omnes illas cautelas, quas adhuc hodie adhibent prudentes Chirurghi, ne in tali casu duram matrem ferræ dentibus lædant. Specillo enim terebræ circuitum sæpius tentandum jubet, & in partem ossis crassissimam terebram semper adigendam monet; simulque sæpe tentandum esse, an dimovendo os educi possit, antequam nempe integre dissectum fuerit. Omnia hæc eadem observanda monet, si quis ab initio suscepta curatione os ad membranam usque excindere voluerit (b).

Simul patet, quantum usum habeat conica interni modioli cavitas: nam os dissectum ascendit facile in latiore semper factum modiolum, & inclinari facile potest modiolus in omni ambitu, dum circa finem operationis non amplius æquabiliter circumduci debet, sed hanc illamve crenæ partem, ubi crassius esse os specillo detegitur, fortius radere. Si enim cylindrica foret interna modioli cavitas, non posset inclinari, quin apprimeretur os dissectum cavitatis internæ parietibus; impediretur libera terebræ circumductio; & sæpe secederet superior calvariæ tabula à diploë; unde postea residuum os difficilius tolli posset. Hoc aliquando accidisse patet ex Celso (c); sive de industria hoc factum fuerit, dum solam externam tabulam tollerent, non altius penetrante ossis affectione; sive vitio instrumenti hoc contigerit: Dicit enim: *ubi totum os ejectum est, circumradenda lavandaque sunt ora, & si quid scobis membrana insedit, colligendum. Ubi, superiore parte sublata, inferior relicta est, non ora tantum, sed os quoque totum lavandum est, ut sine noxa postea cutis increseat; quæ aspero ossi innascens protinus non sanitatem, sed novos dolores movet.* Simul apparet, si ullibi, certe in hac operatione, periculosissimam esse festinationem; imprimis circa finem; & omnium optimum esse, ut tenuis lamella relinquatur: poterit enim tunc vacillans jam ille orbiculus sine periculo tolli: quod quomodo fieri debeat, docebit sequens paragraphus.

§. 291. **U**B I color cærulescens, ejus per totum ambitum æqualitas, segmenti vacillatio docent, fere perforatum esse cranium, segmentum væste, cochlea, vel cochleari eximendum.

Postquam constitit signis hic recensitis, modiolum eo usque penetrasse, ut sine periculo læsionis duræ matris ulterius pergi non possit; tunc pars ossis dissecti educenda est. Hoc autem tentaverunt variis modis: vel enim væste parum in-

(a) Hippocrat. de Capit. vulner. cap. 34. |
Charter. Tomo XII. pag. 1. 8.

(b) Ibi. Capit. ultimo pag. 129.

(c) Lib. VIII. cap. 3 pag. 512. 513.

curvo, immisso intra orbiculum dissectum, tentabant elevare jam fere ab omni cohaesione liberum os; sed tunc facile patet, quod, dum ab uno latere elevatur, in opposita parte necessario deprimatur, atque ita dura mater lædi posset aspero margine ossis sic diffracti: & licet prudenter in omni ambitu tali vecti frangeretur coherens adhuc ossis pars, tamen adhuc cohererebiter firmiter duræ matri valis emissis & receptis; & sic hac methodo difficulter tolli poterit. Omnium optimum videtur, si perpendiculariter sursum trahendo educi posset: quod fieri poterit, si cavo semicirculari instrumento, utrimque intra crenam immisso, prehendatur dissectus orbiculus, & deinde hæc simul sursum ducantur; dum calvariae margo instar hypomochlii his instrumentis inservit. Si autem in vicinia fracta fuerit calvaria, facile patet, neque hoc tuto fieri posse. Pulcherrime fit, si cochlea spiralis applicetur medio centro orbiculi dissecti, ubi vestigium est à stylo trepani maris impressum; (uti dictum fuit in commentario §. 289.) deinde illa leniter circumtorquendo sic infigatur ossi, ut firmiter hæreat: potest ita commodissime tunc leniter hinc inde moveri dissectus orbiculus; & postea, ubi vix amplius coherere videtur, perpendiculariter sursum educi.

§. 292. **D**EIN asperitas lateralis ossis radenda lenticulari cultello, scobs demenda, via paranda cruori & fordibus exituris per sternutationem, animæ retentionem, & depressorium prudentissime & raro, foramen implendum tegendumque tenui, molli linteo, imbuto medela membranis amica, & apta lamella plumbi ansata.

Cum operatio hæc, si ex arte instituta fuerit, semper relinquat marginem foraminis facti asperum, & osseis festucis hirtum; quia orbiculus excisus tenui adhuc parte coherens sursum vi evellitur; & statim contentum calvaria encephalon in hunc locum assurgat; læderetur ab his aculeis dura mater; nisi statim cultello lenticulari (si dicto, quia obtusum ejus extremum lentis figuram refert) abradatur omne illud, quod in margine foraminis facti eminet. Illa autem, quæ in figura hujus instrumenti & usu quam maxime observanda sunt, videri possunt apud *Garengeot* (a). Scobs sic abrasa, duræ matri jam nudatæ incumbens, postea tollitur.

Aliquando accidit, ut, perforata calvaria, statim sanguis, vel pus aut ichor, inter cranium & duram matrem collecta, prodeant; sæpe etiam, licet hæc adsint, nihil exit. Dura mater enim ubique cranio adhæret, uti jam sæpius dictum fuit: hinc si, v. g. in quodam loco calvariae effusi humores duram matrem à cranio separaverint, & trepanum non fuerit directe applicatum huic loco; poterit sic dura mater, undique adhærens, coercere collectos humores, ut non possint per foramen factum, quamvis satis etiam vicinum fuerit, exire. Tuncque nihil superesset, quam in alio loco iterum cranium perforare. Tamen antea tentatur animæ retentio, vel & sternutatio; quia sic majori copia sanguinis distenditur encephalon, (reditu libero per venas impedito, affluxu interim per arterias ma-

(a) *Nouveau Traité des instrumens de Chirurgie* Tom. II. pag. 121. &c.

nente, uti explicatum fuit in commentario §. 271.) illudque distentum effusus humores versus foramen factum premet, ubi minor resistantia est. Aliquando & observatum fuit, licet statim non exiverint per foramen factum collecti humores, sequenti die sponte illos prodiisse. Ut vero promoveatur facilis exitus effusi liquidi, cum prudentia lenissime deprimunt Chirurghi duram matrem instrumento, quod Meningophilax vocatur, ac si diceret membranae custodem. Instrumentum illud obtusum talem apicem habet, uti cultellus lenticularis, qui rotundo cylindro politissimo continuatur. Hoc instrumento, parum tepesfacto prius, ne frigore his partibus detectis insolito noceat, lenissime premitur dura mater, ut ab ambitu foraminis exsecti parum recedat, sicque facilis via pateat humoribus in vicinia foraminis effusis: simul etiam sic impeditur, ne dura mater, dum animam retinet vulneratus, acuto foraminis margini appressa lædatur. Simile quidem nomine instrumentum, sed diversae structurae & usus, apud Celsum (a) describitur: Erat enim lamina aenea firma, paulum resima, ab exteriori parte laevis, qua utebatur, ut, factis prius in calvaria foraminibus, eorundem septa media scalpro tuto excidere posset; loco enim exciendendo submittebatur hæc lamina inter cranium & duram matrem, ne scalprum malleolo percussum hanc membranam læderet. Eadem hac lamina etiam utebatur, ut os depressum attolleret (b).

Postquam humores effusi educti fuerunt, notandum quam maxime, quod in loco foraminis facti desit calvaria coercens; & cum ejus cavum semper plenum sit, nisi cautela adhibeatur, incipiet attolli in hoc loco encephalon; imprimis si dura mater simul læsa fuerit, & in fungum excrescere. Et quamvis dura mater illæsa fuerit, tamen, nisi idoneo apparatu coerceretur, inciperet sensim attolli, & super ossa eminere, ut Celsus monuerat (c). Unde apta ligatura compensari debet deficiens pressio. Sumitur orbiculus ex linteo mollissimo, parum major, quam est foraminis excissi amplitudo, ille applicatur duræ matri, & sub limbo foraminis inter duram matrem & cranium in omni ambitu subducitur, sicque cavetur, ne acuto margini foraminis appressa dura mater lædi posset. Centro hujus lintei filum adhæret, ut postea commode semper tolli posset. Instillantur tunc aliquot guttulæ balsami Peruviani tepidi, vel alterius similis balsami vulnerarii, deinde foramen repletur plumaceolis rotundis, ejusdem cum foramine diametri, & simili balsamo madis: repleto sic foramine, applicantur plumaceola parum majora, integumentorum dissectis labiis mollissima digestiva applicantur; dein idonea ligatura firmatur totus apparatus,

Pulchrum laudatur inventum peritissimi Chirurghi *Belloste* (d), qui lamellam plumbeam ejusdem diametri, ac est foramen trepano factum, binis ansis utrimque instructam, parvis foraminulis perforatam, & balsamo vulnerario tepido madidam, immittebat foramini; deinde huic lamellæ imponebat plumaceola mollissima, quæ effluentes humores imbiberent; ansas utrimque reflectebat supra calvariam, deinde apta ligatura firmabat apparatus. Sic leni tali pressione impediabatur, ne exurgeret in foramen dura mater: poterant renovari plumaceola, relicta hac lamella plumbea; quæ tamen etiam, si opus videretur, facile tolli & reponi poterat. Hac lamella per quatuordecim dies utebatur, deinde tollebat, ne ossis consolidationi noceret diutius relicta.

(a) Lib. VIII. cap. 3. pag. 512.

(b) Ibid. cap. 4. pag. 512.

(c) Ibid. pag. 510.

(d) Le Chirurgien d'Hôpital. pag. 69. &c.

Quia autem, nisi idonea ligatura retineat, à tumente encephalo posset elevari hæc plumbea lamella, imprimis cum foramen conico modio ab inferioribus sursum semper latefeat; ideo & alia methodo usi fuerunt Chirurghi. Sumpserunt nempe laminam plumbeam, quæ foraminis inferiorem diametrum æquabat: hanc filo instructam in medio centro applicabant duræ matri, dein huic transversum imponebant plumbeam lamellam, lineam Geometricam circiter latitudine æquantem, & longitudine parum excedentem diametrum prioris laminæ: hujus lamellæ extrema utrimque sub cranio prudenter demittebant, quæ ergo impediobat, quo minus encephali pressio posset elevare orbiculum illum plumbeum. Huic lamellæ pariter filum affigebatur, ut commode tolli posset (a).

§. 293. CURATUR dein ut vulnus membranæ (185. ad 239):

Illa, quæ in generali vulnere cura dicta sunt, sufficiunt, ut habeatur cognitio illorum quæ requiruntur, ut fiat sanatio perforatæ calvariæ; imprimis si simul considerentur illa, quæ habentur in commentario ad §. 245. Maxime hic requiritur aëris moderatus tepor, dum nudatur plaga, & rara deligatio; præterquam in initio, dum adhuc prodeunt extravasata liquida; uti etiam quamdiu valida adest suppuratio. Nimis humida & laxantia, uti & pingua, fere semper noxia fuerunt; Olibanum, mastiche, sarcocolla, & similia lenia roborantia, in tenuissimum pollinem trita, & vulnere aspersa, pulcherrime profuerunt. Hæc methodus confirmatur Hippocratis (b) autoritate: qui, postquam monuerat, omnia capitis vulnera, ubi repurgata sunt, siccantibus tractari debere, subjungit: *Eandem quoque est ratio membranae cerebrum ambientis: illa enim protinus ossi secto & exempto denudata quam citissime purgari & siccari debet; ne, si diutius madescat, nimia uligine tabescat, & in tumorem exsurgat. His enim ita se habentibus periculum est, ne ipsa putrescat.* Summa quies animi & corporis, diæta tenuis, imprimis commendanda sunt: cum levia etiam vitia in usu sex rerum non naturalium in capitis vulneribus adeo noceant; uti in præcedentibus pluribus Exemplis confirmatum fuit.

§. 294. ITA enim intra 40. & 50. dies separati sunt margines ossei foraminis; quotidie enascitur caro cavum replens, quæ sensim durior, tandem calli ossei, cavati, vel eminentis formam adipiscitur: ubi debilitas & dolor aliquis remanent.

Omnis ambitus foraminis, excissi serræ dentibus, & abrasione per cultellum lenticularem, contusus fuit: hinc omnis illa superficies ossis quasi gangrænosa est, & separari debet, antequam poterit fieri regeneratio perditæ. Optime hoc notavit Celsus dicens: *Si quod etiam os adustum est, (à terebra calefacta, dum circumagitur celeriter) à parte sana recedit; subitque inter integram atque emortuam*

(a) Garengot Traité des Opérations de Chirurgie pag. 212.

(b) De Capitis vulner. cap. 26. Charter. Tom. XII. pag. 126.

partem caruncula, qua, quod abscessit, expellat. Eaque fere, quia testa tenuis & angusta est, *λεπίς*, id est squama à Græcis nominatur (a). Hæc separatio serius acyusve fit, imprimis pro varia ætate vulnerati; incipitque tunc tota superficies foraminis sulca fieri, imo aliquando nigrescere: totum tamen illud sponte benigna suppuratione separatur; tuncque incipiunt ab omni ambitu foraminis, imprimis à diploc & ab ipsa dura matre, vasa viva elongari, sibi mutuo occurrere, implicari, & retexere sic deperditam ossis substantiam. Pulcherrime hanc rem notavit Celsus (b) dicens: *Ubi bene res cedit, incipit ab ipsa membrana; vel, si os eo loco duplex est inde quoque caro excrescens id, quod inter ossa vacuum est, replet: nonnunquam etiam super calvariam excrescit.* Renata hæc substantia primo tenerum mucum refert; lentim in callum mutatur, & tandem osseam fere duritiem acquirit; sed non nisi longiori mora. Si æquabilis pressio semper adhibita fuerit, pulchra satis erit cicatrix; si minor pressio luxuriare fecerit renascentia hæc vascula, eminebit callus supra æquabilem superficiem calvariae; si nimia pressio, vel valida exsiccantia applicata fuerint, cava erit cicatrix. Plerumque intra quadraginta vel quinquaginta dies hæc cura absolvitur, si nihil sinistri acciderit, quod consolidationem retardaverit.

Observatione quam maxime dignum est, quod, quamvis perfectissime videatur recrevisse callus, raro tamen totum foramen integre repletum si tali substantia, quæ osseam duritiem acquirit: plerumque in medio mollior locus manet, ubi carnea magis substantia, duræ matris forte propago, concurrit cum illa, quæ ex ossis ambitu undique recrevit: unde plerumque in medio talis cicatricis debilior locus adest, forte nunquam in perfectum os indurefcens. Hoc in pluribus calvariis defunctorum, qui hanc operationem passi fuerant, se observasse testatur *Garengo* (c), & præsertim in calvaria hominis, qui ante viginti annos celeberrimus Chirurgus trepanum applicuerat: invenit enim in illo loco foramen inæquale, quod minus pilum transmittere poterat. Non mirum ergo, si debilitas in hoc loco cranii, & aliquis dolor sæpe remaneant; imprimis à subita tempestatum mutatione: simulque apparet, debere locum illum, quamvis sanatum, diu adhuc muni, ne ambientium injuriis lædatur. Alia occasione, in commentario ad §. 271. dictum fuit de memorabili illo casu, quo tredecim annorum puellæ, magna parte calvariae ablata, post novem menses elapsos post integram consolidationem, cicatrix rupta fuerit à vehementissima tussi, sic ut binæ uncie ipsius cerebri substantiæ expressæ fuerint; & post quinque dies inde perierit.

Curam autem bene procedere monet Celsus (d), *si membrana mobilis ac sui coloris fueris; caro increfcens rubicunda; facilis motus maxilla atque cervicis. Mala signa sunt, membrana immobilis, nigra, vel livida, vel aliter coloris corrupti, dementia, acris vomitus, nervorum vel resolutio, vel distentio, caro livida, maxillarum rigor, atque cervicis.* Et paulo post subjungit: *capite fracto, donec jam valida cicatrix sit, vitentur sol, ventus, frequens balneum, major vini modus.*

(a) Cef. Lib. VIII. cap. 3. in fine pag. 513. | III. pag. 214. 215.
 (b) Lib. VIII. cap. 4. circa finem. pag. 521. | (d) Lib. VIII. cap. 4. pag. 520. 521.
 (c) Traité des opérations de Chirurgie Tom.

§. 295. **I**NFLAMMATIO, suppuratio, gangræna, fungus excreescens raro membranarum, & ipsius etiam corticis imprimis cerebri, tolluntur remediis, quæ his malis propria, tum applicatione antiphlogisticorum, detergentium, antisepticorum, filo, & lamella plumbea (292). Cæterum malignitas vulnerum capitis censetur. 1. loco. In occipite, vertice, pariete, futuris, pessima. 2. symptomatibus; febris post septimam cum frigore, tremore, vulnere pallido, arido, livido, osse aspero, flavo, hemiplegia, convulsione. 3. ætate. 4. temperie. 5. tempestate anni. 6. malignitate impuri, putrisque aëris.

Superest jam ut considerentur illa symptomata, quæ post institutam calvariae perforationem aliquando sequuntur, & magnum sæpe periculum inducunt. Cum enim ablato osse, ob calvariae plenitudinem, contentum encephalon una cum dura matre per foramen factum assurgat, nisi hoc caveatur illis, quæ dicta sunt §. 292., ad margines duri ollis appressa dura matre, impiedietur liber transitus sanguinis per ejus vasa, orietur inflammatio, & omnia, quæ illam sequi poterunt, mala; imprimis suppuratio & gangræna. Multum huc facit insolitus aëris, imprimis frigidi, contactus. Idem malum fieri poterit in piæ matris vasis, ipsiusque cerebri corticali substantia, unde omnes encephali functiones lædi poterunt. Generalis cura inflammationis, de qua dicitur postea, tollere præsens malum poterit; tutius vero præcavere, antequam natum fuerit. Venæ sectio larga, epipastica, pedibus applicata, clysmata lenissima, tenuis victus, potus copiosus feri lactis, hydrogalæ &c. corpus sic disponent, ut ab inflammatione alienissimum sit. Eadem hæc natam inflammationem tollere valebunt, audacter etiam repetita, si urgeant symptomata. Periculosissimam enim hic esse suppurationem, lethalem fere semper gangrænam, nullus dubitat; unde omni artis molimine præcavendi sunt hi inflammationis exitus.

Frequens satis, & valde metuendum malum, solet sequi calvariae perforationem; fungosa nempe, & subitissime increescens encephali dilatatio: quæ raro, vel nunquam forte, contingit, quamdiu dura mater integra est; hac vero difficilis vel erosa, pia mater, adeo tenuis, coercere nequit huc assurgentem cerebri substantiam: quæ adhuc citius protuberabit, si pia mater simul læsa fuerit. Ob incrementi celeritatem, & figuræ similitudinem, fungi vocantur, uti dictum in commentario §. 268. Celsus videtur simile malum observasse, sed credidit esse tumorem duram matrem. Aperto enim cranio, & detecta dura matre, dixit: *Quod si membrana per inflammationem intumuerit, infundenda eritrosa tepida. Si usque eo tumebit, ut super ossa quoque emineat, coercet eam bene trita lenticula, vel folia vitis contrita, & cum recenti vel butyro vel adipe anserino mista (a).* Videtur autem omnibus observatis constare, fungos illos fieri à corticali pulposa cerebri substantia, coercetibus membranis & osseo tegmine orbata, & immaniter dilatata ab impulsis arteriosa vi humoribus; omnium maxime, si febris circulationis velocitatem auxerit. Cum autem cortex cerebri naturaliter nihil rubri sanguinis habeat, ideo &

(a) A. Corn. Celsi. Medic. cap. 4. pag. 510.

hi fungi secti, & erosi, raro sanguinem fundunt; nisi maxima dilatatione horum vasculorum diametri eo usque auctæ fuerint, ut rubrum sanguinem admittant: quod raro quidem fit, tamen aliquando factum fuisse testantur observata. In mirabili enim illo casu, in commentario §. 268. recensito, fungosa talis excrescens, pertuso cranio, moles valide pulsantes habebat, arterias, & rudius tractata sanguinem copiosissime fundebat. Ob hanc causam, immutato circulationis impetu, fungi illi ante mortem sæpe subsident; uti in eodem casu aliquot ante mortem diebus observatum fuit: fungus enim nucem juglandem æquans, coloris cineritii, indolens, sponte subsedit, paucis ante mortem diebus; & ingens hiatus in ipsa cerebri substantia apparuit. Scultetus in homine, acinace caput vulnerato, rimam cranii magnam & satis latam cum duobus fungis invenit: post mortem autem, dum vulnus inspiceret, vidit fungos subsedisse quam plurimum (a). Quæ omnia confirmant, quod fungosæ tales excrescentiæ à corticali vasculosa encephali substantia, ab impulsis humoribus dilatata, nascantur.

Quæritur jam, quid agendum sit in tali casu? ubi fungus talis eminet, retro-premi nequit, encephalon enim comprimeretur, & pulpola hæc vascula levi etiam pressione destruerentur; unde putredo summa, & pessima mala. Abscindere vel erodere ipsam cerebri substantiam periculosum nimis forte videbitur. Tamen innumera observata docuerunt, fungos tales resectos fuisse, superstitie vita non tantum, sed & omnibus encephali functionibus illæsis manentibus postea. Puero quatuordecim annorum, post trepani applicationem, talis fungus ex foramine calvariae emerit: filo circumstricto abscissus fuit; renascebatur similis, eodem modo resectus; hoc cum aliquoties factum fuit, ad pugni magnitudinem de substantia cerebri sic periisse constitit: tamen à tanto malo incolumis evasit; licet & quævis obvia sumeret pauperculus, & satis negligenter ipsum vulnus à mulierculis curatum fuerit, dum Chirurgus abesset. (b) Puero ejusdem ætatis à ponderoso lapide, in dextrum latus capitis ex alto delapso, ingens cranii fractura accidit. Cum, exemptis pluribus calvariae, fragmentis, omnia pulcherrime cedere viderentur, & cum pars duræ matris, à cranii fragmentis impressis lacerata, separata fuisset, elapso die vigesimo, enatus fuit de vulnere fungus, qui intra viginti quatuor horas ad magnitudinem ovi gallinacei extra cranium eminuit: tamen asperso pulvere aromatico exsiccante, & emplastro ex similibus composito &c. intra quatuordecim dies totus fungus subsedit, & postea plenissime convaluit vulneratus (c). Plura Exempla, quæ docent impune tolli posse hos fungos, apud eundem Autorem habentur. Acrioribus tamen remediis fungos tales tentare videtur periculosum: & eodem in loco Hildanus casum narrat, quod rudis Chirurgus, contempto prudentioris consilio, fungo tali pulverem vitrioli & aluminis usi insperferit, unde statim dolor vehementissimus, febris acutissima, inflammatio, delirium, & paucis diebus postea mors ipsa secuta fuit.

Si consideretur mirabilis ille apparatus, quo arteriæ ad encephalon tendentes ubique communicant inter se, postquam calvariam ingressæ sunt; & simul notetur, quod injectiones docuerint, piæ matris arterias ubique anastomosis in-

(a) Sculteti Armament. Chirurg. Observ. 19. | Observ. 3. pag. 287.
pag. 317.

(b) Hildani Observat. Chirurg. Centur. IV.

(c) Ibid. Centur. I. Observ. 15 pag. 22. 23.

ter se uniri; idemque in tomentosis illis ultimis corticis vasculis obtinere ex analogia admodum sit probabile; patebit ratio, quare, magna etiam parte corticalis substantiæ cerebri ablata, functiones cerebri illibatae manere possunt. Simul notandum, quod parva etiam corticis cerebri moles, coërcentibus tegumentis libera, in immanem molem possit extendi; cum vasculis adeo teneris & facillime dilatandis constet.

Omnium optimum videtur ergo majores fungos filo circumducto resecare prope calvariæ foramen; ubi semper angustiores sunt; minores vero exsiccantibus compescere: qui scopo spiritus vini, cum mastiche vel olibani coctus, pulchre convenire videtur; vel & pulverem mastichis, sarcocollæ &c. fungo inspergere.

Licet autem fungus ablatas fuerit, recrescet brevi, uti innumeris observatis constitit; nisi restituatur æquabilis pressio, quæ impediat nimiam luxuriantium vasorum distensionem; simulque adeo moderata fiat circulationis velocitas & impetus, ut non nimis urgeantur tam facile dilatanda vascula. Prius perficietur linteis carptis replendo foramen; vel & applicando lamellam illam plumbeam, de qua dictum §. 292.; & deinde idonea ligatura hæc sic firmando, ut in loco maneant. Posterius impetrabitur, si missione sanguinis minuaturs copia distendentis liquidi: quiete corporis & mentis; diluentibus antiphlogisticis magna copia potatis; victu tenui & blando; lenibus anodynis poterit compesci nimia circulationis velocitas. Clysmata ex similibus facta, fomenta applicata partibus inferioribus, epispastica &c. derivabunt impetum versus inferiora.

Ex tota hac vulnere capitis historia, uti & ex illis quæ de vulneribus in genere dicta sunt, satis constitit, levia sæpe capitis vulnera præter omnem expectationem funestum habuisse exitum; atque iterum, gravissimas non tantum calvariæ, sed etiam ipsius encephali læsiones, sine ulla abolitione vel læsione functionum, aliquando curatas fuisse. Plurimæ observationes ex optimis auctoribus enarratæ fuerunt, quæ hæc confirmant. Unde videtur pro axiomate haberi posse, quod nullum capitis vulnus, quantumvis leve videatur, perfunctorie tractandum sit; neque facile desperandum esse, etiam in gravissimis malis. Ut tamen, quantum per artem hodie cognitam licet, vulnere capitis Prognosis habeatur, sequentia consideranda sunt.

I. OCCIPITE. Validissimi hic muscoli calvariæ insiguntur; cerebellum, à quo tota vita pendet, hic reconditur; sinus magni transversales hic ponuntur. Effusus si fuerit vasis fractis sanguis, difficillime hic educi poterit; imo si sub expanso duræ matris velo, quod cerebellum regit, & à pressione incumbentis cerebri tuto defendit, hæserint effusi humores, impossibilis omnino videtur horumeductio.

VERTICE. Calvaria enim omnium tardissime ibi osseam duritiem acquirit; in junioribus diu membranaceus talis locus manet, quem fontanellam vocant. Falciformis duræ matris processus satis valide adhæret ibi, & sinus longitudinalis supponitur: unde facile patet, magnum discrimen vulnere, quæ huic loco insiguntur.

PARIETE. Quia satis sæpe tenuia plerumque inveniuntur bregmatis ossa imprimis circa medium centrum, & sulci impressi his ossibus docent, satis magnas arterias duræ matris hic locari. Præterea hæc ossa capitis pro maxima parte solis

integumentis communibus teguntur; unde Hippocrates (a) magis periculosa huic parti inflicta vulnera concludit, quia os imbecillum, minima carnis tectum, & plurimum cerebrum subest.

SUTURIS. Quia pericranium hic cum dura matre videtur uniri, & cranium hic fortissime cum dura matre coheret; unde mala in externis partibus orta, substantiæ continuitate, ad interiora facile propagari poterunt. Accedit, quod, si effusi humores, perforata calvaria, educi debeant, nunquam hæc operatio possit institui in loco suturarum, semperque magnum dubium addit, si inter cranium & duram matrem effusus hæreat sanguis, a quo futuræ latere calvaria perterebrari debeat, cum dura mater firmissime adhærens futuris in diversis quasi cameris locare possit extravasata liquida; uti latius dictum fuit in commentario ad §. 285.

2. Symptomata, post vulnus inflictum orta, docent, quænam functiones læsæ fuerint, & majus minusve metuendum ex vulnere periculum: quo ergo plura hæc, quo graviora fuerint, eo major semper metus. Sed dictum fuit in commentariis §. 240. n°. 4. gravia symptomata, statim post vulnus inflictum apparentia, sæpe minus formidolosa esse illis, quæ post aliquot dies elapsos apparent; illudque Hippocratis testimonio confirmatum fuit. Pessimi semper ominis habita fuit febris, quæ post septimum diem à vulnere inflicto oritur; novam enim inflammationem, vel suppurationem, hic adeo metuendam, fere semper designat; & ab Hippocrate (b) damnatur hæc febris, tanquam signum male affecti cranii, & neglectæ ejus curæ. Vulneris autem ruber color mutatus in pallidum vel lividum; uti & quando instar carniū emarcidarum, vel sale diu conditarum, labia vulneris apparent, & arida fiunt; designat, omnia hic in mortem & corruptionem tendere; uti fusius dictum fuit in commentariis §. 255. n°. 8. Cum autem cranium læve, & coloris candidi rubelli aut subcærulescentis naturaliter sit; ejus asperitas & mutatus color in flavum, vel & fuscum, docent, illud corruptum esse, & natura, vel arte separari debere sic affectam partem: videantur de his illa quæ dicta sunt in commentario §. 249. Hemiplegia autem, uti & convulsio, cerebrum ipsum affectum esse docent; siue illud compressum fuerit ab intropressa calvaria, uti dictum §. 267. siue ab effusis sub cranio humoribus pressione vel corruptela lædatur cerebrum; vel & sola valida concussione, sine notabili liquidorum effusione, tenerrima encephali fabrica insigniter mutata, vel destructa; de quibus vide §. 273. 274. 275.

3. In junioribus ossa molliora facilius cedunt, & minus resistere possunt causis vulnerantibus: in adultis omnia hæc firmitiora sunt: in senibus dura quidem sunt omnia ossa, sed maxime fragilia. Præterea ossa omnia in juniore ætate magis vasculosa sunt, & hinc majori humiditate scatent; cum procedente ætate plurima vasa complanata concrecant; uti pulchre notavit Hippocrates, (c) dicens: *Puerorum vero ossa & tenuiora sunt, & molliora ideo, quod sanguine magis redundant; &c. unde ab eodem, vel & leviori vulnere, junioris pueri os magis & citius, minorique temporis spatio purulentum evadit, quam senioris. Et si aliqui ex vulner,*

(a) De Capit. vulner. cap. 3. Charter.

Tom. XII. pag. 116. 117.

(b) De Capit. vulner. cap. 31. Charter.

Tom. XII. pag. 117.

(c) Ibid. cap. 27. Charter. Tom. XII. p. 117.

moriendum sit, junior seniore citius perit. Accedit quod juniores mobilissimum habeant totum systema nervosum; unde etiam levioribus de causis adeo facile convelluntur; ideoque à capitis vulneribus in hac ætate majus periculum imminet. In senibus vero tardior separatio ossis affecti, & difficilior regeneratio perdati observatur semper: quia minor numerus vasorum vitalium in ossis substantia in hac ætate; imo sæpe integra diploë, quæ tota fere vasculosa est in summo senio evanescit.

4. Temperies vulnerati dupliciter considerari potest: vel enim est temperies sana; vel morbosa. Unicuique enim homini privata & propria sanitas est, quæ tantum ratione hujus singularis corporis talis dici potest: & videmus diversissima in solidorum compage & fluidorum attributis corpora tamen sana esse. Hæc vocatur sanitas temperiei, quam in calidam & frigidam, humidam & siccam &c. distinxerunt Veteres Medici. Pater facile inde magnum discrimen obtinere in omnibus vulneribus, & imprimis capitis; in calidis enim & biliosis hominibus longe validior inflammatio, & multo major degeneratio humorum extravasatorum expectanda sunt: in frigidis, mucosis, debilibus hominibus, contrarium obtinet. Temperies autem morbosa ex prædominante cacochymia cognoscitur: pessima autem in capitis vulneribus illa temperies morbosa, quæ ossa inficere & corrumpere solet; uti scorbutica, rachitica, Venerea &c.

5. Summus æstus, & glaciale frigus, semper capitis vulneribus noxia; vernus tepor imprimis prodest. Æstivos tamen calores hyemali frigore magis noxios damnavit Hippocrates (a), dicens: *Et hyeme diutius vivet homo quam æstate, si quis cateroquin periturus sit ex vulnere, quacumque demum capitis parte vulnus habeat.* Et alibi (b), postquam signa recensuit, quibus cognoscitur, capite vulneratum periturum esse, dicit: *æstate ante septimum diem, hyeme ante decimum quartum pereunt.* Longe etiam facilius acre frigus accenso foco temperari potest, quam intensus calor. Forte & ob hanc causam in calidis regionibus capitis vulnera difficilior curari observatum fuit: sic in Italia hoc constitisse Ludovicus Duretius monet. Alia tamen & hujus rei ratio data fuit in commentariis §. 245.

6. Dictum fuit in commentariis §. 245. æris; imprimis frigidiusculi, liberum accessum capitis vulneribus nocere: & in commentariis ad §. 200. demonstratum fuit, purum ærem, sæpe renovatum, & ab omnibus putridis exhalationibus liberum, omnibus vulneribus tam pulchre prodesse. Unde post conflictus bellicos, qui frequentissime æstivis caloribus contingunt, dum in nosocomiis ingens vulneratorum numerus decumbit, tot exhalationibus putridis repletur ær, ut plurimi pereant; imprimis illi, qui ex capitis vulneribus decumbunt. Unde peritissimus Chirurgus Belloste inter utilitates præcipuas, quas pulchra ejus methodus minutis terebris calvariam nudatam & male affectam perforandi, descripta §. 252. 253. 262. habet, recenset, quod vulnerati sic longe citius curentur; nec cogantur diu languere, in nosocomiis, ubi à malignis illis exhalationibus robustissima etiam corpora pessime affici, quotidianis experimentis constat: & affirmat, se centies vidisse, sanatos jam, & abitum meditantes, putridis febribus, hæmorrhagiis, diarrhæis &c. correptos periisse (c).

(a) De Capitis vulner. cap. 4. Charter.]
Tom. XII. pag. 117.

(b) Ibid cap. 31. pag. 118.

(c) Belloste Chirurg. d'Hopital. pag. 671

§. 196. **S**I cruor, pus, sordes sub membrana latentes deprehenduntur post perforatum cranium, audacter incidenda, pertundendave erit membrana coercens.

Perforata calvaria exitus quidem patet humoribus effusis inter hanc & duram matrem; sed si sub dura matre extravasata liquida hæserint, facile patet, hæc non posse educi, nisi discindatur vel pertundatur dura mater. Verum quidem est, quod omnes Medici & Chirurgi semper sollicitissime caverint, ne modioli dentes, dum calvaria perterebratur, duram matrem lædant; inde enim graves inflammationes cum periculo mortis oriri testatur Celsus (a): sed aliud quid est dentibus serræ lacerare hanc membranam, aliud cuspide lanceolæ acutissimæ prudenter pertundere. Nec aliud in tali casu superest: sic enim relinquuntur hæc extravasata liquida, corrumpuntur, & destruent teneram encephali fabricam, vel dura mater corrupta & gangrænosa facta secedet; qualem casum refert Scultetus (b). Videtur autem hoc satis tuto fieri posse, cum constiterit observatis, magna etiam parte duræ matris rescissâ in periculotissimo vulnere, profunde in ipsam substantiam cerebri penetrante, sanatum fuisse ægrum. Illud patuit in mirabili illo casu memorato in commentariis §. 187. ubi bis applicato trepano ingens pars calvariæ exscindebatur, & simul dura mater dissecabatur per omnem ambitum tam magni foraminis. Dum vero sanguis effusus coagulatus hæret sub dura matre, sæpe color niger per hanc membranam pellucet; & dum forcipe tollere vellet grumum sanguinis Chirurgus, arriperet duram matrem. Si de hac re dubitatur, digito saliva madido leviter tantum fricetur ille locus; colore enim sanguineo digitus tingetur, si thrombus coagulati sanguinis nudus ibi hæreat; si vero sub dura matre recondatur, non colorabitur digitus. Ubi vero pertusa fuit dura mater, ex ante dictis patet, periculum esse, ne fungus cerebri nascatur; quod ergo idonea pressione præcavendum erit. Si autem humores effusi non hæserint inter duram & piam matrem, sed profundius in ipsis v. g. cerebri ventriculis locentur, nulla medela superest. Quis enim auderet cerebri ipsius fabricam pertundere? Unica spes est, pressione encephali, calvariam semper exacte replentis, alibi hærentes effusos humores posse sensim forte derivari versus aperturam factam.



VULNERA THORACIS.

§. 197. **V**ULNERA Thoraci inflicta, nec in cava penetrantia, cognoscuntur aspectu, stylo, aëre nulla arte exiliante, injectæ tepidæ repulsi, corporis situ, ut in accepto vulnere, eodem, signis certis adnati pulmonis ad illum locum pleuræ, quem transit ictus.

Thorax vocatur illa pars trunci corporis quæ antè sterno, postè dorsi

(a) Lib. VIII. cap. 3. pag. 511.

(b) Armament. Chirurg. Observ. 3. p. 195.
K k k iij

vertebris duodecim, à latere arcuatis costis, superius costis binis superioribus terminatur, & inferius per diaphragma à cavitate abdominis separatur. Cum autem diaphragma arcuatum fornicem faciat & oblique positum, sic ut antèrìus satis alte assurgat, posterius autem profundius descendat, patet, thoracis cavum versùs posteriora multo amplius esse. Interne tota hæc cavitas membrana politissima, pleura dicta, undique investitur, quæ binas quasi cava vesicas formans, uti dictum §. 170. n°. 4. sibi mutuo accumbentes prope sternum, thoracis cavum bifariam dividit. Inter binas illas pleuras locatur Pericardium una cum corde incluso, quod tertiam thoracis cameram constituit.

In omni vulnere thoracis primo quæritur, an in cava thoracis penetret, an non? ubi instrumentum vulnerans pleuram membranam, vel pericardium, perforaverit, tunc dicitur in cava thoracis penetrasse, aliter non. Plurimæ autem lædi possunt partes, & quidem magno cum periculo, licet vulnus thoraci inflitum non penetret in ejus cava. Utriusque enim lateris pleura, ubi pervenit ad latus columnæ vertebrarum utrimque, secedit à finibus ultimis costarum, & assurgens inde spatium satis amplum relinquit, quod cellulosa membrana occupatur, per quam œsophagus, aorta, ductus thoracicus &c. pergunt. Omnes ergo partes hic posita possunt lædi, licet vulnus non penetret in cava thoracis. Rarius tamen hoc fieri posse facile patet, quia à parte posteriori vertebrarum columna tuto defenduntur. Vulnus autem in pectoris cava non penetrasse, sed sola externa læsisse, cognoscitur sequentibus signis.

A SPECTU. Si nempe vulnus satis patulum fuerit, & recta penetra-verit.

STYLO, ex plumbo vel argento molliſſimo, sine ulla vi adhibita per vulneris aperturam introducto. Sed facile patet, mutatum situm corporis, pinguedinem vulnus obstruentem, thrombum sanguinis &c. stylo viam facile sic impedire posse; ut resistentia inveniatur, quamvis vulnus in cavum thoracis penetret.

AERE NULLA ARTE EXILIENTE. In commentariis §. 170. n°. 4. demonstratum fuit, quamdiu thoracis cavum clausum est, pulmonem pleuræ semper exacte contiguum esse, nullumque omnino aërem inter pulmonem & pleuram hære-re: ubi vero instrumentum vulnerans pleuram penetravit, aër ingredi potest, pulmo illius lateris collabitur; & spatium sic natum repletur aëre ingresso. Ille aër autem, calore rarefactus, iterum per vulnus pro parte exiit, novus aër iterum ingreditur, sicque ibit & redibit hanc viam; imprimis si vulnus pleuræ non nimis patulum fuerit; tunc enim aliqua adhuc dilatatio pulmonis ab aëre per glottidem ingresso fieri poterit, uti latius dictum fuit in loco modo allegato. Omni jam cura periti Chirurghi in vulneribus thoracis inquirunt, an aër cum impetu per vulnus exeat, imprimis sequenti modo. Postquam Chirurgus pollice vel digitis vulneris labia sic compressit, ut nullus aër ingredi vel exire possit, jubet vulneratum valide inspirare aërem, & inspiratum aërem in pulmone retinere, clausa larynge: deinde, antequam exspiret vulneratus, candelulam ceream prope vulnus ponit, tuncque subito labia vulneris diducit: si jam aër cavum pectoris ingressus fuerit, ille cum impetu efflabitur de vulnere, & movebit flammulam candelulæ ceræ. Dum enim aër, pertusa pleura, in cavo pectoris hæret, clauso vulnere, à corporis calore rareſcit; simul, si valida inspiratione adhuc parum dilatari

tantum possit pulmo illius lateris, aer in pulmone, clausa glottide, retentus & rarefactus expandet pulmonem; hinc urgebitur eo magis aer in cavum pectoris ingressus; qui ergo, simulac aperto vulnere libera datur via, cum impetu & sibilo exibat. Facile autem apparet, certissimum quidem esse, si per vulnus inflictum hac methodo aer exeat, quod vulnus in cavum thoracis penetraverit; interim tamen accidere posse, quod thorax quidem perfossus sit, & nullus aer tamen ingressus sit, pinguedine, imprimis post mutatum corporis situm, replente statim viam instrumento vulnerante factam; vel etiam, licet pauculum aeris sic ingressum fuerit, ille non facile poterit iterum exire per vulnus ob eandem causam. Imprimis autem hoc fiet, si angustum vulnus in thoracis cavum penetraverit. Ex his ergo apparet, qualem hoc signum certitudinem dare possit.

INJECTÆ TEPIDÆ REPULSUS. Tutissima videtur hæc methodus, & omnium certissima. Exploratio enim per stylum facta sæpe fallere potest, cum aliquando mutato corporis situ, imprimis in obesis, membrana cellulosa viam impediat, quo minus stylus immissus ad fundum vulneris possit pertingere. Aliquando etiam insigni longitudine stylus poterit immitti, nec tamen penetrare in pectoris cavum, vulnerante instrumento supra costas per pinguedinem adacto, uti constitit observari Chirurgicis. Studiosus in singulari certamine gladio sic vulnerabatur in dextro thorace, ut vulnus, quod obliquo corpore à latere inflictum fuerat, in sinistro thorace exiret, nec tamen penetraret in pectoris cavum, ense supra costas gliscente. Aqua tepida syringa per vulneris orificium leni vi injicitur: si insignis aquæ copia sine resistantia sic immitti possit, nullusque tumor in vicinis partibus à collecta aqua in membrana cellulosa oriatur, novimus aquam in pectoris cavum per viam vulnere factam intrasse; si vero statim magna resistantia sentiat, & redeat aqua injecta per vulneris orificium, contrarium pater. Neque ullum inde metuitur malum, licet aqua tepida per siphonem injecta in pectoris cavum sic delabatur. Facile enim inde poterit educi idoneo situ corporis, vel aliis methodis, de quibus dicitur §. 303. Immo, licet ibi relinqueretur, vasis bibulis venosis, omnem thoracis interni & pulmonum superficiem occupantibus, resorberetur. Sic enim contenta in thoracis cavis liquida dissipari posse, frequentissimæ docuerunt observationes. In Empyemate, pus resorptum per sputa, urinas, vel alvum, evacuatum fuisse aliquando constat; uti & idem pus, venas ingressum, sanguini mistum, metastasi ad varia corporis loca delatum fuisse. Dum ex amaris paratum medicamentum injiceret thoracis cavo Paræus, ut detergeret & munderet hæc loca ab extravasato & corrupto sanguine, mirabatur, paulo post vulneratum percipere summum amarorem, & vomendi conatum^(*); ideoque postea ab his abstinuit.

CORPORIS SITUS &c. Quantum usum habeat in determinanda vulneris inflicti natura, & præfagio malorum, quæ à vulnere metuenda sunt, cognoscere situm corporis, quem habuit vulneratus, dum vulnus accepit, dictum fuit in commentario §. 168. n°. 2. Sæpe enim omnino impossibile foret indagare viam, qua instrumentum vulnerans penetravit inter corporis partes: nisi in eodem situ reponatur vulneratus, quem habuit, dum vulnus ipsi inflictum fuit. Varia enim musculorum actio miris modis mutare potest partium situm; uti pulcherrime expressit Eustachius in tabulis suis Anatomicis: ibi enim trigesima tabula dextrum brachium elevatum, flexo cubito, apparet, sinistrum vero extenso cubito deor-

(*) Les Oeuvres d'Ambroise Paré Liv. X. Chapit. 31. pag. 251.

sum porrigitur. Si in hac figura conferatur dextrum thoracis latus cum sinistro, patebit insignis differentia in positura partium.

SIGNIS CERTIS ADNATI PULMONIS &c. Cum pulmo toto vitæ tempore pleuræ contiguus maneat, & in inspiratione pariter ac in expiratione, uti ex Physiologicis constat; tamen naturaliter undique liber est in pectoris cavo, asperæ arteriæ cohærens per vasa sua aorea, vasis vero sanguineis cordi unitur; cæterum in nullo puncto pleuræ adhæret. Præcipua autem causa, quare non concrecant hæ partes inter se, videtur esse hæc, quod in omni puncto pleuræ & pulmonis fistulæ minimæ arteriosæ omni vitæ tempore exhalent tenuissimum rorem, qui impedit, ne pulmo cum pleura concreseat. Quam rem Hippocrates concinna brevitate, ut solet, pulcherrime expressit, dicens: *Omne enim non concretum, siue cute, siue carne tegitur, cavum est, impleturque sanum quidem spiritu, infirmum vero ichore* (a). Ubi autem, inflammatione distentis vasis majoribus, minima hæc compressa non efflant tenuissimum illud liquidum, sicæ superficies concrescunt inter se satis cito; unde post Pleuritidem, Peripneumoniam, Empyema, toties invenitur pulmo pleuræ accretus. Si ergo constet, vulneratum hos morbos passum fuisse, de hac re cogitandum est. Si enim vulnus inflictum fuerit tali loco, ubi pulmo cum pleura concrevit, poterit instrumentum vulnerans pulmonis substantiam penetrare, nec tamen intrare pectoris cavum. Cognosci poterit, si aqua per siphonem injecta in vulneris orificium tussiculam excitet, & per asperam arteriam expellatur, tunc enim vulnus in pulmonem quidem, sed non in pectoris cavum penetravit.

Hæc sunt illa signa, quibus solet concludi, vulnus sola externa læsisse, non autem penetrasse in pectoris cavum. Accidere tamen aliquando potest, ut omnia hæc, sollicitissime quamvis observata, fallant tamen; imprimis si angusto instrumento vulnus inflictum fuerit: tunc enim educto instrumento poterit pinguedo sic obturare vulnus factum, ut nec aëri, nec stylo, nec aquæ injectæ pateat via, & tamen pulmonis vasa læsa v. g. poterunt effundere sanguinem in pectoris cavitatem. Unde simul attendendum est, an respiratio læsa fuerit; si enim vel aëre ingresso, vel sanguine extravasato, pectoris cavum angustetur, semper erit difficilis respiratio; quæ ergo si observetur post vulnera pectoris, semper videtur periculum indicare, quamvis nullo alto signo appareret, vulnus ad interiora thoracis penetrasse. Summa enim in his cautela opus est, ne famæ detrimentum accipiat Medicus vel Chirurgus, dum periculosum & sæpe lethale vulnus leve & nullius fere momenti habuerint,

§. 198. **S**I obliqua descendunt illa (§. 197.) supra, vel intra costas, sæpe dein pleura erosa in cava Thoracis pus deponunt, maxime, si puri ad externa egressuro via quacumque arte impeditur. Tumque Empyema fit, & inde multa mala.

Licet jam constiterit, vulnus non penetrasse in pectoris cava, tamen inde pessima mala oriri possunt. Si enim vulneris fuerit talis conditio, ut ejus orificium altiori loco ponatur, interim satis profunde inter musculos descendat; humores

(a) Hippocrat. de arte cap. 8. Charter. Tom. II. pag. 150.

effusi hic colliguntur, mora & stagnatione acriores fiunt, sinus formabunt varios; tandemque poterunt, erosa pleura, in pectoris cavum delabi: quotidie ex tali sinuoso ulcere collectum pus depluet, augebitur cavo thoracis contentorum liquidorum copia, fiet Empyema, pulmo maceratus pure, quotidie acriori facto, tabesiet; unde post summas misérias toleratas tandem mors ipsa sequetur. Omnium molestissima hæc mala sunt, quando fistulosa tales cavitates pone costas descendunt; tunc enim nec dilatationi, nec compressioni ullus fere locus superest. Præterea sterni & costarum substantia ossea vel cartilaginea læsa si fuerit, poterunt inde multa mala sequi, & curatio sæpe erit difficillima; uti patebit, ubi de ossium morbis agetur. Memorabilem historiam, quæ hæc confirmat, habet Galenus (a). In palæstra puer ictus fuerat in sterno: neglectus primo fuit, nec postea pulchre curatus. Post menses quatuor pus in parte percussa apparuit: Medicus incidit locum, & satis cito, ut credebat, ad cicatricem perduxit. Postea nova inflammatione orta iterum sectus fuit puer, nec potuit amplius ad cicatricem deduci factum vulnus. Galenus postea, cum pluribus aliis Medicis advocatus, invenit sterni os laceratum; cumque omnes recusarent curam aggredi, Galenus sterni partem corruptam excidit, subjecti Pericardii partem putridam invenit, & nudum cor vidit; & tamen brevi satis tempore puer sanatus fuit. Et de hoc casu videtur etiam locutus fuisse in ipso initio libri primi de Placitis Hippocratis & Platonis (qui liber primis quatuor capitulis truncus tantum habetur), dum dicit, se in tali puero tam aperte cor vidisse, uti in animalium dissectionibus, ubi consulto & data opera id denudatur; additque, puerum hunc servatum fuisse (b). Omnium maxime hæc mala metuenda sunt, quando vel vulneris situ, vel perversa arte, impeditur exitus puris versus exteriora.

§. 199. **Q**UARE in curatione abstinendum ab omni turunda, emplasticis, comprimentibus, contra depurantibus, balsamicis, plumaceolis, levi ligatura utendum, & situ corporis apto.

Cum ergo tot & tanta mala oriri possint in thoracis vulneribus ab humoribus extravasatis retentis in vulneris cavo, ibique novas sæpe vias sibi facientibus per membranam cellulosam, patet evidenter, liberum exitum his procurandum esse omni modo. Quondam communi omnium fere Chirurgorum usu plerisque vulneribus, & imprimis thoracis, immittebantur turundæ; ut scilicet impediretur orificii vulneris subita nimis consolidatio, nondum concreta interna vulneris superficie; & ut facilis esset exitus corporum heterogeneorum in vulnere relictorum; & simul ut facile ad fundum vulneris usque venire possent remedia vulneraria. Peritissimus Chirurgus *Belloste* (cui etiam præcipue debetur pulchra illa methodus ossa periosteotomo suo nudata minutis foraminulis petterebrandi, uti dictum fuit §. 252. 261.) huic torrenti se opponere ausus fuit, & solidissimis argumentis demonstravit noxium turundarum usum, imprimis in thoracis vulneribus (c): simul pulcherrimis exem-

(a) De Anatom. administr. Libi VII. cap.

I. cap. 5. Charter. Tom. V. pag. 78

23. Charter. Tom. IV. pag. 161.

(c) *Belloste* Chirurgien d'Hôpital. pag. 1-43.

(b) Galen. de Hippoc. & Platon. placit. Lib.

plis ostendit, rerum usum confirmare illa, quæ ratio dictaverat. Turundæ enim, ex linteis carptis contortis vel similibus paratæ, vulneris orificio immittæ, effusis humoribus resorptis tument, &, nisi tenaci emplastro vel ligatura firmentur, expelluntur brevi: si vero coërceantur sic, ut exire nequeant, turgentes lenta dilatatione vulneris orificium dilatant non sine magno dolore & irritatione partium; & simul, dum vulneris orificium obturant, impediunt exitum puri aliisque liquidis effusis; quæ ergo novas sibi vias facient, & vulnus in ulcus pessime sinuosum poterunt convertere: imo &, pleura erosa, poterunt delabi in pectoris cava; unde tristissima fient mala. Præterea singulis vitæ momentis mutatur thoracis capacitas, moventur costæ illisque affixi muscoli, etiam in placidissima respiratione; unde nunquam quiescit tale vulnus, & continuo vulneris labia turundæ affricantur; unde dolor, inflammatio, & tandem callositas nascitur in labiis vulneris, quæ postea tolli debebit, antequam ad consolidationem vulnus deduci poterit. Ex quibus omnibus satis apparet, nihil boni à turundarum in vulneribus thoracis usu expectari posse. Forte tantum prodesse possent, si vulneris orificium nimis angustum dilatari deberet, quamvis tamen, uti dictum fuit §. 238. cultro facilius hoc fiat: & si huic usui inservire debeant turundæ, uno alterove die applicatæ hoc efficere poterunt, neque ideo necesse sit illas toto curæ tempore applicare. Quin imo turunda ex spongia rite præparata (uti ibidem dictum fuit) orificio vulneris immissa paucis horis poterit insignem dilatationem facere. Ob eandem rationem patet, quare & tenacissima Emplastra hic nocent: quia nempe liberum humorum per vulnus effluxum impediunt. Optime ergo vulneribus thoracis applicantur plana plumaceola, balsamo vulnerario, vel pro re nata mollissimis digestivis inuncta: his dein imponitur Emplastrum non nimis tenax, foraminulis plurimis pertusum; & idonea dein applicatur ligatura, si opus videatur; hac cum cautela, ut spleniis applicatis vel alio quocumque modo impediatur, ne fasciæ circumductæ, vulneris aperturam comprimendo, exitum extravasatis humoribus impediant.

Monuerat Hippocrates (a): *Quicumque thoracem vulnerati externa parte vulneris sanati sunt, interna non, periclitantur, ne suppurati fiant. Quibus autem debilis intus facta fuerit cicatrix, facile disrumpitur.* Unde apparet, summam cautelam adhibendam esse, ut interna vulneris superficies consolidata fuerit, antequam externum ejus concreasca orificium. Hinc forte videretur concludi posse, quod turunda, impediens concretionem orificii externi, prodesse posset. Sed si consideretur, turundam sic vulnus obturare, ut pus collectum in cavo vulnere exire nequeat; patebit impediri concretionem: vulneris interni, dum pus retentum in vulnere à contactu removeret partes uniendas, & idem copia auctum novas vias sibi faciet, & sic augebit vulneris interni superficiem. Non autem fuisse Hippocratis mentem, ut turundis occluderetur in tali casu vulneris orificium, ex alio memorabili loco ejusdem autoris patet, qui pulchre Coacam Prænotationem modo allegatam explicat. Dicit enim: *Quicumque à vulneribus purulenti sunt* (ubi eodem vocabulo *ἰμῆρες* utitur, ut in Coaca Prænotatione, illudque vocabulum frequentissime sumitur pro collectione puris in thoracis cavis) *sive hasta, vel pugione, vel jaculo intus vulnerati sunt, quamdiu quidem ulcus foras respirationem habeat per antiquum vulnus, & hac frigidum in se attrahat, calidum vero à se emittat, tum pus facile, tum sane si quid aliud expurgatur. Et si quidem interna & externa pars simul sanescit.*

(a) In Coacis Prænot. n°. 430.

cant, omnino sanus evadit. Sin vero externa quidem pars sanescat, interna vero non, purulentus (μρucus) sit. At vero si simul tum interna tum externa pars sanata sint, cicatrix autem intus debilis aspera & livida existat, quandoque refricatur ulcus, & ab hoc purulentus evadit (a).

Ex quo loco satis patet, non per turundas tentari debere curam, ut interna & externa æquabiliter & firmiter consolidentur; sed situ corporis tali, ut contenta cavo vulneris liquida proprio pondere versus aperturam externam delabantur; & ubi fundus vulneris demissior est ejus orificio, nec tamen situ vulnerati hoc corrigi possit, tunc spleniis, vulneris fundo applicatis, & idonea ligatura poterunt pelli humores contenti versus vulneris orificium, & sic uniri partes in vulneris fundo, liquidis expulsi, ut contiguae factæ concrecant facile. Interim pus, continuo exiens per orificium vulneris, facile impedit, ne illud concrecat, antequam interiora sanata fuerint. Si autem vulneris interna superficies, sordida facta, prius requirat depurationem, antequam consolidatio expectari possit; tunc applicari possunt illa auxilia, quæ §. 207. enumerata sunt; de quibus etiam postea dicetur in Fistularum curatione. In horum usu pergitur, donec pus album, blandum, viscidum, læve, æquale, inodorum adit; & postea leni compressione, sensim à vulneris fundo ad ejus orificium procedente, tentatur consolidatio puri jam vulneris.

§. 300. **I**N cava Pectoris adire scimus 1. considerata causa cum amplitudine vulneris. 2. Specillo corpori, in situm vulnerandi reposito, applicato. 3. Aëris in pulmonem inspiratu forti, dum clausum vulnus, mox naribus & ore clausis nixu expirantis edito, tumque detecto subito vulnere, expiratione, & sæpe sono ejus agitati in cavo pectoris. 4. Iniectione. 5. Emphysemate, quando aër thoracis cavo contentus; pertusi pulmonis actione assidue auctus; calefactus; rarescens; pressus inspiratu; exire impeditus libere ex vulnere; in labiis vulneris actus per membranam cellulosa, auctus, facit; ut sæpe totus homo, hinc inde ad 11. pollices, tumore pellucido, levi tumeat; solis plantis pedum, manuumque volis exceptis. Ac. reg. Sc. 1713. hist. p. 15. 18. Item 4. 14. & 119. 120. ubi emphysema lethale à costis fractis illæsa cute. 6. cruoris spumosi exitu.

Magna cautela opus est, dum determinabitur, an vulnus inflictum in pectoris cavum penetraverit, an non. Nam thoracis cavum antè multo altius ascendit, à parte posteriori profundius descendit. Unde sæpe turpes errores acciderunt, dum credebantur vulnera thoracem penetrasse, cum tamen in abdominis cavum transirent. Sic habetur apud *Ruyfchium* (b), quod temerarius Chirurgus, in loco quodam suburbano habitans, thoracis paracentesin cum instituere vellet,

(a) Hippocrat. de morbis Lib. I. cap. 9. | (b) Observat. Anatom. Chirurg. Centur. Ob.
Charter. Tom. VII. pag. 541. | servat. LXV.

ipsum in consilium vocari jusserat; cum autem Ruyschius ob adversam valetudinem venire non posset, ille Chirurgus solus thoracem, ut putabat, perforavit. Mox hydatides multæ eruperunt; quibus visis territus Chirurgus turundam immisit vulneri facto. Paulo post misera fœmina periit, & aperto cadavere patuit, nihil liquidi præternaturalis in thoracis cavis hære, sed ignarum Chirurghum abdomen perforasse, non thoracem, & hepar vulnerasse, quod ibi, peritonæo accretum, in hydatides degenerasse visum fuit, quæ per vulnus factum eruperant. Unde patet, ex Anatomicis diaphragmatis situm & nexum rite cognosci debere, ut certi quid hic statui possit.

Vulnera autem possunt in pectoris cava penetrare, dum abdomini inflicta per diaphragma transeunt: cujus rei certa signa non habentur, & fere tantum post mortem in cadaveribus hoc apparuit: quales casus enarrati fuerunt in commentario §. 170. n°. 4. Vel vulnera thoracem proprie dictum perforantia in cava ejus transeunt, de quibus hic agitur; illudque cognoscitur sequentibus signis:

1. Cum fere omnia instrumenta, quibus punctim vulnera infliguntur, conicæ sint figuræ; patet, vulneris amplitudinem, collatam cum instrumento vulnerante, docere posse, quousque penetraverit instrumentum vulnerans. Fallere tamen in hoc casu posset hoc signum, si vulnus supra costas inter musculos adactum fuerit: potest enim tunc instrumentum vulnerans magna sui parte penetrasse, nec tamen ingredi thoracis cavum.

2. De hac re dictum fuit §. 168. n°. 1. & §. 297. ibique patuit, mutato situ corporis musculos alio modo positos, & pinguedinem in vulnus pressam facillime aditum stylo exploratorio impedire posse.

3. De hoc signo etiam dictum fuit §. 297. Imprimis hic cavendum, ne hac exploratione aer ingrediatur pectoris cavum: diductis enim vulneris labiis, & dilatato per inspirationis nixum thorace, posset facile ingredi aer, licet huc usque nondum intrasset. In obesis enim, inflicto vulnere in cavum thoracis penetrante, pinguedo sæpe educto instrumento vulnerante ilico viam sic obturat, ut aer ingredi nequeat. Unde, dum hoc tentatur, primo sollicitè comprimenda sunt vulneris labia; deinde forti inspiratione haustum aërem retineat vulneratus; tuncque naribus & ore clausis nixum expirationis edat. Aer tunc retentus, calore expansus, validissime dilatabit pulmonem; hinc comprimet aërem, qui inter pleuram & pulmonem hæret, calore loci pariter admodum rarefactum: detecto tunc vulnere, nullus metus est, aërem per externum vulnus posse ingredi in thoracis cavum, quia pulmo distentissimus applicabitur undique pleuræ, si nullus hætenus aer, in cavo pectoris hæret; si vero aer jam ingressus fuerit, ille calore rarefactus, à pulmone dilatato pressus, prævalebit atmosphæræ pressioni, & cum impetu exhibit de vulnere. Si autem vulnus tale fuerit, ut liber satis aëri ingressus in thoracis cavum pateat, nec tamen tam patulum fuerit, ut glottidis aperturam multum superet (vide §. 170. n°. 4.), ibit & redibit aer cum sibilo manifesto per vulneris aperturam: tuncque nullum dubium superest.

4. De hoc signo etiam dictum fuit §. 297.

5. In §. 244. de mirabili hoc symptomate dictum fuit, quatenus vulnera capitis aliquando sequatur. Longe tamen frequentius pectoris vulnera, in cavum penetrantia, hoc malum sequitur, & tunc brevi satis temporis spatio per totum corpus mirus talis tumor dispergi poterit. Dum enim per vulnera ingressus fuit aer

In thoracis cava, & orificium externum per emplastra tenacia, vel pinguedinem, clausum fuerit; calore loci rarefactus aer viam saepe sibi facit per panniculum adiposum. Imprimis autem maximi tales tumores oriuntur, si pulmonis vasa aërea, per vulnus læsa, inspiratum aerem in pectoris cava deposuerint; tunc enim omni momento augetur malum. Mirabilem casum habet Paræus, qui huc referri potest, quem jam memoravi in commentariis §. 249. Ubi constitit, aspera arteria læsa in collo, aerem per vulnus hujus elapsum se insinuassee in panniculum adiposum, & miro modo sic intumuisse faciem, ut nasus & oculi penitus disparerent quasi. Cumque vulneratus jam pro derelicto haberetur, peritissimus Chirurgus, profundis scarificationibus hinc inde factis, ingressu panniculum adiposum aëri viam fecit, & ex ipsis orci faucibus vulneratum eripuit (a). Mirabile emphysema, post vulnus thoracis penetrans & pulmonis substantiam lædens, habetur in Actis Parisinis (b). Homini triginta annorum, sanguineæ temperiei, & valde carnosus habitus, infligebatur vulnus in pectoris cavum penetrans, à quo quinta die periit. Ante mortem totum corpus miro tumebat emphysemate, exceptis plantis pedum & volis manuum, & capitis vertice. In pectore tumor ille undecim pollices crassus erat, in ventre novem, in collo sex, in reliqua autem corporis superficie quatuor pollices æquabat. Oculi in cadavere pro parte extra orbitas eminebant, aëris magna copia distenti in tunica cellulosa. Rarissimus alter casus observatus fuit (c), ubi integra cute costis fractis emphysema lethale ortum fuit. Homini sexaginta annorum, carpenti rotis super pectus transeuntibus, quarta & quinta costa vera lateris sinistri in medio fractæ erant: paulo post in loco affecto tumor notabilis apparuit ab aëre ingressu panniculum adiposum; qui quotidie una cum difficultate respirationis crescebat, donec quarta die post hoc infortunium moreretur homo. In cadavere patuit, Emphysema totam corporis superficiem occupasse, exceptis plantis pedum & manuum volis. Discissa cute & reliquis integumentis, quæ incumbabant costis fractis, in musculis intercostalibus parva & vix perceptibilis apertura inventa fuit, sine ulla ecchymosi; aperto vero thorace, membranæ externæ pulmonem investientis exigua particula lacerata apparebat, quæ partim adhuc cohærebat pulmoni, partim affixa erat costæ fractæ: nihil autem sanguinis extravasati in pectoris cavo inveniebatur.

Ex quibus omnibus satis patet, emphysema pectoris vulnera sæpissime sequi: imprimis si vulnus aërem quidem admiserit in pectoris cavum, sed interim quacumque de causa impediatur liber exitus aëris ingressi ex vulneris orificio. Omnium autem maximos tales tumores fieri docent hæc observata, si simul pulmo læsus aërem inspiratum in pectoris cavum dimiserit; præcipue si simul non adsit magna hæmorrhagia: tunc enim sanguis, in cavum thoracis delapsus illudque replens, impedit, ne tanta copia aëris in pectoris cavo accumuletur, quæ toti corpori inflando sufficeret. Simulque apparet evidens ratio, quare, si vulnus thoracis subito sequatur tale emphysema, merito concludatur illud penetrasse in pectoris cavum.

6. Hoc signum denotat certo pulmonem esse læsum: sanguis enim tunc, læsis sanguineis vasis effluens in aërea vasa pulmonis, cum aëre mistus spumescit; unde tunc vel per asperam arteriam eructant spumosum cruorem, vel undatim talis

(a) Les Œuvres d'Ambroise Paré Liv. X. pag. 5. &c.
Chapit. 30. pag. 249.

(b) Acad. des Sciences l'an 1713. Mémoire, | (c) Ibid. Mémoire pag. 154. &c.

sanguis de vulnere externo effluit. Sed pulmo ladi nequit, nisi instrumentum vulnerans in pectoris cavum penetraverit; nisi forte pulmo illo in loco pleuræ fuisset accretus: de qua re dictum fuit §. 297. Pulcherrime hoc expressit Virgilius (a), ubi Antiphaten à Turno vulneratum describit:

----- Volat Itala cornus
 Aëra per tenerum, stomachoque infixæ sub altum
 Pectus abit: reddit specus attri vulneris undam
 Spumantem, & fixo ferrum in pulmone tepescit.

Ob eandem causam, si sanguis spumofus in morbis per os rejicitur, ex pulmone illum prodire concluditur.

§. 301. **E**FFECTUS talis vulneris sæpe 1. aëris ingressi pressio in pulmonem, respirationi hinc, & circulationi ineptum. 2. Effusus cruor in Thoracem, & accumulatus. 3. ejus extravasati, calefacti, moti, clausi undique, putrefactio. 4. hinc pleuræ, pulmonum, mediastini, diaphragmatis, pericardii maceratio, erosio, corruptio, fætor. 5. infiniti ex his oriundi morbi. 6. cruoris excretio.

Enumerantur jam illa mala, quæ observata fuerunt aliquando sequi vulnera thoracis in cavum penetrantia, quæ omnia imprimis ab aëris admissione, vel extravasatis humoribus pendent.

1. In commentariis §. 170. n°. 4. demonstratum fuit, inter pulmonem & pleuram in homine sano naturaliter nunquam aërem esse; hocque requiri necessario, ut pulmo, pectore dilatato, distendi posset aëre per glottidem irruente. Unde, simulac per vulnera thoracis aër in cavum pectoris admittitur, patet, liberam pulmonis expansionem impediri, imo à patulis vulneribus integre tolli. Eodem loco per varia experimenta constitit, quousque & quam sub limitatione hoc verum sit. Si enim aër liberrime per vulnus factum ingredi possit, non poterit dilatari pulmo; si angustiori vulnere ingrediatur minor aëris quantitas, quam per rimam glottidis apertam intrare potest, fiet aliqua pulmonis expansio, non tamen tanta ac in sanitate fieri debet. Quam rem pulcherrime expressit Galenus (b) dicens: *Notum vero est, inspiratione per animantis os facta, tantum necessario perire ob vulnus, quantum ejus loco extrinsecus insluit circumflui aëris in thoracem. Quanto autem minus inspiraveris per os ad necessitatem, tanto etiam minus efflari; quanto autem efflatio decreverit, tanto vocem sequi breviorē necesse est.* Si jam aër, ingressus pectoris cavum, quacumque de causa iterum per vulneris orificium exire nequeat, ille calore rarefactus expandetur, pulmonemque fortiter comprimendo impedit inspirationem, & dilationem pulmonis inde factam; quæ in homine nato requiritur, ut sanguis, corde dextro expulsus, libere per arteriæ pulmonalis angustias transire possit. Omnium autem horum ratio facile deducitur ex cognitis aëris proprietatibus, & illis requisitis, quæ ad respirationem peragendam, & liberum sanguinis circulum per pul-

(a) Æneid. Lib. IX versu. 700. &c.

(b) De Anat. administrat. Lib. VIII. cap. |

3. Charter. Tom. IV. pag. 172.

monis vasa, necessaria esse in Physiologicis demonstrantur.

2. Si arteriæ intercostales læsæ fuerint v. g. sanguis ingenti copia colligi poterit in thoracis cavo; vicinum enim cor magna vi sanguinem in has arterias pellit; motus thoracis per respirationem impedit, ne arteriæ læsæ quiescant & se contrahere tam cito possint. Si jam pulmonis vasa sanguinea dissecta fuerint, facile patet, subito ingentem cruoris copiam accumulari debere: si vero ex corde egressa vasa maxima lædantur, brevi mors sequetur. Sanguis autem sic effusus, nisi per vulneris aperturam externam effluat, colligetur in thoracis cavo, & impediet liberam pulmonis dilationem; unde summa anxietas & respirationis impedimentum.

3. Cruor sic effusus hæret in loco calido & humido, & per respirationem assidue moto; hinc facillima degeneratio in putridam corruptelam hic obtinet; imprimis cum per vulnera, in cavum thoracis penetrantia, fere semper aer ingrediat; uti etiam, si pulmo in aëreis suis vasculis læsus fuerit, & aërem inspiratum in pectoris cavum dimiserit. Observata jam Chirurgica docent, parvo satis temporis spatio putrescere hic effusum sanguinem. In commentariis §. 172. n°. 3. ubi agebatur de illis malis, quæ vulneratis accidere observantur aliquando ex neglectu vel errore Chirurgi, enarratus fuit ille casus, quo militi thoracem vulnerato sic ut sanguinem cum tussi per os rejiceret, imperitus Chirurgus vulneris labia futura univerat ita, ut nihil exire posset. Sequenti die advocatur Paræus, qui ilico futuram rescidit, & digito immisso thrombum sanguinis coagulati, vulneris orificium obturantem, removit & eduxit de pectoris cavo uncias octo sanguinis, jam corrupti & foetentis. In nobili viro, thoracem vulnerato gladii ictu in cavum penetrante, post septem vel octo libras sanguinis perditas, dum circa finem primæ dici post vulnus inflictum removeret apparatus *Belloste* (a), eduxit sex septemve uncias sanguinis jam semicorrupti. Dixerat Hippocrates (b): *Quod si sanguis ex vulnere aut vena fluxerit in superiorem ventrem, necesse est illud puri fieri.* Sed demonstratum fuit in commentariis §. 172. n°. 1. ubi ex Aphorismis similis locus allegatus fuit, quod hic suppurationis nomine intelligatur quæcumque sanguinis corruptela; uti & *Galenus* in explicatione illius Aphorismi monuerat.

4. Tam brevi temporis spatio nata corruptela effusi sanguinis augebitur omni momento: calor enim hic summus ob viscerum vitalium viciniam adest; hinc in putridissimum liquamen mutabitur cruor. Pulmo, in hoc gangrenoso corrupto liquore hærens, macerabitur, & putrescet; sic & pericardium, pleura &c. Præcedenti numero constitit, citissime cruorem effusum in pectoris cava corrumpi posse; sed & summum corruptelæ gradum acquirere posse, docuerunt observata. Homini in dorso sic percusso, ut per pectoris cavum transiens ensis in pectore sinistro mammam penetraret, cum pessima urgerent symptomata, applicata fuit paracentesis; & sexto die post inflictum vulnus notabilis satis copia effluxit puris, sed tam foetidi, ut nullus in cubiculo manere auderet, ubi decumbebat vulneratus (c). In alio vulnerato, dum, tertia die post inflictum vulnus, illud dilataisset *Scultetus*, ex cavo thoracis effluxit libra sanguinis, sed adeo calidi, ut profluens patientem magis ureret, quam candela accensa (d). Unde non mirum, viscerum, tam putrido tabo immerforum, substantiam consumi & erodi posse, quod in ipsius cordis adeo firma substan-

(a) Le Chirurgien d'Hôpital pag. 93.

(b) De Morbis cap. 2. circa finem. Charter. Tom. VII. pag. 533.

(c) Scultet. Armament. Chirurg. Obser. 43.

pag. 255.

(d) Ibid. Observ. 50 pag. 262.

tia contigisse legitur apud Hildanum (*). Rusticus plaustrī fœno onusti everfionem & ruinam corpore exceperat, & de doloris aliquo sensu, cordis quadam compressione, & spirandi difficultate conquestus fuit, post quatrīdium tamen ad consuētos labores rediit. Aliquot diebus elapsis ardenti febre, asthmate, delirio, vigiliis, lipothymia &c. correptus, undecima die morbi vitam finivit. In cadavere invenitur Pericardium plenum sanioso pure, cui velut immersum cor magna sui parte, ad utramque potissimum auriculam, partim exesum, partim emarcidum inveniebatur. Pulmo ejusdem labis particeps apparuit.

5. Humores effusi poterunt comprimendo, vel & nata acrimonia putrida rodendo, turbare, vel abolere omnes functiones illorum viscerum, quæ hic locantur. Inde dyspnœæ pessimæ, immanes cordis palpationes, anxietates intolerabiles, inflammationes, exulcerationes, gangrænæ &c. harum partium nasci possunt. Sed & sanguis effusus, mora & calore putrescens & attenuatus, venis bibulis, in superficie harum partium locatis, reorberi poterit, sanguini misceri, & putridanti eacochymiam pessimam inducere: unde febres acutæ putridæ, & resorpti tabi putridi ad alia corporis loca miræ metastases, phthisis, atrophia, mors. Unde merito concluditur, innumeros morbos, illosque pessimos, ab extravasatis in pectoris cavis humoribus nasci posse.

6. Si statim post vulnus inflictum sanguis excreatur, designat pulmonem læsum esse; imprimis si spumescens exeat: unde in cavum pectoris ex pulmonis vasis læsis delabi poterit sanguis, nisi forte pulmo in loco vulneris pleuræ fuerit accretus. Si aliquot diebus post vulnus inflictum cruenti quid expuitur, poterit hoc fieri, quia sanguis extravasatus, mora & calore attenuatus, pulmonis vasis resorptus fuerit. Quomodo hoc fiat, non disputo: certum tamen est, ipsum Empyema per sputa purulenta sanatum fuisse. In vera pleuritide sputa flava cum striis sanguineis pulmone excreta morbum toties sanaverunt, uti innumeris observatis practicis constat. Unde patet possibilitas, quod sanguis, effusus in cavum thoracis, sputa cruenta facere possit,

§. 302. **E**FFUSI hic cruoris signa. 1. orthopnœa. 2. decubitus in dorsum commodior, in latus læsum difficilis; in sanum impossibilis. 3. sequelæ descriptæ (301). 4. pondus in Septo. 5. fluctuatio materiæ. 6. natura, & situs, vulneris inflictī. 7. debilitas ingens, cum pallore, sudore frigido. 8. omnium fere symptomatum incrementum perpetuum.

Postquam jam constitit, vulnus in thoracem penetrasse, alia quæstio magni momenti proponitur; an nempe, vasis discissis, notabilis copia sanguinis effusi in cavo thoracis hæreat? Neque semper adeo facile est, hoc determinare, cum multa signa, mox recensenda, fallere possint; hinc requiritur concursus plurium signorum, ut quid certi de hac re statui possit. Multum autem mali posse nasci, si in hac Diagnosi fallatur Medicus vel Chirurgus, patet, quia sanguis effusus tolli debet vel per vulnus factum, vel per novam aperturam: si vero hoc tentatur, dum nihil sanguinis hæret in pectoris cavo, aer admittitur, semper hic nocens,

(*) Observat. Chirurg. Centur. 2. Observ. 27. pag. 106.

vulnus irritatur &c. unde summa cautela ad omnia attendendum est, ne vulneratus inutilem molestiam patiatur, vel medentes famæ periculum incurrant.

1. Orthopnœa vocatur anhelosa, difficilis, & stertens, cervice & thorace erectis tantum absolvenda, respiratio; quæ semper designat, liberam pulmonis expansionem ab aëre inspirato impeditam esse, à quacumque demum causa hoc fiat. Cum autem sanguis effusus in thoracis cava illud spatium occupet, quod dilatatus pulmo replere debebat, patet facile, difficilem respirationem hinc fieri. Dum autem erecto corporis situ vulneratus hæret, sanguinis effusi pondere depressum diaphragma thoracis cavitatem auget, unde tunc poterit adhuc aliqua pulmonis expansio fieri; saltem major, quam in alio situ corporis. Signum autem hoc, si solum consideretur, fallere posset: aër enim cavum pectoris ingressus, impediens liberam pulmonis expansionem, orthopnœam facere posset. Spasmodica pulmonis constrictio in Asthmaticis simile malum efficit: unde, si vulneratus tali morbo obnoxius sit, non multum certi daret hoc signum.

2. Magnum pondus habet hoc signum. Diaphragma enim versus posteriora corporis profunde descendens capacitatem thoracis multum auget; unde sanguis effusus in cavum pectoris, dum homo decumbit, sponte inferiorem & posteriorem thoracis locum occupat, & illa pars diaphragmatis facilius cedit deorsum: pars enim media tendinea diaphragmatis, cui pericardium lata basi accrescit, deorsum deprimi non facile poterit, uti dictum in commentariis §. 170. n^o. 4. Unde patet, in hoc situ sanguinem extravasatum omnium commodissime locari. Dum vero in latus læsum decumbit, difficilior quidem, sed ferenda tamen, est corporis positura: sed si in latus sanum decumbat vulneratus, sanguis effusus pondere suo premet mediastinum & pericardium versus alterum pectoris cavum; unde minuetur & hujus capacitas, & augebitur respirationis difficultas: quam dum sentiunt sic decumbentes, statim vel inviti corporis situm mutant, ob suffocationis metum.

3. Sequelæ illæ imprimis à corruptela sanguinis extravasati pendent, & labe visceribus impressa, quæ putridus talis tabus alluit: unde his cognoscitur quidem sanguinis extravasati præsentia, sed sæpe nimis fero.

4. Dum erecto corporis situ ponitur æger, sanguis effusus toto suo pondere diaphragma premit deorsum: unde ponderis incumbentis sensus tunc percipitur, & dolor circa illa loca, quibus diaphragma nectitur. Sæpe etiam à diaphragmate depresso in illo latere abdominis tumor apparet. Hinc aliquando in Empyemate à copia puris aggesti depressum diaphragma, & sensim magis magisque distentum, sic abdomen protuberare facit, ut Ascitem mentiatur morbus.

5. Ubi suspicio aderat, in pectoris cavis pus accumulatum hære, jubet Hippocrates (a) ægrum multa calida lotum in sella stabili collocari; & dum alter manus tenet, Medicus agitato humero auscultet, quonam in latere affectio strepitum edat. Eandem methodum adhibebat, ut detegeret latentem in pectoris cavis Hydropem (b), & determinaret locum, quo aperto accumulatum in pectore serum educi posset. Apparet autem facile, hoc signum aliquando fallere posse, dum sanguis extravasatus in pectoris cavis colligitur, ille enim stagnando grumescit,

(a) De Morbis Lib. II. cap. 16. Charter. Tom. VII. pag. 568.

(b) Ibid. cap. 14. pag. 576. & de internis affectionibus cap. 24. Ibid. pag. 655.

& hinc difficilior ejus fluctuatio percipitur : præterea si magna copia cruentioris repletur pectus, ob plenitudinem nullus audietur, concusso thorace, sonus : Unde prudenter hoc monuit Hippocrates (a) dicens : *Quibus suppuratis, dum concutiantur humeri, multus strepitus fit, minus puris habent, quam quibus, difficilior spirantibus & melius coloratis, exiguus. Quibus autem strepitus nullus fit, valida tamen spirandi difficultas adest, & ungues lividi, pleni sunt pure, & perniciose habent.*

6. Dum enim locum vulneris & viam instrumenti vulnerantis per partes novimus, ex Anatomicis scitur, an magnæ arteriæ vel venæ sint, an non. Sic trunci majores arteriarum intercostalium prope marginem inferiorem costarum decurrunt : Mammariæ internæ ad latus sterni utrumque, transversæ digiti distantia ab hoc osse, pone costarum cartilagine ponuntur. Magna vena Azygos ad dextrum latus vertebrarum dorsi locatur &c. Ex quibus omnibus bene cognitis majus minusve periculum vulneris determinatur.

7. Sunt homines tam pusillanimes aliquando, ut, dum alienum vulnus vident, in animi deliquium cadant : talibus vulneratis etiam levissime omnia hæc symptomata accident. Sed facile in tali casu ad se redeunt aqua frigida respersi, vel stimulante cardiaco exhibito, neque adeo diu durat debilitas inde orta. Ubi vero post vulnus in thoracis cavum penetrans ingens debilitas contracta & pallida facies, oculi pallidi languidi, sudor frigidus guttatim in cute collectus hærens, imprimis in facie & pectore, pulsus vix observabilis, deprehenduntur; tunc novimus, difficilissimis vas tantam copiam sanguinis effundi, ut vix ullus ad cor redeat, sed omnis fere extra corpus profundatur, vel in cavis pectoris collectus hæreat. Unde tunc summum periculum imminere monendum est; sæpe enim subito tunc moriuntur. Pulchre hoc monuit Hippocrates (b) dicens : *sanguinem profundentia cum sudatiunculis vulnera maligna. Tales enim loquentes occulte pereunt.* In Coacis Prænotionibus (c) idem pronuntiatur habetur, præterquam quod loco ἐπιστήθη ibi legatur ἐπιστήθη; sed & alibi rigores succedere largis hæmorrhagiis monuit (d), & dixit, rigorem sanguinis fluxionem sistere : sed patet in hoc loco ex præcedentibus, quod de narium hæmorrhagia ibi agat. Ubi autem in thoracis vulnere magna vasa, cordi adeo vicina, læsa fuerint, patet facile, rigorem quidem largam hæmorrhagiam sequi posse, sed non ideo sanguinem sisti in hoc casu.

8. Vasa sanguinea maxima hic sunt, & cordi admodum vicina : hinc illis læsis, perget sanguis effluere in thoracis cava : unde compressio pulmonum, anxietas, dyspnœa &c. augebuntur perpetuo, donec minutis viribus vulnerati, vel contracto vase discisso, cesset effluxus sanguinis. Multa etiam symptomata adesse possunt vulneratis in hoc casu à comitante terrore, ira &c. quæ sensim minuuntur; illa autem mala, quæ ab effuso sanguine fiunt, pergent, quamdiu durat Hæmorrhagia; & ideo symptomatum augmentum perpetuum recensetur merito inter illa signa, quibus cognoscitur, sanguinem in thoracis cava effundi. Ubi autem signa docent, vulnus in corporis cava majora penetrasse, & simul merito metuitur, ne vasa discissa pleno rivo sanguinem effundant interius, licet nulla

(a) In Coacis Prænot. n°. 432. Charter. Tom VIII. pag. 877.

(b) Prorrhet. Lib. I. num. 130. Charter. Tom. VIII. pag. 791.

(c) N°. 328. Charter. ibid. pag. 870.

(d) Prorrhet. Lib. I. n°. 152. Charter. ibid. pag. 799.

Hæmorrhagia externe appareat, summa cautela opus est in Prognosi determinanda, ne fama Medici vel Chirurgi periclitetur, si nihil metuendum pronunciaverint: sæpe enim tales vulnerati inopinato pereunt, & mors vulnerati eorum ignorantie imputabitur ab his, qui illius, qui vulnus inflixit, causam defendunt. Quanta autem cura attendendum sit ad omnia phænomena, ut determinari rite possit, an cruor extravasatus in thorace hæreat, an non; patet inde, quod & peritissimi aliquando hic decepti fuerint. *Mery* (a) ingenue fatetur, quod in juvene, cui ense vulnus inflictum fuerat parti anteriori & superiori brachii dextri, jam tribus horis post vulnus inflictum tot viderit & tanta symptomata, ut non dubitaret, quin pectoris cavum cruore extravasato plenum foret, unde de paracentesi thoracis instituenda serio cogitabat. Postea tamen eventus docuit, nihil tale factum fuisse, cum octidui spatio perfecte, sanatus fuit vulneratus. Admodum autem verosimile videbatur, tendinem pectoralis musculi læsum fecisse dolorem summum pectoris, respirationem difficillimam &c.

§. 303. **E**ST QUE tum illico educendus. 1. situ, motu, nixuque corporis. 2. suctu per tubum flexilem, ad latera perforatum, obtusum ad finem. 3. injectu liquoris diluentis, resolventis, depurantis. 4. dilatatione vulneris. 5. alia apertura inter secundam & tertiam costam veram inferiorem, ad distantiam quatuor digitorum à vertebriis, & ab angulo inferiori omoplatae, facta instrumento secante, sectione costis parallela, inter has media, deorsum directa acie.

Postquam constitit ex signis præcedenti paragrapho recensitis, sanguinem extravasatum in thoracis cavis hære, indicatio curatoria quidem jubet, illum tollendum esse illico, ne compressione, vel corruptela, noceat; tamen simul quam maxime notandum est, illam sanguinis effusi educationem fieri non debere, antequam constiterit, vasa læsa non amplius sanguinem fundere. Quid enim proderit educere cruorem, si motu corporis, suctu, injectione &c. sic irritentur vasa læsa adhuc patula, ut pergant sanguinem fundere. Si jam pulsus sit satis fortis & æquabilis, calor ad extrema corporis usque adsit nullus singultus, nulli spasmi appareant, & virium simul ad constantiam, novimus cessare internam Hæmorrhagiam, & tuto tentari posse illa artis molimina, quæ requiruntur ad educationem sanguinis in cavis thoracis hærentis.

Dubitari præterea posset, an semper arte educi debeat sanguis extravasatus cum fidelissimis observatis constiterit, sanguinem, pus, aquam &c. ex thoracis cavis evanuisse sensim, resorpta in venas, & per sudores, urinas &c. deinde excreta. Talis casus recensetur ab *Hieronymo Fabricio ab Aquapendente* (b). Amicus ejus thorace vulnerabatur tam angusto vulnere, ut stylo non potuerint detegere Medici, quod in thoracis cavum penetraret; illud tamen patuit ex sputo sanguinis, ponderis sensu diaphragma prementis, tussi, feбри, respiratione impedita &c. Cum

(a) Académie des Sciences l'an 1713. Mémoires, pag. 159.

(b) Opera Chirurg. part. 1. Lib. II. cap. 12. pag. 174.

autem nihil ex vulnere poterat educi, Medici statuerant, thoracis Paracentesin sequenti die instituendam. Interea accidit, ut æger cyathum cruoris plenum megeret, unde à dolore, febre, & omnibus symptomatibus levatus est. Alter casus similis habetur apud *Belloste* (a): Centurioni vulnus inflictum fuerat in thoracis penetrans cavum cum læsione pulmonis, stipatum omnibus symptomatibus, quæ similia vulnera solent comitari. Dum vena secabatur, loco sanguinis verum pus exivit, cum levamine omnium malorum. Casum hunc sibi à peritissimo Chirurgo narratum, & pluribus fide dignissimis testibus oculatis confirmatum fuisse, testatur auctor. Urinæ copiosam excretionem, & sudorem profusum profuisse in similibus casibus, observatum fuit sæpius (b). Plura talia observata occurrunt; sed hæc sufficiunt, ut probetur, miris modis naturam, quæ toties sibi soli sufficit, sanasse talia vulnera. Tamen rarius hæc contingunt, & prudentiæ medicæ quidem est sedulo attendere, an signa quædam doceant, naturam tale quid moliri: interim tamen, si soli naturæ hoc opus relinqueretur, certum est, plurimos perituros, corrupto extravasato cruore viscera vitalia tabefaciente, qui per artem, hoc cruore educto, servari potuissent. Illa autem eductio tentatur sequentibus modis:

1. Si sanguis adhuc fluidus in thoracis cavo hæreat, vulnusque satis patulum non oblique decurrat per integumenta, sed directe penetret; si tunc vulneratus ponatur in tali situ, ut propria gravitate versus vulneris aperturam sanguis descendere possit, effluet sponte. Unde & peritissimi Chirurgi in tali casu per aliquot horas nihil imponunt omnino vulneris orificio, ut sanguis liberrime exire posset. Hominem ense sub mamma dextra thoracem perfoissum sic tractavit *Dionisius* (c). Cum enim inveniret pectoris cavum sanguine plenum, dilatato prius vulneris orificio, tota nocte plagæ incumbere iussit, & sequenti mane vacuum omni sanguine invenit thoracis cavum; & optime sanatus fuit vulneratus. Pedibus elevatis, capite declivi, hominem similiter vulneratum iussit poni *Paræus* (d), sicque digitis per orificium vulneris immissis, remoto thrombo coagulati cruoris, eduxit sanguinem effusum, & ab imminente suffocatione liberavit vulneratum.

Multum juvatur hæc sanguinis extravasati eductio per vulneris orificium, si abdomen fascia lata, vel manibus comprimatur, & inspiratum aërem diutissime retineat vulneratus; interimque clausa glottide expirationis nixum faciat; sic enim dilatato quam maxime pulmone, & sursum presso diaphragmate, exprimitur per vulneris aperturam sanguis in thoracis cavum effusus.

2. Cum sæpe incommodum admodum sit in multis thoracis vulneribus ægrum in tali situ retinere, ut propria gravitate extravasatus sanguis per vulneris aperturam exeat, ideo excogitaverunt aliam Methodum. Tubum nempe flexilem ex auro (e) ad latera multis foraminulis pertusum, stylo aureo ejus cavum obturante instructum (ut possit commode flecti sine angustatione sui cavi) caute per vulneris orificium dimittebant in thoracis cavum quam profundissime; deinde vel suctu; vel siphone applicato extrahebant effusum sanguinem. Obtusus apex talis tubi requirebatur, ne pulmonem læderet. Similis tubus ex plumbo, uti & ex corio flexili & balæne osse, parari posset in eodem usus. Tali instrumento in angulum curvato, extracto dein stylo obturante, sine ulla suctione adhibita magnam san-

(a) Chirurgien d'Hôpital. pag. 265.

(b) Ibid. pag. 94. 95.

(c) Operations de Chirurgie pag. 225. 226. fig. 9. & 10.

(d) Livre X. Chap. 31. pag. 251.

(e) Scultet. Armament. Chirurg. Tab. XII.

guinis extravasati copiam de thorace eduxit Scultetus (a).

3. Facile patet, binas præcedentes methodos tantum locum habere, ubi sanguis extravasatus adhuc fluidus est: si vero in grumos concreverit, non poterit facile exire per vulneris orificium, multo minus ingredi foramina tubi immissi. Verum quidem est, quod sanguis coagulatus sponte quidem dissolvatur postea, sed tunc simul putrescit, quod hic summopere noceret: & sæpe ob compressum pulmonem tanta urget anxietas, ut spontanea illa sanguinis concreti resolutio expectari non possit. In tali casu in thoracis cavum injiciunt aquam tepidam cum melle & salis pauculo, addito sapone Veneto (de quibus dictum fuit in commentario §. 236), deinde illud liquidum immissum respirationis motu agitur, & conteritur quasi cum grumis illis concretis, qui sic solvuntur, ut una cum injecto liquido per vulneris aperturam exire possint. Pro varia jam indicatione liquidum illud injiciendum diversis ingredientibus medicatum redditur. Dilutioni & resolutioni concreti sanguinis sufficit aqua tepida, cum melle & pauxillo salis; ubi vero jam putrescere incepit cruor extravasatus, infusum Scordii, Rutæ, Matrubbii, & similia antiseptica, & leviter detergentium, cum pauxillo aceti, convenit.

4. De hac dictum fuit §. 238.

5. Ubi vulneris talis est conditio, ut non possint educi per illud collecta in thoracis cavo liquida, tunc nihil aliud superest, quam novum vulnus facere tali in loco thoracis, versus quem sponte sua ob thoracis interni figuram liquida hæc delabuntur. Hoc imprimis requiritur, ubi superiori thoracis parti vulnus inflictum fuit, tunc enim vix possibile est, ut effusus sanguis per vulneris aperturam exeat. Cum autem thoracis cavum à posterioribus ob inclinatum diaphragmatis posituram profundius descendat, hinc in posteriori parte thorax perforatur, loco tam demisso, ac fieri potest sine periculo læsionis diaphragmatis, quod inferioribus costis adnascitur, & à posteriori parte thoracis versus anteriora adscendens angulum satis acutum cum vertebrarum corporibus format. Ne autem lædantur validi illi musculi, Sacrolumbalis, Longissimus dorsi &c. qui ad utrumque spinæ dorsi lateris positi per lumbos & dorsum adscendunt; apertura illa thoracis quatuor transversis digitis à vertebra distare debet ad minimum. Plerumque solet hæc apertura fieri inter secundam & tertiam, vel inter tertiam & quartam costam spuriam, ab inferioribus sursum numerando. Cum autem Diaphragma in dextra parte altius adscendere in thoracem ex Anatomicis constet (b), ideo in dextro latere thoracis dum instituitur Paracentesis, solet illud fieri inter tertiam & quartam costam, in sinistro vero latere, inter secundam & tertiam costam spuriam fieri posset, uti monuit *van Solingen* (c). Forte ob hanc causam Hippocrates inquirens, cuinam pectoris lateri sectio adhibenda esset in Empyemate, optabat, pus hæere in latere sinistro (d). *Dionisius* etiam inter tertiam & quartam costam hoc fieri iussit (e). Unde viderur in textu hujus paragraphi error subrepisse, dum locus incidendus inter secundam & tertiam costam veram indicatur, cum & mos sequentia

(a) Ibid. Observ. 42 pag. 248.

(b) B. Siegf. Albini Hist. Musculorum hominis Lib. III. cap. 81. pag. 300.

(c) Manuale Operation &c. tweede Deel cap. 1. pag. 118.

(d) Hippocrat. de Morbis Lib. II. cap. 16. Charter. Tom. VII. pag. 563.

(e) Dionis Cours d'Operations de Chirurgie. Demonst. 5. pag. 296.

locum longe inferiorem indicent, & §. 1191. 3. ubi de thoracis perforatione in cura Empyematis agitur, indicetur locus inter costam quintam & sextam, vel quartam & quintam ab inferioribus numerando; quem locum *Ægineta* (a) etiam in cura Empyematis indicat à quibusdam dissecari, licet ab hac operatione vel subitanam mortem, vel insanabiles fistulas præfagiat. Unde crederem in textu legendum esse, INTER SECUNDAM ET TERTIAM COSTAM SPURIAM INFERIOREM: nisi forte hic intelligeretur perforatio thoracis in anteriori parte facienda, quæ certe optime inter secundam & tertiam costam veram, ab inferioribus numerando, tunc institueretur, uti & habet *Dionisius* (b), qui unicum tantum *Paracentesis* in hoc loco institutæ commodum memorat, quod nempe vulneratus, absente Chirurgo, proprium vulnus curare posset. Sed major thoracis in posteriori parte profunditas, & declivis sponte via sanguinis effusi versus aperturam factam, dum decumbit homo, facile persuadent, perforationem thoracis in parte posteriori & inferiori præferendam esse. *Hippocrates* (c) de Empyematis curatione agens, non quidem exacte definivit locum incidendum, tamen determinat, hoc infimo loco, & à parte posteriori, faciendum esse. Dicit enim: *At si pra crassitudine & copia (puris) nullum strepitum ediderit, quo illud deprehendatur (sit enim hoc aliquando) utrumlibet latus intumuerit, ac magis doluerit, illud infima parte secare (oportet) à posteriori magis tumoris parte, quam ab anteriori, ut facilis tibi sit puris effluxus. Secare vero inter costas &c.* Et alibi (d) de eodem morbo agens dicit: *secare aut urere oportet quam proxime ad septum transversum, cavendo tamen ipsum septum ne lædatur nempe.*

In pectoris hydrope, dum aqua educenda erat, jubet *Hippocrates* (e) tertiam ab ultima costam ad os usque secari, dein terebra acuta perforari, & dum perforata fuit, aquæ pauculum educi jubet &c. Ex quo loco satis patet, infimum thoracis locum elegisse *Hippocratem*, ut illo perforato contenta liquida educerentur.

Locus ille sic determinatus facile invenitur, nudato corpore ægri, costas numerando: in obesis autem, uti etiam si *Emphysema* adfuerit, difficilius hoc cognoscitur. Unde alia methodo conati fuerunt Chirurgi locum incidendum determinare. Quidam filum à cartilagine ensiformi recta ad spinam dorsi ducebant, deinde illud filum dividebant in tres partes æquales, & tunc locum determinabant in tali distantia à sternum, quæ binas tertias longitudinis fili haberet (f). *Dionisius* (g) mensurabat quatuor digitorum transversorum distantiam ab infimo angulo omoplatae, & ad similem distantiam à spina dorsi notabat locum incidendum. Cum autem scapula mobilis sit, & locum mutare possit varia actione musculorum ipsi affixorum, patet, non adeo certam semper esse hanc methodum. Unde præstat, loco sic invento, digitis pertentare, an quidem costarum interstitio respondeat.

Solet tunc locus incidendus, jam cognitus, atramento notari, ne postea lateat.

(a) Paul. Æginet. Lib. VI. cap. 44.

(b) Cours d'Operations de Chirurgie &c. pag. 296.

(c) De Morbis Lib. II. cap. 16. Charter. Tom. VII. pag. 568.

(d) Ibid. Lib. III. cap. penultimo pag. 503.

(e) De internis affection. cap. 24. Charter. Tom. VII. pag. 656.

(f) Van Solingen Manuale Operation tweedo deel capit. 1. pag. 118.

(g) Cours d'Operations de Chirurgie. demonstrat. 5. pag. 296.

Sed, cum mobiles costæ sint, patet facile, mutata corporis positura cutis situm etiam mutari. Unde merito monuit Hippocrates (a): *Quum vero secare aut urere voles, nota impressa, fac ut eandem figuram servant inter secandum aut urendum, ne fallat cutis figura mutatione sursum vel deorsum vergens.* Apertura tunc fieri debet instrumento secante; non autem pungente, uti fit in paracentesi abdominis, quæ stylo chalybeo canulæ argenteæ cavæ immisso perficitur; quia magnum periculum foret, ne pulmo vulneraretur sic pungendo. Ut autem instrumentum secans penetret in cavum thoracis, debent dissecari cutis, panniculus adiposus, latissimus dorsi, intercostales muscoli & pleura; quod ut tuto fiat, parum reclinatum versus posteriora corpore ægri, ut cutis laxa sit, digitis elevat Chirurgus omnia integumenta communia, & simul, si fieri possit, latissimum dorsi; & illa sic elevata simul & semel satis lata plaga dissecat ad trium quatuorve digitorum transversorum longitudinem. Hoc facto, antrorsum, & simul parum in oppositum latus flectatur corpus ægri, ut costæ à se mutuo plus recedant, & tendantur muscoli intercostales; tunc scalpello leniter incurvo, cujus dorso in tota longitudine applicatur digitus index, & simul apex scalpelli digiti extremo tegitur, tenso musculos intercostales & pleuram dissecat, caute in cavum penetrando parvo vulnere, ne pulmonem lædat: simul ac dissecta pleura est, statim pulmo collabitur & à costis recedit; unde tunc tuto vulnus dilatari potest. Sectio autem fit costis parallela, & medio inter binas costas loco, acie scalpelli deorsum directæ, ut vitentur vasa intercostalia, quæ costæ superioris imæ parti, in sulcum cavatæ, adjacent.

His cautelis tutissime perficitur hæc operatio. Quædam præterea monita circa hanc rem apud auctores occurrunt, quæ minoris momenti videntur. Sic *Hieronymus Fabricius ab Aquapendente* (b) voluit, illo temporis momento, dum pleura pertunditur, debere exspirare ægrum, ut nempe pulmo à pleura recedens hoc tempore scalpello non lædatur. Sed ex Physiologicis hodie novimus, & in inspiratione & in expiratione pulmonem semper pleuræ contiguum esse, illumque pectoris dilatationem sequi. Monuerat Hippocrates (c) quod, si Empyici, vel hydropici, uruntur aut secantur, & pus vel aqua confertim emittatur, moriantur omnino: hinc & voluerunt quidam, non simul & semel omnem extravasatum sanguinem educendum esse, sed partitis vicibus. Sed in Empyemate, vel hydrope pectoris, pulmo diu maceratus fuit pure vel sero extravasato undique alluente, unde tota hac coluvie simul & semeleducta, sanguis subito dilatans fere tabefacta pulmonis vasa, illa rumpere posset, unde subita mors. In vulneribus autem thoracis dum hæc operatio institueretur, raro tam diu solet differri, ut hoc metuendum sit: & plurimis observatis Chirurgicis constitit, tuto omnem sanguinem extravasatum sic subitoeductum fuisse. Multum faciliat hanc operationem, quod extravasati humores pulmonem comprimendo, & diaphragma suo pondere deprimendo, faciant, ut, pleura pertusa, non adeo facilis fiat læsio harum partium.

Dictum fuit §. 297. pulmonem aliquando pleuræ adnasci: si jam mala fortuna acciderit, illo in loco, ubi paracentesis facta fuit, pulmonem pleuræ accrevisse, patet facile, magnam inde oriri difficultatem. Plerique Chirurgici auctores, qui de hac re scripserunt, sibi hoc accidisse testantur; & tunc jubent, ut Chirurgus

(a) De morbis Lib. III. cap. penult. Charter. Tom. VII. pag. 523.

(b) Operat. Chirurg. cap. 45. pag. 450. 491.

(c) Aphor. 27. Sect. VI. Charter. Tom. IX. pag. 263.

digito per vulnus immisso prudenter separaret pulmonem à pleura, cui cohæsit. Certe nihil aliud superest, quam hoc tentare, licet crudele videatur in vivente homine partes concretas sic lacerare; nisi enim hoc fiat, frustra instituta fuit Paracentesis. Mirus habetur apud Hippocratem (a) locus, qui huc facere videtur. Describit enim illa mala, quæ oriuntur, quando pulmo in latus procidit (ὁ πνεύμων προσπίπτει ἐς τὸ πλευρόν) quæ satis conveniunt cum illis phænomenis, quæ post morbos acutos inflammatorios pectoris, pulmone pleuræ accreto, apparent: & medela, quam ad hunc morbum sanandum commendat, satis etiam responderet. Postea autem addit: *si vero ex vulnere illud fiat, aut Empyico secto (sit enim) huic vesicam fistula alligans, statu implere, & intus immittere, & penicillum stanneum solidum imponere, & ulterius repellere, (oportet).* Ex quo loco forte concludi posset, quod Hippocrates, ut pulmonem à pleura divelleret, vesicam complicatam per vulnus immiserit, dein inflaverit, ut illa flatu distenta in cavo pectoris aveleret pulmonem à pleura, cui concreverat. Saltem hoc videtur inde deduci posse, quod tentata fuerit jam antiquitus hæc separatio pulmonis concreti cum pleura membrana. Ob metum hujus concretionis voluerunt nonnulli, integumentis difficillimis musculos intercostales prudentissime dissecandos esse sine læsione pleuræ, & tunc pleuræ locum nudatum examinandum esse sedulo, an ex crassitie ejus insolita & callositate metuendum sit, pulmonem huic loco accrevisse; in quo casu magis conducere, sectionem parum producere, donec liber ab hac cohæsione locus inveniat. Sed facilius sic demonstratur in cadavere talis operatio, quam in vivente homine instituitur, in quo tardam talem sectionem per strata quasi facere crudele admodum videtur. Mirabiles vero tales concretiones pulmonis cum pleura aliquando observantur, quæ irritam omnino facerent hanc operationem: Vidi sic in cadavere nobilis juvenis, post hæmoptysim subita apoplexia extincti, pulmonis dextri medium lobum undique pleuræ ita accretum, ut thoracis dextra cavitas in bina cava distinctissima divideretur. Si tali in casu vulnus superiori parti pectoris dextri inflictum fuisset, facile patet, paracentesim nullo modo profuturam, si solito loco institueretur. Rari autem hi casus sunt; & error inde natus non artifici, sed arti adscribendus foret, cum nullis indiciis latens tale malum cognosci posset.

Perforato sic thorace, omnia illa, quæ præcedentibus numeris hujus paragraphi memorata fuerunt, adhiberi poterunt, ut sanguis extravasatus educatur. Si autem liquida, concretum sanguinem dissolventia, immitti debent, satis commode per vulnus prius inflictum injiciuntur, quia altiore locum thoracis occupat, & deinde facile per novam aperturam factam exire poterunt.

§. 304. **S**I nullis distenduntur turundis, raro deteguntur, aër arceatur, suctu artificioso, & nixu respirationis debito expellitur aër admissus, frigus caute vitatur, brevi & optime sanantur, si curabilia sunt.

Expositæ fuerunt §. 299. illæ rationes, ob quas turundarum usus in vulneribus

(a) De Morbis Lib. II. cap. 23. Charter. Tom. VII. pag. 575.

thoracis non penetrantibus damnabatur; nec videntur minus obesse in vulneribus thoracem penetrantibus. Ubi autem conducere videtur, non simul & semel, sed partitis vicibus educere contenta cavis pectoris liquida, quod rarius fit in pectoris vulneribus, sed aliquando, pure vel aqua in thorace collectis, juxta monitum Hippocratis observatur, tunc turunda vulnere facto immittitur, ut pro lubitu evacuari possit stagnans in pectore liquidum. Etiam post institutam Paracetesim, prima die turundam applicare debere, ne recenti vulnere divisa pleura concresecat, monuit Belloste (a), qui in aliis casibus ubique fere turundarum usum tanquam perniciosum damnavit. Postea autem semper nocere videntur, dum tumentes absorptis humoribus dilatantur, & à motu thoracis affricantur lateribus vulneris, quæ inde callosa facta difficilem curam faciunt. Aëris accessum ad interiora thoracis sic prohibere voluerunt; sed remota in singulis deligationibus turunda, per patulum foramen aer liberrime ingreditur, ejusque exitu dein nova turunda intrusa impedito, calore dilatatus miras sæpe vias sibi faciet, & pessima Emphysemata producere poterit. Præstat ergo potius plano plumaceolo vulnus tegeri, & liberam viam relinquere humoribus per vulnus factum elapsuris; & si vulnera satis patula fuerint, sollicite cavendo, ne plumaceola imposita in cavum pectoris delabantur, quod turundis immixtis aliquoties accidisse testantur auctores. Nobili Dano vulnerato, & negligentius à Chirurgo habito, turunda in thoracis vacuum delapsa fuit; & post sextum mensem ore excreta, & postea tamen integra sanitate fruebatur (b). Homini dextrum pectus prope axillam gladio, inter secundam & tertiam costam veram, perfossus fuerat; ex quo vulnere per quindecim dies sanguis fluxit, & simul sanguinem tussiendo excreabat. Post varia, illaque satis gravia, symptomata vulnus tandem cicatrice obductum fuit. Mansit tamen respirationis difficultas, tussis continua, & puris fœtidi & viridis excreatio. Tribus mensibus elapsis à curato vulnere, tussiendo una cum multo pure ejecit binas turundas, diverso tempore in vulneris curatione sub Emplastro perditas (c).

Alterum, quod hic requiritur, est, ut aër arceatur, ne per vulnus in cavum pectoris integrediat, vel, si ingressus fuerit, inde educatur. Quamdiu nondum extravasata liquida educta sunt ex pectoris cavis, impossibile est aërem arcere, cum liber exitus requiratur humoribus effusis; sed ubi nihil amplius de vulnere exit, tunc aër, in thorace hærens inter pleuram & pulmonem, educendus est, & omni cura cavendum, ne postea iterum ingrediat. Constat enim ex Physiologicis, requiri ad liberam pulmonis ab inspirato aëre expansionem, ut nullus aër in pectoris cavo hæreat. Hoc autem fieri potest, vel sugendo, vel omnium optime sequenti methodo. Detecti vulneris labia digitis adducuntur, ut nullus aër ingredi possit, deinde æger lenta & profunda inspiratione magnam copiam aëris hauriat, illumque retineat in pulmone, quamdiu hoc commode facere poterit: aër ille sic retentus, calore rarefactus expandet pulmonem, & comprimetur aër inter pleuram & pulmonem hærens. Si tunc, antequam expiret æger, diducantur vulneris labia, pars magna aëris, contenti in cavo thoracis, exprimeretur: sta-

(a) Chirurgien d'Hôpital. part 3 Chapit. 6. | pag. 123. 124.
pag. 223.

(c) Hildan. Observ. Chirurg. Cent. 1. Ob-

(b) Tulp. Obser. v. Medic. Lib. II. cap. 15. | serv. 45. pag. 41.

tim iterum claudenda vulneris labia, & tunc expiret æger, non prius. Dum hoc repetitur aliquoties, omnis omnino aër ex pectoris cavo expelletur, & sentiet vulneratus statim, se longe commodius respirare. Omni aëre sic expulso, subito vulneri applicatur tenax Emplastrum illo tempore, dum æger inspiratum aërem in pulmone retinet, tunc enim pulmo distentus, pleuræ contiguus, obturabit viam aëri per vulnus ingressuro. Relinquitur autem hoc Emplastrum diutissime; & si renovari debeat apparatus, aliud simile Emplastrum iterum imponitur iisdem cum cautelis: & si ullibi, certe in talibus thoracis vulneribus, rara deligatio summam utilitatem adfert. Methodi hujus efficaciam probant etiam illa experimenta in vivis animalibus capta, quæ §. 170. n°. 4. enarrata fuerunt. Dum enim, perfollo utrimque thorace patulo vulnere, cessaret omnino respiratio, & animal mortuum videretur; simili arte educto aëre illapso ex pectoris cavis, reviviscebat animal, & vox perdita redibat statim.

Cum autem omnes partes thorace contentæ, caloris fonti, cordi nempe, proximæ, blando tepore foveantur semper, summopere cavendum est, ne detecto vulnere insolitum frigus sentiant; unde aër semper calidus hic requiritur, imprimis, quando renovabitur apparatus.

Hac methodo vulnera thoracem penetrantia, licet periculosissima fuerint, & sævis symptomatibus stipata, aliquando sanantur, neque facile desperandum esse mira observata docuerunt, & §. 170. plura talia exempla ex fidissimis auctoribus enarrata fuerunt. Magnum quidem malum semper ab his vulneribus metuendum esse nullus dubitat, cum vitalia viscera, cor nempe & pulmones, & maxima totius corporis vasa sanguinea hic locentur: sed cum non semper absolute lethalia sint ipsius etiam cordis vulnera, (de quo dixerat Plinius (a): *quod solum hoc viscerum vitis non maceratur, nec supplicia vita trahit, læsumque mortem illico affert*), patet, etiam in gravissimis vulneribus sæpe spem aliquam superesse; cum etiam, maximis vasis lætis, pro mortuis derelicti homines aliquando emerferint, dum nulla illorum cura gereretur, nullisque refocillarentur cardiacis. Non autem solum constat, gravissima talia vulnera sanata fuisse, sed etiam brevi admodum tempore. Centurioni gladio pectus dextrum perfossus fuerat prope axillam, & satis subito septem vel octo libras sanguinis perdiderat; nec cessabat hæmorrhagia, licet idoneo apparatu vulnus religatum esset. Pulsus debilis, inæqualis, frequentia animi deliquia, febris &c. acerbam prognosin faciebant. Postridie, nondum cessante hæmorrhagia, cogebatur vulneratus locum mutare, unde omnes illum in itinere expiraturum credebant. Tamen dum tertia die solo Emplastro regebatur vulnus, copiosa urinæ evacuatione, & sputis sanguineis eductis, & profuso sudore sequenti nocte adeo levabatur, ut omnia symptomata evanescerent, vulnusque solo Emplastro, incarnativo dicto, curaretur brevi, & quinta die post vulnus inflictum equo satis commode veheretur, neque amplius decumberet de die (b). Apud eundem autorem plura talia Exempla habentur, quæ docent, gravissima thoracis vulnera, pessimisque stipata symptomatibus, sine turundis & rara deligatione felicissime & satis brevi tempore curata fuisse.

(a) C. Plii Secundi Natur. Hist. Lib. XI. cap. 37.

(b) Belloste Chirurgien d'Hôpital. part. 2. chap. . pag. 92.

§. 305. **T**UMQUE præcaventur omnia illa & sæva sympto-
mata (301.).

Pessimæ sequelæ, quæ post vulnera thoracis apparent, fere tantum oriuntur ab aere admissio in pectoris cavis; vel ab extravasatis liquidis pectoris cava angustantibus, aut illorum corruptela, qua nocent visceribus contentis. Dum vulnera hæc non obturantur turundis, effusus sanguis libere effluit, rara deligatio & cautelæ modo expositæ aëris ingressum impediunt, idemque jam admissus methodo dicta educi poterit. Unde felix successus semper curæ sequitur, nisi tales partes læsæ fuerint, sine quarum integritate vita consistere nequit: simulque patet historiam & curam vulnerum thoracis magnam lucem affundere multis morbis pectoris, & viscerum contentorum; uti postea in Empyemate, pectoris Hydrope &c. patebit.



VULNERA ABDOMINIS.

§. 306. **A**BDOMINIS vulnera non penetrantia in cavitatem
noscuntur 1. stylo, & situ. 2. injectu. 3. causa vulnere-
rante cognita, & natura vulneris.

Truncus corporis in duas magnas cavitates dividitur; quarum superior & minor thorax, inferior & major abdomen vocatur. Abdominis autem cavum à thorace per diaphragma dividitur. Omne ergo, quod in trunco corporis diaphragmati subjacet, ad abdomen pertinet, sive partes continentes fuerint, sive contentæ. Omnis thoracis ambitus costis tegebatur; sed abdominis maxima pars mollibus integumentis tantum defenditur. Si enim exceperis superiorem lateralem utrimque partem abdominis, quæ costis spuris circumvallatur, pone quas magnum hepatis & lien, adeo friabilia viscera, tuto reconduntur; & vertebrarum columnam, posteriora abdominis pro parte occupantem; denique inferiorem & lateralem partem, quæ ossibus innominatis utrimque defenditur; reliqua omnia abdominis mollia sunt. Uti jam thoracis cavitas pleura dicta membrana undique cingebatur, sic & totum abdominis cavum undique simili membrana obducitur, quæ Peritonæum vocatur. Atque inde iterum generalis divisio vulnerum abdominis sumitur: omnia enim vulnera, quæ partes abdominis continentes lædunt, integro manente peritonæo, vocantur non penetrantia; ubi vero peritonæum perforatum simul est, tunc in cavum abdominis penetrare dicuntur. An autem penetraverint vulnera, cognoscitur sequentibus signis.

1. De hac re dictum fuit in commentariis §. 300. n°. 2. sed in abdomine adhuc major adest difficultas, imprimis in obesibus ob magnam pinguedinis molem, quæ in his abdomen tegit. Unde & peritissimi Chirurghi styli exploratione nihil certi hic detegi posse dixerunt: mutatus enim partium situs, tumor labiorum vulne-

N n n ij

neris, sanguinis thrombi vulnus obturantes, pinguedo in vulnus pressa, viam stylo, per vulneris aperturam immisso, impediunt. Accedit, quod vulnerati sæpius ignorent, vel male indicent posituram corporis, quam habuerunt, dum vulnus infligebatur.

2. Dum aqua tepida siphone vulneris aperturæ injicitur: de qua re dictum fuit in commentariis §. 300. n^o. 4.

3. Si enim ex figura instrumenti vulnerantis, comparata cum amplitudine vulneris, constiterit satis profunde illud adactum fuisse, & recta penetrasse; possumus concludere, illud in cavum abdominis ivisse; & contra si ex iisdem signis pateat, non satis profunde adactum fuisse, vel obliqua via. Sed patet facile in illis, quibus pinguis aqualiculus propenso sesquipede exstat, instrumentum vulnerans profunde posse adigi sine perforatione tamen peritonæi.

§. 307. **S**I profunde fere usque ad peritonæum penetraverint; debilitatis ibi tegumentis, herniæ occasionem præbent in corpore robusto; Pejus nihil, quam, si oblique decurrentia inter integumenta abdominis fistulosa vulnera effecerint.

Quantum possit extendi peritonæum in gravidis & ascite laborantibus, satis patet. Unde vulnera abdominis non penetrantia aliquid singulare habent; quod neglectum sæpe pessima produxit mala. In singulis enim inspirationibus depresso diaphragmate contenta abdominis omnia comprimuntur, muscoli abdominales in expiratione iterum reprimunt; unde patet, contenta abdominis continuo à diaphragmate & musculis abdominalibus premi. Si ergo, discissis profundo vulnere integumentis abdominis fere ad peritonæum usque, tollatur æquabilis pressio in quodam loco, per vim respirationis expandetur adeo facile dilatabile peritonæum, & saccum formabit, quem intestina, omentum &c. ingredientur, & sic facient herniam: quæ nil aliud est, nisi dilatatio peritonæi in quodam loco; quem locum dilatatum contenta abdomine viscera ingrediuntur. Rarissime enim, si unquam, à rupto peritonæo herniæ fiunt; fere semper ab eodem in saccum expansio; licet in alia opinione videatur fuisse Celsus (a): & observata certissima docuerunt, in omni abdominis ambitu hernias posse nasci, modo æquabilis pressio deficiat in quodam loco. In cadavere mulieris inventa fuit hernia ad latus sinistrum lineæ albæ, quatuor digitis transversis supra umbilicum, omenti & intestini coli portionem continens. Ortum duxerat hæc hernia à valida percussione abdominis in hoc loco (b). Mirabilem casum habet Sennertus (c), qui docet, debilitato abdominis quodam loco, immanes tumores herniosos posse nasci. Vietoris uxor, cum maritum in pertica incurvanda juvaret, ab illa resiliente percussa fuit ad sinistrum inguen. Paulo post in hoc loco parvus tumor oritur, sed brevi tempore admodum increescens; & postea evidenter apparuit, miseræ huic feminæ gravidæ uterum tumentem dilatata abdominis integumenta in saccum ingentem ingressum fuisse; poteratque & visu & tactu in hoc loco vivi infantis mo-

(a) Lib. VII. cap. 4. pag. 413. & ibid. cap. | pag. 159.

17. pag. 454.

(c) Lib. IV. part. 1. sect. 1. cap. 16. Tom.

(b) Acad. des Sciences l'an 1714. Mem. III. pag. 39.

tus percipi : & cum nihil aliud superesse videretur , partus tempore instanti , dissecto utero eductus fuit vivus infans ; tuncque præsens *Sennertus* vidit , dissectis communibus integumentis peritonæum integrum fuisse , non disruptum , sed ab uteri mole insigniter dilatatum. Post sanatum abdominis vulnus , in plagæ loco insignis hernia nascebatur in homine , qui hanc negligentius tractans post sex annos gangræna hic orta periit (*a*). Quo jam robustior fuerit homo sic vulneratus , eo majus herniæ futuræ periculum , quia tanto fortior pressio in reliquum abdomen agit , unde facilius & citius dilatabitur debiliior locus. Accedit , quod robusti corpus validis exercitiis movere solent , unde majore respirationis nixu magis dilatabitur pars minus resistens.

PEJUS NIHIL &c. Notum est , semper magnam pinguedinis copiam abdomen occupare , nisi macilentissimus homo fuerit , hæc autem pinguedo non tantum musculis abdominalibus imponitur , sed & inter illos ubique locatur : si ergo vulnus inter abdominis integumenta obliquo ductu decurrat , humores extravasati , vel pus hic collectum , si non possint ob quamcumque causam libere exire per vulneris aperturam , miro sæpe modo viam faciunt in panniculo adiposo , & inter musculorum interstitia profundos cuniculos agunt ; tuncque ingens fit curæ difficultas : imo sæpe omnino impossibile est fistulosa talia ulcera , ex vulneribus abdominis nata , curare , cum ad hoc requiratur , ut vel pressione artificiosa fundus talis fistulæ comprimatur , libera manente apertura ; vel sectione detegantur omnes ejus anfractus. Utrumque autem in his casibus sæpe fieri non posse , patet facile consideranti membranæ adiposæ magnam crassitiem in abdomine , ejusque insertionem inter musculorum abdominalium interstitia. *Celsus* (*b*) monuerat , pessimas hic fistulas nasci , dicens : *Ventri nullum os subest ; sed ibi perniciose admodum fistulae sunt : adeo , ut Sistratus insanabiles esse crediderit. Id non ex toto ita se habere usus ostendit.*

Imprimis autem abdominis fistulas periculosas credidit , quia , dum exciduntur , herniæ occasionem præbent ; & ideo dixit (*c*) : *tutior fistula est contra jecur & lienem & ventriculum , quam contra intestina ; non quo perniciosior ibi res sit , sed quo alteri periculo locum faciat.* Fistulam in inguine puellæ incurabilem doluit *Tulpius* (*d*) , quæ longa & anfractuosa via à costâ spuria cariôsa ortum duxerat. Plures tales casus observantur , de quibus in *Capitulo de Fistulis* latius dicetur : Unum alterumve Exemplum hic adduxisse sufficiet. Capitaneo ense vulnus infligebatur ad distantiam duorum digitorum transversorum ab umbilico , versus superiora & posteriora vergens : cumque non penetraret in cavum abdominis , plumaceolo plano & simplici Emplastro tectum fuit vulnus , & sequenti die clausum erat. Post sex dies abdomen miro modo tumebat & dolebat ; sed post venæ sectionem & molliissima fomenta abdomini applicata , leniebatur dolor , & sequenti die in loco vulneris tumor parvus eminens apparuit , quo aperto , incredibilis copia puris effluxit , & octidui spatio perfecte convaluit (*e*). In alio vulnerato gladius ad binorum digitorum distantiam à linea alba in epigastrio intraverat : cumque planus esset & facile plicabilis sine ruptura , secundum ductum costarum ad vertebrae dorsii usque

(*a*) *Tulp. Observat. Medicar. Lib. III. cap. 20. pag. 211.*

(*b*) *Lib. VII. cap. 4. pag. 415.*

(*c*) *Ibidem.*

(*d*) *Observ. Medic. Lib. III. cap. 28. pag. 230. 231.*

(*e*) *Traité complet de Chirurgie par Mr. de la Motte Tom. III. pag. 97.*

penetraverat, unde fistulosum ulcus nascebatur, cujus fundo aperto felix curatio sequebatur (4).

§. 308. **Q**UARE futura, ligaturæque his prospiciendum: in cæteris curatio communis vulnerum sufficit.

Illa, quæ dicta sunt de generali cura vulnerum, hic conveniunt; & sufficerent, nisi herniæ vel fistulæ metus foret. Angusta & profunda simul integumentorum vulnera facile in fistulas degenerant; unde idoneo situ vulnerati, & artificiosa pressione impediri debet, ne humores collecti in panniculo adiposo sinus forment. Latiora autem integumentorum vulnera summum periculum herniæ faciunt, unde convenit illa futura unire (vide §. 214.) & fasciis spleniisque ex arte applicatis debilem hunc locum sic firmare, ut contenta abdominis huc pressa non possint dilatare peritonæum. Cum autem omnis nixus validus respirationis hic adeo noceat, sollicitè vitanda sunt illa omnia, quæ faciunt, ut homo fortius respiret: imprimis cavendum, ne inspiratum aërem clausa larynge diu retineat, uti sit v. g. in alvo exoneranda, maxime si duræ fæces magno molimine excerni debeant. Unde leni clysmate eluenda alvus: dein victus talis debet institui, unde minima copia crassiorum fæcum in intestinis colligitur: v. g. ex jure carniū, quo solo vita sustineri potest; & tamen per integrum mensem sine damno stricta poterit esse alvus, cum vix ullæ fæces inde in intestinis accumulentur. Ob eandem causam urina diutius retinenda, ut sponte fere & minimo nixu exeat. Tussis, si forte adsit, compescenda diacodiatis: clamor, risus, sternutatio &c. vitanda, quantum fieri potest: quies summa debet imperari ob eandem rationem.

§. 309. **A**T eadem in cavitatem Abdominis ire liquet. 1. Stylo, & situ. 2. Injectu. 3. Causa vulnerante cognita, & natura vulneris. 4. Egressu contentorum.

De signis illis, quæ tribus prioribus numeris recensentur, actum fuit §. 306. & §. 300. n^o. 1. 2. 4.

4. Si per vulnus factum exeant illa, quæ abdominis cavo contineri novimus, nullum potest manere dubium, quin vulnus in cavum abdominis penetraverit. Imprimis, autem perfosso abdomine, intestina vel omentum excidunt. Intestina elapsa facile cognoscuntur, sed in obelis pinguedo, dissectæ cutis pressione liberata, per vulneris aperturam extuberat, & pingue omentum refert; unde in vulneris diagnosi nasci posset error. Simul etiam vulnus, in cavum abdominis penetrans, pinguedine huc pressa, sic posset obturari, ut nec stylo, nec iniectione aquæ tepidæ hoc detegeretur. Si jam contenti vasis & visceribus abdominalibus humores exeant, ut sanguis, urina, bilis &c., de quibus diceretur §. 312.; evidens habetur signum, vulnus in cavum abdominis penetrasse non tantum, sed etiam abdominis contenta læsisse.

(4) Illi. 108.—113.

§. 310. **S**I tum omnia Symptomata levia, dolor, febris, inflammatio absunt, posito in vulnus ægro cruor non exit, injectis liquor immutatus redit, interiora illæsa scimus.

Postquam jam ex signis constitit, vulnus penetrasse in cavum abdominis, tunc inquirendum est, an contenta abdominis cavo viscera & vasa læsa fuerint, an non? Cum autem singula viscera suis functionibus conspirent ad sanitatem, patet primo, nihil alicujus momenti hic læsum esse, si non observentur multæ functiones turbatæ esse, quæ ab integritate horum viscerum pendent. Quia autem viscera abdominalia præcipue chylopoiesi inserviunt, hinc cibi & potus receptio, retentio, mutatio in chylum hujus resorptio, & fæcum residuarum excretio si hiant illa lege, ut in sanitate fieri solet, certi sumus, causam vulnerantem, licet in abdominis cavum penetraverit, tamen non læsisse hæc viscera. Cum autem, (licet minus proprie, quia extra personæ ambitum locantur) & organa illa, quæ urinæ secernendæ & excernendæ inserviunt, uti & generationi dicatæ partes multæ in abdomine dicantur hære; hinc & attendendum est, an symptomata, vulnus secuta, has partes læsas esse demonstrent.

Præter has viscerum abdominalium læsiones aliquando accidit, mesenterii nervos discissos solos gravissima symptomata, & mortem ipsam, producere; uti ex Ruyschii observatis in commentariis §. 170. n°. 3. dictum fuit: sed tunc immanis dolor, inflammatio, & febris satis docent, periculum adesse. Unde hæc si absunt, optima spes facilis curationis habetur. Sed magna vasa sanguinea, chylosa, & lymphatica, per abdominis vulnera lædi possunt; unde ægro in vulnus decumbente satis patulum, si nihil effluat sanguinis, vel alterius liquidi, novimus vasa hæc illæsa esse: quia autem sanguis effusus & coagulatus in cavo abdominis hære posset, nec exire tamen, ideo aquam tepidam siphone per vulneris aperturam injiciunt, quæ si non mutata redeat, nihil tale metuitur. Notandum tamen, in homine vivente & sano abdomen semper halitu plenum esse, qui aperto mactatorum animalium ventre tam manifeste apparet: ille frigore aëris admissi, vel alia quacumque de causa, condensatus & collectus lymphæ tenuis specie de vulnere posset exire, licet interiora omnia illæsa forent.

§. 311. **I**LLICO arcendus aër, ingressus suctu & expirationis in nixu excludendus; gastroraphia consuenda integumenta, turundæ auferendæ, balsami illitu, decubitu, in vulnus, quiete corporis, victu leni, humido, parco, rara deligatione percurabitur.

AER ARCENDUS &c. Ubi per modo dicta constitit, interiora omnia abdominis illæsa esse, talis vulneris cita consolidatio requiritur. Sed notandum est, aërem per vulnus aliquando ingredi, & in cavo abdominis retentum, calore rarefactum immaniter expandi posse, & comprimere omnia viscera, si per vulnus exire impediatur. Ab eodem aëre, in panniculum adiposum se insinuante, mira Emphysemata oriri possunt, uti in thoracis vulneribus, §. 300. n°. 5. dictum est. Unde antequam de consolidatione vulneris talis cogitatur, debet constare, nul-

lum aërem in cavo abdominis hærere ; & si adsit , debet prius educi. Hoc autem fit simili modo ac §. 304. dictum fuit : Inspiratum nempe aerem vulneratus retinet , quam diu ferre potest ; & tunc , clausa larynge , expirationis validum nixum facit : sic enim depresso diaphragmate , simulque agentibus in expirationis nixu musculis abdominalibus , contenta abdominis valide premuntur , & aer contentus per vulneris aperturam expellitur. Ne autem eodem tempore omentum vel intestina exprimantur , linteo raro tegitur vulnus , quod aerem quidem transmittit , reliqua autem egressura coercet.

Excluso sic aëre requiritur ex generali indicatione in cura omnium vulnerum (§. 185. n°. 3.) ut partes , per causam vulnerantem separatæ , uniantur iterum , & in hac adunatione retineantur : quod fit in vulneribus abdominis in cavum penetrantibus peculiari methodo , nempe :

GASTRORAPHIA CONSUEVENDA INTEGUMENTA. Antiquis jam descripta fuit hæc operatio , & , uti videtur , diversis etiam tentata modis. Galenus (a) metuens , ne peritonæi dissecti labia difficulter concreverent inter se , cum membranam nervosam & exsanguem esse crederet , sic instituit hanc operationem , ut peritonæi discissi labia abdominis dissecti oppositis lateribus concreverent. Jubeat enim , acum ab externa parte per cutim introrsum adigendam esse , non pertundendo peritonæum , & deinde in latere opposito vulneris peritonæum una cum omnibus incumbentibus tegumentis ab interiori parte extrorsum eadem acu transfigebat ; & postea in eodem vulneris latere cutim & musculos iterum pertundebat acu ab exteriori parte introrsum , vitando peritonæum ; sed tunc vicissim in opposito latere peritonæum cum omnibus incumbentibus acu ab interiori parte extrorsum transfadacta perforabat. Hac methodo conabatur efficere , ut peritonæum discissum concreveret cum musculis abdominis discissis lateris oppositi. Tamen & ibidem Galenus aliam methodum Gastroraphiæ recenset , qua cognatæ naturæ partes inter se uniuntur & coalescunt ; peritonæum nempe peritonæo , musculi musculis &c. & quæ ob hanc causam etiam melior esse videtur. Celsus (b) hanc operationem describens illam sic fieri jussit , ut prius interiori membranæ sutura injiciatur , deinde hoc facto eadem fila , eademque acus , ad cutem transferebantur , similique modo etiam sutura uniebantur , vulneris labia : dicit enim , suturam summæ cutis , neque interioris membranæ , per se satis proficere , sed utriusque. Voluit etiam è duobus linis faciendam esse suturam , & spissiore quam alibi ; quia & rumpi facilius motu ventris potest , & non æque magnis inflammationibus hæc pars exposita est. In hac sutura perficienda imprimis requiritur , ut minimo cum dolore , & sine periculo læsionis omenti , vel intestinorum , fiat ; neque ullus metus sit , ne sutura facta ob continuum abdominis motum laceretur. Quia autem curis abdominis tenacissima est (uti experiuntur omnes , qui cadaverum apertorum ventris consuunt) & difficillime perforanda ; ideo acus valde acutæ , & à latere scindentes , requiruntur , ad tertiam circiter suæ longitudinis partem incurvæ , cæterum rectæ. Filum forte , vel & plura fila simul , non contorta inter se sed in eodem plano posita , transmittuntur suis extremis per binarum talium acuum capita ; deinde acus unius cuspis , pulpa indicis digiti occultata ,

(a) Method. Med. Lib. VI. cap. 4. Char-
ter. Tom. X. pag. 140. 141.

(b) Lib. VII. cap. 16. pag. 453.

caute sub peritonæo in abdominis cavum dimittitur, ne lædantur intestina vel omentum; perforatur peritonæum & integumenta, transadigendo hanc acum ad digiti circiter transversæ distantiam à vulnere. Simili modo per oppositum vulneris labium altera acus adigitur, & fila transmissa prius suppositis spleniolis nodo constringuntur. Repetitur jam ex futura, prout vulneris amplitudo requirit. Reliqua autem, quæ in Gastroraphiæ applicatione notanda sunt, apud *Garengeot* (a) & alios autores habentur: videantur & illa, quæ dicta sunt in commentario §. 214.

TURUNDÆ AUFERENDÆ. Illæ enim in hoc casu semper nocerent, cum requiratur partium separatarum unio, quam semper impediet quodcumque corpus heterogeneum interpositum. Noxium autem in abdominis vulneribus turundarum usum, ratione & experimentis pulchre probat *Belloste* (b).

BALSAMI ILLITU, DECUBITU IN VULNUS &c. Cum autem per futuram adductis labiis requiratur illorum unio, ad hanc sufficere, si secundum dicta in vulnere cura generali §. 204. balsamo vulnerario leni leviter illinantur, vel & plumaceolum tali balsamo madidum superimponatur. Situs autem vulnerati talis imprimis requiritur, ut vulnere incumbat, ut sponte sua pus & alia forte extravasata huc tendant. Quies summa hic requiritur, quia corporis motu, tussi, risu, sternutatione, alvi exoneratione difficiliore, augetur respirationis vis; & periculum foret, ne futura laceraretur, vel saltem rudiori tali abdominis motu distracta fila irritarent partes, per quas transmittuntur: unde inflammatio, dolor, & alia inde sequentia mala oriri possent. Ob eandem causam victus lenis & humidus requiritur, parca copia simul, ne repleto ventriculo distendatur abdomen: imprimis carniū julsula hic commendantur, uti dictum fuit in commentariis §. 308. Si jam nullus dolor aut pruritus, nulla inflammatio &c. superveniant, rara deligatio curam accelerabit; uti dictum fuit in generali vulnere cura.

§. 312. **S**I acutus dolor, febris, inflammationis signa, cruor, ichor, potus, cibus; chylus; bilis, pus, urina, stercus, fœtor, ex vulnere exeuntia; causa vulnerans, situs & natura vulneris; pallor, sudor frigidus, inquietudo, animi deliquia, pulsus defectus, præsentia considerantur, docebunt, læsa vasa vel viscera abdominalia, & quæ.

Hactenus considerata sunt vulnera abdominis, quæ vel sola communia integumenta læserant, integro manente peritonæo; uti & illa, quæ in cavum abdominis penetraverant quidem, sed tamen non læserant contenta vasa vel viscera. Sequuntur jam illa signa, quibus noscitur, interiora læsa esse: simulque ex iisdem concluditur, quænam partes abdominis cavo contentæ, vulneratæ fuerint. Signa autem hæc desumuntur vel ex illis, quæ de vulnere exeunt; vel ex functionibus læsis.

ACUTUS DOLOR. Suspectum quam maxime in vulneribus abdominalibus signum, denotans partes membranaceas, vel nervosas esse læsas. Quantum au-

(a) *Traité des Operations de Chirurgie* Tom. I. pag. 124. &c.

(b) *Chirurgien d'Hôpital* part. 2. chap. 15. pag. 114. &c.

tem ex illarum partium læsione immineat periculum, demonstrant illa, quæ dicta sunt in commentariis §. 170. n°. 3. Ibi enim constitit ex *Ruysschii* observationibus, vulnera mesenterio inflicta, sine læsione aliarum partium, post enormes dolores abdominis, intra duos tresve dies fuisse lethalia: simulque apparuit, admodum probabile esse, à nervis mesenterij læsis omnia hæc mala orta fuisse. *Celsus* (a) inter signa vulnerati jecinoris recenset punctiones, doloresque usque ad jugulum, junctumque ei latum scapularum os, intentos. In renibus vulneratis dolorem ad inguina & testiculos descendere monet: Percussa vulva dolorem in inguinibus, coxis, & feminibus esse dicit &c.

FEBRIS. Quæ, si non ex animi perturbatione ortum duxerit in vulneratis, semper vel acerbi-doloris comes est, vel inflammationem natam sequitur; quæ in nervosis illis partibus, mesenterio nempe, intestino &c. semper periculosa.

INFLAMMATIONIS SIGNA. Horripilatio nempe, illamque sequens calor febrilis, sitis, anxietas, respiratio laboriosa, pulsus durus, lingua sicca &c. Quam funesta autem sit inflammatio plurimorum viscerum abdominis, docent Ileus, & herniæ suffocatae, à quibus morbis vel robustissimi homines sæpe paucarum horarum spatio pereunt.

CRUOR. Designat vasa sanguinea majora læsa esse, si cum impetu erumpat, & quidem arteriosa, si coccineo colore fulgeat; venosa vero, si magis nigricans appareat.

ICHOR. Ex variis partibus, per vulnus abdomini inflictum læsis, tenuis talis aquosus liquor prodire posset. Lymphatica hic plurima vasa sunt, quæ talem lympham fundere possent. Ductus pancreaticus, porus hepaticus, renum pelves, si vulnerata fuerint, possent incredibilem copiam talis ichoris in cavum abdominis effundere. Imò halitus in abdomine sani animalis, ex vasis perspirantibus expulsus, condensatus frigore admissi aeris per vulnus, nec resorptus iterum per venas, hinc collectus, per aperturam vulneris posset exire sæpe satis notabili copia, licet interiora omnino illæsa forent.

POTUS, CIBUS. Hæc designant, ventriculum esse læsum: cujus vulnera periculosa semper esse, non tamen absolute lethalia, constitit ex illis, quæ dicta sunt in commentariis §. 170. n°. 5. Quibus addi posset & illud, quod habetur in *Miscellaneis Curiosis* (b), exemplum hominis, cui ventriculus vulneratus per undecim annos partem cibi & potus per vulneris aperturam, callosis factis labiis non consolidatam, emittebat.

CHYLUS. Si per vulnus exeat, intestina tenuia esse læsa docet, vel ductus chyloferos, in quibus candidissimo colore distinguitur à chylo intestinorum semper magis griseo, vel & flavescente, si intestinum tenue vulneretur prope illum locum, in quo bilis chylo miscetur.

BILIS. Designat læsionem ductus communis, vel cystici, vel intestinum forte duodenum vulneratum esse circa illum locum, ubi ductus communis huic intestino inferitur: imprimis autem magna copia bilis in abdominis cavum effluit, si ipsa vesica fellis læsa fuerit. Rarus admodum talis casus habetur in *Actis Angliæ*,

(a) Lib. V. cap. 26. pag. 286.

(b) Decad. 2. Ann. V. pag. 2.

caris (a) de milite, cui vulnere in cavum abdominis penetrante vesicæ fellæ fundus perfoßus fuerat, absque ulla notabili læsione vicinarum partium. Mira satis symptomata secuta fuerunt hoc vulnus: statim enim distendebatur abdomen, ac si Tympanitide vel Ascite laboraret: neque augebatur vel minuebatur tumor ille ad mortem usque, quæ septimæ diei initio post inflictum vulnus contigit. Nulli tamen ructus, flatus, aut borborygmi aderant, & alvus toto hoc tempore manebat pertinacissime stricta licet acria satis purgantia & clysmata adhiberentur. Somnus vix ullus aderat, licet opiata satis magna dosi exhibita fuissent. Vulnus externum flaccidum, pallidum, sine pure. Pulsus erat fortis, æqualis, tardus, pridie ante mortem leviter subinde intermittens; mens constabat ad mortem usque, levis singultus & nausea adfuerant quinta die post vulnus inflictum. Ex hac historia patet, pessimum signum esse, si bilis per vulnus abdominis exeat.

P U S. Designat factam jam suppurationem internarum partium à vulnere inflicto; nisi forte præexistit vomica purulenta instrumento vulnere nunc aperta.

U R I N A. Si exeat ex vulnere, pelvis, ureterum; vel & vesicæ læsionem significat, uti facile patet.

S T E R C U S, F A C T O R. Constat ex Physiologicis, ingesta alimenta actione Ventriculi & intestinorum tenuium sensim sic emulgeri, & per bibula venarum meseraicarum & vasorum lacteorum oscula resorberi partem maxime solubilem, ut circa finem intestini ilei solæ fere fæces non solubiles residuæ in cæcum dictum intestinum delabantur; inde per totam coli intestini longitudinem sensim propulsæ ad rectum intestinum perveniunt, & alvo excluduntur. Simul observatum fuit, nullibi percipi factorem illum stercorem, incipientis putredinis indicium, nisi in cæco, colo, & recto; nunquam autem in tenuibus intestinis. Ideo in cæco intestino *sedere stercorem fermentum, corruptionis opus, non nutritionis*, dixit Helmontius (b). Ubi ergo stercus exit per vulnus inflicto, vel factor talis de vulnere expirat, concluditur, crassa intestina læsa esse. Unde Cellus (c) postquam dixerat, communes esse notas jejuni intestini & ventriculi vulnerati, subjungit *Cæcra intestina ista vel stercus, vel ejus odorem exhibent*.

C A U S A VULNERANS, SITUS, ET NATURA VULNERIS. Instrumentum, quo vulnus inflicto fuit, si haberi possit, sæpe docet, quo usque vulnus penetraverit, si comparetur cum vulneris inflicti amplitudine: simul patet, multum differre vulneris inflicti naturam pro varia directione, qua instrumentum vulnerans in cavum abdominis penetravit, sursum, deorsum, ad latera &c. sed præterea abdominalium viscerum situs multum differre poterit, pro varia positura corporis, quam vulneratus habuit illo tempore, dum vulnus infligebatur, uti etiam aliis de causis. Sic notavit accuratissimus Anatomicus Winslow (d), hepar in homine ligamenti suis quidem sic firmari, ut non facile ab uno latere in aliud dilabatur, nequiquam tamen ab his suspendi, sed sustineri à ventriculo & intestinis; imprimis quando hæc viscera repleta sunt. Unde post diuturnam inediam proprio pondere depressum hepar trahit diaphragma, & molestum sentit.

(a) N°. 414. pag. 341. Abridgem. Tom VII. pag. 571. 572.

(b) Ortus Medicin. pag. 179. n°. 31. in fine capituli: *Sextuplex digestio alimenti humani*.

(c) Lib. V. cap. 16. pag. 287.

(d) Exposition Anatomique &c. Traité du bas ventre n°. 267. 268. pag. 350.

facit; quem ventriculo male adscribi credit idem auctor. Unde si, vacuo ventriculo, stanti homini vulnus infligatur ad binorum digitorum distantiam sub costis spuris lateris dextri, poterit lædi hepar in tali casu ultra costarum limbum prominens: quale Exemplum refert Garengot (a) hominis sic vulnerati, in cujus cadavere apparuit abscessus in hepate à vulnere inflictio natus. Idem jam verum est de ventriculo, qui repletus admodum satis profunde sæpe descendit.

PALLOR, SUDOR FRIGIDUS, INQUIETUDO, ANIMI DELIQUA, PULSUS DEFECTUS. Omnia hæc signa vitam deficientem denotant, & plerumque largam sanguinis jacturam sequuntur: unde, licet nihil sanguinis per vulnus effluat, si hæc signa adsint, de interna Hæmorrhagia cogitandum est, & magna vasa sanguinea læsa esse concluditur: sanguine enim sic in cavum abdominis effluente, parca copia tantum ad cor redit: hinc ejus vires imminuuntur, unde pulsus incipit vacillare, intermittere, & tandem penitus deficere in perfecta syncope. Inde & pallor collapsis vasis sanguine vacuis, & frigidus sudor, resolutarum virium certum indicium. Incipit tunc illa lucta vitæ cum morte, quam agoniam vocaverunt: anxietas nempe summa, & inquietudo, sic ut continuo situm corporis mutant, quantum vires permittunt; tandemque animi deliquium, vel & mors ipsa sequitur. Videantur & illa, quæ dicta sunt in commentariis §. 302. n°. 7.

Aliquando forte & hæc symptomata oriri possunt à nervorum, per viscera abdominalia disperforum, læsione. Magnum enim hos nervos habere imperium in vitales functiones docent subitanæ mortes, etiam in sanissimis & robustissimis hominibus ab herniis suffocatis, intestinorum susceptionibus &c.: in quibus morbis omnia hæc signa apparent, & paucarum sæpe horarum spatio mors sequitur. Unde & Celsus (b); signa ventriculi vulnerati enumerans, dixit: *Venarum motus ælanguescunt, sudores tenues oriuntur, per quos extrema partes frigescunt.* Et statim addit, communes jejuni intestini & ventriculi vulnerati notas esse.

Ex his omnibus signis cognoscitur, partes abdominis cavo contentas læsas esse; & sæpe ex iisdem satis evidenter patet, quænam partes læsæ fuerint: unde ex his Diagnosin horum vulnorum habetur. Sequens paragraphus Prognosin docebit.

§. 313. **T**UM infinita mala sequuntur, partim. 1. à natura viscerum, tenui vasculosa, non musculosa, difficillimæ circulationis, nec nisi clauso abdomine absolvendæ. 2. à functione læsa visceris. 3. ab effusi cruoris copia, corruptione. 4. ab aëris ingressi, rarefacti, prementis, actione.

1. Constat ex Physiologicis omnia viscera abdominalia, quæ chylopoiesi inferiunt, venosum suum sanguinem deferre ad sinum venæ portarum, qui dein in ramos divisus per omnem hepatis molem venosum hunc acceptum sanguinem distribuit sic, ut non amplius ab angustis ramis in latiores fluat, sed ut in arteriis à latiore basi in angustos fines pellatur. Unde patet, difficillimam hic humorum circulationem esse, cum sanguis venosus, qui maximam partem motus, à corde &

(a) Traité des Opérations de Chirurgie Tom. I. pag. 84. (b) Lib. V. cap. 16. pag. 187.

arteriis accepti, amisit, hic iterum per angustias convergentium vasorum transire debeat. Sed circulum humorum juvat actio diaphragmatis & musculorum abdominalium, per quam omnia viscera abdominalia premuntur alternis vicibus: Inspirationis enim tempore diaphragma deorsum tendens cavum abdominis arctat, & omnia contenta comprimit, expirationis vero tempore contracti musculi abdominales eodem modo reagent. Hinc omni vitæ momento alternis his pressioibus promoveatur sanguinis circulatio per abdominalia viscera. Unde in illis hominibus, qui otiosam vitam degentes salubre corporis exercitium negligunt, toties circa hepar & alia abdominalia viscera difficiles nascuntur obstructions, & pessimi morbi chronici. Ubi ergo per vulnus læditur vel turbatur actio diaphragmatis vel musculorum abdominalium, patet, tolli hoc adminiculum, quod requirebatur omnino ad expeditam humorum circumductionem per abdominalia viscera. Hoc apparet evidentior in vivis animalibus dissectis: dum enim cani decussata sectione dissecantur musculi abdominales & peritonæum, post aliquot momenta venæ omnes viscerum abdominalium apparebunt distentissimæ, quia non potest commode sanguis venosus per hepatis angustias pelli, deficiente actione musculorum abdominalium. Facile interim patet, non ab omnibus abdominis vulneribus hanc noxam expectandam esse, sed tantum ab illis, quæ diaphragmatis vel musculorum abdominalium actionem insigniter lædunt. Accedit, quod per patula vulnera aer illapsus insolito frigore quam maxime nocere possit abdominalibus visceribus; & à binis his causis videtur deduci posse, quare omentum, vel intestina, extra vulnus dilapsa tam facile gangrænescant.

2. Singula hæc viscera proprios usus habent ad chylicationis opus conspirantes: uno ergo, vel pluribus læsis, turbabitur chylicatio. Sic v. g. intestino tenui dissecto prope pylorum, omnis chylus in cavum abdominis decideret, vel per vulnus exibat, nutrimento suo defraudabitur corpus, & vero peribit marasmo. Fellis vesicula læsa, ut dictum fuit præcedenti paragrapho, bilis in cavum abdominis decidebat, & alvus manebat pertinacissime stricta nullis remediis auscultans, cum subita & permanente abdominis inflatione: Quæ mala non facile quis prævidisset futura à tali vulnere. Unde simul patet, quanta sit bilis necessitas ad abdominalium viscerum plurimorum actionem. Sed bilis ex sanguine venoso viscerum chylopoieticorum, in singulis forte diverso; & mire mutato per hepatis fabricam, conficitur; unde læsis visceribus abdominalibus sæpe tolluntur quædam requisita ad bonæ bilis secretionem; quæ ergo à naturali sua indole degenerans chylopoiesin miris modis turbare poterit. Sic hepar & lien quasi spongiæ sanguine plenæ apparent: ab horum ergo læsione copiosa cruoris effusio, inflammatio, suppuratio in amurcam quasi horum viscerum substantiam convertens &c. expectari poterunt.

3. Discissis vasis sanguineis, quæ tam numerosa & satis ampla per abdominis viscera distribuuntur, ingentem sanguinis copiam in cavum abdominis posse effundi, facile patet. Ille copia sua premendo viscera nocere potest, uti & nata corruptela; imprimis, si simul aer libere accesserit, tabefacere posset omnia. Modicam vero sanguinis effusionem, sine visceris ullius nobilioris læsione; & impedito libero aeris accessu, non adeo periculosam credidit Ruyschius (a), edoctus experimento

(a) Observat. Anatom. Chirurg. 66.

in vivo animali capto. Cani enim mediocris magnitudinis, prius ligatis, vasis splenicis, lienem exciderat: neglexerat autem ligare arteriolam Epiploicam, quæ tantam tamen sanguinis copiam fundebat, ut jamjam moriturus canis videretur. Hanc tamen arteriolam sine ligatura abdomini intrusit, ubi procul dubio perrexit sanguinem fundere: futura vulnus abdominis univit, & vulnere intra sex septemve dies consolidato canis convaluit. Ex hoc experimento conclusit, sanguinem extravasatum in cavo abdominis, modo secludatur aer, posse resorberi sic, ut nihil inde mali postea sequatur.

4. Si per vulnus aer in cavum abdominis intraverit, & interim ejus exitus à pinguedine, vulneris orificium obturante, vel alia quacumque de causa, impediatur, calore corporis rarefactus aer distendere poterit abdomen in molem immensam: sed & simul eadem vi comprimet omnia contenta abdominis cavo viscera; imprimis autem ventriculum & intestina, illaque penitus complanare poterit: unde miserrima mala, sola educatione rarefacti aeris sananda.

§. 314. **U**NDE lethalia sæpe sunt. At intestina læsa, & pertractioni oblata, consuenda, si magnis; sibi relinquenda, si parvis vulneribus læta sunt, & reliqua peragenda, ut (311). dictum est.

Ex omnibus prædictis patet, quantum discrimen sit vulnorum in cavum abdominis penetrantium, una cum læsione contentorum vasorum vel viscerum. Si jam simul considerentur illa, quæ de vulnorum lethalitate dicta sunt §. 170. n°. 3. & §. uti & illa mirabilia mala, quæ diaphragmatis læsionem sequi observata fuerunt, de quibus ibidem n°. 4. agebatur; patebit facile, mortem inevitabilem sæpe vulnera abdominalia sequi.

Sequitur jam, ut considerentur illa, quæ fieri debent in cura abdominalium vulnorum, si intestina læsa fuerint, & manibus pertractari possint. Hippocrates (a) tenuium intestinorum vulnera lethalia pronuntiavit: Galenus tamen in suis commentariis non quælibet vulnera tenuium intestinorum lethalia esse voluit, sed rarissime sanari dicit illa quæ in cavum usque intestinorum penetrarent. In alio Aphorismo (b) Hippocrates dixit, non coalescere intestinum tenue dissectum. Celsus (c) pariter dixit: *Si tenuius intestinum perforatum est, nihil profici posse. Latius intestinum sui potest: non quod certa fiducia sit, sed quod dubia spes certa desperatione sit potior: interdum enim glutinatur.*

Hodie tamen plurimis, illisque fidelissimis, observatis constat, intestina tenuia etiam integre dilcilla fuisse, & tamen superstites fuisse vulneratos. Si ergo intestinum læsum fuerit, neque vulnus adeo magnum sit, ut patula via contenta intestini cavo in abdomen delabi possint, sibi relinquenda sunt; sponte enim tunc solent sanari. Simulac enim intestina per vulnus abdominis erumpunt, solent valide distendi flatibus, si integra fuerint; & tunc tenuia & membranacea apparent: ubi yero in naturali statu considerantur, satis crassa & solida apparent; unde parvum vulnus non adeo nocere poterit. Exemplo hominis Maniaci, (de quo dictum fuit

(a) Aphor. 18. Sect. VI. Charter. Tom. IX. pag. 257.

(b) Ibid. 24. Sect. VI. pag. 262.
(c) Lib. VII. cap. 15.

§. 170. n°. 5.) qui octodecim vulnera proprio abdomini inflixerat, constitit, sanari sponte tales intestinorum etiam tenuium lusiones, uti docuerunt cicatrices sanatorum vulnerum in cadavere postea repertæ. Dum cani majori (uti ibidem dictum fuit) intestinum tenue secundum longitudinem dissecaretur, nulla futura intestini in abdomen retrusi facta, animal tamen convaluit. Imo observata docuerunt larga satis intestinorum vulnera, per quæ contenta exhibant, sponte sanata fuisse. Homini globo plumbeo majori vulnus inflictum fuerat in cavum abdominis penetrans cum insigni læsione intestini coli; sic ut per bimestre spatium excrementa per vulnus exirent: tandem tamen sine ullo artis adminiculo illud vulnus consolidatum, & homo sanatus fuit (a). Insigni decoctori vulnus abdomini infligebatur cultro, sic ut acies penetraret in latius dextri lateris intestinum; quod, licet ultra triginta horas pependerit extra corpus, jam abunde refrigeratum, reductum tamen fuit in locum suum sine ullo malo. Profluebant quotidie per vulneris hiatus fæces alvinæ, & licet perditus helluo nullam diætæ rationem servaret, felicissime tamen intestini vulnus consolidabatur, uti post sextum annum à vulnere inflictio in cadavere apparuit (b).

Ubi autem vulnera intestinis inflicta tam magna sunt, ut inde jure metuendum sit; ne contenta in cavum abdominis delabantur, ibique accumulata & putrefacta corrumpant omnia; tunc, si detur manibus pertractandi tale intestinum vulneratum occasio, hæc consuenda sunt. Solent Chirurghi in tali casu uti futura, quam pellionum vocant: quia solent pelliones laceras animalium pelles tali futura unire. Hæc autem futura fit, dum ambo vulnerati intestini labia simul acupertunduntur, quam sequitur filum sericeum planum: dein sequens punctura similiter fit ad distantiam binarum linearum à priore, semper ab eodem latere intestini incipiendo: hoc repetitur, donec labia vulneris contigua sint: Sic spirali circumvolutione filum continet vulnerati intestini labia, & fili pars satis longa ex vulnere pendula relinquitur, ut postea consolidato intestino commode educi possit. Ob hanc causam etiam majoribus intervallis puncturæ faciendæ sunt, nec fili extrema subducenda spiralibus gyris ejusdem fili per intestini labia circumductis, ut multi autores voluerunt: tunc enim postea non posset protrahi filum sine corrugatione violenta intestini confuti: unde acerrimi dolores, inflammatio, gangræna &c. sequerentur. Videatur de hac futura *Garengeot* (c) ubi optima methodus hanc perficiendi describitur.

Patet facile, nonnisi urgente necessitate hanc futuram instituendam esse, cum requirat intestini extra abdomen protracti satis longam moram in aere externo, & rudiorum ejusdem intestini pertractationem. Unde & notaverunt autores, sæpe funestum eventum sequi. Exempla tamen illa, quæ in commentariis §. 170. n°. 5. allegata fuerunt, ubi ipse ventriculus, vulnere divisus, consuebatur; uti & illa, quæ dicuntur postea in commentario §. 317. probant satis, non posse hanc operationem tanquam damnosam aut inutilem repudiari.

(a) Belloste Chirurgien d'Hôpital pag. 266. part. 3. chapit. 15.

(b) Tulpii Observat. Medicar. Lib. III. cap. 20. pag. 311.

(c) Traité des Operations de Chirurgie Tom. I. pag. 105. &c.

§. 315. **S**I per latum vulnus illæsum intestinum exit, foveatur animalibus vivis dissectis applicatis, vel fomento idoneo; reponatur; fiant reliqua, ut (311).

Intestina, quam diu in abdomine hærent, semper undique tepido rore exhalante humectantur, & simul pingui subtilissimo lubricantur; uti solus etiam attactus docet in animalibus vivis dissectis. Ubi ergo per vulnus inflicturn intestina evolvuntur, carent blanda & tepida atmosphæra; unde refrigerantur, siccantur, & satis cito sæpe in mortem tendunt: quod imprimis mutato colore cognoscitur. Pulcherrime hanc rem expressit Celsus dicens: *Protinus considerandum est, an integra ea sint; deinde, an his color suus maneat &c. Tum, si utrumlibet intestinum (crassum nempe & tenue) lividum, aut pallidum, aut nigrum est; quibus illud quoque necessario accedit, ut sensu careat, medicina omnis inanis est. Si vero ea adhuc sui coloris sunt, cum magna festinatione succurrendum est: momento enim alienantur, externo & insueto spiritu circumdata (a).* Quod autem pulchre intellexerit Celsus, intestina naturaliter irrigari non tantum tenui lymphâ sed & pingui simul oleo, patet evidenter, quia paulo post addit sequentia: *Ac, si jam sicciora sunt intestina, perluenda aqua sunt, cui paululum admodum olei sit adjectum (b).* Ubi ergo patulo de vulnere intestinorum orbes evolvuntur, statim reponenda sunt, si nondum refrigerata vel exsiccata fuerint. Multum facilitatur hæc repositio intestinorum, si tali situ ponatur vulneratus, ut contenta abdominis non urgeant propria gravitate locum vulneris; unde resupinandum hominem, coxis erectioribus, voluit Celsus (c). Hac enim positura corporis contenta abdominis cavo viscera diaphragma premunt in thoracis cavum, sicque abdominis capacitas augetur; unde facilius possunt egressa intestina recondi. In hac repositione intestinorum iterum pulchre monet Celsus (d): *quod Medicus priora semper intestina, qua posteriora prolapsa sunt, condere debet sic, ut orbium singulorum locum servet. Repositis omnibus leniter homo concutiendus est, quo sit, ut per se singula intestina in suas sedes reducantur, & in his consistant.* Nisi enim hoc observetur, tormina validissima, & plurima alia mala sequi possent.

Aliud adhuc monitum, & satis magni momenti, habetur apud Garangeot (e); nempe, quod si vulnus esset in abdomine medio sub umbilico, per rectum abdominis musculum in alterutro latere penetrans, tunc intestinum, vel omenti pars prolapsa sæpe possent recondi sub musculo recto, inter hunc & ejus vaginam tendineam, quæ musculum sub umbilico admodum laxè ambit; & male crederetur, hæc reposita esse in cavum abdominis. Facile patet, à tali errore pessima mala sequi debere; intestini nempe, sic valide à musculo incumbente pressi, inflammationem, dolorem &c.

Ubi autem intestina prolapsa jam refrigerata fuerunt, vel & ab aëre exsiccata, tunc omnium optimum est, si blando prius tepore foveantur & humectentur simul. Nihil

(a) A. Corn. Celsi. Medicin. Lib. VII. cap. 26. pag. 452.
(b) Ibidem.
(c) Ibidem.

(d) Ibidem. pag. 453

(e) Traité des Operations de Chirurgie Tom. I. pag. 102.

tunc melius excogitari potest, quam si abdomine discisso vivum & sanum animal imponatur elapsis intestinis; tunc enim naturali quam maxime fotu calefcunt & humectantur. Unde etiam in Ileo, terribili adeo morbo, sæpe tantum solamen habetur, uti & in herniis incarceratis reducendis. Si viva animalia præsto non sint ad hunc usum, aqua calida cum lacte dulci & pauxillo olei blandi, decoctum carnis vitulinæ subpingue; decocta emollientium herbarum &c. adhiberi possunt in eodem usus, modo semper tepida retineantur. Verum quidem est, quod intestina prolapsa & refrigerata, si recondantur abdominis cavo, ibi calefcunt & humectabuntur; sed debemus prius certi esse, antequam hæc reponantur, vitam rediisse in his partibus, jam refrigeratis & semimortuis: Aliter enim, si jam gangræna adesset, pessima corruptio expectanda foret; &, licet separatio corrupti fieret, contenta intestinali fistula in cavum abdominis delaberentur: unde post summas misérias toleratas tandem mors sequeretur.

§. 316. **S**I per parvum exeuns foramen, tumens flatu, inflammato, fœce, reduci non possit; fotu, punctu, dilatatū vulneris, reponitur.

Quando amplo vulnere abdomen perfossum est, intestina facile evolvuntur; sed etiam tunc sine magna difficultate reponi possunt. Ubi vero per angustum vulnus pars intestini expressa fuerit, longe periculosius malum est. Intestinum enim egressum comprimetur vulneris ambitu, & inflammabitur, & brevi tumebit distentum flatibus, vel & ingestis alimentis motu peristaltico huc pulsus, nec redire potentibus, ob intestini angustationem in vulneris loco. Unde suffocatio & gangræna satis cito sequuntur; uti in herniis incarceratis toties visum fuit. Facile patet, non posse reduci intestinum, nisi minuatur illius distensio, vel dilatetur vulnus. Prius semper tentandum est, quia dilatio vulneris non sine molestia fieri poterit. Fomenta illa, de quibus dictum fuit præcedenti paragrapho, calide applicantur; dein leniter manibus palpando tentatur, an flatus vel contenta in tubo intestinali possint iterum propelli per vulnus, tunc enim detumescet intestinum, & reduci poterit. Si autem flatibus distentum fuerit, & per aliquot horas fomenta talia frustra applicata sint, tunc acu hinc inde pertundendum est intestinum distentum, ut flatus exire possint. Neque aliquid metuendum videtur ab his vulnusculis, nam flatu expulso contrahetur intestinum, & disparebunt parvulæ tales aperturæ, nihilque contentorum intestini per illas poterit egredi. Tales intestini puncturas se felici cum successu instituisse dicit Paræus (a). Ne tamen ignaris detur occasio culpandi hanc intestinorum perforationem, præstat hoc clam perficere; quod facile fieri poterit. Funestus enim talis vulneris eventus aliquando adscriberetur Chirurgo, licet ex arte hoc fieri debere in tali casu satis pateat.

Si autem ne sic quidem detumescat intestinum, sola dilatio vulneris superest; quam Celsus etiam in hoc casu commendavit dicens: *Si angustius vulnus est, quam ut intestina commode refundantur, incidendum est, donec satis pateat* (b). Summa autem cautela hic opus esse facile patet, quia intestinum elapsum in loco vulneris

(a) Liv. X. Chapitre 36. pag. 256.

(b) A. Corn. Cels. Medic. Lib. VII. cap. 16.

arctissime comprimitur à peritonæo & integumentis, unde facile lædi posset. Ut hoc evitetur, specillum fulcatum introducunt in abdominis cavum, parum etiam protracto, si opus sit, intestino; tunc ut Chirurgus certus sit, intestinum non esse interceptum inter specillum & vulneris marginem, parum adhuc protrahit intestinum; deinde cultellum sulco specilli imponit, & caute discindit peritonæum: hoc facto elevat specillum una cum cultello jam in ejus sulco hærente & discindit integumenta abdominis, donec pateat satis vulneris amplitudo, ut commode intestina prolapsa refundi possint in cavum abdominis. Si vero tanta sit strangulatio intestini prolapsi, ut impossibile sit specillum fulcatum introducere, tunc indicis digiti pulpa premitur intestinum, ut parum recedat à vulneris margine, & deinde supra unguem ejusdem digiti indicis parum discinduntur integumenta & peritonæum, ut via fiat specillo fulcato introducendo.

Ut quam tutissime hoc fieri posset, pulcherrima instrumenta excogitaverunt celebres Chirurghi. Sic specillum fulcatum habetur, quod crena sua abscondit cultellum, presso e latere pro lubitu Chirurghi emergentem, cujus figura habetur apud *Heisterum* (a). Solo cultello recto, obtuso apice instructo, utebatur *Petitus*, cujus cultelli acies obtusior erat: cultellus ille perpendiculariter abdomini immergebatur, nec poterant inde lædi viscera, quia globosum habebat apicem, & vix scindere poterat; sufficiebat tamen cultelli acies, ut discindere posset tensa admodum abdominis integumenta (b). Simplicitas hujus methodi placuit multis & alii Chirurghi maluerunt prioribus uti.

Dilatato sic vulnere, repositisque intestinis elapsis, omnia illa dein fieri debent, quæ §. 311. dicta sunt.

§. 317. **S**I vulnere, suppuratione, gangræna, fistulæ intestinalis pars ablata est, pars superior se offerens, vel prudenter adducta, assuenda foramini vulneris.

Ubi autem intestinum integre dissectum est, vel per vulnus angustum exiens; nec in tempore reductum, gangræna vel suppuratione partem sui amisit, tunc continuïtas fistulæ intestinalis sublata est, & si refunderentur in cavum abdominis disjuncta extrema, facile patet, effuso chylo intestinorum in abdominis cavum, ibique accumulato & corrupto, miserrimam sequi debere & inevitabilem mortem. Idem verum est, si intestinum integrum quidem adhuc, sed jam in parte quadam gangrænosum, reponeretur: illud enim postea separari deberet, tuncque omnia eadem fierent mala. Totum fere, quod tunc habet ars, est, ut affigat externi vulneris margini discissi intestini extremum; sicque tota vita manebit hic turpis cloaca, quæ ani vicem supplebit. Separata enim intestini extrema coalescere iterum posse, ne quidem sperare quondam audebant Medici & Chirurghi, cum Hippocratis obstabat auctoritas, dicentis: *Si intestinum tenue diffecetur, non concrefcit* (c). Mira tamen observata docuerunt, non semper etiam de hac concretionem desperandum esse. Homo robustus jam ab octo annis laboraverat hernia,

(a) Institut. Chirurg. part. 2. cap. 114. tab. 24. pag. 797. Chirurgie Tom. I. pag. 119.

(b) Garengéot Traité des Operations de Chirurgie Tom. IX. pag. 161, & in Coacis Prænot. n°. 503.

(c) Aphorism. 24. Sect. VI. Charter. Tom. IX.

quæ tamen ipsi non admodum molesta fuerat; subito intumuit hernia una cum duritie summa, quam frustra cataplasmatibus emollire tentabat Chirurgus. Tandem suppurabatur tumor, illoque aperto, partem intestini putrefacti quatuor digitis longam abscidit Chirurgus; postea similis longitudinis pars intestini sponte secessit. Cum jam crederetur, quod hoc in loco apertura maneret, quæ ani vice fungeretur tota vita, præter omnem expectationem incepit minui humorum per vulnus effluxus, & triginta trium dierum spatio percuratum fuit, & sanissimus postea vixit (a). Alter casus adhuc evidentius docuit, coalescere posse intestina integre divisa. Homini hernia laboranti tubi intestinalis portio, sex pollices longitudine æquans, gangræna corrupta perierat. Filo transmissio per mesenterii partem illam, quæ intestino corrupto cohæserat, utrumque intestini extremum in vulneris apertura retinebatur hac spe, ut accrescerent vulneris margini, & extremum intestini superius ani vice fungeretur; altero extremo inutili manente: sed præter spem mensis spatio sic uniebantur hæc extrema, ut ingesta alimenta consueta via iterum per anum excernerentur: & convaluit homo, hoc tantum habens incommodi, quod, si nimium manducasset, dolore colico corripereetur, qui à vulneris loco incipiens sensim diminuebatur. Videtur autem hoc factum fuisse, quia in loco, ubi bina extrema concreverant, tubus intestinalis angustior parum erat, & firmioris substantiæ, nec tam facile cedere poterat (b). Hanc rem confirmat aliud mirabile Exemplum. Serenissimi Ducis Brunsvicensis Chirurgus aulicus *Ramdohrius* fœminæ, post herniam incarceratam sponte ruptam, insignem partem tubi intestinalis corrupti abstulit; deinde extremum superius intestini immisit inferiori extremo, & levi futura univit, & in abdomen reposuit. Ex ipsis orci faucibus erepta hæc fœmina postea sana vixit, sed post annum pleuride correpta periit; atque inciso cadavere patuit, intestini extrema inter se coaluisse. Intestina hæc una cum parte abdominis, qui accreverant, à dexterrimo Chirurgo dono data, servat Heisterus (c).

Facile autem patet, divisi intestini unionem talem fieri non posse, si bina extrema in abdomine fluctuarent; sed requiri ad hanc rem, ut cuidam parti vicinæ accreta maneant contigua. Ob hanc causam frequentius hæc unio fit in herniis, quia per abdominalem anulum duplicatum intestinum exiens contigua habebit hæc extrema, uti pulchre demonstratur, & figuris elucidatur à Celeberrimo *Morand* (d), qui ex structura partium concretionis rationem, & alia inde sequentia solidissime deducit. Ubi simul probatur, semper in loco unionis minorem esse capacitatem tubi intestinalis: quod etiam sæpius post mortem in cadaveribus illorum, qui has calamitates passi fuerant, se vidisse testatur idem Auctor. Ob hanc causam, nisi durioribus eduliis abstineant, nec nimiam ciborum copiam ingurgitent, periculum est, ne hæc in illa angustia hæreant; unde dolores acerrimi, imo sæpe ruptura loci, jam consolidati dudum: Quale Exemplum habetur fœminæ ab hac causa mortuæ, pluribus annis elapsis post integram sanationem: in cujus abdomine & ingesta alimenta, & medicamenta, effusa reperiebantur, disrupto intestino in illo loco, ubi bina extrema intestini, antea divisi, concreverant (e).

(a) Academie des Sciences l'an 1723. hist. pag. 41. &c.

(b) Ibidem pag. 44.

(c) Institut. Chirurg. part. 2. cap. 117. p. 818.

(d) Academie des Sciences l'an 1735. Mém. pag. 335. &c.

(e) Ibidem. pag. 343.

Ubi vero nulla spes est, divisa intestinalis fistulæ extrema posse simul uniri & consolidari tunc hoc solum superest, ut extremum superius, aliquando sponte in vulnere hærens, vel & prudenter illuc adductum, assuatur vulneris aperturæ, ut ibi artificialis anus tota vita maneat. Alterum extremum ligatum, ne ejus contenta hoc tempore in abdomen delabantur, tota vita manebit inutile. Sic vita servari poterit, modo tanta adhuc sit longitudo intestinalis tubi à pyloro ad anum hanc artificialem usque, ut ex ingestis alimentis sufficiens copia chyli possit sanguinem ingredi, ut inde restituantur illa, quæ inevitabili sanæ vitæ effectu quotidie de corporis substantia pereunt. Ut autem cognosci possit, quodnam ex binis extremis intestini dissecti sit illud, quod duodeno continuum superius dicitur, signa quædam habentur, à clarissimo *Littre* recensita (a). Illud enim extremum manifestum motum vermicularem habet, materia chylosa repetitis vicibus per hoc extremum exit, & illius parietes non apparent integre collapsi; vel si quandoque collabuntur, paulo post iterum elevantur à materia intestini cavo contenta, & huc propulsa. In altero autem extremo intestini dissecti, quod recto intestino continuatur, motus peristalticus deficit, nihilque exit inde, nisi in initio, vel quando convulsivo motu retrogrado ab inferioribus sursum aliquid exprimitur; quod nunquam tamen tam regulariter fit, ac in extremo superiori apparet. Illud extremum, quod duodeno continuum esse sic deprehensum fuit, tribus in locis, quæ ejus circumferentiam trifariam dividunt, unitur per futuram vulneris foramini, vel filis transmissis retinetur intestini extremum in vulneris apertura, donec ibi concreverit. Sic per artem vita servatur, sed non sine sædo satis incommodo, cum tota vita fœces hac via exire debeant. Quandoque etiam contigit, naturæ solius beneficio extremum superius intestini dissecti vulneris aperturæ accrescere. Sic *Mery* (b) in virgine viginti octo annorum, post herniam incarceratam, & gangræna corruptam, abscidit quinque pedum longitudine circiter putrefactum intestinum, & orificium superius accrescebat inguini, per quod tota vita postea fœces exhibant; satis etiam duræ & si figuratæ, si facile digerendos cibos modica copia simul assumeret. Plures tales casus occurrunt post conflictus bellicos, dum milites pugionibus bombardis impositis in adversos hostes ruunt; unde frequentia satis abdominis vulnera cum intestinorum discissione contingunt. Memini, me ante viginti circiter annos vidisse militem, cui post talem plagam dissectum intestinum colon vulneris orificio exteriori accreverat; & facile patiebatur, cum ostiatim stipem peteret, ut examinaretur intestinum, aliqua sui parte extra vulneris aperturam prominens, ubi pulchre interior superficies intestini lustrari poterat. Jam decem elapsi tunc erant anni post vulnus inflictum, & videbatur optima sanitate frui.

§. 318. **S**I omentum exierit, & humidum, calidum, rutilo sanguine rubescens adhuc est, reponendum, ut (316).

Dixerat Hippocrates (c): *si omentum excidat, necesse est putrescere*. Certe tenerissima omenti fabrica non potest diu aëris externi frigori exponi, quin vitalis humo-

(a) Académie des Sciences l'an 1700. Mémoires, pag. 394.

(b) Ibid. l'an 1701. pag. 372. 373.

(c) Aphorism. 58. Sect. VI. Charter. Tom. IX. pag. 282.

rum circuitus per hanc partem lædatur insigniter; imo sæpe integre destruitur. Unde, si fieri potest, reponendum ilico. Notandum tamen est, quod omenti membrana adeo tenuis sit, ut rudiorum pertractationem sine laceratione ferre nequeat. Unde summa hic circumspectio opus est: aliter enim rudius tractatum omentum, dum reponitur, fractis vasibus postea inflammatione, suppuratione, vel & gangræna corruptum pessima mala producere posset. Ob hanc causam potius dilatandum vulnus est, ut sine vi reponi possit. Humiditas, calor & rutilus sanguinis, per tenera vasa omenti pellucens, color docent, vitalem superesse adhuc humorum motum per omenti elapsi de vulnere substantiam.

§. 319. **S**I siccum, frigidum, lividum, ligatura, sectione, fotu; curatum reponendum est.

Ubi vero omentum diu extra vulnus hæsit, solet emori, & quidem satis cito; quod ex frigore, siccitate, & livido vel nigro colore cognoscitur. Mortuam talem partem abdomine recondere periculosum foret: illa enim postea à vivis partibus separata in abdominis cavo putresceret, & viscera omnia inticere posset. Unde voluit Celsus (a), ut, intestinis jam abdomine conditis, omentum consideretur, *ex quo, si quid jam nigri & emortui est, forscit excidi debet; si quod integrum est, leniter super intestina reduci*. Si tamen, mutato quamvis colore, aliqua spes superesse videatur, vitam redire posse in hac parte, fomentis mollissimis, & imprimis vivis animalibus dissectis impositis, fovenda est; si signa vitæ redeuntis appareant, humiditas nempe, calor, & ruber color, in abdominis cavum reponenda; sin minus, tolli debet illud, quod corruptum est. Tamen celebres Chirurghi, si leviter tantum livesceret omentum elapsum, illud reposuerunt, nec ullum inde damnum secutum fuisse testantur (b): tunc enim naturali corporis calore redibat facile vita in hac parte. Ubi autem mortua pars omenti tollenda est, tunc per partem ejus sanam filum transadigitur, deinde ligatur, & sub ligatura ad digitum circiter transversi distantiam abscinditur illud, quod corruptum est; reliquum abdomine conditur, curando, ut fili pars satis longa ex vulnere pendeat, ut separatione facta illud commode tolli posset. Neque multum mali observatum fuit talem omenti resectionem sequi. Galenus (c) quidem dixit, ablata parte omenti frigidiores fieri ventriculum, & minus recte concoquere; illudque se vidisse affirmat in gladiatore, cui vulnerato fere totum omentum abstulerat, & qui postea cogebatur assidue lanis ventrem obvolvere, ne ab externo frigore læderetur. Tamen postea numerosissimis observatis constitit, omenti ablationem hæc mala non sequi (d). Unde satis tuto tolli posse videtur. Quod etiam confirmatur, quia sæpe in cadaveribus omentum pro maxima parte deficit; licet functiones viscerum abdominalium satis integræ fuerint in talibus hominibus.

(a) Lib. VII. cap. 16. pag. 453.

(b) Dionis Cours d'Opérations de Chirurgie démonstrat. 2. pag. 73. Garengot Traité des Opérations de Chirurgie. Tom. I. pag. 120.

(c) De usu part. Lib. IV. cap. 9. Charter. Tom. IV. pag. 377.

(d) Académ. des Sciences l'an 1725. hist. pag. 13.

§. 320. **M**ISSIO sanguinis largior, clysmata in initio injecta si crassa illæsa, diætæ, blanda respiratio, quies, situs, palmaria hic remedia.

Ex hæcenus dictis quædam generalia auxilia deducuntur, quæ etiam in periculosis vulneribus abdominalibus summopere semper profuisse certis experimentis constitit. Nempe

MISSIO SANGUINIS. Nihil plus hic metuitur, quam inflammatio viscerum abdominalium, quæ post enormes dolores cito in gangrænam tendens sæpe subito necat: sed summum remedium præbet larga missio sanguinis; quæ præsentem inflammationem tollere, futuram vero præcavere efficaciter solet. Sic in hernia suffocata vix ulla remedia juvant, nisi audacissima sanguinis missione sic debilitentur vires, ut motus inflammatorii careant urgente nimis vitali impetu.

CLYSMATA &c. Si crassa intestina læsa essent, patet facile, Clysmata nocitura fore; liquidum enim sic injectum delaberetur in abdominis cavum. Ubi autem constat, hæc illæsa esse, tunc omnium maxime convenit, clysmatibus injectis duras fæces, crassis intestinis contentas, educere; ne postea vulneratus cogatur alvum duram nixu valido exprimere. Dum enim alvus exoneratur, diaphragmate deorsum preßo ob inspiratum & retentum ærem, & simul agentibus musculis abdominalibus, validissime comprimuntur omnia abdominis contenta; quæ ergo urgebunt vulneris locum; sicque intestina vel omentum exprimentur; vel dilacerabitur iterum illud, quod jam inceperat consolidari. Unde patet satis clysmatum in vulneribus abdominis utilitas.

DIÆTÆ. In generali vulnerum cura §. 192. dictum fuit, vulneratis prodesse illa imprimis alimenta, quæ blanda, nec facile putrescentia, facilis digestionis atque assimilationis essent; si parca copia simul, repetitis vicibus, sumerentur. Sed in abdominis vulneribus præterea considerandum est, sæpe læsam esse actionem illorum viscerum, quæ crudis ingestis efficacissimam mutationem imprimere debent, qua apta evadant, ut postea pulmonis & vasorum efficacia in nostram mutantur naturam; simul etiam a majori copia assumptorum ventriculum & intestina statim distendi: Unde patet, adhuc majori cautela hic opus esse. Sed præterea summi usus est hic dare talia, quæ minimam copiam crassarum fæcæ in intestinis relinquunt, cum alvi exoneratio, per clysmata prius eductis omnibus fæcibus, hic vitanda sit, quantum fieri potest. Omnibus his indicationibus nihil melius respondet, quam jusculorum ex carnibus juniorum animalium usus: Si enim omni bihorio uncie tres quatuorve sumantur, addito pauxillo succi citri, ut nimis facilis in putredinem degeneratio caveatur, sustinebitur vita, nullaque fere actione ventriculi & intestinorum opus erit ad hæc ingesta mutanda; simulque vel nullæ, vel paucissimæ saltem, in intestinis accumulabuntur fæces, unde per plures dies, imo septimanas, sine molestia alvum retinere poterunt. Panis tostus poterit immergi, vel & incoqui his jusculis; modo tollatur postea, ne fæcum copia in crassis intestinis inde augeatur. Pro potu sola aqua, modica vini quantitate addita, sufficeret. Posset tamen & panis, vel hordei aut avenæ decoctum, vel & mollissima cerevisia concedi. Lac hic vitatur, quia nimiam copiam crassarum fæcæ relinquit; uti patet in infantibus, qui, solo materno lacte licet utantur, tamen duras tenacesque admodum fæces sæpe alvo deponunt.

BLANDA RESPIRATIO, QUIES, SITUS. In singulis enim inspirationibus distenduntur muscoli abdominales, & contrahuntur iterum expirationis tempore; unde vicissim omnia abdominis contenta premuntur; quo ergo pacatior fuerit respiratio, eo minus movebuntur partes vulneratae, ergo & facilius consolidabuntur. Ob eandem causam quies hic summopere necessaria est. Situs autem talis sit, in quo commodissime diu manere poterit vulneratus; nempe ut in lectulo, erecto parum corpore, sedenti fere similis ponatur, & quantum commode fieri poterit, declive sit vulneris orificium, ut pus, sanguis &c. facillime exire possint, neque accumulentur in cavo abdominis.

Hæc sunt illa, quæ in omnibus vulneribus abdominalibus conveniunt; uti etiam post calculi sectionem vel fistularum ani. Nisi enim tunc caveatur alvi exoneratio, sæpe felicissime peractam operationem pessima mala sequuntur. Gravissima etiam vulnera abdominalia, & pessimis symptomatibus stipata, hac methodo curata fuisse felicissime, constat observatis. Unicum tale adduxisse sufficiet, cujus jam alia occasione in commentariis §. 170. n°. 5. mentio facta fuit. Maniacus homo sibi ipsi cultro octodecim vulnera infixerat abdomini, quorum octo penetrabant in cavum abdominis, & lædebant contenta viscera. Febris valida, tensio abdominis, respiratio difficilis & dolens, nausea, vomitus, diarrhœa &c. acerbam dabant prognosin, sic ut fere pro derelicto haberetur. Septies repetita Venæ sectio primis quatuor diebus; diætâ tenuissima ex solis fere jusculis carniû, additis quandoque lactuca, cichoreo, portulaca & similibus mollissimis oleribus; quies summa, lenibus emulsis diacodiatis impetrata, rara & prudentissima vulnerum deligatio, effecerunt; ut bimestri spatio à tot vulneribus incolumis emergeret non tantum, sed & mentem sanam in corpore sano haberet. Post septendecim menses iterum maniacus factus ex alto se præcipitem dedit, & ilico mortuus fuit. In cadavere cicatrices inventæ docuerunt, lobum medium hepatis læsum fuisse, uti & intestinum jejunum ac colon (*). Hæc historia docet, quantum ab hac methodo expectandum sit in periculosissimis etiam casibus.



C O N T U S A.

§. 321. **S**I durum, obtusum, corpus motu, resistantia, morsu vel pressu, multa vascula simul confregit, læsio hæc Contusio vocatur.

Contusio est solutio continui, facta in quacunque parte corporis, per instrumentum durum, cujus superficies non exit in aciem sed in obtusam quamecunque figuram. Sic enim distinguitur à vulnere, quod est solutio continui, acuto instrumento vulnerante facta. Unde contusio, cæteris paribus, semper ampliorem locum occupat, quam vulnus, quia instrumentum lædens majori superficie corpori applicatur. Facile jam patet, effectum fore eundem, sive obtusum corpus motum

(*) Academie des Sciences l'an 1705. Mém. pag. 40. &c.

impingat corporis parti, sive pars corporis mota duro obtuso obstaculo quiescenti occurrat, sive gravitate sua obtusum corpus partem nostri corporis prelserit, aut mordendo corporis pars quædam contrita fuerit.

§. 322. **C**UJUS idea, accumulatio vulnuscule cum attritu solidorum, & vasculorum.

In loco contuso tot possunt concipi vulnuscula, quot sunt partes læsæ in toto contusionis ambitu; unde minimorum vulnuscule, sibi invicem adjacentium, aggregatum dat ideam contusionis. Sic v. g. si arteria novacula discinderetur, vulnus esset: si innumeris juxta se mutuo quam proxime positis sectionibus divideretur, repræsenteret fere talis arteriæ contusionem. Solidæ autem partes duræ & resistentes a causa contundente atteruntur & comminuantur in minima fragmentula. V. g. si os brachii à quacunque causa rumpitur in binas partes, dicitur fractura, si autem comminuat in minima fragmenta, contusio vocatur.

§. 323. **E**FFECTUS ergo, solutio continui lacerans, destructio plurium conterens, effusio liquoris in inania vicina, vel facta, & infinita mala, quæ ex his sequi possunt. Contusis, fractisque costis emphysema lethale. Mem. Ac. R. Sc. 1713. 119.

SOLUTIO CONTINUI LACERANS. Dilaceratio dicitur, quando partes molles corporis distrahendo franguntur; & talis distractio in omni contusione adest, & per hanc distinguitur à vulnere, in quo etiam quidem adest continui solutio, sed non adest illa dilaceratio; cum instrumento acuto vulnus iussigatur. Potest quidem contusio vulnus comitari, sed tunc compositus morbus est.

DESTRUCTIO PLURIUM CONTERENS. In vulnere aderat simplex divisio partium, quæ ante cohererant; unde tam felix sæpe etiam maximorum vulnorum cura, dum partes divisæ contiguæ iterum factæ concredebant. Sed in contusione sæpe sic conteruntur partes, ut vitali earundem fabrica destructa impossibile sit, iterum uniri has posse vicinis; unde requiritur ad curationem separatio horum omnium, quia omni vitali humorum influxu orbata mortua sunt, & instar heterogenei corporis sua interpositione vivarum partium adjacentium unionem impediunt. Ideo Hippocrates (a) merito dixit, *carnes contusas necessario in pus versas tabescere*. Unde celerrime movendam suppurationem hic voluit.

EFFUSIO LIQUORIS IN INANIA VICINA, VEL FACTA. Fractis vasis, liquida his contenta effluunt, & deponuntur in loca aliena. Totum corpus cavis plenum esse dicere ausus fuit Hippocrates (b): *Omne enim non concretum, sive cute, sive carne tegatur, cavum est. Impletur autem sanum quidem spiritu, agrotum vero ichore*. Unde effusi humores ubique locum invenient in cavis illis majoribus aut minoribus corporis. Nullum enim fere vas, nulla muscoli tendinisve fibra observatur in corpore, quin hæreant in membrana facillime dilatabili, cellulis pluri-

(a) De Ulceribus cap. 2. Charter. Tom. I. XII. pag. 131. (b) De Arte cap. 8. Charter. Tom II. pag. 130.

mis cum se mutuo communicantibus constante : minora ergo hæc cava per omne corpus dispersa hærent, & poterunt repleri humoribus ex fractis vasis effusis. De majoribus autem cavis, ventriculis nempe cerebri thoracis cavo, pulmonum tracheis & vesiculis, pericardio, abdomine, ventriculo &c. res facile patet. Sed non tantum humores effusi naturalia corporis cava majora & minora replere poterunt, sed iidem accumulati poterunt distendendo remove partes, quæ prius contiguæ fuerant, sicque novas cavitates facere, vel naturalium cavorum magnitudinem augere immaniter. Dum v. g. post validam contusionem capitis, fractis vasis duræ matris, sanguis effusus inter hanc & cranium colligitur, dura mater à cranio, cui antè arcte cohærebat, separatur; sicque novum nascitur cavum, quod non adfuerat.

ET INFINITA MALA &c. Omnia illa mala, quæ contusionem sequuntur, ad tria capita possunt reduci : Vel enim fiunt inde, quod, destructis solidis, & effusis humoribus, tollantur illæ functiones, quæ à determinato motu fluidorum per vasa integra pendent : Vel oriuntur, quod effusi humores, in cavis corporis naturalibus vel præternaturalibus collecti, mole sua premant partes vicinas, illarumque functiones tollant omnino, vel turbent saltem : Vel denique iidem humores effusi, mora & stagnatione corrupti, talem possunt acquirere acrimoniam, qua partes circumpositas rodere & destruere possint. Si jam hæc tria applicentur singulis partibus corporis, patet, infinita inde posse fieri mala, quorum enumeratio impossibilis foret : sufficit generales horum malorum fontes indicasse. Exemplum, quod hic adfertur ex Academiæ Regiæ Scientiarum monumentis, docet, mirabilia, nec facile vel à peritissimis prævidenda, mala validas contusiones sæpe sequi. Homini enim sexagenario, carpenti rotis supra pectus ejus transeuntibus, contusæ & fractæ fuerant costæ, sic ut costæ fragmentum extimam pulmonum membranam leviter tantum dilacerasset; unde aeris inspirati pars elapsa per hoc vulnusculum se tunicæ cellulosæ insinuabat, & mirabili Emphysemate totam fere corporis superficiem inflabat : sicque miser homo quarta die suffocabatur. Flatulentum talem tumorem post contusiones oriri circa costas jam notaverat Paræus (a), licet hujus rei causam non adeo intellexisse videatur. Plurima alia occurrunt passim apud Observatores exempla, quæ docent, validam contusionem, licet nulla læsio in externis partibus appareret, sæpe fregisse hepar, lienem &c. unde subita mors. Imo aliquando observatum fuit, validas contusiones, licet in externis nec internis partibus aliquid notabilis damni appareret, tamen subitam mortem induxisse. Videantur illa, quæ de hac re dicta sunt in commentariis §. 274. Et apud *Bohnius* (b) memorabilis talis casus habetur. Homini lapis aliquot librarum valido jactu hypogastrico dextro impingitur, unde subito concidens expiravit. Dum Prætoris jussu defuncti cadaver lustrat *Bohnius*, nec in integumentis, nec in visceribus aut vasis, ullam læsionem invenit, nisi quod in diaphragmatis illo loco, ubi costis nothis ejusdem lateris contiguum est, aliquam contusionem & sugillationem viderit, quæ tamen ambitu suo vix dimidiam nummi imperialis magnitudinem æquaret.

(a) Lib. XII. chap. 6. pag. 293.

(b) De Renunciatione vulnerum pag. 17.

§. 324. **P**ESSIMUM vero ex his (323.), si, integumentis co-
hærentibus, interiora sic affecta (321. 322. 323.), ut
liquida itagnent, coëant, putrescant, unde ecchymosis, aneurisma
spurium, sugillatio, ulcus, gangræna, caries, in glandulis scirrhus;
cancer.

Cutis tenax & valide cohærens non tam facile obtuso instrumento rumpitur :
vasa, cuti supposita, per panniculum adiposum decurrentia, longe teneriora sunt,
& facilius franguntur. Sic si quis malleo digitum percusserit, cutis manebit ple-
rumque integra, & tamen macula nigra, ab effuso fractis vasis sub integra cu-
te sanguine, locum contusum deturpat. Omnium maxime, si vasa cuti supposita
à caula contundente ad durum os subjectum atterantur; unde tam vasti & su-
biti tumores fiunt, dum caput duro obstaculo impingitur. Sed humores sic ruptis
vasis effusi, integra cute coerciti, in membrana cellulosa accumulatur, stagnant,
ideoque coagulantur; tandemque & putrescere possunt, licet hoc tardius fiat, si
nullus aëri externo accessus detur. Varia quidem inde oriri possunt damna, quæ
tamen imprimis referri possunt ad sequentia.

ECCHYMOSIS. Est effusio humorum extra vasa sua sub integumentis, cu-
jus definitio habetur apud Aeginetam (a): *Carne contusa à quodam gravi illapso, & parvis in illa venulis divulsis sanguis profunditur per diapadesin: qui, ubi col-
ligitur sub cute, facit illud, quod vocatur ecchymoma. Non divulsa cute sicut tumor
mollis tactui cedens sequatur, lividus & indolens ut plurimum.* Sic & Galenus (b)
ecchymosin esse dixit, quando sanguis in spatia, quæ vasis circumjacent, effun-
ditur. Et alibi (c): Quum contusa caro in eam, quæ sub cute est, regionem san-
guinem profundit, ille affectus suffusio (ἐκχύμωσις) vocatur.

ANEURUSMA SPURIUM. Quando nempe, majori arteria lassa, mag-
na copia sanguinis effusi in panniculo adiposo sub cute colligitur: de quo vide com-
mentaria in §. 178. Unde minoribus vasis ruptis, si modica copia sanguinis sub
cute integra colligatur, dicitur ecchymosis: si autem insigni vase fracto disten-
datur cutis sanguine extravasato, vocatur Aneurisma spurium.

SUGILLATIO. Quando minuitur, vel & integre fere tollitur, pressio atmo-
sphæræ in superficiem corporis in quodam loco, siue sugendo hoc fiat, siue cu-
curbitis impositis; sanguis in hæc loca minus pressa ruit, vasa distendit, & ingre-
ditur minora vasa dilatata, in quibus naturaliter non erat sanguis ruber, & in
his vasis impactus hærens sæpe retrogredi nequit; hinc macula rubra, livida,
imo sæpe fere nigra fit. Unde sugillatio dicitur talis macula post suctum partis cu-
jusdam relicta. Dum vero v. g. malleo percutitur pars corporis, vasis sanguineis
compressis subito per hunc ictum, poterit sanguis pelli in serosa & lymphatica
vasa, & talem maculam facere colore mutato insignem. Differret ergo sugilla-
tio ab Ecchymosi, quod in Ecchymosi ruptis vasis sanguis in vicina spatia ef-
funderetur, in sugillatione autem sanguis valida pressione ingreditur vasa aliena,

(a) Lib. IV. cap. 30. pag. 66. versa.

(b) In Commentar. in Aphor. 10. Sect. VI.
Charter, Tom. IX. pag. 259.

(c) Commentar. 1. in librum Hippocrat. de
Medici officina text. 31. Charter. Tom. XII,
pag. 98.

integra tamen; unde etiam sugillatio potius in vicinia, quam in ipso loco contusio, hæret. Patet autem facile, ecchymosin & sugillationem sæpe se mutuo comitari post validas contusiones, unde etiam frequenter apud auctores hæc vocabula confunduntur.

ULCUS, GANGRÆNA. Si nempe humores effusi, stagnando corrupti, vicina inflamment, vel erodant. Imo aliquando, distenta nimis ab effusis humoribus tunica cellulosa, nascitur suffocatio; unde gangræna & pessima putredo sequi possunt.

CARIES. Si nempe mala recensita ad os usque perungere potuerint.

IN GLANDULIS SCIIRRHUS, CANCER. Cum ex Anatomicis constet, glandulas innumeris arterioliis constare, quarum varia dispositione ab arteriolo sanguine separatur tenuior liquor, qui collectus per illarum emissaria exit, patet, contusione læsis his partibus, sic posse destrui hæc vascula, vel comprimi aut obstrui glandularum emissaria, ut liber denegetur exitus secretis per arteriosam glandularum fabricam humoribus; unde stagnatione, & liquidioris partis exhalatione vel resorptione in minimas venulas, nascitur inspissatio liquidi secreti, & fit tumor durus, vix resolubilis, indolens, quem scirrhum vocaverunt Medici; cui tumori jam inveterato, durissimo & scabro, si dolor accesserit, cancer dicitur.

§. 325. **L**ÆDIT sæpe ossa, tumque sequuntur descripta (249. 250. 251. 254. 256. 257.), & medullæ læsio, unde ulcera, fistulæ, caries, putredines, habet se enim medulla in ossibus, ut Cerebrum in cranio (273. 274.).

Quando contusio ossa ipsa affecerit, vasa, quæ inter lamellas, ossis fabricam constituentes, decurrunt, possunt comprimi, vel & penitus destrui; unde vitalis influxus humorum in has lamellas tollitur: quæ ergo mortuæ separari debebunt à vivis partibus subjectis. Poterit jam hoc malum sensim proferpere per totam ossis substantiam, uti explicatum fuit in paragraphis hic citatis, quando de læsione varia calvariæ ossæ agebatur.

ET MEDULLÆ LÆSIO &c. Maxime metuendum hoc malum in ossium contusionibus: majorum enim ossium cavis medulla reconditur, similisque substantia inter cellulas osseas dispersa hæret. Uti autem cerebrum osseo tegmine tuto defenditur, sic & medulla in cavo osse latet: cerebrum peculiari membrana regitur, pia matre nempe, quæ vasa ejus substantiam ingressura excipit & ordinat; ita etiam medulla tenerrima regitur membrana, in similes usus. Vasa piæ matris arteriosa, depositis suis tunicis crassioribus, tenerrima apparent; idem & in vasis ad medullæ substantiam pergentibus verum est: sic ut medullam, ex osse femoris annosi bovius desumptam, digitis facillime in oleosum quasi liquamen quis conterere possit, licet innumeris arteriis irrigari hanc medullam constet. Uti jam fîsso, fracto vel contuso cranio, vitia nata ab effusis humoribus, vel iisdem corruptis, ipsum encephalon inficere poterant, sic etiam ossis læsiones ipsi medullæ contentæ nocere poterunt. Sed valida concussione capitis, integra quamvis manente calvaria, tenerrima encephali vasa destrui poterant; idem & in medulla obtinere facile patet, si os medullam continens valido percutiatur ictu. Ubi autem medullæ va-

Q q q ij

sa tenerrima vitio regentis ossis his communicato, vel alia quacumque causa læsa fuerint, stagnabit oleum medullare fractis vasis effusum, rancidam pessimam acrimoniam acquireret, vicina omnia erodet, os ipsum cariosum reddet; unde ulcera pessima & vix sanabilia, fistulæ pertinacissimæ non curabiles, nisi depurari possit medullosum illud corruptum; putredo oleosa pessima omnia depascens, & infinita alia mala nascentur, de quibus postea dicetur in morbis ossium. §. 326.

§. 326. **T**UM aliquando musculos, unde validæ suppurationes, gangrænæ, paralyse, contracturæ. Si autem magnos nervos, qui multos emittunt ramos, corrumpit contusio, tum paralytis, atrophia, insensibilitas, atque certa fiet, nec curabilis ulla arte, gangræna inferiorum, quæ imprimis vera de spina dorsi, ejusque contenta medulla.

MUSCULOS. Constat hodierna Anatome, musculum quemcumque visibilem posse separari in minores fibrarum muscularium fasciculos, neque hætenus etiam per microscopia inventus fuit finis: nunquam enim singularem muscularem fibræ quis vidit, semper tantum plures fibras collectas simul. Fibrarum muscularium illi fasciculi membrana tenui cellulosa investiuntur, quæ subtile pingue in se habet lubricandis his fibris inserviens. Arteriæ autem numerosissimæ inter fasciculorum horum interstitia, & in membrana cellulosa, illis interposita, decurrunt; uti injectiones Ruyschianæ demonstraverunt, sic ut fere totam musculi substantiam constituere videantur. His arteriis similes venulæ comites per musculi substantiam disperguntur, uti & nervi. Musculo ergo contuso, frangi poterunt hæc vasa, effundi humores, in membranæ cellulosæ cava, ibi colligi, & vasa vicina comprimere: poterunt extravasata liquida corrumpi, & acrimonia acquisita rodere illas partes, quas tangunt; unde inflammatio, suppuratio, gangræna & reliqua inde oriunda mala fieri poterunt. Suppurationes autem ab hac causa ortæ omnium pessimæ sunt, quia pus factum in membrana tenerrima cellulosa, musculares fibras investiente, miras vias inveniet, & per omnes anfractus hujus membranæ prorepere poterit, sicque pessimos sinus & fistulas facere. Accedit, quod per diuturnam suppurationem consumpta tunica hac cellulosa, quæ fasciculos fibrarum, & forte ipsas fibras ultimas musculares, à se mutuo distinguit, hæc concresecunt inter se; unde tollitur libera expansio harum fibrarum per illas causas, quæ musculos agentes distendunt, depravabitur muscularis actio, vel & integre tollitur. Sed & ipsæ fibræ musculares, proprie sic dictæ, valida contusione poterunt destitui; unde motus muscularis, harum fibrarum integritatem requirens, cessabit, & fiet paralytis musculi, id est impotentia exercendi motus una cum musculi affecti flexili laxitate. Sed etiam poterit inde oriri contractura, quando per validam suppurationem destructa membrana cellulosa, fibras musculares distinguente, illæ concresecunt inter se, & tenuissimis etiam humoribus impervix fiunt; unde sensim accurtantur, & nulla vi amplius distrahi possunt: hinc membrorum contracturæ mirabiles fieri poterunt: uti etiam ex eo, quod musculi cujusdam actione destructa, ejus antagonista prævaleat, & membrum, cui affigitur, versus suam originem trahat continuo, unde illud tandem

dem obrigescit: & ideo toties diuturnam paralyfim contractura fequitur.

Ubi autem à contulione quædam fibræ musculares ruptæ fuerunt, sic tamen, ut inde actio musculi non tollatur, tunc videtur adesse illud malum, satis dolorificum, quod veteres Medici (σπάσμα) vulsionem, vel & (ρήγμα) rupturam dixerunt. Galenus (a) de contusione agens dicit: *Manifestum autem, quod parva vena una cum carne dividuntur in suffusionum (ἐκχυμώματα) generatione. Vulsiones (σπάσματα) autem fiunt circa fibras musculorum amplius distentas, ut nonnullæ rumpantur, & vocant proprie juniores Medici hos affectus rupturas (ρήγματα). Horum autem primus Hippocrates meminit &c.* Rupturas autem illas sic descripsit Hippocrates (b): *Quibusdam autem, cum imbecilles in carnibus aut venis vulsiones factæ fuerint, non suppurantur, sed diuturni fiunt dolores, & vocant rptiones (ρήματα).*

Et in fine ejusdem Capituli addit sequentia: *Fiunt enim vulsiones à laboribus, & casibus, & à plaga, & si quis onus majus tollat, & à cursibus, & luctu & ejusmodi omnibus.* De his etiam videtur dixisse in Coacis Prænotionibus (c): *Vulsiones omnes quidem molesta fiunt, & dolores in initio intensos producant, & in posterum aliquos commonefaciunt, difficillima autem circa thoracem & maxime periculosa.* Notandum, quod in versione σπάσματα reddiderint convulsiones, sed male uti videtur, cum: σπασμοὶ hæ vocentur. Difficiliter autem adunari iterum divisas sic musculorum fibrillas, monet Galenus (d): *Hæc enim erat ejus opinio, quod satis facile coalesceret rupta caro, si ecchymoma cito discuteretur: ubi vero longiori tempore hoc fieret, tunc sordes collectæ inter fibras divulsas se interponerent, & impedirent adunationem.* Unde à majori, fatigatione, febre, alimentorum minus debita concoctione, & similibus causis, recrudescebat dolor. An non tale quid adesse videtur, dum post validos nixus, pondera graviora in altum sublata &c. dolores acerrimi & subitanei oriuntur, qui sæpe diutissime torquent, & à minimo motu corporis exacerbantur? Certe talibus doloribus absolutam corporis quietem summum remedium esse, constat experimentis: & in pectoris aut dorsii rptionibus curandis jussit Hippocrates, (e) ut per annum à labore abstineretur: & alibi (f), postquam hoc malum ab immodico labore fieri dixerat, monet, quietem corporis summopere necessariam esse; aliter enim morbus revertitur, tuncque magis, quam in initio, lædit.

SI AUTEM MAGNOS NERVOS &c. Si considerentur nervi in sua origine ex medulla oblongata, vel spinali, patet illos mollissimos esse. Si spectentur in illis locis nervorum extrema, ubi involucris suis depositis constituunt illud organum corporeum, à cujus mutatione per objecta externa novæ nascuntur per sensus in mente ideæ, quam tenera apparent! Mollissima nervi acoustici pulpa, retina oculi statim collabens in mucum informem, nisi æquabili pressione liquidi ambientis sustineatur, evidentissime hoc docent. Tenerrima autem hæc stamina nervosa ex loco suæ originis ad extremas etiam corporis partes tuto deferuntur tenacibus vaginis defensa. Si ergo nervus major in hoc itinere contundatur, poterit lædi,

(a) Commentar. 3. in librum Hippocrat. de Medici officina Text. 31. Charter. Tom. XII. pag. 98.

(b) De Morbis Lib. I. cap. 8. Charter. Tom. VII. pag. 541. 542.

(c) N. 425. Charter. Tom. VIII. pag. 877.

(d) Method. Medend. Lib. IV. cap. ultimo Charter. Tom. X. pag. 102.

(e) De Morbis Lib. II. cap. 14. Charter. Tom. VII. pag. 56.

(f) De Internis affectionibus cap. 9. Charter. Tom. VII. pag. 64.

imo destrui pulposa illa mollissima substantia, licet involucra nervi appareant illaesa; adeoque tolli omnes illarum functiones, quae à nervorum, in majori hoc nervo collectorum, integritate pendent. Patuit hoc in experimento *Valsalva*, citato in commentario §. 276. n°. 5. Dum enim cani nervos cardiacos filo constrinxit arcte, & mox iterum solvit ligaturam, periit hoc animal post aliquot dies eodem modo, ac si nervi illi abscissi fuissent; & post mortem tamen nulla sensibilis lætio in his nervis apparuit. Ligatura nempe sic compresserat ipsam pulposam nerveam substantiam, ut liber spirituum influxus per hos nervos penitus interceperetur.

Quare autem post nervum majorem destructum, & imprimis sic læsa medulla spinali, sequatur nulla arte curabilis gangræna, dictum fuit in commentariis §. 162. & ibidem casus memorabiles allegati fuerunt, qui hanc rem confirmant.

§. 327. **I**M O sæpe ipsa viscera corrumpit, tumque horum inflammatio, suppuratio, gangræna, scirrhus, functio læsa.

Quanta mala fiant aliquando post validas capitis contusiones, ipso cerebro etiam inde læso, dictum fuit in vulnerum capitis historia. Pectoris cavis contenta viscera tuto reconduntur arcuatis costis, sterni, & spina dorsi, undique defensa: tamen mirabilis casus, §. 323. recensitus, docuit, aliquando à contusionibus & hæc viscera lædi posse, dum costæ fragmentum extimam pulmonis membranam laceraverat; unde mirabile illud Emphysema, & mors sequebantur. Abdominis viscera facilius contusionibus lædi possunt, cum mollibus tegumentis pro maxima sui parte tegatur abdomen: Lien tamen, & maxima hepatis pars, costis spuris defenduntur. Contusionibus tamen validis hæc viscera aliquando lisa fuisse, cum morte subita inde secuta, patuit observationibus Medicis recensitis §. 170. n°. 3. Neque hoc mirum videbitur, si consideretur, hepar & lienem adeo tenera esse, ut non nisi cum prudentia possint integra eximi de cadavere. Unde validæ abdominis contusiones toties adeo subito lethales fuerunt. Narrat Paræus (a), quod, dum bini pugiles certarent, quorum unus parvæ staturæ, sed robustus & quadratus, alterum procerum valde in terram projiceret, ille iratusprehendit postea adversarium, & cubito cordis scrobiculo innitens toto pondere sui corporis, prosternens miserum occidit illico. In cadavere copia maxima sanguinis effusi inveniebatur in thoracis æque ac abdominis cavo. Innumera apud auctores occurrunt observata, quibus constat, validis contusionibus sic læsa fuisse varia viscera, ut inde mors vel pessima mala secuta fuerint. Frangi enim sic possunt vasa, & effundi humores, qui extravasati & corrupti vicinas partes rodendo iterum pessima mala excitare poterunt. Inde enim inflammatio & omnes ejus sequelæ, suppuratio nempe, gangræna &c. sequi poterunt. Et cum à vasorum integritate, & debito fluidorum per hæc motu, omnes viscerum functiones pendeant, patet iterum, & illas lædi, imo integre aboleri posse.

(a) Œuvres d'Ambroise Paré, Apologie & Voyages pag. 78;

§. 328. **E**X quibus (322. 323. 324. 325. 326. 327.) facilis est explicatio tot mirabilium & miserabilium malorum, quæ ex contusione (324.) sequi solent, prædici possunt, tam Acuta, quam Chronica, certe infinita.

Si jam illa, quæ dicta sunt §. 322. de contusionis idea, uti & effectus inseparabiles omnis contusionis recensiti §. 323. applicentur diversis corporis partibus, quæ contusione lædi possunt, patebit statim, quænam timenda sint mala; poteruntque illa tuto prædici ex cognitis partium corporis fabrica & usu. V. g. si quis lapsu impegerit duro obtuso obstaculo hypochondrium dextrum, & paulo post insignis flavedo in oculis & cute appareat; cognoscitur, bilem retropressam sanguinis massam infecisse, vesiculæ ergo fellis regionem, & ipsum hepar, contusione læsa fuisse. Si jam consideretur, hepatis substantiam adeo teneram esse, ut spongiam sanguine plenam referat, summus metus est, ne fractis valis in cavum abdominis sanguinis magna copta effluat; unde convulsionem, animi deliquia, & mors ipsa sæpe brevi sequetur. Si vero levius malum fuerit, & minora tantum per hepatis substantiam dispersa vasa fracta sint, effusi humores premendo vicina vasa, vel corruptela nata rodendo, poterunt inflammationem, suppurationem, scirrhum &c. in hoc viscere producere, unde lenta, post summas miseras toleratas, mors sequetur. Si valida contusio lumborum regionem læserit, & mictus cruentus sequatur, novimus renum vascula fracta esse; unde iterum pessima fient sæpe mala. Sanguinis enim coagulati thrombi, in pelvis & ureteris angustias delapsi, poterunt intercipere omnem transitum urinæ ex renibus in vesicam; unde renum inflammatio, ischuria &c. sequentur. Imo parvulus grumus sanguinis hic relictus basim poterit dare, cui circumaccrescet calculus; unde iterum nova malorum origo. Si jam cogitetur, in aliis visceribus idem malum accidere posse, patebit facile, innumera sequi posse mala, quæ vel cito necabunt, effusis humoribus, vel destructa fabrica partium, quarum integritas ad vitam absolute requiritur, aut læsis functionibus quibusdam vita quidem manebit, sed à sanitate multum deficiens; unde chronici quam maxime, & sæpe simul nulla arte superabiles, morbi orientur. Tristis casus hoc docuit in strenuo belli. Duce, cui, dum feroci vectus equo in adversos ruit hostes, accidit, ut equus vulneratus subito se crexerit, unde ephippii nodus validissime ventriculi regioni allidebatur. Statim sequebatur copiosus sanguinis vomitus; cumque nobilis vir non satis servaret moderatum vitæ regimen, & strenue debaccharetur, imo omnino negligeret tam grave malum, diu quidem supervixit, sed tota vita enormes dolores ventriculi passus fuit, postea vomitum molestissimum, dysenteriam &c. donec tandem tot miseriis mors finem imponeret. In cadavere hepatis magna pars, & totum pancreas canerosa inventa fuerunt. Sic pessima mala fiunt a testiculorum contusionibus: Vidi testem scirrhosum ab hac causa factum, imprudenter dein emollientibus & suppurantibus tractatum in tam enormem molem excrevisse, ut scrotum una cum testiculo incluso genu ejusdem lateris proxime attingeret; qui deinde horrendo cancro exedebatur, & post diras calamitates mortem induxit in corpore cæteroquin sanissimo.

§. 329. **C**OGNOSCITUR præsens, simulque detegitur affecta pars 1. conspectu, tactuque. 2. Effectu doloris, stuporis, gravitatis, coloris mutati in rubrum, fuscum, plumbeum, nigrum, flavum, viridem, hæmorrhagiæ, gangrænæ, (323. 324. 325. 326. 327.) 3. Comparatione causæ motæ, figuratæ, cum parte læsa.

In hac paragrapho agitur de illis signis, quibus cognoscitur, contusionem adesse, & simul detegitur pars affecta.

1. Fractis enim vasis sub cute integra, effusi humores panniculum adiposum replent & distendunt, unde tumor & mollicies partis contusæ conspectu & tactu deteguntur, omnium maxime in capitis contusionibus, quia durum calvariæ os suppositum facit, ut effusi humores cutim magis elevent, unde tam enormes sæpe a contusionibus tumores hic tam subito oriuntur. Quod eleganter expressit *Terentius* (4), ubi pro meritis suis pessime ab adolescente mulctatus leno dicit :

— — — omnes dentes labefecit mihi !
Præterea colaphis tuber est totum caput.

2. Dolor fere in omni contusione adest : ubi autem validissima contusio fero destruxit omnia vasa, tunc vel nullus, vel admodum obtusus dolor est ; sed tunc adest stupor & gravitatis sensus in parte affecta, quæ denotant nervos sentientes in parte contusa destructos esse, vel ab effusis humoribus, aut à causa contundente sic compressos, ut non sentiant. Cum autem sub cute, plerumque integra, colligatur effusus sanguis, mutatur color partis contusæ pro varia quantitate effusi cruoris, uti & pro vario tempore eiapso post contusionem factam. Levem enim contusionem ruber color sequitur, minoribus vasis fractis pauculum sanguinis fundentibus ; qui tamen post aliquot horas jam magis obscurus fiet & ad nigredinem verget. Post validam contusionem sæpe cito partis affectæ color mutatur in plumbeum, lividum, imo sæpe nigrescentem, dum concretus cruor sub integra cute magna copia hæret. Et licet in initio ruber color fuerit, tamen postea, distillata vel resorpta parte tenuissima sanguinis extravasati, residuum nigrescit. Nec tamen nimis tenere debet plumbeus ille & lividus color partis contusæ ; non enim semper gangrænæ est indicium : quod facile distinguitur, quia, si à gangræna pars liveat, frigus, & elevata epidermidis bullulæ, ichore plenæ, discrimen faciunt. Ubi concretus cruor incipit resolvi sensim & dissipari, tunc plumbeus ille vel & niger color sensim dilucior fit, incipitque in rubedinem vergere, & circa margines loci contuli flavus, vel & leviter viridescens, color apparet, parte rubra sanguinis sensim resoluta & dissipata : quod designat, extravasatos humores & concretos incipere dissolvi. Notum est, dum sanguis de vena mittitur hominis sani, quod paulo post separetur in binas partes, serum nempe limpidum flavescens, & partem rubram concretam huic sero innatantem. Si omne serum effundatur, post paucas horas iterum notabilis copia apparet, immixta sensim parte rubra concreta, & in serum deliquescente : sic ut, sæpius ef-

(4) *Adelph. Act. 1. Scen. 2. Versu, 6.*

fundendo

fundendo serum, tandem tota pars rubra concreta fere evanescat. Idem videtur & hic obtinere in contusionibus, quod nempe concretus cruor sensim resolvatur in serum tenuius, unde illa mutatio coloris in loco contuso, quando incipit fieri attenuatio & dissipatio extravasati sanguinis. Pulchre hoc notavit Hippocrates (a), ubi de calcanei fractura agit. Inter optima enim signa, & quæ omnem metum recidivæ tollunt, numerat, si *suffusiones* (ἰσχυράματα) & *nigredines*, & *circumambientia loca subviridescant, sine duritie. Optimum illud testimonium in omni suffusione* &c.

Nisi autem simul satis patulo vulnere cutis divisa fuerit, raro contusionem valida Hæmorrhagia sequitur: sanguis enim fractis vasis exiens, in panniculo adiposo collectus, grumescit, & viam occludit sanguini egressuro. Sed si viscera, vel vasa majora, contusione læsa fuerint, poterit ingens copia sanguinis in cava corporis ire: uti v. g. si hepar sic læsum fuerit: sed tunc pallor, frigus extremorum, debilitas summa, syncope &c. internam talem hæmorrhagiam satis designant. Ubi autem per validam contusionem sic destructa sunt omnia vasa in parte quadam corporis, ut omnis influxus & effluxus humorum in hac parte tollatur, tunc gangræna adest, sive mors partis.

3. Si novimus corpus durum, obtusum, motum, impegisse parti corporis, vel partem corporis motam offendisse ad durum obtusum tale obstaculum, scimus contusionem adesse. Unde & vulnera, nisi acutum fuerit instrumentum vulnerans, sæpe comitatur contusio. Simul & indoles & situs partis læsæ consideranda sunt: sic v. g. viscera thoracis non facile contusionibus læduntur, viscera abdominis vero facilius &c.

§. 330. **E**T bene scitur 1. internam, magnam nobilium viscerum contusionem curatu impossibilem, morborum causam & mortis esse 2. ossium valde periculosa, curatu difficilem, imprimis circa juncturas, & medullam, 3. Cranii pessimam, ut historia præmissa docuit, ob viciniam Cerebri; 4. Glandularum majorum, ad aures, axillas, mammas, pancreas, inguina, uterum, minitari scirrhus, caneros, & mala inde sequentia.

Quænam prognosis ex cognita parte læsa per contusionem habeatur, patet per sequentia.

1. Vel enim fractis vasis lethalis nec compescenda hæmorrhagia sequetur, vel contusæ partes debebunt suppurando separari à partibus sanis, uti Hippocrates in loco allegato in commentariis §. 323. monuerat; sed à suppurationibus internis viscerum tabes frequentissime oritur, quæ lenta morte miseros perimit. Præterea, cum singula viscera suam symbolam conferant ad sanitatem perfectam, post suppurationem sæpe sic turbabitur visceris læsi functio, ut vita quidem supersit, sed morbosa, & misera. Cum autem tales lationes per contusionem imprimis in hepate & liene frequentius obtineant, ob friabilitatem magnam horum viscerum, patet facile, pessima quævis exspectanda esse, & curam fore difficillimam.

(a) De Fracturis Textu 30. & 31. Charter. Tom. XII. pag. 205.

mam, imo rarissime integram sanitatem restitui posse, cum fere semper scirrhusi quid remaneat tota vita, quod functionem visceris læsi turbabit.

2. Fractis enim vasis, quæ ossis lamellis vitam & nutrimentum præbent, illæ morientur & separari debebunt: si vero fiat talis contusio in majoribus imprimis ossibus circa juncturas, nulla fere separatio sperari potest: in his enim locis lamellæ ossæ à se mutuo secedunt, & cellulas formant, in quibus vasa numerosissima sanguinea, uti & talia, quæ oleum tenuissimum continent; quæ ergo destruentur, & effusi humores stagnantes pessime corrumpentur: unde caries ossis, & omnia, quæ inde sequi poterunt mala. Si vero medulla ipsa sic læsa fuerit, pessima mutatio in rancidam acrimoniam, ossis erosio, incumbentium omnium corruptio &c. sequuntur. Confer illa, quæ dicta sunt in commentariis §. 325. Accedit, quod circa juncturas ossa contundi non possint, quin simul lædantur ligamenta, quæ ossa articulata nectunt; unde dolores summi, anchyloses &c. fieri possunt.

3. De hac re dictum fuit in vulnere capitis historia.

4. Confer illa, quæ dicta sunt in commentariis §. 324. In omnibus autem locis hic recensitis insignes glandulæ locantur, à quarum contusione pessima mala sæpe sequuntur. Ex decem casibus scirrhus mammarum & cancer novies forte à contusione oritur. Vidi sic miseram mulierem, cui in eodem lecto dormiens filia cubito mammam contuderat, (dum somnolenta toto pondere corporis sui mammæ matris inuitebatur, corpus circumvertere tentans) paucarum septimanarum spatio habuit se totam mammam scirrhosam & mole immaniter auctam, quæ postea in horrendum cancerum degeneravit. Similia mala circa parotides, glandulas axillares, & inguinales observata fuerunt à contusione orta fuisse. Uterus vero in non imprægnatis mulieribus pelvi ossea undique satis tuto defenditur, unde non facile contundi potest; sed in gravidis, supra ossa pubis fundo suo assurgens, facile lædi poterit; uti & ab imprudenti obstetricis contrectatione, vel & à partu difficili; post quem toties uteri scirrhi, in cancrosa ulcera degenerantes, observati fuerunt.

§. 331. **I**N curatione contusi semper tentanda resolutio, cavenda suppuratio, magis vero gangræna.

Cum in contusione solidæ corporis partes attritæ & ruptæ sint, & liquida effusa occupent loca aliena, ad curationem requiritur, ut tollantur extravasati humores, & uniantur partes solidæ nunc separatæ. Omnium felicissime hoc obtinebitur, si concretis humoribus reddatur fluiditas: tunc enim vasis bibulis resorpti movebuntur cum reliquis humoribus. Hæc vocatur cura per resolutionem. Suppuratio autem, si fieri possit, hic cavenda, quia semper sic multum de substantia partis contusæ perit, dum separatur omne illud, quod circulationis legibus obedire nequit amplius; unde turpes sæpe postea cicatrices remanent, & aliquando post validas suppurationes, consumpta tunica cellulosa, muscoli tendinesque vicinis accrescunt partibus; unde illorum usus turbatur, vel & penitus aboleretur aliquando. Verum quidem est, non semper impediri posse suppurationem; sed hoc certum est, applicatis illis remediis, de quibus dicitur §. 333. 334., sæpe resolvi posse talia, quæ iisdem non, aut tardius, applicatis in suppurationem certo tenderent. Facile autem patet, longe magis vitandam esse gangræ-

nam, quia per hanc vitalis influxus & effluxus humorum in partem affectam tollitur; & postea totum illud mortuum per suppurationem à vivis partibus vicinis debeat separari.

§. 332. **R**ESOLUTIO fit, dum extravasatum aufertur sine ulteriori vasorum læsione.

Liquidum extravasatum tollendum esse generalis indicatio in omni contusione jubet: sed si v. g. discisso loco contuso, exitus detur effuso cruori, non dicitur hæc resolutio, quia nova læsio facta fuit. Idem verum est, quando per suppurationem cura perficitur: tunc enim vasorum læsorum fines separantur, & cum liquidis effusis sub forma puris exeunt. Sed ad resolutionem requiritur, ut nulla fiat ulterior læsio, dum interim tamen extravasatum liquidum tollitur. Hoc est illud, quod Hippocrates vocavit exsiccare, & resorbere effusum sanguinem: (a) dum enim agit de illis malis, quæ sequuntur carniū contusionem circa costas, sine earundem fractura, postquam debita auxilia præscripsit, addit, idoneam ligaturam necessariam esse, *ἵνα αἱ ἐκτραυβῆται, καὶ ἀναρῶσιν τὰ τοῦ ἐκχύματος, τὸ ἐν τῇ πληγῇ* *παύματα*. Quomodo autem & per quæ hæc resolutio obtineri poterit, dicetur in sequentibus.

§. 333. **I**D autem contingit. 1. id reddendo fluidum. 2. laxando vasa vicina. 3. agendo fluidum in vasa, ea evacuando, vel fricando.

1. Sanguis effusus extra vasa concrevit statim, sicque ineptus fit, ut per minima vasa sanguinea fluere possit, vel & venarum osculis resorberi: Primum ergo, quod requiritur, est, ut fluiditas concilietur concretis humoribus. Si enim possit illud extravasatum ad aquæ tenuitatem reduci, certissime dissipabitur, modo corpus cæterum sanum fuerit. *Carnes attractrices ex cavo, & extrinsecus* dixerat Hippocrates (b), qui expirabile & inspirabile totum corpus esse agnoverat. Unde venæ bibulæ, in omnibus corporis cavis majoribus & minoribus patulæ, resorbebunt illud extravasatum; modo sic attenuatum fuerit, ut illarum oscula possit ingredi.

2. Omne illud, quod attenuatum jam resorbetur, debet ingredi vasa minima venosa bibula; deinde deferri in majores ramos. Constat autem experimentis certissimis, canales minimos ex vitro purissimo ad lampadem ductili factos, uno extremo suo immersos liquido cuicumque, illud attrahere in suum cavum; & quidem eo altius ascendere liquidum in hos tubulos, quo arctiores fuerint, uti etiam quo magis à perpendiculo versus horizontalem lineam declinent, omnium maxime si deorsum descendat alterum extremitum; tunc enim pondus liquidi adjuvat vim illam, qua liquidum in hos tubulos trahitur. Simili actione videntur extravasati humores, prius attenuati, tenuissimas fistulas venosas ingredi. Valvulæ autem, in minimis venulis lymphaticis visibilibus conspicuæ, efficiunt, ut

(a) De Articulis, textu 66. Charter. Tom. XII. pag. 397. (b) Lib. 6. Epidem. in initio. Charter. Tom. IX. pag. 149.

liquidum his sustentatum non resistat liquido ingressuro. Sed canales flexiles eo facilius implentur, quo latera eorundem minus resistunt: hinc laxatio vasorum vicinorum efficit, ut tenuissimæ fistulæ resorbentes facilius tradere possint absorptum liquidum majoribus ramis venosis, quod hic requirebatur.

3. Fluida sic resorpta tenuissimis fistulis venosis eo facilius pergent per majores ramos venosos, quo minor est copia liquidi movendi, si reliquæ causæ sanguinis venosi motum promoventes, maneat eadem. Præcipuæ autem illæ sunt adjacentium venis arteriarum pulsus, & muscularis motus: turgentibus enim musculis, dum agunt, comprimuntur venæ vicinæ, & pellitur sanguis per illas cor versus. Si ergo moles movendorum minuitur, & causæ moventes maneat æque validæ, patet, celerius depleri venas, hincque facilius ingredi resorptum minimis bibularum venarum osculis fluidum. Experimenta autem hanc rem confirmant. Dum flagrante sub sole iter conficerent homines, squalidum corpus, & os aridissimum haberent, & ardentissima siti cruciarentur, mirabantur, post balneum, sitim extinguere, os humectari, & totum corpus molle ac humidum factum priorem depoluisse squalorem. Hoc experimentum Galenus (a) adfert, ut probaret, totum corpus inspirabile esse. Per validos enim motus in magno aëris calore distillantur plurima de corpore; unde illud siccum & bibulum redditum avidissime resorbet contiguam externæ etiam suæ superficiei aquam. An non etiam ob hanc causam, post magnas sanguinis jacturas, corpus repletur aquosis humoribus, dum venulæ minimæ absorbentes facillime evacuare possint resorptos humores in vacuas venas majores? Interim vires debilitatæ, & minutus calor faciunt, ut tenue illud aquosum accumuletur in cavis corporis majoribus & minoribus, quæ in sanitate quidem spiritum, in morbis autem ichorem habent, ut dixit Hippocrates loco allegato in commentariis §. 323. Forte & inde deduci posset ratio, quare Hydropici, eductis omnibus aquis Paracentesi vel alio quocumque modo, tam cito iterum tumeant, licet à potu abstinuerint. Quamvis enim in cavis corporis hydropici maxima copia aquæ collecta sit, tamen vasa reliqua collabuntur & deplentur, unde reliquum corpus decrescit tanto plus, quo magis distenditur abdomen in Ascite; ideoque magis bibulum fit.

Frictiones autem, leni compressione, imprimis in venas agunt, quia debiliores tunicis instructæ sunt, quam arteriæ; unde venæ deplentur: sed quia in omni frictione fit alterna pressio & relaxatio partium, ideo venæ, leni hac pressione depletæ, statim iterum implentur; unde per frictiones simile quid fit ac per evacuationes; venis nempe depletis facilis ingressus conciliatur fluidis absorptis per minima bibularum venarum oscula. Accedit quod extravasatus sanguis & concretus per ipsam frictionem attenuetur & resolvatur. Si enim hominis sani de vena missus sanguis, jam concretus in aëre aperto, teratur in mortario vitreo, iterum resolvitur in spumescens coccinei coloris liquidum. Unde summus usus frictionum in contusionibus sanandis patet.

§. 334. **H**INC larga missio sanguinis, mox data purgatio fortis, nec inflammans; fomentum penetrans, laxans; resolvens parti impositum; frictio calida ad partem; interna resolutiva, sudorifera, diuretica, profunt.

(a) Commentar. in Lib. 6. Epidem. Hippocr. Charter. ibid. pag. 541.

Recensentur jam hac paragrapho efficacissima auxilia, quibus satisfieri possit indicationi curatoriae præcedenti paragrapho propositæ.

LARGA MISSIO SANGUINIS. Summum enim hoc est in omni contusione remedium, modo vires consent: unde & audacter institui debet, & repeti, si opus videatur. Sic enim impeditur febris & inflammatio valida, hic quam maxime metuenda. Tollitur enim sic crassissima liquidorum humanorum pars, ruber nempe sanguis, vasa deplentur, facilisque datur aditus tenuioribus liquidis ingestis. Simul etiam, per venæ sectionem depletis majoribus venis, facillime poterunt minimæ venæ bibulæ absorptos humores majoribus ramis venosis tradere; unde promptior fiet dissipatio extravasati sanguinis.

MOX DATA PURGATIO FORTIS, NEC INFLAMMANS. Medicamenta, quæ purgantia dicuntur, non tantum evacuare illa, quæ præexistunt talia in corpore, qualia excernuntur, sed solvere humores sanos, & solutos per alvum ducere, probatum fuit in commentariis §. 201. Unde *Erasistratus*, & qui ejus opinionem sequebantur, optime concluderunt: *purgationes esse evacuationes una cum corruptione & immutatione illorum, qua evacuantur* (a). Galenus quidem in alia opinione fuit; sed revera res se sic habere videtur. Sanissimo enim homini datum scamnoneum sic solvit humores sanos, ut fusi in aquam tenuem incredibili copia alvo excernantur; & si sæpius repetatur hujus medicamenti usus, totum corpus emaciatur, vasa collabuntur, & debilitas summa fit. Quæ omnia satis evincunt, non fuisse evacuata liquida morbosa præexistentia, sed sanos humores, pharmaci vi solutos in aquam tenuem fœtidam, exivisse de corpore. Per hæc ergo remedia deplentur vasa, & solvuntur humores; simulque quam maxime bibulæ redduntur venulæ, in omni superficie interna æque ac externa corporis hiantes, uti pulchro constitit experimento. Adolescenti febricitanti accesserat diarrhœa, cum extremo stupore sensuum. Cum nihil omnino ore haurire veller, interimque febrili calore ardesceret totus, jussu Medici pedes ejus tepidæ aquæ immerguntur. Hoc facto, protinus mirum cernitur aquæ in vase decrementum; & deinde ejusdem vix coloratæ impetuosa per anum effusio (b). Unde patet, optime satisfieri indicationibus primi & secundi numeri præcedentis paragraphi per purgantia talia: solvuntur enim humores, evacuantur vasa, & augetur vis illa, qua bibulæ venæ humores contiguos absorbent.

Simul tamen notandum, non conducere in hoc casu illa purgantia, quæ majori motu excitato agunt, ut *Colocynthis*, *Tithymali* aut *Euphorbii* succus & similia; sed illa tantum, quæ, efficacissima quamvis solvendi vi prædita sint, tamen sine tantis turbis excitatis effectum suum præstant: uti sunt *Scamnoneum*, *Jalappa*, *Senæ folia* &c. ex quibus variæ formulæ paratæ in *Materia Medica* habentur.

FOMENTUM PENETRANS &c. Hæret in loco contuso sub cute plerumque integra effusus cruor coagulatus: ille fluidus reddi debet sic, ut simul putredo caveatur. Dum enim sanguis coagulatus aëri aperto exponitur, sensim deliquescit, sed putrescit simul. Unde in his fomentis una cum vi resolvente requiritur etiam talis proprietas, ut omni putredini resistent. Sal ammoniacus, vel & marinus, in aquæ vigecuplo solutus, addita quarta parte vini & octava

(a) Galen. de purgant. Medicam. facult. cap. 1. (b) De Re Medica Dissertat. quatuor Thoma Charter. Tom. X. pag. 464. | mæ Simsoni pag. 183.

parte aceti, fomentum tale dat, quod calide applicatum omnibus illis indicationibus responderet. Laxat enim ratione aquæ; sal, acetum, vinum optima resolutiva sunt, & simul omnem putredinem arcent. Urina sani hominis, addita aliqua aceti quantitate, simile fomentum dat, quo felicissime dissolvuntur tubera, & contusione capitis in iuniori ætate adeo frequentia.

Possunt etiam aquæ infundi plurima simplicia medicamenta, in quibus vis illa resolvens adest, & formula talis fomenti in Materia Medica habetur. Huic scopo etiam inservire possunt Emplastra varia; pariter in Materia Medica ad hunc numerum recensita: quæ, dum tenacitate sua cuti adherent, exhalans subtilissimum fluidum coercent, & reperiuntur quasi ad partem, cui applicantur: unde pars affecta in proprii quasi vaporis balneo hæret, laxantur vasa; & his laxatis, aromaticum his Emplastris admistorum fragrantia se insinuat, unde sæpe pulcherrimi usus sunt. Fomenta enim, nisi semper calida retineantur ad partem affectam, minus profunt.

FRICTIO CALIDA AD PARTEM. Si nulla inflammatio, nec magnus dolor adsint in parte contusa, frictiones summum usum habent; sed blandæ. Leni enim hac agitatione atteritur concretus sanguis & dividetur, sicque aptus redditur, ut possit ingredi minima bibularum venarum oscula. Simul etiam venæ evacuantur: unde facilis iterum motus resorpti humoris per depletas venas; uti dictum fuit in commentariis paragraphi præcedentis. Sic homini, cui à malevolis pessime excepto tota facies contusa in tumorem elevabatur horrendum, una cum talibus fomentis continua & levi frictione dissipatus fuit sine ulla suppuratione omnis ille tumor, & pristina rediit forma, quod vix sperari posse videbatur.

INTERNA RESOLVENTIA &c. Illa, quæ partes olim fluidas, nunc concretas iterum reducant in illas moleculas, ex quibus concreverunt, vocantur resolutiva. Inter hæc aqua calida præcipuum locum habet; partim quatenus diluendo se interponit inter massulas concretas; partim etiam quia aliorum solventium medicamentorum vehiculum est: de quibus videantur illa, quæ dicta sunt in commentariis §. 54. n° 4. Præmissa ergo venæ sectione, & purgantibus illis antiphlogisticis, quæ sine aucto multum motu solvunt potentissime, convenit quam maxime largam copiam dare talium decoctorum, in quibus magna aquæ copia est; & simul talia, quæ leni stimulo vasorum actionem in fluida parum augent, ne iners aqua hæreat & accumuletur in corpore, eligendo simul talia, quæ putredine resistunt. Infusa hinc scordii, rutæ, marrubii &c. decocta quinque radicum, Lignorum trium santalorum &c. cum nitro & melle adeo profunt. Dum enim his calide potatis assiduo replentur vasa per venæ sectionem & purgantia prius depleta, & simul fomenti continuo applicatis loco contuso, & per frictiones, horum efficacia derivatur ad locum læsum (videantur commentariis in §. 134.) totum fit, quod ab arte expectari poterit. Omni enim tunc momento aqua calida, solventi virtute horum medicamentorum dives, alluit humores extravasatos, illos diluit, solvit, & aptos reddit, ut minimis venulis resorberi possint; sicque omne extravasatum auferetur sine ulteriori læsione, quod hic requirebatur. Cum autem omnia hæc remedia, larga copia sumta, soleant iterum dissili de corpore per diaphoresin, vel etiam per urinae vias; hinc pro vario regimine hæc vel sudorifera, vel diaphoretica sunt. Si enim in calida atmosphaera totum cor-

pus hæreat, uti v. g. dum in lecto quis bene toto corpore decumbit, ab his excitabitur sudor: si vero frigidiusculo in aëre versetur talis homo, plerumque ab his major urinæ excretio solet sequi.

§. 335. **Q**UORUM ordo, repetendi necessitas, magnitudo requisita noscuntur ex (334.), & summo periculo.

Non in quavis contusione adhibentur omnia illa artis molimina; leviores enim contusiones solis fomentis ex urina, sale & aceto, & similibus facile sanantur. Sed ubi metus est validæ inflammationis, suffocationis & gangrænæ, tunc omnia illa auxilia adhibenda sunt. Incipiendum tunc à venæ sectione, & satis larga quidem, modo vires ferendo pares fuerint: deinde exhibentur purgantia illa, ut solutis humoribus, & debilitata vita, sic disponatur corpus, ut ab inflammatione & febre quam alienissimum fiat. Ubi nondum minuitur his applicatis tumor, dolor, & inflammatio, audacter repetenda sunt; imprimis si contusio interiora corporis læserit: tunc enim à suppuratione summa metuuntur mala; vel postea, non bene curato tali malo, poterit manere insanibilis scirrhus; unde cancer & alia tristissima mala fieri poterunt. Ubi autem post hæc applicata incipiunt minui symptomata; tunc, si manibus ad locum affectum detur accessus, frictio summum remedium est, non prius: tensæ enim ab extravasatis humoribus & inflammatæ partes à frictione, imprimis rudiori, gangræna citissime corripentur.

§. 336. **S**IMUL victus tenuissimus, minimeque putrescens, requiritur.

Requiritur enim, ut omnes humores sint dilutissimi, & vita sustineatur, sed tam debilis, ut nulla inflammatio metuenda sit. Simul etiam, cum extravasati humores sponte sua in putredinem vergant, in victu eliguntur talia, quæ huic humorum degenerationi repugnant. Decocta hinc hordei, avenæ, oryza, panis & similibus, lac aqua dilutum, poma cocta, fructus horæi maturi imprimis hic commendantur; juscula carniū diluta, cum oryza vel hordeo cocta, addito succo citri, pariter prosunt. Neque ullus metus est, debili tali nutrimento non posse sustineri vitam: corpus enim humanum quiescens levissimo etiam potest sustentari alimento. Hoc in se ipso expertus fuit Coleberrimus Boerhaavius, dum acerbissimis Rheumatismi doloribus excruciatu solo sero lactis per duodecim dies viveret; & tamen satis fortis maneret ad motus musculares peragendos, nisi dolor impedivisset. Cum autem per venæ sectionem & purgantia debilitatum fuerit corpus, non poterit tanta efficacia agere in ingesta, illaque in naturam suam convertere: unde alimenta ingesta facilius sequentur suam naturam, & in spontaneam degenerationem inclinabunt. Quia autem putredo in extravasatis humoribus metuitur, ideo præcipue in victu laudantur talia, quæ sponte sua in acidum magis vergunt; & ob eandem rationem vitantur carnes, ova & pisces. Acrida autem omnia & aromata nocerent augendo motum circulatorium, qui in hoc casu pacatus & debilior potius esse debet. In omnibus tamen illis respiciendum simul est ad anni tempestatem, læti temperiem sanam vel morbosam, consuetudinem

&c. de quibus omnibus videantur illa, quæ dicta sunt in commentariis §. 192. 193. 194. 195. 196.

Si omnia hæc dicta de victu & auxiliis pharmaceuticis & chirurgicis observentur, felix semper erit successus, si curabile malum fuerit. Reliqua illa jactata specifica remedia ad contusiones non tantam fidem merentur, ut his solis cura committi posset. Pleraque quidem sunt innoxia, & adhiberi possunt; modo non negligantur efficacissima modo enumerata auxilia. Sic hirci resectis testibus manantem cruorem siccare jubet *Helmontius* (a), illumque vult dari ex alto delapsis, ut contusione grumefactus cruor dispergatur. Sperma Ceti, rubiæ tinctorum decoctum, laudant alii &c.

§. 337. **S**I vero ob magnitudinem resolvi non potest, & manibus accessus datur, scarificatio, apertura, suppuratio succedunt, simul actis, quæ dicta (334). Si magnitudine mali pars jam mortua integre, aut & talis, ut inde certo prævideantur dolores intolerabiles, inflammationes, suppurationes, atrophix, febres, mors, extirpanda, si fieri potest (464. ad 475.)

Si tanta fuerit magnitudo mali, ut nullo modo sperari possit, extravasatos humores posse auferri sine læsione ulteriori vasorum superest unicum hoc, si manibus accessus detur ad locum contusum, ut apertura facta detur exitus effusis humoribus, & benigna suppuratione depuretur locus, & ad conditionem vulneris puri redigatur. Nisi enim hoc fiat, extravasati humores, premendo vicina vasa, inflammationem, imo suffocationem omnis vitalis motus, id est gangrænam, facere poterunt. Si vero corruptela simul accesserit, pejora adhuc sequi poterunt mala. Locus tunc contusus integre discinditur, vel lanceolis scarificando pluribus locis pertunditur, ut via pateat libera extravasatis humoribus: partes tunc vivæ suppositæ, hac pressione liberatæ, separabunt & expellent omnia illa, quæ per contusionem sic destructa fuerunt, ut circulationis legibus obedire amplius nequeant. Imprimis autem hoc fit, si magna mala metuenda sint à partium vicinarum inflammatione, aut erosione, uti dictum fuit in vulnerum capitis historia §. 243. 244. 248.

Neque tamen in hoc casu negligenda sunt illa auxilia, quæ §. 334. enumerata fuerunt. Si enim nimis valida fuerit inflammatio in parte contusa, loco benignæ suppurationis gangræna nasceretur: unde Venæ sectio & purgatio antiphlogistica hic conducent summopere; uti & fomenta illa, quæ omnem putredinem arcant. Simul etiam tunc proderit, largam copiam decoctorum solventium dare, ut omne illud, quod ex corruptis humoribus, vel ex pure hinc nato, bibulis venis resorptum sanguinis massam infecerit, per diaphoresim, vel urinæ vias, educatur de corpore. Uti enim constitit ex præmissis, posse extravasatum cruorem sic attenuari, ut resorbeatur venis bibulis; sic etiam poterit pus, vel corruptus ichor, eadem via sanguini misceri, & pessimam cacochymiam producere; unde iterum varia mala sequi poterunt.

Si vero per validam contusionem sic læsa sint maxima vasa, vel eo usque destruc-

(a) Ortus Medic. in Capit. Pleura furens pag. 321. n°. 32.

ta fuerit partis fabrica, ut nulla amplius humorum vitalium circumductio per partem fieri possit, perfecta sit necrosis, & corrumpentur omnia. Unicum tunc superest, ut extirpetur hæc pars, & ita vita servetur. Cognoscitur hoc malum adesse, si nullus calor & nullus sensus in parte contusa supersint, licet profundis scarificationibus dissecetur, & brevi post nata putredine fætor cadaverosus oriatur. Nisi tunc subito extirpetur pars affecta, proserpente Sphacelo brevi pereunt. Qualis casus contigit peritissimum aurigæ, qui, dum habenis alluefacere vellet indomitos equos, iisdem in furibundum cursum concitatis de curru decidit, & crura rotis implicata miserrime contrita habuit; sic ut nullus amplius sensus vel calor in his partibus superesset. Cum autem necessariam hic extirpationem admittere noller, quarta die periit. Idem verum est, si valida contusione ossa sic fracta sint, ut in minutas festucas dissilierint; quæ pungendo & irritando partes nervosas dolores summos, inflammationes validissimas, & quæ inde sequuntur mala facere poterunt. Homini dextra manus ab illabente cado, vino pleno, sic fuerat contusa, ut ossa metacarpi, quæ digitum anulare, medium, & indicem sustinent, penitus contrita fuerint, una cum musculis & vasis adjacentibus. Monebat Celeberrimus Chirurgus, nil superesse nisi extirpationem partium sic contritarum; & secutura pessima symptomata, si hoc negligeretur. Noluit tamen vulneratus hoc pati, & licet selectissima applicarentur remedia, duorum triumve dierum spatio, dolores acerrimi, inflammatio validissima, tumor immanis, gangrænam brevi futuram demonstrabant; extirpatis statim partibus illis contulis, feliciter sanatus fuit (a). Quantum autem possit etiam in desperatissimis casibus intrepidus animus, una cum summa peritia & dexteritate, docet sequens historia apud eundem autorem (b). Capitaneo navis bellicæ, tristissimo infortunio, totum brachium ad humerum usque miserrime contusum fuerat, sic ut nullus omnino sensus vel calor in tota hac parte superesset; & quamvis verus sphacelus jam ultra humeri articulum proserpisset, jamque cadaveroso fæto totum brachium corrumpere, arte sua & ægroti magnanimitate fretus egregius Chirurgus certæ morti incertum remedium præposuit, & immediate sub articulo partem extirpavit; idoneis dein remediis adjuta natura separavit reliquum, quod jam corruptum erat; & intra bimestre spatium incolumis ad suos rediit ex ipsis orci faucibus ereptus æger.

§. 338. **P**LURA tamen methodus dicta (331. 332. 333. 334. 335.) præstat, quam credi fere possit, quum natura egregie separet sponte, attenuet, resolvat, dissipet, & expellat.

Non tamen facile, etiam in gravissimis casibus, ad extirpationem veniendum est: observata enim fidelissima docuerunt, sanata fuisse aliquando talia mala, de quibus omnino desperandum videbatur. Hinc videtur semper prius tentanda esse methodus numeris hic citatis descripta; cum hoc tuto fieri possit, & interim cognita sint in arte talia remedia, quibus partes etiam mortuæ condiri possint, ut non facile proserpat nata jam putredo. Alliaria, scordium, marrubium, salvia,

(a) De la Motte, *Traité complet de Chirurgie*, Tom. 3. pag. 247. | (b) *Ibid.* pag. 408.

ruta &c. aquæ infusa, addito sale, aceto & vino, vel vini spiritu, dant fomentum quod noctes diesque calide applicatum omnem putredinem certissime prohibet; sicque tuto per aliquot dies expectari potest, an forte natura hic aliquam separationem moliat, vel redeant in parte contusa renascentis vitæ signa. Sic solebat hac occasione auditoribus suis narrare Celeberrimus auctor, quod Nobilem Germanum, hujus Academiæ civem, hac methodo curaverat, cui de curru excusso rotæ supra crura transeuntes miserrime confregerant utriusque cruris tibiam & fibulam, cum horrenda dilaceratione partium vicinarum, licet incipiens gangræna jam occuparet partes. Mirabile exemplum habetur in observationibus chirurgicis modo laudati auctoris (*): Juveni fuste tam valide percutiebatur anterior dextri cubiti pars, ut à cubito ad carpum usque ingens contusio cum dolore intolerabili appareret: applicuit miser parti contusæ lintem spiritu vini madidum; sed vix ullum levamen inde sentiens Chirurgum consulit. Cum jam dolor in manu fere evanesceret, circa cubitum vero augetur, manus affecta pallida apparuit, frigida omnino, & à digitis extremis cutis rudius attracta secedebat. Scarificationibus profundis lanceola factis in manu nullus percipiebatur dolor, imo per manum transfacta lanceola ne quidem gutta sanguinis exibat; & pergebat hæc insensibilitas & frigus ad mediam longitudinem cubiti usque. Spiritu vini cum sale & unguento Ægyptiaco fovebatur pars; simul applicabatur cataplasma ex farina hordei, fabarum & lupinorum, additis aromatibus & vino, & his remediis calor & sensus redierunt ad carpum usque, tota manu adhuc manente frigida & sine sensu; quæ tamen quinque dierum spatium nec fœtebat, nec nigricabat. Scarificationibus de novo in manu institutis instillabatur oleum terebinthinæ; sicque reliquis eodem modo applicatis per alios quinque dies, omnia manserunt in eodem statu; tuncque sensum calor & vita redierunt, & sine extirpatione partis sanatus fuit æger: sic tamen, ut bini digiti contracti manerent, & reliquos difficilius movere posset. Cum ergo in tam desperato casu pars contusa adhuc servari potuerit, videtur prudentis Medici & Chirurgi esse, ut non, nisi omnibus aliis incassum adhibitis, ad extirpationem confugiant. Si enim sanguinis impetus per venæ sectionem & alia auxilia sic compescatur, ut nullus metus sit inflammationis vel gangrænæ ab hac causa, & externe simul applicentur talia, quæ omnem putredinem arcere valent, tenuisque simul dicta & minime putrescens adhibeatur; magna spes est, posse separari corrupta à vivis, & postea recrefcere perditâ.



O S S A F R A C T A.

§. 339. **S**I unius Ossis partes vi à cohæsiōne solvuntur in magna fragmenta, Fractura dicitur.

Hactenus dictum fuit de solutione continuitatis in partibus mollibus corporis humani: sequitur jam consideratio ejusdem mali, quando in ossibus obtinet. Ubi

(*) De la Motte; Traité complet de Chirurgie, Tom. 3. pag. 405.

autem in osse unitatis solutio est, recepto in arte nomine Latini fracturam dixerunt, Græci κατὰγμα (a). In cartilaginibus autem facta continui solutio proprium nomen non obtinuit, sed sub fracturæ nomine comprehenditur: saltem Hippocrates de fractura auriculæ agens (b), quæ tota cartilaginea est, idem nomen usurpat, dicens: καὶ δὲ αὖ κατὰγμα &c.

Ufu tamen receptum fuit, non quamcumque continui solutionem in osse fracturam vocare, sed illam tantum, quæ vi externa sit uti monuit Ægineta (c) dicens: *In universum autem fractura est divisio ossis, vel ruptura, vel discissio à quadam vi externa facta*: sic enim fractura distinguitur à carie ossis. Præterea in definitione hac dicitur, fracturam tunc vocari, si unius ossis partes à cohæsiōe separentur; ut distinguatur à luxatione, per quam ossa, contigua naturaliter, separantur. Ut autem fractura à contusione distinguatur, quæ attritum solidorum supponit (vide §. 322), additur in definitione, fracturam vocari, si ossis partes in magna fragmenta solvantur. Tamen & apud Veteres ossium comminutio in minima fragmenta ad fracturam referebatur, modo à vi externa fieret; tuncque vocabant hanc speciem fracturæ ἀσπιδισίαν (d).

§. 340. **Q**UÆ si sola, & una, simplex; ubi multiplex, composita; si stipata vulnere, contusione, inflammatione, ulcere, pluribus fracturis, complicata vocatur.

Solent Chirurghi dividere fracturas in tres species; simplicem nempe, compositam, & complicatam. Simplex dicitur, quando os unicum uno tantum in loco fractum est, sine magna læsione partium incumbentium vel vicinarum. Ubi autem talis fractura contingit illis corporis locis, ubi bina ossa majora sibi mutuo accumbunt, ut v. g. in cubito, si solus radius fractus fuerit, ulna illæsa, tunc vocatur & hæc species fracturæ apud Chirurgos incompleta; quia non adeo multum mutatur situs partium, & eadem longitudo membri manet. Ubi vero ulna & radius simul fracta fuerint, vel & tibia & fibula in crure, solet vocari fractura completa, vel etiam composita: licet etiam videatur compositam fracturam dici posse, ubi unicum os pluribus in locis fractum fuerit. Ubi autem præter fracturam unius vel plurium ossium talia adsunt Symptomata, quæ peculiarem curam requirunt, uti vulnus, ulcus &c. tunc vocatur complicata; quia in curatione talis fracturæ horum comitantium malorum ratio habenda est. Facile autem patet, non dici posse fracturam complicatam, nisi satis valida talia mala adfuerint; non potest enim fractura fieri sine aliqua saltem contusione, & fere semper levis inflammatio fracturas sequitur: Unde tunc solet fractura complicata dici, quando hæc mala comitantia tanti momenti sunt, ut requirant alium apparatus & curandi methodum, quam quæ in fractura simplici vel composita sufficerent. Sic v. g. si insigne vulnus fracturam comitetur, non potest talis deligatio fieri, ac in fractura simplici, quæ sæpe per plures septimanas relinquitur, sed requiritur talis apparatus, qui sine periculo separationis ossis fracti & repositi solvi queat sæpius, ut vulneris cura haberi possit.

(a) Galen. Method. med. Lib. VI. cap. 5. | ter. Tom. XII. pag. 351.

Charter. Tom. X. pag. 143.

(b) Hippocrat. de Articulis Text. 48. Char-

(c) Lib. VI. cap. 89. pag. 96. versa.

(d) Ibidem.

§. 341. **Q**UIN etiam pro vario situ fracturæ transversa, obliqua, longitudinalis audit; & ratione fragmentorum sibi innitendum, aut juxta latera sibi mutuo applicatorum, vel eminente spina emergentium, varia nomina, naturam, medelam accipit.

Pro vario autem fracturæ situ iterum varia nomina imponuntur. **TRANSVERSA** dicitur, quando sectione perpendiculari ad ossis longitudinem os divisum est. Hæc est illa fracturæ species, quam Chirurghi nostrates solent vocare *radysbrenky*; & simili vocabulo apud veteres Græcos designatur à fracti caulis similitudine καυλαδὸν κατὰ μα (a); ubi nempe transversa fractura partes ossis fracti omnino à se mutuo separatæ sunt, & nullibi amplius coherent. Unde & apud *Æginetam* (b) talis fractura etiam παρὰ τὸν & σικυδὸν à similitudine fractæ radiculae & cucumeris dicitur. Hinc & vocabulum ἀποκαυλισθῆναι apud Hippocratem (c) hoc sensu videtur usurpari, dum dicit: οὐ γὰρ κατὰ γῆρας, ἢ κατὰ γαστήρα, ἢ κατὰ σπλῆν, ἀλλὰ ἐκείνηται τὸ ὀστέον &c. Si vero inferior maxilla frangatur, nec autem omnino transversim fracta fuerit, sed cohereat os &c. ubi apparet manifeste, quod το ἀποκαυλισθῆναι opposuerit τὴν συνήκῃ.

OBLIQUA. Quando nempe divisio ossis non perpendicularis est ad ossis longitudinem, sed ab hac illave parte à perpendiculo declinat; unde major fracturæ superficies, & difficilior retentio fragmentorum, ubi reposita fuerint.

LONGITUDINALIS. Quando nempe secundum longitudinem os fissum est, unde potius fissura esset vocanda, quam fractura; quia partes sic affecti ossis non omnino separantur à se invicem, sed veluti per rectitudinem finduntur: quod genus fracturæ Veteres ideo vocaverunt σχισμαδὸν (d), sive ossis divisionem secundum longitudinem (e).

RATIONE FRAGMENTORUM &c. Possunt enim ossis fracti extrema in eodem situ remanere, quem naturaliter habebant, imprimis in fractura transversa: possunt etiam parum loco moveri, sic tamen ut sibi mutuo adhuc pro parte innituntur: possunt denique fragmenta penitus à solito contactu removeri, & ad latera utrimque delabi, quod fere semper in fractura obliqua fit, & aliquando etiam in transversa. Denique si fragmenta acuta fuerint, possunt spinæ instar per integumenta emergere, quæ certe pessima fracturæ species est.

Omnia autem hæc sedulo considerari merentur, non tantum ut variis nominibus distinguantur fracturæ, verum etiam quia pro his fracturarum varietatibus diversa requiritur curatio, & melius in prognosi distingui potest, quænam inde metuenda sint mala.

(a) Galen. Method. medendi Lib. VI. cap. XII. pag. 342.
 (b) Charter. Tom. X. pag. 143.
 (c) Lib. VI. cap. 89. pag. 96. versa.
 (d) Galen. de Method. medend. Lib. VI. cap. V. Charter. Tom. X. pag. 143.
 (e) Ægineta Lib. VI. cap. 89. pag. 96. versa.

§. 342. **E**FFECTUS ejus varii, pro varia indole ossis fracti, pro modo fracturæ vario, pro varietate fragmentorum quoad situm, figuram, numerum, magnitudinem, pro varietate denique loci, in quo, vicinorum, circa quæ, fit.

Effectus fracturæ primo est læsio omnium illarum functionum, quæ ab ossis integritate pendebant: deinde simul turbatur actio partium vicinarum, quæ à fragmentis ossis comprimi vel lædi possunt. Hinc facile patet, magnam posse esse malorum varietatem, quæ à fractura ut causa sequuntur. Diversitas hæc primo pendet à

VARIA INDOLE OSSIS FRACTI. Ossa v. g. majora, ut os femoris, humeri &c. cavum habent, in quo medulla reconditur; claviculæ, costæ, ossa carpi & tarsi non habent tale cavum medulla plenam. Unde à majoribus his ossibus fractis sæpe medullæ læsio contingit, à qua pessima fieri possunt mala.

MODO FRACTURÆ VARIO. Transversa enim fractura optima est, cum fragmenta sibi mutuo inniti possunt: obliqua pejor, quia facilius fracti ossis extrema juxta se mutuo delabuntur. Unde *Hippocrates* (a), de clavicula fracta agens, monet, illam facilius curari, si in totum transversa fracta fuerit; si in longitudinem vero, ægrius. Multum etiam auget curæ difficultatem, si valida contusio aut vulnus fracturam comitentur.

PRO VARIETATE FRAGMENTORUM QUOAD SITUM. Dum in fractura transversa ossis fracti extrema in eodem situ manent, non læduntur inde partes vicinæ: si parum ad latera divergant, sic tamen ut fragmentum inferius adhuc sustineat superius, non fient inde magna mala. Sed si fragmenta ex situ naturali remota juxta latera sibi mutuo applicentur, necessario vicini muscoli, tendines &c. prementur, & longe major requiretur extensio; ut in situm naturalem iterum redigantur fracti ossis partes.

FIGURAM. Quo enim magis acuta fuerint hæc fragmenta, eo plus lædent partes vicinas. Unde *Celsus* (b) varia fracturæ genera recensens dixit: *Omne igitur os, modo rectum, ut lignum in longitudinem finditur: modo frangitur transversum: interdum obliquum: atque id ipsum nonnunquam retusa habet capita, nonnunquam acuta, quod genus pessimum est: quia neque facile committuntur, quæ nulli retuso innituntur; & carnem vulnerant, interdum quoque nervum aut musculum.*

NUMERUM, MAGNITUDINEM. Quo in pleura fragmenta os fractum dissiliit, eo majus periculum læsionis partium vicinarum, & difficilior repositio ossa in situ naturali retineri possunt. Quo majora fuerint fragmenta, eo faciliior erit, cæteris paribus, curatio.

PRO VARIETATE LOCI IN QVO. Ossa majora in medio densissima sunt; circa juncturas, secedentibus lamellis osseis, cellulofam substantiam habent: si ergo circa juncturas os frangatur, non poterit hoc fieri sine destructione cellulofæ illius fabricæ; unde plurima mala ab humoribus extravasatis & corruptis nasci poterunt. Sed & ligamenta, quæ ossa articulata nectunt inter se, prope juncturas

(a) De Articulis Text. LXIII. Charter. Tom. XII. pag. 323.

(b) Lib. VIII. cap. 7. pag. 524.

inferuntur; unde & horum inflammatio & anchyloses sequi poterunt. Dictum fuit in commentariis §. 218. n°. 6. arteriam satis notabilem tibiæ partem posteriorem & superiorem perforare: & sæpe ad pollicis longitudinem per ipsam ossis substantiam decurrere: si ergo fractura fieret in illo loco, ubi arteria in canali osseo hæret, posset funesta Hæmorrhagia sequi, si simul cum fractura vulnus adesset; vel aliter, effuso sub integra cute sanguine, Aneurisma spurium, & omnia, quæ inde sequuntur, mala fieri possent.

VICINORUM, CIRCA QUÆ. Si enim circa fracturæ locum insignes nervi, aut vasa arteriosa vel venosa, decurrunt, patet facile, quantum periculum sit, ne hæc comprimantur, vel lædantur à fragmentis; imprimis si illa acuta fuerint. Plurima etiam mala metuenda sunt, si fracturæ loco tendines validorum musculorum affixi fuerint. De his omnibus in prima deligatione cogitandum est: unde minime festinare debet in his Medicus nec Chirurgus, sed bene considerare locum fracturæ, & comparare cum optimis Eustachii Tabulis. Nisi enim tunc moneatur, quænam mala metuenda sint, omne damnum, quod postea sequetur, imputabitur illis, qui curæ præfuerunt. Si v. g. osse humeri fracto prope humeri articulum, compressi vel læsi fuerint magni trunci nervosi hic decurrentes, poterit sequi paralytis, stupor, marcor, &c. quæ nulla arte superari poterunt. Sollicite hoc monuit Hippocrates (a) agens de illis fracturis, in quibus fragmenta per cutem emergunt, dicens: *Quibus vero femoris vel humeri os excessit, fere non evadunt, sunt enim ossa hæc magna, & multum medulla habent, & multa ac magna simul lacerantur, nervi, & vena & muscoli. Quod si reponantur, solet nervorum distensio supervenire; si non reponantur, febres acuta & biliosa, & singultuosa &c. Magis adhuc evadunt, quibus inferior pars ossis, quam quibus superior excessit &c. Multum quoque differt, si versus interiora os brachii vel femoris excesserit: multa enim & magna vena per interiorem partem feruntur, quarum nonnulla vulnerata hominem jugulant: per exteriorem vero partem pauciores incedunt. In ejusmodi ergo lationibus non oportet oblivisci periculi, illudque in tempore pradicere. Sic à fractis costis summa sæpe sunt mala, dum fragmenta pleuram lacerant, imo aliquando ipsos pulmones lædunt; unde sæpe Empyema, & inde nata immedicabilis phthisis sequitur. A fractura calcanei, cui validissimus tendo, Achillis dictus; accrescit, sequuntur febres admodum acutæ, continuæ, cum tremore, singultu, & mentis alienatione, quæ paucis diebus hominem de medio tollunt (b).*

§. 343. PRIMARIi ergo sunt destructio muneris fulciendi; sustinendi musculos & dirigendi eosdem; musculorum contractio membri accurtatio, musculorum ex debito loco deturbatio, membri intorsio, ejusdem deformatio; periosteï externi, vasculorum cellulas occupantium, periosteï interni, membranæ medullosæ, medullæ ipsius laceratio, contusio, corruptio; luxuries vasculorum osseorum, unde calli inæqualitas, tumor, membrique deformatio; membranarum, tendinum, nervorum distractio, lace-

(a) De Fracturis Textu XLVII. Charter. Tom. XII. pag. 257.

(b) Ibid. Textu XXIII. Charter. Tom. XII. pag. 201.

ratio, irritatio, compressio, convulsio; Vasorum vicinorum mutatio, destructio, obstructio, inflammatio, dolor, ecchymosis, marcor, suppuratio, gangræna, mors partis & sæpe totius; confusio fere semper.

Enumerantur hac paragrapho præcipua mala, quæ ossium fracturas solent sequi.

DESTRUCTIO MUNERIS FULCIENDI. Dum pedibus insistimus vel incedimus, totum pondus corporis nostri ossibus femorum & crurum sustinetur; unde in Rachiticis pueris nimis flexilia hæc ossa à pondere corporis innitentis incurvantur. Ubi ergo per fracturam ossium integritas sublata est, deficit, statim illud fulciendi munus, nisi fractura transversa fuerit talis, ut nondum fracti ossis extrema locum mutaverint, sed adhuc sibi mutuo insistant: brevi tamen post, si in tali casu homo pergat movere partes fractas fragmenta à contactu mutuo removebuntur, & deficient fulciendi vis. Paræus (a) à calcitrante equo percussus, dum retrocedere nititur, ut evitaret ulterius malum, mox concidit, & sinistri cruris ossa utraque fracta, pondere innitentis corporis pressa; emerferunt non tantum per cutim, sed & ocream ipsam perforaverunt, cum intolerabili dolore.

SUSTINENDI MUSCULOS, ET DIRIGENDI EOSDEM. Plerique muscoli nostri corporis ex osse oriuntur, & in os inferuntur: si sphincteres & musculares vasorum & viscerum fibræ excipiantur, vix reperiuntur muscoli, quin saltem uno suo extremo ossi affigantur. Ossibus ergo fractis tollitur illa motus directio, & turbatur miris modis musculorum his ossibus affixorum actio. Dum patella, quæ tendini, ex musculis extensoribus cruris nato, accrescit, & hypomochlii instar hunc tendinem elevat & sustinet, frangitur, statim turbatur horum musculorum directio & efficacia. Idem in reliquis verum est.

MUSCULORUM CONTRACTIO, MEMBRI ACCURTATIO. Notaverat jam suo tempore Galenus (b), musculis inesse hanc vim, ut sponte contrahatur illorum caro; neque illud pendere ab animali facultate musculum movente, probabat ex eo, quod etiam post mortem, transversim dissecto musculo, utrumque extremum retrahi videret. Vesalius (c) in vivis animalibus experimenta instituens hanc rem pulcherrime confirmavit. Dum enim muscoli ventrem prorsus dividebat, musculum ad insertionem suam una parte, alia vero ad exortum, colligi & retrahi observabat. Dum alterius muscoli tendinem præscinderet, musculum versus exortum suum convelli cernebat: si caput musculi divideret, versus insertionem suam contrahebatur. Dum autem & musculi caput & insertionem una truncaret, tunc musculus ad suum ventrem illamque sedem, qua maxime carneus est, globabatur. Ossa autem, quibus muscoli affiguntur, retinent eosdem in illa distensione: unde his fractis spontanea contractione muscoli breviores fiunt, & ossis partem, cui adhærent, retrahunt, unde membrum brevius fit, & quidem eo plus, quo plures & validiores muscoli fragmento inferiori affiguntur. Sic si os humeri frangatur supra illum locum, cui deltoides musculus affi-

(a) Livre XV. Chapitre 23. pag. 344.

ter. Tom. V. pag. 376.

(b) De motu muscul. Lib. I. cap. 8. Char.

(c) Lib. VII. cap. 19. pag. 168.

gitur, retrahetur satis valide versus superiora os fractum, & accurtabitur, membrum. *Nam nervi musculique, intenti per ossa, contrahuntur* (a). Idem etiam in osse femoris verum est: ideoque unanimi consensu omnes Chirurgi testantur, fracturas ossis femoris raro sine claudicatione sanari, si in parte superiori prope coxam fuerint: si autem in medio vel circa genu idem os fractum fuerit, longe major felicitis curationis spes superest. Videretur autem inter alia hoc etiam inde fieri, quod quo altiori loco fractum fuerit femoris os, eo plures muscoli inferius fragmentum sursum trahunt; cumque illi simul validissimi sint, requiritur fortissima extensio, ut iterum reduci possint; & difficillime in unione retinentur.

MUSCULORUM EX DEBITO LOCO DETURBATIO. Plerique muscoli ab ossibus originem ducunt, & in ossa inferuntur, imo & quidam satis notabili longitudine ossibus adhærent; si ergo ossa fracta loco suo mota fuerint, turbabitur situs & decursus musculorum vicinorum, qui ossi fracto inferuntur, vel inde originem ducunt. Præterea ossis fragmenta ipsa poterunt & deturbare alios musculos, licet in hoc osse nec originem nec insertionem habeant, quatenus nempe alienum locum occupantia premunt & repellunt partes vicinas. Sed hanc musculorum ex locis propriis deturbationem semper comitantur.

MEMBRI INTORSIO, EIUSDEM DEFORMATIO. Externa superficies corporis humani varias eminentias habet, & varia iterum loca, quæ magis depressa sunt, quod imprimis à musculis vario modo positis, & pro varia actione eorundem nunc tumentibus, nunc subsidentibus, fit. Hoc autem imprimis in torosis, & non nimis obesis, viris patet; in fœminis longe minus, quarum corpus semper magis æquabile apparet: uti pulchre Pictores & Statuarii observant, dum Herculis vel Laomedontis validos lacertos, aut Veneris molle & glabrum corpus sua arte expriment. Simul ac ergo fractis ossibus muscoli ex naturali situ deturbantur, mutatur figura partium, & naturalis membri forma perit. Unde periti Chirurgi, ut certi sint ossa fracta bene reposita esse, comparant v. g. brachium vel crus læsum cum altero brachio vel crure sano, & summa cum cura attendunt, an ubique similes eminentiæ & cavitates appareant. Possent enim v. g. brachii fracti partes adaptari iterum sibi mutuo, licet non omnino in eodem situ repositæ essent, quo naturaliter antea cohæserant: sed deformatio membri in tali casu semper hunc errorem detegit. Omnium maxima talis deformatio post fracturam apparet cubiti ossibus fractis; tunc enim muscoli supinatores & pronatores manus solent miro modo figuram naturalem partis mutare.

Sequuntur jam illa mala, quæ ossibus ipsis post fracturam accidunt.

PERIOSTEI EXTERNI, VASCULORUM CELLULAS OCCUPANTIUM, PERIOSTEI INTERNI MEMBRANÆ MEDULLOSÆ &c. Ossa omnia incumbentem habent membranam, quæ vasa deferat ad ossa, & inde redeuntia recipit; vocatur Periosteum, & plerumque ossibus arctissime adhæret. Tegit autem ossium externam superficiem ubique, præterquam in illis locis, ubi ligamenta ex ossibus enascuntur, quæ articulationes ambiunt & firman: ibi enim secedit ab osse Periosteum, pergitque supra ligamenta decurrens, donec alteri ossi iterum inferatur & accrescat: & hoc modo Periosteum sine continuitatis interruptione ab uno osse ad aliud pergit (b). Omnis ergo ossium superficies regi-

(a) Celsus Lib. VIII. cap. 10. pag. 534.

(b) Clopton Havers Osteologia nova pag. 17. tur

tur Periosteo, excepta illa parte, quæ capsula articulari, ex ligamentis articulos ambientibus facta, continetur. Sed rarissime, si unquam, os illud illa pars frangitur, quæ in hac capsula articulari hæret: fracto ergo osse fere semper periosteum externum læditur. Sed præterea mira cellulosa fabrica in ossibus plurimis occurrit; ossa enim minora, quæ magnum cavum medullare non habent, ut digitorum phalangæ, ossa metacarpi, carpi &c. per totam suam substantiam cellulis osseis constant. In ossibus majoribus vero, quæ magnum cavum in medio habent, in quo medulla locatur, lamellæ osseæ, in medio ossis arctissime unitæ, versus extrema à se mutuo secedunt, & miros cancellos formant, in quibus vasa sanguinea, & loculi medullosi locantur. Si ergo hæc ossa circa extremitates frangantur, destruetur cellulosa hæc fabrica, frangentur vasa, effundentur liquida, quæ stagnando corrumpi possunt, & plurima mala producere. Simul facile patet, osse fracto, internum periosteum, medullæ membranam tenerissimam, & ipsam medullæ substantiam, posse destrui; cum hæc adeo tenera sit, ut in annoso etiam bove rudius atrectata digitis in pulvem conteratur. Quanta autem possint fieri mala ab oleo medullari corrupto, postea dicetur in morborum ossium historia. Omnia autem hæc certissime dilacerantur, si fracti ossis extrema à se mutuo recesserint, & juxta latera sibi mutuo applicentur, tunc enim omnia, quæ ossis cavo reconduntur, certissime rumpuntur. Verum quidem est, pessima inde metuenda mala non semper fracturas sequi; posse tamen hæc quandoque contingere, facile patet. Unde præstat, hæc ægrum vel amicos monere, ne talia, si postea supervenerint, medentium incuriæ adscribantur.

LUXURIES VASCULORUM OSSEORUM, UNDE CALLI INÆQUALITAS, TUMOR MEMBRIQUE DEFORMATIO. In Coacis Prænotionibus habetur (a): *Quodcumque os in corpore resectum fuerit, aut cartilago, non augetur;* & in Aphorismis (b) additur, *nec coalescit.* Postea & Galenus dixit, nunquam os posse uniri ossi, nec cartilaginem concreescere cartilagini: sed in ossibus fractis fieri unionem per calli nati interpositionem glutinis instar, non vero per concretionem partium separatarum (c). In Commentario autem primo, quem scripsit in Hippocratem de fracturis, latius hanc rem deduxit (d) dicens: *Quum ossa ob siccitatem naturalem non possint carnis instar coalescere, quasi vinculum quoddam illorum callus sit, circumcrescens fractura labiis. Originem vero ei (callo) dat superfluum ipsius ossis fracti nutrimentum. Et quando decumbens non utitur idonea victus ratione, vel etiam plethoricus est, illud superfluum copiosum est, effusumque totas fascias velut effuso sanguine madefacit.* Unde videtur voluisse, quod callus non foret de ipsa proprie dicenda substantia ossis, sed tantum gluten quoddam, quod se interponens inter fracturæ extrema faceret illa iterum cohærere. Paulo post enim subjungit: *Quale enim unitis lignis gluten est, tale ossibus fractis callus.* Cum autem non posset negari, quod callus ille duritiem ipsius ossis tandem acquireret, & non crederet tamen, callum ossis naturam induere posse, mira satis phrasi usus dixit: *Quidquid igitur ex eo, dum effunditur, circa fracturæ labia concreescit, illud, tempore mutatum ab osse contiguo, illi simillimum sit, & callus nomi-*

(a) N°. 505. Charter. Tom. VIII. pag. 882.

(b) Sect. VI. Aphor. 19. Charter. Tom. IX. pag. 258.

(c) Galen de Method. medend. Lib. V. cap.

7. Charter. Tom. X. pag. 113

(d) Charter. Tom. XII. pag. 179.

natur. Unde voluit, calli nomen retinendum esse, licet jam ossis duritiem acquilivisset. Post Galenum plerique videntur fuisse in eadem opinione. Sed vidimus antea in Commentariis §. 158. n°. 9. in vulneribus perditam substantiam regenerari, & uniri partes separatas, non interpositione glutinis, sed vera restitutione perditæ, per sanguinem bonum allatum, opifice & autore natura; uti Galenus ipse in loco ibi citato verissime dixerat. Et in vulnerum capitis historia evidentissime patuit, ablatam calvarie partem, instrumento vulnerante vel trepano excisam, recrefcere. Videtur ergo & idem obtinere in ossibus fractis; nempe, fieri horum concretionem non interpositione glutinis cujusdam, sed vera unione substantiæ; & in illis casibus, ubi pars ossis ablata est, non interponi inter separata fragmenta lentum humorem, qui sensim induresceret, sed renalci organicam fabricam osseam, quæ perditæ damnum reparat. Observationes Chirurgicæ hanc rem pulcherrime confirmant. Homini onusti plaustræ rota supra crus transiens miserrime fregerat tibiæ & fibulam cum maxima dilaceratione omnium vicinarum partium, sic ut non sine ratione de extirpatione partis cogitaretur. Repositis tamen ossibus fractis, & idoneis auxiliis adhibitis, post bimestre spatium fibulæ fragmenta unita erant penitus; sed tibiæ insigne fragmentum, quatuor digitos transversos longum, in quo foramen medium medullare conspicuum erat, separabatur, ideoque ingens hiatus inter bina hæc tibiæ ossis extrema manebat. Decem tamen mensium spatium totum illud spatium repletum fuit substantia solida & firma adeo, ut homo ille postea sine incommodo crure hoc usus fuerit (*). An credibile videtur glutem ex superfluo ossis nutrimento natum, ex binis illis extremis fracti ossis exsudans, posse sic elongari sine ulla deviatione utrimque, ut fieret impletio tanti hiatus? An non potius hoc adscribendum miræ illi proprietati, quam corpus humanum habet ex Adorandi Creatoris instituto, per quam valet ex ingestis, viscerum & vasorum vi in nostram naturam mutatis, restituere illa quæ perierant, & augere in omni dimensione illa, quæ jam formata sunt? Certe vitale illud rudimentum, in sacculo colliquamenti ovi imprægnati latens, creata sui corpusculi fabrica, spatio viginti & unius dierum, ex mollissimo albumine ovi conficit solida ossa, quibus pullus recens exclusus tuto insistit non solum, sed & alacriter currit. Idem ergo videtur hic obtinere in ossibus, quoad regenerationem perditæ, & unionem illorum, quæ divisa fuerant, quod in vulneribus mollium partium corporis contingit; organicæ nempe substantiæ regenerationem, & veram concretionem, non autem agglutinari hæc inter se interpositione informis glutinis.

Uti jam in partium mollium vulneribus renascentia hæc vascula, adeo tenera & pulpofa; cutis tegmine orbata, poterant nimis distendi, & in fungosam carnem degenerare; sic idem verum est in callo illo ossium, qui pariter luxuriare potest, si vel nimia liquidorum copia, aut nimis valido eorundem impetu valde dilatentur vasa hæc, quæ ossis renascentis substantiam faciunt: imprimis autem hoc metuendum in junioribus, quibus solidarum partium semper minus firmum robur est, & humidorum major copia, & plerumque etiam celerior motus. Ideoque in his callum luxuriare toties observaverunt Chirurgi, imprimis, si pleniori victu uterentur. Sed inde necessario sequitur inæqualitas & figuræ mutatio in parte. Longe tamen frequentius membri deformatio contingit, quando, nondum debitam fir-

(*) *Traité complet. de Chirurgie par M. de la Motte &c. Tom. IV. pag. 284. &c.*

mitatem adepto callo, extrema ossis fracti ad se mutuo apprimuntur: tunc enim ceræ flexilis instar callus undique exprimitur, & prominentem in loco fracturæ annulum facit. Hoc imprimis contingit, quando femoris vel cruris ossibus fractis nimis cito incedere volunt ægri: cum enim totum corporis pondus his ossibus sustineri debet, si nondum osseam duritiem acquisiverit callus, exprimitur.

MEMBRANARUM, TENDINUM, NERVORUM DISTRACTIO, LACERATIO &c. Imprimis si fractura talis sit, ut fragmenta supra se mutuo efferantur; omnium maxime, si hæc fragmenta acuta fuerint, uti sæpe fit: tunc enim omnia vicina læduntur, & dilacerantur. In eadem hac paragrapho dictum fuit, quod, Paræus dum fracto cruri inniteretur, fragmenta ossis non tantum integumenta & musculos, sed ipsam ocream quoque perforaverint, cum dolore intolerabili. Quanta autem mala metuenda sint a membranis, tendinibus, vel nervis læsis aut irritatis, dictum fuit in commentariis §. 162. 163. 164. 165. 181. 182. 183. 184. Tristes adeo inde aliquando sequuntur calamitates, ut Hippocrates monuerit Medicos, ut, si sine ignominia possint, fugiant tales casus, cum spei parum, periculi vero plurimum sit. *Si enim non reponantur ossa, Medicus videtur arte destitui, si reponantur, homini magis ad interitum, quam salutem est (a).*

VASORUM VICINORUM MUTATIO, DESTRUCTIO &c. Pessima mala, quæ sequi solent fracturas, rarius fiunt ab ossis ipsius læsione; longe sapius, quia ossis fragmenta vicinas partes comprimendo vel vulnerando male afficiunt. Plurima jam vasa ossibus ipsis affiguntur, vel in illorum vicinia decurrunt, quæ a fragmentis loco suo motis lædi vel comprimi possunt: unde sollicitè monuit Hippocrates (uti dictum fuit paragrapho præcedenti) multum interesse, an humeri vel femoris os ab interiore, an vero ab exteriori, parte excesserit, quia multæ & magnæ venæ per interiorē partem feruntur. Sed inter causas obstructionis §. 112. recensentur omnia illa, quæ canales flexiles externa compressione, vel & distractione, redderent angustiores: patet ergo, post fracturam ossium sæpe obstructionem sequi. Et licet non omnino intercipiatur humorum transitus per vasa sic angustata, miris tamen modis poterunt turbari plurimæ functiones corporis; cum harum integritas sæpe pro magna parte à debita proportionē amplitudinis truncorum ad ramos, & vicissim, pendeat. Si jam obstructioni vasorum accesserit celerior humorum circumductio per febrim natam, inflammatio fiet, & sequi poterunt omnes ejus exitus, suppuratio nempe, gangræna, sphacelus &c. A distractione autem membranarum, tendinum, aut nervorum, summi dolores nascuntur in fracturis, non vero adeo ab ossis ipsius læsione; uti facile patet ex eo, quod, repositis in situm naturalem ossibus fractis, dolor omnis cesset, vel minuat plurimum. Dum autem fractis vasis sub cute integra, vel parvo tantum vulnere divisa, sanguis exit, colligitur in panniculo adiposo, & ecchymosin facit, uti in Contusionis Historia dictum fuit. Ubi vero arteria, vel magnus truncus nervosus, partibus inferioribus prospiciens, sic compressus vel destructus fuerit, ut nihil amplius transmittere possit, omni vitali influxu privantur partes suppositæ: tuncque vel putri gangræna corrumpuntur, vel lento exsiccantur marasmo: uti constitit mirabili illo exemplo hominis, cui arteriæ truncus sub axilla integre dissectus fuerat; unde postea tota vita brachium Mumie instar arefactum remansit. Videantur de his Commentaria §. 161.

(a) Hippocrat. de fracturis Textu L. Charter. Tom. XII. pag. 259:

T t t ij

Mors autem quandoque fracturas ossium sequitur, ob summos dolores ortis febribus acutissimis, delirio, convulsionibus; vel si gangræna partem læsam occupet, quæ in sphacelum versa superiora petit, & post vigilias, deliria, syncopen, singultum &c. tandem placido sopore necat.

CONTUSIO FERE SEMPER. Non potest enim vis externa ossis partes à cohæsiōe solvere, nisi simul agat in partes molles ossi incumbentes; illæ ergo inter causam lædentem & durum os suppositum pressæ necessario contundi debent. Unde semper aderit saltem aliqua contusio; nisi ossa per Luem Veneream, scorbutum, aut similes morbos tam fragilia facta fuerint, ut etiam à levi vi frangantur. Ad hanc rem autem quam maxime attendendum est, quia, ossibus fractis etiam felicissimo successu repositis, sæpe plurima mala à contusione partium sequuntur: unde Hippocrates (a) circa finem libri de fracturis, (in quo plurima recensuit mala, quæ fracturas & luxationes sequi solent) pro generali axiomate posuit, magis metuendum esse à contusione, quam à fractura ipsa. Dicit enim: *Leviora autem, ut summatim dicantur omnia, sunt vitia, quibus ossa franguntur, quam quibus ossa quidem non franguntur, vena autem & nervi notabiles conteruntur in iisdem locis. Hac enim hominem magis ad interitum precipitant, quam illa, si continua febris accesserit.* Unde sæpissime illa remedia, quæ contusioni sanandæ conveniunt, fracturis etiam adhibenda sunt. Licet enim restitutio ossium fractorum, illorumque in situ retentio, videatur satisfacere generali indicationi; illudque sæpe sufficere videatur plurimis Chirurgis, tamen ex modo dictis facile patet, pro variis malis, fracturam comitantibus, diversam medelam requiri.

§. 344. **Q**UÆ expensa (342. 343.) præsens malum, ejusque statum docent: si tactus fragmenta; auris crepitationem; oculus læsam figuram, immobilitatem; intellectus causam, ejus impetum, modum impulsus, sensui decrepiti, temperiei morbosæ, hybernique frigoris efficaciam simul consideraverit, clarior est diagnosi.

Describuntur hac paragrapho illa signa, quibus præsens fractura cognosci possit. Sæpe enim tales calus occurrunt, in quibus etiam peritissimi Chirurghi non sine labore hoc distinguere possunt. Ubique fere locorum habentur homines, plerumque satis imperiti, qui rudi plebeculæ facile persuadent, se longe melius Chirurgis ipsis novisse artem membra luxata & fracta restituendi. Illis solenne est, in quovis fere malo luxationem vel fracturam culpæ, & statim omnem apparatus talium malorum adhibere; unde sæpissime mileros emungunt, simulque à consuetis laboribus cessare cogunt, sine ulla necessitate. Similibus imposturis & ignorantiam suam tegunt, & ignaris mira præstitisse videntur. Honestum virum decet, omni molimine inquirere, an tale malum adsit. Ubi autem fragmenta ossis loco suo mota sunt, & juxta latera sibi mutuo applicantur, vel & aliquando per ipsam cutim emergunt, facilis habetur Diagnōsis. Sed si fragmenta contigua manserint; vel, licet parum deviaverint, adhuc tamen sibi mutuo innitantur, & os fractum undique copiosis musculis tectum fuerit, ut v. g. in femore; longe

(a) Textu LXII. Charter. Tom. XII. pag. 168.

difficilius hoc cognosci poterit. Sic etiam si in cubito vel crure, ubi bina ossa sunt, alterutrum tantum fractum fuerit; uti etiam si Chirurgus serius advocatus omnes partes jam valide inflammatas & tumentes inveniat. Peritissimus Chirurgus (a) ingenue fatetur, se in simili casu diu cespitalle, antequam fracturam adesse cognosceret. Homini, dum fossam transiliret, crus frangebatur, cumque in loco admodum solitario hoc infortunium ipsi contigisset, cogeatur genubus manubusque innixus diu prorepere, antequam clamores ejus ab aliquo audiri possent. Tandem accurrunt rustici, qui miserum domum vehunt. Adeo tunc dolebat membrum, & tantopere tumebat, ut non nisi repetito sæpius examine deprehenderet Chirurgus fracturam adesse, quæ transversa erat utriusque ossis ad duorum circiter pollicum distantiam à malleolis. Partes autem vicinæ tumidæ & inflammatione tensæ retinebant in situ ossa fracta; unde imprimis difficultas deregendi hanc fracturam nascebatur.

Omnium difficillima cognitu est ergo fractura talis, in qua fragmenta adhuc sibi mutuo innituntur: quo in casu sæpe, si non cognoscatur movendo partem affectam, fragmenta à mutuo contactu remonentur, & supra se mutuo efferuntur; unde difficilior curatio, & major læsio & compressio vicinarum partium: Cum in priori casu nulla requiratur extensio; vel levis tantum, si fragmenta parum deviaverint à situ suo naturali. Si ergo talis causa fuerit applicata corpori, à cujus impetu & modo impulsus metui possit, os quoddam fractum fuisse, debet sollicitè examinari pars hæc, antequam vestes exuantur, ne forte mota parte fragmenta à mutuo contactu secedant, & fiat deterior fracturæ species. Prehenditur tunc pars læsa utrimque ad aliquam distantiam à loco, cui ictus impactus fuit, & prudentissime movendo tentatur, an aliquid ibi vacillet, aut aliqua crepitatio, fragmentis ad se mutuo attritis, percipiatur: si quid talis inveniat, discindendæ potius sunt vestes, quam exuendæ, ut caveatur fragmentorum à mutuo contactu secessus. Longe major adhuc fracturæ suspicio nascitur etiam à levioribus causis, si decrepita senectute ossa fragilissima facta fuerint; cum in hac ætate oleum medullare incipiat deficere, unde ossium ariditas & major fragilitas sequitur. Idem verum est, si intenso sub frigore talis casus acciderit, nam & tunc ossa facilius frangi certis observatis constat: & videmus, omnia fere corpora acri gelu rigescere & fragiliora fieri.

Præterea per morbos sic possunt mutari ossa, ut etiam levissima causa frangantur. Sic ubi Lues Venerea ossibus hæret, observatum fuit sæpius, quod lecto egressi tales homines solo pondere corporis sui ossa fracta habuerint. In pessimo scorbuto, Rachitide &c. aliquando etiam talis fragilitas ossium observata fuit. Mira talis observatio habetur apud *Hildanum* (b) à clarissimo Medico *Philiberto Sarazeno* ipsi communicata. Sexagenarius vir arthritide pituitosa circa articulos humeri & cubiti dextri fere per bimestre spatium torquebatur obtuso cum dolore. Nullis usus fuit remediis, cæteroquin sanus, partem affectam tantum in quiete retinens. Dum chirothecam manui partis affectæ levissimo conatu induit, brachii os quatuor vel quinque digitis infra humerum transversim frangitur. Osse restituto, dum post triduum remoto apparatu partem inspiciunt Chirurgus & Medi-

(a) M. de la Motte, Traité complet de Chirurgie, Tom. IV. pag. 148.

(b) Centur. 2. Observ. 66. pag. 139. 140.

cus, & omnia bene se habere latantur, inveniunt aliam ejusdem ossis fracturam circa cubiti articulum, quam statim etiam idoneo muniverunt apparatu. Et in alia Epistola, post sex menses elapsos ad *Hildanum* scripta ab eodem Medico, habetur, quod per bimestre spatium frustra calli generationem expectaverint; & postea in cadavere ejusdem hominis, ex inveterato renum ulcere mortui, viderint, quod brachii os omnino carie computruisset. Similis casus habetur apud eundem autorem (*). Ubi honestæ matronæ fere sexagenariæ, decem liberorum pancreaticæ valentium matri, in lecto sine ulla vi externa brachii os ruptum fuit, dum exporrectis brachiis, & sublato corpore jacente, subuculam puram induere vellet. Curata fuit hæc fractura idoneis auxiliis. Sed postea, dum post diuturnum in lecto decubitus surgere vellet, & ob hanc rem tibialia induere, ancilla illi opem ferens dextrum crus transversim fregit miseræ. Chirurgus vocatus consueta methodo curavit sine magna difficultate & hanc fracturam. Sic per biennium vixit, varias adhuc fracturas passa, tandemque tot cruciatibus confecta supremum diem obiit. Nihil autem Luis Veneræ hic adfuisse videbatur, quia maritus nunquam aliquid mali senserat; & numerosa proles optima sanitate gaudebat; & ne levissima quidem suspicio unquam optimæ Matronæ minuerat famam. Unde patet, aliquando a latentibus causis tantam posse nasci ossium fragilitatem, ut levissima vi sæpe frangantur.

§. 345. **V**ERUM oblongæ fracturæ difficilior detectio, nisi sero: dolor, tumor, crassities partis, inæqualitas, pus fœdum, causa fortis cognita, aliquid luminis dabunt.

Oblonga fractura dicitur, quando à vi externa os secundum longitudinem suam instar ligni fissum est. Difficillime talis fractura cognosci poterit, nisi fuerit in talibus locis, in quibus ossa fere nuda hærent; uti v. g. in anteriori cruris parte, ubi os tibiæ satis nudum tota fere sui longitudine digitis tangi potest. In reliquis locis corporis non facile quis talem fracturam distinguere posset. Pessima quidem mala talem fracturam sequi possunt, quæ tunc docent illam adfuisse, sed sero tamen. Osse enim sic fissum, franguntur vasa per ossis substantiam decurrentia; effunduntur liquida; unde corruptio horum, ossis caries, incumbientium partium inflammatio, & suppuratio metuenda sunt. Præcipua signa hujus fracturæ sunt, si cognoscatur causa satis valida prægressa fuisse, dolor profundus adsit, & diu maneat, & partes ossi impositæ attollantur tumore secundum longitudinem ossis decurrente. Si dein ruptis postea integumentis pus fœdum exeat, major suspicio nascitur, os suppositum læsum esse. Sed omnia hæc signa satis ambigua sunt, cum & validam contusionem sæpe sequantur, licet talis fractura non adsit; puris autem fœdi exitus ossis corruptionem jam sero docet: Unde difficillima est hujus fracturæ Diagnosis. Et licet cognosceretur talem fracturam adesse, non multum tamen inde emolumenti accederet. Quid enim in hoc casu ars facere posset? omnia manent in eodem situ, sola ossis læsio adest. Diceret forte quis, venæ sectionem, fomenta resolventia antiphlogistica, & putredinem præcauentia, adhibenda esse, & victum tenuem &c. ut præcaveatur inflammatio hic imprimis

(*) Ibid. Observ. 68. pag. 141.

metuenda, & omnes ejus effectus. Sed contusio huic fracturæ semper comes eadem requirit auxilia, licet os minime læsum foret. In Historia vulnerum capitis dictum fuit, quomodo fissa calvaria curari debeat; sed an os sic secundum longitudinem fissum potest detegi tuto, ut scalpris radi vel minutis punctulis terebrari posset? si femoris os sic fractum cognosceretur, quis auderet validos huic ossi circumpositos musculos discindere, ut ad os affectum manibus aditus pateret? Hinc in paucis tantum corporis locis, ubi ossa solis integumentis communibus tecta sunt, hæc cura tentari posset; sed & in iisdem locis, longe facilius cognoscitur tale malum. In reliquis ergo difficillima foret, nec magnæ etiam utilitatis talis fracturæ cognitio; cum nihil tamen tentari posset, præter generalia ad omnem contusionem remedia.

§. 346. **F**ACILEM, difficilem, tardam, celerem, integram; vel deficientem fore curationem prædicit figura, simplicitas, compositio, duratio fracturæ; numerus, figura, magnitudo fragmentorum; locus ossis læsi; vicina læsa; tempus anni; ætas ægri & temperies.

Agitur hac paragrapho de Prognosi fracturarum, quæ docet, quænam mala metuenda sint, & quænam bona speranda. Omnes ergo illi effectus fracturarum, §. 343. enumerati, considerandi sunt, & post severum examen, ex cognita fracturæ indole, & scientia Anatomica partium, tunc concludi poterit, an curatio facilis futura sit, an vero difficilis: Facilis autem cura dicitur, si sine magno artis molimine, & absque multa molestia fracturam passi, perfici possit: Difficilis autem, ubi contrarium obtinet. Deinde determinari debet, an longo temporis spatio opus sit, ut fractis ossibus debita restituatur integritas, an non. Ultimo quæritur, an sperari possit talis curatio, ut firmitas, figura, & usus membri fracti, eadem futura sint ac ante; an vero post curam peractam aliquis defectus sensibilis supererit, per quem deturpabitur figura partis læsæ, vel tolletur aut impiedietur saltem ejus usus. Summa autem hic prudentia opus est: plerumque enim solet culpa damni relictæ Chirurgis imputari, & summa quidem sæpe cum injuria. Honestum enim virum quidem non decet parvam rem attollere, histrionis instar, ut plus præstitisse videatur; prudentia tamen requirit, ut mala metuenda indicentur, ne, si victa ars his fuerit, vel ignorasse, vel fefellisse videatur. Si nimis meticulosus Chirurgus etiam in leviori casu pessima quævis ominetur, sæpe alius vocatus curam suscipiet; quæ si felix fuerit, prioris famæ nota inuretur. Turpe pariter erit, si felicem curam promissam sequatur malus eventus. Ut autem tuto Prognosis haberi possit, considerari merentur sequentia.

FIGURA. Omnium optima illa fracturæ species, quæ transversa vel & raphanoides vocatur; imprimis si fragmenta sibi mutuo adhuc innitantur, neque penitus loco mota fuerint. Obliqua autem fractura longe difficilior est, quia tunc fragmenta se mutuo non sustinent, & musculorum ossibus nexorum contractione à contactu facillime dimoventur, neque facile est fasciis sic firmare partes, ut fragmenta reposita in debito situ maneat. Pulchre hoc expressit *Celsus* (a) de fracturis

(a) Lib. VIII. cap. X. pag. 530.

agens. Dicit enim: *Earum maxime tolerabilis est simplex, eaque transversa: peior, ubi obliqua, atque ubi fragmenta: pessima, ubi eadem acuta sunt.*

SIMPLICITAS, COMPOSITIO. Facile patet, longe difficiliorem curam esse, si os pluribus in locis fractum sit; & imprimis, si fracturarum loca adeo distent à se mutuo, ut non possint uno & eodem apparatu comprehendi, sed singulæ fracturæ diversum requirant. Memorabilis talis casus habetur (a) apud *de la Motte*; ubi homini crus, & prope malleolos, & circa genu fractum erat; cumque idoneo apparatu utraque fractura munita esset, superior satis bene se habuit; inferior autem fractura, lævissimis doloribus obortis, debuit postea ligatura multorum capitum tractari, instar fracturæ complicatæ. Si jam fractura non tantum composita, sed & complicata fuerit, sive stipata vulnere contusione, inflammatione &c. difficilior adhuc cura facile prævidetur.

DURATIO FRACTURÆ. Quando ossis fracti partes in naturali situ manserunt, non multum mali expectandum est à majori duratione fracturæ, quia ars nihil hic addere potest, sed tantum idoneo apparatu cavendum est, ne fragmenta situm suum postea mutant. Ubi vero fragmenta ossis non amplius à se mutuo sustententur, sed supra se invicem efferuntur; tunc quo majori temporis spatio hoc duraverit, eo major & diuturnior distractio & laceratio partium vicinarum: unde dolores enormes, inflammatio, tumor &c. solent sequi; & tunc impossibile est ossa hæc reponere, antequam illa symptomata sedata, vel aliquatenus saltem mitigata fuerint. Pars enim talis valide inflammata & tumens, si rudius tractetur, brevi gangræna corripitur; vel & ab intolerabili dolorum acerbitate convulsio sequi posset. Ubi autem in fractura complicata per vulnus comitans ossa nudata sunt, vel fragmenta ossis per cutim emerferunt, quo diutius hæc aëri exposita fuerint, eo difficilior & tardior cura expectanda est; quia tunc sæpe ossis sic male affecti exfoliatio fieri debet; uti patet ex illis, quæ dicta sunt in *Historia vulnorum Capitis* §. 249. 250.

NUMERUS, FIGURA, MAGNITUDO FRAGMENTORUM. Quo major fragmentorum numerus est, eo difficilior erit retentio eorundem in debito situ, postquam reposita sunt; uti etiam quo eadem fragmenta minora sunt. Si enim v. g. brachii os binis in locis sic fractum fuerit, ut fragmentum medium, ab utraque parte solutum, trium transversorum digitorum longitudinem æquet; illud, quamvis optime repositum fuerit, difficillime tamen in situ retineri poterit, cum & contractio musculorum, & ipsa spleniorum & fasciarum circumpositarum pressio, illud facillime iterum expellere possit: unde requiruntur machinæ, quæ membrum fractum in debita extensione retineant. Operoso ergo satis artis molimine indigent tales fracturæ, nec facilis talis cura dici potest. Ad similes casus Hippocrates (b) binos orbes, ex corio Ægyptiaco factos, commendat, quolibus utuntur, qui diu in magnis compedibus continentur; & in cruris fractura jubet, ut unus super talos applicetur, infra genu alter. Debebant præterea hi orbes habere utrimque ex simplici vel duplici loro exiguas ansulas, sic ut superioris orbis ansulæ directe responderent illis, qui in orbe inferiori erant. Deinde corneos baculos aptæ longitudinis his ansulis immittebat, quibus in justa distantia

(a) *Traité complet de Chirurgie* Tom. IV. pag. 254. &c.

(b) *De Fracturis* Textu 29. *Charter.* Tom. XII. pag. 246.

retinerentur

retinerentur orbes illi coriacei; sicque simul debita longitudo servabatur partis fractæ; & cavebatur, ne media fragmenta exprimerentur. Reliqua in applicatione horum orbium coriaceorum observanda ibidem sollicitè notat. Si autem fragmenta habeant acutam figuram, difficillimus casus est, quia talia in situm reposita vix retineri possunt, & vicinas partes pessime lædunt; uti dictum fuit in commentariis §. 342. Præterea observatis Chirurgicis constitit, ossis divisionem, instrumento acuto scindente vel secante factam, non posse curari tam brevi temporis spatio, quam si obtuso obstaculo impingens os fractum fuisset; quod mirum videbitur. Ratio forte hæc est, quod in vulgari fractura fragmenta semper eminentias quasdam habeant & asperitates, quæ ossibus rite repositis sic sibi mutuo respondent, ut melius cohæreant, nec facile possint per tussim, sternutationem, vel aliam causam, fragmenta hæc ad se mutuo atteri; à quo attritu renascens callus destruitur, vel saltem retardatur ossium fractorum unio. Ubi vero scindente instrumento os divisum fuit, æquabilis magis fragmentorum superficies efficit, ut facilius ad se mutuo atteri, & loco moveri possint. Tres quatuorve memorabiles casus, qui hoc confirmant, habentur in observationibus egregii Chirurgi *de la Motte* (a), qui testatur, quod duplo longiori temporis spatio indigerit, ut curaret talem fracturam etiam simplicem, quam in quavis alia complicata etiam pessima, exceptis illis fracturis, in quibus magna fuit facta perditio substantiæ ossis, vel quæ ingentem simul comitem habebant ossis contusionem, aut contritionem in minima fragmenta.

LOCUS OSSIS LÆSI. Dictum fuit §. 342. varios esse fracturarum effectus pro vario loco ossis læsi. *Celsus* (b) quædam communia brachiis, femoribus, cruribus, digitis fractis recensens, dicit: *si quidem ea minime periculose media franguntur: at, quo propior fractura capiti vel superiori, vel inferiori est, eo peior est. Nam & majores dolores adfert, & difficilius curatur.* In medio enim ossa majora omnium solidissima sunt; circa extrema autem, quibus articulantur vicinis ossibus, cellulosa sunt, & friabilia. Difficultatem talis fracturæ augent ligamenta vicina, quibus ossa articulata nectuntur. Multum etiam differt, an versus extremum superius, an autem circa inferius, os quoddam fractum fuerit: uti patuit in commentariis §. 342. ex Hippocratis testimonio. Sic observavit *Hildanus* (c), si os femoris prope articulum coxæ fractum fuerit, vix unquam sine claudicatione sanari talem fracturam; ubi autem in medio, vel circa genu fractum fuit idem os, à perito Chirurgo sæpissime curatur sine ullo malo superstite. Simul eodem in loco plurimorum gravissimorum Auctorum testimoniis hoc confirmatur.

VICINA LÆSIA. Videantur de his illa, quæ dicta sunt in commentariis §. 342.

TEMPUS ANNI. Calidum ossibus fractis plurimum conferre, imprimis nudati, dixit *Hippocrates* (d); frigidum autem ossibus inimicum esse, pronuntiavit (e). Unde, cæteris paribus, hyberna tempestate minus prospera erit ossium fractorum curatio. Sed æstivis caloribus major putredinis metus est: unde vere & autumno felicior cura sperari potest.

(a) *Traité complet de Chirurgie* Tom. IV. pag. 475. 476.

pag. 303.—318.

(b) *Lib VIII. cap. X.* pag. 530.

(c) *Centur. V. Observ. Chirurg. Observ.*

(d) *Aphor. 22. Sect. V. Charter. Tom. IX.*

pag. 207.

(e) *Ibid. Aphor. 18. pag. 204.*

ÆTAS ÆGRI. Quo homo origini propior est, eo citius ossa fracta consolidantur: in summo senio vix, vel saltem non nisi longissimo tempore. Sed in junioribus metuitur sæpe nimia calli luxuries; unde media ætas optima hic est. Egregius Chirurgus *de la Motte* (a) ingenue fateatur, bis sibi hoc infortunium accidisse, dum in difficili partu fœtum pedibus extraheret, ut brachium ipsis fractum fuerit; tamen facili apparatu spatio duodecim dierum hæ fracturæ sanabantur; cum in adultis & sanis ad minimum triplo longius tempus requirant, ut consolidentur.

TEMPERIES. Omnes illi morbi, quibus pinguedo corporis tollitur, vel corrumpitur, efficiunt, ut vel non, vel saltem difficillime, recrescant ossa fracta; hinc in Lue Venerea, Scorbuto pessimo, Rachitide, Phthisi &c. vix curantur fracturæ: uti constitit etiam illis Exemplis, quæ in commentariis §. 344. memorata fuerunt. Sed præterea forte in quibusdam hominibus latet talis dispositio, per quam non ita facile ossa fracta consolidantur, licet ceteroquin nulla notabilis cacochymia vel aliud vitium occurrat. Celeberrimus *Ruyfchius* (b) se tales casus vidisse asserit, licet omnia ex artis regulis ad curationem adhibita fuissent. Et in Observationibus suis Anatomico Chirurgicis (c) narrat, quod in cadavere hominis sani, laqueo suffocati, invenerit, duo ex anterioribus carpi ossibus, ante triennium fracta, nondum coaluisse. Vidi mulierem, cui humeri os fractum fuit, & postea restitutum ex arte, sed nunquam coaluit; licet in flore ætatis esset: unde postea tota vita in loco fracturæ flexile manebat brachium, neque tamen adeo multum incommodi inde sentiebat. Observavit *Hildanus* (d), in gravidis difficillime fieri ossium fractorum consolidationem; & casum narrat, ubi in gravida os tibiæ in medio fractum fuerat (septimum autem jam excesserat imprægnationis mensem) & tamen viginti & tribus septimanis post fracturam elapsis nondum coaluerant fragmenta; tandem trigesima septimana curatio peracta fuit. Sed in hac fœmina insigne vulnus comitabatur fracturam, & fragmenta quædam ossis abscisserunt; unde forte credi posset, inde curæ difficultatem & tarditatem ortam fuisse. Sed alibi (e) habet memorabilem historiam, quæ difficultatem curæ fracturarum in gravidis confirmat. Nobilis matrona, obesa & plethorica, dum equum conscendere veller, tibiam sinistram inter genu & talum fregit. Eodem die *Hildanus* fracturam felicissime reposuit, nihilque neglectum fuit, quod curæ felicitatem promoveret; cumque nullus dolor, neque ullum aliud malum symptoma accederet, bimestri spatio curam absolvi posse sperabat. Lætabat hæc matrona infantem, cumque quadragesimo die callus adhuc lubricus & mollis inveniretur, iussit illum ablaetari; & paulo post apparuit, illam gravidam esse, & septem menses post acceptam fracturam puellum sanum & vegetum feliciter peperit. Quidquid tentatum fuit toto hoc graviditatis tempore, non potuerunt consolidari ossa fracta; licet morositate hujus matronæ, continuo tarditatem curæ exprobrantibus, incitatus *Hildanus* omnem diligentiam & industriam adhibuisset. Post partum vero quadraginta dierum spatio callus firmatus est, & membri fracti usus integre fuit restitutus. Hinc conclusit, naturam in gravidis, totam in formando & perfici-

(a) *Traité complet de Chirurgie* Tom IV. pag. 171

(b) *Advers. Anatom. Decad. 1. n°. 1.* pag. 6.

(c) *Observat. IV. pag. 8.*

(d) *Centur. V. Observ. 87. pag. 484.*

(e) *Centur. VI. Observ. 68. pag. 581.*

ciendo fortu occupatam, calli generationem quasi negligere. Similes observationes, quæ hoc confirmant, habentur & in *Miscellaneis curiosis* (a). Ubi tamen & occurrit historia, qua constat, in fœmina, jam quinto mense gravis, patellam sinistri pedis fractam, sex septimanarum spatio curatam fuisse, sic ut in domo obambulare, licet cum quadam difficultate, potuerit. Unde, licet forte non videatur universaliter concludi posse, ossium fracturas in gravidis ante partum nunquam consolidari; tamen in talibus casibus merito curæ tarditas & difficultas prædicenda videtur, ne postea in Chirurgum vel Medicum culpa retardatæ curæ conjiciatur.

§. 347. S A N A T I O requirit :

1. Restitutionem in situm naturalem, extendendo, reponendo.
2. Retentionem in eo situ per fascias & machinas.
3. Unitorum, retentorumque consolidationem, enato callo.

Sequitur jam cura generalis omnium fracturarum. Omnis autem sanatio (vide commentaria in §. 4.) est mutatio corporis viventis talis, ut conditio corporea, quæ vocabatur morbus, tollatur, & restituatur illud, quod ablatum faciebat morbum. In fractura jam adest semper cohæsionis ablatio, & mutatio situs partium hanc comitatur plerumque. Unde patet, ad sanationem requiri situs naturalis restitutionem, & unionem partium separatarum. Hæc autem obtineri poterunt illis auxiliis, quæ tribus hujus paragraphi numeris recensentur.

1. Si situs partium mutatus fuerit, semper requiritur extensio, antequam tuto reponi possint ossa fracta. Superficies enim fragmentorum fere semper plus minusve asperæ sunt & inæquales; unde, si sine extensione tentaretur repositio, fragmenta ad se invicem attererentur, & sic facillime eminentes asperitates detererentur; quæ vel fragmentorum extremis se interponerent, & consolidationem retardarent; vel inde expulsæ vicinas partes membranosas & tendinosas irritare & lædere possent; uti optime monuit *Fabricius ab Aquapendente* (b). Præterea musculi contrahuntur, uti dictum fuit §. 343. simul ac ossis cohæsio, quo diriguntur & sustententur, sublata est: Unde requiritur & illorum extensio, antequam ossa reponi possint.

2. Postquam ossa reposita sunt in situ naturali, si immobilis omnino servari posset pars voluntatis imperio, hoc sufficeret. Sed non advertentibus hominibus, ut in somno v. g. vel etiam invitis per tussim, sternutationem, risum &c. sæpe summi in corpore excitantur motus, per quos ossa reposita facillime iterum loco suo moverentur. Ob hanc causam fasciis, spleniis, ferulis & aliis machinis, pro diversitate partis affectæ, sic firmatur membrum læsum, ut immobile omnino retineatur. Pluribus hominibus accidit primis duabus tribusve noctibus post repositam fracturam, ut membrum affectum in somno subsiciat satis valide, convulsus quasi; unde & tunc cum terrore solent evigilare. Nisi tunc idonea cautela

(a) Decur. 1. A. 2. Observ. 25. pag. 91.

(b) Oper. Chirurg. Lib. IV. de fracturis
cap. 3. pag. 328.

adhibita fuit ossa reposita loco moventur, & de novo reponi debent. Quod in se ipso doluit factum fuisse Paræus (a), dum quadam nocte dormienti tanta vi crur frantum subsiliit, ut ossa fracta loco moverentur; unde debebant post extensionem factam iterum restitui: quod longe majori cum dolore fiebat, quam prima vice.

3. Demonstratum fuit in commentariis §. 343. recrescere ossa fracta & uniri inter se, non interposito glutine, quod separata ossis extrema sua viscositate retineret, sed vera unione substantiæ, simili modo ac in vulneribus partium mollium regenerabantur perdita, & uniebantur divisa. Unde facile apparet, artem hic nihil facere posse, sed solam corporis humani fabricam totum hoc opus absolvere, dum liquida bona per vasa proportionalia apto impetu & debita copia ad locum læsum feruntur. Omnia ergo, quæ in diætæ regimine in vulnerum cura generali dicta sunt, hic conveniunt. Hæcque est ratio, quare in junioribus tam cito consolidatio ossium fractorum observetur; in decrepita senectute tarde, vel non omnino, hoc fit: Quo enim propius suæ origini est corpus humanum, eo velocius observatur incrementum. Unde merito dixit Hippocrates (b): *Aluntur quadam ad incrementum, & ad essentiam; quadam ad essentiam solam, ut senes: quadam præterea & ad robur.* Hinc facile patet, nihil ad calli generationem facere alimenta viscosa, ex cerealibus farinosis in aqua coctis, & glutinosis animalium partibus, quæ laudavit Fabricius ab Aquapendente (c). Imo hæc data potius nocebunt, cum assumpta difficiliter digerantur; imprimis quiescente corpore, & glutinoso spontaneo in primis viis, & deinde in sanguine, originem dabunt; uti demonstratum fuit in commentariis §. 69. Et Hildanus (d) dicit, se observasse in homine quadragenario & bonæ temperiei, cui ab Empirico victus talis ex viscosis præscriptus fuerat, quod in cachexiam inciderit; unde ictero laboravit, aliisque malis, tandemque hydropicus periit. Nec plus expectandum est ab usu laudati adeo ad calli generationem lapidis Osteocollæ, qui cavum in medio habens, quale pro medulla locanda in majoribus ossibus corporis observatur, ossibus specificum remedium credebatur; cum & dura fragili substantia constaret & figuræ quandam similitudinem haberet. Tuto dari posse iners & terrestre hoc remedium certo constat; vires autem habere tantas in calli generatione, nondum probatum est. Hildanus (e) quidem vires ejus extollit, & curæ felicem successum in homine quadragenario cacoehymico, cui utrumque cruris os fractum fuerat, usui hujus lapidis interno & externo adscribit; & in puero quatuordecim annorum sanissimo & sanguineæ temperiei nimiam calli luxuriam imprudenti ejusdem lapidis usui tribuit. Sed certe & sine hujus lapidis usu pulcherrime in adultis fracturæ etiam difficiles sanantur; & in junioribus callus abundat. Ubi vero in senili corpore deficiens natura languet, non confidebat Hildanus solius hujus lapidis usui, sed alia certe magis, efficacia auxilia adhibuit, licet prosperum successum soli lapidi osteocollæ attribuerit (f). Seni nempe septuagenario & decrepito baculi ictu circa carpum manifesta & completa ossium fractura facta fuerat, & jam ante multos annos paralyti ejusdem lateris

(a) Livre XV. Chapit. 25. pag. 346.

(b) De Alimento text. 45. Charter. Tom. VI. pag. 253.

(c) Opera Chirurg. Lib. IV. de fracturis cap. 6. pag. 335.

(d) Centur. 1. Observ. Chirurg. Observ. 92.

pag. 71.

(e) Ibid. Observ. 90. & 91.

(f) Hildan. Observ. Chirurg. Centur. 3. Observ. 90. pag. 275.

laboraverat, neque integre ab hac restitutus fuerat. Repositis ossibus fractis, cum iter suscipere cogeretur Hildanus, curam domesticis suis reliquit: Post mensem rediens, dum examinat fracturæ locum, invenit ex collisione ossium callum nondum factum esse. Optimo & quam maxime nutriente, non viscoso tamen, victu præscripto, dedit lapidem osteocollæ mane & vespere, addito cinamomo; deinde totum brachium unguento aromatico stimulante perunxit quotidie, & post inunctionem emplastro simili, cui lapidis osteocollæ pulverem addebat, textit; hisque auxiliis intra paucos dies nulla aderat ossium crepitatio, & quatuor septimanarum spatio fractura curata fuit. Felicem curam lapidis osteocollæ viribus adscribere placuit Hildano: sed victus optimus languentes vires excitabat, stimulantis unguenti & Emplastri aromatici efficacia motus major in parte affecta nascebatur; hisque simul conspirantibus integra sequebatur curatio. Quantum autem possit levis talis irritatio partis cujusdam corporis humani, ut deficiens nutritio in hac parte restituatur, dictum fuit in commentariis §. 35. n°. 3. Ubi vero vel vitio fracti ossis, vel totius corporis languore, deficit illa vis, qua corpus humanum perdita regenerat, & unit separata, frustra datur osteocollæ lapis; uti ipsius etiam *Hildani* testimonio patet. Fateatur enim candide (a), se frustra hunc lapidem exhibuisse, & externe loco fracto applicuisse in muliere gravida; post partum vero curam optime successisse. Ex his credo satis apparet, similia remedia quidem sine noxa adhiberi posse, sed regenerationem perdiri, & unionem separati, tam in partibus mollibus, quam in ossibus, expectandam esse à natura corporis humani, quæ sibi soli sufficit.

§. 348. **S**I fracta situm proprium retinent, prima indicatio cessat. Si parum divergunt in latera, requiritur extensio parva. Si omnino juxta mutua latera pertracta sunt, requiritur ingens extensio, ut intercepta removeantur, & ut debita longitudo & adaptatio fiant.

SI FRACTA SITUM &c. Accidit aliquando, imprimis hyemali tempore; quando major fragilitas in omnibus corporibus observatur, lapsu vel alia de causa frangi ossa, sic tamen, ut fragmenta maneat in situ naturali; talis fractura cognoscitur imprimis ex causa satis valida prægressa, dolore profundo, & dum, ab utraque parte loci læsi prehenso manibus membrorum, sentitur aliquis motus & crepitatio. Si tunc, comparatione instituta cum parte simili sana, nulla mutatio figuræ deprehendatur (posset enim circumtorquendo partium situs mutatus esse, licet fragmenta contigua essent), patet facile, nullam extensionem nec repositionem hic locum habere, sed tantum requiri ad curationem, ut fragmenta in hoc situ retineantur.

SI PARUM DIVERGUNT &c. Fracto ossæ fit sæpe, ut fragmenta quidem adhuc sibi mutuo innitantur, tamen utrimque pars eorundem ad latera emineat. Vel etiam, licet sibi mutuo in omni fere puncto contigua manserint, tamen sic intorta fuerint, ut partium, ossibus his affixarum, situs & directio mutantur; quod ex læsa figura apparebit. In his casibus non requiritur valida extensio, sufficit enim

(a) Centur. V. Observ. 87. pag. 434.

talís, per quam fragmenta parum tantum à mutuo contactu removentur, ut sine attritu superficierum possint in debitum situm reponi.

SI OMNINO JUXTA MUTUA LATERA &c. Tunc enim longitudo membri in tantum minuitur, quantum fragmenta supra se mutuo effleruntur; unde requiritur, antequam restitutio fieri possit, talis extensio, per quam partes omnes ultra naturalem longitudinem parum distrahuntur, ut sine partium vicinarum interceptione, & sine attritu ossium ad se mutuo, fragmenta reponi possint. Unde *Celsus*, postquam descripsit signa, quibus talis fractura cognosci potest, dicit: *Ergo, si hoc depreñsum est, protinus id membrum oportet extendere. Nam nervi musculique, intenti per ossa, contrahuntur: neque in suum locum veniunt, nisi illos per vim aliquis intendit (a).* Et postea addit: *Ubi vero paulo longius, quam naturaliter esse solet, membrum vis fecit, tunc demum ossa manibus id suam sedem compellenda sunt &c.* Neque adeo facile in nimia extensione peccatur, imprimis si majora ossa fracta fuerint. Sic *Hippocrates (b)* de femoris osse fracto agens, validam extensionem fieri jubet; additque, non lædi partem, licet plus justo intendatur. Et alibi (c) monet, plerosque minus extendi quam decet; puerum vero se vidiisse plus justo intensum. In juniori ætate enim molliora omnia sunt; hinc validissima extensione ultra naturalem longitudinem multum distrahi possent, quod in adultis non facile timendum est; imprimis si majora ossa fracta fuerint. Validi enim musculi & tendines nimiam distractionem facile impediunt. Præterea peritus Chirurgus manibus palpando locum fractum poterit detegere, an sufficit extensio facta, an vero adhuc validior requiratur. Unde omnes Chirurghi in similibus fracturis validam extensionem jubent: & *Paræus (d)*, dum crus ejus fractum debebat reponi, sollicitè monebat Chirurgum, ne sibi parceret; & rogabat, ut hoc tempore oblivisceretur, se amicum curare. Quam valida autem requiratur aliquando extensio in difficillimis casibus, sequens historia docet. *Juveni cruris dextri tibia & fibula prope talum sic fracta fuerant, ut ossium extrema ad binorum circiter pollicum longitudinem per integumenta emerent. Per septem horas sic jacuerat miser, antequam Chirurghi adesse poterant; unde summa jam membri fracti accurtatio, & tumor vicinarum partium, aderant. Magnum simul vulnus hanc fracturam comitabatur, & ingenue fateretur celebris Chirurgus (e), quod tantam extensionem fecerit ad reponendum ossa fracta, ut alter, qui ipsi opem ferebat, Chirurgus moneret sapius, caveret, ne pedem avelleret. Quomodo autem extensio membri fracti commode fieri possit, & quibus legibus, sequens docebit paragraphus.*

§. 349. **E**X T E N S I O fit. 1. apprehenso osse prope fracturam manu, vel laqueis. 2. firmato agro. 3. disposita parte in situ naturali. 4. distractione lenta, recta, partium fractarum ea vi, eoque prout vis contractorum musculorum requirit. 5. vi & applicatu instrumentorum mechanicorum; si robur manus deficit.

1. Si nihil impediat, prope locum fracturæ manibus prehendendum est mem-

(a) A. Corn. Celsi Medicin. Lib. VIII. cap. 10. pag. 532.

(b) De fracturis Textu 68. Charter. Tom. XII. pag. 222.

(c) Textu 19. ibid. pag. 167.

(d) Livre XV. Chapit. 23. pag. 344.

(e) De la Morle, Traité complet de Chirurgie, Tom. IV. pag. 253. &c.

brum affectum. Vulnus, ingens contusio, musculi loco suo moti, & miro sæpe modo mutantes partis figuram, aliquando vetant, ne in vicinia fracturæ ulla vis adhibeatur. Cum autem Chirurgus, qui ossa fracta reponet, non posset ipse extensionem membri fracti simul facere, nisi in minoribus ossibus, ut v. g. digitorum phalangis &c; indiget ad hanc rem ministris, qui hanc extensionem facient, dum ille ossa fracta in situm reponere tentat. Chirugi peritissimi in gravioribus casibus ideo alios Chirurgos in auxilium vocant imprimis, ut debita extensio ab exercitatis fiat, qui noverunt hanc quam æquabilissime perficere; illud enim quam plurimum ad felicem restitutionem facit. Quia autem pars sæpe satis diu debet extensa retineri, antequam in debitum situm ossa fracta reponi possint, ideo illi, qui partem extendent, debent sic locari, ut satis diu sine molestia in eadem corporis positura manere possint; aliter enim turbaretur operatio. Omnium optimum est manibus extensionem facere, quia melius sic dirigitur, & facilius percipitur, si a rectitudine deviet: si autem crassities membri fracti impediat, quo minus manibus firmiter prehendi utrimque possit, uti v. g. in fractura ossis femoris; tunc laqueis utrimque prehenfam partem extendere oportet. Ideo Celsus (a) dixit: *Intendere autem digitum vel aliud quodque membrum, si adhuc tenerum est, etiam unus homo potest, cum alteram partem dextra, alteram sinistra prehendit. Valentius membrum duobus eget, qui in diversa contendunt. Si firmiores nervi sunt, ut in viris robustis, maximeque in eorum feminibus & cruribus evenit, habenis quoque vel lineis fasciis utrinque capita articularum deliganda, & per plures & in diversa ducenda sunt.*

2. Nunquam debet tentari repositio ossis fracti, nisi æger vel ligaturis vel à ministris idoneis retineatur immobilis. Nec confidendum hic facile magnanimitati & robori ægri, cum sæpe dolor acerbus ab extensione membri fracti ortus cogeret vel fortissimum quemque, ut invitus resisteret & impediret operantes.

3. Situs naturalis partium dicitur ille, qui in homine quiescente adest, & imprimis in dormiente; tunc enim omnes motus voluntarii cessant, & partes sua sponte maxime naturali situ disponuntur. Nunquam tunc articuli extensi sunt, nunquam omnino inflexi, sed leviter tantum. Dum autem partes in hoc situ naturali sunt, musculi omnes minime tensi sunt: si ab hoc situ, etiam contra voluntatis imperium, pars removeretur musculi illi, qui per voluntatem sic poterant mutare situm partis, turgebunt. Sic v. g. validus musculus Deltoides brachium elevat; si vero brachium cujusdam ab altero homine attollatur, turgebit manifeste idem musculus, licet non tam fortiter, quam si per voluntatis imperium brachium elevaretur. Sed dum extendetur membrum fractum, ut ossa reponi possint, debebunt elongari musculi, quod ergo longe minori vi fiet, si musculi flaccidi fuerint, & contra longe validiore distractione opus erit, si iidem musculi turgeant. Præterea, si distensio membri fiat, dum illud non hæret in situ naturali, debet postea repositis ossibus in situm naturalem reponi, quia in alia positura non poterit diu manere sine dolore: sed tunc mutabitur situs partium, & sæpe ex suo loco ossa iterum recedent. Hoc valuit Hippocrates (b), dum dixit: *Ex quiescente vero ac remisso rectitudines (ἰσότης) spectanda sunt, velut in manu.* Et Galenus

(a) Lib. VIII. cap. 10. pag. 531.

(b) De Medici Officina Textu 31. Charter. Tom. XII. pag. 87. 88.

in Commentariis suis in hunc textum dicit: *Quibus in figuris, quum otiamur, partes habere consuevimus, hæ in curationibus eligenda sunt.* Et paulo post pro exemplo manuum situm naturalem describens addit: *Itaque, si homines otari consideraveris, plerumque manus inter summam extensionem & extremam flexionem non plane medias reperies, sed quæ ad extensionem propendeant.* In ipso vero initio libri de fracturis Hippocrates (a), postquam monuit, debere Medicum tum luxationum, tum fracturarum, intensiones quam rectissimas facere, agens de manu fracta, dicit: *Plerumque nihil peccare illos, qui nihil prævio consilio faciunt, ipse enim deligandus manum porrigit, ita coactus à iusta natura; solos autem illos peccare, qui sibi plus sapere videntur.* Postea satis prolixè improbat illorum opinionem, qui manum pronam deligabant; & longe magis culpât illos, qui supinum manus situm eligebant, cum longe adhuc magis incommoda sit hæc positura. Monet deinde pulcherrime, quod dum quidam extensam manum deligaverant, plures alios dolores, ipsa læsione majores, excitaverint; dumque postea flectere jubebant, nec ossa, nec nervi, nec carnes eodem habitu amplius consisterent, sed superata vinculi firmitate in situ mutarentur. Et alibi (b) de fractura brachii agens dicit: *Si autem quis brachium extendens in illa positura deliget, brachii musculus tensus alligabitur, postea autem, ubi sic deligatus cubitum flexerit, musculus brachii aliam posituram habebit.* Patet ergo, quanti momenti sic hæc regula in fracturis curandis. Sic v. g. ossis humeri naturalis positura est parallela corporis trunco, dum nulli muscoli agunt: ubi ergo illud fractum fuit, tali in situ debet poni dum extenderetur. Si ossa cubiti fracta fuerint, cubiti articulo leviter flexo, manus situs inter pronum & supinum medius esse debet. Idem de reliquis verum est.

4. Festinatio hic semper nocet: requiritur enim, ut fragmenta ossis, quæ juxta mutua latera pertracta fuerunt, sine ulteriori partium læsione iterum in situm suum redeant. Nisi autem recta extensio fiat, fragmenta hæc lædent inagis vicinas partes. Distractio autem hæc lente debet fieri, quia muscoli contracti, & sæpe contorti, non possunt simul & semel elongari valida vi sine convulsione metu. Unde extensio membri fracti sensim augeri debet quam æquabilissime; sic enim partes contractæ omnium tutissime elongabuntur. Ideo Hippocrates (c) in restitutione brachii fracti voluit, ut ligno vel alio simili fulcro sub ala transmissio homo fere suspendatur; saltem sic ponatur, ut vix sedere possit, deinde cubito sic flexo, ut rectum angulum cum osse humeri faciat, lorum molle circumponatur, & inde pondus grave suspendatur, quo moderate extendi posset pars affecta: deinde addit, quod robustus homo ponderis vicem supplere posset, deorsum trahens partem affectam. Facile autem patet, quod homo partem trahens imitari debeat, quantum possibile est, æquabilem illam vim, qua pondus appensum partem elongat. Limes autem extensionis est, quando paulo longius, quam naturaliter esse debet, membrum vis fecit, uti dictum fuit ex Celso in præcedenti paragrapho; tunc enim poterunt fragmenta in situm reponi sine attritu ad se mutuo, vel interceptione partium vicinarum. Neque facile peccari posse nimia extensione, imprimis in majoribus ossibus fractis, ut femoris v. g. ibidem ex Hippocrate probatum fuit. Majori autem minorive extensione opus erit, prout validioris mus-

(a) Charter. Tom. XII. pag. 153. &c.
(b) Ibid. pag. 83.

(c) De Fractur. Textu 3. Charter. Tom XII.
pag. 189.

culi ossibus fractis affixi fuerint; ab illorum enim contractione accurtatur membrum. Unde de femoris ossis fracturis dixit *Celsus*: *Neque tamen ignorari oportet, si femur fractum est, fieri brevius, quia nunquam in antiquum statum revertitur: summisque digitis postea cruris ejus insisti: ex quo multa debilitas est; fœdior tamen, ubi fortuna negligentia quoque accessit (a).* Posset tamen aliquando nimia extensione, imprimis si instrumentis mechanicis fiat, lædi partis ulus, nimis distractis musculis; unde illorum debilitas sæpe nasci posset, uti probatum fuit in Commentariis §. 25. n°. 3. Dum autem peritus Chirurgus locum fractum manibus tangit, cum extensio sit, facile poterit percipere an extensio facta sufficiat, an vero adhuc validior requiratur.

5. In osse femoris fracto reponendo in hominibus adultis & robustis sæpe deficit manuum robur, unde ab omni tempore machinas tunc adhibuerunt. Hippocrates ipse (b) varias describit, ut cruris vel femoris ossa restitui possent, ubi manibus hoc perfici non poterat: monet tamen, inanem ostentationem esse uti machinis, si res non exigat. Variæ tales machinæ apud *Paræum*, *Fabricium ab Aquapendente*, in *Actis Academia Regia Scientiarum &c.* depinguntur, in quibus omnibus fere partes firmatæ cochleis circumductis elongantur pro lubitu. Requiritur in his, ut æquabilissima tractio fiat, non per subultus, & directio talis sit, ut secundum rectitudinem agere possint.

§. 350. QUÆ (348. 349.) quum sine vi & dolore sæpe vix fieri queant, ubi partes jam inflammatæ, sæpe omitti debent, donec sedata inflammatio. Aliter convulsi moriuntur, vel gangræna correpti.

Si diu fracta fuerint ossa, solet magnus tumor nasci, quem dolor acutus & valida inflammatio comitantur sæpissime. Sed omnis extensio membri fracti, siue manibus siue machinis fiat, requirit satis validam vim, & rudiorē attactum partis affectæ. Crudele autem foret, partem jam inflammatam valide & dolen- tissimam sic vexare, cum ob doloris acerbiteriam summam convulsiones metuen- dæ sint, & à partis inflammatæ rudiori tractatione gangræna exspectanda. Unde prudenter monuit *Celsus* (c), postquam jusserrat membrum, fractum debere exten- di: *Rursus, si primis diebus id omissum est, inflammatio oritur, sub qua & difficile & periculose vis nervis adhibetur, nam distentionem nervorum vel cancer sequitur, vel certe, cum miuissime agitur, pus.* Itaque, si ante ossa reposita non sunt, post eam reponenda sunt. Et Hippocrates (d) de ossibus fractis, quæ per cutim emerse- rant, restituendis agens, pariter monet, non laceissendas esse partes, ubi inflam- matio adest; unde eodem die vel postridie hoc tentari posse dixit: sed non ter- tio, quarto, vel quinto die; tunc enim major metus est convulsionum, si os res- tituatur, quam si relinquitur. Simul addit, admodum angustam spem superesse, si reposito osse convulsio succedat; tuncque præstare dicit, ut iterum os expella-

(a) A. Corn. Celsi Medic. Lib. VIII. cap. 10. pag. 537.

(b) De Fracturis Charter. Tom. XII. pag. 209, 213.

(c) Lib. VIII. cap. 10. pag. 531.

(d) De Fracturis Charter. Tom. XII. pag. 252, 253.

tur, si sine magna molestia fieri possit. Voluit tunc expectandum esse, donec septem vel paulo plures dies transierint, tuncque tandem, si febris & inflammatio absint, tentandam esse repositionem. Et in alio ejusdem libri loco (a) agens de illis fracturis, in quibus femoris humerive os excessit, monet, sic nervos venas & musculos lacerari; & quod, si reponantur, soleat convulsio sequi; magis vero evadere illos, quibus nequidem tentatur horum ossium repositio.

Ubi ergo vel ob ingentem lacerationem partium vicinarum, vel ob nimiam moram, antequam cura adhiberi potuit, magnus tumor, dolor, & valida inflammatio partem occupant; certi sumus, rudiori tractatione gangrænam vel convulsionem metuenda esse. Antequam ergo repositio tentari possit, requiritur, ut hæc symptomata tollantur, vel saltem mitigentur plurimum. Valida tunc venæ sectio, fomenta vel cataplasinata mollissima parti læsæ applicata, interna remedia antiphlogistica, largus satis diacodii usus, hac spe adhibentur, ut minuantur dolor & inflammatio, & tumor partis subsideat. Pro re nata hæc auxilia repetuntur, donec effectus respondeat medentium votis; & tunc tandem, non prius, repositio tentari potest. Si vero his omnibus adhibitis symptomata maneant æque vehementia, vel & augeantur, prudentia postulat ut nihil tentetur ulterius, sed tunc sola exstirpatio membri superest, si metuat sphacelus: vel relinquenda sunt ossa fracta, totumque opus soli naturæ committendum est. Unde, uti dictum fuit in commentariis §. 343. Hippocrates monet Medicos, ut fugiant tales casus, si sine ignominia possint. Si enim non reponantur ossa fracta, arte destitutus Medicus videbitur; si vero reponantur, ægro magis ad interitum, quam ad salutem est.

Quamvis autem ossa fracta, si fieri possit, quam citissime reponi debeant, tamen etiam post plures dies non desperanda est illorum reductio. Hippocrates (b) de fractura ossium cubiti agens, dicit, postquam methodum deligandi membra fracta descripserat: quod septima die locus fractus jam adeo gracilis fiat, subsidente omni tumore, ut ossa fracta facillime moveri & in debitum situm redigi possint, si inde recesserint, vel non bene adaptata fuerint in initio. Unde patet, post tantum temporis intervallum adhuc dirigi posse & consolidari ossa fracta.

§. 351. **S**I fragmenta libera, eximenda, si facile fieri queat. Si sacumina eminentia extensionem plane prohibent, & patent, excindenda; si latent, incisione detegenda prius. Si fractura composita valde & complicata, imprimis cum ingenti simul contusione, ossium contritu, vasorum magnorum destructione, requiritur ilico, si nihil vetat, exstirpatio.

Magnam molestiam in fracturis curandis faciunt fragmenta & festuæ ossæ; imprimis si acutæ lædant vicinas partes. Satis frequenter hoc accidit, ubi tibia & fibula simul fracta sunt; & satis patet, pessima inde fieri posse mala, si extendendo membrum fractum his aculeis irritentur muscoli vicini, vel tendines. Un-

(a) Ibid. pag. 257.

(b) De Fracturis Text. XLI. Charter. Tom. XII. pag. 178.

de merito concluditur, hæc tollenda esse, imprimis si undique à cohaesione libera fuerint; tunc enim instar corporis heterogenei curationem impediunt. Semper tamen prius examinari debet, an eductio talis fragmenti sine difficultate & magna irritatione partium fieri possit: aliter potius relinquenda forent, sponte enim postea hæc separabuntur & expellentur. De his agens Celsus (a) dicit: *Si id majus est, membranulisque cingitur, sinere oportet has sub medicamentis resolvi.* Illis autem celerissime abscedere hæc fragmenta monuit Hippocrates (b), quibus celerrima suppurationes sunt, & quibus celerrime ac optime caro increfcit: Etenim incrementum carnes in parte vitata ut plurimum ossa attollunt. Et in alio loco (c) agens de illo casu, ubi præter expectationem aliquid abscedet ab osse dicit: *signum esse ossis abscessuri, si pus copiosius ex ulcere profluat, & quasi ad exitum festinet* (ω ὀφείλει εἶναι). In se ipso prædixit Paræus, (d) ossa abscessura, dum tenuis & crudus ichor exiret de vulnere, & labia tumerent, carnesque molles instar spongiæ apparerent. Quanta autem fragmenta sic aliquando folius naturæ ope separantur, patuit Exemplo in commentariis §. 343. allegato.

SI ACUMINA EMINENTIA &c. Aliquando accidit, ipsa ossis fracti extrema acuta esse, quod genus fracturæ pessimum esse merito dixit Celsus (e), quia non facile in situ retineri possunt, ubi reposita sunt, & vicinas partes vulnerant. Si tunc extensio membri fracti ab his acutis eminentiis prohibeatur, nil superest, quam ut abscindantur; si nempe emineant. De his agens Celsus dixit (f): *si acutum, ante acumen ejus, si longius est, præcidendum; si brevius, limandum, & utrumque scalpro levandum: tum ipsum recondendum est &c.* Et Hippocrates (g) monuit, eminentia ossa præcidenda esse in fracturis, si nempe noxia sint, carnes vulnerent, aut molestiam afferant, vel nuda sint: deinde dicit: *Reliqua vero non multum refert, præcidantur nec ne: scire enim certo licet, ossa, quæ ex toto carne nudata sunt, & arida, omnia penitus abscessura: A quibus autem squama separabitur, illa præcidere non oportet &c.* Imo eadem hæc fragmenta, si vicinas partes læserint, & debitam extensionem membri fracti impediunt, interim tamen sub integumentis lateant, his discissis tollenda sunt, licet hoc crudele videatur. Vulgo solet credi, Chirurgos, artis suæ exercitio induratos, proximi miseras sæpe nimis vilipendere, & ferro igneque uti aliquando in talibus casibus, ubi mitior cura, quamvis forte tardior, æque tuta fuisset. Ubi autem ipsi similibus calamitatibus affliguntur, tunc saltem vix credibile videtur quod crudelem curam mitiori præferrent, nisi gravissimas ob causas. Sed Paræus pessimam cruris fracturam passus, expertissimum Chirurgum, qui ipsi aderat, serio monuit, ne parceret amico, sed vulnus novacula dilataret, ut ossa commodius restitui possent, & digitis educi fragmenta, quæ undique à vicinis partibus libera inveniebantur (h).

SI FRACTURA COMPOSITA VALDE &c. Si tanta fuerit laceratio & destructio partium, ut omnis vitalis humorum per partes circuitus abolitus sit, nul-

(a) Lib. VIII. cap. 10. pag. 540.

(b) De Fracturis Charter. Tom. XII. pag.

254.

(c) Ibid. pag. 240.

(d) Livre XV. Chapit. 25. pag. 346.

(e) Lib. VIII. cap. 7. pag. 524.

(f) Ibid. cap. 10. pag. 539.

(g) De Fracturis Charter. Tom. XII. pag.

256.

(h) Ambr. Paré Livre XV. Chapit. 23. pag.

344.

a amplius spes superest ; brevi enim corrumpentur omnia : unde tunc unicum remedium est partis sic affectæ extirpatio ; si spes sit, salva vita illam institui posse. Omnis enim separatio corrupti, & unio illorum, quæ soluta sunt à cohesione, à sanis humoribus per vasa bona allatis pendet. Ubi ergo vasis majoribus læsis, vel destructa per ingentem contusionem partem fabrica, tollitur humorum motus per partes læsas, nil boni sperari potest. Notandum tamen quam maxime, non tentandum esse ultimum hoc & periculosum adeo auxilium, priusquam omnino certi sumus nihil vitale amplius in parte superesse. Mirabiles enim casus docuerunt, rediisse aliquando vitam in partibus, quæ omnino mortuæ credebantur. Unde præstat saltem per unum alterumve diem expectare, interimque partem læsam fomentis antisepticis sic munire, ut non putrescat. Talia enim habemus in arte remedia, quibus confidere possumus, uti in cura contusionis dictum fuit. Ut autem demonstretur, etiam in pessimis fracturis non statim ad extirpationem veniendum esse, sufficiet mirabilis casus, cujus facta fuit mentio in Commentariis §. 343. Homini currus aliquot librarum millibus onusti rota supra crus transiens tibiam & fibulam miserrime fregerat, cum tam valida contusione & dilaceratione partium, ut uno alterove forficis ictu tota pars extirpari potuisset quam facillime. Ossa omnibus tegumentis nuda erant, ingens Hæmorrhagia debilitaverat ægrum, omnia vicina pessime confusa tuebant immaniter ; vixque ulla spes apparebat, posse sustineri diu vitam in hac parte tam enormiter læsa. Restitutis tamen ossibus sequebatur ingens suppuratio, tumor aderat ingens, & cadaverosus odor pessima quævis metuenda esse indicabat. Unde non sine ratione peritissimus Chirurgus in consilium vocatus extirpationem suadebat. Alter tamen, qui ab initio curæ præfuerat, confidens ægri robori & bonæ temperiei, cumque simul anni tempestas faveret, nulla febris adesset, neque magnus dolor, distulit anceps hoc & crudele remedium, partemque læsam vino ejusque spiritu continuo fovens arcebat omnem putredinem. Post binos menses separabatur ingens portio ossis tibiæ, dum interim fibulæ fragmenta consolidata fuerant. Amissa tibiæ pars bono callo restituta fuit, & anni spatio integra cura facta fuit, post tam enormem læsionem superstiti integro partis usu, sine ulla deformitate (a).

§. 352. **R**ESTITUTIO fit partem rite extensam (349.) ; & paratam (351.), caute, lente, leniter ita intorquendo, donec os ossi debito in loco occurrat, musculi vero revulsi suo in situ sint repositi, nihilque intercipiatur.

Chirurgus, qui curæ præest, aliis Chirurgis præsentibus, vel ministris, extensionem partis fractæ peragendam quidem tradet, sed repositionem partis rite extensæ ipse perficere debebit. Ab hac enim tota curæ pulchritudo pendet. Ideo Hippocrates (b) monuit, ita ægrum collocandum esse, ut pars affecta lumbi sic exponatur, ut in extensione partis non lateat manu operantem, num satis in directum sit posita. Si tunc eo usque extensio facta fuerit, ut ossa, quæ supra se mutuo efferebantur, possint sine læsione partium vicinarum iterum ia

(a) Traité complet de Chirurgie par M. de la Moitte, Tom. IV. pag. 284 — 290.

(b) De Fracturis Textu 17. Charter. Tom. XII. pag. 166.

pristinum situm reduci, manibus oberrando circa locum fracturæ illa quæ loco mota sunt, dirigit Chirurgus & reponit. Imprimis hic notandum est, non sufficere, ut fragmenta iterum sibi mutuo insistant, sed requiri, ut illum omnino situm obtineant, quem ante fracturam habuerant. Osse v. g. humeri fracto, possent fragmenta sic sibi adaptari, ut penitus intortum esset brachium, & omnium musculorum adjacentium situs & directio mutarentur; unde magna deformitas & depravatio usus partis affectæ sequerentur. Magna ergo hic cautela opus est, neque festinandum nimis; difficulter enim postea corrigi poterit error semel commissus. Dum autem debita extensio facta fuit, simulac remittitur pars extensa, muscoli ossibus affixi sua contractione solent in debitum situm redigere fragmenta; vel, si devient aut intorta fuerint, poterit peritus Chirurgus leviter intorquendo vel premendo illud corrigere.

Simul notandum est, partem extensam non simul & semel, sed sensim, debere remitti; aliter enim periculum foret, ne aliquid de partibus vicinis forte interciperetur inter ossis fragmenta, dum sibi mutuo applicantur; unde impediretur fragmentorum coalitus; dolor, inflammatio & alia pessima symptomata sequerentur, uti facile patet.

§. 353. **I**D notescit ex anatomicis, comparatione partis sanæ, dolore sublato, longitudine & figura naturali reddita.

Postquam in situm suum reposita esse ossa fracta creditur, antequam deligatio fiet, prius sollicitè examinandum est, an quidem repositio sic facta fuerit, ut fragmenta & aliæ partes vicinæ naturalem situm obtineant. Solentque tunc Chirurgi Medicum præsentem rogare, ut illud examinet. Cognoscitur autem hoc

EX ANATOMICIS. Inde enim ossium situm & figuram novimus: & in illis locis, ubi ossa nuda facile tangi possunt, v. g. si tibia fracta fuerit, digitis oberrando secundum totam longitudinem spinæ ossis tibiæ facile detegitur, an ossa fracta devient à naturali situ, an non. In aliis vero locis, ubi crassis musculis ossa reguntur, non adeo facile hoc sic determinari poterit.

COMPARATIONE PARTIS SANÆ. Maximi momenti hoc signum est, cui confidere licet, ut certa habeatur cognitio, ossa fracta bene reposita esse. Si v. g. cruris ossa fracta fuerint, illis repositis crus affectum cum altero crure sano conferendum est, & sollicitè examinandum, an in utroque membro iisdem in locis similes prominentiæ, cavitates &c. occurrant. Musculi enim ossibus affixi sua mole & politura figuram membri faciunt; quæ ergo si eadem omnino appareat in membro læso & sano, certi sumus omnes partes debitum situm obtinere. Hoc etiam videtur indicasse Celsus (a) dicens, postquam ossa in suam sedem restituta fuerant: *At membrum alteri æquatum, involvendum duplicibus triplicibusve pannis &c.*

DOLORE SUBLATO. Dum fragmenta supra se mutuo efferuntur, non potest hoc fieri, quin vicinæ partes premantur, & distrahantur; & si acuta fuerint fragmenta, earundem laceratio & punctura sequuntur necessario: unde facile patet ratio, quare tam enormis dolor fracturam ossium comitetur sæpe. Simul

(a) Lib. VIII. cap. X. pag. 552. 553.

ac autem ossa reposita sunt, cessat hujus doloris causa; unde statim dolor omnis abest, vel saltem insigniter minuitur (aliquando enim à valida contusione aut laceratione partium aliquis dolor manet, postquam optime etiam reposita sunt ossa): simul etiam certi sumus, nihil interceptum fuisse inter fragmenta reposita, si dolor cessat. Unde absolute posuit Celsus: *Indicium ossis repositi est dolor sublatu* (a).

LONGITUDINE ET FIGURA NATURALI REDDITA. Quod cognoscitur, comparando partem læsam cum parte sana. Si enim fracta ossa *non adversa, sed obliqua junguntur* (quod fit, ubi loco suo non sunt), *membrum id altero latere brevius est, & musculi ejus tument* (b).

In comparanda autem longitudine membri fracti magna attentione opus est; cum aliquando acciderit, peritissimos etiam in hac re falli. Homini femoris os circa cervicem ejus ruptum fuerat, unde primo pro luxatione habebatur hæc fractura. Repositis in situm (ut credebatur) naturalem fragmentis, comparabant Chirurgi longitudinem partis læsæ cum parte sana, & inveniebant, partem læsam breviorē esse: sed quia sine ulla vi poterat ad eandem longitudinem cum parte sana reduci, nihil mali suspicabantur. Peracta ramen curatione homo claudicabat, & membrum fractum brevius apparebat altero sano. Dum in lecto decumbentem examinabant iterum, & utrumque crus extendebatur, sine difficultate ad eandem longitudinem poterat membrum læsum reduci. Inventum tunc fuit, quod os ilium ejusdem lateris descendebat, dum extendebantur crura, & sic fallax apparebat æqualitas, dum lumborum flexibilitas facile permittit, ut una cum femore os ilium deorsum iret. Unde in tali casu, dum comparatur longitudo partis læsæ cum parte sana, debet Chirurgus certus esse, ossa ilii ab utroque latere in eadem altitudine esse posita (c). Potest enim æger, ut dolorem evitet, os ilii unius lateris attollere vel deprimere.

§. 354. **R**ETENTIO in situ fit fasciis, spleniis, ferulis, canalibus quietem conciliando, tum impediendo & dirigendo actionem muscutorum.

Longe difficilior est sæpe in situ retinere ossa jam reposita, quam vulgo creditur, & in hac parte curæ fracturarum peritia & dexteritas Chirurgi imprimis apparent. Musculi enim ossibus affixi sua actione poterunt fragmenta ex situ naturali remove: tussi, sternutatione, motu membri læsi tempore somni &c. simile infortunium accidere poterit, uti in se ipso factum doluit Paræus (d), dum dormienti musculis convulsis valida vi attolleretur crus fractum, unde statim fragmenta à mutuo contactu removebantur, quæ nova extensione facta iterum debebant reponi, non sine summo dolore, quem inflammatio, febris, & suppurationis sequebantur. Unde requiritur, ut sic firmetur membrum læsum, ut immobile omnino sit. Hoc autem fit

(a) Ibid. pag. 531.

(b) Ib. dem.

(c) Académ. des Sciences l'an 1722. Mém. pag. 450. 451.

(d) Livre XV. Chapit. 25. pag. 346.

FASCIIS. Variæ adhibentur membris fractis fasciæ, prout nempe diu relinquatur, vel sæpius debet renovari apparatus. In fractura simplici spiralis fascia unius vel duorum capitum sufficit (a). Ubi autem vulnus, contusio valida, inflammatio &c. fracturam comitantur, incommodum foret quotidie hunc apparatus solvere, ut tractari possit locus affectus; cum deberet attolli membrum læsum, ut fascia spiralis circumducta auferri, atque iterum applicari posset: quod vix fieri poterit line periculo separationis fragmentorum à se invicem. Ideo aliam Methodum excogitaverunt Chirurghi: fasciam nempe libriformem vel octodecim capitum dictam adhibent, quæ ex tribus linteis, sibi mutuo impositis, & utrimque binis scissuris in tria capita divisus sit; sic tamen ut illud linteum, quod membrum læsum tangit, brevius sit, sequens parum longius, extimum iterum longitudine superet medium. Oxycrato vel simili liquido madens hæc fascia libriformis supponitur parti læsæ, & deinde capita primi lintei supra se mutuo parum decussatim ponuntur, à mediis capitibus incipiendo; postea eodem modo & reliquorum linteorum capita uniuntur. Unde requiritur, ut horum linteorum longitudo partis affectæ crassitiem superet, nec nimis tamen. Melior tamen idea talis fasciæ habetur ex figuris Auctorum, quam ex descriptione: videatur *Heisterus* (b) & alii, qui de hac re scripserunt. Quamvis autem recentiorum inventis hæc fascia annumeretur, videtur tamen apud Hippocratem similis fere describi (c). Ubi enim exspectabat, majus aliquod fragmentum abscissurum esse, jubet, ut duplices panni sumantur dimidiam spithamam, non minus; lati, quoad longitudinem paulo breviores, quam ut bis membrum fractum complectantur, multo tamen longiores, quam ut semel: totque numero sint, quot res postulat. Intinctos hos pannos vino nigro austero voluit medios applicari loco affecto, uti fasciæ duorum capitum solent; deinde permutando capita, dextrum versus sinistram, sinistram autem versus dextram partem (*ὑποκίεον*) procedere, neque ullo modo adstringi hæc jubet, sed sic insidere, ut ulcus fulciant. Galenus in Commentariis suis hunc textum Hippocratis explicans satis similem fasciæ, libriformis dictæ, descriptionem habet. Celsus tamen in cura fracturæ, quam carnis vulnus comitatur, similis fasciæ nullam mentionem facit; sed tantum monet, laxius deligandam esse partem, quam si ea plaga non esset; & numero potius fasciarum id agendum esse, ut laxæ quoque æque contineant (d). Pulcher usus fasciæ hujus in eo consistit, quod immoto membro fracto commodissime possit renovari apparatus ad curam vulneris requisitus.

Illas autem proprietates, quæ in omnibus fasciis requiruntur, pulchre recensuit Hippocrates (e) dicens: *Fascia paranda sunt leves, tenues, molles, munda, lata, nulla futuras, neque eminentias habentes, satis valida, ut extensionem ferant, pauloque fortiores, non arida, sed succo madentes, quo quaque inebriari consueverunt.*

Facile patet, fasciam illam, quæ libriformis dicitur, non tam valide firmare partem fractam, quam illa, quæ spiralibus gyris circumducitur; sed vulnus aut ulcus, vel ingens contusio fracturam comitans, validam compressionem minime

(a) Heister Institut. Chirurg. Tab. 2. lit. b. c.

(b) Institut. Chirurg. Tab. IX. fig. 4. & Tab. XXXVIII. fig. 25. & pag. 1244.

(c) De Fracturis Charter. Tom. XII. pag. 241. &c.

(d) A. Corn. Celsi Medic. Lib. VIII. cap. 10. pag. 539.

(e) De Medici officina Charter. Tom. XII. pag. 62.

ferrent, unde tunc libriformis illa fascia sufficit. Spiralis autem fascia hunc usum imprimis habet, ut æquabili pressione fragmenta reposita in situ retineat, & solent ideo fracturæ loco primum fasciæ gyrum circumducere Chirurgi; & si v. g. primam hanc fasciam à sinistra parte in dextram circumduxerint, postea aliam fasciam, iterum à fracturæ loco incipiendo, à dextra parte in sinistram circumvolvunt, ut fiat maxima æquabilitas pressionis, illaque imprimis in fracturæ locum agat. Quæ omnia iterum pulcherrime descripsit Hippocrates. De cubiti enim osium fracturis curandis agens (a) dicit: *Postea oportet fascia deligare, principio supra fracturam injecto, sic ut firmet quidem, non tamen vehementer comprimat. Ubi bis vel ter sic fasciam superduxerit, ad superiora distribuatur, quo sanguinis affluxus intercipiatur, ibique desinat. At primas fascias minime longas esse oportet, secundarum vero initium supra fracturam injiciendum est, at semel circa illam revolvatur, tum deorsum demittatur, lenius adstringatur, atque ex majori intervallo circumdetur &c.* Ubi & plura alia utilissima circa fasciarum usum monita habentur; uti & apud Celsum (b).

SPLENIIS. Monuerat Hippocrates (c), quod probe nosse oporteat, omnem fasciam ad declivia & acuminata diffugere, ut in capite sursum, in tibia deorsum, Ideoque alibi (d) dixit, *qua extremitate tenuantur, spleniis aquanda sunt in orbem datis &c.* Illum ergo usum splenia imprimis habent, ut idoneo loco posita partis affectæ figuram reddant cylindricam, ut fasciæ firmitus hæerere possint, neque sponte versus tenuius membri extremum delabantur. Præterea, dum ossis femoris fracti extremum v. g. versus exteriorem partem excessit, poterit spleniis applicatis sic determinari fasciæ circumductæ pressio, ut magis agat in illum locum, sicque impediatur, ne facile musculorum actione, vel alia de causa iterum loco moveantur ossis fracti partes. Quantum præterea usum habeant splenia in dirigendo & impediendo musculorum actionem, statim dicetur.

FERULIS. Licet spleniis appositis, fasciisque circumductis, pars læsa quam optime munita fuerit, non poterit tamen sic caveri, quo minus in fracturæ loco flecteretur membrum, si in somno v. g. forte moveretur; unde turbaretur situs partium repositarum. Ob hanc causam Chirurgi membro fracto, spleniis & fasciis jam munito, circumponunt in tota fere longitudinem assulas, ex charta crassiori (bortpapier) vel ex tenui ligno factas, ut hoc impediatur. In his requiritur talis firmitas, ut cavere possint flexuram in fracturæ loco; simulque possint utcumque accommodari figuræ partis læsæ, sintque simul adeo leves, ut pondere non obsint. Quia autem ferulæ caulis cavus, levis admodum, & interim satis firmus, à veteribus ad hunc usum adhibebatur, ideo ferulas vocaverunt.

De illis agens Hippocrates (e) dixit: *Ferula autem sint leves, aquales, in extremis sima, hinc & illinc parum minores deligatione; crassissima autem, qua exstat fractura.* Leni tantum ligatura firmantur ferulæ, quia non applicantur, ut premant, sed tantum ut tueantur vinculum, uti Hippocrates prudenter alio in loco monet (f). Ubi simul addit, cavendum esse, ne partes excarnes prominentes

(a) De Fracturis Charter. Tom. XII. p. 169—173.	XII. pag. 173.
(b) Lib. VIII. cap. 10. pag. 533.	(c) De Medici Officina pag. 79. Charter. Tom. XII.
(c) De Med. Offic. Chart. Tom. XII. p. 43.	(f) De Fracturis Textu 14. Charter. Tom. XII. pag. 179. & de Medic. Officina ibid. pag. 80.
(d) De Fracturis Textu 34. Charter. Tom.	lendantur

lædantur à ferularum applicatione, inde enim ulcus fieret, & nervi nudarentur. Unde in ossium cubiti fractura cavendum jubet, ne ferulæ è regione pollicis vel minimi digiti ponantur, vel si omnino hoc necessarium videatur, tunc sint brevissimæ: eminentes enim ulnæ & radii partes circa carpi articulum inde læderentur. Idem verum est in cruris fractura: cavendum nempe, ne ferulæ malleolos vel prominentes tibiæ aut fibulæ partes circa genu tangant: tota enim pressio vinculi, quo retinentur in situ ferulæ, in has partes ageret. Vidi sic turpi errore, dum hoc neglexerat Chirurgus, natam circa malleolos & genu gangrænam à sola pressione ferularum ad has partes. Facile jam apparet, in illis locis, ubi bina ossa sunt, si alterutrum tantum fractum fuerit, non esse adeo necessarium semper ferularum usum. Optime hoc monuit *Celsus* (a), qui similia fere ac Hippocrates de ferulis dixit: *Curiosius omnia in continendis ossibus fiant, si neutrum alteri auxilio est. Nam, ubi alterum integrum est, plus opis in eo, quam in fasciis servilisque est.* In locis modo citatis ex Hippocrate & Celso simul apparet, quod ante septimum diem non applicuerint ferulas: recentiores tamen Chirurghi etiam in prima deligatione illas adhibent, uti in se ipso fieri curavit *Parvus* (b).

CANALIBUS QUIETEM CONCILIANTIBUS. Requiritur præterea, ut membrum læsum sic ponatur & firmetur, ut penitus immobile sit, quantum commodè fieri poterit. Sed cum sic debeat semper in eadem positura remanere, necessarium est, ita ponatur pars læsa, ut sine incommodo in eodem situ diu manere possit. Unde v. g. in femoris vel cruris fractura leviter flecti debet articulus genu, extenso enim crure jacere nemo diu poterit. Deinde, pulvinari supposito, sic fulcienda pars est, ut pondus partis tota longitudine membri sustineatur, non vero uni tantum parti incumbat; quia inde inflammatio, suffocatio & gangræna nasci poterunt. Sic observatum fuit aliquando, pessimam gangrænam calcem occupasse ab hac tantum causa. A diuturno enim decubitu calcis os ipsum tandem corrumpi monet Hippocrates (c), summumque inde nasci periculum; & quod corrupto hoc osse morbus sæpe tota hominis vita duret. Ut hæc mala evitaret, jussit Hippocrates alibi (d), ut crus fractum & deligatum ponatur supra rem aliquam planam & mollem, ne in hoc illudve latus circumverti facile posset, vel antèrius aut posterius emineat. Si enim non in tota longitudine sustineatur crus fractum v. g. sed tantum calx & genu incumbant lecto, solo pondere in loco fracturæ curvatura nascetur. Idem verum erit, si locus fractus quidem sustineatur, calx vero & pes inferior suo pondere magis descendere possint. De canalibus autem, quibus crura fracta imponebantur, ut immota retinerentur, *Hippocrates* fatetur se incertum esse, quid diceret (e). Prodesse quidem possunt, sed non quantum existimatur. Si enim reliquum corpus in hanc illamve partem convertatur, non prohibet canalis, quo minus sequatur crus, nisi ipse homo caveat: neque etiam cavetur sic, quo minus sine corpore crus in hanc illamve partem moveatur. Addit tamen, vulgo persuasum esse, Medicum culpa magis vacare, si canalem subiciat. Recentiores autem Chirurghi pulcherrimas excogitaverunt machinas, quibus commodè locari, & immobile retineri posset membrum fractum; sic tamen ut simul facile posset & sine periculo renovari appa-

(a) Lib. VIII. cap. 10. pag. 536.

(b) Livre XV. Chapitre 23. pag. 344.

(c) De Fract. Chart. Tom. XII. pag. 200. 201.

(d) Ibid. pag. 217.

(e) Ibid.

tus in fracturis complicatis. Capsula talis pro locando crure fracto describitur & delineatur in Actis Academiae Regiae Scientiarum (a), cujus figura etiam in Institutionibus Chirurgicis Celeberrimi Heisteri habetur. Quantum autem prosit ad felicem curam fracturarum commodus reliqui corporis æque ac partis læsæ situs, dum diu decumbere debent sic affecti, facile patet. Unde peritissimi Chirurghi solebant ipsi semper lectum sternere, antequam curam aggrederentur (b), ut certi essent, omnia bene disposita esse.

TUM IMPEDIENDO ET DIRIGENDO ACTIONEM MUSCULORUM.
In hac re imprimis peritia Chirurghi elucet: muscoli enim ossibus affixi, his fractis, turbantur in sua directione, & sæpe, nisi caveatur arte, sua contractione à naturali situ removebunt fragmenta. Sic v. g. si radii os fractum fuerit, pronator quadratus & ligamentum inter radium & ulnam sua contractione adducent fragmentum versus ulnæ os. Imo fasciæ circumductæ sua pressione augebunt hoc malum. Sed si splenia ponantur inter radium & ulnam, hæc efficient, ut fasciarum pressio in hæc splenia imprimis agat, adeoque cavebitur, ne radius ad ulnam propius accedere possit. Idem etiam obtinere poterit, ubi fibula fracta est. Ubi autem in loco fracturæ os in plura fragmenta comminutum est, metus est ne muscoli affixi sua contractione expellant hæc fragmenta, & postea membrum sanatum brevius sit. Requiritur tunc, ut debita longitudo partis læsæ servetur machinis applicatis, quæ impediunt, quo minus accurtetur membrum, donec unita inter se fragmenta musculorum robori resistere possint. De his autem dictum fuit in commentariis §. 346. Magnam hic sæpe esse difficultatem in deligatione similium fracturarum probe noverat Hippocrates, qui de calcis fractura agens (c) monet, non cujusvis hominis esse, aptam in hoc casu deligationem facere: si enim quis tunc deliget eodem modo, quo cætera circa talos vinciuntur, fasciam modo circa pedem circumvolvens, modo circa tendinem (Achilis), fasciæ compressio calcem expellet iterum. Postea vero methodum optimæ deligationis in hoc casu describit. Unde pater, quam necessaria sit in cura fracturarum Anatomica musculorum & tendinum vicinorum cognitio.

§. 355. **F**ASCIÆ adstrictæ tumorem, suffocationem, gangrænam producunt, unde infinita mala: ergo leviter attrahendæ, ut firmare, & vascula leniter compescere, queant.

Multum sæpe hic peccatur, dum fasciæ valide nimis adstringuntur, ut nempe in situ retineantur ossa reposita. Frequentissime enim accidit, imo fere semper, ut post aliquot horas tumere incipiat membrum fractum, & præcipue circa fracturæ locum; sive hoc ab ipsa læsione aut contusione fiat, sive à rudiori tractatione partis, dum extensio & repositio perficiuntur. Si ergo tunc fasciæ in initio fortiter adstrictæ fuerint, antequam tumeat pars, patet facile tumente jam parte fasciarum pressionem augeri; unde à compressis vasis obstructio, inflammatio, imo, integre suffocata circulatione, gangræna nasci poterit. Ingens dolor tunc

(a) L'an 1718. Mem. pag. 396.

(b) Traité complet de Chirurgie par M. de la Motte Tom. IV. pag. 179.

(c) De Fracturis Charter. Tom. XII. pag. 199. &c.

oritur, quando nimis adstrictæ sunt fasciæ: si autem Chirurgus negligat ægri querelas, postea turpi errore sæpe tota pars jam gangræna corrupta apparet, tuncque exitirpatio sola superest. Hinc optimi Chirurgi sollicitè semper monuerunt, si de dolore queratur æger, ilico inquirendum esse in ejus causam; potiusque removendum esse totum apparatus, ne turpi neglectu pereat pars affecta, imo & æger de vita periclitetur. Tristes tales casus frequenter observati fuerunt, & apud egregium Chirurgum *de la Motte* (a) plures tales enarrantur. Minus ergo nocet, non satis adstrinxisse fascias, quam nimis, quia nova fascia applicata illud corrigi poterit. Signa autem, quibus cognosci poterit, an debita adstrictio facta fuerit per fascias, an non, pulcherrime recensuit Hippocrates (b) dicens: *Signa autem rectè curati hæc sunt, & terminus deligandi. Si rogaveris, an prematur, & dixeris, se premi quidem sed leviter, & maxime circa fracturam. Moderationis autem indicia sunt, si illa die, qua deligatus fuit, ac nocte, ipse sibi videatur non levius, sed valentius adstringi, postridie autem parvus tumor (ὀδματις) in manu oriatur & mollis. Signum enim hoc tibi erit moderate adstrictionis. Labente jam die minus adstrictas fascias sentiat, sed tertio die laxas omnino. Scire autem licet, si quid ex dictis absit, quod justo laxior sit deligatio, si quid ex dictis superet, plus justo fuisse adstrictam.* Tumor ille, qui in inferiore parte membri deligati apparet, si mollis, albus, & parvus fuerit, designat leviter tantum compressas esse venas, unde simul quiescente parte difficilior & tardior motus humorum per venas fit, & inde tumor ille nascitur: ubi autem in loco superiori pars tumet, signum est, & arterias simul compressas esse, unde inflammationis & gangræne metus est. Ubi autem tertia die laxantur sponte fasciæ, minuto tumore partis læsæ, jussit Hippocrates (c) fascias paulo arctius adstringendas esse; atque deinde iterum septima die, si opus videatur. Semper iisdem cum cautelis, ut ante dictum est. Ubi autem solvitur apparatus, semper sollicitè debet examinari, an forte ossa reposita non deviaverint iterum à situ naturali, de qua re dictum fuit §. 353.

§. 356. **S**I vulnera adsunt, curanda ex arre, (185. ad 239.) sed rara deligatione. Idem de inflammatione, dolore, tumore, & reliquis symptomatibus intelligendum.

Si in complicata fractura simul vulnus adfuerit tanti momenti, ut non possit tuto committi soli naturæ; tunc oportet fasciam libriformem, vel octodecim capitum dictam adhibere, ut commode possit & sine periculo separationis fragmentorum cura vulneris haberi. Minus quidem firmat partem hæc fascia, quam illa, quæ spirali-bus gyris circumducitur; sed in hoc casu vulnus non ferret validiorem pressio-nem. Peccant illi, qui sic deligare conantur, ut fascia spiralis vicina premat tan-tum, vulneris vero locum liberum relinquat, vel excisso in fascia foramine fe-nestram quasi relinquunt in loco vulneris. Dum enim omnia vicina constringun-tur fasciis, solum vulnus liberum relinquitur, major humorum impetus & copia urgebunt vulneris locum; unde inflammatio, carnis fungosæ protuberantia, & si-

(a) *Traité complet de Chirurgie* Tom. IV. pag. 175. &c. & de *Medic. Offic.* ibid. pag. 95. pag. 271. &c.

(b) De *Fracturis Textu* 37. *Chart. Tom. XII.* XII. pag. 177. &c.

(c) De *Fracturis Textu* 40. *Charter. Tom.*

milia mala orirentur. Damnaverat jam hanc methodum Hippocrates (a) dicens : *Necesse est, ulcus in tumorem assurgere ; nam si sana caro hinc atque hinc vinciatur , in medio vero non , maxime ibi tumebit , & colorem mutabit , quomodo ergo ulcus hec effugiet ? necesse ergo est , ulcus decolorari , & materiam huc exprimi ; unde lacrymabitur & non suppurabit , ossa vero , & qua abscessura non essent , abscedent*. Additque postea , se latius de hac re egisse , ut pessimam hanc deligandi viam , pluribus , usitatam , repudiarent omnes. Reliqua autem , quæ in cura vulnerum dicta sunt , hic pariter observanda erunt : & si pars ossis nudata per vulnus fuerit , illa convenient , quæ in vulneribus capitis cum cranii denudatione solent adhiberi. Rara autem deligatio , uti plerisque vulneribus convenit , uti antea dictum fuit , sic & imprimis in hoc casu , quia semper magna cura adhibenda est , ne ossa reposita situm situm mutant.

Quamvis autem in simplici fractura non adeo exacta victus ratio videatur requiri in homine ceteroquin sano , tamen cogitandum est , nihil pejus hic contingere posse , quam si inflammatio accedat fracturæ ; solvi enim tunc debebunt fasciæ , & talia applicari , quæ tollere valebunt inflammationem natam , quæ forte præcaveri potuisset. Venæ sectio ergo imprimis in plethoricis , & inflammatoriæ diathesi obnoxiiis , convenit ; uti & victus tenuis. Vitanda ergo omnia , quæ humorum copiam vel impetum augere possent. Imprimis autem hæ cautelæ requiruntur primis diebus , quando major inflammationis metus est. Ideo Hippocrates (b) dixit : *Dietæ autem illis , quibus ab initio nec vulnus adest , nec ossa eminent , sufficit non adeo tenuis & exquisita (ὀσσηνία) minus tamen cibi sumant , usque ad decimum diem ; præsertim cum quiescant. Adhibeantque ex obsoniis mollibus , quæ modice alvum sollicitent , sed à vino & carne abstineant : postea paulatim se reficiant*. Ubi vero tumor ingens , acris dolor , aut valida inflammatio fracturam comitantur , subito adhibenda sunt illa , & audacter repetenda , si mala hæc urgeant , quæ in cura contusionis §. 334. laudata fuerunt. Simul tunc & tenuissimus victus convenit.

§. 357. **T**UM fit concretio , callusque , citior , tardior pro ætate , ossis crassitie , ponere incubituro , vario tempore , intra 20. & 70. dies.

Tertium requisitum in generali cura fracturarum (vide §. 347. n°. 3.) erat , ut fragmenta reposita , & in situ retenta , concreverent iterum inter se ; & si quid perditum foret de ipsa ossis substantia , illud regeneraretur. Obtinuit autem usû apud Medicos & Chirurgos , illam substantiam , cujus interpositione uniuntur fragmenta inter se , vocare callum. Quid autem sit callus , & quomodo generetur , dictum fuit in commentariis §. 343. & §. 347. n°. 3. Patuit enim ibi , ex ingestis nutrimentis , vasorum & viscerum vi in natura corporis humani mutatis , per vasa bona , impetu & copia debitis , allatis restitui perditæ , & uniri separata. Ars nihil aliud hic efficit , quam ut debitum in situm reponat fragmenta , quæ deviaverant ; & in illo situ deinde retineat. Reliquum perficit corporis sani fabrica. Unde tantum examinandum est , an aliquid in sanitate deficiat ; & ille defectus cognitus per

(a) Ibidem pag. 234. &c.

(b) De Fracturis Textu 45. &c. Charter. Tom. XII. pag. 181. &c.

artem corrigendus est. In commentariis autem §. 346. dictum fuit de præcipuis causis observatis, quæ curam retardant, vel penitus impossibilem reddunt.

Tempus autem, quo solet fieri unio fragmentorum, varium est multas ob causas etiam in hominibus sanissimis. Unde Hippocrates (a) postquam dixerat, cubiti ossa fracta intra triginta dies ad summum consolidari, mox addit: *Nihil autem perpetuum est: multum enim & natura à natura, & ætas ab ætate differt.*

Præcipua autem varietas temporis requisiti ad curam fracturarum pender ab ÆTATE. In junioribus enim citissima consolidatio fracturarum fit; sed & sæpe calli nimia luxuries oritur. In senectute longe majori temporis spatio opus est; tunc enim potius decrescit homo: unde summa difficultas in regenerandis perditis, & uniendis separatis, nascitur. Media ætas omnium optima est: tunc quidem tardius fracturæ sanantur, quam in junioribus; sed firmitus consolidantur: neque tantum periculum est, ne callus luxuriet. In commentariis §. 346. dictum fuit, brachii os fractum in recens natis duodecim dierum spatio sanatum fuisse, cum in adultis triplum fere hujus temporis requiratur in tali casu; & in senibus adhuc longius.

OSSIS CRASSITIE. Prout majus pondus ferre debent ossa, vel validioribus musculis sustinendis & dirigendis inserviunt, sic & crassitie variant; atque iterum observatur, tanto majus spatium temporis, cæteris paribus, requiri ad fracturæ consolidationem, quanto crassiora fuerint ossa. Sic femoris os quinquaginta dierum spatio firmari dixit Hippocrates (b); cruris autem & humeri ossa quadraginta diebus (c); cubiti vero ad summum triginta diebus (d); costas fractas viginti diebus (e); uti & digitorum phalanges (f) &c. Unde solet tempus sanationis fractorum ossium plerumque intra viginti & septuaginta dies limitari; cum in homine sano & mediæ ætatis, si nihil sinistri acciderit, intra hoc tempus crassissimum etiam in toto corpore femoris os sanari soleat. Quando autem fragmenta separantur majora, & debet magna pars ossis perdiri recrefcere, longe majus temporis spatium requiritur: uti constitit illo exemplo, quod allegatum fuit in commentariis §. 343, ubi tibiæ ossis fragmentum, quatuor digitos transversos longum, separabatur; tunc enim decem mensium spatium requirebatur, antequam tuto cruri insistere potuerit homo hanc fracturam passus.

PONDERE INCUBITURO. Callus enim, in loco fracturæ natus, satis diu mollior reliqua ossis substantia manet. Si ergo os fractum tale fuerit, ut totum pondus corporis innitens ferre debeat, dum incedit homo; patet facile, longius tempus requiri, antequam sine periculo hoc tentari possit. Unde minori tempore indiget ad curationem brachii os, quam cruris ossa; & imprimis si utraque fracta fuerint. Calcis os fractum sexaginta diebus sanum fieri, si quiescat, dixit Hippocrates (g), cum ad femoris ossis fracti sanationem quinquaginta dies sufficerent: sed antea monuerat, quod directe sub tibia calcis os poneretur. Unde patet, quod totum corporis pondus huic ossi innitatur. De fractura ossium pedis & manus agens (h) monet, hæc omnia viginti diebus perfecte sanari, exceptis

(a) De Fracturis Textu 41. 42. Charter. Tom. XII. pag. 179. 180.

(b) De Fracturis Charter. Tom. XII. pag. 223.

(c) Ibid. pag. 220. & pag. 191.

(d) Ibid. pag. 179.

(e) De Articulis ibid. pag. 394.

(f) De Fracturis ibid. pag. 194. 197.

(g) De Fractur. Charter. Tom. XII. pag. 206.

(h) Ibid. pag. 195. &c.

illis, quæ cruris ossibus junguntur, vel illis, directe supponuntur; tunc enim quadraginta dierum spatium requiri dicit, & bene curari, si ægri tam diu jacere velint: quod multi nolunt, quia morbum parvi faciunt; ideoque plerique non bene sanantur. Ferunt enim pedes onus totius corporis.

Antequam ergo liber usus membri fracti ægro permittitur, licet debitum tempus elapsum fuerit, prudentis Chirurgi est, sollicitè examinare fracturæ locum, ut certus sit, callum debitam firmitatem jam habere. Ut hoc constet, prehenditur à binis ministris ab utraque parte fracturæ membrum: deinde illud tentant, leni tamen vi & prudenter adhibita, quasi incurvare; dum interim Chirurgus digitis locum fracturæ tangit. Si tunc aliqua vacillatio, vel quædam flexura etiam levissima in hoc loco percipiatur, signum est, nondum satis induruisse callum; unde periculum novæ fracturæ fieret, vel saltem deformitatis, dum incurvaretur membrum; vel callus mollior adhuc pondere corporis innitens exprimeretur, & annulum protuberantem formaret; unde simul minueretur debita membri longitudo. Interim dum sæpe diu pars affecta immobilis retineri debet, cavendum, ne vicini articuli rigidi fiant. Sæpe enim visum fuit, anchylosin à sola quiete diuturna partium ortam fuisse. Ideo sæpius curæ tempore vicini articuli prudenter à Chirurgo moveri debent: non autem hoc permittendum ægro, ne forte ossium bene repositorum separatio iterum fieret, imprudenti partis motu.

Licet autem optime reposita fuerint ossa, præstat tamen sæpius, dum renovatur apparatus, partem læsam sollicitè examinare, & comparare cum parte sana, ut videatur, an eadem sit utriusque membri figura & longitudo. Si enim aliquis adhuc defectus adsit, poterit corrigi, dum adhuc flexilis callus est; ubi vero jam osseam duritiem acquisivit, tunc raro & non nisi summa cum difficultate hoc emendari poterit. Unde merito monuit *Hippocrates* (a) quod si alligatis ferulis suspicio sit, ossa non recta concurrere; vel aliud quid ægrum molestet, ubi dimidium temporis (requisiti ad integram curationem) præterierit, vel paulo ante, solvere oportet, atque iterum deligare. Non tamen omnino desperandum videtur, licet toto curationis tempore elapso, quo solent ossa fracta inter se consolidari, aliqua adhuc supersit deformitas; observata enim docuerunt, sæpe adhuc, in junioribus imprimis, curam successisse. Juveni sedecim annorum fractum fuerat femoris os, & mala cura post novem septimanas elapsas dimidio pede brevius apparebat altero femore; unde tota vita claudicandum fuisset misero. Peritissimus Chirurgus, examinans fracturæ locum, inveniebat, ossis fracti extrema juxta se mutuo protracta concrevisse. Cum satis fortis esset æger, & callus recens adhuc, laqueis arreptam partem dum validissime extenderent ministri, manibus premendo utrimque, in debitum situm reposuit fragmenta, sine ullo dolore ægri; & sic debitam longitudinem membro fracto restituit, tam felici cum successu, ut post mensis spatium sine ulla claudicatione incedere posset juvenis (b). Imo observatum fuit, citius consolidari in tali casu fragmenta, quam dum recens fracta uniuntur inter se. Quod & confirmatur alio satis miro casu apud eundem autorem (c). Ubi homini, fracturam amborum cruris ossium passo, & optime curato, mala fortuna post sex septemve septimanas iterum frangebatur crus in eodem loco, dum ludens cum amicis caderet. Restitu-

(a) Ibid. pag. 187.

(b) De la Motte Traité complet de Chirur-

gie pag. 194. &c.

(c) Ibid pag. 142. &c.

ris ossibus fractis jam post duodecim dies tanta firmitas accesserat, ut commode movere posset, & elevare crus affectum. Cautior hoc infortunio factus æger sollicitate evitaverat, ne simile quid ipsi postea accideret; sed post tres menses elapsos, dum equo vehitur, inde excutitur, & equus, innitens cruri huic jam bis fracto, illud iterum rumpebat in eodem loco: tamen & tunc pulcherrime cura successit, brevi satis tempore, & sine ulla fere difformitate.

Ubi vero ossium fractorum extrema non recreverunt inter se, sed quasi cicatrice obducta manserunt separata, tunc longe difficilior casus est. Hoc autem aliquando accidere paruit ex illis, quæ dicta sunt in commentariis §. 346. Si enim hoc fiat, quia per morbos ossium nutritio & incrementum deficiunt, tunc nulla medela superest. Si vero tantum pro tempore cesset hæc ossium consolidatio, ut gravidis aliquando observatum fuisse ibidem dictum fuit, expectandum est donec pepererint. An autem prodesse posset in similibus casibus Methodus à Celfo descripta (a): dubium videtur. Dicit enim: *si quando vero ossa non conserbuerunt, quia sæpe soluta, sæpe mota sunt, in aperto deinde curatio est. Possunt enim coire. Si vetustas occupavit, membrum extendendum est, ut aliquid ladatur: ossa inter se manu dividenda, ut concurrente exasperentur, & si quid pingue est, eradatur, totumque id quasi recens fiat. Magna tamen cura habita, ne nervi musculive ladantur.* Totus scopus videtur in eo consistere, ut fragmentis ad se mutuo attritis recens vulnus quali in ossibus fiat. Sed si fragmenta quædam sic deterantur, summæ poterunt inde nasci molestiæ. Forte in simili casu præstaret totum opus naturæ committere, quæ aliquando mira perfecisse fuit observata. Homini utrumque cubiti os transversim fractum fuerat ad quatuor digitorum tranversorum distantiam à carpo: noluit ille doloris metu, ut reponerentur ossa, vel applicarentur fasciæ: imo ne quidem membrum læsum in quiete retinuit, unde nulla facta fuit consolidatio fragmentorum, sed mansit quasi novus articulus flexilis in fracturæ loco, sine dolore vel incommodo notabili, sicque satis diu vixit. Post mortem ejus unus ex Chirurgis, qui ipsi adfuerant, brachium affectum dissecuit, & invenit, superiorum fragmentorum extremitates rotundam acquisivisse figuram, cui respondebant similes cavitates in fragmentis inferioribus. Ipsum periosteum, circa hunc locum crassius factum, ligamenti instar novum hunc articulum firmabat & coercerat. Imo cavitates illæ, inferioribus fragmentis insculptæ, à parte anteriori magis depressæ erant, à parte posteriori magis elevatæ; sicque facilis antrosum flexura erat in hoc loco, & simul nimis extensioni limes ponebatur, simili fere modo, ac in cubiti flexura sit. Ossa hæc à Celeberrimo du Verney inter rariora Anatomica asservata fuisse legitur (b).

Aliquando accidit, imprimis in junioribus, in quibus semper solidorum mollior compages observatur, & fluidorum major copia, callum renascentem exorbitare ultra æquabilem ossis superficiem; simili fere modo ac in partium mollium vulneribus minus pressa luxuriant vasa. Imprimis hoc accidit, si per febrim agitati humores renascentia & mollia adhuc vascula nimis distendant. Tanta enim aliquando copia huc ruunt humores, ut Galenus dixerit (c), sæpe visum fuisse, inviolata cute, quæ fracturam tegit, sanguineum succum effundi sic, ut fascias impleat.

(a) Lib. VIII. cap. 10. pag. 541.

(b) Nouvelles de la Republique des Lettres
Jan 1685. p. 118. &c. & in Actis Erudit. mense

Novemb. 1685. pag. 513. &c.

(c) Commentario 3. Hippocrat. de Articulis. Charter. Tom. XII. pag. 394.

In tali casu conveniunt illa, quæ liquidorum copiam tollunt, & simul nimium illorum impetum minuunt, vel à parte læsa avertunt. Venæ sectio ergo, & purgantia, quæ sine aucto motu agunt, hic conducunt, uti & partior victus, qui sustinendæ vitæ sufficiat, nec tamen humorum copiam augeat. Lenis frictio partis affectæ pariter conducere videtur, ut dissipentur illa, quæ nimia hic copia accumulatur; & dein major compressio, ut nimis laxa vasa sic firmentur ut non tam facile cedant impulsis humoribus. Quæ omnia pulcherrime apud Celsum habentur (a); si enim superincrevit nimius callus, ideoque locus intumuit, dicit: *Dim leniterque id membrum perfricandum est ex oleo & sale & nitro, multumque aqua calida salsa fovendum, & imponendum malagma, quod digerat, adstrictiusque alligandum: oleribusque, & præterea vomitu utendum, per quæ cum carne callus quoque extenuatur: confertque aliquid de sinapi cum sicu in alterum pariter membrum impositum, donec id paululum erodat, coque evocet materiam. Ubi his tumor extenuatus est, rursus ad ordinem vitæ revertendum est.* Si vero imprudenti membri fracti usu, antequam satis firmatus fuerit callus, imprimis in femoris & cruris ossium fracturis, pondere corporis innitens expressus callus annulum formet; tunc debet membrum laxum iterum extendi in debitam longitudinem, & externa pressione coerceri callus exorbitans.

Si vero vel à nimia compressione partis, vel alia quacumque de causa, metuat calli defectus, contraria medela opus est. Laxior enim tunc fasciarum adstrictio, fomenta emollientia, plenior victus, & talia remedia, quæ languentem humorum motum excitant, imprimis profunt. Ob hanc rationem, ut callus nempe felcius cresceret, iussit Hippocrates (b), postquam jam ferulæ applicatæ fuerant, si solveretur membrum, illud calida perfundi debere, & fascias pauciores debere circumduci, & lenius adstringi, quam in initio. Et Galenus (c) in Commentariis suis in hunc locum animadvertit, Hippocratem à prima die, usque dum ad ferulas venit, auxisse fasciarum numerum, & validius adstrinxisse; post septimum vero diem appositis ferulis reliquisse partem immotam usque ad diem vigesimum, ut nutriretur callus; deinde aqua calida affusa ad partem evocasse huc materiam, cum in initio fasciarum numero & adstrictione prohibuisset, ne huc flueret. Pulcherrime hæc habet Ægineta (d) dicens: *Quadam fractura sine callo manent, ultra definitum natura limitem; vel ob continuas resolutiones, vel ob immoderatas fomentationes, vel ob importunum motum, vel ob multitudinem fasciarum, vel ob totius corporis atrophiam; à quibus & tenuius membrum fieri accidit. Oportet igitur & alias occasiones cum studio remove, maxime autem atrophiam: partim calidioribus alimentis materiam attrahentes ad partem, uti & nutrimentum sufficiens & balnea & reliquam animi hilaritatem subministrantes. Signa vero callo jam firmatorum sunt, & alia quidem, maxime vero fascias madescere, nullo etiam vulnere oborto &c.* Quid autem sentiendum sit de lapidis Osteocollæ & similium efficacia in hoc casu, dictum fuit in Commentariis §. 347. n°. 3.

Callus autem, quo ossa fracta junguntur, tandem osseam naturam induit & firmitatem: unde observata docuerunt, partem talem postea facilius alio in loco fractam fuisse, quam in prioris fracturæ vestigio relicto. Tamen apud Ruys-

(a) Lib. VIII. cap. X. in fine. pag. 541.

(c) Ibidem pag. 181.

(b) De Fract. Text. 43. Chart. Tom. XII. p. 130.

(d) Lib. VI. Capit. 110. pag. 101.

chium (a) habetur; quod invenerit gallinæ ossa fracta à natura ferruminata fuisse sic, ut sola ossea spongiosa substantia renata foret, deficiente lamina externa ossea, quæ sua duritie naturaliter priorem defendit & firmat. Satis autem patet, facillime ossa sic consolidata iterum frangi potuisse; idemque aliquando humanis ossibus fractis accidisse credidit, quæ inde levissima de causa iterum frangebantur.

Aliud satis mirabile habetur apud eundem auctorem (b) observatum, quo patet, sæpe summas molestias & dolores fracturam sequi posse, licet optima cura fuerit adhibita. Servabat enim duo femoris ossa, quæ post fracturam curata fuerant tam infelicitè, ut fragmenta se mutuo superiscanderent. Sed quod notandum est, invenit varias exostoses, quarum nonnullæ acutæ & tenues vulnerare potuerant vicinas partes: & hæ exostoses non tantum circum callum in fracturæ ambitu reperiiebantur, verum etiam supra fracturæ locum è parte sana emersebant; viditque illas enatas fuisse ex illis foraminulis, quibus tendinosæ fibræ solent infigi, hisque fibris in fractura vel luxatione evulsis credidit enasci tales exostoses. Hanc autem opinionem confirmant similia observata in aliorum animalium ossibus, quæ ibidem enarrantur. Licet autem similia mala nec prævideri facile, nec curari possint, tamen sic discimus, non temere optime sæpe meritis Chirurgis imputare illa damna, quæ etiam sollicitissima arte curatas fracturas sequi poterunt, nec ulla industria præcaveri.



L U X A T A.

§. 358. **L**UXATIO est recessus extremi ossis mobilis ex cavo, in quo naturaliter movetur, cum motus impedimento.

Luxatio, quæ & delocatio (c) dicitur, uti etiam dislocatio, notat ossis emotionem ex illo loco, quem naturaliter occupabat. Hacque significatione quamcumque situs naturalis ossium mutationem designaret. Obtinuit tamen usu, à quo præcipue vocum significatio pender, hoc nomine tantum intelligere ossium articulorum recessum ex loco, quem naturaliter occupabant. *Celsus* (d) tamen de luxationibus agens illas bifariam distinxit, dicens: *Moventur autem ea sedibus suis duobus modis. Nam modo, quæ juncta sunt, inter se dehiscunt: ut cum latum os scapularum ab humero recedit, & in brachio radius à cubito, & in crure tibia à fura; & interdum saltu, calcis os à tale; quod raro tamen fit: modo articuli suis sedibus excidunt.*

(a) Thesaur. Anatomic. 8. n°. 49.

(b) In Museo Anatomico sive Catalogo rariorum &c Theca A. Repositor. V. n°. 1. & 2. pag. 129. 130.

(c) Cael. Aurelian. Morb. chronicor. Lib. 1. cap. 1. pag. 347.

(d) Lib. VIII. cap. XI. pag. 542.

Cum ergo luxatio proprie dicta in ossibus articulatis tantum obtineat, definitio hic data optime convenit. In omni enim articulo considerantur bina, os recipiens, & os receptum. Ossis recipientis partem illam cavam, quæ ossis alterius caput recipit, *κατάληψις* vocaverunt; ossis vero recepti partem, quæ hoc cavo conditur, *ἀρθρον*, sive articulum, simpliciter dixerunt (a). Unde optima etiam definitio luxationis habetur apud *Aeginetam* (b), nempe, quod sit *elapsus articuli ex proprio cavo in alienum, à quo motus arbitrarius impeditur*: Nisi enim simul adsit motus impedimentum, non potest proprie luxatio vocari, licet ossis mobilis extremum exeat suo cavo, in quo naturaliter movetur. In mirabili enim maxillæ inferioris articulo observatur, capitulum hujus ossis locari quidem in sinu faciei profundo, in ossis squamosi parte ima ad exortum processus Zygomatici insculpto, tamen ope lamellæ cartilagineæ elasticæ interpositæ potest maxillæ capitulum suo sinu exire, & in illum redire iterum sine motus impedimento. Quinimo ad varios motus maxillæ inferioris perficiendos requiritur, ut articulus ille sic possit suo cavo exire.

§. 359. QUI integer, vel pro parte; unde luxatio, & distorsio.

Facile concipitur, ossis articulati caput posse vel omnino elabi ex suo cavo, quo naturaliter continetur; vel sic à naturali situ dimoveri, ut partim in cavo suo, partim extra illud hæreat. Tamen hoc in omnibus articulis fieri posse negavit *Hippocrates* (c). Humeri enim & femoris articulos, cum rotundi omnino sint, & similibus cavis recipiantur, non posse pro parte tantum elabi conclusit, sed necesse esse, ut vel toti exeant suo cavo, vel pro parte elapsi revertantur. In aliis autem articulis hoc fieri posse, satis patet. In Luxationum definitione hinc dixit *Aegineta* (d). *Differentias alias dicere non habemus, nisi solum illam, qua secundum majus & minus contingit. Omnino enim elapso articulo communi generis nomine ἐξάρθρωμα dicitur; leviter vero dimoto, vel usque ad supercilia cavitationis prolapsio, παραρθρῶμα. Obtinuit enim usu, præpositionem παρα, vocabulo præfixam, levioris affectum designare: unde parapoplexiam pro leviori apoplexia, paracynanchen pro leviori cynanche &c. dixerunt Medici. Ideo non ita exacte his vocabulis videtur usus fuisse Vesalius (e), dum dixit, luxationes, quæ ab influxu humoris in articulum fiunt, παραρθρώματα vocari; ἐξάρθρωμα vero, si ab impulsu fiant. Patebit enim ex sequentibus, veram & completam luxationem fieri posse ab humoribus in cavum articuli delapsis. Solet autem luxatio talis, quæ pro parte tantum elapso articulo fit, vocari subluxatio, vel & distorsio. Tamen & distorsionis nomen musculorum tendinumve à vi externa mutatum sitam designat; uti & ligamentorum distractionem à simili causa intorquendo quasi factam (belgice *Verstuychen*). Unde minus ambigua significatione luxatio talis incompleta dicitur *subluxatio*.*

(a) Gorrzi Definit. ἀρθρον, pag. 77.

(b) L.b. VI. cap. 111. pag. 101.

(c) De Articulis Charter. Tom. XII. pag. 427.

(d) Lib. VI. cap. 111. pag. 101.

(e) Chirurg. magn. pag. 911.

§. 360. **P**ESSIMA, quæ epiphyfi ab corpore ossis soluta accidit.

In ossibus majoribus, quæ mobili articulatione aliis junguntur, v. g. in femoris ossibus, observatur, quod extrema utraque à reliquo ossis corpore distincta sint; quod omnium pulcherrime in recens natorum & abortuum ossibus videri potest. Ossa enim hæc quondam fuerunt tota cartilaginea, & in illorum media longitudine primo incipit granulum rotundum osseum apparere, quod cito in longitudinem utrimque se diffundens cartilaginem in os mutat (*a*). Sed extrema utraque manent diu cartilaginea, in quibus interius incipit pariter cartilago in os mutari, quod se sensim per totam fere horum molem diffundit. Diu tamen manet inter corpus ossis femoris v. g. & utrumque ejus extremum aliquid cartilaginis, qua tanquam glutine extrema ossis reliquo corpori agglutinata videntur, donec tandem, & hac cartilagine ossea facta, extrema cum ossis corpore reliquo in unum continuum os confrescant (*b*); sic tamen ut extrinsecus aliquamdiu nota divisionis maneat, quæ tandem etiam deletur (*c*). Vocaverunt jam hæc extrema ossis femoris, ab ejus reliquo corpore intermedia hac cartilagine, vel divisionis remanente nota, distincta, Epiphyfes. In junioribus animalibus hæc Epiphyfes levi vi à reliquo ossis corpore separantur, uti quotidie in mensis apparet. Illo autem in loco, ubi Epiphyfes junguntur ossis corpori, enascuntur ligamenta, quæ articulos undique ambiunt, & firman: atque ideo hunc imprimis usum esse appendicum (*c* 103 5109) Columbus voluit (*d*), ut ex illarum conjunctione cum osse ligamenta prodirent, quæ nulli alteri parti continuata observantur, sed in his locis ex ipso osse nascuntur. Notavit etiam *Clopton Havers* (*e*), (uti dictum fuit in Commentariis §. 343.) in illis locis, ubi ligamenta oriuntur, periosteum hæctenus ossis omnem ambitum tegens ab illo secedere, ligamenta hic nata superascendere, sicque ad aliud os pergere.

Si ergo epiphyfis à corpore ossis solvatur, patet facile, motum articuli talis turbari. Non tamen adeo proprie luxatio dicenda videtur, quia extremum ossis mobilis in cavo suo manet, in quo naturaliter movetur; Sed in definitione data §. 358. ille recessus extremi ossis mobilis ex suo cavo luxationem constituebat: Unde forte potius ad fracturas referri posset hoc malum. Videtur *Galenus* illud numeralitè inter fracturam species (*f*), vocans ἀσπυμα; cum reliquas fracturas generali κατὰ γένος nomine comprehenderet: monuitque, illud vocabulum ἀσπυμα Medicis proprium esse, aliis vero plerisque hominibus inusitatum. Significabat autem illam fracturæ speciem, dum ossis finis, qua parte maxime cum alio osse articulatur, abruptus est. Quia autem sæpe talis fracturæ species pro luxatione habetur, ideo solet & huc referri. Imprimis autem hoc observatum fuit accidere in luxationibus femoris sic dictis, quæ sæpissime epiphyfi soluta à reliquo osse, vel & ipsa cervice ossis femoris, quæ tenerrima est, fracta fiunt (*g*). Narrat enim

(*a*) Albini Icones Ossium fœtus humani &c. pag. 101.

(*b*) Ibid. pag. 156.

(*c*) Ibid. pag. 101.

(*d*) De re Anatomica lib. 1. cap. 2. pag. 7.

(*e*) Osteolog. pag. 17. 18.

(*f*) Method. Med. Lib. VI. cap. V. Charter. Tom X. pag. 143.

(*g*) Ruyfch. Thesaur. Anatom. VIII. n°. 103.

Ruyfchius; celebrem Chirurgum osties aperuisse anuum claudicantium cadavera, semperque invenisse cervicem ossis femoris fractam fuisse, nunquam vero adfuisse luxationem. Cum autem junioribus epiphyfes leviori vi solvantur à reliquo ossè, ideo frequentius illis hoc malum accidit: imprimis, dum ulnis gestantur, si infantes subito corpus retrorsum projiciant, magnum periculum est, epiphysem ossis femoris solvi, vel ipsam cervicem hujus ossis frangi posse; unde tota vita claudi manent, dum ossis corpus, à capite suo articulado solutum, musculorum vi sursum trahitur. Mira tamen in similibus casibus observata fuerunt naturæ molimina, quibus hunc defectum sarcire nitebatur. Invenit enim *Ruyfchius* in cadavere vetulæ, tale malum passæ, collum ossis femoris totum defecisse, & naturam hic substituisse varia ligamenta dura, crassa, teretia, quorum ope caput ossis femoris uniebatur reliquo ossi (a). Majorem longe difficultatem in curatione hujus mali esse, quam in luxatione proprie dicta, facile patet: ossa enim luxata in naturalem situm reposita, modo quiescat pars, facile retinentur; ubi vero epiphysis à corpore reliquo ossis soluta fuerit, muscoli ossi affixi propria contractione illud ex naturali situ removebunt: unde tunc fere semper sequitur membri accurtatio, & depravatio motus.

§. 361. C A U S A vis externa extendens, intorquens, expellens.

Nulla luxatio fieri potest sine vi externa, si articuli & ligamenta, illos firmitas, se habent ita, ut naturaliter esse solent: imo in adultis & fortibus satis magna vis requiritur, ut articuli excidant: uti facile patet ex ligamentorum articulos firmitatis robore. Vis autem externa applicata tribus modis hac paragrapho recensitis agit.

§. 362. A U T interna, cavo innata, extrudens.

Ligamenta, quæ articulata ossa neunt, ex illis locis, ubi epiphyfes reliquo ossi junguntur, enata, capsulæ cavæ instar totum articulum ambiunt, sicque locum omnino clausum constituunt; neque aliquid foris ingredi, vel intus elabi patiuntur. In cavo interno omnis articuli continentur bina extrema ossis excipientis & excepti, cartilagine undique incrustata; & in majoribus articulis glandulæ sat insignes, Haverlianæ dictæ à primo inventore. Unica talis magna glandula in femoris articulo; quatuor vel quinque minores in articulo genu conspiciuntur (b). Præterea plurimi folliculi minores internam ligamenti articulum ambientis superficiem occupant. Per has glandulas, quas innumeris vasculis constare injectiones Anatomicæ docuerunt, secernitur mucus, instar albuminis ovi (c), saporis salis. Cartilaginosa autem ossium extrema articuli cavo contenta, quantum hodie novimus, nullo etiam perichondrio tecta, videntur transsudare tenue

(a) Idem Thesauro IX. n° 74.

(b) Clopton Haversi. Osteolog. pag. 190—201.

(c) Ibid. 200—206.

oleum medullare, quod in cavernosa parte ossium circa articulos hæret satis copiosum. In ossibus equinis majoribus nudo etiam oculo conspicuos vidit *Haversius* (a) tales poros, per quos oleum medullare in cavum articuli transiret. Confirmant hanc rem plurima alia experimenta. Dum enim articuli cadaveris integri servantur, donec omne mucilaginosum sensim dispareat, (resorptum forte) invenitur in illorum cavis merum pingue oleum, quod etiam in digitorum articulis observavit idem autor (b). Post validos motus & diuturnos mactata animalia parum medullæ in cavis majorum ossium habent; cum contra in quiescentibus & saginatis medulla abundet. Ex quibus omnibus satis constare videtur, medullam ossium etiam huic usui servire, ut per ossium articulatorum extrema exsudans misceatur mucilagini à glandulis secretæ; sicque ex his simul unitis fiat illud linimentum, quod ossium articulatorum extrema inungit, & lubricissima reddit, ut sine multo attritu ossium ad se invicem articuli moveri possent. Et ob hanc causam, ubi pingue oleum corporis consumitur nimis laboribus, senio, vel morbis, crepitus articulorum oritur, dum sicca nimis ossium extrema ad se mutuo attreruntur. Simul & in cavum articuli ex ultimis arteriis exhalantibus tenuis ille ros expellitur, quem in omnibus cavis corporis minoribus æque ac majoribus adesse novimus.

Triples ergo in articulorum cava concurrunt humor; universale perspirans, oleum medullosum, & mucilago à glandulis hic positis secreta; ex quibus simul mistis nascitur lubricum illud linimentum, quod calore, & attritu ossium ad se mutuo, attenuatum iterum resorbetur tali copia, quali aggeritur: si vero à quacunque causa deficiat, vel minuat, resorptio liquidi hic effusi, & pergant interim causæ secernentes & expellentes illud effundere, accumulabitur illud, ligamentarem capsulam distendet, & debilitabit; unde facilis prolapsus ossis articuli ex suo cavo ab hac causa nascitur. Ingentis molis tumores circa articulos nasci ab hac sæpe causa testantur observata practica satis frequentia. Oleum vero medullare, per poros extremorum cartilagineorum ex ossis cellulari substantia in articuli cavum expulsum, satis etiam in concretionem pronum esse, si non attenuetur motu & attritu ossium articulatorum ad se invicem, docet *Havers* (c). Dicit enim se in saginatis animalibus (quæ plerumque etiam validos motus non exercent) sæpius invenisse concretam pinguedinem in poro, per quem exsudare solet hoc pingue, hærentem, quam primo aspectu pro glandula quadam habebat, postea tamen nil esse præter oleum concretum invenit.

Pulcherrime etiam hanc luxationis causam, & alia plura circa hanc rem habet *Hippocrates* (d); de articulis enim agens dicit: *Mucus omnibus natura inest, & quum purus fuerit, sani sunt articuli, ideoque facile moventur, utpote lubrici inter se. Labor autem & dolor oritur, quando à carne laborante fluit humor. Imprimis quidem rigescit articulus, non enim lubrica est humiditas ex carne affluens. Deinde utpote copiosa, & valde dispersa, neque ex carne irrigata, semper resiccatur; quumque illam ob multitudinem articulus capere non possit, effluit, maleque concrevens nervos, quibus articulus colligatur, attollit, relaxat & dissolvit: & ob illud claudi sunt magis minusve, prout*

(a) Ibid pag. 173.

(b) Ibid. pag. 172.

(c) Ibidem pag. 174.

(d) De Locis in homine cap. 3. Charter Tom. VII. pag. 361.

illud magis minusve fit. Et alibi (a). Quibus ab Ischiade diuturna vexatis Ischium excidit, & rursus incidit, illis mucii innascuntur.

Si jam simul attendatur, posse hic nasci inflammationem, cum innumeris arteriis ligamenta & glandulas articularum irrigari constet ex Anatomicis; poterit & sequi suppuratio, puris fracti in cavo articuli accumulatio &c. adeoque omnia mala similia produci poterunt, ac à naturalibus articularum humoribus hic collectis nec resorptis iterum. Satis autem frequentes fieri ab hac causa luxationes, docuit *Petitus (b)*, & ingenue fatetur, se hoc didicisse propriis erroribus. Dum enim à lapsu v. g. vis valida trochanterem majorem ossis femoris urget, facile patet, caput ossis femoris fortiter apprimi suæ cavitati, qua continetur; unde glandulæ hic locatæ, & ligamentum teres validam contusionem pati poterunt, quam sæpe inflammatio, suppuratio, & puris vel mucilaginis accumulatio sequuntur. Distracta sic & debilitata ligamenta non amplius retinebunt caput ossis femoris in suo situ, sensim illud expelleretur ex suo cavo, muscoli affixi sua contractilitate sursum trahent os femoris, & immedicabilem postea claudicationem facient. Difficile cognitu hoc malum in initio, cum luxatio diu post sequatur. Si cognoscatur, talem causam prægressam fuisse, & dolor molestus in articuli loco adsit. Venæ sectio, tenuis diæta, & cura antiphlogistica requiruntur, ut inflammatio futura caveatur, vel tollatur, si jam adsit, Quies simul partis affectæ, & idonea fomenta applicata proderunt summopere; sicque poterit præcaveri luxatio, ab hac causa nascitura; quæ, si jam nata fuerit, immedicabilis videtur.

§. 363. **H**Æ causæ (361. 362.) juvantur extensis, laxatis, ruptis ligamentis, sive id ab externa, sive ab interna causa.

Sola ligamentorum cohesio efficit, ut ossa articulata suo loco maneant: in quibus ergo requiritur flexilitas quidem, ut cedere possint variis articuli motibus; sed & simul talis tenacitas, ut non patiantur facile nimiam elongationem. Demonstratum fuit in commentariis §. 25. n°. 3. nimiam distractionem merito numerari inter illas causas, quæ partes solidas corporis debilitant; unde nimia extensio ligamentorum, licet non statim fecerit luxationem, poterit tamen sic disponere articulos, ut postea facillime luxationem patiantur. Idem verum erit, si vel à nimia laxitate totius solidæ compagis corporis, vel à peculiari ligamentorum debilitate, illa non satis resistent causis distrahentibus. Ideo *Celsus (c)* generales omnium luxationum causas describens dicit: *Omnes articuli, cum validis nervis comprehenduntur, excidunt aut vi expulsi, aut aliquo casu nervis vel ruptis, vel infirmatis; faciliusque in pueris & adolescentulis, quam in robustioribus.* In juniore ætate omnes partes solidas molliores esse, & facilius distrahi posse, omnibus notum est. Sed & in quibusdam hominibus, adultis quamvis & satis robustis, mira laxitas ligamentorum in omnibus fere articulis observatur. Aliquando enim publico spectaculo

(a) Sect. VI. Aphor. n°. 59. Charter. Tom. IX. pag. 189.

(b) Académ. des Sciences Pan 1722. Mem.

ag. 159. &c.

(c) Lib. VIII. cap. XI. pag. 543.

se exposuerunt histriones, qui omnes fere articulos corporis sola musculorum vi luxare, atque iterum reponere noverant, & cereum quasi corpus in qualvis fere figuras flectere. Merito hinc monuit *Hippocrates* (a), quod in luxatis facile restituendis multum natura à naturis differant, & multum cavum à cavo distet: nam hoc quidem facilius, illud difficulter superatur. Multum etiam differt nervorum colligatio, quibusdam laxa, quibusdam tensa &c. Complures autem videre licet, qui ita humidi sunt, ut, ibi velint, sine dolore articulos suo loco moveant, & sine dolore restituant. Postea etiam addit, quod carnosus articuli minus facile excidant, sed & difficiliter reponantur, si elapsi fuerint; contrarium vero obtinere in macilentis. Deinde hanc rem boum exemplo confirmat, quibus ultima hyeme emaciatis femoris articuli facillime excidunt.

Si autem vi externa rupta fuerint ligamenta, vel suppuratione, erosione &c. soluta fuerit illorum cohesio, facile patet, levi etiam de causa articulos excidere posse.

§. 364. **H**INC figuræ in parte mutatio, tumor, cavitas, elongatio, accurtatio membri, immobilitas, distractio musculorum, torpor subjacentium, paralyxis, vasorum vicinorum compressio, dolor, privigilium, inflammatio, œdema, ancylosis, convulsio, marcor, mors partis, vel & totius.

Recensentur hac paragrapho illa phænomena, quæ luxationem factam comitari solent, vel sequi.

FIGURÆ MUTATIO, TUMOR, CAVITAS. Signa communia, quæ quamvis luxationem comitantur, describens *Celsus* (b) dicit: *Siquidem semper ea parte tumor est, in quam os prorumpit; ea sinus, à qua recessit.* Imprimis autem insolitus talis tumor, & præternaturalis cavitas apparet, si articuli luxati satis nudi fuerint, ut v.g. in humero & cubito: in femoris enim articulo, ob copiosam pinguedinem & plurimos musculos circumpositos, difficiliter hoc detegitur. Ut autem certo constet, an articulus luxatus fuerit nec ne, pulchre monuit *Hippocrates*, partem læsam debere conferri cum parte sana. *Ad exemplum enim integri æstimare vitiatum oportet, neque spectare alterius hominis articulos, (quibusdam enim hominibus magis prominent articuli, quam aliis) sed ipsius laborantis, an integer vitiato dissimilis sit* (c). Non autem solam figuræ mutationem sufficere, ut constet articulum quemdam excidisse, pariter monet, dicens (d): *multis enim articuli præ dolore, aut alia de causa, licet ipsis non exciderint, nequeunt tamen eo modo, quo in sanis corporibus, figurari.* Immo, licet cavitas præternaturalis appareat circa articuli locum, nisi & tumor insolitus in alio loco adsit, ob caput articuli alieno loco positum, turpis poterit error committi, imprimis circa articulum humeri. *Hippocrates* (e) dicit, se plures novisse, nec ignobiles, Medicos, qui credebant, humeri articulum luxatum esse, dum divulso acromio humeri superior commissura depressa & cava apparet. Et *Galenus* (f) in Commentariis in hunc textum Hippocratis

(a) De Articulis Textu 23. &c. Charter. Tom. XII. pag. 304. &c.

(b) Lib. VIII. cap. XI. pag. 543.

(c) Hippocr. at. de Articulis Textu 34. &c.

Charter. Tom. XII. pag. 310.

(d) Ibid. pag. 311.

(e) Ibid. Textu 62. pag. 321.

(f) Ibid. pag. 322. 323.

narrat, sibi simile quid accidisse. Dum enim in palæstrâ acromium ipsi diductum fuisset, palæstræ magister cavitatem præternaturalem videns credebat, humeri caput in alam prolapsum fuisse, unde valide extendebat brachium, & deinde elapsum articulum repellere nitebatur, sed frustra. Dum aliis etiam adiutoribus adhibitis validissima fieret extensio, Galenus ipse, digitis alterius manus alæ lateris affecti immixtis, tentabat reducere luxatum articulum; cum autem nihil præternaturam in alæ cavo inveniret Galenus, monuit, ut ab ulteriori extensione abstergerent: illo tamen invito perrexerunt distendere, credentes; doloris acerbitate victum Galenum jussisse, ut cessarent; & nisi alter accedens prudentior cohibuisset, musculum avulsissent. Perversa tamen hac arte convulsionis periculum instare sensit Galenus, quod non nisi continua olei calidi perfusione evitare potuit; uti alia occasione dictum fuit in commentariis §. 164. Unde apparet, quanta cautela opus sit, ut constet de articuli luxatione, cum peritissimi etiam aliquando sic erraverint. Vidi sic misero rustico totum brachium ad humerum usque gangræna correptum fuisse, dum phlegmone vera tumentem cubitum luxatum crederet, & validis, illisquæ sæpe repetitis, extensionibus vexasset rudissimus homo; qui tamen ignaræ plebeculæ persuaserat, se in luxationibus & fracturis curandis omnes antecellere.

ELONGATIO, ACCURTATIO MEMBRI. Dum articulus suo cavo, quo naturaliter continetur, excidit, musculi ossi affixi propria contractione illud sursum ducunt; unde plerumque luxatum membrum brevius fit, simili modo ac in commentariis §. 343. dictum fuit, ossibus fractis membra accurtari. In quibusdam tamen casibus, licet rarius, membrum luxatum elongatur: si nempe caput articuli elapsum sustineatur sic, ut à musculis attrahi nequeat. Sic v. g. maxilla inferior, si utrimque luxetur, *totum mentum inclinatur, & in anteriorem partem promovetur, inferioresque dentes longius, quam superiores excedunt, intusque temporum musculi apparent (a)*. Ultra enim tubercula, quæ ante cavum articuli ponuntur, prolapsa maxillæ inferioris capita non possunt retrahi à musculis affixis, & ideo in tali casu maxilla inferior semper ultra superiorem eminent. Et Hippocrates (b), de femoris luxationibus agens, inter illa signa, quæ docent, femur in anteriorem partem prolapsum esse, numerat, quod pars affecta longior sit, si cum altera conferatur. *Ossi enim, quod à coxa sursum procedit ad pectinem, femoris caput inhaeret, & cervix articuli cavo sustinetur*. Ob has autem binas causas femur luxatum longius fieri voluit. Accurtatio ergo membri luxati frequentius quidem accedit: Elongatio tamen ejusdem etiam aliquando locum habet. Rarius tamen accedit, partem luxatam eandem longitudinem retinere cum parte sana: illud tamen contingere monet Hippocrates, ubi femoris luxati caput in anteriorem partem erumpit, & simul addit, raro talem luxationem fieri.

IMMOBILITAS. Omnes illi motus, qui requirebant articuli luxati debitam & naturalem dispositionem, vel omnino fieri non possunt, vel saltem non nisi summa cum difficultate: certe nunquam in vera luxatione omnes motus exerceri possunt, qui integro articulo fieri solebant. V. g. humeri articulo bene constituto, potest homo extenso brachio innumeros conos describere, quorum ver-

(a) Cels. Lib. VIII. cap. XII. pag. 544.

(b) De Articulis Charter. Tom. XII. pag. 399.

rices in articuli cavo concipi possunt, bases vero ab extremis digitis describuntur: si autem humeri ossis caput cavo scapulæ elapsum fuerit, numquam hoc fieri poterit. Idem etiam in aliis articulationibus verum est. Non tamen semper omnes articulorum motus destruuntur luxatione facta; sæpe enim quidam supersunt, uti optime notavit Hippocrates (a). Postquam enim egit de illis, qui à primo natali die humeros breviores habuerunt, sive ob luxationem in utero jam factam, sive alia de causa, dicit: *Quibus vero virili aetate humerus excidit, nec restitutus fuit, summus humerus attenuatur, & magis excarnis fit; ubi autem dolore liberantur, non aequè prestare possunt opera omnia, quæ requirunt, ut cubitus à pectore diductus in latera attollatur. Ad ea autem valent, quæcumque perficienda sunt, humero vel in priorem partem, vel in posteriorem ad pectus adducto: nam terebra, ferra, secure &c. utuntur, dummodo cubitum non admodum alte attollere necesse sit &c.* In aliis plurimis locis ejusdem libri de diversis luxationibus ejusdem articuli agens Hippocrates monet, quinam motus articuli impediuntur, quinam vero superstites maneat. Unde sub hac limitatione immobilitas inter effectus luxationum numeratur.

DISTRACTIO MUSCULORUM. Caput articuli elapsi, alieno loco positum, necessario premet vicinos musculos, illosque distrahet: sed præterea musculi ossi luxato affixi necessario situm suum mutabunt: hinc quidam ex illis elongari debebunt, alii vero è contra laxari. Et ab hac causa etiam pender mutatio figuræ in parte luxata. Dum Petrus (b) signa enumerat, quibus cognoscitur, ossis femoris caput cavo suo elapsum versus posteriora ivisse, monet, glutæos musculos laxatos esse, tricipitem autem chordæ instar validissime tensæ a pubis regione usque ad medium ossis femoris apparere. Dum maxillæ inferioris utrumque caput luxatum est, facile patet ex Anatomica cognitione partium, quanta distractio debeat fieri musculorum temporalium &c. unde sæpe convulsiones, & mors ipsa sequuntur.

TORPOR SUBJACENTIIUM, PARALYSIS. Si nempe articulus elapsus vicinos nervos majores compresserit; vel uti à vertebrarum luxatione contingit, ipsa medulla spinalis prematur. Ubi de spinæ luxatione agit Hippocrates (c), monet, quod, ubi spinæ superior pars intorsum luxatur, toto corpore resoluti & torpidi (*σπασμωδικοί*) fiant. Videantur & illa; quæ dicta sunt in commentariis §. 170. n°. 1. 2. Si jam caput ossis humeri, in cavum axillæ delapsum, magnos truncos nervorum ibi decurrentes comprimat, patet facile, eadem mala in partibus suppositis fieri posse. Quando ossis femoris caput in anteriorem partem luxatur, inter alia signa hujus mali numerat Hippocrates (d) urinæ suppressionem, quia femoris caput tunc insignibus nervis adjacet. Videretur autem à compressis nervis potius debere sequi urinæ excretionem involuntariam, quam ejusdem suppressionem. Sed monuerat Hippocrates alibi (e), si medulla spinæ læsa fuerit quacumque de causa, primis temporibus nec stercus, nec urinam, egeri; vetustiore autem facto morbo, hæc etiam, non urgente homine, prodire: unde patet, à compressis

(a) De Articulis Textu 61. Charter. Tom. XII. pag. 320.

(b) Académie des Sciences l'an 1722. Mém. pag. 163.

(c) De Articulis Charter. Tom. XII pag. 390. 391.

(d) Ibid. pag. 422. 423.

(e) Prothet. Lib. II. cap. 17. Charter. Tom. VIII. pag. 819.

nervis sequi aliquando urinæ suppressionem. Si ergo integre compressi fuerint nervi motui & sensui dicati, paralytis erit perfecta cum insensibilitate; si levior tantum compressio, minuet quidem, non tamen integre abolebit, nervorum functionem: partes subjectas occupabit torpor, qui, uti pulchre dixit *Galenus* (a), inter paralytin & integram valetudinem medius affectus est.

V A S O R U M VICINORUM COMPRESSIO. Æque jam, ac caput ossis humeri, cavo suo elapsum axillam versus, premit sæpe vicinos insignes nervorum truncos, sic & poterit comprimere maxima vasa sanguinea hic posita; adeoque, quamdiu ibi hæret, impedire liberum sanguinis influxum & effluxum in partibus suppositis: unde gangræna, vel atrophia, sequentur. Videantur & illa, quæ dicta sunt in commentariis §. 161. & §. 166.

D O L O R. Illa dispositio fibræ nervosæ, cerebro ortæ, quæ dissolutionem continui minuitur, doloris ideam in mente excitat, uti dictum fuit §. 200. Sed non potest articulus suo loco elabi sine valida distensione ligamentorum hunc articulum ambientium; & , quamdiu os luxatum manet in hoc situ præternaturali, ligamenta plus distrahuntur, quam naturaliter solent: unde dolor, & satis acutus quidem, omnem luxationem recens factam comitatur; cessans plerumque, vel saltem plurimum minutus, postquam ossa luxata in debitum situm reposita fuerunt. Ob hanc rationem doloris inter causas merito numerabatur luxatio §. 224. n°. 3. Si jam consideretur, periosteum in illo loco, ubi ligamenta articulorum oriuntur, ab osse secedere, & supra ligamenta pergere (vide commentaria §. 343), patebit, non posse distrahi ligamenta, quin similiter afficiatur periosteum incumbens, quod acutissimum sensum habet; unde iterum nova doloris causa oritur. Præterea caput ossis luxati, premendo partes vicinas, poterit fibras nervosas per has partes dispersas distrahere, & earundem vasis compressis obstructionem, inflammationem &c. facere; unde iterum nascetur dolor. Ubi autem os luxatum non repositum fuerit, diuturna distractione fibræ ligamentorum debilitantur sic (vide §. 25. n°. 3.) ut facilius cedere possint & elongari sine rupturæ periculo; unde dolor sensim minuitur, & tandem cessat (vide §. 228. n°. 1.). Vicinæ partes vero; à capite ossis luxati pressæ & tritæ, callosæ fiunt & sensim amittunt. Paulo ante dictum fuit, ubi de immobilitate, quæ luxationem sequitur, agebatur, tandem dolore liberari illos, quibus articuli elapsi non fuerunt repositi, & multos adhuc motus sæpe satis commode perfici posse. Ubi de luxatione ossis femoris versus partem exteriorem agit *Hippocrates*, (b) dicit: *Ubi caro, in quam articulus excessit, jam trita est, & tenax evasit, dolor tempore cessat. Quando autem dolore liberi sunt, ingredi sine baculo possunt, si alioquin velint, potestque affecto crure ferri corpus.* Notavit enim *Gorræus* (c) γλίσχρον in fluidis significare majorem lentorem, in solidis vero partibus autem tenacitatem.

P E R V I G I L I U M. In commentariis §. 226. vigilia numerabatur inter effectus doloris: cum ergo modo probatum fuerit, dolorem luxationem comitari, patet & pervigilium adesse debere, quamdiu doloris acerbitas durat.

I N F L A M M A T I O. In sequenti capitulo patebit, inflammationem adesse;

(a) De locis affectis Lib. II. cap. 4 Charter. Tom. VII. pag. 404.

(b) De Articulis Charter. Tom. XII. pag. 411.
(c) Defin. Med. pag. 133.

dum immeabile liquidum in vasorum angustis hærens liquido à tergo urgente, & per febrim fortius moto, premitur, & atteritur. Supponitur ergo obstructio, & celerior humorum circuitus. Sed in commentariis §. 112. demonstratum fuit, omnem vim comprimentem, vel & elongantem vasa flexilia, angustare eorundem cavitates, ideoque obstructionis causam esse posse. Per luxationem autem elongantur ligamenta, & muscoli & tendines ossibus affixi; ossa sedibus suis elapsa comprimunt vicinas partes; unde obstructio ut effectus à luxatione tanquam causa sequetur. Febris autem inter doloris effectus recensetur §. 126. unde apparet, in luxationibus bina illa concurrere, quæ inflammationi producendæ sufficiunt; obstructio nempe, & celerior motus sanguinis per febrim, à dolore, omnem luxationem comitante, ortam. Quam validæ autem febres una cum inflammatione luxationes sæpe sequantur, Hippocrates pluribus locis docuit. *Humeri osse in cubiti articulo versus priorem partem luxato, nisi statim reponatur, graves & vehementes inflammationes sequuntur. Si vero versus posteriorem partem eruperit, maximum dolorem movet, & validissimas febres continuas, cum maraca bilis excretionem, & paucis diebus lethales, excitat (a).* Quod & confirmat in libro de Articulis, ubi de cubiti luxatione agit (b). Et alibi de maxillæ luxatione agens (c) monet, quam celerissime restituendam esse: nisi enim reponatur, vitæ periculum instat propter febres continuas: & postea addit, quod soleant tunc alvo biliosa sincera pauca dimittere, & si evomant, sincera (biliosa nempe) vomunt.

ŒDEMA. Dictum fuit in commentariis §. 112. n°. 1. hoc nomine quidem omnes tumores præter naturam vocatos fuisse; postea tamen solos tumores molles indolentes, & digito prementi cedentes sic dictos fuisse. Talis tumor plerumque tantum in membrana cellulosa hæret, accumulata lymphæ & stagnante in cellulis hujus membranæ. Luxationes autem talis tumor comitatur imprimis, quando articulus elapsus venas majores comprimit: sic enim impeditur liquidi venosi motus, unde tenuissimus ros, ab arteriis efflatus in cava membranæ cellulosa, per venas commode resorberi nequit, adeoque accumulatus stagnat, & in aquam, sive ichorem dictum Hippocrati, convertitur.

ANCYLOSIS. Recenti cicatrice contractos articulos ἀγκύλας Græcis vocari dixit Celsus (d). Articulorum vero detentiones (τῶν ἀρθρῶν κατοχὰς), appellari ἀγκύλας & ἀγκυλώσεις, habetur apud Aeginetam (e), factas ob humorum infarctionem vel ob quandam nervorum contractionem. Ablatam ergo articulorum flexibilitatem Ancylosis significat; quam sæpe tumor præternaturalis comitatur. Sed, ut mobiles articuli maneant, requiruntur debita figura & adaptatio extremorum ossium articularum, lubricitas summa ob cartilagineam æquabilissimam horum extremorum superficiem, & linimentum inungens; denique & ligamentorum, articulum ambientium, debita debet esse flexilitas. Sed per luxationem factam hæc requisita aliquando tolluntur, vel insigniter mutantur. Ligamenta enim, dum articulus suo cavo excidit, rupta, vel valide distracta, inflammantur; uti etiam ab illa vi, quæ ad luxata restituenda adhiberi debet. Sed hanc inflammationem suppuratio sequi poterit, vel & gangræna; unde postea ligamenta contracta manebunt & rigida. Præterea male sic affectis ligamentis non fiet

(a) Hippocrat. de Fracturis in fine libri Character. Tom. XII. pag. 266. 267.

(b) Ibid. pag. 331.

(c) Ibid. pag. 340.

(d) Lib. V. cap. 18. num. 28. pag. 257.

(e) Lib. IV. cap. 55. pag. 70. versa.

talis secretio muci articulos lubricantis, qualis naturaliter fieri solet; unde iterum impediatur articuli motus. Et dum ligamentis inflammatis à minimo motu articuli acerrimus dolor oritur, quiescente parte, non attenuatur satis nec refovetur articulorum linimentum; quod ergo accumulatum, diffusa tenuissima parte, in massam irresolubilem postea concrelescens, omnem articuli motum tollet. Si jam, dum elabitur ex suo cavo articulus, vel dum elapsus reponitur, cartilaginea superficies ad margines cavi fortius attrita lædatur, vel alio quocumque modo depravetur, iterum alia ancylosis origo patet.

CONVULSIO. Acerrimum dolorem, turbato toto sensorio communi, convulsio sæpe sequitur: uti dictum fuit §. 226. Unde vel ob hanc rationem convulsio luxationem sequi posset. Sed præterea luxationem sæpe comitantur ingens musculorum distortio, tendinumque distractio, quæ convulsioni producendæ sufficiunt. Novimus enim quotidianis observatis, si musculorum, digitos manus pedisque moventium, tendines loco suo exsiliant, quam enormis dolor & tetanus musculi sequantur, quem *crampum* vocare solent. Monuit *Hippocrates* (a), si cruris ossibus luxatis, accedente vulnere, articuli, qui ad pedem sunt, sive in interiorem, sive in exteriorem partem penitus excidant, non debere reponi luxata ossa; paucis enim diebus vivunt, si reponantur, & convulsione pereunt. Idem malum expectandum esse dicit (b), si cubiti ossa circa carpum sic luxentur, ut facto vulnere excidant: & postea (c) dicit, quod, si reposito articulo convulsio sequatur, cito expelli debet, & subinde calido humore perfundi.

MARCOR. Ubi à quacumque causa arteriæ majores, vel & nervi, ad partem quandam tendentes impediuntur, quo minus vitales humores, ad vitam & nutrimentum necessarios, deferant & distribuunt per partem, oritur verus marasmus; dum sensim dissipatis liquidis, quæ aderant, nec novis allatis, vasa omnia contrahuntur. Mirum tale exemplum in commentariis §. 161. habetur, ubi arteria axillari integre dissecta, brachium totum postea Mymæ instar exaruit. Ubi ergo v. g. caput ossis humeri elapsum maxima illa vasa axillaria compressit diu, simile malum metuendum esse facile patet.

Sed & aliam causam marcoris notavit *Hippocrates* (d): quando nempe ossa luxata non fuerunt reposita. De femoris enim luxatione agens dicit, quod si hæc acciderit illis, qui nondum incrementi apicem adepti sunt, neque restituta fuerit, brevius reddatur femur, crus & pes, neque enim ossa similiter in longitudinem augentur, sed breviora sunt, femur præsertim. Crus item universum sine carne & musculis fit, & effæminatum & tenuius; partim quod articulus suo loco motus sit, partim quod nequeat suo munere fungi, quia non secundum naturam disponitur. Nam usus aliquis id, quod valde effæminatum est, confirmat; solvit etiam aliquid ex eo, quod augeri membrum in longitudinem prohibet. Potissimum autem læduntur, quibuscumque, dum in utero sunt, hic articulus elabitur; deinde quibus id accidit, dum in ætate sunt admodum tenera; minime quum jam robusti sunt. Marcorem autem illum locum habere notat imprimis in proximis articulo luxato locis (e): quod probat exemplo illorum, quibus humeri luxati à nativitate fuerunt, vel saltem antequam

(a) De Articulis Charter. Tom. XII. pag. 435.

(b) Ibid. pag. 443.

(c) Ibid. pag. 445.

(d) Ibid. pag. 403. & sequentibus.

(e) Ibid. pag. 408.

perfectum corporis incrementum adepti fuerint. Illis enim humeri os brevius est, cubitum vero & summam manum sanis minora paulum habent. Hujus rei & hanc rationem addit, quod possint pleraque opera non minus manu partis læsæ præstare, quam altera manu sana: ideoque, coxæ articulo versus interiorem partem elapso, carnes magis minui dicit, quia crure uti nequeunt. Unde marcor ille, articulum luxatum, nec repositum, sequens, non semper adscribi potest compressioni majorum vasorum, sed sæpe etiam pendet a defectu motus muscularis in parte sic læsa. Ideo notat *Hippocrates* (a), quod, ubi adultis femoris os versus exteriorem partem exciderit, nec restitutum fuerit, non adeo multum minuatur partis torositas, quia non perit membri usus. Carne enim, in quam articulus excessit, per attritum firmiore facta, sine baculo incedere possunt. Postea vero ex plurimis circa hunc marcorem observatis generale axioma deduxit, dicens (b): *Quacumque in corpore ad aliquem usum facta sunt; si quis moderate utatur, exerceatque in eo laboris genere, cui singula assueverunt; hoc pacto bene valent, augentur, & ad bonam senectutem deducuntur. Si in usu non sint, sed otiosa maneant, morbosiora sunt, non augentur, & brevi senescunt: id præcipue accidit nervis atque articulis, nisi quis illis utatur.* Quantum autem effectum præstet motus muscularis, ut ex ingestis restituantur illa, quæ vitæ & sanitatis inevitabili effectum quotidie pereunt de toto corpore & singulis partibus, demonstratum fuit in commentariis §. 25. n°. 2. & §. 28. n°. 2. Si jam simul consideretur, musculos, tendines, ligamenta &c. sibi relicta spontanea contractione abbreviari, & tandem rigescere; & minutis causis distendentibus propria contractilitate vasa nostri corporis arctari; patebit ratio, quare post luxationem, impedito membri motu, marcor sequatur.

Omnia hæc, quæ de hoc Marcore apud Hippocratem sic sparsim habentur, collegit Celsus (c) & brevi, nec minus eleganti sermone sic expressit: *Ac, quibus in pueritia exciderunt (articuli), neque repositi sunt, minus quam ceteri crescunt: omniumque, quæ loco suo non sunt, caro emacrescit, magisque in proximo loco, quam in ulteriore; ut puta, si humerus loco suo non est, major in eo ipso fit macies, quam in brachio; major in hoc, quam in manu. Tum pro sedibus, & pro cassibus, qui inciderunt, aut major aut minor usus ejus membri relinquitur: quoque in eo plus usus superest, eo minus id extenuatur.*

Optimorum Chirurgorum observata etiam hanc rem confirmant. Juveni, dum in prælo sedentem arrepto pede protaxerat ludibunda puella, dolor ortus fuerat circa femoris articulum, fatis levis. Peritissimus Chirurgus advocatus, omni cura examinans hoc malum, nullum luxationis signum invenit, sed à musculorum, & ligamenti articulum ambientis, distractione dolorem hunc ortum fuisse credidit: ideoque linteam spiritu vini madidum loco dolenti applicuit, & comoda ligatura firmavit. Sollicita mater, quæ longe operosiora artis molimina expectaverat, advocat rusticum, qui ignaræ plebeculæ in luxationibus restituendis magnus magister habebatur. Rudis ille homo validissima extensione produxit, quæ falso credebatur adesse, luxationem, sic ut caput ossis femoris, cavo suo enormi hac vi eductum, versus interiora vergeret; uti evidenter apparuit, postquam idoneis remediis acerrimus dolor & tumor immensus adeo crudeliter vexatæ partis imminuebantur. Crus affectum binorum pollicum longitudine superabat crus sa-

(a) Ibid. pag. 411.

(b) Ibid. pag. 42.

(c) Lib. VIII. cap. xi. pag. 544.

num. Cum nondum apicem incrementi æger adeptus esset, prædixit Chirurgus, defecturum postea in parte affecta proportionale reliquo corpori incrementum. Eventus probavit hujus asserti veritatem: cum enim postea ad quatuor pollicum longitudinem increvisset totum corpus, crus læsum binis circiter pollicibus brevius remansit sano, licet in initio simili longitudine superasset (a).

MORS PARTIS, VEL TOTIUS. Inter effectus doloris §. 126. gangræna numerabatur: quæ talis partis corporis mollis affectio est, quæ, abolito influxu vitalis humoris in arterias, effluxu per venas, in mortem tendit. Validam autem inflammationem, quæ toties luxationes comitatur, sæpe idem malum sequitur. Dum cruris ossa circa pedem cum vulnere luxantur; monet Hippocrates (b), si tentatur repositio, gangrænam pedem & crus prehendere. Si ergo vasa majora sic compressa fuerint, vel læsa per luxationem, ut impediatur humorum vitalium influxus & effluxus, mors partis instat. Uti etiam, si valida inflammatione jam præsentente luxatum os reponere tentant. Fortis enim sæpe extensio & rudior attrectatio ad hoc requiruntur, à quibus citissime inflammatio, in gangrænam transit. Tristis talis casus habetur apud modo laudatum auctorem (c). Famulo luxationem cubiti pridie passo, licet valida inflammatio jam articuli locum & vicina occupasset, restitutionem moliebatur rudis homo, in auxilium adhibitis etiam binis robustis viris, qui partem validissime extenderent. Sequenti die gangræna jam ad mediam brachii altitudinem adscenderat, & misero sola exstirpatione membri vita servari potuit. Mortem autem totius sequi aliquando satis constat ex illis, quæ in commentariis hujus paragraphi jam dicta sunt. Maxillæ enim luxationem diras convulsiones & mortem sequi dictum fuit. Post cubiti luxationem validas febres continuas, paucis sæpe diebus lethales, nasci, ab Hippocrate pariter observatum fuit. Uti etiam, ubi majores articuli una cum vulnere sic luxantur, ut ossa emineant; tunc enim convulsiones instant & mors, si reponantur; & licet relinquantur, sæpe tamen adhuc anceps vitæ periculum manet.

§. 365. **E**X quibus notis signa evidentia habentur luxationis.

Ut constet de luxatione articuli cujusdam, primo inquiritur, an talis causa præcesserit, à cujus vi & impetu articulus sua sede expelli potuisset. Sic hæc vis externa fuerit; de qua dictum §. 361. sive interna, in cavo articuli nata; de qua similiter dictum fuit §. 362. Simul tunc attenditur, an forte ligamenta articuli coërentia à vi externa prægressa distracta nimis, vel & rupta fuerint; vel à quacumque demum causa sic laxata, ut non satis firment articulum, quem ambiunt; de quibus dictum fuit §. 363. Postquam ex his constitit, justum adesse luxationis factæ metum, sedulo inquiritur, an illa signa adsint, quæ luxationem faciam docent. Primaria sunt; tumor præternaturalis, ob caput articuli elapsi alieno loco positum; & cavitas insueta in illo loco, quem naturaliter caput ossis elapsi solebat occupare. Ut firma autem sit Diagnosis, debent hæc bina adesse; alter-

(a) De la Motte Traité complet de Chirurgie Tom. IV. pag. 367—371.

(b) De Articulis Charter. Tom. XII. pag.

437.

(c) De la Motte &c. Tom. IV. pag. 359.

utrum enim tantum si deprehendatur, falleret sapissime. Exemplum habetur in Commentariis præcedentis paragraphi talis erroris, ubi male credebatur adesse luxationem humeri, quia cavitas præternaturalis apparebat circa articuli locum ob acromii divulsionem, interim nullo apparente tumore insolito in vicinia. Sic vidí, quod, post lapsum orto tumore durò inflammatorio in inguine, luxatio ossis femoris culparetur; cum tamen in macilenta satis puella facile perciperetur tactu, articuli locum se bene habere, nullamque cavitationem præternaturalem adesse. Multum confirmatur hæc Diagnósis, si motus membri, à naturali articuli conformatione determinatus, omnino sublarus sit, vel saltem quam plurimum depravatus. Si tunc simul pars affecta conferatur cum parte sana, & in figura & longitudine insignis differentia appareat, nullum dubium videtur superesse.

Aliquando tamen contingere potest, ut satis difficilis sit luxationis Diagnósis. Si enim à valida contusione, distorsione &c. inflammatio locum articuli tumere fecerit, non adeo facile licebit distinguere cavitationem præternaturalem in loco articuli, & tumorem insolitum in vicinia; dum interim omnis articuli motus impeditur ob doloris acerbiteriam. Unde in simili casu quam maxime attendendum est, an causæ prægressæ tales fuerint, à quibus merito luxatio expectari posset. Neque nocebit in dubio casu suspendere iudicium, quia, valida inflammatione nata, minime tutum foret luxata reponere, unde hac prius per idonea remedia sedata, postea locus affectus examinari poterit.

Quanta autem sæpe cautela opus sit ad luxationes distinguendas, docet mirus satis casus, qui apud *Galenum* (*) habentur. Homini in palæstra brachium luxatum fuerat: Medicus, partem læsam conferens cum parte sana, circa articuli locum nullam tamen differentiam invenit; unde satis temere hanc sententiam tulit: plagam quidem huic loco infligam fuisse, articulum vero illæsum esse. Balneum itaque adire ægrum, & postea, pannis laneis, oleo cum pauca cera perfusus, recta parte, decumbere & quiescere iussit. Cum tamen his factis tota nocte dolor non remisisset, sequenti die indignabundus (quia alii adhuc Medici ipso imperitiores in concilium vocati essent) promptissime pridie factam Diagnósim confirmavit, humerum vero læsum inflammatum dolore dixit, ideoque in usu eorundem pergendum esse voluit. Tertia die, cum nihil remitteret dolor, in consilium vocatus Galenus vidit, humerum affectura quidem non habere præternaturalem cavitationem in loco articuli, imo potius plus tumere, quam alter humerus, qui secundum naturam se habere credebatur; sed sub alam brachii affecti digitis immissis statim deprehendit, caput articuli elapsi ibi hære, unde luxationem adesse conclusit. Fefellerat autem Medicum comparatio partis læsæ cum altera parte simili, quam sanam credebat; cum tamen æger, sciscitante Galeno, recordari se dixit, quod quondam ex curru delapsus humerum læsisset, unde acromium avulsum fuerat; sicque in humero, qui naturaliter se habere credebatur, præternaturalis cavitas circa articuli locum apparebat, & ideo comparatio binorum humerorum inter se Medicum in errorem duxerat.

Postquam jam constitit de luxatione præsentí, præterea requiritur in Diagnósi, ut determinetur, versus quam partem articulus elapsus iverit, an versus ex-

(*) In Commentario primo in librum Hippocrat. de Officina Medici Charter. Tom. XII. pag. 6.

teriolem, interiolem, superiolem, inférieurem &c. Plurima enim ad prognosim & curam scitu necessaria ab hac cognitione pendent. Anatomica cognitio, ossium articulatorum variam unionem in diversis articulis docens, & consideratio motuum illorum, qui ab articuli naturali dispositione pendent, multum hic lucis dant. Præsertim autem hoc noscitur ex loco, in quo caput articuli elapsi hæret. Ideo sollicitissime collegerunt Hippocrates, & post illum optimi omnes in arte Magistri omnia signa, quibus distingui possent variæ ejusdem articuli luxationes. Sic v. g. cubito in posteriorem partem prolapso monet, quod sic affectus extendere brachium non possit; & contra, eodem articulo in priorem partem luxato, flexio cubiti fieri nequeat (a). De femoris variis luxationibus agens, singularum signa accurate notavit (b), &c. quæ omnia hic describere supervacuum videtur.

§. 366. **E**T expensis magnitudine, figura, situ, parte pressa & intercepta, tempore durationis, concretionem luxatorum, dolore, inflammatione, convulsione, & reliquis symptomatibus, partibus ambientibus tenuioribus, crassioribus, ligamentis destructis, vel modo elongatis, musculis annexis, & similibus, prognosim habetur, quæ doceat, an integra, an deficiens, celeris, tarda, facilis, vel difficilis futura sit sanatio.

Postquam per signa Diagnostica constitit, luxationem factam esse, sedulo debent ponderari omnia illa, quæ hac paragrapho recensentur, ut possit haberi certa prognosim illorum, quæ metuenda sunt a luxatione jam cognita; vel & ab illa vi, quæ necessario debet adhiberi, ut luxata ossa restituantur. Omnia autem hæc indicare oportet, si non ægro ipsi, saltem amicis ejus, ne postea secuta damna, quamvis nulla arte vitari potuerint, medentium incuriæ; non vero magnitudinis mali, adscribantur. Imprimis autem in Prognosi queritur, an cura talis expectari possit, ut omnes motus, integro articulo exerceri soliti, restituantur; an vero aliquis quidem usus membri luxati superstes futurus sit, non tamen absolute talis, qualis ante luxationem factam fuerat. Sic enim distinguitur **INTEGRA ET DEFICIENS** curatio. Præterea debet determinari, an brevi temporis spatio cura perfici possit, an vero longiori mora opus sit, ut debita firmitas articulo restitatur. Si enim v. g. à valida distractione, vel à laxitate nimia, luxationem factam prægressa, ligamenta robur suum amiserint, non poterit celeris curatio expectari. Facilis autem cura dicitur, si levis tantum extensio ad luxata restituenda sufficiat, neque gravia ulla symptomata adsint. Ubi autem contrarium obtinet, difficilis cura merito prævidetur, quæ & validam vim, & multa artis molimina requireret. *Histrionis quidem est, parvam rem attollere, quo plus præstitisse videatur* (c), nunquam tamen nocebit, difficiliorem parum dedisse Prognosim; sic enim si sinistri quid acciderit, illud prævisum fuisse medentibus apparebit; si vero om-

(a) Hippocrat. de Articulis Charter. Tom. XII. pag. 331.

(b) Ibid. pag. 398. & sequentibus,

(c) A. C. Celsi Medic. Lib. V. cap. 26. pag. 283.

omnia feliciter cesserint, faustus eventus laudem merebitur. Quænam autem metuenda sint, patebit, consideratis sequentibus.

MAGNITUDE. Luxationis magnitudo mensuratur distantia, quæ est inter illum locum, quem caput ossis elapsi occupat, & articuli cavum. Facile autem patet, quo plus recesserit os luxatum à suo cavo, in quo naturaliter hæret, eo magis distrahi debere, imo & rumpi aliquando, ligamenta articulum ambientia; atque etiam musculos & tendines vicinos eo majorem vim pati, unde dolor summus, inflammatio &c. sequuntur. Simul etiam evidens est, eo facilius restitui posse luxationem, quo propius articuli cavo hæserit os elapsum, Unde *Celsus* (a) monet, longe facilius humerum in suam sedem compelli, si in partem priorem, quam si in alam, exciderit.

FIGURA. Dictum fuit §. 364. figuræ mutationem in membro luxato adesse: quo ergo, comparatione instituta cum simili parte sana, major invenitur figuræ diversitas, eo major mutatio litus partium omnium vicinarum adest; adeoque earundem validior distractio, vel intorsio: quæ omnia, ut facile patet, curæ difficultatem augent. Sed & ipsius articuli luxati figura magnam hic differentiam adferre poterit. Sic v. g. humeri osse luxato, debita extensione facta, si ejus caput ante sinum cavum scapulæ locetur, remissis partibus extensis, facile in suum locum revertitur. In osse femoris autem longe alio modo se res habet. Caput enim ejus una cum cervice angulum obtusum facit cum reliquo ossis deorsum tendentis corpore; unde alia adhuc arte opus erit. Licet enim, valida extensione facta, è regione cavi sui poneretur articulus elapsus, posset facillime sursum ire, & præterlabi cavum suum à latere positum. Unde *Hippocrates* (b), de restitutione ossis femoris versus interiorem partem luxati agens, sic disponit totum apparatus, ut, dum extensione facta articulus elapsus è regione sui cavi fuerit, curantis brachio urgeatur à latere sic, ut in sedem suam revertatur.

SITU. Si considerentur pulcherrima illa observata, quæ *Hippocrates* (c) de ossis femoris luxati vario situ habet, patebit evidenter, quanta sit differentia effectuum luxationes sequentium ob solam hanc causam. Si enim versus interiorem partem iverit femoris os, nec reponi potuerit articulus (uti sæpe contingit), carnes ambientes os luxatum emacrescent, & plurimum vitiatus manebit partis usus. Longe levius è contra malum sequetur, si versus exteriora luxatum fuerit idem femoris os. Ideoque generalem hanc conclusionem posuit *Hippocrates* (d); *Circa coxas magna differentia est, versus interiora aut versus exteriora, luxatum esse: circa genua quidem differt, sed minus. Modus autem claudicationis utriusque proprius est: nam quibus in exteriorem partem procidit, vari magis sunt minus autem recti stant illis, quibus in interiorem partem luxatur. Similiter autem & si circa talum luxatio facta fuerit; si enim versus exteriorem partem, vari quidem sunt, sed stare queunt. Si versus interiorem partem exciderit, valgi quidem sunt, minus vero stare possunt.*

PARTÉ PRESSA ET INTERCEPTA. Quanta mala fieri possint, dum ossa sedibus suis elapsa vicinas partes premunt, nunquam evidentiùs apparet, quam

(a) Lib. VIII. cap. 15. pag. 549.

(b) De Articulis Charter. Tom. XII. pag. 1

(c) Ibid. pag. 399. & sequentibus.

(d) Ibid pag. 406.

in luxatione vertebrarum : harum enim cavo inclusa medulla spinalis tunc premitur, contunditur, imo & aliquando laceratur. Eo autem magis funesta mala contingunt, prout altiori loco talis luxatio facta fuerit. Capitis hinc luxationem, elapsis versus posteriorem partem processibus, quibus summæ vertebræ committitur, absolute lethalem merito posuit *Celsus* (a). *Nervi sub occipitis extenduntur, & mentum pectori agglutinatur, neque bibere is, neque loqui potest; interdum sine voluntate semen emittit, quibus celerrime mors supervenit.* Et postea (b) monet, eundem casum manere eos, quibus in spina vertebræ exciderunt, sed tardius quidem mori, quam quibus capitis luxatio contigit; intra triduum tamen. Simul ibidem pessima illa mala enumerat, quæ vertebrarum luxationem sequuntur; si nempe totæ loco mortæ fuerint: tunc enim medullam spinalem, membranas, & nervos rumpi necesse esse dixit. Si vero paululum tantum excesserunt vertebræ in exteriorem partem, curam ex Hippocrate proposuit. Videantur etiam de hac re illa, quæ dicta fuerunt in commentariis §. 364. de torpore & paralyti partium, quæ articulo luxato supponuntur. Si autem, dum reponitur articulus luxatus, intercipientur mala fortuna nervi, vasa, musculorumve aut tendinum partes &c. facile patet, quam enormes dolores, convulsionem &c. inde fieri possint. Non facile tamen hæc interceptio continget, si debita extensio partis luxatæ repositionem præcesserit.

TEMPORE DURATIONIS. Generalem regulam posuit *Hippocrates* (c) in luxationibus restituendis, quod statim reponi debeant, vel saltem quam celerrime. Sic enim & facillime hoc fieri monet, & ægrum minimam molestiam pari, si restituatur articulus elapsus, antequam locus intumuerit. Celeberrimi etiam Chirurghi, dum ante fracturæ repositionem totum apparatus prius disponunt, qui requiritur ad retinenda in situ ossa fracta, luxata ossa statim reducunt, & dein illa parant, quæ continendis ossibus jam repositis necessaria videntur (d). Et si mala fortuna luxationem fractura comitetur, semper prius luxationem restituant, antequam fracturæ curam aggrediantur; partim ob modo dicta, partim etiam quia ossis fracti extrema, naturali situ disposita, illa vi, quæ requiritur ad restituendam luxationem, facile iterum à se mutuo recederent (e). Si autem elapsus articulus aliquo tempore sic manserit, brevi tumebit locus affectus, inflammabitur, & dolebit immaniter; unde gangrænæ metus à rudiori attrectatione imminet. Præterea ligamenta, distracta diu, robur suum amittunt; unde facillime postea elabetur repositus articulus. Glandulæ autem insignes, in majoribus articulationibus locatæ, pressione capitis ossis elapsi liberæ, vel & inflamatæ, tumere poterunt sic, ut cavum articuli multum minuant; unde & difficilis repositio & difficilior adhuc repositi ossis retentio in situ naturali. Accedit, quod & mucosum illud articulos lubricans linimentum, motu articuli attenuari & dissipari solitum, nunc accumuletur, & inspissetur sæpe in massam postea nulla arte resolvendam, quæ articuli cavum sæpe sic replet, ut nullus locus amplius elapso ossi capiti superfit. Si jam simul consideretur, luxationem, nisi cito restituatur, semper sequi inflammationem, à qua suppuratio diuturna, & profunde hærens fieri poterit, (uti Hip-

(a) Lib. VIII. cap. 13. pag. 546.

(b) Ibid. cap. 14. pag. 547.

(c) De Articulis circa finem. Charter. Tom.

XII. pag. 466.

(d) De la Motte Traité complet de Chirurgie. Tom. IV. pag. 358.

(e) Ibid. pag. 398.

pocrates (a) de luxatione femoris agens monuit) patebit facile ratio, quare in Prognosi plurima mala prævideantur, si diu duraverit luxatio, antequam tentetur reductio.

CONCRETIONE LUXATORUM. Notum est, partes omnes corporis, sibi mutuo accumbentes & contiguas, à concretionem impediri intermedio liquido tenuissimo, roris instar, omnia cava minora & majora corporis occupante. Simulac autem ille ros deficit, brevi concrescunt inter se partes antea separatae. Ubi autem inflammatio partem quandam occupat, vasa majora infarcta & distenta tenuissimas exhalantes fistulas comprimunt; unde siccitas in partibus inflammationis oritur, & ob hanc facilis concretio cum vicinis. Sic post validas pleuritides & peripneumonias semper fere pulmo pleuræ accretus reperitur. Ossis jam elapsi caput, naturali suo linimento orbatum, partibus accumbens à distractione valida aut compressione inflammationis, facile cum illis concrescit, si diu ibi hæreat. Unde patet, impossibilem esse tunc reductionem. Sed & ipsum articuli cavum repleri luxuriantibus glandulis, vel muco inspissato, statim vidimus. Fortè & sensim ipsum hoc cavum osseum minuitur, diu elapso manente articulo: dentibus enim evulsis lamellæ maxillæ, quæ à se mutuo remotæ alveolum constituerant, sensim propius ad se mutuo accedunt; tandemque sic uniuntur, ut nullum alveoli vestigium maneat.

DOLORE. Recens factam luxationem semper dolor comitatur, uti dictum fuit in Commentariis §. 364. Si vero acerbissimus fuerit, merito pessima quæque metuuntur: quia indicat, partibus dolentibus talem adesse conditionem, quæ in coæhsionis totalem solutionem tendit (vide §. 220.). Præterea pessimi effectus doloris summi, §. 226. enumerati, expectari debent; præcipue quia ad repositionem articuli luxati requiritur valida extensio partium, jam adeo dolentium; unde convulsionis, delirii, gangrænæ &c. metus est.

INFLAMMATIONE. Quare inflammatio luxationem factam sequatur, dictum fuit in commentariis §. 364. Semper autem adesse solet, nisi cito reponatur articulus elapsus. Ubi autem valida inflammatio partem luxatam occupavit, maximum periculum est. Nisi enim reponantur cito luxata, difficillime postea reponi poterunt: si vero inflammatae partes rudius tractentur, gangræna brevi sequetur. In tali autem casu ex binis malis minus eligendum est, præstatque luxata relinquere, donec inflammatio idoneis auxiliis sedata fuerit. Hæc fuit etiam *Hippocratis* (b) sententia: Dicit enim de periculosissimis luxationibus agens: *Eodem die restituenda sunt, vel sequenti; tertio vero aut quarto minime. Ubi enim usque ad quartum diem duraverint, maxime recrudescere videmus. Ubi ergo non prætius recondantur, his diebus supersedendum est. Contineri enim solet, quod intra decem dies conditur.* Ex alibi (c) de cubiti luxatione agens generalem regulam posuit: *quod nullum articulum, dum febris adest, in suam sedem reducere conveniat, & omnium minime cubitum.* Febris autem inflammationis validæ luxationem coactantis signum & comes est. Sic & *Celsus* monuit (d) dicens: *Quidquid autem loco suo motum est, ante inflammationem reponendum est. Si illa occupavit, dum conquies-*

(a) De Articulis Charter. Tom. XII. pag. 411.

(b) Ibid. pag. 445.

(c) De Fracturis Charter. Tom. XII. pag. 167.

(d) Lib. VIII. cap. XI. pag. 544.

cat, laceffendum non est: ubi finita est, tentandum est in his membris, quæ id pariuntur. In commentariis §. 364. talis casus habetur, quo constitit, pessimam gangrænam secutam fuisse, dum cubiti luxatio reponebatur, postquam inflammatio valida partem jam occupaverat. In tali ergo casu differri debet luxatorum reductio; & monendi sunt æger ejusque amici, instare pessima mala, si hoc tentetur; difficilem autem postea curam fore, nec integram sæpe: ne mala secutura imputentur temere postea Chirurgo vel Medico. Licet enim luxata quantocitissime restitui debeant, si nihil veter; tamen observata docuerunt, non desperandum esse omnino, licet articulus elapsus diu remanserit. Humerus enim luxatus, cum valida inflammatio accessisset, non potuit reponi nisi post binos menses elapsos; & tamen integra fuit sanatio tam diuturni mali (a). Quam tædiosa autem mala sequantur articulorum jam inflammatorum extensiones, pluribus Exemplis demonstravit *Hildanus* (b).

CONVULSIONE, ET RELIQUIS SYMPTOMATIBUS. Convulsionem luxationi aliquando succedere in commentariis §. 364. dictum fuit; imprimis ob doloris vehementiam, & musculorum aut tendinum distorsionem aut distractionem validam. Quanta autem mala convulsionem sequi possint, dictum fuit in commentariis §. 233. Facile autem patet, luxatorum restitutionem tentari non posse, ubi convulsio adest, quia & dolor immaniter augetetur, & valida deberet fieri partium omnium distractio; adeoque convulsioniis causæ auferrentur. Adeo autem metuebant convulsionem Veteres Medici in hoc casu, ut & *Hippocrates* (c), & post illum *Celsus* (d) dixerit: si quoque reposito osse, nervi distendantur, rursus id protinus expellendum est. Videtur & alibi (e) ob hanc causam *Hippocrates* dixisse, quod in tetanis & opisthoronis maxillæ luxatio lethalis sit. Non potest enim hæc luxatio restitui, quia tetanus prohibet; & nisi cito restituatur, mortis periculum adest, uti dictum fuit in Commentariis §. 364.

Si jam præter modo recensita symptomata, valida febris, animi deliquia, singulus &c. adfint, patet facile, tuto non posse tentari luxatorum reductionem; adeoque difficilem Prognosin esse.

PARTIBUS AMBIENTIBUS TENUIORIBUS, CRASSIORIBUS. Dictum fuit ex *Hippocrate* in Commentariis §. 363. carnis articulos minus facile excidere, sed & difficilius reponi, si elapsi fuerint. Hinc periculosa imprimis luxationes majorum articulorum, quos validi muscoli ambiunt, & fortissima ligamenta coercunt. Non enim possunt nisi à validissimis causis tales articuli suis sedibus expelli; unde periculosa sæpe symptomata solent sequi. Ob hanc causam *Celsus* (f), agens de illis luxationibus, quas vulnus comitatur, dicit. *Hic vero & ingens periculum est, & eo gravius, quo majus membrum est, quoque validioribus nervis aut musculis continetur. Ideoque ab humeris, femoribusque, metus mortis est; ac si reposita sunt ossa, spes nulla est; non repositis tamen, nonnullum periculum est.* Et ubi de femoris luxatione agit, dicit: *Magnum autem fe-*

(a) La Mothe Traité complet de Chirurgie
Tom. IV pag. 354.

(b) Centur. 2. Observ. 90. pag. 163.

(c) De Articulis Charter. Tom. XII. pag. 447.

(d) Lib. VIII. cap. 25. pag. 557.

(e) Coac. Prænot. n°. 361. Charter. Tom. VIII. pag. 871.

(f) Lib. VIII. cap. 25. pag. 557.

mori periculum est, ne vel difficulter reponatur, vel repositum a rursus excidat &c. cum ibi valentissimi nervi musculique sint, si suum robur habent, vix admittere ut reponantur; si non habent, repositum non continere (a). Unde patet, etiam ad hæc in Prognosi attendendum esse.

LIGAMENTIS DESTRUCTIS, VEL MODO ELONGATIS. Si per luxationem factam ligamenta, articulum coercerent, sic distracta fuerint, ut patiantur elabi os sua sede, sine ruptura tamen, restituto osse sensim contracta poterunt iterum pristinum robur acquirere. Si vero disrupta fuerint, magnum periculum est, ne cruda hæc labia ipsi ossi vel vicinis partibus accrescant; vel cicatrix sanati vulneris ligamenta minus flexilia faciat: unde postea impediatur articuli facilis mobilitas. Si v. g. vix potest concipi luxatio ossis femoris à vi externa subito facta (sensim enim debilitatis vel elongatis ligamentis, à causis in ipso cavo articuli hærentibus, fieri posse luxationem, certum est) quin simul disruptum fuerit ligamentum illud teres ex cavo coxæ enatum, & femoris ossis capiti insertum. Unde in hoc casu curæ difficultas patet: rarissime enim retracta hæc ligamenti rupti extrema iterum recrescent; unde repositum os postea facilius excidere poterit. Ubi autem luxata ossa, ligamentis penitus destructis, per vulnus integumentorum exeunt, difficillimus calus est. Et quidem eo usque, ut Hippocrates desperaverit de curatione talium luxationum. Dicit enim (b): *Quibus autem cruris ossibus luxatis, & vulnus facientibus, penitus excidunt articuli, qui circa pedem sunt, sive in interiorem, sive in exteriorem partem, tales non sunt reponendi, sed sinendum est, ut ille Medicus, cui hoc placet, reponat. Scire enim licet, quod moriatur, si repositi serventur, & paucarum dierum vita fiet. Pauci enim septimum diem excedunt. Convulsione enim occidit.* Unicam salutis spem superesse monet, si non reponantur articuli sic luxati; nam tunc adhuc servari poterunt: si tamen ut turpis claudicatio tota vita maneat. Idem etiam obtinere periculum monet, si brachii ossa cum vulnere luxentur. Omnium pessimas tales luxationes osse monet, quæ robustioribus ossibus accidunt. Unde, si femoris os circa genu luxatum vulnus faciat, repositum adhuc citius occidet, quam in reliquis calibus; & licet non reponatur, longe tamen majus periculum, quam in cæteris imminet (c). In solis digitis pedum & manuum luxatis, & per vulnus factum eminentibus, curam tentari posse voluit; sed non nisi summa cum cautela. Plerumque enim & hæc ossa reposita postea abscedere monet: unde dicit, nisi metus esset, ne Medicus à vulgo imperitus haberetur, neque etiam in his casibus repositionem tentandam esse. Rarus tamen casus docuit, non semper desperandum esse, saltem si circa inferiores articulos talis luxatio una cum destructione ligamentorum contigerit. Fœmina agilissima ex altissima, quam conscenderat, arbore delapsa directe pedibus suis terræ impegerat: Unde in sinistro crure valida ecchymosis à pedum digitis usque ad femoris mediam altitudinem facta fuit. Sed pes dexter, solo impingens, circa malleolos sic invertebatur, ut tibiæ os, ruptis integumentis, ad trium quatuorve digitorum longitudinem non tantum emergeret, sed terræ infixum hæreret. Simul fibula fracta erat ad binorum circiter digitorum distantiam ab articulatione. In-

(a) Ibid. cap. 20. pag. 554.

(b) De Articulis Chart. Tom. XII. pag. 455.

(c) Ibid. pag. 444. 445. 446.

gens contusio & pessima dilaceratio partium faciebant, ut in consilium vocati Chirurghi expertissimi concluderent, extirpationem partis debere fieri. Cum tamen in flore ætatis esset, robusta & optimæ temperiei fœmina, malumque circa inferiorem partem esset, tentata fuit reductio ossis luxati, & fracturæ: tuto enim expectari poterat, an aliqua spes affulgeret curæ, cum raro tam cito gangræna, quæ metuebatur merito, proleperet, quin extirpatio adhuc cum fructu potuisset postea institui. Præter spem tamen fere omnem, optimis remediis adhibitis, dolores leniti fuerunt, nec ullæ convulsiones sequebantur: & per exfoliationem separatis partibus ossis fibulæ & tibiæ, quæ aëri nudo expositæ corruptæ fuerant, à tam periculoso malo emerit hæc mulier; sic ut incedere potuerit, & solita perficere opera, rigido tamen manente articulo pedis (*). Satis tamen patet, quam difficiles & periculosæ sint luxationes, quæ destructis ligamentis contingunt.

M U S C U L I S A N N E X I S E T S I M I L I B U S. Si enim circa articulum luxatum validi muscoli hæserint, non poterit luxatio fieri, nisi à fortissimis causis, unde sæpe sic distrahi poterunt muscoli, ut postea vel nullo modo, vel saltem non integre, pristinas vires recuperent; ideoque postea in motu partis luxatæ semper defectus supererit. Sic v. g. ex Anatomicis notum est, alterum bicipitis brachii musculi tendinem, ex superiori & exteriori parte sinus scapulæ (in quo caput ossis humeri locatur) ortum, in capsula articulari hære, super caput ipsum ossis humeri procedere ad sinum, ibi loci insculptum; sicque ex articuli cavo emergere, & dein in carneum ventrem intumescere, alterique ejusdem musculi capiti uniri. Si jam humeri ossis caput versus anteriora luxetur, patet facile magnam vim sic inferri posse huic bicipitis tendini; unde postea in motu membri defectus forte supererit.

Sic indicatis præcipuis fontibus, unde Prognosis luxationum deduci posset, sequitur, ut de curatione agatur.

§. 367. **A**D quam requiritur 1. luxatorum redaptatio. 2. repositorum in suo loco ad sanationis finem retentio.

Si omnibus bene ponderatis constitit, nulla adesse talia symptomata, quæ vel inutilem redderent, vel impossibilem, luxationis restitutionem, hæc tentanda est. In præcedentibus monitum fuit, diu factas luxationes restitui non posse, quia plerumque articuli cavum à concretis humoribus, vel luxuriantibus partibus à pressione ossis elapsi jam liberis, repletum esse solet. Pariter monitum fuit, non posse tentari curam, si valida jam adfuerit inflammatio, tumor ingens, vel convulsio; uti etiam, si hæc certo brevi adfutura prævideantur: tunc enim curam differri prudentia jubet. Ad curationem autem requiruntur bina sequentia.

1. Hoc per se patet.

2. Ligamenta, quæ ossa articulata inter se nectunt, præcipuam firmitatem articulis præstant. Sed luxatio non potest contingere, nisi hæc ligamenta vel rupta fuerint, vel sic elongata, ut patiantur articulum sua sede elabi. Dictum autem

(*) De la Moue Traité complet de Chirurgie Tom. IV. pag. 435. &c.

fuit in commentariis §. 363. distractione valida sic posse debilitari partes firmas corporis, ut multum de suo robore amittant. Unde, licet luxatorum restitutio facta fuerit, nondum tamen ligamenta pristinam firmitatem habent, ideoque sæpe facilis foret elapsio articuli, nisi arte caveretur, ne hoc fiat. Quam facile autem iterum luxari possint articuli post reductionem factam, docet casus, quem narrat sæpius laudatus Chirurgus (a). Ingenue enim fatetur, sibi accidisse dum restituisset luxatum humerum, nec caveret, ne æger brachium elevaret, ilico iterum elapsum fuisse articulum; quem tamen tanta cum celeritate reduxit, ut nec æger, nec famuli, qui ipsum adjuvabant, hunc errorem animadverterent. Requiritur ergo ad luxationis curationem, ut ossa reducta in suo situ retineantur, tamdiu, donec debita firmitas redierit ligamenti; sic ut motus, in sanitate exerceri soliti, sine periculo luxationis iterum fieri possint: ille enim finis curationis est. Tempus autem, quod requiritur, ut ligamenta iterum debitam firmitatem recuperent, non adeo exacte limitatum invenitur apud Auctores. Interim certum est, illud varium esse, pro diversa magnitudine luxationis, & articuli, pro varia ægri temperie, & symptomatibus magis minusve urgentibus, quæ luxationem comitantur. Luxationis magnitudo, uti dictum fuit paragrapho præcedenti, mensuratur distantia ossis elapsi à cavo suo, quo naturaliter continetur; & facile patet, eo majorem vim inferri ligamenti & reliquis ambientibus, quo plus à loco suo naturali distet articulus elapsus; adeoque eo longius tempus ad integram curationem requiri. Prout jam majorem minoremve vim sustinere debet articulus in sanitate, eo diutius iterum cura protrahitur: sic femoris, & tali, luxatio diuturnam quietem requirit, monente Celfo (b): Digiti vero articulum decimo quarto die confirmatum esse, dixit Hippocrates (c). Quantam autem hic differentiam faciat diversa temperies, monuit iterum Celsus, dicens: *si corpus tenue, si humidum est, si nervi infirmi, expeditius os reponitur; sed & multo facilius excidit, & minus fideliter continetur. Qua contraria his sunt, melius continent: sed id, quod expulsum est, difficulter admittunt* (d). Similia his & apud Hippocratem habentur (e). Syptomatum autem numerum & vehementiam protrahere sæpe curam, satis patet. Tamen Hippocrates monuit, levem inflammationem post restitutam luxationem potius prodesse, quam nocere; cum & dolor tunc membri usum prohibeat, & tensa per inflammationem ligamenta fortius retineant articulum in suo cavo. Dicit enim (f) in loco citato (quem & alia occasione allegavi §. 224. n°. 3.) *Qui reposito articulo, partibus ambientibus nulla inflammatione affectis, protinus humero uti sine dolore possunt, hi nulla cura sibi opus esse arbitrantur. Sed Medici officium est præagire contra illorum opinionem, si quidem his rursus prolabitur magis, quam quorum nervi inflammatione tentantur. Non nocebit unquam parum diutius cavere, ne validi motus membro, luxationem passo, exercentur; modo caveatur simul, ne nimis diuturna quiete obrigescant articuli.*

(a) De la Motte Traité complet de Chirurgie Tom. IV. pag. 347.

(b) Lib. VIII. cap. 10. & 12. pag. 595.

(c) De Articulis in fine Charter. Tom. XII. pag. 467.

(d) A. Corn. Cels. Medic. Lib. VIII. cap. XI. pag. 544.

(e) De Articulis textu 27. 28. Charter. Tom. XII. pag. 306. 307.

(f) Ibid. textu 29. pag. 308.

Simul in cura attendendum est, ut idoneis remediis & victu debito leniantur illa symptomata, quæ maxime molesta his in casibus esse solent; vel & præcaveantur futura. Præcipua sunt, dolor, & inflammatio, cum omnibus, quæ ex his sequi poterunt, malis. De his jam dictum fuit in præcedentibus partim, & etiam partim in sequentibus dicetur. Facile autem patet, eo plura & graviora symptomata expectanda esse, quo major fuerit articulus luxatus; quia non nisi à fortioribus causis tales articuli suis sedibus expelli possunt, & validam pariter extensionem requirunt, ut reduci possint. Unde *Hippocrates* (a) monuit: In omni articulorum repositione maximam abstinentionem imponendam esse, ubi maximi fuerint articuli, & difficillimi ad reponendum: minimam vero, ubi exiguus est articulus, & facile reconditur.

§. 368. **R**EPOSITIO fit 1. firmando corpus ægri. 2. movendo partem, ut directe respondeat suæ cavitati. 3. introducendo per intorsionem, trusionem, pulsationem.

1. Cum enim extensio major minorve ad luxationem restituendam requiratur, neque illa sine dolore fieri possit, patet facile ob rationes dictas §. 349. n°. 2. requiri, ut sic firmetur æger, ne turbare operantem possit. Præterea hoc requiritur, ne totum corpus sequatur, dum pars affecta trahitur.

2. Prudenter monuit *Galenus* (b), de generali cura omnium luxationum agens, quod necesse sit, ut id, quod in antiquam sedem reversurum est, unde excessit, rursus idem iter faciat. Considerato igitur in singulis luxatis, unde cæperit articulus expelli, qua processerit, & ubi constiterit, oportebit elapsionis finem principium esse revertendi, atque inde rursus ad principium elapsionis procedere: deinde hoc assertum exemplo humeri in priorem partem elapsi illustrat. Quantum vero utilitatem habeat hoc monitum ad felicem luxatorum restitutionem, facile patet. Os enim sua sede elapsum viam sibi fecit vicinas partes removendo; facillime igitur redire poterit per viam jam factam, minime per alienam: imprimis autem si ligamenti ruptis articulus excesserit; nisi enim eidem directe loco iterum occurrat, non poterit in suam sedem redire. Requiritur jam, ut hoc fieri possit, extensio, magis vel minus valida, prout major vel minor fuerit articulus luxatus, simulque ne partes vicinæ forte intercipientur, dum articulus elapsus in suam sedem revertitur. Manubus sufficiens extensio fieri plerumque poterit in minorum articulorum luxatione; vel & in junioribus aut laxæ temperiei hominibus, etiam in majoribus articulis, si vero validior vis requiratur, laqueis & machinis sæpe opus erit. Plurima pulcherrima circa horum usum & fabricam apud *Hippocratem* in libro de *Articulis* habentur, quibus & alia addiderunt recentiores; videantur & illa, quæ de hac extensione dicta sunt in commentariis §. 349.

3. Ubi jam articulus elapsus debita extensione, & justo motu, sic dispositus fuit, ut respondeat suæ cavitati, reliquum satis facile perficitur. Unde de luxatione

(a) Ibid. Charter. Tom XII. pag. 466.

(b) Comment. 1. in Hippocr. de articu-

lis Charter. Tom. XII. pag. 294.

tionem ossis femoris versus internam partem agens Hippocrates (a) dicit : si bene extensum fuerit, femoris caput è regione pristina sua sedis attolletur, cumque sic sublatum fuerit, non facile prohiberi poterit, quominus in suam sedem revertatur; sic ut quævis impulsio & directio sufficiat. Sed deficiunt in extensione, idcirco maiorem molestiam habet repositio. Ligamentorum enim elasticitas, & musculorum robur, sæpe tunc sufficiunt, ut redeat in suum cavum elapsus articulus. Cognita autem articulationis luxatæ fabrica facile docet peritum Chirurgum, quid ulterius faciendum sit, si, post extensionem debitam, è regione sui cavi locatus articulus non revertatur in suam sedem : Tunc enim levi intorsione, trusione, pulsatione &c. reliquum perficietur. Imo in multis luxationibus restituendis extensio & reductio fere eodem tempore fiunt ab exercitatis Chirurgis. Sic de maxillæ luxatæ restitutione agens Celsus (b), postquam monuerat, quomodo æger disponi & firmari deberet, dicit : Ubi vehementer maxilla apprehensa est, si una parte procidit, concutiendum mentum, & ad guttur adducendum est : tunc simul & caput adprehendendum, & excitato mento, maxilla in suam sedem compellenda, & os ejus comprimendum est, sic ut omnia pene uno momento fiant. Dum suspensio sub axilla homine, (supra portam scalam, &c.) luxatum humerum reducere tentant Chirurghi, valida tractione penduli brachii deorsum facta, sæpissime ilico in locum suum reddit articulus elapsus. Quantum autem intersit Chirurgo ad curæ felicitatem in difficilioribus casibus peritos habere adjuutores, facile patet.

Rediisse autem in antiquam sedem luxatum os, cognoscitur plerumque ex sono quodam, qui auditur illo momento, quo reductio fit. Monuit autem Celsus (c) quod caput humeri impulsus in suam sedem, modo cum sono, modo sine hoc, compellatur. Fere semper tamen talem, obscurum saltem, sonum audiri, omnes fere Chirurghi observant. Multum mali ab hoc sono videtur timuisse Hieronymus Fabricius ab Aquapendente (d) : credebat enim fieri, dum caput ossis allideretur sinus superciliis; unde hæc rumpi possent, & cavitatem subire, antequam caput ossis ingrederetur; adeoque integra reductio fieri non posset : aut putabat strepitum illum nasci, quia caput ossis sinum contundit; unde postea pessima quæque timebat mala. Sed fidelissima optimorum Chirurgorum & quotidiana observata docuerunt, satis inanem hunc metum esse, cum plerumque talis strepitus percipitur, & raro tamen talia mala sequantur, quæ his causis adscribi merito possent. In Commentariis §. 365. dictum fuit, inter signa Diagnostica luxationis præcipue numerari partis viciatam figuram, & cavitatem circa sedem articuli tumorem autem in loco alieno : bene repositis ossibus luxatis, apparet, hæc omnia iterum abesse debere. Simul dolor recens factam luxationem semper comitatur, ob validam distractionem ligamentorum & aliarum partium ambientium; reposito autem articulo, statim ille dolor vel omnino cessat, vel insigniter saltem minuitur : solet enim aliquando superesse aliquis dolor, optime etiam facta reductione, ob vim, quam passæ fuerunt partes ambientes & à luxato ossi, & ab extensione; quæ sæpe satis valida requiritur, antequam reductio fieri possit.

(a) De Articulis Charter. Tom. XII. pag. 456.

(b) Lib. VIII. cap. 12. pag. 546.

(c) Ibid. cap. 15. pag. 549.

(d) Chirurg. Univerf. Lib. V. cap. 1. pag. 350.

§. 369. **R**EPOSITA in loco retinentur quiete, fasciis, situ partis naturali.

Postquam reposita fuerunt ossa, quæ suis sedibus exiverant, altera pars curationis (§. 367. 2.) superest, ut nempe in naturali situ retineantur. Hoc autem fit

QUIETE. In omni luxatione ligamenta articulos coërcencia vel rupta fuerunt, vel admodum saltem elongata: Nisi ergo quies imperetur, facile iterum elabatur repositus articulus. Præterea demonstratum fuit §. 25. n°. 3. solidas partes corporis debilitari nimia distractione; & in §. 28. n°. 5. dictum fuit, augeri vim cohæisionis in solidis, si diu omnes partes in eodem contactu maneant; & quidem sæpe eo usque, ut tandem nimium robur acquirant. Quies ergo semper necessaria erit, ut firmitas redeat ligamenti nimis distractis, vel ut fiat unio eorundem, si rupta fuerint. Cavendum tamen, ne à nimis diuturna quiete rigeant ligamenta, vel ab accumulato linimento articularum, & inspissato ob motus defectum, nascatur ancylosis. Unde post aliquot dies elapsos, dum metus inflammationis abest, & omnis dolor sedatus, præstat leviter dimovere articulum & molliter perfricare; uti sollicitè monuit *Hippocrates* de curatione humeri luxati agens (a). Omnium maxime in cubiti luxationibus hanc cautelam observandam monuit *Celsus* (b) dicens: *Celerius tantum sepiusque id resolvendum est, multoque magis aqua calida fovendum, & diutius ex oleo & nitro ac sale perfricandum. In cubito enim celerius, quam in ullo alio articulo, si extra remansit, si intus revertit, callus circumdatur; isque, si per quietem increvit, flexus illius postea prohibet.*

Præterea dolor aut inflammatio, quæ sæpe, ob validam vim ambientibus partibus illatam, etiam post reductionem, luxationis supersunt, quietem postulant.

FASCIIS. Nisi omnino rupta, vel validissime distracta fuerint ligamenta, repositum os facile continetur, modo quiescat pars. Unde non semper fasciæ requiruntur. Sic enim maxillam luxatam dum reposuit peritissimus Chirurgus (c), nullas se applicuisse fascias testatur; & tamen optime cura successit. Si vero aliquis metus sit, ne reductum os iterum elabatur, præstat fasciis firmare partem; imprimis si spleniis, vel aliis similibus applicatis, fasciarum pressio maxime determinetur ad illum locum, versus quem articulus excessit. Pulcherrime hoc notavit *Hippocrates* de cura luxationis humeri ossis agens (d), dicit enim: *Hic ergo mederi oportet cerato & spleniis, & multas fascias circumdare: supponere autem axillæ lanam mollem puram convolutam, qua cavum (axilla) repleat, ut vinculum fulciat, & articulum sustineat.* Sic enim cavebitur, ne iterum caput ossis humeri ex sua sede in axillæ cavum delabi possit. Illam enim solam luxationem ossis humeri se novisse dicit *Hippocrates* (e); unde de aliis luxationis modis non egit.

(a) De Articulis textu 30. 31. Charter. Tom. XII. pag. 308.

(b) Lib. VIII. cap. 16. pag. 151.

(c) De la Motte, Traité complet de Chi-

urgie Tom. IV. pag. 331.

(d) De Articulis textu 29. Charter. Tom. XII. pag. 308.

(e) Ibid. textu 3. pag. 290.

Facile autem patet, si cognoscatur via, qua os suo cavo elapsum est, in omni luxatione per idoneam ligaturam sic posse præcaveri, ne rursus exeat. Ubi autem sic firmata pars fuit, rarius solvi debet; nisi inflammatio accesserit: tunc enim frequentius in omnibus luxationibus apparatus debere solvi iussit *Hippocrates* (a).

SITU PARTIS NATURALI. Debebit pars affecta diu quiescere: ut autem possit sine molestia sic retineri, requiritur talis situs, quem in homine dormiente observamus, dum nulli muscoli agunt voluntatis imperio: sed flexores artuum propria contractilitate tunc prævalent extensoribus musculis; unde omnes fere articuli leviter inflexi apparent. Videantur, quæ de naturali partium situ dicta fuerunt in Commentariis §. 349. n°. 3. Generalem ideo hanc regulam in omni luxatione posuit *Hippocrates* (b): *Semper quiescere lasum articulum convenit, & quam optime figurari.* Et hinc inde in singularibus luxationibus commodissimum situm describit. Sic v. g. de cubiti luxatione agens (c) dicit: in curatione sic disponi partem debere, ut summa manus parum sublimior cubito ponatur; brachium vero secundum latus; sic enim suspensum & locatum sine molestia ferri poterit (*ἰσοπέδιον*), & naturæ & usui commodum erit.

His observatis omnibus, felix satis expectari poterit curæ successus, quando à vi externa sua sede expulsi fuerunt articuli: Ubi vero ligamentorum nimia laxitate elabuntur articuli, longe difficilior cura est. Dixerat *Celsus* (d): *Qui nervorum vitio prolapsi sunt, compulsi quoque in suas sedes iterum excidunt.* Repositio talium luxationum facillima quidem est, sed retentio in situ difficillima; imo aliquando penitus impossibilis. Sola fere spes est, ut diuturna quiete partis, & roborantibus fomentis applicatis, redeat laxatis ligamenti debita firmitas. In similibus casibus pulchrum effectum vidit *Petitus* (e), dum splenia crassa, spiritu vini aromatico cum aluminis pulvere & ovi albumine mistis madida, articulo femoris undique applicaret; idonea ligatura circumposita, ut hæc applicata manerent; sæpiusque de die, non remoto apparatu, & splenia & fascias eodem remedio humectabat. *Galenus* (f) se bis curasse femoris luxationem, ab hac causa factam, affirmat; sed dicit, diu debere articulationem tegi siccantibus medicamentis, ut nimia ligamentorum humiditas tollatur. Tantam difficultatem in curatione talium luxationum agnovit *Hippocrates*, ut ad ultimum artis præsidium, ignem nempe, in talibus casibus, confugerit. Cum enim multos videret ob hanc calamitatem bellicis certaminibus inutiles redditos, neque ullum illos recte curantem novisset, fuso satis sermone hanc curandi methodum descripsit. Agit autem de illa luxatione ossis humeri, qua illud in alæ cavum prolabitur: facile patebit tamen & in reliquis ejusdem articuli, vel & aliorum luxationibus, illud tentari posse.

Tota autem curationis ratio in eo videtur consistere, ut ferro candenti adusta cute, & panniculo adiposo in illo loco, versus quem articulus prolabi solet, per cicatrices sanatorum ulcerum sic corrugentur & indurentur integumenta, ut non patiantur se facile extendi postea; unde cavebitur, ne hac via elabi articulus pos-

(a) Ibid. pag. 466 467. in fine libri.

(b) Ibidem pag. 467.

(c) Ibidem pag. 331.

(d) Lib. VIII. cap. 11. pag. 544.


(e) Acad. des Sciences l'an 1721. Mem. pag. 163.

(f) Comment. IV. in Hippocrat. de artic. Charter. Tom. XII. pag. 443.

sit. Brachio parum elevato (nisi enim attollatur , non datur facilis accessus ad alam ; si elevetur multum , tensa nimis cutis prehendi non poterit) laxam cutinē una cum panniculo adiposo digitis prehensam attolli jubet , ut sic integumenta quam maxime recedant à glandulis , nervis inuicibus , & magnis vasis sanguineis hic locatis.

Deinde jubet , ut elevata sic cutis ferro non nimis crasso vel rotundo , sed oblongo potius , quam celerrime trajiciatur ; ideoque ferrum eo usque ignitum voluit , ut pelluceat (χρὴ δὲ διαφανὲς εἶναι) : deinde cure adhuc elevata , per bina hæc foramina , ustione facta , jubet transmitti debere tenuem spatulam (ἰσχυρὴ) ; quo facto remittenda cutis est , & medio inter bina foramina loco alia ustio facienda est tenui ferro candenti per integumenta adactō , donec subiectæ spatulæ occurrat. Sic tribus in locis distinctis sine periculo læsionis suppositarum partium ustio fiet. In curatione autem escharæ separabuntur , & deinde integumenta accrescent iterum sibi invicem ; sed , ut facile patet , ob jacturam substantiæ igne omnia destruyente factam , corrugatæ fient cicatrices , & duræ : ideoque monuit , ne toto curæ tempore multum attollatur humerus , sed modice tantum , quatenus curatio ulcerum postulat : sic enim , non distentis integumentis , firmitus & arctius accrescent sibi mutuo margines ulcerum. Imo , ulceribus jam curatis , voluit *Hippocrates* , brachium adhuc longo tempore debere lateri alligari , ut firmissimæ reddantur cicatrices , & illud spatium , in quod maxime humerus procidere solebat , contrahatur. Bina præterea adhuc alia loca indicavit , quorum ustio prodesse posset in hoc casu ; nempe ab utroque latere capitis ossis humeri , inter hoc & magnas chordas , quæ utrimque cavum axillæ faciunt ; tendines nempe pectoralis musculi & latissimi dorsi (4).

Simili modo herniarum curam aliquando tentatam fuisse ab Empyrico novi dum herniæ locus , reductis prius elapsis visceribus , caustico vel ferro candenti profunde satis exureretur ; hac spe , ut contracta per cicatricem satis profundam integumenta non paterentur facile postea extensionem.



I N F L A M M A T I O.

§. 370. **I**NFLAMMATIO, Ignis, Phlegmone, ob causæ ; & effectuum similitudinem , ab igne nomen habet.

Antequam de morbis acutis dicendum erat , optime historia inflammationis & omnium ejus effectuum præmittitur , quia & magnum lumen his morbis inde affunditur , & inflammationis , partes externas corporis occupantis , successivæ mutationes in sanationem , vel alios morbos , distinctius cognosci poterunt ; & ex illis prævideri , quid futurum sit , si simile malum internas corporis partes obsideat ,

(4) Hippocrates de Articulis textu 41. &c. Charter. Tom. XII. pag. 312.—316;

Obtinuit jam communi usu, & quidem in omnibus linguis (quantum novi), ut huic malo ab igne nomen imposuerint. Inflammatio sic Latinis dicitur, *φλεγμονή*, Græcis &c. Nec mirum, cum omnes majorem calorem, quem ab ignis majori copia in loco nasci in Physicis probatur, inflammationi semper adtribuerint. Galenus (a) sic dicit: *Hic vero tumor, assumens pulsum & igneum ardorem, antea proprie vocatam phlegmonem perficit. Non autem sic veteres; sed quemcumque ardorem vocabant phlegmonem, uti sapius vobis demonstratum fuit. Verum ab Erasistrati temporibus solitum fuit, phlegmones nomen dici de illis tumoribus, in quibus non tantum est calor inflammans, sed & renixus & pulsus, ex necessitate vero habent, & sic vocatum ruborem &c.* Similiter & alibi (b) recensens illa signa, quibus phlegmonem adesse cognoscitur, caloris mentionem fecit. Sic etiam Ægineta (c) dicit: *Communiter quidem calidos omnes & dolentes cum ardore tumores phlegmonas. vocare consueverunt. Pro diversitate vero materia, efficientis ipsos, horum quoque differentiam variare dicunt. Sanguine namque bono & moderata crassitie in partem aliquam confertim irruente, & ob copiam impacto, proprie dictam phlegmonem fieri, bile flava autem in quadam parte hærente, herpes; sanguine vero cum bile flava irruente Erysipelas. Quando vero sanguis influens calidus admodum fuerit & crassus, carbones parere solet.*

Commune ergo omnis inflammationis attributum calor erat, & nomen omnibus inflammationum speciebus commune *εἰσμοῖ*, quod postea tamen illi inflammationis speciei tantum datum fuit, in qua una cum calore renitens tumor & rubor aderat; reliquas autem inflammationum diversitates variis nominibus appellaverunt. Ita & apud Celsum legimus: *Nota inflammationis sunt quatuor, rubor, & tumor, cum calore & dolore* (d). Unde constat, & apud Latinos generale inflammationis nomen certæ tantum speciei datum fuisse.

In loco autem inflammato majorem ignis copiam adesse, docent thermometra, & effectus omnino similes, ac fierent ab igne elementari corpori applicato. Dum enim homo sanus dorsum manus v. g. igni admoveat, incipiet sentire majorem calorem; deinde pars incipiet rubere: si propius adhuc admoveat, tumor fiet, & dolor; si pergat igni admoveat manum, dolor immaniter augebitur, Epidermis in bullas elevata secedet, & tandem aucta ignis actione in escharam comburetur cutis; quæ tunc omnino mortua per suppurationem factam à vivis partibus separari debet: sed eadem omnino, & quidem eodem ordine, mala inflammationem sequuntur. Levis enim calor, rubor, & tumor inflammationem natam in manus dorso comitantur cum dolore; quæ omnia augentur, prout incrementum malum. A valida inflammatione, in gangrænam jam tendente, pariter epidermis in bullas elevatur, crustæ gangrænosæ oriuntur, similiter per suppurationem tantum separandæ à vivis; & si pergat augeri inflammationis vehementia, omnia ad ossa usque nigrescunt, ac si vivo igne in carbonem usta fuissent; tuncque sphacelus adesse dicitur. Hinc ardentem febrim ignem (*τὸ πῦρ*) vocavit Hippocrates, quia sæpe tantus inde fit calor circa vitalia, ac si verus ignis ibi hæreret; unde etiam tam subita sæpe mors. Et in ardentissima febre, peste nempe, dum morbi malignitas per metastasin ad certa loca corporis ruit, observatur illa,

(a) Commentar. 3. in Lib. Hippocrat. de Fracturis. Charter. Tom. XII. pag. 236.

Charter. Tom. VII. pag. 113.

(c) Lib. IV. cap. 17. pag. 63. versa.

(b) De Tumoribus præter Naturam cap. 2.

(d) Lib. III. cap. 10. pag. 137.

sic comburi, ac si igne actuali hoc factum fuisset, uti in carbonibus pestilentialibus patet: qui suppuratione in omni ambitu facta postea excidunt: perfecte eodem modo, ac solet fieri, dum ferro candenti pars corporis exusta fuerit. Sic sapiens antiquitas sola observatione effectuum merito ab igne nomen inflammationi dedit, cum & causæ & effectus omnino respondeant: & hodiernis observatis circa ignis naturam hæc omnia pulchre confirmantur.

§. 371. **E**ST QUE sanguinis rubri arteriosi in minimis canalibus stagnantis pressio & attritus à motu reliqui sanguinis moti, & per febrim fortius acti.

Datur in hac paragrapho definitio inflammationis, sive Phlegmones, proprie dictæ ex suis causis, quam Veteres dederunt ex phænomenis. Definiverunt enim phlegmonem, (uti patet ex illis, quæ ex *Galeno* præcedenti paragrapho fuerunt allegata) quod sit tumor præternaturalis, renitens, durus, ruber, calens, cum dolore punctorio, & febre plerumque comite. Notandum autem est, definitionem hic datam tantum respicere inflammationem, quatenus hæret in illis vasis, quæ naturaliter sanguinem rubrum continent, vel quæ saltem dilatata illum admittere possunt. Quid autem fiat, ubi simile malum in tenuioribus vasis hæret, dicetur postea §. 379. 380. His positis datæ definitionis explicatio dari poterit.

Bina hic occurrunt, quæ simul unita inflammationis naturam constituunt: obstructio nempe, & sanguinis in locum obstructum irruentis aucta celeritas. Stagnat enim sanguis in inflammatione, & transire nequit per vasorum angustias, licet à tergo impulsus liquor urgeat: adest ergo obturatio canalis transitum tollens liquido per illum tranjiciundo. Sed ex illis, quæ dicta sunt §. 107. patet, obstructionem adesse, his positis. Materia obstruens est sanguis ruber sed arteriosus; quia, in solis arteriis obstructionem proprie dicta locum habere posse, demonstratum fuit in Commentariis §. 119. Loca obstructa sunt minimorum canalium angustia; quia, ut facile patet, immeabiles moleculæ per latiore vasorum amplitudinem transire adhuc poterunt, circa fines vero convergentium vasorum hærebunt. Non autem hic intelliguntur minimi totius corporis canales, sed tantum angustissimi rami maximorum vasorum, quæ nempe crassissimam partem humanorum liquidorum, sanguinem rubrum continent. Unde canales illi minimi quidem dicendi sunt ratione maximorum vasorum, sed maximi sunt inter minimos. Ultimus enim finis arteriæ rubræ major semper erit arteria serosa inde orta, quæ omne rubrum suæ diametri parvitate naturaliter excludit. Sic & pariter ultimus finis arteriæ serosæ ob eandem causam semper major erit arteria lymphatica inde orta &c. Unde patet, veram phlegmonem fere tantum in arteriis rubris minimis, vel in serosis dilatatis hære; ideoque esse illam, quæ §. 122. dicebatur inflammatio primi generis. Ubi autem in angustis convergentium vasorum immeabiles moleculæ hærent, liquidum vitali motu à tergo urgens necessario comprimet easdem; & quidem satis magna vi, cum cordis & arteriarum actione sanguis ruat in loca hæc obstructa, tali quantitate motus, qua potuisset ad extrema corporis usque satis magna adhuc cum celeritate pervenire; unde magna pressio erit, & renovata singulis cordis & arteriarum contractionibus (vide commentaria §. 120.). Cum au-

tem immobiles hærere videantur moleculae obstruentes, minimorum canalium angustis impactæ, non ita apparet prima fronte, quare attritus fieret, qui itum quemdam & reditum harum molecularum supponere videtur. Sed si considerentur illa, quæ dicta sunt in commentariis §. 132. n°. 1. patebit, obstruentes moleculas non semper immobiles hærere, sed nunc arteriarum contractione retropelli versus latiore locum, nunc iterum cordis, arterias implentis, actione protrudi in easdem angustias; unde verus attritus hic locum habet.

Hactenus autem dicta omnia conveniunt æque obstructioni, in minimis canalibus à sanguine rubro arterioso stagnante factæ, quam inflammationi: Unde in definitione inflammationis additur, PER FEBRIM FORTIUS ACTI. Ubi valida inflammatio notabilem corporis partem, vel viscera quædam occupavit, febris tunc semper adesse deprehenditur: sed si in minima corporis, imprimis externi, parte inflammatio hæreat, an tunc dici potest; semper adesse febrim? Ophthalmiæ, anginae quædam inflammatoriæ &c. toties observantur, licet nulla in pulsu mutatio appareat. Pulchre hoc explicuit *Galenus* (a), dum pulsum naturam describit, qui inflammationem comitantur: *Incipiente enim inflammatione pulsus major est, quam secundum naturam, & vehementior, & celerior & crebrior. Aucta inflammatione omnia hæc crescunt, & manifeste durior fit &c.* Paulo potest autem subjungit: *Hæc inflammatio habet, quæ pulsum per totum corpus immutat, sive ob magnitudinem, sive ob principem partem, in qua consistit. Si vero universum corpus non afficiat, pulsus in parte inflammata talis erit, qualem diximus.* Sub hac ergo limitatione accipiendum est, quod febris sit omnis inflammationis comes; nempe, si non in toto, saltem in parte inflammata, pulsus robur & celeritas augebuntur, tuncque febris quasi partis ipsius est, uti iterum alio in loco pulcherrime monet *Galenus* (b). Postquam enim dixerat, plurimas esse inflammationis differentias, illis tamen omnibus febres solere accedere notat. Deinde primam inflammationis differentiam ponit, quod humida vel sicca sit. *Humida quidem, quæ ex calida fluxione partem obsidente fit: sicca autem, quando sine ulla fluxione conatum calorem accendi contingit. Hoc autem quodammodo velut febris partis ipsius est.* Antiquissimorum etiam Medicorum opinione confirmatur, quod auctus motus inflammationem semper comitetur, *Celsus* enim in Præfatione (c), ubi varias Medicorum sectas & dogmata recenset, sequentia habet. *Si sanguis in eas venas, quæ spiritui accommodata sunt, transfunditur, & inflammationem, quam Greci ελεμωσι nominant, excitat, eaque inflammatio talem motum efficit, qualis in febre est, ut Erasistrato placuit.* Ubi notandum, non dici simpliciter, quod febris fiat, dum inflammatio adest, sed tantum, talem motum fieri, qualis in febre est.

Inde saluberrimum in Praxi Medica monitum posuit *Simson* (d), ne decipiantur Medici, credentes nullam inflammationem adesse, si febris adsit. Cum sæpe fixos dolores intestinorum & ventriculi inflammatio producat, licet nulla febris observetur, pulsu explorato: imo pleuritides spurias Epidemicas se vidisse asserit, quæ sine ulla febre pluribus mensibus affligebant ægros, nisi statim Venæ sectione, & aliis inflammationi debellandæ aptis remediis, curarentur.

(a) De Pulsibus ad Tyrones cap. XII. Character. Tom. VIII. pag. 8. 9.

(b) De Methodo Medendi ad Glaucon. Lib. II. cap. 1. Character. Tom. X. pag. 367.

(c) Pag. 5.

(d) The System of the Womb &c. by Thomas Simson pag. 106. 107.

Ex modo dictis simul apparet, obstructionem plurima habere communia cum inflammatione; nulla enim inflammatio concipi potest, quā simul adsit obstructio: Præterea in Commentariis §. 120. demonstratum fuit, validam obstructionem augere velocitatem liquidi transmittendi per vasa libera; id est, febrem facere. Sed simulac febris obstructionem factam comitatur, adest inflammatio: quæ ergo posset vocari obstructio cum febre vel in toto, vel saltem in parte.

§. 372. **Q**UOD ergo fieri potest vel in finibus arteriosis, vel in vasis serosis lymphaticis aliisque minoribus, arteriosis, dilatatis oculis admissos globos rubros, aut alia fluidi elementa crassa, per fines transmittere non potentibus. Si sanguis transfunditur in eas venas, quæ spiritibus accommodatæ, inflammationem excitat. *Cels.* 5.

Inflammatio ergo proprie dicta sive Phlegmone, uti patet ex definitione data paragrapho præcedenti, tantum locum habere potest in vasis, quæ naturaliter sanguinem rubrum habent; vel & in illis, quorum initia per morbos sic dilatari observantur, ut partem rubram sanguinis possint admittere. In reliquis minoribus vasis fluidi tenuioris elementa concreta quacumque de causa possunt pariter hæreere immeabilla, potestque fluidum à tergo pariter urgere loca hæc obstructa majori velocitate: cum tamen nullus rubor tunc appareat in parte sic affecta, non vocatur Phlegmone, sed Erysipelas, œdema calidum &c. uti dicitur §. 379. 380. Quo usque autem rubra pars sanguinis penetrare possit, & quot decrescentes vasorum series ingredi, si illorum initia præternaturaliter dilatentur, nondum per experimenta adeo limitari potest. Interim hoc constat, sanguinem rubrum in morbis non solum ingredi posse vasa serosa, quæ sanguineis magnitudine proxima coloratum fluidum, serum flavum nempe, continent: sed etiam longe minora adhuc, quæ pellucida fluida naturaliter tantum habent. Album oculi, in omnibus sanis margaritarum splendorem fere æmulans, nata inflammatione sæpe totum rubet, & innumeras vasculorum ramificationes exhibet, quæ sanguine rubro distentæ nudo oculo distinctissime conspici possunt, cum in statu naturali nihil colorati liquidi habeant. Imo vidi aliquoties in pessimis ophthalmiis, per ipsam corneæ tunicæ adeo pellucidam substantiam transire vas sanguine rubro plenum, nudo etiam oculo conspicuum, Sed tenuiora adhuc vasa esse corneæ, quam adnatæ, nullus dubitat, cum una cum contentis fluidis in sanitate pelluceant omnino, & inflammatione valida hic nata, diu circa limbum corneæ undique appareant rubro sanguine distenta vascula, nullo adhuc vitio in ipsa cornea apparente; donec tandem vi & duratione morbi sensim dilatata corneæ vascula sanguinem rubrum etiam admittere possint. Ex quibus patet, veram phlegmonem sive inflammationem sanguineam aliquando etiam in minutis admodum vasculis obtinere posse.

Quod ad locum attinet ex *Celso* in hac paragrapho allegatum, cujus jam ob aliam causam in præcedenti paragrapho meminimus; constat, antiquissimos Medicos venarum nomine comprehendisse æque illa vasa, quæ hodie arterias vocamus, quam venas proprie dictas. Erasistrati, & plurimorum postea ejus sectæ addictorum,

addictorum, opinio fuit, non contineri venis pulsantibus, arteriis hodie vocatis, sanguinem, sed spiritum, qui pulsum faceret in his valis. Galeni tempore adhuc plurimi, huic sectæ addicti, audacter idem dixerunt; imo quidam promitterunt, se demonstraturos, ipsam aortam sanguine vacuum esse; quos Galenus false deridet, & pulcherrimis experimentis falsa dixisse evicit (a).

Unde ex Erasistrati opinione secundum *Celsum* saltem hoc patet, quod crediderit, tunc inflammationem adesse, quum sanguis ex venis in arterias, naturaliter sanguine vacuas, iret; id est, in locis alienis hæreret. Hodie, cognita sanguinis circulatione, his meliora novimus; tamen quodam sensu tolerari posset hoc effatum, cum & inflammatio fiat, si sanguis talia vasa ingrediatur, quæ naturaliter tantum tenuiores humores capiunt.

Videantur etiam illa, quæ in commentariis §. 122. dicta sunt de inflammationum variis speciebus, quatenus in diversis decrefcentium diametrorum seriebus vasorum hærent.

§. 373. **E**RGO ejus sedes omnis pars corporis, in qua reticulares arteriarum distributiones, vel Lymphaticorum arteriosorum ortus,

Postquam *Ruyfchius* pulcherrima sua arte detexerat, ubique fere in corpore arterias in minutissimos ramos divisas distribui, & in omni fere puncto ramulos ex majoribus truncis emissos communicare cum vicinis; obtinuit usu apud Medicos, has arteriarum distributiones reticula vel plexus reticulares appellare, quia relicta inter concurrentes & sibi mutuo implexos ramulos interstitia reticuli nallas satis apte referunt. Dumque tot annorum spatio sedulam operam huic arti navavit magnus ille vir, invenit sæpe (uri passim in ejus operibus occurrit) relicta spatiola inter reticulares plexus, quæ vasis carere videbantur, postea feliciori successu repleta innumera iterum vascula exhibuisse, simili fere ordine distributa, ac in majoribus ramulis observatum fuerat antea. Sed ubicumque arteriæ in minimos ramulos divisæ observantur, poterunt hære fluidi moleculæ, concretione, vel mutatione figuræ, factæ immeabiles: vel & angustatione horum vasculorum, minuta capacitate, impediri poterit liber transitus liquidi naturaliter per illa fluentis; unde obstructio, & aucto motu liquidi à tergo impulsus inflammatio, nasci poterit. Cum etiam in omni fere corporis loco ex arteriis sanguineis deriventur ramuli, qui sua parvitate partem rubram sanguinis excludunt; poterit, horum vasculorum initiis dilatatis, per errorem loci rubra sanguinis pars minora vascula ingredi, & in illorum angustis hære immeabilis: unde iterum fient omnia similia mala.

§. 374. **H**INC arteriæ ipsæ, venæ, nervi, membranæ, musculi, glandulæ, ossa, cartilagines, tendines, viscera

(a) De Anatom. Administrat. Lib. VII. cap. 16. Charter. Tom. IV. pag. 164. &c.

omnia, adeoque totum fere corpus, sed nusquam frequentius & tenacius, quam in adipe.

Cum ergo ex hodierna Anatome constet, omnes fere corporis partes vasa habere, quæ demonstrari ad oculum possunt; patet, inflammationem in toto fere corpore, obtinere posse, omnibusque ejus partibus, quæ hac paragrapho enumerantur.

ARTERIÆ, VENÆ. Tunicæ horum vasorum componuntur ex aliis minoribus vasis, uti in majoribus horum truncis ad oculum demonstrari potest per injectiones Anatomicas. Et in animalibus, post diuturnum & velocissimum cursum mactatis, sæpe tota aortæ externa superficies fere nigra apparuit, ob distenta nimio sanguine vascula, quæ mirabili textura per membranas magni hujus vasis distribuuntur. De hac re dictum fuit in Commentariis §. 113. n°. 2. ubi tumor vasculorum minorum, majorum vasorum membranas constituentium, referebatur inter illas causas, à quibus majorum canalium capacitas minui poterat.

NERV I. Duplici modo possunt considerari nervi, vel quatenus cerebri, cerebelli & medullæ spinalis propagines tenerrimas continent, vel quatenus vaginis tenacibus, omni vasorum genere donatis (vide commentaria §. 181.) constant; quibus vaginis tuto mollissima & pulposa encephali & medullæ spinalis substantia ad quasvis corporis partes defertur. An tenerrima illa & omnem sensum fugientia vascula, quæ proprie dictam nervi substantiam constituunt, inflammantur aliquando, non adeo patet. Tamen cum & per hæc fluat tenuissimum fluidum à cerebro, cerebello, & medulla spinali (uti dictum fuit in ejusdem §. 181. commentariis) non videtur adeo absolum & in his vasculis tale quid obtinere posse. In majoribus autem, & per injectiones Anatomicas tam evidenter demonstratis, vasculis, quæ sua textura vaginas & tunicas nervorum constituunt, inflammationem veram obtinere posse, facile patet.

MEMBRANÆ. Nam per injectiones Anatomicas hodie novimus, solidissimas etiam, & exsanguines omnino habitas veteribus, membranas nil aliud esse, nisi meram vasorum texturam.

MUSCULI. TENDINES. Innumeras arterias muscularem carnem undique perreptare, hodie constat; imo & solidissimos apparentes & penitus albicantes tendines artificiosa injectione penitus rubescere novimus; non tantum ob vasa illa repleta, quæ vaginas tendines investientes constituunt, sed etiam plurima similia inter ipsas sibi mutuo accumbentes tendinum fibrillas decurrere certum est. Unde & hic inflammatio locum habere potest; & in pessimo Rheumatismo musculis inflammatis sæpe tam enormes dolores fiunt, dum vel levissimus nixus ad motum tentatur.

GLANDULÆ. Sive hæ sint meri vasorum convolutorum glomeres; sive cavi folliculi, per emissaria collectum cavis suis humorem eructantes, qui à vasculis innumeris membranam folliculorum talium perreptantibus secretus in cava eorum infunditur, res omnino eadem erit. Nam in utroque casu innumera vascula arteriosa fabricam glandulæ constituere asseritur; unde & in his inflammatio nasci poterit: uti quotidiana observatio testantur in parotidibus, glandulis submaxillaribus, axillaribus, inguinalibus &c.

OSSA. In vulnere capitis historia in commentariis §. 249. 252. 253. satis evidenter, ut puto, probatum fuit, vasa ex periosteo ad os delata, inter ejus lamellas decurrere; alia etiam per singularia foramina ad diploën cranii, in aliis vero ossibus ad medullam, pertingere: unde & separatio corrupti, & restitutio perditæ, vasorum per ipsam ossis substantiam disperforum efficaciam adscribebatur. Ergo & hic inflammatio potest nasci, vel in vasis arteriosis decurrentibus inter medias lamellas osseas, vel in ipsis medullæ vasculis; unde dolores profundissimi & pertinacissimi simul, spina ventosa &c. uti postea in Capitulo de morbis ossium dicitur. Ossibus autem inflammationem etiam aliquando accidere posse jam *Galenus* (a) notaverat. Postquam enim dixit, ipsas etiam vasorum tunicas inflammari posse, uti & membranas, nervos & tendines, addit: *Quamobrem ossa quoque nonnunquam inflammatio attingit, uti & ex ipsis primo affectis aliquando prorumpit* (ἐκπύεται). Ex illis autem, quæ præcedunt locum allegatum, facile patet, quod voluerit *Galenus*, partibus incumbentibus inflammatis malum ad ossa pertingere posse non tantum, sed etiam inflammationem in ipsis ossibus primo natam ad reliquas partes pergere aliquando.

CARTILAGINES. Ossibus certe proximæ sunt cartilagines, & plurimæ tandem in ossa mutantur; uti ex Osteogenia apparet. Cum autem in ossibus, quæ quondam cartilagines fuerunt, vascularis structura deprehendatur, uti modo dictum fuit, admodum probabile videtur, similem fabricam præexistisse in cartilaginibus: sed etiam subtilissimorum Anatomicorum industria vasa in cartilaginibus detecta fuerunt. Sic in cartilagine Thyroidea se centenos poros vidisse affirmat *Clopton Havers* (b) quorum quidam vasa ex perichondrio ad cartilaginis substantiam pergentia admittebant, alii ab eadem redeuntia trans mittebant. In juniorum cadaveribus felici injectione vidit *Ruyschius* (c), vasa sanguinea penetrare per patellæ corpus, atque immenso numero in ima ejus se abdere medullæ. Et alibi (d) hanc rem confirmat, dicens, se oculis demonstrare posse, vascula sanguifera vera dari in ipsis cartilaginibus; seque hæc detexisse in cartilaginea superficie capitis ossis femoris, & etiam ad margines cartilaginum mobilium, quæ inter ossium articulatim commissuræ extrema ponuntur. Cum autem hæc vasa ex osse contiguo in cartilaginem tendant, mirabatur, quod ad duarum tantum linearum altitudinem procederent, nunquam autem emergerent in supremam cartilaginis superficiem. Ex his ergo patet, in cartilaginibus, æque ac in ossibus, inflammationem fieri posse.

VISCERA OMNIA, ADEOQUE TOTUM FERE CORPUS. Mirabili vasorum textura, & in singulis fere diversa, constare viscera, hodie certo novimus. Et acuti morbi viscerum postea pertractandi docebunt evidentissime, inflammationem & omnes ejus sequelas, suppurationem, gangrænam, scirrhum &c. aliquando in his observatas fuisse; ne quidem ipso corde excepto, quod tamen solum viscerum vitiis non macerari, nec supplicia vitæ trahere, sed lætæ mortem ilico adferre *Plinius* voluit (vide commentaria §. 304.). Nam mulieri, suppurata cordis pulpa, per multos dies urinam purulentam effluxisse, & in cadavere ejusdem, quarto mense mortuæ, calculos & abscessus in corde repertos fuisse,

(a) De Tumoribus præter naturam cap. 2.
Charter. Tom. VII. pag. 315.

(b) pag. 281.

(c) Adversar. Anat. Dec. 1. pag. 3.

(d) Adversar. Anatom. Dec. 3. pag. 33.

testatur *Hollerius* (a). Unde merito concluditur, totum fere corpus inflammationi obnoxium esse, cum omnes fere ejus partes vasculosas esse hodierna Anatomie constet.

NUSQUAM FREQUENTIUS ET TENACIUS, QUAM IN ADIPE. Constat certissime, cellulofam dictam tunicam ubique fere in corpore inveniri, quæ diversa nomina acquirit, prout diversam materiam continet. Si enim alba, granulosa, non nisi calore fulilis, materia cellulas hujus membranæ repleat, adiposa tunica dicitur: quando vero materia in hac membrana contenta fere sponte diffuit, pinguetudinosa vocatur. In illis vero corporis locis, in quibus tenerima invenitur hujus membranæ fabrica, ejusque cellulae tam parvæ, ut pingue contentum oculos fugiat, simpliciter cellulota dicitur; uti v. g. in dorso manus, fronte &c. Quam late autem hujus membranæ dominium pateat in corpore humano, apparebit, si consideretur, omnes musculos tendinesque investiiri tali cellulosa membrana non tantum, sed omnes musculorum fibras, quouique oculorum acies, & subtilissimorum Anatomicorum dexteritas & patientia, penetrare potuerunt, similibus vaginis cellulosis regi. Vasa fere omnia in tali cellulosa substantia decurrunt; imo & ipsam vasorum & viscerum fabricam talis cellulosa substantia pro parte constituit. Unde patet, frequentissime in hac tunica, cellulosa dicta, vel pinguedinosa aut adiposa, inflammationem posse contingere; & ubi in hac parte hæret, tenacissima esse solet, sæpe non resolvenda; sed in suppurationem vel & gangrænam frequentissime tendit. Cum enim arteriæ, per hanc membranam dispersæ, pingue oleum, vel simile unctuosum smegma lubricandis partibus inserviens, in sanitate secernere soleant, & in cellulas, tam facile dilatabiles, hujus membranæ deponere, videtur, his vasis dilatatis vel ruptis per inflammationem, ipsa rubra pars sanguinis transsudare quasi & accumulari in his cellulis; unde tumor ruber & durus, veram phlegmonem comitans, oriri videtur, qui fere semper tantum in hac tunica cellulosa hæret. Pulcherrime hanc rem *Galenus* (b) expressit, (quem locum antea etiam in commentariis §. 118. alia occasione allegavi) dicens: *Quum sanguis calidus copiosior in aliquam animalis partem procubuit, majora ejus vasa protinus distenduntur, quæ plenitudinem non ferunt; ab his deinceps quæ minora sunt. Mox ubi nec in iis satis continetur, exsudat foras in illa ampla spatia, quæ inter vasa sunt, sic ut etiam omnia, quæ in composita carne habentur, loca occupet.* Per carnem autem hic intellexisse *Galenum* membranam illam adiposam, vel cellulofam, satis patet ex illis, quæ ultimo Capite ejusdem libri scribuntur. Præterea per inflammationis eventus optime confirmatur, illam frequentissime in membrana cellulosa hære. Si enim validam inflammationem suppuratio vel gangræna sequatur, pus collectum, vel gangrænosus tabus, pertusa cute, in membrana adiposa semper hære observatur. Sic vidi, dum terribilis gangræna totum crus à genu ad apices digitorum pedis usque fere occupasset, secessisse magna panniculi adiposi frustra subjectis musculis & tendinibus omnino illæsis.

(a) In Commentariis in Coac. Hippocr. pag. 324. (b) Method. Med. Lib. X. cap. 6. Chartæ, Tom. X. pag. 232.

§. 375. **H**ANC Stagnationem (371.) efficit in arteriis minimis 1. Quidquid premendo, distrahendo, intorquendo, rumpendo, contundendo, urendo, erodendo, crispando, vasorum fines ita arctat in conicis, cylindricisve, ut diameter aperturæ fiat diametro sphaeræ sanguinis minor. Calor, motus vehemens, infixa, ligaturæ, pondera incumbentia, acria ingesta vel applicata, frigus acre, frictio nimia, omnes causæ vulnerum, contusionum, erosionum, fracturarum, luxationum, obstructionum, huc pertinent.

In Definitione inflammationis §. 371. bina considerabantur: stagnatio nempe sanguinis rubri arteriosi in canalibus minimis, & dein pressio & attritus, sanguine à tergo urgente majori impetu in loca hæc à stagnante sanguine obstructa. Enumerantur nunc hac paragrapho illæ causæ, quæ hanc stagnationem efficere possunt in arteriis minimis, quæ tamen per ultimas suas angustias naturaliter partem rubram sanguinis transmittere possunt.

1. Arteriæ, quæ rubrum sanguinem vehunt, postquam per laterales ramos tenuiores pars inde secesserit ad varios usus, rubram sanguinis partem, quæ molecularum suarum determinata magnitudine minora vasa ingredi naturaliter non potest, tradunt venis, cum quibus continuum canalem faciunt. Ubi ergo arteria talis minima desinit, ibi incipit vena: arteria autem ex majori amplitudine semper in suo decursu magis & magis angustatur; vena autem in initio angustissima toto suo decursu amplior fit. Hinc in arteriis liquidum à basi coni versus verticem, in venis vero à vertice versus basim movetur: unde & venæ, æque ac arteriæ, canales conici dici possunt. Circa illum autem locum, ubi angustissima jam facta arteria venulæ minimæ continuatur, per aliquam saltem longitudinem videtur canalis cylindricus esse, cujus latera nec convergunt, nec divergunt: si plus procedatur versus arteriam vel versus venam, jam iterum coni vel directi, vel inversi, figuram canalis habet. Sed circa hunc locum, ubi arteria sanguinea desinit, & vena minima huic continuata incipit, maxima est angustia; unde omnium frequentissime molecule sanguinis, quacumque de causa immeabiles factæ, hic hærebunt. Si jam concipiatur, vasorum fines arctari quacumque ratione, stagnatio fiet liquidi, quod per has angustias transire nequit. Simul ex dictis patet ratio, quare in textu dicatur: IN CONICIS, CYLINDRICISVE.

Dictum fuit in commentariis §. 115. particulas minimas liquidorum circularium in animalibus, per microscopia visibiles, sphaericas apparuisse, & circa ultimas vasorum angustias singulas fere tantum moleculas, & sæpe adhuc cum quadam difficultate, transire potuisse: unde facile patet, arctatis à quacumque causa canalium angustissimis finibus, impediri liberum transitum, & obturari canalium cavum; dum magnitudo moleculæ transmittendæ capacitatem vasis transmissari excedit: Fit ergo obstructio, (uti ex ejus definitione data §. 107. patet) quæ omnis inflammationis semper comes est.

Cum autem, (uti dictum fuit in commentariis §. 109.) canalium nostrorum sectio perpendicularis ad axim sit circulus, illeque inter figuras Isoperimétras omnium maximam habeat aream; patet iterum, omnem causam, quæ valet mu-

D d d d iij

tare figuram canalium, facere stagnationem liquidi transmittendi per ultimas canalium angustias. Præcipuæ tales causæ hic enumerantur, quarum plurimæ antea explicatæ jam fuerunt.

PREMENDO, DISTRAHENDO, INTORQUENDO. Videantur de his illa, quæ dicta sunt in commentariis §. 112. n°. 1. 2. 3.

RUMPENDO. Vasorum discissorum orificia sponte contrahi, & liberum exitum fluidis, naturaliter per illa circumductis, impedire, demonstratum fuit in commentariis §. 159. uti & §. 158 n°. 2. & 4. : simulque patuit ex illis, quæ dicta fuerunt ibidem n°. 5. tunc veram inflammationem ab hac causa sequi.

CONTUNDENDO. Cum contusionis idea accumulationem vulnusculorum involvat, uti dictum §. 322. patet ex modo dictis, quare stagnatio liquorum inde fiat. Accedit, quod contusio semper fiat, à duro obtuso corpore partes corporis nostri lædente, quod sine compressione fieri non potest.

URENDO, ERODENDO, CRISPANDO. Omnibus enim his modis vel destruitur pars corporis integre, ut vivo igne vel fortissimis causticis sit; unde vasis vivis ad limites talis mali positus obstaculum nascitur; hinc stagnatio, & inflammatio sequuntur; vel si mitior fuerit horum actio, contractis solidis, & inspissatis fluidis, immeabilitas tamen nascitur in pluribus vasis; unde iterum eadem mala fient, uti postea latius in *Capitulo de combustione* dicetur.

CALOR. Si nempe multum excesserit gradum illum, qui in homine sano naturaliter observatur. Demonstrabitur autem postea, quando de calore aucto, tanquam febrium symptomate, agetur, quod fibræ solidæ inde siccantur, rigidaeque & contractæ reddantur (vide §. 689.) sed, aucta rigiditate fibrarum, valorum ex his conflatorum contractilitas augetur; adeoque cavitas eorundem minuitur, unde obstructio fiet; uti demonstratum fuit in commentariis §. 113. Si jam simul consideretur, nimior calore diffusi tenuissimas fluidorum partes, sanguinem autem & ejusdem serum concreescere in massas solidas, vix resolvable postea; patebit evidenter, calorem auctum merito inter inflammationis causas recenseri.

MOTUS VEHEMENS. Videantur illa, quæ dicta sunt in commentariis §. 100. ubi probatum fuit, à solo aucto motu Obstructionem, inflammationem, omnesque ejus sequelas nasci.

INFIXA. Dum acuta quævis corpora partibus infixa hærent, lædunt vasa; & comprimunt vicina; simulque dolorem & irritationem continuam faciunt; unde facile patet, inflammationem debere sequi, imprimis si circa partes satis acuti sensus hælerint: tunc enim non solent sedari hæc mala, donec suppuratione facta natura expulerit illud molestum. Mirum talem casum habet *Ruyfchius* (a). Puella insciis parentibus aciculam deglutiverat. Postea tumor durus & inflammatorius in inguine oritur cum febre & dolore satis valido; Applicatis mollissimis cataplasmatibus ad suppurationem perducebatur tumor; quo deinde lanceola discisso una cum pure copioso acicula æruginè obducta prodiit, non sine excrementorum alvinorum commixtione. Ad felicem tamen curam perductum fuit periculosum hoc malum. Plurima tamen observata docuerunt, aciculas & similia acuta corpora diu hædere posse in panniculo adiposo sine magno malo. Tornionem si

(a) Observat. Anatom. Chirurg. n°. 55.

novi, qui jam à sex annis festucam ligneam infixam gerit illi manus loco, qui inter pollicem & indicem digitum medius est; quam ibi hærentem facile tangere licebat: consuetos tamen labores exercebat quotidie sine ullo fere incommodo; unde noluit pati unquam, ut educeretur à Chirurgo, licet pessima quævis ipsi ominaretur. Aliud vidi simile exemplum, quod hoc probat. Puella conquerebatur de dolore quodam punctorio circa humerum: dum partem omni modo examinabam, nihil potui detegere mali, licet etiam undique attrectarem; dixitque se non semper, sed aliquando tantum, dolorem illum percipere. Jussi ex galbano factum emplastrum applicaret, & post aliquot dies rediret. Cum nullum inde levamen haberet, rursus omni cura dum partem affectam attrectarem, sensi digitum pungi, vidique acutum apicem eminere per cutim læsam: eduxi forcipe acum, una cum parte fili sex pollices longa; moxque agnovit, se illam acum, dum operi suo intenta esset, ante sex circiter septimanas perdidisse.

LIGATURÆ. Vasa comprimendo illorum cavum arctant: maxime autem agunt in venas; quia & minus firmas tunicas habent, quam arteriæ; & pleræque magis versus superficiem corporis locari solent. Ubi autem fortius adstringuntur ligaturæ, tunc una cum venis & arteriæ comprimuntur. In venæ sectionis administratione quotidie hoc apparet: si enim modice adstricta fuerit ligatura, pertusa vena sanguis cum impetu exsilit; si nimis fortiter adducta fuerit, compressa simul arteria, nihil fere sanguinis effluit: quod ubi vident Chirurgi, laxato vinculo, sanguinis effluxum promovent. Videantur & illa, quæ dicta sunt in commentariis §. 112. n°. 4. ubi simul explicatum fuit, quare **PONDERA INCUMBENTIA** externa vasorum compressione obstructions pariant.

ACRIA INGESTA VEL APPLICATA. Videtur omnibus fere partibus corporis nostri, tam externis quam internis, hæc proprietas inesse, ut ab acrium applicatione contrahantur; & plurima experimenta hanc rem evincunt. Si guttula aceti oculo inspergatur, sic contrahuntur palpebræ invito etiam homini, ut nulla fere vi diduci possint; acria venena ingesta ventriculum & intestina contrahi faciunt; unde ab aëre retento & calefacto inflationes summæ oriuntur. Dum vivi canis nudo intestino olei vitrioli guttulam penicillo applicarem, vidi illud statim sic contrahi, ac si laqueo injecto constrictum fuisset. Verosimile jam videtur, etiam in minoribus vasis acria, si illuc veniant, similes constrictiones facere posse, unde obstructio, &, accedente motus circulatorii augmento inflammatio nasci poterunt. Sic dum acida labes sanguinem ipsum infecerit, pruritus, obstructions, pustulæ, ulcera circa vasa cutanea observantur, uti dictum fuit §. 64. Dum stagnans serum, Hydropicorum crura distendens, acre fieri incipit, cutis inflammatur sæpissime. Si autem tanta vi prædita fuerint acria, imprimis externe applicata, ut vasorum continuitatem solvere valeant, patet facile ex prædictis, longe adhuc magis inflammationem producere posse.

FRIGUS ACRE. Constat certo, per frigus solidas partes corporis in omni dimensione minui; ergo & arctari vasorum cava. Simul probatum fuit in commentariis §. 117. sanguinis moleculas frigore adunari: utroque ergo hoc effectu frigoris obstructio & inflammatio nasci poterit; imo sæpe satis subita gangræna, uti dicetur postea §. 454. 455. An non inde patet ratio, quare tam frequens pleuritis sequitur, dum sudantes à laboribus agricolæ se frigori incautius exponunt? Acr enim inspiratus frigidus fere tangit intercostalia loca, dum tenerrima

plastri vel unguenti, statim cutis inflammatur: imo videntur & quidam in interioribus febre similem dispositionem habere; dum à pinguioribus assumptis, imprimis à lardo, statim febricitent. Si jam oleosis his & pinguibus corporibus acrimonia simul insit, pertinacissimæ inde inflammationes nasci poterunt. Oleum amygdalarum, quod recens pressum adeo blandum est, æstivo tempore paucorum dierum spatio rancidum fit, & tantam acquirit acrimoniam, ut parca etiam copia deglutitum statim fauces inflammer. Idem in butyro, rancido factò, vel in sartagine nimis diu frixo, verum est. Acre autem pingui mistum plus nocet, quia loco, cui applicatur, tenacissime adhæret, neque aquosis facile se ablui patitur. Baccæ Mezeræi officinarum, Thymelææ Lauri folio semper virente fructus, digitis pressæ merum pingue oleum sudant; quod gustatum primo saporis lenitate fallit; sed inox fauces inflamat, adeo, ut me incautius gustantem fere præfocaverit; nec potui, per integrum bihorium continuo fauces eluens posca cum melle, tollere penitus molestissimam hanc acrimoniam. Sic etiam olea illa acris Empyreumatica valido igne ex cervorum cornibus, Ligno Guajaco, & similibus, expressa, (quæ ad rigiditates articulorum ab infarcta materie immeabili sanandas adeo commendantur) imprudentius cuti inuncta pessimas inflammationes, imo gangrænam ipsam aliquando produxisse, observatum fuit. In his enim maxima tenacitas oleosa, qua meatus obstruunt, & valida simul acrimonia, qua vasa irritata constringuntur, deprehenduntur.

§. 377. 3. **O**MNIA, quæ sanguinem cogunt, ut coeat; motus nimius, derivatio tenuioris partis ex sanguine per sudores, urinas, salivas, diarrhœas; coagulantia.

In historia obstructionis dictum fuit, illam fieri ab excessu molis transituræ supra capacitatem vasis transmittentis; adeoque ejusdem generales causas esse, angustiam nimiam vasorum, vel auctam magnitudinem molecularum fluidi transmittendi; vel denique ubi hæc bina simul concurrunt. Binis autem præcedentibus paragraphis dictum fuit de causis, stagnationem producentibus in minimis arteriis sanguiferis, quatenus illa sit ab arctatione horum vasorum: hac autem paragrapho agitur de illis causis, quæ, manente licet eadem vasorum capacitate, sic sanguinem coire faciunt, ut per ultimas minimarum arteriolarum angustias transire nequeat. Inter has autem numeratur primo

MOTUS NIMIUS. In commentariis §. 100. ubi agebatur de illis, quæ fiunt ab augmento motus circulatorii ut causa, demonstratum fuit, sanguinem à motu aucto sic disponi, ut facilius concreseat. In sanguine enim semper est nixus in concretionem; qui tamen eo validior est, quo vasorum fortior est actio in sanguinem contentum. Robusti hominis sanguis de vena missus concrescit statim, & in quiete relictus plurimum concreti rubri, parum autem fluidi seri exhibet: contrarium in debilis puellæ cruore obtinet. Totum autem hoc pender à magis minusve efficaci actione vasorum in sanguinem. Sed per motum auctum vasorum actio intra idem tempus & sæpius & fortius agit in fluida contenta; unde major eorundem condensatio sequitur. Præterea aucto motu dissipantur fluidissima, quia organis secernentibus & excernentibus intra idem tempus major copia fluidi à sanguine separandi applicatur; unde iterum sanguinis concretio au-

Eccc

getur. Accedit etiam, quod auctum motum sequatur caloris augmentum, à quo pariter sanguis sic inspissatur, ut per minimas arteriarum angustias amplius transire nequeat. Unde in morbis acutis, dum calor augetur plurimum, statim cerebri actiones læsæ, & respiratio difficilis docent, in sanguine nasci talem immeabilitatem, ut non possit amplius libere transire per minima horum viscerum vasa.

DERIVATIO TENUIORIS PARTIS EX SANGUINE PER SUDORES. Docuerunt observationes (uti dictum fuit in commentariis §. 93.) in sanguine humano crassissimam partem esse globulos rubros; plurimum autem tenuioris liquidi illis interponi, per quod à mutuo contactu & facili concrezione impediuntur. Simulac ergo quacumque de causa de sanguine tollitur tenuis illa & fluidissima pars, moleculæ crassiores contiguæ factæ, & circa ultimas arteriarum angustias maxime pressæ, adunantur & concrescunt; unde canalium obstructio, & liquidi stagnatio, sequuntur. Sic phthisicis, dum nocturnis sudoribus disfluunt, incipit circa cutanea vascula immeabilis sanguis hære, & pustulas inflammatorias facere: Ob hanc causam sudores in morborum acutorum initiis damnavit *Hippocrates*: & *Sydenhamus* in variolis nocuisse observavit, si in initio morbi sudoribus disfluere ægri.

U R I N A S. In hystericis & hypochondriacis sæpe incredibilis copia urinæ, tenuis instar aquæ, emittitur, si animi quodam affectu graviore turbati fuerint: sed sanguine sic diluente suo vehiculo orbat, crassior pars concrecere incipit, & aliquando pessimæ inflammationes sequuntur; vel sanguinis crassamentum, circa abdominalia viscera depositum, pertinacissimas obstructions producere solet. Unde toties passionem hystericam vel hypochondriacam atra bilis sequitur.

S A L I V A S. Si examinetur saliva, quæ homini sano aperto ore sponte effluit, satis tenuis est, (motu enim linguæ & vicinarum partium mucus oris & faucium, salivæ mistus, magis tenacem efficit) & chemico examine fere totam aquosam esse constat; cum ex sexaginta uncis salivæ fere quinquaginta & novem uncis leni igne abstrahi possint, quæ omni dote aquam referunt. Saliva pariter non concrevit in aqua ebulliente; unde sero sanguinis tenuior est. Copioso ergo salivæ effluxu tollitur plurimum tenuis liquidi de corpore; unde hoc orbat sanguis immeabilis fit. Ob hanc causam illi, qui, vel ex mala consuetudine, vel nicotianæ abusu, quotidie magnam salivæ copiam perdunt, toties pessimis abdominalium viscerum obstructionibus laborant. Postquam densis aphthis omnes oris interni partes diu testæ fuerunt, his postea deciduis, incredibilis copia salivæ exit per dilatata vasa. Nihil idoneis auxiliis tollatur immodicum illud salivæ profluvium, exhausti sæpe pereunt, vel postea diuturnis morbis conflantur; dum tenuissima parte sanguinis sic deperdita difficillimæ obstructions nascuntur. Nec obstat, quod salivatione mercuriali, per plures sæpe septimanas protracta, quotidie ingens liquidi copia sic perdat, absque eo, quod sanguis inde inspissetur: nam tunc non exit saliva proprie dicta, sed soluti omnes humores corporis per vim argenti vivi putridæ aquæ specie exeunt: unde tunc non fit jactura tenuissimæ partis sanguinis, manente parte crassa immeabili; sed vera dissolutio ipsius etiam partis rubræ sanguinis; ideoque hoc ferre possunt, modo bono victu restituantur novi humores, dum evacuantur illi, qui antea adfuerant.

DIARRHŒA S. Per illam pariter tenuiorem sanguinis partem de corpore subduci posse, satis patet. Ideo in febre ardente, si alvus cum impetu prorumpat, lethale dicit *Hippocrates* in Coacis Prænotionibus, & alibi. Cum enim in hoc morbo sanguis jam immeabilis hæere incipiat in minimis arteriis, subductis per alvi fluxum liquidis tenuioribus, immedicabile malum redditur.

COAGULANTIA. Videantur de his illa, quæ dicta sunt in commentariis §. 117.

§. 378. **E**FFICIUNT eam in vasis lymphaticis arteriosis 1. omnes causæ, quæ initia horum latiora ampliant, ita ut in ea intrent partes sanguinis crassiores, quæ propulsæ ulterius occurrunt angustiis conniventibus, ubi tum patiuntur eadem, quæ exposita (377.); talis est laxitas vasculi in suo principio, motus violentus liquidi arteriosi, 2. omnes causæ alteri inflammationi communes (375. 376.).

Hætenus consideratæ sunt illæ causæ, à quibus liber transitus crassissimæ sanguinis partis (rubræ nempe) per minimas arterias sanguiferas impeditur: quæ vel agebant vasa angustando, vel fluidum transmittendum reddebant immeabile. Sed præterea observatur vera inflammatio rubra in illis vasis, quæ naturaliter excludunt sanguinem rubrum angustia sui cavi. Evidens hujus rei exemplum habetur in Ophthalmia, in qua sæpe tota adnata, imo & ipsa cornea, rubet, vasculis rubro sanguine repletis nudo etiam oculo conspicuis; cum tamen naturaliter nihil sanguinis rubri in his vasculis contineatur. Debuerunt ergo talem inflammationem præcessisse quædam causæ, per quas dilatata hæc vascula admittere potuerunt sanguinem rubrum. Facile autem patet, rubram sanguinis partem, semel ingressam hæc vasa tenuiora, obstructionem facere debere, cum continuo occurrat majoribus angustiis canalium convergentium. Unde in hoc casu stagnatio nascitur, licet maneat eadem amplitudo canalium, neque augeantur moleculæ fluidi transmittendi. Aptissimo nomine vocatur *error loci* tale malum, cum sanguis ruber, minora vasa ingressus, immeabilis hæret, non potens transire per ultimas horum vasorum angustias: totum enim malum pendet tunc tantum ab eo, quod sanguis ruber alieno loco hæreat. Videantur illa, quæ circa hanc rem dicta sunt in Commentariis §. 118. ubi simul probatum fuit, vitium illud obtinere posse in omnibus illis locis corporis, in quibus minora vasa, tenuius fluidum vehentia, ex majoribus derivantur. Adeoque error loci nunquam poterit obtinere in vasis sanguineis rubris, cum nulla particula observetur in sanguine sano, quæ sua magnitudine globum rubrum superet: sed in reliquis decrefcentium vasorum seriebus adesse poterit. Quousque jam rubra pars sanguinis aliquando penetrare potuerit, nondum certo per experimenta constat: hoc tamen novimus, quod in morbis minora longe vasa sæpe ingrediatur, quam sunt illa, quæ serum sanguinis continent; uti statim patuit, dum ipsa corneæ tunicæ vascula quandoque ingredi potuerit. Cum autem omne illud fluidum, quod in sanguine sano rubris & serosis globulis tenuius est, lymphæ vocetur generali nomine; hinc & vasa,

E e e ij

per quæ hoc tenuius fluidum movetur, lymphatica dicuntur; quæ vel venæ sunt, vel arteriæ. Sed probatum fuit in Commentariis §. 119. obstructionem locum habere non posse in venis, nisi ab externa earundem compressione transitus impediatur liquido: unde errore loci partes fluidi crassioris tantum in arteriis lymphaticis hætere poterunt; sub quo nomine comprehenduntur omnes arteriæ, quæ naturaliter globos rubros & serosos excludunt, tenuiora autem fluida admittunt.

Requiritur ergo ad errorem loci, ut initia arteriarum lymphaticarum sic dilatentur, ut rubram sanguinis partem admittere possint. Sed demonstratum fuit in Commentariis §. 26. vasorum amplitudinem pendere à binis diversis causis, resistentia nempe laterum vasorum, & momento liquidi impulsu; adeoque mensurari ratione composita ex ratione directâ impetus liquidi impulsu, & ratione inversâ resistentiæ laterum. Si ergo laxitas major oriatur à quacumque causa in vasculi lymphatici initio, manente quamvis eodem impetu liquidi impulsu, illud dilatabitur; & vicissim aucto impetu liquidi impulsu, manente quamvis eadem firmitate laterum, idem fiet; omnium ergo maxime, si binæ hæ causæ simul concurrant. Videantur & illa, quæ de laxitate vasorum, ut causa erroris loci, dicta sunt in Commentariis §. 118. Quare vero aucto motu liquidi arteriosi vasorum initia amplientur, dictum fuit in Commentariis §. 100. Experimenta autem confirmant modo dicta. Pars enim corporis exposita vaporî tepidæ aquæ tumebit, & rubebit, magis solito, ob sanguinem rubrum laxata vasa minora ingressum. Et post validos cursus videmus totam cutim externam rubere, & oculos quasi sanguine perfundi, ob sanguinem rubrum aliena ingressum vasa, quæ majori impetu fluidi impulsu dilatata fuerant.

2. Ubi jam sanguis ruber lymphatica vasa ingressus fuit, patet facile, quod omnes illæ causæ, quæ angustare poterant majorum vasorum cava, applicatæ his minoribus, idem faciant. Illæ autem recensitæ fuerunt in numeris hic citatis.

§. 379. **U**NDE & similis morbus in omni vase conico, ubi fluidum ex lato in angusta liquor, obtinere potest; ut enim in sanguine rubra, sic in Lympha alia est forte pars crassior reliquis.

In sanguine sano, recens de corpore educto per minimum vulnusculum, tubulisque vitreis minimis excepto, microscopia diversas partes distinguunt; uti etiam in pellucidis animalium viventium partibus, in quibus motum humorum per vasa observare licet. Conspiciuntur enim globuli tenuiori pellucido fluido innatantes, in quo nihil ulterius detegere possumus, cum pelluciditas faciat, ut homogeneous tantum fluidum videatur. Omnino tamen probabile videtur, in lymphâ tenui pellucida sanguinis esse quasdam partes crassiores reliquis, quæ determinata suæ molis magnitudine continentur in vasis proportionalibus, neque naturaliter tenuiora his vascula ingredi poterunt. Nisi enim globuli rubri tam magni forent, ut in sanitate serosa vasa, & his minora, ingredi non possent, facile patet, quod omnis sanguis derivaretur in minora vasa; unde majora omnia exinanirentur. Idem verum est in vasis serum sanguinis vehentibus, & reliquis minori-

bus. Unde, simulac in morbis sanguis nimis fluidus sit, diffilantur omnia de corpore, vel in cavis majoribus & minoribus corporis fluida accumuluntur, ut in Hydropicis fieri observatur; sed tunc semper vasa majora collabuntur, defectu copię crassioris sanguinis, qui illa distendere solebat. Idem jam videtur verum esse in reliquis decrefcentium vasorum seriebus, à maximis sanguineis ad subtilissima usque; quod nempe singulis vasorum seriebus propria sint fluida, quę tam crassas moleculas continent, ut proxima minoris magnitudinis vascula ingredi nequeant, sed propriis vasis coerceantur. His positis, si à quacumque causa minuatur canalium talium convergentium cavum, vel adunentur moleculę, quę solitariae per ultimas horum angustias transeunt, inflammatio sequi poterit; non rubra, sed pellucida in tenuissimis his vasculis. Pręterea, si sequentis magnitudinis vasculi orificium, sive à laxitate, sive à nimio motu, sic dilatetur, ut proximę magnitudinis vasis crassissimas moleculas admittat, simile malum fiet ab errore loci. Quot ergo intercurrunt vasorum series inter vas maximum & minimum, tot poterunt esse diversę inflammationes; & quidem in singulis duplices, vel à proprio fluido, immeabili factō ob molecularum auctam magnitudinem, vel angustiam vasis; vel errore loci, ob moleculas crassiores ex vasis majoribus initia dilatata vasorum minorum ingressas. In maximis tamen vasis sanguineis error loci nunquam inflammationem facere poterit, cum nulla crassior pars globulo rubro in sanguine deprehendatur. An Rheumatismus, Arthritis, Podagra, à minimorum vasculorum inflammatione sunt? videantur illa, quę dicta sunt in Commentariis §. 122.

§. 380. **E**X quibus vera diversitas phlegmones, erysipelatis, œdematis, scirrhi, cum inflammatione liquet.

PHLEGMONES. Licet veteres quamcumque inflammationem hoc nomine quondam vocaverint, obtinuit tamen usu postea (uti dictum in Commentariis §. 370. & Galeni & Aeginetę testimoniis confirmatum fuit) sic vocare tumorem præternaturalem, rubrum, renitentem, calentem, pulsantem & dolentem, in parte molli, quem febris in toto vel in parte comitatur. Fit autem à sanguine rubro stagnante circa arteriarum fines, dum reliquus sanguis, cordis & arteriarum viribus pulsus, majori impetu à tergo loca hæc obstructa urget. Potest ergo phlegmone hæere vel in angustis ultimis arteriarum rubrarum, quod rarius fit, vel fieri à sanguine rubro impacto per errorem loci arteriis serosis vel lymphaticis, quod longe frequentius observatur. Patuit autem ex illis, quę dicta sunt, in Commentariis §. 374. veram Phlegmonem potissimum hæere in membrana adiposa.

* **ERYSIPELATIS.** Sic definitur à Galeno (a) Erysipelas, quod verę phlegmones æmulum malum omnino videtur. Si ex sanguine & flava bile iusto calidioribus fluxio mista fuerit, aut ex sanguine quidem, sed fervido, & substantia tenuissimo, Erysipelas vocatur ille affectus, multo calidior inflammatione, & aspectu flavior. Et si tetigeris, sanguis facile subfugit, rursusque affluit, exquisite tenuis & ruber.

(a) Lib. II. Method. Medend. ad Glaucon. cap. 1. Charter. Tom. X. pag. 368. 369.

apparens. Non tamen similiter dolet Erysipelas ac inflammatio : neque secundum ullam inflammationis speciem aut pulsum , aut compressionem , aut distensionem similem adfert. Verum aliquando moderate omnino infestat , & maxime , quando circa solam cutim dispersum est , minime ladens subjectam carnem. Es plerumque tale fit , & illud est exquisitum Erysipelas. Et paulo post dicit : Exquisitum Erysipelas solius cutis affectus est. Cum autem Erysipelatosi loci color aliquid flavescentis rubro misti haberet , bilem , tanquam causam præcipuam Erysipelatis , incusaverunt veteres Medici. Sed novimus hodie , serum sanguinis naturaliter flavescere ; unde , ubi pauculum rubri cum multo sero hæret in vasis serosis obstructis & inflammatis , color ille ex rubro flavescens in parte affecta oritur. Simul etiam apparet , quantam affinitatem inter se habeant Erysipelas & Phlegmone , cum tantum differant magnitudine molecularum obstructantium ; in Phlegmone enim pars rubra sanguinis in vasis distentis & obstructis accumulatur ; in Erysipelate serum sanguinis imprimis cum paucio rubro intermixto sic immeabile hæret : Phlegmone potissimum in membrana adiposa hæret ; Erysipelas integumenta corporis externa , vel & membranaceas partes internas , oblidet. Atque etiam patet , Erysipelas in Phlegmonem degenerare posse , dilatatis vasis majorem copiam rubri sanguinis admittentibus , maloque propagato ad membranam adiposam : & aliquando nasci posse inflammationem , quæ inter Erysipelas & Phlegmonem quasi ambigat ; tuncque composito nomine ex utroque affectu vocaverunt tale malum veteres Medici. Illis enim , quæ modo allegavi , statim subjungit Galenus (a) : Quemadmodum id , quod subjectam carnem attingit , neque ex tenui omnino fluxione fit , non solum Erysipelas est , sed mixtus affectus ex Erysipelate & Phlegmone , in quo quandoque propria Erysipelatis symptomata prævalent , & à recentioribus Medicis vocatur talis affectus Erysipelas Phlegmonodes ; Quandoque autem phlegmones , & dicitur ideo Phlegmone Erysipelatodes. Quod si neutrius (symptomata) evidenter prævalent , sed æqualia videantur , Phlegmonem & Erysipelas mixta esse dicuntur.

ŒDEMATIS. *Ōιδμα* , uti dictum fuit in Commentariis §. 112. n°. 1. simpliciter significabat tumorem ; postea tamen hoc nomine plerumque intelligebatur tumor mollis , non dolens , & digito tangenti facile cedens , sine mutatione coloris in cute , qui tumor plerumque ab aquosis humoribus panniculum adiposum distendentibus fit. Illud vero Œdema , de quo hic agitur , longe alterius naturæ est , & , ut distinguatur à vulgari Œdemate , calidum solet vocari. Demonstratum enim fuit in Commentariis §. 379. in minoribus etiam vasis arteriosis , quæ sua angustia serum & rubram partem sanguinis excludunt , veram inflammationem contingere posse. Tumor ergo dolens , calens , non ruber , parum flavescens , imo aliquando penitus albus , vocabitur Œdema calidum ; quod tantum ergo differt ab Erysipelate , quia in minoribus longe vasculis hæret. Solet vocari & Œdema Erysipelatosum , quia quam proxime ad Erysipelas accedit. In facie & capite frequenter observatur ; tuncque vulgo rosa bullata (de belroos) dicitur. Videtur jam apud Galenum (b) aliquod talis œdematis vestigium reperiri ; quamvis enim illo nomine quemvis tumorem vocari asserat , vel magis particulari usu frigidos tumores postea sic dictos fuisse moneat alibi , tamen de curatione

(a) Ibidem.

(b) Method. Med. Lib. XIV. cap. 3. 4. Char. iter. Tom. X. pag. 311.

Erysipelatis agens, sive simplicis, sive cum aliis affectibus juncti, dicit: *Quemadmodum autem saepe phlegmona admiscetur Erysipelas, ita etiam aliquando œdemati: ac vocetur, quod ex ambobus tum est conflatum, Erysipelas œdematosum.* Quod autem non intellexerit illum casum, quando distentarum frigido tumore partium cutis Erysipelatosa fit, evidenter patet ex illis, quæ sequenti Capite subjungit dicens: *Quemadmodum autem ex biliosa fluxione Erysipelas, ita ex phlegmate fit œdema, rarus quidam ac indolens tumor. Equidem scio aliter quoque œdemata provenire circa pedes in hydropicis affectionibus, phthisibus, aliisque pravis, qui vehementes sunt, habitibus. Atque in illis quidem œdema plenitudinis hominem prementis est symptoma, nullam seorsum propriam curationem requirens &c.* Licet autem ex præconcepta opinione indolentem tumorem dixerit, quem à pituita ortum credebatur, tamen ex remediis, quæ ad hanc œdematis speciem commendat, patet facile, potius calidæ quam frigidæ indolis fuisse: paulo post enim addit: *At si ex pituitoso humore in partem influente œdema constitit, abunde aliquando satisfacit spongia sola, qua ex aqua, in qua sit aceri aliquid, maduerit &c.*

Cum ergo illud œdema calidum vera sit inflammatio, hærens in arteriis lymphaticis minimis, semper metus est, talem forte natam esse diathesim in tenuissima sanguinis lymphæ, quæ immeabilis facta sua vascula obstruit; unde cerebri imprimis functiones, à libero circuitu humorum per minimas arteriolas pendentes, turbari poterunt; sive simili malo etiam in encephalo nato, sive per metastasin ab exterioribus versus interiora delato. Accedit, quod, si vehemens fuerit ille morbus, destructis tenerrimis vasculis, satis subito in gangrænam tendat.

SCIRRHI CUM INFLAMMATIONE. Scirrhus est tumor durus, scaber; vix dolens, circa imprimis glandulosa hærens. Qui, si confirmatus fuerit, & diu hæserit, tali constat materia, quam nulla arte hætenus resolvi posse constat, neque unquam benigna suppuratione à partibus sanis separari. Unde patet, quam periculosa sit inflammatio in scirrhi vicinia, vel in integumentis ipsam regentibus, nata; cum cito in cancerum tunc degeneret, uti postea latius dicitur, quando peculiari Capitulo de Scirrho agatur. Optime Galenus (a) scirrhi duritiem à phlegmones resistantia distinxit dicens: *Phlegmone namque non durum (εκαρπία) sed resistantem tumorem efficit (ἀντίστασις), perinde atque utres sunt liquida materia aut aëre pleni.*

§. 381. **Q**UOTIES autem causæ hæ (375. 376. 377. 378. 379.) produxere stagnationem hanc (371. 372. 379.) in vasis (372. 373. 374. 378. 379.), tum vis acti sanguinis à vita superstita producit effectus quosdam, qui simul signa Inflammationis.

Bina in omni inflammatione, in quacunque demum vasorum serie hæreat, occurrunt observanda: Liquidi nempe immeabilitas, facta angustatione vasis, vel concretionem molecularum fluidi, vel denique errore loci; & vis vitæ à tergo urgens velocitate aucta propulsos humores in vasa impervia. Hæc si concurrant, adest inflammatio; si sola immeabilitas, liquidi adsit, obstructionis idea habetur;

(a) Comment. in Textum XXX. Epidem. Hippoc. Lib. VI. Charter. Tom. IX. pag. 389.

quæ ergo causa præcognita est inflammationis, præcognita autem causa est motus auctus urgens locum obstructum. Dum autem hæc fiunt, nascuntur quædam mutationes in parte inflammata, quæ observatæ dant veram Diagnosin inflammationis præsentis. De his autem agitur paragrapho sequenti, ubi ordine enumerantur.

§. 382. 1. **A**RTERIÆ minutæ vixque visibiles obstructæ jam à sanguine distendente augentur: inde tumor ruber. 2. vasa Lymphatica arteriosa, ante pellucida, & invisibilia, eadem patiuntur; inde augmentum rubedinis, præcipue dum vasa tenerrima, & vesiculæ, in panniculo adiposo, plena sanguine intruso, crasso; liquidiore parte orbatæ. 3. distenta vascula, rupturæ propinquæ in fibris minimis; inde dolor punctorius. 4. compinguntur valde liquida & solida; hinc durities, renixusque partis. 5. à rubro accumulato, & valido impulsu, rubedo splendens. 6. à renixu, pulsu, compactu, vasorumque adhuc meabilium angustatione à tumore obstructorum, attritus fit ingens partium liquidi inter se, in solidum, solidi in illas; inde calor, & æstus; 7. & quia pulsi à corde sanguinis impetus exceptus finibus vasis obstructi latera dilatat, fit Pulsatio. 8. à fibris irritatis, & sanguine celerius per aperta actæ, quia venis revehitur, sed arteriis in multis prohibetur; acceleratur Pulsus, fit febris, sitis, calor, vigiliæ, debilitas, molestia.

1. Demonstratum fuit in Commentariis §. 120, ubi de illis effectibus agebatur, qui obstructionem ut causam sequebantur, quod vasa obstructa necessario deberent extendi & dilatari. Illa enim vis, qua cor pellit sanguinem in arterias, facit recedere illarum latera ab axi canalis, quia plenæ sunt, & convergunt sensim angustiores factæ. Resistentia ergo circa fines arteriarum, & plenitudo illarum, præcipuæ causæ sunt, quare à sanguine impulsæ dilatentur: sed in canalibus obstructis resistentia summa est, & simul maxima plenitudo, quia nihil per fines illorum transire potest; maxima ergo necessario debet sequi dilatio. Si jam simul consideretur, inflammationem comitari auctum sanguinis motum, patebit evidenter, adhuc magis debere extendi canales, dum inflammatio adest, quam in simplici obstructione. Dum autem hæc dilatio fit in illis arteriis, quæ naturaliter sanguinem rubrum vehunt, vel saltem dilatatæ jam illum admittere possunt, evidens est, tumorem, ab extensis vasis natum, rubrum esse debere: si enim in minimis vasis hæreat obstructio aut inflammatio, posset etiam in maxima dilatactione, quam sine ruptura ferre possent, adhuc excludi pars rubra sanguinis, uti dictum fuit §. 379. & 380. Imo & concipi potest, tale malum in vasculis adeo exilibus hæcere, ut illorum tumor, ab hac dilatactione factus, ne quidem sub sensu caderet. Videantur de hac re illa, quæ dicta sunt in Commentariis §. 122. Vera autem, & proprie sic dicta, inflammatio semper in talibus vasis hæret, quæ sanguinem rubrum admittere possunt, vel naturaliter, vel dilatatæ, uti ex definitione §. 371, data patet.

Præterea

Præterea calor auctus, omnis inflammationis comes, uti demonstrabitur statim n°. 6. facit augmentum tumoris. Constat enim certis experimentis, corpora omnia expandi in omni sua dimensione per caloris augmentum.

2. Arteria serosa ex minima arteria sanguinea derivatur, ut ramus ex suo trunco; sed non possunt arteriæ sanguineæ latera distendi, quin distrahantur & amplientur orificia arteriarum serolarum, quæ ex illis oriuntur; unde pars rubra sanguinis hæc orificia dilatata poterit ingredi. Idem verum erit respectu arteriarum lymphaticarum, quæ ex serosis arteriis derivantur. Nam & hæc posse distendi sic, ut capiant sanguinem rubrum, patet in ophthalmiis, uti jam antea dictum fuit. Hinc ergo manifestum tumoris & rubedinis augmentum fit. Neque tamen ab his omnibus vasis distentis viderentur posse tam enormes tumores oriri, quales sæpe in validis inflammationibus apparent: sed demonstratum fuit in Commentariis §. 374. nusquam frequentius & tenacius fieri inflammationem, quam in adipe, dum & tenerrima hujus membranæ vascula infarciuntur sanguine rubro immeabili, & per oscula vasorum, patentia in cellulas hujus membranæ, dilatata pars sanguinis rubra effunditur; unde tam facile expansilis membrana adiposa mirum sæpe in modum distenditur. Pulcherrime hanc tumoris in phlegmone originem notavit *Galenus* (a). Postquam enim dixerat, nullum tumorem posse nasci, nisi nova substantia parti tumentis accedat, vel à copioso calore partes fusæ in spiritum abirent, qui distenderet illam in majorem molem: (uti v. g. aqua in vapores per calorem resoluta immensum spatium occupare potest) probavit, non fieri tumorem in phlegmone ab hac liquidorum rarefactione, qua in vapores sive spiritus solverentur: *Apparet enim, si selecta fuerit pars phlegmone laborans, sanguis effluens plurimus, & locus universus sanguine plenissimus, quem admodum spongia madentes; spiritus autem neque statim excidit, neque postea: & in fine ejusdem Capitis addit* (b): *In inflammationibus autem omnia sanguine replentur, ex vasis per eorum tunicas resudante, in omni vero carnis parte roris instar permixto.* Per carnem autem intellexisse *Galenum* tunicam adiposam, patet ex illis, quæ dicta sunt in Commentariis §. 374. uti & ex aliis plurimis apud eundem locis. Nam & in Capite modo citato sollicite monet, tumorem, qui inflammationem comitatur, diversum penitus esse ab illo, qui aucto corporis habitu fit: ibique *ποικυλαίνω* vocabulo utitur, ut majorem obelicitatem significet.

Sed dum tenuiora vasa dilatata ingreditur sanguinis rubra pars, simul cum illo & serum & tenuior lymphæ in his vasis hærebunt; sed rubrum illud solum immeabile ibi manebit, angustiis conniventium vasorum impactum; reliqua tenuiora, inter resistens hoc obstaculum & à tergo urgentes humores pressa, per laterales ramos derivabuntur; unde magis & magis accumulabitur in vasis obstructis solum rubrum; atque inde iterum oritur rubedinis in parte inflammata augmentum.

3. Cum ergo vasa immeabili liquido obstructa distendantur impetu fluidi à tergo urgentis, distrahentur tunicæ eorundem; ergo & fibræ nervosæ per has dispersæ; adeoque dolor excitabitur, uti patet ex illis quæ dicta sunt in Commentariis §. 220. & 224. n°. 2. Cum autem maximum vas inter minima (arteriæ nempe rubræ angustissimus finis) ne quidem decimam partem capilli crassitie æquet, patet, distractionem fibrillarum nervearum, per talis vasculi tunicas dis-

(a) De Tumoribus præter naturam cap. 2. | (b) Ibid. pag. 315.
Charter. Tom. VII. pag. 313.

perfarum, dolorem excitare debere talem, ac si in puncto minimo corporis hæreret; hicque dolor punctorius vocatur. Sed talis minima arteriola rubra plurimum adhuc excedit magnitudinem serosæ aut lymphaticæ; in quibus tamen ab inflammatione similis distractio, & dolor nascitur, minor adhuc spatio hærens. Unde &, centenis talibus vasculis inflammatis, dolor apparet, quasi in uno puncto fixus hæreret; tantum inde ortus, quia liquidum à tergo majori impetu impulsu vascula sic distendit, ut fibræ nervosæ, horum vasculorum latera constituentes, rupturam minitentur. Unde simul ac in sævissima etiam pleuritide Venæ sectione tantum sanguinis educitur, ut æger jamjam in animi deliquium caderet, cessat integre, vel saltem plurimum remittit, dolor.

4. Sanguis noster, dum quiescit, separatur in binas partes, rubrum nempe con-
crescens, & serum fluidum, cui illud rubrum innatat. Binæ autem imprimis cau-
sæ sunt, quæ concretionem sanguinis impediunt; perpetuus nempe motus, & te-
nuioris liquidi interpositio inter globulos rubros, per quam à mutuo contactu
removentur. Ubi autem rubrum illud immeabile hæret vel in vasis sanguiferis,
vel & in minoribus dilatatis, quiescit, & fluidissima pars exprimitur; uti dictum
fuit n^o. 2. hujus paragraphi: unde fit adunatio & compressio globulorum rubro-
rum ad se mutuo; cumque flexiles sint, mutabitur figura sphaerica, & pluribus
in punctis se invicem tangent, adeoque plus cohærere incipient. Unde, pergenti-
bus iisdem causis, accumulabitur in vasis distentis admodum, uti & in cellulosa
substantia tunicæ pinguedinosæ, rubrum illud concretum; atque inde major du-
rities & renixus partis inflammatae necessario sequentur. Cumque vasa sic distenta
comprimant alia sibi adjacentia, angustatis illorum cavis propagabitur malum
per totum loci inflammati ambitum. Ob hanc causam duritiem cum dolore sæpe
posuit Hippocrates pro inflammatione. Sic in Prognosticis (a) de vesicæ inflam-
matione & malis, quæ illam sequuntur, agens dicit: *κότις ἐν οὐλῇ τὴν ἐν τῇ
δύρῃ, αὐτὴν δὲ ὀδυνην*, *at vesica dura & dolentes* &c. Et aliis in locis, uti notavit Hollerius (b)
phlegmonem ab aliis tumoribus præter naturam distinxit duritie & dolore.

5. Tenuiori omni fluido expresso, solum rubrum in vasis distentis accumula-
tum hæret; unde cæteris paribus eo major semper rubedo, quo validior adest
inflammatio. Cutis autem, quæ in plerisque corporis locis laxa semper est &
mobilis, à panniculo adiposo sanguine immeabili infarcto & turgido quam maxi-
me tenditur, unde polita resplendet. Tensæ enim cuti semper talis nitor adest;
unde pingues nitere dicuntur, distenta nempe cute per pinguedinem accumu-
latam. Sic perpastum canem macie confectus lupo rogabat (c), unde sic nite-
ret. Quam pulchre resplendet tensa cutis in juniorum fronte, quæ in senibus laxa
turpibus sulcatur rugis!

6. Constat hodie certissimis experimentis, solo tritu corporum ad se mutuo
posse excitari calorem summum, imo vivum ignem sic nasci. Simul etiam evic-
tum fuit, tanto majorem excitari ab hoc tritu calorem, quo fuerint rigidiora
& magis elastica corpora sic attrita; uti etiam, quo majori vi ad se mutuo ap-
primantur, & quo celerius agitentur (d). Verum quidem est, aquam vel aliud

(a) Sentent. 71. Charter. Tom. VIII. pag. 659.

(c) Phædr. 3. 7.

(b) Comment. in Coac. Prænot. Hippoc. pag. 552.

(d) Videatur de his omnibus Boerhaavii
Chem. Tom. I. pag. 176. &c.

liquidum interpositum inter corpora, dum ad se mutuo atteruntur, impedire, ne tantus calor nascatur, ac quidem ab iisdem, nullo liquido interposito, fieret: unde videretur, ab attritu fluidorum nostrorum ad canales, quibus continentur: non posse facile excitari calorem. Sed si consideretur, sanguinis globulos elasticos esse, & moveri rapidissime per canales elasticos, & circa ultimas arteriarum sanguiferarum angustias singulos fere tantum transpirari; adeoque, omni tenuiori fluido jam per laterales ramos dilapso, fortiter ad latera vasorum atteri; patebit facile, ab hoc attritu calorem nasci debere. Unde etiam in robustis, quibus densus sanguis, major calor observatur: dum vero dissolutus sanguis plus vergit in aquæ non elasticæ indolem minor semper calor adest. Ob eandem causam major calor comitatur velociorem sanguinis per vasa motum. Neque obstat, quod in loco inflammato immeabilis sanguis in vasis obstructis hæreat. *Leen:enhoeckii* enim experimento, in Commentariis §. 132. allegato, constitit, immeabilem talem moleculam illo tempore, quo cor non agit, arteriæ contractione retropelli, mox cordis systole expulso sanguine in arterias propelli iterum ad priores angustias: unde patet, ire & redire posse sic moleculam obstructentem in canali obstructo. Cum autem ex modo dictis constitit, tenuiora liquida exprimi, crassum immeabile accumulari & condensari continuo, simulque motus velocitatem augeri in parte inflammata, patebit ratio, quare tantum sequatur necessario caloris augmentum. Sed vicina vasa, nondum obstructa, ab inflammatis vasculis dilatatis compressa angustabuntur; unde & in his major attritus fiet, partim ob majorem angustiam, partim ob auctam celeritatem liquidi transjiciendi. Si enim ex centum vasculis quinquaginta fuerint impervia; per reliqua, nisi stagnatio fiat, tanto majori velocitate debebunt transire fluida. Omnia ergo illa concurrunt, à quibus constat per experimenta posse nasci majorem calorem. Sanguis enim, liquidissima parte expressa, concrefcit in solidam fere massam, quæ valida actione vasorum, & impetu liquidi à tergo urgentis, omni momento condensatur, angustata à vicinis tumentibus vasa fortius applicantur ad liquida contenta, motusque fluidorum per vasa acceleratur. Unde patet ratio, quare inflammatio, ob causæ & effectuum similitudinem ab igne nomen habeat, uti dictum fuit §. 370.

7. Cum totum corpus in omni fere puncto arterias habere hodie ex Anatomicis constet; illæque omnes eodem tempore, dum cor est in systole, dilatentur, contrahantur autem momento sequenti, dum cor est in diastole, patet, omnia fere corporis puncta pulsare omni momento vitæ. Sed illos motus, qui semper eadem lege fiunt in corpore nostro, non animadvertimus, licet etiam validissimi fuerint. Simulac vero à consueto ordine deviant, statim illos percipimus. Sic cordis pulsus adeo validus, tam facile, manu pectori admotâ, percipiendus, non sentitur ab homine sano: simulac vero à consueto rythmo recedit post animi affectus, motum corporis velociorem &c. ilico cor palpitare dicitur. Non mirum ergo est, pulsum in parte inflammata sentiri, qui antea non adfuisse videbatur. Sanguis enim, vi cordis projectus in arterias obstructas circa fines suos, omnem suum impetum impendit his dilatandis; unde necessario latera arteriarum magis recedunt ab axi sui canalis: cessante autem cordis actione arteriæ tanto majori vi reagunt, quo plus distentæ fuerint. Pulsus ergo augetur in parte inflammata, & , suo robore & velocitate auctis superans naturalem, percipitur distinctissime.

F f f f ij

8. Quando arteriarum fines obstructi sunt, liquida venis contenta, quæ his arteriis respondent, redeunt ad cor: sed postea hæc corde expulsa non poterunt pelli per arterias obstructas, sed debebunt transire per arterias reliquas liberas tanto majori velocitate. Non minuitur enim copia liquidi per vasa transjiciendi, sed minuitur numerus vasorum transmittentium; unde patet evidenter, debere augeri velocitatem fluidi per reliqua vasa aperta movendi. Sed simul apparet, ab hac causa non posse nasci majorem velocitatem in fluidorum motu Medico observabilem, nisi pars affecta habuerit talem magnitudinem, ut numerus vasorum imperviorum, comparatus cum reliquis vasis apertis, insignem differentiam facere possit: si enim millesima pars arteriarum sic nata inflammatione obstruatur, augmentum celeritatis requisitum, ut per reliqua vasa aperta moveatur sanguis, non videtur facile observari posse. Ergo alia debebit esse causa, quare natam inflammationem febris comiterur sæpe, vel sequatur; licet in exigua admodum parte corporis hæserit morbus. Sic enim in Paronychia v. g. dum inflammatio exiguum tantum corporis locum occupat, tamen sæpe valida febris adest. Ideo in-textu additur à FIBRIS IRRITATIS. Ubi de doloris effectibus agebatur in Commentariis §. 226. fuit demonstratum, a dolore febrim nasci: sed dolentissimas inflammationes valida ob hanc causam comitatur febris; si vix vel parum doleant, sæpe sine febre sunt. Unde ab irritatione fibrarum nervearum, per vasa inflammata, vel vicinas partes, ab his prellas vel distractas, dispersarum, potissimum febris excitari videtur. Revera autem adesse talem irritabilitatem in vasis nostris, per quam acceleratur humorum circuitus, docent plurima observata. Dum in morbis acutis soluta morbi materia per vasa fluit, per metastasim sæpe deponenda ad alia loca, vel criticis evacuationibus expellenda de corpore, quantæ sæpe oriuntur turbæ in corpore, quam miris modis sæpe acceleratur & turbatur pulsus! Dum ab ingestis majori copia cibis, vel iisdem non assuetis & durioribus aut acrioribus, factus chylus una cum sanguine per vasa fluit, nascitur febris. De his autem agetur postea in februm historia, sufficit obiter hæc notasse, ut constet fibrarum irritationem febrim producere posse.

Natam vero febrim comitantur præcipua ejus symptomata, SITIS, CALOR, VIGILIE, &c. de quibus singulis postea peculiari Capitulo dicetur. Notandum autem, non quamlibet inflammationem comitari hæc mala, sed tantum, ubi tota sanguinis massa inflammatoriam illam spissitudinem habet, qua non nisi difficulter per minima vasa transire potest. Constat enim, in sanguine sano esse naturalem proclivitatem in cohesionem, & quidem eo majorem, quo homo fuerit robustior. Quamdiu autem viscerum & vasorum efficacia potest superari nixus ille in concretionem, qui in sanguine adest, tamdiu vita manet incolumis. Videmus autem quotidie in morbis acutis sic degenerare sanguinem, ut tandem vix amplius fluidus maneat, & concreseat ilico, simulac cessat vasorum attritus illum à concretionem impediens. Sic in febre ardenti stillæ sanguinis de naribus prodeuntes ilico in solidas massulas concrescunt; imo sæpe solutas nasi interni arterias sic obturant statim, ut salutare illud naturæ molimen, roties profusa Hæmorrhagia hos morbos solvere tentantis, impediatur omnino. Unde merito Hippocrates in Coacis prænotionibus (a) minimas illas sanguinis stillas damna-

(a) N°. 19.

vit : & alibi (a) trium ægrorum exemplo lethalem eventum probavit, quibus quarto & quinto die pauculum quid de naribus sic stillaverat. Dum ergo incipit augeri hæc proclivitas sanguinis in cohaesionem, patet facile, difficiliter transire illum per minimas arteriolas, hinc cordi oritur major resistantia : & cum pulmo statim debeat excipere, & per arteriæ pulmonalis minimas angustias transmittere, sanguinem corde dextro expulsum, minimum vitium incipientis talis immeabilitatis in pulmone percipitur, unde aucta respiratione nituntur sic affectum viam parare sanguini per pulmonem transjiciendo. Tunc nascitur illa MOLESTIA, quæ in omnibus morbis acutis, inflammatoriis imprimis, malum signum dat; laboriosa sit & difficilis respiratio, & continuo mutato corporis situ anxietatem suam ægri testantur. Hæc est illa *σφοδρία* Hippocrati dicta, quæ, (licet etiam ab aliis causis nasci possit, uti postea dicitur §. 631. & sequentibus) frequenter tamen sanguinis immeabilitati ortum debet.

Ex omnibus ergo, quæ hac paragrapho dicta sunt, patet Phlegmonem his signis cognosci quod sit tumor ruber; cum dolore punctorio, durus & splendens, calens & pulsans, quem febris in toto, vel in parte saltem, comitatur.

§. 383. **H**ÆC species (382.) est morbi nondum adulti.

Omnia autem signa præcedenti paragrapho recensita observantur in phlegmone, quæ nondum ad apicem sui incrementi pervenit, sed adhuc in ascensu est. Trium enim in omnibus morbis stadia observant Medici, incrementum, statum, descensum. Incrementum vocatur, quamdiu omnia symptomata augentur : status, ubi hæc ad summum pervenerunt fastigium, neque sensibile horum augmentum vel decrementum animadvertitur : decrementum vero, quando & vehementia & numerus symptomatum minuuntur. Ubi enim phlegmone ad statum pervenit, tunc incipit disponi ad varios exitus vel in sanitatem, per resolutionem nempe; vel in alios morbos, suppurationem, gangrænam, sphacelum, scirrhum; uti statim dicitur. Sed tunc simul mutantur plurima ex illis phænomenis, quæ phlegmonem nondum adultam comitabantur; & succedunt nova, quæ prius non aderant. Sic v. g. rubedo, tensio, dolor, durities, quæ in phlegmone observantur, ubi illa in gangrænam tendit, incipiunt minui; imo tandem omnino cessant : & contra sensus hebes, color pallidus, cinereus, fuscus, flacciditas, pustulæ ichore plenæ &c. succedunt. Sollicite ergo in Phlegmone, uti & in aliis morbis, hæc stadia distinguenda sunt, ut aliquid certi in Diagnosi, Prognosi, & indicatione curatoria determinari possit.

§. 384. **T**UM cruor emissus pleno saltu ex vena late aperta pelvi exceptus, frigescent format albam, duram, crassam, rigidam pellem instar corii fere porcini.

Ubi valida inflammatione laboranti homini sanguis secta vena educitur, mirum

(a) Epidem. I. Textu 63. Charter. Tom. IX. pag. 65.

satis apparet in sanguine phænomenon. Notum est, sanguinem vena exsurgentem, puro vas exceptum, paulo post coagulari; deinde separari in binas partes, tenue nempe flavescens liquidum, serum dictum; & partem rubram concretam, huic sero plerumque innatantem; quæ insula solet dici. In morbis autem inflammatoriis plerisque superior pars insulæ tegitur alba subærulescente pelle, sæpe aliquot lineas crassa, quæ firmiter insulæ rubræ cohæret, & sæpe talem tenacitatem habet, ut novacula se vix dividi patiatur. Quia autem in pleuritide laborantium sanguine frequenter talis coriacea cuticula observatur, ideo talem sanguinem pleuriticum dixerunt Medici, licet & in aliis morbis sæpius observetur. Mira satis habentur apud auctores de hac re observata; sic *Sydenhamus* (a) notavit, quod, si sanguis de vena secta non recto flumine versus Horizontem profiliat, sed per cutim repens perpendiculariter dimanet, licet satis celeri se propriat gradu, non nascatur tunc talis coriacea in sanguine pellis; & ingenue fatetur, se hujus rei causam nescire. Observavit simul, in tali casu ægros non perinde levari, quam si pleno rivo sanguis effluxisset, & hanc pellem habuisset. Præterea monet, à quocumque alio obstaculo, quo impeditur liberrimus sanguinis de vena secta exitus, impediri hujus pellis generationem, & minus levaminis inde ægros percipere. Et, quod magis mirum videtur, licet patulo de venæ vulnere liberrime effluerit sanguis, modo agitetur digito immisso, non nasci illam pellem observavit. Satis ergo videtur obscura esse origo hujus pellis in sanguine vena educto. An seri sanguinis productum est, per morbum ipsum in majorem concretionem proni? sed certe hæc pellis ipsius insulæ, quæ sero innatat, summum locum occupat semper. An chylus, in sanguinem perfectum nondum elaboratus, recrudescens? sic voluit acutissimus *Simson* (b): Obstare tamen videtur, quod chylus sanguini permistus, neque adhuc subactus, fluidus sero sanguinis innatet, non vero cohæreat insulæ. Dicit idem autor, si brachio aut femori vinculum arctum injiciatur, deinde post tres quatuorve horas incidatur vena, sic ut sanguis libere profiliat, hanc pellem semper adesse; uti etiam in sanguine mulierum gravidarum: causamque posuit, quod sanguis aliquamdiu obstructis vasis remoram patiat post ligaturam injectam, & circa uterum in gravidis stagnet, vel saltem lentius moveatur. Ut verum fatear, anceps hæreo, quid de hac pelle tenaci, sanguinis rubræ parti semper arctissime cohærenti, statuendum sit. Voluerunt magni nominis in arte medica viri, fieri hanc crustam, dum aucta circulationis velocitate densatus sanguis magis in concretionem pronus fieret; adeoque non esse causam prædisponentem, sed potius effectum, morbi. Sed vidi, dum sanissimis hominibus vena secaretur quotannis verno tempore, sæpius talem crustam adesse. Imo in homine debili, cui ad Hæmoptysin præcavendam, qua laboraverat, sanguis mittebatur singulis tribus mensibus, vidi semper crustam illam adesse. Adfuit ergo talis sanguinis diathesis, licet nulla inflammatio adesset. Et contra in validissimis inflammatoriis morbis aliquando nulla talis crusta sanguine apparuit; quod tamen pro malo omine semper habitum fuit.

(a) De Pleuritide pag. 333. 334.

(b) De re Medica Dissert. quatuor, pag. 112.

§. 385. **I**NCRESCENTE malo, eadem adhuc (382. 383. 384.), sed aucta; separatur expressa lymphæ, densatur sanguis ruber.

Omnia illa, quæ hætenus enarrata fuerunt, symptomata ortum ducebant ex eo, quod immeabile fluidum in angustiis conniventium arteriarum hæreret; simulque impetus sanguinis, velocius a tergo impulsus, urgeret hæc loca obstructa. Si ergo augeatur tenacitas materiæ obstructæ, vel & in pluribus vasis idem malum fiat; & increseat momentum liquidi à tergo urgentis, patet facile, omnia hæc mala augeri debere. Hinc major tumor partis inflammatae, color præ summa rubedine in purpureum vergens, calor urens, dolor immanis à fibris distractis jam rupturæ proximis, splendor tensæ partis summus &c. Et cum sanguis pulsus in vasa obstructa transire nequeat, tenuissima pars per lateralìa vasa exhibet; rubrum solum immeabile manebit; applicabitur materiæ obstructæ, & vi sanguinis à tergo urgentis ad illam compingetur; unde continuo augebitur copia immeabilis materiæ, adeoque major difficultas tollendi hæc obstacula nascetur.

§. 386. **S**I humor fluens blandus, motus ejus sedatus, causa obstructuens non nimis solidata, obstructio parva, eaque imprimis in arteriis, vel in initiis lymphaticorum, canales mobiles, diluens vehiculum, reducto fluore concreti, motu stagnantis, solvitur inflammatio *resolvendo*.

Omnis morbus exit in sanationem, alium morbum, vel mortem. Generalis hæc regula etiam in inflammatione locum habet: unde varii ejus exitus considerandi sunt. Dum solvitur inflammatio sic, ut nihil mali supersit, & omnes functiones partis affectæ ad pristinam redierint integritatem, sine ullo alio morbo secuto; tunc dicitur sanatio. Si vero inflammatio in suppurationem abeat, tollitur quidem inflammatio, sed ejus loco alius morbus, abscessus nempe, sequitur. Idem verum est, si inflammatus locus in scirrhum induruerit. Ubi autem inflammatio validissima omnem influxum & effluxum vitalis liquidi tollit in parte affecta, cessat hæc quidem, sed sequitur gangræna, & post hanc sphacelus, qui vera mors partis est.

Omniū ergo maxime optabilis inflammationis exitus erit ille, qui resolutio Medicis vocatur. Quando nempe à vita superstite, & idoneis remediis adhibitis, immeabilis materia, in vasis obstructis hærens, sic solvitur, vel vasa, in quibus hæret, sic disponuntur, ut transire possit illud immeabile in venas, vel retroPELLI in majora vasa; sic ut, manente integritate vasorum, liber restituatur per vasa, antea impervia, circuitus humorum, & concretum fluidum nunc solum humoribus circulantibus mistum, sine impedimento transire possit per illas angustias, quas secundum sanitatis leges pervadere deber. Ubi hæc obtinent, tunc dicitur inflammatio sanata esse *resolvendo*.

Inquirendum ergo est in illa signa, quæ docent, possibilem esse hanc resolutionem; hæc autem omnia hac paragrafo enumerantur. Longe enim diversa me-

dela requiritur, si constiterit, inflammationis alium exitum expectandum esse, uti patebit in sequentibus.

SI HUMOR FLUENS BLANDUS. Omnes humores nostri sani, exceptis excrementitiis & bile forsan, adeo blandi sunt & lenes, ut oculus, & nervi nudi in crudo vulnere, sine dolore horum attactum ferant: & hoc requirebatur, ut per tenerima vasa valido satis impetu in sanitate transire possent, nec læderent tamen. Cum ergo resolutio inflammationis supponat motum stagnantis liquidi, & restitutum fluorem concreti, sine ulla destructione vasorum, patet facile, nullam acrimoniam notabilem hic adesse posse. Dum enim premitur in vascula obstructa, valida vi cordis, sanguis, ibique à vasorum actione retropremitur, dum cor est in diastole; omni momento quasi affricatur horum vasculorum lateribus; si ergo sanguis scateat acribus, evidenter apparet, tenera hæc vascula debere solvi & destrui. Hæc est ratio, quare in scorbuticis v. g. ne levis quidem inflammatiuncula, licet ab externis causis in cruribus nata, resolvendo curari possit, sed fere semper in ulcerosam diathesim degeneret. Idem etiam in aliis omnibus cacochymiis, quæ acrimoniam comitem habent, observatur.

MOTUS EIUS SEDATUS. Demonstratum fuit in Commentariis §. 120. nata obstructione, à liquido vitali urgente extendi vas obstructum, dilatari, attenuari, & tandem solvi. Sed tunc aderat tantum talis humorum celeritas, qualis in sanitate esse solet. Facile autem apparet, aucto impetu humorum in locum obstructum citius adhuc debere solvi vasis obstructi cohesionem. Sed ad resolutionem inflammationis requirebatur, ut maneret vasorum integritas. Ubi ergo velocissimus motus humorum comitatur inflammationem, nulla resolutionis spes est.

CAUSA OBSTRUENS NON NIMIS SOLIDATA. Velocior motus humorum non tantum nocet, quatenus vasa obstructa per hunc frangi possent; verum etiam, quia tanto majori vi compinguntur molecule obstructæ ad se mutuo. Ad resolutionem autem inflammationis opus erat ut obstruens concretum resolveretur iterum in illas molecule, ex quibus adunatis concreverat. Quo autem magis expressum fuerit liquidum tenuius crassiores molecule à mutuo contactu impediens, quo plus hæc ad se invicem pressæ & adunatæ fuerint, eo firmitus cohærebunt, & difficilius iterum dissolvi poterunt. Sed dum augetur circulationis velocitas, dissipantur tenuissima, & adunantur crassiora, uti demonstratum fuit in commentariis §. 100. & simul causæ, compingentes ad se mutuo molecule immeabiles, in obstructo vase hærentes, intra datum tempus eo frequentius his applicantur. Hæc est ratio, quare in pleuritide & similibus morbis, ubi validissima febris per duodecim horas v. g. adfuit, desperent periti Medici de resolutione, & omnem curæ scopum ad coctionem & excretionem materiæ inflammatoriæ dirigant.

OBSTRUCTIO PARVA, EAQUE IMPRIMIS IN ARTERIIS VEL IN INITIIS LYMPHATICORUM. Parva obstructio dicitur vel ratione loci, quem occupat in vase obstructo; vel quia in paucis tantum vasis partis affectæ tale malum hæret. Si enim v. g. in vasis serosi initio dilatato globulus ruber hæserit immeabilis, longe facilius poterit tolli hæc obstructio, quam si ad ultimas angustias talis arteriæ serosæ penetraverit. Sic si maxima pars vasorum in loco quodam corporis obstructa fuerit, singula hæc dilatata prement & angustabunt vicina; unde difficilior resolutio semper erit talis obstructionis. Omnium autem facillime, cæteris paribus, obtineri poterit resolutio inflammationis, si malum hæserit in majoribus

majoribus vasis : Venæ sectio enim, & pleraque alia inflammationis remedia in majoribus vasis potissimum efficaciam habent. Sic si v. g. rubra pars sanguinis immeabilis hæserit in arteriæ sanguiferæ maxima angustia, vel errore loci ingressa fuerit vasa serosa, vel proxima his magnitudine lymphatica, debebit illud obstruens sic solvi, vel vas obstructum sic laxari, ut transire possit; vel debebit ex his angustiis retropelli in latiore locum. Sed globulus ruber ex Leeuwenhoeckii observatis in serosos, ex quibus componitur, facile diffilit: sic & globus serosus in alios minores solvi poterit: ergo obstructio talis, si hæreat in arteriis sanguiferis, serosis, vel lymphaticorum initiis, sic resolvi poterit. Sed si minora longe vasa in suis initiis dilatata, ingressus fuerit globus ruber sanguinis, licet in serosos solveretur, vel & in minores, nondum tamen posset angustias ultimas talis vasculi superare; unde patet in hoc casu resolutionis difficultas. Alterum remedium, in resolvendis inflammationibus summæ efficaciz, erat, ut per largam sanguinis missionem sic minueretur copia, & debilitaretur impetus liquidus à tergo urgentis, ut contractione propria vasis retropelleretur obstruens ex angustia in latiore locum (vide §. 141.). Sed tota hæc actio pendet à reactione vasis, cessante causa distendente: omnium ergo efficacissima erit in vasis maximis, quæ firmas & maxime elasticas tunicas habent: in minimis autem & tenerrimis vasculis vix multum boni inde expectari potest. Patet ergo ratio, quare ad curam inflammationis per resolutionem requiratur, ut obstructio non hæreat in minimis vasculis. Observata jam practica hanc rem confirmant, & quidem omnium pulcherrime in ophthalmiis, ubi oculis vasa inflammata optime distinguere possumus. Quamdiu enim vasa adnatæ tantum rubent, nullo vitio in pellucida cornea apparente, magna spes est benignæ resolutionis sine ullo remanente vitio. Ubi autem tenerrima & adeo pellucida vascula corneæ dilatata crassiores humores admiserint, nunquam resolvetur integre hoc malum; sed semper sequetur suppuratio, vel opaca macula relicta corneæ nitorem deturpabit diu, imo & sæpe tota vita manebit.

CANALES MOBILES. Vasa nostra, ut maneat sanitas, debent cedere posse liquidis impulsis; & dein, cessante causa distendente, redire ad pristinam magnitudinem. Hæc vocatur canalium mobilitas. Bina jam opposita vitia sunt, quibus minuitur, imo & integre tolli potest aliquando, canalium nostrorum debita mobilitas: si nempe horum latera adeo laxa sint, ut facillime cedant quidem liquidis vi cordis impulsis, sed, cessante cordis actione, tam parum firmitatis & roboris habeant, ut non possint sua vi propellere sanguinem impulsam. Et contra tanta rigiditas aliquando nascitur in canalium lateribus, ut non patiantur se satis dilatari ab impulsis humoribus. Prius vitium nimia debilitas; posterius nimium robur vasorum dicitur. Si nimia debilitas peccet, levi etiam vi dilatanda vasa poterunt quidem errore loci admittere crassiora liquida; sed cum facile cedere possint, poterunt & ultimi fines in hoc casu sic dilatari, ut crassiora hæc ingressa venis tradant; unde tunc facillimo negotio solvitur obstructio. Accedit, quod in hoc casu motus humorum langueat semper, atque deficiente vasorum robore nunquam densa & compacta sint fluida: unde facile patet, raro in similibus corporibus inflammationes nasci; natas autem non difficulter curari posse. Ubi autem nimium robur vasorum adest, compactus semper & densus sanguis est; liquidissima dissipantur; hinc crassiora uniuntur, & nata inflammatio difficul-

G g g

ter resolvi poterit; partim ob majorem immeabilitatem fluidi densati; partim ob validam canalium obstructorum contractionem, qua obstruentes moleculas arctissime comprehendunt, & resistunt suæ dilatationi. Quotidie hæc observatur, morbos acutos inflammatorios in scæminis & junioribus facillime benigna resolutione curari quam sæpissime, in adultis, & duro labore fractis corporibus, raro. Hoc monuerat Hippocrates (a) dicens: *Corpora exercitata ac densa citius a pleuriticis & peripneumoniacis morbis pereunt, quam non exercitata.*

DILUENS VEHICULUM. Dum in morborum acutorum initio, periculo enim, alvi fluxum, vel aliam quancumque evacuationem, dissipantur liquidissima, semper magnus merus est finitimi eventus. Moleculæ enim crassissimæ sanguinis, interposito liquido tenuiori, à mutuo contactu & concretionem impediuntur.

Dum sanguis mittitur homini sano, apparet homogeneous fluidum. Illud autem sibi relictum secedit in binas partes distinctas: rubræ enim moleculæ adunatæ concresecunt, secedente sero fluido. Si vero sanguis recens missus bacillo agitur, donec refrigerit, impeditur illa separatio seri a rubra parte sanguinis, & tota massa fluida manet: Unde patet, quantæ necessitatis sit diluens tenue liquidum, ut sanguinis concretio prohibeatur. Ob hanc rem Hippocrates in morborum acutorum initio semper damnavit liquidioris sanguinis partis subductionem per sudores, alvi fluxum &c. Sic dixit: *sudor muvis, cum febris acutis oboritur, malus (b).* In febre ardente, si alvus assatim proruperit, lethale. (c) Et Sydenhamus, qui tam sollicitè varia naturæ molimina in sanandis morbis observavit, notat, quod, si in variolarum initio profusus sudoribus disfluere ægri, semper augentur omnia symptomata (d).

Si omnes illæ conditiones modo enumeratæ, vel saltem plurimæ, adsint, tunc expectari potest resolutio, sive mutatio morbi inflammatorii in sanitatem perfectam; non expulsa de corpore materia morbi, neque destructis vasis; sed meabili reddita materie, & vasis obstructis reseratis. Si vero quædam ex dictis conditionibus ad resolutionem requisitis desint; tunc per artem conamur supplere hunc defectum. Blando victu & medicamentis mollissimis lenitas conciliatur humoribus: Venæ sectione, quiete, aëre frigidiusculo &c. nimia circulationis velocitas sedatur: fomentis applicatis parti affectæ vasa laxantur, ut facilius cedere possint: potu tenui aquoso diluens vehiculum suppeditatur; vitando simul omnia, quibus fluidissima humorum pars de corpore subducitur. De his autem omnibus postea dicetur in cura inflammationis.

§. 387. **S**I humor fluens blandus, motus citatus, obstructio magna, nec resolvi (386.) potens, auctis symptomatibus (382. 384. 385.), vascula distenta rupta cum dolore, calore, pulsu, tumore, liquores suos effundunt, solvunt, putrefaciunt leviter, solida tenera atterunt, solvunt, fluidis miscent in unum similem al-

(a) Coac. Prænot. 398. Charter. Tom. VIII. pag. 747.

VIII. pag. 85

(c) Coac. Prænot. n° 110.

(b) Proorrh. Lib. I. n° 57. Charter. Tom.

(d) Sydenham. Opusc. Universa pag. 321.

bum, spissum, glutinosum, pinguem humorem, Pus dictum; hæc *Suppuratio*, alter modus, quo terminatur inflammatio.

Ubi obstruentes moleculæ vasorum convergentium finibus adeo impactæ hærent, ut non detur aditus diluenti vehiculo, quo solutæ penetrarent in venas; interimque motu citato fluidum a tergo urgens pergit magis magisque protrudere immeabile illud obstruens in majores angustias vasorum; patet, tandem immeabile fluidum, maxime pressum, immobile hæsurum penitus in vase obstructo, neque retropelli posse ex his angustiiis in latiore valis locum. Tota ergo illa valis inflammati longitudo omni influxu vitalis humoris carebit; adeoque debet separari à reliquis partibus vivis & sanis. Observatio jam sollicita naturæ, morbos curantis, docuit Medicos, suppurationem natam perfectissime separare à vivis partibus & sanis omne illud, quod inflammatione perditum erat. Unde apparet, non adeo metuendam esse suppurationem, nisi in talibus corporis partibus, quarum integritas absolute ad vitam & sanitatem requiritur: ut v. g. in encephalo: vel ubi pus natum sine periculo educi non potest, ut in locorum intercostalium inflammatione &c. Quomodo autem per suppurationem separentur omnia illa, quæ vitali fluidorum motui penitus inepta facta sunt, pulcherrime patuit ex illis, quæ dicta sunt in vulnere historia: dum recentebantur illa phænomena, quæ in omni vulnere in corpore sano, à primo initio usque ad integram curationem, observantur (vide Commentaria §. 158.). Primo enim sanguis ex vasis, à causa vulnerante discissis, effluebat; dein contractis horum orificiis, subrubellus tenuis ichor; tunc sicca fere fiebat vulneris superficies, & à vitali motu humorum, urgente obstructos jam vasorum fines, oriebatur inflammatio vera; uti docent dolor, rubor, calor, tumor, febricula, sitis &c. Postea separabantur extrema vasorum impervia, una cum parte fluidi immeabilis his vasorum finibus impacti; apparebat in vulnere liquor tenax, albus, pinguis, pus dictum; quo prudenter deteriso omnis vulneris superficies æquabilissime humida apparebat, evidenti, signo, referata jam esse antea obstructorum vasculorum oscula separatis nempe extremis vasorum contractis & imperviis. Suppuratio ergo est salutare illud naturæ humanæ molimen, quo omne illud, quod vitali humorum motui ineptum factum est, separatur à reliquis partibus vivis & sanis. Hinc optime dixit *Hippocrates* (vide locum citatum §. 158. n°. 7. & §. 323.) quod acuto telo inflicto vulnus possit curari sine suppuratione; carnes vero contusas & dissecatas debere putrescere, & in pus versas contabescere. Quamvis autem putredinis vocabulum hic usurpetur, dum de suppuratione agitur, non intelligenda tamen est proprie dicta putredo, quæ in cadavere fit, ubi vita nulla est; sed alia degeneratio humorum, quæ per vitam superstitem fit. Pulcherrime hoc distinxit *Galenus* (a) de febribus agens. Sedimentum enim urinæ album, læve & æquale, tanquam optimum signum laudabat, designans materiam morbi solutam evacuari de corpore. Vocavit tamen hanc mutationem putredinem, dicens: *Putredo autem humorum, quæ fit in vasis, similis est illi, quæ fit inflammationibus & abscessibus & aliis tuberculis &c.* Duo autem genera hujus putredinis esse dicit: *Alterum nempe fieri, vincente natura, alterum vero, devicta. Vincente quidem natu-*

(a) De Febribus Lib. I. cap. 7. Charter. Tom. VII. pag. 115. & ibid cap. 8. pag. 116.

ra, uti in inflammationibus & tuberculosis omnibus tumoribus pus fit; in humoribus autem arteriarum & venarum illud, quod subsidet in urina puri analogum. Hac autem putredo non simpliciter putredo est, sed aliquid coctionis habet. Manente enim concoquendi facultate vasorum, putrescens tunc humor ad talem alterationem deducitur. Unde apparet evidenter, quod puris coactio distinctissima sit à spontanea degeneratione humorum in putredinem.

Inflammationis autem non resolvendæ transitus in suppurationem videtur talis esse. Liquidum à tergo urgens, aucta per febrim comitem celeritate, singulis cordis ictibus pellitur in locum obstructum; unde continua hac arietatione distenta ante obstructionis locum vasis latera incipiunt sensim divelli, & separatur cohesio extremi obstructi cum reliqua parte vasis: Dum hoc fit, effunduntur humores ex vasis jam apertis: calore loci hæc solvuntur; incipiuntque quasi subputrescere; immeabile fluidum in extremis vasorum separatis hærens ab iisdem causis incipit solvi; solidæ partes tenerrimæ, antea continentes hoc immeabile, pariter atteruntur, dividuntur, & cum liquidis effusis, mora & calore mutatis, abeunt in homogeneum liquidum, quod pus vocatur. Mirum forte videri posset, solida vasorum latera sic solvi posse & misceri cum fluidis, ut horum miscela appareat homogeneus liquor: sed, si consideretur incredibilis fere horum vasorum parvitas, res patebit. Ex observatis enim Leeuwenhoeckianis, & aliorum acutissimorum virorum, patuit calculo subducto, quinquaginta fere milliones globulorum rubrorum sanguinis æquare tantum ponderis granum unicum (a). Sed minimæ arteriæ sanguiferæ unicum tantum talem globulum transmittunt: Unde apparet, quam exigua & quam tenera hæc vascula esse debeant: arteriæ tamen sanguiferæ minimæ sunt maxima adhuc vasa inter minima. Sed & antea probatum fuit, veram inflammationem sanguineam posse etiam esse in serosis, & lymphaticis arteriis. An ergo mirum videtur, solida stamina talium vasculorum sic posse atteri, & misceri fluidis, ut dispareant? In phthisicis aliquando sic consumitur tota pulmonis substantia, & puris forma per sputa educitur, ut post mortem lustrato cadavere non absque ratione mirentur Medici, quomodo, tantilla parte nobilis adeo visceris superstitie, vita tam diu protrahi potuerit.

Humor autem ille, ex liquidis effusis & solidis tenerrimis attritis & simul permixtis constans, *pus* dicitur: cuius dotes, si perfectissima maturatio & coctio inflammationi non resolubilis facta fuerit, hic recensentur. Semper enim pus tunc album apparet, spissitudine fere referens lactis cremorem; attractu pingue, in omni puncto æquabile; nihil omnino heterogenei habens. Ubi vero ab his conditionibus recedit pus, damnatur. Hæc omnia notavit Hippocrates in Prognosticis (b) dicens: *Pus autem optimum est album, & æquale, & leve, & minime fætidum: quod autem maxime huic contrarium est, pessimum est.* Sic & Celsus (c) agens de illis, quæ ex vulneribus & ulceribus exeunt, de sanie nempe, sanguine, ichore &c. dicit: *Pus inter hæc optimum est. Sed id quoque pejus est, multum tenue, dilutum; magisque, si ab initio tale est: itemque si colore sero simile, si pallidum, si lividum, si fæculentum. Præter hæc si male olet; nisi tamen locus hunc odorem excitat. Melius est, quo minus est, quo crassius, quo albidius: itemque si leve est, si nihil olet, si æquale est.* Paulo post pulcherrime notat, pure factio inflammationes solvi;

(a) Medical. Essays Tom. 1. pag. 113.

(b) Semper. 42. Chart. Tom. VIII. pag. 617.

(c) Lib. V. cap. 26. n°. 20. pag. 289.

sic enim pergit: *Modo tamen convenire & magnitudine vulneris & tempori debet. Nam plus ex majore, plus nondum solutis inflammationibus naturaliter fertur. Ubi jam materia inflammatoria, coquenda in pus, magis rebellis est; vel vires coquentes debiliores, vel utraque hæc concurrant, tunc non nascetur pus enumeratas modo conditiones habens, sed alius magis minusve ab his degenerans liquor; ut pulcherrime notavit Galenus (a) explicans textum Hippocratis modo citatum. Postquam enim dixerat, sanguinem in phlegmone effusum in inania spatia, vasibus vicina (tunicam nempe cellulosa), non posse redire in priorem naturam, sed immutari debere & putrescere, non aliter quam omnia, quæ alieno in loco vehementius incalescunt, subjungit sequentia: Itaque si innatus calor à propria temperie plurimum recesserit, sanguis, ut in cadavere, putrescit. Si autem ille adhuc aliquam vim retinet, mixta quadam sanguinis mutatio fit; partim quidem ab ea, quæ præter naturam, partim vero ab illa, quæ secundum naturam causa est; quarum ut illa quæ præter naturam est, putrefacit; sic illa, quæ secundum naturam est, causa concoquit. Earum vero utraque prevaluerit, protinus indicia, tum in colore, tum in odore, tum in consistentia, necessario consequuntur.*

Puris ergo confectio à sanitate superstite pendet: ideoque merito inter pessima signa in morbis numeravit Hippocrates, si ulcus ante morbum, vel in morbo natum, nullum amplius pus funderet, sed siccum evaderet: moriturum enim talem ægrum pronunciat (b).

Cognoscitur autem, locum inflammatum tendere in suppurationem ex sequentibus conditionibus.

SI HUMOR FLUENS BLANDUS. Si enim insignis adsit humorum acrimonia, hæc stagnatione & calore majori loci inflammati augebitur admodum: unde fiat erosio vasorum & destructio, non autem blanda illa separatio extremorum vasorum obstructorum, quæ in suppuratione fieri debet.

MOTUS CITATUS. In resolutione inflammationis requirebatur una cum humorum lenitate motus sedatus; sed ubi suppuratio sequetur, semper adest major velocitas circulationis. Unde suppuratio medium quasi obtinet inter benignam resolutionem, & gangrænam. In resolutione, sine ulteriore læsione vasorum, aut evacuatione liquidi immeabilis facti, reducuntur concreta ad pristinam fluiditatem, & stagnantia moventur: In gangræna autem fit vera mors partis inflammatae; & postea totum illud mortuum separari debet à vicinis vasibus vivis. Sed in suppuratione abscinduntur vasorum obstructorum fines, & liquida extravasata una cum solidis tenerrimis in pus versa debent educi; sicque differt à resolutione: à gangræna vero, quia per suppurationem non destruitur tota pars affecta. Ob hanc causam & aucta humorum velocitas, quæ inflammationem comitatur, admodum pacata debet esse, ut resolutio sperari possit. Et contra, si validissima adsit febris, brevi gangræna sequetur: in suppuratione autem, nec tam sedatus est motus, ut in resolutione; nec tam velox, ut in gangræna solent esse. Unde dum nulla resolutionis spes est, æque nocere potest, si nimis minuitur febris, quam si incitetur imprudenter; uti postea patebit in Commentariis.

§. 403. n°. 3.

SI OBSTRUCTIO MAGNA &c. Quandonam obstructio magna vel parva

(a) Comment. 1. in Prognost. Hippoc. Charter. Tom. VIII. pag. 618.

(b) Hippocr. Prognost. Sentent. 12. Charter. Tom. VIII. pag. 605. & Coac. Prænot. n°. 496.

dicenda sit, uti etiam de signis resolutionis, dictum fuit in paragrapho præcedenti. Sed præcipue noscitur inflammationem tendere in suppurationem, si tumor, calor, dolor, rubedo, & reliqua symptomata, paragraphis hic citatis enumerata, augeantur; non quidem summa cum velocitate, tunc enim gangræna potius sequeretur; sed continuo tamen incremento. Difficile quidem foret, accurate cognoscere illum limitem, ubi desinit resolutionis possibilitas, & incipit suppurationis initium; tamen hoc certum est, dolorem, pulsationem, febrim, calorem &c. manifeste augeri illo tempore, dum suppuratur locus inflammatus. Pure autem facto, hæc omnia iterum minuuntur, quod pulchre monuit Hippocrates (a) dicens: *Circa puris generationes dolores & febres magis accidunt, quam pure facto.* Nec mirum, cum vascula distenta, dum rupturæ proxima sunt, acerrimum doloris sensum excitare debeant (vide §. 221.); illis autem ruptis, dolor inde ortus cessat.

§. 388. **S**I humor acer, valde motus, obstructio magna, vasa rigida, omnia symptomata (382. 386. 387.) magna, tum vascula subito rumpuntur, liquida putrescunt; ichor effusus sub epidermide in bullas colligitur instar loturæ carnis, vel saniei flavæ, cineritius, pallidus, fuscus, ater fit color; rubor, dolor, calor, pulsatio, tumor in loco affecto desinit, in vicinis obtinet; fit mors partis affectæ: vocatur *Gangræna*; tertius modus, quo exit inflammatio.

Sequitur jam tertius inflammationis exitus, qui dicitur *Gangræna*. Dum à quacumque cauta in parte molli corporis tollitur influxus liquidi vitalis per arterias, ejusdemque reditus per venas; tunc mors hujus partis fit: quæ dum incipit & perficitur, gangræna vocatur. Differt ergo hic inflammationis exitus à suppuratione, quod omnis liquidorum motus in parte affecta suffocetur omnino, ruptis subito vasculis; cum in suppuratione senlim separentur obstructa vasorum extrema per motum vitalis liquidi à tergo urgentis. Inflammatio autem in gangrænam tendit imprimis, si adsint sequentia:

HUMOR ACER. Acerrima quævis corpori applicata externe gangrænam faciunt: nec refert fere, an acida, an alcalina, an alterius cujuscumque speciei acria fuerint. Sic oleum vitrioli, cauterium potentiale Chirurgorum, ex sale alcalino acri cum calce viva cocto, olea acria Empyreumatica ex cornu cervi vel ligno Guajaco expressa, sales volatiles alcalini &c. cuti applicata veras escharas gangrænosas faciunt. Idem fiet, si sanguinis massa acribus inquinata fuerit. Verum quidem est, hæc acerrima sanguinem ingredi non facile posse: observantur tamen in morbis mirabiles tales humorum degeneraciones, per quas sæpe satis subito in summam acrimoniam eveci destruunt omnia. In scorbutico pessimo putrido sæpe gingivæ cum intolerabili fœtore vera gangræna depascuntur, pessima ulcera, cito gangrænosa, in variis corporis partibus, & imprimis in cruribus, fiunt. Similia & ab atra bile turgida & mota observantur mala (vide §. 1104.). Unde patet, si inflammatoriæ sanguinis tenacitati simul comes fuerit insignis acrimonia, brevi debere destrui vascula, & nasci gangrænam.

(a) Aphor. 47. Sect. 2. Charier. Tom. IX. pag. 85.

VALDE MOTUS. Sedatus motus humorum resolutioni inflammationis favebat; citatior suppurationem promovebat; sed admodum vehemens tanta vi agit in fines obstructos minimarum arteriolarum, ut subito rumpantur omnia, non separantur sensim; ut in suppuratione fit. Pulsuum autem velocitate & respiratione auctis, motus velox humorum circulantium cognoscitur in toto corpore: summus autem dolor & calor ingens in parte inflammata idem designant. Si jam velocitati motus humorum simul adsit eorundem acrimonia, patet facile, citissime debere destrui tenerima hæc vacula; cum acria & majori impetu & frequentius intra datum tempus his applicentur. Præterea demonstratum fuit in Commentariis §. 100. sola celeritate motus circulatorii aucta, sales & olea sanguinis actiora reddi; sicque novos nasci stimulos, augentes circulationis velocitatem, ex qua producti fuerant. Ex quibus omnibus satis apparet, quantum periculum imminet parti inflammata, si validissima febris adsit.

VASA RIGIDA. Demonstratum fuit in Commentariis §. 51. aucta vasorum rigiditate, densari quam maxime sanguinem, & dissipari liquidissimam partem; unde magis in concrecionem pronus erit. Et, uti dictum fuit §. 386. canalium flexilis mobilitas & diluens vehiculum inter illa numerabantur, à quibus resolutio inflammati sperari poterat: contraria ergo si obtineant, pejor semper sequetur eventus. Cumque in hoc casu magna velocitate per vasa moveantur humores, totus ille impetus ager in obstructos vasorum fines, cujus aliter magna pars dilatandis flexilium canalium lateribus impenditur; adeoque avellentur subito magna hac vi vasorum extremitates una cum infarciendo concreto fluido, & fient omnia illa, quæ mox dicentur. Inde patet ratio, quare duro labore fractis corporibus adeo funesti plerumque sint morbi inflammatorii.

OMNIA SYMPTOMATA MAGNA. Si tumor loci inflammati subitissime increseat, rubedo summa in purpureum vergens, calor urens, dolor magnus increfscens continuo, pulsus celerrimus, respiratio anhelosa, &c. brevi gangræna aderit.

TUM VASCULA SUBITO RUMPUNTUR &c. Si jam consideretur, acre fluidum valido motu pulsum urgere fines vasorum immeabile materia sic infarctos, ut nihil omnino transire possit; apparet facile, subitam rupturam vasorum expectandam esse: imprimis si rigiditas nimia vasorum impediat, quo minus distendi facile sine ruptura possint. Sed vasis ruptis liquida effluent; quæ spontaneamutatione corrumpentur, & quidem satis celeriter; cum magnus calor, validæ inflammationi semper comes, putredini producendæ faveat quam maxime; uti dictum fuit §. 84. n°. 5. Dum autem omnia hæc sunt in loco inflammato, observantur quædam mutationes sensibiles, quæ docent, tale malum jam adesse, vel saltem brevi adfuturum. Illa autem phænomena omnia perfecte similia sunt his, quæ ab igne, corporis parti applicato, sunt, uti dictum fuit in Commentariis §. 370. Incipit enim tunc epidermis secedere à cute subjecta, & ab humoribus effusis in bullas attolli, ichore plerumque subrubello plenas; vel in pejore gradu mali flava tenuis sanies his bullulis continetur: splendens illa rubedo mutatur in colorem cinereum, pallidum, fuscum, & nigrum tandem, & prout color vergit à cinereo vel pallido in nigredinem, eo major minorve mali progressus notatur. Deinde omnia fere inflammationis phænomena quiescunt, imo aliquando penitus abolita videntur: Nec mirum hoc est, cum a motu vitalis hu-

morum celeritate aucta per partem inflammata[m] ortum ducant. Rubor hinc evanescit, cum, cessante humorum influxu non amplius pellatur sanguis per vasa partis sic affecta; & cum ob eandem causam non amplius distendantur fibræ nervosæ, dolor cessat. Calor, & pulsatio, cum validum fluidi impulsu ad latera vasorum attritum supponant, pariter delinunt, ubi gangræna inflammationem sequitur. Subita hinc doloris & reliquorum symptomatum remissio in morbis acutis inflammatoriis, sine bonis signis prægressis, merito adeo funesta habetur. Ubi enim in loco corporis externo gangræna post validam inflammationem fit, ex modo dictis signis facile cognoscitur, adesse illud malum: sed si interiora corporis similem partiantur morbum, subita doloris cessatio præcipuum signum dat. Sic in vehementissima pleuritide, & dolentissima intestinorum inflammatione, sæpe acerrimus dolor evanescit subito; dumque miseri victum morbum credunt, paulo post moriuntur. Hæ sunt fallaces illæ in morbis pessimis induciæ, Medici famæ sæpe adeo insidiosæ; dum imprudens optimum morbi, cito tunc semper lethalis, eventum sperat & præcidit.

Destructis ergo vasis, aboletur omnis influxus & effluxus humorum in parte affecta, id est, mors fit, tuncque omnia, quæ sequuntur, mala à spontanea corruptione mortuæ jam partis pendent. Si enim considerentur illæ mutationes, quæ, in aëre calido & humido imprimis, recens mactatorum animalium carnibus accidunt; patebit, similes esse fere illis, quæ in gangrænosis partibus observantur. Vividus enim & ruber color recentis carnis incipit sensim deleri; succedit color pallidus vel cinereus, sensim magis in fuscum vergens; imo & tandem nigrescunt fere carnes tales putrefactæ; & in tabum olidum diffluunt; cum antea adeo firmæ fuerint: Citius autem hæc omnia in parte gangrænosa fiunt, quia vicinæ partes vivæ calore suo putredinem mortui augent.

Vicina autem mortuæ tali parti loca vitalibus humoribus adhuc pervia sunt; sed in confinio mortui & vivi necessario obstaculum humoribus, huc pulsus, nascitur, cum per mortuam jam partem penetrare nequeant: Unde in illo limite quasi nova nascitur inflammatio: postquam, suppuratione facta, separatur mortuum gangrænosum à vicinis vivis, vel proserpit gangræna, vitali humorum motu suffocato in contiguis locis. Hoc autem fetellit aliquando incautos, dum crederent nondum adesse gangrænam, quia dolor adhuc sentiebatur in parte affecta; licet proprie loquendo in parte gangrænosa nullus sensus sit, sed a partibus suppositis & ambientibus adhuc vivis & inflammatis dolor ille oriatur. Bonum autem semper signum habetur, si in ambitu toto partis jam gangrænosæ rubor, dolor, calor, tensio &c. inveniantur; modo non tam valida sint hæc symptomata, ut metus sit, & hanc inflammationem in gangrænam tendere: Novimus enim tunc, vitam superstitem in reliquo corpore moliri separationem gangrænosi corrupti à vivis partibus vicinis.

§. 389. **U**BI sic affecto (§. 388.) loco compressio externa accidit; vel calor ingens humida dissipat, pars mortua instar arefacti corii durefcit, inferiora suffocat, & corrumpit.

In loco jam illo, quem gangræna occupat, nullus humorum motus est per vasa; sed

sed mera quies & stagnatio : unde fient hic tales mutationes , quales fierent in cadavere ab iisdem causis. Calor partium vivarum suppositarum & ambientium , si simul humiditas adsit , in putridum liquamen totum illud mortuum convertet ; si autem externa compressione , vel calore ingenti , dissilientur humidissima , tunc pars mortua exsiccatur , indurescit , & arefactum corium nigrum perfecte refert ; sæpe tantæ tenacitatis , ut novacula vix discindi possit. Hoc autem imprimis in partibus externis , cute tectis , observatur ; in reliquis enim locis in tabum potius deliquescent gangrænosa. Sic hernia incarcerata mortui hominis , antea sanissimi , intestina vidi in putridam pulvem conversa fuisse bidui spatio , quo morbus duraverat. Ubi autem in morbis acutis à decubitu circa os sacrum & coccygis gangræna nascitur , macula nigerima arida & exsucca in loco affecto apparet. Quam subito autem à sola compressione externa etiam in sanissimo homine non tantum gangræna nascatur , verum etiam cutis nigrescat & corii instar induretur , didici sequenti casu. Dum vastæ molis lignum parant fabri lignarii , ut inde molendini axis construeretur , illudque circumvertunt , accidit tristi infortunio , ut elevata vestibus hæc moles , proprio pondere circumrotata , in proximam fossulam abriperet binos homines ; quorum unus tanto pondere suffocabatur miserrime ; alter tibix sinistræ spinæ incumbentem molem sustinere debuit ultra dimidium horæ , antequam tolli potuerit. Bona fortuna fossulæ fundus limo molissimum copioso tegebatur , unde minus nocuit tanti ponderis pressio ; & homo ille non multum mali inde passus fuit , sed lætus se domum recepit , pedibus ultra quadrantem horæ sine incommodo incedens : Sequenti die vocatus inveni tunc in cruris parte anteriori , ubi tibix ossis tanta superficies solis fere integumentis tegitur , maculas nigras majores minoresque , quæ sugillationis à contusione factæ speciem referebant ; sed probe examinatis his apparuit cutim in illis locis mortuam & nigerrimam instar corii induruisse. Scabra enim ligni incumbentis superficies quædam loca sic presserat , ut cutis , intra durum os suppositum & massam incumbentem posita , omni vitali influxu & effluxu humorum privaretur : & postea , suppuratione in omni ambitu harum macularum nata , totum illud mortuum excidit. Sic pulchre vidi , quid sola compressio facere possit , & quare in morbis loca , quibus in lecto totum fere corporis pondus sustinetur , tam subito aliquando gangræna corripiantur. Ubi autem durum tale coriaceum tegmen vivis partibus suppositis appressum hæret , illæ inflammabuntur , adeoque tumentes , si non possint elevare hoc operculum & separare à vivis partibus , quibus cohæret , comprimuntur similiter , & profundius serper idem malum.

§. 390. **F** RIGIDA actu vel potentia , adstringentia , coagulantia , repellentia , pingua acria , emplastica , narcotica , ligaturæ fortes , compressio externa , hanc mutationem inflammationis in gangrænam (388.) cito promovent.

Recensentur hac paragrapho talia , de quibus constat , quod , si loco inflammato applicentur , satis subito ex inflammatione gangrænam faciant.

F RIGIDA ACTU VEL POTENTIA. Inter illa , quæ inflammationem disponebant , ut in gangrænam tenderet , numerabantur (vide §. 388.) obstructio

H h h h

magna, & vasorum rigiditas. Sed frigoris effectus sunt, solidorum major contractio & robur, fluidorum vero aucta immeabilitas. Summum ideo frigus, constringendo vasa, & coagulando humores, omnem humorum circuitum impedit; unde subita partis mors ab acerrimo gelu fit. Ubi autem vis vitæ hæc obstacula superare valet in parte quadam corporis frigefacta, tunc ingens calor nascitur ab attritu fluidi densati per vasa angustiora reddita. Experiuntur hoc illi, qui nive manus fricant: post molestum enim frigus satis acris calor percipitur. Unde patet, frigida, loco inflammato applicata, nocere; vel quatenus motum, integre suffocant; vel quatenus postea calorem, qui jam nimius adest, augent. Aliquando tamen frigida applicata prodesse possent, si per errorem loci humores crassiores, minora vasa ingressi, contractis frigore vasis retropellerentur in majores ramos; præcipue si vitium illud in tenuioribus fluidis hæreret. Sanguinis enim rubra pars statim coagulatur in aqua frigida, serum & tenuior lymphæ non. Sed facile patet, nihil boni expectari posse a frigidis applicatis, nisi recens morbus, & mitis simul fuerit. Si enim obstruens inflammatorium in vasorum minimis angustis impactum penitus immobile hæreat, augebitur potius malum. Hæc autem perfecte quadrant Veterum doctrinæ. Sic Hippocrates, postquam binis in locis (a) frigidum inter alia mala, etiam nigredines (μελας αἷς) facere monuerat, paulo post (b) frigidi utilitates recensens dicit, illud prodesse: *si inflammationes & ardores in rubrum & subcruentum vergam ex recenti sanguine. Inveteratas enim (inflammationes) denigrat. Et Erysipelas non ulceratum juvat, ulceratum vero lædit.* Et Galenus, licet frigidorum usum in phlegmone commendat, pulchras tamen cautelas addit, dicens: *Magisque profecto ad incipientes phlegmonas frigidis & adstringentibus, quam discutientibus, est utendum: atque etiam magis, ubi crassum non est, quod confluit. Vehementi enim in parte inflammata incuneatione (συνώστωρ) facta, non est amplius repercutientibus utendum, sed tunc tempestivum est discutere (c).* Non potuisset certe melius dixisse, si ex circulatione sanguinis cognita inflammationis naturam cognovisset. Et alio in loco de Erysipelatis cura agens (d) monet, quod hoc amplio- rem quidem refrigerationem requirat, quam phlegmone; & dein addit: *Esse autem refrigerationis terminus coloris mutatio. Etenim exquisitum Erysipelas statim cum hac quiescit: non exquisitum vero, sed quodammodo phlegmonodes, si plusculum refrigeres, lividam cutim facit. Si ne sic quidem quis desistat, nigrescit; & potissimum in senilibus corporibus: sic ut quadam ita refrigerationum ne quidem discutientibus medicamentis perfecte sanentur, sed reliquant scirrhusum quemdam tumorem in parte &c.* Ex quibus satis patet, quam anceps sit frigidorum ad inflammationes sanandas usus, cum inde tam facile in peiores morbos degenerent, nisi ipso initio adhibeantur; vel in illis casibus, ubi non à sanguine rubro, sed à tenuioribus humoribus, aliena vasa ingressis, morbus oritur: uti v. g. in Erysipelate, ædema- re calido & similibus malis.

Frigida autem potentia vocantur illa, quæ applicata corpori sano calorem tollunt vel minuunt, licet ipsa actu calida fuerint; vel saltem non multum frigidiora quam est pars ipsa corporis, cui applicantur. Sunt ergo talia, quæ causas ca-

(a) Aphor. 17. & 10. Sect. V. Charter. Tom. IX. pag. 204. 205.

(b) Ibid. Aphor. 23. pag. 108.

(c) Galen. Method. Medendi Lib. XIII.

cap. 6. Charter. Tom. X. pag. 301.

(d) Method. Med. Lib. XIV. cap. 3. ibid. pag. 310.

loris in parte minuunt vel tollunt integre. Sed calor à motu fluidorum per vasa nascitur; hoc minuto decrefcit; aucto vero increfcit: patet ergo, quod frigida potentia dicantur illa, quæ circulationis velocitatem & robur tollunt vel minuunt. Sic v. g. aqua calida, parti applicata, laxando vafa, & diluendo moleculas obstruentes nimium calorem in loco inflammato tollere poterit; unde frigida dicitur potentia, licet aëtu calida fuerit. Facile autem patet, hæc & fimilia raro nocere inflammationibus; uti patebit in curatione inflammationis: non enim tollunt hæc motum humorum per vafa, fed remotis obftaculis circulationis æquabilitatem reftituunt. Illa autem nocerent quam maxime, quæ vitam fuffocando in parte frigus inducerent; ut de quibusdam venenis legitur. Sic cicuta epota Socrates fenfit frigefcere crura, & hoc frigore fuprà pubem adfcendente, placide expiravit.

A D S T R I N G E N T I A, C O A G U L A N T I A. Per illa enim vaforum minuitur amplitudo, & fluida redduntur immeabilia: confpirant ergo hæc, ut obftructionis caufas augeant; adeoque liberum motum humorum per vafa tollunt: hoc vero motu omnino fublato in parte, gangræna adest.

R E P E L L E N T I A. Locus inflammatus, ob rationes dictas §. 282. n^o. 1. 2. tumet, & fæpe fatis valide: unde concluderunt Veteres Medici, aggestam hic elle materiam, quæ ante non adfuerat, adeoque aliunde adveniffe. Hanc autem accumulationem, cum fæpe fatis cito viderent fieri, per fluxionem nafci credebant. Ideo partem curæ ponebant in repulfu illius, quod influxerat; imprimis in initio morbi, uti paulo ante in eadem hac paragrapho ex *Galeno* probatum fuit. Talem repulfum fanguinis à finibus arteriarum bafim verfus poffibilem elle, certiffimis conftat obfervatis. Saniffimus homo fubito percellatur metu, ftatim pallor faciei & labiorum docent, fanguinem rubrum retroceffiffe verfus cor & maiora vafa; unde & cordis palpitatio, & anxietas mox hunc pallorem fequuntur. Idem etiam in animi deliquio manifefto patet. Hoc autem repulfu moleculæ fanguinis, quæ errore loci ingreffæ fuerant minora vafa, poffent iterum retropelli in latiora; ficque folveretur obftructio. Quoufque autem hæc prodeffe poffint, dictum fuit paulo ante, quando de frigidorum applicatione ad loca inflammata agebatur. Cum autem illa omnia, quæ externe applicari poffent hac fpe, ut talem repulfum efficiant, agant tantum vaforum contractione aucta, patet facile, periculofum elle horum ufum, nifi in initio inflammationis ab errore loci factæ; fimulque ab his augeri malum, nifi ftatim profuerint.

P I N G U I A A C R I A, E M P L A S T I C A. Videantur de his illa, quæ dicta funt in Commentariis §. 376. Cum enim hæc inflammationi producendæ apta fint, natam jam ab aliis caufis augebunt procul dubio, imprimis fi Emplastica tenacitate loco affecto adhæferint: tunc enim & magis inperforabilem reddent locum affectum, & acre his miftum loco affixum manebit diu.

N A R C O T I C I S. Forte hæc ex fua natura non funt adeo damnofa, imprimis fi prudenti ufu adhibeantur. Sed cum hæc omnia doloris fenfum obtundant, manente ejus caufa; hinc fæpe inflammatio augetur omni momento, & fine ullo doloris fenfu deſtructis valis, gangræna fequitur. Acerrimus autem dolor, calor, pulfus & reliqua fymptomata fatis monuiſſent & ægrum, & illos, qui ejus curam gerunt, peſſima quævis metuenda elle in tali cafu, nifi hæc narcotica exhibita pacaviſſent doloris fenfum: unde tunc fæpe negliguntur efficaciffima auxilia, quæ hunc inflammationis in gangrænam exitum impediſſent.

H h h h ij

LIGATURÆ FORTES. Quomodo inde gangræna nascatur, dictum fuit in Commentariis §. 355. Facile autem patet, si inflammatus jam locus forti ligatura stringatur, longe citius expectandum esse idem malum.

COMPRESSIO EXTERNA. De hac dictum fuit in paragrapho præcedenti.

§. 391. **T**UMQUE in Sphacelum augent.

Demonstratum fuit in Commentariis §. 374. veram phlegmonem omnium frequentissime in tunica cellulosa sedem suam habere, illamque immanem in molem aliquando distendi posse. Sic nata inflammatione in dorso manus, ubi tenerima tunica cellulosa est, tamen aliquando tumor oritur, binos pollices transversos & amplius sæpe crassitie æquans. Ubi ergo gangræna natam in hoc loco inflammationem sequitur, tota illa moles corrupta separari debet postea. Poteritque in tali casu scalpellum ad magnam profunditatem sine ullo sensu adigi, unde omnia supposita mortua esse crederentur. Accidit tamen sæpissime, tendines & musculos suppositos vitales manere; tuncque nondum est sphacelus: ille enim dicitur adesse, quando ad ossa usque omnia incumbentia mortua sunt; uti postea dicitur in Commentariis §. 429. Verum ubi panniculus adiposus adeo distentus, jamque gangræna corruptus, interimque tenaci cute coercitus, omnia subjecta premit; poterit & in illis vitalis humorum circuitus suffocari omnino; tuncque gangræna in sphacelum, id est, mortem perfectam partis, transit. Omnia ergo præcedenti paragrapho recensita, quæ inflammationem in gangrænam convertebant, poterunt gangrænam natam sic augere, ut fiat sphacelus.

§. 392. **S**I pars inflammata glandulosa, calor internus externusve magnus, materies impacta inertior, crassior, emunctoria obstructa glandularum, folliculi vero harum & latera distenta, fit tumor durus, indolens, glandulæ: vocatur *Scirrhus*; quartus finis abeuntis inflammationis.

Ultimus jam sequitur inflammationis exitus: ubi nempe nec resolvitur inflammatio, nec separatur tamen à sanis partibus vicinis illud, quod vitali humorum motui secundum sanitatis leges peragendo ineptum redditum fuerat. Manet ergo illud morbosum sanis unitum partibus sic, ut tandem indomabilem adeo indolem acquirat, ut nullo amplius naturæ molimine, nullis hæcenus cognitis in arte auxiliis, solvi possit; sed ferro vel igne debeat tolli. In illis autem corporis locis, per quæ rapido motu pulsus sanguis omni momento transit, patet satis, non posse diu immutata manere infarcta immeabile materie vasa; continua enim hac arietatione vel separabitur omne illud, quod libero humorum per vasa motui resistit, per blandam suppurationem; vel gangræna aut sphacelo corrumpetur brevi. Ubi vero talis est conditio loci affecti, ut sanguinis arteriosi impetus vel nihil omnino, vel saltem parum admodum, in illum agere possit; tunc metus est, ne materies impacta, liquidiori parte sensum diffusa, immobilis ibi maneat, & tumorem durum indolentem constituat, qui *Scirrhus* vocatur. Omnium autem frequen-

tissime ille exitus inflammationis observatur in partibus glandulosis: Emissariis enim harum glandularum obstructis, nihil poterit exire secreti per harum fabricam liquidum; quod mora & stagnatione inspissatum illarum cava, vel intricatissimam vascularem compagem, replebit & distendet: cumque humorum circulantium impetus directe agere non possit in materiam hanc impactam; hæc manebit, liquidissima parte spoliabitur, & Scirrhum faciet; Evidens hujus rei exemplum habetur in mammarum inflammatione. Lac enim, ex sanguine per arterias mammarias allato secretum, in ductibus galactophoris hærens, coagulari incipit; tenue serum per papillæ fistulas extillat; residuum inspissatum ibi hæret extra circulationis quasi territorium; & tumorem talem durum indolentem, sedata inflammatione, sæpe tota vita relinquit: Ob eandem causam tories scirrhus testiculorum inflammationem sequitur: si enim consideretur, parvam adeo arteriam spermaticam, ex ipsius aortæ trunco natam, vera anastomosi ramulis emissis, similibus venulis communicantibus, sanguinem rubrum tradere, deinde innumeris ramulis convolutis, & distinctim locatis testium substantiam constituere; patebit evidenter, sanguinis arteriosi impetum in loca obstructa hic fere nullum esse: unde semel impacta materies hic adeo rebelles ad optima quævis remedia tumores sæpe facit. Inflammationem autem in locis glandulosis natam sequitur imprimis Scirrhus, si adfuerint sequentia.

CALOR INTERNUS, EXTERNUSVE MAGNUS. Solent frequenter mammarum inflammatarum curam puerperæ custodibus suis, vel & aliis sæpe delirantibus aniculis, committere: cumque nihil plus soleant metuere, quam suppurationem, & suppurati loci lanceola Chirurgica pertusionem; omni molimine hanc prohibere conantur. Si autem mollissimis fomentis applicatis benignam resolutionem inflammati tentarent perficere, minime culpandæ forent: sed periculoso errore mammam inflammatam ardenti prunæ exponunt; vel, linteis siccissimis & calidissimis fovant continuo; aut spiritum vini fere fervidum applicant; tali quidem sæpe cum effectu, ut nulla sequatur suppuratio, sed dissoluta parte liquidissima, & residuo quam maxime inspissato, indomabilis nascatur scirrhus: tuncque miseræ mulieres, dum levem puncturam acutissimæ lanceolæ adeo metuebant, postea sæpe crudelem, & satis aliquando periculosam, operationem sustinere debent. Idem etiam malum sequitur frequenter, si validissima febris inflammationem loci glandulosi comiteretur, ob easdem causas.

MATERIES IMPACTA INERTIOR, CRASSIOR. Cum lac tantam copiam crassi coaguli caseosi in se contineat, illudque mora & stagnatione tam facile separetur à parte serosa, qua diluebatur; ideo in mammis omnium frequentissimi scirrhii observantur. Quando sanguinis fluidissima parte spoliati fœx, atram dictam bilem Veteribus constituens, picea fere sua tenacitate infecit fluidorum massam, levissimæ etiam in locis glandulosis obstructions in scirrhos degenerant; uti dicitur postea in Commentariis §. 485.

EMUNCTORIA OBSTRUCTA GLANDULARUM &c. Omne enim illud, quod ex arteriis allato sanguine glandularum fabrica secernitur, per harum emissaria debet effundi in determinatos usus. Si jam à quacumque causa impediatur liquidi secreti exitus, debet illud accumulari, & distendere folliculum, quo continetur. Liquidissima autem parte secreti humoris dissipata vel resorpta, residuum spissius factum ibi hærebit immeabile. Humorum autem circulantium im-

petus agere potest in vasa, quæ latera folliculi talis infarcti constituunt, minime in contentam hujus cavo materiam; uti facile patet: unde hæc manebit sæpe nulla arte resolvenda. Stagnatione autem, & liquidissimæ partis dissipatione, tenuissimos etiam in nostro corpore humores miris modis concreescere posse, certo novimus. Bilis in sua vesicula stagnans, obstructo ejus emissario, in calculos tories concrescit. Limpidissima urina sola mora duro calculo originem præbet: & postea patebit, ubi calculi historia dabitur, tales concreciones calculosas etiam in ventriculis cerebri, abdominis cavo &c. repertas fuisse; quæ loca tamen tenuissimo tantum rore, ex minimis arteriis exhalante, alluuntur. Interna narium superficies in homine sano, si bene emunctæ fuerint nares, tenui satis lymphæ mader; sed paucarum horarum spatio distillata parte tenuissima coriaccæ jam concreverunt lemæ. Plura similia adduci possent, sed hæc sufficiunt, ut probetur; tenues admodum humores in corpore humano pessimis concrecionibus originem dare posse.

§. 393. **C**AUSA, pars affecta, magnitudo, profunditas, velocitas, natura ægri, symptomata inflammationis, collata cum signis, effectibusque, prognosin absolvunt.

Enarrata jam fuerunt inflammationis præsentis signa & varii exitus. Sequitur jam Prognosis, quæ determinat, quænam mala metuenda sint, quænam bona sperari possent. Ut autem cognoscatur, quo vergat inflammatio, an in benignam resolutionem; an vero in suppurationem, gangrænam, aut scirrhum, debent considerari sequentia.

C A U S A. Sic v. g. contagium variolosum ita mutat sanissimi etiam hominis corpus, ut intra triduum tota externa cutis, imò & sæpe interna œsophagi, ventriculi &c. superficies scateat pustulis inflammatoriis: sed nunquam hic resolutio expectari potest; semper suppuratio; vel in pessima specie vera gangræna sequitur. A contagio vero morbillorum cutis externa inflammatur quidem, nunquam tamen suppuratio sequitur, sed desquamata epidermide solvitur malum. Observaverunt omnes Auctores, qui peste correptos homines tractaverunt, in variis corporis locis oriri inflammationes aliquando tam sævas, ut paucis horis pars inflammata in carbonem exuratur, qui postea, suppuratione in toto ambitu nata, à partibus sanis separatur, & excidit. Apparet ergo, diversissimos esse inflammationis exitus pro varietate causarum, ex quibus oritur.

P A R S A F F E C T A. Prout nempe magis minusve ad vitam & sanitatem necessaria est. In manu v. g. tumor inflammatorius satis magnus etiam facile fertur; sed si circa glottidis rimam inflammatione tumeat membrana has partes investiens, exiguo etiam tumore suffocabitur æger. Si in manu vel pede Phlegmone in gangrænam transeat, separari poterit hic mortuum illud à vivo; sed si in cerebro tale malum contigerit, patet facile, vix ullam spem superesse. Sed non tantum majus minusve discrimen à varietate partis affectæ pender, verum etiam longe diversus inflammationis exitus erit ob eandem causam. In locis glandulosis scirrhî metus est; in illis vero corporis partibus, ubi maxima pinguedinis copia locatur, inflammatio sæpissime in suppurationes & fistulas difficiles transit: uti circa anum &c.

MAGNITUDO. Quo enim majorem locum corporis occupat phlegmone, eo plura vasa sunt obstructa, eo major quantitas immeabilis liquidi in vasis infarctis hæret; simulque tanto major est celeritas circulationis per vasa reliqua libera: uti dictum fuit in Commentariis §. 382. n°. 8. Sed hæc omnia repugnant illis conditionibus, quæ requiruntur ad resolutionem inflammationis (vide §. 386.) unde in tali casu semper suppuratio, vel gangræna expectanda sunt.

PROFUNDITAS. Demonstratum fuit in Commentariis §. 374. omnes fere partes corporis inflammatione posse corripì; nusquam tamen frequentius & tenacius illam nasci, quam in tunica pinguedinosa. Profunda hinc inflammatio vel hærebit in tunica hac, vel in aliis partibus. Si in pinguedine hæreat, quæ inter musculorum interstitia se insinuans satis profunde decurrit, remediorum externe applicatorum efficacia vix eo usque penetrare poterit; & suppuratio, vel gangræna talem inflammationem sequens, difficillime poterit depurari. Si vero tendines, musculos, vasa, membranas, periosteum, ossa ipsa occupaverit inflammatio; patet ob easdem causas curæ difficultas. Quanta autem mala fieri possint, si viscera ipsa inflammata fuerint, dicetur postea, quando de morbis acutis inflammatoriis agetur.

VELOCITAS. Dum liquida immeabilia hærent in vasis obstructis, à vita superfluo pulsum fluidum in hæc loca facit effectus quosdam, qui sunt signa inflammationis, recensita §. 382. si autem hæc incrementum velocissime, si rubor, tumor, calor, dolor &c. augeantur omni momento; facile prævidemus, brevi rumpenda esse tenerrima vascula, & nullo modo expectandam esse resolutionem; sed gangrænam brevi adfuturam. Ideo §. 386. motus humorum sedatus numerabatur inter illa, quæ requirebantur ad resolutionem inflammationis; & contractus humorum motus suppurationem, vel & gangrænam futuram, designabat.

NATURA ÆGRI. Unicuique homini sua privata sanitas est; & licet solidorum & fluidorum dotes omnino variæ videantur in duobus hominibus, tamen sæpe ambo in integra sanitate fruuntur: sic tamen ut unus in hos, alter in alios morbos, magis pronus vivat. Duris laboribus fractus rusticus si pleuritide decumbat, vix emerget. Densissimus enim sanguis & vasa rigida nullam fere spem benignæ resolutionis relinquunt. In laxis autem & debilibus corporibus tales morbi longe facilius curantur. Sed & morbosa temperies inflammatione laborantium varium morbi faciet exitum. Sic mucosi & frigidi homines raro inflammationibus laborant, & tantum fere levissimis: si autem putridus scorbutus humores infecerit, minima inflammatio, vel leve etiam vulnusculum, in difficillimum ulcus, vel & gangrænam, sæpe transit.

SYMPTOMATA &c. De his dictum fuit §. 382. & sequentibus. Ex illis autem omnibus rite consideratis facile prævidetur, quem exitum habitura sit inflammatio; sicque Prognosis absolvitur.

§. 394. **P**ERSPICUUM quoque pro vario statu mali varias esse curaturo indicationes.

Sequitur jam, ut ex omnibus antedictis eliciantur indicationes curatoria, per quas determinatur, quomodo tolli debeat cognitum malum. Nihil autem magis damnosum in arte est, quam morbo cuidam generalem curam adscribere, nulla ratione habita varii ejusdem morbi status. Sic eodem nomine Pleuritidis diverſi

certe vocantur morbi; qui in sua origine similes quamvis fuerint, tamen sæpe in decursu omnino variant, & diversissimam medelam requirunt. Longe enim alia curatio requiritur, dum Pleuritis incipit, quam ubi jam per aliquot dies duravit, & manifesta signa incipientis suppurationis adsunt. Non potest ergo generalis cura inflammationis dari, sed requiritur diversa, prout in hunc illumve exitum tendit. Verum quidem est, resolutionem inflammati in curatione tentandam semper esse, si ullo modo possibilis videatur; tamen, si v. g. gangrænæ indicia jam appareant, sola separatio corrupti per suppurationem in ambitu mortui natam superest, & omnis curatio ad illam promovendam dirigitur: cum omni artis molimine caveatur suppuratio, quamdiu resolutionis spes est; imprimis si interna corporis inflammatio occupaverit. Quatuor ergo illi modi; quibus terminatur inflammatio; seorsim considerandi sunt, & singulorum curatio describenda erit. Primo ergo dicetur de cura inflammationis, quæ resolvendo fit; quando nempe, reducto fluore concreti & motu stagnantis, solvitur inflammatio.

§. 395. **S**I enim aliqua causarum (375. 376. 377. 378. 379.) in parte quacumque (372. 373. 374. 379.) inflammationem (371) produxit, ut adsint symptomata (383. 384.) & conditiones primæ (386) oriuntur; hæ indicationes:

1. Impedire ulteriorem vasculorum læsionem.
2. Eam, quæ jam facta, tollere.
3. Materiæ obstruenti fluiditatem, lenitatemque conciliare, conservare.
4. Vel, si id obtineri non potest, retropulsam in vasa majora agere.

Cum hæc postea tantum usum habebunt in curatione Pleuritis, Peripneumoniæ, Anginæ & similium morborum; hinc singula accurate consideranda erunt.

Exactissime jam determinatur in textu morbi conditio, cujus sanatio mox describetur. A quacumque enim causa nata fuerit inflammatio, quacumque etiam partem corporis, internam vel externam, occupaverit; modo recens fuerit morbus, & adsint illa, quæ §. 386. enumerantur, tentari poterit resolutio: quæ obtinebitur, si fieri possint illa, quæ sequentibus quatuor numeris continentur.

1. Ad inflammationis resolutionem requirebatur concreti obstruentis reductio in fluiditatem, & stagnantis liquidi motus; uti dictum fuit §. 386. Sed, nisi conservetur integritas vasorum, liquida effusa vasis fractis stagnabunt necessario. In omni autem inflammatione tumor à vasis distensis, & dolor à distractione fibrarum rupturæ jam proxima, satis testantur, jam jam rumpenda esse vasa, si eadem causæ pergant agere: sed vasorum continuitate soluta, sequitur suppuratio; vel, si subito hæc fiat, gangræna. Patet ergo, requiri ad resolutionem inflammationis, ut caveatur ulterior vasculorum læsio.

2. Quamdiu adhuc integra sunt vasa inflammata, illorum læsio consistit in nimia dilatatione, distractis lateribus à liquido vitali impulsio in locum obstructum. Si ergo tollatur nimia hæc vasorum extensio, satisfit huic indicationi.

Binæ autem hæ indicationes curatorix solida respiciunt: quæ sequuntur, ad fluida pertinent.

3. Hæret

3. Hæret in vasis obstructis concretum, immeabile fluidum: cumque inflammatio tantum in arteriis locum habere possit (vide §. 371): impetus liquidi à tergo urgentis versus majores angustias semper pellet illud obstruens; requiritur ergo, ut attenuetur eo usque, ut per ultimas angustias vasis obstructi transprimi possit. Non sufficit tamen sola attenuatio concreti liquidi, nisi simul blanda nostrorum humorum indoles conservetur: nata enim putredine, concretus sanguis solvitur quidem, sed simul magnam acquirit acrimoniam. Sed acre sanguini mistum, rapido pulsum motu per tenerrima hæc vascula, nimia distensione prægressa jam debilitata, brevi illa destruet; unde tunc gangræna loco benignæ resolutionis sequeretur: demonstratum enim fuit in Commentariis §. 388. acrimoniam humorum facere, ut inflammatio citissime in gangrænam tendat: Patet ergo, quod concreti solutionem lenitas semper comitari debeat.

4. Aliquando accidit, vasorum initia dilatata crassas adeo moleculas ingredi, ut vix sperari possit, illas eo usque posse attenuari, ut per ultimas illorum angustias libere fluere possint. Sic sanguis ruber in pessimis ophthalmiis ipsa pellucidæ cornæ vascula ingreditur, quæ longe adhuc tenuiora sunt, quam adnatæ vascula; hæc tamen sua angustia omne coloratum fluidum excludunt naturaliter. Licet ergo sanguis ruber hic hærens immeabilis solveretur in serum, illudque iterum in lympham sero tenuitate proximam, tamen non posset per ultimos fines tenuissimorum horum vasorum transire. Unicum tunc superest ut resolutio fieri possit, nempe retropulsus obstruentis moleculæ ex angustis, quibus impacta hæret, versus latiore vasis locum, & inde in majora vasa; ut sic torrente sanguinis abrepta, motu & attritu ad vasa & vicinas moleculas, solvatur.

§. 396. **L**ÆSIO ulterior impeditur.

1. Causas (375. 376. 377. 378. 379.) notas tollendo, corrigendo.

In morbis curandis totum, quod ars facere potest, est, ut restituatur sanitas: sed illæ causæ, numeris hic citatis recensitæ, sunt tales, ut sanissimo etiam corpori applicatæ inflammationem facere possint: frustra ergo sunt omnia molimina, nisi possint tolli causæ; Sic dum à decubitu diuturno inflammatio circa os sacrum & coccygis oritur, si non possit caveri partis hujus compressio à pondere corporis incumbentis, non poterit impediiri inflammationis in gangrænam transitus. Idem in reliquis inflammationis causis verum esse facile patet.

1. Impetum arteriosi sanguinis minuendo, per educationem sanguinis, purgationem alvi.

Bina concurrebant in definitione inflammationis explicata §. 371. sanguinis nempe arteriosi in minimis canalibus stagnatio, cum pressione & attritu a motu sanguinis, per febrim fortius acti in hunc locum obstructum. Sed sanguis immeabilis hærens in his canalibus obstructionem quidem facit, sed nulla cæteroquin inde fieret læsio vasis obstructi, nisi impetus arteriosi sanguinis à tergo urgeret. Præcipuum ergo, quod requiritur, ut læsio ulterior vasorum inflammatorum caveatur,

IIII

erit, sic minuere illum impetum, ut nec rumpi, nec magis distendi vasa possint ab hac causa. Integre tolli non potest arteriosi sanguinis motus per partem vita superstite; poterit tamen tam pacatus reddi, ut non amplius nocere possit. Hoc autem obtinebitur per

EDUCTIONEM SANGUINIS. Dictum fuit §. 381. vitam superstitem, ubi illa stagnatio adest, producere effectus quosdam, qui simul erant signa inflammationis. Horum autem numero & magnitudine mensuratur inflammationis malignitas, & praevidentur varii ejus exitus. Ubi ergo à quacumque causa debilitatur vita, & minus actiosa redditur; minuentur illi effectus necessario, qui à vitali motu humorum in loca obstructa irruentium pendebant. Possumus jam per sanguinis missionem pro lubitu minuere motum sanguinis per vasa ad mortem usque, id est quietem perfectam; ergo & pro vario gradu hujus evacuationis plus minusve reprimere circulationis impetum. *Helmontius*, & post illum alii proscripserunt sanguinis hanc jacturam, tanquam inutilem & damnosam in curatione morborum inflammatoriorum: credebant enim, pleuritidem v. g. nasci, dum acidum hostile intercostalibus locis instar spinæ infixum hæreret (a), hinc clamabant, frustra mitti sanguinem, sed evellendam esse hanc spinam pleuriticam; cruentum Moloch cathedris medicis præsidere; specificis remediis debere debellari hunc morbum; non vero enervandas esse vires per venæ sectionem (b) &c. Sed ex antecedentibus patuit, spinam illam pleuriticam esse sanguinem immeabilem in vasis arteriosis hærentem; liquidum autem, à tergo pultum in loca hæc obstructa, urgere hanc spinam, & distractione fibrarum dolorem illum producere. Verum quidem est, perfectissimam curationem fore, si posset ilico solvi, & in fluorem reduci immeabilis ibi hærens sanguis. Sed an hoc efficere potuit *Helmontius* suis specificis? jactavit quidem hirci resectis testibus manantem cruorem, si exsiccatus tereretur in pollinem; cervi priapum; papaveris sylvestris flores &c. sed si quis legat illa, quæ in fine hujus capituli habet de proprio morbo, patebit tatis, jactata hæc remedia parum profuisse. Cum ergo hætenus nulla fide constet, dari talia remedia, quæ specifica sua vi externe applicata, vel intus assumpta, solvere possent tam subito stagnantem hunc & immeabilem sanguinem; nihil melius potest fieri, quam ut impediatur ulterior hujus obstruentis protrusio in majores adhuc angustias vasorum convergentium; ejusdemque caveatur major compactio & consolidatio: Bina autem hæc obtineri possunt, minuto impetu sanguinis arteriosi: quod satis commode & tuto per venæ sectionem fieri potest, uti etiam per

PURGATIONEM ALVI. Hæc enim post sanguinis missionem remedium dat efficacissimum ad sedandum nimium impetum. In materia Medica ad hunc numerum habentur talia purgantia, quæ sine aucto motu hunc effectum præstant, simulque humores nostros solvunt. *Sydenhamus*, postquam triginta annos praxi Medicæ impenderat, sollicitè naturæ decursum in morbis observans, in schedula monitoria de novæ febris ingressu, quam sub vitæ finem edidit, illam methodum commendat. Agebat de inflammatoria febre, cum subita determinatione materię morbi cerebrum versus. Post venæ sectionem præmissam haustum purgantem ex tamarindis, rheo, senæ foliis, manna &c. dabat, vespere leni paregorico sedabat

(a) *Helmont. in capit. Pleura furens pag. 319. n°. 13.* | (b) *Ibid. pag. 322.*

turbas à purgante hoc, quamvis leni, excitatas. Alternis diebus ad tertiam vicem usque, tali purgante utebatur: hacque methodo feliciter sanabatur morbus, ex sua natura satis periculosus. Monet tamen sollicite, purgantia hæc nocuisse, nisi præmissa fuerat venæ sectio.

Facile autem patet, non in qualibet inflammatione requiri omnia hæc artis molimina; sed tantum in tali casu, quando partis affectæ integritas ad vitam vel sanitatem quam maxime requisita non patitur alios inflammationis exitus; vel etiam, quando in tali corporis loco inflammatio hæret, ut suppuratione facta non posset commode pus educi; unde postea pessima quævis mala expectanda forent.

3. Copiam liquorum minuendo per eadem.

Dictum fuit in Commentariis §. 378. frequentissimam inflammationis causam esse nimiam dilatationem vasorum lymphaticorum arteriosorum, per quam admittunt crassiores sanguinis partes, quam ut per ultimos illorum fines possint transire. In Commentariis vero §. 106. lit. d. & §. 118. demonstratum fuit, Plethoram esse inter illas causas, per quas vasorum initia dilatantur. Cum ergo venæ sectio, & purgatio alvi, copiam liquorum minuant, proderunt & hoc respectu. Præterea, diminuta liquidorum copia, minor fit pressio & compactio elementorum sanguinis ad se mutuo, à qua pressione inflammatoria sanguinis densitas sæpissime oritur. Si enim sanguis, corde pulsus, in vacuas arterias rueret, nulla foret resistencia; adeoque nulla fieret compressio: ubi autem cor sanguinem exprimit in arterias plenas, debent vel arteriæ dilatari, vel sanguis, harum cavo contentus, comprimi. Quo autem magis repletæ sunt arteriæ, eo magis resistunt suæ dilatationi; adeoque debet fieri sanguinis condensatio. Merito igitur ob hanc causam §. 106. lit. d. inter plethoræ effectus inflammatio numerabatur; adeoque imminutio copię liquidi, per vasa fluentis, sic disponet corpus, ut à diathesi inflammatoria quam maxime alienum sit; potiusque in oppositum malum vergat, hydropem nempe, qui validas liquidorum evacuationes solet sequi.

4. Revellendo impetum sanguinis in partes alias, suctu, frictu, epispasticis, vesicantibus, fomentis, balneis, fonticulis, setaceis, forti alvi subductione.

Hoc artificio sapiens antiquitas usa fuit semper, uti ex Veterum monumentis apparet. Hippocrates (a) de angina agens dicit: *Sic affectis à venis, qua in brachiis sunt, sanguis detrahendus est; simulque alvus subducenda; ut, quod morbum exhibet, id avellatur &c.* Sic & Galenus de capitis dolore curando agens laudat revulsionem (b) in totum corpus acerbis clysmatibus, & vinculis, ac multis infernarum partium frictionibus; sanguinis etiam nonnihil, si ita necessitas urgeat, detrahendo. Parti autem medemur, interim dum in totum corpus revellimus, ea capiti inf-

(a) De Locis in Homine cap. 11. Charter. Tom. VII. pag. 370. | con. Lib. I. cap. 16. Charter. Tom. X. pag. 364.

(b) Galen. de Method. Medend. ad Glau-

pergentes, quæ repellendi vim obtinent &c. Plura similia loca apud eosdem auctores occurrunt, quibus constat, quod in plurimis morbis magnam spem curæ in revulsionibus his posuerint. *Heimontius*, in Veteres Medicos ubique fere debacchatus, risit has revulsionum nugas: & post *Harvæum* plurimi spreverunt hæc auxilia, tanquam penitus inutilia, & sanguinis circulationi cognitæ repugnantia. Ratione tamen & experimentis confirmatur revulsionum in morbis utilitas: simulac enim minuitur, vel tollitur integre, resistantia sanguini per vasa propulso in quodam corporis loco, ilico majori velocitate huc ruit & derivatur. Dismissa sic mediocris etiam magnitudinis arteria, omnis sanguis per hunc locum, jam non resistantem, effluit. Dum excusso fœtu liberantur abdominalia vasa & viscera tanta pressione, nisi circumducta fascia pendulæ & flaccidæ fulciantur partes, sæpe tanto cum impetu versus hæc loca derivatur omnis sanguis, ut deficiat debita pressio in cerebri & cerebelli vasis, & lethali syncope percat puerpera. Idem fit in asciticis, dum subito paracentesi instituta omnis aqua educitur, nisi stringatur abdomen. Patet ergo, minuta resistantia in quodam corporis loco, sanguinem majori impetu & copia eo versus derivari. Sanguini autem corde propulso per vasa resistunt illorum plenitudo; & laterum firmitas; quæ renituntur suæ dilatationi. Omnia ergo, quæ vasa partis cujusdam corporis deplent, vel efficiunt, ut illorum latera facilius cedere possint distendenti sanguini, derivant impetum & copiam humorum in hanc partem. Si jam v. g. consideretur, sanguinem, corde pulsum, partim versus caput & superiora trunci corporis, partim versus inferiora distribui; patebit, depletis vasis inferioribus, vel minuta horum resistantia, impetum & copiam sanguinis huc versus derivari, & averti à superioribus. Possibilis ergo est revulsio impetus sanguinis arteriosi à loco inflammato ad alium quemvis; imprimis si ille locus, versus quem revulsio fit, ab iisdem truncis majoribus arteriosis sanguinem suum accipiat. Sic in morbis inflammatoriis encephali exteriorem partem capitis fovant Medici, ut, per carotidis externæ ramos aucto impetu sanguinis, minor pressio urgeat capitis interiora. Dum fracti ossis callus luxuriabat, dixit *Celsus* (vide comment. §. 357.), quod conferat aliquid de sinapi cum sicu in alterum pariter membrum imposuim, donec id paululum erodat, eoque evoces materiam. Omnia autem revellentia vel laxant vasa, vel illa evacuant, frictione, aut stimulantibus excitata frequentiori vasorum contractione in parte, versus quam revulsio fieri debet. Revulsio autem imprimis fit sequentibus:

S U C T U. Quod omnium optime per cucurbitulas fit; per quas in illo loco, cui applicantur, tollitur atmosphæræ pressio, vel saltem insigniter minuitur; educto aëre par antliam, aut suctionem; aut admodum rarefacto per linum accensum cucurbitulæ cavo contentum. Simulac jam in hoc loco minuitur æquabilis pressio aeris in corporis superficiem, vasa omnia plus distenduntur; tumet, & rubescit pars; &, si diu maneant applicatæ cucurbitulæ, vera inflammatio, imo & gangræna, nasci poterunt. Incantamenti instar dolores sedari, revulsione facta per cucurbitulas applicatas, jam notaverat *Galenus* (a). Ad menstrua cohibenda cucurbitulam quam maximam mammis apponi jussit *Hippocrates* (b). Difficillimas ophthalmias, vix ullis remediis cedentes, solis cucurbitulis nuchæ apposis

(a) Method. Med. Lib. XII. cap. ultimo, Charter. Tom. X. pag. 292.

(b) Sect. V. Aphor. 50. Charter. Tom. IX. pag. 224.

sanatas fuisse, vidi sæpius. Quanto in usu apud Ægyptios in similibus morbis fuerint videri potest apud *Prosperum alpinum* (a).

FRICTU. Venæ imprimis, utpote facilius comprimendæ, deplentur frictione; hinc arteriæ, his venis respondentes, facilius se in venas depletas evacuant: minuitur ergo resistantia sanguini in has arterias fluxuro; adeoque majori impetu & copia huc derivatur: uti patet ex modo dictis. Ob hanc causam potest pars quæcunque corporis sola frictione calere, rubere & inflammari: & si continuetur frictio, calor & motus augmentum toti corpori communicantur. Hinc in acutis morbis longam frictionem damnavit *Celsus* (b). *Longa vero frictione uti, neque in acutis morbis, neque incrementibus convenit; præterquam cum phreneticis somnus ea quaritur.* Et paulo post frictionum usum ad revulsionem faciendam memorat, dicens: *Nam & capitis longos dolores ipsius frictio levat; non in impetu tamen doloris: & membrum aliquod resolutum ipsius frictione confirmatur. Longe tamen sapius aliud perfricandum est, cum aliud dolet: maximeque cum à summis, aut à mediis partibus corporis materiam evocare volumus: ideoque extremas partes perfricamus.*

EPISPASTICIS. Sic dicuntur hæc remedia ab attrahendo; quia versus partem, cui applicantur, copiam & impetum humorum deducunt. Licet jam omnia quæ vasa in parte quadam corporis laxant & debilitant, attrahentia dici possint, quia vasis laxatis facilior humorum datur ingressus; tamen plerumque hoc nomine solent vocari talia, quæ acri stimulo vasa partis, cui applicantur, irritant in frequentiores & fortiores contractiones, id est, humorum vitalium per vasa motum accelerant. Varia jam hæc attrahentia acceperunt nomina, pro majori vel minori eorundem acrimonia. Quæ levem tantum ruborem excitabant in parte, cui applicantur, phænigmi dicebantur; si major rubor, calor, pruritus, & tumor sequerentur, solebant vocari sinapismi; quia tritis seminibus sinapi parti cuidam corporis applicatis omnia hæc phænomena sequuntur: si acriora adhuc epidermidem in vesicas attollerent, vesicatoria, vel vesicantia, dicebantur; si ignea vi urerent partes, caustica appellabantur. Omnia hæc veram inflammationem excitant in locis, quibus applicantur, illamque augere possunt, si acerrima fuerint, in gangrænam usque. Quantam autem hæc omnia efficaciam habeant ad revellendum impetum sanguinis versus alias partes, quotidiana docent observata practica. Si acuta phrenitide laborantis pedes involvantur pasta panis cum seminibus sinapi tritis, rasura raphani rusticani, aut similibus; sæpe intra paucas horas, dolore & inflammatione hic ortis, levatur morbus, & resipiscere incipit æger. Quando natura molitur ex universali humorum massa secernere nocitura, & deponere ad quædam corporis loca, solent Medici, epispasticis applicatis, vagam hætenus materiam determinare versus tales partes, ubi minime nocebit: & sæpe pulcherrimo cum successu. Sic in variolis, dum à primo morbi insultu crura & pedes fovebantur molliissimis decoctis, & applicabantur hæc epispastica pedum plantis; sæpius vidi, densissimo agmine variolas inferiora corporis occupasse; in facie autem, & artubus superioribus, paucissimas tantum erupisse: Ex quibus satis patet attrahentium utilitas.

VESICANTIBUS. Hæc, uti modo dictum est, sunt fortiora adhuc epis-

(a) De Medicina Ægypt. Lib. II. cap. 14. | (b) Lib. II. cap. 14. pag. 89.

pasticis; & parti corporis, cute testâ, applicata solvunt epidermidem, illamque attollunt in vesiculas, liquido distentas, & inde nomen habent. Omnia jam, quæ validissimam inflammationem excitare valent, sunt etiam vesicantia: dum enim inflammatio in gangrænam transit, bullulæ illæ Epidermidis primum fere nascentis gangrænae signum dant: sic & ignis vivus Epidermidem in vesicas attollit. Accerrima hinc omnia remedia, ut ranunculi pratenses, hydropiper, sedum minus acre &c. si vel majori copia, vel diutius, applicata maneant corporis parti cuidam, vesicas excitant. Omnium tamen maxime in usu sunt cantharides: quæ insecta arida & exsucca, per triginta annos & ultra in officina servata in vase vitreo, satis etiam negligentet clauso, tamen vim suam retinuisse novi. Tritæ cantharides, sed rudius, emplastro tenaci miscentur, vel & pastæ panis; & parti, versus quam revulsio debet fieri, applicantur per octo vel decem horas; intra quod tempus solent vesicæ elevatæ apparere. Si enim nimis diu reliquantur cantharides, irritando pulpam illam nervosam, epidermidi subjectam, sæpe intolerabiles dolores excitant; imo & aliquando molestissimam stranguriam faciunt, & mictum cruentum.

Cum autem omnia hæc insignem acrimoniam habeant, & irritando partem, cui applicantur sæpe motum sanguinis in toto corpore augeant (quod tamen repugnat indicationi in hoc casu, uti patuit numero 2. hujus paragraphi) ideo in illorum usu majori cautela semper opus erit.

FOMENTIS BALNEIS. Hæc ex aqua, additis simul talibus, in quibus vis emolliens & laxans adest, fieri solent. Quæ autem omnia tantum agunt, quatenus, laxatis solidis, minuunt resistantiam laterum vasorum; unde facilius dilatantur, quamvis maneant eadem causæ vasa distendentes. Omnium efficacissima sunt balnea vaporis: solius enim aquæ tepidæ halitui exposita pars corporis per quadrantem horæ incipiet tumere. Ubi autem revulsio fieri debet versus tales corporis partes, quæ commode balneo immergi nequeunt; tunc fomenta balneorum vicem pulchre suppleant; modo calida retineantur.

FONTICULIS. Discinditur cutis ad panniculum adiposum usque; vel & in illis, qui inani metu ferrum repudiant, cauterio potentiâ eroditur. Vulneri sic factò imponitur globulus ex auro, argento, ebore, vel alia quacumque materia non facile mutabili, emplastroque tenaci sic firmatur, ut loco moveri nequeat. Sic heterogeneo corpore interposito inter vulneris facti labia impeditur horum concretio; levis contusio fit in toto ambitu vulneris à duro hoc corpore appresso; inde inflammatio quodidiana & levis irritatio in parte, versus quam impetus arteriosi sanguinis derivari debet. Profunt imprimis fonticuli talibus agris, qui adeo flexiles habent solidas partes, ut minimo excessu impetus facillime dilatentur vasa, & errore loci crassiores fluidorum partes admittant. Sic v. g. illis, qui levissima de causa ophthalmia laborant, toties profuit fonticulus. Ubi autem valida inflammatio partem quandam subito occupat, patet facile, fonticulorum usum inutilem esse; nam poterit pars affecta diu corrupta esse per gangrænam, antequam fonticuli aliqua efficacia posset expectari. Idem verum est de

SETACEIS. Plerumque nuchæ solent imponi. Tenaculo arreptam cutim una cum panniculo adiposo elevat Chirurgus; dein crassa acu, ad hanc operationem parata, pertundit, filumque crassius in vulnere facta relinquit; quod quotidie trahitur per vulnus: unde irritatio, & inflammatio continua loci, in quo setaceum hæret. Similes usus habent ac fonticuli; sed plerumque majorem do-

lorem & irritationem faciunt. Pertinacissimos capitis dolores, nullis aliis remediis cedentes, revulsione facta per setaceum curatos vidi; & plurima apud optimos auctores habentur Exempla, quibus hoc confirmatur. Mirum talem casum habet *Ruyschius* (a). Puella octodecim annorum, sanguineæ temperei, capitis dolore assiduo & interolabili torquebatur. Incassum adhibita fuerant efficacissima in similibus casibus remedia, purgantia, venæ sectio repetita, vesicatoria, sternuratoria, cucurbitulæ. Imo cruciali incisione integumentorum capitis, quam larga sequebatur Hæmorrhagia, frustra adhibita, cogitabant celebres in arte viri de cranil terebratione instituenda. Antequam tamen ad ultimum hoc & crudele remedium pergeretur, proposuit *Ruyschius* setacei applicationem; quo facto, statim dolor evanuit; cumque postea ægra, molestiarum pertæsa, filum auferret, sopitus hætenus recruduit dolor; nova setaceo applicato, statim cessans. Sed tertia vice setaceo ablato, molestissima cephalalgia rediit, cedens tamen statim, dum novum applicaretur.

FORTI ALVI SUBDUCTIONE. Quantum prodesset in morbis inflammationis imperum & copiam humorum minuere alvum ducendo, & quænam purgantia tunc convenirent, dictum fuit num. 1. hujus paragraphi. Notandum autem, eadem etiam prodesse ad revellendum imperum à parte inflammata; imprimis si in superioribus corporis partibus hæserit malum. Tanta enim potest derivatio fieri per vasa mesenterica versus intestinorum cavum, ut nulla fere supersit sanguinis pressio in vasis encephali: unde fortiora purgantia toties vertigines, imo & animi deliquia, sequuntur. In ophthalmiis, dum tota adnata rubet, sanguine crasso minora vasa ingressa; dato fortiori purgante, dum pallor faciem & oculos occupat, retropulso sanguine in majora vasa, sæpe tam felix & subita curatio fit. Clysmata frequenter injecta hunc effectum pariter faciunt; partim laxando; partim leni stimulo derivando humorum imperum versus hæc loca. *Hippocrates* (b) de curatione doloris aurium agens, postquam cucurbitularum applicationem in parte averfa jusserat ad avertendam fluxionem; dicit quod, si hac nihil juvent, medicamentum propinandum sit, quod deorsum purget; sursum vero minime, cum vomitus nihil conferat &c. Et paulo post de ophthalmiis agens addit: si subitissime (oculi) inflammationem conceperint, nihil omnino illine; sed vel fortissime in inferioribus partibus inurito; vel alio quopiam alvum ducente medicamento extenuato; cavendo ne vomitum facias. Ex quibus patet, Veteres Medicos purgantia adhibuisse, ad revulsionem faciendam à locis inflammatis, & quidem talia, quæ satis fortiter agerent, utitur enim in hoc loco *Hippocrates* vocabulo ἀνοσχίμους, quod extenuationem corporis, & vasorum collapsum per validam evacuationem, significat. Vomitus autem sollicite vitari jussit ideo in his casibus, quia sanguinis copia & impetus versus caput augentur, dum vomitus fit: uti facile patet, si vomentem hominem quis aspiciat: oculi enim rubent, lacrymantur, labia & tota facies distenduntur, & sanguine turgent.

5. Aëre subfrigido, sicco; affectibus animi nullis, vel sedatis; quiete naturali, vel artificiali; victu tenui, liquido, antiphlogistico; potu simili; medicamentis diluentibus & refrigerantibus simul.

(a) Observat. Chirurg. &c. XL. pag. 39.

(b) De locis in homine cap. 6. Charter. Tom. VII. pag. 364.

Agitur hoc numero de illis, per quæ motus humorum per vasa sedatissimus fieri possit, ut impediatur ulterior latio vasorum inflammatorum.

ÆRE SUBFRIGIDO, SICCO. Quatenus nempe pulmonibus recipitur inter respirandum. Sanguinem enim ex corde dextro per arteriæ pulmonalis angustias pulsus quam celerrime ab hoc attritu calefcere, & refrigerio aeris indigere, ex Physiologicis constat. Si autem aer externus incaluerit nimis, non poterit hoc refrigerium inde expectari. Constitit autem pulcherrimis experimentis in vivis animalibus captis, solo hujus refrigerii defectu acutissimam febrem nasci, paucis etiam horæ minutis lethalem, dum in aere calidissimo versarentur hæc animalia (a). Patet ergo, ærem subfrigidum multum conferre ad pacatam sanguinis circulationem. Siccus autem aer humido semper præfertur cæteris paribus; & humidus aer, si frigidus simul sit, nimio posset peccare refrigerio. Observatur enim semper, homines autumnæ & hyemæ ad sensum majus frigus percipere, si humidus aer fuerit, quam si siccus; licet tamen Thermometra eundem gradum caloris notent: quod videtur fieri, quia aer corpus nostrum ambiens citius calefcit à calore corporis, si nullam aquam habeat, vel saltem minimam copiam: *quo enim densiora corpora, sive fluida, sive solida fuerint, eo pluri tempore egent, ut ab eodem igne aequaliter incalascant* (b).

AFFECTIBUS ANIMI VEL NULLIS, VEL SEDATIS. Posse motum circulatorium sanguinis accelerari admodum per validos animi affectus, constat quotidianis & certissimis observatis. De hac re dictum fuit etiam §. 99. n°. 1. Unde patet sedulo hos vitandos esse. Si vero nati fuerint, sopiendi ilico. Quomodo autem hoc fieri possit, dictum fuit in Commentariis §. 104.

QUIETE NATURALI, VEL ARTIFICIALI. Quantum possit quies in omni morbo, in quo nimia circulationis velocitas adest, vel futura metuitur, dictum fuit in Commentariis §. 105. Dum autem nullis animi affectibus turbatur mens, nihilque valide agit in sensuum organa, solet sponte subrepere pacatissimus somnus. Unde in morbis omnibus acutis inflammatoriis tenebrioso in loco decumbere faciebant ægros Veteres Medici, ab omni strepitu remotos. Si vero per hæc quies nondum possit conciliari, tunc præmissis illis, quæ præcedentibus numeris dicta sunt, anodynorum usus satis tutus erit. Videantur de his illa, quæ dicta sunt in Commentariis §. 202. & 229. n°. 2.

VICTU TENUI, LIQUIDO, ANTIPHLOGISTICO. Ut restituantur illa, quæ inevitabili vitæ & sanitatis effectu quotidie pereunt de corpore, requiruntur alimenta; quæ, licet optima fuerint, semper tamen alienam in solem habent, & per viscerum & vasorum actionem debent mutari in naturam nostram. Dum autem hæc permutatio & subactio ingesti alimenti fit, si illud vel nimis copiosum fuerit, vel non facile permutabile, oritur etiam in sanis & robustis corporibus febricula; per quam vel subigitur, vel expellitur illud, quod turbas has excitat. Imo quotidie fere aliquot post prandium horis quivis etiam sanus in se ipso augmentum celeritatis in pulsu observat. Quo autem debiliores fuerint vires illæ permutantes cruda ingesta in bonum sanguinem, eo major acceleratio motus circulatorii ab assumptis alimentis. Si debilis puella fumo induratas carnes, pingue lardum, vel similes difficilis digestionis cibos sumserit in prandio, febricitabit

(a) H. Boerhaave Chem. Tom. I. pag. 275. | (b) Ibid. pag. 275.
&c.

certo post aliquot horas. Phthisici, quos sensim hectica febris depascitur, etiam à lactis usu copiosiore augmentum suæ febris percipiunt. Cum autem ingestorum assimilatio in naturam liquidi vitalis sani pendeat imprimis ab actione solidorum in liquida, & magna copia humorum jam coctorum, cui sensim pauculum crudi chyli miscetur (vide Commentaria in §. 25.); & per sanguinis missionem & alvi ductionem, numero 2. & 3. hujus paragraphi præscriptas ad curam inflammationis per resolutionem, subducantur humores cocti, & minuatur circulationis impetus; patet evidenter, in victu non posse usurpari nisi talia, quæ facillime subiguntur. Omnia ergo, quæ levissima etiam actione viscerum chylopoieticorum in bonum chylum possunt mutari, & deinde pulmonis & arteriarum imprimis efficacia facillime ulterius perfici in sanguinem, huc conveniunt. Lactis hinc serum, imprimis acidulum illud, quod ex lacte ebutyrato paratur; lac duplo vel triplo aquæ dilutum pitisanæ hordeaceæ, avenaceæ &c. fructuum horarum recentes succi tanti in his casibus usus sunt; imprimis si parca copia simul, & repetitis sæpe vicibus ingerantur. Talis enim victus nunquam gravabit corpus, simulque gratum refrigerium illi inducet; quod in morbis acutis inflammatoriis adeo prodest. Spontaneo hinc appetitu, æstivis caloribus summis, sani etiam homines, & in morbis calidis agri, tenues liquidos refrigerantes cibos appetunt, à contrariis vero abhorrent: & contra hyemali sub frigore, & in morbis languidis frigidis oppositus victus prodest. Paucis verbis, ut solet, hæc expressit Hippocrates dicens: *Imbecilles diæta frigida, valentes vero calida* (a).

P O T U S I M I L I. Succus citri, vel aurantiorum, cerasorum, ribesiorum, vel illorum syrupi aut sapæ inspissatæ, quæ in officinis prostant, magna copia aquæ diluta, gratissimum potum exhibent, cumque ingens horum varietas esse possit, & omne tenue liquidum ad hunc usum conveniat, poterit facile ex his seligi tale, quod agro placeat.

M E D I C A M E N T I S D I L U E N T I B U S E T R E F R I G E R A N T I B U S S I M U L. Hæret sanguis arteriosus immeabilis in canalibus minimis, & impetu à tergo urgentis liquidi premitur & atteritur; uti patuit ex definitione inflammationis data §. 371. & demonstratum fuit §. 382. n°. 6. calorem intensum sequi hunc attritum. Ut ergo ulterior læsio vasorum inflammatorum impediatur, convenient tala remedia, quæ & diluendo concretum obstructionem solvere possunt, & nimium calorem natum tollere. Diluens tantum unicum proprie loquendo habetur in hoc casu, aqua nempe; & reliqua omnia medicamenta tantum diluunt ratione aquæ, quam continent: sed statim dictum fuit, liquidos cibos & tenues potus hic convenire, id est, aquosos; unde & una cum medicamentis conspirabunt; ut dilutio fiat. Refrigerantia autem medicamenta sunt talia, quæ nimii caloris causas tollunt, vel minuunt. Sed in Commentariis §. 382. n°. 6. & 8. demonstratum fuit; calorem nimium, inflammationis comitem, nasci ab aucta circulatione & attritu valido solidorum in liquida, & liquidorum in solida in vasis inflammatis; uti & in vicinis adhuc perviis, sed à tumore obstructorum accumbentium angustatis. Ergo refrigerantia remedia erunt omnia illa, quæ densitatem nimiam fluidi tollere possunt, vasa infarcta laxare, & nimium impetum circulationis minuere. Omnia ergo aquosa non tantum proderunt diluendo, sed etiam simul sunt refrigerantia. Observatur enim, eo frigidiores esse corporis temperiem, quo major aquæ

(a) Epidem. Lib. VI. textu 18. Charter. Tom. IX. pag. 494.

copia in corpore adest; & contra, eo majorem adesse calorem, quo minus dilutus sanguis est: hinc hydropicis omnia frigent, robustis vero & exercitatis hominibus calor magnus adest. Simul autem aqua prodest, quatenus solidas partes corporis laxat: uti dictum fuit in Commentariis §. 35. & 54. Sed sanguine per aquosa diluto, & laxatis vasis, semper minuitur circulationis impetus; uti patet evidentissime in debilibus puellis, quæ aquosorum potuum tepidorum abusu in tantos languores incidunt. Ubi ergo spes est, inflammationem resolvi posse; basis omnium medicamentorum antiphlogisticorum est aqua: cui adduntur mollissima farinosa, ut magis laxentur vasa; & solventissima remedia, ut concretum inflammatorium attenuetur, & meabile reddatur. Variæ jam poterunt esse talium remediorum formulæ: quarum specimina quædam in Materia Medica ad hunc numerum habentur. Notandum etiam est, sanguinis missionem, & purgationem alvi, de quibus numeris 2. & 3. hujus paragraphi dictum fuit, in morbis inflammatoriis refrigerium facere.

6. Sedando impetum in ipso loco, applicatis refrigerantibus, repellentibus, adstringentibus externe, admistis anodynis, tum aperientibus, varia, pro re nata, mistura.

Hactenus dictum fuit de illis auxiliis, quæ mutando alias partes, vel & totum corpus, ulteriorem vasorum lationem impediabant: nunc agendum de illis, quæ ipsi loco inflammato externo applicata nimium impetum humorum sedare valent. In Commentariis §. 382. n°. 8. dictum fuit, à fibrarum irritatione in loco inflammato accelerari motum humorum, & in parte affecta, & in toto corpore. Omne ergo, quod applicatum parti inflammatae poterit tollere hanc irritationem, sedabit impetum. Sed hæc irritatio fiebat inde, quia sanguisurgens vasa obstructa distrahebat illorum latera: omne ergo, quod obstructionem natam solvere poterit, & liberam viam sanguini expedire per vasa aperta, tollet hanc irritationem. Duplici autem modo hoc fieri poterit, vel laxando sic vasa obstructa, ut transmittant per ultimos suos fines in venas immeabiles moleculas; vel sic constringendo vasa per refrigerantia, repellentia, aut adstringentia, ut retropellatur obstruens immeabile ex angustis, quibus hæret, versus latiore locum vasis. Posterior hæc methodus in cura inflammationis apud Veteres Medicos usitata fuit satis frequenter, quando à nulla causa evidente prægressa subito inflammabatur pars quædam corporis; tuncque à fluxione deducebant mali originem: *Galenus* de hac re agens (4) monet, quosdam, Methodicorum sectæ addictos Medicos dixisse, inflammationes omnes laxantibus indigere, quia adstrictas affectiones esse credebant (notum enim est, hanc sectam Medicorum à stricto & laxo morborum causas deduxisse) & postea plurimos temere hanc opinionem secutos fuisse. Paulo post autem subjungit, quod & ratio & experientia suadeant, post debitas evacuationes, partem inflammatam perfundendam & illiniendam esse talibus remediis, quæ influentis humoris repellendi vim habeant; simulque vacuarent illum, qui jam in affecto loco continetur; tonumque & robur affectis partibus redderent. Laudavit au-

(4) Method. Medend. ad Glaucon. Lib. 2. cap. 2. Charter. Tom. X. pag. 370.

tem ad hos effectus præstandos, Sempervivum, Malicorium, Rhus &c. in quibus vis refrigerans & adstringens satis manifesta adest. Et in sequenti capite ejusdem libri dicit, quod inflammationes ab aliis causis, non autem subita tali fluxione, natas, humectare & calefacere nihil veret.

Ex modo dictis ergo, uti & ex illis, quæ habentur in Commentariis §. 390. ubi agebatur de effectû frigidorum actu vel potentia applicatorum loco inflammato, patet, aliquando, sed non semper, prodesse refrigerantium, repellentium, & adstringentium usum; & requiri cautelam in horum applicatione, cum magnopere lædere possint, si non profuerint. In levioribus inflammationibus pulcherrime sæpe profunt, si in principio adhibeantur; sic ophthalmias incipientes sola aqua frigida applicata toties curatas vidi. Ubi autem vetustior jam morbus est, inflammatorium illud obstruens vasis quasi incuneatum (uti Galenus optime dixerat in loco citato §. 390) non patietur se retropelli facile: unde angustatis per hæc vasis, & fluidis coagulatis, augebitur malum. In hoc casu ergo laxantia & aperientia, quæ vasa expediunt, & materiam obstruentem solvunt, conducent. Prudentis ergo Medici est pro re nata varia seligere remedia.

Utiliter etiam his videntur admisceri posse anodyna, sive dolorem sedantia medicamenta. Dictum fuit in Commentariis §. 202. illa remedia, quæ dolorem sedant, agere triplici modo: vel enim tollunt doloris causam; vel partem corporis, cui causa dolorifica applicatur, sic disponunt, ut minus afficiatur ab hac causa; vel denique manente causa doloris, nullaue mutatione inducta parti affectæ, tollunt doloris sensum. Omnia ergo modo memorata erunt anodyna, quatenus aperiendo canales obstruotos & laxando, aut repellendo immeabilem materiam ex angustis versus loca latiora, tollunt doloris causas; aut partem affectam sic disponunt, ut minus afficiatur ab iisdem causis. Sed præter hæc possunt & adhiberi illa, quæ doloris sensum sopiunt in parte, cui applicantur; modo simul non negligentur illa auxilia, quæ doloris causas tollere vel emendare valent. Solani hinc, hyoscyami, cynoglossæ & similibus folia, fomentis, locis inflammatis applicandis, addere licet: nam doloris validi effectus (uti dictum fuit §. 226) sunt febris, calor, sitis, siccitas &c. quæ omnia nocent partibus inflammatis: cumque plurima ex his malis à doloris sensu oriantur (vide §. 229. 2.), patet facile, multum boni expectandum esse ab illis remediis, quæ doloris sensum obtundunt.

§. 397. **L**ÆSIO facta tollitur usu eorundem (§. 396.): nam distractione nimia laxata, propria fibræ vis priscam formam restituet, & nutritio vires reddet.

Læsiō facta erat distentio vasis obstruati à pressione liquidi vitalis urgentis locum obstruatum. Cum ergo omnia, præcedenti paragrapho recensita, impetum sanguinis vel minuant, vel avertant; patet facile, læsionem factam per eadem remedia tolli. Quamdiu enim resolutionis spes superest, nondum soluta est vasorum cohesio, licet valide distracta fuerint. Unde, simul ac obstructio resoluta fuit, sensim proprio robore redeunt in priorem dimensionem distractæ fibræ: totum enim malum, quod tunc superest, est debilitas fibræ à nimia distractione

K k k k ij

facta (vide §. 25. n°. 3.), quæ curatur, si causæ distrahentes tollantur (vide §. 28. n°. 5.) & idoneis alimentis, per vim vasorum & viscerum mutatis, restituantur illa, quæ perierant. Quo jam firmitiora & magis elastica fuerint vasa, quæ per inflammationem distenta fuerunt, eo citius redeunt in præscam formam; & contra, quo tenerioribus in vasis hæserit inflammatio, eo longius tempus requiritur, antequam his redeat debitum robur. An forte inde ratio deduci potest quorundam phænomenorum, quæ post morbos inflammatorios encephali, resolutione sanatos; sæpe diu supersunt? Accidit enim aliquando post phrenitidem, aut deliria in febribus acutis, variolis &c. satis valida, sanatis his morbis, superesse ingentem debilitatem, vel & perturbationem omnium vel quarundam tantum functionum, quæ ab encephalo pendent. Si tunc vesicatoriis, catharticis, sudoriferis, & similibus evacuantibus, aut valide moventibus, tentetur cura, omnia in pejus ruunt: sensim tempori & naturæ commissa hæc mala evanescent. *Sydenhamus*, qui in rimanda rectissimorum etiam morborum indole adeo sagax erat, suo hanc rem confirmat suffragio (a). Observaverat enim in febre continua Epidemica, quæ citissime caput petens phrenitidem facere solebat, post evacuationes generales, per Venæ sectionem & cathartica factas, coma aliquando supervisse; quod tamen post multos dies sensim evanescebat, modo quotidie lecto surgeret æger, neque validis remediis vexaretur. Videtur enim in similibus casibus æquabilis humorum per vasa encephali motus utcumque turbatus manere, donec ridierit vasculis, nimia distensione debilitatis, præstinum robur.

§. 398. **M**A T E R I Æ obstruenti conciliatur fluiditas, si illa attenuatur, si diluitur:

1. Vasis oscillationes elasticas restituendo per imminutionem distendentis liquidi, misso sanguine, purgatione multa; per stimulum additum fibræ ope liquidi tenuis, aromatici, calide epoti; fomentis, frictionibus, cucurbitis, scarificationibus.

Tertium requisitum ad curam inflammationis, quæ resolvendo fit, erat, ut materiæ obstruenti fluiditas & lenitas concilietur & conservetur (vide §. 395). Unde jam ordine tractandum est, de methodo & auxiliis, quibus hoc obtineri poterit: ac primo quidem de illis, per quæ fluiditas conciliatur tali materiæ immeabili, ut per vasorum fines angustissimos sine impedimento transire possit. Duplici aurem modo imprimis videtur hoc fieri posse; vel diluendo, quando nempe aqua admistione & interpositione suarum partium separat adunatas sanguinis moleculas; vel attenuando per attritum vasorum & frictiones, aut & talia remedia, quæ particularum suarum figura & rigiditate dividere possent illa, quæ concreverant. Possunt deinde diluentia & attenuantia sic combinari, ut conspirantibus viribus majores effectus faciant.

1. Sanguis noster sponte sua in concretionem tendit, si quiescat; & quidem eo magis, quo fortior homo est: jugis ergo motus requiritur & mutatio situs in sanguinis particulis, ut impediatur à concretionem: & per eundem hunc motum

(a) *Schedula Monit. de novæ febris ingressu pag. 661.*

iterum solvitur illud, quod jam inceperat concrefcere. Dum homo in animi deliquium cadit, stagnat in magis venolis receptaculis circa cor sanguis; & imprimis magna copia inter cor dextrum & pulmonem in finu venoso & auricula colligitur, & incipit statim ad concretionem disponi. Si aqua frigidissima, corpori aspersa, homo talis incipiat reviviscere, mox valida nascitur cordis palpitatio; lentescens jam sanguis, & in polyposos quasi flocculos mutari incipiens, in pulmonalis arteriæ angustias hæret; contracta arteria pulmonali hi flocculi retroprimuntur; sicque eunt & redeunt, donec tandem repetito hoc attritu ad vasorum latera solvantur; tuncque omnis anxietas cessat, & libera iterum patet sanguini, corde dextro expulso, per pulmonalis arteriæ angustias via. Idem effectus expectari poterit, si vasis inflammatis restituantur oscillationes elasticæ, quibus antea movebantur. Si enim considerantur illæ causæ, per quas in sanitate vasa nostra moventur; patebit, in vase inflammato debere deficere motum illum oscillatorium, per quem nunc distenduntur, nunc contrahuntur iterum. Dum enim cor contrahitur, omnem sanguinem cavis suis contentum expellit in arterias plenas; quæ ergo, cum flexiles sint, dilatantur, momento post, dum cor est in Diastole, arteriæ propria elasticitate & actione fibrarum suarum muscularium contrahuntur iterum; unde sanguis harum cavis contentus propellitur; cumque valvulæ aortæ impediunt, quo minus sanguis versus cor retroprimi posset, hac vi sanguis ex arteriis derivatur in venas. Si jam concipiatur, obstaculum hære in arteriæ cavo, quod liberum sanguinis transitum impediat, sanguis vi cordis impulsus, dilatare poterit talem arteriam; sed non poterit momento sequenti contrahi arteria dilatata, quia sanguis ejus cavo contentus per obstructum finem transire nequit, & retrogressum impedit à tergo urgens impetus vitalis liquidi. Manebit ergo talis arteria distenta & plena, sed immota; cum ejus elasticitas & vis muscularis non possint superare resistentias. Quomodo jam poterit restitui oscillatio in hac arteria? Sola imminutione liquidi distendentis: sed obstructus finis negat transitum in venam: unde nihil superest, quam sic minuere copiam & impetum vitalis liquidi, ut naturalis arteriæ contractio ejus efficaciam prævaleat, adeoque contentus sanguis retroprimatur versus arteriæ basim. Obstruens tunc illud immeabile, non amplius pressum fluido à tergo urgente, arteriæ contractione pariter ibit versus latiore locum (nisi sic impactum fuerit his angustias, ut penitus immobile sit), momento autem sequenti pelletur in priores angustias; sicque hoc ita & reditu atteretur ad latera vasis & vicinas sanguinis alluentis moleculas; unde merito attenuatio & divisio concretarum molecularum expectari poterunt. Quod autem massulæ concretæ sic iterum solvantur, ut per arteriarum ultimas angustias transire possint, ad oculum patuit in Experimento pulcherrimo Leewenhoeckiano, cujus mentio facta fuit in Commentariis §. 132. n°. 1. Quomodo autem & copia, & impetus distendentis fluidi, minui possint per venæ sectionem & purgationem alvi, dictum fuit numeris 2. & 3. præcedentis paragraphi. Quantum vero possit imminutio liquidi distendentis ad restituendam vasorum oscillationem, à nimia plenitudine suffocatam, in plethoricis patet; in quibus sæpe pulsus arteriæ vix potest percipi, si ad summum gradum plethora pervenerit: dum autem ingenti sanguinis missione nimia minuitur copia, mox pulsus insurgit, & omnes functiones, antea fere suppressæ, restituantur.

P E R S T I M U L U M A D D I T U M F I B R I S O P E L I Q U I D I T E N U I S
K k k k iij

AROMATICI, CALIDE EPOTI. Demonstravit celeberrimus *Baglivi* in tractatu, quem scripsit *de fibra motice & morbosa*, solidis corporis partibus inesse talem proprietatem, ut irritatæ à stimulis miras sæpe turbas excitare possint; sive aucto naturali; quem secundum sanitatis leges exercere solent, motu; sive eodem omnino perturbato. Per experimenta certissima constat, in majoribus partibus stimulos hunc effectum facere. Ingesta alimenta, motu ventriculi & intestinorum sensum per omnes horum gyros & anfractus deducuntur usque ad finem intestini recti, totoque hoc itinere spoliata omni solubili, tandem excernuntur de corpore: si autem purganti stimulo irriterentur intestina, brevi admodum temporis spatio ingesta per alvum deturbantur, accelerato motu peristaltico propulsa. Acrida venena, dum internam intestinorum superficiem rodunt, faciunt sæpe sic contrahi intestina in omnibus locis, quæ tangunt, ut integre claudantur; unde, in tercepto aëre elastico, enormes adeo abdominis tumores tunc aliquando observantur. Imo hæc irritabilitas adeo tenaciter multis corporis partibus adhæret, ut etiam post mortem, imo & in iisdem à reliquo corpore resectis, diu superstes maneat. Verulamii observatio docuit, (vide Comment §. 1.) cor hominis eviscerati in ignem projectum saltasse in altum, & motum hunc continuasse septem vel octo minutorum spatio. Dum in fele, post abortum demortua, licet diu jam obriguisset, abdomine ac pectore resecato, cisternam chyli inflaret *Peyers*, obstupuit, aëre ad cor delato, auriculas primo, dein totum cor vibrare per plures horas. Dum fortuito hoc casu incitatus idem tentabat in humanis cadaveribus, parem habuit successum; sic tamen ut in quibusdam facilius, in aliis vero difficilius cordis motus resuscitaretur; & aliquando præter aërem insufflatum, quem calidum esse expedit, etiam externo foris opus haberet. Suspensorum autem corda facile motum recipere, & servare receptum diutissime, experimentis didicit (a). Ex quibus omnibus apparet, fibras viscerum & vasorum, stimulis applicatis etiam satis levibus, incitari posse ad majores motus. Dum sanissimus homo nimiam copiam salis, vel aromatum, aut vini sumsit, stimulis his irritabuntur vasa & cor in celeriore motum, & nascetur febris. Ubi ergo obstructa vasa, impetu vitalis liquidi à tergo urgentis, distenta fuerunt admodum & diu, sæpe fibræ nimis distractæ vires suas amiserunt, neque satis reagunt in fluidum contentum. Postquam ergo per Venæ sectionem & purgantia subducta fuit distendentis liquidi copia, & minutus sanguinis arteriosi impetus, proderit dare talia remedia, quæ sanguini mista, & per canales arteriosos circumducta, blando stimulo possunt irritare fibras vasorum, ut fortiori vi contrahantur, sicque atterant & dividant obstruentes moleculas, ut per angustias vasorum sine molestia transire possint; tunc enim inflammatio sanata erit per resolutionem. Huic autem scopo inserviunt blanda aromata, quæ larga aquæ copia infusa potantur, lignorum santalorum, cassiæ, quinquæ radicum aperientium & similium infusum, vel leve decoctum, quæ nunquam in tali casu nocere poterunt. In Materia Medica ad hunc numerum talis formula habetur.

Dum autem talia remedia larga copia assumuntur, ut illorum efficacia determinetur versus partem affectam, prosunt fomenta, frictiones, cucurbitæ, scarificationes: de quorum omnium usu actum fuit in Commentariis §. 134. Frictio.

(a) *Peyer. Parerg. Anatom. pag. 199.*

nes autem in hoc casu profunt, quia perfecte imitantur & suppleant alterna pressione & relaxatione valorum actionem in fluida. Facile autem patet, lenissimas tantum hic requiri frictiones; neque illas unquam adhiberi posse locis inflammatis, nisi postquam tensio & dolor per evacuantia, & impetum sanguinis minuentia remedia, integre sublata fuerint; vel saltem plurimum imminuta.

2. Nova liquida tenuia, aquosa, calida potando, impacta diluendo.

Postquam per evacuantia subducta fuit magna pars liquidorum, & vasorum oscillationes restitutæ fuerunt, nihil magis convenit ad curam inflammationis per resolutionem, quam replere vasa tali liquido, quod per omnia etiam minima vasa facillime transire poterit. Aqua autem has dotes habet; & subtilissima nostrorum fluidorum pars, quæ sub sensu cadit, aquam fere omni dote refert: unde patet, aquam per minima etiam corporis vascula transire posse. Hæc calida potata summum remedium in omnibus morbis inflammatoriis dat: circulationis legem enim deducta ad illa loca corporis, ubi obstruens illud inflammatorium hæret impactum, illud alluet; vasorum efficacia cum illo coneretur; sicque sensim se interponens inter concreti hujus moleculas, illas separabit à se mutuo & diluet. Quantum autem possit in referendis obstructionibus aqua diluendo & attenuando, dictum fuit in Commentariis §. 134. & 135. Simulque notandum est, reliquis omnibus, quæ concretum inflammatorium attenuare & solvere possunt, auxiliis, aquam pro vehiculo servire. Omnes ergo potus tenues, in quibus aqua prædominatur, hic tanti usus sunt: serum lactis, hydrogala, cerevisia tenuis & mollis, hordei, avenæ &c. decocta, cassiæ & theæ infusum, præcipua sunt.

3. Utendo attenuantibus, solventibus, & oppositis genio obstruentis, interne, externe forma decocti, balnei, foci, vaporis, cataplasmati, emplastri, unguenti specie.

Quamvis aqua plurima concreta dissolvere possit, ut omnia salina, saponacea, mucosa, gelatinosa &c.; tamen & multa sunt, quæ aqua sola solvi nequeunt. Ob hanc causam una cum aquosis sumuntur talia remedia, in quibus vis solvendi cognita est. Seliguntur autem illa, quæ OBSTRUENTIS GENIO opposita sunt. Obstruens autem in hoc casu est sanguis ruber, vel & tenuius liquidum immedicabile, in propriis vasis hærens, aut per errorem loci alienis vasis impactum: simulque adest major motus & calor, qui in putredinem quam maxime vergere faciunt nostros humores (vide §. 84. n°. 4. & 5.); unde attenuantia concreti inflammatorii simul debent esse putredini quam maxime adversa. Pulcherrima jam talia habentur remedia cognita in arte, in quibus simul & summa vis solvens, & antiseptica simul virtus est. Mel, Veteribus Medicis adeo usitatum in omnibus morbis inflammatoriis, has dotes egregie possidet: ejus enim usu immodico, vel & nimis diuturno, sic solvi potest totus sanguis, ut aquæ instar per alvum dilabatur: interim tamen omnes vegetabilium partes melle condiuntur, & conservantur quam optime ab omni corruptela. Imo Babyloniorum sepulturas in melle fieri me-

rigidæ fuerint fibræ hujus vas, sic compriment hanc moleculam, ut immobilis maneat: proderit ergo in tali casu fibras laxare, dum simul prius per sanguinis missionem impetus liquidi à tergo urgentis minutus fuit; aliter enim ulterius protruderetur obstruens molecula in majores angustias, quia laxatæ fibræ paterentur se facilius distendi; quod repugnaret huic indicationi, quæ retropulsum obstruentis jubet, non vero ejus propulsum per laxata vasa. Quomodo autem, & per quæ remedia, laxari possint fibræ corporis humani, dictum fuit §. 35. 36. & 54.

3. Videantur illa quæ de frictione ad hunc scopum adhibenda dicta sunt in Commentariis §. 141. n°. 2.


§. 401. **H**INC intelligitur; quænam sit in omni morbo inflammatorio, interno, externo, illa, semper quærenda; Resolutio; quæ sanatio perfecta; quæ sine crisi (386).

In quocumque corporis loco inflammatio hæreat, manet semper eadem definitio; nempe, obstructio canalisi arteriosi cum impetu valido vitalis liquidi à tergo urgentis locum obstructum. Quænam ergo erit inflammationis resolutio? quando molecula obstruens canalem arteriosum sic attenuatur & dividitur, aut vas obstructum sic laxatur, ut liber fiat humorum transitus per vas antea impervium: vel etiam quando talis molecula retropellitur in latiora vasa. Facile autem patet, hanc inflammationis curam omnium optimam & tutissimam esse, quia sine ulteriori partium læsione functionum integritatem restituit. Sed non semper est in potestate Medici inflammationem curare per resolutionem. Quænam autem requirantur, ut resolutio fieri possit, dictum fuit §. 386.

QUÆ SANATIO PERFECTA. Sola resolutio potest dici sanatio perfecta inflammationis, quia illam tollit, nullo alio morbo inducto. Reliqui autem exitus inflammationis in suppurationem, vel scirrhum, non sunt perfectæ sanationes, quamvis inflammationem tollant; quia definit inflammatio in alium morbum, qui iterum novam curationem requirit, antequam sanitas integre restituatur. Ubi autem inflammatio in gangrænam vel sphacelum definit, tunc non in sanationem, sed in mortem tendit.

QUÆ SINE CRISI. Quid proprie crisis in morbis sit, & quomodo hoc vocabulum apud Medicos tam veteres, quam recentiores varia significatione usurpatum fuerit, postea opportunius dicetur in Febrium historia, ubi de hac re latius agetur. Sufficit hic notasse, quod tunc inflammatio dicatur sanari sine crisi, quando morbi materies, liquidum nempe immeabile in vasis arteriosis hærens, à vita supersistere & remediis adhibitis sic disponitur, ut iterum libere fluat per vasa sua, sanitatis legibus obsequiosum penitus: Ubi autem eadem hæc materies morbi sic quidem mutatur, ut mobilis fiat, nec amplius impacta maneat vasorum angustis, & tamen tales condiciones non habeat, quæ requiruntur, ut cum sanis humoribus sine functionum impedimento fluat per vasa; tunc evacuat de corpore, vel deponitur ad quædam corporis loca; diciturque tunc crisi sanari inflammatio; & evacuatio materiæ, vel depositio ad alia loca, vocantur critica. Dum v. g. globulus ruber errore loci ingressus est vas serosum, & inflam-

inflammatio inde facta fuit; si vel retropellatur globus ruber ex vase seroso in arteriam rubram, vel dividatur in sex serolos globulos (quibus ex Leeuwenhoeckii sententia componi creditur) sanata erit hæc inflammatio sine crisi: quia materies morbi sic disposita fuit, ut sine impedimento fluere possit per omnia vasa, per quæ secundum sanitatis leges moveri debet. Si vero vasis obstructi finis una cum immeabili obstruente molecula, impetu liquidi sani & blandi à tergo urgentis, sensim separatur, sublata erit obstructio; sed continuitate vasis interrupta effundentur humores, separatim extremum vasis obstructi cum immeabili sua molecula contenta non poterit amplius sanitatis legibus obedire, hinc debet removeri, cum jam instar corporis heterogenei considerari possit: Unde tenerrima hæc solida, cum liquidis effusis mista, calore corporis, & levissimo inchoatæ putredinis initio mutantur in pus, quod evacuari debet, cum nunquam possit nostrorum humorum indolem acquirere. Sanatur tamen & hoc modo inflammatio, sed facta crisi; quia materia morbi per vim vitæ superstitem mutata separatur & excernitur de corpore. Sic apparet evidenter, quomodo inflammationis resolutio differat ab ejusdem sanatione, quæ per crisin fit; Et videtur pulcherrime hic convenire *Galen* de morborum vario exitu generale axioma (*a*) τὰ μὲν γὰρ μεγάλα κριῖται πάντες οἱ αὖ δὲ μικρὰ λύεται μόνοι. *Magni siquidem morbi judicantur omnino: quicumque autem parvi, solvuntur solum.* Valida enim inflammatio in suppurationem aut gangrænam desinit; levis vero resolvi poterit.



A B S C E S S U S.

§. 402. **S**I, his (395. 396. 397. 398. 399. 400. frustra, non; aut sero, paratis, inflammatio in suppurationem (387). vergit, idque per signa, ibi (387.) posita, notescit, indicationes erunt:

1. Crudum ocys maturare in unum humorem.
2. Idem, ut & vicina, emollire.
3. Ad exteriora ducere.
4. Puri cocto exitum conciliare.
5. Mundare locum.
6. Reliquum instar vulneris percurare.

Abcessus, ἀποσάσις, ἀπόστημα, apud Veteres Medicos variam significationem habuit. Morbi enim mutationem in alium morbum hoc nomine vocavit *Hippocrates* (*b*) dicens: ἐξ ἄλλων πυρετῶν ἡ νοσημάτων ἀποσάσις ἐς ταταράνας ἰγίροντο, *ex aliis febribus & morbis abscessus in quartanas fiebant.* Præterea & abscessus no-

(*a*) De Crisibus Lib. III. cap. 4. Charter. Tom. VIII. pag. 433.

(*b*) Epidem. I. Textu 21. Charter. Tom. IX. pag. 44.

mine vocabatur illud naturæ humanæ molimen, per quod ex sanguine separabantur quædam nocitura, quæ evacuabantur de corpore, vel deponerentur ad quædam loca; ideoque distinxerunt Veteres bifariam hos abscessus, nempe in illos, qui per effluxum (κατ' ἐξῆς) & alios, qui per decubitum (κατ' ἀποβίβιν) in partes quasdam fiebant (a) Sic v. g. in Peripneumonia materies morbi observatur exire de corpore per sputa, alvi fluxum biliosum, aut urinam crassam copiosam cum multo sedimento; tuncque abscessus per effluxum factus fuit. Ubi autem nulla talis excretio observatur, interimque signa salutaria ægrum superstitem fore docent, tunc monet Hippocrates (b), expectandos esse abscessus vel ad aures, vel versus inferiora corporis, materia morbi versus has partes deposita. Vulgatissimo tamen hodie in uſu est, abscessus nomine intelligere inflammationis transitum in suppurationem, & puris inde nati collectionem in loco quodam corporis. Hoc autem sensu abscessus definivit Galenus (c) affectiones illas, in quibus ab invicem secedunt, quæ prius se mutuo tangebant, corpora. Spatium igitur in medio vacuum fieri necesse est, quod materiam aliquam flatulentiam aut humidam, aut ex utraque mistam, continebit. Mutantur autem in abscessum & inflammationes quedam, & Erysipelatosi Phlegmonodesque tumores non pauci &c. Dum enim vasorum inflammationum fines obstructi vitalis fluidi à tergo urgentis vi separantur, cum effusis humoribus miscentur, & calore loci foveantur, transeunt in pus, quod partes prius contiguas removendo locum sibi facit: cum autem vera Phlegmone (uti dictum fuit §. 374.) fere semper tantum in panniculo adiposo hæreat, facile cedens hæc membrana pure collecto distendi potest in maximam aliquando tumorem. Tale autem cavum præternaturale fieri à pure collecto, postquam phlegmone suppurata fuit, non vero præexistisse, patet inde, quod si pars inflammata lanceola pertundatur, antequam pus factum fuerit, sanguis exit vel & tenuius ichorosum fluidum, & totus tumor solidus apparet: ubi vero post suppurationem factam pertunditur talis locus, pure educto cavitas manifesta apparet, facta à secessu partium, quæ prius contigæ fuerant.

Omnium optimam esse inflammationis curam, quæ per resolutionem fit, nullus dubitat: sæpe autem non est in potestate Medici vel Chirurgi hanc obtinere; tunc suppuratio sola superest: facile enim patet, reliquos inflammationis exitus, in gangranam nempe vel scirrhum, peiores longe esse. Si ergo ex signis §. 387. enumeratis constet, talem esse inflammationis indolem, ut non possit expectari resolutio: vel, licet forte in initio spes adfuerit illam obtineri posse, tamen frustranea applicatione, aut neglectu idoneorum remediorum, aut iisdem sero adhibitis (postquam per plures jam dies impetus vitalis liquidi continua pressione consolidavit obstruentes moleculas, & expressa parte fluidissima easdem reddidit omnino irrefolubiles) omnis hæc spes evanuerit; tunc indicationes curatoriæ omnino sic dirigendæ erunt, ut quam citissime facta suppuratione tollantur omnia illa, quæ & in solidis & in fluidis per inflammationem adeo corrupta sunt, ut nullo modo amplius sanitatis legibus obedire possint: & deinde hoc facto restituantur perdita, & uniantur illa, quæ à naturali cohesione separata fuerant. Hæc autem sequentibus numeris hujus paragraphi considerantur.

(a) Galen. Comment. 2. in Lib. I. Epidem. 655. & in Coac. n°. 395.

Hipp. Sect. 44. Charter. Tom. IX. pag. 55.

(c) Method. Med. ad Glaucon. Lib. II. cap.

(b) Prognostic. Charter. Tom. VII. pag. IX. Charter. Tom. X. pag. 381.

1. *Causa materialis morbi*, quamdiu tales conditiones habet, ut morbum faciat vel augeat, cruda vocatur; ubi autem per vitam superstitem, propriam indolem, aut medicamenta idonea sic mutata fuit, ut minus recedat à sanitatis legibus, minusque turbet functiones corporis, tunc cocta dicitur. Ille autem status morbi, in quo hæc causa materialis sic mutatur, ut minus noceat, dicitur maturatio vel coctio. Poterit ergo hæc cruditas in partibus fluidis & solidis locum habere; adeoque & maturatio. In Phlegmone autem crudum vocatur, omnis materies sic obstruens, ut resolvi nequeat; omne vas sic obstructum, ut referari non possit. Debet ergo, ut restituatur sanitas, separari vas illud sic obstructum una cum contenta materia immeabili, à reliquis vasis vivis & perviis, & cum effusis liquidis mutari in unum humorem, qui pus dicitur. Quamdiu ergo nondum soluta est cohesio finis obstructi à reliquo vase pervio, vis vitæ urgens locum obstructum faciet augeri omnia symptomata inflammationis; (vide §. 381. 382.) ubi autem hæc separatio facta est, cum per fines abscissos jam liber sit humorum transitus, pater satis, minui debere plurimum omnia hæc mala. Cruditas ergo ex symptomatum omnium incremento, vel summo vigore; maturatio vero ex eorundem remissione cognoscitur. Pulchre hæc habentur apud *Celsum* (a) ubi de abscessibus agit: *Crudum est autem, in quo major quasi venarum motus est, & gravitas, & ardor, & distentio, & dolor, & rubor, & durities; & si major abscessus est, horror, atque etiam febricula permanet: penitusque condita suppuratione pro his, qua alioqui cutis ostendit, punctiones sunt. Ubi ista se remiserunt, jamque is locus prurit, & aut sublividus, aut subalbidus est, matura suppuratio est.*

2. *Durities & renixus partis inflammatae à compactis admodum liquidis & solidis oritur* (vide §. 382. n°. 4.) & quamdiu illa adest, crudus merito dicitur morbus. Sed maturatio requirit separationem finium obstructorum à reliquis vasorum partibus: quo ergo magis hæc emolliantur & contabescant quasi, eo citius & minori cum dolore hæc separatio fieri poterit. Si autem valida Phlegmone partem occupavit, plerumque observatur, licet medium loci affecti jam mollescere incipiat, omnem tamen ambitum adhuc durum esse; unde & vicina similis emollientibus foveri debent, uti monuit *Celsus* (b). *Si qua circa duriora sunt, ad ea mollienda, vel malva contrita, vel fœni graci linive semen ex passo coctum superdandum est.*

3. Si pus natum ex suppuratione loci inflammati circa corporis superficiem sub cute hæreat, plerumque solet sponte cutis elevari in tumorem; omnium maxime, si emollientibus & laxantibus foveatur locus. Si autem profundior locum occupaverit, tunc majus periculum est, ne sinuosas sibi vias in panniculo adiposo formet; vel, in corporis interioribus si lateat, purulenta labe viscera corrumpantur. Simulac ergo ex signis §. 387. recensitis constat, inflammationem tendere in suppurationem, omni artis molimine tentandum est, ut versus exteriora deriveretur pus. De Pleuritidis cura agens *Celsus* (c) ad magnum & recentem dolorem commendat sanguinis missionem: sed ubi vel supervacuum vel serum est id auxilium, tunc dicit: *Confugiendum est ad cucurbitulas, ante summa cute incisa. Recte etiam sinapi ex aceto super pectus imponitur, donec ulcera pustulas-*

(a) Lib. V. cap. 28. n°. 11. pag. 327.

(b) Ibid. pag. 328.

(c) Lib. IV. cap. 6. pag. 209. 210.

que excitet; & tum medicamentum, quod humorem illuc citet &c. Et in Peripneumonia (a), ubi ad summum incrementum morbus pervenit, monet: *Prodesse etiam impostum super pectus salem bene contritum, cum cerato mistum: quia leviter cutem erodit, eoque impetum materia, qua pulmo vexatur, evocat. Utile etiam aliquod malagma est ex his, qua materiam trahunt.* Si jam ubique pus factum commodè posset versus exteriora duci, non adeo metueretur ille inflammationis exitus: nam v. g. à pleuritide suppurata moriuntur ægri, dum ulcus pure plenum tumore suo, versus interiora prominente, pulmonem comprimendo suffocat; vel dum idem ruptum in thoracis cavum pus deponit; unde Empyema, phthisis, & mors. Si vero apostema in locis intercostalibus natum versus extimam corporis superficiem vergat, ibique tumorem faciat, illo pertuso, & pure evacuato, felix plerumque curæ successus sequitur. Ob hanc causam Veteres Medici externas has partes stimulis irritabant, vel & mollissimis fovebant cataplasmatibus aut fomentis, ut versus exteriora tenderet morbi impetus.

4. Quando vasorum obstructorum fines, cum sanguine immeabili in illis hærente, calore, humoribus admistis, & mora in loco clauso, abierunt in pinguem, album, homogeneous liquorem, tunc pus coctum adesse dicitur. Quibus autem signis cognoscatur, tale pus jam præsens esse, postea in §. 405. explicabitur. Ubi autem pus illud loco clauso & calido diutius continetur, incipit sensim tenuius fieri & simul acrius; cumque venulæ resorbentes patulis suis orificiis in tota superficie cavi, quo pus continetur, hient, illud resorbebitur his, & reliquæ sanguinis massæ admistum purulentam cacochymiam efficiet: unde febris hæctica, & phthisis sequi poterunt. Præterea pus illud acrius factum totam superficiem loci, quo continetur, male afficiet: cumque simul attenuetur, poterit novas sibi vias facillime invenire in panniculo adiposo; unde pessimi sinus & fistulæ sæpe sequuntur, dum non satis cito puri cocto conciliatur exitus. Unde iterum patet, quantum differant inter se resolutio inflammationis, ejusdemque cura per suppurationem. Dum enim resolvitur inflammatio, materies morbi per vitam superstitem & idonea remedia sic mutatur, ut evadat salubri quam simillima, & cum reliquis humoribus per vasa fluere possit sine læsione functionum, unde nulla requiritur evacuatio. Quando autem per suppurationem fit separatio illorum fluidorum & solidorum, quæ per inflammationem corrupta fuerant, hæc quidem convertuntur in blandum pus; illud tamen penitus alienum est à nostrorum humorum indole, illisque mistum omnia turbat, febresque accendit, donec evacuetur de corpore, vel per metastasim à sanguine secernatur, & deponatur ad quædam corporis loca; unde iterum educi debebit, ut sanatio fiat. Paret ergo, puris cocti evacuationem requiri, & quidem satis cito, cum longiori mora semper acrius reddatur. Quanta autem mala fiant, dum pus in abscessu latens non satis cito educitur, docuerunt observationes Medicæ. Virgini quadragenariæ sinistra parotis suppurata fuerat, & decimo quarto morbi die ac pugni magnitudinem excreverat abscessus ibi factus. Licet autem in initio morbi febris nulla adfuisset, sed domestica curaret negotia quotidie, cum non in tempore exitus factus fuit puri contento, febris accessit stipata pessimis symptomatibus, liporhymia, nausea, vigiliis &c.; unde paucis diebus postea periit. Sponte quidem

(a) Ibid. cap. 7. pag. 212.

ruptus fuerat abscessus aliquot diebus ante mortem, sed nihil vel parum admodum puris effluxerat (a). In puero trimestri abscessus circa humerum dextrum erat: cum autem parentes incisionem fieri nollent, sponte quidem tumor incepit sublidere, sed resorptum pus per metastasim ad genitalia delatum lethalem gangrænam harum partium fecit (b). Plurimæ similes observationes occurrunt apud Auctores, quæ docent, quam periculosum sit pus coctum in vomica clausa diu relinquere.

5. Quamdiu locus suppuratus clausus manet, vomica clausa dicitur; ubi vero vel sponte, vel per artem, puri exitus conciliatus fuit, tunc vomica aperta vocatur. Tota autem superficies cavi illius, quod pus continuit, macerata fuit in hoc pure, unde semper plus minusve male affecta erit; imprimis si pus mora & calore acrius factum fuerit. Non poterit ergo partium separatarum unio & consolidatio fieri, neque restitutio perditorum, nisi prius omnis illa superficies ad conditionem puri vulneris reducat. Semimortua ergo vasorum extrema & semicorruptæ panniculi adiposi partes, prius separari debebunt, & reliqua omnia fieri, uti dictum fuit in vulnerum historia §. 206. 207. 208. *Ulcera non purgata coire nolunt, etiam si adducantur; neque etiam sponte coalescunt. Ulcera etiam, quorum circumposita partes inflammantur, coire non possunt, quamdiu non cessaverit inflammatio. Neque, si ambientes ulcus partes denigrata fuerint, aut sanguis putrescens, aut varix sanguinis influxum suppeditans adfuerit, talia coire possunt, nisi circumstantes ulceris partes sanas effeceris (c).*

6. Post depurationem illam ulcus transit in naturam puri vulneris, sed cum jactura substantiæ; unde tunc perditæ regeneratio, & separati unio, procurari debet.

§. 403. **M**A T U R A T I O fit applicatione horum, quæ
1. Motum in parte augent, fovendo, stimulando, calefaciendo per ea, quæ re ipsa, vel & virtute calefaciunt; in toto similia præstant, excitata febricula.

Omnis maturatio crudi inflammatorii in coctum pus fieri debet per vim vitæ superstitem: simulac enim hæc vel deficit, vel languet, nullum pus fieri observatur. Ideo inter signa mortis numerat Hippocrates (d), si ulcus vel ante morbum, vel in ipso morbo natum, siccum fuerit. Et in phthificis ultimo morbi, stadio sputa minuuntur, imo & sæpe cessant ob eandem causam. Vis vitæ autem mensuratur liquidorum trajectu per vasa. Cum ergo separari debeant vasorum obstructorum fines, una cum materia immeabili contenta, per vim liquidi à tergo urgentis, patet illud citius fieri, si motus fluidorum per vasa in parte suppuranda augeatur robore & celeritate; tunc enim intra datum tempus frequentioribus & validioribus simul ictibus fluidum per vasa projectum arietabit obstructos fines,

(a) Hildan. Observ. Chirurg. Centur. I. Observ. 39. pag. 33.

(b) Ibid. Observ. 81. pag. 59.

(c) Hippocrat. de Ulcer. cap. 4. Charter.

Tom. XII. pag. 131.

(d) In Prognosticis Sentent. 21. Charter.

Tom. VIII. pag. 605.

illosque à cohaesione solvet. Unde & motus citatus recensetur §. 387. inter illas conditiones, quæ faciebant inflammationem in suppurationem tendere. Notandum tamen, nimis velocem liquidorum per vasa motum subito rumpere vascula, non autem sensim separare; unde gangræna loco suppurationis benignæ sequeretur; uti dictum fuit §. 388. Requiritur ergo hic justum moderamen, ut nempe motus in parte major sit, quam in sanitate; nec nimius tamen. Calor autem loci inflammati, si in corporis superficie sit; vel febris major minorve, si in internis lateat malum, demonstrabunt, an motus augendus vel minuendus sit. Unde vel topicis auxiliis parti affectæ applicatis, vel internis remediis, augendus erit motus, si deficiat. Et uti dictum fuit in Commentariis §. 371. inflammationem habere comitem febrim in toto, vel saltem in parte, sic etiam motus augendus erit vel in parte inflammata sola, si fieri poterit; vel in toto, excitata febricula. Sic videmus in phthisicis, in quibus quotidie pus fit, febriculam illam hecticam semper adesse, ingravescentem, dum pus conficitur; imminutam vero, quando pus factum excreatur. Ideo *Hippocrates* dixit loco in Commentariis §. 387. allegato, *circa puris generationes, dolores & febres magis accidere, quam pure facto*. In materia Medica ad hunc numerum laudantur gummata illa aromatica, ammoniacum, galbanum, opopanax &c.: in quibus omnibus stimulus adest moderatus, & tenacitas simul satis magna, per quam hærent parti, cui applicantur; sicque coercendo exhalans subtilissimum quasi proprio vaporis balneo partem fovent, simulque laxatis sic vasis aromaticum illud stimulans insinuant: unde tam pulchros effectus habent talia remedia in omnibus inflammationibus, ubi à nimis debili motu scirrhus metuitur. Omnia autem hæc, quæ blando tali stimulo majorem motum in parte affecta excitant, simul & VIRTUTE CALEFACIUNT, quia auctum motum fluidorum per vasa major calor sequitur; uti demonstratum fuit in Commentariis §. 382. n°. 6. Profunt simul & pulcherrime illa, quæ actu ipso calida sunt, modo non tantum habeant caloris gradum, ut dissipando liquidissimam partem reliquum in scirrosam duritiem convertant. Unde omnium optimus hic est humidus calor; quando nempe fomenta vel cataplasmata, loco suppurando applicata, pannis laneis calefactis vel similibus obvolvuntur, ut continuo sed blando calore foveatur pars affecta. *Calidum enim suppuratorium, non in omni ulcere, maximum securitatis signum: cutim emollit, extenuat, dolorem sedat &c. (a)*. Quare autem *Hippocrates* dixerit, *non in omni ulcere*, explicat *Galenus* in Commentariis suis in hunc Aphorismum; quia nempe putridis ulceribus & rheumaticis omnibus calidum nocet, augendo putredinem, & attrahendo fluxionem,

2. Excitatum motum, & calorem ad eum locum coercet, impediendo nimiam exhalationem & dissipationem per obturantia glutinosa, lenimen acrimoniæ nimiae.

Locus inflammatus semper calet magis, quam in sanitate solebat (vide §. 382. n°. 6.), cumque omnia symptomata inflammationis augeantur, ubi illa in suppurationem tendit (vide §. 387.), ergo & calor auctus erit dum abscessus fit. Sed per calorem auctum liquidissima pars humorum nostrorum dissipatur, uti patet.

(a) Hippocr. Aphor. 22. Sect. V. Charter. Tom. IX, pag. 207.

bit in Commentariis §. 689. unde maxime conducet talia applicare, quæ continua humectatione partem affectam fovent, & restituunt illud, quod per calorem auctum dissipatur continuo. Pulcherrima ergo erunt illa, remedia, quæ maximam copiam aquæ continere possunt, nec facile tamen illam iterum dimittunt: talia autem sunt glutinosa omnia, quæ cum aqua in ductilem pastam abire possunt, uti omnia farinosa, & imprimis farina seminum lini, quæ ingentem copiam aquæ absorbere potest. Ex similibus mollissima cataplasmata fiunt, quorum varix formulæ in Materia Medica ad hunc numerum habentur. His si involvatur undique locus suppurandus noctes & dies, imprimis si curetur, ut calida maneant, solet satis cito onine inflammatum irrefolubile maturari, & in bonum pus converti. Cum autem omnia hæc remedia una cum vi humectante simul emolliant & laxent partes solidas corporis, dolorem, & ærumque satis acrem, suppurationis comitem, plurimum mitigant (vide §. 228. n^o. 1.) omnemque acrimoniam inviscando & obtundendo leniunt; adeoque & hoc respectu profunt, quia blanda humorum indoles requirebatur ad suppurationem, uti dictum fuit in Commentariis §. 387. Cum autem imprimis hic metuatur degeneratio in putredinem (vide §. 84. n^o. 4. & 5.) ob stagnationem fluidorum in vasis obstructis, illorumque celeriores motum per vasa vicina aperta, & auctum calorem; ideo feliguntur talia quæ calore partis, cui applicantur, brevi mutantur in oppositam putredini indolem, id est, acefcunt. Farinam hinc secales citissime acefcientem, ipsum acetum, acetosam & similia Chirurgi addunt cataplasmatibus maturantibus. Solent etiam his addere recens butyrum, oleum lini, vel similia mollissima pingua, partim quia cutaneos meatus obturando humidi distillationem impediunt; tum etiam quia per hæc addita cavetur, ne cataplasmata illa nimis cito arefcant.

3. Moderando motum totius fluidi vitalis, ejusque temperiem ita, ut nec torpeat, nec excitetur, nimis.

Maximi momenti hæc regula est in Praxi Medica, tam in morbis internis, quam in externis curandis. Motus citatus humorum inflammationem facit tendere in suppurationem (vide §. 387.) motus nimius, subito destructis vasculis tennerrimis gangrænam producit (vide §. 388.). Motus sedatus autem in resolutione inflammati locum habet (vide §. 386.) Quamdiu ergo resolutionis spes est, impetum vitalis liquidi audacter minuunt Medici per illa remedia, de quibus actum fuit §. 396. ut caveatur ulterior læsio vasorum inflammatorum: ubi autem signa docent, resolutionem inflammati impossibilem esse, tunc requiritur semper major motus, quam naturaliter in sanitate aderat, ut separentur fines obstructi vasorum, & convertantur cum effusis humoribus in bonum pus: adeoque patet, tunc sæpe nocere posse illa, quæ nimis debilitant circulationis impetum. In hoc ergo casu vel per remedia interna, vel per topica parti affectæ applicata, tale queritur moderamen in motu humorum per vasa, ut in loco suppurando sit major calor & celerior motus, quam in sanitate; neque tamen tanta hæc sint, ut subito destructis vasculis omnem influxum vitalium humorum per partem tollant, id est, gangrænam faciant. Cognoscitur autem tale moderamen adesse, si calor in loco inflammato caloris sani gradum excedat quidem, nec multum tamen; si dolor adsit, sed non summus; si pulsatio percipiatur modica; si tumor, rubor,

M m m m

& reliqua inflammationis symptomata augeantur quidem, sed sensim: Hæc autem signa in ipso loco affecto docent, an minui debeat, an augeri vitalis fluidi motus. Ubi autem inflammatio tanti momenti est, ut totum inde turbetur corpus, tunc febris magnitudo, sitis, siccitas linguæ, facile demonstrant, quid fieri debeat, ut illud moderamen obtineri possit. Nullum ergo universale suppurans est, sed, prout vel augeri vel minui debet motus humorum, diversa medela requiritur. In calido juvenili corpore suppurando loco applicatum cataplasma ex avena, lacte, butyro insulso, proderit; in melancholicis, senibus, aut frigida temperiei hominibus bulbos ceparum sub cineribus assatos, galbanum, ammoniacum gummi & similia stimulantia adduntur, ut incitato parum motu felicius succedat suppuratio loci inflammati, & caveatur scirrhus; qui sæpe sequitur in tali casu, si inflammatio glandulosa loca corporis occupaverit. Idem jam in internis inflammationibus obtinet. Sic in pleuritide incipiente audax sanguinis missio ad animi deliquium usque sæpe morbum tollit: ubi vero serius vocatus Medicus videt, curam per resolutionem non amplius obtineri posse, superest tunc coctio materiæ morbi, & coctæ evacuatio per sputa, urinas &c. vel in abscessum conversio. Qui tunc per Venæ sectionem vel alia evacuantia vitam nimis debilitat, semper nocet; cum requiratur in tali casu febris moderata ad maturationem crudæ inflammatorii.

4. Relinquendo locum clausum, donec omne inflammatum irresolubile suppuratum sit. His enim causis bonum fiet Pus in parte.

Accidit in majoribus abscessibus sæpius, medium centrum loci suppurandi mollescere, & digitis cedere, dum tamen maxima pars tumoris inflammati in omni ambitu dura manet. Cum autem pure jam facto, si nimis diu relinquatur locus clausus, plurima sequi possint mala, uti dicitur in Commentariis §. 406. ideo sæpe festinant Chirurghi aperire tales tumores, dum vel minimam fluctuationem percipiunt. Sed omnia mala, quæ observata fuerunt sequi, si non satis cito concilietur exitus puri, pendent vel à putredine & acrimonia, quam pus nimia mora acquirit, ut & dum copia auctum novas sibi vias parat in panniculo adiposo, & sinus fistulasque producit; vel ab ejusdem attenuati resorptione per vasa bibula venosa, unde cacochymia purulenta sanguinem inficiet; aut dissipata parte tenuiori reliquum crassescens scirrhosos tumores producet, imprimis circa loca glandulosa. Quamdiu autem locus clausus manet, & aëri nullus datur accessus, non tam subita degeneratio in putredinem fiet; & dum pus continetur cavo, cujus ambitus undique durus est, non poterit facile cuniculos agere in panniculo adiposo: neque magnus erit metus resorptionis attenuati puris, cum distenta vasa arteriosa per inflammatoriam non resolubilem materiam adjacentes venas comprimant. Præterea illud pus, quod in semimaturato tali abscessu hæret, optimum dat remedium, quo vicina omnia adhuc dura & cruda solvantur, dum contiguum pus calore & mora illa quasi contabescere facit: tali phrasi usus fuit Hippocrates in loco allegato in Commentariis paragraphi 323. uti & alibi (1) ubi dicit: ἀνέχεσθαι τὰς εὐφράς τὰς φλασθίσας καὶ κοπιέας πρὸς γρηγορίαν ἐκίληται.

(1) De Vulner. Capit. 14. Charter. Tom XII. pag. 121.

Necesse est, carnes contusas & laceratas in pus versas tabescere. Sic etiam in Commentariis §. 158. n°. 7. dictum fuit, pus in vulnere natum solvere partes semilaceras, & inflammata vasorum extrema una cum infarctis liquidis. Patet ergo, quanti usus sit, locum suppurandum clausum relinquere, donec omne crudum inflammatum fuerit maturatum. Ita enim imitamur naturam, quæ suppurationem optime perficit, ubi locus clausus est, qui suppurari debet. Sic recenti vulnere divisus partibus, postquam sanguinis effluxus cessavit, crusta sanguinea cavo vulneris innascitur, & sub hoc tegmine blanda suppuratione depuratur vulneris superficies. Unde naturam ubique secutus *Hippocrates* hoc axioma Medicum posuit. *Quæcumque concoqui oportet; occludi convenit; contraria vero exsiccare & aperire (a).*

Si jam omnia illa fiant, quæ quatuor his numeris enumerata fuerunt, tunc bonum pus fiet in parte. Quænam autem sint puris boni conditiones, dictum fuit in Commentariis §. 387.

§. 404. **N**ISI materies inflammata sic mutata, cum periculo, & sine profectu, aperitur abscessus.

Quamdiu enim nondum ad perfectam maturitatem deductus est inflammatorius tumor, si aperiatur, nihil puris effluet, sed merus sanguis, uti dictum fuit in Commentariis §. 382. n°. 2. vel, si jam pro parte in pus versus fuerit, illo educto reliqua indurata difficilius & longiori temporis spatio maturari poterunt. Præterea dum crudi tales tumores secantur, longe acerbior dolor oritur, & majus periculum est, ne pertusa cute subjæctæ partes lædantur. In maturo enim abscessu collectum pus cutim elevat à partibus suppositis, hinc tuto aperiri poterit, cum lanceolæ cuspis cute perforata cavum pure plenum ingrediatur; unde nullum periculum læsionis vasorum aut fibrarum musculosarum erit. Ideo *Celsus* de abscessibus agens, qui in locis nervosis occurrunt, dicit: *Sed cætera etiam suberuda aperiiri possunt; inter nervos ultima expectanda maturitas est, quæ cutem extenuet, eique pus jungat, quo propius reperiatur (b).* Idem verum erit in illis locis, ubi magna vasa sanguinea decurrunt; uti v. g. in inguinibus & sub axillis, ubi frequenter tumores tales inflammatorii occurrunt, postea suppurandi. Nemo enim prudens, tales abscessus aperiet, nisi penitus maturi fuerint, cum magna vasa vel illorum insignes rami facillime lædi possent, ingenti cum periculo, si nimis cito dissecarentur. Quantum autem retardetur cura, & augeantur dolores, si crudi abscessus aperiuntur, optimorum Chirurgorum observata docent. Nobili viro post febrim prægressam sub axilla oriebatur tumor inflammatorius acerrime dolens; Chirurgus, qui curam ejus gerebat, spreto prudentiorum consilio, simulac levem fluctuationem in hoc tumore percepisset, profunde adaucta lanceola pertudit, acerbissimo cum dolore ægri. Neque pauculo puris educto ullum sequebatur levamen, sed contra febris & inflammatio augebantur. Mollissimis cataplasmatibus applicatis diu, sanatum fuit malum, quod paucorum dierum spatio fieri potuisset, nisi temerario ausu ante perfectam maturationem apertus fuisset tumor. Pluribus

(a) Epidem. Lib. VI. Textu 34. Charter. |
Tom. IX. pag. 416.

(b) A. Corn. Cels. Medic. Lib. VII. cap. |
2. pag. 409.

exemplis hanc rem probat sæpius laudatus Chirurgus *de la Motte* (a). Sic aliquoties vidi, bubones Venereos nimis cite dissectos, quia metuebatur Lues à pure diu retento, maximas molestias fecisse, & sæpe per menses curam protractam fuisse, dum cogeantur erodentibus consumere Chirurgi illa, quæ pus diutius relictum in loco clauso paucarum dierum spatio solvisset certissime. Notandum tamen, frequenter accidere in abscessibus, extremum marginem adhuc aliquam duritiem habere, dum tamen reliquum penitus maturatum est: Sponte ruptis talibus tumoribus, & pure omni sic educto, duræ illæ reliquæ paucis diebus solent fundi quasi & evanescere. Non nocuisset ergo & aperuisse tales tumores, quorum longe maxima pars jam suppurata fuerat.

§. 405. **M**OLLITIES partis, fluctuatio pressi tumoris, albitudo, remissio doloris, caloris, ruboris, tensionis, pulsus, febris, vertex mucronatus tumoris, gravitas dolori succedens, docent pus jam factum, atque exitui aptum esse.

Cum itaque periculosum sit, aperire locum suppuratum ante perfectam maturitatem, simulque plurima mala sequi possint, si pus factum nimis diu relinquantur in loco clauso, uti dicetur sequenti paragrapho; ideo summa cura expendenda sunt illa signa, quæ docent, pus jam factum esse & collectum in abscessu sic, ut cum fructu inde educi possit. Signa illa autem deducuntur ex mutatis phænomenis, quæ loco suppurando accidunt, dum incipit irresolubilis materies inflammatoria abscedere, ad perfectam maturationem usque.

MOLLITIES PARTIS. In Commentariis §. 382. n°. 4. demonstratum fuit, in Phlegmone à compactis admodum inter se liquidis & solidis magnam duritiem fieri, quia tunc sanguis densatus in vasis, obstructis quidem, integris tamen adhuc, hæret. Ubi vero, dum suppuratur Phlegmone, vascula distenta rumpuntur, humida effunduntur, tenerrima solida atteruntur, solvuntur, & abeunt in pus (vide §. 387.) duritiei succedit necessario mollities, cum tunc sub integra cute subsit fluidum, non autem dura & cruda inflammatoria materia. Posse enim ingentem duritiem esse in corporibus, licet pro maxima parte fluidis consent, modo illa distinctis vasis contineantur, non vero in unum locum confluant, docent poma, pyra, rapæ &c. licet enim hi fructus incredibilem succi copiam habeant, tamen admodum duri sæpe sunt: Ubi vero tunduntur, in pulpam mollissimam abeunt; uti etiam dum igni propius admoventur: tunc enim elasticus aer, in his fructibus latens, calore rarefactus vasa rumpit, unde humores effunduntur; sicque durissimum pomum intra horæ quadrantem adeo mollescere potest, ut diffluat: idem etiam contingit, dum per putredinem solvitur in his fructibus vasorum continuas.

FLUCTUATIO PRESSI TUMORIS. Ut certi sint Chirurgi, inflammatum locum æquabiliter suppuratum esse, solent oppositis tumoris locis digitos apponere, tuncque nunc ab una, nunc autem ab altera, parte leviter premere: si tunc, dum premunt ab uno latere, in opposita parte percipiunt humoris con-

(a) *Traité complet de Chirurgie, Tom. I. pag. 211. &c.*

tenti undulationem, noverunt satis, omnem tumoris ambitum maturatum esse. Ubi vero talis fluctuatio non sentitur, licet ab utraque parte mollities appareat, tunc in medio tumoris poterit adhuc esse cruda inflammatoria materies, quæ impediatur, quo minus motus impressus uni parti ad oppositam partem pertingere possit. Tales autem occurrere abscessus, qui bifariam sic quasi dividuntur, dum in medio centro adhuc crudi manent, in extremis autem maturati sunt, docent observationes Chirurgicæ, & jam monuerat Hippocrates (a) dicens: *Tubercula foras protuberantia, in acumen subolata & fastigiata, & aquabiliter commaturescentia, neque in ambitu dura, & deorsum tendentia, neque bifida, meliora (sunt). Contraria mala, & quæ plurimum contraria, pessima.* Et Galenus (b) in Commentariis suis in hunc textum monet: *In bifidis medium non sine vitio inveniri, crudum (ἀκρωστόν) nempe & durum.* Verum quidem est, abscessum maturum fluctuationem hanc communem habere cum Aneurysmatibus, & tumoribus quibusdam ampullosis, humores continentibus; sed tamen abscessus ab his optime distinguitur, quia inflammationem prægressam sequitur. Satis autem patet, hanc fluctuationem pressi tumoris non posse commode percipi, nisi emineat tumor; dum enim in panniculo adiposo, profunde inter mûculos decurrente, abscessus hæret, hoc signo non facile detegitur.

ALBITUDO. In Commentariis §. 382. n°. 1. & 2. demonstratum fuit, rubedinem comitari debere inflammationem natam, quia nempe vasa obstructa & dilatata, uti etiam panniculus adiposus, sanguine rubro crasso infarcta erant. Ubi ergo omne illud crassum inflammatorium una cum vasorum extremis obstructis abiit in pus album & æquale, causæ majoris rubedinis aberunt. Præterea, dum ab interiore parte pus, ab exteriori vero mollissima fomenta vel cataplasmata, cutim macerant, illa contabescit quasi, albumque colorem acquirit. Dum enim, Emplastro quocumque applicato, fovetur percussæ exhalantis liquidi vapore cutis, paucorum dierum spatio albescit penitus. Sensim etiam marcescens & extenuata cutis puris albi subjacentis colorem exhibet. Patet ergo ratio, quare inter signa maturi abscessus merito numeretur & albitudo. De abscessibus agens Celsus (c) habet sequentia: *Et, quod de subito durius non est, melius est: & quod, quamvis rubet, coloris tamen in album mutati est: quæ signa jam pure oriente nascuntur: tumor enim ruborque multo ante incipiunt.*

REMISSIO DOLORIS, CALORIS, RUBORIS, TENSIONIS, PULSUS, FEBRIS. Omnia hæc signa inflammationis producebantur à vi acti sanguinis per vitam superstitem, dum nempe impetu & celeritate auctis urgebat vasorum obstructorum fines (vide §. 381.); horumque omnium ratio data fuit in Commentariis §. 382. Postquam ergo per suppurationem fines obstructi arteriarum separati fuerunt, cessat causa horum symptomatum; adeoque desinunt, vel saltem plurimum minuuntur. Unde merito Hippocrates monuit (vide locum allegatum in Commentariis §. 387.) circa puris generationem dolores & febres majores esse, quam illo jam facto. Notandum tamen, aliquando acerbissimum dolorem superesse, licet locus suppurandus perfectissime maturuerit, quia pus collectum & auctum quotidie cum incumbentem distendit & sensim dilacerat: sed dolor ille, uti patet, ab alia causa oritur, & rupto sponte, vel pertuso lanceola abscessu, cessat ilico. Ideo

(a) Epidem. Lib. VI. Textu 13. Charter. Tom. IX. pag. 375.

(b) Ibid. pag. 376.

(c) Lib. V. cap. 28. n°. 11. pag. 326.

Celsus (a) postquam recensuerat signa, quibus abscessus, cruditas cognoscitur (vide Commentaria §. 402. n°. 1.) statim subjungit: *Ubi ista se remiserunt, jamque is locus prurit, & aut sublividus aut subalbidus est, matura suppuration est.* Notandum enim est, licet cutis, maturo jam abscessu, albescat plerumque, aliquando tamen à pure distendente sic comprimi vasa cutanea, ut sublato vitali influxu & effluxu humorum gangrænescat, & sublividum colorem acquirat. Similia his maturi abscessus signa habentur apud *Æginetam* (b): dicit enim postquam loci inflammati in suppurationem tendentis signa recensuerat: *Consummato abscessu, plurima (horum) minuuntur, punctura autem pruriginosa sunt, & torpor sentitur, & tumor in apicem acutum elevatur, tangenti lenis & cedens, & superficies circa apicem abraditur (ἀπορίπτεται).* Ubi pulchre notat, quomodo sensim cutis in vertice mucronato abscessus maturi quasi excoriando per strata secedat.

VERTEX MUCRONATUS TUMORIS. Quando phlegmone suppuranda maturefcere incipit, fere semper in medio loco percipitur mollities & fluctuatio aliqua, licet reliquus ambitus adhuc durus sit. Cum autem ad suppurationem promovendam mollissima soleant applicari cataplasmata, laxata integumenta cedent in hoc loco puri sensim copia aucto, & extendentur ultra æquabilem tumoris superficiem, quia in reliqua parte tumoris suppurandi major durities facilem extensionem prohibet. Ob hanc ergo causam vertex mucronatus talis eminebit, illoque in loco, sensim distractis & debilitatis integumentis, rumpetur sponte abscessus, vel tutissime lanceola pertundi poterit.

GRAVITAS DOLORI SUCCEDENS. Paulo ante dictum fuit, dolorem augeri, quamdiu suppuratur locus inflammatus: debent enim sensim abrumpi fines vasorum obstructorum; adeoque, dum fibræ nervosæ, per vasorum tunicas dispersæ, rupturæ proximæ sunt, acerrimus erit dolor (vide §. 221.), qui cessabit, quando integra ruptura facta fuit. Sed tunc aderit pus, quod extra vasa in cavo præternaturali facto, vel & cavo naturali dilatato, collectum hæret, & pondere suo gravabit partes, quas occupat. Sanus enim homo, licet corporis sui pondus non sentiat, simulac tamen extra vasa humores colliguntur, statim gravitatem percipiet. Dum post validas contusiones fractis valis sub integra cute sanguis colligitur in panniculo adiposo, statim de gravitate insolita partis conqueruntur ægri (vide §. 329. n°. 1.). Ubi hydrops anasarca accumulato sero crura distendit, plumbeos quasi artus trahunt miseri. Facile autem patet, gravitatis illum sensum tantum locum habere, ubi alicujus momenti suppuratio adest, & in morbis internis latentis abscessus præcipuum signum esse, si post dolorem acutum partis ponderis sensus in loco affecto percipiatur; uti postea in Pleuride, Peripneumonia, & similibus morbis patebit, quando de illis dicetur.

§. 406. **S**I tum relinquitur diu in loco clauso, attenuatur, acre fit, putrescit, augetur, vicina consumit, erodit, mole, pondere, & motu sinus, fistulasque, creat variis locis varias, pessimas in intestino recto. Aut dissipata parte tenuiori, reliquum durefcens tumores duros, maxime circa glandulas, creat. Vel denique venis

(a) Ibid. pag. 327.

] (b) Lib. IV. cap. 13. pag. 64.

lymphaticis, aut sanguiferis per erosa oscula impressum absorbetur, sanguini miscetur, hunc inquinat, & collectam in visceribus pessimis collectionibus ea corrumpit, horum functiones turbat, atque ita infinitos, eosque gravissimos, morbos efficit.

Postquam ergo per signa præcedenti paragrapho enumerata constitit, omne crustum inflammatorium maturatum esse, & in bonum pus conversum, tunc quanto citius pus illud collectum debet educi: semel enim ad ultimam perfectionem ubi pervenit pus, album nempe, crassum, læve, æquabile & inodorum redditum, tunc sensim incipit degenerare, & quotidie in pejus mutari. Extra vasa enim hæret, neque amplius circulationis legibus subjacet, sed stagnat, & calore loci spontaneam mutationem sequitur, qua in putredinem vergit. Quamvis enim in loco clauso, nullo aëre admisso, lentius corrumpantur omnes animalium partes, putrescunt tamen. Præterea per putredinem observatur nasci major tenuitas in nostris humoribus: sanguis enim de vena missus, concrevens statim, nata putredine postea integre dissolvitur. Cystica bilis, in sanis & quiescentibus animalibus spissior semper, dum putrescit, in tenue liquamen solvitur. Ideo & puri, nimis diu in abscessu maturo retento, perit illa unctuositas & balsamicus lentor, quo cremorem lactis fere æmulatur, atque in tenue ichorosum fluidum mutatur: hanc vero tenuitatem auctam à putredine semper comitatur major acrimonia, uti dictum fuit in Commentariis §. 86.: tota ergo superficies cavi loci, quo pus illud attenuatum & acrius factum continetur, alluitur continuo tenui jam & rodente ichore, unde tenella vasorum extrema hic hiantia destruentur, humores effusi in similem corruptelam abibunt; adeoque erosio parietibus cavi continentis augebitur abscessus magnitudo, & ab humoribus huc delatis per erosa vasa crescet puris copia. Innumera jam, & ubique obvia apud probatissimos auctores, observata docuerunt, à pure diu relicto & putrefacto consumi & erodi etiam solidas corporis partes. Post Empyema consumptos fuisse pulmones, sic ut vix reliquæ inventirentur tam nobilis visceris, legitur apud *Schenckium* (a). Pericardium non tantum, sed & ipsam cordis substantiam adeo solidam à pure erosam fuisse memoriæ tradidit idem auctor (b). Solida ossa erosa & in cariem conversa à pure corrupto, doluerunt toties Chirurghi in profundis suppurationibus &c. Patet hinc ratio, quare *Hippocrates* (c) dixerit, evadere posse Empyicos, quibus sectis vel ustis pus album & purum efflueret; si vero sanguinolentum, cænosum vel graveolens educeretur, perire. Uti etiam (d) suppurato hepate laborantes perire, si amurcosum pus efflueret, dum urerentur. A corrupto enim pure tunc erosa erat ipsa viscerum substantia, unde certa imminet perniciēs.

Præterea, cum inflammatio omnium frequentissime locum habeat in tunica adiposa, uti dictum fuit §. 374.; suppuratio ex inflammatione nata eundem occupabit locum. Sed tenerrima hujus tunicæ fabrica facillime erodetur à pure acriori reddito; imo solo etiam pondere suo & mole pus, in hac membrana tam facile

(a) Observat. Medic. Lib. II. pag. 251.

(b) Ibid. pag. 274.

(c) Aphor. 44. Sect. 7. Charter. Tom. IX. pag. 315.

(d) Ibid. Aphor. 45. Sect. 7. pag. 316.

dilatabili hærens, illam distendet, & novas sibi faciet & pessime sinuosas vias. In Commentariis enim §. 244. & 300. n^o. 5. demonstratum fuit, ærem panniculum adiposum ingressum miro emphysemate totum aliquando sepelivisse corpus; unde patuit, viam patere ex quocumque loco hujus tunicæ per omnem fere ejus ambitum. Sic vidi, parotide glandula suppurata, dum non conciliabatur exitus puri collecto, illud viam sibi fecisse descendendo in panniculo adiposo per collum, humerum, brachium, ad cubiti flexuram usque; ibique sic corrupisse ligamenta cubiti/articulum firmantia, ut postea immedicabilis facta fuerit ancylosis. Post profundam inflammationem circa femoris articulum sequebatur abscessus; cumque latens sub maximis musculis pus educi non potuisset, illud descendens sinuosum ulcus fecit, per totam femoris & cruris longitudinem decurrens; unde post terribissima mala, incassum tentatis omnibus, periit cacochymia purulenta confectus egregius juvenis. Si jam simul consideretur, pus illud in tunica cellulosa collectum, mora & calore attenuatum, sæpe validissimis musculis accumbere, patet facile, quod horum musculorum motu pressum propelli possit per omnia loca vicina, adeoque sinus profundos & pessimas fistulas sic fieri posse; imprimis dum pus per tunicam adiposam sic repens se musculorum interstitiis insinuat. Prout jam major crassities est adiposæ tunicæ, vel plura sunt strata musculorum sibi incumbentium in loco suppurato, eo peiores cuniculos agere poterit pus diu retentum. Ideo in abdomine, ob magnam copiam pinguedinis hic plerumque posita, & inter musculorum abdominalium varia strata decurrentis, adeo molesti sinus & fistulæ observantur; uti dictum fuit in Commentariis §. 307.

Nullibi tamen fere peiores fistulæ & sinus à pure nimis diu retento nascuntur; quam circa intestinum rectum. Cum enim crassissimæ fæces per illud exire deberent, necesse erat, ut distendi posset facile in omni ambitu: ideo undique molissima & copiosa pinguedo huic intestino circumponitur, adeoque pus in abscessu hic nato diu retentum profundissimos sinus facere poterit: *Putrescens enim mollia depascitur, quum intestinum rectum humidum sit, & caro mollis, in qua pabulatur, donec tuberculum rumpatur, & infra versus intestinum rectum compurefcat* (a). Si jam ipsum intestinum rectum simul erosum fuerit, per cellulosam tunicam hujus intestini, cryptas mucilaginosas &c. poterit se pus distendere, & terribissima mala producere; quæ multum augentur, dum fæces alvinæ hic transeuntes omnia conspurcant. Tanta mala metuens Hippocrates noluit expectandum esse, donec tuberculum in his locis natum penitus maturuerit, verum crudum adhuc quam celerrime secari jussit (b).

AUT DISSIPATA PARTE TENUIORI &c. Accidit & hoc aliquando, licet rarius, imprimis quando calidis admodum remediis tractatur abscessus, sine emollientium & humectantium admistione. Solent sic mulieres mammas suppurratas exponere prunæ ardenti, ut evitent maturi abscessus aperturam lanceolâ Chirurgica faciendam. Diffatur tunc pars tenuissima, residuum inspissatum in scirrhum indurefcit, & tota vita cruciat metu canceri, qui & sæpe sequi solet. Similis durities sæpe remanet post bubones Venereos ante debitam maturationem discissos, vel nimis calefacientibus remediis tractatos. Convenit ergo hic monitum Galeni,

(a) Hippocrat. de Fistulis cap. 1. Charter. | (b) Ibid. cap. 2. pag. 142.
Tom. XII. pag. 141.

ubi de Erysipelatis & Phlegmones curatione agit, dum scirrhus metuendus erat ab his affectibus; dicit enim: *Quod si quis vehementer trahentibus & discutientibus medicamentis vacuare tentet, nec iis, quæ humectent & calefaciant, molliat ac liquet; huic paucis primis diebus pulchre successisse curatio videbitur; illud vero, quod de affectu restabit, insanabile erit. Si quidem toto, quod in eo erat tenuium partium discusso quod reliquum est, velut lapidosa concretio linquetur (a).*

VEL DENIQUE VENIS LIMPATICIS, AUT SANGUIFERIS &c. Dictum fuit in Commentariis §. 1; 8^mo. 7., pus in vulneribus fieri ab effusis per vasorum extrema humoribus, mora & resorptione, vel dissipatione partis fluidissimæ, inspissatis. Si enim detergeretur omni hora vulnus, non inveniebatur pus, sed tenuis tantum humor, qui duodecim horarum spatio v. g. in pus mutatur. Videtur autem fluidissima pars extravasatorum humorum potius resorberi osculis venosis quam dissipari extrorsum, quia bonum pus non nisi bene recto vulnere per Emplastra vel unguenta, solet fieri; & in omni vulneris superficie venarum æque quam arteriarum discissa hiant oscula, quæ illa vi, qua minimæ fistulæ vitreæ liquores trahunt, contiguos humores hauriunt, & dein majoribus venis tradunt, sicque sanguini miscent. Pari ergo ratione pus in abscessu diu relictum sponte attenuabitur, simulque, blanda sua indole deposita, acre fiet; tuncque venosis osculis contiguis resorptum cacoehymia purulenta sanguinem inficiet: unde febris hectica, & phthisis sequi poterunt. Pus autem in loco cavo corporis collectum resorberi sic posse venosis osculis, & sanguini misceri, docent observata plurima. Nobili viro in bellico conflictu cubitus trajiciebatur globulo plumbeo, sic ut cubiti os fractum esset, & dein gravia plurima symptomata una cum febre continua accederent; simulque magnus satis abscessus vulneris locum & vicina occuparet. Cum jam maturi abscessus aperturam faciendam statuissent Chirurghi, ingens diarrhœa vulneratum corripuit, statimque omnis tumor membri vulnerati evanuit; visumque fuit, ingentem puris copiam alvo excretam fuisse. Et dum postea novo pure tumeret abscessus, orta denuo diarrhœa illud evacuatum fuit: hocque modo periculosum satis vulnus sanabatur (b). In homine abdomen perfollo, cum levamine omnium symptomatum, urinam copioso pure mixtam vidit excerni *Sculterius* (c). Pulmonis apostema per urinas, thoracis vero per intestina & alvum expurgari vidit *Galenus* (d). Pulmonis vomitum, cum spinæ distorsione, purulenta dysenteria per plures dies durante sanatam fuisse, observatum fuit (e); licet ingens debilitas & pessima plurima signa persuasissent expertissimis Medicis, nihil spei amplius superesse; neque tantum ex ipsis orci faucibus sic erepta fuit hæc puella, verum etiam spinæ distorsio sponte emendata fuit. In variolis toties observatur, pus resorptum pessimas febres accendere; & deinde ad varia corporis loca pus illud deponi, subitosque attollere tumores, qui pertusi verum pus emittunt, & aliquando in pessima ulcera degenerant. Ingens observationum numerus apud fide dignissimos auctores habetur, quibus confirmatur pus nimis diu relictum in loco clauso venis absorberi, & sanguini misceri posse atque postea ad varia cor-

(a) Galen. Method. Med. Lib. XIV. cap. 4. Charter. Tom. X. pag. 321.

(b) Belloste Chirurg. d'Hôpital, part. 3. chap. XV. pag. 264.

(c) Armament. Chirurg. Observ. 61. p. 245.

(d) De Locis Affectis Lib. 6. cap. 4. Charter. Tom. VII. pag. 517.

(e) Acad. des Sciences l'an 1731. Mem. pag. 724. &c.

poris loca deponi : simulque patet ancipitem penitus eventum esse in his casibus, prout has illasve partes pus à sanguine secretum occupat. Licet enim in casibus modo enumeratis felici successu per alvi & urinæ vias pus eductum fuerit, magnum tamen periculum semper adest, ne viscera pessimis collectionibus corrumpat, aut totam sanguinis massam, cui miscetur, sic depravet, ut postea immedicabiles inde sequantur morbi. Pus enim in abscessu clauso collectum vix resorbebitur, nisi jam tenuius & acrius factum fuerit; dumque sanguini mistum per vasa fluit, majorem adhuc acquirat acrimoniam, unde pessimæ sæpe febres, sanguinis corruptio, & infinita mala sequi poterunt. Ab hac causa toties in Variolis, dum omnia fere in vado credebantur, subito phrenitis summa orta fuit, quam brevi mors sequebatur; pure nempe resorptio & ad cerebrum delato. Habetur apud Hippocratem (a) talis casus, qui huc facere videtur. Describit enim ægrum, interna pectoris suppuratione laborantem, in quo stertor pectoris, difficilisque respiratio docere videbantur, collectum magna copia pusuisse. *Prope sexagesimum autem diem oculus sinister cum tumore excacatus fuit, sine dolore: neque longe postea etiam dexter oculus, pupillaque admodum candida & sicca fiebant, neque multo post hanc excacationem mortuus est, non ultra septem dies, cum stertore & multa desipientia.* Admodum enim verosimile videtur, pus resorptum, pessima metastasi primo ad oculos delatum, dein ad ipsum cerebrum mortem induxisse. Prout jam varia viscera à purulenta hac colluvie occupantur, diversi orientur morbi; dum pus hic depositum premendo partes, quibus accumbit, vel majori acrimonia nata rodendo, illorum functiones turbat, vel integre tollit. Unde patet simul, summa hic prudentia opus esse: nimis enim cito apertus abscessus, antequam omnia penitus maturuerint, plurima damna facere poterit; uti dictum fuit in Commentariis §. 404.: si vero non concilietur exitus puri factio, periculosissima sequi poterunt mala. Signa autem maturationis perfectæ cum cetera enumerata fuerunt paragrapho precedenti.

Ab hac puris resorptione toties pereunt illi, quibus extirpatis membris, vel aneurismate exsecto, ingens vulnus factum fuit, quod quotidie magnam copiam puris dat. Si enim sæpe detergeatur pus in superficie vulneris collectum, omne fere corporis nutrimentum deficit, hac via exiens; sicque vero marasmo contabescunt. Si vero diutius relinquatur pus in tanti vulneris superficie, illud resorptum cacochymiam purulentam inducit, & omnia, quæ inde sequi possunt, mala; nisi decoctis vulnerariis detergentibus potatis magna copia abluatur pus sanguini mistum. Aliquando autem debiles tales ægri sufficientem talium decoctorum copiam ferre nequeunt, sed inde hydropici herent; tuncque fere semper infelix successus sequitur.

§. 407. **I** S D E M auxiliis (403.) integumenta loci suppurati inferne & superne emolliuntur, attenuantur, laxantur, ut & vicina.

Quando inflammatio per benignam resolutionem curari non potest, tunc sola suppuratio bona est, ad quam obtinendam requiruntur indicationes curatoriæ

(a) Epidem. Lib. VII. Ægrot. 30. Charter. Tom. IX. pag. 565.

§. 402. recensitæ, & sex numeris ibidem comprehensæ. Primo enim debebat crudum inflammatorium ad perfectam maturationem perducî; de qua re actum nunc est, uti & de signis, per quæ certi sumus, illam maturationem factam esse, tuncque præcedenti paragrapho enumerata sunt illa mala, quæ metuenda sunt, quando abscessus maturus, bono pure plenus, nimis diu clausus relinquitur: Secunda indicatio curatoria erat, ut locus suppurandus, uti & vicina emollirentur (vide §. 402. n°. 2.) de qua re nunc hac paragrapho agitur.

Omnium frequentissime inflammatio in panniculo adiposo, aut tunica cellulosa dicta, hæret, (vide §. 374.), cutis densa una cum epidermide huic incunibit in omni fere superficie externa corporis: hæc vel pertundi, vel sponte rumpi debet, ut concilietur exitus puri facti: unde facile patet, requiri quam maxime, ut hæc integumenta laxentur & emolliantur. Sed illa remedia, quæ ad maturationem crudi inflammatorii commendabantur in Commentariis §. 403., eadem opera & hoc perficient. Obturantia enim illa glutinosa, quæ n°. 2. illius paragraphi laudantur, simul hanc vim habent, ut laxent & emolliant solidas corporis humani partes. Dum ergo talia cataplasmata vel fomenta applicantur externe loco suppurando, integumenta macerantur & contabescunt quali: simulque pus sub cute hærens internam ejus superficiem alluet, & macerabit: quod multum adjuvatur prægnante illo calore, qui (vide §. 403. n°. 1.) in parte suppuranda adest. Non videtur ergo aliud quid ad hanc indicationem curatoriam requiri.

§. 408. **Q**UIN & hac ope (407.). minuta resistantia horum, per auxilia maturantia (403.) pus factum extra pellitur vel attrahitur foras.

Pus jam factum, in loco clauso hærens, auctum quotidie à vicinis partibus pressum communi omnibus fluidis lege tender eo versus, ubi minor resistantia est. Si jam emollientissimis remediis applicatis sic debilitata fuerint integumenta, ut cedant facillime distendenti puri, illud elevatis integumentis extrorsum tender, neque sinuosas vias in panniculo adiposo sibi faciet. Omnia ergo illa auxilia, quæ ad maturationem crudi inflammatorii adhibentur, simul etiam pus factum foras attrahunt. Probatum enim fuit in Commentariis §. 134., attrahentia remedia esse talia quæ resistantiam minuunt illo in loco, versus quem derivatio fieri debebat.

§. 409. **T**UM modice acria, emollientia, subpinguia mista simul applicentur, ut & mortua tegumenta facilius, & sine dolore, aperiri queant.

Debeat exitus conciliari collecto puri sub integumentis adhuc integris, unde horum divisio fieri debet, sive sponte & sensim dilacerentur à pure distendente, sive lanceola Chirurgica pertundantur. Ut autem hoc minimo dolore fiat, mollissima & subpinguia applicantur, quibus sic contabescunt integumenta, ut emortua fere omni sensu careant. Ubi ergo incipit fere maturus abscessus in verticem mucronatum elevari, huic loco Chirurgi plumaceolum unguento basilico, vel alio simili mollissimo, inunctum solent applicare, ut summa fiat in hoc loco integumentorum emollitio; sic enim laxatis fibris minuetur dolor (vide §. 228. n°. 1.),

N n n n ij

qui in hoc loco prominente satis acer plerumque esse solet. Simul aliquando emollientibus miscentur modice acria, ut fermentum panis, sapo venetus, mel &c. quæ macerata integumenta quasi emori faciunt, & citius rumpi. Sic lotrices, quæ tota die saponis lixivio manus macerant, albam & fere emortuam digitorum cutim habent, quæ sæpe etiam excoriando secedere solet. Formulæ similibus remedium in Materia Medica ad hunc numerum habentur.

§. 410. **D**EIN, presso rite pure in assurgentem tumorem; parti albissimæ, mollissimæ, eminentiori, inferiori, intrudatur scalpellum, donec exeuns pus satis penetratum doceat, dein elevetur æquabili sectione sursum lata plaga, aut per oppositam plagam culpide acta, media integumenta dissecentur, viratis fibris, vasisque: leniter mox exprimatur, & successive, pus abundans; nec aëre, nec turundis, vexetur.

Ubi jam omnis ambitus loci suppurandi perfecte emollitus est, & omnia quæ docuerunt, maturationem factam esse, nisi sponte rumpantur integumenta, exitus puri conciliandus est per artem; ne fiant illa mala, quæ §. 406. recensita fuerunt. In locis glandulosis abscessus diutius clausi relinquuntur, quam in aliis partibus, quia major ibi scirrhi metus est, si forte aliquid nondum maturatum relinqueretur. Unde de abscessuum apertura agens *Celsus* sequentia monuit. *Si pus maturuit, in alis quidem & inguinibus raro secandum est: item ubicumque mediocris abscessus est: item quoties in summa cute, vel etiam carne vitium est, nisi festinare curandi imbecillitas cogit. Satisque est cataplasmatibus efficere, ut per se pus aperiatur, nam fere sine cicatrice potest esse is locus, qui expertus ferrum non est (a).* Ex quibus apparet, quod non tantum in locis glandulosis, sed etiam in aliis casibus spontaneam abscessuum aperturam prætulit illi, quæ per artem fit, imprimis, uti videtur, ob cicatricis deformis metum. Sed vulnus lanceola factum pulchrius postea consolidari poterit, quam si major cutis plaga tabefacta, & à pure contento exesa, secesserit. Quare autem turpem sæpe cicatricem post apertum ferro abscessum viderit *Celsus*, patet facile ex illis, quæ in eodem loco habentur. Ubi enim altius hærebat pus, candenti ferramento abscessum aperiri iussit: alio in casu dum cutis vehementer extenuata erat, illam totam super pus excidendam voluit. Idem faciebat, si cutis palleret; tunc enim illam emortuam esse & inutilem futuram dixit, adeoque commodius esse, ut excideretur.

Ut concilietur exitus puri in abscessu maturo collecto, attendendum est ut hoc fiat minima cum molestia ægri & sine periculo læsionis partium suppositarum. Solæ enim integumenta communia pertundenda sunt, sub quibus pus hæret, & quæ à pure distenduntur & elevantur. Solent hinc Chirurghi mollissime premere in omni ambitu tumorem suppuratum, ut integumenta recedant quam maxime à partibus suppositis: cumque soleat plerumque quædam pars tumoris in verticem mucronatum prominere, uti dictum fuit §. 405., huic imprimis loco scalpellum imprimitur, quia integumenta hic magis attenuata, & fere emortua, facillime, & fere sine dolore, pertundi pos-

(a) A. Corn. Cels. Medic. Lib. VII. cap. 2. pag. 403. 409.

sunt, imprimis si subpinguibus & modice acribus applicatis mucronatus ille vertex fere contabuit, uti paragrapho præcedenti dictum fuit. Quantum autem commode fieri poterit, locus inferior tumoris pertundi deber, ut propria gravitate pus per aperturam factam effluere possit: sic tamen ut consideretur litus, quem pars affecta habebit post aperturam factam. *Danda enim opera, ut imus sinus exitum habeat; ne quis humor intus subsidat, qui proxima & adhuc sana rodendo sinuet* (a). Si vero apex abscessus maturi in superiori loco est, ibique integumenta molliissima & albissima appareant, præstat ibi pertundere, quam in alio loco quamvis inferiori, ubi viva adhuc & inflammata cutis non sine summo dolore, & magnis sæpe postea secuturis molestiis discindi poterit. Postea enim apertura facta poterit mutato partis situ, vel leni compressione per splenia & fascias ex arte circumductas satis impediri, ne pus relictum in abscessu pondere suo sinuosas vias in panniculo adiposo faciat.

Simulac scalpellum integumenta penetravit, hæret in medio pure, & statim ad latera scalpelli pus incipiet prodire; imprimis si leni pressione vicinorum tensa fuerint integumenta à pure subjecto. Ubi autem satis magna puris copia adest, præstat parum profundius demergere scalpellum, ut postea elevato ejus apice æquabili sectione latior plaga fiat. Ob eandem causam, si sine discrimine fieri possit, per medium abscessus mucronatum verticem ab uno latere ad oppositum scalpellum transfadigitur, & dein illud elevando simul & semel imposita integumenta discinduntur, ut sic maxima apertura fiat; quod nunquam nocebit. Nisi enim patulum sic fiat orificium, membranæ cellulosæ partes sæpe satis magnæ, fere gangrenosæ, protrudentur una cum pure, & aperturam obstruent, unde postea nova sectione opus erit. Accedit, quod evacuato pure tensa antea integumenta propria contractilitate corrugentur, & aperturam factam plurimum imminuant. Ideo pro generali fere regula haberi potest, dum abscessus pertundetur, tam latam debere fieri plagam, ac sine periculo læsionis partium subjectarum fieri poterit. Ubi autem pus statim sub cute hæret, patet facile non requiri, ut scalpellum ad magnam profunditatem adigatur. Aliquando vero accidit, pus hære pro fundius reconditum, & tunc majori cautela opus est: turpe enim est, frustra secuisse abscessum; periculosum autem sæpe, profundius apicem scalpelli adigere: & in similibus casibus peritia & dexteritas Chirurgi imprimis elucescunt. Nisi enim ex Anatome situm partium optime noverit, vel inani semper trepidabit metu, vel temerario ausu contemnet periculum, quod ignorat. Cum enim inflammatio omnium sæpissime in panniculo adiposo hæreat, uti jam aliquoties dictum fuit, illeque inter musculos ubique se insinuet, patet, quod profundissime sæpe pus latere possit, nullo omnino vicio apparente in integumentis. Inflammationis profundæ signa prægressa, suppurationis dein indicia hanc sequentia, fluctuatio puris, pressa parte, percepta, lucem in obscuris talibus casibus dabunt. Notabilem maxime talem casum habet toties laudatus egregius Chirurgus *De la Motte* (b). Fœmina post lochiorum suppressionem jam per novem menses lecto affixa fuerat, incurvato miserrime corpore jacere coacta, ut acerbissimos parum leniret dolores: facie enim genibus admota, calcaneis autem versus nates reflexis, noctes diesque in eodem manebat situ. Cumque dolor imprimis hypogastrium media inter umbilicum & pubem altitudine oc-

(a) Celsus ibidem.

(b) *Traité complet de Chirurgie* Tom. I. pag. 280.

cuparet, omni cura hunc locum examinavit peritissimus vir, atque aliquam undulationem percepit, quamvis nulla durities aut tumor adessent, neque integumentorum color ullo modo mutatus esset. Longo artis usu firmus in similitudinem malorum diagnosi conclusit, profundum hic latere abscessum, qui omnium malorum causa esset; &, licet abnuerent quatuor Chirurgi, qui antea miserimæ hujus fœminæ curam gesserant, aperturam faciendam esse in hoc loco statuit, illamque maximam cum cautela perfecit, donec in cavum abdominis penetrasset. Nihil tamen omnino puris exivit per aperturam factam, licet comprimeretur abdomen, spiritum contineret ægra, vel situs corporis mutaretur. Antonius infausto hoc eventu optimus vir, in sinu ridentibus aliis Chirurgis, abiit; candideque fatetur, insomnem se duxisse noctem. Sequenti mane, dum mutaret apparatus hesternæ plagæ, ingentem copiam puris exire vidit lætus, licet non intelligeret, ubi illud latuisset. Perrexerat pus quotidie effluere per sex circiter septimanarum spatium, tuncque perfecte convaluit à tam desperato morbo hæc fœmina; posteaque adhuc peperit, & sine difficultate incedere potuit, parum tantum inclinans versus dextrum latus, ubi malum hæserat. Similem casum vidi, dum profundum mammæ muliebris abscessum aperiret Chirurgus, quod ne gutta puris exiverit, licet ad pollicis altitudinem & ultra scalpellum adegisset: paucis tamen horis postea sponte ingens copia puris per aperturam factam prodit. Unde patet, non statim mutandam esse Diagnosin in tali casu, si omnibus prius rite ponderatis conclusum fuerit, pertundi debere locum. Licet enim scalpelli apex ad puris latibula non penetraverit, versus locum tamen hunc minus resistantem saepe sponte pus paulo post derivabitur.

VITATIS FIBRIS, VASISQUE. Si sub integumentis pus collectum immediate hæreat, &, uti dixit *Celsus* (a) pus cuti jungatur; satis patet, nullum esse metum læsionis vasorum aut fibrarum, cum pus cutim à subjectis partibus elevet, neque hætenus constiterit, suppurationem veram musculorum substantiam occupasse unquam, sed in panniculo adiposo hæreere tantum. Quamvis enim *Ægineta* (b) dixerit, quod *Abscessus sit corruptio & permutatio carniū aut carnosarum partium, veluti musculorum, venarum, arteriarum*; tamen post maximas suppurationes, imo & gangrænas, quotidiana observata docent, consumpto panniculo adiposo nitidissimos & integros inveniri musculos. Verum quidem est, miras aliquando degeneraciones non tantum tunicæ adiposæ, verum etiam muscularis ipsius substantiæ observatas fuisse; sed tunc talibus tumoribus apertis, non exivit pus, sed alius omnino liquor; unde non videntur ad suppurationem proprie dictam pertinere talia mala. Memorabile tale Exemplum habetur in *Actis Edinburgensibus* (c). Fœmina per aliquot menses tumorem gesserat in cruris externa parte, in medio prominentem & molliorem, cum manifesta fluctuatione, dum digitis premeretur. Cum cutis in illo loco ruberet, dolor adesset acerrimus, febris hæctica, sudor nocturnus, diarrhœa tertio quoque die recrudescens &c. videbatur optimum fore, si locus incideretur. Postquam ergo per biduum cataplasmata maturantia applicata fuerant, & integumentis plurimum attenuatis evidentissime fluctuatio percipiebatur, incisione satis profunda, quæ pollicem cum dimidio longitudine æquaret, apertus fuit tumor; sed ne guttula puris prodit;

(a) Lib. VII. cap. 2. pag. 409.

(b) Lib. IV. cap. 18. pag. 64.

(c) Medical Essays Tom. I. pag. 236

effluxerunt vero binæ tresve unciae muci. Sequenti die fungosa moles per aper-
turam factam emicuit, qua ablata similis recrevit, & postquam ingens copia
similis substantiæ sic ablata fuerat, immixtum specillum per totam cruris substan-
tiam penetravit, donec in opposita parte cutim tangeret. Paucis diebus postea
mortua hac muliere, cutis cruris affecti sana reperiatur, sed panniculus adipo-
sus una cum musculis degeneraverat in fungosam molem sic, ut diligenti exa-
mine tamen non potuerint distingui muscoli. Periosteum ubique secesserat ab
ossibus male affectis. Ex hoc casu constat quidem, in informem talem massam
potuisse per morbos mutari musculos, tamen nullum hic pus fuit inventum, quod
maxime notandum est. An similes abscessus intellexit *Hippocrates* (a) dicens :
Verum, ut summatim dicam, cetera quoque omnia, quæ mucosa sunt, & mucos produ-
cunt, utpote glanosa, ubi tangantur, subito in hanc vel illam partem sub digitis ela-
buntur, quam ob rem profundius inveniunt hæc Medici, quam putant. Agebat enim
in hoc loco de fractura auris, & suppuratione illam secuta; & monebat, si in-
cisio fieri deberet, illam non parvam debere esse, quia pus altius hærebat, quam
quis putaret: & paulo ante monuerat, cataplasmata nocere auri fractæ, quia absces-
sus concitant, & mucos plurimos & suppurationes molestas; deinde illa subjun-
git, quæ modo allegata fuerunt.

Non videtur ergo tantum periculum esse læsionis fibrarum, dum maturi abs-
cessus aperiuntur; adeoque supervacuam esse anxiam illam cautelam, quam sa-
tis operose describit *Fabricius ad Aquapendente* (b) in singulis fere locis cor-
poris, ut nulla fiat sectio nisi secundum ductum fibrarum musculorum subjacen-
tium: idem enim ille auctor postea in eodem Capitulo (c) fatetur, *Anatomes ignaros*
passim non errare in secandis abscessibus, ob puris copiam, quæ attollit partem,
& reddit membra subiecta tuta ab incidente instrumento.

LENITER MOX EXPRIMATUR, ET SUCCESSIVE, PUS ABUN-
DANS. In maximis abscessibus, in quibus ingens copia puris collecta hæret,
simul & semel omne pus educere non semper tutum videtur. Omnes enim par-
tes, quæ saccum talem pure plenum ambiunt, antea pressæ admodum, nunc uno
momento hac pressione liberatæ, flaccidissimæ fiunt, & sanguinis maximam co-
piam in vasa sua admittunt, unde minor ejus appulsus ad cerebrum & cerebel-
lum, hinc animi deliquia & mors ipsa metuenda forent. Idem periculum im-
minet, si ab alia quavis humorum colluvie partes pressæ subito liberentur: Ideo
monuit *Hippocrates* (d), quod *Empyici aut Hydropici, qui uruntur, aut secantur*
pure aut aqua confertim effluente, omnino intendant. Si vero abscessus fuerit in tali
corporis loco, ut facta apertura pro ratione effluentis puris possint fulciri partes
circumductis fasciis, tunc satis tuto maximæ etiam evacuationes fieri poterunt,
uti postea dicetur, ubi de Ascitis cura per Paracentesin agitur. Neque nocebit ali-
quam puris copiam hinc relinquere: cavi enim hujus sacci parietes pure bono, opti-
mo certe & naturali balsamo testæ, foventur, & depurantur, semimortua vaso-
rum extrema separantur, & omnia disponuntur ad optimam consolidationem,
uti latius dictum fuit in *Vulnerum historia* §. 158. n°. 7. 8. 9. Requiritur solum,

(a) De Articulis Charter. Tom XII. pag.

363.

(b) De Chirurgicis Operat. cap. 107. pag.

654.

(c) Pag. 662.

(d) Aphor. 27. Sect. VI. Charter. Tom.

IX. pag. 163.

ne impura erit abscessus superficies, si pus nimia mora à blanda sua indole degeneraverit; tunc enim & cutim impositam, & vicinas panniculi adiposi partes quasi contabescere facit: sed tunc sordidæ tales superficies consolidari simul nequeunt, nisi prius mundentur. Monuit hoc *Galenus* (a) dicens: *Quum vero cutis in suppuracionibus amplius extabuerit, ita ut attritis vestium fragmentis similis reddatur* (*ὡς ἰσκάδης γυνιδας*) *difficulter subjectis corporibus coalescit; itaque emissario largiore facto ulcus necessario curandum est.* Quænam vero requirantur auxilia, ut sordidum ulcus depuretur, & ad vulneris puri recentis conditionem deducatur, in historia vulnerum dictum fuit; & quidem præcipue in Commentariis §. 204. 205. 206. 207. 208. 209.

§. 412. **S**I inanis metus ferrum repudiat, applicetur causticum parti (410.); eschara butyro separetur mollita; curatio fiat ut prius (410. 411.).

Omniū tutissime scalpello aperitur maturus abscessus, sed aliquando Chirurgis res est cum hominibus, qui adeo pusillanimes sunt, ut in animi deliquium cadant, si vel mentio tantum hujus rei fiat. Optimum est, talibus fraudem facere, & illis nil minus suspicantibus pertundere abscessum. Varias ad hanc rem machinas excogitaverunt Chirurghi, dum annulo, quem indice digito gerebant, lanceolam occultabant; aut lanceolæ cuspidem, lamellæ metallicæ affixam, cataplasmate aut unguento reguebant, & deinde loco aperiendo applicabant, quod tunc leviter premendo apparatus facile perficitur. Plura talia apud *Paracelum* (b) & alios habentur. Si neque sic necessaria apertura maturi abscessus impetrari possit, tunc nihil aliud superest, quam ut mucronato abscessus vertici applicetur cauterium, potentiale dictum apud Chirurgos, qualiâ plura sunt in officinis. Lapis infernalis, vel & corrosivum vulgare Chirurgorum ex calce viva & cineribus clavellatis paratum (vide Materiam Medicam ad hunc numerum) imprimis solent adhiberi. Applicatur parti Emplastrum, quod in medio foramen habet, respondens loco, ubi causticum applicari debet; huic foramini imponitur causticum; & dein alio Emplastro superimposito tegitur; & ille apparatus sic constituitur per unam alteramve horam, donec Eschara satis profunde inusta fuerit. Unguento deinde basilico, butyro insulso, vel similibus mollissimis applicatis, escharæ mortuæ à partibus vivis separatio promovetur; & dein pus per aperturam sic factam educitur: tuncque ad curationem omnia eadem requiruntur ac modo dictum fuit. Certum interim est, meticulosos tales majorem longe dolorem pati; maturi enim abscessus divisio scalpelli ope unico temporis momento perficitur; caustici autem actio horam, & sæpe longius tempus, requirit; & postea, dum eschara sensim à vivis partibus contiguis secedit, adhuc satis magnus sæpe dolor sentitur. Major præterea cicatricis deformitas solet sequi post caustici applicationem.

(a) Method. Med. ad Glaucon, Lib. II. cap. 9. Charter, Tom. X. pag. 384.

(b) Livre VII. chap. X. pag. 167.



F I S T U L Æ.

§. 413. **H**INC Sinuum, Fistularumque origo, causa, natura, locus, effectus, intelliguntur (406.).

Dum recensabantur §. 406. illa mala, quæ metuenda sunt, quando pus in abscessu undique maturo nimis diu relinquitur, dictum fuit, quod pus mole, pondere, & motu, sinus fistulasque creet, variis locis corporis varias. De his autem sinibus & fistulis in hoc Capitulo agetur.

Sinus autem apud Medicos & Chirurgos designat cavum inter partes molles corporis à naturali contactu remotas factum à pure in abscessu collecto, & per aperturam, sponte vel arte paratam, educto. Talem enim sinus definitionem dedit Galenus de hac re agens (a). Quoad enim pars ita affecta nullam aperturam habet versus exteriorem superficiem, abscessisse ipsa quidem dicitur: affectio autem abscessus vocatur. At ubi aliqua ex parte aperta est, sic ut excernatur contentus humor, affectio non amplius abscessus, sed sinus jam appellatur. Ex hac vero definitione sequeretur, post omnem abscessum sequi necessario sinum. Obtinuit tamen usu, sinum tantum vocari, quando latera abscessus aperti, educto pure contigua facta non concreverunt cito inter se, sed separata manent diutius; adeoque in hoc cavo præternaturali quotidie novi humores aggesti difficultatem curæ faciunt. Unde alio in loco sequentem sinus definitionem Galenus dedit. Quum corpora pus excoriat, & continentia à subjectis separat ac diducit; deinde eo (pure) quomodocumque evacuato, separata nequeunt pristinam constitutionem recuperare, affectio sinus appellatur (b): Similia & habet alibi (c). Postquam enim monuerat (loco in Commentariis §. 411. citato), cutim in suppurationibus sic tabefactam, ut att. vestium fragmentis similis reddatur, difficulter subjectis corporibus coalescere; statim in sequentis Capituli initio dicit: Quum amplius subjectis corporibus cutis coalescere non potest, ejusmodi affectus sinus appellatur. Hanc autem sinus definitionem iisdem fere verbis ex Galeno habet Paulus Ægineta (d).

Fistula autem à sinu differt, quod sit angustior, diutius plerumque duraverit, & interna superficies, uti & orificium, callo sæpe obducta sint. Unde sequentem Fistulæ definitionem dedit Ægineta (e): Fistula sinus est callosus, plerumque ex abscessibus nascens, ducta ab arundineis fistulis translatione appellatus. Et alibi (f) addit, fistulas plerumque abscessus non bene curatos sequi. Paucissimis verbis Latinissimus Celsus, postquam monuerat ex abscessibus, & aliis ulcerum ge-

(a) Commentar. 2. in Lib. Hippocrat. de Medici Officina textu 27. Charter. Tom. XII. pag. 64.

(b) Galen. de Tumor. præter. natur. cap. 4. Charter. Tom. VII. pag. 316.

(c) Method. Med. ad Glaucon. Lib. II. cap. 10. Charter. Tom. X. pag. 385.

(d) Lib. IV. cap. 48. pag. 69. versa.

(e) Lib. IV. cap. 4. pag. 70.

(f) Lib. VII. cap. 77. pag. 93. versa.

neribus, fistulas oriri, illarum definitionem dedit, dicens: *Id nomen est ulceri alto, angusto, calloso* (a).

ORIGO autem sinuum & fistularum facile patet ex illis, quæ in Commentariis §. 406. dicta sunt. Phlegmone enim in abscessum mutata, si pus collectum, loco clauso manente, nimis diu retineatur, vel per aperturam nimis angustam, aut non satis declivem, exire commode non possit, sinibus & fistulis originem dat.

CAUSA. Pus bonum pondere & mole sua viam sibi faciens in facile dilatabili tunica cellulosa; vel idem pus more & stagnatione corruptum, & acrius factum, vicina rodens.

NATURA consistit in cavo præternaturali inter partes molles, à naturali contactu remotas per collectam materiem purulentam, ichorosam, saniosam &c.

LOCUS. Semper in panniculo adiposo est; neque constitit ullis observatis fide dignis, quantum novi, unquam muscularem substantiam proprie dictam fistulas pervasisse. In Commentariis §. 374. dictum fuit, quam late pateat panniculi adiposi extensio per totum corpus & omnes fere ejus partes; & quomodo non tantum musculis & tendinibus circumponatur, verum etiam majorum musculorum in minores subdivisionibus se interferat, quo ulque sensibus hoc detegi potest. Unde patet, quam mirabiles anfractus sæpe unus & fistulæ habere possint, & quare in profundis admodum & dissitissimis ab orificio suo locis fontem eorundem sæpe inveniant Chirurgi; uti plurima testantur observata. Juvenis viginti duorum annorum acerbissimo jam ultra sex septimanarum spatium cruciabatur dolore, qui lumbos, inguen, & nates in dextro latere occupabat, & cogebat miserum noctes diesque dorso incumbere, genibus elevatis, & pedibus versus nates reflexis. Optimis remediis in cassum adhibitis, dum examinantur partes dolentes, nulla mutatio in colore cutis aut figura partium inveniebatur: ad latus autem vertebrarum lumborum inter cristam ossis ilii & ultimam costam spuriam percipiebatur undulatio profunda. Hoc loco, ad magnam satis profunditatem adacto scalpello, discisso ad trium pollicum longitudinem effluxerunt sinceri puris libræ sex & ultra; & postea eodem die incredibilis copia puris sponte per aperturam factam exivit, totumque inundavit lectulum, inscio ægro, sed summo tamen cum doloris levamine. Dum apparatus auferret Chirurgus, & premeret abdomen, denuo notabilis copia puris exivit; & adhuc multo plus, dum crus & femur ejusdem lateris comprimerentur, quamvis nullus omnino tumor in his partibus apparet. Dumque sequentibus diebus, omni pure evacuato, quantum fieri poterat per compressionem abdominis & femoris, premerentur partes à pede infimo ascendendo ad genu usque, magna adhuc puris copia exivit (b). Ex mirabili hoc casu apparet, pus bonum, & nondum degenerans in pejorem indolem, solo, ut videtur, pondere sinuosas tales sibi fecisse vias à lumborum regione ad infima pedis usque: & licet valida tali suppuratione omnem corporis habitum perdidisset miser ille homo eo usque, ut summa femoris pars pugno comprehendi potuerit, quinque tamen mensium spatio post aperturam factam convaluit, & dein post binos menses amissum corporis

(a) A. Corn. Cell. Med. Lib. V. cap. 28. n°. 12. pag. 328.

(b) De la Morre Traité complet. de Chirurgie Tom. I. pag. 357. &c.

habitum penitus recuperavit; imo oberior, quam ante morbum hunc, redditus fuit.

Similem casum vidi, sed infausto eventu lethalem. Mediæ ætatis viro sano & alacri sine manifesta causa oritur tumor mollis in latere sinistro ad altitudinem circiter ossis ilii, & ad distantiam binorum digitorum transversorum a spina dorſi. *Celeberrimus Boerhaavius* consultus jussit scalpello dividi tumorem lata satis plaga: sed meticulosus æger, simulac primum scalpelli ictum sensit, aufugit ilico, neque potuit precibus amicorum, neque secutorum malorum intentatis minis, adigi, ut sectionem pateretur. Levisſimus tantum fuerat scalpelli ictus, qui cutim vix penetraverat, unde nihil effluxit omnino: sed, applicato emolliente cataplasmate, post biduum per cutis hoc vulnusculum incredibilis copia puris effluxit. Quia cæteroquin omnes functiones corporis optimæ apparebant, magna spes curæ affulgebat, sed pergebat quotidie copiosi puris effluxus. Cum dilatationem parvulæ hujus aperturæ quam maxime necessariam esse urgeret merito dextrissimus Chirurgus, qui ejus curam gerebat, post plurimos dies elapsos tandem illam admisit, sed iterum dolorem sentiens, cum firmari ab adstantibus ministris absolute renuisset, motu corporis impedivit, quo minus satis ampla hæc fieret. Interim per aliquot dies videbatur minui puris quantitas, sed mox inopinato ingens copia puris undatim fere effluxit. Magna cum difficultate à morosissimo hoc ægro impetravit Chirurgus, ut specillo liceret explorare, quo versus ille sinus tenderet, potuitque versus superiora sub integumentis ad costas usque illud adigere: cumque mortem ipsam vel levissime etiam sectioni præferre se pertinacissime assereret miser æger, ruptorio communi applicato illi loco, ubi specilli immissi apex resistantiam invenisset, nova apertura facta fuit. Sed licet splenis, ligaturis corporis situ idoneo &c. Tentaretur cura, nihil omnino profuit, & pergebat pus exire tanta copia, ut fasciæ, splenia, & lectulus inde quotidie inundarentur. Febricula hectica interea depaſcebat corpus, manente tamen appetitu integerrimo, & alvo libera, nec nimis laxa tamen. Post aliquot septimanas, emaciato jam penitus corpore, in inguine dextro ad altitudinem summitatis ossium pubis tumor mollis apparuit; quo aperto, sinceri puris septem libræ effluerunt, neque tamen ideo sequentibus diebus cessabat pus exire per aperturam inguinis æque, ac per binas priores, quæ in dorſo erant. Tandem exhausto corpore, ad vitæ finem usque appetitu optimo manente, & placide exspiravit.

Cum mirarer quam maxime, unde tanta copia puris prodire potuisset, & peritissimus Chirurgus putaret, ex ipso abdominis cavo per inguinis aperturam fluxisse, quod tamen vix credere potui, cum nullus abdominis tumor, & nullum vitium in chylopoiesi apparuerit per totum morbi decursum, obtinui ab amicis defuncti, ut in cadavere hæc perſcrutari liceret.

Specillum immisimus per binas aperturas in dorſo, neque illud ad notabilem aliquam profunditatem adigere potuimus. Dum vero illi orificio, quod in inguine erat, specillum applicuimus, illud tota sua longitudine ingressum fuit, licet nulla vis adhiberetur, sed quam lenissime hoc factum fuerit. Educto hinc specillo filum plumbeum per idem orificium introductum fuit, & sensim versus superiora illud adigebatur, donec resistantia perciperetur. Deinde lenta incisione filii hujus plumbei ductum sequentes invenimus, illud non penetrasse in cavum abdominis, sed versus posteriora sursum ivisse, sub peritonæo supra musculum Pſoas, sub rene dextro: neque potuimus ullam communicationem inve-

nire hujus sinus cum aperturis illis, quæ in dorso erant. In thoracis & abdominis cavis ne guttula quidem puris inventa fuit; cumque toto morbi decursu nullum vitium in cerebri functionibus observatum fuerat; à cranii apertura abstinuimus. Ex quibus satis patuit, omnem illam puris copiam in solo panniculo adiposo hæsisse, cum nullæ aliæ partes vitiatæ apparerent, & in magnis cavis corporis nullum puris vel suppurationis prægressæ vestigium deprehensum fuerit.

EFFECTUS sinuum & fistulæ similes sunt illis, qui in Commentariis §. 406. recensiti fuerunt, dum pus non diu in abscessu maturo clauso relinqueretur: in sinibus enim & fistulis hærens, neque integre evacuari potens plerumque, ibi moram trahit, attenuatur, putrescit, & in acrem saniem degenerat; & quidem adhuc citius quam in abscessu clauso, qui aëri datur accessus. Sinus ergo & fistulæ parietes pessime afficiuntur ab hoc pure corrupto, sicque degenerabunt tandem, ut difficillime mundari possint, & ad puri vulneris conditionem reduci; quod tamen omnino requiritur, ut unio partium separatæ fieri possit: quam etiam impedit pus ibi relictum, instar corporis heterogeni interpositi omnem concretionem prohibens. Simul patet inde, eo pejores fistulas esse, quo diutius duraverint, & quo propiores fuerint talibus partibus, à quarum erosione vel magnum periculum, vel curæ tarditas & difficultas, merito prævidenter. Unde Hippocrates (a) de his agens dixit: *Fistula difficillima sunt, quæ in cartilaginosis & carne vacuis locis fiunt, cavæ sunt, cuniculos agunt, & ichore semper manant. Caruncula autem in eorum osculo est. Facilius autem curantur, quæ in mollibus, carnosiss, & nervorum expartibus locis contingunt.* Accuratissima etiam, sed parum amplior, fistularum Prognosis apud Celsum (b) habetur. *Expedita curatio est in fistula simplici, recenti, intra carnem. Adjuvatque ipsam corpus, si juvenile, si firmum est. Inimica contraria his sunt: itemque, si fistula os, vel cartilaginem, vel nervum, vel musculos laesit; si articulum occupavit; si vel ad vesicam, vel ad pulmonem, vel ad vulvam, vel ad grandes venas arteriasve, vel ad maxillas, guttur, stomachum, thoracem penetravit. Ad intestina quoque eam tendere, semper periculosum, sæpe pestiferum est. Quibus multum mali accedit, si corpus vel agrum, vel senile, vel mali habitus est.*

§. 414. **A**PERTI (413.) facile cognoscuntur; clausi cavitatis mollis tactu deteguntur.

Quæritur jam, quibus signis cognosci possit, an sinus aut fistula adsit? Quando apertura extrorsum patet versus corporis superficiem, tunc satis detegi possunt. Si enim puris magna copia per parvum tale orificium exeat, vel pressione partium vicinarum inde educi possit, satis patet, amplum debere locum esse, in quo pus illud hæsit. Ut autem simul constet, versus quam partem sinus vel fistula tendat, specillo jubet explorari Celsus (c) dicens: *Ante omnia autem demitti specillum in fistulam convenit, ut quo tendat, & quam alte perveniat, scire possimus &c.* Hacque methodo voluit simul distingui posse, an fistula ad os usque pervenerit nec ne; uti etiam an os curiosum jam factum sit. Ut autem certus esset, an ab uno orificio externo ortæ fistulæ dividerentur in plures quasi rivulos, sequens monitum dat: *Corporis inclinatio de-*

(a) Coac. Prænot. n°. 511. Charter. Tom. VIII. pag. 881.

(b) Lib. V. cap. 28. n°. 12. pag. 318. 319.

(c) Ibid. pag. 319.

cet, num in plures partes fistula penetrarint; quia sæpe, cum quis aliter decubuit, aliterque membrum collocavit, pus ferri, quod jam desierat, iterum incipit; testaturque, non solum alium sinum esse, ex quo descendat, sed etiam in aliam corporis partem eum tendere (a). Omnium autem optima methodus sinus & fistulas, variumque eorundem decursum, detegendi videtur esse, si per siphonem prudenter & leni vi aqua tepida injiciatur. Hæc enim facile se per omnes anfractus fistularum insinuabit; & si versus exteriora sub integumentis fistula decurrat, tumore elevata cutis varium docebit iter: si vero profundius descendant sinus aut fistulae, quantitas aquæ injectæ cavi talis præternaturalis magnitudinem docebit saltem; neque in tali casu specilli usu plura fere deteguntur: Præterea, si parum rudius adigatur specillum per fistulae orificium, vias læpe faciet dilacerando tenerum panniculum adiposum, quæ non adfuerant; neque potent sic cognosci fistulae longitudo, si anfractuoso itinere decurrat.

Ubi vero clausi adhuc sinus sunt, difficilior Diagnosıs est, imprimis si profunde admodum hæserint. Lucem tamen dabunt inflammationis prægressæ signa, & dein suppurationis hanc secutæ indicia. Si tunc post hæc attactu mollis cavitas, & undulatio percipiuntur, satis certi sumus, sinum talem adesse. Accedit, quod raro suppuratio alicujus momenti in corpore diu lateat, quin hæctica adsit febricula. Summa tamen prudentia hic opus est, ne aliquando latens Aneurisma, aut varicosus tumor pro suppuratione profunda habeantur: qualis error tamen perito Chirurgo non facile continget, si mali originem & decursum attenta mente consideraverit. Tamen fatendum est, profundos adeo aliquando inventos fuisse abscessus, ut in illis detegendis sæpe cespitaverint etiam peritissimi, uti patet ex miro illo casu, cujus mentio facta est in Commentariis §. 410. & apud optimum Chirurgum *De la Motte*, qui tanto cum candore hunc casum descripsit, plura similia observata inveniuntur.

§. 415. **C**URANTUR dissecta parte inferiori, impletione cavi per liquefacta digestiva pro re nata, injectu detensivorum, ligatura sensim premente à fonte ad aperturam: sed citissime integumentis artificiose supra cannulam fossatam, filum argenteum, vel per syringotomon, dissectis.

Omnibus sinibus & fistulis communis curatio hæc sequentia requirit. 1º. Ut liber concilietur exitus puri, & impediatur, ne illud in sinu & fistula stagnare diu possit, & corrumpi. 2º. Ut tota interior superficies cavi sinus vel fistulae munderetur, & ad conditionem puri vulneris deducatur. 3º. Ut munda partes, sed adhuc separatæ, contiguæ fiant & concrecant inter se. Ubi autem bina priora requisita ars perfecit, tertium facile obtinebitur; uti optime monuit *Celsus* (b) dicens: *Neque verendum est, ne purum corpus puro corpori junctum non coeat, adjectis quoque medicamentis ad id efficacibus; cum sæpe exulceratio digitorum, nisi magna cura prospeximus, sanescendo in unum eos jungat.* Præcipua ergo difficultas in libero puris collecti exitu conciliando, & depuratione cavi sinus, consistit: & dantur aliquando tales casus, in quibus illud admodum difficile, imo sæpe

(a) Ibid. pag. 330.

(b) Ibid. pag. 331.

omnino impossibile est. Vidi sic fistulam angusto orificio in pectoris sinistri anteriori parte patentem, quæ anfractuosa via pone costæ cartilaginem descendebat. Non poterat ulla arte impediri, ne pus in fundo hujus fistulæ collectum stagnaret, cum costæ cartilago & compressionem redderet iuutilem, & aperturam fundi talis fistulæ periculotam admodum, si non omnino impossibilem. Voluit quidem *Celsus* (a), in tali casu costam ab utraque parte præcidendam & eximendam esse, ne quid intus corruptum relinquatur, sed nemo facile tentabit, credo, in vivente homine ex costa fragmentum abscindere, & deinde illud avelere à pleura, cui satis firmiter adhæret. Omnes fere methodos expertus æger sine fructu patienter tulit, quod non poterat evitare, malum, & post biennium subita morte extinctus fuit. Sic etiam, ubi fistula ad os usque pervenit, illudque affecit, non poterit depurari locus, antequam corrupti ossis particula secesserit, vel per artem ablata fuerit. Frequentissimæ occurrunt tales fistulæ circa maxillas, quæ per annos sæpe durant, nullisque cedunt remediis; dente autem evulso carioso, vel etiam sano, qui per maxillarum thecam penetrans continua irritatione partes molles incumbentes lædit, paucorum sæpe dierum spatio sanantur. Ad fistularum autem curam imprimis laudantur sequentes Methodi:

DISSECTA PARTE INFERIORI. Si sinus aut fistulæ orificium sic ponatur, ut contenti cavo humores propria gravitate versus illud tendere nequeant, semper difficilis cura est; accumulabuntur enim & augebunt cavum illud præternaturale. Ideo tunc tentant periti Chirurghi semper novam aperturam facere in parte inferiori, ut sponte pus, sanies &c. elabi possint. Si autem dubium videatur, ubinam inferior sedes sinus vel fistulæ sit, turunda obturant orificium per 24 horas sic, ut nihil exire possit; tuncque collecti humores tumorem facient in loco maxime declivi. Idem fit, si per siphonem prudenter aqua tepida injiciatur. Hac methodo quidem cavetur, ne stagnent in sinu vel fistula collecti humores, sæpe autem tota superficies interna sordida admodum, vel etiam callosa facta est; unde requiritur depuratio, quæ fit

IMPLETIONE CAVI PER LIQUEFACTA DIGESTIVA PRO RENATA. Quomodo similes sordes in vulneribus natæ tolli debeant, dictum fuit in Commentariis §. 207. atque eadem remedia hic convenient, leniora vel aciora, prout crassiores sordes fuerint, vel magis minusve callosa superficies sinus vel fistulæ inveniatur. Sed patulo vulnere facile hæc in omni puncto applicari poterunt; longe autem difficilius est, eadem per omnem superficiem anfractuosa fistulæ distribuere. Veteres Medici Collyriis ad hanc rem usi sunt: quo nomine licet hodie plerumque in officinis tantum intelligantur illa remedia, quæ oculorum morbis curandis inserviunt, tamen constat, illud quondam magis generalem significationem habuisse; *κολύριον* enim dicebatur quasi *κολεῖν ἔρειν*, cauda truncata, uti ex optimis auctoribus probat *Gorræus* (b), ob figuram conicam. Sic & *Celsus* (c) laudans ad curam fistulæ recentis & simplicis, quæ in carne est, Emplastrum, quod recentibus vulneribus imponitur, modo salem vel alumen, vel squamam æris, vel æruginem &c. habeat, dicit: *Exque eo collyrium fieri debet altera parte tenuius, altera paulo plenius. Idque ea parte, qua tenuius est,*

(a) Lib. VII. cap. 4. n^o. 2. pag. 412.(b) *Definit. Med.* pag. 324 325.

(c) Lib. V. cap. 28. pag. 330.

antecedente demitti oportet in fistulam, donec purus sanguis se ostendat &c. Totus scopus videtur fuisse, ut hac methodo superficiei internæ sinus vel fistulæ in omni puncto applicarentur talia, quæ sordes hic natas abstergere, aut callum consumere possent. Omnium optimum ergo videtur esse, si aloë, myrrha, olibanum, ærugo &c. non excipiantur solis pinguibus emplastris, sed potius melle aut vitello ovi subigantur: tunc enim ab humoribus affluentibus solventur, sicque majori efficacia agent in loca, quibus applicantur; & præterea, dum sic diffluunt, æquabilius distribuentur per omnem sinus aut fistulæ amplitudinem. Accedit, quod collyria firmam satis consistentiam habere debeant, ut instar corporis solidi per orificium sinus vel fistulæ immitti, & ad fundum usque protrudi possint; adeoque, nisi deliquescant sensim, toto tempore, quo ibi manent, instar corporis duri contudent & prement parietes, sicque sæpe magis nocerent, quam prodesse. Sumitur ad hunc usum v. g. terebinthina purissima, vel aliud simile nativum balsamum; cui additur æqualis quantitas vitelli ovi; deinde his bene mixtis additur mel, & alia detergentia, prout requiritur; & ex his vel fit solidum coni truncati instar collyrium, vel liquidioris consistentiæ remedium, quo leni calore fuso tota cavitas impletur.

INJECTU DETERSIVORUM. Facile patet, priorem methodum tantum locum habere, ubi simplex sinus vel fistula est, restaque via decurrit: Quando autem anfractuoso itinere fistula procedit, vel in plures quasi rivulos finditur, aliis auxiliis opus est. Tunc enim collyrio uti non debemus, quod unam partem curet, reliqua omittat; sed eadem medicamenta arida in calamus scriptorium conjicienda sunt, isque ori fistula aptandus; inspirandumque, ut ea medicamenta intus compellantur. Aut eadem ex vino liquanda sunt, vel, si sordidior fistula est, ex mulso; si callosior, ex aceto; atque intus infundendum, quidquid inditum est (a). Omnia ergo illa medicamenta, quæ collyriis parandis pro re nata inserviebant, liquidis convenientibus diluta per fistulæ aperturam solent injici, & variæ tales formulæ in Materia Medica ad hunc numerum habentur. Notandum tamen, sæpe hæc nocere, si valido impetu urgeantur; tunc enim in facile dilatabili panniculo adiposo novas vias facere possent, adeoque malum augere. Præterea omnia hæc tantum profunt, quatenus sordes tollunt, & callositatem fistularum consumunt: post depurationem autem factam nocerent potius; quia impedirent partium separatarum unionem: optima enim etiam ballama, inter partes corporis vulnere separatas interposita, instar corporis heterogenei consolidationem impediunt. Unde sola glutinantia commendat Celsus (b) tunc, si ea tunica, qua inter foramen & integram carnem est, victa tot medicamentis exeat, infraque ulcus purum sit. Spongiam enim melle cocto illitam imponi jubet, & collyria damnat, cum nullus metus sit, ne purum corpus puro corpori junctum non coeat &c. uti paulo ante ex eodem auctore dictum fuit. Cognoscitur autem, totam internam superficiem puram esse, si pus album lave æquabile exeat, nihilque saniei vel ichoris adlit, nullusque fœtor percipiatur. Sic v. g. turundam vel collyrium sinui aut fistulæ immissum, uti & emplastrum aut plumaceolum ejusdem orificio applicatum, sedulo examinant Chirurgi periti, dum renovant apparatus, ut videant an in quodam loco tenui sanie hæc madescant loco boni puris; tunc enim certi sunt, nondum omnem ambitum sinus vel fistulæ purum esse.

(a) Ibidem pag. 332.

(b) Ibidem.

LIGATURA

LIGATURA SENSIM PREMENTE A FONTE AD APERTURAM.
 Pus, licet optimum fuerit, tamen mora & stagnatione corrumpitur, & degenerat in saniem tenuiorem & acriorem (vide Commentaria 9. 402. n°. 4.): unde, licet interna sinus aut fistulæ superficies optime mundata fuerit, nisi impediri possit puris nimis diuturna mora, novæ iterum sordes nascentur, neque poterit fieri partium separatarum concretio. Ut autem hoc impediatur, artificiosa ligatura summum usum habet, & talis dispositio partis, ut pus collectum liberrime exire possit per fistulæ orificium, ac nullo modo colligi & stagnare in fundo ejusdem. Sic habetur apud *Galenum* (a), quod in femore deorsum vergentem & ad genu terminatum sinum, cujus orificium sublime supra femoris medium esset, curaverit sine ulla ex adversa parte divisione, subtrato sub poplite molli pulvinari, quo demissius inguen quam genu esset. Ligatura vero talis esse debet, quæ leni pressione mundas jam partes reddat contiguas. Cum autem etiam in puro vulnere, si alicujus momenti fuerit, quotidie pus generetur, debet illud exire posse: unde non simul & semel in tota sua longitudine sinus vel fistula per fascias & splenia comprimi debet, sed sensim à fonte ad aperturam procedendo. Summa ergo cura inquirendum est, in quo loco fundus sive fons sinus vel fistulæ hæreat: hoc autem cognosci potest prudenti injectione mulsæ vel similium detergentium, quæ fistulæ depurandæ inserviunt, si attendatur, quo versus & quo usque hæc tendant; uti etiam si leni pressione, incipiendo in loco satis dissito, & pergeundo sensim versus aperturam, contentum in sinu pus exprimatur: simulac enim tunc pressio, in parte sana vicina facta, progrediendo pervenit ad fundum sinus, incipiet pus prodire per aperturam. Cognito ergo illo limite, ubi fundus sinus vel fistulæ contiguus est partibus sanis, imponitur huic loco spleniolum (si certus sit Chirurgus totam internam superficiem mundam esse) sicque pressio fasciæ circumductæ determinatur, ut in hunc locum agat; reliqua sinus aut fistulæ longitudo spiralis fasciæ circumductione laxius tantum firmatur, ejusdem orificio liberrimo manente, ut pus contentum exire possit. Sollicite hanc methodum descripsit *Galenus* (b) de varia sinuum cura agens: *Colligatio autem à fundo sinus quidem incipiat, finiatur autem in ejus orificio. Fasciarum vero circumductiones sine dolore fundum sinus premant, quæ paulatim usque ad orificium (sinus) laxentur.* Simulque monet, Emplastrum debere applicari, quod circa sinus aperturam forficibus discissum sit, ut effluere possit sanies, si adsit &c. Sequenti deligatione antequam tollatur spleniolum fundo sinus applicatum, leniter exprimitur omne pus, & postea ablato spleniolo tentatur, an adhuc aliquid puris premendo loca vicina exeat; si enim hoc fiat, signum est, splenium non fuisse adhibitum debito loco, sed ultra illud adhuc pus collectum fuisse: adeoque debet ejus situs mutari. Si vero nihil puris tunc exire deprehendatur, spleniolum illud parum plus versus sinus aperturam admoveatur, sed sensim procedendo, & similibus cum cautelis; sicque concretio partium separatarum in fundo sinus incipiet, sensimque versus ejusdem aperturam progredietur. Brevi sermone, ut solet, hæc comprehendit *Hippocrates* dicens: *Quæ abscesserunt, ut sublimia sint, naturalem sedem tangere quidem debent, non vero comprimi* (hunc enim sensum

(a) Method. Med. ad Glaucon. Lib. II. cap. 10. Charter. Tom. X. pag. 316.

(b) Ibidem.

esse obscuri satis hujus loci *Galenii* Commentariis docere videtur). *Ex sana vero parte incipiendum, & ad ulcus finiendum, ut, quod subest, emulgeatur* (ἐκ τῆς ἀσφαλτοῦς), *aliud autem non colligatur* (α). Optime autem hic videtur convenire emulgenti vocabulum, quia sic sensim à fundo sinus derivata pressione versus ejus aperturam liberam exprimitur omne pus, uti fit, dum vaccarum ubera simili blanda compressione à superioribus versus inferiora mulgentur, papillæ orificio interim patulo manente. Signa autem, per quæ novimus curam in hoc casu bene procedere, *Galenus* optime recensuit sequentia: *An vero sinus profundum pulchre conglutinatum fuerit, hac tibi sit diagnosi ex sanie effluente: si pauca vel multa sit, cocta vel cruda. Præterea si circa ipsum sinum neque dolor sentiatur, neque tumor appareat, sed totus locus æquabilis sit, siccus, ac doloris expers. Quod si puris probe cocti pauculum in orificio videris, multo magis de glutinando sinu sperandum est* (b). Quamvis autem hæc methodus in plurimis casibus pulchre profuerit, facile tamen patet, illam locum habere non posse, nisi tota superficies sinus vel fistulæ purissima fuerit, & pressio externa in illam agere possit. Ubi ergo vel ab ossæ vicino affecto fistula originem duxit; vel tota callosa interius se non facile depurari patitur; aut sic decurrit, ut pressio externa fundum ejus attingere nequeat; tunc sola dissectio integumentorum superest, ut tota superficie nudata medicamenta idonea possint applicari in omni loco, ubi hoc requiritur.

SED CITISSIME INTEGUMENTIS DISSECTIS ARTIFICIOSE SUPRA CANNULAM FOSSATAM. Omnium promptissima cura fistularum & sinuum est, si dissecantur integumenta, sic ut fistula mutetur in ulcus apertum. Difficultas enim curationis non pendet adeo à callositate interna, quam quod pus ibi stagnet & corrumpatur. Observata fidelissima docuerunt, & plures similes casus ipse vidi, quibus constitit, simplici dissectione curatas fuisse fistulas quatuordecim dierum spatio, quæ aliis methodis frustra tentatæ fuerant per plurimos menses, imo & annos. Hujus rei probe gnarus *Celsus* ideo dixit (c): *Adversus fistulas quoque, si altius penetrant, ut ad ultimum demitti collyrium non possit, si tortuose sunt, si multiplices, majus in manu, quam in medicamentis praesidium est; minusque opera est, si sub cute transversa feruntur, quam si recta intus tendunt. Igitur, si sub cute transversa fistula est, demitti specillum debet, supraque id ea incidi. Si flexus reperiuntur, hi quoque simul specillo & ferro persequendi sunt. Idemque faciendum, si plures se quasi rivuli ostendunt.* Multa quidem jaçantur ad maxime etiam rebelles fistulas sine sectione curandas arcana, sed quam parum his fidei habendum sit, patuit exemplo *Ludovici Decimi quarti, Gallie Regis*. Cum enim fistula ani laboraret, & innumera proponerentur remedia, præcipua tentata fuerunt Regis jussu in aliis ægris simili morbo laborantibus, sed incassum omnia: Cumque integer annus jam transiisset, dum hæc tentamina fierent, Rex operationem subiit, & constanti animo tulit, licet pluribus incisionibus omnes fistulæ rivulos prosequi cogeretur Chirurgus (d). Ut autem hæc sectio tuto fieri posset sine læsione suppositarum partium, varias excogitaverunt methodos Chirurgi. Quando enim sub integumentis decurrit fistula, sufficit cannulam fossatam per

(a) Hippocrat. de Medici Officina Textu 27. Charter Tom. XII. pag. 63.

(b) Galen. Method. Med. ad. Glaucon. Lib. II. cap. 10. Charter. Tom. X. pag. 386.

(c) Lib. VII. cap. 4. n°. 1. pag. 412.

(d) Dionis Cours d'Operations de Chirurgie Demonstret. 4. pag. 288. &c.

orificium fistulæ immittere prudenter, & adigere ad fundum usque; deinde scalpello vel novacula crenæ huic instrumento insculptæ fortiter appressa simul & semel omnia incumbentia discindere. Ubi vero fistulæ decursus magis introrsum tendit, uti v. g. in fistulis ani tories sit, tunc adhibent

FILUM ARGENTEU M. Ex argento puro candefacto & sensim refrigerato, ut mollissimum sit, paratur stylus apice obtuso instructus, qui per aperturam fistulæ immittitur, & sensim protrahitur ad fundum usque, donec sub integumentis sentiat obtusus ille styli apex: incisione tunc ibi loci facta apex ille educitur, tuncque bina styli extrema simul eleuantur, ut integumenta à suppositis partibus removeantur, & tuto scalpello vel forfice discindi possint.

Hac methodo usi fuerunt in fistulis ani sectione curandis: stylum enim talem per externum orificium fistulæ immissum protrudebant, donec indice digito ano immisso ejus extremum sentirent Chirurgi, emergens nempe per internum fistulæ orificium; vel, si illud non adesset, styli apice audacter perforabant intestinum rectum. Tunc indice curvabant styli extremum, & per anum educebant; & prehensis binis styli extremis protrahebant illa quæ discindenda erant; nempe non tantum integumenta communia, sed & sphincter ani, & ipsius intestini recti latus, dissecari in tali casu debent (a). Aliam adhuc methodum fistulas ani curandi habet *Hippocrates* (b): Stanneum specillum, quod altero suo extremo perforato quintuplex linum crudum gerat, lecta equina circumvoluta colligatum, fistulæ orificio jubet immitti: deinde sinistrae manus indice ano inducto specilli extremum prehendi, incurvari, & foras produci vult, donec linum sequatur. Ablato dein specillo lini capita nodo constringi jubet, ægrumque dimitti, ut sanorum instar negotia sua peragat. Scopus erat, ut sensim sic attererentur lino crudo integumenta omnia, tandemque integre solverentur: unde monuit *Hippocrates*, quotidie intorquendo tantum debere intendi linum crudum, quantum laxatur exesa fistula: sicque linum crudum putrescere videatur, alterum illi adjunctum protrahatur per fistulam, similique modo ligetur. Hanc curationis rationem longam esse dixit merito *Celsus* (c); an autem sine dolore sit, uti affirmat pariter, quam maxime dubitarem. Linum enim paulatim cutem, quæ supra fistulam est, incidit: simulque & id sanescit, quod à lino relictum est, & id, quod ab eo mordetur, inciditur. Dum enim inter ambulandum motis his partibus linum ad cruda fistulæ latera atteritur, molestus satis dolor esse debet; si vero adeo callosa sit fistulæ superficies, ut ab hoc attritu non doleat, non facile etiam hac methodo integumenta incumbentia solventur; tuncque post longa hujus curationis tædia ad scalpellum tamen veniendum erit. Frustra autem sæpe tentatam fuisse hanc methodum satis patet ex illis, quæ paulo post apud *Hippocratem* in eodem loco habentur (d). Dicit enim: si vero fistula non fuerit exesa, demittens specillum incide, quo usque illud pervenerit, & insperge aris florem, & per quinque dies relinque &c. & *Celsus* in loco modo citato monet, illos, qui festinare volunt, cutem lino adstringere debere, quo celerius secetur: uti etiam, si linum illinitur callum excedentibus medicamentis, adjici quidem celeritati, sed & tormento quoque; tandemque sub-

(a) Ibid. pag. 285.

(b) De Fistulis cap. 3. Charter. Tom. XII.

pag. 142.

(c) Lib. VII. cap. 5. n°. 4. pag. 414.

(d) De Fistulis cap. 4. pag. 143.

jungit, posse tamen fieri, ut ad scalpelli curationem etiam illo loco veniendum sit &c. Eviluit ideo hæc methodus, cum vel nullum successum habeat, vel diuturnitate simulque doloris fere continui molestia & ægro & medenti summum tedium faciat.

SYRINGOTOMON. Ab usu, quem in fistulis secandis habet, nomen datum fuit huic instrumento, cujus variz figuræ apud auctores habentur. Omnium maxime solebat laudari ad fistularum ani curationem. In hoc instrumento stylus, quo exploratur fistulæ profunditas & decursus, unitur scalpello, per quod dissectio fieri debet; sicque unico instrumento perficitur operatio, quæ aliter plura requirebat. Syringotomi tamen, qui apud *Scultetum van Solingen*, *Fabricium ab Aquapendente* & alios delineantur, minus commodi videntur esse, imprimis pro fistularum ani curatione. Falcatus enim cultellus in specillum ex eodem metallo paratum definit, adeoque non potest habere illud instrumentum debitam flexilitatem, quæ requiritur, ut digito per anum immisso specillum in cavum intestinum prominens incurvari & protrahi possit. Recentiorum autem Chirurgorum industria hujus instrumenti incommoda correctæ fuerunt. Cultelli enim falcati ex optima chalybe confecti uni extremo ferruminando unitur specillum ex puro & flexili argento confectum, dum alterum extremum in manubrium incurvum definit (a). Reliqua autem, quæ in confectioe hujus instrumenti observanda sunt, uti & ejusdem figura apud laudatum auctorem habentur.

Discissa sic fistula mutatur in ulcus apertum, & si tunc appareat, plures adhuc cuniculos adesse, simili modo dissecandi sunt, ut nullæ maneant latebræ, in quibus pus collectum possit corrumpi & curam retardare. Cumque sæpe tunc interna superficies callosa inveniatur, solent hinc inde scarificare Chirurgi, ut fortioribus digestivis vel etiam erodentibus callositas citius tolli possit. Imo *Celsus* (b) voluit, ubi ad fines fistulæ ventum est, excidendum esse ex ea totum calum. Omnia autem, quæ in Commentariis §. 411. dicta sunt, hic pariter observanda erunt.

§. 416. **B** U B O, parotis, furunculus, anthrax, carbunculus; phyma, erysipelas, morbilli, variolæ, maculæ, rubræ, hinc quoad cognitionem, prædictionem, curationem, sciuntur.

Ex illis autem omnibus, quæ hætenus in historia inflammationis, & suppurationis inde secutæ, dicta fuerunt, habetur cognitio plurimorum malorum, quæ ad inflammationem & ejus exitus varios referri possunt, quamvis peculiare nomen illis in arte detur. Simulque eorundem prognosis & curatio ex iisdem fontibus hauriri possunt. Præcipua hic enumerantur.

B U B O. Inguina *βubωνες* dixerunt Græci, & glandularum in inguine tumores eodem nomine vocaverunt. Cum autem similes glandulosi tumores sub axillis observentur, idem nomen & illis datum fuit. Imo & glandularum in aliis corporis partibus tumores bubones appellatos fuisse, apud Galenum (c) legitur:

(a) Garengot Traité des instrumens de Chirurgie Tom. I. chap. IX. pag. 286.
(b) Lib. VII. cap. 4. pag. 412.

(c) Method. Med. Lib. XIII. Charter. Tomi X. pag. 297.

Quin etiam in collo & secus aures sæpe glandula intumescunt, natis ulceribus circa caput, collum, vel aliquam ex vicinis partibus. Nominant autem sic intumescentes glandulas bubones. Obtinuit tamen hodie usu, glandularum inguinalium, vel & subaxillarium tumores, hoc nomine tantum vocare. Bubones autem illi sunt vel inflammatorii, suppuratorii, vel & scirrhusi, à communibus nempe inflammationis causis orti. Præterea & in morbis contagiosis pessimis frequentissime bubones oriuntur, uti v. g. in peste. Sic & in Lue Venerea sæpe observantur, & tunc plerumque non adeo subito nec valide inflammantur, sed diutissime solent hære, antequam vel resolvantur, vel ad bonam suppurationem deduci possint, ad efficacissima etiam remedia sæpe rebelles. Aliquando etiam in morbis per *ἀνδραγίαν* vel & *μαράσιν* ad hæc loca deponitur materies morbi optimo cum successu. Imo etiam in hominibus, cæteroquin sanissimis, sine ulla causa topica subiti tumores hic nascuntur, primo inflammatorii, dein suppuratorii: hæcque sunt incognita illa naturæ molimina, per quæ ex universali humorum massa separantur illa, quæ nocerent, licet nulla signa latentis cujusdam mali prægressa fuerint. Ideo & hæc loca pro emunctoriis viscerum habita fuerunt apud Veteres Medicos, & glandulas facillime fluxionem recipere ob imbecillitatem & ratiorem texturam dixit *Galenus* (a). Certe, si consideretur glandularum inguinalium & subaxillarium situs, apparebit, aptissimas esse illas, ut excipiant illa, quæ ex universali humorum massa abscedent: Ponuntur enim in mollissima tunica adiposa, ab omni compressione musculorum fere liberæ, maximis arteriis venisque & truncis nervosis adjacent, & ab illis ramos recipiunt. Tantum autem cum reliquis horum nervorum ramis habent commercium, ut illis læsis sæpe ilico hæc glandulæ inflammantur & tumeant. Sic vidî sæpius in Paronychia dolentissima subito sub axilla tumorem ortum fuisse, licet in extremo digiti apice hæreret malum. Dum aciculam sub ungue adigeret mulier mala fortuna, & nervosam ibi reconditam pulpam læderet acerbissimo cum dolore, intra quadrantem horæ sub axilla ejusdem lateris tumorem insignem natum fuisse miratus fui. Patet hinc ratio, quare *Hippocrates* (b) dixerit: *Febres post bubones orta, nisi Ephemeræ fuerint, malum.* Designat enim tunc, naturam quidem tentasse saluari molimine per abscessum expellere nocitura, nec tamen potuisse. Unde febres tunc sequentes latenti, nec minus contumaci tamen, causæ originem debent; nisi Ephemeræ fuerint, quæ, intra viginti quatuor horarum spatium integre finitæ semper, naturæ vincentis robur demonstrant *Bubones febribus succedentes deteriores, si in acutis ab initio decrescant.* Irritum enim tunc naturæ conamen indicatur in periculosis febribus, quod semper malum est, raro enim solent bubones apparere in febribus, nisi acutissimæ fuerint. In pessimis variolis bubones me vidisse memini: in peste omnes observatores illos satis frequentes esse testantur.

PAROTIS. Glandularum circa aures positarum tumor hoc nomine vocatur. *Παροτις* Græcis, quasi *παρὰ τοῖς ὠσὶν ἀπόστημα* prope aures abscessus dicitur. Apud Hippocratem sæpe *τὰ παρ' ὧν ἐπάσματα* vocantur, vel & simpliciter *τὰ παρ' ὧν*. Uti jam dictum fuit de glandulis inguinalibus & subaxillaribus, quod in mollissima pinguedine hæreant, à compressione musculorum liberæ &c. illud & de Parotidibus ve-

(a) Ibid. pag. 296.

(b) Epidem. Lib. II. Charter. Tom. IX.

| pag. 162, & Aphor. 55. Sect. 4. Ibidem pag. 170.

rum est: locum enim illum occupant cavum, qui ad radicem auriculæ inter processum mammillarem & condyloidem maxillæ inferioris reperitur: & inde verius anteriora, inferiora & posteriora lobi auriculæ extenduntur. Pariter & magnis ramis externæ carotidis adjacent. Fræquentius longe in morbis apparent harum glandularum tumores, quam bubones; & plurima in morbis prælagia Hippocrates inde deduxit, uti postea patebit. Sufficiet hic ex Celso (a) notasse sequentia: *sub ipsis vero auribus oriri ætate solent, modo in secunda valetudine, ibi inflammatione orta; modo post longas febres, illuc impetu morbi converso. Id abscessus genus est. Itaque nullam novam curationem desiderat: animadversionem tantummodo hanc habet necessarium, ut, si sine morbo id intumuit, primum reprimentibus experimentum fiat: si ex adversa valetudine, illud inimicum est, maturarique & quam primum aperiri commodius est.*

FURUNCULUS. Est tumor inflammatorius dolentissimus, in superficie corporis externa hærens, difficulter ad suppurationem veniens ruberrimus, & postquam abscessus talis ruptus est, plerumque concretum sanguinem in fundo ostendit, unde vulgo sanguineum ulcus (*bloedsijeer*) solet vocari. Accidit aliquando, hujusmodi abscessus plurimos in eodem loco homines, epidemicorum more, affligere, & non singulos, sed plures in diversis locis corporis nasci. Celsus (b) sequentem furunculi descriptionem habet. *Furunculus vero est tuberculum acutum cum inflammatione, & dolore; maximeque ubi jam in pus vergit. Qui ubi adaperitus est, & exiit pus, subter apparat pars carnis in pus versa, pars corrupta subalbida, subnigra; quem ventriculum quidam furunculi nominant. In eo nullum periculum est, etiamsi nulla curatio adhibeatur: maturescit enim per se atque erumpit. Sed dolor efficit, ut potior medicina sit, quæ maturius liberet. Cum autem in furunculis nunquam benigna resolutio expectari possit, totus curationis scopus in eo consistit, ut quam celerrime suppurentur; & quia plerumque difficiliter ad perfectam maturationem perducuntur, hinc emollientibus solent addi talia, quæ paulo majorem motum in parte suppuranda excitare valent. Unde Celsus (c) dixit: *Proprium furunculi medicamentum galbanum est.**

ANTHRAX. Quando à subita & validissima inflammatione cutis externa una cum panniculi adiposi subjecti parte sic corrumpitur, ut in siccam duram escharam convertantur, quæ omnino mortua suppuratione debet solvi à partibus vivis contiguis, tunc Anthrax vocatur. In peste frequens hoc malum fuisse testantur Observatores, imprimis quando, jam mitiori utcumque reddita atrocis morbi indole, versus externa corporis derivabat victrix natura latens virus. Duplex tamen Anthracis species describitur apud Galenum (d) ubi de variis inflammationis speciebus agit. *Quando influens sanguis admodum calidus fuerit, & crassus in quamcumque partem confestim fluxerit, illam adurit, ulcusque crustam habens efficit. Quidquid autem circumstat, in ferventem inflammationem attollit, & valide dolentem. Vocatur autem ille affectus Anthrax. Quod si influens sanguis niger sit, crassus, sæculentus, ac fervidus qualis est prior, admixtamque quandam saniem habeat tenuem, pustulas in superficie cutis excitat, similes his, quæ ab igne fiunt: quibus ruptis sub ipsis crustosum ulcus invenitur. Est autem hic affectus etiam Anthrax. Prior*

(a) Lib. VI. cap. 16. pag. 391. 192.

(b) Lib. V. cap. 28. n°. 8. pag. 314.

(c) Ibidem.

(d) Method. Med. ad Glaucon. Lib. II. cap. 1. Charter. Tom. X. pag. 369.

species datæ definitioni Anthracis maxime convenire videtur; posterior mitioris indolis malum designat. Curatio in eo consistit, ut, suppuratione in omni ambitu anthracis nata, separetur à vasis vivis, quibus cohæret, & integer excidat. Nunquam enim poterit ipsa Anthracis substantia in pus converti. Sola ergo mollissima remedia hic conveniunt.

CARBUNCULUS. Anthraci proprie dicto affine malum, sed mitius. Plerumque solet hodiernis Chirurgis hoc nomine vocari, quando nempe post validam inflammationem, & plerumque admodum dolentem, pluribus aperturis dehiscit cutis, & per hæc orificia corrupti panniculi adiposi fragmenta exeunt; quia autem aliquando novem aperturas habuisse talis Carbunculus visus fuit, nostriatibus *Negenoo* dicitur: quamvis revera sæpissime plures paucioresve habere observetur. Distinctum tamen ab his Carbunculis videtur fuisse malum, quod *Celsus* sub eodem nomine descripsit. *Rubor est, superque eum non nimium pustula eminent, maxime nigra, interdum sublivida, aut pallida. In iis sanies esse videtur; infra color niger est. Ipsum corpus aridum & durius quam naturaliter oportet. Circaque quasi crusta est; eaque inflammatione cingitur. Neque in eo loco levare cutis potest, sed inferiori carni quasi affixa est. Somnus urget. Nonnunquam horror, aut febris oritur; aut utrumque. Idque vitium subteractis quasi quibusdam radicibus serpit, interdum celerius, interdum tardius &c. (a).* Cura etiam, quam postea subjungit, satis probat, malignam satis indolem hos Carbunculos habuisse, & perfecta morte destruxisse partes, quas occupabant. Protinus enim adurere jubet, quod sine sensu fieri posse addit, quoniam caro ea mortua erat. Finem vero ulationis posuit, quando ab omni parte doloris sensus erat. Quam periculosi autem sæpe fuerint illi Carbunculi, monuit eodem loco *Celsus*: *Si circa stomachum faucesve id vitium incidit, sæpe subito spiritum elidit.*

PHYMA. *αἷμα* Phymata dicta fuisse *Galenus* voluit (b); dicit enim: *Ab iis, quæ ex terra progerminant, homines Phymata vocaverunt tumores præter naturam, qui omnino sine causa externa proveniunt: sed potissimum sic nominant eos qui ad externum locum impelluntur. Quia autem aliud nomen non habetur, etiam latos & paulo naturalibus partibus elatiores (tumores) eodem nomine appellant. Unde satis laxa hujus vocabuli significatio videtur fuisse, & hoc nomine bubones, & aliarum glandularum suppurationes designatas fuisse, constat ex alio *Galen*i loco (c). Imprimis autem quadam Phymata appellantur inflammationes nonnullæ spontaneæ, subitissime nata, citissime in acutum apicem elata, & celerrime suppuranda. Et plurima illorum generatio est in inguinibus & axillis, quod in his locis plures sint glandule, quæ hanc naturam habent, ut excrementa promptissime in se recipiant. Imo & abscessus, post longas febres natos ad articulos, *αἷματα* vocavit Hippocrates (d): & alibi vomicam introrsum ruptam (e); & in ipsa urethra natum tumorem suppurandum, eodem nomine appellavit (f). Quem locum Hippocratis *Celsus* hoc modo expressit: *Quibus in fistula urina minuti abscessus, quos αἷματα Græci vocant,**

(a) A. Corn. Cels. Med. Lib. V. cap. 28. n°. 1. pag. 315. 316.

(b) Comment. 1. in VI. Epidem. Hipp. Textu 13. Charter. Tom. IX. pag. 375.

(c) Commentar. in Aphor. 26. Sect. 3.

Charter. Tom. IX. pag. 122.

(d) Aphor. 41. & 45. Sect. 4. Charter. Tom. IX. pag. 163.

(e) Aphor. 8. Sect. 7. Ibid. pag. 295.

(f) Aphor. 82. Sect. 4. Ibid. pag. 191.

esse ceperunt, iis, ubi pus ea parte profluxit, sanitas redditur (a). Idem auctor alio in loco cōparata vocavit orientia tubercula simpliciter (b). Ubi vero de abscessuum variis generibus agit (c), pluribus sequentem Phymatis descriptionem dat, Phyma vero nominatur tuberculum furunculo simile, sed rotundius & planius, sepe etiam majus. Nam furunculus ovi dimidii magnitudinem raro explet, numquam excedit. Phyma etiam latius patere consuevit: sed inflammatio dolorque sub eo minores sunt. Ubi divulgum est, pus eodem modo apparet; ventriculus, qui in furunculo, non invenitur: verum omnis corrupta caro in pus vertitur. Id autem in pueris & sapius nascitur, & facilius tollitur: in juvenibus rarius oritur, & difficilius curatur. Ubi atas induravit, ne nascitur quidem.

Ex quibus omnibus hoc patet, tumorem inflammatorium, satis cito plerumque suppurandum, Phymatis nomine ut plurimum appellari; adeoque ejusdem cognitionem & curam ex inflammationis & abscessus historia deducendam esse.

ERYSIPELA S. Videantur illa, quæ dicta sunt in Commentariis §. 380.

MORBILLI. Si perpendantur illa, quæ Sydenhamus, accuratissime morbillorum decursum à primo initio ad finem usque describens, habet; patebit evidenter, post febrem prægressam, quarto plerumque die in regularibus, serius occlusve in anomalis, in cute externa faciei apparere minimas papulas inflammatorias, quæ racematim cohærentes maculas rubras faciunt: postea truncus corporis atque artus rubere incipiunt, late diffusis maculis. Tandem octavo vel nono die iterum disparet omnis illa rubedo, & rupta cuticula corporis superficies tota alba apparet, ac si farina respersa foret, & squamularum forma decidit Epidermis. Unde apparet, morbillos ad Erysipelas proxime accedere, cum integumenta corporis externa, vel & membranaceas partes internas quandoque, tantum occupent, illosque nunquam sequatur suppuratio, sed Epidermidis desquamatione secedant.

VARIOLÆ. Sunt veræ pustulæ inflammatoriæ, non Erysipelatosæ, uti in morbillis, sed in suppurationem benignam, si mites fuerint & bonæ indolis, abeunt; vel in Gangrænam, si pessimæ. Externam corporis superficiem non tantum; sed & os internum, fauces, ventriculum, viscera occupare observatæ fuerunt, uti postea latius dicetur, quando peculiari Capitulo de his agetur. Sufficit hic notasse, quod inflammationis veræ omnia phænomena, & exitus in abscessum vel gangrænam hic observentur, & generales regulæ, quæ in cura inflammationis & abscessus explicatæ fuerunt, & sequenti Capitulo de Gangræna adhuc dicentur, in variolis pariter locum habeant.

MACULÆ RUBRÆ. Hoc nomine vocantur omnes cutanæ illæ efflorescentiæ, sive exanthemata, dictæ, quæ aliquando post morbum prægressum, quandoque & sine ulla alia læsione functionum sensibili observantur; neque tamen ad modo recensita in hac paragrapho mala referri possunt. De his postea inter Februm symptomata §. 723. & sequentibus peculiari Capitulo dicetur; tuncque patebit, illarum quoque cognitionem & curam ex historia inflammationis deduci posse.

(a) A. Corn. Cels. Medic. Lib. II. cap. 8. pag. 70.

(b) Idem. Lib. V. cap. 18. n.º. 16. p. 254.

(c) Idem. Ibid. cap. 28. n.º. 9. pag. 35.

§. 417. **N**EC difficulter hinc scitur eventus suppurationis internæ, ad quam artificis manui accessus non datur, magna quippe & multa mala (406. 413.), & collectiones puris in cava corporis.

Ex omnibus jam illis, quæ hæcenus de abscessibus & fistulis dicta sunt, patet facile, quanta sæpe sit difficultas curæ in suppurationibus internis, quas nec oculis lustrare, nec manibus attingere possumus. Indicationes enim curatoriaæ §. 401. recensitæ æque in suppurationibus internis, quam externis, locum habent: sed sæpe impossibile, vel saltem admodum difficile est, illa facere, quæ indicationes jæbent. Nam nec crudi maturatio in coctum, nec vicinorum emollitio per mollissima fomenta & cataplasmata poterit accelerari, si manibus negetur accessus. Omnino impossibile plerumque est, ad exteriora ducere in his casibus materiam suppuratam, & puri cocto lanceola Chirurgica exitum conciliare: quod ergo mora & stagnatione corruptum & attenuatum rodet vicinas partes; vel resorptum bibulis venis purulenta cacoehymia totum sanguinem inficiet: unde omnia illa mala fient, quæ §. 406. recensita fuerunt. Sed pus sic in interioribus corporis partibus latens in abscessu clauso, auctum quotidie, nisi resorptum fuerit venis, pondere suo & mole novas sibi vias inveniet, & sinus latentissimos fistulasque intricatissimas facere poterit; donec tandem ruptis vel erosis membranis in cava corporis majora effundatur, sicque in pectoris cavo Empyema, in abdomine vero purulentum dictum Ascitem efficiet. Dumque pus, mora & calore corporis quotidie magis magisque à blanda sua indole degenerans, viscera alluit, post summas misérias toleratas, tandem tabefactis visceribus lentus marasmus sequitur.

§. 418. **S**I tum necessitas partis affectæ ad vitam, sanitatemve scitur, facile prævidentur futura, & curationis difficultas.

Si cognitum fuerit, quænam partes corporis internæ per suppurationem læsæ fuerint, determinari poterit ex Physiologicis, quænam mala exspectanda sint, simulque major minorve curæ difficultas evidentur apparebunt. Sic v. g. si hepar suppuratum fuerit, magnum merito periculum imminere creditur: Visceris enim hujus ad vitam sanam integritas omnino requiritur; cum bilis confectio, ad Chylopoiesin adeo necessaria, ab hepate imprimis pendeat. Icterus ergo, cachexia, hydrops, & plurima alia mala inde metuenda sunt. Præterea friabilis hujus visceris substantia, à pure diu retento & acriori reddito, tota corrumpi poterit; unde tabes hepatica, & alvi fluxus colliquativus putridissimus, cito necans. Si vero ruptum tale apostema in cavum abdominis contentum pus effuderit, ascites purulentus cum certa fere semper perniciæ sequetur. Apertum enim tunc in hepate ulcus quotidie novum pus generabit. Viscera omnia abdominalia in hoc pure macerabuntur, & corrumpentur brevi. Si autem bona fortuna pus in hepatis abscessu latens per abdominis integumenta viam sibi fecerit versus

exteriora; anceps adhuc erit eventus. Cum enim purum & album pus effluit, evadere poterit talis æger; sed si amurcæ speciem habeat, peribit certo; uti monuit *Hippocrates* (a). Dubia ergo tantum spes in tali casu superest, neque tamen certa omnino desperatio. Si autem inflammatio nata in molli encephali substantia in suppurationem abiverit, nec exitus patebit puri hic collecto; nec evitari sæpe poterit tenerrimorum staminum, à quibus tota vita & humanitas pendent per suppurationem destructio: unde satis patet, nihil fere spei superesse. Rara quidem in vulnere Capitis historia exempla docuerunt, per nares auresve aliquando, nondum hæcenus bene cognitæ per Anatomen viis, pus, ichorem, sanguinem exivisse de calvarie cavo, & evasisse homines in desperatissimis etiam casibus: tamen forte ne centesimus sic evadit. Si jam vitalia in thoracis cavo recondita viscera, cor, & pulmones abscessus occupaverit, satis patet, quanta metuenda sint mala.

~~~~~

## G A N G R Æ N A.

§. 419. **S**I inflammationi (371. 372.) Gangræna (388.) succedit, alia curatio requiritur: vocatur autem Gangræna ea partis mollis affectio, quæ, abolito influxu vitalis humoris in arterias, effluxu per venas in mortem tendit; sed Sphacelus ea, quæ jam in tota parte omnem vitalem actionem perfecta morte destruit, superstite vita in reliquis.

Patuit in historia Inflammationis, illam habere varios exitus, resolutionem nempe benignam, suppurationem, gangrænam & scirrhum. De resolutione inflammationis, uti & de suppuratione, dictum fuit: sequitur nunc ordine, ut agamus de Gangræna, &, qui illam sæpe sequitur, Sphacelo.

Gangrænae definitionem satis accuratam dedit *Galenus* (b) dicens: *Gangrænas autem vocant mortificationes ob magnitudinem inflammationis, non quidem factas, sed quæ fiunt*: vel uti satis eleganter exprimit per paraphrasin versio hujus loci; *quum pars corporis aliqua ob inflammationis magnitudinem nondum emortua est, sed adhuc emoritur*. Eandem definitionem ex *Galeno*, ut solet, habet *Ægineta* (c), qui tamen præmittit, quod inflammatio nec resoluta (*διαρρομένη*), nec in pus conversa, ut plurimum in gangrænam vel sphacelum transeat. Designat ergo Gangræna partis corporis incipientem mortem. Dum jam perfecta gangræna adest, facile distinguitur ab inflammatione per illa signa, quæ §. 427. enumerabuntur: ubi autem validissima inflammatio jamjam in gangrænam mutabitur, vel & gangræna ex inflammatione nasci

(a) In Coecis Prænot. n°. 41. & Aphor. 11. Charter. Tom. X. pag. 383.

45. Sect. 7.

(b) Method. Med. ad Glancon. Lib. II. cap.

(c) Lib. IV. cap. 19. pag. 64.

incipit, aliqua ambiguitas esse posset ex hac definitione. In illo enim limite quasi medio & valida inflammatio partis mollis in mortem tendit, & incipiens gangræna nondum totam vitam abolevit. Pulcherrime hoc alio loco (a) monuit Galenus. Postquam enim dixerat, gangrænam medium affectum esse inter sphacelum & magnam inflammationem, quodque tanto gravior esset inflammatione, quanto levior sphacelo, addit sequentia: *Abutimur autem interdum vicinorum affectum nominibus ad eos significandos, qui ad hos quidem accedunt, neque tamen ex toto ipsorum speciem & naturam habent. Sic igitur & maximam inflammationem quando non amplius suum colorem servat, nec dolorem interdum gangrænam nominamus, quamvis nondum exakte gangræna sit, futura tamen paulo post, si negligatur.*

Videtur Celsus & canceri & gangrænæ nomen adhibuisse, ut hunc affectum significaret. Dicit enim (b): *Interdum vel ex nimia inflammatione, vel ob astus immodicos, vel ob nimia frigora, vel quia nimis vulnus adstrictum est, vel quia corpus senile, aut mali habitus est, cancer occupat.* Deinde talem canceri descriptionem exhibet, quæ gangrænæ & sphacelo satis convenit (cancerum enim à carcinomate Celsus omnino distinxit) tandemque hæc subjungit. *Modo oritur ea, quam Græci γαῖσπαινα appellant. Priora (cancer nempe) in qualibet parte corporis sunt: hæc (gangræna) in prominentibus membris, id est inter ungues & alas, vel inguina, fereque in senibus, vel in his, quorum corpus mali habitus est.* Pergit postea graphice describere illa omnia, quæ gangrænæ proserpenti, & in sphacelum tandem terminatæ, accidunt. Unde videretur ex modo allegatis concludi posse, quod Celsus in extremis corporis gangrænam, in reliquis vero partibus cancerum vocaverit idem malum. In eodem tamen capitulo (c) curam gangrænæ describens monet sequentia: *solent vero nonnunquam nihil omnia auxilia proficere, ac nihilominus serpere sub his cancer. Inter quæ miserum, sed unicum, auxilium est, ut cætera pars corporis tuta sit, membrum, quod paulatim emoritur, abscindere.* Satis autem patet, quod hic de extirpatione partium extremarum, sphacelo corruptarum, agat, & tamen hunc affectum cancerum nominet Celsus.

Gangræna vero inflammationem sequitur, quando tam valida est obstructio, ut nullo modo resolvi possit, illaque in omnibus loci affecti vasis adsit; vel, licet quædam vasa libera fuerint in initio mali, illa à vicinis obstructis & tumen- tibus sic comprimantur, ut brevi tollatur omnis transitus humorum per arterias; adeoque & nihil redire poterit per venas, arteriis obstructis continuatas. Idem malum fiet, si motus circulatorii impetu & velocitate, vel acrimonia humorum circulantium, aut utrisque his causis simul conspirantibus, subito rumpantur vascula in loco inflammato, & effusi humores putrescant (vide §. 388.). Utroque in casu impediatur liquidorum arteriosorum influxus in partem, & eorundem per venas reditus, uti facile patet: tota ergo pars sic affecta nullum amplius vitale commercium cum reliquo corpore habet; adeoque spontanea mutatione, omnibus animalium partibus communi, in putredinem tendet. Requiritur ergo longe alia curatio, quam in suppuratione; in qua blanda quidem separatio fit finium vasculorum obstructorum una cum immeabili materia obstruente, & aliqua simul degeneratio liquidorum obtinet, sed talis, quæ vincente natura fit; cum putredo devictam naturam ostendat, uti optime Galenus notaverat (vide

(a) Comment. IV. in Hippocrat. de Artic. Charter. Tom. XII. pag. 437.

(b) Lib. V. cap. 26. n<sup>o</sup>. 31. pag. 300. 301.

(c) Ibid. n<sup>o</sup>. 34. pag. 304.

loca allegata in Commentariis §. 387. ); si enim calor innatus à propria temperie plurimum recesserit, tunc sanguinem putrescere, ut in cadavere, dicit: ubi vero ille calor adhuc aliquam vim retinet, tunc mixta quædam mutatio fit, partim ab ea, quæ præter naturam, partim vero ab illa, quæ secundum naturam causa est. Illa vero causa, quæ præter naturam est, putrefacit; ea, quæ secundum naturam est, concoquit. In suppuratione ergo coctio est à superstitie vita in parte, quæ secundum naturam causa est; in gangræna vero sola putrefactio, quæ præter naturam est, agit.

Quamdiu vero partes molles solæ sic moriuntur, vel mortuæ sunt, Gangræna vocatur; quæ præcipuè in panniculo adiposo, uti sequenti paragrapho dicitur hæret: ubi vero musculi, tendines, ligamenta, periosteum, ossa ipsa, perfecta mortificatione afficiuntur, tunc vocatur sphacelus. Quia autem in cadavere omnis vitalis actio perit æque in toto, quam in singulis partibus; ideo definitioni additur, quod sphacelus supponat quidem perfectam mortem in parte affecta, superstitem tamen vitam in reliquis. Sed quoniam in gangræna, à partibus ambientibus & suppositis adhuc vivis, plerumque calor manet; & validissimam inflammationem, quæ partes affectas urit, plerumque sequi solet; imo aliquando, uti paulo ante dictum fuit, validissima inflammatio gangræna vocatur, quando jam jam in hanc abibit; ideo Chirurgis nostratibus solenne est, gangrænam vocare ignem calidum (*heet vunn*); sphacelum autem, in quo omnis actio vitalis cessat, dixerunt ignem frigidum (*boud vunn*); quia pars sic affecta brevi ad frigus aeris ambientis deducitur: calorem enim excitans causa, morus nempe humorum per vasa, in parte sphacelata omnino deficit.

Sphaceli autem vocabulum non semper perfectam partis affectæ mortem significasse videtur apud Veteres Medicos. Sic v. g. *Hippocrates* (a) ipsius encephali sphacelum describit, neque tamen absolute lethalem hunc morbum pronunciavit; sed tantum dixit, paucos ex hoc morbo evadere: imo sequenti Capitulo curam hujus mali descripsit. Facile autem patet, sphacelum proprie dictum in hac parte omnino lethalem esse debere, & quidem quam citissime, si hoc nomine absoluta mortificatio tam nobilis visceris intelligeretur. *Galenus* (b) autem Archigenis, Verusti Medici, locum quemdam considerans, in quo vocabulum *σφακελ* occurrebatur, notavit, ambiguum quam maxime esse hujus vocis significationem; cum quidam sic vocarent dolorem vehementem; alii inflammationis talem excessum, quo in parte affecta corruptionis periculum nasceretur; alii ipsam corruptionem &c. Plura alia loca apud *Hippocratem* & *Galenum* habentur, quæ varium hujus vocis usum demonstrant; quæque apud *Gorram* & *Foësum* in *Hippocratis Œconomia* recensentur. Unum alterumve talem textum adduxisse hic suffecerit.

§. 420. **G** A N G R Æ N A ergo ut plurimum panniculum adiposum, Sphacelus cuncta ad ossa usque inficit, illa præcedit, hic ut plurimum sequitur; nisi ab ossis corruptione, medul-

(a) De Morbis Lib. I. cap. 7. Charter. Tom. VII. pag. 552. | (b) Lib. II. de locis affectis cap. 8. ibid. pag. 429.

læ, vel periosteï originem duxerit : unde & apparet singularis gangrænæ species, quæ sine febre, inflammatione, aut jactura caloris nativï, fit in partibus sub contusa medulla dorſi positis ( 326.).

Demonstratum fuit in Commentariis §. 374. inflammationem nullibi frequentius locum habere, quam in panniculo adiposo : cum autem gangræna fere semper inflammationem validissimam sequatur, patet evidenter, quod & hæc eundem locum occupet. Hoc autem quam maxime notandum est, quia aliquando Chirurghi sphacelum adesse credunt, ubi sola gangræna adest ; dum v. g. in dorſo manus, ubi vix ulla pinguedo adest, nascitur phlegmone, sæpe membrana cellulosa incredibiliter intumescit : si tunc post talem phlegmonem sequatur gangræna, & ad tantam crassitiem mortua pars inveniatur, sphacelo omnia corrupta esse putant ; cum tamen sub tumente membrana cellulosa vivi & integri tendines musculique sepulti hæreant ; uti postea, separatis corruptis partibus apparet. Si autem in tam macilenta parte tantus tumor nasci possit ab inflammatione, quid fiet in natibus, femoribus, cruribus, brachiis &c. ubi insignis adeo copia pinguedinis naturaliter observatur, maximis musculis accumbens, ut lubrico pingui oleo illorum motus faciliores reddat.

Quamvis ergo enormis sæpe crassities gangræna corrupta sit ; quotidianæ fere Chirurgicæ observationes docent, totum illum tumorem tantum in panniculo adiposo hærare, qui tunc, separatione facta à partibus suppositis vivis, ingentibus frustis educitur : sicque aliquando servantur partes corporis, dum sola exstirpatio superesse videretur. Sphacelus autem non tantum adiposum panniculum, sed & musculos, tendines, ligamenta, periosteum, ossa ipsa, perfecta morte destruit.

Si jam consideretur, tumentem tam immaniter panniculum adiposum, cute integra sæpe coercitum, comprimere omnia subjecta ; patebit facile posse ab hac causa sola deleri omnem vitalem influxum & effluxum humorum in partibus suppositis. Accedit, quod putredo, Gangrænam natam sequens, contigua omnia sua labe inficere possit ; adeoque gangræna sphacelum plerumque solet præcedere. Sunt tamen quidam casus, ubi sphacelus sine gangræna prægressa oritur : uti v. g. si ingenti contusione in parte quadam corporis omnia ad os usque simul & semel destruantur : vel etiam, si quacumque de causa ossa ipsa, vel contenta his medulla, aut periosteum vasa ad ossa deferens & redeuntia inde excipiens, sic afficiatur, ut vitalis humorum motus per arterias & venas tollatur omnino in his partibus. Lues Venerea & spina ventosa sæpe observatæ fuerunt ossa sic corruptisse, licet partes incumbentes adhuc vivæ forent ; tuncque malum sic à suppositis partibus ascendendo corrumpit omnia ; cum in gangræna prius afficiantur incumbencia, & dein suffocentur omnia, quæ his supponuntur.

Quare autem gangræna sequatur, dum valida contusione, vulnere, aut alia quacumque de causa medulla dorſi sic læsa fuit, ut liquidi nervosi influxus in partes, læsionis loco suppositas, omnino impediatur, demonstratum fuit in Commentariis §. 162. ubi simul dictum fuit, nervorum majorum destructionem similia mala producere. Cum autem reliquæ gangrænæ validas febres, vel inflammationes, soleant sequi semper ; vel à mero caloris nativï defectu in summo senio nascantur ; hæc species, sine his prægressis orta, lenta quidem sed indomabili pernicie omnia depascitur.

Q q q ij

§. 421. **E**RGO Gangrænæ & Sphaceli causa eadem, sed vi, duratione, loco, diversa.

Quando vasa corporis nostri sic mutata sunt, ut sanguinem aliosve per illa in sanitate fluentes humores, transmittere nequeant, neque debitas inde secretiones facere, & dein venis tradere, mors est. Quod ubi in panniculo & cute tantum obtinet, Gangræna vocatur; si autem omnis actio vitalis in tota parte quadam corporis destructa fuerit, tunc sphacelus est. Causa ergo & gangrænæ & sphaceli eadem erit; nempe omnis illa, quæ influxum, effluxum, secretionem, excretionem humorum in parte quadam corporis tollit.

Major autem debet esse vis causæ, quæ sphacelum producet, cum solidiores longe partes per illam corrumpantur; muscoli nempe, tendines, ossa ipsa: gangræna autem tantum tenerum panniculum adiposum, plerumque & cutim, perfecta morte destruat.

Sed & eadem causa, quæ gangrænam produxit, pergens agere sphacelum facere poterit. Si enim v. g. ab externa compressione vitalis influxus & effluxus humorum in cute & panniculo adiposo integre sublatus fuerit, patet facile, nisi causa comprimens removeri possit, omnia supposita ad os usque suffocari debere, adeoque ab ejusdem causæ majori duratione sphacelum nasci.

Locus autem gangrænæ, uti dictum fuit, est in panniculo adiposo; sphacelus autem occupat omnia: unde iterum nova distinctio gangrænæ & sphaceli oritur.

§. 422. **I**DEO 1<sup>o</sup>. omnia, quæ inflammationem faciunt (375. 376. 377. 378. 379.), si liquida stagnent, & nisus in ea vivi sanguinis magnus: eo pertinent *a*. ligatura venarum. *β*. compressio earum ab causa quacumque, ut tumore, &c. *γ*. frigus ingens. *δ*. prohibita perspiratio in phlegmone per adstringentia, emplastica, frigida, reperiuentia, stupefacientia, maxime si interna acria, vel acria simul externis applicatis permista. *ε*. inflammatio interna, externa. *ζ*. vulnerata, contusa, luxata, fracta, maxime si arcte constricta. *η*. oleosa acria sanis applicata, vel ægris. *θ*. decubitis. *ι*. herniæ suffocatae, & clausæ.

Hac paragrapho & sequentibus agetur de causis illis, quæ gangrænam & sphacelum facere poterunt. Primo loco recensentur omnes illæ causæ, quæ inflammationem producant, quæque numeris hic citatis enumeratae fuerunt. Omnis enim inflammatio supponit obstaculum in angustiis arteriosis, per quod liber transitus liquidi transmittendi impeditur; adeoque, si hoc in omnibus vasis partis cujusdam corporis fieret, sphacelus esset, impedito omni vitali motu humorum per partem sic affectam. Si jam simul consideretur, ex definitione inflammationis §. 371. non tantum hic adesse stagnationem liquidi immeabilis, verum etiam validum imperum sanguinis à tergo urgentis agere in loca hæc obstructa, patebit, posse sæpe subito rumpi vascula, liquida effundi, putrescere &c. adeoque &



gangrænam nasci, uti demonstratum fuit in Commentariis §. 388. Quia autem arteriæ suos humores tradere debent venis, quæ eosdem reducunt ad cor; ex quo iterum pelli debent per arterias, ut maneat debita sanguinis circumductio per totum corpus omnesque ejus partes; ideo omnes illæ causæ, quæ impediunt, quo minus arteriæ libere se possint in venas evacuare, poterunt suffocare vitalem motum fluidorum in parte, adeoque gangrænam & sphacelum producere. Demonstratum autem fuit in Commentariis §. 119. obstructionem in venis locum habere non posse, nisi ab externa compressione earundem; adeoque huc pertinent.

α. **LIGATURA VENARUM.** Solebat hac occasione Celeberrimus horum Aphorismorum Autor Auditoribus suis sequentem casum enarrare: Nobilis juvenis, Academiae Ultrajectinæ civis, hilari exceptus convivio domum redierat bene potus. Auræ captandæ gratia apertæ fenestræ pronus incubuit, cubitis innixus, sicque tota nocte mansit vino somnoque sepultus. Sequenti mane expurgatus, dum corpus movere volebat, concidit, credens se pedibus carere. Tristi enim infortunio subligacula arctè adstricta sic compresserant venas, ut nihil per illas redire potuerit, dum interim per arterias, aucto per ebrietatem impetu, sanguis pelleretur; unde tumor partium, & ab hoc tumore major adhuc adstrictio subligaculorum facta fuerat. Suffocato hinc omni virali humorum motu, Gangræna utrumque crus occupaverat, quæ citò ascendens ad femur utrumque lethalis fuit.

β. **COMPRESSIO &c.** Uti jam ligaturæ, sic & aliæ quævis causæ comprimentes venas possunt gangrænam facere eadem ratione. Observationes Medicæ & Chirurgicæ docuerunt, insanabiles Gangrænas & sphacelos originem suam debuisse latentibus in corpore tumoribus, qui nulla arte tolli poterant, & difficillime cognosci. Sic *Hildanus* (α) mirabilem talem casum se vidisse affirmat. Homo integræ ætatis, optimæque temperiei, insolitum frigus, gravitatem & stuporem in utroque crure sentire incipit, sine ulla causa cognita prægressa: auctis sensim his malis Gangræna sequitur, & post illam sphacelus ad genu ascendens, & mors. In cadavere invenitur tumor scirrhusosus venam cavam descendantem comprimens circa illum locum, ubi in binas iliacas finditur. Additque fide dignissimus auctor, quod plura similia exempla, brevitati studens, omiserit. Non minus mirabilem casum mihi videre contigit in viro illo, cujus mentionem feci in Commentariis §. 413. Binis enim ante mortem septimanis crus sinistrum dolore incipiebat, tumere, tandemque totum œdematosum fieri, tumore jam ultra genu ascendente; cumque simul extremus pes frigescere inciperet, apicesque digitorum pedis jam sublivescerent, gangrænam brevi secuturam timui; adeoque fomentis antisepticis totam partem noctes diesque involvi curavi. Credebat autem mecum peritissimus Chirurgus, qui ægro huic aderat, latentem puris collectionem iliacam venam aut cruralem compressisse, adeoque immedicabile malum fore, nisi causa comprimens tolli posset. Scrupuloso tamen examine non potuimus detegere locum, ubi hæreret causa mali; unde in solo antisepticorum usu pergendum esse conclusimus. Sequenti die mirabamur, crus multum detumuisse, magisque calere: narrabatque æger, & qui illi adfuerant, quod pluri-

(α) De Gangræna & Sphacelo cap. 4. pag. 775.

mos flatus summo cum impetu & maxime sonoros ano explosisset. Perrexit omni hora minui affecti cruris tumor, & bidui spatio, lenibus frictionibus simul adhibitis, totus evanuit. In cadavere, uti dictum fuit, nihil puris in cavis corporis majoribus inventum fuit; sed in abdomine inveni intestinum colon, non subiacens ventriculo, (uti solet), sed illi incumbens, flatibus distentum: illa autem ejus pars, quæ in latere sinistro à liene descendendo pone intestina tenuia locatur, sic contracta erat, ut pollicis vix æquaret crassitiem, simulac vero sub intestinis tenuibus emergebat illud intestinum, iterum inflatum apparebat. Unde admodum verosimile videtur, colon illo in loco iliaceæ venæ incumbens, flatibus distentissimum, illam compressisse; unde tumor cruris ejusdem lateris secutus fuit, qui flatibus his explosis iterum evanuit. Nisi hæc certe in cadavere vidissem, fateor, quod vix unquam credidissem, à flatibus sic comprimi posse ingentem talem venam, ut gangrænæ inde periculum immineret.

7. FRIGUS INGENS. Dictum fuit in Commentariis §. 117. moleculas sanguinis frigore sic adunari, ut immeabiles fiant; adeoque obstructions faciant. Si jam ingens frigus in partem quandam corporis egit tam valide, ut liquida congelaverit, quæ per vala fluere debent, patet facile, omnem vitalem influxum & effluxum humorum in tali parte tolli penitus; adeoque veram Gangrænam adesse imo & sphacelum, si vis frigoris ad ossa usque penetraverit. Verum quidem est, sanguinem ejusque serum majorem requirere frigoris gradum, antequam congelantur, quam aqua; & calorem corporis in homine sano ingenti etiam frigori resistere posse, si simul valide corpus moveat: tristia tamen exempla, & quotidiana in Borealibus regionibus, docuerunt, extrema corporis à summo frigore subitissime sæpe sic siderari posse, ut vero sphacelo corrupta decendant. Unde summi frigoris effectus satis conveniunt ignis vivi actioni in partes nostri corporis; fit nempe subitissima destructio earundem. Quod pulcherrime habetur apud *Virgilium* (a), qui & frigoris & caloris effectus conjungit, dicens:

*Ne tennes pluvia, rapideve potentia solis  
Acrior, aut Borea penetrabile frigus adurat.*

Gangræna tamen & sphacelus, ab acerrimo frigore orta, signa habent distincta; quibus differunt à reliquis gangrænis; uti dicitur §. 427. n°. 6. atque etiam diversam curam requirunt: de qua §. 454. & sequentibus agitur. Omnium autem citissime gangræna nascitur à frigore, si satis magno calori succedat. Dum profundum puteum mundare vellet famulus, Julio mense, summum frigus percepit, simulque dolorem atrocissimum in magno pedis sinistri digito, qui paulo post ad malleolos ascendebat: tota pars hæc vero sphacelo erat corrupta, & post horæ spatium jam ultra cruris medietatem adscenderat, & procul dubio brevi sustulisset hominem de medio, nisi subito extirpatio facta fuisset (b).

8. PROHIBITA PERSPIRATIO &c. Quantum noceat prohibita perspiratio inflammationi, & quomodo, pinguibus applicatis cuti externæ, pessimæ aliquando nascantur inflammationes, imprimis si acria pinguibus mista fuerint; dictum fuit in Commentariis §. 376. De adstringentibus autem, frigidis, emplastis &c. probatum fuit in Commentariis §. 390. quod omnia hæc mutatio-

(a) Georgic. Lib. I. versu 92. 93.

(b) De la Motte Traité comple de Chirurg. Tom. III. pag. 384.

nem inflammationis in gangrænam cito promoveant. Phlegmone enim proprie dicta tantum in majorum vasorum angustis hæret, quæ vel naturaliter, vel dilatata saltem, sanguinem rubrum capere possunt; unde, licet humorum motus per vasa majora impeditus fuerit, per minora tamen poterit manere libera circulatio: sed Gangræna tunc tantum adest, quando vitalis influxus & effluxus humorum in omnibus vasorum seriebus suffocatur in loco quodam corporis: Adeoque omnia illa, quæ in parte inflammata perspirationem prohibent, gangrænam faciunt, quia liquidorum motum per minima vascula tollunt, majoribus vasis per inflammationem jam imperviis factis Observationes Medicæ docuerunt, infelicissimo cum successu similia locis, Phlegmone obsessis, sæpe applicari. Puella laborabat ardentissima febre continua, fervido sub caniculæ ardore, & die critico sudore & calore summo æstuans, haustæ de puteo gelidissimæ aquæ manus immergit: mox dolor & tumor manus occupavit, quo usque aquæ immersæ fuerant, & paulatim harum partium livor sequebatur. Profundis scarificationibus, aliisque remediis adhibitis, *Hildanus* servavit miseram, sic tamen ut dextræ manus digitorum extremæ phalangæ caderent sideratæ omnino (a). Similes casus & in *Miscellaneis curiosis* (b) habentur, qui hoc confirmant.

Omnium vero frequentissime Gangræna nascitur, si loco inflammato applicentur talia, quæ acri suo stimulo motum augment in parte affecta; uti etiam, si iisdem interne exhibitis acceleretur motus circulatorius. Demonstratum enim fuit in Commentariis §. 388. humorum acrimoniam & validum motum mutare inflammationem in gangrænam. Inde toties funestus eventus fuit in morbis inflammatoriis, dum Chémici sales suos volatiles oleosos & similia acerrima tam audacter propinarent, tanquam summa resolventia; imo & Chirurgi spiritum salis ammoniaci, alcohol &c. applicarent locis inflammatis.

4. INFLAMMATIO INTERNA, EXTERNA. Quomodo Phlegmone in Gangrænam transeat, dictum fuit §. 388. sed ibi tantum de tali malo agebatur, quod externas partes occuparet, & varia phænomenorum mutatione sensibili inflammationis transitum in gangrænam demonstraret. Interim tamen certissimum est, veram Phlegmonem, & omnes ejus exitus, in suppurationem, Gangrænam, scirrhum, in internis corporis partibus æque locum habere posse: uti postea patebit, quando de morbis acutis inflammatoriis agetur. Idem etiam demonstratum fuit in Commentariis §. 374. & 379.

5. VULNERATA, CONTUSA &c. De his omnibus in propriis Capitulis dictum fuit. Quam frequenter autem à nimis valida adstrictione fasciarum Gangræna oriatur, dictum fuit in Commentariis §. 355.

6. OLEOSA ACRIA &c. Videantur illa, quæ de his dicta sunt in Commentariis §. 376. & 390. Similia enim acerrima sæpe cum sint, & tenacitate oleosa pertinacissime hæreant partibus, quibus applicantur, gangrænam producere poterunt, licet nulla inflammatio adfuerit; longe citius autem, si inflammatis partibus talia inungantur. In nobili fœmina *Celeberrimus Boerhaavius* tristem talem casum vidit. Laborabat paralyti cruris femorisque dextri; cumque præscriptum ipsi fuisset linimentum ex Galbaneto Paracelsi, oleo cornu cervi, & similibus sti-

(a) Hildanus de Gangræna & Sphacelo cap. 4. pag. 774.

(b) Decur. 2. ann. 3. pag. 145. ann. 4. pag. 203.

mulantibus acrioribus, uti leviter pars inungeretur; illa lentæ curæ pertasa maxima copia hoc linimentum applicuit, & deinde linteo cerato undique partem texit, ne remedii vis exspiraret. Cum autem obtusior sensus in parte affecta adisset, illaque dolorem perceptum spe subitæ curationis contemneret, sequenti die totum femur & eius Gangræna correptum inveniebantur. Unde patet, quàm periculosus sæpe sit usus oleosorum & acrium simul, si imprudenter applicentur.

θ. DECUBITUS. Frequentissima hæc gangrænæ causa est: dum enim decumbimus, totum corporis pondus paucis tantum locis sustinetur, unde à compressis vasis inflammationscunda & levis dolor oriuntur, mutato situ corporis statim evanida. Hinc homines etiam sanissimi, dum dormiunt, corporis posituram subinde mutant, sicque facile hoc præcavetur. Ubi vero in morbis dolentissimis, arthritide, podagra & similibus, coguntur ægri jacere immobiles, cum à minimo corporis motu hæc tormenta immaniter augeantur; compressis arteriis venisque in illis partibus, quibus corporis pondus incumbit, suffocatur omnis vitalis motus & Gangræna fit. Nunquam tamen frequentius, nunquam citius, ab hac causa Gangræna nascitur, quam in morbis acutis, in quibus sæpe oritur illa *drainde i*, qua levem dolorem & molestiam in partibus, à decubitu compressis, minime sentiunt ægri, tuncque simul projectis viribus dorso incumbere solent. Sed (uti dictum fuit in Commentariis §. 112. n<sup>o</sup>. 4. ubi de obstructionis causis agebatur) homine sic horizontaliter decumbente, lectus semper in medio comprimitur, superius & inferius assurgit, unde totum corporis pondus ossi sacro & coccygis imprimis fere innititur, quod solis integumentis & pauca pinguedinetectum est. Partes ergo molles his ossibus impostæ valida hac pressione omni vitalium humorum influxu & effluxu privantur, & moriuntur citissime; imo & ipsa hæc ossa corrumpuntur: unde postea difficillimæ curationis tædia affligunt miseros hos homines, si à periculosis illis morbis evaserint. Ut præcaveantur omnia hæc mala, sola mutatio situs corporis sufficit: si enim sexies v. g. tantum nycthemeri spatio liberentur hac pressione corporis incumbentis partes affectæ, explicabuntur ab humoribus impulsis vasa, & redibit vita. Deinde curatur, ut nudo corpore mollissimæ alutæ, incumbant, qua nihil pulchrius est in hoc casu. Ubi autem secesserit Epidermis, & levis excoriatio facta fuerit, regitur locus Emplastro diapompholygos vel simili, cui cerussæ vel lapidis calaminaris tenuissimus pulvis inspergitur. Si jam ob summam ægri debilitatem, vel aliam quamcumque causam, vix possibile sit situm corporis toties mutare; tunc vel loris suspensum tenetur corpus, vel annulus ex stramine convoluto, mollissima aluta obductus, corpori supponitur ita; ut partes, pro quibus metuitur, ab omni compressione liberentur. Non potest ergo satis inculcari Medicis, ut semper de Gangræna à decubitu nascitura cogitent; ubi in morbis acutis hebetes & semisopitos quasi ægros vident; paucarum enim sæpe horarum spatio circa coccygis os omnia corrumpuntur. Sed non tantum hic loci, verum & circa scapulas, ischii ossis tibia, femoris ossis trochanteres majores, imo & circa ipsas vertebrarum spinas in emaciatiissimo homine, à decubitu gangrænam natam vidi. Quanta sæpe mala fiant, dum in fracturis curandis Chirurgi ægrorum querelas vilipendunt, neque situm partis mutant, dictum fuit in Commentariis §. 354. Et de pessimarum fracturarum curatione agens *Hippocrates* sequens monitum habet (α):

(α) De Fractur. Charter. Tom. XII. pag. 245.

*Recordandum est, quod loca illa, in eodem situ longo tempore jacentia, excoriatio-  
nes curatu difficillimas faciunt.* Usus fuit hic vocabulo *εξτρίμματα*, quod exco-  
riationes, attritus intertrigines significat, & optime quidem: Dum enim incipit  
pars quædam corporis à decubitu male affici, oritur macula rubra, paulo post  
cuticula quasi detrita abscedit, & dum leve malum credunt minus periti, paucis  
horis postea macula nigra pessimam mortificationem indicat.

II. *HERNIAE SUFFOCATÆ ET CLAUSÆ.* Quamvis herniæ nomen diver-  
sissimis soleat tribui morbis, uti v. g. dum tunicæ testem ambientes, vel & ipsi  
scrotum extravasata lymphæ replentur, hernia aquosa dicitur: si venæ in spermatico  
funiculo in varices intumuerint, hernia varicosa dicitur: si testis in scirrhum  
induruerit vel aliquando in fungosam massam miro modo excreverit, hernia car-  
nosa dicitur &c. hoc tamen in loco intelliguntur illæ herniæ, quæ a contentis  
abdomine partibus, per dilatatum vel & ruptum peritonæum exeuntibus ex cavo  
abdominis, fiunt. Cum autem intestina, à mesenterio pendula, & omentum quasi  
fluctuant in abdomine; hinc præ cæteris omentum vel intestina per dilatatum,  
vel ruptum, peritonæum solent exire. Dictum autem fuit in Commentariis §.  
307. in omni abdominis ambitu hernias posse nasci, & alias partes, præter in-  
testina vel omentum, sic aliquando ex cavo abdominis elabi: omnium tamen  
frequentissimæ sunt herniæ, quæ à dilatato peritonæo per umbilicum; vel in  
inguine per annulos musculorum abdominalium, exeunte fiunt. Umbilicales  
tunc vel inguinales herniæ solent vocari; quæ postremæ, si in scrotum usque  
delabantur, scrotales; si vero versus femora tendant, uti in fœminis frequenter  
fit, femorales dicuntur. Si jam v. g. per annulos musculorum abdominalium dilata-  
tum peritonæum una cum intestini parte exiverit, patet facile in ipsis his annulis  
hæreere intestini fistulam duplicatam (nisi raris in casibus pars intestini mesenterio  
opposita, sensim dilatata, per annulos abdominales exiverit in appendicem  
sensim longiorem factam mutata (\*)). Motu ergo peristaltico chylus &  
reliqua, cavo intestinalis fistulæ contenta, huc pelli debebunt, & sæpe redire  
inde nequeunt, dum in angustiis annuli abdominalis intestinum comprimitur.  
Idem à flatibus intestinum elapsum replentibus fieri poterit. Vocatur talis hernia  
tunc suffocata & clausa, quia nec elapsum intestinum, nec contenta ejus cavo,  
in abdomen redire possunt. Summi tunc dolores oriuntur, motus peristalticus  
turbatur, vomitus fit, singultus &c. & paucarum sæpe horarum spatio intestinum  
sic strangulatum gangrænescit; imo, quod magis mirum videtur, robustissimus &  
sanissimus homo sic subito moritur. Post summos enim cruciatus subito omnis do-  
lor cessat, dumque miseri omnia in vado esse credunt, pereunt. Peritos tamen  
Medicos vel Chirurgos non facile decipient fallaces illæ induciæ, cum extre-  
morum frigus, facies cadaverosa, & frigidus sudor, lividusque sæpe corrupti intesti-  
ni per integumenta pellucens color, mortem instare satis doceant. Ex cognita  
hactenus fabrica corporis non facile mihi videtur explicari posse, quare herniam  
suffocatam & clausam cito adeo mors sequatur sæpe: observationes quidem Chi-  
rurgicæ & Medicæ docuerunt, nervos abdominales mirum habere imperium in  
vitales functiones ipsas. Sic in Commentariis §. 170. n°. 3. ex *Ruysschii* observatis  
notatum fuit, vulnus abdomini inflictum, quod mesenterium læserat, post diros

(\*) Académ. des Sciences l'an 1700. 1701. 1723.



cruciatus paucis diebus lethale fuisse, licet in cadavere non inveniretur in ulla alia parte læsio alicujus momenti : tamen in vulnere abdominis historia ex optimorum auctorum observatis constitit, ingentis longitudinis frustra resecta fuisse, vel sponte separata ex tubo intestinali, vita tamen manente : Patuit ibidem, consui posse lacera intestina, imo & mesenterium filo trajectum ad vulneris abdominalis aperturam adduci, ut bina extrema intestini læsi contigua redderentur, & concrecerent inter se. In tali casu, ubi ab hernia suffocata Gangræna meruitur, audacissima Venæ sectione sic debilitandus æger est, ut inflammatio hic nata careat urgente motu vitali; deinde narcotica dentur parva dosi simul, sed quavis octava horæ parte, donec induciæ fiant : mollissimis interim fomentis foveatur hernia, clysmata ex similibus parata injiciantur omni hora; & tentetur reductio : quæ si his obtineri nequeat, sola discissio integumentorum abdominalium omnium & peritonæi superest, ut strangulatum intestinum liberetur, & in abdominis cavum revolvi possit, de qua re videantur Commentaria §. 316. Ubi autem gangræna jam occupavit herniam suffocatam, plerumque cita mors sequitur; vel, si evaserint tales ægri, separata parte corrupta tubi intestinalis, extremum superius aperturæ affigendum est, ne fœces in cavum abdominis delabi possint. Tuncque tota vita in hoc loco anus artificialis manet, nisi rara fortuna intestini extrema iterum sic concreverint inter se, ut continua maneat intestinalis fistula à ventriculo ad anum usque. Miri tales casus in Commentariis §. 317. habentur, quibus probatur, talem concretionem possibilem esse.

§. 423. 2<sup>o</sup>. **Q**UÆ liquida acuunt, ut vascula exedant, destruant. que, ut α. stagnatio clausi & calidi humoris diuturna, unde acrimonia (80.), corrosio, hinc cruor in aneurismate, pus in abscessu, aqua in cranio, thorace, abdomine, scroto &c. contusa & effusa in læsis. β. mala, morbosa, acris temperies in toto peccans, & locum alluens; ut lymphæ diu fluens circa loca tendinosa, ichor canceri, fluor dysentericus, fluor hydropicus, materiæ febrilis, pestilentis, variolosæ, scorbuticæ fluxus ad carnem, imprimis ad gingivas.

Sanguis noster, & omnes inde secreti humores, (si forte bilem & urinam exceperis, in quibus tamen stagnando acrimonia vel nascitur, vel saltem plurimum augetur) blandi adeo sunt in sanitate, ut nec oculo instillati, nec crudo vulnere applicati, ullum dolorem faciant : hoc autem requirebatur, ut rapido satis motu per tenerrima vasa humores fluere possent. Si ergo à quacumque causa liquidis nostris major concilietur acrimonia, destruentur vasa, atque sic impeditur vitalis influxus & effluxus humorum, adeoque nascetur Gangræna. Unde in §. 388. humorum acrimonia merito recenscebatur inter causas, quæ inflammationem in Gangrænam tendere faciunt. Præcipuæ talis acrimoniæ, in liquidis nostris natæ, causæ sunt sequentes :

α. STAGNATIO &c. Demonstratum fuit in Commentariis §. 80. liquida humana, etiam in corpore sanissimo, sola quiete & calore sponte in putredinem

vergere ; imo & omnia alimenta assumpta , quamvis ex propria indole ab omni putredine aliena fuerint , viginti horarum spatio in corpore nostro sic mutari , ut similem naturam adipiscantur. Sanus homo , aquis submersus , paucis diebus putrescit totus , à simplici stagnatione liquidorum , & calore aeris communis. Calor autem major hanc degenerationem in putredinem auget in nostris humoribus , nisi tantus fuerit , ut exsiccatione distet humidum , & reliqua exsiccet. Sic in aëre calidissimo , & siccissimo simul , non putrescunt animalium carnes tam cito ; imo sæpe penitus exsiccatae ab omni putredine servantur : in aëre autem calido , & humido simul , putrescunt quam citissime. Præterea observatur , si nullus detur aëri accessus ad stagnantes humores , eosdem diu ab omni putredine immunes servari posse. Ob hanc causam STAGNATIO CLAUSI ET CALIDI HUMORIS DIUTURNA in textu habetur.

CRUOR IN ANEURISMATE. Videantur illa , quæ dicta sunt in Commentariis §. 112. n°. 1. & §. 176. ibi enim constitit ex fidelissimis observatis , cruorem in dilatatae arteriae sacco stagnantem , tantam acquisivisse acrimoniam , ut non tantum partes molles corrumpere , sed etiam solida ossa destrueret omnino.

PUS IN ABSCESSU. Videantur Commentaria §. 406.

AQUA IN CRANIO , THORACE , ABDOMINE , SCROTO &c. In cavis corporis majoribus & minoribus aquam accumulari posse , quotidianis observatis constat ; sive hoc fiat ruptis vasis lymphaticis , contentam lympham effundentibus ; sive , dum exhalans ros in cava corporis à venulis bibulis non refoberetur. Quamdiu autem nullus aër accedit , diu sine ulla corruptione manere potest talis aqua ; tandem tamen putrescere incipit , & omnes partes rodere , quas alluit. Ubi postea de hydropo agitur , patebit ex fidelissimis observatis , omentum , hepar , lienem &c. , in putrida tali aqua macerata , contabuisse penitus ; imo apertis post mortem ascite defunctorum cadaveribus , sæpe tetra mephitis pessime omnes adstantes affecit. Omnium frequentissime gangræna ab hac causa nascitur , quando hydrops anasarca crura & femora occupat. Cum enim frigidi semper hydropici sint , sæpe dum foco nimis assident , vel hypocaustulis suppositis pedes calefaciunt , epidermis in bullas attollitur , quibus ruptis ingens copia aquæ exit , sæpe summo cum levamine. Frequenter tamen tunc circa illas aperturas à sero præterlabente , accessu aeris jam magis acri facto , gangræna fit : distentus antea tam enormiter panniculus adiposus collabitur flaccidus , & partim ab acri sero alluente corrumpitur , partim ob vitalis influxus debilitatem moritur.

CONTUSA ET EFFUSA IN LÆSIS. Videantur illa , quæ de his in Capitulo de *Contusione* dicta sunt.

§. MALA , MORBOSA &c. Stagnatione humores sanos & blandos acres posse fieri , apparuit ex modo dictis : sed accidit aliquando , sanguini & inde secretis liquidis adesse jam majorem acrimoniam , licet per vasa moveantur solita naturali lege. Verum quidem est , raro vel nunquam in sanguine ipso esse magnam acrimoniam ; cito enim destruerentur tenerissima vasa : tamen quandoque quædam adest , quæ non adeo sensibiles effectus habet , quamdiu integræ sanguinis massæ mista manet : ubi vero secreta inde fuit , & in quibusdam partibus corporis collecta , tunc sæpe pessime nocet. Sic v. g. susceptum Luis Veneræ con-

R r r iij

tagium, humoribus circulantibus mistum, nullum fere sui signum exhibet; ubi autem latens illud virus ad partes quasdam deponitur, illas erodit, nequidem durissimis ossibus exceptis. Si ergo acre aliquod morbosum sanguini inhærens ad loca quædam corporis deponatur, vel humores à sanguine secreti solito aciores locum quemdam diu alluant, poterunt vascula inde exedi & destrui; adeoque tolletur vitalis influxus & effluxus humorum, id est, gangræna fiet.

**LYMPHA DIU FLUENS CIRCA LOCA TENDINOSA.** Dictum fuit in Commentariis §. 163. nervorum tensorum aut tendinosorum talia vulnera, quibus pro parte tantum rescinduntur, sæpe sequi evacuationem tenuis, acris, & copiosissimi simul feri: Simulque notabatur, nunquam in talibus casibus benignam suppurationem fieri, sed sinuosas collectiones icherosæ talis materiæ omnem pinguedinem musculis interpositam sic corrumpere, ut gangrænosa facta magnis sæpe frustis exeat; imo & ipsas tendinum vaginas pinguedinosas sic destrui; unde postea immobilitas musculorum fit, & totus membri usus sæpe perit. Ichorem vocavit Celsus (a) dicens: *τὸν τένιν, subalbidus, ex malo ulcere exit, maximeque ubi, nervo laeso, inflammatio secuta est. Μαλακία crassior est, glutinosior & subalbida, mellique albo subsimilis. Fertur hoc quoque ex malis ulceribus, ubi nervi circa articulos laesi sunt, & inter hæc loca, maxime ex genibus.* Quia autem circa articulos inflicta vulnera aliquando talis ichoris effluxus comitatur, & postea articuli vicini immobilitas sæpe tota vita manet; ideo Chirurgi articularum aquam (*Leedenwater*) vocaverunt: composito hinc nomine aptissime expressit hoc malum Hildanus (b) Hydrathron vocans. Cumque urentis doloris sensum ægri in hoc malo percipiant, summam lymphæ effluentis acrimoniam culpate solent, licet forte à distractis lenta dilaceratione fibræ nervosæ, vel tendinosis acerrimus ille doloris sensus oriatur. Interim hoc plurimis & fidelissimis observatis constat, post lymphæ talis diuturnum fluxum circa loca tendinosa gangrænam fere semper sequi; sive hoc fiat ob lymphæ fluentis acrimoniam, sive quia diluente hoc vehiculo orbatus sanguis pertinacissimas inflammationes facit. Integrum tractatum de *Ichore & Meliceria* habet Hildanus, ubi plurimi casus enarrantur, qui modo dicta confirmant.

**ICHOR CANCRI.** In calamitosissimo enim hoc morbo in tantam sæpe acrimoniam degenerant humores effluentes, ut lintea applicata stygiæ instar aquæ comburant, & vicinam cutim erodant profundissime, per quam defluunt. Sed, uti postea dicetur, non tantum in partibus externis, verum etiam in internis canceri inventi fuerunt; unde facile patet, quam horrenda mala debeant fieri, dum acre illud virus interiora corporis depascitur.

**FLUOR DYSENTERICUS.** Si v. g. cancri hepatis vel pancreatis virus in intestina depluens continuum deponendi alvi tenesmum, cum horrendis torminibus, faciat, patet facile, sic erosio intestinis, veram Gangrænam fieri posse. Dum turgens atra bilis calore aëris, corporis motu, vel quacumque alia de causa, moveri incipit, dysenterici illæ atrabiliarie fiunt cum dolore intolerabili, quam sæpe brevi post Gangrænam intestinorum sequitur (vide §. 1104.), & placida, omni dolore sublato, mors.

**FLUOR HYDROPICUS.** Paulo ante in eadem hac paragrapho dictum fuit,

(a) Lib. V. cap. 16. n°. 10. pag. 188.

| (b) De Ichore & Meliceria cap. 3. pag. 837.

serum hydropicorum per aperturas, casu vel & arte factas in eruribus, totum aliquando evacuari; verum simul in hoc transitu sæpe vicina his aperturis loca corrumpere: Sed observationes Medicæ docuerunt, idem illud serum quandoque, venis resorptum & humoribus circulantibus mistum, per alvum, urinas &c. exire. *Hydropicis, secundum venas aqua in alvum prorumpente, solutio fit* (a) dixit Hippocrates. Si jam mora & stagnatione aquæ illæ putrescere inceperint, antequam venis resorbeantur, augebitur hæc putredo, dum cum sanguine per vasa circumducuntur; & si per mesenterica vasa in cavum intestinorum tunc excernantur, villosa tunica intestinorum macerabitur & contabescet, dum putrida hac aqua alluitur continuo, unde putredo, gangræna, & mors ipsa toties sequuntur. Generalem hinc modo allegatæ Coacæ Prænotionis sensum alio in loco magis limitavit Hippocrates (b) dicens: *Hydropi incipienti alvi profluvium aquosum superveniens, citra cruditatem, morbum solvit*; tunc enim nondum putredinis ullus metus est.

**MATERIÆ FEBRILIS.** Febris, uti patebit postea, quando peculiari capitulo de hac agetur, sæpe causam suam materiale, unde ortum duxit, vel à qua sustentatur, sic mutat & subigit, ut sine ulla evacuatione redeat omnium functionum integritas. Aliquando etiam latens in corpore noxium mutatur quidem per febrim, & mobile redditur; cum autem illud pergeret turbare functiones, si maneret, expellitur de corpore; vel per abscessum deponitur ad quædam corporis loca. Nec refert, an illud, quod sic abscedit, præexistit ante febrim, an vero natum fuerit in corpore illo tempore, quo febris adfuit: utroque enim in casu materia febrilis vocatur. Ubi ergo materia hæc febrilis per abscessum deponitur ad quædam corporis loca, non tantum per Erysipelata, Phlegmonas, & suppurationes facit, sed aliquando subito vitam omnem in parte suffocat, unde Gangræna & Sphacelus quam celerrime oriuntur.

Alia occasione (in Commentariis §. 253.) memini mirabilis talis casus, ubi homini quinquagenario in febre aguta continua unius noctis spatio siderabatur extrema pars dextri pedis, & postea decidebat; homine tamen superstitie manente: simulac enim morbi malignitas hanc partem occupaverat, cessabat febris, & redibat reliquo corpori sanitas. In vetula septuagenaria, febre ardenti laborante, mirabatur *Tulpius* (c), quod pestifer morbi humor tanto impetu brachium sinistrum invaderet, ut facto initio à commissura humeri præcipitaretur una nocte in immedicabilem sphacelum usque ad extremos digitorum apices, cum tanta protinus cutis nigredine, & tam exsucco atræ carnis squallore, ac si integrum mensem expositum fuisset retorrído urentis solis æstui. Simile infortunium & in alia muliere se vidisse asserit; & apud alios Observatores plures tales casus habentur. Observaverat & Hippocrates, in morbis aliquando jactura partis cujusdam corporis vitam redimi, unde sequens monitum Medicis reliquit: *Pedes autem, digitiq;e, penitus nigri minus perniciosi sunt lividis. Sed & alia signa considerare oportet. Nam si ager malum leviter ferre videatur, atque aliquod signum salubre præterea se ostendet, morbum in abscessum versum iri spes est; sic ut homo quidem superstes evadat, partes vero corporis denigrata decidant* (d).

(a) Coac. Prænot. n°. 451. Charter. Tom. VIII. pag. 879.

(b) N°. 457. ibid. pag. 878.

(c) Observ. Med. Lib. III. cap. 48. pag. 264.

(d) Hippocrat. Prognost. Charter. Tom. VIII. pag. 624.

PESTILENTIS. Omnes, qui de terribili hoc morbo scripserunt, Auctores testantur, quod, si mali hujus virulentia in partem quandam corporis abscederet, illa subito destrueretur, sic ut mortua & vivis adhuc contigua hærens, supuratione in ambitu nata, postea separari debuerit. Anthraces pestilenciales dicebantur plagæ tales, in superficie corporis apparentes, ac si vivo igne ambustæ fuissent. Longe terribiliora adhuc mala sequebantur illam pestem Atheniensium, quam *Thucydides* adeo graphice descripsit (a), qui non solum hac correptos viderat, sed ipse laboraverat. Sanissimos enim repente invadebat tetra lues, cum capitis dolore, oculorum rubore, & inflammatione: mox fauces & lingua sanguinolentæ erant, spiritumque tetrum & pessime olentem exhalabant ægri. Sequebatur sternutatio & rauco: paulo post ad pectus descendebat morbus cum tussi vehementi; dein bilis vomitus; singultus molestissimus; ardor internus intolerabilis; corpus externe non admodum calere videbatur, sed subrubrum lividumque, & pustulis minutis ac ulceribus repletum erat. Sic sensim videbatur morbus à capite descendere per omnia; illique, qui septimum nonumve diem superaverant, descendente jam in ventrem morbo, exulceratione vehementi & magno profluvio debilitati peribant. Si autem morbi furor corporis extremitates corripuisset, tales ægri maxima quidem pericula effugerant; & evaserunt quidam; sed manuum pedumque summitatibus amissis mutili, quandoque pudendis, vel & oculis, orbi ipsa morte calamitosiorem vitam trahebant languidi. Sic & Galenus (b) sævam pestem in summos pedes grassatam fuisse, illosque corrupisse, memorat.

VARIOLO SÆ. In pessimis enim confluentibus tota facies in bullam gangrænosam elevatur, & hac pellicula rupta ichor exit tenuis sæpe olidissimus, subiecta cutis & panniculus adiposus à tabo hoc gangræ noso miserrime depascuntur. Imo memini me aliquoties vidisse, quod jam *Sydenhamus* notaverat, in femoribus talium ægrorum elevatas vesicas, ovum gallinaceum æquantes, tenui ichore, vel & sanguinolenta sanie plenas, quibus ruptis subiecta caro nigerrima apparebat.

SCORBUTICÆ FLUXUS AD CARNEM, IMPRIMIS AD GINGIVAS. In scorbuto illud satis mirum observatur, quod adeo minuatur vasorum cohesio, ut à levissima vi fragantur. Sic rudiorum attactum in hoc morbo laborantibus semper ecchymosis sequitur, fractis vasis effuso sub cute integra sanguine. Imo sine ulla vi externa, sponte ruptis vasis, maculæ illæ scorbuticæ fiunt caruleæ, vel & nigricantes, à musculorum adjacentium motu fractis vasis, vel erosio ab acriori sanguine. Vasorum enim minutam cohesionem in hoc morbo semper acrior sanguinis indoles comitatur; uti postea patebit in hujus morbi historia. Non mirum ergo est, si scorbuticæ materiæ fluxus ad carnem, destructis vasis, Gangrænam faciat. Crurum ulcera pessima, ad optima quævis remedia omnino rebellia, facillime gangrænosa, quotidie observantur in scorbuticis. Nullibi tamen citius scorbuti præsentis indicia observantur, nullibi celerius corrumpit partes, quas occupat, quam circa gingivas. Incipiunt calere, dolore, vel & prurire gingivæ, ad levem attactum sanguinem fundunt; hinc inde dein maculæ albæ oriuntur, in ambitu suo rubræ & inflammatae, quæ sæpe, si negligantur, profer-

(a) De bello Peloponnesiaco Lib. 2. | (b) De usu part. Lib. III. c. 5. Chart. Tom. IV. p. 345. punct



punt & depascuntur omnia, imprimis in junioribus, cum horrendo fœtore, & copiosissimo salivæ tenuis & olidissimæ simul ex ore fluxu. Nostrates malum hoc cancrum aquaticum (*Waterkanker*) solent vocare, quia cancri instar exedit omnia, & jugis talis salivæ fluor adest. Nisi in initio compescatur hoc malum, (quod spiritu salis marini aqua diluto omnium certissime; dein & aliis acidis fossilibus, muria salis marini &c. fit) non tantum gingivas, sed & genas, labia, linguam, imo & dentes, ipsamque osseam maxillam omnino corrumpit, & excidere facit. Aëris liber accessus, calor loci & humiditas, lymphæ acerrima sæpe & putrida continuo hæc loca alluens in pessimo scorbuto, natam semel hic corruptelam augent immaniter.

§. 424. 3<sup>o</sup>. **Q**UÆ mortem extremorum creant defectu vitalis influentiæ, ut quies senilis, debilitas summa, contusiones ingentes magnorum nervorum, spinæ dorsi, medullæ spinalis, magnorum gangliorum (326. 420.).

Cum Gangræna talis sit corporis mollis conditio, quæ abolito influxu vitalis humoris in arterias, effluxu per venas, in mortem tendat (vide §. 419.); patet evidenter, illam nasci debere, quando causæ moventes humores per vasa tam debiles fiunt, ut ad extrema corporis usque motum continuare nequeant. Cordis autem vis arterias implens & dilatans, arteriarum efficacia, qua se contrahere possunt & impulsu à corde sanguinem propellere per ultimas suas angustias in venas, sunt illæ causæ, quæ sanguinis motum per vasa absolvunt. Attamen musculorum, venis adjacentium, motu venosi sanguinis fluxus cor versus promovetur. Ubi ergo in senio, vel per debilitatem summam, à quacumque etiam causa natam, cordis vires sic imminuuntur, ut non possint ad extrema corporis usque arterias impulso sanguine dilatate, incipit nasci quies illa senilis, & ab hac extremorum Gangræna. Præterea requiritur in arteriis talis flexilitas, ut cedere possint, & dilatari à sanguine corde impulso; simulque tale robur, ut cessante cordis actione, elasticitate sua, & fibrarum muscularium actione, propellere possint sanguinem cavis suis contentum. Unde ab oppositis fibrarum solidarum, & vasorum ex his compositorum, vitiis idem sequitur effectus; nempe æquabilis sanguinis motus impedimentum, & stagnatio.

A nimia debilitate & laxitate fibrarum & vasorum impediri humorum per vasa motum, probatum fuit in Commentariis §. 26. & 44. Idem malum fieri à nimia fibrarum & vasorum rigiditate, constitit ex illis, quæ §. 33. & 52. dicta sunt.

In decrepita autem senectute, plurimis canalibus concretis jam, qui in juventute & flore ætatis pervii fuerant (vide Commentaria §. 43. n<sup>o</sup>. 4.), nimium in vasis robur adest, & callositas, per quam resistunt suæ dilatationi; unde tandem cor non amplius valet evacuare contentum suis cavis sanguinem, adeoque obruitur, & quiescit. Videantur illa, quæ in Commentariis §. 128. de inevitabili mortis necessitate ab hac causa dicta fuerunt. Mirabilem casum, qui modo dicta confirmat, habet *Tulpinus* (a): Seni fatuo, diutissime debili, fatiscebant eo usque &

(a) Observat. Med. Lib. III. cap. 46. pag. 261,

languidum cor, & effœtus partium calor, ut à minima corporis offensa sequeretur protinus Gangræna. Si enim vel natibus insideret, vel cubito incumberet, vel calcem pavimento imponderet, vel scapulam in parietem inclinaret, ilico à gangræna oblidebatur non minus pars premens, quam pressa. Brevi serpens malum occupabat universum fere corpus, sic ut omnia jam emortua forent, antequam vere emoreretur miserrimum hoc lascivientis mortis ludibrium. Similem fere casum in fœmina nonagenaria vidi, cui ante mortem non tantum extrema Gangrænosa fiebant, verum & gena, cui dormiens incubuerat, simili labe corripiebatur. Tam debiles enim videntur fuisse in his ægris cordis vires, ut externa compressione, quantumvis hæc levis fuerit, complicata vasa explicare non potuerint.

Sed & aliam incurabilis Gangrænæ causam Historia Medica docet, quando nempe arteriæ, quamvis cordis vires integræ satis fuerint, sic obriguerunt, oliscæ quandoque factæ, ut nec cedere possint sanguini cordis vi impulsio, neque se contrahere. Nobili viro sexaginta septem annos nato, qui optima sanitate valuerat toto vitæ decursu, oriebatur Gangræna in digito pedis, quæ sensim ascendens cruris dimidium jam occupabat. Cum cæteroquin vires constarent, & pulsus satis fortis & æquabilis esset, certæ morti, quæ sic gradatim corpus depalceret, incertum auxilium præposuit animosus senex, crusque gangrænolum sibi amputari voluit. Exstirpatione facta, duæ tresve uncia sanguinis ex musculari carne resecta exiverunt: Ubi autem laxabatur tornatilis ligatura, quæ arteriam subpopliteam compresserat, mirabatur peritissimus Chirurgus, qui operationem fecerat, ne guttam quidem sanguinis exire: Arteriosi autem trunci extremum durum & callosum esse apparuit. Quatriduo autem post exstirpationem peractam periit æger. Dum examinabatur crus abscissum, patebat, truncos arteriosos majores pro maxima parte oliscos factos fuisse, & in quibusdam locis adeo contractos, ut vix setam admitterent suis cavis. Unde satis patuit Gangrænæ hujus causa (\*).

Cum ergo seniles tales Gangrænæ fere semper immedicabili vitio vasorum ortum debeant, vel cordis debilitati non facile corrigendæ, patet satis, nec separationem corrupti hic expectari posse per suppurationem, neque profuturam exstirpationem. Nihil ergo superest, quam ut pars affecta sale, aceto, vino, ruta, scordio & similibus condiatur, & ab omni putredine præservetur; simulque bono victu & cardiacis vires vitales augeantur, quantum fieri potest. Hac methodo *Celeberrimus Boerhaavius* in Senatorio hujus urbis viro per sex integros menses stigma gangrænolum, in pollice pedis natum, continuit, ne proserperet. Cum autem, convocato Medicorum consilio, plurium suffragiis concluderetur, tentandam esse separationem illius mortui à vivis partibus per suppurationem, & hunc in finem Cataplasmata maturantia applicarentur, tridui spatio Gangræna jam ad femur usque ascendit, & paulo post placide exspiravit æger.

Quare autem contusiones ingentes, vel alias læsiones insignes magnorum nervorum, gangliorum, spinæ dorsi aut medullæ spinalis, sequatur Gangræna, explicatum fuit in Commentariis §. 162.

(\*) Philosoph. Transact. n°. 369. pag. 226 Abridg. Tom. VII. pag. 571.

# §. 425. 4°. V E N E N A mirabilia.

Præter hætenus recensitas Gangrænæ causas, adhuc aliæ quædam occurrunt, quæ ad priores classes reduci non poterant. Dantur enim in rerum natura talia, quæ corpori humano applicata mortem partis, imo & totius, cito & certo faciunt, licet modus physicus, quo hoc faciant, hætenus lateat. Cum enim in qualitatibus sensibilibus venenorum sæpe nihil occurrat, cui tanta efficacia adscribi posset, tota substantia nocere, & occulta qualitate hæc agere *Galenus*, & post illum Scholæ dixerunt. Recentiores Philosophi, quibus rerum causas ignorare turpissimum videbatur, exploserunt qualitates illas occultas, & riserunt Veterum simplicitatem, qui candide ignorantiam confessi effectus illos mirabantur, quorum causas minime intelligerent. Verum potiori jure subtilissimos Philosophos, de veneno Viperarum disputantes, risit Magni Hetruriæ Ducis Venator (vide Commentaria §. 155.), dum illorum ratiunculas convelleret, epota non tantum bile viperæ, verum etiam iratissimæ & maximæ viperæ saliva, spuma, & venenato succo pone dentes in loculis peculiaribus collecto, vino dilutis & haustis. Licet enim in vulnere noceant venena quædam, impune tamen sæpe deglutiuntur. Unde *Psyllis*, qui sugendo curabant venenata vulnera, non tribuit *Celsus* (a) scientiam præcipuam, sed audaciam usu ipso confirmatam. Adeoque conclusit: *Ergo quisquis, exemplum Psylli secutus, id vulnus exusserit, & ipse tutus erit, & tutum hominem præstabit. Illud interea debet attendere, ne quod in gingivis, palatoque, aliave parte oris ulcus habeat.*

Vidimus in §. 423. in morbis aliquando nasci aliquid, quod naturæ humanæ adeo adversum est, ut partem corporis, versus quam deponitur, ilico faciat emori. Dicitur fuit ibidem, contagium variolosum paucorum dierum spatio sic corrumpere posse omnia in sanissimo etiam juvene, ut tabo gangrænofo totum corpus diffuatur. Sed præter hæc observationes Medicæ docuerunt, venenatorum animalium morsu etiam levissimo, Gangrænâ & Sphacelum nasci posse. Dum per Libyæ deserta exercitum duceret *Cato*, ubi ingens venenatissimorum animalium copia erat, occurrebat & exiguus serpens *Seps* dictus, qui miserum militem parvo tantum vulnere læserat in crure, atque statim

----- *Plaga proxima circum*  
*Fugit raptâ cutis, pallentiaque ossa retexit.*  
*Jamque sinu laxo nudum est sine corpore vulnus,*  
*Membra natant sanie, suræ fluxere, sine ullo*  
*Tegmine poples erat: femorum quoque musculus omnis*  
*Linquitur, & nigra distillant inguina tabe. &c.*

Sic sensim ascendendo abdomen, pectus, & contenta his viscera diffluabant; imo & ipsa ossa consumpta fuisse canit Poëta (b), & quidem satis subito:

(a) Lib. V. cap. 27. n°. 3. pag. 309.

】 (b) *Annei Lucani Pharsal. Lib. IX.*

----- Omne  
*Quidquid homo est, aperit pestis, natura profana  
 Morte patet, manant humeri, fortesque lacerti:  
 Colla, caputque fluunt. Calido non ocyus Austro  
 Nix resoluta cadit, nec solem cera sequitur.  
 Parva loquor, corpus sanie stillasse perustum,  
 Hoc & flamma potest, sed quis rogos abstulit ossa?  
 Hac quoque discedunt, putresque secuta medullas  
 Nulla manere sinunt rapidi vestigia fati.  
 Cyniphias inter pestes tibi palma nocendi est:  
 Eripiunt omnes animam, tu sola cadaver.*

Forte Poëtæ fides parum suspecta videretur nonnullis, cum solita licentia uti potuisset in horrendis illis malis enarrandis, quæ morsum hujus serpentis sequuntur: sed in Commentariis §. 105. casus mixtus habetur, qui huc satis accedit. Sanissimam enim puellam venenatissimus serpens momorderat, unde brevi moriebatur: dumque cadaver paucis tantum post mortem horis auferre volebant, tabefactæ jam ab ossibus secedebant carnes.

Latet sæpe deleteria talis facultas in quibusdam rebus, de quibus nullus cogitasset unquam, nisi frequentes casus docuissent, inesse his talem malignitatem. Sic observatum fuit in Galliis, secales grana (imprimis illa quæ Martio mense terræ tradi solent) solo humido & frigido lata, si pluviz copiosæ fuerint, pro magna parte in spicas surgere degeneres omnino, quæ & nigra erant, & à solita figura recedentes galli gallinacei calcaria non inepte referebant. Dumque annonæ penuria non mundarent satis secalen ab hoc vitio pauperes, plurimi Gangræna sicca, nigra, & livida corripiebantur, quæ à digitis pedum incipiens sensim ascendebat: in magno satis talium ægrorum numero tantum unus fuit, cui gangræna in manu inciperet. Quod maxime mirum videbatur, soli viri hac gangræna afficiebantur, mulieres nullæ, nisi hinc inde quædam juniores puellæ. Dum gallinis dabantur vitiosa hæc secales grana, maluerunt integro triduo inediam pati, quam hæc sumere: quibusdam autem fraude ingesta hæc grana non videbantur nocere (a). Mirabilis hæc observatio docuit, saluberrimum humano generi alimentum sic à latente causa mutari posse, ut verum fiat venenum.

§. 426. **G** A N G R Æ N Æ futura signa sunt causæ ejus (422: 423. 424. 425.) præcognitæ.

De his omnibus, numeris hic citatis, dictum fuit: Agendum nunc de illis signis, quibus præsens Gangræna cognoscitur, & distinguitur ab inflammatione, quæ illam sæpe præcedit; & à sphacelo, qui gangrænam aliquando sequitur.

(a) Académ. des Sciences l'an 1710. Hist. pag. 80.

§. 427. **A**T vero præsentis hæc: 1. phænomena inflammationis subito ablata sine correctione causæ (confer 382. 383. 385. cum 422. 423. 424. 425.). 2. sensus hebes. 3. color pallidior, cinereus, fuscus, lividus, niger. 4. mollities, flacciditas, ad tactus vestigia non resurgens. 5. pustulæ ichore lympharico subflavo, vel rubello plenæ in loco inflammato. 6. ubi à frigore, pruritus & punctura ingens, una cum rubore intenso, quem brevi nigritudo mortifera sequitur.

Si bene intellecta fuerint illa, quæ dicta sunt de causis præcedentibus, natura, & loco gangrænæ, facile distinguetur, an Gangræna adsit nec ne, sequentibus signis.

1. Phænomena inflammationis oriebantur à vi vitæ urgente sanguinem in vasa obstructa majori celeritate, uti dictum fuit §. 381. omnia autem illa §. 382. & sequentibus enumerata fuerunt. Si ergo hæc phænomena increverint omni momento, dein subito desinant, novimus, non cessasse hæc mala ob causæ correctionem, id est resolutionem concreti inflammatorii: quia hæc nunquam fit, nisi initia fuerint omnia inflammationis symptomata (vide §. 386.). Neque poterit tunc adesse suppuratio, quia per hanc inflammationis phænomena non abolentur, sed sensim, non subito, mutantur & mitescunt: multo minus adhuc scirrhus expectari poterit, in quo omnia adhuc lentiori gradu mutantur. Superest ergo tantum ille exitus inflammationis, quo in Gangrænam, id est mortem partis, tendit. Quare antem tunc cessent symptomata, quæ inflammationem comitantur, explicatum fuit in Commentariis §. 388. Ubi inflammatio corporis partem externam occupat, sensibus mutatio coloris & reliqua signa gangrænæ, ex inflammatione natæ, percipi possunt. Si vero interiora corporis simile malum occupaverit, caloris, doloris, febris subita ablatio idem docet.

2. Locus inflammatus antea dolentissimus erat, ob distractas fibras nervosas per tunicas vasorum distentorum dispersas: cum ergo causa distendens, vitalis nempe humorum influxus per vasa, cesset, aberit & dolor; vel saltem quam plurimum minuetur. Accidit enim aliquando, panniculo adiposo jam per Gangrænam corrupto, cutim tamen nondum emortuam esse, unde aliquis sensus supererit; uti etiam in partibus panniculo adiposo suppositis; quæ tunc, interposito hoc mortuo & insensibili, corporum externorum actionem obtusiori sensu percipiunt.

3. Demonstratum fuit in Commentariis §. 382. n°. 1. 2. & 5. locum inflammatum rubere, & cutim præ summa tensione splendere. Simul ac vero omnis humorum motus per partem inflammata tollitur, incipit deficere floridus ille ruber color, pallor dein nascitur, quem color cinereus, fuscus &c. excipit; sic ut, pro vario colore partis affectæ, varius sic corruptelæ gradus; eo pejor semper, quo magis à pallore in mortiferam nigredinem vergat. Pulcherrime has Gangrænæ præsentis notas recensuit *Galenus* (a), dum in maximis inflammationibus, vehementer obstructis vasorum orificiis, & omnibus meatibus naturali

(a) De Tunfor. præter naturam cap. 8. Charter. Tom. VII. pag. 317.



perspiratione destitutis, subito partes sic affectas mori debere monet. *Ac primum illarum exstinguitur floridus color* ( *αποβιναται τι τὰς χρίας ιωάνης* ) *qui inflammatio- nibus adfuerat; deinde dolor & pulsus abeunt, non sedato affectu, verum sensu emortuo.*

4. Quamdiu inflammatio durat, durus & renitens tumor partem occupat, qui compressus ilico resilit, quia impetus vitalium humorum, a tergo urgens loca obstructa, distendit omnia. Ubi ergo deficit ille impetus, mortua jam parte, omnia flaccescunt, & panniculus adiposus, antea distentissimus, nunc mollis apparet, & impressi digiti vestigium retinet. Tangenti tunc locum sic affectum videtur sub cute tenax quasi fluctuare materia, vel saltem manifesta partium cu- ri suppositarum vacillatio percipitur, quæ tantum à corrupto panniculo adiposo fit; cujus ingentia frustra postea secedunt, dum mortuum à vivis benigna suppu- ratione separatur.

5. Signum hoc solet fere Pathognomicum haberi, quo præsens Gangræna in externa corporis superficie cognosci posset. Rumpuntur enim subito vasa ( uti dic- tum fuit §. 388. ) dum inflammatio in gangrænam abit, & effunduntur humores, brevi corrumpendi. Epidermidis tenerrimi cum cute subjecta nexus solvantur, illaque ab effusis humoribus in pustulas attollitur; quæ vel ichore flavescente, vel & aliquando subrubello, loturæ carniū instar, turgent; in pessimis au- tem gangrænis, quæ brevi in sphacelum tendent, etiam nigro ichore plenæ ta- les bullulæ apparent.

6. Peculiaris hæc Gangræna species distinctis signis cognoscitur. In borealibus regionibus, & regidissima hyeme, miserrimi tales casus satis frequentes occurrunt. Extremæ nempe corporis partes, digiti pedum manuumque, nasi apex, aurium lobi, acerrimo gelu subita Gangræna sic corrumpuntur, ut postea cadant: sic autem solet procedere hoc malum. Primo à frigore pallor oritur, sequitur dein ru- bedo, quam comitatur dolor punctorius molestissimus, vel pruritus magnus; ru- bedo dein augetur, in purpureum fere colorem vergens; dein nigrescit pars sic affecta, &, ad ossa usque vero sphacelo corrupta, cadit. Quia autem Gangræna ab hac causa orta citissime partes corporis facit emori, & aliam longe curationis methodum requirit, uti dicetur §. 454. ideo omni cura attendendum est, ne ullus in hac Diagnosi error contingat.

§. 428. **S**PHACELUS futurus scitur ex signis Gangræna præ- sentis ( 427. ) assiduo auctis.

Dictum fuit in Commentariis §. 420. Gangrænam plerumque præcedere, hanc vero sequi sphacelum. Si ergo omnia signa Gangræna præsentis, præcedenti pa- ragrapho recensita, augeantur, novimus sphacelum metuendum esse. Gangræno- sæ enim partes poterunt viva supposita comprimendo suffocare, vel & proserpente putredine corrumpere.

§. 429. **P**RÆSENTIS autem signa sunt. 1. Gangræna exqui- sita prægressa. 2. sensus, motusque integre sublatis, ut pars scissa, puncta, ulla, usque ad ipsa ossa, nihil sentiat, sed gra-

vis modo sit. 3. color lividus, fuscus, niger. 4. mollities, flacciditas, frigus, cutis separabilis, tandem siccitas, durities. 5. fœtor cadaverolus. 6. corruptio mortifera, profunda, omnia vicina depascens in ossa usque.

1. Signum hoc Medici & Chirurgi attentionem tantum excitat; non enim semper sphacelus sequitur, licet exquisita Gangræna prægressa fuerit, sed tamen tunc merito metuitur hoc malum.

2. Non adeo facile sæpe est determinare, an sphacelus adsit, nec ne. Sæpe enim panniculus adiposus, valida Phlegmone occupatus, in crassitudinem immanem distenditur, etiam in illis locis ubi non multum pinguedinis adest; uti v. g. in manuum & pedum dorso, & digitis. Si jam Gangræna tales partes occupet, poterit scalpellum adigi ad magnam profunditatem sine ullo doloris sensu. Imo poterit distentus panniculus adiposus, cute integra coercitus, sic comprimere subjectas partes, ut hebetior in illis sensus sit, imo fere nullus, quamvis nondum omnino mortuæ fuerint hæ partes, & postea ab hac pressione liberæ reviviscant quasi. Unde non potest concludi, sphacelum adesse, nisi certi fuerimus, profundissimis scarificationibus vel puncturis nullum omnino excitari dolorem: si enim adhuc aliquid vivi sub panniculo adiposo, gangræna corrupto, lateat, poterit separatio corrupti expectari.

Notandum præterea, sæpe motum superesse posse in parte, quamvis sphacelo penitus corrupta fuerit. Vidi hoc in viro illo, cui in febre subito anterior pedis pars sphacelo corripiebatur (vide §. 423. B.): movebat enim digitos pedis affecti, licet scalpello ad ossa usque adacto nullum omnino dolorem perciperet, nec vel unica sanguinis guttula efflueret. Neque mirum hoc videbitur, si consideretur, plurimos musculos, pedum manuumque digitos moventes, satis alte locari; unde, licet extremæ partes membri sphacelo affectæ fuerint, poterunt muscoli adhuc sani sua actione partes mortuas movere, quibus suis tendinibus affiguntur. Tendines enim, funium instar, trahuntur, dum muscoli agentes turgent; & cum tenacissimi sint, diu manent integri, licet reliquæ partes molles jam putredine diffuant: unde & in illo viro coacti fuimus postea, dum separabantur mortua à vivis, forcice rescindere cohærentes adhuc tendines. Simulac integre mortua fuerit pars corporis, sentitur ejus gravitas tanta, ac si plumbum vivis partibus affixum hæreret. Quamdiu enim liber transitus humorum per omnia vasa obtinet, integra sanitate fruimur & corporis nostri pondus non sentimus; ubi autem à quacumque causa ille impeditur, gravitatem & torporem percipimus. Unde lassitudines illas spontaneas morborum prænuncias dixit Hippocrates (a).

3. Videantur illa, quæ præcedenti paragrapho n°. 3. dicta sunt.

4. Quare mollescat & flaccida fiat pars corporis Gangræna & Sphacelo affecta, dictum fuit pariter paragrapho præcedenti. Cum autem calor à fluidorum per vasa motu fiat (vide Commentaria §. 382. n°. 6.), motu hoc sublato, necessario pars sic affecta ad communem aëris ambientis temperiem reducitur; sed tunc frigescere dicitur, quia calor corporis sani semper calorem aëris ambientis superat.

(a) Aphor. 5. Sect. 2. Charter. Tom. IX. pag. 46.

Quamdiu autem Gangræna tantum adest, partes suppositæ adhuc vivæ suo calore poterunt aliquem saltem reporem parti affectæ conciliare; ubi vero ad ossa usque omnis vitalis influxus desinit, patet facile, frigus nasci debere.

Solet tunc epidermis secedere semper, quæ & tenacissima est, & non facile putredine corrumpitur: sic etiam post combustiones cantharides applicatas &c. integra manet epidermis; solutis tamen vinculis, quæ illam cuti necebant, ab humoribus effutis in bullas attollitur. Imo dum pars cadaveris humani in aqua diu maceratur, & putrescit, non corrumpitur epidermis, sed secedit à partibus suppositis in tabum putridum jam resolutis.

Licet autem incipiente sphacelo mollities & flacciditas partis sic affectæ appareat; tamen postea, fluidissimis partibus dissipatis, reliqua omnia exsiccata contrahuntur, & exsiccantur sic, ut durissima appareant. Partibus enim sphacelo corruptis idem accidit, quod in carnibus animalium mactatorum, in aëre libero suspensis, observatur apud illos, qui equinis carnibus ferocissimos canes alunt. Primo enim hæc carnes putrido tabo disfluunt, dein indurescunt quam maxime. Imo in aridis & exsuccis senilibus corporibus sphacelo correpta pars sine ulla putredine servari potest diu, sed exsiccata. Mirabilis talis casus Hagæ Comitum observatus fuit. Nonaginta duorum fere annorum anus de dolore atrocissimo dextræ tibie conquerebatur: Medicus advocatus vero sphacelo totum crus affectum invenit, fere ad genu usque. Cum vires projectæ, & decrepita senectus, exstirpationem sideratæ partis vetarent, bono victu & cardiacis remediis vires instaurabantur: interimque emortuum illud membrum terbinthinæ spiritu inungebatur assiduo, posteaque spiritu juniperino fovebatur. Sic omnis putredo prohibita fuit, neque proserpsit sphacelus; sed miro spectaculo pars mortua, Ægypticæ Mumie instar exsiccata, vivo corpori adhæsit per sex fere integros menses; tuncque tandem mortua fuit hæc mulier (a). *Hildanus* ex observationibus *Smetii* similem casum refert (b). Mulier nempe alterum pedem aridum, nigrum, & absque tumore spaciellatum, sine ullo motu aut sensu, aliquandiu gestaverat: post multum temporis pars hæc mortua à vivis separata cecidit, speciemque linguæ bovillæ fumo indurata, præ se tulit.

5. Pars enim sphacelo affecta omnia eadem patitur in aëris communis calore, quæ cadaver; unde & similis fætor, & corruptio aderit.

6. Sicut jam in cadavere spontanea corruptione omnia pereunt, exceptis ossibus solis, quæ etiam post sæcula plura superfuisse constat observatis; sic & sphacelo omnes partes molles, nisi exsiccantur, in tabum putridum disfluunt, & ab ossibus secedunt. Simul & hoc in sphacelo observatur, quod, nisi arte vel natura limes ponatur inter vivum & mortuum, & partes molles rima facta in hoc confinio secedant à se mutuo, pergat mortifera hæc corruptio depascere omnia vicina, & quidem eo citius, quo vita est actuosior: unde in juvenili corpore, imprimis si valida simul febris adest, tam cito sphacelus serpit; in decrepita senectute, modo antisepticiis pars mortua à corruptione præservetur, sæpe satis diu toleratur malum. Liquida enim per vasa vitalia ad sphacelum usque propulsa sistuntur, & venæ corrupta miasmata resorbent; hinc vivum, contiguum

(a) Miscellan. Curios. dec. 3. an. 5. & 6. | pag. 471.

(b) Hildan. de Gangræna & Sphacelo cap. 7. pag. 779.

mortuo, ulterius afficitur. Horrendum tale spectaculum narrat Tulpus (a) dicitque, nullum mortalium acerbius quid tulisse unquam, vel vidisse execrabilis. Mulieri nempe annorum quinquaginta ex acerbissimo ventris dolore nata Gangræna medium abdomen depascebat sic, ut consumto umbilico, & perforato peritonæo, denudaverit non modo mesenterium, ac intestina, sed exererit pleraque ventris extra. Cruentis cutis, musculorum, peritonæi, omenti horas, lacerum mesenterium, ventris viscera pure, sanie, & effusis cibi reliquiis fœdissime conspurcata, nemo sine horrore videre poterat. Pulcherrime modum, quo Gangræna & Sphacelus proserpere solent, Celsus descripsit dicens: *Caro illi ulceri vel nigra, vel livida est, sed sicca & arida; proximaque cutis plerumque subnigri pustulis impletur; deinde ei proxima, vel pallida, vel livida & fere arginosa & sine sensu est. Deterior in inflammatione est, omniaque illa simul serpunt: ulcus, in locum pustulosum: Pustula, in eum, qui pallet aut livet: pallor aut livor, in id quod inflammatum est: inflammatio in id, quod integrum est, transit (b).*

### §. 430. I N G E N S in hoc morbo & velox discrimen præstigia vera exigit.

Simulac sphaceli præsentis signa apparent, omnibus rite perpenſis, sine ulla mora concludendum est, quid heri debeat, ut vita servari possit. Si vero nihil aliud superſit, quam extirpare partem mortuam, illud faciendum quam citissime. Unius enim alteriusve horæ spatio aliquando sic proserpit malum, ut nulla amplius medela superſit. Plurima observata Medica & Chirurgica docuerunt, quam velox discrimen in hoc morbo sit: unicum & satis notabilem casum adduxisse sufficiet. Mulier, ante quatuor septimanas fœtam enixa, sana, subito in dextro pede tantum dolorem sensit, ut ejus atrocitatem summis ejulatibus exprimeret. Nullum tamen in parte dolente post sollicitum etiam examen vitium apparuit; nec frigus, nec calor nimius aderat: Nec mollissimis cataplasmatibus, neque aliis remediis adhibitis, levabatur dolor; & ad suram usque tumere & inflammari incipiebat crus. Cumque sæpius mutarentur applicata remedia, ut leniretur intolerabilis dolor, tandem levamen sensit ægra, & obdormiens satis tranquillam noctem duxit: dum vero Chirurgus novisset, pacatum esse dolorem, sequenti mane serius illam invisit, ne turbaret: sed obstupuit ille, videns totum pedem frigidum, sine ullo sensu, perfectò sphacelo corruptum, malo jam supra malleolos ascendente. Concludebatur ilico partem extirpandam esse: post bihorium, necessariis omnibus ad hanc operationem dispositis, redit Chirurgus, sphacelus autem jam totum crus ad genu usque occupaverat. Tanta serpentis mali velocitate territus noluit tentare extirpationem, quam inutilem fore credebat, cum jam vitales vires labascerent; uti patebat ex debilitate pulsus. Sequenti die jam dimidiam femoris altitudinem sphacelus occupabat. Audacior alter Chirurgus, sed non prudentior, extirpavit femur, sine ullo ægræ dolore quidem; sed & sine ullo fructu, cum bihorio postea exspiraverit (c).

(a) Lib. III. cap. 7. pag. 187.

(b) A. Corn. Celsi Medic. Lib. V. cap. 26.

pag. 301.

(c) La Motte Traité complet de Chirurgie

Tom. III. pag. 358.

§. 431. **Q**UAM veritatem dabit. 1. justa consideratio ætatis, temperiei, morbi, virium. 2. Velocitas mali. 3. causa interna vel externa cognita. 4. anni tempestas. 5. locus affectus, ut vitæ magis, minusve necessarius, vel prout humida, sinuosa, aut sicca temperie donatur.

Ut firma ergo Prognosis habeatur, quæ determinet, quænam metuenda sint, quænam speranda; sequentia debent considerari.

1. **Æ T A S.** In junioribus, cum liquida solidis prævaleant, omnia fere diffluunt; unde sæpe satis velox putredinis semel natæ progressus. Hoc imprimis in Gangræna illa gingivarum, quam Cancrum aquaticum solent vocare, patet, quæ citissime in hac ætate omnia depascitur. Media ætate Gangræna & Sphaceli magnas tantum inflammationes sequuntur; vel & in febribus acutis aliquando observantur. In senectute vero à mera quiete & defectu subtilissimi liquidi eadem hæc mala nascuntur; tuncque raro vel nunquam curantur, cum non possit emendari causa. An *καρκίνος* *καρκινώδης* cancri extrema occupantes, quos in senectute nasci, & senibus commori dixit *Hippocrates* (a), huc referendi? Certe *Celsus* (b). Cancri nomine simile malum descripsit, & *γαστήριον* appellari dixit, si in prominentibus membris, id est, inter ungues & alas vel inguina, nasceretur. Addiditque, fere in senibus, vel in his, quorum corpus mali habitus est, hoc malum fieri. Et *Hippocrates*, in loco modo citato, paulo post subjungit, quod ex articulis periculo maxime obnoxii sint magni digiti, & imprimis pedum.

**TEMPERIEI.** Hæc vel sana est, vel morbosa. Sic in calidæ temperiei hominibus si spacelus natus fuerit, nisi artē vel natura limes ponatur serpenti malo, cito perget vicina depascere. In frigidis autem, cæteris paribus, lentior observatur Gangræna & Spaceli progressus. Si autem morbosa temperies in putridum vergens prædominetur, ut in scorbuto putrido, atræ bilis quadam specie &c. pessima quævis metuenda erunt.

**MORBI.** Sic v. g. post diuturnum hydropem Gangræna pedum rarissime curatur. Ubi vero in morbo acuto febrilis materia (vide §. 423. h.) extremam corporis partem quandam occupat, & omnino emori facit; magna spes est, modo reliqua signa salubria sint, evadere posse talem ægrum, sed hac parte sui corporis mutilum.

**VIRIUM.** Quam maxime notandum est, quod & post velocissimum humorum motum in febre ardentissima, & post stagnationem & quietem in decrepita senectute, nascantur Gangræna & Sphacelus. In priori casu, quo vires vitales fuerint validiores, eo citius perget malum; in posteriori vero, eo minor spes erit, quo debiliior vita fuerit. Facile autem patet, debilitatem summam magis metuendam esse, quam nimis velocem humorum vitalium per vasa motum: illum enim minuere possumus per illa remedia, de quibus in Commentariis §. 102. 103.

(a) Prædict. Lib. II. cap. 8. Charter. Tom. I. (b) Lib. V. cap. 26. n°. 31. pag. 307. VIII. pag. 817.



104. 105. dictum fuit; excitare vero fatiscentes, imprimis in summo senio, vires, longe magis arduum est; imo sæpe penitus impossibile.

2. Inflammationis, quæ benigna resolutione curari poterit, decursus nunquam velox est; sed symptomata omnia, vel sensim, vel vix augentur: ubi eadem in suppurationem tendit, dolor, calor, rubor &c. velocius crescunt: omnium velocissime, si in gangrænam abitura sit: atque iterum in Gangræna tanto majus discrimen, quo citius hæc proserpserit: idem & in Sphacelo verum est. Casus ille hoc confirmat, qui præcedenti paragrapho allegatus fuit: statim enim dolor in summam atrocitatem usque augebatur; inflammatio validissima secuta fuit, quæ brevi mutabatur in gangrænam; hæc vero in sphacelum quam citissime proserpentem. Jure merito ergo peritis omnibus Chirurgis semper suspecta fuit magna velocitas crescentis mali; & quidem omnium maxime, si ab internis causis, sine ulla læsione externa, Gangræna nata fuerit.

3. Tunc enim novimus, an hæc causa tolli vel emendari possit, an non? si v. g. cognosceretur, tumorem scirrhusum venam cavam descendantem sic comprimere, ut inde Gangræna in extremis inferioribus nasceretur (vide §. 422. f.), satis pateret, incurabile hoc malum esse: si vero à decubitu diuturno pondus corporis partes circa os sacrum & coccygis sic compresserit, ut inde gangræna fiat, mutato situ corporis impediri poterit mali progressus; & dein idoneis remediis separari à partibus vivis illud, quod corruptum erat.

4. Ab acerrimo frigore gangrænam nasci certum est; uti etiam à summo calore, sive per ignem corpori applicatum, sive à validissima inflammatione. Omnium ergo optima anni tempestas erit illa, in qua nec acris frigus, nec intensus calor adest, id est, ver vel autumnus. Hyemalis vero tempestas maxime nocet illis Gangrænis, quæ à quiete senili fiunt; æstas autem damnosa imprimis, si post validas inflammationes, aut humorum putridam corruptelam, similia mala sequantur: omnium maxime, si intensum calorem aëris humiditas simul comitetur.

5. Nisi incipiens Gangræna subito corrigatur, destructis solidis, extravasatis & corruptis fluidis, sic corrumpitur pars, ut nullo modo sanitas restitui possit. Tuncque nihil aliud superest, quam separare illud mortuum à vicinis partibus vivis quam citissime. Si jam pars affecta talis fuerit, ut ejus integritas ad vitam absolute requiratur, patet facile, nihil spei superesse: uti v. g. si cerebellum, medulla oblongata, medulla spinalis &c. Gangræna corrumpantur. Præterea major curæ difficultas erit, si Gangræna humida corporis loca occupaverit; nata enim putrefactio ab humorum illuvie continua plurimum augebitur: unde tam difficiles Gangrænae, quæ os internum occupant, & tam cito proserpunt, cum fœtore intolerabili. Ubi autem locus affectus sinuosus est, uti sunt genitalia in utroque sexu, intestinum rectum &c. semper metus est, ne difficilior mortuum à vivo separari possit; & quamvis hoc factum fuerit, postea malum hoc degeneret in fistulosum ulcus. Ubi vero extremæ corporis partes siccae & tendinosæ Gangræna aut sphacelo corrumpuntur in senibus, vel & in aliis hominibus, quibus sicca temperies naturaliter est, similia mala oriuntur; plerumque tamen tardius proserpet malum, neque tanta putredo sequetur: sed etiam longe difficilior erit separatio corrupti à vivis & sanis partibus, quia hæc per liquidam sanam, ad limites Gangrænae debito impetu & copia allata, perfici debet.

Ex omnibus jam, quæ hætenus dicta sunt, colligi possunt axiomata quædam, quæ legitimam in his malis Prognosin faciunt, & sequenti paragrapho enumerantur.

§. 432. **H**INC regulæ:

A Gangræna sphacelus.

A Sphacelo mors partis, & vicinorum cita infectio.

Gangrænæ ilico succurrendum.

Sphacelus ilico extirpandus.

A GANGRÆNA SPHACELUS. Cum Gangræna ut plurimum solum panniculum adiposum occupet (vide §. 420.), Sphacelum præcedere solet. Sæpe enim sub tumente enormiter panniculo adiposo, & jam Gangræna corrupto, vivi musculi adhuc, uti & periosteum & ossa sana, hærent. Facile autem patet, Gangrænam mole sua vicinas partes vivas comprimere posse adeo, vel & propagatione mali sic afficere, ut moriantur; tuncque à Gangræna Sphacelus natus est.

A SPHACELO &c. Quamdiu adhuc per quasdam membri affecti partes aliqua humorum circumductio superest, nondum sphacelus adest, & adhuc aliqua spes manet, corrupta à vivis partibus separari posse. Ubi vero omnis vitalis influxus & effluxus humorum omnino sublatus est, mors partis adest. Sed mortua hæc pars vivis cohæret; & sæpe eadem causæ, quæ sphacelum produserant, pergunt agere, & vicina similiter perdunt: imo, licet hæ causæ cessaverint, contigua tamen loca cito inficiuntur. Liquida enim vasorum continuitate ad locum corruptum deferentur; hinc putredinem hanc alluent omni momento, & stagnabunt hic, quia per mortuæ partis vasa transire nequeunt. In solidis autem partibus continuitate substantiæ proserpet malum. Quam cito autem vicinæ partes à Sphacelo afficiantur, patuit in memorabili illo casu, cujus mentio facta fuit in Commentariis §. 430.

GANGRÆNÆ ILICO SUGGURRENDUM. Illa enim (uti optime dixit Galenus in loco allegato in Commentariis §. 419.) inter magnam inflammationem & sphacelum quasi media est: *tanto quidem gravior inflammatione, quanto levior sphacelo: ille enim est corruptio totius substantiæ membri affecti, ita ut nullus eum curaverit jam confirmatum, sed adhuc incipientem, cum nondum sphacelus est, sed magna gangræna sphacelo vicina.* Cum autem gangræna in mortem partis, id est sphacelum, tendat; patet, omni artis molimine huic succurrendum esse quam citissime.

SPHACELUS ILICO EXSTIRPANDUS. Sanæ enim & vivæ partes vicinæ afficiuntur brevi proserpente malo. Unde, quo diutius differtur extirpatio, eo plus perditur de corpore. Adeoque, *miserum, sed unicum, auxilium est, ut cætera pars corporis tuta sit, membrum, quod paulatim emoritur, abscindere (a).* Faciendum tamen est, observationes Medicas & Chirurgicas docuisse, aliquando & naturam, quæ toties sibi soli sufficit, perfecisse curam in talibus casibus, ubi sola extirpatio locum habere posse videbatur. Homo quadraginta circiter annorum, bonæ temperiei, vulneratur gladio in parte media interna & inferiori brachii dextri: Vulnus hoc sequebatur statim ingens Hæmorrhagia, quam adstringentibus & forti ligatura compescebant. Febris continua, ardens, accessit, cum vigiliis fere perpetuis; & brevi postea ad cubitum usque omnia sphacelata apparue-

(a) A. COSM. CELS. lib. V. cap. 26. n°. 34. pag. 364.

runt : imo & interna brachii pars ad axillam usque jam corrupta erat, & ipsum brachii os usque ad distantiam quatuor digitorum transversorum ab axilla nudum erat, omnibus ipsi incumbentibus jam putredine sublati. Cum ad tantam altitudinem jam ascendisset malum; febris adesset cum anxietate, genæ lividæ forent, pulsus debilis & vacillans, periti Chirurgi in consilium vocati concluderunt, exstirpationem tentari non posse. Dum hæc fierent, accedit muliercula, quæ se curaturam hunc ægrum pollicetur : Chirurgi commiserunt illius curæ hominem, quem brevi credebant periturum. Illa totam partem unguento quodam perfricat, deinde linteis tegit, simulque cibos valde nutrientes & optimum vinum exhibet : post viginti quatuor horas jam apparebat limes serpentis mali; pergebat eodem modo, & quodidie in melius videbatur mutari malum, secedentibus partibus corruptis sponte. Cum autem à cubito ad apices digitorum usque omnia corrupta forent, & terribilissimum fœtorem spargerent, voluerunt Chirurgi tollere hoc corruptum, cum vix amplius hæreret reliquis partibus : sed noluit pati hoc mulier illa, quæ curam dirigebat, unguento solo omnia perfici posse affirmans. Tandem post sex septimanas sponte totus cubitus ab osse humeri cecidit : illa interim & nudam ossis humeri partem & reliqua suo unguento textit; & tam felici quidem cum successu, ut mensis spatio elapso ossis humeri pars, quæ nuda fuerat, secesserit à reliquo osse sano, & quatuor mensium spatio ad cicatricem deductum fuerit terribile hoc malum (a). Unguentum autem illud, quo usæ fuerat hæc mulier, Balsamo Lucatelli in officinis dicto satis simile erat, confectum ex olivarum oleo, cera, terebinthina, ligno santalo rubro. Ne autem credatur, mirabilem hanc curam huius unguenti efficaciam adscribendam esse, alius casus evincit; quo constitit, naturam, nullis omnino remediis adiutam, talem separationem sphacelo corrupti membri perfecisse. Septemdecim enim annorum puellæ crus sphacelatum erat: cumque huic pauperculæ exstirpationem partis affectæ suaderet peritissimus Chirurgus, solo miseram servandi desiderio ductus, illa pertinaciter negavit, nihilque membro huic corrupto applicuit præter lintea pura : tamen sponte sua in articulo genu separatione facta membrum corruptum decidit (b). Plures similes casus occurrunt apud Observatores, qui docent, sponte à sanis partibus secessisse illa, quæ sphacelo corrupta fuerant. Longe tamen frequentius accidit, proserpere sphacelum, nisi exstirpetur, & satis cito occidere. Cum ergo semper sphacelo corrupta pars tolli debeat, sive sponte separetur, sive refecetur; & anceps admodum eventus sit, si soli naturæ hoc committatur; apparet, axioma tamen hoc verum esse, quo statuitur sphacelum ilico exstirpandum esse. Interim mirabiles illi casus docent, non omnino desperandum esse in illis casibus, ubi vel ob debilitatem summam, vel alia quacumque de causa, exstirpatio fieri nequit. Tuncque bono victu & Cardiacis vires erigendæ sunt; dum interim pars affecta conditur talibus, quæ omnem putredinem prohibent & emendant; de quibus paragrafo sequenti dicetur.

Gangræna cerebri, viscerum, vesicæ, lethalis, & in acutis circa mortis, partibus majoribus vix apparentibus læsis, causa.

(a) Acad. des Sciences l'an 1702. Mem. pag. 170. &c.

(b) La Motte Traité complet. de Chirurgie Tom. III. pag. 365.

**CEREBRI.** Si enim consideretur mollis & tenera cerebri substantia, patet facile, illam brevi tempore in putridum tabum debere diffluere, si Gangræna hic nata fuerit. Neque datur hic depurationi locus, licet mortua à vivis separarentur, nam undique dura calvaria exitum impedit. In vulnerum capitis historia patuit quidem ex fidelissimis observatis, magnam partem cerebri, sed imprimis corticalis substantiæ, aliquando per vulnera, fungos, suppurationem &c. ablatam fuisse, vita tamen superstitè; quin & sine ulla remanente læsione functionum cerebri: Imo etiam evacuatione per nares vel aures levata fuisse omnia symptomata, quæ ab effusis sub calvaria humoribus, encephalon comprimentibus, nasci solent. Sed ut evadere posset homo, cujus cerebrum Gangræna affectum est, quot non deberent concurrere fortunati eventus, qui tamen singuli raro occurrunt. Deberet enim sisti Gangræna, & corruptum separari à reliquis adhuc integris; deinde deberet illud jam separatum non amplius inficere tenerrimam cerebri pulpam, cui contiguum est; adeoque citissime evacuari per tales vias, quas nondum Anatomicorum industria detexit, licet observata videantur docere, illas adesse; si non naturaliter, saltem in morbis: Ultimo requireretur, ut restituerentur illa, quæ per Gangrænam de ipsa cerebri substantia perierant. Si omnia hæc serio ponderentur, patebit, credo, nihil spei superesse, ubi cerebrum Gangræna corruptum fuerit; multo adhuc minus, si cerebellum, vel medulla oblongata eodem malo affecta fuerint. Dixerat *Hippocrates* (vide *Commentaria* §. 268.) illos, quibus cerebrum sideratum fuerat (*σπαιλισθῆναι*) intra tres vel septem dies mori; si autem illos effugerint, sanos fieri: Sed satis dubium videtur, an ipsius encephali corruptionem intellexerit hoc nomine. Quædam enim loca videntur docere, quod longe alia mala sub hoc nomine descripsit: Dicit enim (a) si cerebrum sideratum fuerit (*ἢ δὲ σπαιλισθῆναι ὁ ἐγκέφαλος*) dolor caput occupat, & per cervicem ad spinam tendit, & auditus privatio illum prehendit, & frigus in caput irruit, & tumescit totus, & repente voce privatur. Et ex naribus sanguis fluit, & lividus evadit. Ille, si morbus leviter corripuerit, quum sanguis exiverit, levatur: si vero vehementer correptus fuerit, cito moritur. Patet autem evidenter, non hic describi encephali corruptionem, sed compressionem à sanguinis copia nimia, vel derivatione ad caput. Alibi autem (b) Calvariæ corruptelam sub hoc nomine designavit, dicit enim: Dolor paulatim anteriorem maxime capitis partem detinet, & intumescit, & livescit, & febris ac rigor prehendit. Quum sic habueris, secare oportet, qua parte tumueris, & os perpuratum radere, donec ad diploën perventum sit, deinde ut fracturam curare. Ex quibus patet, Hippocratis auctoritatem non repugnare huic regulæ Prognosticæ, qua Gangræna cerebri damnatur tanquam lethalis.

**VISCERUM.** Cum Gangræna partes corporis, quas occupat, destruat; & dein, nisi sistatur, proserpat satis cito sæpe; patet facile, nullam fere spem superesse, si hoc malum occupaverit viscera; præsertim si mollioris substantiæ fuerint, ut hepar, & lien; illa enim brevi in putrilaginem diffluent. Vitalia autem viscera, thoracis cavo recondita, si post validissimas inflammationes gangræna corripereantur, mors certa videtur sequi debere, cum in ipso quasi fonte suo tunc

(a) De Morbis Lib. III. cap. 4. Charter. | (b) De Morbis Lib. I. cap. 8. ibid. pag. 559; Tom. VII. pag. 583. 584.

vita opprimatur. In cadavere proprii filii, ischuria mortui, renes cum vicinis partibus Gangræna affectos vidit *Hildanus* (a). Interim tamen certissimis observatis constitit, non omnium viscerum Gangrænam certo lethalem esse: si enim firmioris & membranaceæ substantiæ fuerint, uti v. g. intestina, & possibilis sit gangrænosi corrupti separatio non tantum à partibus vivis, verum etiam separati educio de corpore, sæpe evadunt: uti pluribus exemplis demonstratum fuit in Commentariis §. 317. ubi de illis casibus agebatur, quando per vulnus, suppurationem, aut gangrænam intestinalis fistulæ pars ablata erat. Videtur ergo in illis visceribus, quorum firmior substantia non tam facile in putridum tabum diffluit, & in quibus corrupti educio de corpore sperari potest, Gangræna summum quidem periculum, sed non semper certam mortem facere. An non hoc indicavit *Hippocrates* (b) dum de pulmonum inflammatione agit? In validissima enim horum inflammatione illos ad latera prolabi, & livores foras ostendere dicit; tuncque veteres vocasse sideratos (βλατῆς) sic affectos monet. Sed livor ille Gangrænae natæ signum est (vide §. 427. n°. 3.). In sequenti dein Prænotione subiungit sequentia: *Quibus vero totus pulmo inflammatus fuerit cum corde, sic ut ad latus procidat, resolvitur totus ager, & jacet frigidus, sine sensu, & moritur secundo aut tertio die. Si vero sine corde contigerit, & minus, longiori tempore vivunt. Quidam autem etiam servantur*: Per sputa enim posset educi ex pulmone tabus gangrænosus. Corde autem ipso corrupto, quis aliquid sperare auderet? Sputa vero talia gangrænosa educi aliquando de pulmone, docent observata Medica. Sputum cœnosum, argillæ cujusdam liquidioris speciem præ se ferens, in desperatis Phthificis observavit *Benedictus* (c), & in illorum cadaveribus pulmones in amurcam sordescens convertos vidit, certissimo plenæ *suppuris* indicio. Sed & sputa hæc gangrænosa videntur aliquando observata fuisse, ægro postea superstite, dum gangrænosum corruptum, à vivis partibus & sanis separatum, sic excerneretur. Saltem sequens *Hippocratis* sententia hoc docere videtur (d). *Sputi excreationes in febre livida, nigra, biliosa, si quidem supprimantur, malum: secedentes vero pro ratione, utile.* Simile & in *Aphorismis* (e) pronunciatum habetur. *Excreationes in febribus non intermittentibus livida, & cruenta, & graveolentes, & biliosa, omnes mala: bene tamen si prodeant, bona &c.* Sequens autem *Aphorismi* pars, & *Galeni* commentarius, docent, tunc bene prodire has excreationes, quando & facile ferunt ægri, & inde levatur morbus. Inanis forte videbitur fiducia, salutem sperare, si pulmo jam gangrænosus factus fuerit; sed certe nunquam nocebit ægris, si ne quidem in desperatissimis morbis Medicus omnem spem abjecerit.

**VESICÆ.** Post validas inflammationes, aut insignes læsiones vesicæ, per vulnera lacerationes in calculi rudiori educatione &c. Gangræna sequitur, pessimi semper eventus. Partim, quod acris urina affectam sic vesicam semper alluens putredinem natam augeat; partim etiam, quod numerosissimis nervis prædita vesica cerebrum totumque systema nervosum miris modis afficere possit. *Stomachum affici, bilis vomitum, singultum, frigus, mortem ipsam sequi, si vesica vulneretur,*

(a) De Gangræna & Sphacelo cap. 4. pag. 774.

(b) Coac. Prænot. n°. 401. 402. Charter. Tom. VIII. pag. 875.

(c) Tabidor. Theatr. pag. 68.

(d) Coac. Prænot. n°. 243. Charter. Tom. VIII. pag. 865.

(e) Sect. IV. Aphor. 47. Charter. Tom. IX. pag. 165.



monuit Celsus (a). Evulso calculo, *diffentione nervorum periclitari aliquem, dum vesica ejus agitatur*, dixit alibi (b). Duras ac dolentes vesicas (id est inflammatas) graves omnino ac exitiales pronunciavit Hippocrates, & omnium quidem exitiolissimas, quæ cum febre continua fiunt; tuncque in prima morbi periodo ægrum sæpe interire monuit (c). Interim tamen excisa vesica Cancrum (quo nomine Gangrænam designasse Celsum in Commentariis §. 419. dictum fuit) alio quando sequi Celsus scripsit (d), illumque cognosci, *si & per vulnus, & per ipsum colen fluit sanies mali odoris, cumque ea quadam à concreto sanguine non abhorrentia, tenuesque caruncula lanulis similes &c.* Licet autem, non videatur omnino desperasse de curatione hujus mali, monet tamen: *orto cancro sæpe affici stomachum, cui cum vesica quoddam consortium est: exque eo fieri, ut neque retineatur cibus, neque, si quis retentus est concoquatur, neque corpus alatur: ideoque ne vulnus quidem aut purgari, aut ali posse, quæ necessario mortem maturant (e).*

Si jam in morbis acutis inflammatoria densitate immeabiles facti humores, vel per errorem loci in alienis vasis hærentes, tenerrima encephali vascula, unde vita & humanitas pendent, si obstruxerint, ut omnis vitalis influxus & effluxus tollatur, mors subita sequetur; neque ulla fere læsio sensibilis detegi poterit, cum omnem sensum fugiant hæc minima. Nec refert, an statim morbus has partes occupaverit, an vero in aliis corporis locis nata inflammatio per metastasin versus encephalon tendat. Unde tam sollicitè Hippocrates omnia signa notavit, quibus futurum delirium in morbis prævideri posset, ut caveatur, antequam fieret, malum: quod, ubi factum est, certam perniciem adferre solet. Vidi sic in febre continua ortum cruris dolorem, qui subito evanescebat; sed mox orta phrenitis improviso sustulit ægrum tertia morbi die. Et apud Hippocratem similes casus habentur, qui hoc confirmant. *Calvo in Larissa femur dextrum derepente doluit, nihil vero ex oblati profuit. Prima die febris acuta ardens placide prehendit, dolores vero concomitabantur. Secunda die femoris quidem dolores remiserunt, febris vero intensa est; utcumque moleste patiebatur morbum (ὀνιδυσσίου), non dormiebat, extrema frigida, urinarum non bonarum copia profluxit. Tertia die femoris quidem dolor cessavit, verum mentis alienatio, & multa jactatio. Quarta die circa meridiem celerrime moriebatur (f).* In Commentariis §. 423. β. dictum fuit, materiam febrilem aliquando versus extrema corporis deponi, ibique citissime corrumpere non tantum molles partes, verum etiam ossa ipsa; idem & in peste observatum fuisse, ibidem constitit. Si jam similis materia versus encephalon, pulmones, cor, viscera, tenderet, patet facile ilico mortem sequi debere.

Gangræna oris interni, labiorum, narium, genitalium, curatu difficilis.

Notum est ex Anatomicis, circa labia cutim desinere, & solam epidermidem labia, genas internas, & reliquas oris fauciumque partes tegere. Si in his partibus oriatur inflammatio non resolubilis, raro sequitur bona suppuratio, sed fere sem-

(a) Lib. V. cap. 26. n°. 19. pag. 288.

(b) Lib. VII. cap. 26. n°. 5. pag. 482.

(c) Hippocrat. Prognost. Charter. Tom.

VIII. pag. 659. & in Coac. Prænot. n°. 471.

(d) Lib. VII. cap. 27. pag. 485.

(e) Ibid. pag. 486.

(f) Hippocr. Epid. 3. Ægrot. 5. Charter.

Tom. IX. pag. 299.

per depascens putredo gangrænosa. Aëri enim expositæ partes, saliva sæpe acriori, humectatæ continuo, in fœtidissimum liquamen diffluunt: cumque tunc ingens plerumque adsit salivoli humoris profluvium, & semel natum hoc malum, nisi cito curetur, exeat omnia vicina, cancerum aquaticum vocaverunt. Frequens scitis in his regionibus malum, & aliquando epidemicorum morborum more plures simul affligens, imprimis illos, quibus acris scorbutica Cacoehymia adest; uti dictum fuit in Commentariis §. 42; .f. Nascitur primo in buccarum interiori parte, gingivis, labiis, lingua, tonsillis &c. levis rubedo parum dolens, & major calor; paulo post medium illius loci stigma album occupat, quod sæpe fallit Chirurgos, qui suppurationem futuram tunc putant. Dolor tunc augetur imprimis in illo loco, ubi album illud stigma hæret, uti & in ejus marginibus, qui tunc ruberrimi apparent. Profundius exeditur porro ille locus, & totum illud album, quod nil est nisi vera eschara gangrænosa, cadit, si levius malum fuerit, & in adultis. Si vero major adfuerit malignitas, & imprimis in juniore ætate, ubi omnia molliora sunt, proserpit malum, & alba illa macula quaquaversum in omni ambitu dispergitur: simul tunc putridissimus halitus ore exit, & perpetuum olidissimæ salivæ stillicidium; & nisi subita tunc & efficax adhibeatur medela, citissime exedit omnia.

Tristissima sic mala vidi, quorum non sine horrore recordor, in pauperum infantibus, dum in initio neglectum fuerat hoc malum, vel perversa tractatum medela. Gingivarum enim gangræna proserpente malo; non tantum destruxerat dentes, qui jam prodierant, sed & futurorum rudimenta in alveolis latentia sic corruperat, ut miselli illi jam ab ineunte ætate senectutis incommoda ferre debuerint, edentuli facti. Sed levia hæc sunt: corruptis gingivis totam fere maxillam inferiorem osseam cecidisse vidi, linguam erosam, labia, genas, mentum, exesa omnino, donec mors tantis malis finem imponeret. Tantus autem fœtor sæpe comitatur hoc malum, ubi ad summam malignitatem pervenit, ut ferri nequeat. Vocabar ad hominem obesum, & scorbuto putrido pessimo laborantem, cujus maxilla inferior tota fere hoc malo exesa erat: cumque ignorarem morbum, ille propius assidentem, dum alloqui veller, tam retro afflavit halitu, ut in animi deliquium fere ceciderim, & tota die molestissima nausea remanserit. Cum frequenter à scorbuto oriatur hoc malum, ideo spiritu cochleariæ, theriacali, & similibus os colluere solent; sed hæc fere semper nocent. Si levius malum fuerit, & incipiens tantum, (quod cognoscitur, si rubedo, calor, & dolor adsunt, sed nullus adhuc fœtor) sal ammoniacus, aut niterum multa copia aquæ dilutum, addito pauculo aceti vel succi citri, optime proderunt, si os his colluatur, vel lintea his madida partibus affectis applicentur leniter. Solent autem pessimo more Chirurgi penicillis remediis his intinctis ruditer perfricare partes, quod semper nocet, dum dolor augetur inde, & teneræ partes destruuntur. Si vero jam incipiat serpere malum, & fœtor adsit, modo dicta remedia non sufficiunt, sed oportet tunc spiritu salis marini domare hanc putredinem. Unciæ dimidiæ mellis rosarum viginti guttæ spiritus hujus miscentur; deinde sæpius de die affecta pars penicillo huic remedio intincto oblinitur: augetur spiritus salis marini quantitas, si major putredo adfuerit: imo in pessimis casibus ipsum spiritum salis marini, sine ullis aliis admixtis applicui, & pulcherrimo cum successu semper; nam statim sistebatur Gangræna hujus progressus, & brevi post separabatur

V V V

eschara gangrænosa à vivis partibus. Neque fefellit unquam me huic auxilio unice confidentem, nisi cum, gingivis jam omnino corruptis, maxillæ os affectum foret, tunc enim illius cariem impedire non potui: mollium vero partium oris interni Gangrænam eradicat certissime (a).

Ubi autem in labiis illud malum nascitur, aliud præterea periculum adest. Epithelio enim, quod labiorum mollem substantiam tegit, eroso, nervosæ papillæ in molem immanem sæpe expanduntur, dum coercente hoc vinculo liberantur, & in pessimum Cancrum fungosum degenerant. Si vero nares internas investiens membrana corrumpatur, ossa nutantur; in quibus, cum tenerissima sint, nulla sperari potest exfoliatio, sed semper carie consumuntur & cadunt. Patet ergo curæ difficultas, si Gangræna hæc loca occupat.

GENITALIUM. Loca enim hæc cellulosa mirabili structura constant, semiputridum odorem etiam in sanis spargunt, binis corporis cloacis, (alvo nempe & vesicæ) quibus corrupta è corpore eliminantur, quam proxime adjacent: Unde nata hic Gangræna citissime proserpit, & difficulter curatur. Imo *Hildanus* (b) ingenue fatetur, ex infinitis propemodum, quos viderat, ægris Gangræna scroti laborantibus, ne unum quidem restitutum fuisse. Unde sanata talis Gangrænae historiam à peritissimo Medico ipsi communicatam, tanquam monstrum in arte, admirabatur. Mirum talis Gangrænae exemplum ante septem annos videre mihi contigit. Homini quadragenario, optimæ temperiei, sano & robusto. levis stranguria oritur, sine ulla causa manifesta: cum adhuc semel similem molestiam passus à balsamo sulphuris terebinthinato levamen percepisset, iterum idem illud sumsit, & quidem repetitis vicibus, sed sine ullo fructu. Biduo elapso à decocto emolliente, quod sumserat, stranguria minuebatur, sequenti die aucta plurimum; cœpitque tunc dolorem sentire in perinæo, & dum urinam redderet, mirum tremorem in toto scroto & pene percepit: accessit dein febris, & urinam emisit, quæ sedimentum crassum mucosum haberet copiosum, & balsamum sulphuris adhuc redoleret, ante quatrimum assumptum. Licet fomenta mollissima externe applicarentur, Vena secaretur, purgantia antiphlogistica sumeret &c. nihil fere inde levaminis apparuit: magna enim cum molestia urinæ olidissimæ paucas guttulas valido nixu exprimebat, & septima die morbi scrotum immaniter intumuit, uti & cavernosa penis substantia in uno tantum latere. Sequenti die scrotum gangrænosum factum crepuit, & sanguinolentam saniem effudit, penisque totum latus affectum pariter gangrænosum apparuit. Fomenta & Cataplasmata ex ruta, scordio, marrubio, sale ammoniaco &c. applicabantur cum aceto; profundæ fiebant scarificationes; cumque horrenda putredo adesset, spiritum salis marini ipsum sextupla aquæ copia dilutum applicui partibus gangrænosiss; sicque impediabatur, ne proserperet malum. Cum intolerabilis ægro adesset anxietas, nausea continua, pulsus celer & debilis, urina & sanies corrupta inundarent hæc loca continuo, nihil fere spei superesse videbatur: Calor talem æquabilis corporis totius ad extrema usque, & firmum corporis robur faciebant, ne omnino desperarem. Non potui tamen impetrare ab ægro, qui certissimam mortem prævidebat, & avidè exoptabat, tanquam terribilis mali unicuique finem, ut fierent illa, quæ profutura

(a) H. Boerhaave Chem. Tom. II. pag. 410. [ (b) Observat. Chirurg. Centur. V. Observ. 77. pag. 468.

quam maxime sperabam: communi potui spiritum salis marini dulcis instillaverunt adstantes ægro inscio, tandemque permisit, ut profundas satis scarificationes faceret in partibus gangrænosæ Chirurgus, quas deinde textit linteis spiritu salis marini sextuplo aquæ diluto madidis, & cataplasmata ex antisepticis applicavit. Sic potuit impediri, ne proserperet malum, & decima quarta morbi die incepit in laterali penis parte apparere rima, quæ mortuum à vivis separabat; & post triduum in inguine simile separationis inceptæ vestigium apparuit. Optimam tunc recuperandæ valetudinis spem concepit æger, & satis alacriter assumpsit oblata remedia; rediit appetitus, bonoque victu languentes erigebantur vires: omne corruptum gangrænosum octidui spatio separatum fuit sic ut de toto scroto nihil superesset, nudique suspensorii testium musculi conspicerentur. Urethra binis in locis, prope bulbum nempe, & digiti transversæ circiter à glande penis distantia, jacturam substantiæ passa fuerat talem; ut postea non amplius urinam dimitteret per glandis aperturam, sed illa in perinæo efflueret; & quamvis tubo argenteo politissimo immisso, & in urethra noctes diesque relicto, caveremus, ne concreverent abruptæ urethræ fines, simulque mollissimis applicatis balsamis conaremur efficere, ut elongata vasa retexerent illud, quod perierat, non potuimus hoc impetrare, sed remanserunt illi hiatus, posteaque semper urinam reddidit per foramen urethræ in perinæo, & manebit hæc molestia tota vita, licet optima sanitate fruatur adhuc superstes ille homo. Simile sanatæ Gangrænæ in scroto exemplum habet in suis observationibus *Stalpartius van der Wiel* (a), qui & notavit, postea aliquid carnosæ à cute & carnosæ abdominis membrana deorsum excrevisse, ac testiculos sensim contexisse: sic tamen ut recens hoc scrotum glabrum omnino esset & rugis careret; atque simul adeo arcte contineret testes, ut loco moveri non possent. Similem cicatricem post sanatam Gangrænâ in illo homine vidi.

A partu difficili genitales fœminarum partes aliquando sic contunduntur & lacerantur, ut Gangræna sequatur, difficilis semper, non tamen omnino incurabilis. Apud Observatores tales casus memorantur: unicum ex *Ruyfchio* adduxisse sufficiet. Mulier ex partu difficili incidit in tam enormem vulvæ & intestini recti gangrænâ, ut brevi illam perituram crederent multi. Evasit tamen ab hoc malo, & perfectissime curata fuit, licet post separationem corrupti in vagina inveniretur foramen in rectum intestinum penetrans; quod nucem juglandem cortice suo vestitam transmittere posset, per quod fœces alvinæ liberrime in vulvam transibant. Plures alias à simili malo mulieres se curasse ibidem monet auctor (b).

### • Sphacelus extremorum, tendinosorum, lethalis in senio.

Demonstratum fuit in Commentariis §. 424. & observationibus practicis confirmatum, seniles illas Gangrænâs plerumque nasci à talibus causis, quæ nullam medelam capiunt. Plerumque enim vasorum nimis rigiditatis, vel & cordis viribus labefactatis, ortum debent. Nulla ergo separatio corrupti hic fere expectari poterit, cum illa ab humorum sanorum per vasa, debitam flexilitatem habentia, valido appulsu pendeat. Neque proderit extirpatio partis affectæ, nam ab iisdem causis in trunca parte redibit malum; uti memorabili exemplo tunc allegato consti-

(a) Observ. 85. Tom. I. pag. 363.

(b) Ruyfch. Observ. Chirurg. 59. pag. 55.

tit. Unicum, quod ars habet, est, ut condiatur pars affecta talibus, quæ etiam in cadavere arcerent putredinem: hacque methodo potuit in effectis etiam senibus, quodam jam sui parte mortuis, per integros mensis impediti, ne proserperet malum. Solet plerumque in pedum digitis purpureum aut lividum tale punctum apparere primo, quod, nisi sic condiatur, brevi proserpens lethalem sphacelum facit. Neque, quantum novi, ullis observatis constitit, curatam fuisse Gangrænam in decrepita senectute sponte in pedum digitis ortam. In sene tamen septuagenario, sed vegeto, dum sponte circa malleolum internum dextri pedis natam Gangrænam aceto, vino & sale, cum ruta recenti infulis, foveri curarem noctesque, separatio gangrænosæ corrupti facta fuit, & cura successit.

**Gangræna hydropicis, phthisicis, scorbuticis pessima, mortis nuncia.**

In hydropicis Gangræna nascitur, vel quia collecta aqua premendo partes suffocat; vel quia putrida & acris reddita contigua rodit: sed nihil tunc spei superest. Si enim maneant aquæ, augebitur malum; cum eadem causæ pergant agere, quæ illud produserant. Si vero quocumque modo evacuentur aquæ, flaccidæ, & jam fere tabefactæ partes, non amplius æquabili pressione fluidi, illas alluentis, sustentatæ, disfluent, vasa rumpentur, & accelerabitur mors partis affectæ, & totius.

In phthisicis autem, cum jam atrophia adsit ex cacochymia purulenta sanguinis, tandemque putridissima diarrhœa soleant perire; patet facile, nullam spem superesse, si Gangræna partem quandam corporis occupaverit. Vitales enim vires minuuntur quotidie, & acrior fit omnium humorum indoles; unde nec separatio corrupti, nec regeneratio perdiri hic obtineri poterit.

In scorbuticis autem (uti dictum fuit in Commentariis §. 423. §.) sic minuitur vasorum cohesio, ut à levi etiam vi frangantur; simulque major humorum acrimonia adest: imo & in pessimo scorbuto putrescunt omnia (vide §. 1151. n<sup>o</sup>. 3. 4.). Cum ergo humorum acrimonia, vasculorum ruptura, & effusorum humorum putredo Gangrænam facere possint (vide Commentaria §. 388.), difficillima erit cura ejusdem mali, si scorbutica cacochymia sanguis infectus fuerit. Hinc in ulceribus crurum, in scorbuto adeo familiaribus, gangrænosæ illæ crustæ fere semper adsunt; renatæ mox, si detergentibus applicatis ablatae fuerint; & ob hanc causam hæc ulcera vix unquam ad bonam cicatricem perducì possunt.

**Sphacelus superiora petens, vigilias, deliria, syncopen, ructus, singultus, spasmos, dolores, sudorem frigidum, soporem creans, prænunciat mortem.**

Recensentur omnia symptomata, quæ lethalem Sphacelum comitari solent, & quidem illo, quo procedunt, ordine. Si enim sistitur vel sponte, vel per artem, sphacelus, oritur separatio inter vivum adhuc & mortuum, neque amplius, tali limite posito, proserpit. Ubi vero pergit malum, tunc dicitur superiora petere, quia ab extremo articulo pedis digiti incipiens ascendit, pedem, crus totum,



femur denique occupans: in manuum vero digitis si inceperit, per totum brachium ad axillam ulque ascendere solet, antequam occidat. Semper autem observatur, cerebri functiones turbari, si sphacelus in mortem tendat: deinde etiam incipiunt vitalia affici; tandemque placido sopore sepulti tales agri moriuntur. Pessimum ergo signum est, si in Gangræna vel sphacelo, extrema corporis occupante, signa appareant turbati cerebri. Unde Hippocrates monuit (a): *Sphacelus autem gravis, periculosus. Si autem vomitus biliosus cum anxietate, aut oculorum stupor, aut vocis privatio, aut rarus sermo, aut deliratio quadam, lethalia hæc & convulsiva.* Vigiliæ autem uti patebit postea in Phrenitidis & Symptomatum febrilium historia, primum fere semper signum dant, quo excitatur attentio Medici, ut omni artis molimine à capite vim morbi avertat: hæc deinde sequitur delirium; tunc cerebello affecto syncope fit; dumque inde excitantur, ab inordinato motu spirituum per nervos viscerum abdominalium, ructus & singultus oriuntur; postea spasmi & dolores. Tunc sudor ille viscidus, guttatim in cute collectus, frigidus, mortis imminenti signum certissimum, apparet: de quo mira phrasi dixit Helmontius (b), *quod non sit tam latex in sua natura, quantum ros alimentarius resolutus, cui mors imperat.* Tandem placido sopore sepulti moriuntur. Prout jam à diversis causis sphacelus nascitur, celeriori vel tardiori gradu hæc omnia procedunt. Si enim à mera quiete senili hoc malum oriatur, lente proserpit, & poterit per plures menses aliquando tolerari, antequam mortem inferat; modo pars affecta condiiatur talibus, quæ omnem putredinem arcant. Si vero in vegeto juvenili corpore post validissimam inflammationem Gangræna, & post hanc sphacelus, sequatur; celerrime superiora petit, & paucarum sæpe horarum spatio incurabilis evadit; uti pluribus exemplis, in hoc Capitulo jam allegatis, constitit. Pleraque jam ex his phænomenis, quæ Sphacelum lethalem comitantur, apud Celsum habentur (c). Postquam enim descripsit, quomodo proserperet Gangræna, addit sequentia: *Inter hæc deinde febris acuta oritur, ingensque sitis: quibusdam etiam delirium accedit: aliis, quamvis mentis suæ compotes sunt, balbutiendo vix sensus suos explicant: incipit affici stomachus: fit fædi spiritus ipse odor. Atque initium quidem ejus mali recipit curationem: ubi vero penitus insedit, insaniabile est. Plurimique sub frigido sudore moriuntur.*

Lividitas, nigritudo, ariditas circa ulcera, gangrænam, sphacelum, mortem, adesse nunciant.

In Prognosticis suis Hippocrates, ubi tam sollicitè omnia recenset, ad quæ Medicum attendere oportet, ut prævideat illa, quæ in morbis futura sunt; habet & sequens monitum: *Considerare autem oportet, an forte ager ulcus habuerit ante morbum, an vero in ipso morbo natum. Si enim homo moriturus sit, ante mortem lividum & siccum erit, vel pallidum & siccum (d).* In Commentariis autem §. 158. n°. 7. & §. 403. n°. 1. ubi hujus prognostici mentio facta fuit, demonstra-

(a) Epidem. VII. textu 71. Charter. Tom. IX. pag. 578.

(b) In Capitulo: latex humor neglectus n°. 17. pag. 303.

(c) Lib. V. cap. 26. n°. 31. pag. 301.

(d) Hippocrat. Prognost. Textu 22. Charter. Tom. VIII. pag. 605.

tum est, à vita superstite, & humoribus ad vulnus ulcusve allatis, pus bonum fieri; si nempe bona liquida apto impetu & debita copia huc venirent; sin minus, aliud liquidum in vulnere observari, à boni puris conditionibus degenerans; unde in cacochymicis corporibus tam difficilis erat boni puris confectio, & ulcerum vel vulnorum consolidatio. Ubi vero vasorum vel humorum, aut utrorumque, vitio nihil defertur ad vulnus, siccabitur ab aëre & vicinarum partium calore vulneris superficies, & totum illud, quod sic exsiccatum erat, postea separari debet, ut cura perficiatur. Designat ergo ariditas ulceris, vitalem influxum & effluxum humorum desinere in hoc loco: lividitas autem & nigritudo veram jam mortificationem indicant; adeoque pro pessimis signis hæc merito in morbis habentur.

§. 433. **I**NDICATIO in Gangrænæ curatione: 1. vires firmare. 2. putridi ingressum in venas impedire. 3. putredinem conceptam arcere, coercere.

Absolutis illis, quæ circa Diagnosin & Prognosin Gangrænæ notanda erant, agendum est de indicationibus Curatoriis, quæ determinant, quomodo, & per quæ remedia cura perfici possit. Ne autem confusio hic oriatur, in memoriam revocanda sunt illa, quæ in Commentariis §. 419. dicta fuerunt. Nempe, difficulter distingui posse illum limitem, qui Gangrænam incipientem dirimit à Phlegmone, à qua nascitur. Cum ergo Gangræna in sui initio ad Phlegmonem quam proxime accedat; & ab eadem tamen plurimum differat, quando in sphacelum jam transibit; patet, intermedio hoc tempore varios esse malignitatis in Gangræna gradus, neque eandem requiri curationis methodum. Incipiens enim Gangræna aliquando felici correctione tolli potest, uti dicitur §. 441. Ubi vero confirmatum malum est, non poterit reddi corruptæ parti sanitas, sed debet mortuum separari à vivis partibus, quibus adhæret. Generalia tantum ideo indicationis curatorie capita hac paragrapho expenduntur; de reliquis postea dicitur.

1. Quamdiu expeditus sit motus humorum sanorum per vasa debito cum impetu & velocitate, sanitas adest, & virium integritas. Ubi vero nascitur æqualis hujus motus impedimentum, sive in toto, sive in parte, vires debilitantur etiam vel in toto corpore, vel saltem in parte affecta: Unde spontaneas illas lassitudines, per quas homines solitos labores non sine molestia perficere possunt, licet cæteroquin adhuc satis bene se habere videantur, morbos prænunciare dicit *Hippocrates* (a). Frequenter enim observantur hæc lassitudines, quando inflammatoria spissitudine minus meabilis redditus sanguis difficilius per ultimas vasorum angustias transire potest. Vires ergo firmabunt omnia illa, quæ liberum humorum per vasa circuitum sustinent, & tollunt illa impedimenta, quæ hunc turbant. Adeoque, pro causarum diversitate, varia ad firmandas vires conducent remedia; uti sequenti paragrapho dicitur.

2. Urina naturaliter eluit de corpore illa, quæ putredini proxima nocerent, & diutius cum reliquis humoribus per vasa fluere: ubi autem perfecta ischuria

(a) Aphor. 5. Sect. 2. Charter. Tom. IX. pag. 46.

urinæ secretionem & excretionem impedit, hæc retenta, acriora facta & putrida, tenerimis encephali valis imprimis nocere videntur; & ægri hoc morbo laborantes, postquam similia fere mala passi fuerunt, ac illi qui sphacelo moriuntur, pariter sopore profundo oppressi pereunt. Merito ergo metuitur, ne putredo Gangrænam sequens, venis contiguus resorpta, simili modo noceat; adeoque cavendum est, ne hoc fiat.

3. Omnis pars corporis nostri, quæ omni vitali humorum influxu & effluxu, quo antea gaudebat, privatur, spontanea mutatione in putredinem tendit. Requiritur ergo, ut futura putredo caveatur, vel jam nata emendatur; & sic coercetur, ne vicina adhuc integra inficiat. Ubi manibus accessus datur ad partem affectam, talia applicari poterunt, à quibus merito ille effectus expectandus est; si vero in profundis corporis lateat malum, patet facile, hoc difficillimum esse.

§. 434. **F**IRMANTUR vires dando: 1. quæ causæ internæ (422. 423. 424. 425.) debellandæ profint, spiritus excitent, liquidis motum circularem conservent, habita simul ratione ætatis, sexus, temperiei, tempestatis. Illa ergo ex classe refrigerantium, vel calefacientium petuntur pro re nata. 2. cibos potusque analepticos. 3. Epithemata ex pane tosto cum præscriptis (Nº. 1. hujus) applicata venis, vel circa nares.

1. Dum huic indicationi satisfieri debet, necessario respiciendum est ad indolem causæ, quæ Gangrænam produxit: sed causæ omnes in numeris hic citatis in diversas classes ordinatæ fuerunt, & enumeratæ. Sic v. g. si putridus scorbutus pessima cacochymia sanguinem infecerit, proderunt ad firmandas vires omnia illa, quæ putredini huic adversa sunt: Vinum Rhenanum, succus citri, aurantium, &c. optima erunt. Pauperibus lac ebutyratum, vel ejusdem serum, cum pauculo macis vel nucis myristicæ decoctum, inserviet. Cumque omnis Gangræna, quamvis ex diversissimis causis nata, semper putredinem faciat, patet, acidorum illorum fere universalem usum esse.

**SPIRITUS EXCITENT.** Certissimis constat observatis, esse in rerum natura talia, quæ in subtilissimum nostri corporis liquidum, quod spiritus vocamus, insignem habent efficaciam, & totum corpus miris modis turbare possunt. Interim tamen tota hæc vis pendet sæpe à corpusculis, vel effluviis, adeo subtilibus & minutis, ut non tantum sensus, sed & omnem fere imaginationem, fugiant. Asa fœtida v. g. solo halitu suo viroso inordinatos illos spirituum motus compescit sæpe tam feliciter in hysteris mulieribus; & tamen, postquam per integros menses satis amplum locum suis effluviis implevit, vix ulla sensibilis apparet ponderis imminutio. Moschi fragrantia è contra mobilissimas in genere nervoso feminas toties pessime affecit, imo & diras aliquando in his convulsiones excitavit: tamen nec Moschus sensibile ponderis detrimentum patitur, licet plurimis etiam fervetur annis, & omnia vicina corpora indelebili fere odore infecerit. Habentur in arte cognita talia remedia, quæ solo halitu suo languentes spiritus excitent,

& novam quasi vitam inspirent etiam debilissimis hominibus. Si jam in animi deliquium lapsuræ puellæ odoratissimum citrei pomum naribus supponitur, mox reviviscit: idem & aceti fragrantia, & fere omnium aromatum gratissimorum halitus faciunt. Imprimis autem illa, quæ spiritus excitant, in Gangræna & Spacelo curandis locum habent; quia nil magis debilitat, nec citius fere omnes vires etiam in robustis hominibus prostermit, quam putrida effluvia. Si sanissimus homo æstivo tempore mala fortuna occurrat cadaveri submersi animalis majoris illo tempore, dum tumidum abdomen crepat, tam tetro mox afflabitur halitu, ut in animi deliquium cadat, & tota die pessima nausea languebit. Dum in morbis corrupta bilis circum præcordia hæret, summa debilitas observatur; & hac saburra excussa, vires redeunt. Cum ergo in Gangræna putredo adsit, vel brevi futura metuatur, patet, quare fragrantia illa aromata, imprimis si acida admisceantur, tantum usum habeant. Apud *Hildanum* (a) & alios auctores pretiosi lapides Bezoardici, margaritæ, os de corde cervi & similia commendantur; sed vinum Rhenanum cum succo & cortice citri, cinamomo, nuce myristica &c. his longe efficaciora sunt; & si febris valida, aut major calor corporis, à calidioribus abstinendum esse suadeant, sambuci, rosarum &c. flores, una cum aceto, spiritus excitabunt, simulque gratum refrigerium facient.

**LIQUIDIS MOTUM CIRCULAREM CONSERVENT.** Cum Gangræna sit talis conditio partis mollis, quæ abolito influxu & effluxu vitalis humoris in mortem tendit, id est, in quietem perfectam; omni molimine conservandus est humorum per vasa motus, ut hæc caveatur. Circuitus autem humorum impeditur vel liquidi transmittendi, vel vasorum transmittentium vitio, vel defectu causarum moventium. Omnia ergo illa, quæ liquida diluunt & attenuant, vasa aperiunt, & leni stimulo causas moventes incitant, pulcherrime hic conveniunt. Decocta hinc ex graminis, bardanæ, scorzonæræ radicibus, uti & illis; quæ aperientes dicuntur, lignorum santalorum, sassaphras &c. infusa, tanti hic usus sunt; quia vi diluente, solvente, & simul blando aromatico stimulo, omnibus his indicationibus satisfaciunt.

**HABITA SIMUL RATIONE ÆTATIS &c.** Longe enim alia requiruntur in decrepito sene, ubi omnia languent, & frigida mucosa est sanguinis indoles, quam in vegeto & calidæ temperiæ juvene. Mulierum corpus laxius semper, cæteris paribus, quam in viris, facillime mutabile quidem etiam à levissimis causis, tamen summas & subtilissimas mutationes facilius fert. Docent hoc menstrua, graviditas, partus, lochia, hæmorrhagiæ uterinæ sæpe adeo enormes; unde & a sexu iterum in medendo varietas obtinet: Uti etiam, prout temperies biliosa calida, aut aquosa frigida fuerit. Idem de varia anni tempestate verum est: æstivis enim caloribus, imprimis si simul humida æëris constitutio fuerit, omnia in putredinem vergunt; hyemali frigore omnia diutissime incorrupta servari poterunt. Confer & illa, quæ de his dicta fuerunt in Commentariis §. 192.

**ILLA ERGO EX CLASSE REFRIGERANTIUM &c.** Primo examinandum est, an vires deficiant, an non? si pulsus sit fortis, magnus, & utcumque durus; si calor satis magnus ad extrema corporis usque adlit, si urina colorata, rubra fuerit; novimus, satis magnas circulationis vires esse; adeoque il-

(a) De Gangræna & Splacelo cap. 12. pag. 786.

lam minime augendam: sed si pulsus debilis, & reliqua, modo dictis contraria, adfuerint; tunc concluditur, motum circulatorium humorum incitandum esse. Deinde examinatur, an liquidorum indoles in putridam alcalinam indolem vergat; an vero mucosa frigida cacochymia prædominetur (hæc autem ex illis, quæ de glutinoso spontaneo & alcalino spontaneo ante dicta sunt, cognoscuntur); in priori casu gratissima acida stimulantia exhibentur; in posteriori vero sales volatiles oleosi, Elixiria proprietatis &c. adeo profunt. Variæ tales formulæ remedium in Materia Medica ad hunc numerum habentur.

2. *Ἀναμύκτης* dicitur de illis, qui ex gravioribus morbis resurgentes vires recolligunt. Licet autem, morbo devicto, sanitas redierit, requiritur tamen in his, ut bono nutrimento restituantur illa, quæ per morbum prægressum perierant. Debilitas autem postulat in talibus hominibus, ut dentur cibi & potus, in quibus abundat quidem materia, unde per chylopoiesin & hæmatopoiesin possint restitui perditæ; sed & simul tales sint, ut nullam fere, vel minimam saltem; actionem vasorum & viscerum requirant, ut sanis humoribus assimilentur. Cibi vero & potus, qui has dotes habent, vocantur analeptici. Videantur illa, quæ de his dicta fuerunt in Commentariis §. 18. n°. 1. Sed & in horum delectu ætatem, sexum, consuetudinem &c. attendendum est, uti modo dictum fuit præcedenti numero. Cumque plerumque putredinis metus sit in Gangræna, ex acescentibus, ut lacte, decocto panis, avenæ, hordei &c. jusculis carnis vitulinæ cum succo citri &c. hæc parantur. Videantur illa, quæ in Materia Medica ad hunc numerum habentur.

3. Ex Physiologicis constat, in tota corporis externi superficie venarum bibularum oscula patere, quæ contigua liquida haurire possunt, & sanguini miscere ilico: unde patet, ad vires firmandas maximum usum posse habere illa remedia, quæ externæ cuti apponuntur. Illa enim, quæ primo hujus paragraphi numero laudata sunt, si sic epithematis forma applicantur, subtilissimam & maxime fragrantem sui partem venis bibulis insinuant; quæ ergo statim cum sanguine venoso ad cor defertur, atque inde ope arteriarum per universum corpus distribuitur. Hinc citissima virium refectio sequitur, quatenus nempe à gratissimis illis stimulis, nullis viscerum actionibus mutatis, excitantur spiritus, & augentur cordis vires. Solent autem hæc præcipue applicari illis locis, quibus magnæ venæ adjacent: uti v. g. sub axillis, poplitibus, collo &c. ut brevi itinere resorpta per venas bibulas hæc effluvia magnas venas ingrediantur. Sed non tantum hac via videntur prodesse epithemata talia, verum etiam si nervis quibusdam, quibus maximum imperium in vitales corporis functiones esse per experimenta novimus, applicentur quam proxime. Nervi per narium internam superficiem dispersi tales sunt, & hominem nimio corporis motu fatigatum, & jam jam in syncopen lapsurum, panis recens de clibanoeducti fragrantia reficiet ilico: Idem jam de omnibus aromatibus fere verum est, quorum fragrantia solo olfacto percepta vires erigit statim. Solent hinc etiam Cardjæ, ubi magni illi nervi circa ventriculi officium superius locantur, similia applicari tanto cum fructu; uti etiam umbilico. Incredibilem enim efficaciam habere aliquando remedia, externe iis locis applicata, docent observationes Medicæ. Homo sævissima cardialgia contabescebat, dum quatuor à pastu horis recrudesceret quotidie dolor, intolerabilis omnino, nisi mensæ incumbens miser cardiam validissime comprimeret;

X x x



unde incurabile carcinoma stomachum obsidere credebatur: Paucarum tamen horarum spatio curatum hunc morbum vidit *Helmontius* (a), fragranti Emplastro applicato, quod palmæ latitudinem vix excederet. Imo non sine ratione videtur conclusisse idem Autor, quod omnia fere remedia solo odore agant, id est subtilissima sua & spirituosâ parte: simulac enim nativo suo odore spoliantur, nimis diu servata in officinis, etiam vires absunt. Sic scammonium ubi cadaverosus ejus odor periit, effectum penitus est; si castoreum virus suum amiserit, nihil efficit amplius &c. Requiritur autem, ut firmentur vires, horum Epithematum talis applicatio, per quam caveatur, ne calor corporis subtilissimam dissipet fragrantiam extrorsum: sumitur hinc panis tostus, ut siccissimus & maxime bibulus fiat; perfunditur tali Epithemate (varias formulas vide in *Materia Medica* ad hunc numerum); applicatur nudæ cuti; postea tegitur vesica ovilla vel suilla molliissima, oleo prius pertricata; deinde idonea ligatura hæc omnia firman-  
tur.

§. 435. **I**MPEditur putrefacti in venas introitus. 1. firmando vires (434.), adeoque augendo motum ad exteriora. 2. curando exitum ad exteriora; fomenta, cataplasmata ex diaphoreticis, emollientibus, laxantibus, facta, scarificationes, cucurbitæ, hirudines id agunt, cum calore externo.

Secunda indicatio generalis in Gangrænæ curatione erat, impedire putridi in venas ingressum (vide §. 433. n°. 2.). Gangrænosa enim pars vivis vasibus undique vel adhæret, vel saltem contigua est, & sensum solet in putridum tabum deliquescere; unde facilis erit resorptio illius putrefacti per venas, à qua pessima mala oriri possunt: febres nempe putridæ, deliria, virium prostratio subita &c. Poterit autem hæc resorptio impediri sequentibus.

1. Quæ liberrimum faciunt humorum per vasa motum, vires firmare dicuntur; uti in *Commentariis* §. 433. n°. 1. habetur: adeoque eadem illa, quæ præcedenti paragrapho enumerata fuerunt, sic augebunt vires vitales, si langueant, ut per ultimas exhalantes arterias, in superficie corporis ubique positas, liberrime disflentur illa, quæ naturaliter per has vias eliminari debent. Quamdiu autem nullum impedimentum est in ultimis illis exhalantibus fistulis, videmus, aucto circulationis impetu & velocitate, majorem liquidorum copiam per has expelli; sive insensibili perspiratione, sive sudore: ratio facile patet, quia organa secernentibus & excernentibus intra idem tempus major fluidorum copia applicatur. Sed dum arteriolæ exhalantes majori momento liquidi impulsu urgentur & dilatantur, vicinæ his venulæ resorbentes angustantur; adeoque & difficilior erit per has ingressus liquidi contigui resorbendi. Accedit, quod calor, auctum motum humorum per vasa comitans, dissipet illa, quæ resorberentur. Ideo in omnibus morbis, in quibus motus circulatorii humorum augmentum adest, siccitas nascitur à diffatis tenuissimis; & contra in languidis morbis, in quibus nimis tarda & debilis circulatio est accumulatis humoribus turget corpus. Quantum autem resorbere possint venulæ in superficie corporis posite, dum languidæ

(a) In Capitulo: Imago fermenti imprægnat. &c. n°. 21. pag. 93.

sunt vitales vires, docuerunt mira observata; de quibus postea in Hydrope dicitur. Constitit nempe, Hydropicorum corpora,educta omni aquoia colluvie, brevi tempore iterum intumuisse, licet ab omni potu fere abstinerint & siccissimos tantum cibos sumpserint. Unde videntur talia corpora ex ipso aere per venulas absorbentes haurire aquam. Summi ergo usus erit, augere parum circulatorium humorum motum, ut impediatur putridi Gangrænosi in venas ingressus: &, si quid forte ingressum fuerit, illud per urinas, aut cutis spiracula expellatur iterum; dum firmatis viribus motus versus exteriora augetur.

2. In abscessuum curatione dictum fuit, quam maxime requiri, ut crudum inflammatorium, jam maturatum, duceretur ad exteriora (vide §. 402. n°. 3.), ne illud resorptum purulenta cacochymia sanguinem inficeret, plurimisque & gravissimis morbis daret originem (vide §. 406.). Sed in Gangræna curatione exitus ad exteriora procurandus est tanto majori curâ, quando tabus gangrænosus pure peior est. Nihil autem magis impedit exitum illum ad exteriora, simulque vivas partes suppositas plus suffocat, quam si cutis gangrænosa & exsucca corii aridi instar induruerit: si enim tunc simul satis validus motus humorum in partibus vivis adhuc super sit, sub hac crusta omnia corrumpuntur. Optimum ergo erit, per fomenta aut cataplasmata applicata continuo humectare locum gangrænosum, omnesque meatus sic aperire, ut viva vasa omnia hic perspirent quam liberrime. Aqua, & omnia remedia, in quibus aqua prædominatur, huic scopo inserviunt; simul adduntur talia, quæ emolliendi & laxandi vim habent. Cum autem in parte gangrænosa circuitus humorum deficiat, ideoque & calor inde pendens; requiritur calor externus applicatus, ne fomenta & cataplasmata applicata frigescant. Pulcherrime hoc obtinetur, si imponantur ex terra figulina parati lateres calefacti, quales variæ magnitudinis & figuræ in his locis habentur; a pulchro effectu, quem in doloribus colicis levandis habent, dicti (*Kolykteenen*). Verum quidem est, calore sic & humectatione augeri putredinem in partibus jam mortuis; sed simul & facilitatur earundem separatio à vivis: unde nunquam hæc adhibentur remedia, nisi simul spes adfuerit, hanc separationem obtineri posse. Prudenter hoc monuerat *Celsus* (a), ubi de Gangræna curatione agit, dicens: *Medicamenta vero, dum malum serpit, adhibenda nulla sunt, quæ putredinem moveant: ideoque ne aqua quidem calida.* Quamdiu enim proserpit malum, augetur ab his putredo, & eo citius omnia vicina inficerentur. Solent tamen semper fomentis & cataplasmatibus ad Gangrænam misceri talia, quæ & putredini resistunt efficacissime, & penetrabili aromatica vi in motum deducunt stagnantia. Quia autem omnia illa in aqua facile possunt solvi, tamque subtilem habent simul fragrantiam, qua omnia aperiunt vasa, sine nimio tamen motus augmento; simulque solent augere illam evacuationem, quæ per cutis spiracula fit; diaphoretica vocantur. In Materia Medica ad hunc numerum similium formularum exempla habentur, in quibus emollientibus & laxantibus ruta, alliaria, sambuci, calendulæ, chamæmeli flores &c. miscentur.

SCARIFICATIONES. Quæ imprimis usum habent, si panniculus adiposus, materia inflammatoria distentus ad magnam crassitudinem, gangrænosus factus fuerit. Sæpe enim tunc tanta moles corrupti & mortui incumbit par-

(a) Lib. V. cap. 26. n°. 34. pag. 303.

tibus vivis subjectis, ut sola compressione suffocentur: simulque applicata fomenta vel cataplasmata non possunt penetrare suis viribus, & impedire putrefacti in venas introitum. Unde per scarificationes loci gangrænosus spiracula quasi hunc; per quæ aucto motu ad exteriora expelli possit corruptum, & admitti illa, quæ putredinem præsentem corrigant, futuram vero arceant. Scarificationes autem illæ tantum debent fieri in parte mortua, & penetrare quam proxime ad viva, neque tamen illa lædere; sic enim poterunt sine ullo dolore fieri, neque, crudo vulnere in partibus vivis factò, facilitabitur putridorum in venas ingressus. Docent enim venenatorum animalium morsus, quam facile cruento in vulnere virus recipiatur venis.

**CUCURBITÆ.** Ablata enim atmosphæræ pressione illo in loco, cui Cucurbita hæret, impetus sanguinis per vivas adhuc partes moti distendet vasa, elevabit mortua incumbentia, & repellet putrida. Imò, dum a mortuis incumben- tibus vasa vicina pressa non poterant explicari ab humoribus impulsis, ablata per Cucurbitam maxima parte hujus pressionis, libera iterum fiet via liquidis per hæc vasa transmittendis: sicque redibit vita in partibus, quæ abolito omni influxu & effluxu humorum in mortem tendebant. Quantam autem efficaciam habeant Cucurbitæ, ut deficientem vitam & nutritionem restituant in parte, docuit *Tulpius* (a). Nautæ juniori ex amplo brachii abscessu tanta puris copia subducta fuerat, ut postea deficeret nutritio, tandemque universum brachium emacresceret. Cum jam illud exarefactum esset, Cucurbitula cornea aliquoties imponebatur, cujus succu & calor & nutritio redibant tam pulchre, ut exsuccum illud brachium pristinum vigorem & torositatem recuperaverit & solitum robur; sic ut postea in navi officio suo fungi potuerit. Pulchrum etiam usum habent Cucurbitæ, si applicentur partibus vivis in Gangrænæ vicinia, ut augeatur vitalis liquidi huc ruentis impetus & copia: sic enim, uti postea §. 444. dicetur, solventur fibræ necdentes Gangrænâ parti sanæ, & obtinebitur separatio.

**HIRUDINE S.** Animalcula hæc, partem corporis, cui applicantur, trifulco ore vulnerant, dein sanguinem exsugunt, & sæpe pertinaciter affixa manent, donec satura & sanguine plena decidant; vel nitro, sale, aut similibus respersa, deferant locum, cui adhærent. Pergit sæpe tunc, remotis jam hirudinibus, sanguis effluere; imprimis quando hæmorrhoidibus applicantur; & quidem tanta copia, ut apud Autores, qui de hirudinum usu scripserunt, remedia enumerentur, quibus nimius ille sanguinis fluxus compesci posset. Tota ergo hirudinum actio est, ut vulnerent vasa, & dein sugendo educant sanguinem; adeoque minuta resistentia sanguinem majori copia & impetu huc derivari faciant. Similem ergo effectum habent, ac cucurbitæ, imprimis si scarificetur locus, cui cucurbitæ applicabuntur. Usum ergo habent imprimis, si scarificationes timeant ægri; aut talis fuerit loci situs, ut cucurbitæ applicari nequeant. Animalcula autem hæc gangrænosum & mortuum locum non facile mordebunt, sed in vicinia loci gangrænosus applicari poterunt.

Ex omnibus, quæ hac paragrapho dicta sunt, patet, talem hic laudari perfectè methodum, qualem Veteres adhibuerunt contra venenatorum animalium morsus. *Celsus* (b) tunc cucurbitulas commendat, & scalpello circa vulnus incidere

(c) *Observat. Medic. Lib. III. cap. 49. p. 266.* | (b) *Lib. V. cap. 27. n°. 3. pag. 309. 310.*

juber, quo plus vitiatī sanguinis extrahatur. Si cucurbitula defit, hominem vulnus exiugere vult; quod tuto fieri posse monet, modo nullum in ore interno ulcus habuerit. Deinde in loco calido hominem demorsum collocandum voluit; foveri vero vulnus animalibus vivis per medium dissectis, adhuc calidis, tuncque antidota exhibenda esse. Quæ si defint, portionem meri vini cum pipere exsorbendam voluit, vel quidlibet aliud, quod calori movendo est.

§. 436. **P**UTREDO incipiens corrigitur: 1. tollendo ejus causas sensibiles ( 422. 423. 424. 425. ).

Nihil hic generale determinari poterit, sed requiritur prius, ut sollicite indagentur causæ paragraphis hic citatis enumeratæ, à quibus gangræna, & illam sequens putredo, ortum duxit. Quod enim in uno casu prodesset, summopere noceret in altero. Sic v. g. in illa Gangræna specie, quæ post summam debilitatem, aut senilem quietem, sequitur, cardiaca calida moventia & incitantia summum usum habent: eadem tamen hæc nocerent summopere, si in calido juvenili corpore, post summam inflammationem, Gangræna nasceretur.

§. 437. 1. **C**ORRIGENDO ejus causam proximam, stagnationem, & calorem. α. condiendo stagnantia contra putredinem. β. muniendo solida contra eandem. γ. stagnantibus correctis per vasa munita conciliando motum.

Quantum stagnatio & calor ad putredinem faciant, jam sæpius dictum fuit. Per octoginta annos sanus homo vivere poterit, neque ulla putredo in corpore aderit; lanissimi autem juvenis cadaver bidui spatio totum putrescet, imprimis si calor aeris ambientis magnus simul adfuerit. Sola stagnatio putredinem non facit, vel saltem quam lentissime: docent hoc maceratorum animalium carnes, quæ hyemali sub frigore plurimis septimanis incorruptæ servari possunt. Neque solus calor corrumpit facile, nisi stagnatio accesserit: perpetuo cursu exercita flumina summis etiam æstivis ardoribus puram & limpidam aquam exhibent; & contra in stagnis collecta aqua pessimam mephitim tota æstate spirat. Optime hinc Galenus dixit: *Videtur autem ex materia humida omnis putredo fieri, ex causa vero efficiente, extraneo & præter naturam calore, simul autem augeri ab immobilitate* (α). Ut ergo putredo concepta arceatur, & coercetur, (vide §. 433. n°. 3.) expediet nimium calorem compescere, & stagnantia deducere in motum.

α. Cum requiratur ad curam Gangræna, ut stagnantia in motum deducantur, atque iterum cum reliquis humoribus fluant per vasa; patet, omni ope cavendum esse, ne putrescant: si enim jam putrida facta moverentur, destruerent tenerissima vasa, & corrumpere bonos humores, quibus miscentur. In commentariis enim t. 86. probatum fuit, sanguinem dissolvi à putridis, & minima vasa destrui; adeoque etiam depravari omnes actiones solidarum & liquidarum partium corporis, unde innumera mala possent nasci. In putrido scorbuto, & in

(α) Galea. Comment. 3. in Lib. III. Epidem. Charter. Tom. IX. pag. 256.

atra bile turgente patuit toties, quanto cum periculo corrupta & stagnantia in motum deducantur; uti postea dicetur, quando de his morbis agendum erit.

6. Non enim humores soli mutantur & corrumpuntur per putredinem, verum etiam solidæ corporis partes cohesionem suam perdunt, sic ut animalium carnes in aere calido & humido putrefactæ diffuant in tabum olidissimum. Pro vario autem putredinis gradu plus minusve mutatur cohesio in partibus solidis, uti quotidiano in culinis experimento constat. Recens enim mactatæ carnes tenaces esse solent, si statim mensis adhibeantur; per aliquot dies servatæ multum de illa tenacitate perdunt; ubi autem ad levissimum putredinis initium usque in aere aperto relinquuntur, tenerriam evadunt, & in ore diffuunt fere, dum manducantur. Unde & *Plinius* (a) memoriæ tradidit, quod *Galli sagittas in venatu ellebore tingant, circumcisoque vulnere teneriorem sentiri carnem affirmant*. Venenata ellebori vi ad putredinis initium disponente animalium carnes.

7. Postquam bina priora facta sunt, tunc tuto motus excitari poterit. Si enim vel humores stagnantes putrefacti acquisiverint notabilem acrimoniam; vel vasa in cohesione sua per putredinem natam multum debilitata fuerint, vel utrumque vitium adfuerit; à motu excitato rumpentur vasa, effundentur humores, putredo præsens augebitur; adeoque Gangræna non sanabitur, sed increfcet potius: uti patet ex illis, quæ in commentariis §. 388. dicta fuerunt.

#### §. 438. **C**ONDIUNTUR liquida applicatione salis, aceti, vini, spirituum vini, aromatum.

Habentur in arte talia remedia cognita quæ animalium partes ab omni putredine servant; sed cum præter hoc requiratur, ut fluida stagnantia, per hæc remedia correctæ vel præservatæ, moveantur postea per vasa munita; patet, quod hæc antiseptica talia esse debeant, ut non tollant dotes in vasis transmittentibus & humoribus transmittendis requisitas ad hunc motum: unde non debent condiri instar cadaveris, sed debet simul vita servari in parte; & restitui, si defecerit. Præcipue autem hoc obtinebitur applicatione sequentium:

**S A L I S.** Animalium carnes, quæ paucis diebus putrescerent, sale marino undique resperstæ, vel ejus muris immerstæ, servantur incorruptæ diutissime: sed simul observatur, carnes illas duriores fieri. Sal marinus, gemmæ, ammoniacus præcipua sunt, uti & nitrum; quando nempe in fomentis diluta partibus Gangrænosæ applicantur.

**A C E T I.** Quod omni putredini quam maxime adversum est; unde tanti usus in morbis putridis fuit jam apud Antiquissimos Medicos: imo vel solo odore suo his morbis decumbentes reficit. Quotidianis experimentis constat, animalium carnes aceto æque posse præservari à putredine, quam sale. Interim hoc boni habet acetum, quod nec solida induret adeo, nec liquida coagulet; sed è contra sanguinem potius dissolvat. Acida reliqua fortiora, ignis vi ex fossilibus expressa, ut sunt spiritus nitri, salis marini, sulphuris, vitrioli &c. omnem quidem putredinem arcent, sed simul fluida coagulant, solida autem con-

(a) Hist. Natur. Lib. XXV. cap 5. pag. 634.



trahunt & indurant; imo, si meraciore hæc fuerint, destruunt. Unde patet, quare levissimum illud fermentatione paratum acidum, acetum nempe, illis præferatur.

VINI, SPIRITUUM VINI. Aprinas carnes, vino immerfas, in Germania à putredine servari notum est, simulque teneras manere. Unde & in vino antiseptica virtus est, quæ huic indicationi respondet. Spiritus autem vini, & Alcohol inde paratum, efficacissima quidem contra omnem putredinem præsidia sunt; sed sanguinem ejusque serum coagulant; vasa autem corrugant & contrahi faciunt: unde partem mortuam corporis servare quidem possunt, & cavere ne serpat putredo, sed tamen nunquam redire poterit vita in partibus illis, quæ alcohole vini diu conditæ fuerunt. Sic in mirabili illo casu, cujus mentio facta fuit in Commentariis §. 429. n°. 4. crus emortuum, spiritu terebinthinæ inunctum quotidie, & deinde assiduo spiritu juniperi fotum, non putrescebat, sed Mumia instar exsuccum & aridum redditum vivis partibus adhærebat: Vini ergo spiritus proderit potius dilutus aqua: tunc enim, quamvis debilior fuerit, tamen servare poterit partes à corruptione: neque tamen nocebit solida crispando, aut coagulum fluidis inducendo.

AROMATUM. Plurima talia in Materia Medica ad hunc numerum recensentur, in quibus hæc vis obtinet, ut etiam cadaveribus aspersa putredinem arceant quam diutissime, simulque gratissimo suo halitu reficiant vires. Inter illa autem scordium, alliaria, ruta, salvia, marrubium, absinthium, tanacetum præcipue commendantur. De scordio mira narrat *Galenus* (a); nempe à viris fide dignis scriptum fuisse, quod, cum post confectus bellicos cadavera pluribus diebus insepulta jacuissent; multo minus computruerint illa, quæ casu scordio ibi crescenti incubuissent; maxime vero incorruptas mansisse illas horum cadaverum partes, quæ herbam hanc attigissent. In alliaria similes vires laudavit *Hildanus* (b), licet scordium prætulerit: tamen tanti fecit illam herbam in Gangræna & Sphacelo curandis, uti etiam ad ulcera putrida & sordida, ut verno tempore succum ex illa pressum in lagenis vitreis, oleo super infuso, servaret, ne hyemali tempore saluberrimo hoc remedio destitueretur. Omnibus autem his plantis inest subtilis fragrantia, à qua præcipue illarum vis medicata pendet: longa autem coctione, imprimis in vasis apertis, illa diffatur in auras, & iners decoctum residuum nullas fere vires habet. Optimum ergo erit vasis clausis infundere has herbas in aqua pura fere fervida; dein expresso liquido addere vinum, acetum, sal, &c. vel & recentes herbas in pulvem tritas, addito sale & aceto, cataplasmatibus instar partibus Gangrænosæ applicare. Quantum autem hæc & similia profuerint quandoque, patuit ex illis, quæ in commentariis §. 338. dicta fuerunt.

## §. 439. I I S D E M ( 438. ) servantur solida intacta.

Hoc satis patet: solidæ enim partes ex sua indole non corrumpuntur facile; sed tantum quia liquida continent suis cavis, vel illis alluuntur. Unde per exsic-

(a) De Antidotis Lib. I. cap. 12. Charter. Tom. XIII. pag. 883.

(b) Observat. Chirurg. Centur. 1. observ. 94. pag. 171.

cationem dissipatis pro maxima parte fluidis partes animalium diu sine putredine servari poterunt.

§. 440. **S**TAGNANTIA deducuntur in motum: *α.* diluendo aquosis affatim haustis & applicatis. *β.* stimulo arterias per ea, quæ malo opposita. *γ.* movendo liquida calore, frictione, cardiacis. *δ.* sublata copia nimis distendente per missionem sanguinis.

Ex ipsa definitione Gangrænæ §. 419. patet, stagnare liquida in suis vasis in loco Gangræna affecto, cum cesseret influxus vitalis humoris per arterias, effluxus per venas: sed stagnatione & quiete nostrorum fluidorum moleculas adunari, demonstratum fuit in Commentariis §. 117. adeoque, ut stagnantia deduci possint in motum, requiritur, ut moleculæ concretæ inter se dividantur iterum sic, ut possint per ultimas vasorum suorum angustias transire: sed & moleculis jam divisus debet conciliari motus, qui deerat, dum stagnabant: simul etiam, si à quacunque causa vasorum transmittentium capacitas imminuta fuerit, & hæc tollenda erit. Hæc autem omnia obtineri poterunt sequentibus.

*α.* Tota cutis in omni fere puncto absorbentium venularum oscula habet: hinc diluentia applicata externe loco affecto poterunt se his osculis insinuare, sanguini misceri, & communi corporis lege per omnia distribui. Quantum autem effectum habeant diluentia in resolvendis stagnantium fluidorum concretis moleculis, dictum fuit in Commentariis §. 132. n°. 2. & 134. Sed & ibidem demonstratum fuit, fomenta diluentia parti affectæ applicata non tantum prodesse, quatenus diluens aquosum venulis absorbentibus insinuent; verum etiam quatenus laxando omnia vasa faciant, ut impetus & copia vitalis liquidi in parte augeantur; adeoque & diluens liquidum, universali humorum massæ permixtum, magis versus hæc loca deriveretur. Si jam simul attendatur ad illa, quæ in Commentariis §. 398. n°. 3. habentur, patebit, externa applicatione diluentia etiam posse ingredi arteriolarum exhalantium extrema; si nempe majores ramuli, unde minores hæc arteriæ prodeunt, obstructi fuerint, tunc enim ultimi illorum fines vacui contigua liquida ebibent illa vi, qua minimæ fistulæ cavæ liquores hauriunt. Si jam simul, dum hæc externe applicantur, ingens similium copia potatur, resolutio concretorum fluidorum obtinebitur, quatenus per diluentia liquida fieri poterit.

*β.* Cum autem, respectu nostrorum fluidorum, aqua fere sit unicum diluens, hæcque ex se iners sit, requiritur motus cordis & arteriarum, ut illa actiuosa & mobilis reddatur. In parte Gangrænosa stagnatio est: hinc licet & externe & interne diluentia adferantur, nisi possit simul hic excitari motus, nihil boni fiet. Unde paulo major motus in toto corpore, id est febris modica, semper tunc proderit; ideo una cum diluentibus solent dari talia, quæ blando stimulo motum parum augent (vide de his Commentaria §. 398. n°. 1.) ut Infusum ligni sassafras, trium santalorum, rutæ, alliaræ, &c. Cumque humorum nostrorum spontanea corruptio, dum stagnant, semper in putredinem vergat (vide §. 80.); simul his adduntur gratissima acida, & imprimis vegetabilium expressi succi, ut

ut citreorum, aurantiorum, ribesiorum &c. vel & fermentata acida, vinum nempe aut acetum; quæ omnia minime coagulant sanguinem, sed attenuant potius & dissolvunt. Prout jam major minorve putredinis metus est, & in victu & medicamentis acida plus minulve exhibentur. Ubi vero à defectu & quiete senili, vel à lenta & frigida sanguinis cacochymia Gangræna nascitur, neque ulla hactenus adsunt putredinis signa, tunc sales volatiles oleosi, Elixiria tincturæ aromaticæ &c. prodesse poterunt.

3. CALORE. Vitam perfectam in homine, id est sanitatem, calor comitatur, & quidem æquabilis, per omnia corporis loca diffusus, ad extremas etiam partes usque. Vitæ viribus auctis vel minutis, pariter increfcit vel decrefcit calor; tandemque in cadavere, omni vita cessante, frigus oritur, & omnium quies. Sed non tantum calor vitæ præsentis comes & signum est, verum etiam latens & sopita quasi vita calore excitatur, & redditur actiuosa. Ranæ hyemali frigore torpent, imo media in glacie sepultæ hærent immobiles: si in hypocaustum delatæ calefcunt, redit agilitas. Vitale stamen pulli, in sacculo colliquamenti ovi incubati latens, iners ibi hæret, neque crescit, donec calori gradu requisito latens in actum deducatur vita; &, uti ex immortalibus acutissimi *Reaumurii* observatis patuit, insectorum vita potuit pro lubitu excitari, deprimi, prolongari, vel brevior reddi, dum majori minorive calori exponerentur (a). Jam apud Antiquissimos mira hæc ignis & caloris proprietas videtur cognita fuisse, qua cuncta in rerum natura animantur. Scribit enim *Plutarchus* (b), sapientissimum regem Numam ignem tanquam omnium rerum principium colendum dedisse: *Mobilissimus enim in natura ignis est. Motus autem est, aut cum motu ejus generatio. Alia vero materia partes calore destituta: torpida jacentes & mortuis similes, desiderant ignis vim, velut, animam: qua simulac accessit, conferunt se ad agendum aliquid aut patiendum.* Pater ergo, quantum expectari possit à calore externo, ut stagnantia deducantur in motum; modo simul adhibeantur illa, quæ putredinem arcere possint, quæ aliter metuenda foret.

FRITIONE. De variis frictionis usibus, & quomodo per illam major motus in toto corpore, vel & in parte, excitari possit, dictum fuit in Commentariis §. 28. Sufficit hic notasse, alternam illam pressionem & relaxationem partium, quæ in omni frictione fit, supplere naturalem vasorum in liquida contenta actionem; adeoque stagnantia per illam moveri poterunt, quod hic requirebatur. Summi ergo usus erunt, ubi à quiete senili Gangræna in extremis adest, vel brevi futura metuitur. Ubi autem post validas inflammationes Gangræna metuitur, frictiones tantum mollissimæ & prudenter adhibitæ prodesse poterunt: rudiori enim tractatione vasa, liquidis immeabilibus distenta, frangerentur.

CARDIACIS. Cum cor causa princeps statuatur omnium illorum motuum, unde vires vitales æstimantur, ideo omnia remedia, quæ hos motus augent, cardiaca vocantur, licet non semper in solum cor proxime agant. Cardiaca autem illa imprimis duplicis generis sunt, vel replentia, vel moventia. Priora restitunt copiam humorum sanorum; posteriora motum illorum per vasa augent. De

(a) *Memoires pour l'Histoire des insectes* | (b) *Plutarchi Camillus* Tom. I. pag. 139.  
Tom. II, Mem. 1.

posterioribus autem hic præcipue agitur, cum indicatio curatoria jubeat, stagnantia in motum reducenda esse. Vinum, succus citri, aurantiorum, & similia gratissima acida imprimis hic usum habent; cum simul putredini hic metuenda adveniant. Videatur de his Institutionum Medicarum *Celeberrimi Boerhaavi* §. 1112. ubi pulcherrima enumerantur.

Δ. Cum modo dictum fuerit, ut in curatione Gangrænæ stagnantia deducantur in motum, excitandas esse vires vitales; mirum forte videri posset, quare Venæ sectio nunc laudetur, cum per illam minuatür humorum copia, & debilitentur vires. Sed in illo casu proderit, si vel in toto corpore plethora adfuerit, vel in loco affecto vasa, immeabili liquido infarcta, à vi & impetu liquidi a tergo urgentis nimis distendantur: demonstratum enim fuit in Commentariis §. 106. 1. metuendam esse circulationis suffocationem, vasorum rupturam, & Gangrænâ à nimia plenitudine; & in Commentariis §. 100. probatum fuit, eadem mala à nimio sanguinis per vasa motu fieri. Præterea in Commentariis §. 398. n°. 1. dictum fuit, per missionem sanguinis, imminuto liquido distendente, restitui valis oscillationes elasticas, quæ ad motum stagnantium quam maxime necessariae sunt.

Metuendum forte videretur, ne putrefacti facilior esset introitus in venas depletas per sanguinis missionem: sed hæc vix adhiberi debet, nisi satis valida febris adsit, per quam motus magnus ad exteriora fit, qui putridi in venas ingressum impedit (vide §. 435. n°. 1.): & præterea non potest adesse magna putredo, quamdiu spes superest, stagnantia liquida per vasa adhuc integra moveri iterum posse. Unde, licet aliquid putredinis illius incipientis venas ingrederetur, illud facile elueretur ex sanguine per diluentia affatim hausta (vide lit. α. hujus paragraphi) & per urinam aut sudores exiret de corpore.

§. 441. **H** I S. (434. 435. 436. 437. 438. 439. 440.) cito applicatis, sæpe renovatis, multoties incipiens gangræna felici correctione & diaphoresi benigne tollitur.

Nunquam facile desperandum est, licet Gangræna adesse videatur, modo nondum illa signa adsint, quæ docent vasa jam rupta esse, & humores effusos putrefactos. Si enim omnia illa, quæ paragraphis hic citatis dicta fuerunt, cito applicentur, & pertinaciter pergatur in eorundem usu, sæpe redit vita in partem, quæ jam mortua credebatur. Neque nocebit hoc tentare, modo aliqua, quantumvis etiam levis, spes felici successus superfuerit; quia eadem hæc remedia applicata proderunt etiam in illis casibus, ubi nihil amplius expectari poterit, quam separatio mortui à vivo, uti §. 445. dicitur. Licet ergo validissimæ inflammationis phænomena subito ablata fuerint sine correctione causæ, & color loci affecti, antea ruberrimus, jam inceperit mutari; imo quamvis aliquæ parvæ pustulæ chore lymphatico plenæ in cute apparuerint (quæ docent tantum, tenerrima vascula cutim epidermidi necentia rupta esse), adhuc tentari poterit hæc methodus. Dictum enim fuit in Commentariis §. 419. non semper adeo facile esse, ut distinguatur validissima inflammatio à primo Gangræna

ex illa natæ initio ; quia & valida inflammatio in mortem tendit, & incipiens Gangræna nondum totam vitam abolevit in parte. Ubi ergo in illo confinio inter Gangrænam & inflammationem affectus consistit, efficacissima auxilia simul & semel applicanda sunt : si enim pergant eadem causæ agere, brevi destruentur vasa, & effusa liquida stagnabunt & putrescent. Sed vasis destructis nulla amplius spes est, stagnantia in motum reduci posse. Memorabiles casus in Contusionis historia allegati, in Commentariis imprimis §. 338. docent ; quam inopinati aliquando successus in gravissimis etiam casibus hanc methodum secuti fuerint.

§. 442. **S**I autem liquida jam putrefacta, horumque mobilissimæ partes exhalaverint, tum & canales destructi fuerint, malum non cedit his remediis, neque reddetur corruptæ parti sanitas, sed vicina multum destruentur motis, neque tamen exhalare potentibus, vivis.

Dum autem omnia illa, de quibus actum fuit binis paragraphis præcedentibus, tentantur, oportet Medicum vel Chirurgum quarta quaque hora inspicere locum affectum, si sensibus pateat ; & sollicite attendere, an signa vitæ auctæ vel redeuntis appareant ; an vero omnia in pejus ruant, & color mutetur in pallidum, fuscum, lividum, vel & nigrum ; tunc enim novit certo, partem mortuam esse, & vasa sic destructa, ut nulla motus vitalis restituendi spes supersit. Liquida ergo stagnantia spontanea degeneratione putrescent (vide §. 80.) ; solida destruentur ; & dum sic aer extravasata liquida alluit, eo citius corrumpentur. Sed demonstratum fuit §. 82. à putredine sic mutari nostros humores, ut aquosa pars exhalet, sales vero nativi, blandi saponacei & satis fixi, fiant acres alcalini volatiles ; olea pro parte sic attenuentur, ut fœtida & volatilia fiant ; residuum vero oleum, mobilissimis his partibus orbatum, terrestri & fixiori humorum parti unitum, tenacissimam fœcem constituat. Omnia ergo & hæc contingunt, ubi Gangræna confirmata partem occupat ; & partes mortuæ, postquam mobilissima exhalaverunt, exsiccantur durum sæpe & coriaceum tegumentum formant, quam escharam Gangrænosam vocant. Sed sub hac eschara vivæ partes sepultæ hærent : si ergo tunc arterias stimulo, vel per cardiaca, frictiones, aut calorem externum motus liquidorum multum augeatur per viva adhuc vasa, illa ad duram hanc & imperspirabilem crustam comprimuntur, & atteruntur ; unde nova inflammatio in his fiet, cito iterum in Gangrænam tendens, adeoque augebitur brevi in Sphacelum usque malum, dum ad ossa usque omnia perfecta morte destruuntur ; vel putredo mota in panniculo adiposo versus vicina loca propagabitur, sicque proserpet Gangræna. Hoc pulcherrime expressit Celsus loco illo in Commentariis §. 429. citato. Postquam enim dixerat, de Gangræna agens, quod caro illi ulceri vel nigra, vel livida sit, sed sicca & arida ; proximaque cutis plerumque pustulis subnigris impleatur &c. addit sequentia : *Omniaque ea simul serpunt ; ulcus in locum pustulosum : pustula in eum, qui pallet aut livet ; pallor aut livor in id, quod inflammatum : inflammatio, in id quod integrum est.* transit &c.

Y y yy ij



§. 443. **I**DEO totus scopus hoc casu (442.) separare mortuum à vivo.

Cum enim nulla amplius circumductio humorum per partem sic affectam superfit, neque illa restitui possit, uti ex modo dictis patuit; unicum tantum superest in arte remedium, nempe ut tollatur illud mortuum, ne vel pressione suppositis vivis partibus noceat, vel suo contagio inficiat vicina.

§. 444. **S**EPARATIO hæc fit semper vi vitalis liquidi ruentis ad fines gangrænosæ escharæ, ibidem suffocati, sicque in suppurationem (387.) acti, unde solvuntur fibræ necientes gangrænam parti sanæ.

Sed quomodo fiet hæc separatio mortui Gangrænosi à vivis partibus contiguis? Vitalis humorum per vasa motus in partem mortuam agere non potest, quia in illa absolute deficit; neque interim spontanea mutatione illius mortui hæc separatio obtineri poterit; in cadavere enim nunquam observatur. Superest ergo tantum, ut pars viva crustæ Gangrænosæ contigua ab illa secedat. Semper autem observatur, quamdiu vitales functiones validæ sunt, in illo loco, ubi gangrænosæ crusta vivas partes tangit, rubor & inflammatio; quia in illo confinio vivi & mortui humores per vasa viva allati sistuntur, cum non possint per crustam gangrænosam transire. Sed inflammatio illa hic nata per resolutionem curari nequit, quia non possunt referari obstructorum vasorum fines; unde vel in gangrænam, vel in suppurationem tendet, (scirrhus enim in hoc casu non metuitur). Omne ergo artis molimen huc dirigendum est, ut in hoc loco suppuratio fiat; quæ obtinebitur, si illæ adsint conditiones, vel sponte vel per artem, quæ §. 387. recensentur. Vitalis ergo motus sic moderandus erit, ut major sit quam in sanitate, nec nimius tamen; humoribus lenitas concilianda; putredo præcavenda. Tunc enim continua arietatione liquidorum vitalium, quæ per vasa viva & pervia usque ad locum gangrænosum pelluntur, sensim solvantur latera vasorum, & separabitur cohesio inter vivum & mortuum: ex solutis vivorum vasorum extremis effundentur humores, qui, uti dictum fuit in Commentariis §. 387. in pus mutabuntur. Cumque pars gangrænosæ mortua, nullis amplius liquidis vitalibus irrigata, mobilissimis partibus difflatis, aëris ambientis & vivarum partium vicinarum calore exsicceetur, contrahetur in omni dimensione, sicque secedet à vivis partibus adhuc magis, simulac incipiunt vasorum vivorum extrema per suppurationem solvi. Oritur tunc rima, quæ perfectissime omne mortuum gangrænosum separat à partibus vivis, tuncque nullus amplius metus superest, ne Gangræna proserpat: sed eschara gangrænosæ insulæ instar inter medias partes vivas hæret: inferiori parte plerumque diutius affixa adhuc manens, licet in reliquo ambitu jam soluta fuerit; donec tandem, iisdem causis pergentibus, quotidie magis contrahatur; tandemque soluta penitus excidat, & purum ulcus relinquat. Suppurationem autem esse unicam naturæ humanæ methodum, per quam à vivis partibus separantur illa, quæ sic corrupta sunt, ut vitæ & sanitatis legibus

obedire amplius nequeant; dictum fuit in Commentariis §. 158. n°. 7. & ibidem *Hippocratis* auctoritate confirmatum. Qui plus hic sapere voluerunt, putantes, quod secando, urendo, corrodendo possent citius perficere hanc separationem mortui gangrænosi à vivis partibus, erraverunt certe. Omnibus enim his modis vel relinquitur pars mortui, vel una cum mortuis destruuntur viva vicina. Dum enim butyro antimonii, vel caustico liquore ex argenro vivo in aqua forti soluto (quem *Belloste* (a) adeo laudat) tangitur gangrænosi loci illa pars, quæ vivis partibus proxima est, poterit aliquando impetrari, ne proserpens putredo vicina afficiat, sed nunquam sic fiet separatio mortui à vivo. Quidquid enim de vivis partibus tangitur acerrimis his corrosivis, ilico moritur, & per suppurationem postea separari iterum debet à partibus vivis. Totum ergo, quod per hæc obtineri poterit, est, ut sic putrido gangrænosum undique circumscribatur limbus, in quo partes mortuæ quidem sunt, sed concentratissimis illis acidis spiritibus sic penetratæ, ut omnem putredinis progressum impedian. Sicque inter partes vivas & Gangrænosum corruptum medius limbus ponitur, qui omne commercium inter vivas partes & putridas gangrænosas tollit. Ipse autem ille limbus mortuus est, & separari debet à vivis partibus, quibus cohæret; quæ separatio à sola natura perficitur per suppurationem factam, uti statim dictum fuit.

Docuerunt observationes Chirurgicæ, scarificationes partium gangrænosarum sæpe prodesse, ut vis antisepticorum remediorum profundius penetraret, omnisque putredo arceatur: sed simul constat iisdem observatis, semper nocere illam methodum, qua gangrænosa cultro resecantur à vivis partibus. Toties jam laudatus Chirurgus *de la Motte* ingenue fatetur (b), quod tentaverit aliquoties scalpello mortua à vivis separare, cum illud in Nosocomiis sic factum vidisset à celeberrimis Chirurgis; sed semper pessimo successu. Fœminæ, dum in morbo acuto sine sensu jaceret, fœcesque clam dimitteret, oriebatur Gangræna circa coccygis os. Levibus scarificationibus mali progressum tentabat impedire, sed frustra; licet etiam profunda incisione ambitum loci gangrænosi separaret à partibus vivis, & antisepticiis fomentis muniret. Resecuit postea gangrænosa corrupta, unde cogeatur ægra in latus alterutrum decumbere; cumque & sic in illis locis corrupta auferet iteratis sectionibus, nudavit totum coccygis os, & maximam partem ossis sacri, trochanteres ossis femoris utriusque, & partem ossium ilii; donec tandem misera hæc mulier moreretur. Additque, se sæpius vidisse hanc methodum adhibitam fuisse, sed semper infausto eventu. Nec mirum; cum in tali casu mortuum illud gangrænosum subjectas partes vivas defendat, ne ab urina & fœcibus conspurcentur, & rodantur. Accedit, quod, quamdiu morbus talis acutus adest cum illa insensilitate, pondus corporis nimis diu incumbens uni parti novas gangrænas faciat in aliis locis, si situs corporis mutetur, vel crudas partes vivas, tegmine hoc gangrænosum orbatas, subito suffocet. Ubi autem leviter tantum scarificantur loca gangrænosa in talibus casibus, & fomentis efficacibus putredo præcavetur, totumque separationis opus

(a) *Chirurgien d'Hôpital* part. 3. chap. 2. | *Chirurg.* Tom. III. *Observ.* 198. & 199. &c.  
pag. 189. 190. | pag. 335. & seq.

(b) *Traité complet des Opérations de Chi-*

naturæ relinquitur, morbo devicto, & viribus vitalibus restauratis, pulcherrimus semper observatur curæ successus, etiam in satis profundis Gangrænis; uti pluribus exemplis modo laudatus auctor confirmat: imo fatetur, quod sæpius viderit in pauperibus, quorum nulla cura habita fuerat, sponte sua secessisse crustas illas gangrænosas, à decubitu circa os coccygis & vicina loca natas. Probe memini, meidem frequenter observasse, licet nullæ scarificationes adhiberentur, sed tantum vino, aceto, & sale foverentur partes, ad putredinem arcedendam.

§. 445. **A** DEOQUE patet, in eo hædere artem, ut 1º. fiant ea, quæ dicta. (433. 434. 435. 436. 437. 438. 439.

440. ).

2º. Ut acceleretur suppuratio.

3º. Ut emolliatur eschara.

Cum ergo ex modo dictis pateat, sola suppuratione posse fieri perfectam separationem mortui à vivo, hæc omni artis molimine promovenda erit, & acceleranda: simulque, dum hæc expectatur & perficitur, cavendum est, ne nimia putredo hic nascatur, quæ vicina suo contagio inficiat; vel venis resorpta totum corpus turbet. De hac re autem numeris hic citatis actum est. Cumque eschara Gangrænoſa, difflatis liquidissimis partibus, aliquando corii exsucci rigiditatem fere acquirat; patet, illam facilius separari posse, si prius humectetur & emolliatur.

§. 446. **U** T suppuratio acceleretur, conducit scarificatio putrefacti usque ad vivorum initia: sic enim, suffocatione nimia imminuta, loco serpentis gangrænæ fit abscessus, quo cutis & adeps gangrænoſa plerumque à subjectis adhuc vivis separantur.

In quibusdam corporis locis tunica adiposa, præcipua Phlegmones & Gangrænæ sedes, satis notabilem crassitiem habet; imo, licet satis tenuis fuerit, aliquando immeabili sanguine infarcta & inflammata in molem incredibilem distenditur. Si jam Gangræna occupaverit totam hanc massam, vivi muscoli & tendines &c. sepulti hærebunt sub hoc mortuo, neque poterunt illud amovere; unde suffocationis metus est, & magnum periculum, ne ad ossa usque moriantur omnia, & Gangræna in Sphacelum transeat. Ut hoc præcaveatur, scalpello solent Chirurghi sectiones facere in loco hoc gangrænoſo, sibi invicem parallelas, longitudine & numero diversas pro varia magnitudine partis affectæ. Aliquando & his addunt similes sectiones transversales, quæ priores decussant (\*). Profunditas autem harum sectionum talis esse debet, ut vivas & sensiles partes subjectas non lædant, mortuas tamen quam proxime ad viva usque dividant. Cru-

(\*) Garengot Traité des Opérations de Chirurgie Tom. III. pag. 347.

dele enim foret & sæpe periculosum, vivas partes scalpello dividere, & longe facilius esset ingressus putridi Gangrænosæ, dum crudum tale vulnus allueret, quod tamen quam maxime cavendum est. Unde Veteres jam monuerant, ad vivas partes usque loca gangrænosa incidenda esse (a). Sic & Celsus de curatione Gangrænæ agens sequentia habet: *Quidquid aridum est, & intentione quadam proximum quoque locum male habet, usque ad sanum corpus concidere* (b). Ita enim spiracula quasi fiunt, per quæ vasa viva supposita emergere possunt, & remove mortua incumbentia; simulque retexere novam fabricam, ut suppleat illa, quæ Gangræna corruperat. Perfecte idem hic fit, quod in historia Vulnerum Capitis dictum fuit, quando nempe minutis foraminulis perterebrabatur calvaria os, ad variam profunditatem pro vario corruptelæ gradu; tunc enim per hæc puncta emergebant vascula supposita, separabantur partes ossis corrupti, & restituebantur perdita. Præterea, divisis sic partibus Gangrænosæ, facilius ingressus conciliatur fomentis illis antisepticis, & mortuæ partes undique his penetrantur, & ab omni putredine quam efficacissime defenduntur; simulque escharæ emollitio facilius poterit impetrari, dum per rimas illas applicata emollientia se undique insinuant. Postquam omnia hæc facta sunt, si vitales vires bonæ fuerint, ad omnem ambitum loci gangrænosæ vivæ partes inflammabuntur, fietque suppuratio, per quam totum illud mortuum, scarificationibus sic divisum & emollitum, sensim separabitur; fitque tunc ex Gangræna ulcus, sed sordidum: quod tamen sic depurabitur quotidie magis magisque, dum cutis & panniculus adiposus (quæ tantum solent Gangræna occupari, vide §. 420.) contabescunt quasi & à vivis partibus subjectis secedunt. Ubi autem Gangræna tales partes occupat, quæ pauca tantum pinguedine teguntur, crusta talis gangrænosa non habebit tantam crassitatem, ut scarificationes illæ requirantur; vel sine læsione partium vivarum suppositarum commode fieri possent. Sic v. g. dum à decubitu circa os coccygis & sacrum Gangræna nascitur, raro crassa talis crusta gangrænosa adest, quia nuda fere hæc ossa statim sub cute hærent.

§. 447. **Q**UO autem sanguis plus in hosce fines ruat, hiru-  
dines, cucurbitæ, & similia attrahentia sæpe applicata  
profunt.

De his dictum fuit in Commentariis §. 435. n°. 2. Omnia autem hæc locum habent, quando vitalium humorum impetus languet; ubi enim valida febris adest simul, sæpe prodest potius nimium circulationis impetum minuere. Præterea attrahentia his locis applicata prodesse poterunt, quatenus diluentium & antisepticorum remediorum, quæ ore assumpta sunt, efficaciam huc versus determinant. Videantur de horum usu illa, quæ dicta fuerunt in Commentariis §. 134.

Non incongruum erit hic addere quædam de usu Corticis Peruviani in Gangrænis & Sphacelis curandis, cum ex observatis recentioribus constare videatur, specificam vim in hoc cortice esse, qua & sistitur serpentis mali progressus, & acceleratur suppuratio, per quam mortua à vivis separantur. Decem elapsi sunt

(a) Galen. Meth. Med. ad Glaucon. Lib. II. | (b) Lib. V. cap. 26. n°. 34. pag. 303.  
cap. 11. Charter. Tom. X. pag. 388.

anni, quando Celebris Northamptoniensis Chirurgus *Rushforth*, literis ad Societatem Chirurgorum Londinensium datis, corticis Peruviani usum in sistendis & sanandis Gangrænis & Sphacelis celebravit, sibi que hoc plurimis experimentis constare affirmavit. Sequenti anno *D. Amyand* recripsit, quod jam septies felici successu in sphacelo ulus fuisset eodem remedio, & præsertim in sene fere octogenario, cui Sphacelus, ex Phlegmone natus proserpebat quotidie: viginti tamen quatuor post corticem datum horis mortui à vivis separatio, & laudabile pus apparuit. Postea & alii celebres Chirurghi suis testimoniis confirmaverunt modo dicta. Sic in homine quinquagenario, cui sine ulla causa externa in dorso pedis prope medios pedis digitos Sphacelus ortus erat, mira hujus remedii efficacia apparuit. Postquam enim, per octiduum frustra applicatis & internis & externis remediis solitis, Sphacelus totum pedem occuparet, ipsum tendinem Achillis jam inficeret, omnesque Medici & Chirurghi inevitabilem mortem præviderent, nihil etiam ab extirpatione partis sperantes, quia febris valida, lingua aspera & siccissima, torvus aspectus, sitis, inquietudo &c. aderant; unanimi consensu omnium statutum fuit, in desperato hoc casu corticis Peruviani vires experiri. Omni quadrihorio drachma dimidia corticis huic ægro data fuit, & sequenti mane, cum vespertino tempore diei præcedentis prima dosis exhibita fuisset, jam in melius omnia tendere videbantur: febris enim & reliqua symptomata mitiora erant, pacatam satis noctem æger habuerat, nullumque progressum Sphacelus fecerat. Sequenti die jam aliquid humidi ex parte affecta prodibat, & tertia post exhibitum corticem die bini magni abscessus ad utrumque malleolum apparuerunt; unde satis patebat, nullum amplius metum esse, ne serperet malum. Cum deinde sexta quaque hora daretur eadem corticis dosis, redibat febricula levis, neque adeo laudabile pus apparuit; unde statim quarta quaque hora iterum exhibebatur, & ita per viginti & octo dies perfectum fuit: deinde adhuc per quinque vel sex dies sexta quaque hora dabatur drachma dimidia corticis. Toto autem hujus curæ decursu æger uncias decem Corticis Peruviani sumsit. Musculi omnes & tendines pedis, Sphacelo jam putrefacti, antequam cortex exhibebatur, sensim separati fuerunt; ossa vero digitorum pedis, metatarsi & tarsi nuda sic & corrupta successive fuerunt abscissa. Post septem circiter menses tota curæ absoluta fuit, tibiæque & fibulæ extrema firma cicatrice fere integre obducta erant; potuitque ligneo cruri innitens æger incedere, & postea optima valetudine usus fuit (a).

Plures ibi casus recensentur, quibus constat, corticis Peruviani usu Gangrænas & Sphacelos cohibitos fuisse, ne vicina sana inficerent; & deinde felici separatione mortua à vivis secessisse, licet nulla omnino febris intermittens indicia forent in toto morbi decursu; & quamvis ab externa læsione Gangræna nata fuisset: Quin imo, dum cortice exhibito omnia pulchre cederent, intermisso ejus usu, mox in pejus omnia vergere observatum fuit; datoque iterum cortice, felix denuo fuit successus. Bini tamen ibidem recensentur casus, quibus patet, dato quamvis cortice periisse ægros, neque superatam integre fuisse Gangrænam. In hydropico nempe, dum puncturis crurum collectæ lymphæ parabatur exitus, Sphacelus ortus fuit; dato cortice quidem sistebatur malum, sed immedicabili ictero obsessus æger; morboque & remediis evacuantibus exhaustus, Gangræna crus alterum occupan-

(a) Philosoph. Transactions n°. 426. pag. 429. & 434. Abridgement. Tom. VII. pag. 643.—652.  
tc,



te, fato, cessit. Alter casus observatus fuit in quinquagenario viro, cui post liberaliorem Bacchi usum, & inde ortam cachexiam, phlegmone pedis in sphacelum digitorum & metatarsi transivit. Frustra plurimis remediis tam externis quam internis adhibitis quotidie serpebat sphacelus, cum febre lenta, & copioso urinæ limpidioris profluvio. Tandem quarta quaque hora dabantur scrupuli bini Corticis Peruviani; & licet in ejus usu per aliquot dies pergeretur, nihil tamen profuit nec Sphacelo, nec urinæ profluvio, & ægrotus intra duarum septimanarum spatium periit.

Plures alii casus, qui Corticis Peruviani vires in curandis Gangrænis & Sphacelis probant, habentur in Actis Edinburgensibus (4). Cum autem frequentissime Gangrænas, & aliquoties Sphacelos, etiam in senibus, sine Corticis Peruviani usu, non tantum substituisse, verum etiam pulcherrime separatos à vivis partibus, imo & sanatos viderim, nondum auderem ex propriis observatis aliquid hic determinare. Meretur certe rei hujus dignitas, ut quavis data occasione tentetur, quid Cortex Peruvianus in his morbis valeat.

§. 448. **I**NCISA (446.) pars calidis liquoribus, corruptioni resistens (438.), & duritiem escharæ (389.) emollientibus (403.), fovenda.

Ut fiat separatio mortui gangrænosæ à vivis partibus, quibus adhæret, pulcherrime convenit si emollire & humectare hanc crustam gangrænosam, ut fere diffuat: sed dum hoc fit, putredinis semper metus est. Debent ergo talia applicari, in quibus emolliens hæc vis est, sed & simul antiseptica his miscenda sunt. Dum ergo alcohole vini, spiritu vini camphorato, & similibus solis foveatur locus gangrænosus, impeditur quidem putredo, sed indurantur omnia; & dum incisionibus satis profundis factis hæc sua efficacia penetrare possunt ad partes vivas suppositas, illas emori faciunt, sicque novas crustas mortuas generant. Ubi autem emollientibus foveantur hæc loca, pauculum illud mortuum, quod in locis scarificatis vivis vasis incumbit, ita laxatur, ut fere diffuat, adeoque vix amplius vivis vasis cohæreat, unde facillime inde separari poterit vi vitalis humoris, per vasa viva supposita huc pulsæ. In Materia Medica ad hunc numerum habetur liquor talis, qui potentissime putredini resistit, simulque ibi describitur cataplasma emolliendis escharis Gangrænosæ inserviens; quod partim ex aromaticis antiseptis herbis, partim vero ex emollientissimis constat. Solent Chirurghi similibus Cataplasmatibus, antequam applicabuntur parti affectæ, inspergere liquores antisepticos, sicque pulcherrimo effectu bina hæc adminicula conjunguntur. Simplex cataplasma ex avenæ vel secales farina, quæ citissime acescunt, in lacte eburato decoctis, addendo sub finem rutam recentem contritam, salis ammoniaci aliquam quantitatem, & oleum lini vel simile, ne nimis cito arefceret hæc puls, utrique huic indicationi optime satisfacit.

(4) Medical Essays Tom. III. pag. 35. — 47. Tom. IV. pag. 47. — 65.

§. 449. **P**ARTES pendulæ, emortuæ, solutæ, emollitæ escharæ tollendæ tenaculis, forfice.

Dum omnia hæc fiunt, crustæ illæ gangrænosæ, imprimis si scarificando in plures partes divisæ fuerunt, incipiunt solvi, separari a se mutuo & vivis partibus, tuncque aliquando pendulæ, paucis adhuc tantum in punctis coherent. Dum depurationi loci gangrænosi nimis student sæpe Chirurgi, avellunt hos floccos gangrænosos tenaculis, sicque sæpe dolorem faciunt; imo & circa loca tendinosa convulsionem & tetanum, dum irritant vel trahunt nudos sæpe suis vaginis mucosis tendines; uti constitit observationibus Medicis & Chirurgicis in Commentariis §. 164. allegatis. Quantum noceat, crudeli cura mortuas partes, etiam nondum emollitas, sed vivis coherentes rescindere, dictum fuit in Commentariis §. 444. Natura, toties in curandis morbis sibi sola sufficiens, perficiet, separationem mortui à vivis, quam inchoavit: totum, quod ars potest, est, ut bono victu & idoneis remediis efficiat, ut sani humores debita copia & impetu per vasa viva huc ferantur, & continua quasi arietatione repellant bas crustas gangrænosas, emollientibus fomentis & cataplasmatibus laxatas; simulque putredo hic metuenda caveatur antisepticis medicamentis. Quidquid autem ab omni cohæsiōe cum vivis liberum est, tolli debet, ne diutius relictum & putrescens tenerrimis vasis suppositis noceat: si pendulæ gangrænosæ lacinie pro parte cohæreant adhuc, forfice rescindendum est omne illud, quod à vivis partibus solutum est, relinquendum autem illud, quod adhuc cohæret: dum enim illud à vivis partibus avellitur, crudum vulnus fit, sanguinem fundens, quod à gangrænolo tabo pessime affici posset; facilisque foret in crudo sic vulnere putredinis gangrænosæ resorptio. Generalis ergo regula haberi potest, nihil hic tollendum esse, quo ablato dolor nascitur, vel sanguis effunditur.

§. 450. **T**OTI parti affectæ assiduo applicanda cataplasmata calida, & cum calore continuo sustentato agentia; quæ ex Emollientibus, Diaphoreticis, Anodynis, consent.

Cum in parte Gangrænosa vitalium humorum per vasa motus nullus sit, calor inde pendens pariter deficiet; adeoque calore externo supplèbitur ille defectus. Facile autem patet, hoc tantum locum habere, si crassæ satis fuerint crustæ illæ gangrænosæ; aliter enim vivarum partium suppositarum calor sufficeret. Solent ideo etiam ad hunc usum cataplasmata fomentis præferri, quia pulvis illæ calorem diutius retinent, neque tam cito exsiccantur, adeoque non tam sæpe renovari postulant. Lateribus autem illis calefactis, de quibus antea dictum fuit, applicatis commode poterit sustineri calor. In illis autem cataplasmatibus, uti statim §. 448. dictum fuit, requiritur & emolliens vis, & simul ut adsint talia, quæ putredinem arceant, & grato stimulo aromatico viva vasa parum stimulent, (vide de his commentaria §. 435. n°. 2.). Varia ergo hæc esse debebunt pro diversa loci affecti conditione. Si enim ingens siccitas adsit, emollientia & humectantia quam maxime proderunt; si autem putredinis validæ signa

adfuerint, antisepticorum major copia requiritur. Si pallor, frigus, inertia prædominantur in toto corpore, vel in parte affecta, aromatum stimulantium major copia proderit; & contra si valida inflammatio circa Gangrænæ limites adlit, flores sambuci, sempervivum & similia refrigerantia proderunt. Solent autem his cataplasmatibus addi Anodyna, quæ doloris sensum sæpe satis molestum, dum Gangrænosa eschara à vivis partibus separatur, obrundunt & leniunt. Eschara enim hæc innumeris nexibus hæret partibus vivis sentientibus: dum ergo illa sensum se contrahit, & in omni dimensione minuitur, lenta dilaceratione distrahuntur nervosæ sensiles fibrillæ in partibus vivis gangrænosam escharam ambientibus; unde dolor (vide §. 220. 221.). Patet ergo iterum, quantum usum emollientia & laxantia in tali casu habeant, cum & citius his applicatis eschara gangrænosa solvatur, & dolor à distractis fibris nervosis ortus tam pulchre leniatur per eadem, uti probatum fuit in Commentariis §. 228. n°. 1. Simul tamen possunt & his cataplasmatibus addi talia, quæ, manente quamvis doloris causa, ejus sensum minuunt, uti v. g. Hyoscyamus, solanum officinarum &c. In Materia Medica, ad hunc numerum talis cataplasmatidis formula habetur.

§. 451. **H**UC etiam plurimum facit rarior partis detectio, quam vulgo fieri solet.

Quanta cum velocitate sæpe proserpat Gangræna & Sphacelus, antea Chirurgis & Medicis observationibus fidelissimis constitit: ob hanc causam pessima semper quævis metuentes Chirurghi partes Gangrænosas sæpius inspiciunt, & merito quidem, quamdiu nondum constat, Gangrænæ progressum cohibitum esse. Postquam autem crena illa, separans mortui & vivi confinia, apparuit in omni ambitu loci gangrænosi, limes positus est serpenti malo, quem nunquam transibit, quia soluta est continuïtas, qua partes mortuæ cohærebant vivis. Nullum ergo periculum est, licet cataplasmata illa diutius maneant applicata sine renovatione; constant enim talibus, quæ putredinem hic metuendam prohibent, & continua hac maceratione crustæ gangrænosæ citissime contabescunt, & suppuratio adeo hic necessaria promovebitur. Dum autem sæpius renovatur apparatus, aëris liber accessus partibus vivis, nudis jam hac crusta Gangrænosa, nocebit uti demonstratum fuit in Commentariis §. 204., præcipue si diu scrutando, & instrumentis suis depurando, loco Gangrænoso notabile tempus impenderint Chirurghi, uti aliquando facere solent. Sufficit, ut Chirurgus ter quaterve in die accedens subolfaciat, an aliquid putridi deprehendat; & si nihil tale adsit, tunc totum apparatus per viginti quatuor horas relinquat.

§. 452. **U**BI, his (446. 447. 448. 449. 450. 451.) factis, eschara contrahi, scarificata humescere, margo sanare, rubeo, suppurari, mortuum vacillare incipit, signum est, separationem fieri, subsistere serpens malum, brevi purum futurum locum.

Postquam vitalis liquidi vi, ruentis ad fines Gangrænosæ escharæ, solutæ sunt

Z z z z ij

fibræ neſcentes gangrænâ parti ſanæ, vaſorum vivorum extrema retrahentur illa vi, quæ explicata fuit in Commentariis §. 158. n°. 1. interimque eſchara Gangrænôſa, quæ nihil amplius per vaſa recipit, calore partium vicinarum perder mobiliffima & fluidiffima; adeoque exſiccabitur & mœle minuetur: unde in omni ſuo ambitu contrahetur, & recedet à margine vivo, cui cohæſit: utroque illo effectu conſpirante naſcitur rima illa, inter vivas partes & eſcharam Gangrænôſam media, quæ limitem certiffimum ponit proſerpenti antea malo. In illo autem loco vaſa viva, mortuo hoc tegmine libera, incipiunt perſpirare, & liquores patulis ſuis orificiis effundere, unde tunc in rima illa humiditas apparet, quæ redeuntis vitæ in hoc loco optimum ſignum eſt. Si autem ſcarificationibus Gangrænôſa eſchara diviſa fuerit, paulo poſt & illarum fundus, qui antea ſicciſſimus fuerat, humectari incipiet. Facile autem hoc diſtinguitur ab humectatione illa, quæ fomentis & cataplaſmatibus applicatis debetur. Si enim his remotis pars bene deterſa inſpiciatur, ſicca omnino apparebit, quamdiu nondum incepta eſt ſeparatio mortui à vivo; & contra, ſi jam viva vaſa ſuppoſita removerint ſaltem pro parte mortuum incumbens; in fundo ſcarificationum apparebit manifesta humiditas, quæ licet prudenter deterſa fuerit, redibit ilico. Paulo poſt incipiet ſuppuratio naſci: ſed ſtatim in illa rima, quæ gangrænôſum mortuum à vivo margine ſeparat, non apparet bonum pus, ſed aliud à conditionibus boni puris degenerans liquor; pariterque à tabo gangrænôſo diverſus, interque illum & pus quaſi medius. Illud enim liquidum quod per vitalia vaſa jam libera & aperta affertur, mora calore & diſſipatione vel reſorptione partis liquidiffimæ in pus converteretur; verum mortuum Gangrænôſum in tenuem ichorem diſfluens huic ſe miſcet: Perfeſte ergo illud tunc obtinet, quod *Galenus* in loco citato in Commentariis §. 387. tam pulchrè dixerat: nempe *ſit mixta quedam ſanguinis mutatio: partim quidem ab ea, quæ præter naturam, partim vero ab illa, quæ ſecundum naturam cauſa eſt; quarum ut illa, quæ præter naturam eſt, putrefacti; ſic illa, quæ ſecundum naturam eſt, cauſa concoquit. Earum vero utraque prævaluerit, protinus indicia, tum in colore, tum in odore, tum in conſiſtentia, neceſſario conſequuntur.* In initio enim ſeparationis ſubrubellus ichor effluit, ſed tamen craſſior parum & unctuoſior; ſequentibus vero diebus ille magis magisque ad conditiones laudabilis puris accedit, donec tandem omnes boni puris dotes habeat. Margo autem vivus, undique ſolutus à Gangrænôſo mortuo, quod illi adhæſerat, ſe jam perfeſte habet, ut labia vulneris; unde incipiet tumere, rubere, dolere, calere &c. ob rationes expoſitas in Commentariis §. 158. n°. 5. Omnia autem eadem etiam fient in partibus vivis, quæ eſcharam Gangrænôſam ſubjacent: nam & illæ ſenſim ſeparabuntur ab hoc mortuo; unde cruſta illa, quæ antea valide adhærebat, incipiet mobilis fieri & vacillare, dum digito tangitur, & levi preſſione in omni ambitu liquidum ſub illa collectum exit; ſicque ſenſim, ſolutis omnibus nexibus, quibus mortuum hærebat vivis partibus, illud excidit; tuncque relinquit purum vulnus cum jactura ſubſtantię, quod repleri & conſolidari debet.

§. 453. **T**UM lenia, anodyna, balsamica, digestiva applicanda sunt; raro detegendum ulcus est; omnia, quæ fibris rigiditatem dant, vitanda; quies parti danda; & porro instar ulceris malum pertractandum erit (411.).

Postquam ergo serpens malum substitit, & Gangrænosa crusta, à margine vivo separata, intulæ instar inter partes vivas hæret, tunc considerandum est tanquam ulcus sordidum, quod primo depuratione, & dein perditæ substantiæ regeneratione & consolidatione indiget: Unde de Gangrænæ curatione agens *Celsus* optime dixit: *Postea, si vitium constitit, imponi super vulnus eadem debent, qua in putri ulcere præscripta sunt* (a). Sed depuratio hujus ulceris consistit in eo, ut tam cito, quam fieri possit, excidant gangrænosa crusta, impetu vitalium humorum per vasa allatorum separata à partibus vivis, quibus adhærebant. Hoc autem obtinebitur imprimis talibus remediis, quæ gangrænosas illas crustas laxant & emolliunt: Mollissimum hinc unguentum aureum, basilicum, sive tetrapharmacum, ab ingredientium numero dictum, butyrum recens &c. tanti hic usus sunt. Neque metuendum est, ne vasa viva emollientissimis his nimis laxata in fungosam dictam carnem degenerent; impedit hoc enim his incumbens crusta Gangrænosa; qua ablata, & puro sic reddito loco, applicantur talia, quæ blande roborant, & nimiam vasorum dilatationem coercerent. Sed & simul hæc emollientia anodyna sunt, ob rationes dictas in Commentariis §. 450. si autem pro parte jam separatis crustis gangrænosis vasa viva nuda incipiant nimis attolli, mastiches pulvis inspersus his locis facile hoc tollet; dum interim eadem emollientia reliquis plagæ partibus imponuntur. Rara detectio loci affecti quam maxime proderit, uti §. 451. dictum fuit. Omnia autem spiritiosa, ut alcohol vini, spiritus vini Camphoratus, Theriacalis &c. putredinem quidem prohibent, sed curam retardant, dum fluida coagulant, & fibras solidas faciunt rigidissimas; adeoque difficilius separabitur mortuum à vivis, cum solidarum partium per hæc augeatur cohesio. Idem continget, si acribus lixivis, salis marini, ammoniaci &c. pars Gangrænosa continuo foveatur: notum enim est quotidiano experimento, carnes animalium, muriæ immerfas, indurescere. Sufficiens ergo modo dicta. Sed & quiescere pars debet, ut melius in situ maneat apparatus; atque etiam, ne mota parte pulposa illa & mollia vasa atterantur ad Gangrænosas escharas, sicque destruantur. Reliqua autem quæ requiruntur ad integram curationem Gangrænæ, postquam omni mortuo separato purus factus est locus, intelliguntur facile ex illis, quæ dicta sunt in Commentariis §. 411. ubi de curatione ulceris aperti agebatur.

§. 454. **S**I ab impactu acri Gelu gangræna (427. N<sup>o</sup>. 6.), pars nive imposita, vel impositis linteis aqua gelida humectatis, operienda erit, donec, spiculis frigoris in nivem vel aquam receptis, iterum solvi incipiat, redeunte vita.

(a) A. Corn. Celsi Medic. Lib. V. cap. 26. n<sup>o</sup>. 34. pag. 304.



Absoluta jam foret Gangrænæ curatio, quæ in omnibus casibus locum haberet, nisi observaretur quædam Gangrænæ species, quæ à frigore ingenti nascitur (vide §. 422. 3.). Hujus Gangrænæ signa diagnostica enumerata fuerunt §. 427. n°. 6. Si autem cura hujus Gangrænæ tentaretur methodo hætenus descripta, pars affecta cito & certo ad ossa usque Sphacelo corrumpetur, & de corpore decideret; uti in borealibus regionibus, & etiam in his, tristibus exemplis toties constitit, dum acerrima sæviebat hyems. Omni ergo cura hæc Gangræna à reliquis distinguenda erit: quod facile heri poterit, si ad causam prægressam, & signa præsentis hujus gangrænæ attendatur.

Frigus meram tantum caloris privationem esse, voluerunt Scholæ; adeoque à frigore orta mala calore applicato curari posse crediderunt multi. Sed si considerentur frigoris effectus, videtur illud non esse privationem simpliciter, sed potius Ens physicum distinctissimum ab omni alio. Helmontius, qui ubique in Scholas acerrime invehitur, dicit, quod dum vir juvenis descenderet mane ex Alpibus perpetua nive testis, tamen in illo cervicis latere, quod solem respiciebat, vesicas ambustis similes habuerit. Unde conclusit; in eodem loco, tempore, & subjecto (aere nempe) hætere tantum calorem, qui cutim in vesicas attolleret; simulque tale frigus, quod impediret nivis solutionem per calorem solis; adeoque poterat & frigus & calor simul existere, licet se mutuo non destruerent; hinc voluit patere, frigus non esse caloris privativam absentiæ, sed Ens verum (a). Si considerentur illa, quæ in congelationibus liquorum artificialibus contingunt, apparet, frigus habere satis mirabiles proprietates, & transire posse ex uno corpore in aliud; sicque posse augeri immaniter, dum frigidissimo v. g. jam corpori novum continuo conciliatur frigoris augmentum. Unde acutissimus Philosophus *Reaumur*, cui tot & tanta inventa debentur, comparavit hanc frigoris proprietatem ignis adeo notæ virtuti, qua à minima etiam scintillula, materia inflammabili excepta, summus ignis excitari potest. Verum uti requiritur ignis actualis ad producendum novum ignem hoc modo, sic etiam glacies semel facta novam glaciem producere valet (b), & admistis quibusdam salibus &c. frigus glaciæ augeri potest quam maxime, etiam media æstate. Aqua certo frigoris gradu fluiditatem suam amittit, & in corpus solidum mutatur, tuncque glacies dicitur: & adest in hac glacie aliquid, quod inde exire potest, & corporibus contiguis solidis liquidisque insinuari. Si enim v. g. glacies, illum frigoris gradum habens tantum, qui requiritur, ut non diffuat in aquam, misceatur sali marino, augetur frigus: & uti docuerunt observata, illud frigoris augmentum tantum sit, quando glacies incipit deliquescere (c): si tunc huic miscelæ ex glacie & sale marino immergatur vasculum aquam continens, illa in glaciem mutabitur multo frigidior ad thermometrum, quam erat prior illa glacies, cujus miscela cum sale marino frigoris illud augmentum factum fuerat. Sicque reperitis vicibus glaciem sic factam cum sale marino miscendo poterit frigoris gradus augeri immaniter; uti pulcherrimis experimentis in *Artis Parisinis* loco modo citato constitit. Hæc autem frigoris proprietates cognitæ forte

(a) Helmont. *Ortus Medicin.* in Capit. *Natura contrariorum* nescia pag. 135. n°. 23. 24.

(b) *Academ. des Sciences* l'an. 1734. *Mémoires* pag. 223.

(c) *Ibid.* 252.

aliquam lucem affundere poterunt illis, quæ observantur fieri in partibus corporis humani acerrimo frigori expositis. Calor corporis nostri, dum sani sumus, etiam in summo æstatis fervore, superat aeris ambientis calorem: unde patet, requiri acerrimum frigus, antequam possint partes corporis nostri gelu rigescere: cum autem, cæteris paribus, calor minor sit in extremis partibus corporis, quia celeritas sanguinis per vasa moti minuitur in maxima a corde distantia; ideo frigoris aeris ambientis effectus in pedum manuumque digitis, nasi apice, & auriculis præcipue observantur. Cum autem gelu aquam prius fluidam convertat in rigida spicula; pari ratione & humores nostri, qui maximam copiam aquæ in se habent, afficientur. Omnis ergo influxus & effluxus humorum per vasa cessabit, cum fluidi naturam amittant congelati humores; ergo aderit Gangrena: uti patet ex ejus definitione data §. 419. Cum autem in minimis tunc & tenerrimis vasculis congelata illa spicula hæreant, facile patet, si hæc moveantur calore subito applicato, frictionibus &c. debere destrui omnia. Si enim supponatur, pro parte resolutis his spiculis, motum redire circulatorium in parte; necessario omne illud, quod nondum in fluorem conversum est, ilico hærebit circa vasorum angustias: cumque impetus liquidi vitalis a tergo urgentis in hæc obstacula agat, rigidis & acutis his moleculis vasorum cohesio debebit destrui citissime; adeoque brevi fiet immedicabile malum: nihilque supererit, præter corrupti & mortui à vivis partibus separationem. An non augentur hæc mala, quia salinæ liquidorum nostrorum moleculæ, per congelationem, excutuntur, & in majores massulas concresecunt; quæ motæ antequam iterum in fluidis solutæ fuerint, rigiditate suæ molis & figura pariter nocere possent? saltem hoc experimenta docent, aquam sale gravidam non nisi majore frigoris gradu congelascere; & antequam congeletur, saltem inde excuti & in fundo colligi.

Docuerunt jam observationes, in frigidissimis regionibus satis frequentia hæc mala felicissime sanari, si partibus congelatis applicetur aqua frigidissima, congelationi proxima: tunc enim causa illa physica, quæ in partibus congelatis fluida fecerat converti in rigidam glaciem, inde educitur, & aquam proxime parti contiguam congelat. Hoc modo liquidis pristina redit fluiditas; quibus per cardiaca stimulantia, frictiones &c. tunc tuto conciliatur motus. *Hjidanus* sic refert (a) septentrionalium plagarum incolæ, dum vesperi domum redeunt, prius nive perfrigare manus, extremum nasum, & auriculas, antequam ad ignem accedunt, vel vaporarium ingrediuntur. Imo ex relatione viri fide dignissimi narrat, quod viator, qui in itinere frigore obriguerat, cum quasi mortuus ad diversorium deduceretur, hospes illum demerserit ilico in frigidam aquam, quo facto, undequaque spicula glacialia exiverunt, sic ut totum corpus glaciali tali crusta tectum undique conspiceretur. Postea exhibito ampliore cyatho hydromelitæ cum pulvere cinamomi, macis & Cariophyllorum in lecto sudor provocatus est; sicque convaluit, amissis tamen manuum & pedum extremis articulis.

§. 455. **A**LITER enim caloris applicatu pars putrescit, æolis, nec eductis spiculis.

(a) De Gangræna & Sphacelo cap. 13. pag. 791.

Dum enim, nondum educta illa causa [physica, quæ congelationem fecit, conciliatur motus per calorem externum spiculis illis glacialibus, destruuntur tenerrima vasorum omnium stamina; uti statim dictum fuit. Pulchre hoc apparet in pomis congelatis: si enim illa igni admoveantur, ut regelascant, omnem saporem perdunt, & in mollem pulpam conversa corrumpuntur brevi. Si autem frigidissimæ aquæ, & tantum non congelatæ immergantur, pulchro spectaculo crusta glacialis undique hæc poma tegere incipit; qua decidua, iterum aquæ simili immergantur; illudque repetitur, donec nulla amplius glacies ex pomis his prodire deprehendatur: deinde deterga & siccata pristinum saporem retinent, & diu servari possunt. Idem fit & in corporis humani partibus, summo gelu constrictis, si imprudenter calori exponantur, antequam glacialia illa spicula nivis vel aquæ gelidæ applicatione educta fuerint: corruptæ enim vero sphacelo tales partes decidunt. Videtur jam hoc monuisse Hippocrates (a) dum dicit: *Verum & pedes perfrigerati deciderunt ex calida affusione.*

§. 456. **E**O autem peracto (454.), calidis refocillandus cardiacis, & in sudorem usque calefaciendus æger est.

Postquam eductis glacialibus illis spiculis nullus metus est, ne excitato motu partes destruantur, tuto dantur talia, quæ & in parte affecta, & in toto corpore majorem paulo excitant motum, & æquabilem calorem diffundunt per omnia. Sic enim expeditissima iterum redibit humorum circumductio per illas partes, in quibus paulo ante mera stagnatio & quies aderant. Unde lenes frictiones tunc commendat Hildanus (b), deinde fomenta ex lacte dulci decocto cum foliis lauri, rosmarini, salviæ, lavendulæ &c. applicari voluit, & postea in lectum composito ægro calida sudorifera propinavit; fomentis interim illis continuo applicatis ad partes affectas, ut sic determinatio excitati motus per remedia interna potissimum versus has partes fieret. In Materia Medica formulæ talium remediorum habentur. Solum certe ligni sassaphras infusum, vili pretio parabile, potatum larga copia profuisse vidi sæpius in pauperibus, qui, rigidissima hyeme prægressa, in hæc inciderant infortunia,



## S P H A C E L U S.

§. 457. **S**I gangræna jam in sphacelum conversa, infectum auferendum.

Quid Sphacelus sit, dictum fuit in Commentariis §. 420. ejusque præsentis signa enumerata fuerunt §. 429. patuitque ex illis, nihil aliud tentari posse,

(a) De Liquidorum usu cap. 1. Charter. Tom. VI. pag. 444.

(b) De Gangræna & Sphacelo cap. XIII. pag. 793.

quam

quam ut auferatur illud, quod Sphacelo corruptum fuerit. In Gangræna incipiente adhuc aliqua spes erat, felici correctione posse superari malum, si subito efficacissima adhiberentur auxilia (vide §. 441.); ubi autem ad ossa usque omnia emortua sunt in Sphacelo, nunquam poterit redire in has partes vita; adeoque unica tantum indicatio curatoria superest, nempe ut mortuum natura, vel arte, à vivis separaretur. Mira historia, in Commentariis §. 429. n°. 4. enarrata, de anu illa, quæ crus Sphacelo affectum per plures menses gessit spiritu terebinthinæ conditum, docet quidem, in exsucco tali corpore potuisse caveri putredinem sic in parte mortua, sed tamen hæc non erat Sphaceli curatio, quæ semper separationem omnimodam mortui à vivis partibus requirit. Quin imo in loco ibidem citato habetur, quod etiam in decrepita hac ætate natura separationem mortui à vivis partibus molita fuerit. Postquam enim per quinque integros menses lecto affixa fuerat, sponte notabilis fissura apparuit in confinio mortui & vivi; perfectam tamen separationem corruptæ partis in ultimo illo senio nullus expectare poterat, & mors brevi post secuta fuit. In sanis tamen, & in flore ætatis constitutis, hominibus sponte separatas cecidisse partes Sphacelo infectas, constitit observatis certissimis, in loco modo citato; uti etiam in Commentariis §. 432. enarratis. Naturæ ergo ductum sequuntur Medici & Chirurgi, dum sphacelatas partes tollunt, & quidem quam ocyslime, si talis conditio agri fuerit, ut & ferre possit illa, quæ ad hanc ablationem requiruntur; & spes sit illum superstitem esse posse, postquam hæc facta fuerint. Licet enim in raris casibus sponte ceciderint partes corporis Sphacelo corruptæ, tamen longe frequentius solet proserpere hoc malum, & vicina viva depalcere; adeoque tutius & melius videtur, ilico rescindere mortuum, ne partes sinceræ trahantur. Ubi vero Sphacelus non progreditur amplius, tunc sine periculo licet expectare per aliquot dies salutaria hæc naturæ vincentis molimina; modo interim antisepticiis remediis partes condiantur, & ab omni putredine serventur. Præcipue, si talis fuerit partis affectæ conditio, ut non multum damni sequeretur, licet aliquem adhuc progressum Sphacelus faceret. Uti v. g. si pedis inferiora sphacelata essent, nili citissime ascendat sphacelus, sine periculo expectari hic potest sæpe per aliquot dies, cum exstirpatio in hac parte sub genu semper fieri debeat; uti postea dicetur in Commentariis §. 468.

§. 458. **Q**UÆ ablatio diversa, prout pars vel tota, vel pro parte affecta, vel prout tota tolli non potest ob situm; ut nates &c.

Cum in ablatione infecti, uti postea dicetur §. 467. sanum quam maxime conservandum, omneque corruptum tamen integre auferendum sit, patet facile, magnam hic diversitatem occurrere in curatione, si membrum aliquod, brachium v. g. integre corruptum fuerit, vel tantum pro parte. Præterea exstirpatio proprie dicta, qua tota pars affecta tollitur, locum tantum habet in extremis corporis, non autem in aliis locis. Unde v. g. dum à decubitu diuturno in morbis omnia circa os sacrum & coccygis vero Sphacelo corrumpuntur, facile patet, situm harum partium non permittere, ut rescindantur omnia mortua una cum

A a a a

ossibus, sæpe tunc etiam affectis. Idem verum est, si ab eadem causa, circa prominentes vertebrarum spinas, scapularum eminentias, ossium femoris trochanteres majores &c. simile malum oriatur.

§. 459. **S**I ergo pars non usque in fundum corrupta, aut exstirpari nequit, conamur: 1. progressum impedire. 2. corruptum auferre.

Accidit aliquando, ut, panniculo adiposo ad enormem crassitiem distento & gangrænosus facto, omnia ad ossa usque omnino emortua credantur, licet tamen aliquid vitale in subjectis partibus sæpe supersit, quod incunibente hoc mortuo liberatum vitam redintegrat in membro, quod exstirpandum credebatur. Mirabilis talis casus in Commentariis §. 338. memoratus fuit, qui hoc confirmat. Licet enim, post validam contusionem anterioris partis cubiti, tota manus pallida & frigida esset, & scarificationibus etiam profundis nullus perciperetur dolor; imo per manum transfusa lanceola ne guttula quidem sanguinis exiret, tamen sensim calor & vita redierunt in hanc partem, quæ penitus mortua videbatur. Decumbebat in Nosocomio ante multos annos mulier, quæ pessimam necrolim à decubitu circa os sacrum habebat, sic ut non tantum integumenta corrupta forent, verum etiam ipsius ossis sacri satis magna superficies nigresceret: cum jam fere desperaret de sanatione tanti mali *Celeberrimus Boerhaavius*, qui ejus curam habebat, inceperunt lamellæ corruptæ ab osse sacro separari, & vivum os suppositum vasis emissis retexit novum periosteum, sicque ad cicatricem perductum fuit tam grave malum. Ubi ergo aliqua adhuc spes superest, nondum omnia penitus corrupta esse; vel conditio loci exstirpationem mortuæ partis vetat, tunc binæ oriuntur indicationes: impedire nempe, ne mortuum vicinas partes vivas inficiat, & progrediatur; & deinde separare omne illud quod corruptum erat.

§. 460. **P**ROGRESSUS tollitur, si communicatio mortui cum vivo aufertur.

In parte sic mortua omnes humores quiescunt in vasis suis, vel his ruptis effusi stagnant. Quamdiu autem inter mortuum & vivum cohesio manet, liquida allata per vasa adhuc viva sistentur illo in loco, ubi sphacelus incipit; adeoque & suffocabitur motus in parte viva in vicinia mortui, sicque propagabitur malum. Neque poterit hoc impediri, nisi tollatur vivi cohesio cum mortuo: quod simul ac factum est vel natura vel arte, per vasa viva abrupta exhibunt humores, extrema vasorum soluta retrahentur, rima fiet mortuum à vivo separans, neque tunc amplius proserpet Sphacelus, licet etiam plurimæ concurrant causæ, quæ Sphaceli propagationi quam maxime favent. Docuit hoc sequens casus, satis singularis. Miles, furti reus, ut supplicium evitaret, ex castelli muris præcipitem se dedit, pedesque sic rupibus impegit, ut non tantum illos luxaverit, verum etiam binas fracturas habuerit cum vulnere. Cum pauci tantum milites adessent, nullus erat in hoc loco Chirurgus; unde miser ille



sine ullo auxilio artis per quatuor menses jacuit, stramini incumbens, & solo pane & aqua vivens. Non mirum ergo, quod Gangræna & dein Sphacelus utrumque pedem occupaverit. In calamitosissimo hoc statu tamen separatio mortui à vivis partibus facta fuit in utroque pede paulo supra malleolos, & circa hunc locum partes vivæ tumentes protuberantem formabant annulum, qui sic coercuit Sphacelum, ut nullo modo proterpserit amplius, licet omne illud, quod his annulis supponebatur, teterrima putredo depasceret, quæ talem mephitim spirabat calidissima anni tempestate, ut totum castellum inficeret, unde cogebantur illum ad Nosocomium proximæ urbis deferre. Resecuerat miser homo cultello, quem habebat, sibi ipsi dextrum pedem, circa articulum tibiæ cum tarfi ossibus, sine ullo dolore, aut hæmorrhagia; atque dum ad Nosocomium transportabatur, magna pars sinistri pedis defluerat: & licet in itinere intolerabilem fætores spargeret, ubicumque transiret, instar putridissimi cadaveris, limites tamen per separationem vivi a mortuo à natura positos nunquam transgressus est Sphacelus. Cumque tibiæ & fibulæ extrema nuda omnino corrupta forent, utriusque cruris extirpatio facta fuit, & postea satis brevi tempore convaluit (a). Patet ergo, Sphaceli progressum tolli, si communicatio mortui cum vivo auferatur.

§. 461. **I**D fit, si in vicinia sani & mali limes ponitur secando, urendo, rodendo; isque undequaque satis profundus.

Ars naturam imitando conatur tunc limitem talem ponere, quo impediatur mortui progressus & communicatio cum vivis partibus. Sed nunquam hoc poterit fieri tam accurate per artem, ac quidem à natura factum observatur, quæ omne mortuum perfectissime à sanis & vivis partibus secedere facit, interimque omne vivum servat illibatum. Ubi enim cultro, igne vel erodentibus hoc fit, semper relinquitur pars mortui, vel destruuntur viva simul. Probatum enim fuit in Commentariis §. 444. sola vitalis liquidi, ad fines corrupti ruentis, efficacia solvi nexus illos, quibus mortua cohærent vivis, & deinde blanda suppuratione separari undique hæc, & excidere. Quam proxime autem ad partes vivas, sed in mortuis tamen, convenit igne vel cultro limitem illum ponere: Cum enim in hoc casu omnia nondum in fundum usque corrupta supponantur, vel talis partis affectæ conditio fuerit, ut integre tolli nequeat; crudele foret vivas partes sic destruere, atque inde summi dolores, inflammationes &c. nascerentur, imprimis cum in Sphacelo satis profunde hæc penetrare debeant. Verum quidem est, quod sic pars mortui vivis affixa relinquitur: sed tamen omne illud corruptum, quod pone hunc limitem hæret, non amplius putrido contagio nocebit sanis partibus, & pauculum illud mortui relictum sic condiri poterit antisepticiis remediis, ut omnis putredo caveatur. Dumque in omni ambitu loci, Sphacelo infecti, talis limes per artem fit, & profundis scarificationibus dividitur reliqua superficies, longe profundius penetrabunt applicata remedia; adeoque nullus putredinis metus supererit, tutoque expectari poterit separatio perfecta mortui à vivis partibus, quæ soli naturæ debetur. Potest jam secando talis limes poni, vel & ferro ignito; uti

(a) Belloste Chirurgien d'Hôpital partie 3. Chapit. XV. pag. 262. &c.

etiam causticis illis liquoribus, qui uno momento destruunt omnia, quæ attingunt. Solutionem meracissimam argenti vivi in aqua forti factam laudavit *Belloste* (vide *Commentaria* §. 444.). Butyrum antimonii præferunt alii; imprimis si rectificatione tenue instar aquæ & lymphidum redditum fuerit; tunc enim poterit hoc liquido acerrimo, penicilli ope, pro lubitu in omni ambitu Sphaceli talis limites circumscribi. Imprimis autem laudatur in his casibus illud remedium, quia constat salis marini spiritu concentratissimo, parti regulinæ antimonii unito: spiritus autem salis marini incomparabile ad omnem putredinem coercendam & corrigendam remedium est; unde tam pulchrum usum in sanandis gingivarum Gangrænis habet, uti in Gangrænæ curatione dictum fuit. Verum, uti jam sæpius monitum fuit, per hæc non fiet separatio mortuorum à vivis, sed tantum inter sanam partem & Sphacelum interponitur limbus, qui & ipse mortuus est, & separari postea debet; atque interim tamen communicationem vivi cum mortuo tollit. Pulcherrime certe erodentium medicamentorum vires notavit *Celsus* (a), dum de carbunculi curatione agit, dicens: *sequitur enim sub medicamentis erodentibus crusta: quæ undique à viva carne diducta, trahit secum, quicquid corruptum erat &c.* Optime enim notat, mortuam talem crustam nasci quidem ab erodentibus, sed illam tamen postea à vivis partibus separari: hæc separatio ergo non ab erodentium vi pendet, quæ jam dudum evanuit, antequam illa fiat.

§. 462. **I**NFECTUM separatur, si, impedito progressu (461.) prius, vel simul dum id fit, tota pars usque in fundum sanum uritur, secatur, dein acri lixivio calide applicato eroditur, donec in escharas, assiduo emolliendas (403.), & tollendas, usque ad viva consumatur, eximatur. Vitæ summa cum cura vivis.

Cum Sphacelus tunc adesse dicatur, quando ad ossa usque omnia mortua sunt (vide §. 420.), debebunt omnia hæc corrupta auferri quam ocyssime, ne illud, quod in osse vel periosteo adhuc vivum mansit, suffocent, vel putredine corrumpant. Sed Sphacelo affectæ partes mortuæ sunt, neque magis afficiuntur à remediis applicatis, quam cadaver; unde vel secando, vel urendo, hæc tolli debent; vel talibus erodentibus, quæ per calorem externum actiosa fieri possunt etiam in cadavere. Docuit enim *Petitus* (b), cauterium potentiale Chirurgorum, cadaveri applicatum, vix ullum effectum fecisse, licet per quindecim horas cuti contiguum mansisset, & disfluxisset; uti semper solet, quando aëri exponitur. Ubi vero linteis calidis applicatis continuo fovisset locum cadaveris, cui cauterium potentiale applicabatur, post quindecim horas invenit cutim pultis instar mollem redditam fuisse, atque vim remedii per cutim ad pinguedinem penetrasse. Summo ergo cum fructu ad tollendas partes illas mortuas poterit applicari vulgare illud cauterium Chirurgorum potentiale, quod ex lixivio calcis vivæ & cinerum clavellatorum inspissato fit; vel & ipsum illud lixivium adhiberi posset: & si vicinarum partium vivarum calor non sufficiat, externus calor adhibeatur: sic

(a) Lib. V. cap. 28. n°. 1. pag. 36.

(b) Académ. des Sciences l'an 1733. Mémoires, pag. 315.

parvo temporis spatio partes mortuæ in escharas convertuntur, quæ, mollissimi unguenti vel butyri applicatione emollitæ, commode tolli possunt; & deinde idem remedium iterum applicetur eodem modo, donec omne illud mortuum sic consumptum fuerit ad viva usque. Quia autem in omni Sphacelo semper putredinis metus est, viderentur acida corrosiva potius convenire, quam lixivium illud ex calce viva & sale alcalino paratum, quod sales nostrorum humorum illico volatiles alcalinos reddit & putridos. Sed si consideretur, sphacelum ad ossa usque penetrare, atque acida, imprimis acerrima illa, ossibus semper nocere, facile patet, quare acidis hic potius abstinendum sit: sic dentes Agyrtæ solent spiritu vitrioli attingere, & statim dealbare, sed post aliquot septimanas incipiunt flavescere, tandemque nigrescunt, & frustillatim excidunt, vitali horum fabrica destructa per acidum illud vitrioli. Unde ad limitem ponendum inter mortuum & partes vivas præfertur acidum illud salis marini concentratissimum, quod in antimonii butyro adest. Ut autem illud mortuum citissime in escharas convertatur & separetur, conducet potius lixivium illud acerrimum alcalinum. Ubi autem, partibus mollibus sic contumtis, in osse ipso aliquod vitium apparet, quod ex matato ejus colore facile patet; tunc illa oportet adhibere, quæ in vulneribus capitatis laudata fuerunt; quando nempe ipsum calvariæ os male affectum erat. Vide §. 249. 250. 251. 252. 253.

Cum autem omnia hæc remedia acerrima sint, & momento temporis fere destruant partes, quas attingunt, patet, summa cautela opus esse, ne una cum mortuis destruantur & viva. Et quia in vero Sphacelo nihil vitalis sæpe superest præter ossa & periosteum ipsis incumbens; imprudenti similium applicatione possent & hæc lædi, unde postea difficillime curationis tardia nascerentur; cum corruptarum in osse partium separatio sæpe satis multum temporis requirat, uti postea in Capitulo *de morbis ossium* latius dicitur. Præterea, dum in profundum usque penetrant hæc remedia, tendines, nervi, & membranæ tendinosæ vicinæ adhuc vivæ his lædi & irritari, hincque iterum pessima mala fieri possent, uti dictum fuit §. 163.

Præterea notandum est, hanc erosionem per corrosiva non requiri, nisi magna sit crassities partium mortuarum, aliter enim tuto sine his cura perficitur. Sic dum a decubitu circa os sacrum & coccygis Sphacelus factus fuit, solent partes mortuæ nigrescere, & instar corii siccissimi arefcunt; cumque nulla hic panniculi adiposi crassities sit, vix possent hæc applicari sine periculo læsionis ossis suppositi. Dum autem in tali casu subinde vino aceto & sale foveantur partes, & deinde simplici plumbato Emplastro teguntur, morbike impetu remisso corporis situm sæpius mutant ægri, & fæces & urinam retinent, quibus antea conspurcabantur hæc loca; sponte separatur omne mortuum, & felicissime cura perficitur; uti sæpius vidi, & in Commentariis §. 444. dictum fuit.

§. 463. **U**BI dein sanitatis & vitæ indicia redeunt, curandum ut ulcus, vulnusve.

Ubi abolitus est influxus vitalis humoris in arterias, ejusdemque effluxus per venas, tunc mors partis adesse dicitur (vide §. 419.): signa ergo redeuntis vitæ.

A a a a a iij

erunt illa, quæ docent, humores iterum influere per arterias, effluere per venas, id est, circuitum liquidorum restitutum esse, vel saltem incipere restitui. Sed hoc nunquam fiet in illis partibus, quæ vero Sphacelo corruptæ sunt, sed tantum in suppositis vel ambientibus. Si ergo vel scarificando, vel erodendo, pars mortui & corrupti ablata fuerit, vel divisa ad confinia vivorum usque, simulac vita suppositarum partium incipit prævalere, humescent rimæ illæ, quæ antea siccissimæ fuerant, & in omni ambitu sensim secedet mortuum à vivo; uti dictum fuit latius in Commentariis §. 452. Nullus tunc amplius metus est, ne Sphacelus proserpat, sed considerari potest, ut ulcus sordidum, quod post depurationem corruptarum partium per benignam suppurationem ad conditiones puri vulneris deducetur, adeoque & similem curationem requireret. Notandum tamen, postquam purus fuerit talis locus, mollissima imprimis balsama prodesse, ut, quantum fieri possit, restituatur jactura perditæ substantiæ: de qua re vide §. 190. & sequentes.

§. 464. **S**I vero pars extrema in os usque sphacelata tolli potest, salva vita, una cum osse ipso exstirpanda erit; quia nudum vas nutriti nequit, neque vivere potest.

Methodus modo explicata tantum locum habet in illis corporis locis, in quibus pars affecta integre tolli nequit; vel ubi nondum omnia penitus corrupta sunt. Verum ubi in parte extrema corporis ad os usque omnia emortua sunt, nihil aliud superest, uti dictum fuit in Commentariis §. 432. ex *Celfo*, *quam miserum illud, sed unicum auxilium, ut cætera pars corporis tuta sit, membrum, quod paulatim emoritur, abscindere.* Si enim, verbi gratia, brachium sphacelatum fuerit ad ossa usque, quid prodesset acri lixivio corruptas carnes erodere, & tollere, donec ossa nudarentur undique, cum eadem hæc ossa, omnibus incumbentibus orbata, mori debeant, & nullus sit postea talis membri usus? Ubi autem à decubitu, corruptis omnibus incumbentibus, os sacrum vel coccygis nudatur, alia res est: tunc enim exterior superficies tantum nuda est; reliqua vero horum ossium pars à partibus lateralibus & suppositis vivis per vasa humores recipit; unde facile vita sustineri poterit in his ossibus, imo & corruptum quid si fuerit in ipsa horum ossium substantia, separari poterit; & restitui illud, quod sic perierat. Quamvis autem raris quibusdam casibus constiterit, sponte sua cecidisse partes sphacelatas aliquando, & naturam solam, sine ullo etiam artis auxilio, curam perfecisse, tamen inde concludi nequit, exstirpationem non requiri, ubi sphacelus extrema occupat. Generalis enim hæc regula obtinet, sanas partes quam maxime conservandas esse: sed sphacelus sibi relictus proserpit, & vicina depascitur; imo, antequam sponte sistatur, sæpe tam alte ascendit, ut exstirpatio non nisi summo cum periculo fieri possit, quæ antea longe tutius instituta fuisset. Videantur illa quæ dicta sunt in Commentariis §. 432. ubi agebatur de axioma illo practico, quod sphacelum ilico exstirpandum esse concludebat: ibi enim pluribus de hac re actum fuit.

Serio tamen examinari debet prius, an quidem spes sit, salva vita exstirpationem partis sphacelatæ institui posse. Si enim à latente causa interna ortum duxerit

sphacelus, citoque progrediatur, æger debilis sit, vel provectæ admodum ætatis; satis patet, nihil sperandum esse ab extirpatione, quæ tunc plerumque & arti, & artifice, vituperio esse solet. Et si ullibi, certe in hoc casu, locum habet regula *Celsi* (a): quod nempe sit *prudens hominis eum, qui servari non potest, non attingere, nec subire speciem ejus, ut occisi, quem fors ipsius interemit*. Nunquam quidem caret periculo extirpatio extremæ partis corporis, licet & in sanissimo cæteroquin homine, & a dexterrimo fiat artifice. *Verum hic quoque nihil interest, an satis tutum præsidium sit, quod unicum est*. Uti optime dixit *Celsus* de membrorum Gangræna corruptorum extirpatione agens (b). Hoc saltem requiritur, ut non instituatur, nisi certo constiterit, spem aliquam superesse felicitis eventus.

S. 465. **I**LLA extirpatio in digitis, metacarpo, vel metatarso, cuneo peragitur, & malleo.

In his enim locis ossa extirpanda satis tenuia sunt, & possunt facile sic uno ictu abscindi; solus metus est, ne, dum valido ictu cuneus sic adigitur, ossa findantur, & postea inde difficillima curatio fiat. Vidi tamen, felicissime curam successisse, dum hac methodo extirpabatur in muliere pedis sinistri major digitus, per medium secundæ phalangæ adacto cuneo. Sed imponebatur digitus extirpandus mollissimo ligno, deinde cuneus acutissimus & fortissimus imponebatur, & mallei plumbei unico ictu transadigebatur. Crederem, satis tutam esse hanc operationem, si talibus cum cautelis fiat: ictus enim, quantumvis etiam validi, vehementia suffocatur ilico, dum superius agit minime elasticum plumbum, inferius mollissimum lignum resistit; unde non videtur ossis discissi fissura adeo metuenda esse. Dum vero forcipibus incisoriis, licet acutissimis (c), abscindebant digitos Chirurgi, majus erat fissuræ in ossæ periculum: non potest enim hoc fieri nisi validissima pressione, quæ non simul & semel, sed magis successiva actione hoc perficit. Plurimis tamen, & quidem magni nominis Chirurgis, in usu fuit, potius acutissimo cultello rescindere in articulatione phalangerum digitorum ligamenta & reliqua incumbencia, sicque sine ossis ulla læsione extirpare partem corruptam. Sic *Dionysius* (d) hanc methodum præ cæteris adhibuit, uti etiam *Garengeot* (e), qui cautelas in hac operatione observandas addidit. *Hildanus* (f) pariter extirpatione digitorum tenaculis incisoriis, aut cuneo & malleo, factam damnavit. Satis certe simplex hæc operatio est, si digitus sic extirpetur: ubi vero una cum digito os metatarsi, vel metacarpi, quod ipsum sustinet, tolli debet, vel ubi integer digitus in articulatione sua cum ossæ metatarsi vel metacarpi abscindendus est, parum magis composita est. Tunc enim partes carneæ laterales etiam discindi debent, uti facile patet. Hoc ergo unico scalpelli ictu minime perfici posset, & ob hanc rem *Hildanus* descripsit scalprum, vel potius cuneum alatum acutissimum, cujus ope unica sectione posset tolli integer digitus,

(a) Lib. V. cap. 26. n°. 1. pag. 283.

(b) Lib. VII. cap. 33 pag. 497.

(c) Schultet. Armament. Chirurg. pag. 45.

(d) Cours d'Opérations de Chirurgie. Démonstrat. huitième pag. 498.

(e) Opérations de Chirurgie Tom. III. pag. 430.

(f) De Gangræna & Sphacelo cap. 16. pag. 800.



vel & simul ipsius metacarpi vel metatarsi ossis pars. Figuram illius instrumenti dedit in eodem loco (a) Scriniarii similia scalpra sed minora, ad cavata opera perficienda adhibent.

§. 466. **I**N majoribus vero, ut femore, crure, humero, brachio, eget operosiore molimine, quod intelligitur ex sequentibus.

Facile apparet, quo majora fuerint ossa partis extirpandæ, eo magis metuedam esse horum filuram, si cuneo & malleo hæc operatio perficeretur; unde in majoribus membris alia longe methodus requiritur. Docuerunt etiam observata, pessima symptomata secuta fuisse, dum rudi tali operatione tollebantur majores corporis partes. Sic apud *Hildanum* (b) habetur, quod, cum juveni cuidam, dissiliente bombarda, manus sinistra perfracta fuisset, barbitonsor, manu scamno imposita, securim, qua rustici ligna findere solebant, applicuerit illi loco, in quo extirpatio fieri debebat; deinde jusserit cuidam ex adstantibus, ut fortissimo ponderosi satis mallei lignei ictu securim percuteret: unico sic momento manus abscissa fuit, sed statim gravissimi dolores & vigilæ, aliaque mala symptomata secuta sunt; unde quidem post longum temporis spatium evasit miser, sed tamen ob ossium comminutorum separationem tædiosa admodum cura fuit, cum vix ad cicatricem perducere potuerit locus. Alia adhuc methodus membra majora extirpandi, quæ etiam citissime perficiebatur, à *Leonardo Botallo* descripta fuit; & habetur etiam in *Microtechnie* *Johannis van Horne* (c), qui omnia Opera Medica & Chirurgica *Botalli* edidit, suisque annotationibus illustravit. Construebatur binæ columnæ ligneæ, ponderoso cippo infixæ, & utrimque per longitudinem interius sulcatæ. Cippo infixus erat firmiter latus culter, acie sua sursum spectans, & alterius cultri, per sulcum, columnis insculptum, mobilis, aciem sibi oppositam habens. Imponebatur membrum detruncandum cultro inferiori, qui cippo infixus erat, illo in loco, ubi extirpatio fieri debebat; tuncque superior culter plumbo oneratus magna vi per sulcos columnarum descendebat, aut gravi malleo percussus adigebatur, sicque momento temporis carnes una cum osse secabantur. Tunc parvo autem & momentaneo cum dolore extirpationem talem perfici voluerunt, ut ægri hanc passi ignis scintillulam in membrum incidisse crederent illo tempore, dum omnia simul & semel sic diffecarentur. Satis autem patet, ossa majora & cava non posse sic discindi, nisi cum periculo fissuræ in his ossibus; & uti optime notavit *Schelhammerus* (d) de hac re agens, quotidiana in culinis experimenta hoc docent. Dum enim lanii, vel coqui, animalium partes securi etiam acutissima, & magna vi adacta disciunt, ossa neutiquam ad perpendicularum franguntur, sed inæqualiter finduntur, vel in festucas dissiliunt. Unde evituit hæc methodus ab *Hildano* (e) & aliis præclari nominis Chirurgis improbata. In juniorum tamen membris extirpandis hanc methodum locum ha-

(a) Hildanus de Gangrena & Sphacelo. cap. 19. pag. 817.

(b) Ibid. pag. 800.

(c) Microtechnie Sect. I. §. 17. pag. 384.

(d) De humani Corporis tumoribus, parte secunda n. 56. pag. 11.

(e) De Gangrena & Sphacelo cap. 17. pag. 821.

bere posse innuit *Solingen* (a), quia in hac ætate molliora ossa non tam facile funderentur.

Quanam autem methodo, & quibus cum cautelis membrorum extirpatio tutissime perfici possit, dicetur sequentibus.

§. 467. **D**EFINITUR locus, ubi extirpatio instituenda, ex hisce :

1. Sanum maxime conservandum.
2. Corruptum accuratissime simul & semel tollendum.
3. Usus commodissimus parti superstici procurandus.

Postquam omnibus rite perpensis conclusum fuit, partem sphacelo corruptam extirpandam esse; tunc determinari debet, quonam in loco amputatio fieri debeat; hoc autem fiet ex arte, si attendatur ad sequentia.

1. Cum hæc operatio tantum instituat, ut mortuum tollatur, ne relictum vivis partibus noceat; patet satis, non plus tollendum esse, quam absoluta necessitas requirit.

2. Illud enim, quod relinquitur ex mortuo & corrupto, vivis partibus vicinis continuitate substantiæ unitur, adeoque facillime propagabitur malum etiam post extirpationem factam; cum tamen hæc instituta fuerat in hunc finem, ne proserpendo Sphacelus depasceret corpus. Præterea uti dictum fuit in Commentariis §. 461. mortuum illud relictum requireret continuam applicationem talium remediorum, quæ omni putredini resistunt; adeoque & frequentem apparatus renovationem. Sed post extirpationem peractam, ob Hæmorrhagiæ metum diutius relinqui debet apparatus, adeoque sæpe pessime putrescerent omnia, & proserperet sphacelus: unde vel repetenda foret hæc operatio, vel suo fato relinquendus æger; summa certe artis ignominia. Licet autem disputatum fuerit inter Chirurgos, an sectio in parte viva, vel in mortua, fieri deberet; tamen omnes consenserunt in eo, omne corruptum simul & semel esse tollendum: Illi enim, qui in parte mortua secabant, post extirpationem factam, cauteriis ignitis adurebant ilico mortuum relictum. An ergo non liceret unquam extirpare partem, nisi omne corruptum accuratissime simul & semel tolli posset? Sane in desperatissimis casibus certæ morti incertum sæpe præfertur remedium; & cum sine dolore & fere sine hæmorrhagia in parte mortua possit fieri extirpatio, videtur aliquando & hoc tentandum esse, si absolute fieri nequeat in parte viva.

Peritissimus Chirurgus, annoso artis usu firmus, cum successu felicissimo extirpationem instituit in tali casu, de quo omnes desperabant, & non sine ratione (b). Tristissimo infortunio navis Præfecti tota manus & brachium ad humerum usque misertime confusa, imo contrita fere fuerat. Rudis homo, luxationem humeri adesse credens, partem affectam validissimis tractionibus & contorsionibus vexaverat; unde post quatrimum, non suspicante tantum malum Chirurgus, qui ægri curam gerebat, totum brachium ad humerum usque verò sphacelo corruptum erat; quin imo malum jam ultra humeri articulum versus

(a) Manuale Operationen der Chirurgie 4. Decl. | rurgie Tom. III. Observ. CCCXI. pag. cap. 2. pag. 261. 408.

(b) De la Motte Traité complet de Chi-

pectus & collum extendebatur. In consilium vocatis pluribus Chirurgis, omnes concluderunt, certam mortem instare, extirpationem inutilem fore, adeoque suo fato relinquendum esse miserum hominem. Cum autem in flore ætatis esset æger, & intrepido animo, nulla febris adesset, brachiumque affectum cadaverosum foetorem jam spargeret, qui auctus continuo tandem ægro intolerabilis foret; neque signa instantis mortis adhuc adessent, solus *de la Motte* huic torrenti obniti aulus fuit, atque extirpationem faciendam persuasit; quæ, licet successu caruisset, saltem hoc efficeret, ut commodius ultimum illud vitæ suæ stadium transigeret æger, & tranquillius moreretur. Proxime ergo ad articulum humeri extirpatum fuit brachium, sine ulla hæmorrhagia, pauca tantum sanie subrubella ex carnibus dissectis exstillante. Et dein, idoneis remediis adhibitis, omne, quod relictum fuerat, mortuum secessit à partibus vivis; sic ut post quindecim dies elapso nihil corrupti superesset amplius, & bimestri spatio ex ipsis orci faucibus ereptus æger ad suos redire potuerit sanus.

3. Hæc regula limitat illam, quæ n°. 1. hujus paragraphi dicta fuit: nam quamvis sanum conservandum sit quam maxime, tamen, si prævideatur, truncæ partis usum commodiorem postea futurum, si plus tollatur de partibus vivis, quam requireretur, ut omne corruptum simul ac semel accuratissime auferatur; & hoc faciendum erit. Cum autem, uti statim dicitur, sectio in viva carne semper fieri debeat, non multum referret, an parum altius hæc facta fuerit.

§. 468. **E**RGO in cæteris sectio fiat in sano prope ægrum (ob 467. N°. 1. 2.); in crure autem sub genu semper (ob 467. N°. 3.).

Varia fuerunt circa hanc rem Auctorum sententiæ: quidam enim, doloris & Hæmorrhagiæ metu, in parte mortua sectionem instituendam volebant; alii è contra in parte sana & viva. Quamvis autem *Celsus* primus fuisse videatur, qui de hac operatione scripserit, tamen apud *Hippocratem* quædam inveniuntur, quæ videntur evincere, quod sectionem in parte mortua prætulit. Postquam enim dixerat (a) *quacumque circa digitorum articulos integre abscinduntur, plerumque nullam inferre noxam, nisi homo, dum secantur, animi defectione ladatur*, subjungit sequentia: *Integra autem abscissiones ossium, & circa articulos in pede, & in manu, & in crure nonnullis circa malleolos, & in brachio nonnullis circa carpos, plerumque citra noxam sunt, nisi protinus animi deliquium prosternat, aut quarta die febris continua superveniat*. Ut autem evitetur animi deliquium, dum membra detruncantur, paulo post monet, emortuas omnino partes, & nullum amplius dolorem sentientes, circa articulos præcidendas esse, cavendo, ne aliqua læsio fiat. Si enim doluerit, qui secatur, & nondum, qua secatur, emortuum corpus fuerit, maximum periculum est, ne à dolore anima deficiat: ejusmodi autem animæ defectiones plurimos repente sustulerunt. Videtur ergo ex modo allegatis constare, quod in mortua tantum parte extirpationem fieri voluerit *Hippocrates*; reliqui autem corrupti, quod adhuc vivis & sanis partibus coharebat, separationem soli naturæ commiserit, & quidem quod in articulis tunc separaverit partes

(a) Hippocrates de Articulis Charter. Tom. XII. pag. 446. 447.

mortuas. Statim enim modo allegatis subjungit sequentia : *At femoris os hoc modo nudatum, vidi octogesimo die abscedere : crus tamen huic homini vegeſimo die ad genu exciſum eſt &c.*

In parte ſana vero exſtirpationem faciendam deſcribit *Celfus* (a) ſequenti modo. *Igitur inter ſanam viciatamque partem incidenda ſcalpello caro uſque ad os eſt ſic, ut neque contra ipſum articulum id fiat, & potius ex ſana parte aliquid excidatur, quam ex agra relinquatur.* Apud *Galenum* non habetur exſtirpationis deſcriptio ; & apud *Æginetam* ſatis obſcura eſt ; tamen videtur in parte ſana illam deſcripiſſe, quia & nimium ſanguinis profluviū metuebat, & panniculum lineum partibus ſectis circumponebat, ne ſerra per illas tracta dolores pareret (b). Arabes dein, & poſtea plures alii Medici & Chirurgi ſectionem in parte mortua fieri voluerunt, & cauterio actuali conſumendas eſſe carnes corruptas, quæ adhuc vivis partibus cohærebant. Sed plurima incommoda habet illa methodus, quæ ſectio non in parte viva, ſed in mortua inſtituitur. Debet enim poſtea relictum mortuum comburi ad viva uſque, donec æger dolorem percipiat ; cruſta ſic naſcitur, quæ vivis partibus adhærens putridi exhalationem verſus exteriora impedit ; deinde debet omne illud combuſtum ſeparari à partibus vivis, quod non ſine magno & diuturno dolore ſolet fieri, uti dicitur in *Capitulo de Combutione*. Præterea, ſectione ſic in parte mortua facta, os ſerra dividitur : dum ergo poſtea adhuc notabilis pars carniū uſtione deſtruitur, os neceſſario ultra vulneris ſuperficiem prominebit multum, atque iterum illud omne, quod ſic eminet, ſerra debet tolli ; vel ſumma faciet longiſſimæ curationis tædia, ſic exſpectandum ſit, donec ſponte ſeparetur & excidat. Videntur autem Medici & Chirurgi tantum ideo ſectionem feciſſe in parte mortua, quia metuebant hæmorrhagiam & dolorem ; unde *Celfus* (c) monuit, exſtirpationem ſummo cum periculo fieri. *Nam ſape in ipſo opere, vel profuſione ſanguinis, vel anima defectione, moriuntur.* Cum autem hodiernis inventis poſſit impediri metuendum illud ſanguinis profluviū, dum tornatili ligatura (*Tourniquet*) magni arteriarum trunci comprimuntur ; eademque opera preſſis nervis ſtupor & inſenſibilitas in parte ſecunda oriantur ; patet evidenter, præferendam eſſe exſtirpationem, quæ in parte viva fit, proxime ad mortuam ; ut ſic omne corruptum ſimul & ſemel tollatur ; interimque ſervetur omne vivum, quantum fieri poſſit. Varias circa exſtirpationem artuum ſententias Auctorum collegit, & ordine chronologico diſpoſuit *Celeberrimus Petitus* (d), ſicque demonſtravit, quomodo ſucceſſive hæc Chirurgiæ pars ad illam, qua nunc colitur, perfectionem venerit.

Cum autem in definitione loci, ubi exſtirpatio fiet, ſimul ratio habenda ſit uſus commodiſſimi in parte ſuperſtite ; ideo in exſtirpatione cruris ſemper determinatur locus ſub genu, ad quatuor vel quinque digitorum diſtantiam ab articulo ; ſic enim hoc fiet ſine læſione tendinis illius, qui vaſtiſſimis femoris muſculis originem debet & patellæ inferitur ; neque diſſecabitur ligamentum, quod patellam tibiæ alligat. Ille autem locus eligitur, licet *Sphacelus* tantum ad malleolos uſque aſcenderit. Si enim exſtirpatio inferiori loco fieret, non poſ-

(a) Lib. VII. cap. 33. pag. 498.

(b) Ægineta Lib. VI. cap. 84. pag. 95.

(c) Lib. VII. cap. 33. pag. 497.

(d) Academie des Sciences l'an 1732. Mem. pag. 285. &c.

set postea talis homo cruri ligneo insistere, nisi flexo articulo versus posteriora reflexum gereret inutilem truncum; dumque in eodem hoc situ totis diebus retinentur hæ partes, obrigescet genu articulus, & molestum in lecto decubitus faciet; & ad plurima alia vitæ munia inutilem reddet talem hominem. Ubi vero sub genu abscissum membrum fuit, postea commodissime possunt artificiales machinæ applicari, quæ amissi membri damnum compensent. Imo aliquando adeo rædunt magnanimos hæroes inutilem hanc partem circumferre, quæ illos ad belli munera redderet impotes, ut maluerint extirpationem sub genu pati, quam has molestias. *Paræus* (a) sic refert, quod dum Capitaneo cuidam globo ex tormento bellico majori exploso auferretur totus pes parum supra malleolos, atque jam ab hoc vulnere convaluisset, postea tamen extirpationem hujus trunci sub genu subierit, expertus, quantum incommodi faceret relicta hæc cruris pars. Licet autem sub genu eligatur ille locus, qui infra validum hunc tendinem & patellæ ligamentum est, tamen & maluit peritissimus Chirurgus sub genu partem extirpare, quamvis ligamentum dissecari deberet, quam in femore, quia longe commodior usus partis superstitis esse potest, si sub genu extirpatio fiat. Successit feliciter hæc operatio, in fœmina cui molaris lapidis diffracti pars totum crus miserrime contriverat, ad genu fere usque, unde ad binorum circiter pollicum distantiam, ab articulo genu crus resectum fuit (b).

§. 469. **A**D amputationis administrationem, & felicem successum intelligendum, attenditur;

1. Ad præparationem.
2. Actionem ipsam.
3. Curationem Symptomatum.
4. Consolidationem.
5. Supplementum amissorum.

Recensentur hic generalia illa, quæ in omni extirpatione majorum membrorum observari debent, & quæ postea seorsim singula considerabuntur. Maximi imprimis momenti est ad felicem successum periculosa talis operationis, ut prius attenta mente considerentur omnia illa, quæ operationis tempore, vel statim post illam peractam, parata esse debent. Præstatque hæc omnia, quando peritum licet, in chartam conjicere, & ordine disponere, ut semper menti præsentia sint, dum aliquando subitam membrorum extirpationem infortunati casus requirunt. Ut autem commode considerari possint omnia, quæ huc spectant, neque in eorundem dispositionem nascatur confusio, optimum erit quinque distinctis numeris hæc distribuere.

1. Antequam extirpatio fiat, debet pars extirpanda firmari, sicque disponi, ut lumini opposita sit; debent idonei esse adjutores, qui immobilem ægrum retinere possint; debent adesse tales fasciæ, splenia &c. quorum applicatione trunci majores arteriarum, ad partes extirpandas tendentium, claudantur pro-

(a) Liv. XII. chapit. 29. pag. 325.

(b) De la Morre Traité complet de Chirurgie

Tom. III. pag. 427. &c.



bitu : requiritur præterea , ut omnia instrumenta taliter disponantur ordine , quali adhibebuntur. Sic v. g. culter incurvus , qui dissecandis omnibus partibus molli-  
libus ad ossa usque interviet , primo loco ponatur ; proximus dein huic sit an-  
ceps cultellus , quo inter ossium interstitia , si duplex in parte amputanda os fue-  
rit , locatæ partes discindi debent. Tunc sequatur ferra &c. Unde quam maxi-  
me necessarium est , ut , antequam incipiat hæc operatio , sedata mente Medi-  
cus una cum Chirurgo omnia hæc examinet. Generalia monita circa operationes  
Chirurgicas perficiendas pulcherrima habet *Hippocrates* (a) in libro illo , quem  
de Medici officina inscripsit ; & in loco citato quædam imprimis habentur , quæ  
in extirpationibus faciendis summi usus sunt. Dicit enim inter alia , instrumenta  
sic debere disponi , ut operantem non impedian , commodeque accipere possit  
illa , dum operationem perficit ; vel , si alius operanti illa tradet , is paulo ante  
exercitatus sit , ut imperata faciat. Deinde addit , illos , qui ægro assistunt , par-  
tem , in qua operatio instituetur , debere exhibere operanti , prout requiritur ;  
reliquum vero ejus corpus immobile retinere. Ultimo monet , quod silentes aus-  
cultare debeant , ut operantis jussa audire , & audita prompte exsequi possint.  
Ergo in similibus operationibus non admittantur otiosi spectatores , nisi tales , qui ,  
ad salutis artis exercitium destinati , sensim assuescere debent his spectaculis ,  
ut discant proximi miseras firmo intueri animo. Nunquam adsint amici ægri ;  
ne forte intempestiva misericordia moti operantem impedian , vel saltem im-  
portunis ejulationibus turbent.

1. Nihil magis conducit in similibus gravioribus operationibus Chirurgicis ,  
quam exercitatos habere adjuutores : imo nunquam deberent fieri extirpationes majores  
membrorum , nisi plures adessent periti Chirurgi ; quod etiam ut fiat , mul-  
tis in locis lege cautum est. Plurima enim accidere possunt non prævisa , quæ  
totam turbarent operationem , nisi alii præsentem opem ferre possent. Sic accidit ,  
ut Chirurgus , dum incautius cultrum incurvum , quo omnia ossibus incumben-  
tia disciderat , tractat , sic se ipsum vulneraverit , ut inceptam operationem per-  
ficere non posset. Egregius Chirurgus *De la Motte* ingenue fateretur pluribus in  
locis , quod in difficillimis operationibus optatos successus habuerit tantum , quia  
dexterimos & peritissimos habebat adjuutores : artem suam exercebat enim in  
eadem urbe cum tribus aliis Chirurgis ; omnibusque hoc solenne erat , nunquam  
graviores aliquam operationem pericere , vel difficillimam casum tractare , nisi  
in consilium & auxilium vocatis reliquis omnibus.

3. Præcipua symptomata sunt , Hæmorrhagia , & animi deliquium. Omnia er-  
go illa , quæ §. 471. recensentur , ad sanguinem sistendum remedia parata esse  
debent , ut sine ulla mora adhiberi possint. Conducet etiam in promptu habere  
gradum cardiacum , quo æger refocillari possit ilico , si in animi deliquium de-  
lapsus fuerit. Interim tamen crudele videretur , excitare miserum his remediis ;  
dum ipso hoc tempore si non tota operatio , saltem notabilis ejus pars , perfici  
posset sine doloris sensu. Cumque hodiernis inventis Hæmorrhagiam operationis  
tempore satis compescere norint Chirurgi , animi deliquium , non à jactura san-  
guinis , sed à dolore vel timore ortum , non adeo metuendum erit.

4. 5. Bina hæc , quæ ad felicem successum operationis spectant , & ad sup.

(a) De Medici officina. pag. 33. 34. Chartes. Tom. XII.

plendum defectum illarum actionum, quæ à parte extirpata solebant perfici, non requirunt, ut omnia huc spectantia in promptu sint extirpationis tempore; cum postea per otium de his cogitare liceat.

Præparatio fit :

1. Compressu vasorum magnorum sanguiferorum arteriosorum per splenia applicata pyramidalia, & ligaturam tornando adigendam super his in parte sana prope ægram.
2. Tractu valido & æquabili partium incidendarum ope ligaturæ ex corio fibulatae cum loris.
3. Firmatione cauta ægri, & partis amputandæ.
4. Moderato inflexu partis, ne nimis extensa secetur.
5. Narcotico cardiaco ipsi ægro exhibito.

1. Apud Veteres Medicos & Chirurgos hujus rei nulla mentio fit : unde non mirum est, quod *Celsus* (a) dicat, summo cum periculo membra præcidi. Describit enim extirpationem fieri debere in parte viva, uti ibidem patet. Discissis ergo omnibus partibus mollibus, patulo rivo ex vasis arteriosis dissectis sanguis effluere debebat : unde non tantum imminebat mortis periculum, verum etiam necessario turbari multum debebat ipsa operatio. Undatim enim effluens sanguis impediet, quo minus Chirurgus reliqua commode perficere possit. Imo, quod mirum videtur, ante *Paræum* nullus distincte locutus fuit de ulla methodo, qua compesci posset sanguinis effluxus operationis tempore (b). Post extirpationem factam cauteriis ignitis quidem compescere tentabant Hæmorrhagiam ; sed hic agitur de illa, quæ mollibus partibus dissectis oritur, antequam os serra divisum fuerit. Satis tamen adhuc imperfecta fuisse videtur illa methodus, qua *Paræus* (c) usus fuit. Validam enim ligaturam fieri voluit parum supra locum, ubi extirpatio fiet, adhibuitque in hunc usum vinculum latum & forte, quo ad religandos capillos mulieres uti solent. Satis autem patet, tali ligatura non posse facile comprimi majores truncos arteriosos, profundiori loco plerumque sitos : Post *Paræum* tamen *Fabricius ab Aquapendente*, *Hildanus*, aliique eadem methodo usi fuerunt. *Morellus* vero Chirurgus Gallus ingeniosissimus, in castris stipendia merens, septuagesimo quarto sæculi elapsi anno, primus invenit pulcherriam methodum sanguinem compescendi extirpationis tempore (d) : splenia nempe applicabantur illis locis, per quæ ex Anatome notum erat truncos arteriosos decurrere ; deinde ligatura circumducta bacillo transmissa arctabatur tornando ; sicque pro lubitu poterant angustari, vel & integre comprimi arteriæ, quæ ad partem amputandam sanguinem adferebant ; adeoque tutissime omnis Hæmorrhagia impediabatur. Cum autem tornatilis hæc ligatura, quamvis simplicissima foret, non careret tamen incommodis, postea correctæ fuit. Dum enim circumverteretur bacillus, ut arctaretur ligatura, cutis intercepta dolebat acerrime. Præterea pressio illius ligaturæ non agebat tantum in vasa comprimenda,

(a) Lib. VII. cap. 33. pag. 497.

(b) Academie des Sciences l'an 1732. Mem. pag. 288.

(c) Livre XII. chap. 30. pag. 306.

(d) Academie des Sciences l'an 1732. Mem. pag. 289.

sed totum membri ambitum stringebat satis valide. Insuper requirebatur famulus; qui hanc ligaturam adstringeret vel laxaret, ad nutum illius, qui operationem perficiebat. Simulque in eodem loco adesse debebat alter, qui membrum exstirpandum retineret; unde iterum satis notabile incommodum nascebatur. Tandem cum resecta parte tornatilis ligatura parum laxaretur, ut sanguis erumpens arteriarum ligandarum patula orificia monstraret Chirurgus, loco sæpe movebantur splenia, imo & totus apparatus; sicque valida poterat nasci hæmorrhagia, quæ ægrum debilitaret summo opere, antequam omnia iterum reposita forent. Ut cuncta hæc mala evitarentur, pulcherrimam machinam excogitavit egregius Chirurgus *Petit*, quæ sanguinis effluxum, compressis arteriis, impedire poterat quam certissime: interimque careret omnibus illis incommodis modo memoratis. Longe autem melior idea habebitur ex figura hujus instrumenti cum omnibus suis requisitis, quam ex sola descriptione, quæ in Actis Parisinis (a) videri poterit. Habetur etiam apud *Garengeot* (b), qui tamen solam machinam, qua ligatura ad lubitum adstringi vel laxari potest, delineavit; vinculum autem ipsum, splenium cylindricum, & reliqua descripsit tantum. Spleniorum autem pyramidalium loco solent nunc arteriæ comprimendæ imponere cylindrum ex linteo convolutum factum, qui talem firmitatem habeat, ut ejus figura non nisi à validiori pressione mutetur, interimque non nimis durus sit, ut cedere possit. Si enim nimis mollis fuerit ille cylindrus, à ligaturæ circumductæ compressione complanaretur, adeoque illius pressio non in arteriam adeo, quæ profundius plerumque jacet, ageret, sed in vicinas partes. Si nimis durus foret idem, tantum in paucis punctis tangeret arteriam, quæ proinde se subducere aliquando posset. Ultimo requiritur, ut cylindrus ille assuatur ligaturæ, per quam in loco retinebitur, ne ex situ suo delabatur, dum laxatur operationis tempore tornatilis ligatura, quæ paulo post iterum adstringi debet. Facile autem patet, cylindri illius variam debere esse magnitudinem, prout his illiusve corporis locis applicabitur; uti etiam pro varia ætate & statura ægri, qui hanc operationem subire debet. Loca autem, ubi magni trunci arteriosi hærent, ex fidelissimis *Eustachii* tabulis satis cognosci poterunt. Sic si exstirpatio sub genu fiat, cavo subpopliteo applicatur cylindrus; si supra genu, in femoris parte interiori maximus truncus arteriæ cruralis poterit comprimi &c. Cum autem & magni trunci nervosi in pluribus locis arteriis vicini sint, eadem opera & hi comprimuntur: unde stupor & insensibilitas in partibus suppositis nascetur; adeoque acerbus dolor, crudelem hanc operationem comitans, obtundetur plurimum.

1. Demonstratum fuit in Commentariis §. 158. n°. 1. partes molles corporis, inter quas causa vulnerans adacta fuit, magis magisque à se mutuo recedere: adeoque amputato membro omnes partes molles accurtabuntur. Sed ossis truncati manebit eadem longitudo, adeoque illud ultra æquabilem vulneris facti superficiem eminebit. Verum omne illud, quod de osse sic eminet, nullis partibus mollibus tectum, corrumpetur; & postea vel serra iterum abscindi debet, vel sponte separabitur à reliquo osse sano & carnibus tecto; sed non nisi post longum temporis spatium. Omni ergo modo curandum est, ne os ultra partes mol-

(a) Ibid. l'an 1718. Mem. pag. 253.

(b) Nouveau Traité des Instrumens de Chirurgie Tom. II. pag. 151.

les emineat. *Celsus* (a) jam hoc monuerat, ubi de membris præcidendis agit: postquam enim caro ad os usque resecta fuerat, dicit: *Ubi ad os ventum est, reducenda ab eo sana caro, & circa os subsecanda est, ut ea quoque parte aliquid ossis nudetur: dein id serrula præcidendum est, quam proxime sana carni etiam inherenti: ac tum frons ossis, quam serrula exasperavit; lavanda est, supraque inducenda cutis, quæ sub ejusmodi curatione laxa esse debet, ut quam maxime os undique contegat &c.* Nihil autem dixit *Celsus* de methodo, per quam cutis tam laxa servari possit; ut postea os tegere valeat: videtur enim ejus intentio fuisse, ut cutis crudis his partibus applicata cum illis concretesceret: nullam enim facit mentionem nec ligaturæ vasorum, nec causticorum applicatorum, sed simpliciter dicit: *Quo cutis inducenda non fuerit, id linamentis erit contegendum, & super id spongia ex aceto diligenda. Cetera postea sic facienda, ut in vulneribus, in quibus pus non moveri debet, præceptum est* (b). Difficulus ergo intelligitur, qua arte potuerit talis cura perfici.

Circa finem autem sæculi elapsi *Petrus Hadrianus F. Verduin*, celebris Chirurgus Amstelædameusis, tractatulum scripsit de nova artuum decurtandorum ratione (c), cujus in extirpatione cruris exemplum proponit. Cultro enim falcato & ancipiti suram læva manu arreptam perfodiebat in illa altitudine, ubi extirpatio fieri debebat, deinde deorsum pone ossa abscindebat. Reliquas vero cutis carnisque partes transversim incidebat, & separato periosteo serra decurtabat ossa. Illo autem tempore, dum serra dividebantur ossa, retroducebatur avulsæ carnis & cutis portio illa relicta versus posteriora, ne læderetur à serræ dentibus. Simul ac autem os discissum erat, aqua tepida vulnus abstergebat, ne aliquid scobis ossæ in vulnere maneret, quod sanationem remorari posset; quo facto pendula illa carnis cutisque relicte portio, dicto citius, antrorsum reflectebatur, & mutilatæ parti coaptabatur. Vulneris dein ore fungo, linamento, aut alio quovis stiptico idoneo tegebantur; totique trunco vesica bovina aqua egelida emollita applicabatur, atque idonea dein ligatura applicata firmabantur hæc omnia. Tabulis autem æneis instrumenta omnia huc requisita, ipsamque operationem satis nitide exhibuit auctor in eodem tractatulo, qui etiam habetur in *Bibliotheca Anatomico-Chirurgica Mangeti tomo primo*. Vocabat autem extirpationem hoc modo factam methodum curandorum artuum per insitionem. Totus scopus erat, ut hoc modo, applicata carnis relicte portione ad crudum vulnus, obturarentur arteriarum-discissurarum orificia, & crudæ partes contiguæ factæ concretescerent inter se, nudatumque os tegeretur ilico.

Neque timebat ossis, serra divisi, & aëre tacti, separationem, cum jam olim vidisset, hanc non adeo necessariam esse, ac multi quidem voluerant. Præterea dicit, quod caro illa, qua vulnus tegitur, super eminens sæpe ultra vulneris margines nihil incommodi adferat; sentim enim labia illa sic contrahuntur, ut parva admodum sit cicatrix. Partes autem illæ molles, sic trunco membro appositæ & concretæ, pulvinaris instar, faciunt, ut sine ullo dolore totum corporis pondus postea inniti possit. Successisse autem sibi hanc curam in adolescente affirmat auctor, atque postea Amstelædamensis Nosocomii Chirurgos in viro triginta annorum crus eadem methodo extirpassè felici etiam cum eventu narrat.

(a) Lib. VII. cap. 33. pag. 498.

(b) Ibidem.

(c) Dissertatio Epistolaris de nova artuum decurtandorum ratione. Amstelædami 1696.

Circa

Circa idem fere tempus Genevensis Chirurgus *Sabourin* in eandem incidit opinionem, neque illam ex modo citato auctore hausisse videbatur, quia & extirpationibus in articulorum locis faciendis illam adaptaverat, & plane diversa deligatione utebatur. Secundo hujus sæculi anno methodum hanc Academiae Regiæ Scientiarum proposuit, seque semel hoc modo extirpationem perfecisse dixit, tali cum successu, ut toto operationis tempore tantum quatuor vel quinque uncias sanguinis perdiderit æger, & postea ne guttulam quidem. Academiae jussu in Nosocomio Parisiensi idem Chirurgus novæ hujus methodi experimentum fecit, præsentibus harum rerum aptissimis judicibus *Du Verney* & *Mery*. Æger autem fuit mortuus: neque tamen videbatur operationis cuidam vitio mors adscribenda esse, licet major fuerit sanguinis jactura, quam solet adesse in extirpationibus vulgari methodo factis (a).

*Celeberrimus Heisterus* in suis Institutionibus Chirurgicis (b) hujus inventionis gloriam prædictis auctoribus negat, & in libello, cui titulus, *Currus triumphalis terebinthinæ &c.* auctore *Jacobo Joungio* Londini 1679. edito, hanc methodum jam descriptam fuisse contendit. Apud Ruyschium (c) habetur descriptio hujus operationis, quæ ipso præsentem facta fuit, & felici cum successu; unde conclusit, novam hanc methodum amplectendam esse. Tamen deinde iterum evilit; & uti testatur *Celeberrimus Heisterus* (d), postea ipse *Verduin*, & alii Amstelædameses Chirurghi, ab illa abstinuerunt, & ad antiquam methodum reversi sunt. *Garengot* tamen (e), qui hanc methodum descripsit amplo sermone, & figuris additis illustravit, optat, ut in Nosocomiis iterum tentaretur; additque plures successus felicissimos hujus methodi visos fuisse.

Varia sic fata hujus methodi fuisse videntur, hodieque, saltem in his regionibus, extra usum est: Dum autem vulgari methodo extirpatio membri fit, impossibile quidem est, totam trunci superficiem carne vel cute tegere; tamen hoc caveri poterit, ne postea ossi dissecti extremum ultra reliquam vulneris superficiem emineat. Circumducitur nempe membro, proxime supra illum locum, ubi sectio fiet, annulus, ex corio factus molli, firmiterque adstringitur. Ansulis autem instructus est ille annulus, per quas transmissis habenis a ministro sursum trahi possit, sicque partes molles omnes, antequam sectio fiet, retrorahuntur quantum fieri potest. Extirpatione facta, remoto coriaceo illo annulo, partes sursum tractæ remittuntur & descendunt, sicque cavetur, ne os emineat ultra partes molles. Ad hos usus manicam ex alura paratam descripsit & figura expressit *Hildanus* (f).

3. Antequam operatio hæc tentetur, debemus certi esse, partem amputandam non tantum, verum & reliquum ægri corpus sic firmatum esse, ut penitus immobilis sit, neque operantem Chirurgum turbare possit. Multi enim crederent, nunquam os dolores experti, se satis magnanimos esse, & turpe putarent, vinculis adstringi, vel famulorum manibus teneri. Sed prudentia jubet, nunquam talibus promissis confidere. Simulque curandum est, ut tales adsint adju-

(a) Academ. des Sciences Pan 1702. Hist. pag. 43.

(b) Pag. 305.

(c) Epist. Problem. decima quarta pag. 9. &c.

(d) Institut. Chirurg. pag. 506.

(e) Operations de Chirurg. Tom. III. pag. 413.

(f) De Gangrena & Sphacelo cap. 19. pag. 808.



tores, qui jam ad hæc spectacula durati illas animi dotes habeant, quas in Chirurgo requirit Celsus (a). Vult enim, ut sit animo intrepidus, immiseri ors, sic, ut sanari velit eum, quem accepit; non ut clamore ejus motus, vel magis, quam res desiderat, properet; vel minus quam necesse est, secet: sed perinde faciat omnia. ac si nullus ex vagi.ibus al.terius affectus oriretur. Multi autem temere suam in similibus operationibus constantiam jactant; atque postea turbati omnino jussa operantis nec intelligunt, nec perficere possunt; imo aliquando in animi deliquium labuntur: sicque & operantem Chirurgum impediunt, & miserum ægrum diutius in his tormentis manere faciunt.

4. Summi momenti hæc regula est: debet enim post operationem peractam poni in tali situ, in quo diutissime sine ullo incommodo manere possit. Sed ille est situs naturalis partium quem in homine sano dormiente observare licet, in quo omnes motus voluntarii silent. Omnes enim articuli corporis leviter flexi apparebunt, nullum vero membrum erit extensum. Hippocrates optimum ægri decubitus in morbis describens hoc pulchre notaverat; uti dictum fuit in Commentariis §. 211. ubi & datae fuerunt rationes, quare, omni motu voluntario musculorum silente, articuli leviter inflecti debeant. Sed si pars valide extensa secetur, amputatione facta, ut Hæmorrhagia sistatur, ligari solent vasa, uti dicitur §. 471. n<sup>o</sup>. 1. utque hoc fiat, sæpe aliquid vicinæ carnis eadem ligatura intercipitur; adeoque, mutato partis truncatæ situ post ligaturam vasorum factam, caro musculosa pariter alio disponetur modo, unde sæpe enormes dolores & pessima alia mala nascentur, quæ omnia vitari poterunt, si moderate inflexa pars secetur.

5. Quam vano metu olim Medici optima hæc remedia vitaverint, dictum fuit in Commentariis §. 202. & 229. Prudens autem illorum usus incantamenti instar sævos dolores mitigat, & animi mœrorem tollit: imprimis si opium tali datur quantitate, ut nondum gravem inducat soporem, sed levissimum blande subrepentis somni initium quasi faciat. Nascitur tunc pacata adeo menti tranquillitas, & serena in vigilante etiam homine quies, quam nullus credere posset, nisi expertus. Probe memini, me quondam, ut molestum lenirem dolorem, sumpsisse unicum granum opii, hoc cum effectu, ut vigilem duxerim noctem, sed absque dolore, tantoque cum animi oblectamento, ut felicior in campis suis Elysiis statum fingere non potuerint Poetæ. Sequenti mane post levem nauseam facilis vomitus excussit, una cum opii pilula nondum integre dissoluta, fluxam hanc beatitudinem. Summi ergo usus poterit esse Narcoticum remedium, una alterave hora ante operationem instituendam exhibitum; non hac spe, ut sopitus æger nullum sentiat dolorem (tanta enim copia dare hæc remedia periculosissimum foret), sed ideo, ut instantis mali metus tollatur, vel minuatur saltem. Licet enim gravis sit hæc operatio, & non sine acri dolore perfici possit, molestior tamen merus ille est, quo imminenti mali imago menti semper præsens est, dum miseri omnia horæ minuta numerant, quæ exstirpationis constitutum tempus præcedunt. Unde non immerito insidias undique imminentes subire semel satius esse, quam cavere semper, confessus est Julius Cæsar (b). Rara quidem exempla docuerunt, non semper hæc artis adminicula necessaria esse, darique tales homi-

(a) Lib. VII. cap. 1. pag. 476.

(b) Seuton. Lib. I. cap. 36. pag. 106.

nes, qui intrepido animo futura mala intueri norunt. Sic magnanimus heros, postquam ex sclopeti vulnere molestissimum ulcus fistulosum in femore gesserat per viginti annos, tot malorum pertaxus, necessariam extirpationem ipse conclusit, diemque & horam, qua illam institui veller, indicavit. Statuto tempore, dum accedunt Chirurgi & Medici, invenerunt dormientem (a). Simile exemplum & alibi (b) habetur: ubi strenuissimus navis Præfectus, postquam statutum fuerat, brachium prope humeri articulum extirpandum esse, rogavit Chirurgos, ut liceret prius lassum vigiliis protractis jam per aliquot dies corpus somno reficere; quo concessio, placidissime dormivit. Sed pauci sunt, qui invicto hoc mentis robore gaudent: aliis ergo per artem benigne succurrendum est, cum tuto hoc fieri possit. Turcæ certe Opium sumunt, ut intrepidi contemnunt belli pericula, unde narrat *Bellonius* (c), totam Provinciam Opio fere spoliari, dum Turcarum Imperator, bellum gesturus, militum delectum facit. Formula talis Narcotici cardiaci in Materia Medica ad hunc numerum habetur.

§. 470. **A**CTIO fit in parte præparata (§. 469.).

1. Cultro acuto, forti, curvo, in dorso obtuso, bene temperato, fortiter per omnia ad os usque adacto, æquabiliter & fortissimo applicatu ad os in orbem circumacto, ut una celeri sectione totum periosteum accurate discissum sit.
2. Si duplex in amputanda parte os, interstitia similiter minori, utrimque acuto, cultello quam exactissime dissecando.
3. Dissecta (1. 2. huius) per ministros fortiter distrahendo, ut hiatus sit inter margines sectionis.
4. Serra acuta, subtili, forti, tensa, os secando, quæ agenda perpendiculari, forti, æquabili motu; incipiendo ab tenuioris dissectione, desinendo in crassissimum, si os duplex; ne vi serræ in festucas filum dissiliat debilius.
5. Ossa inter secandum per ministros artificiose flectendo, ut liber sit serræ meatus.

1. Primum, quod fieri debet in ipsa actione; est, ut simul & semel quam celerrime omnes partes molles ad ossa usque dissecentur, sicque hoc facto libera via pateat serræ. Ad hanc sectionem faciendam requiritur culter satis acutus quidem, sed tamen sic factus, ut non nimis tenuem aciem habeat; illa enim obtunderetur, dum ossi appropinquatur. Cum autem extrema corporis teretem figuram habeant; culter ille curvus debet esse, ut maiorem superficiem secare possit. Curvatura autem huius cultri modica tantum sit, & per totam cultri longitudinem æqualis, non versus apicem tantum. *Garengot*, qui omnia observanda in cultri

(a) Academ. des Sciences l'an 1731. Mem. pag. 142. &c.

(b) De la Motte Traité complet de Chirurgie Tom. III. pag. 413.

(c) Observat. lib. III. cap. 15. pag. 179.

hujus confectione exactissime descripsit (a), monet, cultri hujus figuram optimam esse, quæ magni satis circuli arcum referat, sic ut radii, perpendiculariter ex hoc arcu in chordam subreusam incidentis, illa pars, quæ inter arcum & chordam continetur, pollicem vix excedat. Interim tamen satis patet, majorem cultrum requiri pro femore quam pro brachio extirpando, adeoque variaz magnitudinis cultros in Armamentariis Chirurgicis adesse debere. Dorsum autem cultri talis obtusum esse debet, ut sine periculo offensæ Chirurgus manus vola vel digitis illud excipere, sicque cultrum dirigere possit. Culter ille per cutim & carnes adigitur ad os usque, & deinde, acie ejus manente ossi applicata, circumducitur in orbem, donec circularis sectio omnia diviserit, & imprimis simul ipsum periosteum. Præstaret, ut Chirurgi, antequam in vivo homine extirpationem membrorum facerent, sæpius tentarent hanc in cadavere, sicque discerent firma manu, (cultri acie semper manente perpendiculari ad partem applicandam, ne deviet) circulari sectione omnes partes molles dividere. Voluit *Heisterus* (b) cutim cum pinguedine prius circulari sectione dividendam esse, & deinde retrahendam, quantum fieri possit, ut sic altiori in loco musculosa caro altera sectione ad os usque dissectari posset, & operatione facta cutis & pinguedo magis tegerent ossis truncam partem. Sed sic binis sectionibus fit, quod aliter unica, satis celeriter perfici poterit. Quia autem post extirpationem peractam tenacibus sæpe opus est Emplastris ad varios usus, ideo, prius quam hæc institueretur, convenit prius omnes pilos in loco vicino abraderi, ne postea dolorem satis molestum excitent, dum renovari hæc emplastra debent (c).

2. Si unicum tantum in parte amputanda os foret, hoc sufficeret: ubi vero bina ossa sunt, ut in cubito & crure, non possunt prima hac sectione discindi illa, quæ inter bina hæc ossa ponuntur, adeoque requiritur alia sectio. Cum autem in quibusdam locis distantia v. g. inter fibulam & tibiā tres quatuorve tantum lineas æquet, merito monuit modo laudatus auctor (d) cultellum, quo ad hanc sectionem utetur Chirurgus, non posse esse latum. Præterea in illis locis, ubi bina ossa adsunt, non potest prima sectione omne periosteum hæc ossa ambiens dissectari: ista enim ejus portio, quæ illam partem horum ossium, qua se mutuo respiciunt, tegit, non poterit cultro majori curvo attingi, ut facile patet. Debebit ergo sollicitè cultello eodem, quo partes inter bina ossa sitæ discinduntur, dividi periosteum, ne illud postea enormi cum dolore serræ dentibus laceretur. Simulque attenditur, an forte in aliis locis aliquid de carne vel periosteum nondum integre discissum fuerit. Ex omnibus his apparet, quanta frinitas arti accesserit, dum compressis arteriis omnis hæmorrhagia impeditur operationis tempore; absque hoc enim impossibile foret distinguere, an partes molles ad os usque positus dissectæ forent, cum sanguine omnia inundarentur.

3. Ut autem serra liberrime agere possit, partes dissectæ à se mutuo removen-  
tur, trahendo illas ab utraque parte; & imprimis versus superiora, ut carnes eo magis ab ossibus recedant, illæque altiori loco refecari possint: unde postea

(a) *Instrumens de Chirurgie* Tom. II. pag. 140.

(b) *Institut. Chirurg.* pag. 427. & 508.

(c) *Garengeot Operations de Chirurgie* Tom. III. pag. 356. & 386.

(d) *Idem. Instrumens de Chirurgie* Tom. II. pag. 162.

eo minor metus erit, ne ossis truncati pars ultra æquabilem vulneris superficiem emineat. Hoc autem poterit fieri trahendo versus superiora annulum illum coriaceum, qui supra locum extirpationis ponitur; uti in præcedentis paragraphi numero secundo dictum fuit. Optime etiam ad hanc rem convenire videtur sequens methodus. Sumitur linteam, longitudine pedem æquans vel excedens, quinque vel sex digitorum transversorum latitudinem habens; unum autem hujus lintei extremum finditur usque ad duas tertias longitudinis partes. Bina hæc fissi hujus lintei capita sic applicantur carnibus discissis, ut fissura sua os comprehendant nudatum, & tegant totam superficiem carniū. Dum ergo bina hæc capita versus posteriora reflectuntur decussata, & trahuntur, simulque alterum ejusdem lintei extremum in parte anteriori hærens eadem directione adducitur, patet, partes molles æquabilissime sursum duci, & majorem adhuc partem ossis nudari, simulque caveri, ne ferra partes molles lædere possit (a). Interim tamen curandum est, ne ferræ dentes huic linteo intricentur, inde enim turbaretur operatio.

4. Quænam observanda sint in constructione ferræ, qua ossa dissectantur, videantur apud *Garengot* (b). Sufficit hic notare præcipuas ejus proprietates. Acuta autem & subrilis esse debet, ut levi vi ossa dissectari possint, quod facile patet: si enim crassa foret ferræ lamina, tanto plus de ossium substantia deberet dentibus abradi, ut via fieret ferræ descendenti, adeoque fortiori molimine opus esset. Verum ferræ subtilitas facit, ut & facilius frangi, si rigida & elastica valde fuerit; vel saltem flecti possit, si minus fragilis. Posterius cavetur, dum arcu chalybeo firmata ferræ lamina pro lubitu per cochleam applicatam tendi potest: prius autem vitatur, si non nimis rigida fuerit chalybeæ laminæ, ex qua ferra facta est, temperatura. Neque facile frangetur ferra, si recta & perpendiculariter per os adigatur: ubi vero inde deflectitur, hæret ferra, neque poterit moveri sine magna vi adhibita; unde sæpe periculum est, ne rumpatur. Tale infortunium Chirurgo accidisse narrat *Hildanus* (c): cumque illo tempore nondum inter operandum tornatili ligatura compescebatur Hæmorrhagia, exanimis fere jacebat æger, antequam alia ferra adesset, qua operatio absolveretur. Ideo voluit *Hildanus*, ut semper binæ ferræ æqualis crassitie adsint, ubi extirpabitur membrum.

Applicatur autem ferra ossi, quam proxime fieri poterit sine læsione; circa carniū dissectarum orbiculum; dein lentissime crena insculpitur perpendicularis in osse: ubi autem hæc facta est, non amplius tantum periculum est, ne ferra deviet, cum crenæ lateribus undique sustineatur. Pergitur dein æquabili motu; cavendo quam maxime, ne unquam à perpendiculo deflectat ferra; brevi enim tunc hæreret immobilis, unde nova iterum via ferræ parari deberet: vel, si pergeretur, periculum foret, ne ferra rumperetur. Notandum præterea, non requiri; ut magna vi ferra apprimatur ossi, quod in vivente homine, vel & in recens mortuo, mollius & succulentum est, adeoque facile cedit: tunc enim dentes ferræ profundius immergerentur ossis substantiæ, adeoque non posset æquabilissime ferra reciprocari, sed per subsultus tantum. Ubi autem duplex in parte amputanda os est, atque notabilis in magnitudine illorum & robore diversitas, uti v. g. in crure

(a) *Garengot Operations de Chirurgie* | 173. &c.  
Tom. III pag. 367.

(b) *Instrumens de Chirurgie* Tom. II. pag. | 802.

(c) *De Gangræna & Sphacelo* cap. 18. pag.

(in brachio enim ulna & radius non tam multum differunt), tunc omnium optimum est, si primum ferræ vestigium imprimatur tibie, deinde sic inclinetur ferra, ut simul fibulam radat; atque simul curetur, ut fibula prius discissa sit quam tibia. Sine his cautelis enim periculum foret, ne fibula in festucas dissiliret, dum ferræ pressionem & pondus sola sustineret. Facile autem patet ex cognito situ horum ossium, Chirurgum, ut omnia modo dicta perficere possit, commodissime locari inter bina ægri crura, non vero extra illa; uti in figuris *Hildani* (a) male exprimitur.

5. Dum enim ferra profundius descendit jam in ipsam ossis substantiam, si v. g. ille minister, qui crus extirpandum circa genu tenet, parum elevet partem, alter vero pedem extremum parum deprimat, augebitur hiatus inter ossis partes resectas, & liberrima fiet ferræ via. Si vero adjuutores in tali operatione fuerint imperiti, vel animo turbati, patet facile, plurima mala fieri posse.

§. 471. **S**YMP TOM ATUM, extirpationem sequentium, primarium Hæmorrhagia semper ilico sistenda:

1. Vasis, jactu sanguinis deprehensis, apprehensis per tenacula elatere compressa, eductis, filo trajecto & circumducto arte constrictis, si majora sunt. Aut vas constringendo per filum acubus binis incurvis utrimque ad latera vasis infixum.
2. Cauteriis ignitis applicatis.
3. Plumaceolis vitriolo imbutis ad vasa, absorbentibus alia ad loca applicatis.
4. Partes vivas, retroractas (469. N°. 2.), laxatas reducendo.
5. Vesicam circumponendo trunco, pulvere adstringente refertam.
6. Ligatura firmante.
7. Somno, quiete, victu sollicitè procuratis.

Amputato membro, vasa discissa hiant aperta: hinc, nisi tornatilis ligatura arteriæ ad partem tendentis truncum compressisset, pleno rivo sanguis undatim efflueret. Sed non poterit hæc ligatura relinqui, quia, impedito omni affluxu sanguinis arteriosi in partem, de novo Gangræna & Sphacelus fieret. Debent ergo sic obturari, quacumque demum methodo hoc fiat, vasorum discissorum orificia, ut laxata quamvis tornatili ligatura truncum arteriæ comprimente, sanguinis fluxus non sit timendus. Voluerunt tamen quidam auctores, non ilico sistendam esse Hæmorrhagiam, sed conducere, ut aliqua copia sanguinis effluat, partim ut minuatur sanguinis abundantia, partim etiam ut evacuetur illa sanguinis pars, quæ in his vasis prope partem mortuam stagnaverat, & forte aliquid maligni inde contraxerat. Sed cum hodie in parte viva extirpatio tantum fiat, nullum hujus rei periculum est; & si postea appareat, sanguinem nimia copia vel rarefactione curationi obesse, poterit Venæ sectione tuto hoc tolli. Videtur ergo Hæmorrhagia post membrorum extirpationem ilico sistenda esse: quod quomodo fieri possit, sequentibus numeris considerabitur.



1. In Commentariis §. 218. n°. 4. dictum fuit, *Paræum* primum fuisse, qui post amputationes membrorum vasa ligatura firmavit, & crudelem methodum cauteriis adurenti partem truncatam repudiavit. Postea omnes Chirurgi illum secuti sunt.

Ut autem hæc ligatura bene fieri possit, laxatur tornatilis ligatura, ut sanguis per aperta vasorum-orificia effluens demonstret illorum loca. Duplici tunc modo ligantur vasa: vel enim tenaculo, (quale apud *Garengot* (a) describitur & delineatur) quod elatere sponte clauditur & firmissime quidem, arripiuntur vasa, & protrahuntur ultra plagæ superficiem, & deinde ligantur. Sed, uti facile apparet, sanguis appulsus sensim protrudet talem ligaturam, sicque periculum erit, ne illa decidat, & recrudescat de novo Hæmorrhagia: unde voluerunt alii (vide Commentaria §. 218. n°. 4.) debere trajici filum per ipsam arteriæ substantiam, & deinde circumductum arctissime constringi. Alia (& quidem hodie usitatissima) methodus est, ut acus admodum curva, quæ plura fila, non contorta inter se, sed in eodem plano posita, habet, adigatur per carnes circa arteriam positas; primo supra arteriæ locum, deinde similis punctura eadem acu, & iisdem filis manentibus, fiat infra arteriam; ita ut binis his puncturis quatuor fiant foramina, quæ quadratum spatium includunt, in cujus medio arteria hæret, quæ ligatura firmari debet (b). Extrema tunc filorum nodo constringuntur, sicque clauditur arteria hoc vinculo, quod non immediate tunc arteriæ ipsi applicatur, sed, carnibus interceptis simul, illam æquabilissime comprimit. Prior autem methodus tenaculo protracta vasa ligandi periculis Chirurgis aliquando magis arrisit, quam illa, quæ acubus per carnes vicinas transigendo fit, quia metuebant à partibus tendinosis, nervis, &c. punctura læsis, vel vinculo interceptis aterrimos dolores, & convulsionem. Sic egregius Chirurgus *De la Motte* (c) se sola hac methodo semper usum fuisse dicit; vel vitrioli globulis vasorum discissorum orificiis adaptatis, ad sistendas hæmorrhagias post membrorum exstirpationem. Non autem solam arteriam ligandam, verum etiam circumpositæ carnis partem simul, tenaculo arripiebat & ligabat, sicque minus periculum erat, ne ligatura facta delaberetur nimis cito. Interim tamen non omnino condemnabat alteram methodum; quin imo in eodem loco felicem ejus successum candidus enarrat, dum, post periculosam brachii exstirpationem prope ipsum humeri articulum factam, transfadato filo per carnes, arteria, inter illud filum & os intercepta, clauderetur, sine ullo malo symptomate secuto.

Notandum tamen, quod & metu & dolore aliquando exanimis fere jaceat æger, adeoque non magno impetu sanguis exiliat, & tantum per maxima vasa; unde, nisi omnes notabiles rami sic ligatura firmati fuerint, periculum foret, Hæmorrhagiæ, & deberet sæpe postea totus apparatus iterum tolli, ut illa compesceretur. Præstat ergo grato cardiaco exhibito excitare vires, & attente circumspicere, an forte cum impetu per arteriam notabilem quandam adhuc sanguis exiliat, quæ tunc pariter liganda erit. His factis, nullus amplius Hæmorrhagiæ metus est; neque opus erit ferris ignitis, neque adeo valida requiritur ligatura, quæ

(a) Instrum. de Chirurg. Tom. II. pag. 183. &c.

(c) Traité complet de Chirurgie Tom. III.

(b) Garengot Operations de Chirurgie | pag. 425.  
Tom. III. pag. 371.

recens discissas carnes contundit, & novam inflammationem, imo & Gangrenam aliquando excitat.

2. Ad Paræi tempora usque videtur fuisse universalis hæc methodus sistendi sanguinem per cauteria ignita applicata. *Hildanus* (a) non tantum laudat cauteriorum usum post membri amputationem, verum etiam multis encomiis extollit cauterium cultellare. Candenti nempe cultro carnes ad ossa usque secabantur, sicque eadem opera sistebatur sanguis. Sed post talem operationem debet ambusta vulneris superficies separari per suppurationem, adeoque periculum erit, ne os ultra partes molles emineat, & difficilem curationem faciat. Verum quidem est, quod & ipsum os cauteriis pariter exuri voluerit; sed & tunc videtur latis longum tempus requiri, ut mortua illa ossis pars separaretur, licet contrarium voluerit auctor. Videantur illa, quæ de causticorum ignitorum usu in compescendis Hæmorrhagiis dicta sunt in Commentariis §. 218. n<sup>o</sup>. 1. & 4. Ibi enim habentur rationes, quare optimi Chirurghi hæc methodo abstineant.

3. Sumitur vitriolum, & imprimis Cyprium, in pulverem conteritur, qui plumaceolis, vasis discissis applicandis, inspergitur: vel, quod melius est, vitrioli pulvis gossypio excipitur, & fiunt inde noduli spherici, vel & conici, qui vasis discissis applicantur. Sanguis effluens, simulac vitriolum tangit, coagulatur in thrombum, qui vasis discissi orificium obturat; sicque sanguis sistitur. Ubi vero maximæ arteriæ discissæ sunt, sanguis magna velocitate erumpens abriperet hos globulos vel hæc plumaceola; unde simul requiritur pressio externa, per quam applicata hæc maneant ad vasorum dissectorum orificia: ideo dies noctesque adesse debent famuli, qui leni pressione continuo hæc in loco retineant. Præterea vitriolum vasorum extrema, & crudas carnes, quas tangit, in escharam convertit; quæ postea separari debet: tuncque hæc eschara decidua, novus iterum erit Hæmorrhagiæ metus, uti antea dictum fuit in Commentariis §. 218. Ideo fere omnes Chirurghi magis hodie confidunt vasorum ligaturæ, neque vitriolum adhibent, nisi ubi non facile vasa prehendi & ligari possunt. Vitriolum autem illud tantum apponitur majorum vasorum orificiis; reliquæ trunci superficiei, ubi plurima vasa minora discissa hiant, applicantur talia, quæ sanguinem absorbent; & cum illo in crustam abeunt, quæ operculi instar minorum vasorum hiatus regit. Ubi vero cautum est, ne ex majoribus truncis discissis sanguis exire possit, facile patet, nihil timendum esse, licet ex minoribus ramulis aliquid adhuc sanguinis lente exstillet; sponte enim hi rivuli clauduntur; uti probatum fuit in Commentariis §. 159.

4. In præparatione ad extirpationem ipsam dictum fuit, cutim & subjectas partes molles debere sursum trahi, quantum fieri possit, & in hoc situ retineri, donec amputatio membri facta fuit. Deinde, vinculo soluto, reducuntur, ut ossis resecti pars non emineat ultra reliquam vulneris superficiem: dumque hoc fit, distracta antea vasa laxantur; unde sibi relicta nunc vasorum dissectorum orificia contrahi possunt, & se recondere sub partibus vicinis. Hacque ratione partium retrahendarum reductio sistendæ Hæmorrhagiæ utrumque conducit. Voluit *Paræus* (b), tunc truncum debere quatuor in locis acu perforari, ut trajectis filis, in

(a) De Gangrena & Sphacelo Cap. 19. pag. 812. 813. | (b) Livre 12. Chap. 22. pag. 307.

crucis formam decussatim positis, adduci magis possent partes molles, & in situ retineri. Sed si valide adducerentur hæc fila, dolor satis magnus, & valida inflammatio, faciebant, ut brevi post iterum discindi deberent; si laxè tantum, inutilis erat hæc cautela.

5. Cum nihil plus metuatur post membri extirpationem, quam Hæmorrhagia; hinc anxia cura omnia artis molimina adhibent Chirurghi, ut hanc evitent. Et quamvis ligatis vasis majoribus, & absorbentibus pulveribus applicatis ad locum satis cautum videatur, solent tamen vesicam, simili pulvere refertam, trunco circum applicare; ut, si forte aliquis sanguis adhuc exiret, vel mala fortuna ligatura trunci cujusdam arteriosi solveretur; pulveres illi, statim cum sanguine in massam firmam concrecentes, prohiberent Hæmorrhagiam. In Commentariis autem §. 218. n°. 3. dictum fuit, adstringentia illa parum efficere posse, nisi simul idonea compressio accesserit, quæ sola sine his etiam quam efficacissime Hæmorrhagiam compescere potest, uti ibidem n°. 6. probatum fuit. Farina volatilis molitorum, gyplum, bolus Armena, præcipua sunt. Colophoniam vel resinam cum bolo laudant alii. Lycoperdi fungi. dissectos orbiculos nostrates Chirurghi ad similes usus adhibere solent, & satis feliciter quidem. In Materia Medica ad hunc numerum tales formulæ habentur. Celeberrimus tamen in arte Vir (a) *Alexander Monro*, qui plurima utilissima monet in extirpationibus membrorum observanda, dudum jam horum pulverum adstringentium usum apud Scotos eviluisse notat, quia & cum sanguine, vel aliis humoribus affluentibus, in duras massas concrescunt, quæ teneram vulneris superficiem lædunt; & postea difficulter tolli possunt, cum satis pertinaciter adhæreant. Consulit hinc, ut, ligatis majoribus arteriis, reliqua trunci superficies molissimis tegatur lintei carpti filamentis, quæ non lædent crudum vulnus, interimque liquida affluentia satis absorbeant. Monetque simul, longe pulchrius hoc obtineri, & æquabiliorem pressionem conciliari parti, si loco plumaceolorum, ex linteis carptis convolutis factorum, filamenta hæc simpliciter applicentur, varia crassitie, prout major eminentia vel cavitas superficiei requirunt.

6. Cum illa methodo ligandi arterias majores dissectas, quæ hodie invaluit, Hæmorrhagiæ periculum nullum sit, non requiritur stricta adeo ligatura: sufficiet autem talis, quæ blanda pressione lintea carpta & reliquum apparatus in loco retineat. Si enim ligatura circumposita truncum magis urgeat, plurima fient mala: tota enim pressio fasciarum in partes molles solas ager, cum os cedere nequeat; adeoque sursum prementur carnes & os nudum relinquent. Præterea crudum illud vulnus (vide §. 158. n°. 5.) incipiet tumere, calere, dolere, inflammari; adeoque summus Gangrænæ metus erit, si valida compressio accesserit (vide §. 422. 7.). Unde etiam prudentes Chirurghi maluerunt, ubi metuebant Hæmorrhagiam, noctes diesque famulos apponere, qui blanda manus pressione stipricos pulveres & reliquum apparatus continerent.

7. Quam necessarium sit, ut vigilæ impediuntur in vulneratis, & quies concilietur, demonstratum fuit in Commentariis §. 202. Dictumque fuit ibidem, satis tutum esse in talibus casibus narcoticorum usum. Multo magis ergo hoc verum erit in extirpationibus. Ubi autem paulo ante operationem (vide §. 469. n°. 5.)

(a) *Medical Essays* Vol. IV, n°. 42. pag. 311. &c.

narcoticum datum fuerit, illud perget agere adhuc per aliquot horas, blandumque somnum inducet. Multum etiam huc faciet tranquilla pacatae mentis serenitas, quæ adesse solet semper, dum transierunt illa mala, quæ antea brevi futura metuebantur. Quam periculosum vero sit partem truncatam movere, constitit illo casu, cujus alia occasione (in Commentariis §. 218. n°. 6.) mentio facta fuit. Femur exstirpatum fuerat Nobilissimo viro, qui intrepido animo hanc operationem sustinuerat; cum faustus hactenus fuisset curationis progressus, vigesima prima post exstirpationem die, se ipsum solus erexit in lecto subito & magna fatigæ vi; sed mox imprudentiæ suæ pœnas luebat, ilico succedente valida Hæmorrhagia, quamvis ligatura oclusæ fuissent arteriæ: vixque à tanto periculo evasit, ope pulcherrimi instrumenti à Celeberrimo *Petito* excogitati, quo comprimebatur hiantis arteriæ orificium, simulque arteriæ truncus supra vulneris locum pro lubitu angustari poterat (\*). Omnia autem illa, quæ circa victus regimen in vulneratis à §. 192. ad §. 197. enumerantur, hic accuratissime observanda sunt. Minimum enim diætæ vitium tanto vulnere nocere poterit, cum recens chylus, ingestorum dotes sæpe diu adhuc retinens, versus hunc locum minus resistentem maxima sæpe copia feratur; uti monitum fuit in Commentariis §. 192. Præterea, cum aliquando per exstirpationes magna corporis pars tollatur, parcior victus ratio instituenda est, cum minus requiratur ad corporis nutrimentum, quam antea; & omne superfluum vulneris locum minus resistentem urgeat: unde vasorum dilatatio nimia, carnes fungosæ &c. nasci possent.

§. 472. **C**ONSOLIDATIO fit in osse, si cito curetur exfoliatio, & caveatur caries, quod fit, si ilico ei applicetur spleniolum sp. vin. mastichino madidum.

Superficies ossis in parte truncata serræ dentibus contusa fuit, unde videtur hic requiri separatio extimæ illius superficiei. Ut hanc promoverent Chirurgi, solebant candenti ferro os nudum leviter tangere (b). Merito autem hæc methodus hodie repudiatur. In vulnere enim capitis & fracturarum historia patuit, ossium consolidationem, & separationem corrupti, non indigere tanto molimine, sed felicissime perfici, modo ab aëre & pinguibus defendantur. Si ergo statim post exstirpationem ossi applicetur plumaceolum, spiritu vini cum mastiche, vel similibus, decocto madidum, aër arcetur, & felicissima cura sequi solet; uti dictum fuit in Commentariis §. 252. n°. 2. Ubi autem cauterio applicato os comburitur, certo debet separari omne illud, quod ignis vi destructum fuit; adeoque retardabitur cura. Quin imo observata fidelia videntur evincere, non semper necessariam esse illam ossis dissectionem exfoliationem. In methodo enim illa curandarum artuum exstirpatorum per insitionem, de qua dictum fuit in Commentariis §. 469. n°. 2. ilico carnis relictæ pars trunco applicatur undique, & postea accrescit: testaturque *Ruyfchius* (c) qui in cubito tali methodo institutam exstirpationem coram viderat, & quotidie deligationi vulneris adfuerat, quod nullam

(\*) Académie des Sciences l'an 1731. Mem. pag. 144.

(b) Ambroise Paré Liv. 12. Chap. 36. pag. 108.

(c) Epist. Problem. XIV. pag. 144

sensibilem separationem extremitatum ossium cubiti & radii toto curæ tempore observaverit ; creditque factum hoc ideo fuisse , quod ilico carne resectæ ossium extremitates acri minus expositæ fuissent. Ubi autem vulgari methodo membra extirpantur , licet ossa nudata diutius acri exponantur , tamen neque tunc semper sensibiles partes ab ossibus secedere monet *Celeberrimus Monro* ( *a* ). In quatuordecim enim extirpationum casibus , tantum ter ossis particulas abscississe observavit ; in reliquis ne vestigium exfoliationis inventum fuit. Ex quibus patet , nullo modo requiri , ut exfoliatio ossis dissecti promoveatur , cum non semper necessaria sit.

§. 473. **I**N carne vero , ut in historia vulnerum dictum fuit ( ab 189. 192. ad 210. ).

Omnia , quæ in curatione vulnerum numeris citatis dicta sunt , hic iterum conveniunt. Notavit autem *Celeberrimus Monro* ( *b* ) cavendum esse , ne nimis cito tollatur primus apparatus. Lintea enim carpta , pulveres styptici , fungus *Lycoperdi* &c. pertinaciter solent adherere vulneris superficiei , neque sine dolore & metu Hæmorrhagiæ inde avelli possunt ; donec suppuratione nata humescant iterum & sponte decidant : ideo noluit ante quintum diem apparatus renovari. Si vero à sanguine vel ichore fasciæ penetratæ fœtere incipiant , forfice rescindendas jubet , omniaque illa removenda , quæ non adhærent firmiter vulnere ; deinde puris linteis applicatis omnia iterum tegi voluit. Raram dein deligationem commendat , secunda quaque vel tertia tantum die faciendam , dum pruritus , in vulneris loco perceptus , acrius jam fieri pus indicat. Molli vero per lintea carpta applicata compressione spongiosæ carnis generationem præcavendam monet , & fila , quibus arteriæ ligatæ fuerunt , si non satis cito cadant , & incrementum carne tegantur , caute rescindenda jubet , ne diutius relicta postea commode educi nequeant , & fistulosum ulcus diu maneat.

Quamvis autem à dexterrimis Chirurgis extirpatio membri facta , omnesque cautelæ hoc capitulo enumeratæ scrupulose observatæ fuerint , tamen aliquando quædam sequuntur mala , quæ nec prævideri poterant facile , neque sæpe ulla arte tolli. Dictum fuit in Commentariis §. 172. n°. 1. , magnam sæpe nasci curæ difficultatem , dum post majorum membrorum extirpationem latum vulnus quotidie ingentem puris copiam colligit : sæpius enim absterfo pure , impeditur vulneris consolidatio , quod tunc in fonticuli naturam fere degenerans incredibilem copiam liquidi dimittit quotidie : unde subducto corporis nutrimento hac via , totum corpus exsiccatur vero marasmo. Si autem diu maneat in tanti vulneris superficiei collectum pus , illud , mora & calore attenuatum , venosis osculis resorbetur , & omnem sanguinem putrida cacochymia inficit ; unde iterum plurima mala fiunt. Sed rara deligatio nimiam humorum jacturam impedit , & decoctorum ex herbis vulnerariis largus usus eluet de sanguine resorptum pus , & per urinas vel sudores expellet. Ubi autem improvviso omne corporis nutrimentum huc ruit , & maxima copia per aperta hic vasa exit , in angusto spes est

( *a* ) Medical Essays Tom. IV. n°. 22. | ( *b* ) Ibid. pag. 342.  
page 345.



Homini in flore ætatis crus exstirpatum fuerat ob sphacelum; quem contraxerat; dum media ætate puteum profundum mundaret. Felicissime successerat operatio, nulla sequebatur febris, appetitus erat integerrimus, atque interim diætæ regimen debitum observabat æger, ossis extrema jam exfoliata fuerant, plagaque ipsa ad cicatricem perducebatur, tota vulneris amplitudine dimidii nummi imperialis magnitudinem circiter æquante. Cum sic omnia in vado esse credebantur, optimaque valetudine fruebatur æger, incepit de vulnere aliquid albicantis, lacteæ quasi materiæ, exire, sensimque augebatur hujus materiæ copia eo usque, ut singulis deligationibus duas tresve libras exivisse deprehenderetur: accessit simul profusus alvi fluxus. Binis his evacuationibus intra octodecim dies sic exhauriebatur æger, ut vero marasmo confectus periret. Nulla tamen causa hujus mali à peritissimis Chirurgis, qui communi consilio ægri curam gerebant, poterat detegi; nullumque inveniebatur remedium, quod cohiberet infaustum illud nutrimenti corporis per vulnus & alvum profluvium (a).

Alterum, quod graviores operationes chirurgicas aliquando sequitur, malum & convulsio est; quæ non statim, sed diu post, licet omnia prospere cedere videantur, sæpe ægros opprimit. Sic *Mauritius à Reverhorst* Anatomies Professor Hagæ Comitum in Epistola data ad *Celeberrimum Ruyschium* (b) narrat, quod in virgine triginta duorum annorum, postquam crus infra genu dextra admodum & celeri manu resectum fuisset, atque ipsa curatio feliciter pro tempore succederet, optatumque finem polliceretur; infaustus tamen & lethalis eventus fuerit. Continui & intolerabiles dolores aderant in parte affecta, similesque percipiebantur in ipsa parte ablata (quod sæpe in exstirpationibus observatur). Ante debitum tempus menses prodibant cum validis intestinorum cruciatibus, & dejectionibus assiduis. Postquam autem hæc mala cessaverant, statim conqueri cepit de faucium anxietate, & respirandi difficultate, quæ passioni hysteriæ, familiari huic virgini malo, adscribebantur. Sed brevi postea, colli dolor & immobilitas, masticatio & deglutitio impedita, oris clausura, musculorum faciei distortio, sinistram ominabantur eventum; licet omnia in vulnere laudabilia apparerent. Nec internis nec externis remediis applicatis minuebantur hæc symptomata; febris intendebatur, accedebat delirium, tandemque mors omnibus his malis finem imposuit. Additque *Egregius Vir*, se in illis, qui ab hernia intestinali secti fuerant, quandoque similia symptomata observasse, & lethali plerumque cum eventu, licet saluti jam proximi viderentur.

Apparet ergo ex his observatis, nunquam posse promitti in gravioribus operationibus Chirurgicis felicem curam, semperque adesse periculum; non tantum in ipso opere, uti *Celsus* (c) monuerat, animi deliquium vel sanguinis profusionem metuens; sed diu etiam postea, licet omnia ex voto cedere videantur. Debent ergo Chirurghi & Medici ægri amicos monere, talia pericula in omnibus exstirpationibus, quamvis dexterrime factis, adesse; ne postea vel ignorasse, vel sefellisse videantur. Non sine ratione ergo & *Hippocrates* & *Aretæus* (vide Commentaria §. 233.) convulsionem, vulneri accedentem lethalem damnaverunt.

(a) De la Motte Traité complet de Chirurgie Tom. III. pag. 385. &c.

(b) Ruysch. Epist. Anatom. Problem. 142. pag. 6.

(c) Lib. VII. Cap. 33. pag. 497.

Optimum, quod ars habet in dolendis illis casibus, est, ut blandissimis oleis, fomentis emollientissimis, tepidæ vapore &c. totum corpus, & imprimis partes dolentes & convulsæ, laxentur; uti in Commentariis §. 234. n°. 3. ex *Hippocrate*, *Aræto*, *Galeno* &c. commendatum fuit. Pulcherrimum casum, qui horum vim salubrem probat, habet *Paræus* (a). Militi, ob Sphacelum post vulnus sclopeti brachio inflicto natus, in ipso cubiti articulo extirpaverat membrum: post quindecim dies convulsioprehendit miserum, sic ut maxillæ firmissime clauderentur, & labia & faciei muscoli distorti risum Sardonicum facerent. Cum omnium rerum indigus, in summa domus parte decumberet, male tecto corpore, frigori & vento expositus æger, *Paræus* iussit illum deferri in stabulum, in quo pecorum magnus numerus erat, & fimi ingens copia. Ab utraque parte corporis positis carbonibus ardentibus, perfricuit nucham, brachium & crura linimentis, & fimi acervo mundum stramen imposuit, deinde supra hoc militem linteo calido involutum reposuit, & bene tecto corpore reliquit per tres dies & noctes. Fimi blandus & humidus calor adeo profuit in desperato fere hoc casu, ut, post copiosum sudorem & levem diarrhæam, inceperit æger parum diducere maxillas, antea spasmo pertinacissime clausas; & tandem ab ipso mortis limine redux convaluerit.

§. 474. **S**I ægro, sic truncato magnam partem (466. ad 471.) viscera chylopoæa & hæmatopoæa valida sunt, plethoræ effectus sæpe sequuntur (106.), quibus ut auferatur causa, missio sanguinis aliquoties, pro re nata, instituenda, & victus moderatus.

Visum fuit aliquando, supervixisse diu homines, quibus in bellicis conflictibus utrumque crus globo ex tormentis bellicis majoribus emissio ablatum fuerat. Sed quanta tunc pars corporis periit! Pergunt interim viscera omnia, si cæteroquin sanus fuerit talis homo, suis fungi muneribus: hinc ex ingestis tantum chyli & sanguinis parabitur, quantum antea; vasorum tamen recipientium numerus longe minor erit; adeoque reliqua vasa magis debebunt distendi & repleti, ut auctam quotidie humorum copiam possint recipere. Omnes ergo effectus plethoræ sequentur necessario: Et quia artubus truncati ad solitos labores minus idonei sunt, augebitur plethora, dum quotidie minus dissipabitur per corporis motum, quam antea solebat. Nihil ergo superest, quam ut sanguinis missione tollatur nimia copia, repetenda aliquoties, si signa plethoræ urgentis redeant; sensim autem postea minuatur sanguinis educendi copia, ut sic gradatim corpus insigni huic mutationi assuescat. Simul victus instituat talis, qui sustinendo corpori sufficiat quidem, nec tamen nimis augeat humorum copiam. Nisi hæ cautelæ observentur, metus est, ne vasa nimis distenta rumpantur: unde Apoplexia; Hæmoptoe &c. fieri poterunt, nisi dilatatis orificiis sanguinis nimiam copiam in locis minus periculosis effundant; uti dum salubri narium Hæmorrhagia, cruenta dejectione &c. tollitur plethora. Sic *Galenus* (b) monet, quod ob sanguinis plenitudinem, of-

(a) Livre XII. Chapitre 37. page 309.

Articulis Charter. Tom. XII. pag. 480.

(b) Commentar. IV. in Librum Hippocr. de

culis venarum in intestinis apertis, cruenta alvo exeant, sic ut sit affectus similis hemorrhoidibus, in hoc uno diversus, quod ille (hemorrhoides) circa sedem nascantur, in hoc vero affectu vena aperiantur in intestinorum anfractibus, vel etiam in intestino recto, sed longe ab ano, & circa ejus initium. Multos autem videmus hac pati, quibus membrum amputatum fuerit &c. Sed in manu Medici non est copiam sanguinis nimiam per vasa dilatata vel rupta educere in talibus corporis locis, in quibus tuto hoc fieri poterit; adeoque semper metus est sinistri eventus. Sola venæ sectio in tali casu nocituram sanguinis abundantiam minuit sine periculo. Nisi enim vel sponte, vel per artem, solvatur plethora in illis, qui magnam corporis partem sic amiserunt, sæpe ad thoracem vel pulmonem confluit, gravisque tunc est affectus. Alterutrum enim illis tunc supervenit, peripneumonia, aut pleuritis, vel sanguinis sputum (a). Et Benedictus (b) inter observationes suas sequentem regulam præditam posuit: Gibbosi, & quibus membra amputata, fluxionibus magis lacerati, & phthisi maxime periclitantur.

§. 475. **A**MISSI damnum facit imitatio artificialis perditæ; per fabricatas machinulas. Vid. Aquapendentem, Hildanum, Solingen, Paræum.

Facile potest adaptari truncato membro arte facta machina, quæ figuram partæ ablatae refert; sicque, dum vestibus regitur, tollitur deformitas. Sed, Mechanici miris inventis aliquem adhuc usum ablatae partæ restituere potuerunt. Super locum amputationis enim musculi, & illorum partes residuæ, ad voluntatis nutum turgent & inflantur: Adaptaverunt autem his musculis pulcherrima arte fabricatas machinas: per quas, dum musculi, qui antea truncatae partæ ablatis articulos flectebant v. g., turgent, aliqua quasi imago similis motus excitatur. Integrum tale sceleton ferreum & ab anteriori & à posteriori parte delineavit Fabricius ab Aquapendente. Manus talis artificialis figuram, quam ab optimo artifice precibus vix extorquere potuerat, exhibuit Paræus (c), ubi & plures aliæ similes figuræ habentur.



## DE COMBUSTIONE.

§. 476. **S**I ignis ardens, vel in fervido corpore latens, corpori nostro applicatur, oritur destructio vasculorum, extravasatio humorum, pro varietate causæ, durationis, partis affectæ, varia.

Datur in corpore hominis sani calor gradus, Thermometris mensurandus, &

(a) Ibidem pag. 451.

(b) Theatrum Tabidorum pag. 108.

(c) Livre XXIII. Chap. 12. page 580 &c.

quo nec liquidis nec solidis aliquid noxæ accidit. Raro etiam in fortissimis hominibus calor ille nonagesimum sextum gradum Thermometri Fahrenheitiani (dicti à primo portatilium thermometrorum in his saltem regionibus artifice) excedit. Ubi vero ultra centesimum gradum in morbis ascendit, incipit sanguis ejusque serum ad coagulationem disponi: si autem centesimum & vigesimum gradum æquat calor, serum sanguinis coagulatur. Calor ergo ad hunc gradum evectus jam liquida nostra mutat; solidæ autem partes nondum videntur inde multum lædi. Ubi vero ad ebullientis aquæ calorem, quæ circiter ducentesimo & duodecimo gradu mensurari solet, perventum est, & citius adhuc; jam solidæ corporis partes inde læduntur, & destruuntur quædam ex illis. Aqua enim ebulliens, vel & ebullitioni proxima, si tangat partem nostri corporis, paulo post ruptis vasis tenerimis, quæ epidermidem cuti nectebant, effunduntur humores, qui collecti epidermidem in bullas elevant. Ubi autem major calor, quam est ebullientis aquæ, corpori humano applicatur, plura vasa destruuntur, & citissime quidem. Sic ferrum candens uno momento destruit omnem partem corporis, quam tangit.

Ignis autem corpori applicatus vel ardet & lucet, uti v. g. candelæ flamma, ardens pruna &c.; vel inhæret quibusdam corporibus sic, ut non luceat quidem, interimque pessime comburat omnia, quæ tangit. Sic v. g. ferrum potest adeo calere, ut sulphur accendat, & partes nostri corporis ad ossa usque destruat; nec luceat vel ardeat tamen. Tunc dicitur latere ignis in talibus corporibus, quamvis adeo sensibiles effectus præstet. Effectus illi reduci possunt ad vasculorum destructionem, humorum extravasationem, atque eorundem coagulationem. Sic v. g. si aqua ebulliens per aliquot tantum momenta partem corporis tangit, ruptis vasculis sub epidermide colliguntur extravasati humores: verum & cutis, & sæpe panniculi adiposi suppositi pars sic inde mutantur, ut coagulatis fluidis tollatur omnis vitalis influxus & effluxus humorum in his locis; & postea partes sic affectæ, vere gangrænosæ, suppuratione in omni ambitu facta, separari debeant. Ubi ferrum candens parti corporis applicatur, statim dura & siccissima eschara nascitur, nihilque extravasati liquidi apparebit in illo combustionis loco, quamvis vascula destructa fuerint: Ratio facile patet, quia eadem illa ignis actione liquida coagulata fuerunt. Extravasatio ergo humorum levioris adhuc combustionis effectus est; validiori autem liquida & solida simul in siccam crustam convertuntur.

Effectus vero ignis corpori applicati differunt pro varietate *CAUSÆ*. Ignis quidem videtur esse ex sua natura unus idemque: sed rarissime corpori nostro applicari potest purus ignis, semper enim fere alteri corpori adhæret. Nam purissimi alcoholis accensi flamma nequidem purus ignis est, sed aquam secum rapit. Speculis ustoriis collecti solis radii in foco suo forte purum ignem habent; in reliquis experimentis ignis semper pabulo suo sustentatur, vel aliis corporibus unitur. Illa autem corpora, quæ ignem in se continent, vel pabulum ardenti præbent igni, dicuntur causæ illorum effectuum, qui ab igne hoc modo corpori nostro applicato fiunt. Ingens autem observatur diversitas in his, per experimenta tantum determinanda. Sic per accensi alcoholis flammam manum movere licet, sine damno fere; si vero quercino ligno focus instructus ardeat, ilico combureretur. Præterea in fluidis detecta fuit hæc proprietas, quod quædam longe

majorem copiam ignis capere & retinere possint, quam alia. Aqua igni ardenti imposita vix calefcet ultra ducentesimum & decimum quartum gradum thermometri Fahrenheitiani; & ubi semel hunc caloris gradum acquisivit, non incalcet plus, quantumcumque etiam suppositus augeatur ignis. Oleum autem lini, olivarum, vel simile aliquod ex seminibus vel fructibus expressum, dum ebullit, ad sexcentesimum ejusdem thermometri gradum facit ascendere mercurium. Unde enormis diversitas effectuum observatur, dum vel aqua ebulliente, aut fervido oleo, pars corporis ambutitur.

DURATIONIS autem ratione effectus ignis corpori applicati augeri vel minui facile patet. Ferrum candens uno momento applicatum cuti, mox remotum, comburet quidem, sed leviter; diutius appressum parti cuidam ad ossa usque omnia destruet. Longe periculosior hinc combustio ab ebulliente pice, quam ab oleo; quia illa tenacissime adhæret, oleum vero citius defluit.

PARTIS AFFECTÆ autem diversa indoles, & varius in corpore humano usus, iterum novam diversitatem facit. Cyclopes illi, qui anchoris cudendis quotidie incumbunt, volas manuum instar cornu durissimas & insensiles habent, atque impune vivum ignem, imo & candens fere ab igne ferrum, arripiunt: idem tamen, dum à valido labore lassī foculis suis assidentes vesperi obdormiunt, sæpe à modico tali igne cutim in crutibus combustam, & in vesiculas elevatam, habent. Dum civis Hagensis ori admotum sclopetum inflat, infortunato casu incenditur pulvis pyrius, quo, inscio hoc homine, gravidus erat tubus; miserieque palatum, gula, gingivæ, lingua adurebantur. Licet autem & venæ sectio, & alia selecta adhiberentur remedia, per octiduum tamen nihil omnino deglutire potuit; posteaque, separatis partibus mortuis, viva supposita cruda & dolentissima novas fecerunt misérias, donec tandem post diurnam veluti cum morte colluctationem convaluerit, ossis etiam fragmentis à palato separatis (a). Facile autem patet, longe minus periculi fore & molestiæ, si loco gulæ manum pulvere pyrio accenso combussisset.

§. 477. **H**UJUS (476.) varietatis gradus varii similes sunt his, qui decurrunt à prima & levissima inflammatione, (370. ad 404.) usque in sævissimum sphacelum.

Quæcumque jam fuerit causa ignem continens, & applicans corpori, quantumvis magna aut parva fuerit duratio hujus applicationis, cuicumque denum parti corporis ignis applicatus fuerit, effectus quidem erunt varii, sed omnino similes illis tamen, qui in variis inflammationis gradibus observantur: summus enim ignis partem corporis destruens non plus facit, quam Sphacelus omnia corumpens. Levis autem, quamvis jam molesta, ignis actio tumorem aliquem & ruborem excitabit in parte quadam corporis, fere Erysipelatis instar; aucta ignis vi, tumor & rubor augebuntur, & fiet vera phlegmone: dein pergente, vel & aucta adhuc ignis actione, vesiculæ elevantur, & omnia Gangrænæ, ex valida inflammatione natæ, signa apparent: ultimo per ignem omnia destruantur ad ossa usque, uti in vero Sphacelo fit. Dictum autem fuit in Commentariis §. 370., ob hanc effectuum similitudinem Phlegmonen nomen ab igne

(a) Stalpart, vander Wielen Observat. rar. Cent. 1. Observ. 24. pag. 100.

accepisse.



accepisse. Quot autem possunt esse gradus intermedii inter levissimum Erysipelas & perfectissimum Sphacelum, tot etiam intercurrunt inter minimam & maximam combustionem. Sola fere diversitas est in celeritate, quia per ignem applicatum momento temporis perfectus Sphacelus fieri poterit; qui semper, post levissimam quamvis inflammationem, tardius sequitur.

### §. 478. **H**INC phænomena, diagnosi, prognosis eadem.

Ex modo dictis patet, Phænomena combustionis eadem esse illis, quæ inflammationem comitantur. Verum, sicut inflammatio, pro varia magnitudine & intensitate, varios habebat exitus, variamque requirebat medelam, uti in ejus historia dictum fuit; ita etiam in Combustione obtinet: adeoque & cognosci debent illa signa, quæ docent variam combustionis magnitudinem. Horum cognitio ad Diagnosin pertinet. Levis combustio noscitur ex cognita causa, quæ nec valida fuit, nec diu applicata: uti v. g. si aqua, nondum omnino fervida, per momentum tantum partem corporis attigerit; rubor cutis, levis tumor, dolor molestus quidem, nec tamen acerrimus, vesiculæ vel nullæ vel paucæ tantum, neque statim post Combustionem ortæ, & lymphida aqua plenæ, hujus speciei Diagnosin absolvunt. Pejor combustionis gradus scitur, cognita causa validiori, aut majori duratione ejusdem, dolore valido, vesiculis liquore flavescente plenis statim post combustionem apparentibus, sensu tensionis & rigiditatis in cute loci combusti. In pessima autem combustionem, ubi per validissimam causam subito destruantur omnia, nullæ vesiculæ sunt in loco ambusto, quæ tamen postea sæpe in ejus ambitu oriuntur, cutis livida, imo aliquando penitus nigra est, & nullum sensum doloris habet, licet scalpello pungatur, dura & penitus arida.

Prognosis autem pendet à cognita combustionis specie per signa diagnostica; indole partis læsæ, & ægri temperie. Hicque imprimis cauti debent esse Medici & Chirurghi, ne plus promittant, quam efficere possint. Ubi enim levis tantum combustio est, sine cicatrice relicta sanari poterit; si vero ruptis vasibus & effusis humoribus, vel iisdem coagulatis per ignem, in parte affecta destructus fuit humorum circuitus, totum illud suppuratione, in omni ambitu nata, separari debet, & turpiter errabit ille, qui facilem talis combustionis curam, & sine cicatrice, promittet: separata enim hac parte mortua cavum ulcus fiet: cuius amissa substantia raro vel nunquam sic reparari poterit, ut æquabilis fiat superficies cum cute vicina. Prout jam tenerioris vel durioris fabricæ fuerit pars ambusta, iterum prognosis variat. Sic v. g. circa oculos summum semper periculum etiam à levi combustionem est, ne lædatur visus. In atrabilaris, cacochymicis, & scorbuticis imprimis corporibus, levis sæpe combustio in pertinacissimum ulcus degenerat. Ad omnia ergo hæc in Prognosi attendendum est, ne postea mala sequentia adscribantur Medico vel Chirurgo, si non monuerit, hæc metuenda esse.

### §. 479. **Q**UIN Curatio nihil differt: potus antiphlogisticus semper necessarius.

Sicut enim nulla generalis cura est inflammationis, sed illa variat, prout in  
E e e e

resolutionem, suppurationem, Gangrænam, vel scirrhum tendit; sic etiam & in combustionem longe alia requiruntur, quando illa intra limites resolvendæ inflammationis subsistit, quam si in crustas gangrænosas vel & sphacelatas partem converterit. Sequentibus ergo paragraphis pro vario gradu combustionis peculiaris cura tradetur; patebitque, illam satis respondere indicationibus curatoriis in phlegmones historia enumeratis. Unicum tantum hoc in omni combustionis specie commendari potest, nempe potus tenuis antiphlogistici usus. Semper enim inflammatio levem etiam combustionem comitatur. Imo in gravioribus combustionibus, imprimis si magna pars corporis affecta fuerit, omnia illa conveniunt, quæ in valida phlegmone curanda laudata fuerunt. Venæ sectio hinc, etiam repetita pro re nata, & purgantia antiphlogistica summi usus sunt. Hac methodo *Hildanus* (a) feliciter curavit tinctoris famulum, qui in ahenum tinctura calida, nec omnino fervida tamen, plenum inciderat; simul optimis externis remediis applicatis, intra quatuordecim dies ab universi corporis combustionem tali sanatus fuit. Sed hæc combustio, uti ex historia patet, non excesserat limites resolvendæ inflammationis, nisi paucis tantum in corporis locis, quæ ramentis ligni quercini, & aliis similibus in fundo aheni jacentibus contigua fuerant; quibus etiam, uti ibidem monet *Hildanus*, alia curationis methodus adhibita fuit. Patet saltem ex hoc exemplo, quantum illa, quæ in curanda inflammatione resolvable fuerunt laudata, etiam in combustionem profint.

§. 480. **U**STIO intra limites resolvendæ inflammationis subsistens (386.) curanda his, quæ liquida condiant, moveant, vasa expediant, conservent: id sit igne moderato, fottu, cataplasmate, (395. ad 401.) butyro loto, spiritu vini cum pauco vitriolo.

Si combustio parvam tantum corporis partem læserit, non opus erit venæ sectione, purgantibus antiphlogisticis &c. corpus turbare; sufficiet enim tunc topici medela ipsi parti affectæ adhibita. Ubi vero tam levis ustio fuit, ut resolvablem inflammationem tantum excitaverit in parte, satis facilis cura est: tuncque omnia illa, quæ in singulis fere familiis habentur diversa, remedia valent. Quod enim mirum videtur, optimi etiam Chirurgi oppositæ virtutis remedia hic commendant, emollientia nempe, & adstringentia, attrahentia & repellentia &c. Sic *Paræus* (b) portulacæ, lactucæ, plantaginis &c. succos, mollissimum ovi albumen laudat; & eodem in loco ad idem malum commendat lutum forti aceto dilutum, atramentum scriptorium oxycrato mistum alumen rupeum aqua solutum, imo & acres ceparum bulbos cum pauco sale tritos applicari summo cum frictu monet. Vidi aliquando & plurima alia fuisse applicata in tali casu & cum levamine quidem, modo frequenter renovarentur. Hoc & monuerunt fere omnes Chirurgi, in initio applicata remedia locis combustis sæpe renovanda esse, donec dolor sedetur; & uti *Paræus* (c) dixit, donec calor parti impressus eductus fuerit. Dum *Hildani* uxor sapæ ebullienti ad carpum usq;

(a) De Combustione cap. 7. pag. 922.

(b) Liv. XII. chap. 17. 18. pag. 300.

(c) Ibidem.

que dextram manum improvise immiserat, ilico dolor vehementissimus ortus est, non tantum in manu, verum etiam toto brachio. Calida aqua abluit statim sapam, deinde partem læsam inunxit linimento, ex cepis crudis sale, sapone & oleo amygdalarum dulcium & rosaceo composito, brachium vero oleo rosaceo inunxit, & fascia posca intincta involvit; simulque addit, quod sæpius omnia illa iteraverit, tam pulchro quidem cum successu, ut tantam combustionem nulla cutis exulceratio secuta sit, præter parvam pustulam in pollice, alteramque similem in digito indice, quæ tamen levi negotio solo Unguento Basilico curatæ fuerunt (a). In alio casu dicit, quod singulis horis quater Emplastra renovaverit prima die, sicque major pars Empyreumatis evocata fuerit (b). Videntur ergo plurima esse remedia, quæ combustionem in hoc gradu curare possunt, modo tales habeant proprietates, ut liquida stagnantia condiant, & moveant, vasa interim expediant simul, & illorum integritatem conservent. An ignis, applicatus corporis humani partibus, illis manet unitus pro tempore? an inde potest educi per attrahentia, uti spicula glacialia ex partibus congelatis aquæ frigida vel nivis applicatione educuntur? Certe sola ignis prudenti applicatione lenitur dolor in parte combusta, tandemque totus tollitur. Unde optime *Fernelius* (c) dixit, quod ignis, si propius ipsi pars usta admoveatur, sit proprii inusti mali alexiterium, illamque revocato Empyreumate dolore levet: additque, nonnulla remedia impressum partibus ardorem foras calore prolektare: ari & porri folia ambustis præsentis remedio esse dixit, & postea numerosum catalogum addit medicamentorum, quæ ad eundem scopum faciunt, licet viribus medicatis omnino diversis gaudeant. Vidi sæpius, sola aqua tepida applicata, unguento populeo inuncto, vel & alio simili, levatum fuisse dolorem in parte combusta; qui tamen paulo post augebatur iterum, levandus ilico, modo aliud linimentum aqua tepida madidum parti applicaretur, vel nova copia ejusdem linimenti inungeretur; sicque repetitis vicibus eadem applicando sensim omnis dolor evanescebat. Quidquid sit de illa ignis proprietate quam tantum dubii instar proposui, sufficiet Practico novisse illa remedia, quæ tuto & certo dolorem in ambustionibus leniunt, & malum hoc sanant. Ufus autem docuit, hæc obtinere posse sequentibus.

**IGNE MODERATO.** Si v. g. manus dextra combusta fuerit, sinistra foco admovetur in tali distantia, ubi gratissimum calorem percipit; tunc manus dextra in eadem à foco distantia ponitur: incipiet augeri dolor in initio, sed brevi post minuetur iterum; parum propius admoveatur manus dextra foco, dolebit iterum, & paulo post evanescet dolor: sic sensim propius ad focum accedat manus læsa, donec possit ferre calorem foci in illa distantia, in qua manus sana illum sine molestia tolerare valet. Ubi hoc factum est, sanata est combustio, & quotidianis experimentis hujus methodi utilitas probatur, diciturque vulgo tunc exuri combustionem (*nystranden*).

**FOTU, CATAPLASMATE. &c.** In Materia Medica ad hunc numerum tales formulæ habentur, & plures aliæ similes adhiberi possent. Omnium maxime profunt, si tepida applicentur, (frigida enim actu nocere ambustis ob-

(a) Hildan. de Combust. cap. 6. pag. 922.

(b) Ibid. cap. 9. pag. 927.

(c) Therapeut. Lib. VI. cap. 20. pag. 453.

servantur) & renoventur frequenter, donec dolor sedetur. Emplastra plumbata, linimenta similia ex plumbi calcibus facta, mollissima olea quævis pariter profunt. Spiritum vini autem omnibus remediis, quotquot adhuc inventa fuere, palmam præripere *Sydenhamus* (\*) asseruit; si nempe lintea spiritu vini imbuta partibus ambustis applicentur ilico, & horum applicatio repetatur, donec dolor ab igne excitatus penitus evanuerit; posteaque bis in die eadem tantum applicanda voluit. Norandum hic est, quod pariter magnus ille vir commendet frequentem applicationem ejusdem remedii renovati in initio mali. Pauculum vitrioli addidisse spiritui vini forte proderit æque, ac alumen, & similia, adstringendi & repellendi vi prædita, quæ laudata fuerunt à *Paræo* & aliis. Forte hæc sua efficacia sanguinem aliena vasa ingressum, constringendo vasa, repellunt versus latiorum arteriarum locum, sicque inflammationem hic natam solvunt. Omnia tamen hæc remedia, quantumvis etiam decantatissima fuerint, tantum profunt, ubi combustio resolvendam inflammationem fecerit; si enim sic destructa fuerint vasa, vel coagulata liquida, ut non possit separari resolutio concreti, nec stagnantibus possit conciliari motus; alia curatio requiritur, uti in sequentibus paragraphis dicitur.

§. 481. **U**STIO itura in gangrænam, crispata jam & erosa cute; elevatis bullis, curanda ut inflammatio talis, foru, cataplasmate, emollientibus, digestivis (402. ad 454.).

Si jam signa (vide §. 478.) doceant, combustionem tantam fuisse, ut benigna resolutione curari non possit, sed metus sit, ne in gangrænam transeat, tunc omnia illa convenient, quæ ad similem inflammationem, numeris hic citatis, commendata fuerunt. Benigna suppuratio tunc quæ separat omne illud, quod in solidis & fluidis sic mutatum est, ut vitæ & sanitatis legibus amplius obedire nequeat, promovenda est, mollissimis fomentis & cataplasmatibus applicatis. Notandum tamen, bullas in loco combusto elevatas non semper notare, gangrænam hic adesse. Si enim non statim, sed post aliquot tantum horas appareant, & tenui lymphida aqua turgeant; neque dura & crispata appareat subjecta & vicina cutis; nondum desperandum est, sine suppuratione posse curari talem combustionem. Vidi enim sæpius, ignis vi solutos quidem nexus tenerrimos epidermidis cum cute subjecta, illam tamen non admodum læsam; & sine ulla suppuratione, vel cicatrice relicta, sanatam fuisse talem combustionem. Bullas illas elevatas ilico pertundendas volunt *Paræus* & *Hildanus*, ne contentus ichor rodat subjectam cutem & exulceret; sed & in me ipso, & aliis, frequenter vidi, nullam noxam ortam fuisse, licet integræ relinquerentur: non enim tam cito corrumpitur illud extravasatum; & cuticula, integra relicta, & ab aëre & ab applicatis remediis defendit tenerrimam illam pulpam nervosam, quæ supponitur, & adeo dolet, si nudetur; ut unusquisque in se ipso expertus aliquando fuit, quando à quacumque causa epidermis in quodam corporis loco deraditur: tunc enim dolor lancinans molestissimus (*schrynenide pyn*) percipitur. Solet enim con-

(\*) De Peripneumonia Notha, in fin. pag. 343.

tentus his bullis ichor sponte resorberi vel dissipari, & cute subjecta testa renata Epidermide, illa pars, quæ in bullas elevata fuerat, sponte secedit postea sine ullo dolore. Si vero subjecta cutis sic læsa fuerit, ut per suppurationem tolli debeat non resolubilis inflammatio, præstat levi apertura harum bullarum exitum facere contento ichori, epidermidem vero relinquere; quæ nunquam quid mali faciet, neque corrumpetur. Si enim, uti solet fieri sæpe, abscindatur epidermis jam collapsa, nuda cutis superficies dolentissima erit. Hoc pulchre notavit *Parvus* (a) dicens, profundas combustiones minus dolere, quam superficiarias: monuitque Chirurgos, ut in his casibus dolentissima loca reterent raro linteo, ne rudiori tactu hæc irritarent, dum depurant ulcus. Similem cautelam in superficialiis illis combustionibus commendat *Hildanus* (b), totumque locum ambustum tela Cambriacensi tegebat; neque auferbat illam, donec sanatus esset locus. Certe Epidermis relicta magis naturale tegumentum dabit.

Ubi ergo non resolvenda inflammatio à combustionem nata suppurationem requirit, mollissima cataplasmata proderunt, & reliqua ista, de quibus dictum fuit §. 402. & sequentibus, ubi de abscessu agebatur. Et licet nullum profundum ulcus adfuerit, sed sola tantum epidermis secesserit, maxima tamen sæpe copia optimi puris quotidie in loco ambusto nascitur; sicque sensim sanatur malum. Mirabatur hoc quam maxime *Hildanus*, dum curabat ancillam, quæ fervida aqua totum crus combusserat ad genu usque. Singulis enim deligationibus, quæ bis quotidie fiebant, ultra semilibram puris albi, æqualis & optimi, invenit in linteis & Emplastris amotis, duravitque per multos dies tam copiosi puris effluxus; licet sola tantum Epidermis secessisset, nullibique profundum ulcus, multo minus eschara gangrænosa adesset (c). Curatio autem hujus combustionis, per suppurationem facta, quinque septimanarum spatio absolvebatur.

Cum autem causa comburens, non semper æquali vehementia in omnem loci ambusti ambitum egerit, uti sæpe fit; accidit aliquando, ut in quadam parte resolubilis inflammatio sit, in alia minime; unde tunc varia pro re nata applicari debent remedia. Sic v. g. dum aqua fervida delabitur in corporis partem, ille locus, quem primo tangit, longe pejus afficietur, quam vicina, per quæ postea defluit. Unde in casu illo, (de quo §. 479. dictum fuit,) ubi tintoris famulus toto corpore in fervidam fere aquam inciderat, *Hildanus* totum fere corpus quidem inunxit unguento ex sapone, sale, cepis crudis &c. confecto, quibusdam tamen locis, ubi combustio profundius penetraverat, mollissima tantum remedia applicuit. Nunquam tamen nocebit, licet resolutio vix sperari posse videatur, in gravioribus combustionibus, venæ sectionem, purgantia antiphlogistica, diluentia &c. adhibere; cum illis cito applicatis, & si opus fuerit repetitis, multoties etiam incipiens Gangræna feliciter curetur; uti dictum fuit §. 441. Imprimis si facies ambusta fuerit, unde turpis, & tota vita manens, deformitas merito metuitur; vel & aliquando cæcitas, si vel oculi ipsi, vel vicina his loca læsa fuerint. Celeberrimo Boerhaavio tale infortunium quondam accidit, dum, Papiniana machina dissiliente, fervidissima aqua in faciem insiliit; quæ & se insinuans intra vestes brachium misere combusserat. Tota fa-

(a) Liv. XII. chap. 18. 19. pag. 301.

(b) De Combustione cap. 7. pag. 224.

(c) Hildan. Observ. Chirurg. Cent. IV. Observ. 93. pag. 372.



cies mox in bullam elevata fuit, palpebræque tumidissimæ sic impediabant omnem visum, ut nequidem candelæ lumen distinguere potuerit. Ilico sibi sanguinem mitti ad animi deliquium usque iussit; & sequenti die venæ sectionem repetendam curavit: deinde purgans satis forte sumsit; quamvis etiam à levioribus purgantibus ad syncopen usque fere moveretur. Solo unguento nutrito faciem inungi curavit, & Emplastro ex lapide Calaminari tegi. Subsederunt tumidæ partes post tam validas evacuationes, & victu tenuissimo & potibus antiphlogisticis magna copia sumtis tantum profecit in curatione periculosæ hujus combustionis, ut magno generis humani bono, salvis oculis, incolumis evaserit à tanto malo; & post octo vel novem dies iterum in publicum prodierit. In brachio tamen fœda cicatrix post diuturnam suppurationem relicta fuit; ibi enim aqua fervida, inter vestes se insinuans, diutius manserat applicata cuti.

§. 482. **U**STIO jam in crustas gangrænosas, vel sphacelatas acta, curanda ut illi morbi (419. ad 476.).

Ubi autem combustionem sic destructa fuerunt vasa, aut humores adeo coagulati, ut omnis influxus & effluxus humorum in parte affecta impediatur, vera Gangræna est; &, si ad ossa usque malum penetraverit, Sphacelus. Omnia ergo illa, quæ de curatione horum malorum in numeris hic citatis dicta fuerunt, in tali casu proderunt. Debet nempe mortuum illud & corruptum separari à vivis partibus, quibus cohæret. Et in his casibus apparet evidentissime inanis jactantia illorum, qui arcanis suis remediis brevi tempore, & sine cicatrice relicta, se omnes combustiones curare posse gloriantur. Plures tales casus quotidie occurrunt, & fere semper vidi, quod aqua ebulliens, dum in partem quandam corporis decidit, illum locum, quem primo tangit, gangrænosum reddat; reliqua vero loca, per quæ successive dein defluit, levis tantum comburat. Si tunc in tali loco pertundatur Epidermis in bullas elevata, subjacet macula cinerea, vel & flavescent, quæ vera eschara gangrænosa est; & iisdem legibus à vicinis partibus vitalibus per suppurationem solvitur & excidit, ac in Gangrænis, ab aliis causis ortis, accidit; ut in Commentariis §. 444. explicatum fuit. Si vero ab igne ardente, pulvere pyrio, oleo ebulliente, aliisque gravioribus causis combusta fuerit corporis pars quænam; escharæ illæ durissimæ fiunt & adeo crassæ, ut scarificationibus sæpe profundis opus sit, ut partes vivæ suppositæ ab hoc mortuo incumbente liberari possint. Sola mollissima unguenta tunc prosunt, uti & fomenta & cataplasmata similia: omnia exsiccantia & adstringentia nocent. Spiritus vini, adeo laudatus à Sydenhamo & aliis ad omnes combustiones, inducendo has crustas retardat curationem non tantum, sed & sæpe omnia mala augeat. Patuit hoc evidentissime in tristissimo casu, quem toties laudatus de la Motte (a) refert Hysterico paroxysmo correpta puella prona facie in ignem delapsa est: dumque forte dolore excitata se erigere voluerit, supina denuo in ignem cecidit; unde tota facies, & collum ad mammas usque, uti & tota cervix ad humeros usque miserrime combusta fuerunt. Mox lintea, spiritu vini madida, locis ambustis applicata fuerunt, & per triduum sic pergebatur. Sed auge-

(a) Traité complet de Chirurgie. Tom. III. pag. 318. &c.

batur dolor, & nigredo jam prima die apparens extendebat se quaquaversum, una cum fœtore cadaveroso intolerabili. Bona fortuna facies levius combusta fuerat, & oculi manserant illæsi. Sed a mento ad mammas usque, & a nuca ad angulum inferiorem utriusque scapulæ, nihil nisi mera crusta arida gangrænosa erat. Profundæ fiebant scarificationes in omni ambitu gravissimæ hujus combustionis; & deinde rimis illis factis applicabatur Unguentum Ægyptiacum in spiritu vini dissolutum; impositis simul spleniis spiritu vini madidis. Sed omnia manebant siccissima, nullumque apparebat vestigium incipientis separationis. Ideo ablatis his remediis, totum locum ambustum texit unguento mollissimo, ex cera flava, oleo olivarum, & vitellis ovorum sub prunis ardentibus ad crepaturam usque coctorum, confecto. Nondum per triduum hoc applicatum fuerat, quin omnia humescerent. Satis cito dein inceperunt decidere escharæ mortuæ & corruptæ, & mensis spatio totus locus purus erat & nitidus; ultra quatuor tamen mensium spatium requirebatur, antequam ad cicatricem perducipotuerit gravissimum hoc malum. Similes aliquot casus adducit idem auctor, quibus confirmatur, in talibus malis mollissima tantum conducere remedia. Similia etiam in talibus combustionibus commendat *Hildanus* (a). Ubi vero ad ossa usque omnes partes molles ambustione destructæ sunt, sola exstirpatio superest; uti in sphacelo dictum fuit. Talem casum *de la Motte* in loco modo citato habet.

Patet ergo, curam Gangrænæ & Sphaceli in ejusmodi combustionibus convenire; & semper in Prognosi tunc monendum esse, tale malum non nisi longo temporis spatio curari posse, semperque turpem mansuram esse cicatricem,

§. 483. **N**USQUAM plus prospiciendum pulchritudini cicatricis, quam hic: vid. (217.).

Quid sit cicatrix, explicatum fuit in Commentariis §. 217., ubi de vulnerum curatione agebatur: ibique dictum fuit, omnium perfectissimam sanationem vulnorum esse, ubi nullum vulneris facti vestigium manet. Si vero hoc obtineri nequeat, tunc pulcherrima cicatrix dicitur adesse, quando vestigium plagæ, post sanationem absolutam relictum, quam simillimum est cuti vicinæ. Simulque notatum fuit ibidem, tria imprimis ad cicatricis pulchritudinem requiri, ut nempe partes uniantur in eodem situ, quem antea habuerant; neque plagæ locus emineat ultra vicinæ cutis superficiem, neque cavus maneat. Cum ergo post combustiones fœdæ adeo sæpe cicatrices remaneant, omni cura attendendum est, ut hæc deformitas caveatur, quantum fieri per artem poterit. In illa combustionis specie, quæ intra limites resolvendæ inflammationis consistit, & sine suppuratione sequenti curari potest, nulla manebit cicatrix: unde ignari sæpe credunt, quod omnes combustiones ita curari possint. Ubi autem valida suppuratio, vel Gangræna post combustionem nata, eutim & panniculum adiposum consumpserit, tunc summa difficultas est, curare tale malum sine deformi cicatrice. Si in parte, quæ vestibus regi solet, fœda maneat cicatrix, hoc forte vilipendi posset. Ubi autem facies, & imprimis in amabili sexu, ambusta fuit, omni artis molimine tentandum est, ut cicatrix, si omnino evitari nequeat, saltem minime deformis sit.

(a) De Combustione Cap. 8. pag. 224.

Cum vero , consumptis panniculo adiposo & cute , cicatricem regens glabra pellicula subjectis musculis vel eorundem involucris tendinosis accrescat ; locus ille fere semper cavus erit , & politus & resplendens magis apparebit , quam vicina loca. Optimum , quod ars haber , est , ut mollissimis & humectantibus ambustus locus foveatur continuo , ad integram curationem usque ; ut laxata his remediis vascula magis elongentur , & retexant plus de perdita substantia. Omnia ergo exsiccantia , rodentia aut adstringentia vitentur ; & applicentur talia , quæ in aliis casibus luxuriantem carnem gignerent. Notandum tamen quam maxime , hic summa circumspeditione opus esse : aliquando enim in loco combusto tota superficies non fuit passa æqualem ignis vim ; ideoque emollientissima , toti plagæ applicata , quædam loca facerent protuberare ; sicque turpis nasceretur cicatrix. Sollicite ergo lustrandus est omnis ambustæ plagæ ambitus , & pro re nata magis minusve emollientia quibusdam locis applicanda sunt. Unde non cujusvis Chirurgi est pulchram cicatricem locis ambustis inducere. Imo formatam jam cicatricem , si durior & aspera fuerit , mollissimis unguentis inungendam quotidie voluit *Hildanus* ( *a* ) , & fovendam decoctis mollissimis ; sicque alicubi emineat , lamina plumbea , argento vivo inuncta , deprimi jussit. Monet præterea , quotidie post inunctionem Chirurgum debere manibus cutem induratum & contractam extendere ; ut sic tollatur , quantum fieri potest , cicatricis deformitas. Si omnibus his turpis cicatricis emendatio obtineri nequeat , illam exscindendam voluit ; & deinde labia vulneris facti à mutuo contactu debere removeri fibulis applicatis , ( quam methodum figura addita expressit ) , & mollissimis balsamis incarnationem promoveri. Cum autem nunquam fœdior cicatrix fiat , quam si partes , mutato naturali earundem situ , concreverint inter se ; simulque illud Chirurgi ignorantiam vel negligentiam arguat ; omni attentione hoc cavendum erit. Narrat *Hildanus* ( *b* ) , quod misero infanti , sex tantum menses nato , manus dextra combusta fuerit , ita ut , excepto pollice , omnium digitorum extremi articuli ceciderint ; & , imperitis tam gravis combustionis cura commissa , digiti retrorsum incurvati manus dorso , quod etiam combustum fuerat , & inter se invicem concreverint. Cum omnis membri usus sic periisset , & contracta in globum manus fœdissimum exhiberet spectaculum ; pater infantis , post absolutam curam septem jam mensibus elapsis , *Hildanum* consuluit , qui mollissima fomenta & unguenta per aliquot dies applicuit , ut laxaret omnia ; deinde novacula rescidit callosam cicatricem , quæ digitos dorso manus alligabat , similique modo concretos inter se digitos separavit ; postea pulchro artificio , applicata machina sensim digitos in naturalem situm reduxit , uti in loco citato figura demonstrat. Post faciei combustionem reflexam palpebram inferiorem genæ concrevisse vidi ; unde fœdissima lippitudo tota vita manebat.

Ex quibus omnibus patet , magnam requiri in Chirurgo peritiam & dexteritatem , ut graves combustiones absque insigni deformitate , aut usus partium depravatione , curentur ; atque sæpe inmedicabilia mala nasci , dum imperiti , jactatis ad combustionem remediis confisi , quæ levioribus malis curandis sufficiunt , graviorum combustionum curam aggrediuntur ,

( *a* ) De Combustione Cap. 14. pag. 931. | ( *b* ) Ibid. Cap. 15. pag. 952.



## S C I R R H U S.

§. 484. **S**CIRRHUS (392.) pro causa habet quidquid succum in glandulis coagulare, inspissare, siccare, potest. Ejus ergo sedes omnis glandula; sed imprimis quæ liquorem facilius inspissandum habet, vel ratione loci stagnare plus cogit. Unde in oculis, naribus, ore, mammis, axillis, inguinibus, pancreate, mesenterio, utero, sæpius obtinet.

Sequitur jam ultimus inflammationis exitus, quando nempe (vide Commentaria §. 392.) nec resolvitur inflammatio, neque tamen separatur à sanis partibus vicinis illud, quod vitali humorum motui secundum sanitatis leges peragendo ineptum redditum fuerat, tam in fluidis quam in solidis partibus. Uti autem, ubi de Gangræna agebatur, dictum fuit non tantum de illa specie, quæ post validas inflammationes sequebatur, verum etiam de Gangrænis ab aliis omnino causis oriundis; ita pariter & in hoc capitulo generalis Scirrhi historia & curatio describitur.

De tumorum differentiis agens Galenus (a) dicit, tumores duros & absque dolore scirrhus vocari: hancque scirrhi definitionem pluribus in locis habet, & videtur hæc generalis maxime fuisse scirrhi notio. Quibusdam tamen in locis parum diversam scirrhi descriptionem dedit, dicens: *Exquisitus igitur Scirrhus tumor est præter naturam, sensu carens, & durus. Non exquisitus autem, non omnino quidem sine sensu est, sed ægre tamen admodum sentit. Qui igitur sine sensu, incurabilis est; qui vero hebesis sensus est, non quidem insanabilis est, tamen non facilis curatu (b).* Quod autem in hoc loco Galenus vocabulum *ἀνίσθητος* non usurpaverit eadem significatione, qua *ἀνίσθητος* solet sumi, pater evidenter ex alio loco (c), ubi dicit: *Scirrhum nominamus tumorem durum, qui sine dolore est, non tamen omnino sine sensu; talis enim sanabilis non est.* Ex quibus omnibus saltem hoc patet, duritiem sine dolore in omnibus scirrhis adesse; in pessimis autem & insanabilibus, secundum Galenum, etiam insensibilitatem.

Non autem in locis glandulosis tantum, verum etiam in aliis corporis partibus scirrhus descripsit Galenus. De cura enim scirrhi agens (d), aceti vires commendat, tanquam efficaces & tutas, ubi carnosæ musculorum partes in scirrhum induruerant: majori cautela in aceti usu opus esse voluit; si ligamenta vel tendines simili malo afficerentur. Imo in puero, ex Erysipelate vehementer adstricto

(a) Comment. in Aphor. 34. Sect. IV. | II. Cap. 6. Charter. Tom. X. pag. 378.  
 Charter. Tom. IX. pag. 155. & Comment. 1. | (c) Method. Med. Lib. XIV. Cap. 6. pag.  
 in text. 2. Lib. VI. Epid. Hippocrat. ibid. pag. 324.  
 356. | (d) Ibid. Cap. 5. pag. 323.  
 (b) Galen. Meth. Med. ad Glaucon. Lib. 1.

& refrigerato, tumorem scirrhosum in toto femore relictum fuisse dicit (\*). Negari enim non potest, etiam in locis aliis corporis, quam in glandulis tumores præternaturales, duros, indolentes reperiri; qui ergo ex generali definitione Galeni scirrhi vocari deberent: Verum cum alium sæpe exitum habeant hæc mala, neque tam facile in cancrum degenerent, forte melius tumores scirrhoïdes vocari possent, distinctionis causa.

Scirrhi autem proprie dicti sedes glandula videtur esse, sive folliculus cavus, cujus latera omnis generis vasculis constant, & in cujus cavum minimarum arteriolarum oscula hiantia singulare liquidum deponunt, arteriosa fabrica à sanguine allato ad glandulam secretum: per glandulæ emissarium deinde collectum in ejus cavo liquidum exit, variosque usus in diversis locis corporis præstat. Simples tales glandulæ plurimæ sunt, quæ collectum in suis cavis liquidum versus cutis exteriora, vel in superficies membranarum, cava narium, oris faucium, asperæ arteriæ, œsophagi &c. eructant. Si vero plurimi tales folliculi simul adunati concipiantur, quorum emissaria omnia in unum canalem majorem abeunt, qui collectum sic liquidum in singulares usus deferret; tunc glandularum harum congeries, una communi membrana vestita, & in unum commune emissarium definens, vocatur glandula composita, sive conglomerata, ex quorundam Anatomicorum sententia. Parotides, v. g., & reliquæ glandulæ salivam à sanguine fecernentes, & per unum emissarium in cavum oris emittentes, tales dicuntur. Videantur de his illa, quæ in Institutionibus Medicis *Celeberrimi Boerhaavii* §. 241. & sequentibus habentur.

Omne ergo illud, quod succum glandularum fabrica secretum, in cavis illorum collectum, coagulando, inspissando, aut exsiccando potest reddere imbecilem, sic ut per illorum emissaria exire nequeat, dabit scirrho originem. Idem etiam efficiet omnis causa, quæ externa compressione sic angustat glandularum emissaria, ut secreti in cava illorum succi exitus impediatur. Distendetur enim tunc à retento succo folliculus, tenuissima pars sola resorbebitur osculis venosis hic patentibus, vel exibat per angustata emissaria; crassum retinebitur, accumulabitur, extendet glandulæ folliculum, comprimet vasa per membranas glandulæ decurrentia: unde tumor orietur & durities ab infarctis vasis, & coagulatis, inspissatis, aut exsiccatis liquidis; nervisque per glandularum fabricam dispersis compressis, orietur doloris absentia; & in scirrho insanabili, uti dixit *Galenus*, ab eadem causa fiet omnimoda insensibilitas. Verum etiam in aliis corporis locis, in quibus arteriosa fabrica, absque folliculorum talium interpositione, secretus humor in communi quodam receptaculo colligitur, similia mala oriri possunt. Sic v. g. in testibus arteria sanguinem advehens venæ sociæ sanguinem rubrum tradit: deinde in ramulos innumerabiles divisa, totam fere testis substantiam constituentes, ultimis suis osculis eructat in commune receptaculum humorem singularem, mirabili hac fabrica, à sanguine secretum. Si jam quacumque de causa impediatur liber exitus collecti illius in communi receptaculo humoris, omnia eadem fient mala, ac modo de glandulis sic affectis dictum fuit, & testis in tumorem durum indolentem, distendetur, id est scirrhosus fiat. Frequentia satis in Praxi exempla occurrunt, quæ hoc confirmant, quibusve constat, difficillimam hic loci, æque ac

(\*) Ibidem Lib. II. Method. Med. ad Glaucon. Cap. VI. Chapter, Tom. X. pag. 378.



in aliis scirrhis, esse curationem, & in cancerum pariter testium has indurationes converti. Sed & in aliis visceribus idem obtinere poterit. In hepate enim à sanguine venæ portarum secernitur bilis hepatica, quæ minimis ramulis, per totam hepatis substantiam dispersis, recepta tandem in magnum ductum hepaticum infunditur, perque illum versus intestina deferitur. Si jam ipse ductus hepaticus obstructus fuerit; vel minores ramuli, in hunc secretam hepatis fabrica bilem deferentes, à quacumque causa fuerint obturati, stagnante humore coagulato, inspissato, exsiccato; totum hepar, vel quædam ejus pars poterit in scirrhum tumorem distendi. Cui malo producendo multum faver, sanguinis venæ portarum tardior motus (cum jam venosus factus iterum per convergentium canalium angustias pelli debeat), & secreti humoris facilis degeneratio in lentorem immedicabilem. Adeoque, licet ex quorundam Anatomicorum sententia in glandulis, conglomeratis dictis, ut v. g. Parotide & similibus, non forent tales folliculi colligentes secretum ab arteriis liquidum, & minimis suis emissariis in communem ductum excretorium deferentes; sed ramuli secretorii ex arteriis derivati, nullis folliculis interpositis, directe in ductum excretorium deferrent secretum humorem; nasceretur tamen ab iisdem causis scirrhus: si nempe succus ille, ab arterioso sanguine secretus, coagulatus, inspissatus, vel exsiccatus obstrueret ductum communem excretorium, vel & ramulos illos secretorios, eundem succum in commune hoc receptaculum deferentes. Magna enim difficultas curationis scirrhii, qui in glandulis proprie sic dictis hæret, præcipue consistit in eo, quod materies in his folliculis collecta extra circulationis territorium quasi hæreat, neque impetus liquidi arteriosi, cordis & vasorum vi propulsi, directe adeo in hæc loca agere possit. Sed si parotis glandula ex arteriis minimis, in glomerem convolutis, & ultimis suis emissariis secretum liquidum in ductum communem excretorium deferentibus, constet; an ullo cum effectu arteriosi liquidi impetus ad ultima illa oscula inspissato fluido infarcta pervenire poterit, ut obstructum illud referet, vel ipsa hæc minima vascula una cum obstruente humore benigna suppuratione separet à reliquis vasis, quibus cohærent? certe patebit, credo, hæc pensitantibus, summam hic difficultatem esse; & docent radiosissima talia testium mala, in quibus tamen sine folliculis interpositis secretio fieri videtur, hujus rei veritatem.

An ergo eo curata difficilior scirrhus, quo in glandulis magis compositis hæret? sic videtur: Dum enim folliculi illi simplices, qui in cute externa linimentum illud pingue colligunt, & emissariis suis excernunt, obstruuntur, accumulatur secretus humor, distenditur folliculus, & tumor nascitur; qui à varia consistentia materię contentæ diversum nomen habet, Meliceridis, Atheromatis, vel Steatomatis: uti dictum fuit in Commentariis §. 75. & 112. n°. 1. Videntur enim tales tumores huc referendi esse, imprimis si duriores materiam continent, ut in steatomatibus fit; tunc enim sub generali scirrhii definitione (vide §. 392.) continentur. Sed ampullosos dictos tales tumores audacter incidunt Chirurgi, contentam materiam exprimunt, & deinde validis suppurantibus, vel & erodentibus, folliculi ipsius cavum consumunt, felici toties cum successu. Raro enim hi tumores in canceri malignitatem degenerant, licet externa specie scirrhum malignum referant. Vidi memorabile hujus rei in hac urbe exemplum. Sexagenarius vir jam per multos annos gesserat tumorem durum, sensim auctum, tandemque pugni magnitudinem æquantem, in inferiori & sinistra faciei parte pro-

F f f f f ij

pe maxillæ inferioris angulum lata : basi quidem cuti inhærebat , sed mobilis una cum cute elevari poterat , nulli subjectæ parti accretus. Incepit sensim magis in fastigium elevari tumor ; cutis rubra , imo fere livida apparebat in apice tumoris ; pruritus primo , dein dolor in cute distenta oriebatur ; & cum pessima quævis metueret boni senis familia , nihilque ipse tumori applicari vellet , sponte ruptus fuit apex : exivit materia granulosa dura , subsedit tumor omnis , sic ut vix vestigium maneret , atque aliquot adhuc annis cruda senectute postea vixit. In compositis autem glandulis , si scirrhosæ factæ fuerint , succus ille inspissatus non in uno cavo hæret , sed in pluribus loculis vel & vasculis dispersus est ; unde longe major curæ difficultas est , uti facile pater.

Præterea , si scirrhosa facta fuerit glandula composita , multum differt , in quibus vasis talis glandulæ obstructio hæreat. Sunt enim hic vasa , quæ sanguinem arteriosum adferunt , à quo per glandulæ fabricam peculiaris succus seceratur : adsunt vasa , quæ succum illum ab allato sanguine secernunt : sunt & vasa , quæ secretum hunc liquorem continent : adsunt denique & alia , quæ illum excernunt. Si jam vasa adferentia obstructa fuerint , videtur vitalium humorum imperus loca hæc obstructa vi sufficiente urgere posse , ut fiat per suppurationem separatio finium obstructorum à reliquis. Forte illud obtinet , quando in morbis toties tumentes parotides glandulæ in benignam suppurationem abeunt. Ubi vero in secernentibus vasculis simile malum obtinet , facile patet , minori impetu vitales humores in hæc loca agere posse. Ubi autem in vasculis secretum liquorem continentibus , & colligentibus , concretus stagnat humor , ille extra circulationis limites positus ad optima etiam remedia rebellis est. Si vero in ductibus excretoriis idem malum obtineat , eadem ratio est ; nisi quando talis horum situs est , ut cum fructu solventia , & concretum humorem attenuantia , remedia illis applicari possint , vel causa quædam circa ipsum ultimum orificium ductus excretorii glandulæ hæreat , quæ vel obstruendo vel comprimendo liquidi excernendi exitum impediat. Sic v. g. si in ipso ductu excretorio parotidis glandulæ infarctus humor hæserit , tota glandulæ hujus fabrica in scirrhum converti poterit , sed situs hujus ductus spem facit , ut fomentis , frictionibus &c. adhuc superari possit incipiens malum ; omnium maxime quidem , si circa hujus ductus aperturam , qua in os secretum & collectum liquidum effunditur , causa obstruens hæserit , vel tumor aliquis in vicina aperturæ hujus natus illam compresserit. Confirmant hanc rem illa , quæ in genitalium morbis observantur. Si enim à gonorrhœa vel alia quacumque causa tumor nascatur circa illum locum urethræ , ubi vesicularum seminalium & vasorum deferentium communia emissaria hiant , impeditur excretio liquidi testibus secreti , aliquando in utroque teste , sæpius in alterutro tantum , tuncque incipit paulo post tumere vas deferens & epididymis , deinde etiam ipsa proprie dicta testis substantia. Observavi tunc semper , epididymidem prius tumere , & satis sæpe indurescere ; testem vero postea etiam distendi in majorem molem quidem , sed longe molliorem tactu , quam est distenta epididymis. Soletque in hoc casu feliciter plerumque curari tale malum , quia causa non in ipsa testium substantia , sed circa finem ductus excretorii hæret. Simul ac enim tumor ille in urethra minuitur , sensim etiam decrescit epididymis , & lenibus frictionibus adhibitis ad pristinam redit magnitudinem & molliem , omnisque

stis tumor evanescit. Ubi vero ipsa testis substantia in durum tumorem attol-  
litur, nullo vitio prius observato In epididymide, longe difficilior morbus est;  
talisque scirrhus rarissime, vel nunquam, resolvi poterit. Malum enim tunc  
hæret in minimis illis vasculis secernentibus, vel secretum liquorem continentibus,  
quæ tot circumvolutionibus miro ordine hic disponuntur, ut nullus fere, vel  
exiguus admodum, possit esse impetus vitalis liquidi per parvam adeo arteriam  
spermaticam huc allati; nihilque fere sperari possit ab externis remediis, cum tot  
involucris intricatissima hæc testium substantia defendatur.

Cum ergo à coagulatione, inspissatione, aut exsiccatione succi glandulosi scir-  
rhus nascatur, patet, illum frequentius nasci debere in illis locis, ubi glan-  
dulosa fabrica viscidus humor secernitur; vel qui, licet statim post secretionem talem  
lentorem non habeat, illum tamen paulo post acquirit. Totum os internum, fau-  
ces imprimis, œsophagus, aspera arteria, pulmonis bronchia &c. cryptulas  
tales mucosas habent, in quibus lentus mucus deponitur, lubricandis & de-  
fendendis his partibus inserviens; non mirum ergo frequenter hic scirrhos naci.  
Recensentur jam illa corporis loca, in quibus scirrho sæpius observantur.

IN OCULIS. Glandulas sebaceas in palpebrarum limbis positas, unctuosum  
smegma parantes, quod palpebras illinit, & ab attritu mutuo defendit, ob-  
structis suis emissariis, intumescere posse, & tumores scirrhosos facere, satis fre-  
quentia testantur observata: sed & glandula innominata hic hæret, similibus  
morbis obnoxia. Et caruncula illa, in majori oculi angulo locata, scirrhescit  
aliquando, & in magnam molem excrescit. Scirrhum talem in majori oculi si-  
nistri cantho natum, castaneæ magnitudinem æquantem, feliciter abstulit *Hil-*  
*danus* (a) & trium septimanarum spatio, illæso visu, sanavit. Magis horren-  
dum calum idem auctor refert (b): ubi ingens scirrhus, durus, lividus, & jam  
cancrescens, ovo anserino major extra palpebras prominebat, postea immani  
Hæmorrhagia terribilis: summa tamen dexteritate, methodo ibi descripta, to-  
tum hunc tumorem una cum integro oculi bulbo ex orbita resecurit, & à ca-  
lamitosissimo hoc malo nobilem virum persanavit.

NARIBUS. Membranam mucosam, narium cava investientem, numero-  
sis scatere corpusculis glandulosis, demonstravit *Ruyfchius* (c), & figura expres-  
sit. Cum autem liquor his glandulis secretus facillime inspissetur, scirrhis hic  
nascituris frequens datur occasio. Videtur jam *Hippocrates* scirrhos in his lo-  
cis natos descripsisse (d), dum de Polypis agit, quorum quinque distinctas ob-  
servavit species. De secunda autem specie dicit: *Nasus carnibus impletur, & at-*  
*tacta caro dura apparet*; quam ferramentis comburi iussit. Quartam autem Po-  
lypi speciem sic describit: *Intus circa cartilaginem durum quid aliqua ex causa*  
*nascitur, & videtur esse caro; si vero attigeris, sonat velut lapis*. Naso autem  
per scalpellum diviso pariter inuri iussit, ut curetur hoc malum. In quinta au-  
tem polypi specie affirmat, *in cartilaginis summa parte ex obliquo velut parvos*  
*cancros exoriri*, quos etiam inurendos voluit.

ORE. Mucolis cryptis omnes fere oris interni partes præditas esse, hodie  
satis notum est. Palatum osseum investiens membrana callosa illas habet; uvu-

(a) Observat. Chirurg. Cent. I. Observ. 2.

pag. 13.

(b) Ibid. Observ. 1. pag. 2.

(c) Epist. IX. Tab. 9. fig. 7.

(d) De Morbis Lib. II. cap. 11. Chartæ.

Tom. VII. pag. 56.

la, velum pendulum palatinum, tonsillæ, membrana mucosa in spiras sinuosas complicata constantes, numerosissimos habent tales mucosos folliculos patentibus osculis spumantem mucum copiosissimum hic eructantes. Faucium postrema pars lacunas tales mucosas plurimas habet, quæ ulcuscula mentiuntur, & hac specie imperitis sæpe imponunt. Non mirum ergo est, toties hic scirrhus observari. Tonsillas, post inflammationem illarum male curatam, in scirrhus induruisse vidi aliquoties. Uvulam scirrhosam in tumorem durum, lividum, inæqualem excrevisse, sic ut totum oris cavum impleret, & dentes anteriores fere attingeret, observavit *Hildanus* (a). Circa uvulæ radicem tumorem durum inæqualem, ovi gallinacei magnitudinem æquantem, vidit idem auctor (b); unde respiratio impediabatur, cibique, sed imprimis potus, deglutitio difficillima fiebat.

M A M M I S. Quamvis enim mammas glandulosas esse negaverit *Ruyfchius* (c); talis tamen illarum fabrica est, atque illa lactis à sanguine secreti indoles, ut in mammis satis facile scirrhi nasci possint: quam rem etiam observationes quotidianæ confirmant. Ex arteriis enim, nullis folliculis interpositis, emissi tubuli lactiferi cum vicinis coeunt in majores ramulos, tandemque vasa lactifera majora faciunt; quæ iterum angustantur, & minimis fistulis in papilla exeunt. Cum autem lac in mammis collectum, lactifera vasa distendens, possit redire iterum in vasa, unde exiverat, &, ne guttula quidem lactis per papillam exeunte, turgidissima mamma aliquando depleatur satis cito & subfidat; patet tubulos lacteos continuari arteriis ipsis, nullosque folliculos inter hos & illas interponi. Verum lac, ex sua natura in coagulum facile tendens, stagnans in vasis lactiferis dilatatis, in colostrum & serum abit: hoc tenuius per papillæ aperturas dilabi, vel & facile redire in sanguinem potest; colostrum vero sero suo orbem harebit immeabile in vasis lactiferis, magisque exsiccatur tandem in scirrhum, vix resolvendum sæpe, abit. Cumque in glandulis proprie dictis natus scirrhus ideo sæpe ad optima remedia rebellis erat, quia vitalium humorum impetus & efficacia in coagulatum succum, glandulæ cavo contentum, nullum fere effectum facere poterat; idem & in mammis obtinebit. Majores enim tubuli lactei respondent cavis glandularum, colligentibus secretum humorem; angusta eorundem extrema, in papilla hiantia, similem usum habent ac glandularum emissaria, collectum in cavo humorem deducunt. Patet ergo ratio, quare in mammis, licet proprie loquendo glandulosæ non fuerint, scirrhi tamen nasci possint.

A X I L L I S, I N G U I N I B U S. Dictum fuit in Commentariis §. 416. glandulas in his locis positas aptissimas esse, ut excipiant illa, quæ ex universali humorum massa abscedunt: ideoque & in morbis, & aliquando in sanitate, salutari naturæ molimine versus hæc loca deponi quædam, quæ alibi forte magis nocuissent. Hinc subiti sæpe tumores in his glandulis nascuntur; & aliquando satis rebelles, sive ob materiæ impactæ indomabilem naturam, sive ob intricatissimam harum glandularum vascularem compagem; qua fit, ut liquidi arteriosi impetus minori efficacia in hæc loca obstructa agere possit. Quando inveteratus

(a) *Observ. Chirurg. Centur. 3. Observ.*  
19. pag. 91.  
(b) *Ibid. observ. 20.*

(c) *Epist. Problem. XV. pag. 10. &c. &*  
alibi pluribus in locis.

scirrhos mammas occupat, plerumque & subaxillares glandulæ tument indurata. A Venereo contagio inguinum glandulas in difficillimos curatu scirrhos sæpe mutari, omnibus notum est.

Sed non tantum in externis partibus corporis, verum etiam in internis toties scirrhos inventi fuerunt, qui pertinacissimis morbis chronicis originem dabant.

PANCREATE, MESENTERIO. Plurimis observationibus Medicis constat, has partes scirrhosas inventas fuisse: paucas adduxisse sufficiet. Rustica, quinquaginta & unum annos nata, numerosæ prolis mater, sanæ satis vixerat: ante quinquennium ægrotare inceperat, menstruis subito suppressis, & crebro vomitu, simulque tumore abdominis sensim crescente, qui totum hypochondrium dextrum occupans manibus palpari poterat, & versus sinistram corporis partem dimoveri: tandem post insignes cruciatus periit. Aperto cadavere, præter alia mala, omnes glandulæ mesenterii scirrhosæ inventæ fuerunt; & simul apparuit, tumorem illum, qui exterius palpari potuit, fuisse pancreas tumidum & scirrhosum. Imo & pylori circulus scirrhosus inveniebatur; & ventriculi interior facies undique glandulis induratis albicantibus scatebat (a). Totum Pancreas & Mesenterium scirrhosa & immensæ molis in cadavere mulieris sexagenariæ vidit *Paræus* (b): & affirmat ibidem, quod in cadaveribus illorum, qui scrophulis laboraverant, invenerit glandulas Mesenterii tumidas, variæ magnitudinis, sic ut quædam pugnum æquarent; & in quibusdam inveniretur gypsea materia, in aliis veropurulenta. In cadavere mulieris Hydropicæ plurimæ glandulæ scirrhosæ repertæ fuerunt, quarum decem vel duodecim pugnum æquantes ligneam habebant duritiem (c).

UTERO. Scirrhescere uterum jam monuerat *Hippocrates* (d), atque in hoc loco solo (saltem alibi me invenisse non memini) vocabulo *σκιρδῶναι* usus fuit. *Si uteri scirrhus affecti fuerint (σκιρδῶναι σκιρδῶναι) tum menses occultantur, tum illorum os connivet, neque concipit, & velut aliud quid est. Quid si contigeris, tanquam saxum illic esse videtur &c.* Et apud *Æginetam* (e) uteri scirrhos describitur. Imo & alio in loco *Hippocratis* (f) cancerum ex scirrhus uteri metuendum esse, scribitur. *Quum mulieri uteri duri evadant, & ad pudenda prominent, & inguina indurentur, & ardor in pudendis insit, concrefcere incipit.* Recentiorum pariter observationibus constitit, talem morbum in hac parte aliquando inventum fuisse. In cadavere mulieris, quæ durum & distentum abdomen diu gesserat, *Paræus* (g) invenit uterum caput hominis adulti magnitudine sua æquantem, quem de cadavere exemptum cum coram pluribus Medicis & Chirurgis discindere vellet, totam ejus substantiam adeo duram & scirrhosam invenit, ut acuto scalpello vix dividere potuerit. Dissecta uteri latera trium digitorum transversorum crassitiem excedebant. In uteri illius cavo inveniebatur densum scirrhosum corpus, binos pugnos magnitudine æquans, quibusdam in locis tantum adhærens uteri parietibus: in hujus massæ substantia atheromata, cartilagine, imo & ossa reperiebantur. In medio uteri collo similis scirrhos ovum gal-

(a) Miscellanea Curios. Dec. 1. ann. 6. pag. 271.

(b) Livre VII. chap. 21. pag. 175.

(c) De la Motte Traité complet de Chirurgie Tom. II. pag. 160.

(d) De Mulierum Morbis Lib. II. cap.

38. Charter. Tom. VII. pag. 821.

(e) Lib. III. cap. 68. pag. 54.

(f) De Natura Mul. cap. 28. Charter. Tom. VII. pag. 692. & de Morbis Mul. Lib. II. cap. 41. ibid. pag. 823.

(g) Livre 24. chap. 41. pag. 616.



linaceum mole excedens inveniebatur. Uterus autem ille cum contentis novem librarum pondus superabat. Apud Hildanum similes observationes habentur, quæ hanc rem confirmant (a).

Quamvis autem in locis corporis, hac paragrapho enumeratis, frequentius inveniantur scirrhi; tamen & in aliis visceribus pariter deprehensi fuerunt. Hepar scirrhosum vel in toto, vel in parte, inventum fuisse, passim apud observatores legitur. Scirrhum lieni familiarem morbum esse & diuturnum *Aretæus* (b) memoriæ tradidit. In ventriculo & intestinis scirrhos inventos fuisse, & in observationibus paulo ante memoratis, & apud plurimos observatores habetur. Vesicam urinariam totam scirrhosam fuisse, ejusque membranas quartam pollicis partem crassitie æqualle legitur (c) &c.

§. 485. **H**INC inflammatio (392.); lac stagnans, caseosum; durefcens, coagulatum; contusio (324.); attritus validus; anthrax; bubo; ulcus præmature clausum; materies atrabiliaria sanguinis, bilisve, maxime cessante consueto menstruo, vel hæmorrhoidali fluxu; lapidescens, crassa, austera, gypseæ materies; vita tristis; victus durus; hæreditaria labes, scirrhum creare possunt.

Recensentur hac paragrapho præcipuæ causæ, à quibus scirrhus nasci solet.

**INFLAMMATIO.** Dictum fuit in Commentariis §. 392. inflammationem circa loca glandulosa aliquando in scirrhum desinere; tuncque non separari vasorum obstructorum fines una cum infarcto immeabili liquido à vicinis partibus sanis, sed manere illud morbosum, atque adeo indomabilem indolem sæpe acquirere, ut postea nullo naturæ vel artis molimine solvi possit; sed vel tota vita maneat, vel ferro aut igne tolli debeat. Pulcherrime hanc scirrhi ex inflammatione originem notaverunt Veteres Medici. Sic *Aretæus* (d) dicit. *Si à Phlegmone jecur non suppuratur, non est absurdum, tumorem durum temporis progressu in scirrhum mutari.* Et *Ægineta* (e) de uteri scirrho agens, habet sequentia: *Scirrhescit uterus, aliquando repente, sine causa evidenti: plerumque vero à Phlegmone prægressa, que nec soluta, nec in abscessum conversa fuit.* Videnturque scirrhosæ tales male curatæ inflammationis reliquæ non tantum in locis glandulosis, verum etiam & in aliis corporis partibus obtinere. Observaverat hoc Galenus, ubi de Erysipelatis cura agit (vide locum citatum in Commentariis §. 390.). Postquam enim dixerat, illud majorem refrigerationem requirere, quam Phlegmone, monet, incauto refrigerantium usu lividam cutim fieri, imo & nigrescere, potissimum in senilibus corporibus; sic ut quædam ita refrigerantium nequidem discutientibus medicamentis perfecte sanentur, sed relinquant scirrhosum quendam tumorem in parte &c. In morbis inflammatoriis forte sæpius sic scirrhus in locis etiam non glandulosis nascitur, dum, per frequentes nimis venæ sectiones, debilitatis viribus,

(a) Observ. Chirurg. Centur. 1. cap. 65. 66. §. 67. pag. 51.

(b) De Caus. & Sign. Morb. diut. Lib. I. cap. 14. pag. 43.

(c) Abridgement of the Philosoph. Transactions. Tom. III. pag. 147.

(d) De Caus. & Sign. Morbor. diuturn. Lib. I. cap. 13. pag. 41.

(e) Lib. III. cap. 68. pag. 54.

non valet impetus vitalis liquidi solvere obstruentes moleculas ultimis vasorum angustis impactas, neque blanda suppuratione separare. Inde forte post pleuritidem toties Pleura, imo & pulmonis pleuræ accreti pars in scirrhum indurescit. Partium enim membranacearum, post infelicem validarum inflammationum curam, miræ observatæ fuerunt degeneraciones. In Pleuritidis historia postea dicitur, aliquando & Pericardium inflammari, & forte sæpius, quam putatur. Et in cadaveribus inventum fuit, tenuissimam illam membranaceam cordis capsulam miro modo inspissatam, imo & induratam fuisse, post pectoris morbos diuturnos. Sic in cadavere nautæ, qui gravissimo asthmate, & tussi laboraverat, tandemque hydropico tumore abdominis, scroti, crurum detentus perierat, inveniebatur inter alia mala pericardium pollicis crassitiem æquans, cordi firmiter accretum, & cartilagineæ fere duritiei, sic ut vix cultro cederet (a). Licet enim, per morbos mutato Pericardio, hic invenerint glandulosam fabricam *Malpighius* (b) & *Santorini* (c), tamen videtur ipsa membranacea substantia Pericardii in casu modo recitato degenerasse, cum non invenirentur folliculi dilatati & indurati, sed totum Pericardium cartilagineum factum esset.

LAC STAGNANS &c. Videantur illa, quæ in Commentariis paragraphi præcedentis de hac re dicta sunt. Imprimis frequens ab hac causa scirrhus in mulierum lactantium mammis oritur, dum suppurationem metuentes inflammatas mammas igni exponunt, vel spiritu vini calido foveant. Minuitur sæpe sic tumor, dissipata, vel per papillas effluente tenuissima parte lactis in ductibus lactiferis stantis; sed residuum crassum manet, & scirrhum sæpe nulla arte resolubilem facit.

CONTUSIO. Videantur Commentaria §. 324.

ATTRITUS VALIDUS. Inde enim inflammatio & omnes ejus sequelæ nasci poterunt. In publicis prostibulis toties observata fuerunt condylomata scirrhusa, in vagina à nimio attritu nata: In illis vero, quibus circa jecur ulcerosum turpior longe libido sævit, similia mala apparent, dum

----- podice laevi

*Caduntur tumida, medico ridente, marisca (d).*

ANTHRAX. Quid sit, in Commentariis §. 416. dictum fuit: quando nempe à subita & validissima inflammatione cutis, una cum panniculi adiposi parte subjecta, in siccam & duram convertitur escharam; cujus curatio in eo consistit, ut per suppurationem in omni ejus ambitu solvatur à partibus vivis, & excidat. Hoc autem si obtineri nequeat, sedata inflammatione partium vicinarum, manebit scirrhusus talis tumor; imprimis si loca glandulosa tale malum occupaverit.

BUBO. Generali fere significatione glandularum tumores, in diversis etiam corporis partibus ortos, sic vocatos fuisse, in Commentariis §. 416. monitum fuit; potissimum tamen hoc nomen datur glandulis inguinalibus tumentibus. Frequentissime tales tumores à Venereo contagio nascuntur, & sæpe diu manent, ad optima quævis remedia rebelles.

(a) Acta Physico-Medica &c. Vol. 1. Observ. 20. pag. 43.

(b) In Epistola ad Societ. Londin. de structura

glandul. conglobat. &c. pag. 7. edit. Londin.

(c) Observ. Anatom. pag. 142.

(d) Juvenal, Lib. I. Sat. 2. v. 11.

**ULCUS PRÆMATURE CLAUSUM.** Frequenter observatur, dum phlegmone in abscessum conversa est, mediam loci partem omnino emollitam & maturatam esse, licet totus ambitus tumoris adhuc durus sit (vide Commentaria §. 402. n°. 2.): unde abscessus talis non cito aperiendus est. Sed accidit aliquando, in vertice mucronato abscessus tensa integumenta, & cataplasmatibus macerata, sponte rumpi, & exitum dare puri contento, reliqua autem adhuc cruda & dura manere. Nisi tunc apertum maneat tale ulcus, & simul suppurationem excitantibus remediis regatur locus, sæpe scirrhusa durities manet satis diu; quæ tamen in locis non glandulosis sensim plerumque dissipari solet. Ubi vero in mammis, post male curatam suppurationem, talis durities manet, sæpe scirrhum non resolvablem relinquit. Nunquam tamen frequentius ab hac causa scirrhus oritur, quam in bubonibus Venereis, quando hi suppurati aperiuntur ante perfectam maturationem, vel his apertis Chirurgi, longæ curæ pertæsi, exsiccantibus consolidationem aperti ulceris tentant: tunc enim semper aliquid scirrhusi relinquitur.

**MATERIES. ATRABILARIA SANGUINIS, BILISVE.** Quotiescunque sanguini arterioso perit fluidissima pars, sive per motus corporis vehementes, sive per protractas mentis exercitationes; tunc illud, quod superest, colore solito nigrius, tenacitate picea fere, ex oleo crasso sanguinis & terrestri ejus parte simul unitis, immeabile fit, & majori cum difficultate per minimas vasorum angustias transit: obstructionibus hinc producendis aptissima est hæc materies, & vocatur *Atra bilis*. Ubi vero bilis proprie dicta in suo folliculo stagnat, miram tenacitatem acquirere potest, & sæpissime in calculosas concreciones degenerat. Tenax talis amurcosa materia à bile stagnante & inspissata orta etiam vocatur *Atra bilis*; longe tamen acrior, longe facilius putrescens, quam prior ex sanguinis crassamento nata. Poterit ultima hæc species totam bilis officinam turbare, & obstruere loca, quibus continetur, & postea putredinem accedente pessima quævis mala facere. Prior autem species scirrhis producendis imprimis apta videtur, cum sanguis lentore tali inquinatus facillime in fabrica intricatissima glandularum hæreat. Docent observationes practicæ, frequentissime scirrhos inveniri in talibus corporibus, quæ ex sua peculiari idiosyncrasia in atrabilariam temperiem inclinant; cujus signa in *Celeberrimi Boerhaavii Institutionibus Medicis* §. 896. enumerantur. Veteres Medici semper fere atram bilem, tanquam scirrhi & cancri causam, incusaverunt: imo *Galenus* (a) hanc solam cancri originem tantum agnoscit, quando atrabilarius humor collectus in corpore, neque per Hæmorrhoides, vel varices evacuatus, neque ad curim propulsus, ad alias corporis partes defertur. Atque in hac opinione confirmabatur, dum in partibus sic affectis venæ atro & crasso sanguine plenæ conspiciebantur: quare autem hoc fiat, postea in cancri historia §. 497. dicitur. Magna effectuum scirrhi & atræ bilis similitudo evincit, sæpe illum ab hac oriri. Tenax enim & piceus humor atrabilarius dictus, viscerum abdominalium vasa plerumque replet & obstruit, & chronicos maxime morbos facit. Ubi vero à quacumque causa incipit fundi & corrumpi simul stagnans ille humor, incredibili malignitate furit (vocabatur tunc *atra bilis surgens vel mota* Veteribus Medicis) & febres acutissimas cito lethales etiam in frigidissimis corporibus excitat; dysenterias pessimas &c. visce-

(a) Method. Medendi ad Glaucon. Lib. II. cap. 12. Charter. Tom. X. pag. 389.

rum erosiones, animi deliquia, mortem subitam sæpe producit. Sed & scirrhus diu potest hære in corporis partibus, vix nocens, nisi adjacentia vasa multum comprimat: si vero vel iponte, vel imprudenti medela, incipiat moveri vetusti scirrhii materia, in horrendum cancrum brevi degenerat.

MAXIME CESSANTE CONSUETO MENSTRUO. Maximæ mutationes in muliebri corpore fiunt illo tempore, dum menstrua primo prodire incipiunt; uti etiam postea, quando cessant in effectis. Observationes omnium fere Medicorum docent, circa illud tempus in utero & ovariis sæpe ab infarctis vasis scirrhos natos fuisse. Mammis autem cum utero tantus consensu est, ut, simulac impediatur sanguinis uterini libera excretio, incipiant turgere, uti in gravidis mulieribus patet, & in puerperis, quando lochiis cessantibus, vel minutis multum, mammæ attolluntur lacte turgidæ: Ideo non mirum erit, cessante fluxu menstruo consueto, mammas affici, illarum vasa distendi, & scirrhos nasci. Sic etiam frequentissime observatur, scirrhos ab aliis causis natos circa hoc tempus augeri mole, & sæpe in cancrum mutari. Pulchre hæc notavit *Hippocrates* (a) dicens: *Conclusi uteri menses ad mammas remittunt.* Postquam autem enumeravit plurima symptomata, quibus deceptæ mulieres se tunc gravidas credunt, subiungit sequentia: *Et in mammis tubercula dura oriuntur, quadam quidem majora, quadam vero minora. Hac autem minime suppurant, sed semper duriora sunt, & ex illis occulti cancri nascuntur.* Ex propriis observatis conclusit *Dionysius* (b), ex viginti mulieribus, quæ cancro laborant, quindecim hoc malo affici intra quadragesimum quintum & quinquagesimum ætatis annum: additque, se in itinere per Galliæ provincias in singulis fere urbibus plures hoc morbo affectas vidisse in cœnobiiis, semper autem circa modo dictum ætatis tempus; vel, si in junioribus occurreret malum, menstrua sanguinis evacuatio deficiebat in illis. Imo à retentis vel parcius fluentibus menstruis glandulosa alia corporis loca in tumores attolli, docuit *Hollerius* (c) dicens, se uno anno vidisse plus quam ducentas puellas, quibus medio vere, non satis exeunte sanguine menstruo, tumores in inguinibus nascebantur. Et in illo casu, cujus mentio in Commentariis præcedentis paragraphi facta fuit, sana hætenus mulier circa quadragesimum sextum ætatis annum subito suppressis menstruis, ægrotare incepit; & postea in cadavere Mesenterium, Pancreas, Ventriculus, Pylorus, scirrhosa inventa fuerunt. Ex quibus omnibus satis patet, quantum ad scirrhum producendum, vel augendum, si præexistit, possit facere consueti fluxus menstrui cessatio.

VEL HÆMORRHOÏDALI FLUXU. Cum atrabilarius humor, uti patebit postea in Capitulo de Melancholia, sæpe soleat deponi versus abdominalia viscera, & ibi plurima, & satis mirabilia mala facere; nihil commodius videtur, quam per Hæmorrhoidalia vasa tenacem & sæpe piceum fere sanguinem dimitti, atque hoc in melancholicæ temperiei hominibus frequenter observatur. Unde *Hippocrates* (d) laudavit Hæmorrhoides, si melancholicis contingerent. Ubi ergo atrabilaria materies, solito Hæmorrhoidali fluxu evacuari consueta, hoc suppresso retinetur;

(a) De Morbis Mulier. Lib. II. cap. 20. Charter. Tom. VII. pag. 807. 808.

(b) Cours d'Operations de Chirurgie Démonstr. 9. pag. 314.

(c) Comment. 1. in Lib. III. Coac. Hippocr. n°. 40. pag. 246.

(d) Aphor. 12. Sect. VI. Charter. Tom. IX. pag. 387.

pertinacissimis obstructionibus in locis glandulosis producendis occasionem dare potest; uti paulo ante in eadem hac paragrapho dictum fuit.

**LAPIDESCENS, CRASSA, AUSTERA, GYPSEA, MATERIES.** Nisi constaret numerosissimis experimentis, vix crederetur, etiam in tenuissimis & lymphatissimis corporis nostri humoribus hærere materiam, unde durus satis potest crescere calculus. Lymphida & tenuis urina, per minimas fistulas renales a sanguine secreta, toties calculosis concretionibus originem dat; non tantum, ubi in pelvi, ureteribus, aut vesica stagnat collecta, verum etiam in ipsis renibus, qui aliquando toti calculosi inventi fuerunt. Plurimos calculos renales vidi excretos, qui pedunculos habebant, quibus fistulis renalibus inhæsisse videbantur; dum reliqua illorum superficies globosa apparebat. Ex glandula sublinguali calculum eductum vidi. In ipso abdominis cavo, quod tenuissimo exhalante rore tantum maderet, calculi inventi sunt. In cerebri substantia, & in omnibus fere corporis locis, deprehensi sunt; uti postea in calculi historia latius dicitur. Si ergo similes concretiones circa loca glandulosa fiant, pertinacissimi nascentur scirrhii. Variam autem duritiem in calculis in corpore humano natis observare licet: aliquando durissimi sunt, ut in vesicæ calculis imprimis observatur: quandoque longe molliores & friabiles, uti imprimis sunt illi, qui in bile concreverunt, imo & albos friabiles, gypsum fere referentes, tussi pulmonibus excretos vidi: & in Commentariis præcedentis paragraphi ex *Paræi* observationibus constitit, glandulas mesenterii scirrhosas, gypsea materia turgidas inventas fuisse.

**VITA TRISTIS.** Dicitur postea in Commentariis §. 1090. in morbis melancholicis mirum hoc observari, quod nempe atra bilis in sanguine prædominans, & imprimis jam circa viscera abdominalia hærens, miram anxietatem, & ætorem insuperabilem producat, cujus rædio violentas aliquando manus sibi inferunt miseri. Sed non hoc tantum, verum etiam quod validi animi affectus, & imprimis mæstitia, similem materiam in sanguine producant, & in viscerum abdominalium vasis figant. Cum ergo vita tristes atrabiliarium materiam producere possit, patet ex ante dictis, quod & scirrho dare originem valeat.

**VICTUS DURUS.** Inter causas Melancholiæ recensentur §. 1093. etiam cibi austeri, duri, terrestres, sicci, diu assumti, imprimis si simul quiescat & torpeat corpus: unde literatis toties pertinacissimæ sunt in visceribus abdominalibus obstructions, dum carnibus & piscibus fumo, sale, acre induratis, fabis, pisces &c. utuntur frequentius; interimque mentem acriter, corpus vero minuire, exercent; solent hi semper magno suo damno experiri, duriora hæc messorum illis relinquenda esse; mollissima autem olera, lactucam, intybum, cichorea &c. sapientum ventribus amica esse, una cum teneris juniorum animalium carnibus &c. Dum farinosis crudis nec fermentatis pauperum infantes vescuntur, misellis abdomen in tumorem attollitur, tenellis visceribus insuperabili lentore infarctis. A fructibus austeris immaturis avidè comestis rusticorum pueri similia mala patiuntur.

**HÆREDITARIA LABES.** Phthisim, Epilepsiam, Podagram, ex parentibus in prolem transire, funestis toties exemplis constitit: idem & de pluribus aliis morbis forte verum est. Tales autem morbi hæreditarii, si non penitus incurabiles, saltem ab omnibus Medicis curatu difficillimi habentur. Solebat hac occasione suis auditoribus dicere Celeberrimus Auctor, quod familiam novisset,



in qua omnes certo ætatis termino fiebant icterici; tandemque, nullis remediis cedente malo, Hydropici peribant. In cadaveribus, (quæ incidenda Medicis libenter concedebant, ut funesti huic familiæ mali causa detegi, & postea curari vel præcaveri posset) inveniebatur hepar scirrhosum.

§. 486. **E**FFECTUS scirrhi nati, occupare aucta mole vicina; ea premere, comprimere; lædere functionem scirrhosi, & vicini; nunc inflammationes, suppurationes, gangrænas, paralyfes, atrophias, sphacelos, sterilitatem, partum difficilem, volvulum, & multa similia mala producere, quæ ex natura & officio læsi, & comprimantis, facile deduci queunt.

Pars scirrhosa augetur magnitudine: sed hoc fieri nequit, quin vasa partium scirrho adjacentium angustentur; imo & aliquando comprimantur integre. Ideo inter causas obstructionum, quæ externa vasorum compressione illorum cava arctent, numerantur etiam scirrhosi tumores (vide §. 112. n<sup>o</sup>. 1.). Innumeri ergo, illique penitus diversi effectus scirrhi esse possunt, pro varietate partium, quæ in scirrhum induruerunt, & diversis functionibus vicinorum, quæ a scirrho incrementum accipiunt. Sic scirrhosus ab externa causa, in corpore euchymo natus, mammam occupans, sæpe in seram usque senectam innocuus manet: ubi idem malum in œsophago, vel vicinis partibus, quæ tumentes illius cavum arctare & comprimere possunt, hæserit; omni deglutorum in ventriculum transitu impedito, post Tantali pœnas sæpe per menses toleratas, inevitabilis mors sequitur. Sufficiet ergo generales fontes hic indicare, unde scirrhi nati effectus deduci possunt: singularium autem malorum, quæ a scirrho ut causa sequuntur in corpore humano, cognitio à functionibus partium affectarum læsis pender. Quædam tamen ex præcipuis enumerantur hac paragrapho.

**INFLAMMATIONES, SUPPURATIONES, GANGRÆNAS, SPHACELOS.** In §. 375. ubi de inflammationis causis agebatur, dictum fuit, omnes obstructionum causas inflammationem facere posse: sed, uti modo dictum fuit, inter causas obstructionum, quæ externa compressione vasa arctarent, etiam scirrhosus numeratur; adeoque hæc res patet. Natam autem inflammationem sequi possunt omnes ejus effectus; adeoque & suppuratio & gangræna & sphacelus. Notandum tamen in scirrho exquisito & confirmato suppurationem nunquam fieri, sed quidem in partibus vicinis à scirrho tumente compressis. Præterea in Commentariis §. 422. §. ex observationibus *Hildani* constitit, à tumore scirrhoso venam cavam comprimente illo in loco, ubi in binas iliacas finditur, in utroque crure Gangrænam natam fuisse; quam sphacelus sequebatur ad genua ascendens & mors.

**PARALYSES.** Ut fiant motus musculorum voluntarii, requiritur liberum commercium inter cerebrum & musculos per nervos: si ergo scirrhosus nervum ad musculum tendentem in toto hoc itinere à cerebro ad musculum usque alicubi compresserit, erit musculus ille paralyticus. Si jam ingens truncus nervosus ad partem quandam corporis tendens à tali causa comprimatur, erit perfecta paralyfis illius membri. Dum subaxillares glandulæ, scirrhosæ factæ &

tumidæ valde premunt vicinos truncos nervosos, patet facile, inde paralyfim nasci posse. Vidi sic in muliere sexagenaria dextram mammam totam scirrham, & dein glandulas sub axilla dextra admodum tumidas pariter induruisse; unde primo maximus dolor in toto brachio dextro, dein stupor, & incipiens paralyfis. Simul in colli dextro latere glandulæ tumidæ admodum & duræ erant, & frequentia animi deliquia; forte a pari vago & intercostali ejusdem lateris compressis.

**ATROPHIA S.** Dictum fuit in Commentariis §. 161. quod, si arteria major tota sic discindatur, ut postea nullus amplius sanguis ad partes suppositas venire possit, tunc omnia illa, quæ ab hoc trunco vitalem sanguinem accipiebant, emori, sublato omni vitalis liquidi influxu: simulque notabatur ibidem, duplici modo hoc fieri: vel enim stagnabant liquida non amplius propulsa motu sanguinis arteriosi, & corrumpebantur; unde putrida & lenta Gangræna fiebat: vel humores in partibus suppositis relictæ, propria contractione vasorum transibant in venas, quæ musculorum vicinorum turgentium ope humores receptos cor versus revehunt: sic omni liquido orbata vasa collabuntur, latera collapsa concresecunt inter se, & partis moles minuitur quotidie; donec tandem arefacta omnia Mumiam fere referant: uti ibidem miro casu probatum fuit. Facile patet, eadem mala fieri debere, si scirrhus sua mole arteriam ad partem quandam corporis tendentem compresserit sic ut omnis sanguinis transitus impediatur.

**STERILITATEM.** In utroque sexu sterilitatem nasci posse, si organa generationi dicata in scirrhum induruerint, sic ut inde illorum functio aboleatur vel depravetur, nullus dubitat. Testiculos v. g. in viris scirrhescere posse, plurimis observatis constat. Verum cum in mulieribus plures adhuc requirantur conditiones, omnino necessariæ, ut non tantum suscipiantur hominis primordia, sed in utero hæc possint retineri, foveri, ali ad perfectæ maturitatis tempus usque; facile patet, longe frequentiores esse sterilitatis causas in sexu fœminino. Observata jam docuerunt, scirrhosos tumores, vel in ipsis partibus genitalibus natos, vel in locis vicinis ortos, mole sua omnia vicina comprimentes, frequentem satis dedisse sterilitati causam. In obesæ mulieribus omentum crassius factum uteros comprimere sic, ut genituram suscipere nequeant, notavit *Hippocrates* (a). Si uterorum os durum fuerit, aut & cervix, quod immisso digito deprehendi potest, sterilem fore mulierem, nisi cureretur, in eodem loco monet. Incisis autem cadaveribus patuit sæpe, scirrhos hic latentes fuisse sterilitatis causam. Sexagenariam matronam, quæ bis nupta sterilis semper fuerat, incidit *Hildanus* (b), ut sterilitatis causam inveniret; & vidit scirrhum circa orificium uteri, qui instar annuli collum matricis cingebat, sicque claudebat ejus aperturam, ut styli acies vix immitti posset. In alia muliere, quæ primo puerperio uteri inflammatione correpta fuerat, & postea sterilis manserat, invenit post mortem scirrhum, ovi cancerini magnitudine ante orificium uteri sic locatum, ut omnem aditum versus uterum præcluderet, tamque pertinaciter adhærentem, ut nullo modo avelli potuerit (c). Vaginam uteri totam scirrhosam vidi, & in omni

(a) De natura muliebri cap. 19. Charter. 65. pag. 51.  
Tom. VII. pag. 690. (c) Ibid. Observ. 66.  
(b) Observat. Chirurg. Centur. 1. Observ.

fuò ambitu adeo tumentem, ut vix stylum admittere posset. Sæpius etiam observatur in illis mulieribus, quæ steriles vixerunt, circa illud tempus, quo menstrua desinere consueverunt, cancerosam nasci uteri diathesin, quæ enormibus doloribus, acri sanie exstillante; & profundissima, vasis varicosis redditis & deinceps, Hæmorrhagia malignitatem suam satis manifestat. Ex quibus omnibus patet, scirrhum merito inter sterilitatis causas recenseri.

**PARTUM DIFFICILEM.** Ut utero fœtus maturus exeat, requiritur ut ejus orificium & vagina liberrime expandi possint. Si ergo partes illæ induruerint scirrhus, vel & in vicina similes tumores nati compresserint hæc loca, patet facile, partum difficilem, imò sæpe impossibilem omnino, fore. Verum quidem est, raro scirrhum tam cito in magnam molem extendi, ut, si non præexistere ante conceptionem, graviditatis tempore natus adeo multum nocere posset, dum fœtus excludetur: Videretur autem scirrhus in utero vel vagina natus sterilitatem inducere debere, unde etiam inter sterilitatis causas in observationibus modo allegatis numerabatur. Observata tamen plurima docuerunt, mulieres gravidas factas fuisse, licet parva admodum, imò nulla fere, apertura fuerit, per quam semen uteri cavum ingredi potuisset, unde non semper absoluta sterilitas sequitur, licet magnus etiam scirrhus hæc loca occupaverit; sed semper tunc erit difficilis partus. Historia Medica plurimos casus habet, qui modo dicta confirmant; paucos adduxisse sufficiet. Mulier triginta & octo annorum primipara moriebatur inter partus dolores, neque potuit in lucem prodire fœtus. In cadavere Celeberrimus *Littre* invenit matricis collum obturatum substantia glandulosa, quæ utero cohærebat, & parvis hinc inde foraminulis perforata erat (a). In muliere quadragenaria primipara fœtus mortuus non nisi magna difficultate potuit educi, ob nimiam pelvis ossæ angustiam. Post tres menses iterum imprægnata, circa partus tempus per biduum summis torquebatur doloribus, sine ulla oris uteri dilatatione. Distractis rudi satis instrumento, cum speculum uteri deesset, vaginæ lateribus, cicatrix concreti orificii uteri apparuit; dumque scalpello illud discinderet Chirurgus, invenit cartilagineam fere duritiem, & omnem ambitum aperturæ uteri pluribus incisionibus dividere debuit, ut aliqua dilatio fieri posset. Eductus fuit sic Chirurgi manu fœtus mortuus, & ilico misera hæc puerpera febre acuta, dolore pleuritico, & respiratione impedita correpta fuit; unde post viginti quatuor à partu horas periit (b). In cadavere fœminæ, quæ post partus dolores per sex dies frustra toleratos mortua fuerat, invenit *Hildanus* (c) uterum lacerum, & caput infantis in cavo abdominis hærens. Horum malorum causa erat scirrhus, qui capitis fœtus magnitudinem æquabat fere, & sua mole impediverat, ne fœtus exire potuerit.

**VOLVULUM.** Causa quæcumque intestinalem fistulam in quodam loco ita angustare valet, ut contenta, motu peristaltico propellenda ad anum usque, transire nequeant, terribilem hunc morbum producere poterit, unde tunc fœdo spectaculo omnia, inverso motu peristaltico versus ventriculum redeunt, & post summas anxietates, vomitu excutiantur. Ubi inflammatio tale

(a) Acad. des Sciences l'an 1705. Hist. pag. 65. 66. | (c) Observat. Chirurg. Cent. 1. Observ. 67. pag. 52.  
(b) Medical Essays Tom. III. pag. 317. &c.

malum comitatur, sæpe subito lethale est; sine hac autem diutius hominem affligit. Observati fuerunt & scirrhi, mole sua arctantes, vel & integre obturantes intestinalem fistulam, huic morbo originem dedisse. In cadavere hominis, qui per aliquot annos dolore fixo & continuo sub hepatis regione laboraverat, & tandem gravissima passione iliaca extinctus fuerat, invenit *Hildanus* (a) scirrhum jam exulceratum in cæci intestini fundo. Notabilem casum, qui modo dicta confirmat, vidit *Celeberrimus Boerhaavius*. Festivus in nobili familia puer, calipodiis ferratis in glacie currens æstuabat, dein calente ab hoc motu corpore traham ingreditur, qua pater vehebatur; sicque mansit per horulam æcri satis frigori expositus. Paulo post dolorem in abdomine sensit, & deinde languit semper. Incepit post aliquot septimanas tardior fieri alvus, tandemque fere integre supprimebatur. Appetitus manebat satis bonus, sed singulo fere triduo post diras anxietates cibos toto hoc tempore ingestos revomebat. Post varia remedia tentata, sed frustra, moritur puer, & cadaver lustrandum conceditur Medicis, qui in consilium vocati, dum in vivis esset puer, diversas circa morbum hunc habuerant opiniones. Scirrhum latere prædixerat *Boerhaavius*; hinc lenissima tantum remedia solventia, & tales cibos, à quibus minimum fæcum alvinarum colligi solet, commendaverat. Vomitoriis excutiendam esse pituitosam saburram, in intestinis stabulantem, & illam obstruentem, concluderant alii Medici, & persuaserant parentibus ægri: sed ab illis assumptis omnia mala augebantur. Aperto cadavere, inventus fuit scirrhus, ileon intestinum comprimens prope illum locum, ubi ultimus ejus finis intestino colo inseritur. Ante locum obstructum intestina tenuia enormiter dilatata apparebant, pone locum obstructum sic contracta, ut processus vermiformis magnitudinem vix superarent.

Præter illa mala, quæ hac paragrapho enumerata sunt, plura alia similia à scirrhis nasci possunt, qui in aliis corporis partibus hærent. Dolores fixos, chronicos, à scirrhis ventriculi & pancreatis, jam in canceri malignitatem vergentibus, ortos, legitur. Hepatis scirrhus immedicabilem sæpe icterum, & lethalem postea Hydropem produxit. Illa, quæ hætenus dicta fuerunt, sufficient, ut demonstretur, plurimos chronicos, illosque pertinacissimos, morbos, scirrhis, in corporis interioribus latentibus, originem debere. Sequitur jam, ut de scirrhi Diagnosi & Prognosi agatur.

§ 487. **P**RÆSENTIA scitur, causa (484. 485.), effectu (486.), phænomenis (392.), loco affecto (484.), temperie ægri, cognitio.

Ubi in externis partibus corporis scirrhus hæret, facile detegitur: difficilius cognoscitur, si in partibus internis lateat. Lucem tamen obscuris his casibus affundet sequentium attentæ consideratio.

C A U S A. Sic v. g. causa prædisponens ad scirrhi generationem est atrabilaria sanguinis spissitudo in humoribus; in victu austera terrestria crassa diu sumpta absque validis corporis exercitiis; in animi affectibus mæror diuturnus. Causa vero efficiens est v. g. contusio, inflammatio non resoluta nec in suppurationem

(a) *Observ. Chir. Cent. 1. Observ. 61. pag. 49.*

conversa

conversa, menstruorum vel hæmorrhoidum consuetus fluxus subito suppressis, lăbes hæreditaria, &c. Si constet, tales causas præcessisse, merito scirrhus metuitur.

**E F F E C T U.** Scirrhus semper lædit functionem partis, quam occupat; sæpe etiam turbat actionem vicinorum, quæ aucta sua mole comprimit. Unde si causæ, scirrho producendo aptæ, prægressæ fuerint, & signa læsarum functionum doceant, partium quarundam usum, quem in sanitate habebant, turbatum esse, vel & omnino abolitum; diuque in eodem statu maneat sine notabili incremento morbus; augetur firmitas Diagnoseos, qua scirrhi præsentia determinatur. Sic v.g. si post acutum pectoris morbum, nec blanda resolutione, nec benigna suppuratione, sanatum, maneat dyspnœa, & tussis sicca, atque ad minimum corporis motum, vel post cibum largiori copia assumptum, augeantur hæc mala, merito concluditur, scirrhum in pulmone natum esse, qui, mole sua angustans vasa aërea, difficilem respirationem facit, & compressis vasis sanguineis impedit, ne sanguis corde dextro expulsus liberrime per omnes arteriæ pulmonalis angustias transire possit; unde aucta per motum corporis sanguinis velocitate, vel crudi chyli largiori copia sanguini venoso dextri cordis mista, incipit obrui pulmo, & augetur cordi dextro resistentia, quam omni respirationis auctæ molimine superare vel invitus nititur homo, tales angustias passus. Latens in pulmone vomica, comprimens partes vicinas, similis quidem efficiet, sed augebitur, incrementum puris copia hæc anxietas, donec vel suffocetur æger, vel rupto abscessu liberetur. Hæctica febricula, hujus morbi semper fere comes, latens tale malum indicabit satis. Ubi autem scirrhus hic latet, omnia diutissime manent in eodem statu, & sæpe per plures annos sine ullo incremento persistent hæc mala.

**PHÆNOMENIS.** Hæc sunt in scirrho, externas partes occupante, tumor, durities, doloris absentia: sed ubi interius latet, hæc phænomena sensibus sæpe detegi nequeunt; unde tunc soli effectus scirrhi lucem in tali casu affundent.

**LOCO AFFECTO.** Dictum fuit in Commentariis §. 484., circa loca glandulosa frequentissime scirrhos nasci, & imprimis si fluidum, glandulosa fabrica secretum, sua natura facile inspissetur; uti v.g. lac in mammis: unde à levibus etiam causis scirrhi hic nascuntur.

**TEMPERIE ÆGRI.** Atrabilia nempe, quæ scirrho producendo maxime favet, ut in Commentariis §. 485. dictum fuit: cujus signa in semeioticis recensentur, de quibus postea in Capitulo de Melancholia latius dicetur.

§. 488. **E**X iisdem (487.) eventus præfigitur, considerando durationem mali, & effectus (486.). Sunt per se innocui, evadunt motu incitato maligni.

In Prognosi determinatur facilis difficilisve curatio scirrhi per Diagnosin cogniti; uti etiam illa mala prævidentur, quæ à functionibus læsis scirrhosarum partium, vel vicinarum à tumente scirrho compressarum, in corpore fient. Prognosis ergo ex iisdem fontibus petenda erit, ex quibus Diagnosin deducta fuit. Longe enim v.g. difficilior erit cura scirrhi, qui ab atrabilia sanguinis spissitudine ortum duxit; quam si idem malum post inflammationem remanserit. Longe alia metuenda erunt, si scirrhus magnis vasis adjacens illa compresserit sua mole,

H h h h h



quam si in mamma idem hæserit, vix nociturus, nisi in cancerum degeneraverit: Imprimis autem in Prognosi attenditur ad durationem mali & ejus effectus varios. Uti enim patebit paulo post, recentem scirrhum curari posse plerumque magna spes affulget; si per annos hæserit, indomabile malum est, nisi extirpari possit. Effectus autem scirrhi fere tantum variant ob diversitatem partium, quæ scirrhus laborant, vel à tumente ejus mole comprimuntur.

Scirrhus vero, cum indolens tumor sit, non adeo multum nocet ex sua natura, nisi tali in loco situs sit, ut vicina comprimendo insignes corporis functiones turber. Sic in mammis per viginti annos & ultra sine noxa scirrhos hæsisse novi: imo & constitit observatis, etiam in interioribus corporis illos delituisse absque insigni sanitatis detrimento. In homine sexagenario, post lapsum ex alto mortuo, *Littre* (a) invenit totum lienem putrefactum, neque tamen de ullo malo conquestus fuerat homo ille, & sanus satis atque hilaris semper vixerat. Sed parva debuit fuisse moles illius lienis, cum tantum unciam unam cum dimidia æquaret pondere; adeoque non potuit vicinas partes sua mole multum premere. Imo & *Hippocrates* (b) de lienosis agens habet sequentia: *Progressu vero temporis quibusdam morbus in hydropem degenerat, & contabescunt. Quibusdam vero (lien) suppuratur, & usque sani fiunt; quibusdam etiam durus & magnus existens consenescit. Oritur autem morbus, quando ex febribus & mala curatione bilis aut pituita, vel utraque in lienem decubuerint, & diuturnus quidem affectus est, non vero lethalis. Tamen si consideretur scirrhi indoles, patebit satis, plurima inde nasci posse mala, si motus humorum per vasa incitetur, quacumque demum de causa hoc fiat. Hæret enim in scirrhus liquidum coagulatum vel inspissatum, sive in folliculis collectum, sive per fabricam intricatissimam vascularem partium dispersum; illud ergo tanquam mortuum & iners ibi corpus concipi potest: sed vasa hoc liquido immeabili repleta, vel folliculi eodem distenti, in suis membranis habent vasa vitalia, per quæ angustata, à concreto hoc scirrhuso illa comprimente, difficilius humorum transitus est; qui tamen adhuc fieri poterit, ubi pacatus est vitalium humorum motus: si vero per febrim v. g. augeatur circulationis celeritas, vascula hæc vitalia, undique à scirrhuso concreto compressa, non poterunt dilatari, ut eodem tempore major per illa fluere possit liquidorum copia; hinc fiet in his obstructio, & urgente velociori humorum motu, inflammatio. Cum autem à valido tunc attritu in vasis his angustatis calor nasci debeat satis validus (vide §. 382. n°. 6.); sequetur brevi putrefactio concreti illius scirrhusi (vide §. 84. n°. 4. & 5.), & omnia illa mala, de quibus postea in Canceri historia dicetur. Pater ergo ratio, quare ex propria natura innocuus scirrhus, aucta circulationis velocitate, malignus fieri possit.*

§ 489. **Q**UI sæpe vitari impos æternum metum parit.

Quis enim Medicus cavere queat vel in proprio corpore, ne aliquando incitetur humorum motus? Animi affectus quos vitare nemo potest, natos vero compescere vix sapientissimi valent, augent sæpe immaniter circulationis impetum

(a) Académ. des Sciences l'an 1700. Hist. | (b) De Affectionibus cap. 5. Charter. Tomi pag. 50. | VII. pag. 615.

& velocitatem (vide §. 99. n°. 1.). Diætæ errores satis etiam leves hoc efficere aliquando possunt. Motus corporis musculares aucti eodem modo nocebunt. Sed nunquam impetrari poterit ab ægris, ut tanta cum cura hæc omnia vitent, cum indolens scirrhus semper fere negligatur. Licet autem summa etiam sollicitudine ad omnia hæc attenderetur, quis ulla arte cavere poterit, ne epidemicis morbis grassantibus corripiatur, vel externis læsionibus, contusione v. g. aut similibus, irritetur mitis hætenus scirrhus? Præterea & illæ mutationes, quæ naturaliter corpori accidunt, scirrhum in cancerum convertere valent: uti v. g. menstrui fluxus cessatio in effœtis mulieribus (vide §. 495.). Patet ergo, dum scirrhus in quadam corporis parte hæret, æternum adesse metum p̃joris mali, cum nulla arte vel prudentia vitari possint omnes causæ, quæ benignum scirrhum in pessimum cancerum mutare valent.

§. 490. **U**NDE Curaturus notet:

1. Scirrhum, si recens, benignus, loco idoneo situs, nondum perfecte durus, in homine euchymo, tentandum emolliente, resolvente medela; quo fumi acidi, & vis mercurii imprimis spectant.

In scirrho curando summa prudentia opus est, nihilque hic temere tentandum; cum commissi errores postea corrigi nequeant, & calamitosissima mala sequantur perversam scirrho medelam. Medicorum ergo & Chirurgorum animis semper obversetur salutare monitum *Hippocratis* dicentis: *Quibus occulti canceri oriuntur, illos non curare præstat: curati enim citius pereunt, non curati vero multum tempus perdurant* (a). Scirrhos enim malignos & inveteratos hoc nomine vocasse videtur *Hippocrates*, qui tam facile irritantur à remediis applicatis, & in cancerum degenerant exulceratum. Priusquam ergo ullum remedium applicabitur scirrho, sedulo examinandum est, an spes sit, illum resolvi posse: hoc autem cognoscetur, si scirrhus habeat sequentes dotes.

**R E C E N S.** Tunc enim concretus humor nondum, liquidissima parte diffusa, in massam non resolvendam amplius abivit: & raro adhuc in scirrho recenti tota glandulæ substantia affecta est, unde major opportunitas erit per vasa pervia huc adducendi solventia remedia, quorum major etiam efficacia erit in concretum, quod nondum in calculosam fere duritiem transiit. Si ergo scirrhus per plures jam menses in quadam parte corporis hæserit, angusta resolutionis spes superest. Optime hinc dixit *Aretæus* (b) de Scirrhis Lienis agens: *Orientes avertere, & nuper incipientes solvere oportet*. Monuit tamen ibidem, non adeo faciles esse horum scirrhorum resolutiones.

**B E N I G N U S.** Quamdiu indolens scirrhus est, neque nimis magnus, nec durus admodum, neque integumentorum color mutatus fuerit, nullusque pruritus neque calor major in illo vel ejus vicinia sentitur, benignus dicitur. Contraria si obtineant, tunc malignus vocatur: cujus signa postea enumerabuntur n°. 3. hujus paragraphi.

(a) Hippocr. Aphor. 38. Sect. VI. Charter. { (b) De Curat. Morbor. diuturn. Lib. I. cap. Tom. IX. pag. 272. } 14. pag. 128.

**LOCO IDONEO SITUS.** Cum nempe medicamenta commodè applicari possint, & manibus accessus detur: ut, si forte præter spem hætenus benignus scirrhus à remediis applicatis irritaretur, tolli integre ferro posset. Unde requiritur, ut & adsint conditiones sequenti hujus paragraphi numero recensitæ.

**NONDUM PERFECTE DURUS.** Saxea enim illa fere durities, & prærupta scabra superficies scirrhum confirmatum indicant, & à lenissimis etiam solventibus remediis applicatis talis scirrhus in majorem malignitatem degenerabit brevi. Debet ergo tumor talis pressioni utcumque adhuc cedere posse; aliter enim metuendum est, vasa cum liquidis coagulatis fere concrevisse in massam ir-  
resolubilem.

**IN CORPORE EUCHYMO.** Cum enim in Commentariis §. 485. dictum fuerit, cacochymiam atrabilariam scirrhis producendis quam maxime favere; quid juvabit multo molimine solvere impactam vasis materiem; si, hac soluta, ab eadem causa similis obstructio brevi renascetur? si v. g. acri scorbuto putrido sanguinis massa infecta fuerit, putredinis hic adeo noxiæ magnus metus erit, dum emollientibus & resolventibus remediis tentatur scirrhi resolutio.

Tot cautelæ requiruntur, ut absque periculo scirrho medela fieri possit. Fraudulenti Agyrtæ, delirantes aniculæ, nimis sæpe imprudentes Chemici, dum suis arcanis temere confidunt, contemnunt pericula, quæ ignorant; & magnis promissis deceptos homines in summas misérias præcipitant.

Ubi ergo omnibus rite perpensis patuit, scirrhum resolvi adhuc posse, quænam tunc medela requiritur? sola certe emollientia, quæ vasa laxant; & solventia, quæ sine magno motu excitato fundere valent concretos humores, conducunt. Dixerat quidem *Aretæus* (a) igni similibus remediis ad scirrhosam duritiem lienis molliendam utendum esse, sed statim commendat irrigationes ex aceto, oleo, & melle, unguentariæ glandis pulverem inspergendum jubet, & mollissima laudat cataplasmata. Alia occasione (§. 406.) mentio facta fuit regulæ practicæ, quam Galenus de Scirrhi curatione agens (b) habet. Dicit enim: *Quod si quis vehementer trahentibus & discutientibus medicamentis vacuare tentet, nec iis, quæ humectant & calefaciunt, molliat ac liquet, huic paucis primis diebus egregie processisse curatio videbitur. Cæterum, quod de affectu restabit, erit insanabile. Siquidem toto, quod in eo erat tenuium partium, discusso quod reliquum est, velut lapidosa concretio linquetur.* Veritas hujus rei toties apparuit in lactantibus mulieribus, quæ tumores in mammis natos, ut suppurationem evitent, præter ardentem exponunt, & perfricant: sic enim brevi minuitur tumor, nec fit suppuratio, sed tota vita manet indomabilis scirrhus. Nihil fere pulchrius est, quam partem scirrhosam vaporibus aquæ tepidæ exponere bis de die, dein molliter perfricare, & postea imponere Emplastrum aromaticum, imprimis additis gummi ferulaceis, ammoniaco, galbano, sagapeno & similibus, quallia plurima in officinis prostant. Fomenta & cataplasmata ex similibus parata iisdem usibus servire poterunt: in Materia Medica ad hunc numerum talium formularum exempla habentur. Hæc methodo per menses continuata mammæ scirrhosæ recentes me sæpius curasse lætus recorder. Plurimum profuisse etiam vidi, saponis Veneti in lacte factam solutionem adeo spissam, ut pulvem tenuiorem referret, sponsia exceptam, & loco scirrhoso.

(a) Ibidem.

(b) Method. Med. Lib. XIV. cap. 4. Charter. | Tom. X. pag. 322. & Method. Med. ad Glau-

con. Lib. II. cap. 6. ibid. pag. 379.

applicatam, superimposita vesica fuilla, oleo perfricata.

Fumi acidi, & imprimis fermentatione ex vegetabilibus parati, aceti nempe, plurimum profuerunt in scirrhis resolvendis. Apud *Galenum* (a) jam hujus remedii usus commendatur: voluit enim emollientium applicationem interpolari debere usu illorum, quæ scirrhi materiam attenuare & incidere valent; atque inter incidentia præ reliquis laudat acetum. In tendinum & ligamentorum schirrhosis indurationibus curandis aceto acerrimo candentem lapidem pyriten, vel ejus defectu molarem, exstinguebat, & supra calidum ascendentem ex aceto vaporem tendines & ligamenta scirrhusa dimoveri curabat; hoc facto, iterum emollientia remedia applicabat. Metuebat tamen, ne ipsam tendinum & ligamentorum substantiam vapor aceti, nimis diu vel sæpe applicatus, læderet. Sed in lienis vel carnosarum partium scirrho tutum ejus usum dixit. Imo & composita quædam ex aceto medicamenta se excogitasse monet, atque Ammoniacum, Thymianum, aceto dilutum ad luti crassitiem, lieni scirrhuso impositum, perfectam sanationem attulisse, absque ullo alio remedio, dicit. Pulcherrime autem monuit alio in loco (b) laxantium usu mollescere quidem scirrhum, sed non decescere; medicamentorum vero, quæ aceto constant, applicatione ejus molem insigniter minui: Unde alternum horum auxiliorum usum commendat. Imo Galenus (c) & internum aceti usum in viscerum scirrhis curandis laudat, monetque in lienis scirrho externa remedia sola non sufficere, verum etiam requiri validissimas potiones, ex cortice radicum Capparis & Scolopendrii, & myricæ radicibus & ramulis in aceto vel oxymelite decoctis. Recentiorum observata etiam salutarem aceti usum in scirrhis resolvendis probant, sive in vapores resolutum partem aluat, sive fomenti vice adhibeatur, sive denique Gummi ferulaceis mistum emplastri forma applicetur parti scirrhusæ. In omnibus fere officinis obtinuit, gummi ammoniacum, galbanum, opopanax, sagapenum, aceto diluere, deinceps depurare à sordibus admistis, tuncque leni igne iterum exsiccare. Hæc autem preparatio non tantum instituta fuisse videtur, ut ab heterogenis admistis mundarentur hæc gummi, verum etiam ut acerrima aceti pars, dissilata inter inspissationem tenui & aquosa, illis gummi uniretur, sicque augetur horum remedium efficaciam, qua concreta dividere & attenuare valent. Unicum ex *Hildano* casum adduxisse sufficiet (d). Juveni & robustæ matronæ, dum infantem lactaret, sinistra inflammatur mamma: sedata inflammatione, tumor durus remansit, plurimis remediis frustra tentatus à mulierculis & Empiricis. Vocatus *Hildanus*, infantem ab lactari jussit, dein mammam quotidie inungi curavit linimento, quod inter alia bonam copiam gummi ammoniaci in aceto scillitico dissoluti haberet, simulque bis de die emolliens cataplasma applicuit; hacque methodo, dato per intervalla leni purgante, durus ille tumor integre resolutus fuit: idemque sibi in alio simili casu successisse affirmat.

Internum remedium nullum forte magis efficax habetur, quam acetum sale alcalino purissimo saturatum; vel si vini Rhenani libræ addatur uncia media salis cardui benedicti, stipitum fabarum, vel similis cujusdam; talisque mixturæ ter vel quater de die uncia dimidia sumatur. Antiquis jam laudatus fuit similium.

(a) Method. Med. Lib. XIV. cap. 5. Char-  
ter. Tom. X. pag. 323.

(b) Method. Med. ad Glaucon. Lib. II. cap.

6. ibid. pag. 372.

(c) Ibid. cap. 7.

(d) Observat. Chirurg. Centur. 1. p. 152.  
H h h h h iij.

usus. Cinerem sarmentorum vitiumque & vinaceorum condylomatis & sedis vitii mereri ex aceto: lienis tumori cum rosacco ruta & aceto: cinerem sarmentorum ad lienis remedia aceto conspersum valere dixit Plinius (a). Laudatur etiam sulphuris accensi vapor, ad partem scirrhosam determinatus; sed cum pulmone infestus sit, difficilius adhiberi poterit. Etiam aceti cognita vis, qua sanguinem dissolvit, majorem spem curationis in talibus calibus facit, cum sulphuris acidum, imprimis si meracissimum fuerit, sanguini coagulum inducat.

De argenti vivi efficacia in obstructionibus referendis dictum fuit in Commentariis §. 135. n°. 4.: & in scirrhis resolvendis sæpe ejus usus profuit, tam externus, quam internus; sed tantum in scirrho benigno & incipiente: Ubi enim in lapideam fere duritiem conversus est, & malignus fieri incipit, nullum omnino à fortissimis etiam mercurialibus præparatis; neque ab ipsa salivatione, argento vivo excitata, levamen expectari potest; quin potius exacerbantur omnia, & aucto humorum motu per hoc remedium, scirrhus citius in cancerum mutatur. Solet cum fructu scirrho resolubili applicari Emplastrum de ranis cum mercurio, cavendo tamen, ne imprudenti ejus applicatione exciteretur sæpe periculosa salivatio: unde simulac ægri aliquem dolorem vel tensionem circa gingivas sentire incipiunt, auferendum est Emplastrum, locusque, cui adhæsit, saponis lixivio sollicitè depurandus. In bubonibus Veneris scirrhosis resolvendis hoc Emplastrum pulchre prodesse solet. Cinnabaris accensi vapor, sulphuris & argenti vivi conspirantibus viribus prodest; sed sæpe subito salivationem excitat.

2. Si non cedit his, si locus, situs, vicina, mobilitas, conditio mali, robur & valetudo ægri permittunt, ocyus ferro integre eximendus est.

Ubi vero, omnibus illis adhibitis per plures septimanas, vel & menses, nulla sit scirrhi imminutio, nihil aliud superest, quam ut tollatur, ne relictus Canceri æternum metum faciat. Præstat autem cito hoc facere, quia diutius relictus talis scirrhus solet augeri mole, & sæpe vicinis partibus accrescere; unde postea longe difficilior erit ejus exstirpatio; imo & aliquando penitus impossibilis. Accedit, quod & sæpe soleat malum propagari ad vicinas glandulas; tuncque plures scirrhi exstirpandi forent, ut integra fieret curatio. Raro enim in mammis scirrhi majores non resolubiles diu hærent, quin & glandulæ subaxillares afficiantur simili malo. Vidi sic in muliere, cui ab externa contusione mamma scirrhosa facta fuerat, & frequenti applicatione fervidi fere spiritus vini in lapideam duritiem conversa, non tantum glandulas subaxillares, sed & totum collum, pectus, humerumque ejusdem lateris, penitus induruisse. Nunquam tamen satis inculcari poterit Chirurgis, ut de scirrho exstirpando non cogitent, nisi certissimi fuerint, illum integre tolli posse. Si enim vel minima ejus pars residua maneat post exstirpationem, brevi in cancerum degenerabit; uti toties funestis Exemplis constitit. Antequam ergo scirrhi exstirpatio concluditur, sequentia erunt consideranda.

(a) Histor. Natur. Lib. XXIII. Procem. pag. 588.



**LOCUS.** Debet esse talis, ut manibus Chirurgi & instrumentis facilis detur aditus. Qui enim de scirrhis internis tollendis cogitare auderet? In ipso tamen pudoris sinu enatum scirrhum, pugnum magnitudine æquantem, membrana crassa ac densa obvolutum, intus album & testiculorum virilium substantiam referentem, à dexterrimo Chirurgo resectum absque ulla læsione vicinarum partium, vidit *Tulpius* (a) in vidua quinquagenaria, quæ sic felicissime à tristissimis malis imminetibus liberata fuit; cum abscissa hæc moles non obscura jam indicia scirrhi in carcinoma degenerantis haberet.

**SITUS, VICINA.** Imprimis considerantur ratione magnorum vasorum, quæ in scirrhi vicinia hærent, cum tunc magnum periculum ab horum læsione immineat: uti v. g. si glandula subaxillaris vel Parotis tolli deberet. Neque tamen in difficillimis talibus casibus exercitati Chirurgi desperant; & constitit fidelissimis observatis, prudenti manu etiam in his locis scirrhos tolli posse. *Hildanus* (b) in muliere scirrhum jam cancrum mammæ abstulit; simulque debuit tres alios scirrhos, sub axilla ejusdem lateris hærentes, tollere, quorum unus ovi magnitudinem æquabat. Periculosam tamen hanc operationem feliciter perfecit; & ligatis vasis ad scirrhum illum majorem subaxillarem tendentibus, metuendam hic hæmorrhagiam vitavit. Parotidem glandulam, uti & subaxillarem, scirrhosas factas, à peritissimo & dexterrimo apud Haganos Chirurgos felicissime extirpatas vidit *Abrahamus Kaau*: notavitque in absolutissima de scirrho dissertatione, quam ad gradum Doctoratus aspirans scripsit, & defendit eadem die, qua *Magnus Boerhaavius* avunculus ejus obiit, quod extirpata glandula Parotide nequidem opus fuerit vasa arteriosa ligare, sed immissa spongia adstringenti liquore ebria compescebatur Hæmorrhagia; quæ sponte post octavam diem, pure subtus prodeunte, excidit. Ex quibus patet, quantum exercitata manus etiam in periculosissimis casibus valeat.

**MOBILITAS.** Antequam scirrhum ferro eximendum esse concludatur, debet prius constare, illum versus omnem directionem mobilem esse, neque cuidam parti accretum. Nisi enim integre tollatur, minima etiam pars scirrhi relicta in Cancrum degenerabit quam certissime, uti omnes observatores testantur. Omnis autem glandula hæret in tunica cellulosa, & cum illa naturaliter mobilis est quaquaversum. Debet ergo scirrhus prehendi digitis, dein sursum, deorsum, & ad latera moveri; si jam in omnem directionem æquali facilitate cedat, immobilis est, neque partibus suppositis vel ambientibus adhæret. Tunica cellulosa quidem illi undique accrevit, sed illa absque ullo damno, imo & sine magno dolore, inde separari poterit, uti statim dicetur. Aliquando accidit, scirrhum quidem inferius & ad latera satis mobilem esse, cutim tamen ejus superiori parti accrevisse, quod noscitur facile, quia in tali casu cutis elevari nequit in hoc loco: poterit tamen & tunc tolli scirrhus, simul rescindendo cutis partem, cui accrevit. Sed tunc semper majus vulnus fieri debet, & turpior erit ob cutim perditam cicatrix.

**CONDITIO MALI.** Ut nempe scirrhus solitarius sit; vel alii, si adsint, resolvi possint, vel etiam ferro eximi, si opus fuerit. Quid enim juvaret v.

(a) Observat. Med. Lib. III. cap. 34. pag. 142. (b) Observ. Chirurg. Centur. 2. Obs. 79. pag. 150.

g. scirrhum ex mamma tollere, si certis signis constaret, utrum pariter scirrhosum esse, vel in altera mamma simile malum adesset, quod ob rationes sequenti numero dicendas eximi non posset.

ROBUR ET VALETUDO. Omne enim artis molimen ægri salutem habet pro scopo. Unde si projectæ vires adeo fuerint, ut metuendum foret à dolore, hæmorrhagia, aut valida suppuratione, sæpe sequente majorum tumorum extirpationem, periturum ægrum, frustra tentaretur cura. Idem verum est, si magna cacochymia totam sanguinis massam infecerit; tunc enim vix unquam vulnera ad bonam cicatricem perducentur, nisi hæc emendari potuerit. Verum quidem est, si metus sit, scirrhum brevi in Cancrum abiturum anceps remedium certæ atque adeo horrendæ perniciiei præferendum esse: tuncque prudentis etiam Medici foret, suadere scirrhi ablationem, licet non absque periculo fieri posset.

Postquam omnibus bene ponderatis conclusum fuit, scirrhum tollendum esse, quaeritur, quam methodo hoc fieri debeat? Cauteria actualia, neque corrosiva hic locum habent, nisi tam parvus fuerit scirrhus, ut sic simul & semel destrui possit; sed & in hoc casu tutius cultro abscindi poterit: si enim vel minimum quid relinquatur, canceri metus est. Si scirrhosus tumor, quod rarius fit, sic propendeat, ut totus emineat ultra superficiem vicinarum partium, & pedunculo quasi affixus hæreat; suaserunt quidam, ut laqueo circumducto angustum illud collum, cui scirrhus adhæret, stringatur valide, ut sic omni nutrimento intercepto marcescat & decidat. Sed neque hæc methodus locum habere poterit, nisi certus sit Chirurgus, nihil de scirrho ipso laqueo sic intercipi: illud enim relictum, reliquo quamvis deciduo, in cancerum degeneraret. Tristissimum talem casum vidit *Celeberrimus Boerhaavius* ante multos annos in hac urbe, dum magnum tumorem scirrhosum in dorso situm, qui angustius collum habebat, sic curare aggredierentur quidam, quamvis satis moniti fuissent, pessima quæque expectanda fore. Binis enim laminis æneis, ad hanc rem paratis, & per cochleas sensim arctius appressis, tentabant comprimere tumoris hujus radicem; sed infauitissimus fuit eventus: horrenda enim putredine non tantum scirrhus, sed & vicina, corripiebantur, tetramque adeo spirabant hæc mephitim, ut ab omnibus, etiam Chirurgis, derelictus miser homo, infelix temerarii facinoris victima, tandem moreretur.

Omniū ergo optimum videtur, ferro scirrhum tollere, quando nulla resolutionis spes superest, & quidem ocysus. Periculum enim est, ne diutius relictus talis scirrhus crescat mole, accrescat partibus vicinis, vel etiam propagetur malum ad vicinas glandulas. Duplici autem modo sectione scirrhus tollitur: vel enim, dissectis integumentis, integer scirrhus enucleando quasi eximitur; vel totus scirrhus una cum integumentis omnibus simul & semel resecatur. Prior methodus, tunc longe, tardius tamen perficitur; locumque habet in tollendis scirrhis minoribus nullibi cuti accretis, sed undique liberis in membrana cellulosa hærentibus. Ubi vero ingens scirrhus est, cuti accretus, posterior methodus adhibetur: uti v. g. quando mamma tota scirrhosa extirpari debet. Ut enucleando scirrhus tollatur, tensis manu Chirurgi integumentis, cutis & panniculus adiposus discinduntur ad scirrhum usque, sine ejus læsione. Sectio hæc pro varia magnitudine scirrhi aliā est; in minoribus scirrhis sic eximendis recta sufficit

sufficit : decussatim facta sectio requiritur, si majores fuerint. Elevatis deinde per hamulos sectionis angulis cultello separantur integumenta à scirrho, donec totus nudetur antèrius : postea, forcipe Helvetii per ipsam scirrhi substantiam adacto, lenissime protrahitur, ut commodius in omni suo ambitu cultello separari possit, & eximi. Cum in panniculo adiposo hæreat glandula scirrhusa, illa separatio sine multo dolore fit, nisi illo in loco, ubi vasa scirrhum ingrediuntur. Ablato scirrho, compresso sanguinis effluxu, examinatur, an aliquid scirrhusi relictum fuerit; deinde curatur, ut vulnus cum substantiæ jactura: de qua re in vulnerum historia generali dictum fuit. Scirrhi talis enucleatio, cum omnibus suis cautelis exactissime describitur in modo laudata dissertatione *Abrahami Kaau*, qui illam à dexterrimo Chirurgo felicissime institutam coram viderat. Monetur merito, ne imprudentius trahatur scirrhus, dum separatur: tensis enim nervis ad scirrhum tendentibus non tantum acerrimus dolor nascitur, verum etiam convulsio lethalis, diu etiam post operationem peractam, secuta fuit. Pariterque cavendum, ne acrioribus stipticis irritetur cruda vulneris superficies, vel talia adhibeantur, quæ sanguinem fortissime coagulant: thrombi enim sanguinis concreti, in venis discissis hærentes, per latiores continuo factos ramos ad cor & pulmones pervenire possent, polypisque originem dare. Lintea carpta, idonea ligatura appressa, plerumque sufficiunt. fungus orbicularis (*Bovist*) pariter pulchri usus ad sistendum sanguinem.

Ubi autem una cum integumentis incumbentibus aufertur scirrhus, ut in mammae extirpatione fit, requiritur, ut sectio sub scirrho per panniculum adiposum transeat, absque læsione partium subjectarum. Ut hoc fiat, elevatur scirrhus à partibus suppositis, sive digitis tantum Chirurgi prehendatur, sive acubus transfixis, vel forcipe Helvetii per scirrhi substantiam adacto, attollatur; vel & bidente trajecto per cellulosa tunicam inter scirrhum & partes subjectas sectio instituitur cultro, qui sub bidente, illi appressus manens, omnia sic discindit, transeundo per membranam cellulosa: interim bidente elevato, dum sectio fit, elevatur scirrhus, sicque cavetur, ne partes suppositæ cultro lædantur. Pro varia magnitudine scirrhi, & conditione loci, in quo hæret, diversa methodus eligitur à Chirurgis. Verum talis scirrhi extirpatio fieri nequit, quin ingens vulnus remaneat; unde semper periculum est, ne vel nimia suppuratione exhauriatur corpus, vel pus in tam lata plaga collectum, dein venis bibulis resorptum, purulenta cacoehymia sanguinem inficiat. Unde prior methodus, qua enucleando scirrhus tollitur, tutior est, cum illam nunquam tam valida suppuratio sequatur, & longe citius curetur inflicto vulnus. Omnium felicissime peraguntur hæ operationes, si Chirurgus peritos & intrepidus adjuutores habeat, qui dissectas inter operandum arterias digitis comprimere nōrunt, ne impetuose exsiliens sanguis turbet operantem.

3. Si vetus, colore, duritie, scabritie, pruritu, inchoato dolore malignus, loco vel vicina timendus, adhærescens, in corpore cacoehymo, extirpatu impossibilis, tum omnia vitanda, quæ motum augment, ne carcinoma fiat. Ideo emollientia, suppurantia, rodentia, caustica, dissipantia, mala sunt.

Præcedentibus numeris actum fuit de illis, quibus scirrhus resolvi, vel tolli poterat: agitur hoc numero de illo casu, quando nulla spes resolutionis superest, neque tamen tolli potest scirrhus. Resolutionis impossibilitas noscitur, si scirrhus vetus fuerit; si color integumentorum mutatus in rubrum, purpureum, vel lividum: si lapidea durities & scabra & prærupta tumoris superficies. Sin vero his omnibus accedat pruritus, longe major metus est, brevi in Cancrum transiturum hoc malum; incipit enim tunc moveri scirrhi concreta moles, leviterque distendi nervi per illam dispersi; unde grata titillatio & pruritus adeo molestus, ut ægri tales, quamvis moniti sævissimum cancrum instare, si scalpant vel fricent locum, tamen abstinere nequeant. Si jam dolor, pruritum brevi sequens, adsit, gravius adhuc malum est. Exstirpationem scirrhi talis impossibilem esse scitur, si vicinis sic accreverit, ut integre tolli nequeat; vel tali situs sit loco, ad quem Chirurgi manibus aditus non conceditur; aut denique vicina vasa sanguinea maxima periculosam nimis operationem fore doceant: in quo tamen casu plurimum à dexteritate & peritia Chirurgi intrepidi sperari potest. Si vero maligna adeo cacochymia sanguinis massam infecerit, ut vulneris facti, dum scirrhus tollitur, consolidatio sperari vix possit; vel in aliis locis corporis scirrhi plures pullulent; facile patet, irritam fore hanc operationem, si institueretur. Cum ergo in tali casu emendari non possit malum, nec tolli, totum, quod ars valet, est, ut in eodem statu retineatur, & præcaveatur sedulo, ne in deterius vergat. Hic est ille casus, de quo dixit *Hippocrates* in loco citato in Commentariis n°. 1. hujus paragraphi, quod Cancris occultis laborantes melius sit non curare, quia curati citius pereunt, non curati vero diutius supervivunt: scirrhus enim, dotes modo recensitas habens, merito Cancer occultus vocatur. Observatur autem scirrhum irresolubile citissime in Cancrum mutari, si motus humorum augeatur vel in toto corpore, vel in parte affecta; uti dictum fuit in Commentariis §. 488. Omnia ergo talia remedia, quocumque etiam titulo commendentur, noxia sunt. Nunquam enim poterit hic suppuratio fieri, quæ scirrhum non resolubile à partibus sanis separaret; sed pessima sequetur & indomabilis putredo, quæ omnia vicina depascitur, uti statim in Cancro historia dicetur. Quamdiu autem integumentis suis adhuc continetur scirrhus in Cancrum tendens, tolerabilis est; ubi vero ruptis his, Cancer ulceratus nascitur, tunc indomabili malignitate furit. Omnia ergo emollientia, & suppurantia, minuendo integumentorum cohesionem, malum hoc accelerant. Rodentia autem & caustica longe adhuc citius & pejus nocent. Quantum obsint emollientia scirrhis inveteratis applicata, observationibus suis demonstrat *Hildanus* (a); & ipse aliquoties vidi, dum delirantes aniculæ mammarum scirrhos, quos ad suppurationem deducere moliebantur brevi tempore in Cancros exulceratos similibus applicatis abire fecerunt. Voluit *Etmullerus* (b), incurabilem scirrhum intactum omnino relinquendum esse; vel applicatione nitri in aceto dissoluti in lapideam duritiem convertendum: Verum & hoc periculosum videtur, cum aucta scirrhi durities majorem ejus malignitatem indicet, & ab acribus his irritaretur: imprimis si scirrhus puncturis jam molestus

(a) Observ. Chirurg. Centur. 1. Observ. 89. | (b) Oper. Med. Tom. II. part. 2. pag. 1238.

tus, ad tactum dolens, & colore livescens esset; quali scirrhus illud remedium applicari voluit auctor. Præstat ergo talibus, quæ omnem inflammationem averunt, vel natam sedare valent, scirrhum munire, ne in pejus vergat; cum artem hæcenus cognitam superet mali hujus pertinacia.

4. Sed sola tum (490. 3.) anodyna, sedantia motum, Saturnina, Mercurialia blanda conveniunt.

In victu tunc mollissima olera conveniunt, juscula carniū recentium, lactinia, cerealia, fructus horæi mites, bene maturi (vide Materiam Medicam ad hunc numerum). Pro potu lac aqua dilutum, recens & mollis cerevisia, decocta hordeacea, avenacea & similia. Omnes animi affectus validi vitentur sedulo; nati sopiantur prudenter. Acrida omnia, calefacientia, moventia, hic nocent summopere. Si jam dolores lancinantes, vel pruritus molestus, in parte scirrhosa percipiuntur, anodynis hæc sedanda, tam interne sumtis, quam externe applicatis: quorum varix formulæ in Materia Medica habentur. Si vero incipiant inflammari scirrhī integumenta, plumbatis remediis prudenter applicatis tentandum est, ut hæc sedetur. Acerum lithargyrii aquæ copia dilutum, nutritum dictum unguentum, ex hoc & oleo solani officinarum intime simul mistis paratum, Emplastrum Diapompholygos, præcipua sunt. Iisdem remediis sedatur pruritus. Mollissima aluta tegatur locus scirrhosus, ut omnis attritus vestium caveatur, à quo facile excoriari possent integumenta. Unde si mamma scirrhosa fuerit, nunquam loricæ ex balenæ ossibus factas induant mulieres, neque valido labore se exercent; cum à pectorali musculo supposito tunc agitetur scirrhus. Blanda mercurialia optimi hic usus sunt; amalgama ex argento vivo & plumbo factum, Emplastro diapompholygos mistum, pulcherri-me profuit etiam in illo casu, ubi jam inflammari integumenta scirrhī cœperant: tenuem lamellam plumbeam argento vivo perfricatam, & scirrhī figuræ adaptatam, laudant alii. Ubi autem mercurialia scirrhus applicantur, cavendum sedulo, ne ab incauto horum usu excitetur salivatio, semper hic nocitura, cum scirrhosum concretum solvere non possit, interimque motum augeat, & humorum acrimoniam: adeoque scirrhī in cancerum degenerationem promoveat.

§. 491. **S**I simul temperies peccat; hæc corrigenda præ cæteris.

Cum totus scopus sit in cura hac, palliativa Medicis dicta, ut non augeatur mole, neque degeneret in Cancrum scirrhus; patet satis, temperiem morbosam, si adfuerit, corrigendam esse. Dictum fuit in Commentariis §. 485. atrabilariam temperiem quam maxime scirrhus occasionem dare: eadem ergo, si adfuerit, scirrhū præsentem augebit; adeoque diætæ & medicamenta talia sunt, quæ huic temperiei emendandæ conveniunt: de quibus postea in Capitulo de Melancholia dicetur. Eligenda tamen illa remedia sunt, quæ blanda & saponacea vi fundunt tenacem illum atrabilarium succum; vitanda omnia, quæ notabilem acrimoniam habent. Mel, sapo Venetus, blandi & quam maxime tamen solventes herbarum succi, vel decocta, profunt; qualia ex cichoreo, ta-



raxaco, endivia, fumaria & similibus confici poterunt. Si acris scorbutus v. g. simul adfuerit, pariter aptis remediis debellandus erit, vel mitigandus saltem, quia acre scirrho mistum, uti statim patebit, ejus malignitatem auget, & brevi in Cancrum mutat.



## C A N C E R

§. 492. **S** C I R R H U S ( 392. ), ætate, augmento, motu viciorum, si movetur ita, ut vasa vicina ad margines scirrhii inflammari incipiant, evadit malignus, & vocatur jam Cancer à similitudine, vel Carcinoma.

Sequitur jam omnium, quibus humanum corpus affligitur, calamitosissimus morbus quem hactenus nunquam sanatum fuisse constitit, nisi una cum vitio pars vitata tolli potuerit. Neque sola pertinacia, qua ad omnia rebellis manet, metuendus morbus est; verum etiam diris cruciatibus, & putredine intolerabili, qua vivum corpus sensim depascitur, terribilis. Accedit omnibus his malis tormentorum diurnitas, quibus per plures menses, imo & annos, aliquando affliguntur miseri, antequam, ultimum omnium malorum remedium, mors finem sævissimis doloribus faciat. Nisi enim erosio vasis majoribus Hæmorrhagia pereant, miserrimam vitam diu trahunt, antequam peresa corpore moriantur.

Cancer, *καρκίνος*, *καρκίνωμα*, solet vocari hic affectus: illudque nomen huic datum fuisse voluit *Galenus* (a), quod similitudine quadam Cancrum animal referat. Uti enim illud animal utrimque pedes porrigit, sic & venæ atro sanguine turgentes undique ex carcinomate exeunt. Addidit *Ægineta* (b), quod carcinoma pertinacissime adhæreat partibus, quas occupat, uti Cancer animal chelis suis prehensam prædam firmissime tenet; atque inde majoris similitudinis rationem deduxit. Ex illis autem, quæ in Commentariis §. 419. dicta fuerunt, patuit, *Celsum* sub Canceri nomine Gangrænam & Sphacelum descripsisse: Carcinomatis autem vocabulo usus fuit, ut illum morbum designaret, quem hodie Medici & Chirurgi & Cancrum, & Carcinoma, promiscue solent vocare. Licet enim obscurior aliquantum videatur carcinomatis apud *Celsum* (c) descriptio, talia tamen habet, quæ satis ostendunt, quod hunc morbum sic vocaverit. Circa faciem enim, aures, nares, labra, mammas mulierum, maxime id vitium fieri dicit, circaque illud venas quasi recurvari: summamque etiam illius malignitatem, & facilem irritabilitatem, dum secatur vel uritur, pariter in-

(a) Method. Med. ad Glaucon. Lib. II. cap. 1.  
71. Charter. Tom. X. pag. 390.

(b) Lib. VI. cap. 26. pag. 66.

(c) Lib. V. cap. 28. pag. 317.

dicavit. Quin imo nulli unquam medicinam profuisse in his malis dixit: adusta enim protinus concitata sunt, & increverunt, donec occiderent. Excisa etiam, post inductam cicatricem reverterunt, & causam mortis attulerunt. Ex quibus omnibus satis patet, Carcinomatis nomine Cancrum hodie dictum à *Celfo* descriptum fuisse.

Scirrhum prægressum Cancer sequitur, vel potius scirrhus in Cancrum mutatur. An autem nunquam cancer oriatur in corpore absque scirrho prægresso, alia quaestio est: patebit credo illis, quæ in Commentariis §. 496. dicuntur, simile malignitate, & horrendis effectis, malum observari in multis corporis locis, licet nullus scirrhus præxisterit. Sed quomodo scirrhus in cancrum transit? quibus signis à cancro distinguitur? Communi omnium Medicorum consensu scirrhus vocatur tumor durus, indolens, (vide Commentaria §. 392.): scirrho autem in cancrum tendente manet tumor, sed accedit dolor, qui antea non adfuerat. Signum ergo cancrum à scirrho distinguens dolor est. Verum cum inter scirrhum, incipientem in cancrum degenerare, & cancrum exulceratum ingens discrimen sit, & per varios gradus decurrat hoc malum, antequam ad pessimam malignitatem pervenerit, ideo apud auctores scirrhi nomen aliquando retineretur, licet jam lancinantes illi dolores adfuerint. Melius tamen tunc distinctionis gratia Canceri occulti vocantur quam scirrhi, uti statim §. 494. dicetur.

Scirrhus, uti in Commentariis §. 484. patuit, pro causa habuit, quidquid succum glandulosa fabrica paratum, in ductibus secretoriis, excretoriis, vel & in folliculis hunc colligentibus, coagulare, inspissare vel siccare potest; dum simul intricatissima vasculorum, quæ glandulas constituunt, fabrica; vel & humor in folliculis extra circulationem quasi positus, faciunt, ut sanguinis arteriosi impetus non possit agere in vasa hæc vel receptacula obstructa, neque in materiam obstruentem, tali cum effectu, ut solvatur concretum; vel blanda suppuratione separentur illa, quæ circulationis legibus amplius obedire nequeunt. Hæret ergo concretus succus in vasis, vel in cavis folliculis, quorum latera omni vasorum genere constant; potestque ibi diu hære immutatus, & quidem sine magna damno, ut quotidiana observata testantur. Sola functio partis scirrhosæ læditur, vel & aliquando turbatur actio partium, quæ à scirrho adjacentes comprimuntur. Ubi vero à quacumque causa augetur motus humorum per vasa viva & pervia, quæ circa scirrhi substantiam hærent, patet ex illis, quæ ad §. 375. dicta sunt, inflammationem hic nasci facillime, cum vasa hæc à scirrhoso concreto compressa & angustata placide motos humores transmittere possint; accelerata autem circulatione, obstruantur. Sed inflammationem hic natam sequentur omnia ejus effecta (vide §. 382.), dolor nempe, attritus ingens, & inde natus calor & æstus. Verum in Commentariis §. 84. demonstratum fuit, incitatum humorum motum, auctumque calorem, quam maxime ad putredinem disponere. Scirrhosum ergo concretum, hætenus mite, & inertis corporis instar in vasis vel receptaculis infarctis hærens, putrescere incipiet, & majorem acrimoniam acquirere; sicque irritare & rodere valebit loca, quibus continetur. Non mirum ergo, tunc dolorem nasci, quo, uti dictum fuit, Cancer à scirrho distinguitur. Idem effectus sequetur, si vasa vicina, à scirrho contiguo pressa, inflammentur: facile enim patet, tunc brevi in ipsa scirrhi substantia simile oriturum malum. Unde toties, & satis cito sæpe, scirrhus ma-

ma in Cancrum mutatur in mulieribus, quæ manuum opera victum comparare debent; atteritur enim tunc durus scirrhus ad vicina vasa, quæ inde inflammantur; sicque brevi scirrhus in Cancrum degenerat. Si ergo scirrhus sensim auctus magis comprimat vicina loca, Cancer brevi fiet. Sed præterea ipsa hæc concreta scirrhi substantia tandem poterit sponte sua acris fieri, & omnia eadem mala producere: dictum fuit enim §. 485. atrabiliariam sanguinis materiem scirrhis producendis quam maxime favere: imo Veteres Medici ab hac sola causa scirrhorum originem fere deduxerunt; & ad hanc materiem solvendam & evacuandam de corpore totam curationem intenderunt.

Parebit autem ex illis quæ postea in capitulo de Melancholia dicentur; atrabiliarium illum, & piceæ fere tenacitatis, humorem diuturna mora & stagnatione acrem fieri & rodentem; tuncque summa mala producere. Idem ergo & in scirrho contingere poterit, & imprimis in atrabiliaræ temperiei hominibus: adeoque & ætate malignus fiet, licet nulla alia causa accesserit.

§. 493. **I**N quo (492.) gradus inflammationi vicinæ; acrimoniæ putridæ excessus in loco affecto; dignitas partis; glandularum nexarum numerus & conditio; temperies totius, diversos malignitatis primæ status docet.

Simulac prima tantum initia degenerationis scirrhi in Cancrum adsunt, malignus dicitur; & merito, ob horrenda mala, quæ postea sequuntur. Sed malignitas illa major minorve est, citiusque vel serius in pessimam indolem mutatur, pro variis conditionibus, quæ hac paragrapho enumerantur.

**GRADUS INFLAMMATIONIS VICINÆ.** Leve Erysipelas vel mitis Inflammationuncula in vicinis scirrhi, vel etiam in ejus integumentis, nata, sæpe prudenti applicatione plumbati Emplastri, acetii lithargyrii multa aqua diluti, vel similibus, sedari poterit; sicque præcaveri, ne in Cancrum exulceratum cito degeneret scirrhus. Ubi vero valida inflammatio in scirrhi integumentis, vel in vicinis partibus illum ambientibus, nata fuerit, pessima mala expectanda sunt brevi.

**ACRIMONIÆ PUTRIDÆ EXCESSUS IN LOCO AFFECTO.** Præcipua Canceri malignitas in eo consistit, quod scirrhi substantia, in vasis vel receptaculis adhuc vivis hærens, putrescat, & sanie virulenta vicina omnia rodât & exulceret. Non vero statim, in cancris etiam exulceratis, ad ultimam illam malignitatem procedit malum, sed sensim & per gradus. Quo ergo major fuerit putredo, eo pejora erunt omnia. In Cancris apertis putredinis major minorve acrimonia ex saniei exstillantis fœtore, & erosione vicinarum partium, satis cognoscitur: in occultis vero pruritus, calor, dolores lancinantes, tumoris scirrhi augmentum subitum, indicant varium putredinis inceptæ gradum.

**DIGNITAS PARTIS.** Si enim v. g. Pancreas, ventriculus, hepar, intestina &c. Cancro affecta fuerint, longe sæviora symptomata sequentur, & acerbior prognosis erit, quam si v. g. in mamma simile malum hæreret.

**GLANDULARUM NEXARUM NUMERUS ET CONDITIO.** Solitarius Cancer diutius toleratur, minusque affligit, quam si in diversis locis

corporis simile malum hæreat. Adeoque pejor morbus erit, si talem partem oblideat, quæ propagatione mali vicinas glandulas afficere poterit. Vix unquam diu scirrhus insignis, & jam cancerum minitans, in mamma hæret, quin & glandulæ axillares ejusdem lateris incipiant scirrhusæ fieri; uti quotidianis observatis constat. Frequenter etiam, dum una mamma scirrhusa fuit diu, altera similiter afficitur. Cumque inter mammas & uterum tanta affinitas sit, sæpe & uterus simili malo laborare incipit. Tristissimum casum vidit *Celeberrimus Boerhaavius*, qui hoc confirmat. Nobili Matronæ mammam dextram occupans Cancer, nondum exulceratus, extirpabatur: post annum in mamma sinistra simile malum exscindebatur pariter. Sed languit postea, & omnia signa Cancris, uterum occupantis, habuit, tandemque lævissimis cruciatibus enectæ periit. In scirrhii historia dictum fuit, constitisse observationibus Medicis, dum glandulæ colli omnes induruerunt, etiam glandulas mesenterii similiter affici; frustra ergo in similibus casibus cura tentatur, cum malum in glandulis communicantibus redeat.

TEMPERIES torius. Atrabilaria temperies scirrhis producendis apta est, uti in Commentariis §. 485. dictum fuit: eadem ergo temperies scirrhum natum augere poterit. Sed scirrhus augmento suæ molis in Cancrum mutatur, uti patuit §. 492.; patet ergo in ficcis illis, macilentis, atrabilaris corporibus maximum futuri Cancris metum esse. Omnium maxime, si atrabilaris ille succus in sanguine prædominans incipiat solvi, & acris fieri: uti enim statim patebit §. 495. omne acre, scirrho mistum, illum in Cancrum convertit: Idem verum erit, si v. g. putridus scorbutus simul adsit: raro enim diu scirrhii in talibus corporibus hærent, quin evadant maligni.

§. 494. **S**I suis continetur pellibus, Occultus, his ulcere ruptis, Manifestus vel Ulcerosus dicetur; posterior primi solutes.

Scirrhus, uti jam sæpius monitum fuit, tumor durus, indolens, est in parte glandulosa. Ubi autem titillatio, pruritus, dolor, calor in hoc tumore percipiuntur, non amplius scirrhus vocari poterit, sed Cancer. Quamdiu autem integumenta cancri nondum erosa sunt, sed suis ille adhuc pellibus continetur, vocatur Occultus: ubi vero in illam malignitatem degeneravit, ut integumenta eroderet, & sanies exeat, tunc vocatur Cancer manifestus vel ulceratus. Apud *Ætium* legitur (a), quod *Phinoxenus* vocaverit Cancrum occultum, qui in abditis corporis hæret: ut, v. g., in utero vel intestinis. Post illum & alii idem dixerunt. Verum alia videtur fuisse *Hippocratis* opinio: ille enim (in loco citato in Commentariis §. 485.) tale malum in mammis hærens occultum Cancrum vocavit. Dum enim agit de menstruis retentis, ob os uteri aversum, dicit, menstrua retenta ad mammas remitti, falsaque graviditatis specie deludi mulieres: posteaque addit sequentia: *Et in mammis tubercula dura oriuntur, quadam majora, quadam vero minora: hæc autem non suppurantur, sed semper duriora fiunt: ex his deinde occulti Cancris nascuntur* (b). Ex quibus evidenter apparet, quod

(a) Tetrabibl. IV. Serm. IV. cap. 43.

(b) Hippocrat. de Morb. Mulier. Lib. II.

cap. 10. Charter. Tom. VII. pag. 808.

Hippocrates scirrhum à Cancro occulto distinxerit, illumque sic vocaverit in locis corporis quamvis externis hærentem. Cancer autem occultus ulceratum semper præcedit, uti facile ex modo dictis patet.

§. 495. **C**AUSA est quidquid scirrhum facit (484. 485.), acris scirrhus mistum; mutatio in circulantibus, à mens- truis, hæmorrhoidibus, hæmorrhagia qualibet, retentis; sterilitas, cœlibatus, effecta ætas à 45. ad 50. annos; victus austerus, acer, cali- dus; affectus animi tristes & biliosi, irritatio externa quælibet, motu, calore, acrimonia, emolliente, suppurante, caustica, vesicante me- dela externa, vel interna similia peragente.

Agendum nunc de causis, per quas scirrhus indolens, in Cancrum testum primo, deinde in ulceratum mutatur. Omnis autem causa, quæ scirrhum fe- cit, potest considerari, ut causa canceri remota: sed eadem hæc causa pergens agere poterit augere scirrhum natum, adeoque & in Cancrum convertere.

**ACRE SCIRRHUS MISTUM.** Sive materia ipsa scirrhi tempore mutetur in acrimoniam, & corrumpatur; sive per morbos blanda humorum sanorum indoles pervertatur, irritabitur scirrhus, qui hætenus quieverat, & brevi in Cancrum degenerabit. Idem fiet, si in victu assumantur talia, quæ acria sunt, neque per vires vasorum & viscerum facile subigi possunt; qualia sunt aroma- ta plurima, & acres imprimis alliorum & ceparum bulbi; his enim assiduo utentium sudor & urina hæc assumpta redolent. Unde patet, quam insidio- sum malum sit scirrhus, quamvis mitissimus fuerit. Licet enim in diæta ca- verentur omnia acria, quis à morbis, epidemice sæpe grassantibus, tutus sem- per erit? per quos blanda humorum indoles toties mutatur. Accedit, quod acria hæc noceant pariter augendo circulationis velocitatem, aqua sola scirrhus in Cancrum converti poterit, uti antea dictum fuit. Plurimis observatis Me- dicis constitit, quam periculosus sit acrium usus in his casibus: unicum ad- duxisse sufficiet. Post sævissimam ophthalmiam rupto oculo effluxerant humores, & collapsæ palpebræ concreverant in nobili viro; sicque per quatuordecim an- nos sine ullo maligno symptomate vixit. Cum autem tunc vino liberalius ute- retur, concoctu difficilibus cibis, aromatibus, cepis, alliis, porris, raphanis &c. vesceretur avide, tam diu silens malum in nervum erupit. Palpebræ enim clausæ sensim inceperunt diduci, & excrevit ex orbitæ fundo tumor durus, lividus, malignus, tandem ovo anserino major extra palpebras prominens hor- rendo spectaculo. Felicissimo successu ex imo orbitæ fundo reseculit cancerosum hunc tumorem *Hildanus* (a) & sanavit ægrum. Merito hinc cancro laboranti- bus in victu commendavit *Galēnus* (b) prisanæ cremorem, serum lactis, olera mollissima, malvam, atriplicem, blitum &c. pisces saxatiles &c.

**MUTATIO IN CIRCULANTIBUS &c.** Videantur illa, quæ de his dicta sunt in Commentariis §. 485. Ibi enim & Hippocratis testimonio, & optime-

(a) Observ. Chirurg. Cent. I. Observ. 1. }  
pag. 1. &c.

(b) Method. Med. aJ. Glaucon. Lib. II. }  
cap. 11. Charter. Tom. X. pag. 390.



rum auctorum observatis constitit, non tantum scirrhus nasci, si consuetæ illæ evacuationes substituerint, verum etiam scirrhus, si prius adfuerint, in cancrum brevi abire. Omnium maxime à mensstruis suppressis irritantur scirrhii in mammis, vel & circa uterum hærentes.

**STERILITAS.** In Commentariis §. 486. ubi de effectibus scirrhii nati in corporis variis partibus agebatur, notatum fuit, sterilitatem sæpius à scirrho, partes genitales mulierum obsidente, produci: Imo, quantum ex historia Medica pater, videtur inter observatas sterilitatis causas hæc frequentissima fuisse. In sterilibus ergo mulieribus non sine ratione Medici latentes scirrhus suspicantur, qui ætate & augmento solent in cancrum degenerare. Accedit præterea, graviditatis tempore, cum adeo dilatentur omnia vasa uteri substantiam constituentia, sæpe sic referari, aucta vasorum capacitate, incipientes obstructions, vel saltem sic disponi uteri vasa, ut postea facilius transmittant humores. Unde mulieribus, quæ inordinatis & suppressis sæpe mensstruis laborant, ob vasa uteri non satis facile dilatanda, toties profuit imprægnatio.

**CÆLIBATUS, EFFETA ÆTAS A 45. AD 50. ANNOS.** Constitit & hoc observatis Medicis: uti enim dictum fuit in Commentariis §. 485.; observavit *Dionysius*, quartam partem mulierum cancro laborantium hoc malo affici inter quadragesimum quintum & quinquagesimum ætatis annum; additque, quod frequentissime Moniales hoc morbo correptas observaverit: hoc etiam testatur *Vesalius* (a).

**VICTUS AUSTERUS, ACER, CALIDUS.** Atrabiliarium materiam, scirrhis sæpe causam dare §. 485. dictum fuit; patuitque etiam ex illis, quæ in Commentariis §. 493. habentur, ab eadem scirrhum augeri, & ad canceri malignitatem disponi. Omnia ergo, quæ augment atrabiliarium succum in sanguine, vel etiam majori excitato calore & motu eundem acriorem reddunt, nocebunt summopere. Verum, uti postea fusiùs dicetur in Capitulo de Melancholia §. 1093.; cibi austeri, duri, sicci, terrestres, cum quiete & torpore corporis diu assumpti, humorem atrabiliarium in sanguine generant; unde scirrhii & canceri inde futuri causas augebunt. Omnia acria, calefacientia, in victu pariter vitanda, quia aucto motu humorum nocent, uti paulo ante dictum fuit.

**AFFECTUS ANIMI TRISTES ET BILIOSI.** Dum generosæ indolis homines alta mente repostam injuriam gerunt, & memores iras in pectore nutriunt, solent in terribilissimam Melancholiam sæpe delabi; & chronicis morbis pessimis diu colluctati, tandem pereunt. Non mirum ergo & scirrhus inde generari, si non adfuerint; illos vero, qui jam adsunt, in cancrum mutari: cum atrabiliaria temperies, tristes illos animi affectus sequens, illis malis producendis apta sit. Ira autem, merito biliosus affectus dicendus, scirrhis nocet quam maxime. Dum enim

— — — — — calido sub pectore mascula bilis  
Intumuit, quam non extinxerit urna cicuta (b),

calor magnus conciliatur toti corpori, motus humorum augetur, febris excita-

(a) Chirurg. Magn. Lib. V. cap. 16.

(b) Aul. Pers. Satyr. V. vers. 144.

kkkkk

tur valida sæpe, totum corpus tumet, & rubet: unde ab aucto motu magnum periculum est, ne scirrhus in cancerum abeat.

**IRRITATIO** EXTERNA QUÆLIBET, MOTU, CALORE &c. Omnia hæc, quocumque demum titulo jactentur, noxia semper sunt. Scirrhum enim confirmatum & non resolubilem nemo prudens curare aggredietur, nisi sola exstirpatione: ubi vero hæc tentari nequit, nihil superest, quam servare scirrhum immutatum quam diutissime. Omnis enim mutatio scirrhi talis in malum tendit. Frictio, ubi spes resolutionis superest, summum remedium est; scirrhum malignum autem citissime in cancerum mutat: Calor, diffatis mobilissimis, scirrhum in summam duritiem converteret, vel putredinem, adeo hic metuendam, promovebit: Quantum noceant emollientia, suppurantia, rodentia, dictum fuit in Commentariis §. 490. n°. 3. Unde generalis regula practica est in scirrho tali curando, ut nihil ingeratur in corpus, quod motum augere possit vel calorem; nihil extrinsecus applicetur scirrho, quod illum irritare valeat. Simplex aluta mollissima, ut vestium attritus caveatur, vel plumbæ tum Emplastrum, optima sunt.

### §. 496. **L**OCUS ut Scirrhi (484.).

Cum cancer plerumque ex scirrho oriatur, facile patet, quod & eundem locum occupet. Observata tamen Medica videntur evincere, cancro omnino simile malum in quibusdam locis corporis nasci, licet nullus scirrhus præexistit. In labiis v. g. si vel frigore fissæ, vel alia quacumque de causa tenuis membranula illorum superficiei incumbens lacera fuerit, incipit emergere fungosus tumor, ad tactum sæpe satis mollis, qui auctus sensim in magnam satis molem expanditur, & dolore, maligno ichore exeunte, erosione vicinorum, hæmorrhagiâ, & rebelli ad quævis remedia indole, verum cancerum refert omni dote: &, nisi tempestiva sectione tollatur, omnia vicina depascitur eodem modo, ut in cancro exulcerato fieri solet. In lingua pariter papillæ nervosæ, coercente integumento liberæ, in fungosam massam expanduntur, & in eandem malignitatem degenerant; uti toties tristissimis exemplis constitit. In pene virili similes pessimæ degenerationes papillarum nervearum observantur. Memorabile hujus rei exemplum habetur apud *Hildanum* (a). Faber ferrarius à teneris annis habuerat in summa penis glande verrucam, lentis magnitudinem non excedentem, quam sine multa molestia gesserat, quamdiu cælebs vixerat. Postquam uxorem duxerat, dolor ingens & continuus accessit, ita ut per tredecim annos ab uxoris congressu abstinere debuerit. Successu temporis verruca in horrendum cancerum degeneravit, & quidem tantæ magnitudinis, ut recens nati infantis caput æquaret: penis totus in molem carneam inæqualem & lividam transformabatur, ulceribus plurimis hinc inde erosus, per quæ urina exiens conspurcabat omnia. Fætor adeo horrendus aderat, ut à familiaribus & amicis defereretur. Cum incassum tentatis plurimis remediis pro derelicto haberetur ab omnibus, *Hildanus* totum penem abscidit, & felicissime sanavit hunc hominem;

(a) Observ. Chirurg. Centur. 3. Observ. 82. pag. 172.

sic ut postea corpore validus fuerit, & solitum opificium peragere potuerit, atque decem annis post hanc curationem supervixerit. Sed ex Anatome constat, in lingua, labiis, glande penis esse numerosissimas papillas nervosas, acutissime dolentes, ubi epithelio, illas tegente, destituuntur; videnturque hæ papillæ in horrenda hæc mala degenerare, omnium frequentissime in locis modo dictis, & aliis similibus, ubi tenerissima tantum membranula teguntur. Neque tamen in his locis solis, verum etiam, ubi cutis ipsa adest, similia mala observata fuerunt. Vidi sic in virgine adulta satis magnam verrucam in dorso locatam, quam jam ab infantia gesserat, tandem ab attritu lorice ætioris, ex balnearum ossibus factæ, auctam, in cancrum degenerasse. Cum autem angusto collo penis emineret, Chirurgus filo illud constrinxerat, unde brevi decidebat verruca; locum, ubi hæserat, dein lapide infernali erosit. Sed paulo post ingens & malignus fungus excrevit, & cutis vicina induruit; cumque de extirpatione formidolosi mali cogitaretur, alio morbo correpta periit. Vidi sic in pollice pedis, dum unguem imprudenter secuerat Chirurgus in rustica, & læerat tenerimam illam pulpam nervosam hic locatam, similem excrevisse fungum; quem rodentibus dum consumere tentabat idem Chirurgus, sic irritavit; ut in horrendum cancrum abiret; unde postea pars extirpari debuit. Si jam quis vellet, verrucas, in locis cute rectis plerumque duriores, sub generali scirrhi definitione posse comprehendere, opponi tamen posset, in labiis, lingua &c. molles sæpe tales fungos excrevere, nec minus malignos tamen. Forte similia mala, à degenerantibus papillis nervosis orta, distinctionis causa; cancri fungosi dici possent.

Cum autem injectionibus Ruyschianis constet, papillas illas nerveas non tantum constare sola pulpa nervosa, verum & vasculis sanguineis satis numerosis; hæc omnia simul degenerant, & augentur mole: unde toties à verrucis malignis imprudenter resectis periculosa hæmorrhagia orta fuit. Neque videtur improbabile, & ipsam nervorum proprie dictam substantiam sic degenerare. Acutissimus enim dolor & in canceris illis fungosis, & in scirrho cancrecente, demonstrat, vitales manere nervos per hanc massam dispersos: & in Commentariis §. 268. & 295. satis patuit, quam facile ipsa cerebri substantia, cranio & membranis coercentibus libera, in fungosam molem attollatur. Nervi ad varia corporis loca delati, vaginis tenacibus tuto defenduntur, & coercentur; ubi vero, his depositis, explicatur mollis illorum substantia, uti v. g. in lingua, glande penis, palpebrarum interna superficie &c. membrana superimposita coercentur; qua erosa, vel alia quacumque causa læsa, fungosæ tales excrementæ emergunt. Necessarium ergo erit Chirurgis & Medicis novisse, etiam cancrum sæpe metuendum esse, licet nullus scirrhus prægressus fuerit.

§. 497. **C**OGNOSCITUR Occultus ex signis scirrhi (487.) prægressi, accedente titillatione, pruritu, calore, rubore, dolore lancinante, urente, pungente, colore rubello, rubro, purpureo, cœruleo, livido, atro; duritie summa, prærupta, scabra, cum eminente apice; tumoris augmento; vasis sanguiferis vicinis tumetibus, nodosis, varicosis, crassis, atris.

Kkkkk ij

Scirrhus præfens quomodo cognoscatur, in Commentariis §. 487. dictum fuit. Sed ut ex scirrho cancer fiat, & factus noscatur, debent quædam nova accessisse phænomena, quæ ante non adfuerant. Nunquam autem scirrhus subito in cancerum pessimum transit, sed sensim mutatus in pejorem malignitatem degenerat. Illæ autem mutationes, quæ scirrho accidunt, successivæ sunt, & illo ordine hic enumerantur, quo se mutuo sequi solent. Cancer ulceratus, vel etiam occultus, dum jam jam in ulceratum mutabitur, satis cognoscitur ab omnibus: ubi vero scirrhus prima dare signa incipit suæ degenerationis in pejorem indolem, difficilior aliquando ejusdem cognitio videtur. Monuerat hoc Galenus (a) de hoc affectu agens; dicit enim: *At ubi magna quidem omnia sunt, nemo de appellatione ambigit, sed nominant communi assensu omnes ejusmodi affectum cancerum. Incipientem adhuc latere plurimos, consentaneum est, non secus quam è terra pullulantes stirpes; nam & hæc à bonis tantum agricolis cognoscuntur.* Cum enim scirrhus §. 32. definiatur tumor durus indolens, hoc nomen retineri poterit, quamdiu nullus dolor adest; ubi autem incipit titillatio & pruritus oriri, jam ab innocua sua indole (vide §. 488.) degenerat, neque adhuc canceri, proprie dicendi, nomen meretur, in quem tamen brevi mutabitur. Licet autem aliquid dubii posset esse, circa denominationem hujus affectus, in illo limite, ubi scirrhus in cancerum transit, in curatione tamen nullus inde error nascetur, cum & vetustus scirrhus, & incipiens cancer, eandem medelam requirant; extirpationem nempe, vel talia remedia, quæ sedant nova orta symptomata, & futura præcavent, malumque incurabile in eodem statu conservant; cavendo, ne in pejus ruat scirrhum autem in Cancerum transire cognoscitur sequentibus.

**TITILLATIONE, PRURITU.** Suspectum maxime in vetustis scirrhis hoc signum est, indicans, nervos, per scirrhii substantiam dispersos, levissime tendi vel irritari; sed pruritus brevi, aucta nervorum distensione, jam eorundem dissolutionem minitante, sequetur dolor (vide §. 220.), scirrhii jam in cancerum mutati signum. Periculum hujus symptomatis augetur, quod prurientem locum ægri vel inviti scalpere cogantur; sicque augeatur, scirrhii canerescens malignitas, cum irritatio quælibet externa, uti dictum fuit in Commentariis §. 495. scirrho in cancerum convertendo sufficiat. Cumque ignarum vulgus sibi persuasum habeat, pruritus in quibusvis malis incipientis sanationis certissimum signum esse, lætantur sæpe miseri, dum omnium malorum acerbissimum, cancer nempe, imminet. Vidi sic impudentissimum Agyrtam gratulari miseræ mulieri, dum pruritus illum sentiret, in scirrho incurabili, cui Emplastrum, ex calefacientibus admodum paratum, imposuerat; sed post paucas septimanas cancer pessimus exulceratus totam mammam, & vicina omnia, miserrime depascebatur. Cum autem prudentes Medici & Chirurgi unanimi consensu incurabilia pronuncient hæc mala, ægri, licet toties moniti, faciles tamen aures præbent inani jactantiæ horum nebulonum, cum omnes illa, quæ impense cupiunt, facile sibi persuaderi patiantur.

**CALORE, RUBORE.** Scirrhus, quamdiu benignus est, colorem similem habet, ac cutis vicina, neque plus calet; unde merito pessima metuantur, si hæc accedant. Signum enim est tunc inflammationem nasci in vasis,

(a) Method. Med. Lib. XIV. cap. 2. Charter. Tom. X. pag. 329.

vitalibus, per scirrhi substantiam dispersis; vel saltem in scirrhi integumentis, vicinisque partibus. Uti enim patuit ex illis, quæ dicta sunt in Commentariis §. 382. rubor & calor inter effectus inflammationis merito recensentur. Et à calore & motu auctis scirrhum in cancerum abire monitum fuit in §. 495. Periculum auget, quod calor major ad putredinem disponat omnia (vide §. 84. n°. 5.); pariterque observatum fuit §. 85. putredinem natam caloris molesti sensum facere. Calor ergo perceptus in scirrho vel putredinem jam inceptam notat, vel brevi futuram indicat: hinc semper periculosus.

**D O L O R E L A N C I N A N T E, U R E N T E, P U N G E N T E.** Signum hoc, uti sæpe jam dictum fuit, cancerum, occultum quamvis, à scirrho distinguit. Primo dolores percipiuntur, non continui, sed per intervalla tantum, & subito evanidi, ac si lanceola acutissima celerrime per scirrhum transfadigeretur. Sæpe accidit, si non irritentur perversa medela scirrhi, dolores illos lancinantes diu non percipi iterum, atque per annos adhuc silere malum. Ubi vero quotidie fere recurrunt similes lancinationes, & tandem pungentes dolores, non tam cito evanidit, percipiuntur, summus metus est, ne occultus cancer brevi in exulceratum transeat. Omnium pessimus dolor ille est, qui vivi ignis, interna scirrhi adurentis, sensum exhibet; tunc enim canceri occulti integumenta sensum à tumente ejus mole distrahuntur, & à majori acrimonia eroduntur.

**C O L O R E R U B E L L O, R U B R O, P U R P U R E O, C Æ R U L E O, L I V I D O, A T R O.** Varii malignitatis gradus in cancro occulto noscuntur ex mutato ejusdem colore, sic ut color rubellus levissimum malum designet, pessimum vero ater: reliquæ autem colorum mutationes intermedios gradus indicant. Rubellus enim color levem inflammatiunculam notat, ruber validiorem, purpureus validissimam, & jam incipientem quasi necrosin. Ubi autem attenuatis jam, & erodi incipientibus integumentis, canceri subjecti color transparenere incipit, primo cœruleus apparet, aucto malo lividus; & cum jamjam exulcerabitur, per tenuem adhuc pelliculam canceri ater color conspicitur.

**D U R I T I E S U M M A, P R Æ R U P T A, S C A B R A, C U M E M I N E N T E A P I C E.** Quamdiu nondum pellibus suis ruptis occultus cancer in manifestum conversus est, semper durissimus apparet, instar lapidis; & quæ major illa durities fuerit, eo pejora omnia exspectanda sunt. Ubi autem exulceratus est, protuberante contentæ materiæ parte per erosa integumenta, minus durus apparet. Nunquam tunc superficies talis tumoris æquabilis apparet, sed nodosis eminentiis aspera & prærupta. In illo autem loco, ubi integumenta, magis distracta vel erosa, minus resistunt, prominulus apex extuberat, certissimum signum canceri brevi exulcerandi; solentque tunc postea in apice illo sensim integumenta quasi excoriando secedere; atque plerumque ibi primo omnium cancer exulceratur.

**T U M O R I S A U G M E N T O.** Scirrhus benignus plurimis sæpe annis manet absque notabili mollis suæ augmento; ubi vero malignus fieri incipit, sæpe paucis septimanis quadruplum & amplius augetur; tuncque certo novimus, quod in cancerum exulceratum tendat. Nunquam hoc evidentius apparet quam quando benignus hactenus, nec resolubilis tamen, scirrhus perversa medela irritatur.

**V A S I S S A N G U I F E R I S V I C I N I S T U M E N T I B U S &c.** Horrendum aspectum sic refert cancer talis, atque inde huic affectui imprimis nomen illud.



datum fuit, quod venis undique exporrectis Cancris animalis figuram utcumque referret, uti dictum fuit in Commentarijs §. 491. Durus enim ille tumor, integumentis adhuc coercitus, mole tamen auctus, vicinas venas comprimit, quæ hinc à sanguine difficiliter transeunte distentæ turgent, & varicosæ apparent. Dumque tenuissima pars sanguinis per angustata vasa transprimitur adhuc, crassius reliquum aggestum nigrum fere colorem habet. Observatur autem semper, cutis à quocumque tumore distentæ venas augeri plurimum. Sic in hydropicis, & in gravidis mulieribus abdominis distenti cutis varicosas & amplissimas venas habet. Cum autem venæ illæ varicosæ à tumore subtrahuntur distendente utcumque complanentur, adhuc majores apparent, quam si teretem suam figuram retinerent. Nodosæ vero apparent venæ, quia prærupta & scabra canceri superficies in quibusdam locis magis, in aliis vero minus illas comprimit. Ob atrum autem illum venarum colorem Veteres Medici melancholicum humorem hic aggestum culpabant: sed ex modo dictis facile patet, unde hoc fiat.

His signis occultus cancer, in partibus corporis externis hærens, satis cognosci poterit; ubi autem in interioribus delitescit, difficiliter hoc scitur. Scirrhi prægressi signa, calor & dolor in illis locis, in quibus antea inertis tantum ponderis sensus percipiebatur, lucem in obscuris his casibus dant.

Cancrum non exulceratum in mamma describens *Aëtius* (a) omnia hæc signa enumerat dicens: *Cancro itaque non ulcerato in mamma existente, tumor apparet ingens, ad tactum renitens, inæqualis instar fera sævus, penitissime pertinaciter insertus, radices longe lateque extendens, & venis circumscissis velut illicatus, quas circumcirca varicosas habet, colore cineritius ad ruborem vergens, & aliquando sublividus, & videntibus quidem mollis apparet, tangentibus autem durissimus est, ut visui hac parte non sit credendum: dolorem autem inducit, pungentem, late se extendentem, ut sæpe per consensum glandularum malignas inflammationes sub alis excitet. Pertingunt etiam dolores usque ad claviculam & scapulas.*

§. 498. **U**L CER AT US noscitur ex prægresso occulto, prius cognito (§. 497.), si aperitur: pellis tum quæli excoriando denudatur, & tenuis, acer, ichor, quasi transsudando exprimitur.

Cancer ulceratus differt à non ulcerato sola integumentorum erosione, & post cancerum occultum sequitur, uti dictum fuit §. 494. Unde facile cognosci poterit; supponit enim cancerum occultum prægressum, & dein ejus aperturam. Nunquam autem simul & semel rumpuntur integumenta, neque his ruptis collecti liquidi copia exit, ut in abscessibus maturis sponte apertis observatur: verum lentim, excoriando quasi secedit cutis & epidermis, atque aliquid tenuis ichorosi per attenuata integumenta exprimitur; sicque per strata illa discerpuntur summo cum dolore, donec canceri substantia lentim per factam aperturam exprimatur. Quomodo autem cancer exulceratus à primo initio

(a) Tetrabib. IV. Sermon. 4. cap. 43.

per varios auctæ malignitatis gradus decurrat ad mortem usque, sequens docebit paragrahus.

§. 499. **E**JUS hic progressus: vasa sana circa margines cancri duri vi fluentis vitalis liquidi attrita, & assurgente tumore distracta rumpuntur, hinc putredo, tum sanies subtilis, acris, foetida, cadaverosa, ambientia rodens, vicina excedens, progressus in ambitum, & in profundum ad partes vicinas emittendo undique radices malignas, quibus tenet fortiter, labia tumida, retorrída, horrenda, dolor intolerabilis, urens, pungens, rodens, color cineritius, lividus, niger, cancri occulti ad glandulas communicantes, hæmorrhagiæ, convulsiones, febris lenta, extenuatio totius, *Αναιμία*, indolentes in aure calli, lipothymia, inde peresis & consumtis mors.

VASA SANA CIRCA MARGINES CANCRI &c. Dictum fuit §. 497. tumoris augmentum una cum summa duritie scirrhi cancriscentis signum esse. Vasa ergo sana ad margines cancri, imo circa totam ejus superficiem, atteruntur: idem accidit & illis vasis, quæ per ipsam cancri substantiam dispersa vitalibus liquidis adhuc pervia manserunt; nam & illa, undique compressa a duro cancroso tumore, cui inhxerent, illi continuo affricantur. Inflammatio &, quæ illam comitatur, major humorum per vasa circumduktorum velocitas, omnia hæc mala augent. A continuo autem hoc attritu vasa rumpuntur, & humores contentos effundunt, qui putrescunt brevi. Nulla autem hic suppurationis benignæ spes est, per quam mortuum illud & corruptum à partibus vivis separetur. Patebit hoc, si considerentur illa, quæ in phlegmone in suppurationem abeunte fiunt, & comparentur cum scirrhi, & cancri inde nati, indole. In abscessu enim ultima vasorum arteriosorum extrema tenerissima, liquido coagulato non resolvendo infarcta, impetu arteriosi liquidi à tergo impulsu solvantur à cohæsiōe, & abscinduntur quasi: patula, his extremis obstructis separatis, vasorum oscula liquores sanos affundunt, & miscent in loco clauso calido, & paucorum dierum spatio hæc simul mutantur in blandum pus, quod sponte rupto, vel pertuso hoc loco, evacuatur. Vincente sic natura, uti optime dixit *Galenus* (a), pus nascitur (vide Commentaria §. 387. & 452.) & ex sua indole putrescens humor ad talem alterationem deducitur. Extrema enim illa vasorum, una cum obstruente liquido immeabili, humoribus sanis affusis absorbentur quasi, & solvantur in homogœneum pus. Sed in scirrho coagulatum liquidum per annos sæpe manet, antequam in cancrum degeneret, simulque in talibus locis hæret, in quæ liquidi arteriosi moti efficacia vix agere poterit: in glandularum nempe cavis, vel intricatissima fabrica ramulorum, à sanguine arterioso allato singularem humorem secernentium. Rebellis ergo cancri materia, & vitalium humorum debilis, vel nulla fere, in hanc efficacia, nunquam salubrem materiæ morbosæ concoctionem sperare

(a) De Febribus Lib. I. cap. 7. Charter. Tom. VII. pag. 114.

finunt; unde maligna tantum putredo erit expectanda. Pulcherrime monuerat *Galenus* (a), putredinem duplici de causa nasci: vel ob facultatem concoctricem debilem, quæ nullam in melius mutationem putrescentis perficere posset, vel ob summam malignitatem humoris, qui à valida etiam facultate superari nequit: Utraque autem hæc in cancro concurrunt: vitalis enim liquidi, à quo concoctrix illa facultas *Galen*i pendet, efficacia nulla hic est, vel exigua admodum: malignitas materiæ, debili hac facultate superandæ, summa est. Fallaci ergo spe miseros ægros deludunt, qui canceri materiam suppurantibus solvi posse, & in pus reduci, quantumvis etiam jactatis arcanis, contendunt. Sed an non posset totus Cancer emori, & dein, uti in gangræna & sphacelo fit, sponte separari à partibus vivis per suppurationem in omni ambitu natam? Felix certe foret, & genus humanum demereretur quam maxime, quæ hoc efficere posset! Licet autem sola hæc spes (sed quam levis) aliquam possibilitatis umbram habeat, satis tamen patet, summas hic occurrere difficultates. Non enim totus Cancer mortuus est, sed vitalibus humoribus pervia vasa, & nervi vivi in medio hoc mortuo & corrupto hærent: docent hoc dolor acerrimus, & continuus copiosæ saniei effluxus. In gangræna autem & sphacelo mortuæ omnino partes nullum dolorem excitant, licet ferro vel igne destruantur, & in siccissimas crustas abeunt, uti in horum malorum historia patuit. In Cancro ergo mortuum & corruptum, vitalibus adhuc vasibus & nervis intercurrentibus donatum, diras illas calamitates, mox evumerandas, efficit. Neque unquam superabile videtur hoc malum, nisi mortuum illud tolli posset, vel viva vasa interposita, absque propagatione mali ad vicina loca, mori: tunc enim, omni vitali influxu & effluxu per partem abolito, gangræna vel sphacelus nasceretur loco Canceri; & periret quidem pars affecta, sed impediri posset tamen mali progressus, & separari corruptum à vivis. In minimis Cancris, summis rodentibus, vel & vivo igne, simul & semel destructis, aliquando successit talis cura: sic parvo, sed maligno, tumore in naso externo laborantem Verbi Divini Ministrum curavit *Celeberrimus Boerhaavius*, dum acerrimo vitrioli oleo eroderet totum simul & semel. Sic enim fit crusta mortua, quæ, si totum Cancrum comprehendat, postea à vivis partibus & sanis benigna suppuratione poterit secedere. Pulcherrime hunc erodentium medicamentorum usum notavit *Celsus* (quem locum allegavi alia occasione in Commentariis §. 461.) dicens: *Sequitur enim sub medicamentis erodentibus crusta, quæ, undique à viva carne diducta, trahit secum, quidquid corruptum erat; purusque jam sinus curari potest implentibus.* Verum impossibile est, majores canculos momentanea actione acerrimi etiam corrodentis, vel ipso vivo igne sic destruere, ut omnino in escharam mortuam converterentur. Quidquid autem cancrum, nondum mortui, sub tali crusta reconditur, licet minimum fuerit, indomabili feritate furet postea. Unde parum ab hac methodo sperandum videtur, nisi in Cancris minoribus, qui tamen & tunc ferro tutius extirpari poterunt. An autem unquam cognita fuerint remedia, quæ depascentem Canceri putredinem cohibere valent, illumque à vivis & sanis partibus separare, quis dixerit? Legitur apud *Herodotum* (b) quod *Democedes*, ob curatam difficile luxationem Darii Regis, fru-

(a) Ibidem.

] (b) Lib. III. pag. 211.

Attentatam à Medicis Aegyptiis, celebris sanaverit Atossam Cyri filiam, Darii uxorem, cui in mamilla ortum ulcus (*ἑσμε*), deinde disruptum porro sepebat; quod pudibunda celaverat, quamdiu parvum erat; cum autem male se haberet, Democedi revelavit. Nulla autem sit in hac curatione sectionis vel unctionis mentio. Narrat *Helmontius* (a), quod vir quidam in tractu Juliacenfi Cancrum unumquemque sanabat, insperso pulvere indolente, atque tum demum Emplastro incarnante solidabat. Additque, artem hanc cum illo sepultam esse. Quidquid sit de harum historiarum veritate, saltem quantum novi, hodie tale remedium ignoratur.

TUM SANIES SUBTILIS, ACRIS, FETIDA &c. Mortua illa Canceri exulcerati massa, aëris accessu, calore partium ambientium vivarum, brevi in horrendam putredinem convertitur, & in olidissimum tabum dissolvitur. Vasa autem vitalia, per Canceri substantiam dispersa, nova liquida adferunt, quæ brevissime corrumpuntur, dum putrida hæc loca alluunt. Nervi vivi & dolentissimi, acri hoc tabo irritati continuo, majorem copiam tenuis & acris feri huc versus forte derivari faciunt. Constitit enim ex illis, quæ dicta sunt in Commentariis §. 163. nervos tenfos, tendines, membranas nervosas à levi etiam punctura læsas, pessima producere symptomata, & imprimis ingentem sæpe hæc mala comitari evacuationem acris & tenuis feri. Admodum ergo probabile est, & hanc causam concurrere in Cancro exulcerato, dum ingens sæpe copia tenuis liquidi exit. Videtur autem liquidum, ad Cancrum delatum, ipso in loco degenerare, & malignam adeo indolem acquirere, quamvis antea mite fuerit. Vidi enim in sanissima ceteroquin fœmina Cancrum exulceratum acerrimum talem tabum stillare, qui ergo non præexistebat in sanguine, sed in loco affecto genitus fuerat. Unde non statim in Cancro exulcerato acerrima talis sanies exit, sed sensim crescit ejus malignitas, quotidie aucta putredine. Videmus autem & in aliis morbis, fluida in quibusdam locis corporis hærentia, & ab humorum sanorum indole degenerantia, in suam naturam corrumpere allata liquida. Dum post extirpationem mammæ v. g. ingens plaga mansit, toties doluerunt Medici & Chirurghi, humoribus copia ingenti huc allatis, & in bonum pus conversis, totum corpus exhausti, & vero marasmo exsiccari. Ubi in fistuloso ulceris cavo degenerans à bono pure liquor stabulatur, nunquam album & æquale pus ibi colligitur, sed ichor vel sanies. Ubi ab osse carioso v. g. fistulosum ulcus nascitur, pejor erit adhuc collecti in ejus cavo liquidi indoles. Ex quibus omnibus videtur patere, cancerosam massam putrefactam affluentes humores, quamvis optimi fuerint, in similem malignitatem convertere. Videtur in hac opinione fuisse *Helmontius* (b) dum dixit: *Sanies & pus non sunt ulceris aut partis excrementa, ut neque digestionis naturalis: sed sunt producta seminum sive radicum ulceris &c. Dum in ulcere habitat proprius corruptor, qui cruorem alimentarium vitiat, antequam digeri sit aptus &c. Sanies ergo & pus non sunt excrementa ulceris, sed producta corruptoris: suntque cruoris in noxiam materiam depravati indicia, signa, producta, effectus, sive fructus.* Pluribus deinde hanc sententiam deducit, & argumentis firmat: modo allega-

(a) In Capitulo de Ideis morbofis n° 32. pag. 437.

(b) In Capitulo: Scabies & ulcera scho- larum pag. 258.

ta satis evincunt, quod fuerit in illa opinione, sanos humores ad ulcus allatos degenerare in similem malignitatem, ac in fundo & labiis ulceris hæret.

Saniem autem illam, ex Cancro ulcerato manantem, horrendam acrimoniam acquirere posse, constat certissimis observatis. Vidi lintea loco cancroso applicata, sanie hac madentia, penitus exesa æque, ac si aqua foris tacta fuissent. Merito hinc dixit *Aërius* (a): *At vero ulceratus Cancer assiduo erodit, & ad profundum perfodit, nec sisti potest, & saniem emittit omni ferarum veneno deteriorem, copia & odore abominabilem.* Non mirum ergo, si acerrimum illud virus erodat & depascatur omnia. Non sine horrore recordor, me vidisse Cancrum mammæ exulceratum ad axillas usque omnia exedisse, donec, erosio vasis majoribus, profusa Hæmorrhagia subito moreretur ægra. Quatuor mensium spatio exulceratum Cancrum totam mammam & vicina omnia ad sternum & axillas usque erodisse testatur *Hildanus* (b). A cancroso tumore ventriculum erodum invenit foramine pugnum æquante *Stalpart van der Wielen* (c). Lobus hepatis ventriculo incumbens, & vicinum diaphragma pariter exesa erant. A Pancreate cancroso diaphragma perforatum, spinam dorsi erosam, renes omnino corruptos & putridos fuisse, legitur (d). Plurimi similes casus apud observatores occurrunt.

PROGRESSUS IN AMBITUM ET IN PROFUNDUM, &c. Si Cancer exulceratus ab acerrima hac sanie eroderetur ad viva usque, atque proprio tabo sic consumeretur, aliqua adhuc salutis spes affulgeret post tot calamitates; verum horrendum hoc malum vicina omnia in similem malignitatem convertit, primo illa indurans, ac deinde vera propagatione mali erodens. Hoc autem non tantum fit in ambitu, verum etiam pellibus suis ruptis in profundum se demergit, hacque ratione malignas radices emittere dicitur, quibus vicinis adhæret fortissime. Undique enim induratae tales Cancri ulcerati propagines solent dispergi, quarum minimum quid, post extirpationem Cancri relictum, brevi repullulat, & æque ferox malum renasci facit.

LABIATUMIDA, RETORRIDA, HORREND A. Dum scirrhus incipit in Cancrum mutari, summa durities observatur, & tumoris augmentum (vide §. 497.): simulac autem exesis integumentis in apice illo eminente, qui in scirrhus maligno jam solet adesse, datur via, undique pressa Cancri substantia per aperturam factam expanditur, circa labia ejusdem retorquetur, & in fungosam molem excrescens, lividi, & aliquando fere nigri coloris, horrenda illa Cancri exulcerati labia constituit.

DOLOR INTOLERABILIS, URENS, FUNGENS, RODENS. Cutis enim adhuc integra à turgente massa cancroso sensim discerpitur, unde à distractis lenta hac dilaceratione nervis cutaneis dolor summus, & diuturnus tamen. Præterea nervi per Cancri substantiam dispersi vivi manent, & omni momento ab acerrima sanie eroduntur, quæ & per vicina loca depluens omnia depascitur. A continua ergo distractione & lenta erosionem ingens dolor miseros ægros cruciat, absque ulla fere intermissione. Patet igitur, quantum Cancer sævitie gangrænam & sphacelum superet, cum in illis malis, perfecta morte destructis omnibus, nullus adsit dolor.

(a) Teerabibl. IV. Serm. IV. cap. 43.

(b) Observ. Chir. Cent. 3. Obs. 87. p. 267.

(c) Observat. Rarior. Centur. post. part. 1.

Observ. 26. Tom. II. pag. 273.

(d) Miscellan. Curios. Dec. 1. A. Obs.

serv. 99. pag. 231.



**COLOR CINERITIUS, LIVIDUS, NIGER.** Quando sanissimi etiam animalis mactati carnes in aëre calido suspenduntur, ruber color brevi in pallidum & cineritium mutatur, deinde incipiente putredine livescunt, tandemque nigrescunt, dum in tabum putrefactum resolvuntur. Eadem colorum mutatio in gangræna & sphacelo affectis partibus humani corporis observatur. Cum ergo in Cancro ulcerato maxima ejus pars mortua sit, & à calore partium vicinarum, & libero aëris accessu, putrescat, patet facile, quare sic color muretur pro vario corruptelæ gradu. Unde & color cinereus minus malus est, pejor lividus; niger autem pessimus, quia summam putredinem adesse significat.

**CANCRI OCCULTI AD GLANDULAS COMMUNICANTES.** Constat observatis Medicis, dum glandulæ in quadam corporis parte morbosæ factæ sunt, alias etiam in dissitis sæpe locis affici. Sic in Scirrhi historia dictum fuit, dum scrophulosæ sunt colli glandulæ, plerumque etiam mesenterii glandulas simili malo affici; unde merito communicantes glandulæ hæ dicuntur. In scirrhis vetustis, & imprimis in Cancro mammarum, fere semper glandulæ subaxillares induratae tument, & in Cancros occultos degenerant.

**HÆMORRHAGIÆ.** Quando nempe vasa sanguinea, per ipsam Cancri substantiam decurrentia, solvuntur, vel ubi à depascente vicinas partes malo insignes trunci arteriosi eroduntur; uti in Cancris mammarum toties observatum fuit, arteriam ipsam axillarem, vel insigniores ejus ramos erosos, lethalem brevi fecisse hæmorrhagiam. Difficillime autem compesci poterit talis sanguinis effluxus; à compressione enim, vel & liquoribus stipticis acrioribus, pessime irritari solet Cancer. Neque solum à magnis vasis vicinis erosus valida hæmorrhagia nascitur, verum etiam dispersa per ipsam Cancri substantiam vasa sæpe adeo dilatantur, ut ab illorum etiam solutione ingens periculum immineat, licet in sanitate eadem hæc vasa satis exilia fuerint. In horrendo illo Cancro oculi, cujus, ex Hildani observationibus, in Commentariis §. 495. mentio facta fuit, ruptis vasis dilatatis, bidui spatio septuaginta unciz sanguinis effluxerunt; licetque ex tanta sanguinis jactura æger admodum debilis foret, sequenti tamen die, soluta fascia, qua tegebatur malum, majori adhuc quam antea impetu sanguis erupit. Accidit aliquando in effœtis mulieribus, postquam omnia signa scirrhi uteri prægressa fuerint, ut dolor fixus continuus pubem, hypogastrium, lumbos occupet, & saniosus ichor ex pudendis exeat: solet tunc sæpe inmanis hæmorrhagia uterina sequi, unde admodum debiles factæ pro tempore levamen sentiunt, donec restauratis viribus redeant omnia eadem mala. Videtur tunc cancrofa talis diathesis circa uterum hære, quæ dilatata vasa erodit.

**CONVULSIONES.** Quæ vel nimiam evacuationem cruoris prægressam sequi solent; vel à nervis irritatis & dolore intolerabili nascuntur. Vide §. 226. & 232.

**FEBRIS LENTA.** Ob vigilias perpetuas. & acrem dolorem toleratum. Præterea sanies illa acris putrida, Cancri superficiem semper alluens, venulis erosus se insinuat, totumque sanguinem putrida labe corrumpit: unde & postea §. 586. i. inter febriis causas singulares Cancer recensetur. Si enim blandum pus, in abscessu clauso nimis diu retentum, venas ingressum, omnia adeo turbare possit (vide §. 406.), quanto magis hoc fiet à tabo cancroso resorpto.

**EXTENUATIO TOTIUS,** Quantum dolor diu toleratus, & anim

Llllij

curæ corpus extenuare possint, docent observationes quotidiana. Cum ergo tales ægri continuis torqueantur doloribus, & pessima omnia prævideant, non mirum est, illos contabescere. Præterea ingens copia liquidi de corpore subducitur, dum acrem illam saniem continuo fundit Cancer exulceratus; interimque hæctica febricula, & vigilæ protractæ corpus depascuntur; simulque functiones illæ, quæ restaurandis perditis inserviunt, parando ex ingestis bonos humores, depravantur.

*Amphipræ*, INDOLENTES IN AURE CALLI. Intolerabilem fœtorem Cancer ulceratus spargere solet, sic ut adstantes ferre nequeant. Interim coguntur miseri ægri noctes diesque illum pati, unde tamen omnis olfactus perit. Inter Cancris symptomata etiam hæc recensuit *Hippocrates* (a) dicens: *Ipsæque toto corpore extenuata sunt, nares sicca & obductæ, neque eleuantur; spiritus est imminutus, & nihil odorantur: in auribus dolor quidem nullus, sed interdum callus innascitur.* Olfactum ablatum in Cancro laborantibus observavi sæpius: indolentes autem in aure callos nondum mihi videre contigit. An forte sunt incipientes scirrhi folliculorum, quin in meatu auditorio hærent?

L I P O T H Y M I Æ &c. Vel ab hæmorrhagia, aut doloribus, vigiliis, febre, consumtis viribus. Tandemque, post summas misérias diu toleratas, toties optata inter diros illos cruciatus mors omnibus his malis finem imponit.

Ex omnibus illis, quæ modo dicta fuerunt, patet, quam deplorabile malum Cancer sit, si tolli nequeat; uti etiam quam horrendi sint ejus effectus, si in corporis interioribus hærens indomabili rabie furat: in hoc uno tunc felices ægri quod depastis visceribus citius moriantur; cum per menses, imo & per annos quandoque, sensim erodantur, si in exterioribus hæreat radicum malum. Simulque apparet, quanta cum cura scirrhus, infelix nascituri Cancris rudimentum, tractari debeat; extirpandus statim, si nulla resolutionis spes affulgeat, quantumvis etiam fallaci sua indolentia videatur innoxius.

§. 500. **I**N Euchymis occulti Cancris quiescentis facilis toleratio, moti rabies (499.) prædicitur.

In Prognosi ergo omnia modo enumerata malâ timentur, si nempe Cancer exulceratus fuerit: Quamdiu enim adhuc occultus est, pellibus suis coercitus, tamdiu tolerari potest, modo quiescat, nullisque irritetur remediis, quæ motum humorum per vasa augere possunt in ipsa Cancris substantia, vel in vicinis partibus; tunc enim brevi fureret. Optime hoc monuit *Celsus*, qui de Carcinomatis cura fere desperasse videtur, adeoque solam curam palliativam commendat, dicens: *Neque ulli unquam medicina profuit: sed adusta proinus concitata sunt, & increverunt, donec occiderent. Excisa etiam, post inductam cicatricem, tamen reverterunt, & causam mortis attulerunt: Cum interim plerique nullam vim adhibendo, qua tollere id malum tentent; sed imponendo tantum lenia medicamenta, quæ quasi blandiantur, quo minus ad ultimam senectutem perveniant, non prohibeantur* (b). Docuit jam Historia Medica, Cancros occultos per plures annos hæsisse in corpore, absque notabili malo. Narrat *Tulpinus* (c) quod femina ges-

(a) De Mulier. Morbis Lib. II. cap. 20. | 27. pag. 318.

Charter. Tom. VII. pag. 808.

(c) Observ. Medic. Lib. I. cap. 47. pag.

(b) A. Corn. Celsi Medic. Lib. V. cap. | 204.

serit per quinquaginta & amplius annos durum ac inæquale carcinoma : sed sine ulcere aut ulla gravi noxa. Adversa dein mariti fortuna cum affligeret miseram , increvit dolor & pruritus hætenus silentis mali , & adurentibus medicamentis impositis , Empyrici consilio , brevi in Cancrum ulceratum pessimum abiit.

Observavit *Hildanus* (a) in cive Lausannensi tumorem cancrum ovum gallinaceum magnitudine æquantem , qui circa papillam sinistram jam per multos annos hæserat. Medicorum quorundam consilio Emplastrum de mucilag. nibus , de meliloto , & similia applicuit , hac spe , ut paulatim emolliretur tumor. Sed brevi post horum applicationem dolor & inflammatio sequebantur , unde hæc removit , & refrigerantibus applicatis sedavit symptomata. Deinde iterum priora adhibita fuerunt , sed simili cum effectu ; ideoque postea illis abstinuit , diuque postea superstes fuit. Unde in his casibus veritas Aphorismi Hippocratici , in Commentariis §. 490. n°. 1. allegati , patet , quod nempe melius sit , non curare illos , quibus occulti cancri fiunt : quia curati cito pereunt , non curati vero longius tempus perdurant. Cujus asserti veritatem pluribus exemplis probat *Hildanus* (b).

Non autem potest expectari Cancri occulti diuturna quies , nisi corpus ægri euechymum sit , id est , sanguis ejus , omnesque humores , blandam habeant indolem , qualis in sanissimis semper adesse solet. Si enim insignis cacoehymia prædominetur , per quam humores à naturali indole in majorem acrimoniam degenerant , uti in scorbuto acri , atra bile confirmata , biliosa calida temperie sit ; brevi Cancer occultus in ulceratum transibit , uti dictum fuit in Commentariis §. 495.

§. 501. **C**ANCER parvus , incipiens , liber , loco apto situs , vasis magnis non adcretus , à causa externa ortus , in juvenili , sanoque corpore , solus in toto corpore , ilico ferro extirpandus , vel abscindendus est.

Licet autem ex modo dictis constiterit , Cancros occultos diu tolerari posse aliquando , cum tamen etiam in scirrhus , uti dictum fuit in Commentariis §. 489. æternus metus peioris mali maneat , longe magis hoc in Cancro verum erit. Adeoque pro axioma pratico haberi poterit , omnem Cancrum extirpandum esse , si , salvo ægro , & absque recidivæ metu , fieri possit. Quamvis enim *Celsus* (c) nunquam medicinam Cancro profuisse scripserit , innumeræ tamen observationes docuerunt , illum tuto & felici cum eventu resecari sæpe posse. Verum , uti antea dictum fuit , obscuram & confusam Cancri descriptionem dedit ; & si considerentur illa , quæ in Cancri cura jubet , facilis patet ratio , quare infelicitè cesserit ; statim enim voluit imponi debere medicamenta adurentia ; & si levatur malum , minuunturque ejus indicia , tunc curationem procedere posse ad scalpellum & ultionem dixit. Sed satis apparet , hac methodo prius irritari cancrum pessime , antequam ad ejus extirpationem procedatur. Si jam considerentur illa , quæ alii Veteres Medi-

(a) Observ. Chirurg. Cent. I. Observ. 89. |  
pag. 70.

(b) Ibidem.

(c) Lib. V. cap. 27. pag. 318.

ci de Cancro ablatione habent, evidens erit ratio, quare pessimus eventus sequi debuerit. Sic apud *Æginetam* (a) legitur, quod quidam cauteriis omne vitiatum consumerent, alii totam mammam excindentes deinde adurerent: addit tamen, *Galenum* solam sectionem commendasse, qua totus Cancer sine ulla radice relicta excinderetur. *Aëtius* (b) Cancro Chirurgiam *Leonida* tradens dicit, supra Cancrum partem mammarum sanam debere incidi, & incisam cauteriis inuri, donec crusta inducta sanguinis eruptio sistatur; mox iterum debere secari, tuncque de novo aduri, sicque alternatim secando & urendo pergendum esse, donec totus Cancer absumptus sit. Tuncque post amputationem integre peractam rursus partes omnes ad resiccationem usque debere inuri; additque, primas inustiones fieri sistendi sanguinis causa; postremas vero ad omnes morbi reliquias abolendas. Scirrhus tamen sola sectione tolli posse monet: credebatur enim tunc nullum hæmorrhagiæ periculum esse, adeoque nec ustionem requiri. Quam periculosa autem fuerit crudelis hæc Cancro curatio, satis patet: imo & in sequenti Capitulo habetur, quod convulsiones metuendæ essent illo etiam tempore, quo ulcus repurgatur. Ubi autem sola sectione Cancer tollitur, uti hodie fieri solet, non videtur adeo periculosa cura esse, modo adsint sequentes conditiones.

**PARVUS.** Ubi enim magnus Cancer est, & operatio majus discrimen habet, & ingentis vulneris, quod tunc fieri debet, difficilis cura: sæpe enim, ingenti puris copia quotidie exeunte, exhausto corpore vero marasmo contabescunt; vel à pure diutius relicto in tantæ plagæ superficie, & resorpto, cachymia purulenta sanguinis fit, sæpe funesta.

**INCIPIENS.** Quo enim diutius duravit malum, eo pejor, cæteris paribus, eventus; cum tunc aliquando periculum sit, ne inferne Cancer malignas radices vicinis partibus infixit.

**LIBER.** Nisi enim totus Cancer simul & semel tolli possit, minimæ etiam ejus reliquæ malignius repullulabunt: si autem suppositis partibus jam accretus fuerit, integre tolli non poterit. Quomodo autem cognoscatur, an Cancer liber sit, dictum fuit in Commentariis §. 490. n°. 2.

**LOCO APTO SITUS, VASIS MAGNIS NON ADCRETUS.** Et de his in loco modo citato dictum fuit, uti & tertio ejusdem paragraphi numero: simulque ibidem patuit, quantum etiam in periculosis casibus possit Chirurgi periti dexteritas, & intrepidus animus. Parotides enim scirrhosas, glandulas submaxillares, & subaxillares, ingentium vasorum vicina adeo metuendas, sectione prudenti ablatas fuisse constat, & felicissimo cum successu. Nullum tamen dubium est, pessima metuenda esse, si Cancer magnis vasis adcreverit; tamen & in simili casu anceps remedium tentandum videtur, modo aliqua spes affulgeat, ægrum à dirissimo omnium malorum Cancro sic liberari posse.

**A CAUSA EXTERNA ORTUS, IN JUVENILI ET SANO CORPORE.** Ubi enim à latente diathesi scirrhus, & ex hoc Cancer natus fuit, magnus metus est, ne illo extirpato, manente eadem causa, renascatur alter. Ubi autem v. g. à contusione mammarum ortum duxit, recidivæ periculum non

(a) Lib. VI. cap. 45. pag. 88,

(b) Tetrabib. IV. Serm. IV. cap. 45. & 46. pag. 981.

est. Cum vero ad vulneris, post exstirpationem relictī, consolidationem optima sanitas requiratur, patet satis, quanta spes curæ sit, si in juvenili & sano corpore talis operatio instituat: Effæta enim ætas, imprimis in feminis, scirrho (vide §. 485.) & Cancro (vide §. 495.) producendis quam maxime opportuna est; uti etiam atrabilaria temperies.

**SOLUS IN TOTO CORPORE.** Docuerunt enim observata, ablato Cancro, si in alia quadam parte corporis scirrhus, licet parvus, adfuerit, illum brevi augeri, & in Cancrum mutari. Sollicite ergo omnia loca glandulosa corporis externi examinanda sunt, ut detegatur, an aliquid scirrhusi ibi lateat. Cum autem in Scirrhi historia constiterit, & in corporis interioribus similia latere posse mala, pariter attendendum est an quædam signa doceant, internas partes scirrho vel cancro affici. Sic in illis, qui glandulas colli omnes fere scrophulosas habent, plerumque simile malum mesenterii glandulas occupat. Cum autem inter mammas & uterum mira communicatio sit, antequam ad exstirpationem cancerosæ mammx procedatur, sedulo attendendum est, an circa uterum aliquid similis mali adesse suspicio sit. Si enim pondus insolitum circa hypogastrium sentiatur, aut dolor molestus illa loca occupet, validæve hæmorrhagiæ uterinæ subinde redeant, aliquid saniosi acris de vagina destillet &c. magnus merus est, ne post mammx exstirpationem, quamvis felicissime peractam, in utero pejus adhuc malum recrudescat.

§. 502. **E** MOLLIENTIA, emplastica, suppurantia, acria, excoriantia, vesicatoria, caustica, ei applicata convertunt in Cancrum ulceratum; ergo vitanda.

Funesti toties eventus, post similibus applicationem, docuerunt satis, nunquam his sanari Cancrum, sed irritari tantum. Unde omnes prudentes Medici & Chirurgi unanimi consensu prohibent similibus usum. Sola enim Cancri medela est exstirpatio. Omnia emollientia, emplastica, suppurantia, movent indomabilem Cancri materiam, & ad pessimam putredinem disponunt; nunquam autem ad suppurationem deducere poterunt. Acria, excoriantia, vesicatoria, caustica actualia & potentialia, Cancri recti integumenta solvunt, illumque brevi apertum, & pessime ulceratum, reddunt. Videantur illa, quæ de similibus remediorum noxa dicta fuerunt in Commentariis §. 490. n<sup>o</sup>. 3. & §. 495. Unicum adduxisse exemplum ex Paræo (a) sufficiat, quo modo dicta confirmantur. Nobilis virgo, ex comitatu Reginx matris, tumorem nucis magnitudine in mamma sinistra gerebat, cujus maligna indoles ex doloribus lancinantibus satis apparebat. Paræus curam palliativam solam convenire judicavit, assensiente expertissimo Medico, qui in consilium vocatus fuerat. Post bimestre spatium, manente eodem morbi statu, morosior ægra alium Medicum consuluit, qui integram curam promisit audax, licet monitus esset, ab aliis incurabile illud malum haberi. Applicuit tumori calida & emollientia; unde brevi immaniter augebatur tumor mammx, una cum dolore acerrimo & validissima in-

(a) Livre VII. Chap. 31. pag. 182.



flammatione ; donec tandem rumperetur tumor , simulque ingens hæmorrhagia sequeretur ; quam dum causticis pulveribus applicatis compescere nitebatur Medicus , omnia pessime irritabantur symptomata , brevique post moriebatur ægra. Quam infelix ille , cui conscia mens exprobrat , quod simili temeritate proximum in tanta mala projecerit !

§. 503. **C**ANCER magnus , vetus , adhærens , locis extirpationi ineptis situs , vasis magnis adcretus vel incumbens , à causa interna ortus , in corpore senili , cacochymico , ad Cancrum composito , aliis jam Cancris in eodem corpore sociatus , nec ferro ( 501. ) , nec medicamentis ( 502. ) tangendus est.

Enumerantur hæc paragrapho omnia illa signa , quibus Canceri extirpatio vetatur ; quæ penitus opposita sunt illis , quæ §. 501. recensita fuerunt , & facile ex illis , quæ ibi dicta fuerunt , intelliguntur. Requiritur autem in similibus casibus , ubi de extirpatione canceri deliberatur , ut omnia serio ponderentur : si enim cancer relinquitur , qui extirpari poterat , pessime consultitur ægris ; si tollatur talis , qui relinquendus erat , augentur omnia mala , & frustra operationis , satis sæpe crudelis , tormenta patiuntur miseri. Ubi ergo vel immensa mole , aut temporis diuturnitate metuendum malum est , aut vicinis partibus adcreverit , nil boni ab extirpatione sperari fere poterit : satisque patet , hanc omnino impossibilem esse , nisi manibus Chirurgi & instrumentis facilis aditus pateat. Ubi vero vasorum magnorum vicinia periculosam fore hanc curationem demonstrat , non tentanda , nisi certus quis sit , ligatura , vel alio quocumque modo , metuendam hic hæmorrhagiam compesci posse. Evidens est ex illis , quæ dicta sunt in Commentariis §. 501. cancerum à causis internis ortum vix unquam cum spe felicitis eventus tolli posse ; & maxime quidem si effæta ætas , vel insignis cacochymia demonstrent , difficulter factum vulnus consolidandum fore. Uti enim in vulnerum historia patuit , restitutio perdiri , & unio separatorum , humores sanos , per vasa bona , apto impetu & copia debita allatos , postulant. Ubi autem in locis etiam dissitis plures scirrhi occurrunt , vel occulti jam canceri , novimus , corpus ad canceri generationem dispositum esse , adeoque inutilem forte extirpationem mali , cujus germina manifesta in aliis locis occurrunt , brevi mutanda in similem malignitatem. Fatendum interim est , aliquando prudenti consilio posse tolli cancerum , licet quædam signa adfuerint , quæ vel periculosam fore extirpationem , vel & inutilem aliquando , suaderent. Summa enim hujus mali atrocitas facit , ut anceps remedium præferatur certæ atque adeo horrendæ perniciæ , modo aliqua tantum spes affulgeat felicitis eventus ; vel saltem possit diu differri , post extirpationem factam , ne in aliis locis idem malum repullulet. Omnia tamen hæc pericula indicari debent ægro ejusque amicis , ne vel ignorasse timenda mala , vel fefellisse videatur Medicus. Sic in Scirrhi historia dictum fuit , etiam in periculosis , ob magnorum vasorum viciniam , locis feliciter successisse extirpationem. *Hildanus* , uti ex ejus observatis enarratum fuit , mammam extirpa-

vit, licet plures scirrhi, & satis magni, sub axilla ejusdem lateris hærent, quos eodem tempore abstulit. Probi Medici est, nihil consulere aëris, nisi quod in proprio corpore factum vellet, si simili malo laboraret. Ubi ergo, omnibus rite perpenſis, constitit, canceri exstirpationem omnino impossibilem esse, vel penitus inutilem fore, nihil aliud superest, quam in eodem statu retinere incurabile malum, & lenire symptomata. Quanam autem methodo, & quibus remediis, hoc impetrari poterit, dicetur in sequentibus.

§. 504. **N**I enim cum radice & semine integre exstirpari queat, asperabitur, ad interiora recurrit, alios generat, fac-  
tos augeat.

Canceri radix vocatur, quidquid de ejus substantia vicinis partibus accevit, & per illas quasi dispergitur. Dictum enim fuit §. 499. cancrum exulceratum in profundum ad partes vicinas undique emittere malignas tales radices, quibus fortiter hæret. Aptissime autem hoc nomen datur his canceri propaginibus, quia reſectus ex illis radicibus relictis brevi repullulat. *Hildanus* (a) narrat, quod dum scirrhum linguæ tuber examinaret, tactu deprehenderit, majoris fili instar propagines ab hoc scirrho per linguæ substantiam dispergi. Nisi ergo cancer cum suis radicibus tolli possit, brevi recreſcet idem malum. Habetur apud *Ruyſchium* (b) audax talis cûratio, qua post sectionem factam candenti ferro inurebat locum, ut canceri radices destrueret integre. Vetula tumorem malignum induratum gesserat in lingua à longo tempore, postque iteratam sectionem recidivam passa fuerat: Communi consilio *Celeberrimus Ruyſchius* & peritissimus Chirurgus conſulerunt, nil aliud superesse remedii, quam ut exſcinderetur denuo renatum malum, & deinde locus candenti ferro inureretur. Crudelem curam admisit facile animosa hæc anus, & fortiter pertulit, vix ullos ejulatus inter hæc tormenta emittens, licet satis fortiter cauteria adigerentur, & quidem iterata vice. Escharis separatis locus brevi ad cicatricem deductus fuit, atque postea diu sana vixit.

Semen canceri autem vocatur illa causa, quæcumque demum fuerit, quæ primum scirrbi rudimentum nasci fecit. Si jam à suppresso menstruo aut hæmorrhoidali fluxu consueto, atrabilaria temperie, vita tristi, labe hæreditaria &c. primam originem duxerit scirrhus, ex quo postea cancer factus fuerit; nisi hæc vitia emendari possint, frustra exstirpabitur cancer; cum manente causa justus metus sit, similia mala in aliis locis brevi renascitura: imo & forte in internis partibus jam scirrhi rudimenta hærent. Si vero scirrhi in aliis locis jam adsint, ablato cancro, augebuntur brevi, & in similem malignitatem degenerabunt; uti plurimis observationibus constitit. In cadavere puellæ, in orphanotrophio publico à strumis colli scirrhis suffocata, vidit *Tulpius* (c) sub qualibet struma clanculum delitescere minores alias, non singulas, sed vicenas aliquando in eodem loco occurrentes, forma seminibus lupinorum non absimiles. Tali autem ordine disposita erant hæc strumarum latentia semina,

(a) Centur. 3. Observ. 84. pag. 164.

(b) Observat. Anat. Chirurg. n°. 76. pag. 70.

(c) Observat. Med. Lib. I. cap. 46. pag. 88.

ut majora minoribus semper incumberent, declinante sensim usque adeo illarum mole, ut tandem vix æquarent semen sesaminum.

§. 505. **C**AUSA Cancrī tollenda cum Cancro, vel antequam tollatur ille.

Nisi integre auferri queat, relinquendus est.

Uteri, faucium, palati, axillarum, inguinum insanabilis; labiorum curatu difficilis.

**C A U S A C A N C R I &c.** Ratio ex illis, quæ modo dicta sunt, patet. Omnium optimum est, modo aliquam patiat moram ferox malum, apta medela tollere prius causam cancri, antequam extirpatio instituatur. Si vero in mora periculum sit, tunc poterit tamen cancer tolli, modo spes bona affulgeat, cancerosam in corpore diathesin superari posse.

**N I S I I N T E G R E A U F E R R I.** &c. Certum enim tunc est, reliquias cancri resecti, quamvis minimæ fuerint, brevi in similem molem excreturas, pari, imo aliquando & majori, malignitate. Memorabile hujus rei exemplum vidit *Celeberrimus Boerhaavius* in nobili femina. Extirpabatur à dexterrimo Chirurgo mamma cancerosa; hocque factò, in media plaga apparuit stigma cinereum, digiti minoris unguem vix æquans magnitudine: cumque illud ipsi substantiæ pectoralis musculi infixum hæreret, rescindere funditus non audebat Chirurgus, sperans erodentibus hoc tolli posse. Curatio vulneris satis feliciter procedebat, jamque fere omnis superficies cicatrice obducta erat, tuncque incepit illud stigma attolli, mole augeri, & in fungosam massam expandi, quæ summa malignitate furens omnia vicina depascebatur, donec misera hæc ægra moreretur. In alio simili casu audacior alter Chirurgus excidit viva de carne musculi pectoralis relictam cancri resecti radicem: Cumque omnia felicissime cedere videbantur, decima quarta die post extirpationem factam inceperunt maxillæ constringi, & tandem adeo obrigescere, ut nulla vi diduci potuerint; &, incassum tentatis efficacissimis etiam remediis, tetanodes periit. Apparet ex his casibus, quanta cum cura ante extirpationem examinari debeat, an cancer undique liber nulli parti cohæreat.

In quibusdam vero corporis locis cancri si nascentur, curatio vel impossibilis omnino, vel saltem difficillima est. In visceribus corporis si cancri hæreant, facile patet, nullam medelam superesse, cum nullus detur Chirurgi manibus aditus. Insanabiles etiam haberi solent cancri Uteri, imprimis si ulcerati fuerint: scirrhum enim tumorem, jam in cancerosam malignitatem tendentem, in hoc etiam loco resectum fuisse ex *Tulpii* observationibus in *Commentariis* §. 484. dictum fuit: exulceratum vero cancerum quis hic attingere auderet, cum malignis radicibus tunc undique adhærescat; uti in cadavere mulieris, à cancro uterino crudelem in modum occisæ, vidit idem Auctor (\*): Tumor enim lividus ac ater, cruore & sanie undique perfusus, membranaceis filamentis undique necebat utero. De uteri morbis agens *Are-*

(\*) *Tulpii Observ. Med. Lib. III. cap. 34.*

*caus* (a) etiam de cancroso ejusdem ulcere loquitur; monetque illud occidere, sed diuturno tempore prius afflicta. *Putredo enim ab ulcere fuit, nequidem ipsis agrotis tolerabilis, efferaturque attactu & medicamentis, & quovis remediorum genere exasperatur.* Ex quibus satis patet, quod verum uteri cancerum hic descripserit; licet paulo post subjunxerit sequentia: *At cancer neusquam ulcus est, sed tumor durus indomitus, qui una totum uterum distendit, &c.* Videtur enim hoc de testis cancro dixisse; ulceratum vero ulceris maligni & exedentis nomine descripsisse; statim enim hæc addit: *Utraque autem hæc cancrosa sunt, & diuturna, & perniciofa: ulcus autem non ulcerato multo pejus est, & odore, & doloribus, & vita & morte.*

**FAUCIUM.** Dictum fuit in Commentariis §. 484. Scirrhi sedem satis frequentem esse in mucosis illis folliculis, qui os internum, fauces, pharyngem undique occupant; & imprimis quidem, quia horum ope à sanguine secerantur & colligitur lentus mucus, ex propria natura facilius inspissandus. Præterea numerosissimæ papillæ nervæ, per harum partium superficiem dispersæ, aliquando in cancerum fungosum, pessimum degenerant, uti dictum fuit in Commentariis §. 496. Vidi sic horrendo spectaculo magnam partem palati & totum velum pendulum palatinum cancrosum factum fuisse in sene, qui post summas misérias ex hoc morbo periit. Ubi altæ jam radices in faucibus egerit cancer, facile patet, incurabile malum esse. Ubi vero parvam tantum partem occupavit, forte prudenti arte tolli posset. Apud *Hippocratem* (b) legitur, cancerum in faucibus ultione sanatum fuisse.

**PALATI.** Callosa & dura membrana, quæ palatum osseum investit, uti modo dictum fuit, aliquando & in cancerum degenerat, & fere semper insanabilem, nisi forte exiguus admodum fuerit. Difficultatem curationis auget, quod, hac membrana destructa vel erosa, ossa palati nuda corrumpantur; unde iterum pessima mala nascuntur. Ideo *Galenus* (c) explicans illum *Hippocratis* Aphorismum, qui caneros occultos curare prohibet, dixit: *Qui cancerum in palato (α τὸ σπαινω, quod fornicatum palatum osseum designat) ortum, vel in sede, aut in sinu muliebri secuerunt, aut ufferunt, non potuerunt ulcera ad cicatricem perducere; sed homines curationis cruciatu ad mortem usque consumserunt; qui non curati minori cum molestia diutius vixissent.*

**AXILLARUM, INGUINUM.** Vicinia maximorum vasorum facit, ut vix extirpari possint absque periculo lethalis Hæmorrhagiæ. In Scirrhi historia notatum fuit, *Hildanum* felici eventu tumorem scirrhosum, inchoato jam dolore malignum, extirpasse sub axillis. Ubi autem jam in verum cancerum hæc mala abierunt; & imprimis si ulceratus fuerit, patet facile quam periculosa talis cura foret; cum & varicosa vasa sint circa cancerum, & summus metus, ne subjectis vasis jam accreverit. Accedit, quod vicinis glandulis sæpe inhæreat eadem labes, unde post periculosam extirpationem sæpe recrudesceret malum.

**LABIORUM CURATU DIFFICILIS.** Frequens satis malum, dum vel mordendo læduntur labia, sicque contunduntur corpuscula illa rotunda,

(a) De caus. & sign. morbor. diuturn. IX. pag. 596.

Lib. II cap. 11. pag. 64.

(b) Epidem. 7. text. 119. Charter. Tom.

(c) In Commentariis Aphor. 38. Sect. VI.

Charter. Tom. IX. pag. 272.

per horum substantiam dispersa; unde toties scirrhi, in pessimum cancerum degenerantes, oriuntur. Uti etiam si membranula tenerrima, qua labia teguntur, læsa, nervosa fabrica labiorum in fungos cancriscentes attollitur. Ubi ergo talis mali vestigium apparet, tollendum ilico; sive erodentibus, quod in exiguis canceris hic natis aliquando successit; sive cultro, quod longe tutius est. Quamdiu autem nondum in magnam molem increverunt canceri labiorum, satis tuto tolli possunt: Si vero negligentur, proserpit malum, totumque labium imo & vicinas partes exedit; tuncque non nisi magno cum discrimine tolli potest, & post extirpationem turpis deformitas manet. Vix tamen credi potest, quantæ magnitudinis canceri à peritissimis Chirurgis aliquando ex labiis resecti fuerint, & feliciter curati, absque insigni deformitate. Vidi sic hominem, cui binæ tertiæ partes labii inferioris sic fuerunt ablata; & tamen satis pulchra cicatrice coaluerat tantum vulnus. In alio, qui necessariam extirpationem admittere noluerat, totum mentum sensim exesum vidi, antequam moreretur.

§. 506. **E**RGO in statu (§. 503.) adspiramus ad duo: 1. quietem mali; 2. lenimen symptomatum.

Ubi ergo Cancer, cognitus signis §. 497. recensitis, ob conditiones §. 503. enumeratas, nec ferro nec medicamentis tolli vel emendari potest, miserrima ægri condicio est, cum latentem in corpore hostem gerat, qui à causis, nulla sæpe prudentia evitandis, facile irritari possit sic; ut indomabili sævitie fuerat. Funesta hæc Prognosis ægro minime revelanda est, sed amicis tantum; hacque spe erigi debet, posse aliquando ad mortem usque tolerari malum sine tantis calamitatibus, modo cum prudentia tractetur. Optime enim in Commentariis suis in Aphorismum illum *Hippocratis*, quo occulti canceri cura vertatur, monuit *Galenus* (a) non abstinendum esse ab illa curatione, quæ cancerum mitiget ac demulceat, sed tantum à talibus, quæ illum irritent. Tota spes tunc in eo consistit, ut sustineatur malum, & impediatur ulterior ejus malignitas; simulque leniantur symptomata, quæ imprimis sunt pruritus, calor, dolor. Quomodo autem, & per quæ remedia, hoc impetrari possit, docebunt sequentia.

§. 507. **Q**UIES impetratur: 1. locum defendendo ab omni externo per plumbata, & narcotica. 2. causam (§. 495.) cognitam minuendo, corrigendo, avertendo: quo lenia purgantia ex blandis vegetabilibus, mercurialibusque faciunt, parva & sæpe geminata dosi data. 3. diluentibus, aperientibus blandis, subalcalicis. 4. vitando, quæ sumta, vel applicata vicem causæ gerunt.

Dictum fuit in Commentariis §. 492. dum vasa vicina, aucto humorum motu, ad duros scirrhi margines atteruntur, inflammationem nasci, scirrhumque

(a) Commentar. in Aphor. 38. Sect. VI. Charact. Tom. IX. pag. 272.



que hæcenus benignum in cancrum mutari; & ex illis, quæ dicta sunt in Commentariis §. 499., constitit, ab eadem causâ cancri malignitatem augeri. Quies ergo summopere hic necessaria erit. Absoluta quidem tantum in cadavere obtinet, sed pacatissimus humorum blandissimorum per vasa pervia motus hic intelligitur, ut nulla fiat cancri irritatio, nec ab aucto motu, nec ab acribus huc delatis.

1. Quantum noceat scirrhis & cancris inde natis, irritatio quælibet externa, dictum fuit in Commentariis §. 495.: omni ergo cura locus affectus defendi debet ab attritu vestium imprimis; & uti dictum fuit §. 490. n°. 4. quam maxime cavendum erit, ne occulti mammarum cancri à loricis arcte adstrictis premantur, vel ab agitatione valida pectoralis musculi suppositi irritentur. Unde nunquam melius Eleemosynæ publicæ possent impendi, quam alendis miseris illis fœminis, quæ cancro recto laborantes manibus tamen victum sibi comparare debent. Omnium optimum est mollissima aluta tegere locum affectum, ut omnis vestium incumbentium attritus evitetur. Emplastra ad eundem usum laudantur, sed talia tantum, quæ nec emolliendo nimis integumenta, nec movendo cancri materiam, nocere possunt. Sola ergo plumbata hic conveniunt, & quidem talia, quæ non adhærent firmiter partibus, quibus applicantur: tunc enim metus foret, ne exhalans liquidum, sub emplastro tenaci coercitum, maceraret integumenta, atque illa brevi dirumpi faceret. Simul etiam his misceri solent narcotica, quæ sua efficacia nimis facile irritabiles nervos, per cancrum ejusque integumenta dispersos, sopiant parum, sicque metuendum hic pruritus compescant, & molestos dolores lancinantes sedent. Emplastrum diapompholygos officinarum, ex oleo solani & plumbi calcibus paratum, pulcherrimi in his casibus usus est. Similium Emplastrorum formulæ in Materia Medica ad hunc numerum habentur.

2. Omnes enim causæ §. 495. enumeratæ, cum scirrhum in cancrum mutant, si pergant agere, vel augeantur, poterunt cancrum rectum in ulceratum convertere. Illæ ergo, per sua signa cognitæ, tolli debent, vel saltem minui: si vero neque hoc impetrari possit, averti debet illarum actio à parte affecta, quantum fieri poterit. Nihil magis nocet cancro, quam humorum acrimonia, cum & benignus scirrhus cito inde in cancrum degeneret, uti antea dictum fuit: Sedulo ergo inquirendum est, an hæc adsit, & qualis? & deinde per idonea remedia, singulari acrimoniæ cognitæ opposita, hæc emendari debet: alia enim requiruntur, ad acrimoniam acidam, muriaticam, putridam, rancidam oleosam &c. Ut avertatur materies morbosâ in humoribus latens, pulcherrime conducunt purgantia, sed leniora, & talia, quæ sine multis turbis excitatis in corpore fundunt humores, & evacuant. Lenissima mercurialia præparata, purgantibus mista præcipue hic laudantur, ob magnam vim solvendi, quam possident; cavendo semper, ne imprudenti illorum usu salivatio hic nocitura excitetur. Si putredinis signa adsint, ut in scorbuto sæpe observatur, tamarindorum cum foliis senæ decoctum, cremor & crystalli tartari, & similia, proderunt. Ut autem turbæ, à lenioribus quamvis purgantibus, in corpore excitatæ, sedentur, conducet leve opiatum exhibere post purgantium operationem finitam. Quantum autem profit purgantium usus, in can-

M m m m iij,

cris testis præservandis, ne ulcerentur, docuit *Galenus* (a). Mulierem enim, cancrösam diathesin in mamma habentem, circa veris initia quotannis purgavit satis fortiter medicamento atram bilem evacuante: simulque notat, quod, omiſſa hac purgatione, in profundo dolor oriretur, certo indicio, cancröſæ diathesis malignitatem tunc augeri.

3. Totus scopus enim est, ut fiat æquabilis & sedatus humorum circuitus: hoc autem obtinebitur, si paulo plus diluti fuerint humores, & vasa pervia. Dantur ergo talia, quæ diluunt, & attenuant, neque tamen humorum motum augment. Aqua autem sola fere diluit, uti dictum fuit §. 134: huic dein adduntur talia, quæ & vi attenuante prædita sunt, & simul blanda indole omnem acrimoniam leniunt. Decocta ergo radicum bardanæ, chinæ, scorzonæræ, zaræparillæ, graminis; infusa agrimonix, betonicæ, florum althææ, malvæ, verbasci, sambuci, papaveris Rhœados &c., pulcherrimum usum habent. Sic enim diluens vehiculum sanguini affunditur, attenuantibus & leviter obtundentibus solvuntur humores, & lenitur acrimonia; simulque per urinam, vel & diaphoresin, eluuntur nocitura: unde similia remedia à Medicis vocantur sanguinem depurantia. Cum autem sales inter remedia attenuantia magnum nomen habeant, neque tamen acriora in hoc casu convenient, sola adhibentur mitissima subcalca, qualia sunt v. g. nitrum stibii, & sal polychrestus, in quibus nitrum fixatum, tuncque alcalinum, sulphuris accensi simul vapore acido sic invertitur, ut minus acre fiat, licet adhuc alcalinæ indolis particeps maneat; unde tunc subcalca dicuntur hæc salia. Seliguntur autem hæc imprimis ideo, quia in scirrhis curandis sales alcalini, acido oleoso vini Rhenani mitigati, toties profuerunt. Cum autem satis magnus numerus Simplicium in officinis habeatur, quorum blanda vis attenuans usu cognita est, possunt satis variari hæc formulæ, ne diuturnus ejusdem remedii usus nauseam moveat ægris, dum diu manet eadem indicatio curatoria in hoc casu.

4. Auctus humorum motus in toto corpore, vel in parte affecta, acrimonia quævis humorum, irritantia quæcumque, præcipuæ causæ erant, quæ scirrhum mutabant in cancrum; uti dictum fuit §. 495. Omnia ergo hæc, tam in victu, quam remediis internis & externis, sollicitè vitanda erunt. Cumque atrabilia humorum tenacitas & scirrhis originem det, illisque jam natis malignitatem conciliet, uti ex ante dictis patuit; imprimis curandum erit, ne in victu sumantur talia, quæ hanc producere, vel natam augere, possint. Diæta ergo sit talis, qualis in scirrho insanabili §. 490. n°. 4. descripta fuit. Quia autem affectus animi validi, & præcipue tristitia hic adeo nocent (vide §. 495.), blanda spe erigendus est ægrorum animus, ne imminentis mali æterno metu contabescant. Hæc omnia si sedulo observentur, poterit per annos sæpe, imo ad ultimam senectutem aliquando compesci minax malum (vide §. 500.), donec vel communi fato, vel aliis morbis pereant, & futuris eripiantur miseris: hocque totum est, quod ab arte hætenus cognita in diro hoc morbo expectari poterit.

(a) In Libello: quos decet purgare, & quibus catharticis, & quando. Charter. Tom. X. pag. 470.

§. 508. **S**YMP TOMATA iisdem ( 507. ) leniuntur; dolor opiata exigit.

Omnia enim symptomata, quæ cancro occulto accidunt, tantum ab ejus aucta malignitate pendent: si ergo methodo præcedenti paragrapho descripta in eodem statu servetur cancer, lenientur mala præsentia, & cavebuntur futura. Præcipuum symptoma est dolor, à distractis integumentis ob tumoris augmentum, vel acrimonia canceri rodente nervos vivos per ejus substantiam dispersos. Causam doloris tollere sæpe non possumus; tunc ergo nihil superest, quam narcoticorum usu obtundere Sensorium commune, ut, manente quamvis doloris causa, tollatur ejus sensus, & caveantur doloris effectus nonnulli, hic metuendi ( vide §. 229. n°. 2. ). Nisi enim hoc fiat, vigilæ, inquietas, jaectatio, febris &c. ( vide §. 226. ) aderunt, atque fiet brevi omnium malorum augmentum; Videantur de Narcoticorum usu illa, quæ dicta sunt in Commentariis §. 202. & 229.

§. 509. **E**XULCERATUS ( 498. 499. ), ni tolli queat, leniendo, tum dicta ( 507. 508. ) adhibendo.

Ubi autem Cancer, pellibus suis ruptis, exulceratur, tristissimum exhibet medentibus spectaculum; atque adeo sæpe horrendum, ut viderim, intrepidus, & longo artis usu duratos, Chirurgos vix sustinuisse, ut siccis oculis luctuosissima hæc mala tractarent. Abominabilis enim fætor, retorrîda illa labia, & certa curæ desperatio, movent etiam tales, qui inter crudelissimas operationes nullis ægrorum ejulatibus turbantur. Quamvis enim quisque, ut puto, pretio redimere vellet, ne harum calamitatum spectator esset, jubet tamen proximi commiseratio, ut miseros derelinquendo non reddamus miseros, & conemur saltem lenire incurabile malum.

Acerrimus ichor, quotidie malignior, & , uti optime dixerat Aëtius ( vide §. 499. ), omni ferarum veneno deterior, rodit dolentissimam canceri superficiem, si diu ibi relinquatur, & defluens inde vicina omnia exedit. Unde sapius de die mundari debet locus affectus, & vicina omnia vel unguentis mollissimis, vel emplastris plumbatis, defendi debent, ne à depluente sanie erodantur. Omnium optimum est, si quater ad minimum intra 24 horas mollissimis plumaceolis, leviter tepefactis, absorbeatur collectum virus; deinde tota superficies canceri exulcerati tegatur similibus plumaceolis, sed leviter unguento nutrito, sine corpore dicto in officinis, ex aceto lithargyrii & oleo simul mistis composito, obductis: sicca enim plumaceola, quamvis optime imbiberent exsudantem ichorem, adhærescerent ulceri, & postea, his avulsis, acerrimus dolor fieret. Sic liber aëris accessus cavetur, impeditur exsiccatio, & aceti vis putredini resistit; cujus tamen acrimonia pumbo addito mitigatur. Pinguia omnia nocere observata sunt, dum imperspirabile ulcus reddunt, sicque saniei liberum exitum impediunt. His plumaceolis deinde superimponitur emplastrum diapompholygos, sed foraminibus exactis in tota ejus superficie, ut sanies libere pos-

sit exire, deinde his foraminibus lintea carpta sicca applicantur, ut imbibant exsudentem ichorem. Lenissima fasciæ applicatæ circumductione totus hic apparatus retinetur; validior enim pressio loci affecti exasperaret statim omnia mala.

Cum autem & pessima putredo cancerum exulceratum comitari soleat, & huic occurrendum est, quantum fieri poterit. Acetum, sal marinus, gemmæ, &c. efficacissime quidem omnem putredinem domant; sed ab omnibus acribus pessime irritatur cancer ulceratus. Narrat Hildanus (a), quod Chirurgus mammæ cancerosæ applicavit unguentum Ægyptiacum, ut fœtorem emendaret, & fungosam canceri luxuriam compesceret; verum adeo inde irritabatur malum, ut brevi temporis spatio ad costas usque tota mamma eroderetur. Unde apparet, quanta hic prudentia opus sit. Omnia autem hæc adeo diluta applicanda sunt cancro ulcerato, ut sua acrimonia nocere nequeant. Acetum vigecuplo aquæ dilutum, addito salis marini pauculo, ferri poterit, multumque proderit, si singulis vicibus, dum mundatur locus, tota superficies tepido tali liquido abluatur. Spiritus salis marini, cum adeo efficaciter omni putredini resistat, summi pariter ulus erit; modo tanta copia aquæ diluatur, ut oculo instillatum hoc liquidum vix dolorem faciat. Cancerum exulceratum mammæ in paupercula muliere, cæteroquin sanissima, per quindecim menses potui hujus remedii usu sic sustinere, ut vix in deterius vergeret; imo in marginibus aliquod suppurationis vestigium vidi, qua fungosæ molis pars quædam separata cadebat, fundo satis puro apparente. Magna tamen spe, quam conceperam, excidi postea, dum, aucta malignitate, leni hoc auxilio putredinem cohibere amplius non potui, & acrioribus remediis ilico exasperaretur malum: unde & hæc misera, postquam per biennium cancerum exulceratum gesserat, periit. Fatetur ingenue Hildanus (b), se fallaci spe delusum fuisse, dum cancerum linguæ ulceratum tractaret variis remediis, & quidem tam pulchro cum successu, ut non tantum quotidie mitesceret atrox malum, verum etiam, post validam hæmorrhagiam, & copiosum saniei cadaverosæ effluxum, omnis tumor evanesceret, ac malignitate extincta ulcus laudabilem saniem funderet, & caro, non livida, sed rubella & sana sensim succresceret, ita ut jam fere cicatrice obducendus videretur locus, sola tantum parva rimula relicta. Cum omnia jam in vado esse crederet, scrophulosus tumor, sub maxilla inferiore latens, auctus quotidie, labæ sua linguam denuo infecit, quæ adeo paucorum dierum spatio intumuit, ut totum oris cavum impleret non tantum, sed & ultra dentes promineret adeo, ut ante mortem horrendo spectaculo viderit Hildanus, superiores dentes per exesam linguam inferioribus conjunctos fuisse. Docent tritissimi hi casus, quam terribile malum sit cancer exulceratus, post fallaces inducias tanto acerbius furens. Forte tamen & inde aliqua spes affulget, non penitus impossibilem esse canceri separationem à partibus sanis; licet hæctenus ignoretur, qua methodo, quibusve remediis, hoc fieri possit. Quam felix ille, qui hæc inveniret! quanta præmia dignus, qui inventum celaret, turpis lucra causa!

Possent jam his remediis, quæ putredini resistunt, cum fructu addi talia, quæ prentem dolorem narcotica sua vi lenire valent, etiam dum externe applicantur,

(a) Observat. Chirurg. Cent. 3. Observ. 1. (b) Ibid. Observat. 84. pag. 265.  
16. pag. 267.

Solani succum laudat *Galenus* (a); cicutam, Phellandrium, alii. *Aegineta* (b) pariter, ut dolorem tolleret in canceris ulceratis, jubet solani succum molli linteo duplicato exceptum applicari loco affecto, & extrinsecus lanam molliissimam, eodem succo madidam, circumponi, cavendo ne siccescant. Varia fomenta similia possunt parari ex hyosciami, cynoglossæ, papaveris foliis, aquæ infusis, addito aceto & sale, sed parca quantitate, ne sua acrimonia dolores augeant, & exasperent adeo facile irritabile malum. Ad eosdem usus & opii aliquot grana similibus fomentis miscentur.

In victu molliissima tantum conveniunt olera, jussula carniū, lacticia; vitanda omnia, quæ difficiliter digeruntur, vel acrimonia sua nocere possent; uti dictum fuit ad §. 507. Largus usus infusi florum sambuci & papaveris Rhæados plurimum prodesse solet.

§. 510. **E**XSTIRPATIO fit: 1. Corpus victu, medicamentisque refocillantibus, & causæ adversis præparando. 2. Totum simul & semel cum omni radice filo trajecto, vel forcilla suffixa elevatum exscindendo, vel detectum incisus integumentis, filo trajecto attollendo, & deinde prudenter separando. 3. Vulnus rara, blandaque obligatione curando, vicino cruore prudenter prius evacuato.

Si Cancer exulceratus in tali corporis loco hæret, ad quem manibus Chirurgi accessus datur, neque partibus vicinis adhuc accrevit, nec in aliis locis scirrhī deprehendantur, qui tolli nequeunt; nullaque suspicio sit, in internis corporis partibus latere simile malum; tollendus est quantocyus, ne diutius relictus aucta malignitate plus noceat, aut vicinas glandulas inficiat. Sequentia autem in Cancris exstirpatione observanda erunt.

1. Cum sæpe crudelis hæc operatio sit, & ablato cancro aliquando latum vulnus supersit, præstat prius blandissimis alimentis corpus replere, & gratis cardiacis, neque tamen admodum moventibus, erigere vires dolore, metu, vigiliis, prostratas: sic enim postea felicior consolidatio facti vulneris sequetur. Simul attendendum est, talia debere dari, quæ canceri causæ cognitæ adversa sunt: Si v.g. putridus scorbutus in corpore prædominans benignum scirrhū in cancerum exulceratum mutaverit, cerealia omnia, fructus horrei molliissimi, vel & leviter acidi, conducent: Si atrabilaria temperies peccaverit, mel, graminei succi, una cum prioribus convenient. Si autem ligna docuerint, acidum austerum in corpore prædominari, carniū jussula, pingua molliissima &c. dari debent: cum autem cancer ex sua natura in pessimam putredinem vergat, plerumque aciescentia sola tantum exhibentur. Verum sæpe urget mali atrocitas, neque datur tempus corrigendi cognitam humorum acrimoniam ante exstirpationem, cum metus sit, ne ulceratus cancer vicina inficiat loca, vel malignas radices in profundum dimittat, sicque impossibilem exstirpationem reddat: unde tunc

(a) Lib. II. Method. Med. ad Glaucon. | (b) Lib. IV. cap. 26. pag. 66.  
cap. 2. Charter. Tom. X. pag. 390.



præstat statim cancerum rescindere, & deinde idoneo victu, debitisque remediis, cognitam humorum cacochymiam emendare.

2. Funestam adeo prognosim Canceri dedit *Celsus* (a), ut solam fere curam palliativam admiserit. Excitum enim cancerum tamen reverti & occidere dixit. In numeris autem observationibus constat, cancerum, si totus simul & semel cum omni sua radice tollatur, tuto extirpari, & absque recidiva (b): Ubi vero vel minima ejus particula relinquitur, tunc malignius repullulat. De variis autem methodis, quæ ad extirpationem canceri proponuntur, dictum fuit in Commentariis §. 490. n°. 2., ubi de Scirrhi ablatione agebatur.

3. Cum vasa sanguifera vicina cancro tumeant, & atro crasso sanguine soleant distendi (vide §. 497.), videtur optimum fore, ut, resecto cancro, sanguis ille, qui in his vasis sæpe diu stagnavit, effluere permittatur, neque statim sistatur Hæmorrhagia: justus enim metus adest, ne forte ille sanguis in canceri vicinia aliquid maligni contraxerit, ex quo deinde in aliis corporis locis simile malum recrudesceret. Dictum enim fuit §. 499., cancerum exulceratum in glandulis communicantibus, propagata labe, canculos occultos excitare. Neque multum mali inde fiet ægris, si aliquot uncie sanguinis sic effluxerint. Majoris cautelæ gratia voluit *Perkins* (c), premendas undique esse venas varicosas atro sanguine distentas, ut penitus evacuarentur; deinde cauterio actuali utebatur, partim ut hæmorrhagiam compesceret, partim etiam ut latentes forte mali reliquias destrueret penitus. Crudelis hæc methodus sanguinem cauteriis sistendi obsolevit fere, cum mitioribus remediis hoc tuto fieri possit: & si integrè resectus fuit cancer, non opus erit crudum vulnus adurere, ut ejus reliquie tollantur. Dictum tamen fuit antea in Commentariis §. 504., *Ruyfchium* in lingua renatum, denuo post extirpationem cancerum ferro fustulisse, & dein cauteriis adussisse locum, felici cum eventu.

Ablato cancro vulnus crudum adest, latum satis, si major cancer cum omnibus integumentis simul & semel resectus sit: si vero enucleando ablatum fuit, minus vulnus erit, & citius curabitur, uti in Scirrhi historia §. 490. n°. 2. dictum fuit. Rara deligatio convenit ideo, ne nimia puris copia subducatur necessarium corpori nutrimentum, sicque marasmo pereant ægri: simulque cavendum, ne pus nimis diu relictum in tanti vulneris superficie, venulis resorptum, purulenta cacochymia sanguinem inficiat, unde iterum pessima fierent mala: cum autem multum sic de corporis substantia perditum fuerit, omnia illa observari debent, quæ in vulnere cum jactura substantiæ curatione dicta fuerunt §. 189. & sequentibus. Imprimis autem blanda deterfio loci, dum deligatur vulnus, necessaria erit, ne renascentium vasorum tenera pulpa rudiori tractatione destruat; uti pariter in Vulnere curatione dictum fuit.

§. 511. **H**IS actis (§110.), diu pergendum in victu & medela Cancro adhuc præsentis propria, quin & patet, quæ mala à Cancro in loco extirpationem renuente prodire queant.

Cum autem medentibus nihil turpius, ægris nihil calamitosius, accidere possit;

(a) Lib. V. cap. 27. pag. 318.

| serv. 87. pag. 270.

(b) Hildan. Observ. Chirurg. Cent. 3, Ob-

| (c) Livre VII. chap. 31. pag. 180.

quam si post crudelem operationem toleratam in aliis locis corporis simile renasceretur malum; diu adhuc pergendum erit in victu & medela, quæ causis canceri adversa cognoscuntur: præcipue si ab internis causis cancer extirpatus originem suam duxerit. Ubi enim ab externa causa, contusione v. g. in corpore sano cancer natus fuerit, post ejus ablationem vix adest recidivæ periculum. Præstat certe nimia hic attentio, quam secuta nimis oscitantia: facileque ab ægris, semel dirum hunc morbum expertis, scrupulosa etiam præscriptorum Medicorum observatio impetratur. Illa ergo omnia, quæ §. 507. n° 2. 3. 4. dicta fuerunt, diu adhuc erunt continuanda. Cum autem ex illis, quæ dicta sunt ad §. 484. & 496. paruerit, etiam in partibus internis corporis aliquando scirrhus & cancrus deprehensos fuisse, apparet satis, quam horrenda mala sequi debeant, dum rodens sanies ex cancroso ulcere depluens viscera depascitur. Plurimorum, & quidem pertinacissimorum, morborum chronicorum origo à scirrhis viscera obsidentibus sæpe pendet; constititque observationibus Medicis, in scirrhi & canceri historia memoratis, enormes dolores, mirabiles viscerum erosiones, tandemque, post acerbissima tormenta, subitam mortem à cancro, interna corporis depascente, ortam fuisse.



## DE MORBIS OSSIUM.

§. 512. **I**PSA Ossa morbos patiuntur similes iis, quos hætenus in mollioribus partibus descripsimus.

Antequam de morbis internis dicetur, ultimum superest Capitulum, in quo de Ossium morbis agitur. Utilissima erit & horum morborum pertractatio ut postea plurima intelligi melius possint, quæ in Lue Venerea, Rachitide, Scorbuto observantur.

Ossa, quæ merito durissimæ, aridissimæ, & maxime terrestres animalium partes à *Galeno* (a) dicuntur, & fulciendis ac stabiliendis reliquis inserviunt, similes morbos pati, ac partes corporis molliores, mirum forte videbitur: Verissimum tamen hoc esse patebit ex sequentibus.

Ossa omnia quondam mollia fuerunt: totum enim hominis rudimentum primis à conceptu diebus, nisi æquabili ambientis fluidi pressione sustineatur, informis muci specie diffluit; & hoc in generatione pulli ex ovo per immortalia *Malpighii* observata constitit. Sed & in homine jam nato plurimæ partes membranaceæ & molles inveniuntur, quæ postea in solidissima ossa mutantur. Docent hoc imprimis capitis ossa, quæ adhuc satis diu membranæ naturam retinent loco illo in capitis vertice, *Fontanella* dicto, qui ad octavum ætatis annum, & serius adhuc, in quibusdam hominibus membranaceus &

(a) Libr. de Ossib. in Proæmio, Charter. Tom. IV. pag. 9.

mollis manet. Imo, quod mirabilius est, durissimi postea futuri dentes, dum in recens nati mandibulis latent, mollem mucum, innumeris vasculis irrigatum, referunt. In prima ergo sua origine mollia ossa cum fuerint, omnes morbos mollium partium pati potuerunt, saltem antequam induruerint. Postquam autem illam soliditatem acquisiverunt, quæ requiritur, ut destinatis in corpore humano inserviant usibus, non tamen omnino dura & arida sunt, prout in sceletis conspiciuntur, sed succulenta, & pluribus adhuc vasis irrigata, quæ & per ipsam ossis substantiam, & in cava illorum, liquores deducunt. Unde ratione horum vasorum continentium, & fluidorum contentorum, omnia eadem mala ossibus accidere poterunt, quæ in partibus mollioribus observantur: simulque patet, in illa imprimis ætate ossa his morbis magis obnoxia esse, quam mollium partibus magis sua natura accedunt, id est in junioribus, quod & quotidiana observata testantur. Unde & spina ventosa, uti postea patebit, fere tantum in junioribus deprehenditur. In decrepita senectute arida & exsacca facta à levibus etiam causis franguntur; sed aliis Ossium morbis minus affici solent.

Docuerunt præterea observationes fidelissimæ, per morbos ossa sic mutata fuisse, ut amissa soliditate naturali carni molliem acquisiverint. Refert *Petrus* (a) quod, aperto abscessu circa femoris cum coxa articulum nato, invenerit femoris ossis caput, & ossis ischii cavum, colore & consistentia carnem omnino referentia, sed mole multum aucta, atque adeo mollia, ut à levi etiam attractu sanguinem funderent: Dicitque egregius ille Vir, quod sæpius similem Ossium degenerationem in mollem & carnosam substantiam viderit. Ex quibus omnibus satis patet, mollium partium morbos etiam in ossibus obtinere posse: Quod adhuc magis confirmabitur ex illis, quæ Anatomæ in Ossium fabrica detexit.

§. 513. **N**A M interstitia horum vestiuntur membranula eodem vasorum genere instructa, iisdem liquoribus perpetuo allatis humectata, ac illæ.

Demonstraverunt celeberrimi Anatomici *Clopton Havers* (b) & *Dominicus Gagliardus* (c), ossa corporis humani constare lamellis sibi mutuo applicatis, sic tamen ut non semper & ubique arctissime uniantur, sed inter illas relinquuntur interstitia, per quæ vasa satis numerosa decurrunt. Omnium pulcherrime hoc apparet in ossibus cavis majoribus, uti v. g. in osse femoris, humeri, tibiæ &c. In medio enim loco horum ossium lamellæ arctissime unitæ apparent, & firmissima ossis compages ibi deprehenditur: Ubi vero à medio ossis utrimque versus ejus extrema lamellæ osseæ pergunt, incipiunt internæ lamellæ secedere ab incumbentibus, atque notabile interstitium relinquunt. Quo magis autem pergitur versus extrema, eo plures lamellæ secedunt; donec tandem in extremis hujus ossis tenuis tantum crusta ossea supersit, quæ tegit & defendit mirabilem illam cellulosam fabricam quæ in ossibus majori-

(a) *Traité des Maladies des Os* Liv. I. chap. I. pag. 312. (b) *Osteol. Nov.* pag. 30. 43. (c) *Anatom. Ossium* pag. 10.

bus circa illorum extremitates observatur. Dum enim secedunt per omnem ambitum cavi ossis lamellæ a se mutuo, angustatur ossis cavum, tandemque in extremitatibus nullum fit, toto hoc spatio repleto cellulari ossæ fabrica. Nam inter secedentes lamellas ossæ ubique ossæ propagines emergunt tenues, quæ separatas lamellas inter se uniunt, & in situ quasi retinent; simulque relicta interstitia in minores cancellos subdividunt. In ossibus vero minoribus, quæ magnum cavum non habent, uti v. g. in phalangis digitorum, non apparet illa unio & concretio laminarum in medio, sed plurimæ laminæ ex interioribus tota sua longitudine distant ab incumben- tibus, & cancellos tales ossæ non tantum versus extrema, ut in majoribus ossibus observatur, sed ubique formant. Unde etiam apparet ratio, quare longe debiliora sint hæc ossa, cum robur ab unitis & concretis plurimis lamellis ossæ pendeat. In cranio similes lamellæ ossæ observantur, quæ sibi mutuo incumbentes calvaria ollam constituunt, & manifesta inter has interstitia in quibusdam calvariis observare licet.

Interstitia hæc inter has lamellas secedentes relicta vestiuntur suis membranulis, quas plurima vasa perreptant. Docuit hoc injectionibus suis *Ruyfchius*: & in recens mactatorum animalium ossibus majoribus, absque ullo artificio adhibito, hujus rei veritas apparet: adeoque non mirum est, ossa partium mollium morbos pati, cum & simile vasorum genus, & eosdem liquores, habeant. Ossium autem hæc ex lamellis sibi mutuo accumbentibus fabrica pulcherrime respondet illis, quæ in morbis quandoque observantur. Dictum fuit in Vulnerum capitis historia §. 249. si, pericranio læso, diu nudatum fuerit os, illud colorem suum mutare, & tandem squamam corruptam separari ab osse supposito sano. Dumque pulcherrima arte minimis terebris (vide §. 252.) per- tunditur locus affectus in osse, per hæc foraminula emergunt viva vasa supposita, & separant corruptum, & deinde retexunt perditam ossis substantiam, novumque Periosteum formant, simili modo ac in partibus mollibus perditæ per vulnus substantia recrefcit. Constitit autem observationibus ibidem memo- ratis, non requiri ad hanc rem, ut ad diploën usque perterebretur locus affectus, (ibi enim vasa esse nemo negabit) verum in minoribus malis sufficere levissimam terebrationem, & tamen vascula per hæc foraminula emerge- re. Manifestum ex his ergo est, inter ossium calvaria lamellas decurrere vascula, quæ corrupti ossis tegmine libera cito satis emergunt. *Celsus* (a) de vitiatis Ossibus curandis agens jam dixerat. *Oportet autem ante omnia os nuda- re, ulcere exciso, & si latius est ejus vitium, quam ulcus fuit, carnem subseca- re, donec undique os integrum patefiat: tum id, quod pingue est, semel iterum- de satis est admoto ferramento adurere, ut ex eo squama secedat, aut radere, do- nec jam aliquid cruoris ostendatur, qua integri ossis nota est. Nam necesse est aridum sit id, quod vitiatum est.*

§. 514. **E**T prout hæc spatiola (§. 13.) majora, eo os ibi proprius accedit structuræ partis mollis.

Cum enim interstitia hæc inter secedentes lamellas relicta membranulas ha-

(a) Lib. VIII. cap. 2. pag. 508.

beant vasculis irrigatas, quo ampliora fuerint hæc spatiola, eo major aderit horum vasculorum numerus; adeoque os in illo loco quam proxime ad partium mollium structuram accedet.

§. 515. **I**DEOQUE aptius ibi (514.) pati eos morbos, qui aliter molles partes occupare dicuntur.

Ex ante dictis hoc satis patet. Adsunt enim hic vasa, & humores, æque ac in partibus mollibus proprie dictis. Omnia ergo quæ in præcedentibus de nimis debili, vel & nimia, firmitate vasorum dicta fuerunt, omnesque spontaneæ humorum degeneraciones, pariter hic locum habere poterunt. Poterit humorum motus per hæc vasa nimis incitari, vel nimis tardus esse. Obstructio, solutio continui, inflammatio, & omnes ejus sequelæ pariter ob eandem rationem æque in ossibus, quam in partibus mollibus, adesse poterunt.

§. 516. **T**ALIS est latior circa juncturas pars, quum densior, minusque vasculosa sit in osse medio.

Dictum fuit in Commentariis §. 513. lamellas, ex quibus ossa majora corporis constant, in medio ossis arctissime sibi mutuo uniri & vix ulla interstitia relinquere; hinc maxima erit illo in loco ossis soliditas, simulque vel nulla, vel paucissima tantum & minima, vasa inter has lamellas decurrere poterunt. Cum autem versus extrema sensim magis magisque à se mutuo recedant lamellæ, & spatiola inter has media augeantur, larescet os circa juncturas, sed simul debilius erit, & facilius lædi poterit, quia crusta illa ossea externa ex unitis inter se lamellis osseis facta, ibi tenuissima est. Dixit *Clopton Havers* (a) quod observaverit in osse femoris, latera ejus in medio osse, antequam ullæ lamellæ secesserant, quintuplo crassiora esse, quam in capite ejusdem ossis. Verum in simili femoris osse, quod radiosa arte præparatum possideo, inveni latera in medio vigecuplo crassiora esse ad minimum tenui illa crusta ossea, qua caput ossis femoris, & trochanter major, & inferior ejus pars ribiæ articulata, teguntur. Adeoque, patet, quare versus juncturas os partium mollium morbos frequentius patiatur. Unde etiam in fracturis longe pejora mala metuuntur, si circa latiore ossium partem prope juncturas fuerint, ob vasorum numerosorum læsionem, & liquidorum effusionem & corruptelam, uti in Commentariis §. 342. 343. dictum fuit. Requirebatur autem major firmitas in mediis ossibus, quam versus extrema: quia, dum v. g. totum corporis pondus ossi femoris innititur maxima vis in medium os agit. Simulque arctissime hic unitis lamellis cavum nascitur, medullæ locandæ interveniens, atque etiam augetur ossis robur: demonstraverunt enim Mechanici, cylindrum cavum difficilius frangi cylindro solido, in quo eadem materiæ quantitas est (b).

(a) Osteol. nov. pag. 37.

(b) Académ. des Sciences l'an 1701. Hist. p. 158.



§. 517. **H**INC ( §14. §15. §16. ) prima morborum in Ossibus distinctio.

Ut aliquid distincti in morbis Ossium tradendis habeatur, necessarium erit illos in quasdam classes disponere, prout variae partes ossium fabricam constituentes affectae sunt: diversi enim penitus horum morborum erunt effectus; & alia requiretur curatio, prout hae illae partes laborant. Prima autem horum morborum divisio desumitur à loco, quem occupant, in ossibus scilicet majoribus articulatis: prout nempe vel in media, solidissima horum ossium parte, vel circa extrema haerent; ubi crassiora quidem sunt hae ossa, sed minus firma, & cellulosa fabrica constant.

§. 518. **O**SSA; praeter vasa mollibus communia ( §13. ) partibus, in suis cellulis latioribus ( §16. ) habent vesiculas oleo subtili meduloso, ibi secreto, & in suos usus asservato, plenas; hae vesiculae, majores circa juncturas, circa densitatem ossis sensim abolentur, & in canales pingue vehentes tenuissimos versa, evanescent fere.

Cum ergo ossa in parte sua latiori circa juncturas magis accedant ad structuram partium mollium, poterunt imprimis in illis locis omnes morbos in partibus mollibus observatos pati. Sed praeterea in ossibus aliud quid obtinet, unde pessimorum in his morborum origo saepe pendet. Oleum enim medullosum satis tenue in cellulosa hac ossium parte haeret, à sanguine arterioso secretum, in vesiculas collectum, quae & cum se mutuo, & toto systemate meduloso in majori ossium cavo haerente, communicant, & per poros cartilaginum, quibus extrema ossium articulatorum incrustantur, transudant in articulorum cava, ut una cum glutinoso glandularum hic positarum humore faciant linimentum, quo mobiles articuli inunguntur ( vide Commentaria §. 362. ). Praeterea & hae vesiculae medullosae, inter secedentes lamellas osseas locatae, videntur etiam his lamellis osseis largiri medullaris olei partem, qua ossium nimia fragilitas cavetur. Uti enim patebit postea in Commentariis §. 514. in illis locis, ubi lamellae ossis arctissime uniuntur, per poros his inculptos ingreditur oleum medullare, & inter lamellas sibi mutuo incumbentes distribuitur; cum in solidissima & media ossium parte non detur adeo locus inter lamellas osseas, ubi vesiculae medullosae locari possent. Duplicem ergo usum videtur habere medullosum oleum his folliculis, in cellulosa ossium parte locatis, contentum: lubricare nempe articulos, & inter lamellas osseas se diffundere, ut ossium nimia ariditas praecaveatur. Unde etiam, dum vel per morbos, vel in decrepita senectute, deficit illud oleum medullare, articuli difficilius moventur & crepitant; atque ossa, non amplius hoc oleo inuncta, à levi etiam vi franguntur.

Quanta autem copia olei medullaris in cavernosa hac ossium parte contineatur, patet in ossibus bovinis coctis: postquam enim omnis medulla, ma-

jori horum ossium cavo contenta, educta fuit, si findantur horum ossium extrema, vel malleo percutiantur, magna adhuc copia tenuis olei medullofi exit. De fabrica horum folliculorum, medullosum oleum continentium, postea §. 524. dicitur, cum similes omnino sint, ac illi, qui medullam in majorum ossium medio cavo hærentem constituunt; solaque differentia sit, quod in cavernosa ossium parte pauci folliculi simul, vel forte & singuli tantum in minoribus cancellis, hæreant; cum medulla congeries sit plurimorum talium folliculorum, una communi membrana comprehensorum. Ubi jam major distantia est inter secedentes ossis lamellas, patet facile, plures folliculos tales locari posse; in illis vero locis, ubi contiguæ sunt hæ lamellæ, vel saltem quam minimum à se mutuo distant, nulli tales aderunt, sed vel per tenuissimos canales ex his folliculis propagatos distribuetur inter lamellas oleum illud tenue, vel per poros illos (de quibus postea dicitur) lamellarum ossearum idem illud oleum ingreditur.

§. 519. **H**INC (§. 518.) altera morborum in Ossibus classis.

Nova hinc morborum in Ossibus origo, quatenus nempe folliculi illi medullare oleum tenuissimum continentes afficiuntur, unde olei illius pessima corruptela; & plurima mala fient, quæ postea §. 526. enumerabuntur.

§. 520. **H**ABENT ossa periosteum externum convexa ambiens, tegens, vasa arteriosa in cellulas, inque medullam ferens, venosa excipiens, magna, parva, numero infinita.

Demonstravit *Clopton Havers* (a), omnia corporis ossa tegi tenui membrana, pellucida fere, & acutissimi sensus, quæ variis fibrarum stratis, sibi mutuo incumbentibus, non vero intertextis, constat. Fibræ hæ parallelo ductu ad se mutuo, & secundum ossium longitudinem, decurrunt. In quibusdam locis crassior hæc membrana apparet, & fibris se mutuo decussantibus vario ordine constare videtur; verum hoc fit à musculis, illorumve tendinibus, supra periosteum decurrentibus, antequam ossibus inferuntur. Observavit præterea, periosteum supra ossa decurrens illa deferere illis in locis, ubi ligamenta, ossa articulata neccentia, oriuntur, & hæc ligamenta superascendere, sicque ad vicinum os pergere; uti alia occasione in Commentariis §. 343. dictum fuit. Unde credidit, periosteum tantum esse continuationem unius ejusdemque membranæ, quæ, à dura matre originem ducens, cranium investit, & deinde supra omnium reliquorum ossium superficiem extenditur. Membrana hæc, supra ossa expansa, illorum cavitatibus & eminentiis variis perfectissime se accommodat, adeoque omnem illorum superficiem tegit. Illa vero pars ossium articularum, quæ ligamentis, capsulam articulare constituentibus, continetur, periosteo destituitur; cum, uti modo dictum fuit, in his locis ossa deferat, & supra ligamenta pergat. Nihil ergo ad ossa venire, neque ali-

(a) Osteol. nov. pag. 14. &c.

quid inde redire potest, nisi Periostei ope. Omnes ergo arteriæ, quæ pro nutritione & incremento ad ossa veniunt, vel & in cellulotam illarum fabricam penetrant, aut per distincta foramina ad medullam in majorum Ossium medio cavo collectam feruntur, prius per Periosteum transeunt: pariterque venulæ residuum sanguinem revehentes in Periosteo ordinantur. Unde hæc membrana tota vasculosa est, uti arte sua pulcherrime demonstravit *Ruychius* (a), atque vasorum ramulis, ex Periosteo in os pergentibus, venulisque inde redeuntibus, omni fere in puncto ossi necitur, atque ideo firmissime adheret, imprimis in junioribus. In decrepita enim senectute, plurimis vasis jam abolitis, laxius ossi adherere Periosteum observatur. *Clopton Havers* (b), qui pulcherrima sua de Ossibus observata scripsit, antequam *Ruychii* inventa obi erudito innotuerant, firmam illam Periostei cum ossibus cohesionem miratus credidit, hanc membranam ossibus firmissime accrescere illo ætatis tempore, quando adhuc mollia & glutinosa quasi erant: viderat tamen egregius ille Vir, minimis fibrillis, ex Periosteo in ipsam ossis substantiam emissis, illud ossi uniri: constitit autem postea *Ruychianis* injectionibus, fibrillas illas esse vascula ex Periosteo in os tendentia, atque numero fere infinita. Neque tantum majoribus ossibus vasculosum Periosteum imponitur, verum etiam & exiguis adeo auditus ossiculis, quæ Periosteo carere magni in arte Viri dixerant, similis membranula tenerrima datur; & internam tympani cavitatem suo etiam Periosteo tegi, vasculis innumeris prædita, invenit *Ruychius*, & figuris expressit (c).

§. 521. **H**INC (§. 520.) iterum Morborum tertia series in Ossibus.

Quæcumque ergo causa liberum humorum per vasa Periostei transitum in os, vel eorum reditum ex osse in Periosteum impediverit, poterit in ipso osse morbos facere, licet causa horum morborum prima & efficiens non in ipsa proprie dicta ossis substantia, sed tantum in Periosteo, hæserit. Ratio ex illis, quæ præcedenti paragrapho dicta fuerunt, facile patet. Unde iterum nova Morborum in Ossibus classis habetur.

§. 522. **H**ABENT Ossa Periosteum internum cava medullæ receptacula ambiens, regens, vasa arteriosa in vesículas medullosas distribuens, venosa excipiens, magna, parva, numero infinita.

Periosteum illud internum non adeo facile demonstratur, quam Periosteum externum: talis tamen membranula adesse videtur, sed tenerrima, cum duro ossis tegmine tutissime defendatur. Cranium dura mater investit, Periostei interni munere fungens; sed cum hæc membrana vaginas emittit, quibus ex medulla oblongata & spinali egressi nervi tuto defenduntur, crassior & densior ejus fabrica requirebatur. In cavis Ossibus majoribus ab omni externa injuria

(a) *Adversar. Decad. 3. Tab. II. fig. 8.*

(b) *Osteol. nov. pag. 22.*

(c) *Epist. Anatom. 9. pag. 10. & 11. Tab. IX. fig. 1. & 10.*

defensa hæc membranula, tantumque tegendæ internæ ossium superficiei & recipiendis vasis inserviens, non requirebat tantam firmitatem & robur; adeoque ob summam illam tenuitatem difficilius detegitur: In Ossibus illis, quorum interior superficies tota cellulosa est, talis continua membrana non facile invenitur, cum adeo intricata hæc fabrica sit: uti etiam in Ossibus majoribus circa extrema, ubi secedentes lamellæ ossæ mirabilem illam spongiosam substantiam faciunt. Sed hæc membrana imprimis adesse debet in illa parte majorum Ossium, quæ arcte unitis lamellis ossæ solidissima est, & magnum cavum in medio habet, in quo medulla locatur. Monuerat *Ruyschius* (a), Anatomicos sæpe nimis liberaliter loqui de Membrana, quam putant ipsam medullam ambire, dixitque, in ossibus, quorum tota cavitas plena est substantia osseo-spongiosa, aut osseo-filamentosa, non inveniri unam communem medullæ membranam; nec mirum, cum tunc non collecta, sed per cancellos illos dispersa hæreat medulla. Alibi tamen (b) ossis humeri ex puerulo, bifariam secundum longitudinem divisi, fabricam sic describit, atque etiam figura expressit: *Substantia interior, quæ osseo-spongiosa, meduloso liquore imbuta, & membranula adeo tenui obsita, ut telam araneæ adæquet. Hac autem superbit arteriolis repletis, & exinde rubedine prædita.* Et in eodem Thesaurο (c) describit portionem Ossis femoris ex infante, serra divisam, in cuius cavo apparet membranula, instar telæ aranæ tenuis, quæ medullam ambit; uti etiam arteriolæ per illam dispersæ. Ex quibus satis apparet, teneram talem membranulam in cavis ossium internis hærare. Forte tamen dubium videri posset, an hæc membranula pertineat ad medullam, an vero ossis internum sit Periosteum; vel denique an eadem membranula utroque fungeretur munere? sed si considerentur illa, quæ *Clopton Havers* (d) de Medullæ structura habet, videbitur admodum probabile esse, hanc membranam à medulla distinctam esse. Dicit enim, totam medullæ collectæ molem tegi tenuissima & pellucida membranula, quæ in pluribus locis colorata apparet, ac si à sanguineis vasculis, per suam fabricam dispersis, ruberet. Ubi autem hanc membranulam à medulla, parum majorem consistentiam habente, caute separabat, vidit sæpius vascula per medullæ superficiem decurrentia integerrima mansisse; certissimumque se esse dicit, hæc vascula ad membranam illam incumbentem, nunc separatam, non pertinuisse: statimque postea dicit, quod hæc membrana ossi adhæreat, non tantum per exiguas venulas, verum etiam quod se insinuet transversis poris, quæ in interna ossis superficie reperiuntur. Ex qua descriptione patet, tenerissimam membranulam internæ ossium superficiei necesse, & sub hac vasa, procul dubio in alia membranula ordine disposita, per medullæ superficiem decurrere, adeoque distinctum foret internum illud Periosteum à medulla ipsi contigua. Usus illius Periosteici foret ergo, non tantum vasa arteriosa in vesiculas medullosas distribuere, & venosa inde redeuntia recipere, verum etiam ipsius ossis vitæ & nutrimento, per vasa immissa in ossis substantiam & inde recepta, prospicere. An hoc forte docent mira observata in morbis Ossium? Describit *Ruyschius* (e), & figuram addidit ossis cubiti, carie exesi, in cuius cavo continetur fistula ossea integre separata ab ossis cubiti substantia exteriori, ita ut undique mobilis esset.

(a) Adversar. Decad. 3. pag. 32.

(b) Thesaur. X. Tab. III. fig. 2.

(c) N°. 182. pag. 78.

(d) Osteol. nov. pag. 164. 165.

(e) Thesaur. X. N°. 176. pag. 69. Tab. II. fig. 1.

Non adeo improbabile videtur, à vitio quodam in Periosteum interno nato affectam fuisse ossis partem internam, cui imprimis Periosteum illud internum prospicit, & deinde partem ossis tubulatam internam secessisse à reliqua ossis exteriori parte.

§. 523. **H**INC (§. 522.) quarta Morborum in Ossibus divisio.

Cum hæc membranula vasculis constet, uti modo dictum fuit, poterunt obstructio, inflammatio, omnesque ejus sequelæ & hic locum habere; unde & os contiguum male afficietur, & proxime supposita medulla pariter vitium contrahere poterit, de qua re statim dicetur.

§. 524. **H**ABENT ossa in suis cavis infinitas vesiculas oleo subtili meduloso plenas, id asservantes, distribuentes & inter se mutuo, & inter lamellarum interstitia, & in cava juncturarum, & per poros rectos. Hæ vesiculæ arterias, venas, lymphæ ductus, adiposos ductus, nervulos, membranulas, habent.

Dictum fuit §. 518. de Vesiculis oleo subtili meduloso plenis, quæ in cellulosa ossium parte circa juncturas hærent: hic autem agitur de medulla proprie dicta, quæ in majorum ossium cavo reconditur, & ex infinitis vesiculis simul collectis, & una communi membrana inclusis, constat. Observaverat *Clopton Havers* (a), oleum medullosum non hære in cavo membranæ medullam ambientis effusum, sed in minimis vesiculis colligi, ex quarum adunatione fiunt lobuli majores, peculiari membranula vestiti; ex horum dein lobulorum unione tota medullæ massa, in majorum ossium cavis conspicua, componitur. Videntur autem minimæ illæ vesiculæ, oleum medullosum continentes, communicare inter se; uti pariter & lobi, ex collectione harum vesicularum facti; unde oleum illud, & ad ipsius ossis substantiam, & ad cava juncturarum, venire poterit ex omnibus medullæ locis, etiam dissitis. Dum enim talis lobuli medullaris membranam lædebat *Havers*, vidit, non simul & semel, sed gradatim tantum effluere oleum medullosum, sensinquè tamen evacuari totum per lenem pressionem, quæ leviter comprimeret, nec frangeret tamen minimas illas vesiculas. Dum medullæ durioris partem igne liquabat, videbat liquefactum pingue gradatim disfluere, lobulis & vesiculis vacuis remanentibus. Confirmatur hoc ulterius inde, quod majori motu, & nutrimenti defectu, minuatur medullæ quantitas; augeatur vero quiete, & pleniori victu: quod pluribus experimentis constituisse affirmat *Du Verney* (b); qui & medullæ fabricam similem describit, ac modo dictum fuit. Oleum autem illud medullosum triplici modo videtur exire posse ex illis vesiculis, in quibus collectum hæret. Vel enim per vesiculas & lobulos communicantes versus extrema ossium derivatur, atque ibi per poros cartilaginum, quibus extrema ossium articularum incrustantur, in articularum cavitates exsudat (vide Commentaria §. 362.), ut expeditissimi motus fieri possent absque attritu & detritione ossium motorum: atque ideo etiam post validos motus medullæ co-

(a) Osteolog. nov. pag. 166. &c.

| (b) Academ. des Sciences l'an 1700. Mem. 155.



pia minuitur. Vel forte attenuatum hoc oleum venulas minimas absorbentibus ingreditur, sanguinique miscetur: certe in morbis acutis videmus sapre, paucorum dierum spatio omnem corporis pinguedinem fere consumi. Ultimo videtur & hoc oleum medullosum ipsam ossium substantiam ingredi, illique conciliare debitam cohesionem & unctuositatem. Dum indagabat vias illas *Croton Havers (a)*, quibus oleum medullosum ossium substantiæ se intinuat, invenit, internam ossium laminam numerosis foraminulis pertundi, per quæ tamen post sollicitum examen nulla vasa ad medullam tendere, vel ab illa redire, vidit. In proxime sequenti lamella ossea similes poros vidit, sed non incumbentes directe prioribus verum aliis locis positos, adeoque non poterit directa via ex foraminulis internæ lamellæ oleum medullosum ingredi sequentis lamellæ poros, sed debet illud oleum, postquam primam lamellam penetravit, inter hanc & secundam lamellam pergere, donec simili poro occurrat in hac lamella, quem ingrediatur, atque inde inter secundam & tertiam lamellam iterum decurrat, donec & hujus poros ingrediatur, sicque successive inter lamellas ossis distribuatur, donec ad extimam illarum superficiem pervenerit. Foraminula illa, quæ oleum medullare ingreditur, transversos poros vocavit Auctor; vias autem illas, secundum quas oleum illud transversis poris receptum inter lamellas osseas decurrit, antequam proxime sequentis lamellæ poros transversos ingrediatur, vocavit poros longitudinales; quia ductum fibrarum osseas lamellas constituentium sequuntur. Monuit simul idem Auctor (b), longitudinales illos poros difficilius detegi, neque absque optimorum microscopiorum ope, omnium tamen facillime in costis; additque, quod pulcherrime illos distinguere potuerit in densissima scapulæ parte, ubi lamellæ osseæ immediate cohærebant sibi mutuo; viditque medullam, hos poros longitudinales ingressam, lateribus illorum iustar olei adhærere. Quinimo testatur, quod in osse humano, inter undecim vel duodecim distincta lamellarum ossearum strata, eosdem observare potuerit. Transversi ergo pori medullare oleum transmittunt tantum; longitudinales vero illud inter lamellas deducunt; sicque lamellarum interstitia hoc oleo inunguntur. Illa autem olei medullaris per ossis substantiam distributio tantum obtinet illis in locis, ubi lamellæ osseæ sibi invicem contiguæ sunt; in illis vero locis circa juncturas, ubi inter illas notabilis distantia est, locantur vesiculæ medullares §. 518. descriptæ, quæ oleum illud facillime largiri poterunt.

Pulcherrima hac structura oleum medullare æquabilissime per ossium substantiam distribuitur, cumque interna ossis lamella transmittere debeat illam copiam medullæ, quæ & propriis & lamellarum omnium incumbentium usibus inservire debet, hinc maximus in illa pororum transversorum numerus occurrit; minor in sequente; sensimque decrescit, prout magis versus extimam ossis superficiem pergitur; quam rem sic se habere invenit idem Auctor (c).

Siccissimæ sic atque aridissimæ maximeque terrestres totius corporis partes, ossa nempe (vide §. 512.) tenuissimo oleo irrigantur; forteque ab hoc oleo terrestrium partium unio, tanquam ab interposito glutine, fit. Omni enim oleo, vi ignis expulso, ossa fragilia fiunt; atque eadem valido calcinata igne, dein

(a) Osteol. nov. pag. 43. &amp;c.

(b) Ibidem pag. 46. &amp;c.

(c) Ibidem pag. 44.

oleo immersa, novam iterum cohesionem acquirunt; uti in Commentariis §. 21. dictum fuit.

Paret inde, quare ossa, pingui sic undique penetrata oleo, luculentum igni pabulum dent: adeo ut, referente *Herodoto* (a), Scythæ, præ lignorum penuria, succensis ossibus carnem victimarum coquant; imo, si defuerint lebetes, omnes carnes hostiarum in alvos illarum injicientes admista aqua, ossa succendant: sicque fiat, ut bos se ipsum excoquat. Simul apparet, quare nitidissima etiam sceleta, quamvis pectoratis ossibus majoribus omnis medulla inter coquendum effluerit, postea iterum flavescant; imo sæpe pingue oleum exsudent; sensim nempe oleo medullari, inter lamellas osseas distributo, versus ossium superficiem emergente.

A sanguine arterioso separatur oleum illud medullare, in vesiculis illis colligitur, & deinde ex his exit, ut destinatis à natura usibus inserviat. Observavit *Cleopon Havers* (b), arterias ad medullam, pendentes penitus distinctas esse ab illis, quæ per ossium substantiam vitales humores deducunt, atque etiam per foramina singularia ossibus insculpta in medullam usque deferri; sic tamen ut non recta penetrent in ossium cava, sed oblique decurrant per ossium substantiam, antequam ad medullam perveniant, & quidem satis notabili sæpe longitudine: vidit enim idem Auctor (c) talem arteriam per sesquipollicis spatium intra ossis substantiam decurrere, quamvis ossis crassities in hoc loco octavam pollicis partem vix excederet, neque tamen potuit detegere, quod talis arteria in toto hoc decursu aliquos ramulos per ossium substantiam dispergeret (d). Postquam hæc arteria in cavum ossis venit, solet plerumque dividi in duos ramos, quorum singuli versus extrema opposita ossis tendunt, & innumeris ramulis per vesiculas medullofas dividuntur. Licet autem microscopio viderit egregius Auctor, plurima vascula sanguinea per minimam vesiculam medullarem dispergi, ingenue tamen fateretur, se non potuisse detegere, an singulæ vesiculæ talia vascula habeant; imo videtur fuisse in illa opinione, hoc minime requiri, cum secum invicem communicent vesiculæ, adeoque secretum fabrica arteriosa oleum medullare in quibusdam vesiculis posset etiam ad alias venire. Injectionibus tamen Ruyschianis patuit, totam medullam in omni sua parte vasculis talibus præditam esse; adeoque admodum probabile videtur, similem apparatus vasculosum in omnibus vesiculis medullaribus obtinere.

Postquam vero secretum fuit oleum medullosum, residuus sanguis minimis venulis traditur, quæ collectæ in majores trunculos tandem in unicam desinunt venam, quæ plerumque per idem foramen, per quod arteria ingreditur, solet exire. Observavit tamen laudatus Auctor, minimas venulas, à medulla venientes, ipsi ossium substantiæ immergi, atque ibi disparere: forte hæc venulæ arteriarum medullam nutrientium sanguinem revehant; nam & in aliis multis corporis locis observatur arteriarum venarumque duplex apparatus, quorum unus secretioni peculiaris liquidi inservit, alter partis ipsius viæ & nutrimento.

Cum autem per injectiones & illæ partes medullæ rubeant, quæ absque his candidæ & pellucidæ apparent, patet, & minores vasorum series hic adesse, adeoque & lymphatica vasa: probatur hoc etiam inde, quia omnia cava corporis,

(a) Melpomene sive Lib. IV. pag. 240. 241. | (c) Ibidem pag. 37.

(b) Osteol. nov. pag. 162. | (d) Ibidem pag. 162.

majora æque ac minora, tenuissimo exhalante liquido madescunt, adeoque & similes venulæ absorbentes hic aderunt.

An autem hic adiposi ductus adsint, quibus in vesiculis collectum oleum medullare deferretur ad loca destinata, nondum se observare potuisse fatetur toties jam laudatus Auctor (a), crediditque potius, harum vesicularum contigua latera poris pervia esse, quibus ex una in aliam aditus pateret. Insignes tamen invenit ductus adiposos (b), per quos ex cavernosa ossis parte in articularum cava oleum medullare transit.

Nervos in medulla adesse, demonstravit *Du Verney* (c). Vidit enim, una cum arteria & vena nervum per ossis substantiam ad medullam tendere, atque observavit, tria hæc vasa eadem vaginula, quæ periostei productio est, includi. Præterea sensum doloris in medulla percipi directis experimentis evicit. In Nosocomiis enim, dum pest membrorum extirpationem renovabatur apparatus, sæpius jussit, nudam medullam rudius attingi, statimque ægri doloris molesti sensum exprimebant. Utque nullum dubium circa hanc rem superesset, coram Academia Parisinæ Membris animalis vivi femur resecurit, deinde expectavit paulisper, donec dolor, crudelis hujus operationis comes, transisset; tuncque stylum per medullæ substantiam adegit, statimque animal acerrimi doloris signa dedit. Experimentum hoc aliquoties iteratum fuit, similibus cum cautelis, atque eodem successu.

§. 525. **H**INC (524.) quinta & ultima, ex hac divisione, morborum in Ossibus differentia.

Cum ergo in intimis ossium medullis tam varii humores, tam numerosa vasa adsint, omnes fere morbi hætenus recensiti & hic contingere poterunt. Adeoque nova hæc & ultima morborum in ossibus divisio erit. Primo enim considerabantur morbi, quatenus in ipsa proprie dicta Ossium substantia hærent, quorum diversitas inde deducebatur, prout vel latiore & cellulosa ossium circa juncturas partem, vel mediam & solidiorem, occupabant. Secundo dictum fuit de Vesiculis, oleo meduloso plenis, in cellulosa parte ossium hærentibus, atque aliud morborum genus inde nasci posse, patuit. Tertio actum fuit de Periosteo externo, ossa convexa ambiente, atque & in hac parte nova Morborum origo descripta fuit. Quarto de Periosteo interno similia fere dicta sunt. Quinto & ultimo medullæ in majorum Ossium cavis ex optimorum Anatomicorum inventis fabrica & usus tradita fuerunt, ut & morbi in hac parte orti cognosci possent. Hisque omnibus jam præmissis evidentior haberi poterit morborum in ossibus observatorum Diagnos; atque ex iisdem firmior patebit Prognosis, horum morborum varios eventus designans; simulque indicationes curatoria, in singulis aliquando diversæ, ex artis regulis poterunt determinari.

§. 526. **S**I medullosum (518. 524.) oleum in suis vesiculis, emissariis, vel in Ossium interstitiis stagnat, calore & motu vitali acre, putridum, saniosum fit; secretionem novam im-

(a) Ibidem pag. 169.

(b) Ibidem pag. 173.

(c) Academ. des Sciences 1700. Mem.  
pag. 253. &c.

pediet, vasa adferentia, secernentia obturabit; vesiculam suam inflammabit; dein suppurabit; vel gangrænosa putredine corrumperet liquida & vascula; hinc ossea ipsa substantia vasis orba, liquido vitali privata, acribus erosa, in cineritiam quasi calcem vertitur, ubi tenuissima, id est, in cellulis apophysium; sic dolor, calor, pulsatio, tumor, abscessus, caries contingit pessima. Stagnatio hæc ab omni obstructione oriri potest (vid. cap. de Obstr.). Si autem ex interno malo, tum fere Spina Ventosa audit.

Agitur hac paragrapho de illis Morbis, qui Ossibus accidunt, quando oleum medullosum, a sanguine arterioso secretum, collectum in vesiculis in cellulosa Ossium parte dispersis, vel in iisdem in medulla aggregatis, stagnat & corrumpitur.

Ex illis, quæ §. 124. dicta sunt, patuit, oleum illud in vesiculis illis minimis colligi, & servari ad debitos usus, atque forte ibidem pro tempore stagnare, vel saltem tardissime moveri. In animalibus enim quiescentibus illud magna copia accumulatum solet inveniri; post validos vero corporis motus multum minuitur. Adeoque per stagnationem intelligitur talis conditio hujus olei medullofi, vel partium illud continentium & deducentium, per quam non possit obedire illis motibus, qui ad usus hujus olei in sanitate necessarios requiruntur. Debet enim oleum illud medullosum posse exsudare in articulorum cava, ut lubricentur articuli, debet insinuari inter lamellarum ossearum interstitia; debet posse transire libere ex minimis illis vesiculis in similes proxime accumbentes, donec ad loca illa perveniat. A quacumque ergo causa impediatur ille olei medullofi motus, fiet stagnatio. Sed videmus, blandissima etiam pinguis sponte in horrendam acrimoniam mutari, quædam citius, alia serius. Oleum amygdalinum blandum, dum recens pressum habetur, æstivis caloribus intra paucos dies adeo fit acre, ut fauces adurat, dum deglutitur. Butyrum pariter eodem modo solet corrumpi, sed non tam cito. Verum quidem est, libero aëris accessu multum accelerari hanc corruptelam; adeoque medulla, in ossium cavo stagnans, ob hanc rationem tardius corrumpetur, tamen diuturniori mora similiter degenerabit. Calor autem vitalis stagnans illud oleum cito putrefaciet, imprimis cum ex propria indole medulla admodum prona sit in putredinem: paucis enim diebus sanissimorum etiam animalium mactatorum medulla solet corrumpi, & fœtorem intolerabilem spargere; simulque, destructa oleosa tenacitate, diffluit in saniam tenuem sed putridissimam. Patebit facile, pessima mala tunc necessario sequi debere, si consideretur partium medullare oleum secernentium, colligentium, & deducentium tenerrima fabrica. Arteriæ enim ad medullam tendentes, simulac in ossis cavum pervenerunt, depositis, ut videtur, callosis tunicis, adeo pulposæ & molles evadunt, ut etiam annosi bovis medulla intra digitos facillime contereri possit in liquamen oleosum. Semel ergo nata hic corruptela, oleum medullare, in saniam acrem mutatum, erodet vesiculas, quibus continetur, & vicinas adhuc sanas destruet similiter, dum illas alluit, sicque in parva etiam medullæ parte natum tale malum propagabitur per omnia hæc loca. Poterunt ergo hæc vascula inflammari, omnesque loqui inflammationis effectus: verum benigna sup-

puratio hic vix locum habere poterit, cum acerrima saniei putridæ indoles sit; & licet hæc fieret, collectum pus in loco clauto hærens, neque inde educi potens, similiter attenuaretur & putresceret. Unde destructis vasis vitalibus harum partium necessario gangrænosa corruptio sequetur, & quidem pessima.

Præterea putrida hæc sanies, aucta quotidie malignitate, pejor redditur, omnemque internam ossis cavi superficiem alluit, adeoque & membranam externam medullæ, & periosteum internum, brevi destruet: Ossea ergo substantia, vasis vitalibus sic orba, acri sanie erodetur pariter, & destruetur. Omnium autem citissime hoc fiet in latiore ossis parte (vide §. 516.), sive in cellulis apophysium, ubi ossea substantia tenerrima est, & inter disjunctas à se invicem lamellas vesiculæ medulloas hærent; adeoque in his locis corruptum oleum medullare lamellas osseas ab utraque parte alluit, ergo & citius destruet. Circa solidissimam vero ossium partem tardius destruetur ossea substantia, quia & densius os est, & corrupta sanies internam tantum ossis lamellam tangit: sensim tamen hæc sanies, (augetur enim cum acrimonia tenuitas) se insinuabit poris lamellæ externæ, sicque inter lamellas osseas pergere poterit eodem modo, ac de medulloso oleo dictum fuit §. 524., atque hac ratione osseæ substantiæ erosio fiet; ita ut etiam solidissima ossa, destructa omni coactione, in calcem fatiscant. Ubi de Ossibus fractis agebatur, constitit, ossa etiam majora corporis, cariola facta, minima vi fracta fuisse (vide §. 344.).

Cum ergo inflammatio, omneque ejus sequelæ, in his locis adesse possint; & ex dictis ad §. 524. constet, medullam læsam dolere, patet ratio, quare dolor, calor, pulsatio &c. hic deprehendantur. Miri etiam tumores observati fuerunt ab hac causa, dum lamellæ osseæ à se mutuo sensim magis remotæ, imprimis versus juncturas, immaniter auxerant naturalem ossis affecti molem. Fœmina lapsu genu contuderat, atque postea in loco læso tumor apparuit, qui & in partibus mollibus & in osse ipso hæreere videbatur: octo annorum spatio sensim auctus tumor fuerat in magnam molem. Externa dein læsione vulnus in parte anteriori & superiori illius tumoris factum fuit, atque os ipsum denudatum, sensimque extrema ejus pars secessit; tuncque apparuit cavum in parte cavernosa ossis tibiæ adeo amplum, ut decem-uncias liquidi injecti caperet, ne guttula quidem per vulnus exeunte. Cum extirpatio sola superesse videretur, interimque in gravida muliere hæc non tentari posset, dilata fuit operatio, donec peperisset. Post partum autem pessime computruerant omnia, & paulo post periit (a). In eodem ossis tibiæ loco ingentem talem tumorem vidit *Petitus* (b), quo aperto, invenit massam carneam pugno majorem, in caverna ossea undique latentem, una cum pure fœtido, quam eduxit, & postea ossis partes corruptas tenaculis, imo & cuneo & malleo, resecur, atque feliciter tam grave malum curavit. Ex quibus patet, partes molles, in cellulosa parte Ossium circa juncturas, mirum in modum sæpe degenerare posse, atque inflammationes, abscessus &c. hic aliquando inveniri. Ubi vero oleum medullosum corrumpitur, terribissima mala fiunt, & pessima ossium caries, quæ tunc adesse dicitur, quando os corruptum in pulverem quasi fatiscit, & specillo exploratum non resistit amplius. Unde

(a) Academ. des Sciences l'an 1737. Hist. pag. 64.

(b) Traité des Maladies des Os, Tom. II, chap. 16. pag. 389.



*Celsus* (a) dicit: In carie quidem expedita cognitio est, si specillum tenue in foramina demittitur, quod magis minusve intrando, vel in summo cariem esse, vel altius descendisse testatur. Pessimum ergo ossium vitium caries, totalem fere eorundem corruptelam indicans aut erosionem: leviora enim ossium vitia, separatis lamellis corruptis per exfoliationem, sanari solent; caries nunquam, sed ferro vel igne tolli debet, donec ad viva perventum fuerit.

Cum ergo plurimæ causæ obstructionis, uti ex ejus historia patet, stagnationem hanc olei medullofi efficere possint, apparet, teterrima hæc mala à variis admodum causis originem ducere posse. Illa autem, quæ vi externa vasa comprimere aut destruere possent, minus hic locum habent, cum duro osse satis tuto defendatur medulla. A validis tamen contusionibus, & fracturis Ossium, lædi posse medullam, nullus dubitat. Ubi autem, absque ulla læsione externa, ab interno vitio ortum duxerit olei medullofi corruptio, tunc plerumque solet à Medicis & Chirurgis vocari *Spina ventosa*, quæ à *Rhaze* Medico Arabe celeberrimo primo descripta fuit (b), & hoc nomine vocata, quia consistebat hic morbus in corrosione & corruptione ossis, una cum dolore pungente & tumore. Ubi enim hoc malum, à medulla corrupta incipiens, os erodit, integumenta mirum in modum tument, imo & ipsa ossis substantia sæpe in maximam molem distenditur. Displicuit hoc nomen *Marco Aurelio Severino*, qui integrum Tractatum de hoc Morbo scripsit maluitque vocari, Græco verborum complexu, *Padarthrocacen*, quasi puerorum ad articulos malum, quia & pueris familiare erat hoc malum, & circa articulos frequentius observabatur (c). Sequentem vero dedit hujus morbi definitionem: *Padarthrocace abscessus est corruptorius, seu sphacelismus ossis, circa articulum in pueris, ex primis spermatis, & menstrui sanguinis, inquinamentis non repurgatis, per congestum illapsis & computrescatis, natus* (d). Non negavit tamen, adultioribus hoc malum contingere posse, atque exemplum adultæ mulieris hoc morbo laborantis adducit (e). Ad vigesimum quintum annum usque tum viros tum fœminas hoc morbo laborantes se observasse dicit *Peirus de Marchettis* (f), non autem provectiori ætate, nisi antea eodem morbo tentati nondum convaluissent. Cum vero in Rachiticis pueris ossium circa articulos tumores, abique illorum corruptela, observentur frequentissime, *Padarthrocaces* nomen magis ambiguum videtur esse. Imo videtur alio in loco *Severinus* (g) ipse vacillare, dum noluit ita facile asserendum esse, quod *spina ventositas* & *Padarthrocace* una eademque res esset. Non incongruum erit ergo, spinæ ventosæ nomen retinere ad hunc affectum designandum, cum *Rhazes* primus Auctor, qui aliquid distincti de hoc morbo memoriæ tradidit, illo usus fuerit; poteritque ex illis, quæ in hac paragrapho dicta fuerunt, satis limitari illius significatio, quod nempe sit ossis corruptio, à vitio in ipsa medulla nato originem ducens; adeoque ossis corruptela in parte interiori ossis primo incipit, sensimque progrediendo per totam ejus substantiam pergit, donec eroso, vel à tumente ossis substantia distracto, periosteum dolor & tumor incum-

(a) Lib. VIII. cap. 2. pag. 508.

(b) Freind History of Physick Tom. II. pag. 55.

(c) M. Aurel. Sever. de recond. abscess. natur. pag. 337.

(d) Ibid. pag. 356.

(e) Ibid. pag. 347.

(f) Observat. Medic. Chirurg. rarior. sylloge pag. 118.

(g) De Recond. abscess. natur. pag. 352.

bentium fiat. Ubi vero ossis corruptela, in exteriori parte incipiens, versus interiora pergit, licet tandem ipsam medullam etiam inficiat, caries ossis vocabitur: sic simul evitabuntur omnes illæ lites, quæ inter eruditissimos Auctores agitantur, an spina ventosa Arabum Græcis antiquis cognita & descripta fuerit, nec ne. Cariem enim ossium, illorumque siderationem (σφαλισμῶν) illis cognitam fuisse, nullus dubitat; illa autem ossium corruptio, quæ à medulla prius affecta ortum ducit, apud veteres Græcos non legitur.

§. 527. **L**IQUET. signa hujus mali, & status (§. 526.), esse signa inflammationis profundæ, nec ad tactum externum favientis.

Quam maxime dolendum est, malum hoc sæpe non cognosci, nisi sero, quando nempe osse penitus corrupto incumbencia incipiunt in tumorem attolli. Unde omni cura attendendum est, ut quantum possibile sit, in ipsa sua origine detegatur. Difficillimum autem hoc sæpe esse patet facile, si consideretur, in mediis ossibus latere malum. Lucem tamen in his tenebris dare poterunt sequentia. Si cognoscatur talis esse morbosus cacoehymia in corpore, à qua novimus per observata Medica ossa frequentissime affici. Tales sunt imprimis Lues Venerea, Scorbutus, & Rachitis in junioribus, qui postremus morbus, uti postea in ejus historia dicetur, sæpe magnam suspicionem latentis labis Venereæ lenioris habet. Ex his novimus, causas prædisponentes ad hunc morbum in corpore adesse. Præsentis autem morbi signum fere tantum habetur unicum, nempe dolor profundus, pertinax, molestissimus, in intimis ossibus, uti agri solent ipsi dicere, hærens, cum sensu lentæ erosionis. Accedit, quod dolor ille calore corporis majori in lecto, vel post validos corporis motus, aut aromatum vel vini majorem copiam assumptam, augeatur. Licet autem pars dolens valide prematur, vel fricetur, nullum inde doloris augmentum sit; nec mirum, cum durum os impediat, ne tactus externus in locum affectum agere possit. Hæc sunt signa incipientis mali: ubi vero osse jam eroso periosteum externum affici incipit, dolores augentur, & rudiori tactu exacerbantur plurimum; simulque tunc tumor mollis incumbentium partium nascitur: imo plerumque prius solet ipsa substantia ossis in tumorem attolli; tuncque facile noscitur malum: sed sero, quia tota ossis substantia jam corrupta nullam medullam capit, sed vel sponte cadet separata à partibus vivis, vel ferro aut igne tolli debet.

§. 528. **P**ROGNOSIS ex difficili separatione, absterfione, emundatione, mala multa, & difficillimam curationem prævidet.

Si jam perpendantur omnia illa, quæ hætenus de morbi hujus indole dicta fuerunt, patebit facile, pessima quævis hic metuenda esse, & difficillimam fore curationem. Hæret enim in medio duri ossis cavo corruptum oleum medullosum, quod ad curationem deberet posse abstergi & elui. Sed nulla datur via, qua exire possit, nisi prius os erosum fuerit, vel audaci arte perterebrari.

retur. Mora interim & calore loci quotidie acius fiet illud oleum, adeoque omnia augebuntur mala. Præterea si ossis interna superficies ab acri hac sanie erosa fuerit, corrupti ossis partes, quamvis à sanis & vivis partibus separarentur, hærent in medio ossis cavo, & mole sua & asperitate teneram medullam læderent, sicque nova producerent mala. Docuerunt jam observationes Medicæ, miras ossium degenerationes, dolores intolerabiles, febres, mortem ipsam ab hoc malo, facta fuisse. Ossa tarsi à spina ventosa corrupta fuisse, & in unam substantiam osseam confusa quasi, quæ nil minus quam nativam horum ossium fabricam referret, vidit *Ruyfchius* (a), & figura expressit (b). In homine paucis ante obitum diebus vidit idem Auctor, femur à duobus tumoribus spongiosis obsessum, quorum unus septem ulnæ quadrantes, alter unicum tantum circumferentia adæquaret. Ossa metacarpi in homine, qui per triennium toleraverat hoc malum, rupis instar aspera specillo invenit *Severinus* (c), manumque affectam adeo intumuisse, ut caput infantis magnitudine æquaret. Plura similia exempla apud Auctores habentur. Ex modo enarratis satis constat maligna pessimi hujus morbi indoles.

§. 519. **C**URATIO optima tentatur: 1. omnia vasa largissime implendo decoctis ex his, quæ valide penetrant, multum abstergent, putredini resistunt. 2. dein valide movendo cuncta per methodum sudorem exprimendi vapore calido artificiose ad corpus applicato. 3. simul tum, dum sudor fluit, motum determinando ad locum affectum per topica fomenta, & applicatione determinata vaporis calidi ad partem illam.

Quando jam tumor partium incumbentium sponte aperiebatur, nullam aliam curam superesse voluit *Rhazes* (d) præter illam, quæ urendo vel secando corrupti ossis partes tolleret. *Petrus de Marchettis* (e), simul ac æger conquerebatur de dolore pungente in articulis manuum vel pedum &c. quamvis nullus appareret tumor, ilico omnia discindenda voluit, & deinde ferro & igne tollendam esse vitiatam ossis partem. Antequam autem crudeli hæc methodo una cum vitio pars vitiata tollatur, videtur tentari posse sequens cura, cujus pulchri successus sæpe fuerunt observati.

1. Hæret morbi fomes reconditus ossium cavis: externa remedia huc penetrare nequeunt, nisi quatenus venis bibulis recepta, circulantibus humoribus mista, una cum sanguine huc deferri possint. Unicum ergo tantum superesse videtur, ut nempe corpus repleatur ingenti quantitate tenuis liquidi, in quo vis penetrabilissima, detergens, & putredini quam maxime resistens, adest: deinde ingestum tale liquidum accelerato motu feratur per vasa, ejusque efficacia determinetur ad partem affectam, quantum fieri poterit. Magna enim tunc spes est, tali liquido per vasa vitalia in ossis substantia, & medulla nondum

(a) Thesaur. VIII. n°. 68. pag. 42.

(b) Thesaur. V. Tab. 3. fig. 4.

(c) De recond. abscess. nat. pag. 375.

(d) Freind History of Physick Tom. II. pag. 57.

(e) Observat. Medic. Chirurg. rarior. Sylloge pag. 138.

penitus destructa, hærentia delato ad locum affectum, putredinem sisti posse, corrupta separari a vivis & sanis, dilui oleum illud medullosum, venulisque bibulis resorberi, atque per urinæ vel sudoris vias de corpore expelli. Putridos enim illos humores, in ossium cavis hærentes, in sanguinem resorberi posse, docet febris hæctica putrida, totum sæpe sanguinem pessima cacochymia inficiens, quando malum hoc ad magnam malignitatem pervenit. Sed largus talis remedii usus cavebit facile, ne putridum illud resorptum noceat. Omnium optima ad hunc scopum sunt ligna illa, in quibus aromatica fragrantia & magna copia balsamicæ resinæ adest: talia sunt Lignum Juniperinum, Buxinum, Quercinum &c: &, quod omnium commendatissimum ad hos usus semper fuit, Lignum Guajacum, cujus decoctum ex arte paratum subacidulum & balsamicum penitus est. Cumque duriora hæc ligna sint, & magnam copiam resinæ habeant, non adeo facile aqua hæc penetrare poterit, nisi prius in scobem rasa fuerint, leni calore per aliquod tempus digerantur, & deinde in vase clauso ebulliant per aliquot horas. Solet aliquando parca copia salis alcalini cujusdam addi, dum in digestionem ponuntur hæc ligna, ut aqua facilius intimam illorum substantiam penetret; & sub finem coctionis aliquot unciaz spiritus vini rectificati adduntur, ut omne resinosum in his lignis hærens tanto melius solvatur. Talis decoctis formula in Materia Medica ad hunc numerum habetur. Posset tali decocto infundi rasura Ligni Sassafras, quod volatili fragrantia præditum longam coctionem ferre nequit, absque jactura virium medicatarum. Meracissimi talis decoctis uncias aliquot sumat æger ter vel quater de die, simulque pro potu quotidiano utatur debiliori decocto, ex residuo decocti meracioris, nova aqua affusa, parato. Pro varia ætate, temperie, viribusque ægri major minorve copia horum decoctorum exhibetur: proderit semper tantum potare, quantum ferre poterit; sic enim penetrabili detergente & antiseptico liquido quam maxime replebitur totum corpus, atque satisfiet primæ indicationi curatoria.

2. Postquam per aliquot dies largo talium decoctorum usu vasa omnia repleta sunt, & incipit quasi turnere corpus, tunc conducet, motum humorum per vasa augere. Frictionibus quidem pro lubitu fere motum sanguinis accelerare possumus, unde & hæc solent adhiberi: commodissime tamen hoc fit vapore calido nudum corpus undique alluente, sicque simul sudores eliciente, per quos diffatur liquidum ingestum, & nova opportunitas datur, corpus replendi similibus. Nudato hinc corpore, linteo cerato undique obvoluto, exponitur calidæ aquæ vapor æger; vel quod omnium efficacissimum est, accensi spiritus vini vapor. Vix per pauca minuta vapor ille calidus penetrabilissimus corpus alluit, quin incipiant calefcere ægri, totoque corpore profusissimis sudoribus diffluere, qui aliquando observati fuerunt ingesta decocta redolere. Tanta sæpe copia hac methodo sudor exprimitur, ut quandoque robustissimi etiam homines in animi deliquium cadant, si diutius spiritus vini accensi vapor exponantur. Unde cautela hic opus est: constitit enim, in cura la's Veneræ, simili methodo tentata, aliquando periisse homines, dum ab imperitis cogerentur diutius hos sudores pati, quam vires ferre possent. Per horam dimidiam in debilioribus quotidie sudorem sic movere sufficiet; robustissimi etiam vix sustinent per bihorium: præstatque semper Medicum præsentem

esse, dum sudat talis æger, ut pro re nata judicet, quo usque pergendum sit. Hoc facto, linteis calidis deterfo corpore, in lectum calidum deponatur æger, sicque levius sudabit adhuc sæpe per unam, alteramve horam. Cum autem periculosissimum foret, si frigidus aer æstuans adeo à sudore corpus allueret, necessarium erit, ut aer loci, in quo versatur æger, satis calidus sit, quod accenso fornace commodissime fieri poterit. Ob hanc causam maluerunt alii, ut æger nudato corpore in lecto jaceat, & per infundibulum sub stragulis vapor accensi spiritus vini corpus undique foveat. Sic enim nullum periculum erit, quominus frigidus aer corpus alluat. Sive autem in lecto, sive extra hunc in cista quadrangulari, vel alia simili machina, sub craticula, ut vocare solent, sudet æger, curandum semper, ut caput emineat; aliter enim suffocationis periculum immineret. Finito sudore, datur jusculum ex macilentata carne confectum, vel & vini pauculum, ut languentes sæpe post profusissimos sudores vires refocillentur.

3. Facile patet, accelerato motu penetrabilissimum tale decoctum pelli æqualiter per totum corpus. Requirebatur autem quam maxime, ut remedii efficacia potissimum in partem affectam ageret. Quando agebatur de curatione obstructionis (vide §. 134.), dictum fuit, dari in arte auxilia, per quæ remediorum ingestorum vis pro lubitu ad partes quasdam corporis determinari posset. Illa autem erant talia, quæ liquidi vitalis impetum & copiam augerent in partibus, versus quas indicatio jubebat, derivari debere remediorum efficaciam. Hoc autem obtineri poterit, minuendo vasorum resistantiam in partibus his, & augendo circulationis velocitatem in iisdem. Fomentis mollissimis calidis applicatis, cataplasmatibus similibus, vel & cucurbitis perficitur prius; posterius frictionibus, & stimulantibus adhibitis, fiet. Pulcherrimi usus erit in his morbis pannis laneis, decocto Guajaci calido madidis, partem affectam fovere, simulque sic determinare vaporem accensi spiritus vini, ut hanc partem primo alluat.

§. 530. **H**OC modo (§. 529.) si diu continetur, sæpe multum boni fit, maxime si diæta simul tenuis, & putredini oleosæ adversa, instituitur.

Si jam omnia illa, quæ paragrapho præcedenti dicta sunt, fiant, decoctum tale penetrabilissimum, & putredini adversum, aucta circulationis velocitate, rapide movetur per omnia vasa, & imprimis in parte affecta; determinatione huc versus facta per fomenta, vaporem calidum &c. sic abluatur omne corruptum, & per sudores diffatur de corpore. Sed pertinax tale malum paucis diebus tolli posse, nulla spes est; unde aliquando per tres quatuorve septimanas eadem methodo quotidie sudores exprimi debent, habita semper ratione virium ægri. Interimque toto curæ tempore bono victu sustentandum corpus est; sed tali, qui ex eupeptis conficitur, & minime pinguibus. Hac enim methodo solent semper emaciari quam maxime ægri, omni fere pingui corporis soluto & per sudores diffato: cumque præcipua morbi malignitas à corrupto oleo pendeat, merito vitantur pingua omnia, ne morbi materiam augeant. Juscula ergo carniū, omni pinguedine sollicitè ablata, panis biscoctus, hordei, avenæ, oryza, milii decocta, panatellæ, fructus horæi bene maturi, præ-

P p p p p iij



cipue hic conveniunt. Pro potu serum lactis, vel lac tripla aquæ copia dilutum, concedi posset: præstat tamen debilius Guajaci decoctum, quod additis passulis majoribus, glycyrrhiza &c satis gratum reddi poterit.

Omnibus illis, quæ hætenus dicta fuerunt, sollicitè observatis, felix sæpe successus fuit etiam in talibus malis, ubi jam de extirpatione partis affectæ deliberabatur. Symptomatum remissio, & tumoris subsidencia, præcipua signa sunt, quibus docemur, curam recte procedere. Notandum tamen, aliquando per hæc mala sic degenerare osium fabricam, ut sæpe supersit tota vita major tumor in osse affecto, licet omnis corruptela olei medullofi felicissima curatione ablata fuerit: neque tamen multum noceat postea talis tumor, sola sæpe difformitate notabilis. Aliquando & observatum fuit, dum hæc curatio instituitur, ossis corrupti partem felicissime separari, & abscessu facto partium mollium incumbentium, educi, sequente deinde optima sanatione. Notabilis talis casus habetur in Actis Edinburgensibus (a) ubi in simili malo in puella septenni, postquam per sex menses decocto lignorum usa fuerat bis de die, & cerevisia antiscorbuticis herbis medicata pro potu communi, ossis tibiæ tota substantia abscessit, sic ut circa genu ossis sani pars relicta æquaret tantum trium digitorum transversorum longitudinem; prope malleolos autem vix dimidium hujus longitudinis superesset. Renato tamen callo tanta ossis jactura restituta fuit eo usque, ut affecto crure currere, saltare &c. potuerit absque ullo impedimento. Aliqua tantum in figura renati ossis difformitas mansit, quia innixa fuerat huic membro puella, antequam callus perfecte indurisset. Ab externa noxa ortum fuisse hoc malum credebant parentes; sed post absolutam curationem notabili jam tempore elapso, ulcus in superiori brachii parte apparuit, ex quo acutæ festucæ, ab osse humeri separatæ, brevi post emerferunt: unde patuit internæ latentis causæ prius malum potius originem suam debuisse, cum in alio loco simile renasceretur, absque ulla externa injuria.

Cum autem in junioribus sæpe occurrat hic morbus, non semper ab illis impetrari poterit, ut satis magnam similium decoctorum quantitatem potent, & sudoribus exprimendis methodo dicta vix sufficerent tenella hæc corpora. Profuit tunc, si semel in septimana daretur purgans hydragogum, reliquis autem diebus sumerent lenia antiscorbutica; pars vero affecta obvolvatur continuo penetrabilissimis fomentis ex aceto, sale, urina sana, ruta, alliaria &c. paratis. Simul pro potu ordinario serum lactis exhibetur. Sic vidi aliquoties successisse curam, postquam per plures menses similia adhibita fuissent: sed sæpe semper integumenta tunc parvo foramine aperiuntur, saniei copia quædam exit, sensimque subsidet ossis intumescencia, & aliquando etiam ossis corrupti partes exeunt, & cava admodum postea cicatrix manet. In puella, cui ossa tarsi & metatarsi pedis dextri sic affecta in maximam molem intumuerant, dein & in cubito & radio manus dextræ similis mali vestigia apparuerant, per integrum biennium in hac cura perrexi; sic tamen, ut remittente malo singulis mensibus bis, & deinde semel tantum, purgans sumeret. Pluribus in locis aperiiebantur in pede integumenta; sensim tamen sic subsedit ille tumor, ut commode incedere potuerit, quamvis naturalem magnitudinem ossa adhuc tumida excederent.

(a) Medical Essays Tom. I. n°. 13. pag. 238.

Ubi autem malum illud eo usque adolevit, ut totam fere medullam corruerit, & vitalia vasa per illam delata penitus destructa fuerint, nihil fere ab optimis etiam remediis expectari poterit. Decoctorum enim usus non proderit, cum vasorum vitalium integritas requiratur, ut ad hæc loca virtute sua medicata penetrare possint. Pessima tunc expectanda mala sunt, cum oleum corruptum, quotidie malignius factum, in cavo ossis hæreat: atque unicum in arte præsidium est, ut osse terebrato via fiat corruptæ materiæ hic stabulanti: sic enim imitatur naturæ viam, quæ eroso osse aliquando expurgat omne corruptum. Successisse hanc methodum apud optimos Chirurgos legitur. Homo lue Venerea laborans tumorem habebat in ipso tibiæ osse; post salivationem toleratam disparuit tumor, sed dolores in hoc loco non cessabant penitus, & binis septimanis post curationem absolutam augeri ceperunt. Post varia tentata remedia, ad os usque dissecta fuerunt incumbentia tegumenta, sed absque ullo levamine: post biduum trepano excissa fuit ossis pars in cavum usque, atque statim exivit olidissima sanies; patuitque, totam medullam sic corruptam fuisse: tria adhuc similis magnitudinis foramina in osse per trepanum facta fuerunt, & resectæ postea ossis inter foramina medii reliquæ, cauteriis reliquum ossis corrupti tangebatur, & cura successit. Eandem methodum simili cum eventu adhibitam fuisse in puella, testatur celebris Chirurgus *Petitus* (4).

§. 531. **S**I textura arteriosa, vel venosa, ut & lymphatica, (§ 513. § 516. § 20. § 22.) obstructa fuerit, defectu novi, vel stagnatione allati liquidi, iterum in iis partibus oriuntur similes omnino morbi ordine tantum mutato (§ 26.).

Patuit sic ex præmissis, quanta mala fiant, si medullosum oleum in suis vesiculis, vel in ossium interstitiis, stagnet & corrumpatur. Ut autem bona fiat medullæ secretio, illiusque collectæ, neque motibus corporis consumptæ, resorptio forte per venas pro parte, requiritur expedita humorum vitalium circulatio per illa vasa, quæ liquores ad medullam vehunt & reducant inde. Si ergo à quacumque causa oriatur obstructio in textura vasorum, quæ per ossium lamellas secedentes in latiori eorundem parte prope juncturas distribuuntur, si ve in illis, quæ per internum periosteum, aut membranam externe medullam ambientem, decurrunt, turbabitur secretio olei medullofi, fietque ejus jam secreti stagnatio, compressis, à vicinis vasculis obstructis & tumentibus, tenerrimis vesiculis medullaribus, illarumque emissariis. Idem continget à periosteï externi vasis obstructis: dictum enim fuit §. 520. periosteum illud, superficiem ossium convexam ambiens, excipere & transmittere omnia illa vasa, quæ vel in cellulas ossium, vel in medullam feruntur, aut inde redeunt: adeoque natum in periosteio externo vitium poterit propagari per totam ossium substantiam, atque medullam ipsam. Sola hæc tantum diversitas obtinet, quod ordine mutato mala illa procedant. Ubi enim medullosum oleum primo corrumpitur, illud in acrem saniem mutatum vesiculas, quibus continetur, illo-

(4) *Traité des Maladies des Os* Tom. II. pag. 515.

rumque texturam vasculosam erodet; hinc & medullæ membranam, periosteum internum, ossisque substantiam ipsam simili modo destruet; tandemque, eroso osse, ipsum periosteum externum afficiet, sicque ab interioribus propagabitur malum exteriora versus. Ubi autem à Periosteï externi inflammatione malum inceperit, ab exterioribus versus interiora procedit, & affecto prius osse, dein contenta ejus cavo insicit. Periosteï enim vitia statim os ipsum afficere, patuit satis ex illis, quæ in Vulnerum capitis historia (§. 249. dicta fuerunt: jam monuerat *Aristoteles* (a), siderari ossa suis membranis spoliata (Φιλόμενα τὰ ὅσα πρὸς αὐτοὺς σπασίαν). Quam cito autem à Periosteō affecto destrui possit vitalis in osse fabrica, imprimis patet in Paronychia, quando nempe validissima inflammatio in Periosteō ultimam phalangem digitorum regente nascitur, cum dolore intolerabili. Vix enim per paucas horas duravit tale malum, quin sideretur integre ultima phalanga, & postea cadat.

§. 532. **Q**UORUM (§. 531.) ergo diagnosi, prognosis, curatio, eadem (§. 529. 530.).

Cum enim textura vasorum Periosteï externi, osseæ substantiæ ipsius, Periosteï interni &c. prius affecta tandem malum ad ipsas vesiculas medullosas perveniet, ultimus effectus erit idem, & sequentur omnia illa, quæ §. 526. dicta fuerunt. Curatio ergo eadem requiratur,

§. 533. **P**ATETQUE, maximum periculi discrimen hæere in diversitate loci (§. 518. 524. 520. 522.) ubi prima mali causa ortum sedemque habet. Quibus primo præmissis clarior doctrina.

Quamvis levissima etiam periosteï externi inflammatio possit dare originem terribissimis illis malis, quæ a corrupto oleo meduloso oriantur, patet tamen satis, illam facilius curari posse, quam si periosteum internum, aut membrana medullæ ipsa inflammentur; cum in priori casu à remediis externis major spes affulgeat, & discissis Integumentis, in multis locis corporis, manibus accessus detur ad locum affectum; adeoque separatio, abstergio, & emundatio facilius perfici poterunt: Multum ergo differt, in quo loco prima mali causa ortum sedemque habeat: &, cæteris paribus, semper eo majus discrimen est, quo profundius hæreat malum. Ex illis autem, quæ hætenus dicta fuerunt, multum lucis affundetur ossium morbis cognoscendis & curandis.

§. 534. 1. **I**NFLAMMATIO ossis benignior à Periosteō externo inflammato oritur, cujus infinitæ causæ, (vid. totam histor. inflammat.) notique effectus.

2. Cognoscitur per signa inflammationis profundæ ad tactum aucta.
3. Prævidentur plurima mala (§. 531. 526.), ni ocyus sanetur.

(a) De Histor. Animal. Lib. III. cap. 13. in fine.

3. Curatur ut inflammatio, maxime id agendo, ut totum aver-  
tatur ab osse extrorsum; quod fomentis, & aliquando facta in-  
cisione fit.

1. Omnium ergo maxime benignus ossium morbus erit ille, qui à Perioste-  
o externo incipit. Dictum fuit §. 320., Periosteum externum infinitorum vasorum  
textura constare, adeoque inflammatio hic locum habere poterit (vide §. 373.  
374.), nascique ab infinitis fere causis, in historia Inflammationis ordine re-  
censitis. Nata autem inflammatione, sequentur omnes ejus effectus, atque ex-  
pectandi erunt varii ejus exitus.

2. Præcipua signa inflammationis sunt (§. vide 382.) tumor, rubedo, dolor,  
calor, pulsatio in loco affecto: si autem solum periosteum externum fuerit in-  
flammatum, neque in partibus incumbentibus simile vitium obtinuerit, patet  
facile nec tumorem nec rubedinem percipi posse, sed dolor & calor, aliquan-  
do etiam pulsatio, in hoc casu signa inflammationis erunt. Ubi autem rudius  
tangitur locus affectus, sic ut pressionis effectus ad periosteum pervenire pos-  
sit, augmentum doloris nascitur: atque hoc signo distinguitur ab inflammatio-  
ne periosteï interni, vel membranæ medullam ambientis aut medullæ ipsius.  
Uti enim dictum fuit §. 327., tunc ab actu externo non augetur dolor,  
quia omnes illæ partes duri sub ossis tegmine tuto defensæ hærent. In illis ve-  
ro locis, ubi validissimis musculis & magna pinguedinis copia teguntur ossa,  
uti v. g. circa os femoris, non nisi à valida pressione dolor exacerbat.

3. Cum enim omnia vasa, quæ ad ossis substantiam veniunt, prius per pe-  
riosteum externum transeant, & plurima ex illis innumeris ramulis per illud periost-  
eum distribuuntur, antequam ossi inserantur, patet satis, quam periculosa sit  
inflammatio hic nata. Omnia enim mala, quæ numeris hic citatis recensita  
fuerunt, à Periosteï inflammatione ortum ducere poterunt. Licet autem levis  
tantum in osse noxa fiat, terribissima tamen inde mala sæpe sequuntur. Si enim  
in parvo tantum loco os corruptum fuerit, nunquam periosteum ibi accres-  
cet, sed vicina & incumbentia ab acri sanie irritabuntur, & fient sæpe ab  
hac causa pessimæ & incurabiles fistulæ; imprimis si hoc contigerit in talibus  
locis corporis, ubi magna moles incumbentium ossa tegit, sicque impeditur,  
ne ad latentis mali originem usque sectione via tuto parari possit. Si enim v.  
g. Periosteum ossis femoris, prope ejus articulationem cum coxa, inflamma-  
tum fuerit, atque in suppurationem abiverit, patet satis, quanta difficultas cu-  
rationis futura sit, quotque mala inde nasci poterint. Vidi sic egregium juve-  
nem, post neglectam in hoc loco inflammationem profundam, ulcus sinuosum  
habuisse, quod per interstitia musculorum decurrens, quamvis postea repeti-  
tis sectionibus variis in locis exitus conciliaretur puri, nunquam tamen depu-  
rari potuit; unde, post summas miseras per annos toleratas, tandem tabe pu-  
rulenta periit. Postquam ergo per Diagnosin constitit, tale malum adesse, ef-  
ficacissima statim remedia tentanda sunt, ut resolutione curetur talis inflamma-  
tio; sicque evitetur suppuratio, adeo sæpe in his casibus periculosa; & mul-  
to magis adhuc gangræna.

4. Omnia ergo illa, quæ in curatione inflammationis resolvable commenda-

Qqqqq

ta fuerunt §. 395. 396. 397. 398. 399. 400., ilico adhibenda sunt : cumque imprimis hic metuatur ossis suppositi corruptio, illud tentandum est omni artis molimine, ut extorsum avertatur malum. Conducent ergo imprimis illa, quæ §. 396. n°. 4. laudata fuerunt : mollissima hinc fomenta, & cataplasmata parti affectæ noctes diesque applicanda, curando, ut semper calida maneant; sic enim externa integumenta flaccescent, atque impetrabitur aliquando, ut huc versus deriveretur inflammatio, longe minus nocitura, quam si subiectum os ab eadem afficeretur: Plurima postea in morborum acutorum historia occurrent exempla, quibus constat, inflammationem, interius profunde delitescentem, sic posse versus exteriora derivari summo cum levamine. Dixerat Hippocrates (a) : *Ab angina detento, si tumor & rubor in pectore oriantur, bonum; foras enim vertitur morbus.* Unde prudentes Medici solent mollissimis fomentis externas partes fovere, imo aliquando & sinapismis irritare, felici toties cum successu. In molestissimo Ischiadico dolore Hippocrates (vide Commentaria §. 229. 1.) balneis, fomentis, linimentis partem emolliiri voluit. Cucurbitulis admotis foras attrahere iussit alibi (b). In sævissima odontalgia ilico solet levamen observari, dum tota facies in latere affecto inflata tumet.

Ubi autem his frustra tentatis nullum levamen observatur, superest tantum, ut ad os usque omnia simul & semel dissecentur, si conditio loci hoc permittat. In acutissima paronychia, quæ plerumque ab inflammatione periostei ultimæ phalangæ digitorum, aut tendinis affixi, nascitur, nisi audacter ad os usque incisio fiat cito, sideratur os, & extrema phalanga cadit, post summos dolores toleratos, & sinuosa ulcera, quæ sæpe omnia vicina depascuntur, & manum totam dein rigidam & immobilem reddunt. Tempestiva sectio omnia hæc mala præcavet. In dolore ischiadico, fomentis, balneis, cucurbitulis &c. frustra adhibitis, profunde partem inuri debere Veteres Medici omnes voluerunt. Quantum boni faciat sectio integumentorum cranii, ubi post contusiones aut vulnera metus est, ne calvariæ os afficiatur, in Vulnerum capitis historia dictum fuit.

§. 535. **T**ALEM inflammationem vergere in abscessum docent : 1. signa valida inflammationis prægressæ ( 534. 2. ) 2. pulsatio, febris, horripilatio vaga. 3. absentia signorum resolutionis ( 386. ).

Quamdiu aliqua spes est, inflammationem periostei externi resolutione curari posse, omnia illa, quæ præcedenti paragrapho dicta fuerunt, tentanda erunt. Ubi autem in suppurationem vergit malum, alia quædam requiruntur. Sequentia autem docebunt, abscessum expectandum esse.

1. Levem inflammationem curari posse resolvendo spes est; ubi autem symptomata omnia vehementia sunt, & augentur continuo, optimum, quod sperari poterit, suppuratio est. Dolor ingens, caloris validi perceptio, & acuta febris, præcipua signa sunt, quibus docemur, profundam talem inflammationem irresolubilem esse, atque in abscessum vergere.

(a) Aphor. 49. Sect. VII. Charter. Tom. IX. pag. 318.

(b) De Locis in Homine. cap. 9. Charter. Tom. VII. pag. 368.



2. Ubi inflammatio tendit in suppurationem, solent pleraque ejus symptomata augeri. Pulsatio ergo major erit, & distinctius percipietur in loco affecto; febris aderit plerumque, cum suppurationis comes sit, si alicujus momenti fuerit. Præcipuum signum dat horripilatio vaga; quæ dum adest, semper suppurationis, etiam in corporis interioribus delitescens, suspicio nascitur. Sentiant ægri tunc, ac si aqua frigida per fuso corpore horrescerent, perfecte fere ut in febrium intermittentium initio fieri solet: sed mox evanescit talis horripilatio, & postea nullo ordine servato redit. Docuerunt jam Observationes practicæ, tales horripilationes vagas tunc adesse, quando inflammatio alicujus momenti in suppurationem transit.

3. Signa resolutionis paragrapho in textu citata explicata fuerunt. In his autem calibus, recens malum, dolor mitis, febris parva, & moderati tantum caloris sensus in parte affecta, spem resolutionis faciunt. Si ergo contraria his adfuerint, abscessus, vel gangrænæ, metus erit.

§. 536. **R**E autem ipsa adesse docent signa suppurati profunda (387. 405.).

Nisi ex præcedentibus constiterit, prægressam fuisse validam inflammationem; non adeo facile abscessus hanc sequens cognosceretur. In abscessu, qui verius superficiem corporis hæret, mollities partis, fluctuatio puris contenti, albitudo &c. evidentiæ satis signa sunt, uti in Commentariis §. 405. explicatum fuit. Ubi vero malum hæret circa talia ossa, quæ magna incumbantium mole reguntur, difficillime latens abscessus detegitur. Aliquando enim parca tantum copia puris inter os & periosteum collecti nullum tumorem sensibilem facit. Sæpe etiam accidit, non remitti dolorem in hoc casu, pure quamvis factu, quia illud sensim copia auctum, nisi periosteum jam exederit, inter illud & suppositum os viam sibi facit, sicque lenta dilaceratione periosteum ab osse divellit, unde acerbissimus dolor oritur. Non mirum ergo latens sæpe malum etiam peritissimos fallere, neque cognosci nisi serius, corrupto jam osse, vel pure, rupto periosteum, per vicina loca diffuso, & pessima ulcera sinuosa faciente. Ubi autem circa spinam tibiarum abscessus hæserit, satis facile cognosci poterit. In aliis vero locis fere tantum novimus abscessum factum esse, quia præcesserunt talia signa, ex quibus abscessum fieri concluditur.

§. 537. **T**UM pus, exeso periosteum, os nudabit, vasis privabit, corrumpet, (531.) brevi, confert 406.

In suppuratione, uti dictum fuit §. 387., vascula inflammatoria materia non solubili infarcta rumpuntur: cum ergo hoc in suppuratione periosteum sit, tollitur vitale commercium in illa parte ossis suppositi, quæ à vasis per suppurationem jam destructis humores suos recipiebat, adeoque necessario sequetur noxa in osse ipso. Præterea pus illud, in loco profundo hærens, sensim acrius fiet, & superficiem ossis contiguam erodet, adeoque omnia mala brevi augebuntur: idemque mole auctum, nisi periosteum exeso per vicina loca dispergatur, magis magisque separabit periosteum cum osse cohesionem, uti modo dictum fuit, adeo-

Q q q q ij

que major ossis pars nudabitur suo periosteo, & corrumpetur. Præter hæc mala, quæ à suppuratione periostei in osse subjecto contingunt, metuenda erunt adhuc omnia illa, quæ a pure diu in loco clauso relicto, & corrupto aliquando observata fuerunt. De his videantur illa, quæ in Commentariis §. 406. dicta fuerunt.

§. 538. **Q**UARE ilico abscessus aperiendus, pus eliciendum, ulcus mundandum, (403. 404. 409. 410. 411.); dein simul os tractandum iisdem cautelis, ac in vulneribus Capitis cum cranio detecto dictum (252. 253. 259. 260. 261. 266.).

Ut omnia hæc mala vitentur, & curari possint illa, quæ jam adsunt, nihil superest quam audacter incidere omnia incumbentia, ut puri exitus fiat, & accessus detur ad os affectum. Difficile sæpe, imo & periculosum est, profundam talem sectionem facere, sed, uti optime Celsus (a) de membrorum extirpatione dixerat: *nihil interest, an satis tutum præsidium sit, quod unicum est.* Cum vero in talibus casibus & medentium fama, & ægri vita, sæpe periclitentur, summa prudentia opus erit. Anatome magnorum vasorum & reliquarum partium, quæ vitari debent, situm demonstrat: notandum tamen, magnam sæpe varietatem decursus vasorum in diversis hominibus observari; adeoque in difficillimis casibus præstat, cute & pinguedine prius dissectis attendere, an & quomodo ulterius tuto pergi possit, quam simul & semel cultellum ad os affectum usque adigere. Accidit enim sæpe, integumentis communibus dissectis, pus rupto periosteo, per vicina loca diffusum viam invenire, qua exeat, & monstrare semitam, qua tuto sinuosi ulceris dissectio fieri possit, & ad locum affectum perveniri. Omnia illa, quæ de curatione abscessus numeris hic citatis dicta fuerunt, pariter observanda erunt. Cumque plerumque in his casibus sinuosas vias pus sibi fecerit, & sordida sint illa loca, quæ pus alluit, imprimis si diutius relicta fuerint, blanda detergentia solent injici, qualia imprimis ex aloë, myrrha, mastiche, sarcocolla &c. sunt, additis melle, terebinthina, & vitello ovi: hæc enim sufficient indicationi, quæ ulcus mundari præcipit, interimque ossi affecto proderunt. Omnia etiam illa, quæ in historia Vulnerum capitis dicta fuerunt de curatione Cranii, quando illud pericranio orbatum erat, locum habebunt in his casibus, ubi post abscessum periostei os nudatur. Hæc numeris hic citatis videri poterunt.

§. 539. **V**ERGE RE autem illam inflammationem (534.) in gangrænam partis, docent: 1. signa summæ inflammationis (388. 422.) 2. indolentia partis sine bona causa. 3. Tumor densus, lentus, nec multum dolens incumbentium.

Quando in Historia Inflammationis dictum fuit de vario ejus exitu, notabatur; gangrænam post illam sequi aliquando; & §. 388. descripta sunt signa, quibus

(a) Lib. VII. cap. 33. pag. 492.

futuram prævidere, & præsentem cognoscere possemus. Verum inter illa signa quædam erant, quibus in parte corporis externa gangrænam adesse significabatur, per quæ tamen gangræna Periosteï in profundo latens distingui nequit. Bullulæ enim Epidermidis, color lividus, fuscus, niger &c. non adtunt, nisi omnia jam corrupta fuerint. Agitur autem hic de illis signis, quibus gangræna Periosteï cognosci possit, licet incumbentes huic partes nondum simili labe affectæ fuerint.

1. Summam inflammationem adesse ex vehementia symptomatum, illorumque subito augmento, cognoscitur. Præcipua signa inflammationis Periosteï, uti dictum fuit §. 534. n°. 2., sunt dolor, calor, & pulsationis profundæ sensus; quæ ergo omnia si admodum valida fuerint, & subito increfcant, merito gangræna metuitur.

2. Quam fallax sæpe signum sit doloris absentia subita in validis inflammationibus, dictum fuit §. 388. & §. 427. n°. 2. Atque ibidem datæ fuerunt rationes, quare, destructis per validam inflammationem partibus, doloris cessatio sequatur. Idem ergo & in hoc casu locum habebit. Ubi inflammatio curatur per resolutionem, dolor quidem minuitur, sed sensim & per gradus; neque summam inflammationem unquam bona resolutio sequetur, uti patet ex illis, quæ §. 386. dicta fuerunt. Quando ergo sine bona causa, id est, absque signis resolutionis, post summam inflammationem subita doloris ablatio sequitur, pessimum signum est, & semper gangrænam inflammationi successisse indicat.

3. Propagatur tunc labe per partes incumbentes, atque imprimis afficitur panniculus adiposus, qui levibus sæpe de causis in maximum tumorem attollitur. Cum autem omnia symptomata inflammationis fere cessent, ubi gangræna adest, tumor ille non habebit duritiem illam & renitentiam, quam observamus in Phlegmone, sed flaccidus erit, vix dolens, semperque in hoc casu designat, panniculum adiposum pariter jam gangrænosum fieri. Videantur & illa, quæ in Commentariis §. 427. n°. 4. dicta sunt.

§. 540. **A**DESSE jam, scimus ex iisdem (§. 539.), tum ex colore incumbentium pallido, cineritio, livido.

Ubi enim illa signa, quæ docent, inflammationem Periosteï vergere in gangrænam, manent vel augentur, novimus satis, illam jam adesse vel brevi futuram. Mutatus color integumentorum (de quo vide §. 388. & 427. n°. 3.) designat, gangrænam in Periosteï inceptam jam propagari per incumbentes partes. *Ex osse egrotante caro livida malum (a).*

§. 541. **T**UM Os nudum, vasis, succoque vitali orbis, acri putrefacta materie gangrænosa exeditur in cariem (§. 526.), serpit cito contagio crescente.

Corrupto enim per gangrænam Periosteï, omnis vitalis influxus & effluxus humorum tollitur in illo ossis loco, cui Periosteï pars, jam corrupta, solebat prospicere, adeoque extima lamella ossis morietur. Vasa media inter hanc & sequentem lamellam à vasis Periosteï interni per ossis substantiam dispersis, vel à

(a) Hippocrat. Aphor. 2. Sect. 7. Charter. Tom. IX. pag. 293.

vasculis inter lamellas ossis decurrentibus, & à vicino Periosteo externo adhuc sano derivatis, vitales humores poterunt recipere: sed mortua pars his incumbens brevi suffocabit & in illis vitam, & tabus gangrænosus mortuarum partium erodet omnia, unde pessima caries in osse nascetur. Omnibus jam incumbentibus una cum osse ipso corruptis, adest sphacelus, uti ex ejus definitione §. 419. & 420. data patet. Verum à sphacelo vicinorum cita infectio sequitur (vide §. 432.), adeoque patet ratio, quare hoc malum contagio cito crescente serpat.

§. 542. **E**RGO statim locus affectus ad Os usque incidendus, mundandus, Os vero curandum ut supra dictum (248. 249. 252. 258. 259. 260. 261. 262. 266.).

Tota spes curæ in eo consistit, ut, si adhuc aliquid vitalis in ossis substantia superest, illud liberatum à mortuo incumbente separet corrupta, & retexat perditam substantiam: vel, si jam per totam ossis crassitiem mortua sint omnia vasa, facta apertura in osse ipso via fiat, qua medulla corrupta expurgari queat. Impossibile enim est, in tali casu, medullam bonam manere posse, dum tota ossis substantia mortua est. Debet ergo statim, incisione facta ad os usque, detegi latens malum: neque adeo crudele hoc erit, cum plerumque omnia incumbentia gangrænosa sint. Merito ergo de horum malorum cura agens *Celsus* (a) dixit: *Oportet autem ante omnia Os nudare, ulceri exciso, & si latius ejus vitium est, quam ulcus fuit, carnem subsecare, donec undique Os integrum pateat.* Si enim, uti dictum fuit §. 534. n°. 4., aliquando incisione opus sit vivarum partium Periosteum inflammato incumbentium, ut ab osse avertatur malum, longe magis necessarium erit talem sectionem facere, quando gangræna jam adest, ipsiusque ossis corruptio. Nulla enim depuratio poterit fieri ossis affecti, nisi via prius extrorsum pateat.

Sectione ergo facta, interponuntur plumaceola siccissima vulneris labiis, quæ in diem sequentem relicta, madefacta ab affluentibus humoribus, tument, magisque dehiscere faciunt vulneris aperturam, sicque hoc facto patebit oculis nudum os, poteritque ex mutato ejus colore, asperitate &c. cognosci, qualis & quanta corruptela adsit. Videantur de his illa, quæ in Commentariis §. 249. dicta sunt. Videtur & *Hippocrates* probasse hanc curandi methodum (b). Ubi enim agit de encephali sphacelo, describit ipsius calvariae corruptelam, (uti alia occasione in Commentariis §. 432. dictum fuit) habetque sequentia: *Si fideratio invaserit, dolor paulatim anteriorem maxime capitis partem detinet, & intumescit, & liquet, febrisque ac rigor prehendit. Quum sic habuerit, secare oportet, qua parte tumuerit, & os perpurgatum radere &c.* In *Vulnere Capitis* historia dictum fuit, de pulcherrima illa methodo, qua minimis cuneolis leviter perterebrabatur calvariae os, ut vasis vivis suppositis via fieret, sicque citius & melius separaretur ossis corrupta pars, & regeneraretur perditam substantiam: in aliorum Ossium similibus Morbis hanc methodum prodesse posse, facile patet. Sed ut inde aliquid boni sperari possit, nondum tota ossis substantia corrupta esse debet, sed sub parte mortua vitalia adhuc vasa requiruntur. Ubi ergo os, incisione detectum,

(a) Lib. VIII cap. 2. pag. 108.

Tom. VII. pag. 559.

(b) De Morbis Lib. I. cap. 8. Charter.

penitus corruptum invenitur, ferro vel igne tollendam partem mortuam jussit *Celsus* (a); & post illum celebres Chirurgi. Quantum autem etiam in his casibus valeat natura, bono victu & idoneis remediis adjuta, patuit in *miro* illo casu, cujus in Commentariis §. 530. mentio facta fuit. Maxima enim pars ossis tibiæ abscessit sensim, &educta fuit; posteaque renatus fuit callus adeo firmus, ut ægra incedere, currere, & saltare potuerit, absque ulla noxa.

§. 543. **S**I Periosteum internum ( §. 522. ) inflammatur, causas agnoscit easdem ( §. 534. ); effectusque habet, quoad os internum, eisdem; exitum in abscessum, aut gangrænam eundem ( §. 535. §. 539. ); sed ob denegatam exhalationem, pejorem; unde medulla tota, totum inde os, foetidissima putredine, & carie pereunt.

Periosteum illud internum, Ossium concavam superficiem regens, de quo §. 522. dictum fuit, tutius defenditur, quam Periosteum externum, adeoque rariores in illo occurrent morbi. Cum autem & hæc membrana vasculosa sit, inflammationis causæ plurimæ & hic adesse poterunt, adeoque & varii inflammationis exitus. Uti jam Periosteum externum innumera vascula per ossis substantiam distribuit, atque inde redeuntia recipit; sic & hoc obtinere videtur in Periosteio interno. Cumque vitia Periosteii externi os ideo imprimis afficiant, quod destructis vasculis his vitalium humorum circuitus per ossis substantiam tollatur; idem verum erit & in morbis Periosteii interni. Adeoque poterit interna ossis superficies corrumpi, licet externa ejusdem pars adhuc sana maneat. Videtur hoc confirmari observatione *Ruyfchiana*, de qua in Commentariis §. 522. dictum fuit. In ossis enim cubiti cavo fistula ossea, integre separata ab ejusdem substantia exteriore, libera & mobilis hærebat. Unde sicut in calvariæ osse pericranii vasa externæ tabulæ prospiciunt, duræ matris vero vasa internæ tabulæ; ita & fere in ossibus majoribus cavis obtinet: atque uti in diploë, inter binas cranii tabulas media, hæc vascula pericranii & duræ matris concurrunt, ita forte & in media ossium substantia simile quid sit. Os humeri servavit *Ruyfchius* (b); in quo osseo-spongiosa substantia, tanquam in diploë cranii, reperitur inter duas lamellas, seque hoc in nonnullis ossibus observasse affirmat; atque inde explicat, quomodo tubulus talis osseus ab externa parte ossis separari posset. Alibi (c) idem Auctor similem casum habet, quo modo dicta confirmantur. Ex osse enim tibiæ, inveterata carie corrupto, naturæ vi emerit frustum osseum teres & cavum, cujus figuram in tabulis suis expressit. Omnia ergo mala, quæ ossibus accidunt à Periosteio externo inflammato, suppurato, aut gangrænosio, similiter fieri poterunt, si Periosteum internum iisdem afficiatur morbis. Si autem consideretur, omnem corruptelam inde natam in medio ossium cavo hære, nullamque dari viam, qua exire possit, patet evidenter, longe magis metuendos esse illos morbos, qui Periosteio interno accidunt; brevi enim medulla inde corrumpetur, fientque omnia illa mala, quæ §. 526. enumerata fuerunt.

(a) Lib. VIII. cap. 2. pag. 509.

(b) Thesaur. X. n.º 176. pag. 69.

(c) Muszi Anatom. pag. 172. & Thes. VIII. n.º 8. Tab. 3. fig. 2. 3. 4.



§. 544. **U**NDE etiam liquet, siue membrana hæc (§. 522.) primo ipsa inflammetur, siue à corrupta prius medulla contagio suscepto læsa sit, eundem brevi oriri morbum Ossis cariosi à medulla putrefacta, vix unquam curabilem.

Periosteum enim internum concavam ossium superficiem tegit, & membranae communi, quæ medullæ folliculos collectos ambit, contigua est. Unde facile patet, inflammato Periosteio interno, brevi debere medullam affici. Si enim hæc inflammatio in abscessum vel gangrænam terminetur, evidens est, pus vel saniem debere tenerrimam medullæ fabricam erodere; adeoque illam corruptam fore brevi, & secutura esse omnia illa mala, quæ §. 526. recensita fuerunt. Difficultas curationis patebit ex illis, quæ in Commentariis §. 528. dicta sunt. Neque facile credo quis distinguere posset, an membrana medullam ambiens, aut medulla ipsa, an vero Periosteum internum inflammatum sit; cum in utroque casu signa profundæ inflammationis adsint, neque attactu rudiori augeatur dolor; atque effectus similis sit, nempe caries ossis, & medullæ pessima putredo, Unde & eadem medela requiritur, uti statim dicetur.

§. 545. **C**OGNOSCITUR id malum, quando in inflammatione subsistit hætenus: 1. à signis inflammationis generalibus (§. 382.); 2. à loco profundo: 3. à dolore obtuso, fixo, diuturno, nulli remedio externo cedente, nec ad attactum aucto; 4. sed post motus musculares incrementum.

Cum plerumque sero tantum cognoscatur hoc malum, ex pessimis nempe effectis, sedulo investigari debent illa signa, quibus hoc detegi in ipso initio posset: quod tamen satis difficile videtur.

1. Cum pleraque signa inflammationis, numero hic citato descripta, in locis externis corporis tantum observari possint; solus tantum calor, & dolor, atque febris inflammationis plerumque comes, si alicujus momenti fuerit, tanquam signa hujus mali considerari poterunt. Pulsatio enim in loco tam profundo vix percipietur, imprimis, quia vascula Periosteii interni tenerrima sunt.

2. Si jam hæc inflammationis signa adsint, neque tamen in externis partibus aliquid mali percipiat, magna suspicio est in intimis Ossium recessibus hære morbum.

3. Solent tales ægri conqueri, quod sentiant ossa ab interioribus extrorsum quasi diffindi. Dolor ille fixus in eodem loco manet, obtusior quidem, sed molestissimus, cum nec mutato partis dolentis situ, neque ullis fomentis, cataplasmatibus &c. mitigetur; interimque attactu quamvis rudiori non exasperetur. Ratio facile ex ante dictis patet.

4. Patuit ex illis, quæ in Commentariis §. 524. dicta fuerunt, oleum medullare ex cavis Ossium transire posse in articulorum cava Ossium mobilium extremis & ligamentis articulorum inungendis & lubricandis inserviens, sicque consumi per auctos motus corporis. Unde ergo per hos motus stagnantia in Ossium

sium cavis deducuntur in motum, & tardius mora celerius agitantur. Proinde si dolor adsit ab inflammatione in Periosteo interno, vel & in membrana medullari, evidens est, accelerato per has partes humorum motu, illum debere augeri. Istud doloris augmentum semper agri ab hac causa sentiunt, uti etiam si vini vel aromatum copioso usu incaluerint.

§. 546. **S**ANATU R tum : 1. curatione ad inflammationem generali (à 395. ad 401.) deinde, simulac apparuerint resolutionis incipientis signa (386.). 2. methodo proposita (529.), stricte satis observata.

1. Illa inflammationis curatio, quæ per resolutionem fit, omnium maxime optabilis est, semperque quærenda (vide §. 401.): verum in hoc casu difficillime obtineri poterit. Raro enim primis diebus talis morbi Medici consuluntur, cum obtusus dolor & profundissime hærens vel negligatur sæpe in initio, vel externis remediis, vix profuturis, tentetur. Quantum autem conducatur ad resolutionem inflammationis, ut morbus recens sit, patuit ex illis, quæ ad §. 386. dicta sunt. Præterea fomenta, frictiones, balnea &c., quæ tanti usus sunt in hac inflammationis curatione, ad partem affectam minime perringere poterunt. Unde nihil hic superest, quam venæ sectione & purgantibus antiphlogisticis impetum & copiam liquidi arteriosi minuere, & victu tenui, remediisque diluentibus & attenuantibus uti.

2. Si symptomata inflammationis post hæc remedia adhibita minuantur quidem, neque tamen integre cessent, non licet acquiescere, sed omni artis molimine tentandum est, ut integra curatio fiat. Minimum enim in hoc loco relictum malum pessimorum & incurabilium sæpe morborum origo postea esse poterit. Adeoque licet sedata fuerit inflammatio, præstat tamen methodum illam adhibere, quæ §. 529. explicata fuit, ut minimæ etiam prioris mali reliquæ tollantur. Cum autem in hac methodo, repleto prius per decocta lignorum corpore, febris artificialis excitetur, patet facile, hanc tentari non posse, priusquam cura inflammationis prægressa fuerit, aliter enim omnia in pejus ruerent.

§. 547. **S**I vero suppuratio hic, vel gangræna acciderit, & per prægressæ inflammationis internæ signa (245.) valida, tum ex dolore fixo, profundo, obtuso noscitur, vel methodus (529.), vel nihil sanat.

Ubi autem remedia, inflammationi per resolutionem curandæ propria, vel non adhibita fuerunt, vel sero; aut tam valida fuerit inflammatio, ut omnibus his, licet tempestive adhibitis, resolvi non potuerit, expectandi sunt alii inflammationis exitus, suppuratio nempe vel gangræna. Cum vero puri vel gangrænosus tabo, hic collecto, nullus detur exitus, patet satis, quanta mala metuenda sint. Cognoscitur, hos inflammationis exitus adesse, ubi signa resolutionis abfuerint, & dolor fixus, profundus, & obtusus adsit. Unica tunc curæ spes superest in methodo illa §. 529. descripta, ut nempe abluatur omne corruptum. Si vero neque sic curari possit malum, & incisione incumbendum partium

R r r r

tuto possit fieri via ad os affectum, terebra illud perforandum erit in cavum usque, ut exire possit corrupta sanies. Felici cum successu hoc factum fuisse aliquando, patet ex illis, quæ ad §. 530. dicta fuerunt. Tentata fuit aliquoties salivatio, per argentum vivum excitata, in his casibus nunquam tamen illam profuisse vidi: adeoque satis patet, ab aliis remediis nihil boni expectandum esse.

§. 548. **T**UM enim putrefacta tota mole Ossi interna, tumefacto, inflammato, carioso interno Osse, Periosteum externum inflammatur, distrahitur à tumore, eroditur ab acri, incumbencia, lento contagio corrupta, spongiosa fiunt, tument, dolent, totum membrum perit: sola Exstirpatio sanat.

Pus enim in loco clauso calido retentum attenuabitur, putrescet, acre fiet (vide §. 406.), Gangrænosus tabus, si adfuerit, longe citius adhuc in pessimam indolem degenerabit. Oleum medullosum, corrosis vesiculis illud continentibus, effusum stagnabit, & acrimoniam rancidam, qua nulla pejor est, acquirere. Adeoque brevi totum ossis cavum putridissima sanie & acerrima replebitur. In casu illo, in Commentariis §. 530. memorato, dum trepano perforabatur tibiæ os, putridissima sanies exibat, & apparuit evidenter, totam medullam sic corruptam fuisse. Concava ergo ossis superficies ab acri hoc ichore erodetur, vascula inter lamellas ossis media inflammabuntur, lamellæ antea contiguæ separabuntur, fiet tumor in ossis substantia, tandemque erodentur. Dum autem hæc fiunt, novi dolores oriuntur: Corruptis enim omnibus partibus, quæ ossis affecti cavo continentur, dolor, qui prius aderat, cessat sæpe, vel saltem admodum obtusus manet. Verum ubi periosteum externum, quod adeo sensibile esse novimus, incipit distrahi à tumore ossis, vel erodi ab acri sanie huc usque jam penetrante, acerbissima tormenta patiuntur ægri: incipiunt tunc partes molles ossis incumbentes affici, & lento contagio corrumpi. Oriunturque tumores harum partium, & imprimis in panniculo adiposo, satis magni, sed spongiosi, & tactui cedentes. Sensim sic versus exteriora malum propagatur; corrumpuntur omnia, & totum membrum perit. Ultimo enim omnibus, una cum osse ipso, mortuis verus adest sphacelus, quem sola exstirpatio sanat. In gangrænis pessimis, validissimisque contusionibus, licet plurimæ partes destructæ forent, semper fere aliqua adhuc spes aderat, sub mortuis partibus hæreere viva vasa, quorum opere corruptum separari, & perditum regenerari posset. In hoc vero casu non afficiuntur partes molles, nisi ossa supposita prius omnino corrupta fuerint.

§. 549. **Q**UALITAS venerea, scorbutica, rachitica, est causa frequens: inde intelligitur, quid sit gummi, tophus, nodus, exostosis, abscessus, caries, spina ventosa in osse?

Licet autem inflammatio periosteï interni, membranæ medullam ambientis, & folliculorum medullosum oleum continentium, possit nasci ab omnibus fere causis, quæ inflammationem in aliis locis corporis producere valent; tamen, cum adeo tuto defensæ lateant hæc partes, rarius à communibus causis hic inflammatio oritur. Sed observatum fuit, in quibusdam Morbis natam in sanguine cacochymiam versus ossa potius deponi, atque illorum fabricam corrumpere. Tales sunt imprimis

**QUALITAS VENEREA.** Frequentissimis Observationibus constitit, uti postea latius in Luis Historia dicetur, subtilissimum illud contagium, sanguini mistum, dein ad varia corporis loca deponi, atque ibi sensim erodere omnia; simulque tali prædictum esse efficacia, ut humores sanos corrumpat, & in suam naturam convertat sic, ut ab illis iterum similia mala, in vicinia loci affecti non tantum, sed & in distitis partibus, oriantur. Patebit etiam postea, virus illud oleosis & mucosis nostri corporis humoribus quam maxime intricari: non mirum ergo erit, si pingui oleo, sive per ossum substantiam disperso, sive in illorum cavis collecto, se insinuet, & deinde lenta erosione, ut solet, corrumpat omnia. Omnium pessimi ossum morbi à Lue Venerea frequentissime nasci observantur: imprimis si diu in corpore jam hæserit, altasque radices fixerit; rarius enim à recenti hoc malo ossa inticiuntur. Oriuntur tunc dolores illi pertinacissimi, sæpe nullis remediis cedentes; aliquando tamen, post curam per salivationem, vel per decoctum Guajaci, mitiores facti, recrudescunt postea. Quomodo ipsa ossum medulla à Venerea Lue corrupta fuerit, patuit ex illo casu, cujus in Commentariis §. 330. mentio facta fuit. Innumeris autem fide dignissimorum Auctorum Observationibus confirmari posset, ossa pessime à Lue affici sæpissime. Costas, sternum, claviculas inde exetas vidi, Vertebrae colli erosas ab ulcere Venereo pharyngem depascente, totam tabulam anteriorem ossis brengmatis dextri cariosam factam cecidisse memini &c. Hæc sufficient, ut probetur, Veneream Luem satis frequentem causam dare Ossium morbis.

**SCORBUTICA.** Prima fere Scorbuti signa circa gingivas & dentes apparent, notissimumque est, ab hoc morbo cariosos dentes tactos frustillatim excidere non tantum, verum etiam maxillam ipsam in parte sua ossea pessime aliquando affici. Ulcera illa pertinacissima erurum, quæ scorbuticis adeo frequentia sunt, sæpe Ossium cariem comitem habent. Quin imo in pessima scorbuti specie omnia ossa cariosa inventa fuerunt (a). In magno Militum ab hoc morbo defunctorum numero invenit *Peritius* (b) periosteum in plurimis corporis locis integre solatum fuisse ab ossibus, atque sub periosteo hæsisse lympham fuscam, vel & nigricantem sætoris intolerabilis. Unde satis patet, quam funestum ossibus malum scorbutus sit, imprimis si inveteratus fuerit morbus; tunc enim & dolores ossium nocturnos imprimis, & plurima alia signa cum Lue Venerea communia habet.

**RACHITICA.** Quando postea de Rachitide peculiari Capitulo dicetur, patebit, illum morbum magnam cum scorbuto affinitatem habere, & sæpe non carere suspitione lenis Labis Venereæ admixtæ: omnium frequentissime enim infestat tales infantes, qui geniti sunt ex parentibus Labi Venereæ & iteratis Gonorrhæis olim obnoxiiis. Videmus autem, ossa in hoc morbo pessime affici: dentes enim nigrescunt, & cariosi excidunt, epiphyse protuberant, & levi vi solvantur ab ossibus, quibus cohærent, & in pejori hujus morbi gradu sæpe caries ossium & spina ventosa observantur.

Ex hæcenus dictis intelliguntur sequentes Ossium Morbi.

**GUMMI.** Sic solet vocari Tumor, ex ipsa ossis substantia enatus; talis tenacitatis & molliciei, ut digitis cedat, fere uti solent gummi ex arboribus

(a) Académ. des Sciences l'an 1699. Mem. pag. 241.

(b) Perit, Traité des Maladies des Os, Tom. II. pag. 369.

stillantia, & concreta, dum radiis solaribus mollescunt, vel nondum perfectam duritiem acquisiverunt. In Lue Venerea laborantibus satis frequenter tales tumores in capite, uti etiam in media & solidissima parte majorum Ossium, observantur. Videntur autem hi tumores heri, quando vascula inter lamellas, ossium substantiam constituentes, decurrentia, obstructa vel inflammata dilatantur, & lamellas incumbentes elevant. Forte etiam in his tumoribus ipsa ossis substantia proprie dicta, naturaliter adeo dura, in molliem præternaturalem & morbosam degenerat. Docuerunt mirabilia observata, à latentibus sæpe causis ossium compagem sic mollescere posse. In Commentariis §. 512. ex *Petii* Observatione dictum fuit, femoris ossis caput, & ossis ischii cavum in carneam molem mutata fuisse, quæ levi etiam tactu sanguinem funderet. Apud eundem Auctorem plures alii casus habentur (a), quibus probatur, ossa sic emolliri quandoque (cartilagine autem, quibus ossa hæc emollita tegebantur, naturalem duritiem retinuerant). In omnibus his casibus tamen ossa tantum in quibusdam corporis locis amiserant suam consistentiam: mirabilis autem observatio docuit, omnia sic mollescere posse. Fœmina viginti & duos annos nata, post febrim incepit validos dolores per totum corpus pati, deinde pedibus insistere non potuit amplius, & optime formati corporis figura mutabatur, simulque corporis statura sic decrescebat, ut novemdecim mensium spatio integro pede brevior facta fuerit. Non poterat misera loco moveri, quin ossa incurvarentur: tumebat toto corpore, cutisque dura, & longe crassior solito, fiebat: interim avidè manducabat. Post mortem inventa fuerunt omnia corporis ossa, dentibus solis exceptis, molliæ ceram superare, poterantque facilius scindi, quam carnes. Nulla erat in ossibus his emollitis cavitas, neque medullæ vestigium. Reliquæ omnes partes corporis naturaliter se habebant (b). Patet ergo ex his omnibus, posse in morbis emolliri ossa, atque frequenter observatum simul fuisse, ossa sic emollita in quibusdam locis, à topico malo, simul intumuisse, unde origo horum tumorum apparet.

Simul constat ex dictis, Ossium illam molliem aliquando post abscessus vicinarum partium sequi, quandoque in ipsa ossium substantia mali hujus originem esse, & imprimis dum Lues Venerea ossibus hæret. Interim tamen etiam simile malum in ossibus observatum fuit, licet nulla causa detegi potuerit. An acida sanguinis cacoehymia ossium molliæ causa aliquando esse posset? Videmus in debilibus pueris, quorum victus pro maxima parte ex acescentibus constat, interimque vires valorum & viscerum tam debiles sunt, ut chyli, ex ingestis nati, indolem superare nequeant, Rachitim toties nasci, & ossium nimiam flexilitatem. Dum liquor, in quo servabat fœtum humanum *Ruyschius*, acidior justo factus erat, costæ sic emollitæ fuerunt, ut illas vario modo flectere non tantum, verum funiculi instar in nodum torquere potuerit (c).

**T O P H U S, N O D U S.** Quando tumor talis in osse natus durior est, quam gummi, mollior tamen adhuc, quam os ipsum, cui adhæret, tophus vel nodus vocatur. Solebat *Celeberrimus Boerhaavius* tophos comparare cornubus vitulorum, dum adhuc sub cute hærent; nodos vero iisdem, quando jam extra cu-

(a) Ibid. pag. 420. &c. Académ. des Sciences l'an 1712. Mem. pag. 311.

(b) Ibid. l'an 1700. Histoire pag. 46. 47.

(c) Ruysch. Thes. IV. n°. 38. pag. 174. Thes. VI. n°. 13. pag. 11.



tim prominebant, & tamen nondum cornu duritiem habebant. Unde patet, tophum & nodum non differre à gummi, nisi tantum majori firmitate.

**EXOSTOSIS.** Sic solet vocari tumor ossium, qui duritie os ipsum aequat, vel & superat. Aliquando totum os, in omni sua parte mole auctum, facit exostosum, quod in ossibus carpi & metacarpi, tarsi & metatarsi, & in digitorum phalangis quandoque observatur. In majoribus ossibus hoc rarissime accidit, sed plerumque quædam tantum horum pars in talem tumorem elevatur. Ossium nutritio & incrementum, & restitutio perditæ ossium substantiæ, de quibus in Vulnerum capitis & fracturarum historia dictum fuit, probant, ex humoribus sanis, debita copia & impetu delatis per vasa bona, osseam ipsam duram substantiam renasci posse. Quin etiam in fracturarum curatione toties observatum fuit, renatum callum, in junioribus, imprimis, attolli ultra ossis reliqui superficiem, & postea sæpe tota vita tumorem durum, & osseum, relinquere. Verum illa substantia, quæ ossa fracta unit & consolidat, & restituit perditum, primo mollis est, & sensim tantum osseam duritiem acquirit (vide §. 294.). Si ergo quacumque de causa dilatentur vascula, quæ adferunt materiam, ex qua os nutritur, & perditæ restituantur, poterit fieri augmentum molis & tumor in osse ipso. Cumque inter lamellas, quarum variis stratis ossa majora constant, talia vascula distribui admodum probabile sit (vide Commentaria §. 252.), poterit & in his interstitiis augeri ossis moles, & lamellæ à se mutuo distendi; adeoque augeri quam plurimum ossis crassities.

Prout nunc tumores hi in ossibus nati versus exteriora vel interiora protuberant, pro vario loco ossis, quem occupant, pro diversitate partium vicinarum, quæ ab his tumoribus læduntur, pro varia denique talium tumorum mole & figura, diversa mala sequi posse, & satis sæpe mirabilia, in corpore humano, docet Historia Medica.

*Ruyfchius* (a) ossis tibiæ partem, exostosi affectam, serra divisit secundum longitudinem, atque tunc invenit, exostosin cavernosam ex interna superficie ossis enatam, atque medullæ cavum angustantem. Patet facile, quanta mala fieri possint à tali exostosi, cum medulla inde comprimi & lædi debeat, adeoque metuenda sint omnia illa, quæ §. 526. enumerata fuerunt. Exostoses illæ, quæ in media & solidissima ossium majorum parte nascuntur, plerumque satis duræ sunt in tota sua mole: illæ autem quæ prope juncturas hærent, aliquando exterius tantum duræ inventæ fuerunt, & sub hac crusta mollium partium inter secedentes hic lamellas osseas hærentium, miræ degeneraciones in carnem fungosam, pus, saniem, mucum &c. fuerunt observatæ (b). Si interior cranii pars in talem tumorem attolleretur, patet evidenter à compresso encephalo epilepsiam, paralysem, apoplexiam &c. metuenda esse. Dum vero ex osse temporis emergebat exostosis, per quindecim annos sine magno malo illam toleravit miles, licet sensim aucta mole tandem melonem minorem magnitudine æquaret: Dumque in homine, post Lithotomiam in ipso factam mortuo, serra dividebatur exostosis, candore & duritie internæ suæ substantiæ ebur referebat (c). Cum autem exostoses, in externa ossium superficie natæ, periosteum incumbens lenta distractione afficiant, molestissimi & diuturni aliquando

(a) Thesaur. X. n°. 178. Tab. 2. fig. 4. & 5. II. pag. 358. 388.

(b) Petit Traité des Maladies des Os Tom. I. (c) Ibid. pag. 387.

dolores inde fiunt, omniumque acerrimi, sed citius tamen cessantes, si acutam figuram tales tumores habuerint. Vidit *Petitus* (a) ex osse tibiæ emergentem exostosin, apophysi styloideæ similem, quatuor lineis Geometricis ultra ossis superficiem prominentem, quæ acutissimos dolores in initio fecerat, sensim minutos, tandemque indolens talis tumor ossæus remansit.

Solent jam ossei hi tumores externas læsiones aliquando sequi; pariterque observantur fieri ab internis causis; & nunquam frequentius quam à Venerea Lue: in pessimo scorbuto crurum ulcera, rebellia toties ad omnia remedia, ossium cariem sæpe, aliquando & exostosin, comitem habent. Exostoses, ab externis causis ortæ, plerumque benignioris indolis esse solent, sed & difficulter curari possunt: quæ internis vero causis originem debent, debellatis his morbis, aliquando cedere solent, vel saltem plurimum minui, quod in Exostosis Venereis frequenter observatur. A levibus etiam contusionibus exostoses nasci posse constat, imprimis in illis locis, ubi ossa paucis tantum incumbentibus teguntur: unde toties tales tumores in spina ossis tibiæ observantur: cumque satis frequentibus læsionibus soleat offendi hæc pars, monuit *Petitus* (b), raro inveniri homines, qui aliquam saltem non habeant inæqualitatem in hujus ossis superficie. Quam enormes autem ossei tumores validas contusiones aliquando sequantur, patebit ex sequenti casu. Juveni sedecim annorum sexto ætatis anno sinistra manus valide contusa fuerat, integre inde curatus fuisse videbatur. Parvo tamen tempore elapso incipit manus tumere, sensimque mole augeri per decem annos continuos, atque omnium maximum tumoris augmentum observabatur ultimo biennio. Quanta vero moles fuerit partis affectæ, facile intelligitur, cum sex libras pondere suo excederet. Extirpatione facta supra carpi articulum, apparuit, pollicem & indicem illæsos fuisse, reliquorum autem digitorum phalangas in maximam molem excrevisse, & fecisse tres distinctas exostoses, quarum maxime diameter septem circiter pollices, mediæ sex, minimæ quatuor æquabat (c).

Exostoses, quæ à læsione externa factæ fuerunt, raro curantur, nisi manuum opera tolli possint; at cum plerumque benignæ satis indolis esse soleant, vix suaderi potest, ut periculosa sæpe, & semper satis difficilis, cura, tentetur, nisi mole, figura, aut situ, magna mala faciant.

Illæ vero, quæ causis internis originem debent, ablatis his, sæpe sanantur, vel plurimum saltem mole minuuntur: si vero, sanatis morbis, maneant tamen exostoses (quod in Venerea Lue quandoque observatur) incisis integumentis, ferro vel igne tolli possunt, si magnum ab his relictis malum metuatur: plurimos tamen casus vidi, ubi post curatam Luem manserunt exostoses, & quidem per plurimos annos, sola tantum deformitate partis affectæ nocentes. Quanam autem methodo commodissime tolli possint tumores illi ossei, apud modo laudatum Auctorem videri potest (d).

**ABSCESsus.** Quid hoc nomine intelligatur in partibus corporis mollibus, dictum fuit in Commentariis §. 402.; patuitque ex antedictis §. 516. ossa similes morbos pari posse. Ex plurimis etiam observatis, quorum in hoc capitulo mentio facta fuit, constitit, in cellulosa ossium parte prope juncturas, & in mediis os-

(a) Ibid. pag. 436.

(b) Ibid. pag. 435.

(c) Académ. des Sciences l'an 1720. Mem. Tom. II. pag. 518.

pag. 581. &c.

(d) Petit, Traité des Maladies des Os,

sium majorum cavis inflammationem natam transivisse in abscessum. Præterea etiam ipsa ossis proprie dicta substantia abscedere dicitur, quando una vel plures lamellæ, ex quarum adunatione ossa constituuntur, mortuæ & corruptæ a vasis vivis suppositis solvuntur & separantur; atque deinde regeneratur similis lamellis his separatis substantia; cui nova periostei textura increfcit, sicque integre restituitur illud, quod perierat. Videantur illa, quæ de hac re in Commentariis §. 252. dicta fuerunt: ubi simul notatum fuit, Hippocratem jam in capitis vulneribus notasse, quod os nudatum, vel teli vestigium in osse relictum, plerumque abscederet ab alio osse vitam & sanguinem habente. An non etiam ad abscessus ossis referri possent miræ illæ Ruychianæ observationes, de quibus §. 522. & 543. dictum fuit? Quando nempe in medio majorum ossium cavo teres fistula ossea separata à reliquo osse inveniebatur.

CARIES. Gravius omnino, & distinctum penitus ab ossium abscessu, malum. Ubi enim os abscedit, cohesionem suam adhuc retinet, & plerumque lamellæ forma separari solet. In carie vero adeo corrupta & exesa est ossis substantia, ut in pulverem faciscat. Majorem ergo longe corruptelam ossis designat, & difficiliorem curationem. Quomodo cognoscatur caries ossis, integumentis & carnibus incumbentibus testis, dicetur §. 553. Ubi vero oculis patet os affectum, vel specillo tangi potest, facile cognoscitur. Unde Celsus (a) dixit: *In carie quidem expedita cognitio est, si specillum tenue in foramina demittitur, quod magis minusve intrando, vel in summo cariem esse, vel altius descendisse, testatur.* Illo enim in loco, ubi os carie corrumpitur, nullam fere soliditatem habet, sed specillo cedit; ubi vero ad sanam ossis partem usque specillum adigitur, resistentia percipitur. Unde Celsus (b), postquam ad curationem horum malorum ossa radi jussit, addit: *Finis est, cum vel ad album os, vel ad solidum, ventum est. Albo finiri ex nigritie vitium; soliditate quadam ex carie, manifestum est.*

SPINA VENTOSA. Quæ est caries ossis pessima, quando ab interno malo corrupta medulla os erodit; videantur illa, quæ ad finem §. 526. dicta sunt.

§. 550. **H**INC novimus, cur os cariosum colorem suum tam varie mutet. ex subcæruleo candido in album pinguem, flavum, cineritium, lividum, nigrum? & quem corruptelæ gradum singuli denotent?

Ubi in Vulnerum capitis historia agebatur de illis signis, quibus cognoscitur, cranium male affectum esse (vide §. 249. §. 262.), notatum fuit, ossium sanorum in vivo homine colorem esse subrubellum, vel & subcærulescentem; primumque signum vitii ossis esse mutatum colorem, in album, flavum, fuscum, nigrum. Idem etiam in reliquis ossibus verum est, & eo major plerumque corruptelæ gradus significatur, quo magis à naturali colore in nigredinem vergant. Prima coloris mutatio est, dum os albescit, & incipientem quasi mortem in osse denotat; unde etiam, dum arte Bellostiana minimis terebris perforaretur calvaria sic affecta, primum signum felicitis curationis erat, si ossis superficies alba inciperet rubescere. Cum autem demonstratum sit in Commentariis §. 524. oleum:

(a) Lib. VIII. cap. 2. pag. 508.

(b) Ibidem.

medullosum per poros sibi mutuo incumbentium lamellarum transire ad superficiem externam ossis usque, ibique forsan venulis periosteï recipi & sanguini misceri, patet evidenter, destructa vitali in osse fabrica, oleum illud huc delatum accumulari, stagnare, & corrumpi; ideoque os pingue fiet, & flavesceat. Quod & pulcherrime notavit Celsus, dicens, ubi de ossium vitiis agit: *Id, quod vitiatum est, primo fere pingue fit, dein vel nigrum, vel cariosum &c.* (a). Aucto malo, color cinereus, lividus, tandemque niger nascitur, perfectam mortem in osse, & pessimam ejus corruptelam indicans. Successiva hæc colorum mutatio in dentibus pariter observatur, quando incipiunt corrumpi: primo enim flavescent, fulci hiant, dein nigrescunt, & carioli facti frustillatim cadunt.

§. 551. **E**X iisdem liquet, cur os cariosum inæquale, asperum, spongiosum, friabile, molle, fragile; evadat arteriæ externæ, & internæ, lamellas ossis non plus comprimunt.

Patuit ex illis, quæ quinque prioribus paragraphis hujus Capituli dicta sunt, ossa ex lamellis sibi mutuo applicatis constare, interque has vacula decurrere, quæ vitales humores, ad vitam & nutrimentum ossium requisitos, advehunt; omnium maxime in illa ossium parte, ubi majora inter has lamellas interstitia relinquuntur. Arteriolæ ergo, inter extimam ossis lamellam & proxime sequentem mediæ, in omni fere puncto, dum in diastole sunt, lamellam externam elevare nituntur. Verum per periosteum dispersæ arteriolæ, dum dilatantur, æquali, vel & majori, vi resistunt hujus lamellæ elevationi. Ubi ergo à quacumque demum causa periosteum corrumpitur, prævalebit actio arteriolarum inter lamellas osseas decurrentium, & elevabitur exterior lamella: patet autem facile, idem in omnibus lamellarum ossis interstitiis sic contingere posse. Minor forte videri posset arteriolarum harum actio, quam ut duram lamellam osseam elevare, & à subjectis separare posset: sed si consideretur, has arteriolas in omnia fere puncta talis lamellæ quater millies horæ spatio repetitis ictibus agere, forte non adeo mirum videbitur, parvam vim, toties applicatam, tales effectus facere posse. Ubi in Vulneribus capitis nudæ pericranio calvariæ superficies ab acre, pinguibus applicatis &c. male affecta fuit, harum arteriolarum vi separabatur sæpe paucis diebus squamula corrupta; uti latius in Commentariis §. 249. dictum fuit.

Apparet ergo ratio, quare arteriæ internæ, id est, inter lamellas decurrentes, has elevent extrorsum, simul ac deficit pressio arteriarum, quæ in exteriorem harum lamellarum superficiem agere poterant: Os itaque, quod corrumpitur, ob hanc causam inæqualem superficiem accipit, asperumque fit, &, ob lamellas à se mutuo sic secedentes, spongiosum & magis fragile, plurimumque de naturali sua soliditate amittit. In ossibus enim sanis omnium firmissima pars est illa, ubi lamellæ osseæ contiguæ sunt, quod in media parte ossium majorum fieri solet; & contra longe magis spongiola, mollia, & fragiliora sunt ossa circa extrema, ubi lamellæ osseæ plurimum distant à se mutuo. Friabilitas autem ossium cariosorum plurimum augetur, quia humores stagnantes, & aciores red-

(a) Ibidem.

diti, erodunt ossium substantiam; atque omnium maxime hoc fit ab oleo corrupto, uti §. 526. dictum fuit. Præterea ossium cohesio ab oleo, glutinis instar terrestribus partibus interposito, pendere videtur: fragilissima enim sunt ossa, uti antea monitum fuit, ubi igne aperto omne pingue expellitur, atque ossa talia diuturna calcinatione fragilissima reddita, si oleo iterum immergantur, firmius coherent. Dum ergo putredine attenuatum oleum perit, & acribus simul humoribus eroditur os, patet facile, quare ossa cariota penitus friabilia reddantur, sic ut à levi etiam, specilli attractu in calcem collabantur.

§. 552. **I**TEM, cur foetorem singularem rancidi lardi exhalet?

Fœtor ille adeo distinctus est, ut periti Chirurgi hoc solo prædicere audeant, ulceri cariem ossis subesse: expedit ergo cognoscere hunc foetorem, qui verbis describi nequit, verum quam proxime ad lardi corrupti & rancidi abominabilem odorem accedit. Ubi caries ossis ad medullam usque pervenit, facilis ratio hujus foetoris pateret; tamen similis percipitur, licet superficialia tantum corruptela in osse fuerit. Dictum fuit in Commentariis §. 524., oleum medullare per poros lamellarum transire, & inter lamellarum interstitia deferri, ad extimam ossis superficiem usque; licet ergo exteriores tantum lamellas caries occupaverit, oleum medullosum huc versus delatum stagnabit, corrumpetur, & pessimum hunc foetorem faciet.

§. 553. **N**E C non cur in loco ulceroso à subiecta carie caro superincumbens mollis, flaccida, fungosa, inflata, tumens; labia ulceris inversa; sanies clara, subtilis, vix glutinosa, foetida, parvis squamulis nigris referta; recrudescencia sine causa; pertinax rebellio contra medicamenta optima ad alia omnia ulcera?

Considerantur jam illa symptomata, quæ cariem ossis comitari solent, & quorum præsentia latens tale malum peritis Chirurgis sæpe demonstrat.

CUR IN LOCO ULCEROSO &c. Quando prius affecto osse, & corrupto, incumbentes partes afficiuntur, & ulcerantur, sensim sic exedi solent, & in mollem flaccidumque tumorem elavari, uti constans omnium Chirurgorum observatio est, & in spina ventosa apparet; cui inde hoc nomen datum fuisse videtur. Putredo enim ossis suppositi pessimam mephitim per vicina omnia dispergit: cumque panniculus adiposus adeo facile tumere soleat, inflatur brevi: neque tamen inflammatoria tunc duritie turget, sed mollis & laxis apparet, & attractus quasi sub digitis vacillat. Unde periti Chirurgi, dum antiqua ulcera lustrant, semper digitis explorant, an firma quidem appareant omnia in ambitu loci ulcerosi. Ossi enim corrupto non adherent partes incumbentes, neque ulla arte fieri poterit, ut accrescant, nisi prius omne corruptum separatum fuerit: Dum dentes carie afficiuntur, gingivæ secedunt, neque postea unquam ad loca hæc cariota accrescunt. Notatum fuit in Commentariis §. 549. à pessimo

§. 553.



scorbuto ossibus affectis non cohaesisse periosteum, sed in cadaveribus solum inventum fuisse. Unde etiam in vulneribus capitis cognoscebatur, calvariae os male affectum esse, ex carne circa septimam diem abscedente, dolore, natura puris tenui & graveolente, vulneris malignitate aliena (vide §. 255. n°. 8.). Forte etiam elastica materies, quæ a putredine gigni solet, tumorem incumben-  
tium partium auget.

**LABIA ULCERIS INVERSA.** Quando §. 158. agebatur de phænomenis, quæ vulnere in corpore sano & robusto contingerent, dictum fuit, labia vulneris retorqueri, ob assurgentem panniculum adiposum, cutis tegmine coercente liberum. Ob eandem causam ulceris talis labia ab inflato panniculo adiposo invertentur. Verum in vulnere labia vivo rubore perfusa apparent, in his vero ulceribus sordida, pallida, livida sæpe; & uti optime *Hippocrates* dixerat de Vulneribus Capitis cum ossis corruptela (vide §. 255. n°. 8.), carnes sale maceratas referunt.

**SANIES CLARA, SUBTILIS &c.** Quando de suppuratione agebatur §. 387. dictum fuit, *Hippocratem* & *Galenum* putredinis vocabulo usos fuisse aliquando, ut illam designarent. Optime tamen distinxerunt suppurationem à putredine proprie dicta: illam enim dixerunt fieri viscente natura; hanc autem, devicta. Unde merito conclusit *Galenus*, ut in textu ibi citato patuit, suppurationem non esse simpliciter putredinem, verum aliquid coctionis habere, & per superstitem vasorum facultatem illos humores, qui putrescerent aliter, in pus converti: addiditque idem Auctor, in ulceribus nasci liquorem magis minusve à conditionibus boni puris degenerantem, prout vi es coquentes fortiores vel debiliores essent, & materia in pus convertenda magis minusve rebellis foret. Cum ergo in ulcere carie ossis stipato pessima putredo à corrupto oleo adsit, partesque incumbentes & vicinæ flaccidæ, molles, & inflatæ sint: imo sæpe fere semigangrænosa; patet, materiam in pus convertendam maxime rebellem esse, viresque concoquentes debilissimas. Non mirum ergo loco boni puris, quod à vincente natura sit, & album, crassum, læve, æquale, & inodorum est, nasci hic saniem tenuem, & olidam, fuscam aliquando, & acrem valde. Solent plerumque corrupti ossis squamulae nigrae simul cum hac sanie exire; quod pro certissimo ossis cariosi signo merito habent Chirurgi: ob hanc causam in ulceribus diuturnis semper plumaceola & emplastra, dum renovatur apparatus, sollicitè lustrant; & si in his nigredo appareat, & fœtor (§. 552.) percipiatur, cariem ossis adesse suspicantur.

**RECRUDESCENTIA SINE CAUSA.** Nisi enim integrè prius depurari possit os affectum, manet semper mali fomes, licet ulcus coaluerit, atque ideo semper recrudesceat. Neque unquam talia ulcera bona & firma cicatrice coeunt, sed semper cicatrix mollior, elevata, & vacillans apparebit; atque sponte postea, serius occlusæ, talis locus aperietur. Ubi dentes corrupti in theca maxillari cariem fecerunt, oritur subita læpe in gingivis inflammatio, & suppuratio; aperto abscessu pus satis olidum exit, & sanatum videtur malum; post paucas tamen septimanas redire solet, nisi evulso dente, & depurato loco affecto, integra curatio fiat. Vidi sic in puero, cui post variolas tubera pure plena in variis corporis locis orta fuerant, in fronte difficillimum ulcus, quod exsiccantibus remediis sæpius sanatum videbatur, & paulo post tamen recrudescebat; do-

nec post integrum biennium tandem separaretur ossis corrupti squamula, & parcorum dierum spatio sanaretur perfectissime.

**P E R T I N A X R E B E L L I O** &c. Nullum ulcus perfecte sanari poterit, nisi prius ad conditionem puri vulneris deducatur. Quidquid enim mortui vel corrupti in ulcere hæserit, heterogeneum corpus est, quod unionem partium separatarum impediet semper, quam diu ibi hæserit. In Vulnerum historia §. 206. 207. 208. dictum fuit de varia methodo & remediis efficacissimis, quibus sordes illæ tolli possent. Doluerunt toties Chirurgi, quod diuturna etiam talium applicatione nihil profecerint in ulceribus, quæ non adeo magni momenti videbantur: invenerunt tunc fere semper, ossis cariem subesse. Monuerat hoc *Hippocrates* in Aphorismis (a) dicens: *Ulcera annua quacumque fuerint, aut longius tempus habuerint, os abscedere & cicatrices cavas fieri necesse est.* Imo aliquando adeo rebellia sunt hæc ossium mala, ut nullis omnino cedant remediis. Ubi calcis os corrumpitur, dixit *Hippocrates* (b) quod morbus ævum duret.

§. 554. **U**T &, cur caries à causa externa facile; ab interna difficulter; à lue Gallica difficilior; à spina ventosa difficillime sanetur?

Pro diversitate causæ, quæ cariem produxit, facilior vel difficilior ejusdem curatio prævidetur. Ubi enim à causa externa, contusione v. g. vel vulnere, ortum duxit, quædam tantum ossis pars sic corrupta est, sed per reliquam ossis substantiam sani humores, per vasa bona delati, valebunt separare corruptum, & perditum restituere. Unde in vulneribus capitis caries calvariæ tam pulchre & tam cito sæpe sanatur, modo in reliquis sanum corpus fuerit. Ubi autem per morbosam cacochymiam acres redditi humores, qui per ossium substantiam fluunt, illa eroderint, patet satis, difficilem curam fore, cum depurato loco carioso eadem causa sæpe supersit, quæ illam produxerat. Quo autem difficilior superari possit talis cacochymia, eo molestior erit curatio. Cum vero in Venerea lue contagium, ubi semel ossibus hæsit, difficulter admodum extricari possit, & sæpe, post magnas etiam curationes per argentum vivum vel Guajaci decocta, per plures menses silens malum æquali malignitate repulset; patet satis, difficiliorem esse sanationem cariei, quæ ab hac causa originem duxit. In spina ventosa caries ossis, uti dictum fuit §. 526. à corrupta prius medulla oritur, adeoque vix apparet, nisi tota prius ossis substantia erosa fuerit: nihil ergo vitalis sub tali carie hæret, quod corrupta separare & perditam restituere valet. Sola autem spes curæ in eo consistit, ut magna corrupti ossis pars arte tollatur; vel post menses, imo & annos elapsos, sponte à vicino osse sano separetur: hoc factum fuisse quandoque observatis Chirurgicis, antea memoratis, constitit; sed & simul apparuit, omnium difficillimam talis mali curam esse.

(a) Sect. VI. Aphor. 45. Charter. Tom. IX. | (b) De Fracturis Charter. Tom. XII. pag. 277. 200.

§. 555. **D**ENIQUE, cur in parte solidiore ossis mala; in spongiosa pejor; in juncturis pessima, prima lenta, altera velox, ultima velocissima sit; cur in pueris velox, & curatu difficilis; cur spina ventosa plerumque pluribus locis simul, vel successive?

Ex illis, quæ ad §. 516. dicta sunt, constitit, ossium majorum mediam partem densissimam esse, & minus vasculosam, ac quo magis versus extrema ossium pergitur, eo plus recedere à se mutuo lamellas osseas, & majora interstitia relinquare, quæ vasculis numerosissimis, & vesiculis oleo subtili medullosa plenis (vide §. 518.) replentur; simulque apparuit, in illa ossium parte, quæ juncturas constituit, & capsula ligamentorum articulos nectentium tegitur, cavernosam talem substantiam quam maxime adesse, & tenui tantum crusta ossea tegi, quæ in ipso etiam femoris osse unguis sæpe crassitiem vix superat. Si ergo in solidissima ossis parte caries adsit, mala quidem erit, sed tamen magna spes est, separationem carioli obtineri posse, neque tam cito firma hic maxime ossis substantia erodetur. Quando vero in parte spongiosa ossis caries nascitur, brevi destructa erit tenuis illa ossea crusta, & molles partes suppositæ corrumpentur, unde pessima putredo, & metuenda imprimis olei medullosi corruptio sequetur. Cum autem circa juncturas tenerrima sit ossium substantia, & major numerus folliculorum, pingue oleum medullosum continentium, pejora omnia sequentur: si jam simul consideretur, putridam sanie hic collectam, erosa ossis superficie, in cavum articuli delabi posse, patebit ratio, quare cariem hic natam tristissima sequantur mala, vix unquam superanda, nisi exstirpatione membri sic affecti. Mirabilis talis casus describitur à *D. Mery* (a), ex quo patet, quantum mutari possit ossium fabrica in cavernosa hac parte circa juncturas. Militi condyli ossis femoris, quibus tibiæ articulatur, in tam enormem molem expansi erant, ut omnes partes incumbentes summis cum doloribus distraherent, unde miser anxie petebat, ut exstirparetur pars. Quo facto, tumentes condyli resecti, & omnibus partibus incumbentibus nudati, undecim libras pendebant: erat autem globus osseus, sed cavus, plenus materia polyposa, & sanie flavescente & lymphida.

Ex modo dictis simul patet, quare caries lentius depascatur solidam & densam ossium partem, spongiosam citius, atque omnium citissime cavernosam illam substantiam, qua ossium majorum extrema articulata constant.

Quia autem difficillimi ossium morbi & numerosissimi occurrunt in illa horum parte, quæ plurima vascula habet, atque ideo magis ad partium mollium naturam accedit (vide §. 515.), patet ratio, quare in pueris caries ossium velox sit, & curatu difficilis. In juniori enim ætate longe major vasculorum numerus est in omnibus corporis partibus, atque sensim per ætatem plura abolentur, & expressis liquidis concrescunt (vide §. 43. n°. 4.); unde ergo & major numerus vasorum in ossibus erit in pueris, & mollior horum substantia, adeoque & facilius lædi poterunt, citiusque corrumpi. Constitit vero omnibus ob-

(a) Académ. des Sciences l'an 1706. Mem. pag. 318.

servationibus, spinam ventosam, sive cariem ossis à corrupta prius medulla per causas internas datam, nunquam fere unico tantum in loco adesse, sed plures partes, & sæpe satis distitas, simili malo affici. Vidi sic in digito indice spinam ventosam; mediam phalangam obsidentem, & post paucas septimanas in pedis tarso, & in osse jugali simile malum, quod post tardiosam moram, separata ossis corrupti parte, sanatum fuit, sed turpissimam & profundam admodum cicatricem reliquit. Unde simul patet, non facile ad extirpationem partis spinæ ventosæ affectæ pergendum esse, cum plerumque in aliis locis repullulet. Ratio autem videtur hæc esse. Spina ventosa internis causis originem debet, (vide §. 526.) & omnium frequentissime Venereæ, scorbuticæ, aut Rachiticæ cacochymicæ (vide §. 549.) quæ non ad unum tantum locum, sed ad plura sæpe deponi solet. Accedit, quod natum in quodam loco malum possit inficere humores sanos locum affectum alluentes, sicque propagari per totum corpus: quod imprimis in Lue Venerea patet, quæ sæpe, in genitalibus prima labe suscepta, deinde universum corpus depascitur.

§. 556. **Q**UI his (ab 312. ad 556.) dicta de contusione (325.) luxatione (ab 358. ad 370.), fracturisque (ab 339. ad 358.) omnium adjunxerit, tum ea, quæ de vulneribus Capitis ossa lædentibus (ab 249. ad 297.), habebit historiam, & curationem morborum præcipuorum in ossibus. Imprimis si Ἀγκύλωσης additur. Quæ immobilitas articulationis cum tumore duriori. Callo fracti ad articulum ossis, inspissato linimento Haversiano, ligamentis rigescentibus, exostosi ad juncturas, imprimis originem debet. Difficillima curatio petenda ex diversitate causæ.

Ex illis, quæ hætenus dicta fuerunt in hoc Capitulo, intelligi poterunt præcipui morbi, qui ossibus accidere observantur: imprimis si addantur his illa, quæ alia occasione de ossibus per vulnera, contusiones, luxationes, & fracturas male affectis memorata fuerunt. In contusionis enim historia §. 325. enumerata fuerunt illa mala, quæ ossium contusiones sequi solent. In Capitulis de fracturis & luxatis plurima etiam habentur, quæ ossium morbos spectant. Ubi autem de Vulnerum Capitis historia agebatur, demonstratum fuit, etiam à levissimis vulneribus calvariam osseam aliquando affici pessime: atque ibidem pulcherrima habentur circa cognitionem & curam morborum in ossibus. Operæ pretium tamen videtur, adhuc quædam addere de ancylosi, cum sæpius ab ossium vitiis oriatur, quamvis & absque his fieri possit; dum nempe ligamenta articulorum rigescunt, vel inspissatur & accumulatur linimentum illud, quod lubricat & inungit ossium articulorum extrema, & ligamenta articulationes firmantia.

In Commentariis §. 364. (ubi de ancylosi agebatur, quatenus luxationem ut causam sequi observatur) notatum fuit ex *Celfo*, recenti cicatrice contractos articulos ἄγκυλως Græcis vocari; *Æginetam* vero articulorum detentiones appellasse ἄγκυλως & ἀγκύλωσις; harumque causas agnovisse, humorum infarctum, aut nervorum contractionem. Patebit statim, & ab ossium vitiis hoc malum

SSSSS ii]

nasci posse : Aptā definitio hujus morbi videtur, quod sit **IMMOBILITAS ARTICULATIONIS CUM TUMORE DURIORI**. Quando ab ossium fracturorum callo exorbitante, aut exostosi ad juncturas nascitur hoc malum, satis patet, durum tumorem adesse. Verum ubi à ligamentis rigescentibus, aut inspissato linimento Haversiano oritur, sensim debet in cavo articuli accumulari linimentum illud, cum quiescente articulo non consumatur; adeoque distendet capsulam articulare, & tumorem faciet, qui, dissipatis tenuioribus partibus aggesti humoris, satis durus fieri poterit. Adeoque ob has rationes articulorum immobilitatem tumor durior comitari solet, vel saltem sequi, si in initio mali nondum adfuerit. Unicus tamen excipi posset casus, qualem vidi, ubi vero marasmo exsiccabatur totum brachium, tuncque, arefactis omnibus, articulorum hujus membri immobilitas erat absque tumore. Ut autem debita mobilitas articulis adsit, requiritur apta figura ossium articulatorum, & lubricitas superficiesum, quibus se mutuo tangunt, atque etiam ligamentorum, articulos ambientium, flexilitas debita. Adeoque ancylosis oritur à sequentibus causis:

**CALLO FRAC TI AD ARTICULUM OSSIS.** Dictum fuit in Commentariis §. 343. post fracturas aliquando sequi luxuriam vasculorum osseorum, & calli inæqualitatem, unde figura naturalis ossium deturpatur. Plurimisque in casibus constitit, deformem talem prominentiam ab exorbitante callo in loco fracturæ mansisse tota vita. Si ergo fractura prope articulum fuerit, patet à tali vitio immobilitatem articulorum nasci posse, ob mutatam ossium figuram. Verum quidem est, in plerisque articulis ossium articulatorum extrema tuto recondi, plurimis partibus incumbentibus tecta, adeoque difficulter posse frangi in illa parte, quæ articuli cavo continetur: tamen in locis quibusdam satis nuda ossa hærent, uti v. g. circa cubitum & genu, atque ibi ab hac causa ancylosis nasci posset. Vidit sic *Petitus* (a), fracta rotula luxuriantem callum fecisse ancylosim; curatam tamen postea, quia calli substantia nondum acquisiverat osseam duritiem. Ubi in tali casu metuitur ancylosis, periti Chirurgi voluerunt, sic disponi debere partem affectam, ut callus luxurians proprio pondere versus alium determinetur locum: deinde ut inter articulum & fracturæ locum splenia ponantur, quæ fascia circumducta leviter pressa impedian, ne callus versus articulum tendat: tandem ut articulus leniter moveatur, simulac primus apparatus tollitur, atque postea omni biduo, deinde singulis diebus. Neque adeo magnum erit periculum, modo prudenter fiat articuli motus, ne ossa restituta situ suo moveantur; quia ossa circa articulos latiora cum sint, majori superficie fragmenta se mutuo tangent, adeoque non tam facile loco suo movebuntur. Solo tali articuli motu natam jam ancylosin ab hac causa superavit modo laudatus Auctor. (b).

**INSPISSATO LINIMENTO HAVERSIANO.** Ut ossium articulatorum extrema facillime moveri possent, neque ad se mutuo attrita læderentur, linimento lubricissimo inunguntur, quod *Haversianum* vulgo vocari solet, quia egregius ille Vir, qui tot pulchra circa ossium fabricam debentur, primus hujus linimenti naturam, & partes, quibus conficitur, accurate descripsit:

(a) *Traité des Maladies des Os* Tom. I. | (b) *Ibidem.*  
pag. 327.



apud *Hippocratem* tamen jam habetur (vide *Commentaria* §. 362.) quod omnibus articulis mucus natura insit, & sani sint articuli, cum ille purus fuerit. Linimentum illud articulorum (vide §. 302.) ex triplici distincto liquido constat; universali nempe perspirante, oleo meduloso, & mucilagine ex folliculis hic locatis secreta. Si ergo a quacunque causa illud linimentum non dissipatur, vel resorbetur, sensim accumulabitur, & cavum articuli replebit; sicque impediet liberum ossium articulatorum motum: interim tenuissima pars linimenti illius aggesti dissolabitur, & residuum spissius fiet: cumque articuli motus præcipua causa sit, qua dissipatur illud linimentum utibus suis functum, illo jam impedito vel & penitus abolito, major accumulatio fiet, tandemque immedicabile malum nascetur, partim ab inspissata materia, partim ab acrimonia stagnando nata, qua politissimas ossium superficies cartilagineas, & ligamenta articulum coërcentia, erodere & corrumpere valebit.

Cognoscitur hoc malum tumore in initio molli, sensim aucto, articulationis locum occupante, neque ultra hujus limites exprorecto. Omnium autem frequentissime in articulo genu hic morbus observatur.

Dixerat *Hippocrates* (a) *Tumores in articulis, & absque ulcere dolores frigida multa affusa levat & minuit*: Postea etiam celebres in arte Viri hanc methodum laudaverunt. Forte incipiente malo prodesse posset, contractis subito frigore partibus, sicque repellentibus humorem, qui incipit accumulari, modo adhuc tenuis fuerit. Ubi vero major spissitudo jam adest, & aucta copia, parum inde sperari posse videtur. Frictiones sæpe repetitæ, articuli affecti motus, fomenta penetrabilissima ex vino, sale, aceto & urina sana, additis aromaticis herbis, marrubio, scordio, ruta &c. cataplasmata ex similibus parata, proderunt. In difficillimis etiam casibus embrochæ ex aquis mineralibus calidis, lento stillicidio ex alto in partem affectam delapsis, multum levaminis, imo & integram aliquando curationem, attulerunt. Aquarum mineralium defectus suppleri poterit penetrabilissimis fomentis, modo laudatis, embrochæ instar adhibitis. Pulcherrimos effectus vidit *Petrus* (b), dum aqua calcis vivæ, una cum salis ammoniaci lixivio, ex alto in locum affectum depluerent: nascitur enim sic uno momento penetrabilissimus spiritus salis ammoniaci, qui attenuans summum remedium merito habetur. Ubi autem tanta copia aggestæ materiæ est, ut per omnia hæc artis molimina dissipari nequeat, lanceola pertundendum tumorem usque in cavum articuli voluit modo laudatus Auctor, in loco maxime declivi, ut contento liquido exitus concilietur: deinde hoc facto, ante laudata remedia applicari jussit.

**LIGAMENTIS RIGESCENTIBUS.** Ut debitus fieri possit ossium articulatorum motus, requiritur, ut ligamenta articulum coërcentia talem habeant firmitatem, qua in situ suo ossa retineantur, interimque cedere possint & elongari, dum flectuntur articuli. Ubi ergo a quacunque causa ligamenta obrigueant, licet omnia reliqua in articulo se naturaliter habeant, erit immobilitas, quam postea sequetur tumor, ob linimentum *Haversianum* in cavo articuli aggestum, neque motu dissipatum, ut in sanitate fieri solet: adeoque perfecta erit ancylosis. Causæ hujus mali poterunt esse omnes illæ, quæ fibris solidis nimiam

(a) Aphor. 25. Sect. V. Charter. Tom. IX. pag. 210.

(b) *Traité des Maladies des Os* Tom. I. pag. 406.

rigiditatem conciliant (vide §. 32.), uti & istæ, quæ in vasis minoribus & majoribus corporis similem effectum præstant (vide §. 51.). Sic videmus, senes decrepitos in omnibus fere articulis obrigescere, partim quidem ob defectum pinguis olei articulos lubricantis, partim etiam ob ligamenta callosa, imo & ossæ aliquando facta: & in illis hominibus, qui duro labore victum comparare debent, sæpe ante ætatem senectutis hæc vitia observantur, dum nimis exercitato musculari motu firmæ partes corporis indurantur (vide §. 51. n°. 3.). Post validas ligamentorum inflammationes, non bene curatas, liquido stagnante & coagulato cum vasis, quibus continetur, concrecente (vide §. 51. n°. 4.), idem malum sequi solet; unde sæpius arthritidem passis articularum immobilitas tories accidit. Præterea demonstratum fuit (§. 25. n°. 3.), nimiam distractionem partium solidarum corporis illas reddere nimis debiles, & debilitatem ab hac causa natam sanari omni modo, quo nimia distractio tollitur (vide §. 28. n°. 5.). Ubi ergo ligamenta, quiescentibus articulis, non elongantur, sponte solent contrahi & rigida fieri adeo, ut postea omnem motum articuli impédiant. Post fracturas aut luxationes curatas, nisi curæ tempore aliquando moveantur articuli, ancylosis ab hac causa frequenter nascitur, uti etiam in paralyticis membris; tuncque fere semper, muscoli flexores cum fortiores solent esse extensoribus membrorum, articuli leviter inflexi obrigescunt, non tantum ob ligamenta indurata, verum etiam ob musculos flexores diuturna quiete sensim contractos & breviores redditos, qui tunc se elongari amplius vix patiuntur.

Patet ergo, ligamentorum nimiam rigiditatem omnium frequentissimam esse ancylosis causam; sed & simul, plerumque magnam spem superesse, curari posse tale malum, nisi admodum vetustum fuerit, vel originem debeat talibus causis, quæ nulla arte superari possunt; uti v. g. in decrepita senectute. Si mollissimus victus instituat; balneis aquosis, & imprimis vaporis, sæpius de die exponatur pars affecta; deinde bene deterfa mollissimis oleis perfricetur; atque his factis tentetur articuli motus flectendo & extendendo, quantum absque magno dolore fieri poterit; curantur tales morbi, de quibus aliquando desperabatur. De omnibus autem his (§. 30. 35. 51.) latius dictum fuit. Unicuique libet adducere casum, qui modo dicta confirmet. Juveni post febrim acutam continuam, & affectum soporosum, reconvalescenti, dextrum crus inflexum erat, neque ullo modo illud extendere poterat: aderant circa genu articulum dolores molestissimi, unde totus membri usus fere perierat; cum nec ligneo crure uti posset, neque baculis nixus incedere, pendulo crure tunc suo pondere distrahente rigidum articulum summo cum dolore. Celebres Chirurgi, postquam jam ultra anni spatium duraverat malum, consulti crediderunt, ossa ipsa tibiæ & femoris simul consolidata esse, & post plurima remedia diu applicata nullo cum solamine, concluderunt nihil superesse, nisi partis exstirpationem, quam æger tot malorum pertæsus subire voluit. Expertissimus Medicus vocatus, ut rite præpararet idoneis remediis corpus ante periculosam hanc operationem, dum sollicitè partem examinat, invenit condylum internum ossis femoris mole parum auctum, uti etiam & respondentem huic ossis tibiæ partem: neque tamen pressa digitis hæc loca dolebant, sed præcipuus dolor erat in illo loco, ubi ligamentum est, quo patella tibiæ affigitur. Dum nititur extendere inflexum crus valida satis manuum vi, sensit Medicus, non coaluisse ossa inter se, sed tamen levem etiam extensionem.

extensionem non absque ingenti dolore fieri posse : simul apparuit , tendines musculorum flectentium quam maxime tensos esse , & versus suam originem retractos. Omnibus ergo rite perpensis , dissuasit exstirpationem Medicus , & tentavit curam , generalibus remediis quibusdam præmissis , balneis aquæ calidæ cum aromatibus additis bis de die per horam , vel horam cum dimidia , sic ut toto corpore æger balneo immergeretur. Tam felix autem fuit curæ hujus successus , ut , quatuor tantum vicibus adhibito balneo , crus inciperet extendi , & post octavum balneum jam terram attingeret , fulcrisque innixus incedere posset ; tandemque oleorum mollissimorum inunctione , repetitisque balneis , integre restitutus fuit æger ; superstitæ tantum ossium modo memorata intumescencia , sed absque ullo motus articuli impedimento , nisi quod post nimis diuturnam ambulationem aliquando levem dolorem in hoc crure senterit (a). Similis fere curatio ancylois apud *Æginetam* (b) habetur : irrorari enim partem affectam voluit hydrelæo , in quo lini semen , althæa , sænum græcum &c. decocta fuerunt ; deinde inungi linimentis partim ex emollientibus , partim ex aromatibus compositis , similibusve emplastris regi : simul laudavit mollem & continuam frictionem , dum hæc adhibentur ; jussitque sæpius tentari debere , an articulus possit flecti & extendi.

**EXOSTOSI AD JUNCTURAS.** Cum requiratur ad motum articuli determinata figura in extremis ossium articulatorum , facile patet , per exostosin mutata hac figura , motum debere impediri. Quando de exostosi in præcedentibus actum fuit , constitit , tales tumores etiam circa juncturas observatos fuisse. Huc referri posse videtur , quando ossa articulata concresecunt , sive interposito linimento naturali articulorum inspissato uniantur , sive scabræ forte & erosæ ossium contiguum superficies consolidentur inter se. Notabiles tales casus in Historia Medica habentur : Sic scribit *Hildanus* (c) , quod inter rariora servaret in cœmiteriis collecta ossa quædam , in quibus mira concretio ossium articulatorum observabatur , & figuris expressit cubiti ossa cum osse humeri penitus concreta , & os femoris cum acetabulo ossis ilei sic unitum , ac si semper unicum & continuum os fuisset. In infante viginti duos menses nato totum corpus unico osse continuo constare videbatur , sic ut nullus articulus ullo modo flecti posset (d). *Columbus* (e) in capite Gigantis vidit , maxillam inferiorem adeo calvariæ concretam fuisse , ut in vivente omni motu carere debuerit : primam pariter vertebra occipitio sic accretam vidit , ut moveri neutiquam posset. Omnium autem mirabilissimum est , quod idem Auctor habet. Romæ in Xenodochio incurabilium diu vixerat homo , qui omnes articulos rigidos habebat , & nihil aliud movebat , quam oculos , linguam , penem , abdomen , thoracem : Senem jam viderat , & sæpe inviserat celebris Medicus *Joannes Auricula* , qui & post mortem sceleton hujus hominis *Columbo* dono dedit , in quo omnes articuli totius corporis , à capite ad pedum digitos usque , concreti inveniebantur : bini dentes superiores decrant , totidemque inferiores è priorem regione positi , & per hanc viam cibus potusque ingerebatur misero , quam diu viveret.

Difficilem semper curam esse ancylois , satis patet ex ante dictis : pro diversitate

(a) Academ. des Sciences l'an 1781. Mem. pag. 283. &c.

(b) Lib. IV. cap. 55. pag. 70. versâ & 71.

(c) De Ichore & Meliceria cap. 25. p. 382.

(d) Academ. des Sciences l'an 1716. Hist. pag. 30.

(e) De Re Anatomica lib. XV. pag. 263.

tamen causæ cognitæ prognosis variat. Si enim facta fuerit ab ossis fracti circa articulum callo, & ille jam osseam duritiem habuerit, incurabile malum est: uti etiam, si ab exostosi vel concretionem ossium articularum inter se originem duxerit. Ubi vero à linimento Haversiano inspissato, vel à ligamenti rigescentibus nata fuerit ancylosis, nisi inveteratum fuerit malum, curæ spes superest.

§. 557. **Q**UI vero omnes Morbos, hucusque descriptos, oculisque subjectos intellexit ita, ut horum enarratas causas, naturam, effectus, curationem cum cura expenderit; dein autem internis testisque corporis partibus eadem omnia applicuerit; cum actione integrarum comparaverit; atque deinde cum ipsis internorum Morborum phænomenis composuerit; videbit interna externis reapse congruere; externos chirurgicos primo pertractandos; nec aliter ordinati quid, vel veri, in Praxi Medica fieri posse, aut doceri.

Pertractatis sic morbis Chirurgicis, antequam ad Morborum internorum historiam & curationem procedatur, operæ pretium erit, paucis demonstrare, quantum lucem cognitio Morborum externorum affundat detegendis & curandis morbis internis; simulque patebit evidens ratio; quare prius de Morbis externis agendum fuerit.

In Prolegomenis §. 16. datæ fuerunt regulæ, quibus determinatur ordo, quo Morborum historia optime tradi posset; nempe, ut incipiatur à talibus morbis, qui & evidentius cognosci, & facilius curari poterant, quorumque natura simplicior erat, & cognita requirebatur, antequam aliorum morborum indoles bene intelligi posset. Cum autem in externis partibus corporis hærentes morbi sensibus pateant, adeoque cognosci distinctius possint, & facilius ipsi loco affecto remedia applicari; simulque his similes morbi in partibus internis occurrant, quorum phænomena omnia & successivæ mutationes sensibus non adeo obvia sunt; patet evidenter ex dictis, externorum Morborum historiam præmittendam fuisse. Quanta autem similitudo sit inter morbos externos & internos, unico exemplo demonstrare non inutile videtur.

Si vera Phlegmone digitum occupaverit; tumor ruber, renitens, cum dolore punctorio & calore apparebit in parte affecta; sicque alicujus momenti fuerit, inflammatio, illam comitabitur febris: atque ex his symptomatibus concluditur, adesse inflammationem. Si jam in homine sanissimo, æstuante post validos motus, gelidus Boreas nudum pectus afflaverit, orietur in locis intercostalibus sæpe subito dolor acutissimus, ad minimum inspirationis nixum immantius auctus, quem febris comitatur satis valida. Quæritur jam qualis morbus sit, & quænam hic medela conveniat? Novimus in hoc casu tales causas prægressas esse, à quibus vera phlegmone frequenter nasci solet: demonstratum enim fuit §. 117., calore & motu circulari violento adunari moleculas nostrorum fluidorum; & §. 118. dictum fuit, per motum auctum errore loci crassiora liquida ingredi posse canalium conicorum dilatata orificia, per quorum ultimos fines transire nequeunt; simulque ibidem notatum fuit, omnium pessimas obstructions produci, si magno calori subitum frigus succedens constrin-

gat dilatata vasa, alienis jam humoribus infarcta per errorem loci: ex quibus omnibus constat, concurrere hic præcipuas causas obstructionis. Verum §. 375. patuit, obstructionum causas sufficere ad veram phlegmonem producendam; & ex illis, quæ §. 373. 374. dicta fuerunt, constitit, totum fere corpus sedem inflammationi dare posse; atque omnium frequentissime illam in adipe hære. Cum ergo causæ inflammationis prægressæ fuerint, locusque affectus inflammationi suscipiendæ aptus sit, concluditur merito, dolorem illum acutum, ad minimam inspirationem actum, cum febre comite, esse veram inflammationem locorum intercostalium. Tumor quidem & rubor, qui in digito inflammato sensibus patebant, hic non apparent semper, quia profundius hæret recondita Phlegmone; sed dolor ille punctorius, ac si gladio acutissimo perfoderetur pectus, dum thorax inspirando dilatatur, & febris, satis evincunt naturam mali: nam & digitus inflammatus, dum movetur, vel rudius attingitur, dolet acerrime. Si jam consideretur natura & actio partis affectæ, patebit evidenter, ex illis phænomenis, quæ in inflammatione partis externæ sensibus patent, intelligi posse omnia mala, quæ inflammationem in locis intercostalibus natam sequuntur. Tumor enim & hic erit à distentis arteriis inflammatis, plurimum auctus, dum panniculi adiposi (in saginatis animalibus in locis intercostalibus adeo conspicui) vasa tenerima & vesiculæ sanguine crasso, liquidiori parte orbaro, infarciuntur (vide §. 381.): à distractis fibris nervosis, per vasorum distentorum membranas dispersis, dolor sequetur; & acerbissimus hic loci, si tumor versus interiora protuberans pleuram membranam lente à costis, quibus adhæret, divellat: cumque inspirando pectus dilatetur, & costæ à se invicem recedant, patet ratio, quare inspiratione adeo augeatur dolor. Ut autem intollerabilem hunc dolorem vitent ægri, vel leniant saltem, vix inspirant, aut saltem minimam tantum copiam aeris hauriunt; unde non satis dilatatur pulmo, adeoque cordi dextro nascitur obstaculum, summa fit anxietas, pulmo sanguine repletur, & peripneumonia, à pleuritide nata, sæpe brevi suffocatur.

Præterea & exitus omnino similes in hoc casu sequuntur, ac in aliis inflammationibus externarum partium corporis; resolutio nempe, suppuratio, vel gangræna. Mitio rem enim pleuritidem resolvendo curari posse; pejorem in abscessum tendere, sævissimam livida macula, in loco affecto subito sæpe nata, gangrænam facere, omni dolore evanescente absque correctione causæ, observata certissima & frequentissima testantur; uti postea in Pleuritidis historia latius dicitur. Verum & curatio eadem omnino est in pleuritide ac in aliarum partium inflammationibus. Resolutio enim hic semper tentatur, venæ sectione, diluentibus, attenuantibus remediis; fomentis, cataplasmatibus, Emplastris &c. loco affecto applicatis; & in genere omnia illa adhibentur, quæ à §. 395. ad §. 402. de cura inflammationis dicta fuerunt. Ubi vero resolutio obtineri nequit, blanda suppuratio promovetur omnibus illis, quæ §. 402. & sequentibus exposita fuerunt; imprimis curando omni artis molimine, ut abscessus hic natus versus exteriora vergat, quia tantus metus est, ne introsum rupto abscessu funestum Empyema fiat, pure in pectoris cavum delapso. Ubi autem Pleuritide Gangræna, fere semper lethalis, succedit, sola spes superest ab illis remediis, quæ



§. 434. & sequentibus laudata fuerunt; uti patebit, si conferantur his illa, quæ postea §. 903. de cura gangrænosæ Pleuritidis dicentur.

Idem jam de Angina inflammatoria, Phrenitide, Peripneumonia & reliquis Morbis inflammatoriis partium internarum corporis demonstrari posset; sola tantum diversitas horum morborum à varia functione partium affectarum pendet; reliqua omnia conveniunt. Adeoque merito pro axioma haberi poterit, internos morbos externis congruere, atque nihil ordinati vel veri in Praxi Medica fieri posse, vel doceri, nisi externorum Chirurgicorum Morborum historia prius pertractata fuerit, antequam de internis morbis agatur.

## FINIS TOMI PRIMÆ.

BIBLIOTECA NAZ.  
ROMA  
VITTORIO EMANUELE









